


# Ka:dle Yu



Genesis, Exodus, Jonah, and the New Testament in the Kamula  
language of Papua New Guinea

## **Ka:dle Yu**

### **Genesis, Exodus, Jonah, and the New Testament in the Kamula language of Papua New Guinea Buk Stat, Kisim Bek, Jona, na Nupela Testamen long tokples Kamula long Niugini**

Copyright © 2005 The Bible Society of Papua New Guinea

Language: Kamula

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2012-01-20

---

PDF generated using Haiola and XeLaTeX on 22 Feb 2024 from source files dated 31 Aug 2023

74ad7974-9dcd-5470-9c22-0eda5fbabe15

## Contents

FRT . . . . .	1
Yeneses . . . . .	3
Ekesedes . . . . .	78
Yona . . . . .	113
Ma:tiyu . . . . .	116
Maka . . . . .	177
Luk . . . . .	215
Yon . . . . .	278
Taiya dle so . . . . .	325
Loum . . . . .	381
1 Kolin . . . . .	409
2 Kolin . . . . .	435
Galasiya . . . . .	452
Epeses . . . . .	462
Pilipi . . . . .	471
Kolosi . . . . .	477
1 Tesalonika . . . . .	483
2 Tesalonika . . . . .	488
1 Timoti . . . . .	491
2 Timoti . . . . .	499
Taites . . . . .	505
Palimon . . . . .	509
Hibulu . . . . .	511
Yeims . . . . .	531
1 Pita . . . . .	538
2 Pita . . . . .	546
1 Yon . . . . .	551
2 Yon . . . . .	558
3 Yon . . . . .	559
Yuda . . . . .	561
Bobotimatimale . . . . .	564

# Ka:dle Yu

## Genesis, Exodus, Jonah, and the New Testament in the Kamula language of Papua New Guinea

### Buk Stat, Kiskm Bek, Jona, na Nupela Testamen long tokples Kamula long Niugini

#### *Ka:dle Yu*

Genesis, Exodus, Jonah, and the New Testament in the Kamula language of Papua New  
Guinea  
[xla]

Translation by Wycliffe Bible Translators

© 2005, The Bible Society of Papua New Guinea

Print publication, 2005 by The Bible Society of Papua New Guinea

Web version  
2014, Wycliffe Bible Translators, Inc.  
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons  
license (Attribution-Noncommercial-No Derivative Works).  
<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following  
conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

## **Table of Contents**

## Yeneses Yeneses buka ya: dulu koko

Mosesta 40 sokomoko dulu dla Isalael so eleme dalupa dulu dla sela:mama Yeneses buka iye ilimuwapo.

Yeneses hi i ya: dulu kokoye kotiyamale sitali demama apopo. Yeneses buka itapo Godtapo ta:lamo pato mate epo alisisi hapuloma mate mimita:pele kokoye esemapo. Epame buka itapo batalimaleta kotiyamale ma esemapo. Epame Godta sale Isalael so opata kotiyamale ma esemapo.

Sapta 1-11tapo Godta mita:pele oplami A:dam mate epo Ib mateta batalimale kotiyamale kokoye esemapo. Epame Nowa mate epo yúta opa poyuli koko mate esemapo. Epame Godtapo opata yu hatlo mate ha:ha:lali opaye ta:lamo pato dla hutukuliyapo melepame yu ma meyelo meyelo depo hapili koko ma esemapo.

Sapta 12-26tapo Godta ka:yapa A:iblaham tatile sepame ya: mamadulota God ya: opa ikadepe depo ha:ha:lowe koko atlaleye esemapo. Epame yami Aisek koko mape esemapo.

Sapta 27-36tapo Aisek yami Yokob kokoye esemama Godta ya: watle Isalael hi hamili ma esemapo.

Sapta 37-50tapo Yokob yami Yosep mate epo Isalael sotapo Isip mo dla tale koko ma esemapo.

Epame wua: ma buka i sesa:mama God hi ipo himili halla natilipiye, GOD, eye God hi ikadepe semama YHWH demama apopo.

### *Ta:lamo kotiyamale sitali*

<sup>1</sup> Kotiyamale sitali dla Godtapo ta:lamo mate pepele di mate mimita:piyo. <sup>2</sup> Epame oloma edla ta:lamota ala ya: mila:pi pohimilalo halemama koko pa:le halaiyo. Epalati kaula patoye amtuwaleta bodepo ellati God ya: Sokota yú di dla sela:iyo. <sup>3</sup> Epalati Godta epo atlaiyo, “Hela:dleye hallepe,” diyo. Epalati hela:dleta ma-halaiyo. ✧ <sup>4</sup> Epame Godta natili dla hela:dleta ka:pi halaiyo. Epalati ya:tapo amtuwale mate hela:dle mate duka gladepe amtuwale ma meyelo himi epo hela:dle ma meyelo himi diyo. <sup>5</sup> Epame Godtapo hela:dleye semama alila diyo, epame amtuwaleye semama utula:la diyo. Epo itapu alilata ma-tlati ma alila amko haleta ma-alaliyo.

<sup>6-8</sup> Epame Godta epo atlaiyo, “Yú duka glادلalo alisisita hallepe,” diyo. Epalati yú duka glادلalo alisisita ma-halaiyo. Epalati Godtapo yú duka glادلalo alisisi iye semama omapla diyo. Epedeme Godtapo yú duka glademama yú semeye omapla di dla hetlati asiyama semeye ta:lamo dla pomeliyo. Epame namba 2 alilata ma-tlati ma alila amko haleta ma-alaliyo. ✧

<sup>9</sup> Epame Godta ma epo atlaiyo, “Ta:la sekelleta woyamama ta:la ma meyelo hallepe, epalati yú ma meyelo hallepe,” diyo. Epalati koko eta ma-halaiyo. <sup>10</sup> Epalati Godtapo ta:la sekelle semama ta:lamo diyo. Epame yú hatlo alupo pamelleye semama kaula diyo. Epame Godta koko e natipame ka:pi diyo. <sup>11</sup> Epedeme Godta ma epo atlaiyo, “Ta:lamo dla alisisi hapuloma mila:pi meyelo meyelo dletapo matelepe,” diyo. <sup>12</sup> Epalati alisisi mila:pi meyelo meyelo dletapo mataiyo. Epame Godta ya:ta mimita:pele alisisi i tlapame ka:pi diyo. <sup>13</sup> Epame namba 3 alilata ma-tlati ma alila amko haleta ma-alaliyo.

<sup>14</sup> Epame Godta ma epo atlaiyo, “Omapla di dla hela:dlalo alisisita ha:ha:lepe. Yia:tapo alila mate epo utula:la mate duka glادلalo ha:ha:lepe. Epame yia:tapo alilata pololemata mate epo sokomokota pololemata mate imalalo ha:ha:lepe,” diyo. <sup>15</sup> “Epalati

---

✧ 1:3: 2Kol 4:6 ✧ 1:6-8: 2Pita 3:5

hela:dle hapilalo alisisi ewolotapo omapla di dla popa:mama ta:lamo hema hela:dle hapimha:ha:lepe,” diyo. Epalati koko eta mo-woyamaiyo. <sup>16</sup> Epedeme Godtapo hela:dle alisisi patoto dapiyamte mimita:pmama sikemte itiyamale mate hela:dlalo alisisiye alila dla hela:demhallepo depame himiyo. Epame pase sikemte itiyamale mate hela:dlalo alisisiye utula:la dla hela:demhallepo depame himiyo. Ya: ma epame tamili mimita:piyo. <sup>17</sup> Godtapo alisisi hapuloma iye omapla di dla ipila:iyo, yia:tapo ta:lamoye hela:dle hapimha:ha:lepo depame. <sup>18</sup> Epame yia:tapo alila mate epo utula:la mate omha:ha:mama amtuwale mate hela:dle mate duka glademha:ha:lepo depame. Epame Godta koko e natipame ka:pi diyo. <sup>19</sup> Epame namba 4 alilata ma-tlati ma alila amko haleta ma-alaliyo.

<sup>20</sup> Epalati Godta ma epo atlaiyo, “Yú dulu dla pasakalo siyamalalo alisisitapo pasatlepe. Epame teatapo di haliyamale hema hoholiyemsiyamelepe,” diyo. <sup>21</sup> Epame Godtapo amalo hapuloma mate epo alinepi opi patoto yú dulu dla ha:ha:lalo hapuloma mate epo tea hapuloma mate mimita:piyo. Epame Godta koko e natipame ka:pi diyo. <sup>22</sup> Epame yia: watle epo atlaiyo, “Wua: yú dulu dla yimlala usulumha:ha:mama kaula patoye pasatlepe. Epalati ta:lamo di hema teatapo yimlala usulumha:ha:mama teata pasatlepe,” diyo. <sup>23</sup> Epame namba 5 alilata ma-tlati ma alila amko haleta ma-alaliyo.

<sup>24</sup> Epame Godta ma epo atlaiyo, “Ta:lamo hema alinepi mila:pi meyelo pe meyelo pe dle halo mate epo yowo mateta pasatlepe. Epame ilama mape pasatlepe,” diyo. Epalati koko eta ma-halaliyo. <sup>25</sup> Epame Godtapo alinepi hapuloma mimita:pame ma alinepi e tlapame ka:pi diyo.

<sup>26</sup> Epame Godta ma epo atlaiyo, “Di matle oplami di mila:pi sepele mita:plowa, ya:tapo amalo hapuloma mate epo tea hapuloma mate epo alinepi hapuloma halo mate epo yowo mate omhallepo depame,” diyo. ✧ <sup>27</sup> Epame Godtapo oplami ya: mila:pi sepeleye mita:pmama oplami mate a:ya mate mimita:piyo. ✧ ✧

<sup>28</sup> Godta yia: watle epo atlaiyo, “Wua: yimlala isukumama ta:lamoye pasatlepe. Epame wua:tapo ta:lamo omha:ha:mama amalo mate epo tea mate epo alinepi hapuloma mate omha:ha:lepe. <sup>29</sup> Na:tapo wua:ta dlowe alisisi opi ta:la dulu dla milimalalo mate epo dali di dla dlomoko mila:pi meyelo pe meyelo pe dle mate ma-hapiwapo, wua:tapo demha:ha:lepo depame. <sup>30</sup> Amasiyama alinepi hapuloma mate epo tea hapuloma mate dla na:tapo yia:ta dlowe alisisi osamokolo mate epo dali upa mate ma-hapiwapo,” diyo. Epalati koko eta me-elaiyo.

<sup>31</sup> Godtapo ya:ta mimita:pele alisisi hapuloma i tlapame pta ka:pi diyo. Epame namba 6 alilata ma-tlati ma alila amko haleta ma-alaliyo.

## 2

<sup>1</sup> Ta:lamo mate epo pepele di mate epo alisisi hapuloma dulu edla ha:ha:lalo mate mimita:mhalaleye medla puame gudiyo. <sup>2</sup> Epame alila 7 umuluwedeme hallati Godtapo ya: oko hapulomaye mo-pokadiyo. Epame namba 7 alila dla ya:tapo hedepo polaiyo. ✧ ✧ <sup>3</sup> Ya:tapo hedepo polomama namba 7 alila eye aiyalma diyo. Adipalati, ya:tapo alisisi hapuloma mimita:mhalale okota gudlati alila hema hedepo polaiyo.

### *Iden osalo*

<sup>4-5</sup> Epedeme ta:lamo pato mate epo pepele di mateye ipo mimita:piyo. Lod GODtapo ta:lamo pato mita:pele oloma edla alisisi haletapo ta:lamo edla ala pomatlalo halaiyo. Adipalati, Lod GODtapo tiyota hellowe kokoye yipta pohimiyo. Epame ta:la muwalepame alisisi emalalo oplamiye ala pohalaliyo. <sup>6</sup> Amasiyama matale yútapo ta:la dulu tle matame ta:la dla delikiyele hamimdiyo. <sup>7</sup> Epalati oloma edla Lod GODta ta:la

polapo oplami mita:piyo. Epame pasakalo halemhala hedleye ya: mu opokoko dla hamilati oplamitapo pasakalo hallowe kotiyamaiyo. ✧

<sup>8</sup> Epame Lod GODta Iden mo dla osalo himpame edla ya:ta mita:pele oplamiye pameliyo. Osalo eye salita matlalo tiyama dla halaiyo. <sup>9</sup> Epame ya:tapo dali ka:ka:dleta osalo edla matamama dlomoko dlalo milimilipe diyo. Amasiyama osalo duka edla pasakalo hamilalo dlomoko dali ma halaiyo. Epalati dlomoko dali haleye ka:dle malamale hamilalo mate epo batalimale malamale hamilalo mate ma me-halaiyo. ✧

<sup>10</sup> Epalati alomata Iden mo dulu tle yemama osalo dulu dla emale alisisita woloma ka:pi matlepo depame ta:la dla delikiyele hamimdiyo. Epame aloma ita ma Iden mo tla:myemama ma aloma dapiyamte dapiyamte dle tatlamaiyo. <sup>11</sup> Ka:yapa tladle aloma hiye Pisonpo. Aloma itapo mo pato hale Habila mo duka tle yapo. <sup>12</sup> Mo edla gold ewala ka:dle mate epo ullu ka:dle dakopala mate epo ewala ka:ka:dle opi mate wokasepo elapo. <sup>13</sup> Aloma hale tladle hiye Gihonpo. Gihon aloma itapo mo pato hale Kus duka tle yapo. <sup>14</sup> Epame matle aloma hale tladle hiye Tigilispo. Aloma itapo Asul mo tle salita matlalo tiyama dla yapo. Epalati matle aloma hale tladleye Yupalatespo.

<sup>15</sup> Epame Lod GODtapo oplamiye Iden osalo dulu dla pameliyo, ya:tapo osalo eye omhalemama oko hamhallepo depame. <sup>16</sup> Epame ya: watle epo atlaiyo, “Osalo dulu hema dlomoko dali hapulomaye me-demhallepe. <sup>17</sup> Amasiyama wa: ka:dle malamale mate batalimale malamale mate hapilalo dlomoko dali dla dlomoko hale podoahame dlowa. Adipalati, wa: dlomoko e doahame delepiye, wa: oloma medla polope,” diyo.

### *Itapu a:ya mita:pele*

<sup>18</sup> Epedeme Lod GODta ma epo atlaiyo, “Poka:dena, oplamitapo meyelo halloweye. Na: matle ka:dle gadlalo ya: mate ala:leye mita:plowepo,” diyo.

<sup>19</sup> Epame ya:tapo ta:la polapame alinepi hapuloma mate epo tea hapuloma mate momimita:piyo. Epame oplami hala dla elempuwaiyo, ya:tapo yia: hi hapilipo depame. Epalati alinepi hapulomaye oplamita yia: hiye halopiyo. <sup>20</sup> Oplamitapo tea hapuloma mate epo alinepi hapuloma mate hi halopimtale oloma edla ya: gadlowe ya: mate ala:le ponatiyo. <sup>21</sup> Epalati Lod GODtapo oplami watle ellele pato hamilati oplamitapo sikemte elaiyo. Ya: ala sikemte me-ellati GODta ya: tiyape elo haleye holahapame mamisika: godiyo. <sup>22</sup> Epame tiyape elo e mate a:ya mita:pame ma oplami hala dla sempuuiyo.

<sup>23</sup> Epalati oplamita epo atlaiyo, “Wata ma-natima, ya:ye na: mate ala:na. Ya:ye na: elo tle epo na: mo tle mita:pelepo. Epedeme ka:dena, ya: hiye a:ya dlepe. Adipalati, ya:ye oplami moto tle holahapame mita:pelepo,” diyo.

<sup>24</sup> Epapele tle oplamitapo ya: a mate epo ya: wai mate salepo tame ma ya: a:ya mate hatlope depo hallepe. Epame yia:ta madipata ma moto hatlope depo ha:ha:lepe. ✧

<sup>25</sup> Oplami mate a:ya mate madipatata tidali siyapo ha:ha:iyo. Amasiyama yia: dla kapala sisillita pe-elaiyo.

## 3

### *Batalimaleta kotiyamale*

<sup>1</sup> Lod GODta mimita:pele alinepi hapuloma dulu dla ilamata ya:mkale isikimi elemala natilowe malamaleta ya: dla sikemte pato halaiyo. Epedeme alila haleta ilamata puame a:ya watle epo atlaiyo, “Godta dlomoko dali hapuloma hema dlomoko demiyo duwaye ikadepeta:?” diyo. ✧

<sup>2</sup> Epalati asiyama a:yata ya: watle epo atlaiyo, “Godta di watle atlemama dlomoko hapuloma me-dlomha:ha:lepe duwa. <sup>3</sup> Amasiyama hatlo osalo duka dla hala dlomoko dali tlo demiyo duwa. Adipalati, dita dlomoko e doahapo delepiye, dia:ye pallipe duwa.”

✧ 2:7: 1Kol 15:45 ✧ 2:9: Bob 2:7, 22:2, 14 ✧ 2:24: Ma:t 19:5; Maka 10:7-8; 1Kol 6:16; Epe 5:31 ✧ 3:1: Bob 12:9, 20:2



<sup>4</sup> Amasiyama ilamata a:ya watle epo atlaiyo, “Yu eye pomikadepe. E isikimi atluwapo. Wua: popalliwa. <sup>5</sup> Godtapo epo atluwapo, adipalati, ya:malamana, wua:ta dlomoko e delepiye, wua: ma God some ha:ha:lepe depame. Epame ka:ka:dle koko mate bobtali-male koko mate sikemte malastepo ha:ha:lepe depame,” diyo.

<sup>6</sup> A:yatapo ilama yu dalepo medla tulupame ma dlomoko ka:dle natipo doahame dlowe sikemte solotamaiyo. Epame dlomoko e dele koko tle ka:dle malamale halowe ma solotamaiyo. A:yatapo epapele malamale tle dlmokoye dolalipo depame ma dlomoko haleye ya:wolali watle hamiyo. Epalati ya:wolali mape dlomoko eye hame deiyo. <sup>7</sup> Yia:ta madipata dlomoko dele alotle yia: edla yia:skamu malanatiyo, yia:ta tidali siyapo siyamale kokoye. Epalati yia:tapo pigi dali upa kolepame yia:skamu eyamsiyamaiyo.

<sup>8</sup> Tamila:la oloma edla yia:tapo Lod GODta osalo dulu dla sela:lali daliyo. Epalati yia:tapo ya: tle hemele potame dali upa dulu dla haohaodemsiyamaiyo. <sup>9</sup> Amasiyama Lod GODta oplami sisilapame epo atlaiyo, “Wa: hadima halema:?” diyo.

<sup>10</sup> Epalati asiyama oplamita epo atlaiyo, “Na: wa:ta osalo dulu dla sela:la dalepame wota:mama hemele hema puame haodepo poloma. Adipalati, na:ye tidali siyapo halema,” diyo.

<sup>11</sup> Asiyama Godta epo atlaiyo, “Anta wa:ta tidali siyapo hala kokoye wa: watle imo? Pona:malamana, wa: na:ta dlomoko demiyo duwaye e doahame deyo,” diyo.

<sup>12</sup> Epalati asiyama oplamita epo atlaiyo, “Wa:ta na: watle a:ya hamiwatapo na: watle dlomoko eye hamilati na: ma eye de,” diyo.

<sup>13</sup> Epalati asiyama Lod GODta a:ya watle epo atlaiyo, “Wa: adipalati koko iye hao?” diyo.

Epalati asiyama a:yata ma epo atlaiyo, “Ilamata na:ye elemala natilati na: dlomoko eye doahame de,” diyo. ✧

<sup>14</sup> Epalati asiyama Lod GODta ilama watle epo atlaiyo, “Wa: Godta kasilamale dulu dla halemama alinepi hapuloma dulu dla hatlo wa: tlope wa: kokota ta:la dla olalim-sela:mama isikimi apupu mate demsela:lepe. <sup>15</sup> Epame wa: mate epo a:ya mate dla elle kokota elemama duka gladleta ellepe. Epame elle koko hatlo meta ma wa: mamadulo mate epo a:ya ya: mamadulo mate dla ellepe. Epammama wa:tapo a:ya ya: mamadulo hale hete maku dla yellati ma asiyama ya:tapo wa: dokopalaye supulastelepe,” diyo. ✧

<sup>16</sup> Epame Godta a:ya watle epo atlaiyo, “Wa:ta owayemala hammama wotiyalle halowe na:ta ma pato dlowepo. Epalati wa:tapo wotiyalle mate owayimlala ho-homhallepe. Amasiyama epapele tlope wa: dla ala wa:wolali sikemte solotamale patota me-ellepe. Epalati ya:tapo wa: omhallalo hallepe,” diyo.

<sup>17-19</sup> Epame Godta matle A:dam\* watle epo atlaiyo, “Wa: mape wa: a:ya yu dalepame na:ta dlomoko demiyo dle dlmokoye delepo. Epedeme wa:ta dlomoko dele koko tle na:tapo ta:laye batalipo mellowepo. Epedeme dlowe alisisita isikimi meyelo pomat-lowwa, amasiyama osamokolo mate epo tuwale mateta matelepe. Epedeme wa: dlowe alisisi dlowedeme mowolo oko pato hamama ekukulli mate oko hapo de demhallepe. Epapedeme wa: oko pato metlo me-hamhalemama wa:ta polowe sukulu dla malatelepe. Epedeme wa:ta polopiye, wa: motoye matle ta:la yielepe. Adipalati, wa: motoye ta:la mate mita:puwapo,” diyo. ✧

<sup>20</sup> A:damtapo ya:llu hi semama Ib diyo. Adipalati, ya:ye opa hapuloma yia: waipo.

<sup>21</sup> Epame Lod GODtapo alinepi kapalata tluka mimita:pame A:dam mate Ib mate dla didiyemeliyo. <sup>22</sup> Epame ya:ta ma epo atlaiyo, “Watapo oplamiye dia: sepele some hale-mama ka:ka:dle koko mate batalimale koko mate malanatilowe me-ya:malamana. Epapedeme di matle ya: watle pasakalo hapimhallalo dlomoko dali tle dlomoko haleye podoahame dene dlowa, ya:tapo kokó pohallalo wekelepo depame,” diyo. ✧ <sup>23</sup> Epedeme

✧ 3:13: 2Kol 11:3; 1Tim 2:14 ✧ 3:15: Bob 12:17 \* 3:17-19: A:dam hi ya: dulu kokoye oplami demama apopo.

✧ 3:17-19: Hib 6:8 ✧ 3:22: Bob 22:14

Lod GODta yia:ye Iden osalo dulu tle alikili dla dodolomsaliyo, yia:tapo mo edla osalo hatitimha:ha:lepo depame. <sup>24</sup> Epame Godtapo banakaka soye Iden osalo dla tulalo api dla ipila:mama aipa:ya dlapa aloweli some tleka:mama sikemte usiyemale ma medla hitomeliyo, opata matle pasakalo hapimhallalo dlomoko dali tou dla tulala depame.

## 4

### *Kein mate Eibol mate*

<sup>1</sup> Alotle A:dam mate Ib mate ha:ha:le dulu dla Ibtapo mopapo polopame maseyemala hamaiyo, ya: hiye Kein. Epame Ibta epo atlaiyo, “GODta gadle tle na:tapo maseyemala ma-hamalepo,” diyo. <sup>2</sup> Epame alotle ma maseyemala hale hamaiyo, ya: hiye Eibol. Epame yia:ta madipata dulu dla Eiboltapo aliya halo omhalem-diyo, epalati ya: bapa Keintapo alisisi emalalo halaiyo.

<sup>3</sup> Alila haleta Keintapo ya: osalo dla alisisi opi hauwalepame GOD dla namkale dle halopiyo. <sup>4</sup> Epalati Eiboltapo ya: aliya halota ka:yapa yemala usulliye yumpame mo ka:dle tlope GOD dla namkale dle hamaiyo. Epalati GODtapo Eibolta namkale dle alisisi hampuale natipame ka:dena demama siyeiyo. ✧ <sup>5</sup> Amasiyama Keinta namkale dle alisisi halopo pualeye natipame posiyeyo. Epalati Keintapo sikemte siyaladiyo. <sup>6</sup> Epalati GODta Kein watle epo atlaiyo, “Wa: adipalati siyaladema:? <sup>7</sup> Wa:ta woloma ka:dle koko tlo hamatiye, eta na:tapo wa:ta namkale dle alisisi hamili dla siyelemla. Amasiyama wa:poka:dle koko hamhallelepiye, wa: batalimaletapo wa:ye dokopala depo hallowedeme ma-dinapopo wa:ye omhalapo. Amasiyama koko eta wa: dla woyamalala depame, wa: itiyamale mate halane,” diyo.

<sup>8</sup> Alotle Keintapo ya: ei Eibol watle epo atlaiyo, “Di moku dla isikimi hohola:mtlowa,” diyo. Yia: epo ma-tame moku dla ha:ha:mama Keintapo ya: ei Eibol hampame yumiyoy. ✧

<sup>9</sup> Epalati alotle GODta Kein watle epo atlaiyo, “Wa: ei Eibol da:?” diyo. Epalati asiyama Keinta epo atlaiyo, “Na: pona:malamana. Na:ta na: ei motoye omhalem-di?” diyo.

<sup>10</sup> Epalati GODta epo atlaiyo, “Wa: adipapalati poka:dle koko i hao? Wa: ei omalitapo ta:la tle na: dla sisilamhalapo. ✧ <sup>11</sup> Epedeme wa: na:ta kasilamale dulu dla halemama matle ta:la muwalepo alisisi pe-emolowa. Adipalati, ta:la edla wa:tapo wa: ei omaliye olostauwapo. <sup>12</sup> Epapedeme wa: matle alisisi emelepiye, wa: alisisita woloma pomatlowa. Epame wa: woloma mo hatlo dla pohallowa. Amasiyama wa: ta:lamo pato hema isikimi koko pa:le asepe oplami some holomhallepe,” diyo.

<sup>13</sup> Epalati asiyama Keinta GOD watle epo atlaiyo, “Na:ta na: batalimale asiyama dla wotiyalle dulu hema halloweye pasakalo pta kokalena. <sup>14</sup> Adipalati, wa:tapo na:ye mo itle epo wa: mila:pi tle pateka:mu dla tane depo. Epapedeme na:tapo ta:lamo hema asepe oplami some mo pa:le isikimi duka dla holomhallepe. Epapele dulu dla oplami antapo na: umulupiye, ya:tapo na:ye yumilipe,” diyo.

<sup>15</sup> Amasiyama GODta Kein watle epo atlaiyo, “Hao, oplami haletapo wa:ye poyumu-luwa. Amasiyama oplami antapo wa:ye yumilipiye, asiyama na:tapo ya: opa 7ye potimolowepo,” diyo. Epame Godtapo Kein dla ulu himiyo, opata ya: natipame poyumulalo wekelepo depame.

### *Kein ya: mamadulo*

<sup>16</sup> Epalati Keinta GOD mila:pi tle ma teletamama Nod mo dla halla taiyo. Mo iye Iden osalo tle ma salita matlalo tiyama dla halaiyo. <sup>17</sup> Kein edla tame hallati ya:lluta mopapo polopame maseyemala hamaiyo, ya: hiye Enok. Oloma edla Keinye mo amko kestamhalaiyo. Epame mo amko e mape semama Enok diyo. <sup>18</sup> Epapedeme Enok

yamiye Ilad, epalati Ilad yamiye Mehuyael, epalati Mehuyael yamiye Metusael, epalati Metusael yamiye Lamek.

<sup>19</sup> Epalati Lamek tapo wola: dapiyamte halomaiyo. A:ya hale hiye Ada, epo a:ya hale hiye Sila. <sup>20</sup> Ya: a:ya hale Adatapo maseyemala hamaiyo, ya: hiye Yabal. Yabaltapo ya: tatile ka:yapa kimtimsela:mama halo omhallowe kotiyamaiyo. <sup>21</sup> Epalati Yabal ya: ei hiye Yubal. Yubaltapo ya: tatile ka:yapa woiyo mate epo pitikako mate sala dodolomalalo halaiyo. <sup>22</sup> Epalati Lamek ya:llu hale Silatapo maseyemala hamaiyo, ya: hiye Tubal Kein. Ya:tapo ka:yapa oli mate epo blons ewala mate aipa:yaye mimita:plowe kotiyamaiyo. Ya: nanaye Namapo.

<sup>23</sup> Alila haleta Lamek tapo ya: wola: dapiyamte watle epo atlaiyo, “Wua: na: yu daliya. Kipiliyemala haletapo na: heyulati na:ta asiyama ya:ye mo-yumi. <sup>24</sup> Epele dulu dla oplami haleta di mama pato Kein yumili hallepiye, asiyama ya: opa 7 ma potimelepe. Amasiyama oplami antapo na:ye yumilipiye, asiyama 77 soye potimelepe,” diyo. ✧

### *Set mate Enos mate*

<sup>25</sup> A:dam ya:llu Ibtapo matle maseyemala hale hamaiyo, ya: hiye Set. Epalati Ibtapo epo atlaiyo, “Godtapo na: watle maseyemala hale, Keinta yumili Eibol mo dla halloweye ma-hamame ilipo,” diyo. <sup>26</sup> Epame Set yami Enosta halale oloma edla opatapo GOD dla inoma sumama ya: hi di dla ta:dlowe kotiyamaiyo.

## 5

### *A:dam ya: mamadulo*

<sup>1-2</sup> Godtapo oplami mita:mama ikadepe ya: sepele mita:piyo. Epame ya: sepele mimita:mama oplami mate a:ya mate mimita:piyo. Epame yia: dla siyemama yia: semama oplayemala diyo. Epalati A:dam ya: mamadulo hiye ipo. ✧

<sup>3</sup> A:dam 130 sokomoko ma-halepo gudepame ya:lluta maseyemala hale, A:dam mila:pi himili hamaiyo, ya: hiye Set. <sup>4</sup> Set hamale alotle A:damtapo 800 sokomoko dulu dla halemama akimlala opi mate epo utukaka opi mate hatitimaiyo. <sup>5</sup> Epedeme A:damtapo 930 sokomoko halepame powaiyo.

<sup>6</sup> Epame Settapo 105 sokomoko halepame ya:lluta maseyemala hamaiyo, ya: hiye Enos. <sup>7</sup> Epame Enos hamale alotle Settapo 807 sokomoko dulu dla halemama akimlala opi mate epo utukaka opi mate hatitimaiyo. <sup>8</sup> Epedeme Settapo 912 sokomoko halepo gudepame powaiyo.

<sup>9</sup> Epame Enostapo 90 sokomoko halepo gudepame ya:lluta maseyemala hamaiyo, ya: hiye Kenan. <sup>10</sup> Epame Kenan hamale alotle Enostapo 815 sokomoko dulu dla halemama akimlala opi mate epo utukaka opi mate hatitimaiyo. <sup>11</sup> Epapedeme Enostapo 905 sokomoko halepame powaiyo.

<sup>12</sup> Epame Kenantapo 70 sokomoko halepo gudepame ya:llutapo maseyemala hamaiyo, ya: hiye Mahalalel. <sup>13</sup> Epame Mahalalel hamale alotle Kenantapo 840 sokomoko dulu dla halemama akimlala opi mate epo utukaka opi mate hatitimaiyo. <sup>14</sup> Epapedeme Kenantapo 910 sokomoko halepame powaiyo.

<sup>15</sup> Epame Mahalaleltapo 65 sokomoko halepame ya:lluta maseyemala hamaiyo, ya: hiye Yaled. <sup>16</sup> Epame Yaled hamale alotle Mahalaleltapo 830 sokomoko dulu dla halemama akimlala opi mate epo utukaka opi mate hatitimaiyo. <sup>17</sup> Epedeme Mahalaleltapo 895 sokomoko halepo gudepame powaiyo.

<sup>18</sup> Epame Yaledtapo 162 sokomoko halepame ya:lluta maseyemala hamaiyo, ya: hiye Inok. <sup>19</sup> Inok hamale alotle Yaledtapo 800 sokomoko dulu dla halemama akimlala opi mate epo utukaka opi mate hatitimaiyo. <sup>20</sup> Epedeme Yaledtapo 962 sokomoko halepo gudepame powaiyo.

<sup>21</sup> Epame Inokta 65 sokomoko halepame ya:lluta maseyemala hamaiyo, ya: hiye Metusela. <sup>22-24</sup> Metusela hamale alotle Inoktapo 300 sokomoko dulu dla halemama ma akimlala opi mate epo utukaka opi mate hatitimaiyo. Ya: sikemte God malamalalo oplami halaiyo. Epalati Godtapo ya:ta 365 sokomoko umpo hallati ya:ye hamame hetaiyo. Epalati opata ma ya:ye ponatiyo.✧

<sup>25</sup> Epalati Metuselatapo 187 sokomoko halepo gudepame ya:lluta maseyemala hamaiyo, ya: hiye Lamek. <sup>26</sup> Lamek hamale alotle Metuselata 782 sokomoko dulu dla halemama akimlala opi mate epo utukaka opi mate hatitimaiyo. <sup>27</sup> Epedeme Metuselatapo 969 sokomoko halepo gudepame powaiyo.

<sup>28</sup> Epame Lamekta 182 sokomoko halepo gudepame ya:lluta maseyemala hamaiyo. <sup>29</sup> Epalati Lamekta maseyemala e ya: hiye Nowa\* depame epo atlaiyo, “GODtapo A:damta batalimale tle di watle pasakalo kokalle iye hamiwapo. Epedeme ditapo di do mate ta:la muwalepo dlowe alisisi emha:ha:mama wotiyalle natimha:ha: iye ma maseyemala ita di gadlalo hallepe,” diyo. <sup>30</sup> Nowa hamale alotle Lamekta 595 sokomoko dulu dla halemama akimlala opi mate epo utukaka opi mate hatitimaiyo. <sup>31</sup> Epedeme Lamekta 777 sokomoko halepo gudepame powaiyo.

<sup>32</sup> Epalati Nowata 500 sokomoko halepo gudepame ya:llutapo akimlala hatitimaiyo, yia: hiye Sem, epo Ham, epo Yapet.

## 6

### *Ta:la sota batalimale koko*

<sup>1-2</sup> Ta:lamo pato dla opata sikemte pasatamtaiyo. Epalati oloma edla pepele di dla ha:ha:lalo so opa opitapo ta:la sota hatitimale utukaka ka:ka:dleta popa:la natipame malame halomyaiyo. ✧ <sup>3</sup> Epalati GODta epo atlaiyo, “Na:ta hamili pasakalo halemhala hedletapo oplami dulu dla pase kokó hallowa. Adipalati, opaye isikimi ta:la sopo. Epedeme yia:ta:po isikimi 120 sokomoko ha:ha:pame palidemha:ha:lepe,” diyo.

<sup>4</sup> Epedeme pepele di tle malale so opa iwolota wola: ikadepe halopo hatitimale yimlalata sikemte itiyamale mate koko halomha:ha:mdiyo. Epapele tle opata yia: kokoye powowelilalo kokó malaha:ha:mdiyo. Epame yia:ye semama Nepilim\* so demdiyo. Nepilim so iwoloye ka:yapa ta:lamo hema me-ha:ha:mdiyo. ✧

<sup>5</sup> GODta natili dla ta:lamo so hapulomatapo sikemte batalimale koko halomha:ha:la natiyo. Epame yia:ta malamale mape alila hapuloma isikimi batalimale koko malamoloweta ella natiyo. ✧ <sup>6</sup> Epalati GODtapo ya:ta mimita:pele opata ha:ha:le pasakalo natipame dupa kolle mate epo atlaiyo, “Na: adipalati ta:la soye mimita:puwa? <sup>7</sup> Na: watapo na:ta mimita:pele opa hapuloma mate epo alinepi hapuloma mate epo tea hapuloma mate potipa:mmellowepo. Adipalati, na:ta mimita:pele so hapuloma i natimama sikemte alima,” diyo. <sup>8</sup> Amasiyama dulu edla oplami hatlo Nowatapo GOD mila:pi tle ka:dle oplami halaiyo.

### *Nowata koa tili*

<sup>9</sup> Epedeme opa hapuloma dulu dla hatlo Nowatapo God mila:pi tle ka:dle oplami halaiyo. ✧ <sup>10</sup> Nowatapo ya: akimlala dapahatlope elemhalaiyo, yia: hiye Sem, epo Ham epo Yapet.

<sup>11-13</sup> Godtapo ta:lamo so hapulomata batalimale pato dulu dla ha:ha:la natipame Nowa watle epo atlaiyo, “Ta:lamo hema ya:mkale yumuluwe koko mate epo ya:mkale pomalamalalo wekelowe koko mateta pta pato halapo. Epedeme na: ta:lamo mate epo dulu edla ha:ha:lalo so opa hapuloma mate poyuluwepo. <sup>14</sup> Epapedeme wa: dali

✧ **5:22-24:** Hib 11:5; Yuda 14 \* **5:29:** Nowa hi ya: dulu kokoye wotiyalle dulu dla gadlalo demama apopo.

✧ **6:1-2:** Yob 1:6, 2:1 \* **6:4:** Nepilim so iwoloye opa sikemte elo seselemallita teta:mama wisi sepeleta ha:ha:iyo.

✧ **6:4:** Nam 13:33 ✧ **6:5:** Mat 24:37; Luk 17:26; 1Pita 3:20 ✧ **6:9:** 2Pita 2:5

ka:ka:dle mate koa pato tine. Epame dulu edla hutiyelowe aya alupoli hatitipame dulu mate alikili mate dla tokeyamale alisisi mate hutupamelene, yúta dulu dla tulala depame. <sup>15</sup> Epame koata selemalliye 150 mita hallepe, epo ya:ta popolalleye 25 mita hallepe, epame dopukota didleye 15 mita hallepe. <sup>16</sup> Epedeme wa: eme bodepo matle mosisi kokoloma tilimama eme isili tle mateka:pi medla tilimelepe. Epame kokoloma tlo koa seme dla tilipe. Epame koa dulu dla aya popoliyeleye dapahatlope hallepe. Haleta isili ikadepe dla, epalati haleta duka dla, epalati haleta di ikadepe dla hala dlepe.

<sup>17</sup> Epalati na:tapo yú puale pato hamilowepo ta:lamo dla ha:ha: so hapuloma poyulupo depame. Epedeme alisisi hapuloma ta:lamo hema ha:ha:tapo pallipe. <sup>18</sup> Amasiyama wa:tapo, wa: a:ya mate epo wa: akimlala dapahatlope mate epo yia: wola: mate koa dulu dla tumullati na:tapo wua: pasakalo gadlowepo. <sup>19-20</sup> Wua:ta koa dulu dla tumama alinepi mila:pi meyelope meyelope dleye patetalo mate epo molalatalo mateta wa: hala dla pumhallati hohopo tumullupe, yia:tapo popalilalo wekelepo depame. <sup>21</sup> Epame wua:ta tumama wua:ta dlowe alisisi mate epo alinepita dlowe alisisi mate halopo tumullupe.”

<sup>22</sup> Epalati Nowatapo Godta atlale koko hapuloma eye ma-haiyo. ✧

## 7

### *Yúta ta:lamo gola:dle*

<sup>1</sup> Epame GODtapo Nowa watle epo atlaiyo, “Wata oloma hema ha:ha: opa hapuloma dulu dla na:ta natiye hatlo wa: tlo sikemte ka:dle oplami halema. Epapedeme wa: mate wa: a:ya mate epo wa: akimlala mate epo yia: wola: mate koa dulu dla elemtuwane.

<sup>2</sup> Epame wua:ta tumama ullu watalo alinepi\* mila:pi meyelope meyelope dleye patetalo mate molalatalo mate hohopo tumullupe. Amasiyama wa: ullu pa:talo alinepi tlo elemtumama alinepi mila:pi meyelope meyelope dleye patetalo dla 7 hohoma epame molalatalo dla 7 hohoma demtapame elemtulupe. <sup>3</sup> Epame tea mape patetalo dla 7 hohoma epo molalatalo dla 7 hohoma demtapame elemtulupe. Epalati yia:tapo ma alotle yia: mila:pi sepele usulumha:ha:mama pasatlepo depame. <sup>4</sup> Wata oloma itle alila 7 pololepo gudlati na:tapo tiyo patoye ta:lamo dla tulune dlowama. Epalati 40 alila mate epo 40 utula:la mate tiyo patota hellepe. Epalati na:ta mimita:pele opa hapuloma mate epo alinepi hapuloma mateye poyuluwepo,” diyo. <sup>5</sup> Epalati Nowatapo GODta atlale koko hapulomaye ma-haiyo.

<sup>6</sup> Nowaye 600 sokomoko hallati yútapo puaiyo. <sup>7</sup> Epalati Nowata ya: a:ya mate epo ya: akimlala mate epo yia: wola: mate koa pato dulu dla tuwaiyo, yúta ta:lamo gola:dlati yia:tapo pasakalo hallowe halowedeme. ✧ <sup>8-9</sup> Epalati Godta atlale yu e dolumama tea mila:pi meyelope meyelope dle mate epo alinepi hapuloma mila:pi meyelope meyelope dle matetapo Nowa hala dla puame koa dulu dla tumhalaiyo. Yia:tapo koa dulu dla tumhalemama patetalo mate molalatalo mate tua demhalaiyo. <sup>10</sup> Epame alila 7 mogudlati yútapo ta:lamo patoye dokolomhetaiyo.

<sup>11</sup> Nowata halemama 600 sokomoko umale oloma edla yú mataletapo ta:la dulu tle popokotimyaiyo. Epalati omapla di tle tiyo patota heliyo. Koko iye namba 2 mama dulu dla namba 17 alila umulati apiyo. ✧ <sup>12</sup> Epalati tiyotapo 40 alila mate epo 40 utula:la mate dulu dla helemhalaiyo. <sup>13</sup> Epalati Nowa mate ya:llu mate epo yia: akimlala Sem mate epo Ham mate epo Yapet mate epo yia: wola: mate koa dulu dla tuwaiyo. <sup>14</sup> Yia:ta tumama alinepi mila:pi meyelope meyelope dle dulu dla halo mate epo yowo mate epo tea mila:pi meyelope meyelope dle mate elemtuwaiyo. <sup>15-16</sup> Godta atlale yu e dolumama alinepi hapulomatapo Nowa mate tumhalale dulu edla patetalo mate epo molalatalo

✧ 6:22: Hib 11:7 \* 7:2: Ullu pa:talo alinepiye isikimi God hi di dla ta:demama poyupo hapilalo alinepipo. Amasiyama ullu watalo alinepiye God hi di dla ta:demama poyupo pohapilalo wekele alinepipo. ✧ 7:7: Ma:t 24:38-39; Luk 17:27 ✧ 7:11: 2Pita 3:6



mate tua demhalaiyo. Yia:ta hapulomatapo koa dulu dla mo-tupa:mele pokadlati GOD meyelo kokolomaye godiyo.

<sup>17-18</sup> Tiyota 40 alila dulu dla helemhallati yúta pumhetamama koata hollowe mo-kotiyamaiyo. <sup>19</sup> Yútapo ta:lamo dokolomhetemama tamali patoto sikemte seselemalli popa:le aloweli diye mo-gola:gola:diyo. <sup>20</sup> Epalati tamali patoto aloweli yúta gola:dleye 7 mita ga:tulli epapele halaiyo. <sup>21-23</sup> Epalati alinepi hapuloma mate epo tea hapuloma mate epo opa hapuloma mate ta:la medla pomelletapo paliyo. Epedeme ta:lamo hema pasakalo ha:ha:lalo alisisi hapulomatapo mosukulu palipa:meliyo. Amasiyama hatlo Nowata koa dulu dla elemtuwale sotapo pasakalo gadlowe haiyo. <sup>24</sup> Epalati 150 alila dulu dla yútapo ta:laye gola:depo elaiyo.

## 8

### *Yúta mo-pilli*

<sup>1</sup> Godtapo Nowa mate epo alinepi hapuloma mate koa dulu dla ha:ha:leye ala me-malahalaiyo. Epammama ya:tapo mosisi dla itiyamale hamiyo, mosisita sikemte hotlomhalemama yúta pillipo depame. <sup>2</sup> Epalati Godta ta:la dulu dla yú matale opokoko ha:ha:leye ma-gogodlati omapla di tle tiyo patota helemhalale mape keidiyo. <sup>3-4</sup> Epalati yúta woloma pilimtumhalaiyo. Epalati koata yú di dla holomsela:mama mama 5 pololepo gudlati tulume Alalat tamali aloweli di dla gagadiyo. <sup>5</sup> Amasiyama yúta ala woloma me-pilimtumhalemama mama dapiyamte pololepo gudlati tamali opi aloweli mape mo-wowoyamaiyo.

<sup>6-7</sup> Epame Nowata ma 40 alila pololepame mosisi kokoloma gowaladepame wako teaye tane diyo. Amasiyama tea itapo ma ilame populalo yúta pillipo depame me-hollomsela:iyo. <sup>8</sup> Epame ma-alotle Nowatapo seselema teaye tane diyo, yúye mo-pilita: depo natilipo depame. <sup>9</sup> Amasiyama yúta woloma pilimtumama dalupa ala me-dodokolopo hallati natipame teata kollowe totamsela:po ilame pulati Nowata ma hamame koa dulu dla pameliyo. <sup>10</sup> Epame Nowa matle alila 7 halepo gudepame seselema teaye ma tane diyo. <sup>11</sup> Epalati seselema teatapo hollomtame sela:po ma tamila:la ilame pumama olipi dali upa amkota:le ketahame mukota yilame puaiyo. Nowa epela malamaiyo, yúye mo-pilimtulupo. <sup>12</sup> Epame matle alila 7 halepo gudepame seselema teaye ma tane diyo. Epalati ya:tapo hollomtama ma ilame popuwaiyo.

<sup>13</sup> Epalati Nowata koa dulu dla halemama mama 10 umulati eme dokostepo alikili dla natitepo, yúta mo-pilipo halla natiyo. Oloma hema Nowatapo 601 sokomoko umaiyo. <sup>14</sup> Epame ma mama dapiyamte pololepo gudepo alotle natilati ta:lata ma sekelemama kokalestame ella natiyo.

<sup>15</sup> Epalati Godtapo Nowa watle epo atlaiyo, <sup>16</sup> “Wa: mate epo wa: a:ya mate epo wa: akimlala mate epo yia: wola: mate koa dulu tle alikili a:ma dla wowoyamaiya. <sup>17</sup> Wua:ta u-ulapo tamama alinepi hapuloma mila:pi meyelo meyelo dle mate eleme alikili dla woyamaiya, yia:tapo yimlala usulumama ta:lamoye matle pasatlepo depame,” diyo.

<sup>18</sup> Epalati Nowata ya:llu mate epo ya: akimlala mate epo yia: wola: mate koa dulu tle alikili dla u-ulapo tamalaiyo. <sup>19</sup> Epame alinepi hapulomata koa dulu tle alikili dla u-ulapo tamalemama miyelo yia: sepele siyapota mepo ketamta mepo ketamta depo tamalaiyo.

<sup>20</sup> Epame Nowatapo GOD dla alinepi poyupo ha:lalo tileye haiyo. Epame ya:tapo GOD hi di dla ta:demama ullu pa:le aliya halo mate tea mate poyupo halomaiyo. <sup>21</sup> Epalati alinepi halomale ullu seyamaletapo hetame ya: umalati GODta sikemte siyeiyo. Epame ya:skamu epo atlaiyo, “Ta:la sota ma batalimale koko halomha:ha:lati na:tapo ta:lamoye matle poyuluwa. Epapele dulu dla na:malamana, ta:la sotapo koko halomale mate epo momalamale mateye pta batalimana. Epapele tlope na: matle yia:ye popoyuluwa. <sup>22</sup> Amasiyama ta:lamota matle hallowe oloma edla alisisi emolowe alila me-ellepe,

epame alisisi hauwallowe alila ma me-ellepe. Epame pomale alila ma me-ellepe, epame alemalle alila ma me-ellepe. Epame tene alila mate epo sali silaple alila mate ma me-ellepe. Epame utula:la mate alila mate ma me-ellepe.”

## 9

### *Godta Nowa dla yu itiyapo himili*

<sup>1</sup> Godtapo Nowa mate ya: akimlala mate dla epo atlaiyo, “Wua: yimlala sikemte isukumama ta:lamoye pasatlepe. ✧ <sup>2</sup> Alinepi hapuloma tea mate epo amalo mateta wua: wowota:le mate ha:ha:lepe. Epapedeme yia:tapo wua:ta itiyamale isili tle ha:ha:lepe. <sup>3</sup> Kotiyamale dla na:tapo wua:ye isikimi emale alisisi mate epo dlomoko mate dlomha:ha:iye duwapo. Amasiyama na: ma wata wua: watle atlema, alinepi hapuloma iye dlomha:ha:lepe depame.

<sup>4</sup> Amasiyama wua: mo demama ala omali mate hallati podlowa. Adipalati, pasakaloye omali dulu dla halapo. ✧ <sup>5</sup> Epedeme oplami antapo ya:mkale pasakaloye kestlepiye, ya: ma asiyama yumilipe. Epame alinepi aditapo oplami pasakalo kestlepiye, asiyama alinepi e mape yumilipe. <sup>6</sup> Epedeme oplami antapo ya:mkale omaliye olostlepiye, ya: ma asiyama ya: omaliye olostlepe. Adipalati, Godtapo oplamiye me-ya: mila:pi sepele mita:puwapo. ✧ <sup>7</sup> Epedeme Nowa wa: mate epo wa: akimlala mate, wua: yimlala sikemte isukumaiya, wua: mamadulotapo ta:lamo pato hema opa pasatlepo depame.” ✧

<sup>8</sup> Epame Godta Nowa mate epo ya: akimlala mate dla ma epo atlaiyo, <sup>9</sup> “Na: watapo yu itiyamaleye wua: mate epo alotle wua: mamadulota ha:ha:lowe mate dla himima. <sup>10</sup> Epame wua: mate koa dulu tle u-ulapo matiwa alinepi mila:pi meyelope meyelope dle mate dla ma himima. <sup>11</sup> Yu itiyapo himili eye ipo. Na: matle pasakalo ha:ha: alisisi hapulomaye yú mate popoyuluwa. Epame matle ta:lamoye yú mate poyuluwa.

<sup>12</sup> Na:tapo wua: mate wua: mamadulo mate epo pasakalo ha:ha:lalo alinepi hapuloma mate dla yu itiyapo himmama ulu himiye ipo. <sup>13</sup> Eye na:tapo pesepidoloye omapla di dla himima. Pesepidolo itapo na:ta wua: dla yu itiyapo himi i imalalo hallepe. <sup>14-16</sup> Epapedeme pesepidolota wuala dulu dla ella natilipiye, na:tapo wua: mate epame alinepi hapuloma mate dla yu itiyapo himi iye malamolowepo. Epedeme yútapo matle pasakalo ha:ha:lalo alisisi hapulomaye popotimolowa. <sup>17</sup> Adipalati, pesepidolotapo na:ta yu itiyapo himi i ya: ulu himili halapo,” diyo.

### *Nowa ya: akimlala*

<sup>18-19</sup> Nowa ya: akimlala iwolotapo koa dulu tle u-ulapo matiyo. Yia: hiye Sem, epo Ham epame Yapet. Amasiyama Hamye Keinan ya: apo. Epedeme akimlala dapahatlope iwolotapo ta:lamo opa hapulomata puale sitali halapo.

<sup>20</sup> Alotle Nowatapo osalo himpame gla:pi dlomoko emaiyo. <sup>21</sup> Epame ya: gla:pi dlomoko dala mate wain yú mita:pame depo yiyilamama aya dulu dla tidali siyapo elaiyo. <sup>22</sup> Epalati Keinan ya: a Hamta natipame Sem mate epo Yapet mate dla atlaiyo. <sup>23</sup> Epalati Sem mate epo Yapet mateta yia: ata tidali siyapo ellati natilala depame, tluka hame yia: maka: dla himme kawapo tuwame yia: aye bopudiyo.

<sup>24</sup> Nowa kawata yulita mo-pa:lati yelepo yami mosukulu hamale Hamta koko halë dalepame epo atlaiyo, <sup>25</sup> “Wotiyalle kokotapo Keinan dla pulupe. Epame ya:tapo ya: bapadulo dulu dla isili ikadepe dla asiyama pa:le oko halalo hallepe.” <sup>26</sup> Epame ya: matle epo atlaiyo, “Lod, Sem ya: GOD hi di dla ta:diya. Epame Keinantata Sem ya: oko oplami halemama ya: yu dla salladepo sela:lepe. <sup>27</sup> Epame Godtapo Yapet watle ta:la pato hamilipe. Epame Yapettapo Sem ya: aya dla hallepe. Epalati Keinantapo yia: yu dla salladepo sela:mama yia: oko oplami hallepe.”

✧ 9:1: Yen 1:28 ✧ 9:4: Leb 7:26-27, 17:10-14; 19:26; Dit 12:16, 23, 15:23 ✧ 9:6: Yen 1:26; Eke 20:13 ✧ 9:7: Yen 1:28

<sup>28</sup> Yúta opa poyuli alotle Nowatapo 350 sokomoko halaiyo. <sup>29</sup> Epedeme Nowatapo 950 sokomoko halepame powaiyo.

## 10

<sup>1</sup> Nowa ya: akimlala hiye Sem, epo Ham epo Yapet. Epapedeme yúta opa poyuli alotle opa dapahatlope iwolotapo akimlala hatitimaiyo.

### *Yapet ya: mamadulo*

<sup>2</sup> Yapet ya: akimlala hiye Goma, epo Magog, epo Madai, epo Yaban, epo Tubal, epo Mesek epame Tilas. <sup>3</sup> Epalati Goma ya: akimlala hiye Askenas, epo Lipat, epo Togama. <sup>4</sup> Epalati Yaban ya: akimlala hiye Elisa mate epo Talsis matepo. Epame Kitim so mate epo Lodanim so mateye Yaban ya: mamadulopo.

<sup>5</sup> Epedeme opa hapuloma iwoloye Yapet ya: mamadulopo. Yia:tapo Mediteleniya kaula pili dla yia: elele tle miyelo hutukuliyapo tame hala hala demtaiyo. Epame yia: yu mape meyelo meyelo dle yuhamha:ha:mdiyo.

### *Ham ya: mamadulo*

<sup>6</sup> Epalati Ham ya: akimlala hiye Kus, epo Mislaim, epo Put epame Keinan. <sup>7</sup> Epalati Kus ya: akimlala hiye Seba, epo Habila, epo Sabata, epo Lama epame Sabateka. Epalati Lama ya: akimlala hiye Seba mate epo Dedan mate.

<sup>8</sup> Kus ya: mama haleye Nimlodpo. Nimlodtapo opahale dulu dla sikemte itiyamale oplami halaiyo. <sup>9</sup> Epame ya:tapo GOD mila:pi tle ka:pi dlowe alisisi siyomalalo halaiyo. Epapedeme yuta ipo atlapo, “Nimlod some GOD mila:pi tle ka:pi dlowe alisisi siyomalalo halane,” depo. <sup>10</sup> Ka:yapa Nimlodtapo mo hapuloma iye omhalaiyo. Eye Babilonpo, epo Elekpo, epo Akadipo, epo Kalnepo. Mo hapuloma iye Babiloniya mo pato dulu dla hutiyeyo. <sup>11</sup> Epame ma etle Asiliya mo dla taiyo. Ya: edla tame Niniba mo mate Lehobot Il mo mate epame Kala mo mate kotimaiyo. <sup>12</sup> Ya: matle Niniba mo ka: epo Kala mo pato ka: duka dla Lesen mo kestaiyo.

<sup>13</sup> Epedeme Ham yami Mislaim ya: mamaduloye ipo, Ludi sopo, epo Anam sopo, epo Lehab sopo, epo Naptu sopo, <sup>14</sup> epo Patlus sopo, epo Kaslu sopo, epo Kaptoli sopo. Epedeme Pilisteya soye Kaslu so yia: mamadulopo.

<sup>15</sup> Epalati Ham yami Keinan ya: mamaduloye ipo, Saidon sopo, epo Hitai sopo, <sup>16</sup> epo Yebusi sopo, epo Amoli sopo, epo Gilgasi sopo, <sup>17</sup> epo Hibai sopo, epo Alki sopo, epo Sini sopo, <sup>18</sup> epo Albad sopo, epo Semali sopo, epo Hamat sopo. Epame alotle Keinan so elele hapuloma ewolotapo hutukuliyapo taiyo. <sup>19</sup> Epedeme Keinan so ta:la sukuluye ipo elema. Saidon mo tle kotiyapo yame Gasa dla gudapo. Epo matle tame Sodom mo mate Gomola mo dla tame umapo. Epame ma etle tame Adama mo mate epo Seboim mo mate dla tame gudapo. Epame ma metle tame Lasa dla mosukulu gudapo.

<sup>20</sup> Opa hapuloma iwoloye Ham ya: mamadulopo. Yia:tapo mo meyelo meyelo dle dla ha:ha:mtamama yia: yu mape meyelo meyelo dle yuhamha:ha:iyo.

### *Sem ya: mamadulo*

<sup>21</sup> Yapet ya: bapa Semtapo akimlala hatitimaiyo. Epele dulu dla oplami Ebel\* ya: akimlala hapulomaye Sem ya: mamadulopo. <sup>22</sup> Epalati Sem ya: akimlalaye ipo, Elam, epo Asul, epo Alpaksad, epo Lud, epame Alam.

<sup>23</sup> Epalati Alam ya: akimlalaye ipo, Us, epo Hul, epo Getel epame Mesek.

<sup>24</sup> Epalati Alpaksad yamiye Sala, epalati Sala yamiye Ebel.

<sup>25</sup> Ebelta akimlala dapiyamte hatitimaiyo, maseyemala hale hiye Peleg.† Adipalati, ya:ta halale oloma edla Godtapo yu hapulomaye hutukuliyapo hamastamama opa hapuloma mape hutukuliyapo hamastaiyo. Peleg ya: ei hiye Yokotan.

\* **10:21:** Hibulu hi iye ya: sitali Ebelpo. Amka:yapa Yu soye Hibulu so demha:ha:uwapo. † **10:25:** Peleg hi i ya: dulu kokoye duka gladle demama apopo.



<sup>26</sup> Yokotan ya: akimlalaye ipo, Almodad, epo Selep, epo Hasamabe, epo Yela, <sup>27</sup> epo Hadolam, epo Usal, epo Dikila, <sup>28</sup> epo Obal, epo Abimael, epo Seba, <sup>29</sup> epo Opil, epo Habila, epo mosukuluye Yobabpo. Epedeme opa hapuloma iwoloye Yokotan ya: akimlalapo. <sup>30</sup> Yia:ta ha:ha:le moye Mesa mo tle kotiyapo tame salita matlalo tiyama tamali di Sepa mo dla tame gudiyo.

<sup>31</sup> Opa hapuloma iwoloye Sem ya: mamadulopo. Yia:tapo mo meyelope meyelope dle dla ha:ha:mtamama yia: yu mape meyelope meyelope dle yu hamha:ha:iyo.

<sup>32</sup> Elele hapuloma iye Nowa ya: akimlala tle puaiyo. Epame yúta opa poyuli alotle opa iwolotapo ta:lamo so hapuloma yia: sitali halapo.

## 11

### *Godtapo yu hapuloma hutukuliyapo melle*

<sup>1</sup> Ka:yapa ta:lamo pato hema opa hapulomatapo yu hatlo mate yuhamha:ha:iyo. <sup>2</sup> Epame opata ha:ha:mtamama toko salita matlalo tiyama dla gilidetepo wou mo ka:dle Babiloniya mo dla natipame ma edla tame ha:ha:iyo. <sup>3-4</sup> Yia: edla tame ha:ha:mama yia:skamu yia: dulu dla epo atlamyaiyo, “Di mo pato kestapame aya patoto halomolowa. Epame di God umuluwedeme aya pato selemalli hatlo hame hetlowa. Epedeme dita mo edla kestepo aya halomelepiye, di ewala mate pohalomolowa, amasiyama sokope tokeyamale mate dukupo blik ewala\* mimita:pame kolumhetamama aya halomolowepo. Dita aya patoto halomelepiye, opata di hi di dla ta:dlepe. Eta dita ta:lamo pato hema pohutukuliyapo tame ha:ha:myelowa,” demyaiyo.

<sup>5</sup> Amasiyama GODtapo opata mo pato kestale mate epo aya pato selemalli hamhetale mate natila malaiyo. <sup>6</sup> GODta malame natipo epo atlaiyo, “Opa iwoloye hatlopepo, epame yu hatlo yuhamsiyamapo. Epame yia:ta koko ha iye ala ka:yapa kotiyamama amma. Epame ma alotle yia:ta solotamale koko patoto me-halomalala. <sup>7</sup> Epapedeme di tulumé ha:ha:mama yia:ta yu hatlo yuhamsiyamaye duka hutukuliyapo mellowa, yia:ta ya:mkale yu asiyama pomala dallalo weke asiyama pomala dallalo weke demsiyamelepo depame,” diyo.

<sup>8-9</sup> Epapedeme GODtapo yia:ta yu hatlo yuhamsiyamaleye ma hutukuliyapo mellati yia:tapo aya selemalli hamhetale ma memeliyo. Epalati yia:tapo yia: yu meyelope meyelope dle mate ta:lamo pato dla hutukuliyapo tame ha:ha:myaiyo. Epedeme yia:ta mo pato kestale hiye Babilonpo.† Adipalati, mo hema GODtapo yu hapulomaye hutukuliyapo meliyo.

### *Sem ya: mamadulo*

<sup>10</sup> Yúta opa poyuli alotle sokomoko dapiyamte polollati Semye 100 sokomoko umaiyo. Oloma edla ya:lluta maseyemala hamaiyo, ya: hiye Alpaksad. <sup>11</sup> Epo Alpaksad hamale alotle Semtapo 500 sokomoko dulu dla halemama akimlala opi mate utukaka opi mate hatitimaiyo.

<sup>12</sup> Epalati Alpaksadtapo 35 sokomoko halepo gudepame ya:lluta maseyemala hamaiyo, ya: hiye Sala. <sup>13</sup> Epame Sala hamale alotle Alpaksadta 403 sokomoko dulu dla halemama akimlala opi mate epo utukaka opi mate hatitimaiyo.

<sup>14</sup> Epalati Salatapo 30 sokomoko halepo gudepame ya:lluta maseyemala hamaiyo, ya: hiye Ebel. <sup>15</sup> Epame Ebel hamale alotle Salata 403 sokomoko dulu dla halemama akimlala opi mate epo utukaka opi mate hatitimaiyo.

\* **11:3-4:** Yia: blik ewala aya halomolowedeme ka:yapa sokope tokeyamale mate dudukupame sekellati ma woloma kokallepo depame dlapa teleka:le dulu dla hatitimdiyo. † **11:8-9:** Babilon hi i ya: dulu kokoye hutukuliyapo melle demama apopo.

<sup>16</sup> Epalati Ebeltapo 34 sokomoko halepo gudepame ya:lluta maseyemala hamaiyo, ya: hiye Peleg. <sup>17</sup> Epame Peleg hamale alotle Ebelta 430 sokomoko dulu dla halemama akimlala opi mate epo utukaka opi mate hatitimaiyo.

<sup>18</sup> Epalati Pelegtapo 30 sokomoko halepo gudepame ya:lluta maseyemala hamaiyo, ya: hiye Leu. <sup>19</sup> Epame Leu hamale alotle Pelegta 209 sokomoko dulu dla halemama akimlala opi mate epo utukaka opi mate hatitimaiyo.

<sup>20</sup> Epalati Leutapo 32 sokomoko halepo gudepame ya:lluta maseyemala hamaiyo, ya: hiye Selug. <sup>21</sup> Epame Selug hamale alotle Leuta sokomoko 207 dulu dla halemama akimlala opi mate epo utukaka opi mate hatitimaiyo.

<sup>22</sup> Epalati Selugtapo 30 sokomoko halepo gudepame ya:lluta maseyemala hamaiyo, ya: hiye Nahol. <sup>23</sup> Epame Nahol hamale alotle Selugta 200 sokomoko dulu dla halemama akimlala opi mate epo utukaka opi mate hatitimaiyo.

<sup>24</sup> Epalati Naholtapo 29 sokomoko halepo gudepame ya:lluta maseyemala hamaiyo, ya: hiye Tela. <sup>25</sup> Epame Tela hamale alotle Naholta 119 sokomoko dulu dla halemama akimlala opi mate epo utukaka opi mate hatitimaiyo.

<sup>26</sup> Epalati Telatapo sokomoko 70 halepo gudepame akimlala dapahatlope hatitimaiyo, yia: hiye A:iblam, epo Nahol, epame Halan.

### *Tela ya: akimlala*

<sup>27</sup> Tela ya: akimlalaye A:iblam, epo Nahol, epame Halan. Halan yamiye Lotpo. <sup>28</sup> Epame Halan ya: a Tela ala me-hallati Halan mo-powaiyo, Kaldeya mo pato dulu dla ya: mo ikadepe Ul dla. <sup>29-30</sup> A:iblam mate epo ya: ei Nahol mate wola: halomaiyo. A:iblam ya:llu hiye Selai. Amasiyama Selaiye hamkapi polaiyo. Epalati Nahol ya:lluye Halan yoti Milkapo. Milka ya: bapaye Iskapo. <sup>31</sup> Epeleye Telatapo yami A:iblam mate epo ya: moma Selai mate epo Halan yami Lot mate elepame Ul mo tle alikili dla woyapame ma Keinan mo dla tamalaiyo. Amasiyama yia: Keinan mo dla tamalemama ma mo pato hale Halan mo dla tame woyapame medla ha:ha:iyo. <sup>32</sup> Telata 205 sokomoko halepame Halan mo medla powaiyo.

## 12

### *Godta A:iblam sisilamale koko*

<sup>1</sup> GODta A:iblam watle epo atlaiyo, “Wa: mo mate epo wa: opa mate epo wa: a ya: asiyadulo mate medla salepame na:ta wa: watle mo nati-iliwe mo dla tane. ✧ <sup>2-3</sup> Epame na:tapo wa: gademama wa: mamaduloye ma a:ma pasatepo mellowepo. Epame wa: hi mape pato dlowepo. Epapele dulu dla wa: dla siyele hamilalo so dla asiyama na:ta yia: dla siyele hamilowepo. Epame wa: dla wotiyalle hamilalo so dla asiyama na:tapo yia: dla wotiyalle hamilowepo. Epapedeme wa: tle ta:la so hapuloma dla siyele hampulupe.”✧

<sup>4-5</sup> Epalati A:iblamta 75 sokomoko hallati GODta atlale yu e dolumama Halan moye saliyome taiyo. Ya: tamama ya:llu Selai mate epo ya: aluwa Lot mate epo ya:ta Halan mo dla halemama alisisi hapuloma halopo halale mate epame ya: oko so hapuloma mate Keinan mo dla ma-tamalaiyo. <sup>6</sup> Yia: Keinan mo dulu edla siyamama Sekem mo dla puame woyamaiyo. Epame aiyalma dali Mole mo dla hallalo dla tame woyamaiyo. Oloma edla Keinan soye ala mo medla me-ha:ha:iyo. <sup>7</sup> Epalati GODta A:iblam watle woyapo epo atlaiyo, “Na:tapo wa: mamadulo dla ta:la iye hamilowepo,” diyo. Epame A:iblamtapo GOD dla alinepi poyupo ha:lalo tile haiyo. ✧

<sup>8</sup> Ya: Sekem mo medla halepame matle donapi mo dla hetame Betel moye salita tullalo tiyama dla pomele epo Ai moye salita matlalo tiyama dla pomele depame duka dla kimiyo. Edla mape GOD dla alinepi poyupo ha:lalo tile hapame inoma sumama GOD hi di dla ta:diyo. <sup>9</sup> Epame ma mo e saliyome tamama Negeb mo dla tuluiyo.

✧ **12:1:** Taiya 7:2-3; Hib 11:8 ✧ **12:2-3:** Gal 3:8 ✧ **12:7:** Taiya 7:5; Gal 3:16

*A:iblamta Isip mo dla tale*

<sup>10</sup> Oloma edla Keinan mo dla dlowe alisisita pa:lati A:iblamta ma Isip mo dla halowedeme tuluiyo. <sup>11</sup> Epame yia: Isip mo dla mo-ulatuluwedeme ha:ha:mama A:iblamta ya:llu Selai watle epo atlaiyo, “Wa:ye a:ya pta ka:pi. <sup>12</sup> Epapedeme dita Isip mo dla tulupiye, mo sota di natipame ipo atlowe sepena, ‘A:ya iye ya:llupo,’ depame na:ye yumama wa: tlo pomellowe sepena. <sup>13</sup> Epedeme wa:ta asiyama yia: watle atlemama wa:ye notumala dlepe. Wa:ta epapelepiye, yia:ta wa: natimama na:ye poyumuluwa,” diyo. ✧

<sup>14</sup> Epedeme yia:ta Isip mo dla puame woyamalati Isip sota Selai natipame a:ya pta ka:pi diyo. <sup>15</sup> Epame Isip mo dokopala oplami Pelo ya: oko sotapo Selai natipame ma tame yia: dokopala oplami Pelo watle atlemama a:ya sikemte ka:dena depame ma ya: hala dla sempuaiyo. <sup>16</sup> Epalati dokopala oplami Pelotapo semte Selaiye A:iblam yotimala tepo depame A:iblamye woloma gadiyo. Epammama ya: watle sipi aliya mate epo bulumkiyawa aliya mate epo donki aliya molalatalo mate patetalo mate epame oko so opa mate wola: mate epo ka:mol aliya mate hohopo iyo. <sup>17</sup> Amasiyama A:iblam ya:llu Selai koko tle Pelo mate epo ya: oko so mate dla GODta esiyele pato hamiyo. <sup>18</sup> Epalati Pelotapo A:iblam watle hihimama epo atlaiyo, “Wa: apa kokoye na: watle hauwa? Wa: adipalati na: watle Selaiye na: a:ya pe-epalalo wekuwa? <sup>19</sup> Epame wa: adipalati Selaiye notumala duwa? Wa:ta epo atluwa koko tle na:tapo ya: halowedeme na: aya dla semtauwapo. Epapedeme wa: a:ya ipo. Wa: ya: sepame ma-tane,” diyo. <sup>20</sup> Epame Pelotapo A:iblam koko dla ya: opa watle itiyamale yu atlati yia:tapo A:iblam mate ya:llu mate dla ma-taiya diyo. Epalati yia:tapo yia: alisisi hapuloma mate matamalaiyo.

**13***A:iblam mate Lot mateta miyelo ta ta dle koko*

<sup>1</sup> Epedeme A:iblam mate epo ya:llu Selai mate yia: alisisi hapuloma halopo Isip mo saliyome ma Negeb mo dla ilamtaiyo. Epalati ya: aluwa Lotta ya: mate taiyo. <sup>2</sup> Epele dulu dla A:iblamtapo alisisi pasatale halemama alinepi mate epo mani mate sikemte pasatale oplami halaiyo. <sup>3</sup> Epame A:iblamtapo Negeb mo tle ma Betel mo dla umula tamama duka dla kimpo halepo ma a:ma tademtaiyo. Epammamama tame ya:ta ka:yapa kimili mo Betel ka: epo Ai ka: duka dla woyapo kimiyo. <sup>4</sup> Epapeleye mo hema ya:tapo ka:yapa puame kimpo halemama God dla alinepi poyupo ha:lalo tile haiyo. Epame ya: ma mo hatlo hema puame GOD dla inoma sumama ya: hi di dla ta:diyo.

<sup>5</sup> Oloma hema Lottapo ya: yimlala mate epo ya: oko so mate epo aliya halo hapuloma mate me-eleme A:iblam mate sela:iyo. <sup>6</sup> Amasiyama yia:ta madipatata yia: halo hapuloma mate ha:ha:le dulu dla mota yia: mate po-ala:iyo. <sup>7</sup> Epalati A:iblam ya: aliya halo omha:ha:lalo so mate epo Lot ya: aliya halo omha:ha:lalo so mate ta:la yilo yu topuloliyo. Amasiyama oloma edla yia:ta ha:ha:le mo dla Keinan so mate epo Pelisi so mate me-ha:ha:iyo. <sup>8</sup> Epeleye A:iblamta Lot watle epo atlaiyo, “Wa: mate na: mate ta:la yilo yu dlomha:ha:lowe poka:dena. Epame wa: opa mate epo na: opa mate yu dlomha:ha:lowe poka:dena. Adipalati, di asiya hatlopepo. <sup>9</sup> Ta:la hatlo ita pe-elasma. Epedeme di duka gladepame meyelo ta meyelo ta dlowe ka:pi. Epedeme mo pato hema wa:ta solotamale hadima ellepie, wa: mo e halepe. Epele dulu dla wa:ta dowala tiyama dla telepiye, na: asiyama weke tiyama dla tlowepo. Amasiyama wa:ta weke tiyama dla telepiye, na: asiyama dowala tiyama dla tlowepo,” diyo.

<sup>10</sup> Epalati Lotta mo halowedeme toko Yoden aloma pili dla natitepo, wou mo sikemte ka:dle natiyo. Epame ya:ta mo e natili dla mo eye semte GODta osalo himili tepo diyo. Epame semte Isip mo tepo diyo. Koko iye GODta Sodom mo mate epo Gomola mo mate

ala poyulalo hallati apiyo. ☆ <sup>11</sup> Epedeme Lottapo Yoden aloma pili dla mo halowe solotamale atlaiyo. Epapedeme yia:ta madipatatapo duka gladepame meyelo ma-ta meyelo ma-ta diyo. <sup>12</sup> Epalati A:iblamtapo Keinan mo medla me-halaiyo. Epalati Lottapo Yoden aloma pili dla Sodom mo pato mateka:pi dla kimtimsela:mdiyo. <sup>13</sup> Amasiyama Sodom sotapo GOD mila:pi tle pta sikemte batalimale koko patoto halomha:ha:iyo.

<sup>14</sup> Epapeleye Lotta A:iblam saliyome ma-tlati GODta A:iblam watle epo atlaiyo, “Wa:ta hala mo alikili dla tlamane. <sup>15</sup> Ta:la pato wa:ta nati iye na:ta wa: mate epo wa: mamadulo mate dla hamilowepo. Ta:la itapo kokó halepo ha:ha:le dulu dla wua:lë hallepe. ☆ <sup>16</sup> Epame na:tapo wa: mamaduloye sikemte pasatepo mellowepo. Epalati yia:tapo asila some sikemte pasatamama opata sesa:loweye po-ala:lowa. <sup>17</sup> Wa: wata sila:tipame mo tlamtane. Adipalati, na: mo pato iye wa: watle hamima.” <sup>18</sup> Epalati A:iblamtapo ya: kimna:ya dokostepo ma Heblon mo dla tame dali patoto polli Mamele mo mateka:pi dla kimpame GOD dla alinepi poyupo ha:lalo tile haiyo.

## 14

### *A:iblamtapo Lot pasakalo gadle*

<sup>1</sup> Oloma edla Kedolamelta Elam mo dla dokopala oplami halaiyo. Epalati Am-lapelta Babiloniya mo dla dokopala oplami halaiyo. Epalati Aliyokta Elasa mo dla dokopala oplami halaiyo. Epalati Tidalta Goim mo dla dokopala oplami halaiyo. <sup>2</sup> Dokopala so iwolotapo dokopala so opi do supulastale so mate opahale dlowedeme alumaiyo. Epedeme dokopala so do supulastale ewoloye ipo, Belaye Sodom mo dokopala oplamipo, epalati Bilsaye Gomola mo dokopala oplamipo, epalati Sinabye Adama mo dokopala oplamipo, epalati Semebelye Seboim mo dokopala oplamipo, epame dokopala oplami hale Bela mo dla hallalo. Bela mo i ya: hi haleye Sowa demdepo. <sup>3-4</sup> Dokopala so do supulastale iwoloye Kedolamel tapo sokomoko 12 dulu dla yia:ye dokopala depo halemama omhalaiyo. Epame 13 sokomoko mo-umulati dokopala so ewolota ya:ye ma-aliyo. Epapalati yia:tapo Kedolamel mate opahale dlowedeme yia: opa eleme puame Sidim pili dla alumaiyo. Mo iye wata Solo Kaulata gola:depo halapo.

<sup>5</sup> Epame 14 sokomoko umulati Kedolamel mate epo ya: mate tamalale dokopala so mate tame Lepa so, Astelot Kanaim mo dla ha:ha:laloye kotlopame ma Susi so, Ham mo dla ha:ha:laloye kotlomaiyo. Epame yia: ma tame Emi so, Sabe Kiliyataim mo dla ha:ha:laloye kotlomaiyo. <sup>6</sup> Epame matle Seil tamali di dla ha:ha:lalo Holi soye posalem tame dalupa mo mateka:pi dla hallalo El Palan mo dla gudiyo. <sup>7</sup> Epame yia: ma i-ilapo puame ma En Mispa mo dla taiyo. Mo i ya: hi haleye Kadespo. Epame yia: mo edla puame Amalek so yia: moye kolahaiyo. Epame yia: ma tame Amoli so, Hasason Tama mo dla ha:ha:laloye kotlopame yia: ta:laye kolahaiyo. Epame yia: matle Sidim pili dla puame alumaiyo.

<sup>8</sup> Epame yia: edla puame alumalati dokopala so do supulastale tapo yia: mate nalati-molowedeme dinapiyo. Dokopala so do supulastale ewoloye ipo, Sodom mo dokopala oplami, epo Gomola mo dokopala oplami, epo Adama mo dokopala oplami, epo Seboim mo dokopala oplami, epo Bela mo dokopala oplami. <sup>9</sup> Epele dulu dla Kedolamel wolotapo dokopala so do supulastale mate nalatimaiyo. <sup>10</sup> Yia:ta nalatimale dulu dla Kedolamel wolota itiyamalati Sodom so mate epo Gomola so mate potamama opa opiye munamu dulu dla tutula:mtaiyo. Epalati opa opi tlo tamali di dla pehetaiyo. <sup>11-12</sup> Epalati Kedolamel wolota puame Sodom mo mate Gomola mo mate kotlopame opa mate wola: mate elem tamama A:iblam ya: aluwa Lot mate hamam taiyo. Adipalati, ya: ma Sodom mo medla halaiyo.

<sup>13</sup> Epame oloma edla hemele teletale oplami haletapo puame Hibulu oplami A:iblam watle koko woyamale hapulomaye atlamaiyo. Oloma edla A:iblam ye Amoli oplami

Mamele ya: dali patoto mateka:pi dla halaiyo. Epeleye Mamele mate epo ya: eidulo Esko mate Ane mate A:iblamye sikemte gademha:ha:mdiyoy. <sup>14</sup> A:iblamta ya: aluwa Lotye opahale sota hamame tale dalepame ya:tapo ya: opa, opahale dlowe sikemte malastale so 318 opa epapeleye elemayoy. Epame yia:tapo Kedolamel woloye alotle dolumtame Dan mo dla popa:lali umayoy. <sup>15</sup> Epame utula:la oloma edla A:iblamta ya: opaye huhukulupame alumale meyelo meyelo de po hatitimayoy. Epame yia:tapo Kedolamel ya: opaye poyumama opi tlo posalem tame Damasko mo tla:mtame tota ikadepe Hobo mo dla woyamayoy. <sup>16</sup> Epapeleye A:iblam tapo Kedolamel wolota Sodom mo mate Gomola mo mate dla halomale alisisi hapuloma mate epo mo so hapuloma mate ma i-ilapo elem puayoy. Ya: ilampumama ya: aluwa Lot mate epo ya: alisisi hapuloma mate halopo puayoy.

*Melkisedekta A:iblam yilo inoma sumama ya: hi di dla ta:dle*

<sup>17</sup> A:iblamta dokopala oplami Kedolamel mate epo dokopala so opi mate kotlopo poyupame pulati Sodom mo dokopala oplamita ya: umuluwedeme Sabe pili dla taiyo. Epedeme mo i ya: hi haleye dokopala sota ha:ha:lalo mo demama apopo.

<sup>18</sup> Epame Salem mo dokopala oplami Melkisedek mape daya mate epo wain yú mate halopo A:iblam watle halopila puayoy. Ya:ye di ikadepe dla hallalo God ka: epo opa ka: duka dla hallalo halaiyo. ✧ <sup>19-20</sup> Epapeleye ya:ta A:iblam watle epo atlaiyo, “Pepele di mate ta:lamo mate mimita:polalo Godta wa: mate hallepe. Epedeme na: di ikadepe dla hallalo God hi di dla ta:dema. Adipalati, wa: dla opahale dlalo soye ya:ta hohopame wa: do tama dla ipila:uwapo,” diyo.

Epame A:iblamta ya:ta opahale dele dulu dla halomale alisisi hapuloma kolumtame 10 dleye meyelo meyelo de po kokolupame ma dulu edla kolumale hatlo tlo Melkisedek watle hamiyoy. <sup>21</sup> Epalati Melkisedekta A:iblam saliyome tlati Sodom mo dokopala oplamita puame A:iblam watle epo atlaiyo, “Na: wa: dla siyema, wa:ta opahale dele dulu dla na: mo so mate epo na: alisisi hapuloma mate ma i-ilapo halomale dla. Epedeme alisisi tlo mowolo halomama asiyama na: mo so opa mate epo wola: mate epo yimlala mate tlo na: watle halopine,” diyo.

<sup>22</sup> Amasiyama A:iblamta ya: watle epo atlaiyo, “Na: ta:lamo mate epo pepele di mate mimita:polalo di dla hallalo God hi tle wa: watle ipo atlema, <sup>23</sup> Na: wa: alisisiye pohalomolowa. Adipalati, na: posolotamasema, wa:ta ma alotle na: koko dla atlemama wa:ta na:ye alisisi pasatale oplami duwa dloweye. <sup>24</sup> Epapele dulu dla wa: alisisi dulu dla na: opata dlowe alisisi opiye mo-douwa, epedeme eye na:ta wa: dla halomolowe asiyama epo. Amasiyama wa: ka:dena, na: mate tamalale so opa Ane mate Esko mate epo Mamele mate dla alisisi halopiliweye.”

## 15

*Godta A:iblam dla yu itiyapo himili*

<sup>1</sup> Koko ita tame gudlati A:iblam inomata meyelo dle oloma edla Godta ya: watle epo atlaiyo, “A:iblam, wa: ase sikemte wota:miya. Na:tapo wa: pasakalo gadlalo halemama wa: dla ka:ka:dle koko halopimhallepe,” diyo.

<sup>2-3</sup> Amasiyama A:iblamta epo atlaiyo, “Na: pato God, wa: apa kokoye na: watle hamipa:? Adipalati, na: maseyemala pa:le halema. Epedeme na:ta polati na: oko oplami, Damasko dla hallalo Eliyeselta na: elo dla hallalo hallepe. Adipalati, wa:ta na: watle akimlalaye pohapina,” diyo.

<sup>4</sup> Epalati Godta asiyama A:iblam watle atlemama epo atlaiyo, “Wa: oko oplamitapo wa: elo dla pohallowa. Amasiyama mo-wa: maseyemala ikadepetapo wa: elo dla hallepe,” diyo. <sup>5</sup> Epame Godta A:iblamye aya alikili dla semtame halemama epo atlaiyo, “Wa:

✧ 14:18: Hib 7:1-10



inoma mate omapla di dla natine. Wa: ala:lepiye, wa: tamili hapuloma eye sesa:pa:mele pokadene. Wa: mamadulotapo tamili some epo pasatlepe,” diyo.✧

<sup>6</sup> A:iblamta GODta atlale yu dla mikadepe diyo. Epalati asiyama GODta ya:ta mikadepe dle natipame ya:ye ka:dle oplami diyo. ✧ <sup>7</sup> Epame Godta ya: watle epo atlaiyo, “Na:ye GODpo. Na:tapo wa:ye Kaldeya mo dla Ul mo yemala tle hema sempumama api impuwapo. Na:ta mo iye wa: watle hamilati wa:ta mo eye ikadepe wolë dlepo depame sempuwapo,” diyo.

<sup>8</sup> Epalati A:iblamta asiyama epo atlaiyo, “Na: pato GOD, na:ta ikadepe mo i halowepe apa kokota na: ipa:?” diyo.

<sup>9</sup> Epalati GODta A:iblam watle epo atlaiyo, “Wa: na: watle bulumkiyawa aliya molala mate epo gaut aliya molala mate epo sipi aliya pate mate elempuane. Wa: na: watle aliya elempumama sokomoko dapahatlope oloma dla ha:ha:lalo tlo elempuane. Epammama seselema mate epo hilipi yemala mate ma hohopo puane,” diyo.

<sup>10</sup> Epalati A:iblamta alinepi hapuloma iwoloye hohopame elempuaiyo. Epame poyupo duka gaglatipame moto semeye seme dla hatitimta epo moto semeye seme dla hatitimta diyo. Amasiyama tea tlo duka pogladlalo mepo hatitimaiyo. <sup>11</sup> Epalati kepili tea mo i tlapame di tle keketamsiyamama mallati A:iblamta posaliyo.

<sup>12</sup> Epame salita mo-tutula:mtullati inoma ta:le patota A:iblam dla pulati ya: elaiyo. Epalati milamalo amtuwaleta puame ya: bopudlati natimama ya: sikemte wota:iyo.

✧ <sup>13</sup> Epame GODta ya: watle epo atlaiyo, “Wa: mamadulotapo ta:lamo hale dla tame ha:ha:mama asepe so some ta:la pa:le ha:ha:lepe. Epame yia:tapo 400 sokomoko dulu dla opa dla asiyama pa:le oko halomha:ha:mama wotiyalle dulu dla ha:ha:lepe. ✧

<sup>14</sup> Amasiyama yia: dla wotiyalle hapilalo so dla asiyama na:ta wotiyalle hapilowepo. Epame wa: opatapo mo etle alikili dla woyamama alisisi pasatale mate woyamelepe. ✧

<sup>15</sup> Amasiyama wa:ye, wa: totoyemala ikadepe halemama ka:dle api tle polati alotle koko ita woyamelepe. <sup>16</sup> Epalati wa: mamadulotapo 400 sokomoko dulu dla asiyama pa:le oko dla wotiyalle halomha:ha:pame ma ilame mo hema pumullupe. Adipalati, Amoli so hema ha:ha: yia: batalimaleta ta:mpuame gudlowe sukuluye ala po-umasema.”

<sup>17</sup> Epalati salita mo-tullati mota ma-amtuwaiyo. Epalati pakasiyamalalo namtiyape otomale mate epo tuloma otomale mate woyapame mo epallita hutiyeye dlatimale duka dla siyamaiyo. <sup>18</sup> Alila oloma edla GODta A:iblam dla yu itiyapo himmama epo atlaiyo, “Wa: mamadulo dla na:ta ta:la iye hamilowepo. Ta:la ya: sukuluye ipo, Isip aloma tle kotiyapame tame Yupalates aloma pato dla gudepo. ✧ <sup>19</sup> Amasiyama wata oloma hema opa iwolotapo ta:la hema me-ha:ha:po. Eye Keni sopo, epo Kenisi sopo, epo Kadomona sopo, <sup>20</sup> epo Hitai sopo, epo Pelisi sopo, epo Lepa sopo, <sup>21</sup> epo Amoli sopo, epo Keinan sopo, epo Gilgasi sopo, epame Yebusi sopo. Epedeme opa hapuloma iwolo ta:laye na:tapo wa: mamadulo watle hamilowepo.”

## 16

### *Hagaita Ismael hamale koko*

<sup>1</sup> A:iblam ya:llu Selaiye yimlala pohohomalalo hamkapi polaiyo. Epeleye ya: aya dulu dla Isip a:ya ipilalo haleta ya: oko hamhalaiyo, ya: hiye Hagai. <sup>2-4</sup> Epapeleye Selaita A:iblam watle epo atlaiyo, “Na: GODta na:ta yimlala hohomolowe apiye godena. Epapedeme wa: wata tame na: oko a:ya ipilalo Hagai hane. Epame ya:ta yimlala hatitimelepiye, eye nolëpo,” diyo. Epalati A:iblamta Selai yu dla dalepo ka:dena depame Hagaiye haiyo. Epedeme koko iye A:iblamta tame Keinan mo dla sokomoko 10 halale

✧ **15:5:** Loum 4:18; Hib 11:12 ✧ **15:6:** Loum 4:3; Gal 3:6; Yei 2:23 ✧ **15:12:** Yob 4:13, 14 ✧ **15:13:** Eke 1:1-14; Taiya 7:6 ✧ **15:14:** Eke 12:40-41; Taiya 7:7 ✧ **15:18:** Taiya 7:5

oloma edla apiyo. Epalati alotle Hagaita ya:ta mopapo polaleye natipame A:iblam ya:llu ikadepe Selaiye kokosa:mdiyo.

<sup>5</sup> Epalati Selaita A:iblam watle epo atlaiyo, “Hagaita na: kokosa:mhala kokoye e mo-wa: batalimalepo. Amasiyama na:ta ya:ye wa: watle hamiwapo, epapele tlope ma ya:ta mopapo polale natipame ma na:ye kokosa:mhalapo. Epedeme GODta wa: mate epo na: mate di kokoye gladlowe ka:dena,” diyo.

<sup>6</sup> Epalati A:iblamta asiyama ya: watle epo atlaiyo, “Hagai iye wa: oko a:yapo. Epedeme wa:ta solotamale koko ya: dla halowedeme me-hane,” diyo. Epalati Selaita Hagai dla kasilamama ya: dla wotiyalle hapimhallati ya:tapo wota:mama alikili dla woyapo teletaiyo. <sup>7</sup> Hagaita teletame dalupa dulu dla woyapo ma Sul mo dla tlalo api alikili dla yú matale hallati medla polaiyo. Epalati GOD ya: banakaka oplamita tulumé ya: watle epo atlaiyo, <sup>8</sup> “Hagai, Selai ya: oko a:ya, wa: hadima tlowedeme adi tle puame poloma:?” diyo.

Epalati asiyama Hagaita epo atlaiyo, “Na:ye na: omhallalo a:ya Selai tle alikili dla woyapo tama,” diyo.

<sup>9</sup> Epalati GOD ya: banakaka oplamitapo ma ya: watle epo atlaiyo, “Wa: ma ilamtame wa: omhallalo a:ya Selai yu dla salladepo sela:ne,” diyo. <sup>10-11</sup> Epame ma epo atlaiyo, “Wa:ta mopapo polaye hatostamama maseyemala hamelepe. Epalati wa:tapo ya: hiye Ismael\* dlepe. Adipalati, wa:ta dupa kolle kokoye GODta ma-daluwapo. Epame na:tapo wa: awaduloye sikemte pasatepo mellowepo. Epalati oplami haleta posesa:pa:mellowa. <sup>12</sup> Amasiyama wa: maseyemala Ismaeltapo aliya yowo some itiyamale mate halemama opa hapuloma dla opahale demhallepe. Epammama ya: eidulo mate ma opahale demhallepe.”

<sup>13</sup> Epame Hagaita koko i natipo sikemte yelemama epo malamaiyo, “Yao ikadepe, na: ikadepe God natili tlope na: popowasema,” diyo. Epammama ya:tapo GOD hi semama, na: natimhallalo God diyo. <sup>14</sup> Epapele koko tle opatapo yú matale e semama Bel Lahai Loi† demdiyo. Yú matale iye Kades mo ka: epo Beled mo ka: duka dla halaiyo.

<sup>15-16</sup> A:iblamta 86 sokomoko halale oloma edla Hagaita maseyemala hamaiyo. Epalati A:iblamta maseyemala watle Ismael hiye hamiyo. ✧

## 17

### *Kapala kotimolowe kokoye Godta yu itiyapo himili ulupo*

<sup>1</sup> A:iblamta 99 sokomoko halale oloma edla GODta ya: dla woyapame epo atlaiyo, “Na:ye itiyamale Godpo. Epedeme wa: na: mila:pi tle sela:mama woloma ullu pa:po hallepe. <sup>2</sup> Epame na:ta wa: dla yu itiyapo himiwaye e kokalepame wa: mamadulo mape pasatepo mellowepo,” diyo. <sup>3</sup> Epalati A:iblamta ta:la dla akukulume polomama ya: mila:pita ta:la umpo pollati Godta epo atlaiyo, <sup>4-5</sup> “Na:ta wa: dla yu itiyapo himiliye ipo, wa:tapo ta:la so hapuloma yia: a hallepe. Epedeme wata oloma hema wa: hiye ma po-A:iblam dlowa, amasiyama wa: hiye ma A:iblaham\* dlepe. ✧ <sup>6</sup> Epedeme na:tapo wa: mamaduloye ma-a:ma sikemte pasatepo mellowepo. Epalati yia:tapo yia: dulu dla dokopala hi halopo ha:ha:mtelepe. <sup>7</sup> Epedeme na:tapo wa: mate epo wa: mamadulo mate yia: God depo hallowedeme yu itiyapo himili itapo kokó elepe ellepe. ✧ <sup>8</sup> Epame wata wa:ta Keinan mo dla asepe oplami some hala mo iye na:tapo wa: watle epo wa: mamadulo watle hamilowepo. Ta:la itapo mepo kokó wua: hi mate ellepe. Epame na:ta wa: mamadulo yia: God hallowepo.” ✧

\* **16:10-11:** Ismael hi i ya: dulu kokoye God ya: opa yu dallalo demama apopo. † **16:14:** Bel Lahal Loi hi ya: dulu kokoye na: natimhallalo God ya: yú matale demama apopo. ✧ **16:15-16:** Gal 4:22 \* **17:4-5:** A:iblam hi i ya: dulu kokoye mama pato demama apopo. Epame A:iblaham hi i ya: dulu kokoye opa hapuloma yia: a demama apopo. ✧ **17:4-5:** Loum 4:17 ✧ **17:7:** Luk 1:55 ✧ **17:8:** Taiya 7:5

<sup>9</sup> Epame Godta A:iblaham watle ma epo atlaiyo, “A:iblaham wa: mate epo wa: mamadulo mate na: yu dla salladepo siyamelepe. <sup>10-11</sup> Epele dulu dla wua:ta na: yu dla salla depo siyamolowe nati-imama wua: dulu dla opa hapulomatapo kapala kotimolowe kotiyapame ma wua: akimlala dla hamilipe. ✧ <sup>12-13</sup> Epame wata oloma itle kotiyapo tamama akimlala hohopo alila 8 umalati kapala kotima demha:ha:lepe. Epammama wa: oko so hapuloma mate epo yia: akimlala mate kapala kotima demha:ha:lepe. Epame asepe oplamita puame wa: oko hamhallepiye, ka:dena ya: mate epo ya: akimlala mate kapala kotimha:ha:loweye. Wua: moto dla ulu hutiyetapo wua:ta na:ta yu itiyapo himili koko dulu edla ha:ha:ye alila hapuloma dla botomastamhallepe. <sup>14</sup> Epele dulu dla oplami antapo kapala pokestlalo hallepiye, ya: na: opa dulu dla pohallowa. Adipalati, ya:tapo na:ta yu itiyapo himi iye mo-postamama apelepe,” diyo.

### *Aisekye yu itiyapo himili maseyemalapo*

<sup>15</sup> God matle A:iblaham watle epo atlaiyo, “Wa: matle wa: a:ya hi semama po-Selai demhallowa. Amasiyama wa: wata oloma itle tamama wa: a:ya semama Sela demhallepe. <sup>16</sup> Na:tapo ya: gadlati ya:ye maseyemala hamelepe. Epalati wa:tapo ya: a hallepe. Epalati Selatapo ta:la so hapuloma yia: wai hallepe. Epame ya: awadulo opitapo dokopala hi halopo ha:ha:mtelepe,” diyo.

<sup>17</sup> Epela dalepame A:iblahamta alumata akukulumpolomama ya: mila:pita ta:la dla umpo eimale mate ya:skamu ya: dla epo atlaiyo, “Ka:deta:, oplamita 100 sokomoko halemama maseyemala himiloweye? Hao, po-ala:na. Epame a:yata 90 sokomoko halemama maseyemala hamoloweye ka:deta:? Hao, po-ala:na,” diyo. <sup>18</sup> Epame A:iblahamta God watle ma epo atlaiyo, “Ame poka:deta:, wa:ta Ismael ma wa:ta yu itiyapo himili maseyemala dloweye?” diyo.

<sup>19</sup> Epalati Godta epo atlaiyo, “Hao pe-epapolowa. Amasiyama wa: a:ya Selatapo wa: elo ikadepe dla hallowe maseyemalaye hamelepe. Epalati wa:ta ya: hiye Aisek dlepe. Epame na:ta wa: dla yu itiyapo himiwatapo ya: mate epo ya: mamadulo mate dla kokó ellepe. <sup>20</sup> Amasiyama wa:ta Ismael koko dla otele yu himiliye na: me-dalema. Epedeme na:tapo ya: gademama ya: mamaduloye sikemte pasatapo mellowepo. Ya:tapo elele 12 sitali hallepe. <sup>21</sup> Amasiyama na:ta wa: dla yu itiyapo himiwaye ma Aisek mate ellepe. Maseyemala iye Selata sokomoko hale dla alila oloma me-ipapele dla hamelepe.”

<sup>22</sup> Godta A:iblaham mate yukamhalale medla gudepame ya: saliyome me-hetaiyo. <sup>23-27</sup> Epalati Godta atlale yu e dolumama alila hatlo medla A:iblahamtapo ya: mate epo yami Ismael mate kapala kotimaiyo. Epame ya: aya dulu dla ha:ha:le opa hapuloma mate epo yia: akimlala hapuloma mate epo ya: oko so opa hapuloma asepe so mate alila hatlo medla kapala kotimaiyo. Amasiyama oloma hema A:iblahamtapo sokomoko ma 99 oloma dla halaiyo. Epalati yami Ismael tlo 13 sokomoko oloma dla halaiyo.

## 18

### *Godta A:iblaham watle Aisek hamolowe koko dla ikadepe atlale*

<sup>1</sup> Mamele mo dla aiyalma dali patotota ha:ha:le oloma dla Godta A:iblaham watle woyamaiyo. Alila oloma hema sali sikemte alemallati A:iblahamta ya: kimna:ya kokoloma tala homale dla polaiyo. <sup>2</sup> Ya: toko edla polomama ipo natitepo, opa dapa-hatlopeta ya: mateka:pi dla pumha:ha:la natiyo. Epalati A:iblahamta sila:time yia: hala dla kukulumtame heodepo polomama epo atlaiyo, ✧ <sup>3</sup> “Na: adulo, wua: na:ye alikili tle olostame tamiya. <sup>4-5</sup> Amasiyama wua: aseka dali tau hema hedepo popa:iya. Epalati na: tame wua: hete hoahalomolowe yú mate epo dlowe alisisi mate halopo puluwepo, wua:ta e depame ma itiyamale mate tloweye,” diyo.

Epalati asiyama yia:ta epo atlaiyo, “Ka:dena, wa:ta atla koko eye ka:pi,” diyo.

✧ **17:10-11:** Taiya 7:8; Loum 4:11 ✧ **18:2:** Hib 13:2



<sup>6</sup> Epalati A:iblaham hapele tame ya: aya dla tuwame ya:llu Sela watle atlemama epo atlaiyo, “Wa: hapele daya amko tlo hapo daya pato ha:ne,” diyo. <sup>7</sup> Epame matle kukulumtame ya: aliyata ha:ha:lalo mo dla tame aliya amkota:le sikemte kakaliyapele tlo hampo puame ma ya: oko oplami hale watle hamimama aliya iye ma-hapele yumpo ha:ne, diyo. <sup>8</sup> Epame A:iblahamtapo aliya mo ya:ta ha:le mate epame bulumkiyawa aliya meme dala mate opa dapahatlope ewolo dla halopo taiyo. Epapeleye yia: daya mo-dlompopa:lati A:iblahamtapo dali tou dla halemama yia: omhalaiyo.

<sup>9</sup> Epalati yia:tapo A:iblaham watle epo atlaiyo, “Wa: a:ya Sela da:?” diyo. Epalati asiyama A:iblahamta epo atlaiyo, “Ya: aya dulu dla me-poloma,” diyo. <sup>10</sup> Epame GODta atlemama epo atlaiyo, “Sokomoko hale dla alila oloma hema na:ta matle pulupiye, wa: a:ya Selatapo maseyemala hamelepe,” diyo.

Amasiyama GODta epo atlempollati Selatapo hemele aya dulu dla polomama dalem-polaiyo. ✧ <sup>11</sup> Alila oloma edla A:iblaham mate Sela mate mo-totoyimlala ha:ha:iyo. <sup>12</sup> Epame Selatapo eimale mate polomama ya:skamu epo atlaiyo, “Na: mate na: oplami mate yimlala hatitimolowe po-ala:na. Adipalati, dia: dla itiyamale ma-hawapo. Epedeme siyele iye ikadepe na: dla pupa:?” diyo. ✧

<sup>13</sup> Epalati asiyama GODtapo A:iblaham watle epo atlaiyo, “Adipalati Selatapo eimale mate atlemama ya:skamu ya:ye owayemala hamolowe dla sikemte alluyemala poloma di? <sup>14</sup> Epapele dulu dla koko adita GOD dla kokalle elema:? Epedeme na: sokomoko hale na:ta sale alila dla ma ilame puluwepo. Epalati oloma edla Selatapo maseyemala hamelepe,” diyo. ✧ <sup>15</sup> Amasiyama Selaye sikemte wota:mama ya:tapo eimale kokoye kesomama, na: pe-eimana, diyo. Amasiyama Godtapo ya: watle epo atlaiyo, “Hao, wa: me-eimalepo,” diyo.

### *A:iblahamta Sodom mo yilo God dla otele himili*

<sup>16</sup> Epame opata mo-tlowedeme sillipo ma Sodom tiyama dla tamalemama koloma di tle Sodom moye isili dla hallati omtamalaiyo. Epalati A:iblahamtapo yia: api duka dla pomellowedeme yia: mate taiyo. <sup>17</sup> Epame GODta ya:skamu epo malamaiyo, “Na:ta wata koko halowedeme api iye A:iblaham watle atlamolowe me-ka:pi. <sup>18</sup> Adipalati, A:iblaham ya: mamadulotapo sikemte pasatlepe. Epame na:tapo ya: tle ta:la so hapuloma dla siyele hampulupe. <sup>19</sup> Adipalati, na:tapo ya:ye mo-souwapo, ya:tapo ya: mamaduloye GOD yu imama ka:ka:dle koko tlo halomha:ha:lepo depame. Epalati na:tapo ya: dla yu itiyapo himiwa kokoye e hamilowepo,” diyo.

<sup>20</sup> Epedeme GODta A:iblaham watle epo atlaiyo, “Sodom mo mate epo Gomola mo mate dla ha:ha:lalo sota batalimale koko patoto halomha:ha:leye na: me-daluwapo. <sup>21</sup> Epapedeme na: monolo tulume yia:ta koko halomha:ha:le hapulomaye natilowama,” diyo.

<sup>22</sup> Epalati opa dapiyamtetapo God mate A:iblaham mate medla ha:ha:lati yia: tlo ma Sodom mo tiyama dla taiyo. Amasiyama A:iblahamtapo GOD mila:pi tle me-halaiyo. <sup>23</sup> Epame A:iblahamta Godta hala mateka:pi dla tuwame halemama epo atlaiyo, “Na: Lod, wa: bobtalimale so poyumama ka:ka:dle so mate poyupa:? <sup>24</sup> Wa: mo edla ka:ka:dle so opa 50ta ha:ha:la natimama adipapopa:? Wa: mo eye mepele me-yupa:? <sup>25</sup> Amasiyama na:malamana, wa:ye ka:ka:dle so opa mate batalimale so opa mate hatlo godepame po-poyuluwa. Adipalati, wa:ye ta:lamo so opa hapuloma koko gladlalo oplamipo. Epame wa:ye isikimi ka:ka:dle koko siyapo tlo halomdepo,” diyo.

<sup>26</sup> Epalati GODta asiyama A:iblaham watle epo atlaiyo, “Na:tapo Sodom mo dulu dla ka:ka:dle so opa 50 tlamelepiye, na: yia: yilo mo eye poyuluwa,” diyo.

<sup>27</sup> Epalati asiyama A:iblahamta God watle epo atlaiyo, “Lod, na: po-ka:dle oplami, na: isikimi ta:lamo oplamipo. Amasiyama epapele tlope na: wa: dla yu hale atlowe

solotama. <sup>28</sup> Wa: mo edla ma isikimi 45 opa ka:ka:dleta ha:ha:la natimama wa: mo eye me-yupa?" diyo.

Epalati asiyama Godta epo atlaiyo, "Na: 45 opa ka:ka:dle so natilipiye, na: mo eye poyuluwa," diyo.

<sup>29</sup> Epalati A:iblaham matle God watle epo atlaiyo, "Ame wa: 40 opa ka:ka:dle so natimama mo eye me-yupa?" diyo.

Epalati Godta asiyama ya: watle epo atlaiyo, "40 opa ka:ka:dle so tlamelepiye, na: yia: yilo mo eye poyuluwa," diyo.

<sup>30</sup> Epalati A:iblaham matle God watle epo atlaiyo, "Lod, wa: na: dla siyalademiya. Adipalati, na: matle wa: watle yu hale atlowe solotama. Ame wa: ka:ka:dle so opa 30 tlamelepiye, wa: mo eye me-yupa?" diyo.

Epalati asiyama Godta epo atlaiyo, "Hao, na: ka:ka:dle so opa 30 tlamelepiye, na: yia: yilo mo eye poyuluwa," diyo.

<sup>31</sup> Epame A:iblahamta mamsika: God watle epo atlaiyo, "Lod, na:ta wa: dla atlanatili yu atlamhala hema wa: ase sikemte alimiya. Amasiyama wa: ka:ka:dle so opa 20ta mo dulu edla ha:ha:la natimama wa: mo eye me-yupa?" diyo.

Epalati Godta asiyama epo atlaiyo, "20 opata ha:ha:lepiye, na: yia: yilo mo eye poyuluwa," diyo.

<sup>32</sup> Epame A:iblahamta mamsika: epo atlaiyo, "Lod, wa:ta na: dla po-siyaladlalo wekelepiye, na: yu mosukulu tlo wa: dla atlowepo. Wa: opa ka:ka:dle so 10 siyapota ha:ha:la natipame mo eye me-yupa?" diyo.

Epalati Godta asiyama epo atlaiyo, "Na: ka:ka:dle so opa 10 ewolo yilo mo eye poyuluwa," diyo. <sup>33</sup> Epame Godta A:iblaham mate yukamhalaleye medla gudepame matlati A:iblaham mape ya: aya dla ilame ma-taiyo.

## 19

### *Sodom mo mate Gomola mo mate poyuli*

<sup>1</sup> Tamila:la oloma edla Lotta Sodom mo kosukulli kokoloma tala dla pollati banakaka so dapiyamte, A:iblaham mate yukamha:ha:le sotapo woyapo pumulaiyo. Epalati Lotta yia: natipame yia: hala dla tame heodepo polomama epo atlaiyo, <sup>2</sup> "Na: adulo, wua: aseka na: aya dla hedla puaiya. Epalati na:tapo wua: hete howahalomolowe yú tipo puluwepo. Epame wua: wata utula:la hatlo na: aya dulu hema hutiyepame ma iyela utulalati wua:ta solotamale mo dla tamalaiya," diyo.

Epalati asiyama yia:ta epo atlaiyo, "Hao, di wata utula:la isikimi mo duka haliyamale dla hutiyelowama," diyo. <sup>3</sup> Amasiyama Lottapo yia:ta madipataye me-ha:ha:pame ya: aya dla eleme hetame daya ilimaiyo. <sup>4</sup> Epalati yia: daya mo-depo popa:lati Sodom mo opa hapulomata Lot ayaye polomama olostaiyo. <sup>5</sup> Yia: Lot ayaye polemyemama ya: watle epo atlamyaiyo, "Wata tamila:la opa dapiyamteta wa: aya dla pumulale soye dia: watle eleme puane. Di solotama, yia: dla namile pasakalo ilimolowama," demyaiyo. ✧

<sup>6</sup> Epalati Lotta aya dulu tle alikili dla woyapame kokoloma himomeleme ma opa hapuloma dla epo atlaiyo, <sup>7</sup> "Namkadulo, wua: batalimale koko ipapele hamiya. <sup>8</sup> Na: aya dulu dla na: utukaka ipilatalo dapiyamte me-popa:ma. Epedeme na: tame wua: hala dla eleme puluwepo. Epalati wua:ta yia: dla solotamale koko me-haiya. Amasiyama wua: opa dapiyamte, na: aya dulu dla popa: iwolo dla batalimale koko hale pahalowa. Adipalati, yia:ta na: aya dla asepe pumulalepo. Epedeme na:ta yia:ye woloma omhalowama," diyo.

<sup>9</sup> Epalati asiyama yia:ta epo atlamyaiyo, "Wa: alikili dla gilidene, wa: hadima halalota:? Wa: isikimi asepe oplamita puame hema halema. Wa:ta dia:ye dokopala depo

✧ 19:5: Koko 19:22-24

halemama di koko dla humatlowe poka:dena. Ka! Wa: wolomape! Wa: alikili dla pogilidlalo hallepiye, dita asepe so dla koko halowedeme ape kokoye ma wa: dla sikemte pato halowepo,” demyaiyo. Epame yia:tapo Lotye ma alo dla ka:stamama ya: aya kokolomaye hauwokokomala yakomaiyo.

<sup>10</sup> Amasiyama banakaka so opa dapiyamteta haliyamale dla u-ulapo tuwame Lotye hamame aya dulu dla hallumtumama kokoloma tlo himomeliyo. <sup>11</sup> Epame yia:tapo aya alikili dla ha:ha:le so opa inomaye usiyepo meliyo, yia:tapo aya kokolomaye woloma ponatilalo wekelepo depame. ✧ <sup>12-13</sup> Epame banakaka sotapo Lot watle epo atlaiyo, “GODtapo Sodom sota batalimale koko patoto halomha:ha:leye ma-daluwapo. Epame di watle Sodom moye yula tuluiya duwapo. Epedeme wa: a:ya mate epo wa: utukaka mate epo wa: asiyadulo opi mate epo wa: dokodulo mate eleme mo itle hapele alikili dla woyapo tane. Adipalati, GODtapo mo iye yupo hamastlepe,” diyo.

<sup>14</sup> Epalati Lotta tame ya: utukaka dapiyamte opa dla halopiliwedeme yu hatitipo ha:ha:le so opa dapiyamte dla epo atlaiyo, “Wua: hapele sillipame mo itle alikili dla wowoyapo taiya. Adipalati, GODta mo iye mo-yuluwedeme amma,” diyo. Amasiyama opa dapiyamte iwolota Lot yu dalemama semte isikimi yia: mate asupumama ammapo diyo.

<sup>15</sup> Epame ala ka:yapa alalemtlati banakaka sota Lotye ha:ha:mama epo atlaiyo, “Wa: hapele wa: a:ya mate epo wa: utukaka dapiyamte mate elepame alikili dla woyapo teletane. Adipalati, Godta mo iye yumama wua: mate potimalala depame,” diyo.

<sup>16</sup> Amasiyama Lot ala dekelemsela:lati banakaka so opa dapiyamteta Lot do mate epo ya:llu do mate epo ya: utukaka do mate dla hohopame elepo hapele Sodom mo tle alikili dla woyamaiyo. Adipalati, GODtapo yia:ye sikemte malamaiyo. ✧ <sup>17</sup> Yia:ta hapulomatapo ma alikili dla wowoyapo tamha:ha:lati banakaka oplami haleta yia: watle epo atlaiyo, “Wua: pasakalo malamama alikili dla potaiya. Wua: potamama ma ilame ponatilowa, epame wou mo edla pohedepo ha:ha:lowa. Amasiyama wua: pasakalo yilo tamali di dla pohetlepe,” diyo.

<sup>18-19</sup> Amasiyama Lotta epo atlaiyo, “A, wa:ta na:ye sikemte polowamama na: pasakaloye gadlepo. Amasiyama wa: ase dita tamali di dla pohetlepo depame ha:ha:miyo, e pta pateka:mu. Di duka dla hetamha:ha:mama palilala,” diyo. <sup>20</sup> Epame Lotta ya: watle mo yemala hale nati-imama epo atlaiyo, “Mo yemala eye pase pateka:mu, dita edla hapele ullumtloweye. Epedeme dia:ye edla potaiya dene. Epelepiye, dia: popalliwa,” diyo.

<sup>21</sup> Epalati banakaka oplamita asiyama epo atlaiyo, “Mope ka:dena, epedeme wua: mo yimka:mala edla potaiya. Na: mo yemala eye poyuluwa. <sup>22</sup> Epapedeme wua: hapele mo yemala edla ullumtaiya. Adipalati, wua: ala mo e po-umulalo hallati na:ta Sodom mo dla koko haloweye po-ala:na,” diyo. Epapele koko tle mo yemala eye semama Sowa\* demdepo.

<sup>23</sup> Epalati utulalati ikadepe ma-ala:himhallati Lotta Sowa mo dla tame woyamaiyo.

<sup>24</sup> Epapele oloma edla GODta pepele di tle dlapa aloweli tleka:leye Sodom mo mate epo Gomola mo mate dla hamastlati dlapata seseyamama tiyo some heliyo. ✧ <sup>25</sup> Epalati dlapatapo mo patoto dapiyamte e mate epo dulu edla ha:ha:lalo so opa mate epame alisisi hapuloma mate epame dali hapuloma mate epo ta:la mate hamdepo diskopo tuluiyo. <sup>26</sup> Amasiyama Lot ya:lluta helestame ma ilame natili oloma edla ya: mototapo solo yepame ewala some kokalepo halaiyo. ✧

<sup>27-28</sup> Utulala oloma edla A:iblahamta ya:ta ka:yapa GOD mila:pi tle halale mo dla tame halemama koloma isili dla natilati Sodom mo mate epo Gomola mo mate dla namile patotapo bulamhetamhalla natiyo.

✧ **19:11:** 2Dok 6:18 ✧ **19:16:** 2Pita 2:7 \* **19:22:** Sowa hi ya: dulu kokoye yimka:mala demama apopo. ✧ **19:24:** Ma:t 10:15, 11:23-24; Luk 10:12, 17:29; 2Pita 2:6; Yuda 7 ✧ **19:26:** Luk 17:32

<sup>29</sup> Godtapo wou mo dla ha:ha:le mo patoto poyumama A:iblaham ma sikemte malamaiyo. Epapele koko tle ya:tapo Lotye dlapa hamdele dulu tle seme alikili dla woyamaiyo. Amasiyama dlapa etapo Lotta halale mo dapiyamte eye ma-hamdepo hamastaiyo.

*Lot mate ya: utukaka mate*

<sup>30</sup> Lot mate ya: utukaka mate Sowa mo memeleme ma tamali di dla hetame ha:ha:iyo. Adipalati, Lotta Sowa mo dla halloweye pta wota:iyo. Epedeme yia: tamali di dla hetame teiko hotuwale dulu dla ha:ha:iyo. <sup>31</sup> Oloma edla Lot yoti patotapo ya:la yemala watle epo atlaiyo, “Di aye mo-totoyemala halemtama. Epame dita ha:ha: mo hema dita opa halopo yimlala hatitimolowe opaye hawapo. <sup>32</sup> Epedeme di ka:dena, di aye kawata yú ipame ya: mate hatlope dlowa, di ata dia: tle akimlala hatitimelepo depame,” diyo. <sup>33</sup> Epame utula:la oloma edla yia: aye kawata yú ipame yoti pato tatile ya: a seme elaiyo. Epapele dulu dla yotitapo ya: a mate elepo sila:tili kokoye ya: ata pomalamaiyo.

<sup>34</sup> Epame ma alila haleta ya: nanatapo ya:la watle epo atlaiyo, “Na:ta na: a mate ma-elalepo. Epedeme ma wata utula:la kawata yú mamisika: ipame wa:ta ya: mate elane, ditapo di a tle yimlala hatitimolowe,” diyo. <sup>35</sup> Epapedeme utula:la edla yia:ta yia: aye kawata yú mamisika: ipame ya:la yemalatapo elemama ya: a seme elaiyo. Amasiyama ya: atapo yoti yemalata ya: mate elepo sila:tili kokoye ya: ma pomalamaiyo. <sup>36</sup> Epapele koko tle Lottapo ya: utukaka dapiyamte tle yimlala hatitimaiyo. <sup>37</sup> Yoti patotapo maseyemala hamaiyo, epame ya: hiye Moab,† diyo. Epedeme maseyemala itapo Moab so wata ha:ha: yia: mama pato halapo. <sup>38</sup> Epalati yoti yimka:mala mape maseyemala hamaiyo, epame ya: hiye Ben-Ami‡ diyo. Epedeme maseyemala itapo Amon so wata ha:ha: yia: mama pato halapo.

## 20

*A:iblaham mate Abimelek mate*

<sup>1</sup> A:iblahamta Mamele mo melepame ma Negeb mo dla tulume Kades mo ka: epame Sul mo ka: duka dla halaiyo. Epame matle Gela mo dla tame halaiyo. <sup>2</sup> Edla halemama A:iblahamtapo ya:llu Selaye opa watle atlemama yotimala diyo. Epalati Gela mo dokopala oplami Abimelekta Selaye sisilamaiyo, ya:ta hala dla pulupo depame. Epame ya: aya dla semhetaiyo. ✧

<sup>3</sup> Amasiyama Godta milamalo tulume Abimelek watle epo atlaiyo, “Wa: polope, adipalati, a:ya wa:ta sisilapame wa: aya dla semhetaleye mo-oplami walena,” diyo. <sup>4</sup> Epapeleye Abimelek ala Sela mate pohatlope dlalo halademe asiyama epo atlaiyo, “Lod, wa: koko pa:le isikimi opaye potipa:?” <sup>5</sup> Adipalati, A:iblahamtapo Selaye notumala dlati asiyama Sela mape A:iblahamye na: bapa duwapo. Epapele koko tle na:ta Selaye seme hetamama semte ka:dle koko hamapo duwa.”

<sup>6</sup> Epame Godtapo Abimelek watle milamalo epo atlaiyo, “Na:malamana, wa:ye ka:dle malamale mate koko iye halepo. Epapele koko tle na:tapo wa:ta ya: kapala umuluwe apiye himomeluwapo. <sup>7</sup> Epapedeme wa: a:ya eye ma seme ya:wolali hala dla telepe. Ya:wolaliye na: yu molo atlalo oplamipo. Epedeme ya:ta wa: yilo inoma sumale yu na: dla atellepiye, eta wa:ye popolowa. Amasiyama wa:ta a:ya iye ya:wolali watle ma ilame posemtlalo wekelepiye, wa: mate epo wa: asiyadulo hapuloma mate pallipe.”

<sup>8</sup> Epame alila haleta sali ala matamahallati Abimelekta ya: oko so sisilapame ya: dla woyamale koko hapulomaye atlamaiyo. Epalati yia:ta koko e dalepame sikemte wowota:iyo. <sup>9</sup> Epame Abimelekta A:iblaham sisilapame ya: watle epo atlaiyo, “Wa: adipapele kokoye dia: watle hauwa? Epame na:ta wa: dla adipapele batalimale kokoye halati asiyama wa:tapo na: mate epo na: opa mate dla upiyele koko hamila yakoma:?”

† 19:37: Moab hi ya: dulu kokoye a tle puale demama apopo. ‡ 19:38: Ben-Ami hi ya: dulu kokoye na: opa yami demama apopo. ✧ 20:2: Yen 12:13, 26:7

Epedeme wa:ta na: dla koko haleye poka:dle koko, oplamita epapele koko haloweye. <sup>10</sup> Ame wa: adipalati ipapele kokoye na: dla hao?" diyo.

<sup>11</sup> Epalati A:iblahamta asiyama epo atlaiyo, "Na:ta malamaleta God wowota:lalo soye mo hema poha:ha:mapo duwa. Epame na:ta malamaleta opata Sela yilo na:ye yumuluwetepo duwa. <sup>12</sup> Amasiyama ikadepe kokoye epo elema, Selaye notumala ikadepepo. Adipalati, ya:ye na: a yotipo. Epele tlope ya: wai tlo meyelope. Epedeme na:ta ya:ye hauwapo. <sup>13</sup> Epapedeme Godta na: a aya dulu tle na:ye ma asepe so mo dla tane dlati na:ta Sela watle atlemama epo atluwa, 'Wa: na: malamama opa hapuloma dla atlamsela:mama na:ye wa: bapapo demsela:lepe,' duwa."

<sup>14</sup> Epalati Abimelekta sipi aliya mate epo bulumkiyawa aliya mate epo ya: oko so opa mate epo wola: mate eleme puame A:iblaham watle pomeliyo. Epame matle Selaye ya:wolali A:iblaham watle homeliyo. <sup>15</sup> Epame Abimelekta A:iblaham watle epo atlaiyo, "Mo pato iye nolëpo. Epedeme dulu hema wa:ta solotamale natipame edla hallepe," diyo. <sup>16</sup> Epame ya:ta Sela watle epo atlaiyo, "Na:tapo wa: oplami watle 1,000 elo mani hamima. Epapele koko tle na:ta ikadepe kokoye opa hapuloma dla botomastama. Adipalati, na:ta wa: dla koko hale pohana. Epedeme opata wa: koko dla pobatalipo atlowa," diyo.

<sup>17-18</sup> A:iblaham ya:llu dla woyamale koko dla Godtapo Abimelek ya:llu mate epo ya: aya dulu dla oko halomha:ha:lalo wola: mateta yimlala hohomolowe apiye godiyo. Epalati A:iblahamta God watle inoma sumaiyo, wola: ewolota mamisika: yimlala hatitimelepo depame. Epalati yia:tapo ma yimlala hatitimolowe kotiyamaiyo.

## 21

### *Aisek hamale koko*

<sup>1</sup> Godta Selaye sikemte polowamama ya:ta yu itiyapo himili kokota ikadepe Sela dla woyamelepe diyo. <sup>2</sup> Epalati Godta sale alila dla Selatapo mopapo polopame A:iblaham yami hamaiyo. Amasiyama oloma edla A:iblahamye mo-totoyemala ikadepe halaiyo. ✧ <sup>3</sup> Epalati A:iblahamtapo ya: maseyemala hiye Aisek diyo. <sup>4</sup> Aisek hamale alotle alila 8 pololepame A:iblahamta Godta atlale yu e dolumama Aisekye kapala kestayo. ✧

<sup>5</sup> Epele dulu dla A:iblahamye 100 sokomoko oloma dla hallati yami Aisek hamaiyo. <sup>6</sup> Epame Selata epo atlaiyo, "Godtapo eimela:le sepele kokoye na: dla ma-hauwapo. Epedeme opa hapulomatapo koko i dalemama na: mate eimela:lepe. <sup>7</sup> Adipalati, yia:tapo na:ta maseyemala hamolowe koko dla pomalaha:ha:na. Amasiyama epele tlope A:iblahamta mo-totoyemala ikadepe hallati na:tapo ya: maseyemala hamalepo," diyo.

### *Selata Hagai mate yami Ismael mate alikili dla ayalemale*

<sup>8</sup> Aisekta ta:mtamama meme memellati ya: a A:iblahamtapo daya dele pato dinapiyo. <sup>9</sup> Amasiyama daya dele oloma edla Selata natilati ya: oko a:ya Hagaita himili maseyemala Ismaeltapo Aisekye sikemte tetelemsela:iyo. <sup>10</sup> Selata epapele koko natipame A:iblaham watle epo atlaiyo, "Na: oko a:ya i mate epo yami mate alikili dla tane dene. Adipalati, na: posolotamasema, Isip a:ya e yamita na: maseyemala mate wa: elo dla ha:ha:mama wa: alisisi omha:ha:loweye," diyo. ✧

<sup>11</sup> Epalati A:iblahamta koko e dalepame sikemte dupa koliyo. Adipalati, Ismael mape yami ikadepepo. <sup>12</sup> Amasiyama Godta A:iblaham watle epo atlaiyo, "Wa: oko a:ya Hagai mate epo yami Ismael mate ase sikemte malamiya. Selata apa kokoye wa: dla atellepiye, wa: koko eye halepe. Adipalati, Aisekta hatitimolowe yimlalatapo wa: mamadulo ikadepe depa ha:ha:lepe," diyo. ✧ <sup>13</sup> Epame God matle epo atlaiyo, "Na: wa: oko a:ya yami



ya: mamadulo mape ma a:ma selemalliwepo. Adipalati, ya: mape wa: maseyemalapo,” diyo.

<sup>14</sup> Epame alila hale utulala ikadepe A:iblahamtapo Hagai dla daya mate epo aliya kapala dla yú tili mate ya: maka: dla didiyemelepame ma-taiya diyo. Epalati yia:ta madipatata ya: saliyome ma Belseba mo dalupa dulu dla taiyo. <sup>15</sup> Yia: edla tame siya-mama yia:ta dlalo yúta mo-pokadlati Hagaita yamiye dali yimlala polli tou homale dla pameliyo. <sup>16</sup> Epame ya: meyelo pateka:mu tiyama dla tame polomama epo malamaiyo, “Poka:dena, na:ta na: maseyemala mate polomama ya:ta polati natilowe,” diyo. Ya: epo malamama sikemte amaiyo.

<sup>17</sup> Amasiyama Godta maseyemalata amale kokoye daliyo. Epalati pepele di tle God ya: banakaka oplamita Hagai sisilapame epo atlaiyo, “Hagai wa: ase sikemte wota:miya, Godta wa: maseyemalata amale kokoye ma-dallepo,” diyo. <sup>18</sup> “Epedeme wa: sila:time tame maseyemala dla sadle hamine. Adipalati, na:ta ya: mamadulo alotle ha:ha:loweye pasatepo mellowepo,” diyo. <sup>19</sup> Epame Godta ya: inomaye totowatimalati yú matale natiyo. Epame yú tipo hamtame yami watle hamiyo.

<sup>20</sup> Epedeme Ismaelta ta:mhetale oloma edla Godta ya:ye woloma omhalaiyo. Epame maseyemala etapo dalupa dulu dla halemama aliya sikemte siyomalalo oplami halaiyo.

<sup>21</sup> Ismael ala Palan mo dalupa dulu dla hallati ya: wai Hagaitapo ya:lluye Isip a:ya natiyo.

### *A:iblaham mate Abimelek mate madipatata yu itiyapo himili*

<sup>22</sup> Alila haleta Abimelek mate epo opahale so dokopala oplami Pikolo mateta puame A:iblaham watle epo atlaiyo, “Wa:ta halomhala koko hapuloma dulu dla Godtapo wa: mate halapo. ✧ <sup>23</sup> Epedeme wa: wata God hi mate yu itiyapo himine, wa:tapo na: dla epo na: yimlala dla epo na: mamadulo dla batalimale koko halala depame. Epele dulu dla na:tapo wa:ta asepe pulati wa: dla ka:dle koko siyapo tlo halomhaluwapo. Epedeme wa: ma asiyama na: dla epo na: mo so dla mape ka:dle koko siyapo tlo halomhalane,” diyo.

<sup>24</sup> Epalati A:iblahamtapo koko edla me-ka:pi demama yu itiyapo himiyo.

<sup>25</sup> Epame A:iblahamta ma Abimelek watle epo atlaiyo, “Wa: oko sotapo na:ta yú kolomale haleye uhauwapo. E poka:dena,” diyo.

<sup>26</sup> Amasiyama Abimelekta ya: watle epo atlaiyo, “Na: koko eye podallalo haluwa, isikimi wata me-dalema. Wa: adipalati ma-hapele na: watle po-atlalo wekuwa?” diyo.

<sup>27</sup> Epalati A:iblahamtapo sipi aliya mate epo bulumkiyawa aliya mate Abimelek watle hohopo imama yia:ta madipatata ma namkale diyo. <sup>28</sup> Epame A:iblahamta matle ya: halo dulu dla sipi aliya molala 7 amkoteta:le tlo alikili dla giligididiyo, Abimelek watle hapilowedeme. <sup>29</sup> Epalati Abimelekta natipame epo atlaiyo, “Wa: adipalati wa: sipi aliya 7ye alikili dla ipila:i? Ya: dulu koko apata:?” diyo.

<sup>30</sup> Epalati asiyama A:iblahamta epo atlaiyo, “Wa: sipi aliya 7 iye hohomane. Adipalati, wa:ta aliya i hohomelepiye, eta yú iye ikadepe na:ta kolomuwa dlepe,” diyo.

<sup>31</sup> Epapedeme yia:tapo mo eye semama Belseba\* diyo. Adipalati, mo hema opa dapiyamte iwolotapo koko hatlo dla yu itiyapo himpame namkale diyo. <sup>32</sup> Yia:ta yu itiyapo himili alotle Abimelek mate epo Pikolo mate Belseba mo saliyome ma Pilisteya mo dla ilame tamalaiyo. <sup>33</sup> Epalati A:iblahamta Belseba mo dla dali emomelepame ma kokó halepo hallalo GOD dla inoma sumama ya: hi di dla ta:diyo. <sup>34</sup> Epame A:iblahamtapo Pilisteya mo medla alila selemalli halaiyo.

## 22

### *Godtapo A:iblahamta mikadepe dle kokoye natili*

✧ 21:22: Yen 26:26 \* 21:31: Belseba hi ya: dulu kokoye yu itiyapo himili yú kolomale demama apopo.

<sup>1</sup> Alila opi alotle Godtapo A:iblahamta mikadepe dle natilowedeme ya: sisilamaiyo. Epalati asiyama A:iblahamta epo atlaiyo, “Na: ipo,” diyo. ✧

<sup>2</sup> Epalati Godta epo atlaiyo, “Wa: wa:ta sikemte dupa ellalo maseyemala Aisek seme Moliya mo dla tane. Epame edla tamali hale na:ta nati-iliwe dla hetame ya:ye yumpame na: watle hamine,” diyo. ✧

<sup>3</sup> Epalati alila hale utulala ikadepe A:iblahamta sila:time God dla namkale dle alisisi ha:lowe dlapa hukulupo ya: donki aliya ko di dla pameliyo. Epo ya: oko so opa dapiyamte mate epo yami Aisek mate eleme Godta ya: watle atlale mo dla taiyo. <sup>4</sup> Ya: tamama alila dapahatlope pololepo alotle edla Godta ya: watle atlale moye natiyo. <sup>5</sup> Epalati ya: oko so dapiyamte dla epo atlaiyo, “Wua:ta madipatata donki aliya mate medla popa:iya. Epalati na:tapo na: maseyemala Aisek mate huma tame God hi di dla ta:depame ma wua: hala dla ilame puluwepo,” diyo.

<sup>6-7</sup> Epame A:iblahamta God dla alisisi ha:po hamilowe dlapa bulumaleye Aisek maka: dla asiyomellati ya:ta asiyame taiyo. Epalati ya: ata dlapa tele mate epo aipa:ya mate halopo taiyo. Yia:ta madipatata tamama Aisekta ya: watle epo atlaiyo, “A,” diyo.

Epalati asiyama ya: ata epo atlaiyo, “Na: maseyemala, adipamma:?” diyo.

Epalati Aisekta asiyama epo atlaiyo, “A, na: natima, di dlapa bulumale mate epo dlapa tele mate ma-halopo tamalapo. Amasiyama dita sipi aliya yemala yumpame God hi di dla ta:demama ha:lowe e da:?” diyo.

<sup>8</sup> Epalati A:iblahamta asiyama epo atlaiyo, “God meyelo sipi aliya yemala eye di watle nati-ilipe, dita yumpame God hi di dla ta:demama ha:loweye,” diyo. Epame yia:ta madipatata ma-tamalaiyo.

<sup>9</sup> Yia:ta madipatata Godta atlale mo dla tame woyapame ha:ha:mama A:iblahamtapo God dla alinepi poyupo ha:lalo tile haiyo. Epame di dla dlapa kolupame ma yamiye dea mate keketipoliyepame dlapa di dla himiyo. ✧ <sup>10</sup> Epame ya: dota ola:mtuwame aipa:ya haiyo, yami Aisek yumuluwedeme. <sup>11</sup> Epalati oloma edla GOD ya: banakaka oplamitapo pepele di tle ya: watle epo sisilamaiyo, “A:iblaham, A:iblaham,” diyo.

Epalati asiyama A:iblahamta epo atlaiyo, “Na: ipo,” diyo.

<sup>12</sup> Epalati banakaka oplamita epo atlaiyo, “Wa: maseyemala dla koko hale hamama ya: dla wotiyalle hamimiya. Wata oloma hema wa:ta God wota:le kokoye na: ma-natima. Adipalati, wa: God wota:mama wa: maseyemala hatlopeye podatimana,” diyo.

<sup>13</sup> Epame A:iblahamta helestame natili oloma edla sipi aliyata dokopala dla pate walleta dukulu dla olopo halla natiyo. Epalati A:iblahamta tame aliya eye hampo puame Aisekta elale mo dla himpame yumiyo. Epame God hi di dla ta:demama aliya tlo ha:iyo. <sup>14</sup> Epedeme A:iblahamta mo e semama, GODta kokoye dinapelepe, diyo. Epame ma wata oloma hema opata atlemama, GOD ya: tamali di dla ya:tapo koko dinapelepe, demdepo.

<sup>15</sup> Epame GOD ya: banakaka oplamita matle A:iblahamye sisilamama epo atlaiyo,

<sup>16</sup> “Yu iye GODta ipo atlema. Na:tapo na: hi tle wa: watle ikadepe koko atlema. Adipalati, wa:tapo wa: maseyemala hatlopeye na: watle hamilowedeme podatimana.

✧ <sup>17</sup> Epapele koko tle na:tapo wa: mamaduloye sikemte pasatepo mellowepo. Epalati yia:ta pasatamama omapla di dla tamali ha:ha:ye epapele some ha:ha:lepe. Epame yia:tapo pasatamama yú pili dla asila halemdiye, epapele some ha:ha:lepe. Epame wa: mamadulotapo sikemte itiyamale mate yia: dla opahale dlalo soye posalepame yia: ta:laye kolahademsiyamelepe. ✧ <sup>18</sup> Epalati na:tapo wa: mamadulo tle ta:la so hapuloma dla siyele hampulupe. Ame adipalati, wa:tapo na: yu dla salladuwa koko tle,” diyo. ✧

<sup>19</sup> Epame A:iblaham ma ilame tame ya: oko so mate yimkata Belseba mo dla taiyo. Epame A:iblahamtapo mo medla me-halaiyo.

✧ 22:1: Hib 11:17-19 ✧ 22:2: 2Kolon 3:1 ✧ 22:9: Yei 2:21 ✧ 22:16: Hib 6:13-14 ✧ 22:17: Hib 11:12  
✧ 22:18: Taiya 3:25

*Nahol ya: akimlala*

<sup>20-23</sup> Koko i gudlati alotle A:iblahamtapo oplami haleta ya: watile yu hamili yu iye me-daliyo, “Wa: ei Nahol ya:llu Milkaye akimlala 8 hatitimuwapo.” Epedeme akimlala ewolo hiye ipo, Us, epo Bus, epame Alam ya: a Kemuwel, epo Kesed, epo Haso, epo Pildas, epo Yidalap epame Betuwel. Epalati Betuweltapo Lebekaye himiyo. <sup>24</sup> Epame Naholtapo ma a:ya hale Leuma hapame ma akimlala 4 hatitimaiyo. Yia: hiye ipo, Teba, epo Gaham, epo Tahas, epo Maka.

**23***Selata powale koko*

<sup>1-2</sup> Selaye sokomoko 127 halepo gudepame Kiliyat Alba mo dla powaiyo. Mo hatlo i ya: hi haleye Heblonpo. Amasiyama mo iye Keinan mo pato dulu dla elapo. Epalati A:iblahamtapo ya:lluta powale koko dla sikemte dupa kolomama amselaiyo.

<sup>3</sup> Epame A:iblahamtapo ya:llu powale motota elale aya dulu tle alikili dla woyapame Hitai so opa dla tame epo atlaiyo, <sup>4</sup> “Na:ye mo hale oplamita ma wua: mo hema isikimi asepe puame halapo. Epedeme wua: na: watile ta:la nati-iyaa, na: epalati asiyama mate ta:la e hapame na: a:ya motoye hamatilowama,” diyo. ☆

<sup>5</sup> Epalati opa ewolota asiyama ya: watile epo atlaiyo, <sup>6</sup> “A, wa: di yu dalene. Wa:ye ikadepe diamkale ikadepepo. Di wa:ta wa: allu moto hamatilowe ta:la koko dla poalliwa. Amasiyama mowolo di mo hema ta:la ka:dle natipame wa: a:ya moto edla hamatine,” diyo.

<sup>7</sup> Epalati A:iblahamtapo yia: mila:pi tle heodepame yia: watile epo atlaiyo, <sup>8-9</sup> “Na:ta na: a:ya hema hamatilowe dla wua:ta solotamelepiye, ka:dena, wua: Sohal yami Epolon dla dallanatiya, ya:tapo ya: ta:la mosukulu gudle dla Makapela mo dla teiko hotuwale elaye na: watile hamilowe depame. Epele dulu dla ya:ta ta:la asiyama dla adisowa selepiye, na: mesowa himilowepo. Adipalati, na: solotama, na: asiyadulota palilati yia: moto mape medla hatimha:ha:lowedeme,” diyo.

<sup>10</sup> Epalati Epolonta mo kosukulli kokoloma tala dla yimkadulo Hitai so mate polo-mama A:iblaham yu dalepame asiyama epo atlaiyo, <sup>11</sup> “Na: a, wa: na: yu dalene. Na: watapo Makapela ta:la i mate epame teiko hotuwale mate na: opa mila:pi tle wa: watile hamima, wa:tapo wa: a:ya motoye edla hamatilipo depame,” diyo.

<sup>12-13</sup> Epolonta epo atla dalepame A:iblahamta opa mila:pi tle heodepame opa hapulomata dallepo depame Epolon watile epo atlaiyo, “Namkale, wa: na: yu dalene. Na: solotama, wa: ta:la iye asiyama mate hapame na: a:ya motoye hamatilowama. Epedeme wa: na:ta wa: watile ta:la asiyama dla mani hamilati wa: siyele mate hane,” diyo.

<sup>14</sup> Amasiyama Epolonta A:iblaham watile epo atlaiyo, <sup>15</sup> “Na: a namkale, ta:la i ya: asiyamaye 400 elo manipo. Epapele tlope asiyama eye pokoko. Epedeme wa: isikimi tame wa: a:ya motoye hamatine,” diyo.

<sup>16</sup> Epalati ta:la asiyama dla A:iblahamta mo kosukulli kokoloma tala dla popa:le so yia: inoma dali tle 400 elo maniye hame Epolon watile hamiyoye. <sup>17-19</sup> Epapele api tle A:iblahamtapo Epolon ta:la yemala eye haiyo. Ta:la edla Makapela teiko hotuwale mate epo dali edla ha:ha: mate A:iblahamta halomaiyo. Ta:la iye Mamele mo tle salita matlalo tiyama dla elapo. Epedeme A:iblahamtapo ya:llu Sela motoye Makapela mo dla teiko hotuwale dulu dla hamatiyo. <sup>20</sup> Mo eye ya:tapo Hitai so dla asiyama mate hauwapo, ya: asiyadulota palilati hatimha:ha:lepo depame.

**24***Aisek mate Lebeka mate*

☆ **23:4:** Hib 11:9, 13; Taiya 7:16



<sup>1</sup> A:iblahamtapo mo-totoyemala ikadepe halaiyo. Epalati GODtapo A:iblahamta halomhalale koko hapuloma dulu dla sikemte gademhalemdiyo. <sup>2-3</sup> Alila haleta A:iblahamtapo ya: oko so dokopala oplami sisilapo ya: watle epo atlaiyo, “Na: solotama, wa:tapo na: maseyemala Aisekta a:ya halowe totamtelepo depame. Epedeme wa:tapo ya:ta a:ya halowe totamtamama Keinan a:ya tlo natipo sempulala depame Pepele dimo mate ta:lamo mate omhallalo GOD hi tle yu itiyapo himine. <sup>4</sup> Adipalati, na: solotama, wa:tapo tame na:ta ka:yapa haluwa mo dla na: asiya dulu dla a:ya hale natipo sempulupo depame,” diyo.

<sup>5</sup> Epalati asiyama ya: oko oplamita epo atlaiyo, “A:ya eta mo hema na: mate puluwe allipiye, na: ma asiyama wa: maseyemala tlo medla semtapa:?” diyo.

<sup>6</sup> Amasiyama A:iblahamta ya: watle epo atlaiyo, “Hao! Na: maseyemalaye mo edla posemtlowa. <sup>7</sup> Adipalati, Pepele dimo omhallalo GODtapo na: asiyadulo dulu tle na:ye sempuame Keinan mo iye na: mamadulo watle ikadepe hamilowe yu atluwapo. Epedeme God etapo ya: banakaka oplamiye tane dlepe, wa: gadlepo depame. Epalati wa:tapo edla tame ya:ta gadle tle na: maseyemalata a:ya halowe api dinapoloweye ka:pi ellepe. <sup>8</sup> Amasiyama a:ya ipilalo etapo wa: mate puluwe dla posolotamalalo wekelepiye, epalati wa: wa:ta God hi tle na: maseyemala ya:llu sempuluwe dla mowolo yu itiyapo himi koko itle alikili dla woyamelepe. Amasiyama epapele tlope wa:tapo na: maseyemala tlo mo edla posemtlowa,” diyo. <sup>9</sup> Epalati A:iblaham ya: oko oplamitapo God hi tle yu itiyapo himimama epo atlaiyo, “Na: wa:ta na: watle atlale yu e dolumolowama,” diyo.

<sup>10</sup> Epalati A:iblaham ya: oko oplamitapo ka:ka:dle alisisi hapuloma kokopame ka:mol aliya 10 dla hatitipo taiyo. Ya: tamama Alam Nahalaim mo dla tame heyupo ma A:iblaham ya: ei Naholta hallalo mo dla taiyo. <sup>11</sup> Ya: tame tamila:la mo edla woyapame mo alikili dla yú kolomale dla hedlati ka:mol aliyata medla hedepo hutiyemyaiyo. Amasiyama oloma eye mo edla ha:ha:lalo wola:ta yú tilimala pumulumdiyo.

<sup>12</sup> Epapedeme ya:tapo inoma sumama epo atlaiyo, “Lod, na: dokopala oplami A:iblaham ya: GOD, wa:ta A:iblaham dla bokotiyapo malahala koko nati-imama na: watle Aisek ya:lluye wata nati-ine. <sup>13</sup> Adipalati, na: yú kolomale mateka:pi hema poloma. Epedeme ipilatalo hapulomata hema yú tilimala pumullupe. <sup>14</sup> Na: epalati yia: watle yú dallowama. Epalati ipilalo hale antapo na: watle yú tipo hamipame ma na: ka:mol aliya dla yú ilimelepiye, na: epalati edla malanatilowepo, wa:ta Aisek ya:llu saleye. Epapedeme kokota woloma ipo ka:pi ellepiye, na: etle malanatilowepo, wa:ta na: dokopala oplami A:iblaham dla bokotiyapo malamale himhalaye,” diyo.

<sup>15</sup> Ya: ala inoma sumpollati ipilalo hale Lebekata yú tiliwedeme eto hampula natiyo. Ya:ye A:iblaham ya: ei Nahol yami Betuwel yotiyo. Amasiyama ya: awaye Milkayo. <sup>16</sup> A:ya ipilalo iye pta ka:piyo, epame ya: oplami koko yeliyeiyo. Epeleye ya:ta puame yú kolomale dla yú tipo hetaiyo.

<sup>17</sup> Epalati A:iblaham ya: oko oplamita ya: natipame ya: hala dla hapele puame epo atlaiyo, “Notumala namkale, na: yú sikemte ta:ma, na: yú hamine,” diyo.

<sup>18</sup> Epalati asiyama ya:ta yú tipo halale metlo ya: dla haiyemama epo atlaiyo, “A, yú dene,” diyo. Epalati ya:tapo yúye deiyo.

<sup>19</sup> Ya:ta yú depo gudlati a:ya ipilalota ya: watle epo atlaiyo, “Na: wa: ka:mol aliya mape yú tipo ilimolowama,” diyo. <sup>20</sup> Epame ya:tapo ka:mol aliyata yú dloweye aliyata yú dlalo ita dla yú tilipo puame sisimamaiyo. <sup>21</sup> Amasiyama A:iblaham ya: oko oplamita woloma polomama a:yata koko hamsela: tlo ompolaiyo, ya:ta halowe kokoye GODta mo-dinapota: depo malanatilowedeme.

<sup>22</sup> Ka:mol aliyata yú dlopo gudlati A:iblaham ya: oko oplamita gold ewalata ka:pi dinapele yiyeleye ya: mu opokoko dla guludepame ma gold ewalata ka:pi tili seipase patotoye ya: do dla didiyemeliyo. <sup>23</sup> Epo halemama ya: watle epo atlaiyo, “Namkale

notumala, wa: a hiye anata:? Epame wa: a aya dulu dla alupoli elema:, na:tapo na: mate pumulale so iwolo mate tame hutiyeloweye?” diyo.

<sup>24</sup> Epalati asiyama a:ya ipilalota epo atlaiyo, “Na: aye Nahol yami Betuwelopo, epalati na: awaye Milkapo,” diyo. <sup>25</sup> Epame ma epo atlaiyo, “Yao ka:dena, dia: dla ka:mol aliyata dlowe dayaye me-hutiyema. Epame wua:ta hutiyelowe aya alupoli ma me-elema,” diyo.

<sup>26</sup> Epalati oko oplamita GOD mila:pi tle alumata akukumpolomama epo atlaiyo, <sup>27</sup> “Lod, na: dokopala oplami A:iblaham ya: GOD, na: wa: dla siyema. Adipalati, wa:tapo na: dokopala oplami A:iblaham dla yu itiyapo himili e dolumama na:ye woloma sempuame ya: asiyadulo ikadepe dla woyamalepo,” diyo.

<sup>28</sup> Epame Lebekata ilame kukulumtame ya: aya dulu dla ha:ha: so dla koko iye atlamaiyo. <sup>29-30</sup> Epalati Lebeka ya: bapa Labantapo Lebekata didiyepo puale gold alisisi tlapame epo A:iblaham ya: oko oplamita Lebeka watle atlale yuye dalepame oplami eye salataiyo. Ya: tame natilati oplami etapo ya: ka:mol aliya mate yú kolomale mateka:pi dla hallati natiyo. <sup>31</sup> Epalati ya: watle epo atlaiyo, “A namkale, Godta wa:ye gaduwapo. Epele tlope wa: adipapalati alikili hema halema:? Na: mate aya dla puane. Adipalati, na:tapo wua:ta hutiyelowe aya mate epo wua: ka:mol aliyata hutiyelowe aya mate madinapopo pua,” diyo.

<sup>32</sup> Epalati A:iblaham ya: oko oplamitapo ya: mate tame aya dulu dla tuwaiyo. Epame Laban ya: opata ka:mol aliya tama di dla hutiyele alisisiye alikili dla hatitipame ya:ye daya ilimaiyo. Epame A:iblaham ya: oko oplami mate epo ya: mate pumulale so mate dla yú tipo hamiyo, ya:tapo ya: hete howahalomelepo depame. <sup>33</sup> Epame Labantapo ya: watle daya halopo pulati A:iblaham ya: oko oplamitapo epo atlaiyo, “Na: yipta daya podlowa. Amasiyama na:ta puale koko tatile atlepo gudepame daya dlowepo,” diyo. Epalati Labanta epo atlaiyo, “Yao, atlane,” diyo.

<sup>34</sup> Epalati ya:ta epo atlaiyo, “Na:ye A:iblaham ya: oko oplamipo. <sup>35</sup> Godtapo A:iblahamye sikemte gademhallati ya:tapo wata oloma hema alisisi sikemte pasatale oplami halapo. Epo Godta ya: dla sipi aliya mate epo gaut aliya mate epame bulumkiyawa aliya mate epame mani mate epo ya: oko so opa mate wola: mate epo ka:mol aliya mate epo donki aliya mate hapuloma hapiwapo. <sup>36</sup> A:iblaham ya:lluye ma alluyemala ikadepe halemama maseyemala hamalati A:iblahamtapo maseyemala e watle ya: alisisi hapuloma halopiwapo. <sup>37</sup> Epame ya:ta a:ya halowe koko dla ma na: watle epo atluwa, ‘Wa:tapo na: maseyemalata a:ya haloweye Keinan mo a:yaye sempulala depame God hi tle yu itiyapo himine. <sup>38</sup> Amasiyama wa: na: a ya: asiyadulo dla tame na: maseyemala Aisek ya:llu natipo sempuane,’ duwa. <sup>39</sup> Epalati asiyama na:ta ya: dla epo atluwa, ‘A:ya ipilalo eta na: mate puluwe allipiye, na: adipapopa:?’ duwa. <sup>40</sup> Epalati asiyama ya:ta epo atluwa, ‘Na:ta mikadepe dlalo Godtapo ya: banakaka oplamiye wa: mate tane dlepe, wa: gadlepo depame. Epalati wa:tapo na: maseyemala Aisek ya:lluye na: opa ikadepe dulu dla natilipe. <sup>41</sup> Epedeme wa: tame na: opa dla woyamalati ya:ta wa: watle na: maseyemala ya:lluye hamame iliwe allipiye, mowolo yu itiyapo himi koko hema pase sikemte pomalamolowa,’ duwa.

<sup>42</sup> Epalati na:tapo wata yú kolomale dla puame polomama God dla epo inoma sumale yu atla, ‘Lod, na: dokopala oplami A:iblaham ya: GOD, na: wa: dla otele yu himima, wa:tapo Aisek ya:lluye na: watle nati-ilipo depame. <sup>43</sup> Epedeme a:ya ipilalota yú tila pulati na:tapo ya: watle yú dallowepo. <sup>44</sup> Epalati ya:tapo na: watle yú tipo hamipame na: ka:mol aliya ma yú ilimelepiye, na: epalati malamolowepo, a:ya ipilalo eye na: dokopala oplami yami Aisek ya:llupo,’ de.

<sup>45</sup> Na: ala woloma me-inoma sumpollati Lebekata pakasiyamalalo ya: eto hame medla pua. Ya: yú kolomale dulu dla tulume yú tipo matlati na:ta ya: watle epo atla, ‘Namkale na: yú hamine,’ de. <sup>46</sup> Epalati ya:tapo ya: eto maka: di dla polaleye na: watle haiyemama, yú i tlo dene de. Epame ma ya:tapo na: ka:mol aliya ma yú ilimili de. Epapedeme na: yú

e ma-de, epo na: ka:mol aliya mape yú me-ilima. <sup>47</sup> Epame na:ta ya: watle, wa: a anata: dlati ya:ta epo atla, 'Na: aye Nahol yami Betuwelpe, epalati na: awaye Milkapo,' de. Epalati na:tapo gold ewalata mita:pele yiyeleta ya: mu opokoko dla guludepame ma gold seipase mape ya: do dla didiyemele. <sup>48</sup> Epame na:tapo alumata akukulumpolomama na: dokopala oplami A:iblaham ya: GOD dla siyele yu hami. Adipalati, ya:tapo api duka dla na:ye sempuwapo, na:tapo na: dokopala oplami yami ya:lluye woloma ya: opa ikadepe dulu dla natilipo depame. <sup>49</sup> Epapedeme namkadulo, wua: adipo malama:? Wua: na: dokopala oplamita atlale yuye ka:dena dema:? Wua: dla yu hale ellepiye, na: atlaiya. Epalati asiyama na:ta koko haloweeye woloma momalamolowepo," diyo.

<sup>50</sup> Epalati Laban mate Betuwel mate koko i dalepame epo atlaiyo, "Koko iye GOD tle puapo. Epedeme dia: dla koko hale atlowe hawa. <sup>51</sup> Epedeme wa: Lebeka iye me-semtane. Adipalati, ka:dena, ya:tapo GODta dinapele koko dolumama wa: dokopala oplami yami haloweeye," diyo.

<sup>52</sup> Epalati A:iblaham ya: oko oplamita yia: yu e dalepame alumata akukulumpolomama ya: mila:pita ta:la dla gudemama GOD dla siyele ta:diyo. <sup>53</sup> Epame goldta mimita:pele alisisi mate epo silbata mimita:pele alisisi mate epo kapala alisisi mate Lebeka dla halopiyo. Epame namkale dle alisisi opi ka:ka:dle halopame Lebeka ya: wai watle epo ya: bapa watle dla halopiyo. <sup>54</sup> Koko ita gudlati yia:ta hapulomatapo daya dlopo aya medla hutiyeyiyo. Yia: epo utulalati sillipame A:iblaham ya: oko oplamita epo atlaiyo, "Di ma ilame na: dokopala oplami hala dla mo-tlowe ka:deta:?" diyo.

<sup>55</sup> Amasiyama Lebeka ya: wai mate epo ya: bapa mateta epo atlaiyo, "Hao, wua: aseka dia: mate alila 10 epapele ha:ha:po gudepame tamalaiya," diyo. <sup>56</sup> Amasiyama A:iblaham ya: oko oplamita epo atlaiyo, "Wua: na: hammiya. GODta na:ta puwa kokoye ma-ka:depo dinapopo meluwapo. Epedeme na: ka:dena, na: dokopala oplami hala dla ma ilame tloweye," diyo.

<sup>57</sup> Epalati Lebeka ya: wai mate epo ya: bapa mateta epo atlaiyo, "Di aseka amseyemala sisilapame ya:ta solotamale koko atla dallowa," diyo. <sup>58</sup> Yia: epame Lebekaye sisilapame ya: watle atanatiyo, "Wa: oplami i mate tlowe solotama:?" diyo.

Epalati asiyama Lebekata epo atlaiyo, "Yao, na: ya: mate mo-tlowe solotama," diyo.

<sup>59</sup> Epalati yia:tapo Lebekaye ya: nomopi mate opa ewolo mate taiya diyo. <sup>60</sup> Epalati yia:tapo Lebeka yilo inoma sumama epo atlaiyo, "Wa: opa hapuloma yia: wai hallepe. Epame wa: awadulotapo yia: dla opahale dlalo soye posalemha:ha:lepe," diyo.

<sup>61</sup> Epame Lebeka mate epo ya: gadlalo ipilatalo mate ka:mol aliya di dla yia: alisisi mate hetame tamalemama A:iblaham ya: oko oplami mate taiyo.

<sup>62</sup> Alila oloma edla Aisektapo Bel Lahai Loi mo saliyome ma Negeb mo dla tame halaiyo. <sup>63</sup> Ya: edla halemama tamila:la haleta isikimi mo haliyamale dla holomsela:la taiyo. Epo holomsela:mama natilati ka:mol aliyata pumulla natiyo. <sup>64</sup> Amasiyama Lebeka mape pateka:mu tle Aisek natipame ka:mol aliya di tle ta:la dla pestatuluiyo. <sup>65</sup> Epame A:iblaham ya: oko oplami watle epo atlaiyo, "Oplami e anta di natilowedeme ta:la api pumhalema:?" diyo.

Epalati asiyama A:iblaham ya: oko oplamita epo atlaiyo, "Oplami eye na: dokopala oplami Aisekta puapo," diyo. Epalati Lebekata tluka hapame ya: mila:pi bopudiyo.

<sup>66</sup> Yia: tame Aisekye umpo oko oplamitapo ya: watle ya:ta tame koko hauwa hapulomaye esemaiyo. <sup>67</sup> Epame Aisekta Lebekaye seme ya: wai Selata halale aya dla semtaiyo. Epame yia:ta madipatata ma-halomaiyo. Epame oloma edla Aisekta ya:llu Lebeka dla sikemte malamale himmama asiyama ya: waita powale koko dla dupa kolle pase himiyo.

1-2 A:iblaham ya:llu Selata powale alotle A:iblahamtapo ma a:ya hale Ketula hapame akimlala opi hatitimaiyo. Akimlala ewolo hiye ipo, Simlan, epo Yoksan, epo Medan, epo Midiyan, epo Isbak, epo Suwa. <sup>3</sup> Epapeleye Yoksantapo Seba mate epo Dedan mate hatitimaiyo. Epedeme Dedan ya: mamaduloye Asul sopo, epo Letu sopo, epo Leom sopo. <sup>4</sup> Amasiyama Midiyan ya: akimlalaye ipo, Epa, epo Epel, epo Hanok, epo Abida, epo Elda. Asiya hapuloma iwoloye Ketula ya: awadulopo.

<sup>5</sup> A:iblahamtapo ya: alisisi hapulomaye ya: elo dla hallalo maseyemala Aisek watle halopiyo. <sup>6</sup> Epame ya: ma ala popolalo halemama Hagai mate epo Ketula mateta hatitimale akimlala dla namkale dle alisisi halopiyo. Epame yia:ye ya: elo ikadepe dla hallalo maseyemala Aisek tle alikili a:ma salita matlalo tiyama dla taiya, diyo.

### *A:iblahamta powale*

<sup>7-8</sup> Epapedeme A:iblahamtapo 175 sokomoko halepo gudepame sikemte totoyemala oloma dla halemama powaiyo. <sup>9-10</sup> Epalati ya: akimlala dapiyamte Aisek mate epo Ismael mateta ya:ye ya:llu Sela hamatili Mamele mo mateka:pi Makapela teiko hotuwale dulu medla hamatiyo. Epapeleye wabasi iye A:iblaham meyelo Hitai oplami Sohal yami Epolon tle haiyo. <sup>\*</sup> <sup>11</sup> A:iblahamta powale alotle Godtapo maseyemala Aisek dla siyemama ka:ka:dle kokoye halopiyo. Epalati ya:tapo tame Bel Lahai Loi mo dla halaiyo.

### *Ismael ya: mamadulo*

<sup>12</sup> Ismaelye A:iblaham ya:llu Sela ya: oko a:ya Hagaita himili maseyemalapo. <sup>13</sup> Epapedeme Ismael ya: akimlalaye ipo, Nebayot, epo Kedal, epo Adibel, epo Mibsam, <sup>14</sup> epo Misima, epo Duma, epo Masa, <sup>15</sup> epo Hadad, epo Tema, epo Yetul, epo Napis, epame Kedema. <sup>16</sup> Ismael ya: akimlala 12 iwolotapo elele 12 sitali ha:ha:po. Yia:ta ha:ha:le mo hi mape opa iwolo hi tlo sasalemaiyo. <sup>17</sup> Epedeme Ismaeltapo 137 sokomoko halepo gudepame powaiyo. <sup>18</sup> Epalati Ismael ya: mamadulotapo Habila mo tle ha:ha:mtamama Sul mo dla tame gudiyo. Yia:ta ha:ha: mo iye Isip mo mateka:pi, Asul mo dla tlalo api dla halapo. Yia: edla ha:ha:mama A:iblaham ya: mamadulo opi hapuloma mate opahale demha:ha:iyo.

### *Yokob mate Iso mate*

<sup>19-20</sup> A:iblaham yami Aisekta 40 sokomoko oloma dla halemama Padan Alam mo dla hallalo Alam oplami Betuwel yoti Lebekaye haiyo. Amasiyama Lebeka ya: bapaye Labanpo.

<sup>21</sup> Lebekata hamkapi pollati ya:wolali Aisekta GOD dla inoma sumale yu himhallati GODta daliyo. Epalati Lebekata mopapo mo-polaiyo. <sup>22</sup> Epalati Lebeka mopapo koko dulu dla akimlala dapiyamteta popa:iyo. Yia:ta dapiyamtetapo ya: koko dulu dla natalimpopa:mama humsiyamaiyo. Epalati Lebekata epo atlaiyo, “Yimlala iwoloye adipapalati na: koko dulu dla natalimpopa:ma:?” diyo. Epapele koko tle ya:tapo GOD dla dalla natilati asiyama GODta epo atlaiyo, <sup>23</sup> “Opa alumale dapiyamtetapo wa: koko dulu dla popa:po. Alumale dapiyamte ewolotapo wa: koko dulu tle wowoyapo ha:ha:mama yia: dulu dla opahale demha:ha:lepe. Yia:ta dapiyamteta epo opahale demha:ha:le dulu dla haletapo itiyamale mate hallati asiyama haletapo pase itiyamale mate hallowa. Epedeme ya: bapatapo ya: ei yu dla salladepo sela:lepe,” diyo. <sup>\*</sup>

<sup>24</sup> Owayemala hamolowe alilata mo-pulati Lebekatapo akimlala dapiyamte hohomaiyo. <sup>25</sup> Itapu puale maseyemala ya: kapalaye sikemte omtaka:piyo, epame dlalo ma sikemte wokasemaiyo. Epapedeme yia:tapo ya: hiye Iso\* diyo. <sup>26</sup> Epalati ya: ko tle puale maseyemalatapo Iso hete maku dla hamame elaiyo. Epalati yia:tapo ya: hiye Yokob† diyo. Aisekta 60 sokomoko hallati akimlala dapiyamte iwoloye hohomaiyo.

<sup>\*</sup> **25:9-10:** Yen 23:3-16   <sup>\*</sup> **25:23:** Loum 9:12   <sup>\*</sup> **25:25:** Iso hi ya: dulu kokoye dlalota yumili demama apopo.  
<sup>†</sup> **25:26:** Yokob hi ya: dulu kokoye hete maku dla hamame elale demama apopo. Amasiyama Hibulu yuta maku dla hamame elale deye elemala natilalo demama apopo.

<sup>27</sup> Akimlala dapiyamte iwolota teta:le dulu dla Isotapo alila hapuloma dla moku dla yetetalemsela:mama alinepi sikemte siyomalalo halaiyo. Amasiyama Yokobye homta hallalo oplami halemama isikimi hatlo aya dla halemdiyo. <sup>28</sup> Aisektapo Isoye sikemte malamdiyo. Adipalati, Isota alinepi siyopo pulati demama ka:pi demdiyo. Amasiyama Lebekatapo Yokob tlo sikemte malamdiyo.

<sup>29</sup> Alila hale dla Yokobtapo tiyokona opo ha:mhalaiyo. Epalati Isota to hamtaleta pumama daya sikemte ta:le mate puaiyo. <sup>30</sup> Epalati ya:tapo ya: ei Yokob watle epo atlaiyo, “Na: ya:mkale, daya ta:mama pola yakoma. Epedeme wa: tiyokona opo omteka:pele eye na: watle hamine,” diyo. Epapele koko tle Iso ya: hi haleye Edom‡ demdepo.

<sup>31</sup> Epalati Yokobta asiyama epo atlaiyo, “Ka:dena, na: wa: watle hamilowepo. Amasiyama wa: ka:yapa wa:ta di a elo dla halemama ya: alisisi hapuloma omhallowe itiyamale hamhalaye na: watle hamine,” diyo.

<sup>32</sup> Epalati Isota asiyama epo atlaiyo, “Na: daya ta:mama mo-pola yakomapo. Epedeme na:ta na: a alisisi omhallowe itiyamale na: dla ela ita apa koko ka:dle na: dla hamipa:?” diyo.

<sup>33</sup> Epalati asiyama Yokobta epo atlaiyo, “Wa: ikadepe na: watle me-hamili demama God hi tle yu itiyapo himmama atlane,” diyo. ✧ <sup>34</sup> Epalati Isota ya: yu dla tulumama ya: ata ya: watle ya: alisisi omhallepo depo itiyamale hamiliye ma ya: ei Yokob watle hamiyo. Epalati asiyama Yokobtapo ya: watle tiyokona opo mate epo daya mate hapiyo. Epame Isota daya ma-depo gudepame sila:time taiyo. Epapele koko tle Isotapo ya: ata ya: watle ya: alisisi omhallepo depo itiyamale hamiliye pokoko diyo.

## 26

### *Aisekta Gela mo dla halale*

<sup>1</sup> A:iblahamta halale oloma edla sali pato silapomama daya pa:le kokota pualeye, epapele kokotapo ma mo edla puaiyo. Epalati Aisektapo Pilisteya so yia: dokopala oplami Abimelekta hala mo Gela dla taiyo. <sup>2</sup> Adipalati, Godta ya: dla woyapo epo atlaiyo, “Wa: Isip mo dla potlowa. Amasiyama wa:tapo na:ta wa: watle halane dle mo hatlo medla halane. <sup>3</sup> Wa:ta edla hallati na:tapo wa: mate halemama wa: gademhallowepo. Epame na:tapo wa: a A:iblaham dla yu itiyapo himiwaye e dolumama mo eye wa: dla epo wa: mamadulo dla hamilowepo. ✧ <sup>4</sup> Epame na:tapo wa: mamaduloye ma-a:ma pasatepo mellowepo. Yia:tapo omapla di dla tamilita wokasepo elemdiye, epapele some pasatame ellepe. Epame na:tapo ta:la pato iye yia: watle hamilowepo. Epalati ta:lamo meyelope meyelope dle sotapo yia: tle siyele halepe. <sup>5</sup> Epedeme na:tapo koko iye halowepo. Adipalati, wa: a A:iblahamtapo na: yu mate epo na:ta aiyalma hatitimale mate woloma ka:pi dolumhaluwapo,” diyo. <sup>6</sup> Epapedeme Aisektapo Godta atlale yu dalepame Gela mo dla halaiyo.

<sup>7</sup> Epapele dulu dla Aisek ya:llu Lebekaye a:ya pta ka:piyo. Epapeleye Gela mo edla ha:ha:lalo opatapo ya: watle epo atlaiyo, “A:ya iye wa: alluta:?” diyo. Epalati Aisektapo mo so opata Lebeka halowedeme ya:ye yumulala depame wota:mama isikimi yia: watle epo atlaiyo, “A:ya iye notumalapo,” diyo. ✧

<sup>8</sup> Amasiyama alila opi mo-pololepo alotle Pilisteya so yia: dokopala oplami Abimelek-tapo toko mosisi kokoloma tle natitepo Aisektapo ya:llu Lebeka hulumhalla natiyo.

<sup>9</sup> Epalati ya:tapo Aisek sisilapame ya: watle epo atlaiyo, “Lebekaye wa: allu ikadepepo. Ame wa: adipalati dia: dla isikimi mala-atlemama Lebekaye notumala duwa?”

Epapalati asiyama Aisekta ya: watle epo atlaiyo, “Na:ta malamaletapo mo so opata na: a:ya halowedeme na:ye yumulala depo apuwa,” diyo.

‡ 25:30: Edom hi ya: dulu kokoye omteka:pele demama apopo. ✧ 25:33: Hib 12:16 ✧ 26:3: Yen 22:16-18

✧ 26:7: Yen 12:13, 20:2



<sup>10</sup> Epalati asiyama dokopala oplami Abimelektapo ya: watle epo atlaiyo, “Wa: adipalati epapele koko hamama dia: dla mala-atluwa? Epapele dulu dla na: mo so oplami haletapo wa: alluye seme tame elematiye, mowolo batalimale koko halë itapo ma dia: dla wotiyalle hamilimla,” diyo.

<sup>11</sup> Epame dokopala oplamitapo haliyamale dla imale yu hamimama epo atlaiyo, “Oplami antapo Aisek dla epame ya:llu dla wotiyalle hamilipiye, oplami eye polowe dla himilipe,” diyo.

<sup>12</sup> Epedeme Aisektapo mo edla halemama dlowe alisisi emaiyo. Epalati GODta gadle tle ya:tapo emale alisisiye sikemte pasatale hauwaliyo. <sup>13</sup> Epapele koko tle ya:tapo alisisi sikemte pasatepo halaiyo. <sup>14</sup> Epame ya:tapo ya: aliya halo sikemte pasatepo halemama ya: oko so mape sikemte pasatale halaiyo. Epalati Pilisteya sotapo koko i natipame ya: dla elle pato himiyo. <sup>15</sup> Epammama yia:tapo Aisekta yú dlalo hapulomaye ma ta:lata kakapulomtaiyo. Yú kokolomale iye Aisek ya: a A:iblaham ya: oko sotapo kokolomaiyo.

<sup>16</sup> Epapalati dokopala oplami Abimelektapo Aisek watle epo atlaiyo, “Wa:tapo dia: dulu dla sikemte itiyamale mate halemama alisisi pasatepo halema. Epapedeme wa: mo itle alikili a:ma woyapo tane,” diyo.

<sup>17</sup> Epalati Aisektapo mo etle alikili a:ma woyapo tame ma Gela kikiwi isili wou dla tulume halaiyo. <sup>18</sup> Ya: epame yú kokolomale Pilisteya sota kakapulomtaleye mamisika: kokolomtaiyo. Epame ya: a A:iblahamta yú kokolomale edla hi halopili hi hatlo metlo ma halopimtaiyo.

<sup>19</sup> Epapeleye alila haletapo Aisek ya: oko sotapo koloma kikiwi isili dla yú amko kolomaiyo. <sup>20</sup> Amasiyama Gela mo dla aliya omha:ha:lalo sotapo Aisek ya: oko so mate yú kolomale e datimama yu topuloliyo. Epapedeme Aisektapo yú kolomale e ya: hiye semama Esek\* diyo. <sup>21</sup> Epalati Aisek ya: oko sotapo ma yú hale kolomaiyo. Amasiyama Gela mo dla aliya omha:ha:lalo sota yú kolomale e ma yia:ta datimama yia: mate yu topuloliyo. Epapele koko tle Aisektapo yú kolomale hale e ya: hiye semama Sitna† diyo.

<sup>22</sup> Epame yia: ma etle tame yú hale kolomaiyo. Amasiyama yia: yú kolomale hema yu potopulollalo wekiyo. Epalati Aisektapo yú kolomale e ya: hiye semama Lehobot‡ diyo. Epapedeme Aisektapo epo atlaiyo, “GODtapo dia: watle ha:ha:lowe mo patoye ma-hamilipo. Epedeme ditapo hema ha:ha:mama woloma ka:depo ha:ha:lowepo.”

<sup>23</sup> Epame Aisektapo mo edla halepame ma Belseba mo dla hetaiyo. <sup>24</sup> Epapeleye ya: edla hetame woyamale utula:la oloma edla GODtapo ya: watle tulume epo atlaiyo, “Na:ye wa: a A:iblaham ya: Godpo. Wa: ase sikemte wota:miya! Na:tapo wa: mate halemama wa: gademhallowepo. Epapedeme na:tapo wa: a A:iblaham dla yu itiyapo himiwa eye dolumama wa: mamaduloye pasatepo mellowepo.”

<sup>25</sup> Epalati Aisektapo tile hapame God dla namkale dle alinepi poyupo ha:mama GOD dla inoma sumama ya: hi di dla ta:diyo. Epame mo edla kintipo ha:ha:mama ya: oko sotapo yú hale kolomaiyo.

### *Aisekta dokopala oplami Abimelek mate yu itiyapo himili*

<sup>26</sup> Epapeleye Aisektapo Belseba mo dla hallati Gela mo dokopala oplami Abimelekta ya: hala dla pumama opa dapiyamte mate puaiyo. Oplami haleye ya: gadlalo, ya: hiye Ahusat. Epalati oplami haleye opahale so dokopala oplami Pikolo. ✧ <sup>27</sup> Amasiyama Aisektapo yia: watle epo atlaiyo, “Wua: adipalati na: natila pumulo? Na:tapo wua: mo dla hallati wua:tapo na:ye alikili a:ma dodolomuwapo,” diyo.

<sup>28</sup> Epalati asiyama yia:tapo epo atlaiyo, “Dimalamana, GODtapo wa: mate halapo. Epedeme di solotama, wa:tapo dia: mate po-opahale dlalo, isikimi sadepo hallepo depame solotamale yuye wa: mate himila pumula. <sup>29</sup> Epapedeme ditapo wa: dla wotiyalle

\* **26:20:** Esek hi ya: dulu kokoye yu topulolle demama apopo. † **26:21:** Sitna hi ya: dulu kokoye ya:mkale dla elle himilowe demama apopo. ‡ **26:22:** Lehobot hi ya: dulu kokoye mo siyapo elema demama apopo. ✧ **26:26:** Yen 21:22

pohamilalo wekuwaye, epammama wa: ma asiyama dia: dla wotiyalle pohamilalo wekelowedeme yu itiyapo himine. Adipalati, wa:tapo dia: mate hallati ditapo wa:ye woloma omha:ha:pame sadle mate wa:ye alikili a:ma woyamane duwapo. Epedeme dimalamana, GODtapo wa: dla sikemte siyemhalemama wa: gademhalapo.”

<sup>30</sup> Epalati Aisektapo daya dele pato dinapopame yimkata daya deiyo. <sup>31</sup> Epame utulala ikadepe dla Aisek mate epo dokopala oplami Abimelek mate asiyama God hi tle yu itiyapo himi himi demama epo atlaiyo, “Di yimkata woloma sadle mate ha:ha:lowepo,” diyo. Epame alotle Aisektapo yia:ye sadle mate ma-taiya diyo.

<sup>32</sup> Alila hatlo medla Aisek ya: oko sotapo puame ya: watle epo atlaiyo, “Di yú amkoye koloma,” diyo. <sup>33</sup> Epalati Aisektapo yú kolomale eye semama Siba<sup>§</sup> diyo. Epapele oloma etle kotiyapo pumama Siba yú kolomale mateka:pi dla hala moye wata oloma hema semama Belseba demha:ha:po.

### *Isota wola: dapiyamte halomale*

<sup>34</sup> Epapeleye Aisek yami Isotapo 40 sokomoko umulati ya:tapo Hitai mo so wola: dapiyamte halomaiyo. Epedeme ya:llu haleye Beli yoti Yuditpo. Epalati ma ya:llu haleye Elon yoti Basematpo. <sup>35</sup> Epapele dulu dla wola: dapiyamte iwolotapo Aisek mate epo Lebeka mate dla pasakalo kokalleye hampuaiyo.

## 27

### *Yokobta ya: a Aisekye isikimi mala-atlale*

<sup>1</sup> Epapedeme Aisektapo mo-totoyemala halemama inoma pa:po halaiyo. Epapele oloma dla ya:tapo ya: maseyemala itapu hamale Iso sisilapame ya: watle epo atlaiyo, “Na: maseyemala,” diyo. Epalati asiyama Isotapo epo atlaiyo, “Yao, a, atlane,” diyo.

<sup>2</sup> Epalati ya: atapo ya: watle epo atlaiyo, “Na: mo-totoyemala halemama mo-polowe mateka:pi dla halapo. Epedeme wa: na:ta atlamolowedeme ape yuye woloma dalene. <sup>3-4</sup> Epapedeme wa: to hamtame alinepi hale sumpo daya woloma ka:pi ha:po na: watle hampuane. Epalati na:tapo daya eye depame wa: watle asiyadulo dulu dla dokopala depo halemama koko hapuloma omhallowe itiyamaleyeye hamilowepo. Adipalati, na:ye mo-polowe mateka:pi dla halapo,” diyo.

<sup>5-7</sup> Epapele dulu dla Aisekta Iso dla yukamhallati Lebeka ma hemele me-dalemhalaiyo. Epapeleye Isota dlowe api ma-tlati ya:tapo yami hale Yokob watle epo atlaiyo, “Na: wa: atapo wa: bapa watle atlemama ‘to hamtapame alinepi hale sumpo hampuame ha:po hamine. Na: epalati depame wa: watle GOD mila:pi tle elele dulu dla dokopala depo halemama koko hapuloma omhallowe itiyamaleyeye hamilowepo,’ dla dale,” diyo. <sup>8</sup> Epame Lebekatapo Yokob watle ma epo atlaiyo, “Na: maseyemala, wa: na:ta atlamolowedeme ape koko e dalepame koko eye hane. <sup>9</sup> Epapedeme wa: wa: aliya kosukulli dla tame gaut aliya kakaliyapele dapiyamteye poyupo puane. Epalati na:tapo aliya mo e mate wa: ata solotamale dayaye ha:lowepo. <sup>10</sup> Epapalati wa: atapo ala popolalo halemama daya eye depame wa: watle itiyamale hamilipe, wa:tapo elele dulu dla dokopala depo halemama koko hapuloma omhallowe,” diyo.

<sup>11</sup> Epalati Yokobtapo asiyama ya: wai watle epo atlaiyo, “Wai wa: natine, na: bapaye kapala dlalo sikemte wokasemana. Asiyama na: tlo kapala dlalo hawa. <sup>12</sup> Epapele dulu dla na: atapo na: kapala umpo malanatipame na:ta ya: dla mala-atla koko dla adipo malapa:? Ya:tapo ka:dle koko tlo na: dla pohamilalo ma isikimi wotiyalle tlo na: dla hamilala,” diyo.

<sup>13</sup> Epalati asiyama ya: waitapo ya: watle epo atlaiyo, “Wa: ase malamiya, na:ta wotiyalle eye mepele me-halowepo. Epedeme isikimi na:ta atlale yu eye dolumama gaut aliya halo poyupo halopo puane,” diyo.

<sup>§</sup> 26:33: Siba hi ya: dulu kokoye yu itiyapo himili demama apopo.

<sup>14</sup> Epapalati Yokobtapo ya: waita atlale yu eye dolumama aliya halo puyupo pulati ya: waitapo Aisekta solotamale dayaye ha:iyo. <sup>15</sup> Epame Iso ya: kapala alisisi ka:ka:dleye ma Yokob dla didiyemeliyo. <sup>16</sup> Epame gaut aliya halo kapala olale mape Yokob do dla epo tumuku dla didiyemeliyo. <sup>17-18</sup> Epo gudepame Aisekta solotamale mo opo mate epo daya mate Yokob watle hamiyo. Epalati Yokobtapo Aisek watle hamtame hamimama, a diyo. Epalati ya: atapo ya: watle epo atlaiyo, “Yao na: maseyemala, wa: anata:?” diyo.

<sup>19</sup> Epalati Yokobtapo isikimi ya: a dla mala-atlemama epo atlaiyo, “Na:ye wa: maseyemala itapu hamale Isopo. Na:tapo wa:ta na: watle atlamale kokoye ma-halepo. Epedeme wa: sila:time polomama daya iye dene. Epame wa:tapo na: watle elele dulu dla dokopala depo halemama koko hapuloma omhallowe itiyamaleye hamine,” diyo.

<sup>20</sup> Epalati asiyama Aisekta epo atlaiyo, “Wa: adipo alinepi ma hapele sumpo hampuwu?” diyo.

Amasiyama Yokobtapo ya: a watle epo atlaiyo, “Wa: Lod wa: GODtapo na: gadlepo,” diyo.

<sup>21</sup> Epapalati Aisekta Yokob watle epo atlaiyo, “Wa: na: mateka:pi dla kulume puane. Epalati na:tapo wa: kapala umpame ikadepe Iso mleni dlowepo,” diyo.

<sup>22</sup> Epalati Yokobtapo ya: a Aisek hala dla kulume tuwame pollati Aisekta ya: kapala umpame epo atlaiyo, “Wa:ta yukamale tlo Yokobta yukamale sepena. Amasiyama wa: do u-umamalati tlo Iso do dlalo some halema,” diyo. <sup>23</sup> Epapele dulu dla Aisekta Yokobye woloma pomalanatilalo wekiyo. Adipalati, Yokob do dlalotapo Iso do dlalo some halaiyo. <sup>24</sup> Epapele koko tle ya: atapo epo atlaiyo “Wa:ye ikadepe Isota:?” diyo.

Epalati asiyama Yokobta mamisika: isikimi mala-atlemama epo atlaiyo, “Yao, na:ye ikadepe Isopo,” diyo.

<sup>25</sup> Epalati Aisekta ya: watle epo atlaiyo, “Wa:tapo na: daya hampualeye na: watle hamine. Epalati na:tapo daya e depame wa: watle elele dulu dla dokopala depo halemama koko hapuloma omhallowe itiyamaleye wa: watle hamilowepo,” diyo. Epalati Yokobtapo daya mate epo wain yú mate halopo puame ya: a watle halopilati ya:tapo daya mate epo wain yú mate deiyo.

<sup>26</sup> Epame Aisekta Yokob watle epo atlaiyo, “Na: maseyemala, wa: na: mateka:pi dla kulume puame polomama na:ye hulune,” diyo.

<sup>27</sup> Epalati Yokobtapo ya: a Aisekta pola mateka:pi dla tuwame polomama ya:ye huliyo. Ya:ye epo me-hulumpollati Aisekta Iso tluka ullu papame epo malamaiyo, “Yao, iye na: maseyemala ullupo,” diyo. Epammama ya:tapo elele dulu dla dokopala depo halemama koko hapuloma omhallowe itiyamaleye ya: watle hapimama epo atlaiyo,

“Na: maseyemala kapala ullu ka:pi pamalati GODta siyemhala osalo ullu ka:pi some pama. ✧

<sup>28</sup> Epedeme Godtapo tiyo mate epo ta:la ka:dle mate wa: dla hapilipe.

Epalati wa: dla alisisi pasataletapo matapame dlowe alisisi ka:pita teimelepe.

<sup>29</sup> Epame mo meyelo meyelope dle dla ha:ha:lalo opatapo wa: yu dla heodepame salladepo siyamelepe.

Epame wa:tapo wa: asiyadulo dulu dla dokopala depo hallati yia:tapo wa: hete sitali isili dla heode demha:ha:lepe.

Epame oplami antapo wa: dla wotiyalle hamilipiye, asiyama Godtapo ya: dla wotiyalle hamilipe.

Epame oplami antapo wa: dla siyele hamilipiye, asiyama Godtapo ya: dla siyele hamilipe,” diyo. ✧

<sup>30</sup> Epapeleye Aisekta Yokob watle koko hapuloma atlemhalepo gudepo Yokobta ma-tlati alotle Isotapo dlowe api sela:leta mo-puaiyo. <sup>31</sup> Epame Iso mape dlowe alisisi ka:pi ha:pame ya: a hala dla hamtame halemama epo atlaiyo, “A, na:po. Epedeme



wa: sila:time polomama daya iye dene. Epame wa:tapo elele dulu dla dokopala depo halemama koko hapuloma omhallowe itiyamaleye na: watle hamine,” diyo.

<sup>32</sup> Amasiyama ya: a Aisektapo ya: watle epo atlaiyo, “Wa: anata:?” diyo. Epalati Isotapo epo atlaiyo, “Na: wa: maseyemala itapu hamale Isopo,” diyo.

<sup>33</sup> Epalati Aisektapo yu i dalepo sikemte eseselalimama epo atlaiyo, “Ame oplami anta api, wa: ala populalo hallati ya: tatile daya ha:pame hampualeye? Na: daya e depame ya: watle elele dulu dla dokopala depo halemama koko hapuloma omhallowe itiyamaleye ma-hami. Epapedeme na: matle wa: watle pohamilowa,” diyo.

<sup>34</sup> Epalati Isotapo koko i dalepame sikemte dupa kolle mate ammama epo atlaiyo, “A, na: mape, elele dulu dla dokopala depo halemama koko hapuloma omhallowe itiyamaleye hamine,” diyo.

<sup>35</sup> Amasiyama ya: a Aisektapo ya: watle epo atlaiyo, “Wa: eitapo isikimi na: dla mala-atlepame ya:tapo wa:ta halowe koko patoye ma-ha,” diyo.

<sup>36</sup> Epalati asiyama Isotapo epo atlaiyo, “Na: ei Yokob\* ya: hi e mate ya:ta moto mate koko halë mate natimama ma-ala:po. Epedeme ya:tapo na: dla mala-atlaleye madapiyamte depo. Epapele dulu dla ya:tapo ka:yapa na:ta na: a elo dla hallowe kokoye kolahauwapo. Epame ma wata oloma hema ya:tapo elele dulu dla dokopala depo halemama koko hapuloma omhallowe itiyamale mape ya:ta ma-halepo,” diyo. Ya: epo atlepame matle ya: a watle epo atlaiyo, “Wa: dla na: watle hapilowe koko opiye me-hutiyema:?” diyo. ✧

<sup>37</sup> Amasiyama Aisektapo ya: watle epo atlaiyo, “Na:tapo Yokob watle itiyamale ma-hamilipo, ya:tapo wa:ye dokopala depo halemama wa: asiyadulo dla mape ya:ta dokopala depo hallepe. Epame na:tapo na: emale alisisi osalo hapuloma ma ya: dla ma-hapi. Epapedeme na: matle apa kokoye wa: watle hamipa:? Na: dla koko opiye mahawa,” diyo.

<sup>38</sup> Epalati Isotapo ya: a dla otele pato himimama epo atlaiyo, “A, na: dla hamilowe koko mahawapa? Wa: na: dla ma koko opi hapine,” depame ha:ha:mama sikemte amaiyo. ✧

<sup>39</sup> Epapalati Aisektapo asiyama epo atlaiyo,

“Wa:tapo tiyo pa:le mo dla halemama wa: osalo dulu dla dlowe alisisi emaletapo pomatlowa, pallipe. ✧

<sup>40</sup> Epame wa:tapo opa mate sikemte nalatimhalemama wa: ei yu dla heodepame salladepo sela:lepe.

Amasiyama wa:tapo ya: tle alikili a:ma gladepo tame mowolo hallepe,” diyo. ✧

### *Yokob mate Iso mate duka gladle*

<sup>41</sup> Epedeme Isotapo ya: ei Yokob watle elle pato himiyo. Adipalati, ya:ta elele dulu dla dokopala depo halemama koko hapuloma omhallowe kokoye ya: tle mo-kolahalati. Epame ya:ta ya:skamu epo malamaiyo, “Na: aye mo-polowe mateka:pi dla halema. Epedeme na: ata polati dupa kolemana a:lleta tame gudle alotle na:tapo Yokoby yumuluwepo,” diyo.

<sup>42</sup> Epapeleye Lebekata Isota Yokob yumuluwedeme yu himili dalepame Yokob sisi-lapo epo atlaiyo, “Wa: bapa Isoye wa: yumuluwedeme yu himsela:po. <sup>43</sup> Epedeme wa: na:ta atlama koko i dalepame koko eye hane. Wa: na: bapa Laban, Halan mo dla halaye, edla teletane. <sup>44-45</sup> Epedeme wa: edla halemama wa: bapata ma sadlati na:tapo na: oko so watle wa:ye salataiya dlowepo. Epapedeme na:tapo wa:ye po-tane dlalo wekelepiye, wa: bapa Isotapo wa:ye yumilipe. Epalati pona:malamana, ma asiyama opa opitapo wa: bapaye yumulala. Epedeme na: posolotamasema, wua:ta dapiyamteta haohaodloweye,” diyo.

\* 27:36: Yokob hi ya: dulu kokoye elemala natilalo demama apopo. ✧ 27:36: Yen 25:29-34 ✧ 27:38: Hib 12:17

✧ 27:39: Hib 11:20 ✧ 27:40: Yen 36:8; 2Dok 8:20

*Yokobye ya: awe Laban hala dla tane dle*

<sup>46</sup> Epapele dulu dla Lebekatapo ya:wolali Aisek watle epo atlaiyo, “Hitai wola: dapiyamte Isota halomale iwolotapo na: pasakaloye wotiyalle dulu dla semtama. Epedeme na: posolotamasema, Yokobtapo Hitai a:ya hale haloweje,” diyo.

## 28

<sup>1</sup> Epalati Aisektapo Yokob sisilapame ya: watle epo atlaiyo, “Wa: Keinan mo dla hallalo a:ya hale pahalowa. <sup>2</sup> Amasiyama wa: mama Betuwel, Padan Alam mo dla halaye, edla tane. Wa: edla tame wa: awe Laban ya: utukaka dulu dla yoti hale hane. <sup>3</sup> Epalati itiyamale Godtapo wa: gademama wa: watle yimlala pasataleye hapilipe, epame wa: mamaduloye pasatepo mellepe. Epalati ta:lamu meyelope meyelope dle sotapo hatlo wa: watle yia: mama dlepe. <sup>4</sup> Epame Godtapo A:iblaham watle ta:la i hamilowedeme yu itiyapo himiwaye ma alotle wa: watle hamilipe. Amasiyama ditapo ta:la hema watapo asepe so some ha:ha:po,” diyo. ✧ <sup>5</sup> Epo atlepo gudepame Aisektapo Yokobye sadle mate Padan Alam mo dla ya: awe Laban mate halla tane, diyo. Epela dalepame Yokobtapo tame Alam oplami Betuwel yami Laban hala dla taiyo.

<sup>6</sup> Epapeleye Isotapo ya: a Aisekta Yokobye Keinan a:ya pahalalo ma Padan Alam mo dla tame a:ya hane dle kokoye daliyo. <sup>7</sup> Epame ya: ma me-daliyo, Yokobtapo ya: a Aisek yu dalepame salladepo Padan Alam mo dla tale kokoye. <sup>8</sup> Epapedeme Iso ya: malanatiyo, ya: atapo ya:ta Keinan wola: dapiyamte halomuwa dla alimhalaleye. <sup>9</sup> Ya: epela natipame tame A:iblaham yami Ismaelta himili a:ya hale haiyo. Ya: hiye Mahalat, ya:ye Nebayot ya:lapo.

*Yokobta elemama milamalo natili*

<sup>10</sup> Epapedeme Yokobtapo Belseba mo saliyome ma Halan mo dla taiyo. <sup>11</sup> Epapeleye ya: mo edla tamama salita mo-tullati duka dla yaliyo. Ya:ye ellowedeme ewala hapame matali some himme elaiyo. <sup>12</sup> Ya: elemama milamalo natilati tilikali omaletapo ta:lamu tle hitomeleme hetame Pepele dimo dla gudepo halla natiyo. Epalati God ya: banakaka sotapo tilikali etle tulu heta demha:ha:la natiyo. ✧ <sup>13</sup> Epapele dulu dla milamalo dulu edla GODtapo ya: mateka:pi dla halemama epo atlaiyo, “Na:ye wa: mama A:iblaham ya: GODpo, epame wa: a Aisek ya: GODpo. Epedeme na:tapo ta:la pato iye wa: watle epo wa: mamadulo watle hamilowepo. ✧ <sup>14</sup> Epame wa: mamadulotapo sikemte pasatamama apupu some mo pato dla pasalalemtelepe. Wa: mamadulo iwolo tle ta:la so hapuloma dla siyele hampulupe. ✧ <sup>15</sup> Epame wa:tapo hadima adipo ta demsela:lepiye, na:tapo alila hapuloma dulu dla wa: mate hallowepo. Epo alotle na:tapo wa:ye ta:la hema ma ilame sempuluwepo. Na: wa:ye posaliyome tlowa. Epame monolo atlamale koko iye halomolowepo,” diyo.

<sup>16</sup> Epapeleye Yokobtapo elale tle sila:tipame ya:skamu epo atlaiyo, “Na: GODta hema hala kokoye pomalamana. Amasiyama ya: mo hema ma me-halemapo,” diyo. <sup>17</sup> Epammama Yokobtapo sikemte wota:mama epo atlaiyo, “Ikadepe, mo iye God ya: mopo, epame Pepele dimo kokoloma talapo,” diyo.

<sup>18</sup> Epapeleye Yokobtapo ma-alallati elale tle sila:tipame ewala ya:ta matali some dokopala himme elaleye hapame oloma hitomeleme pameliyo. Epame dakopala mate ewala di dla sipame mo eye semama aiyalma diyo. <sup>19</sup> Epapele dulu dla ka:yapa mo e ya: hi semama Lus demdiyo. Epapele tlope Yokobtapo matle hi amko semama Betel\* diyo.

<sup>20-21</sup> Epame Yokobtapo God dla yu itiyapo himimama epo atlaiyo, “Wa:tapo na:ta tlali na: omtamama dlowe alisisi mate kapala alisisi mate halopimtapame ma ilame woloma sempuame na: a aya dla pomellepiye, eta wa:ye ikadepe na: GOD mleni dlowepo.

<sup>22</sup> Epame ewala hema opatapo puame wa: hi di dla ta:de demha:ha:lepe. Epame wa:tapo

✧ 28:4: Yen 17:4-8 ✧ 28:12: Yon 1:51 ✧ 28:13: Yen 13:14-15 ✧ 28:14: Yen 12:3, 22:18 \* 28:19: Betel hi ya: dulu kokoye Godta hallalo mo demama apopo.

na: watle hapili alisisiye kokolumtame 10 depame ma kolomale hatlo tlo wa: watle ilame hami demhallowepo,” diyo.

## 29

### *Yokobta ya: awe Labanta hala mo dla tame woyamale*

<sup>1</sup> Yokobtapo Betel mo saliyome ma tame salita matlalo tiyama dla tame woyamaiyo.

<sup>2</sup> Epapeleye ya: puame mo edla natilati yú kolomaleye natiyo. Epame aliya halo alumale dapahatlopetapo yú kolomale mateka:pi edla yú dlowedeme hutiyemyela natiyo. <sup>3</sup> Yú kolomale iye ewala patotapo himomeleme polomdiyo. Epapeleye aliya halo omha:ha:lalo sotapo yia: aliya halota ma alupo gudlati ewala yú kolomale himomeleme pollaloye alikili dla kokolustamdiyo, yia: aliyata yú dlomelepo depame. Epame yia: aliyata yú mo-dlopo gudlati ewalata mamisika: himomelemdiyo.

<sup>4</sup> Epapele dulu dla Yokobtapo aliya halo omha:ha:lalo so watle epo atlaiyo, “Namkadulo, wua: apa sota:?” diyo. Epalati asiyama yia:ta epo atlaiyo, “Dia:ye Halan mo so,” diyo.

<sup>5</sup> Epalati asiyama Yokobta yia: watle epo atlaiyo, “Nahol ya: mama Laban wua: malamata:?” diyo. Epalati asiyama yia:ta ya: watle epo atlaiyo, “Yao, dimalamana,” diyo.

<sup>6</sup> Yokobtapo matle yia: watle epo atlaiyo, “Ya:ye me-ka:depo halema:?” diyo. Epalati ma asiyama yia:ta epo atlaiyo, “Yao, ya:ye me-ka:depo halema,” depame matle atlaiyo, “Wa: aseka huma natine. Oplami wa:ta atla e yoti Leisolpiye, sipi aliya halo eleme puaye,” diyo.

<sup>7</sup> Epalati Yokobtapo aliya omha:ha:lalo so ewolo dla epo atlaiyo, “Wua: natiya, saliyeye ala dukuslopi dla halapo. Epapedeme wata oloma hema wua: aliya haloye yú ilipame osamokolo dlomelepo depame ma hapele eleme tamalaiya,” diyo.

<sup>8</sup> Amasiyama yia:ta asiyama epo atlaiyo, “Hao, di pe-epapolowa. Adipalati, sipi aliya halo omha:ha:lalo sotapo yia: aliya halo mate woloma yimkata mo-puame hema alupo gudlepiye, eta di ewalaye kokolustapame di sipi aliya haloye yú ilimolowama,” diyo.

<sup>9</sup> Yokob ala opa mate me-yukamhallati Leisoltapo ya: a aliya halo eleme yia: hala dla puaiyo. <sup>10</sup> Epalati Yokobta Leisol natipame ewala kokolustapame ya: awe Laban aliya haloye yú ilimaiyo. <sup>11-12</sup> Epame Yokobtapo Leisol dla hamame ammama ya: watle epo atlaiyo, “Na:ye wa: a yotimala Lebeke yamipo,” diyo. Epalati Leisolta yu i dalepame ma hapele kukulumtame ya: a atlaiyo.

<sup>13</sup> Epapalati Labanta ya: awe Yokobye puwo dle koko dalepame ma hapele ya: natilatiyo. Epame ya:ye hamame hulupame aya dla seme hetaiyo. Epalati Yokobtapo ya: dla wowoyamale koko hapulomaye ya: awe Laban watle atlamaiyo. <sup>14</sup> Epalati asiyama Labanta koko e dalepame ya: watle epo atlaiyo, “Wa:ye ikadepe na: omali ikadepepo,” diyo.

### *Yokobta Liya mate Leisol mate halomale*

<sup>15</sup> Epedeme Yokobtapo ya: awe mate halemama mama hatlo ma-hamastlati ya: awe Labantapo ya: watle epo atlaiyo, “Wa:ye na: awe demama isikimi asiyama pa:le na: oko hamhallowe poka:dena. Epapedeme wa: apa asiyama yilo na: oko hamhallowe solotama:?” diyo.

<sup>16</sup> Amasiyama Labanye ya: utukaka dapiyamte eleme halaiyo, Leisol mate epo ya: nana Liya mate. <sup>17</sup> Epapele dulu dla Liyatapo a:ya ipilalo pase ka:pita polaiyo. Amasiyama Leisol tlope a:ya ipilalo sikemte ka:pita polaiyo. <sup>18</sup> Epapeleye Yokobtapo Leisol tlo ya:ta sikemte solotamale pato elaiyo. Epammama ya:tapo ya: awe watle epo atlaiyo, “Na:tapo Leisol halowedeme sokomoko 7 dulu dla wa: oko hamhallowama,” diyo.

<sup>19</sup> Epapalati asiyama ya: awe Labantapo epo atlaiyo, “Yao, me-ka:pi. Adipalati, poka:dena, na:tapo Leisolye wa: watle pohamilalo wekemama ma oplami hale dla hamiloweye. Epedeme wa: na: mate halemama na: oko hamhalane,” diyo.

<sup>20</sup> Epapele dulu dla Yokobtapo Leisol halowedeme sokomoko 7 dulu dla oko hamhalaiyo. Amasiyama ya: Leisol sikemte solotamale elemama sokomoko 7 iye ya: dla pase pasatale diyo.

<sup>21</sup> Epedeme ya:tapo sokomoko 7 oko hamhalepo depo mogudlati Laban watle epo atlaiyo, “Alilatapo mo-umapo. Wa: Leisolye na: watle ma-hamine,” diyo.

<sup>22</sup> Epalati Labantapo yoti oplami watle hamilowedeme daya dele dinapopame opa hapulomaye puaiya diyo. Epame yia:tapo puame yimkata daya deiyo. <sup>23</sup> Amasiyama ma-tamila:la halemtilati Labanta Yokob mala-atlepame Leisolye poseme pulalo ma Liya tlo seme puaiyo. Epapele dulu dla Yokobtapo pomalanatilalo Liya mate me-elaiyo. <sup>24</sup> Epapedeme Labantapo ya: oko a:ya Silpaye ma Liya gademsela:lepo depame hamame iyo.

<sup>25</sup> Epapeleye Yokobta utulalati sila:tipo natipame Laban watle epo atlaiyo, “Wa: adipalati na: watle isikimi ipo elemo? Adipalati, na: Leisol tlo halowedeme sokomoko 7 dulu dla wa: oko hamhaluwapo. Amasiyama wa: isikimi mala-atlepame ma Liya tlo na: watle hamilipo,” diyo.

<sup>26</sup> Epalati asiyama Labanta ya: watle epo atlaiyo, “Di mo dulu hema wola:ta opa halomama ya: nana pato me-hallati ya:la yemala tatile oplami pohasemde. <sup>27</sup> Epedeme Liya daya dele itapo wiki hatlo hamastlati alotle Leisolye wa: watle hamilowepo. Amasiyama wa: mamisika: sokomoko 7 dulu dla na: oko hamhallepe,” diyo.

<sup>28</sup> Epapalati Yokobtapo yu e dalepame solotamale me-himiyo. Epame Liya hamili daya deleta mosukulu tame gudlati Labanta yoti hale Leisolye hame Yokob watle hamiyo. <sup>29</sup> Epapeleye Labantapo ya: oko a:ya Bilhaye Leisol gademsela:lepo depame hamame iyo. <sup>30</sup> Epame Yokobtapo Leisol mate elaiyo. Epapele dulu dla ya: Leisol tlo sikemte solotamale pato elemama asiyama Liya tlo pase solotamale elaiyo. Epame mamisika: ya:ta Leisol halë asiyama dla sokomoko 7 dulu dla oko hamhalaiyo.

### *Yokob ya: akimlala*

<sup>31</sup> Epedeme GODtapo Yokobta Liya pase solotamalalo wekele koko natipame Liya tlo yimlala isukumelepe diyo, amasiyama Leisol tlo hamkapi pollope diyo. <sup>32</sup> Epapeleye Liyatapo mopapo polopame maseyemala hampame ya: hiye Luben\* diyo. Epedeme Liyatapo epo atlaiyo, “GODtapo na:ta dupa kolle kokoye ma-natiwapo. Epedeme na: oplamitapo wata oloma hema na:ye sikemte solotamale ellepe,” diyo.

<sup>33</sup> Epame ya: matle mopapo polopo maseyemala hale hampame, ya: hiye Simiyon† diyo. Epame ma epo atlaiyo, “GODtapo na: oplamita na:ye pase sikemte malahala kokoye ma-daluwapo,” diyo.

<sup>34</sup> Epame ya: mamisika: mopapo polopo maseyemala hale hampame ya: hiye Libai‡ diyo. Epame epo atlaiyo, “Epedeme watapo na: oplamitapo na:ye sikemte malahallepe. Adipalati, na:tapo ya: akimlala dapahatlopeye mo-hohomuwapo,” diyo.

<sup>35</sup> Epame mamisika: mopapo polopo maseyemala hale hampame ya: hiye Yuda§ diyo. Epame ma epo atlaiyo, “Wata oloma hema na: GOD hi di dla ta:dlowepo,” diyo. Epame etle tamama mamisika: yimlala opi po-isukumalalo halaiyo.

\* **29:32:** Luben hi ya: dulu kokoye na: maseyemala natine demama apopo. Epame, ya:tapo na:ta dupa kolle koko ma-natima demama apopo. † **29:33:** Simiyon hi ya: dulu kokoye ya: dalema demama apopo. ‡ **29:34:** Libai hi ya: dulu kokoye malahallowe koko demama apopo. § **29:35:** Yuda hi ya: dulu kokoye di dla ta:dlowe demama apopo.

## 30

<sup>1</sup> Epedeme Leisoltapo ya:skamu ya:ta yimlala po-isukumalalo wekele koko natipame ya: nana Liya dla elle himhalaiyo. Epammama ya:tapo ya:wolali Yokob watle epo atlaiyo, “Na: yimlala hapine! Wa:ta na: watle yimlala pohapilalo wekelepiye, na: polowepo,” diyo.

<sup>2</sup> Epalati Yokobtapo yu e dalepo siyaladepame ya: watle epo atlaiyo, “Na: Godta:? Eta wa:ta na: watle epo atlaye. Hao! Hatlo Godtapo yimlalaye hapimhalapo,” diyo.

<sup>3</sup> Epapalati Leisoltapo Yokob watle epo atlaiyo, “Wa: na: oko a:ya Bilha mate elane, ya:tapo na: yimlala isukumelepo depame,” diyo.

<sup>4</sup> Epammama Leisotapo Bilhaye ya:wolali Yokob watle hamiyo. <sup>5</sup> Epalati Bilhata mopapo polopame maseyemala hamaiyo. <sup>6</sup> Epapalati Leisoltapo maseyemala hiye Dan\* hi sepilaiyo. Epame epo atlaiyo, “Godtapo na:ta inoma sumale yu dalepame asiyama hamipo. Ya:tapo na: kokoye natipame maseyemala na: watle hamipo,” diyo.

<sup>7</sup> Epame Bilhatapo mamisika: mopapo polopame maseyemala hale hamaiyo. <sup>8</sup> Epalati Leisoltapo ya: hiye Naptali† diyo. Epame epo atluwapo, “Na:tapo na: nana mate nalatimama na:ta ma-tla:mtauwapo,” diyo.

<sup>9</sup> Epapele oloma edla Liya ya: malanatiyo, ya: mopapo godle kokoye. Epammama ya:tapo ya: oko a:ya Silpa hamame ya:wolali Yokob watle hamiyo. <sup>10</sup> Epalati Silpatapo mopapo polopame maseyemala hamaiyo. <sup>11</sup> Epapalati Liyata maseyemala hiye Gad‡ hi hamaiyo. Epame epo atlaiyo, “Ka:dle kokotapo na: dla mo-woyamapo,” diyo.

<sup>12</sup> Epame Silpatapo mamisika: mopapo polopame maseyemala hale hamaiyo. <sup>13</sup> Epalati Liyatapo maseyemala hiye Asel§ diyo. Epame epo atlaiyo, “Na: wata sikemte siyema. Epedeme wola: hapulomatapo na: watle siyele a:ya demyelepe,” diyo.

<sup>14</sup> Epapele dulu dla witi daya hauwallowe alilata pulati Lubentapo osalo dla tame dali dlosalo mopapo pollopo depame dlaloye natipame halopo puame ya: wai Liya watle halopiyo. Epalati Leisolta dalepame Liya watle epo atlaiyo, “Wa: maseyemalata dali dlosalo halopo puale opiye na: watle halopine,” diyo.

<sup>15</sup> Amasiyama Liyatapo siyaladepame Leisol watle epo atlaiyo, “Wa:tapo na: oplamiye mo-uhauwapo. Epame mamisika: na: maseyemalata dali dlosalo halopo pualeyehalomalowedeme apopa?” diyo.

Amasiyama Leisolta ya: watle epo atlaiyo, “Wa:tapo wa: maseyemalata dali dlosalo kolepo halopo pualeyehalomalowedeme apopa?” diyo.

<sup>16</sup> Epapeleye tamila:la oloma edla Yokobtapo ya: osalo tle pulati Liyatapo tame ya: umpame epo atlaiyo, “Wata utula:la na:ta wa: mate ellowedeme na: maseyemalata dali dlosalo kolepo pualeyehalomalowedeme apopa?” diyo.

<sup>17</sup> Epapele oloma edla Godta Liyata inoma sumale yu dalepame ya: watle maseyemala hale hamaiyo. <sup>18</sup> Epame ya:tapo maseyemala e ya: hiye Isakal\* hi hamaiyo. Epame epo atlaiyo, “Na:tapo na: oko a:yaye nowolali watle hamilati Godtapo na: watle asiyama ka:dleyehalomalowedeme apopa?” diyo.

<sup>19</sup> Epapele dulu dla Liyatapo matle mopapo polopame maseyemala hale hamaiyo. <sup>20</sup> Epalati ya:tapo ya: hiye Sebulun† diyo. Epame epo atlaiyo, “Godtapo namkale dle alisisi hamimama maseyemala iye hamilipo. Epedeme nowolalitapo na:ye di dla hame hetlepe. Adipalati, na:tapo ya: akimlala 6 mo-isukumuwapo,” diyo.

<sup>21</sup> Epame alotle ya: matle amseyemala hamaiyo, epo ya: hiye Daina diyo.

\* **30:6:** Dan hi ya: dulu kokoye koko gladle demama apopo. † **30:8:** Naptali hi ya: dulu kokoye nalatimale demama apopo. ‡ **30:11:** Gad hi ya: dulu kokoye ka:dle kokota woyama demama apopo. § **30:13:** Asel hi ya: dulu kokoye siyele demama apopo. \* **30:18:** Isakal hi ya: dulu kokoye asiyama ka:dle demama apopo. † **30:20:** Sebulun hi ya: dulu kokoye di dla ta:dlowe demama apopo.



<sup>22</sup> Epame Godtapo ma Leisolye malapame ya:ta inoma sumale yu dalepame ya:ta yimlala isukumolowe itiyamale hamiyo. <sup>23</sup> Epalati ya:tapo mopapo polopame maseyemala hamaiyo. Epame epo atlaiyo, “Godtapo na:ta wota:le koko hapulomaye ma-hamastalepo,” diyo. <sup>24</sup> Epedeme maseyemala e ya: hiye Yosep‡ diyo. Epame ma epo atlaiyo, “Na: malama, GODtapo na: watle ma maseyemala hale hamilipe,” diyo.

*Yokob ya: aliya halota sikemte pasatamtale*

<sup>25</sup> Epapedeme Leisoltapo Yosep hamale alotle Yokobtapo Laban watle epo atlaiyo, “Na: solotama watapo mo itle ma na: mo ikadepe dla ilame tlowama. <sup>26</sup> Epedeme na:tapo Liya mate epo Leisol mate halomolowedeme wa: oko patoye ma-hamhaluwapo. Epapedeme wa: na: wola: dapiyamte i mate epame na: yimlala mate na: watle halopine. Na: epalati mo-tlowama,” diyo.

<sup>27</sup> Amasiyama Labantapo asiyama epo atlaiyo, “Hao, wa:ta na: saliyome tlowe poka:dena. Adipalati, na:ta inoma natalimale tle natili dulu dla GODtapo wa: tle na: dla gadle pato himimhalapo. <sup>28</sup> Epedeme na: solotama wa:ta hema me-halloweye. Epapedeme wa:ta midla hallepo depame na: asiyamaye adisowa wa: watle hamipa:?” diyo.

<sup>29</sup> Amasiyama Yokobtapo asiyama ya: watle epo atlaiyo, “Epedeme mo-wa:malamana, na:tapo wa: mate halemama wa: oko patoye ma-hamhaluwapo. Epalati wa: aliya halotapo sikemte mo-pasatamtauwapo. <sup>30</sup> Epapele dulu dla na:ta ka:yapa puwa oloma edla wa: aliya haloye pase pasataleta halana. Amasiyama wata oloma hema wa: aliya halotapo sikemte kustipo tame elapo. Adipalati, GODtapo na:ta koko halomale tle wa: dla gadle pato himhaluwapo. Amasiyama wata oloma hema alilatapo mo-puapo, na:tapo naskamu na: yimlala siyapo tlo omhalloweye,” diyo.

<sup>31</sup> Epapele tlope Labantapo asiyama Yokob watle ma epo atlaiyo, “Na: asiyama adisowaye wa: watle hamipa:?” diyo.

Epalati asiyama Yokobta ya: watle epo atlaiyo, “Epedeme asiyamaye ipo. Na: solotama wa: aliya halo dulu dla aliya dilikili mate epo dudulalimale mate epo popokalle mate tlo hohomolowama. § <sup>32</sup> Epapele dulu dla wa:ta na: watle koko e hane dlepiye, na: eta wa: mate medla halemama wa: oko hamhallepe. <sup>33</sup> Epapedeme itapu dla wa: matle puame na: aliya halo natilati dilikili siyapo mate epo dudulalimale siyapo mate epo popokalle siyapo mate natilipiye, wa: na:ye ikadepe po-uhalalo wekele mleni dlepe.”

<sup>34</sup> Epalati Labantapo yu edla solotamale himmama epo atlaiyo, “Yao, me-ka:pi,” diyo.

<sup>35</sup> Amasiyama alila oloma edla Labantapo hemele tame Yokobta ya: dla hohomele dle aliya halo dilikitalo mate epo dudulalimale mate epo popokalalimale mateye elepame pateka:mu dla elemtaiya diyo. <sup>36</sup> Epalati Laban ya: akimlalatapo aliya ewoloye eleme mo pateka:mu, duka dla hutiyemama alila dapahatlope polollalo mo dla elemtamalaiyo. Amasiyama Yokobtapo koko i pomalamalalo aliya halo opi medla pomelleye me-omhalaiyo.

<sup>37</sup> Epapele dulu dla Yokobtapo Labanta ya: aliya uhohopo elemtale natipame ya:tapo dali dlo kolepame kapala dollomama woloma ka:pi dudulumtuluiyo, aliya kapala dudulli some ha:ha:lepo depame. <sup>38</sup> Epame aliyata yú dlalo mo mateka:pi dla kellemtaiyo, yia:tapo yú dlomsiyamama dali dudulli natilipo depame. <sup>39</sup> Epame yia:tapo dali eta ha:ha: mila:pi tle halomsiyapo depo yimlala usulumama isikimi dudulalimale mate epo popokalalimale mate tlo usullupo depame. <sup>40</sup> Epame yia:tapo yimlala usullati Yokobtapo yimlala hapuloma hohopo tame miyelo alikili dla ipila:iyo. Epame matle aliya opi tlo elemtame Laban aliya dudulalimale mate dilikitalo mateta ha:ha: yia:

‡ **30:24:** Yosep hi ya: dulu kokoye ya:tapo ma hale hamilipe demama apopo. § **30:31:** Aliya dilikili mate epo dudulalimale mate epo popokalalimale mateye oloma edla pase pasataiyo. Amasiyama kamale siyapo tlo sikemte pasatepo elaiyo.

mila:pi dla ipila:iyo, yia:tapo halomsiyapo depo yimlala dudulalimale mate dilikitalo mate tlo hatitimelepo depame. Epalati Yokobtapo aliya dudulalimale mate epo dilikitalo mate epo popokalalimale mate ala usulliye elemtame ma ya: aliya mate hatlo godiyo. <sup>41</sup> Epame matle aliya halo i-itiyamaletapo hoholomolowedeme ha:ha:lati Yokobtapo dali dudulliye halopame yia: mila:pi dla kellemdiyo. <sup>42</sup> Amasiyama aliya halo hohopeyalimaletapo hoholomalati ya: dali dloye pokellalo wekemdiyo. Epapele koko tle aliya halo i-itiyamaleta hatitimale tlo Yokobta hohomdiyo. Amasiyama hohopeyalimaleta hatitimale tlo Labanta hohomdiyo. <sup>43</sup> Epapele koko tle Yokob ya: aliyatapo sikemte pasatamtamama ya:ye alisisi pasatale oplami diyo. Epame ya: oko so ma sikemte pasatepo elemama ya: donki aliya mate epo ya: ka:mol aliya mate sikemte kustimtame elaiyo.

## 31

### *Yokobta Laban tle teletale*

<sup>1</sup> Epedeme Laban ya: akimlalatapo Yokob koko dla yu ipo balemyaiyo, “Ya:tapo di ata omhaluwa aliyaye ma ya:ta hohomama ya:skamu ya:ye alisisi pasatale oplami depo halapo,” demyaiyo. Epalati Yokobta yia:ta yu balemyaleyeye me-daliyo. <sup>2</sup> Epame Labanta ya: watle elle himhala koko ma me-malanatiyo.

<sup>3</sup> Epalati Godtapo ya: watle epo atlaiyo, “Wa: ma ilame wa: mo ikadepe dla tane. Epapalati na:tapo wa: mate hallowepo,” diyo.

<sup>4</sup> Epapele dalepame Yokobtapo ya: wola: dapiyamteye ya:ta aliya omhallalo mo dla pulupo depame yia:ye sisilamaiyo. <sup>5-7</sup> Epame yia: watle epo atlaiyo, “Na: wata mo-malanatima, wua: atapo na: dla elle himhala kokoye. Amasiyama dulu edla na: a Aisek ya: Godtapo na: mate halemama wua: atapo na: watle wotiyalle pohamimdena. Epapedeme wua: mo-wua:malamana, na:tapo wua: a oko pato hamhaluwaye. Epapele tlope ya:tapo na: dla isikimi mala-atlale koko hamama na: oko asiyamaye alila opi dla meyelo de epo ma alila opi dla meyelo de demhaluwapo. <sup>8</sup> Epammama ya:ta atlemama, ‘Wa: oko asiyamaye aliyata yimlala usulumama popokalalimale siyapo usullati wa:tapo hohoma demhallepe,’ dlati aliyatapo yimlala usulumama mepo popokalalimale siyapo tlo usulumduwapo. Epame matle wua: ata atlemama, ‘Wa: aliya yimlala dudulalimale usullati hohoma demhallepe,’ dlati aliyatapo mepo dudulalimale siyapo tlo usulumduwapo. <sup>9</sup> Epapele koko tle Godtapo wua: a aliya hapulomaye ma na: watle hohopo iwapo.

<sup>10</sup> Epapeleye aliyatapo hoholomtlowe alilata pulati na: milamalo natimama ipo natiwa. Aliya hapulomata hoholomyale oloma edla isikimi aliya pate dudulalimale mate epo popokalalimale mate tlo hoholomyela natiwa. <sup>11</sup> Epalati milamalo natili dulu edla God ya: banakaka oplamitapo na: watle epo atluwa, ‘Yokob.’ Epapalati na: asiyama epo atluwa, ‘Yao, na: me-dalemelema,’ duwa. <sup>12</sup> Epalati ya:ta epo atluwa, ‘Wa: natima:, isikimi aliya pate dudulli mate epame popokalalimale mateta hoholomyapo. Adipalati, na:tapo Labanta wa: dla batalimale koko hapuloma halomhaluwaye menatiwa. <sup>13</sup> Epapedeme na:ye wa:ta duka dla puame Betel mo dla ellati wa: dla malame woyamuwa Godpo. Wa:tapo mo edla ewalaye oloma hitomeleme dakopala ewala di dla sipame na: dla yu itiyapo himiwapo. Epedeme wa: Laban mate halaye memelepame ma-hapele wa: mo ikadepe dla ilamtane,’ duwa.” ✧

<sup>14</sup> Epapeleye Leisol mate epo Liya mate Yokobta yia: watle atlamale yu dla ka:pi demama epo atlaiyo, “Di ata polati dita ya: tle alisisi halomolowe hawa. <sup>15</sup> Epame ya:tapo dia:ye elele meyelo so some omhalemama wa:ta di halomama ya: watle asiyama pato himiwaye e isikimi mo-dosomuwapo. <sup>16</sup> Epedeme Godtapo alisisi hapulomaye

di a tle mo-kokolahapame ma watapo dia: mate epo di akimlala mate dla hapiwapo. Epapedeme wa: Godta atlamale yu e dalemama dolumane,” diyo.

<sup>17-21</sup> Epedeme Yokobye ya: doko Labanye po-atlalo hemele mo-tlowedeme madinapiyo. Amasiyama alila oloma eye Labantapo ya: aliya halo dlaloye ketlemhalla taiyo. Epalati yoti Leisoltapo mo-tlowedeme sela:mama hemele hetame ya: a Laban aya dla biskapa god dlopi dota mimita:peleye halomaiyo. Epame Yokobtapo ya: wola: dapiyamte mate epo ya: yimlala mate ka:mol aliya di dla ipila:pame ya: a Aisekta hala mo Keinan dla ilame ma-tamalaiyo. Yia: tamalemama yia: alisisi hapuloma mate aliya halo hapuloma mateye eleme tamalaiyo. Yia: tame Yupalates aloma patoye ulupame ma Giliyad mo dla hetamalaiyo.

*Labanta Yokob hamolowedeme alotle dodolomtale*

<sup>22</sup> Epedeme alila dapahatlope mo-pololepo hallati alotle Labantapo toko ipo natitepo Yokobta ma-tale halla natiyo. <sup>23</sup> Epalati ya:ta koko i natipame ya: asiyadulo elepame alila 7 dulu dla Yokobta tale alotle dodolomtamalaiyo. Epapeleye yia: tame Yokobye Giliyad mo dla kimpo halla natiyo. <sup>24-25</sup> Epalati yia: mape seme mateka:pi medla kimpo hutiyeyo. Epalati utula:la oloma edla Godtapo milamalo malame Laban watle epo atlaiyo, “Wa: Yokob watle koko atlamolowedemeye woloma malapo atlamelepe,” diyo.

<sup>26</sup> Epalati Labantapo tame Yokob umpame ya: watle epo atlaiyo, “Wa: adipalati na:ye mala-atlepame na: utukakaye hemele opahale sota hohopo tamdiye epapele some hohopo puwa? <sup>27</sup> Epedeme wa:tapo na: watle woloma wa:ta alikili a:ma woyama kokoye atlematiye, na: eta wa: mate woloma daya dele pato himpame wua:ye sala sale mate alikili a:ma woyamaiya dlemla. <sup>28</sup> Epame wa:ta epo hemele tale koko tle na:tapo na: mamadulo dla epo na: utukaka dapiyamte dla namkale dle yu atlepame pohuhulama. Epapele koko tle wa:ye batalimale koko pato ma-hauwapo. <sup>29</sup> Epapedeme na: dla itiyamale elapo, wa:ye batalipo hamastloweye. Amasiyama wa: a ya: Godtapo wata utula:la milamalo malame na: dla epo atla, ‘Wa: Yokob dla koko atlamolowedeme woloma malapo atlamane,’ de. <sup>30</sup> Epedeme na: malama, wa:ta wa: a hala dla tlowedeme sikemte malamale pato himhaluwaye. Amasiyama wa: adipalati na: god dlopi dota mimita:pele mate uhalopo puwa?” diyo.

<sup>31-32</sup> Amasiyama Yokobtapo ya:llu Leisolta biskapa god dlopi dota mimita:peleye hemele uhalopo puale kokoye woloma pomalamalalo Laban watle epo atlaiyo, “Na: puluwedeme wa:ye po-atlana. Adipalati, na:ta malamaleta wa:tapo wa: utukakaye ma ilame elemalala duwa. Epedeme dia: dulu dla oplami haletapo wa: god dlopi dota mimita:pele halopo puale hallepiye, ka:dena oplami etlo polowe dla himiloweye. Epapedeme wa: na: asiyadulo mila:pi tle wa: alisisi totapame natipo halopo tane,” diyo.

<sup>33</sup> Epalati Labantapo ya: biskapa dlopi dota mimita:pele godye totamtame Yokobta ellalo dla tuwame totama, epo ma Liyata ellalo dla tuwame totama, epame ma tuwame Liya mate epo Leisol mate yia: gadlalo wola:ta hutiyelalo dla tuwame totama diyo. Amasiyama ya: ponatiyo. Epalati ma mosukulu dla Leisolta ellalo dla totamala tuwaiyo. <sup>34</sup> Amasiyama biskapa dlopi dota mimita:pele god eye Leisoltapo duli dulu dla hatipame ka:mol aliya dimsisi di dla himpame di tle polaiyo. Epapele koko tle Labantapo Leisolta ellalo mo dla tuwame totamalati ponatilalo wekiyo.

<sup>35</sup> Epame Leisoltapo ya: a Laban watle epo atlaiyo, “A, na:ta ka:mol aliya di tle alikili a:ma potullalo pola koko dla wa: na: dla ase sikemte siyalademiyaya. Adipalati, na:ye na: toto koko natipo poloma,” diyo. Epapalati Labantapo kimna:ya duluye sikemte totamaiyo, amasiyama ya: ponatiyo.

<sup>36</sup> Epalati Yokobtapo sikemte siyalademama ya: doko Laban watle epo atlaiyo, “Wa: apa batalimaleye na: dla natima:? Epame wa: na: apa aiyalmaye hauwokokomalati wa:tapo na:ye dodolompuo? <sup>37</sup> Adipalati, wa:ta na: alisisi hapuloma dulu dla totapame

natili kokoye na: asiyadulo mate epo wa: asiyadulo mate yia: mila:pi tle hatitimane. Epalati edla anta ikadepe koko hata:-e depo natilowepo.

<sup>38</sup> Epedeme na:tapo sokomoko 20 dulu dla wa: oko patoye ma-hamhaluwapo. Epapele dulu dla wa: aliya halota yimlala usulumtale oloma edla aliya yemala hale-tapo popowana. Epame na:tapo wa: aliya halo dulu dla aliya haleye poyummdena.

<sup>39</sup> Epame alila opita moko esematapao wa: aliya hale yumulati ma asiyama na:tapo na: aliya tlo wa: watle hamame imduwapo. Epame wa: aliya haletapo haodde hallati na: watle asiyama wa:ta himine demduwapo. <sup>40</sup> Epammhalemama sali patotapo na: dla yumduwapo, epame utula:la kapumale patotapo pulati woloma pe-elemdena.

<sup>41</sup> Epame na:tapo sokomoko 20 dulu dla wa: oko hamhalemama asiyama pa:le oko halalo oplami some haluwapo. Epapele dulu dla sokomoko 7 semeye Liya halowedeme wa: oko hamhaluwapo, epame ma sokomoko 7 semeye Leisol halowedeme wa: oko hamhaluwapo. Epame ma mosukulu sokomoko 6 ipiye wa: aliya halo opiye hohomolowedeme oko pato hamhaluwapo. Amasiyama epapele tlope wa:tapo alila hapuloma dulu dla na: oko asiyamaye meyelo pe meyelo demhaluwapo, woloma hatlo dla pohamimhalana. <sup>42</sup> Amasiyama na: a Aisek mate epo na: mama A:iblaham mate yia: Godtapo na: mate haluwapo. Epapele koko tle wa:tapo na:ye alisisi dimi po-tane dena. Amasiyama Godtapo wa:ta na: dla elle himhalemama koko hamhaluwa mate epo na:ta wa: yilo oko pato hamhaluwa mate natipame wata utula:la wa: dla woyapame wa:ye molo atlalepo,” diyo.

### *Laban mate Yokob mate yu itiyapo himili*

<sup>43</sup> Epalati Labantapo Yokob watle epo atlaiyo, “Liya mate epo Leisol mateye na: utukakapo, epame yia: yimlalaye nolëpo, epame aliya halo e ma nolëpo. Epapele dulu dla koko hapuloma wa:ta hema natiye, eye ikadepe nolëpo. Amasiyama na: na: utukaka mate epo yia: yimlala mate ma ilame hohomolowedeme yu hale po-atlowa.

<sup>44</sup> Epapedeme ka:dena, dita madipatatapo sadle halowedeme yu itiyapo himimama ewalaye hatlo kolumolowa,” diyo.

<sup>45</sup> Epalati Yokobtapo ewala pato hatlo tatile hapame oloma hitomeleme pameliyo.

<sup>46</sup> Epame ya: asiyadulo watle epo atlaiyo, “Ewala opi halopame yimkata mateka:pi dla alupo kolupo pameliya,” diyo. Epalati yia:tapo ewala halopame yimkata alupo kolupo pamelepame ma yimkata Laban mate ewala kolumale mateka:pi dla popa:mama daya deiyo. <sup>47-48</sup> Epame Labantapo Yokob watle epo atlaiyo, “Ewala kolumale itapo wa: mate na: mate sadle halowedeme yu itiyapo himi iye nati-imama apelepe,” diyo.

Epapele koko tle Labantapo ewala kolumale e ya: hiye semama Yegal Sahaduta\* diyo. Amasiyama Yokobta ma ewala kolumale hatlo metlo semama Galed diyo.

<sup>49</sup> Epame Labanta ma epo atlaiyo, “Dita madipatatata duka gladepame me-ya: mo dla ta ta dlepiye, Godtapo dia:ye di tle omhallepe,” diyo. Epapeleye ewala kolumale hatlo meye ma opata semama Mispa† diyo. <sup>50</sup> Epame Labantapo ma epo atlaiyo, “Wa:ta adipammama na: utukaka dla wotiyalle hamipame ma a:ya hale halepiye, wa: malamelepe, Godta dia:ye me-omhalapo. <sup>51-52</sup> Epedeme ewala pato oloma hitomeleme pamele i mate epo ewala hatlo kolumale i matetapo wa: mate epo na: mate sadle halowedeme yu itiyapo himiliye malamama apelepe. Epedeme na:ta wa: watle wotiyalle hamilowedeme ewala kolumale eye pohotlatlowa, epame wa: mape na: watle wotiyalle hamilowedeme ewala kolumale eye pohotlapuluwa. <sup>53</sup> Epapedeme wa: mama A:iblaham mate epo na: mama Nahol mate yia: Godtapo dia: dulu dla koko gladlalo hallepe,” diyo. Epalati Yokobtapo ya: a Aisek ya: God hi tle yu itiyapo himili iye dolumhallowepo depame solotamale himiyo.

\* **31:47-48:** Hi dapiyamte yia: dulu kokoye ewala kolumale itapo dia:ye imelepe demama apopo. † **31:49:** Mispa hi ya: dulu kokoye omhalema demama apopo.

<sup>54</sup> Epame Yokobtapo tamali di dla God hi di dla ta:demama aliya halo yumpame God watle hamiyo. Epo ya: asiyadulo watle daya dla puaiya diyo. Epapeleye yia: daya depame tamali di medla hutieyiyo.

<sup>55</sup> Epame utulalati ikadepe Labantapo ya: utukaka dapiyamte mate epo ya: mamadulo mate dla namkale dle yu atlepame yia:ye huhulapo gudepo ma ya: mo dla ilame taiyo.

## 32

### *Yokobta Iso watle namkale dle alisisi hapilowedeme dinapele*

<sup>1</sup> Yokobta ya: doko mate esemhalepo depo ma-tlati God ya: banakaka sota tulume ya:ye umaiyo. <sup>2</sup> Epalati Yokobtapo yia: natipame epo atlaiyo, “Pona:malamana, iye Godta hedepo yallalo mo sepena,” diyo. Epammama ya:tapo mo e ya: hiye semama Mahanaim\* diyo.

<sup>3-5</sup> Yokobtapo ya: yu hamtlalo so taiya demama yia: watle epo atlaiyo, “Wua: tame na: bapa Iso watle yu ipo atlaiye, ‘Na:ye Yokobpo, ya: yu dla salladepo sela:lalo oplami. Na:tapo Laban mate halepo gudepame ma wata ya: hala dla ilame pumhalema,’ diye. Epame ya: dla ma ipo atellepe, ‘Na:ye na: bulumkiyawa aliya mate epo donki aliya mate epo sipi aliya mate epame na: oko so mate puma,’ diye. Epame matle ya: watle epo atlaiye, ‘Na: yu iye ya: dla hamima, ya:tapo na:ta pua kokoye momolo malapame na:ye sadle mate selepo depame,’ diye,” diyo. Epapeleye ya:tapo ya: opa watle yu ipo atlepame ya: bapa Iso hala dla taiya diyo. Epalati yia:tapo tame ya: bapa Isoye Seil† mo dla hallati natipame yu eye atlamaiyo.

<sup>6</sup> Epame yu hamtlalo sotapo ma ilame puame Yokob watle epo atlaiyo, “Wa: bapa Isoye 400 opa eleme hema pumhalapo,” diyo.

<sup>7</sup> Epalati Yokobtapo yu i dalepame sikemte wota:iyo. Epammama ya:tapo ya: opa mate epo ya: aliya halo mate alumale dapiyamte dla hukulupo ipila:iyo. <sup>8</sup> Adipalati, ya: ipo malamaiyo, “Isotapo alumale hale dla puame hustamhallepiye, asiyama alumale hale dla ha:ha:lalo so tlo potlopo depo,” malamaiyo.

<sup>9</sup> Epammama Yokobtapo inoma sumama epo atlaiyo, “GOD, wa:ye na: a Aisek ya: Godpo epame na: mama A:iblaham ya: Godpo. Wa:tapo na: watle atlemama, ‘wa: mo dla epo wa: asiyadulo dla ma ilame tane,’ duwapo. Epame wa:tapo na: mate halemama na:ye gadle himhalli duwapo. <sup>10</sup> Epedeme na:tapo naskamu na:ye koko pa:le depo haluwa tlope wa:tapo na: dla ka:ka:dle kokoye ma-halomhalemduwapo. Epame na:tapo mo-powataliya Yoden aloma ulume Laban hala dla tamama isikimi na: dali ku tlo hame tauwapo. Amasiyama wata oloma hema na: aliya mate epo na: opa mateta sikemte pasatamha:ha:po. <sup>11</sup> Epedeme God, na:ye na: bapa Iso do dulu tle seme alikili a:ma woyamane. Adipalati, ya:tapo na: mate na: wola: mate epo na: yimlala mate potimalala depame. <sup>12</sup> Amasiyama wa:tapo na: dla yu itiyapo himmama, ‘wa: mamadulotapo pasatamama asila some sesa:lowe pa:le hallepe,’ duwapo. Epame wa: ma na: watle atlemama ‘na:tapo wa: mate halemama wa: gadlalo hallowepo’ duwapo.” ✨

<sup>13-14</sup> Epapeleye Yokobtapo medla elepo polomama Iso watle namkale dle alisisi hamiloweeye dinapomama ya: gaut aliya dulu dla 200 molalatalo mate epo 20 patetalo mate hohopo alikili dla ipila:iyo. Epame matle sipi aliya dulu dla 200 molalatalo mate epo 20 patetalo mate hohopo alikili dla ipila:iyo. <sup>15</sup> Epame matle ka:mol aliya dulu dla 30 molalatalo mate epo yia: yimlala mate hohopo alikili dla ipila:iyo. Epame ma bulumkiyawa aliya dulu dla 40 molalatalo mate epo 10 patetalo mate hohopo alikili dla ipila:iyo. Epame ma donki aliya dulu dla 20 molalatalo mate epo 10 patetalo mate hohopo alikili dla ipila:iyo. <sup>16</sup> Epammtepo gudepame Yokobtapo ya: oko so watle aliya halo alumale meyeloape meyeloape dle iwoloye omhala omhala demtaiya demama yia:

\* **32:2:** Mahanaim hi ya: dulu kokoye hedepo yallalo kimna:ya dapiyamte demama apopo. † **32:3-5:** Seil mo i ya: hi haleye Edom mopo. ✨ **32:12:** Yen 22:17



watle epo atlaiyo, “Wua: tatile itapu dla tamalemama alumale hale tatile itapu tle tlati ma alumale haleta medla telepe, epalati ma alumale haleta medla ta demha:ha:iya,” diyo.

<sup>17-18</sup> Epapeleye Yokobtapo ya: oko so itapu aliya elemtlalo so watle epo atlaiyo, “Wua: aliya iwolo elemtlati Isota wua: natipo wua: watle atlemama ‘wua: hadima tama:?’ depame ma wua: watle atlemama, ‘iye ana aliyata:?’ depame ma wua: watle atlemama, ‘wua: dokopala oplami anata:?’ dlatiye, ma wua:ta ya: watle ipo atlaiye, ‘Aliya iye wa: yu dla salladepo sela:lalo oplami Yokob tete, ya:tapo wa: watle isikimi namkale dle tle hapilowedeme puma,’ diye,” diyo.

<sup>19</sup> Yokobtapo yu hatlo me-iye aliya alumale meyelo pe meyelo pe dle elemtlalo so watle atlamaiyo. <sup>20</sup> Epame yia: watle ma epo atlaiyo, “Wua: tame Iso watle atlemama na:ye ala alotle puma dle yu atloweye welimiyo,” diyo. Adipalati, ya: malamaiyo, “Pona:malamana, na:tapo namkale dle alisisi eye Iso watle momolo hapilipiye, eta ya:tapo na: batalimale dla siyaladepo halaye wellipe,” diyo. <sup>21</sup> Ya: epo malapame namkale dle alisisi tatile Iso watle ma-hapila taiya depame ya: tlo aseka medla hedepame alila hatlo medla yaliyo.

### *Yokobtapo God mate madipata poposila:lepo dudupulli*

<sup>22-23</sup> Amasiyama utula:la dukuslopi oloma edla Yokobtapo ya: wola: mate epame ya: akimlala 11 mate epo ya: alisisi hapuloma mate yia: tatile Yabok aloma ulumyame pomeliyo. <sup>24</sup> Amasiyama ya: tlo meyelo pe ala aloma seme medla me-polaiyo. Epalati oplami haleta utula:la puame ya:ye hamame poposila:lepo ya: mate madipata dudupulalimsiyamaiyo. Yia:ta madipatatapo mepo poposila:lepo dudupulalimsiyamama me-ala:himiyo. ✧ <sup>25</sup> Epapele dulu dla oplami hale etapo ya:ta potla:mtlalo wekelati asiyama Yokob tlo akolo dla heyumama akolo holataiyo. <sup>26</sup> Epame Yokob watle epo atlaiyo, “Ma-ala:himima. Epapedeme na: mo-tlowama,” diyo.

Amasiyama Yokobtapo asiyama ya: watle epo atlaiyo, “Na: yilo inoma sumane. Epalati asiyama na:ta wa:ye ma-tane dlowepo,” diyo.

<sup>27</sup> Epalati asiyama oplami eta Yokob watle epo atlaiyo, “Wa: hi anata:?” diyo. Epapalati asiyama Yokobta epo atlaiyo, “Na: hiye Yokobpo,” diyo.

<sup>28</sup> Epalati asiyama oplamita epo atlaiyo, “Wata oloma itle kotiyapo tamama wa: hiye matle po-Yokob demha:ha:lowa. Amasiyama wa: hiye matle Isalael‡ demha:ha:lepe. Adipalati, wa:tapo God mate epo opa mate natalimale dulu dla wa:tapo ma-tla:mtalepo,” diyo. ✧

<sup>29</sup> Epalati Yokobtapo oplami e watle epo atlaiyo, “Wa: hiye anata:?” diyo.

Epalati asiyama oplami eta epo atlaiyo, “Wa: adipalati na: hiye dallowe solotama:?” depame Yokobye inoma sumale mate gadepame ma-taiyo. ✧

<sup>30</sup> Epalati Yokobtapo mo hi eye semama Peniyel§ depame epo atlaiyo, “Na:ye God mila:pi ikadepeye natilipo, epapele tlope na: pasakalota pohaodena,” diyo.

<sup>31</sup> Epapele dulu dla salita matlati Yokobtapo akolo holatale mepele mo e saliyome woloma sukomtamahalaiyo. <sup>32</sup> Epapedeme wata oloma hema Isalael sotapo aliya mo demama akolo oloma dla mo ha:ha:lalo podlomasemde. Ame adipalati, Godtapo Yokobye akolo oloma dla heyumama akolo holatauwapo.

## 33

### *Yokob mate epo Iso mate mamisika: namkale dle*

<sup>1-2</sup> Yokobtapo Peniyel mo saliyome tamhalemama natilati Isotapo ya: 400 opa mate ala pateka:mu tle pumhalla natiyo. Epalati Yokobtapo Isota pula natipame ya: yimlalaye alumale meyelo pe meyelo pe dle dla hatitimama ya: oko so wola: dapiyamte yia: yimlala

✧ **32:24:** Hos 12:3-4 ‡ **32:28:** Isalael hi ya: dulu kokoye God mate poposila:lepo dudupulli demama apopo.

✧ **32:28:** Yen 35:10 ✧ **32:29:** Koko 13:17-18 § **32:30:** Peniyel hi ya: dulu kokoye God ya: mila:pi demama apopo.

mateye wua: tatile itapu dila taiya diyo. Epalati Liya mate epo ya: akimlala mate medla tamalaiya diyo. Epalati Leisotapo mosukulu ya: maseyemala mate alotle tamalaiya diyo. <sup>3</sup> Epame Yokob tlo ya: tatile itapu tle tame ya: bapa Iso ala pateka:mu tiyama tle mepumhallati ya: umula tamama 7 oloma dila heodepo alumata akukulume pola demtaiyo.

<sup>4</sup> Amasiyama Isota kukulumpuame ya:ye hampo poposila:pame hulumama sikemte amaiyo. Epalati Yokob mape sikemte amaiyo. <sup>5</sup> Epame Isotapo wola: mate epo ya: yimlala mate pumha:ha:lali tlapame Yokob watle epo atlaiyo, “Wola: iwolo mate epo yimlala iwolo mate anawolota:?” diyo.

Epalati Yokobtapo asiyama ya: watle epo atlaiyo, “Yia:ye Godtapo na: watle halopiwa wola: mate epo yimlala matepo,” diyo.

<sup>6</sup> Epalati ya: oko so wola: dapiyamteta yia: yimlala mate puame Iso hete sitali isili dila heoheodiyo. <sup>7</sup> Epame ma medla Liyatapo ya: yimlala mate puame Iso hete sitali isili dila heoheodiyo. Epame Leisotapo mosukulu alotle ya: maseyemala Yosep mate puame Iso hete sitali isili dila heoheodiyo.

<sup>8</sup> Epalati Isotapo asiyama me-halemama Yokob watle epo atlaiyo, “Na:ta duka dila pumama tetla:mpuale aliya haloye adipapoloweta:?” diyo.

Epapalati asiyama Yokobta ya: watle epo atlaiyo, “Na:tapo wa: dila siyele hamimama namkale dle alisisi eye wa: dila halopilipo,” diyo.

<sup>9</sup> Amasiyama Isotapo epo atlaiyo, “Ei yemala, na: dila aliya halo sikemte pasatana, epedeme mowolo me-elemaney,” diyo.

<sup>10</sup> Epalati ma asiyama Yokobtapo epo atlaiyo, “Hao, bapa, wa:ta na: natipame namkale dle kokoye nati-imama na:ta namkale dle alisisi halopi-iye me-halomane. Adipalati, wa:ta na: natipo sikemte siyelati na:tapo wa: mila:pi natimama semte God mila:pi natimapo de,” diyo. <sup>11</sup> “Epedeme Godtapo na: mate halemama alisisi hapulomaye na: watle ma-ala:po hapiwapo. Epapedeme na:ta namkale dle alisisi wa: watle halopiye me-halomane,” diyo. Epele dulu dila Yokobtapo sikemte me-ha:ha:mhallati Isotapo namkale dle alisisi eye me-halomaiyo.

<sup>12</sup> Epammama Isotapo Yokob watle epo atlaiyo, “Di yimkata mo-tlowa,” diyo.

<sup>13</sup> Amasiyama Yokobtapo Iso watle epo atlaiyo, “Di yipta yimkata wa: mate potlowa. Adipalati, na: yimlala opiye ala pta yimka:sikili, mo pateka:mu epapeleye hapele tlowe po-ala:na. Epame aliya halo mape yimlala ala yimka:sikili deme meme melimtamalapo. Epapele dulu dila ditapo ma-hapele sikemte ullumtamellepiye, aliya halo yimlala ala usulliye pallipe. <sup>14</sup> Epapedeme wa: tatile itapu me-tane. Di epalati woloma alotle wa: dolumtame wa:ta hallalo Seil mo dila tame woyamolowepo,” diyo.

<sup>15</sup> Epalati asiyama Isota epo atlaiyo, “Na:tapo na: opa opiye wa: mate medla pomolowepo, yia:tapo wa: gadlepo depame,” diyo.

Amasiyama Yokobtapo asiyama epo atlaiyo, “Na: natima, wa:ta na: mate mo-sadepo hala kokoye. Epedeme na: sikemte siyema. Epapele dulu dila wa: na: ase sikemte malamiya, aseka wa: mo dila ma ilame tane,” diyo.

<sup>16</sup> Epalati Isotapo ma ilame ya: mo Seil dila taiyo. <sup>17</sup> Amasiyama Yokobtapo ya: wola: mate epo ya: yimlala mate mo edla potamallalo ma Sukot mo dila tamalaiyo. Yia: edla tame woyapame ya: wola: mate epo ya: yimlala mateta ha:ha:lowe aya haiyo. Epame ya: aliya halota ha:ha:lowe kimna:ya ma halomaiyo. Epapele koko tle mo hiye Sukot\* demdiyo.

<sup>18</sup> Epapele alotle Yokobtapo Sukot mo e saliyome tame Keinan mo dila tame woyamaiyo. Epame Sekem mo alikili tle kimpo halaiyo. <sup>19</sup> Epapele dulu dila mo ya:ta kimili ta:la eye Sekem ya: a Hamol ya: ta:layo. Epapeleye Yokobtapo 100 elo mani mate Hamol

\* 33:17: Sukot hi ya: dulu kokoye kimna:ya demama apopo.

ya: akimlala tle ta:la eye haiyo. ☆ 20 Epame mo edla Yokobtapo God dla alinepi poyupo ha:lalo tile haiyo. Epo tile e ya: hiye semama El Elohe Isalael† diyo.

## 34

### *Daina uhale koko*

<sup>1</sup> Alila haletapo Liya yoti Dainata ipilatalo yimkadulo Sekem mo dulu edla ha:ha:lalo soye natila taiyo. <sup>2</sup> Amasiyama ya: edla tlati mo dulu edla dokopala hallalo Hibai elele halë oplami Hamol yami Sekemtapo ya: natipame ya:ye uhaiyo. <sup>3</sup> Epame Sekemtapo Dainaye sikemte siyalahamama ya:ta Daina dla sikemte solotamale pato ela kokoye ya: watle atlamaiyo. <sup>4</sup> Epammama ya:tapo ya: a watle epo atlaiyo, “A, wa: na:ta a:ya i halowe api dinapene,” diyo.

<sup>5</sup> Epapeleye Yokobtapo Sekemta yoti uhale kokoye dalepame koko hale pahalalo, aseka ya: akimlala aliya halo omha:ha:la tale soye ompolaiyo. <sup>6</sup> Epapele dulu dla Sekem ya: a Hamoltapo yamita Daina halowe kokoye Yokob mate esemolowedeme mo-puaiyo. <sup>7</sup> Oloma medla Yokob ya: akimlala mape aliya omha:ha:le tle mo-puame woyamaiyo. Epame yia: puame Sekemta koko halë dalepame yiyelepame sikemte siyalasiyaladiyo. Epammama yia:tapo epo atlamyaiyo, “Sekemtapo Isalael so dla batalimale koko halëpa?” demyaiyo.

<sup>8</sup> Epalati Sekem ya: a Hamoltapo Yokob mate epo ya: akimlala mate dla epo atlaiyo, “Na: maseyemala Sekemtapo Daina dla sikemte solotamale pato elema. Epapedeme ya:ta halepo depame ya: watle me-hamiya,” diyo. <sup>9</sup> “Epedeme ka:dena, ditapo dia: dulu dla di utukakaye asiyama ha asiyama ha dlowe ka:pi,” diyo. <sup>10</sup> “Epapelepiye, eta wua:tapo ma dia: mate yimkata ha:ha:lepe. Epame di ta:la opiye wua:tapo asiyama mate halopame medla me-ha:ha:lepe,” diyo.

<sup>11-12</sup> Epalati Sekemtapo Yokob mate epo ya: akimlala mate dla epo atlaiyo, “Wua:tapo Dainaye na: watle hamilipiye, asiyama adipapele koko pato wua:ta halowa dlepiye, na:tapo koko eye wua: watle hapo hamilowepo,” diyo.

<sup>13</sup> Amasiyama Sekemta Dainaye mo-uhale koko tle Yokob ya: akimlalata Sekem mate epo ya: a Hamol mate dla mala-atlemama epo atlamyaiyo, <sup>14</sup> “Di posolotamasema, diyotimalaye kapala pokestlalo wekele oplami dla hamiloweye. Adipalati, koko itapo dia: dla wota:le koko hampulupe,” demyaiyo. <sup>15</sup> “Epapedeme wa:tapo wa: opa mate dita kapala kotipo ha:ha:ye wua: ma epo ha:ha:lepiye, di eta diyotimalaye wa: watle hamilowepo. <sup>16</sup> Epapelepiye, eta ditapo dia: dulu dla wola:ye asiyama ha epo asiyama ha demha:ha:mama mo medla yimkata opa hatlope depo ha:ha:lowepo. <sup>17</sup> Amasiyama wua:tapo kapala pokotimalalo wekelepiye, di eta diyotimalaye wa: watle pohamilalo me-seme mo i saliyome tlowepo,” demyaiyo.

<sup>18-19</sup> Epalati Hamol mate epo yami Sekem mate yu i dalepame solotamale himpame Sekemtapo ma-hapele kapala kestla taiyo. Adipalati, ya: Daina halowe dla sikemte solotamale pato elaiyo. Epapele dulu dla Sekem iye ya: asiyadulotapo ya:ye di dla hamhetamdiyo. <sup>20</sup> Epapedeme Sekemtapo ya: a Hamol mate mo dulu dla tame opata alupo esemalalo mo dla opa hapuloma sisilapame yia: watle epo atlaiyo, <sup>21</sup> “Yokob woloye dia: mate namkale depo ha:ha:lowe sikemte solotama. Epapedeme di ka:dena, yia:ye elempuame yimkata ha:ha:mama dia: dulu dla di utukakaye asiyama haloma epo asiyama haloma demha:ha:loweye. Epame yia:tapo di ta:la ipiye asiyama mate halowe ma me-ka:pi. <sup>22</sup> Amasiyama dulu edla di koko hatlo itlo halowepo, di yia: mate hatlope depo ha:ha:lowedeme yia:ta kapala kotipo ha:ha:ye, epammama di mape di opaye kapala kotimolowepo. <sup>23</sup> Epedeme dita epapelepiye, eta yia: aliya halo mate epo

☆ 33:19: Yos 24:32; Yon 4:5 † 33:20: El Elohe Isalael hi ya: dulu kokoye Isalael so yia: Godpo demama apopo.

yia: alisisi hapuloma mate diyole dlepe. Epapedeme ka:dena, dita hapulomatapo kapala kotimolowe,” diyo.

<sup>24</sup> Epalati Sekem so hapulomata yu i dalepo ka:dena demama yia:ta hapulomatapo kapala mo-kotimaiyo.

<sup>25-26</sup> Epame alila dapahatlope pololepo alotle opaye ala kapala kotipo hekaka alomale mate me-hutiyemyaiyo. Epalati Yokob ya: akimlala dapiyamte Simiyon mate epo Libai mateta yia: aipa:ya halopame Sekem soye ala pomalamalalo me-popa:myelati mo dulu dla tuwame opa hapulomaye potimtamaiyo. Yia: opa potimtamalemama Hamol mate epo Sekem mate ma potimaiyo. Epame yia: Sekem aya dla hetame yotimala Dainaye seme ma yia: aya dla tamalaiyo. <sup>27-28</sup> Epalati Yokob ya: akimlala opitapo Sekemta yia: yotimala Daina dla koko halë tle asiyama tame mo edla alisisi hapulomaye uhalomama sipi aliya hapuloma mate epo gaut aliya mate epame donki aliya mate epame alisisi hapuloma mate halopame alikili a:ma woyamaiyo. <sup>29</sup> Epame wola: mate epo yimlala mate mape hohopame alikili a:ma woyamaiyo.

<sup>30</sup> Amasiyama Yokobtapo koko i dalepame Simiyon mate epo Libai mate dla epo atlaiyo, “Wua: adipalati koko ipapele hao? Watapo mo hema ha:ha:lalo Keinan so mate epo Pelisi so matetapo dia: dla sikemte elle pato himilipe. Epedeme wua: natiya, dia:ye opa pase pato, epapedeme yia:tapo dia: mate opahale dlepiye, yia:ta di poyulupe,” diyo.

<sup>31</sup> Amasiyama ya: akimlalata asiyama yia: a watle epo atlaiyo, “Ka:deta:, yia:tapo diyotimalaye isikimi duka dla sela:lalo a:ya some semtame uhalowe?” diyo.

## 35

### *Yokobtapo ma ilame Betel mo dla tale*

<sup>1</sup> Godtapo ma Yokob watle epo atlaiyo, “Wa: mo i saliyome ma Betel mo dla halla tane. Adipalati, mo edla wa:tapo ka:yapa wa: bapa tle teletlati wa: dla woyamuwa God eye na:po. Epedeme wa: edla tame God dla alinepi poyupo ha:lalo tile hane,” diyo. ✧

<sup>2</sup> Epalati Yokobtapo ya: wola: mate epo ya: akimlala mate epame opa opi ya: mate ha:ha:lalo so mate dla epo atlaiyo, “Wua: dulu dla biskapa dlopi dota mimita:pele god hutiyeye alikili a:ma pololepame yú huhutapame tluka amko didiyepo ha:ha:iya, God mila:pi tle woloma ha:ha:lowedeme. <sup>3</sup> Adipalati, di mo iye melepame ma Betel mo dla telepe. Mo edla na:tapo God dla alinepi poyupo ha:lalo tile hapame ya: hi di dla ta:dlowepo. Adipalati, God eta na:ta upiyele dulu dla sela:lali ya:tapo gadle pato himhaluwapo,” diyo.

<sup>4</sup> Epalati opatapo yia: dulu dla dlopi dota mimita:pele biskapa god mate epo sutulu mate uptipame Yokob watle halopiyo. Epalati ya:tapo alisisi eye halopame Sekem mo mateka:pi dla dali pato hallalo hala sitali isili dla muwalepo hatiyo. <sup>5</sup> Epame Yokob mate epo ya: wola: mate epo ya: yimlala mate epame opa opi yia: mate tale so mate ma-tamaiyo. Amasiyama Godta mo yimlala mateka:pi dla popa:myale so dla wowota:le hamilati yia:tapo Yokob wolota ma-tlati yia: mate opahale dlowedeme yia: alotle podolumtamallalo wekiyo.

<sup>6</sup> Epapeleye alila haletapo Yokob woloye ma-tame Betel mo dla woyamaiyo. Amasiyama mo Betel i ya: hi haleye semama Lus demdepo. <sup>7</sup> Epedeme mo edla Yokobtapo God dla alinepi poyupo ha:lalo tile hapame tile e ya: hiye El Betel diyo. Adipalati, ya:tapo Iso tle teletame mo edla ellati Godtapo ya: dla woyamuwapo.

<sup>8</sup> Epapeleye yia: edla ha:ha:lali Yokob ya: wai Lebeke gadlalo a:ya Debolaye mopowaiyo. Epalati ya: motoye Betel mo dla dali sitali isili dla hamatiyo. Epame dali e ya: hiye dupa kolomama a:lle dali diyo.

<sup>9</sup> Epapedeme Yokobtapo Betel mo dla hallati Godta matle ya: dla puame woyapame epo atlaiyo, <sup>10</sup> “Wa: hiye matle po-Yokob demha:ha:lowa. Amasiyama wa: hiye matle

✧ 35:1: Yen 28:11-17

Isalael demha:ha:lepe. ✧ <sup>11</sup> Na:ye itiyamale Godpo. Epame na:tapo wa: mamaduloye ma-a:ma sikemte pasatapo mellowepo. Epame wa: mamadulo opitapo dokopala hi halopo ha:ha:mtelepe. ✧ <sup>12</sup> Epapedeme na:tapo A:iblaham mate epo Aisek mate dla hamiwa ta:laye matle wa: mate epo wa: mamadulo mate dla hamilowepo,” diyo.

<sup>13-14</sup> Epapele dulu dla Godta ya: mate yukamhalepo gudepo me-hetlati Yokobtapo ewala pato pamelepame God hi di dla ta:dlowedeme wain yú mate epo dakopala mate ewala di dla simaiyo. ✧ <sup>15</sup> Epapedeme Yokobtapo mo e semama Betel diyo.

### *Leisolta mopapo hatostamama powale*

<sup>16</sup> Epapeleye Yokob wolotapo Betel moye memeleme ma Epalat mo dla tamalaiyo. Yia: ala duka dla me-tamalemama Leisoltapo owayemala hatostlowedeme wotiyalle natiyo.

<sup>17</sup> Epele dulu dla ya: wotiyalle me-natimelemama owayemala hatostaiyo. Epalati ya: gadlalo a:yatapo ya: watle epo atlaiyo, “Ase sikemte wota:miya! Wa: ma maseyemala hale hamapo,” diyo. <sup>18</sup> Amasiyama Leisoltapo dupa mosukulu ketame tulluwedeme yukamama maseyemala hiye Benoni\* diyo. Ya: epo atlepame mo-powaiyo. Amasiyama Yokobtapo maseyemala e ya: hiye ma Benyamin† diyo.

<sup>19</sup> Epedeme yia: Epalat mo dla tamalemama Leisolta polati duka medla polomeliyo. Epapeleye wata oloma hema Epalat moye semama Betliyem demdepo. <sup>20</sup> Epalati Yokobtapo Leisolta powale wabasi malanatilowedeme ewala patota wabasi di tle pameliyo. Epapedeme ewala eye wata oloma hema ala me-polapo.

<sup>21</sup> Epame Yokobtapo ma mo e meleme ma Migidal Edel mo tla:mtame halemama kintimsela:iyo. <sup>22</sup> Epapele dulu dla Yokobta mo edla me-hallati me-ya: maseyemala Lubentapo ya: wai hale Bilhaye uhaiyo. Epapeleye ya: a Yokobtapo koko iye alotle medaliyo. ✧

### *Yokob ya: akimlala*

<sup>23</sup> Epedeme iye Yokob ya: akimlala 12 ipo. Epeleye ya:llu hale Liyatapo akimlala 6 hatitimaiyo, yia: hiye Luben, epo Simiyon, epo Libai, epo Yuda, epo Isakal, epame Sebulun.

<sup>24</sup> Epame ma ya:llu hale Leisoltapo akimlala dapiyamte hatitimaiyo, yia: hiye Yosep mate epo Benyamin mate.

<sup>25</sup> Epame ya:llu Leisol ya: oko a:ya Bilhatapo akimlala dapiyamte hatitimaiyo, yia: hiye Dan mate epo Naptali mate.

<sup>26</sup> Epame ya:llu hale Liya ya: oko a:ya Silpatapo akimlala dapiyamte hatitimaiyo, yia: hiye Gad mate epo Asel mate. Epedeme yimlala hapuloma iwoloye Yokobtapo Padan Alam mo dla halemama hatitimaiyo.

<sup>27</sup> Epapeleye Yokobtapo ya: a Aisek Heblon mo dla hallati natila taiyo. Heblon mo hi haleye Mamele epame Kiliyat Alba. Epedeme mo iye A:iblahamta ka:yapa halale mopo. ✧ <sup>28-29</sup> Epapedeme Aisektapo mo edla halemama 180 sokomoko umpame powaiyo. Epalati ya: akimlala dapiyamte Iso mate epo Yokob mateta yia: a motoye polomeliyo.

## 36

### *Iso ya: mamadulo*

<sup>1</sup> Aisek yami Iso ya: hi haleye Edom demdepo. Epame ya: mape ya: mamaduloye sikemte pasatana.

<sup>2</sup> Epedeme Isotapo Keinan wola: dapiyamte halomaiyo. A:ya hale hiye Ada, Hitai elele halë oplami Elon yotiyo. Epame a:ya hale hiye Oholibama, Hibai elele halë oplami

✧ 35:10: Yen 32:28 ✧ 35:11: Yen 17:4-8 ✧ 35:13-14: Yen 28:18-19 \* 35:18: Benoni hi ya: dulu kokoye na:ta wotiyalle halë maseyemala demama apopo. † 35:18: Benyamin hi ya: dulu kokoye na: dowala do maseyemala demama apopo. ✧ 35:22: Yen 49:4 ✧ 35:27: Yen 13:18



Sibeon yami Ana yotiyo. ✧ <sup>3</sup> Epame ya: matle ya: nana, Ismael yoti Basemat haiyo. Basemat eye Nebayot ya:layo. ✧

<sup>4</sup> Epapeleye Iso ya:llu Adatapo maseyemala hatlo himiyo, ya: hiye Elipas. Epame Iso ya:llu hale Basemattapo maseyemala hatlo himiyo, ya: hiye Luwel. <sup>5</sup> Epame Iso ya:llu hale Oholibamatapo akimlala dapahatlope hatitimaiyo, yia: hiye Yus, epo Yalam, epo Kola. Epedeme Isotapo Keinan mo dla halemama akimlala iwoloye hatitimaiyo.

<sup>6-8</sup> Epapedeme Iso mate epo Yokob mate yia:ta madipatata Keinan mo dla ha:ha:le dulu dla yia: aliya halota sikemte pasatamama mo ha:ha:lowe kustimalati ya: bapa Isotapo ya: wola: mate epo ya: yimlala mate epame ya: aliya halo mate epo ya: alisisi hapuloma mate ma mo hale Seil mo dla ha:ha:la taiyo.

<sup>9</sup> Isoye Edom elele halë so yia: mama patopo. Epedeme ya: mamadulo Seil mo dla ha:ha:lalo so yia: hiye ipo.

<sup>10-13</sup> Iso ya:llu hale Adatapo maseyemala hatlo himiyo, ya: hiye Elipas. Epalati Elipas ya: akimlala hiye Teman, epo Omal, epo Sepo, epo Gatam, epo Kenas. Epame Iso yami Elipasta ma a:ya hale Timna hapame maseyemala hatlo himiyo, ya: hiye Amalek.

Iso ya:llu hale Basemattapo maseyemala hatlo himiyo, ya: hiye Luwel. Epame Luwel ya: akimlala hiye Nahat, epo Yela, epo Sama, epo Misa.

<sup>14</sup> Epame ma Iso ya:llu hale Sibeon yami Ana yoti Oholibamata akimlala dapahatlope hatitimaiyo, yia: hiye Yus, epo Yalam, epame Kola.

<sup>15-16</sup> Epapele dulu dla Iso ya:llu Adata himili maseyemala Elipas tle elele meyelope meyelope dle iwolota ha:ha:iyo, Teman so, epo Omal so, epo Sepo so, epo Kenas so, epo Kola so, epo Gatam so, epo Amalek so. Epedeme elele meyelope meyelope dle iwoloye Edom mo dla ha:ha:iyo.

<sup>17</sup> Epame ma Iso ya:llu hale Basematta himili maseyemala Luwel tle elele meyelope meyelope dle iwolota ha:ha:iyo, Nahat so, epo Yela so, epo Sama so, epo Misa so. Epapedeme elele meyelope meyelope dle iwolo mape Edom mo hatlo medla me-ha:ha:iyo.

<sup>18</sup> Epame ma Iso ya:llu hale Ana yoti Oholibama tle elele meyelope meyelope dle iwolota ha:ha:iyo. Yus so, epo Yalam so, epo Kola so.

<sup>19</sup> Epedeme elele meyelope meyelope dle hapuloma hema hutiyemtuluye, hatlo Iso tle kotiyamale elelepo. Iso ya: hi haleye Edom.

### *Seil ya: elele halë so*

<sup>20-21</sup> Iso ala Edom mo dla pohallalo hallati Holi elele halë oplami hale Seil tatile mo edla halaiyo. Epedeme elele meyelope meyelope dleta oplami Seil etle kotiyamaleye iwolopo. Lotan so, epo Sobal so, epo Sibeon so, epo Ana so, epo Dison so, epo Esel so, epo Disan so. Epapedeme elele meyelope meyelope dle iwolo mape Edom mo hatlo medla me-ha:ha:iyo.

<sup>22</sup> Epapeleye Lotan ya: akimlalaye Holi mate epo Homan matepo. Epalati Lotan ya: nanaye Timnapo.

<sup>23</sup> Epalati Sobal ya: akimlala hiye Alban, epo Manahat, epo Ebal, epo Sepo, epo Onam.

<sup>24</sup> Epame ma Sibeon ya: akimlala hiye Aiya mate epo Ana matepo. Epapeleye Ana itapo ya: a donki aliya halo omhalemama dalupa pa:le mo dla yú matale natiyo.

<sup>25</sup> Epapele dulu dla Ana ya: yimlala hiye Dison mate epo Oholibama matepo.

<sup>26</sup> Epalati Dison ya: akimlala hiye Hemdan, epo Esban, epo Itlan, epo Kelan.

<sup>27</sup> Epalati ma Esel ya: akimlala hiye Bilhan, epo Saban, epo Akan.

<sup>28</sup> Epalati ma Disan ya: akimlala hiye Us mate epo Alan matepo.

<sup>29-30</sup> Epapedeme Holi elele halomale soye iwolopo, Lotan so, epo Sobal so, epo Sibeon so, epo Ana so, epo Dison so, epo Esel so, epo Disan so. Epapedeme elele meyelope meyelope dle iwoloye Seil mo dla ha:ha:iyo.

### *Edom mo dokopala so*

<sup>31</sup> Epapele dulu dla Isalael mo omhallalo dokopala ala pohallalo hallati dokopala so opi iwolo tatile Edom moye dokopala depo ha:ha:iyo.

<sup>32</sup> Dokopala oplami haleye Beol yami Bela. Ya:ye Dinaba mo dla hallalo oplamipo.

<sup>33</sup> Epame Belata mo-polati Yela yami Yobabta halaiyo. Ya:ye Bosla mo dla hallalo oplamipo.

<sup>34</sup> Epame Yobabta mo-polati matle Husamta halaiyo. Ya:ye Teman mo dla hallalo oplamipo.

<sup>35</sup> Epame Husamta mo-polati ma Bedad yami Hadadta halaiyo. Ya:ye Abit mo dla hallalo oplamipo. Ya:ta halemama Moab mo dla tame Midiya so mate opahale demama ya: opatapo tla:mtaiyo.

<sup>36</sup> Epame Hadadta mo-polati ma Samlata halaiyo. Ya:ye Masleka mo dla hallalo oplamipo.

<sup>37</sup> Epame ma Samlata mo-polati ma Saula halaiyo. Ya:ye Yupalates aloma pili dla Lehobot mo dla hallalo oplamipo.

<sup>38</sup> Epo Saula mo-polati ma Akbol yami Bal Hananta halaiyo.

<sup>39</sup> Epame Bal Hananta mo-polati ma Hadadta halaiyo. Ya:ye Pau mo pato dla hallalo oplamipo. Epedeme Hadad ya:lluye Matled yoti Mehetabelpo, ya:ye Mesahab ya: awapo.

<sup>40-43</sup> Epapedeme Iso elele halomale soye iwolopo. Timna so, epo Alba so, epo Yetet so, epo Oholibama so, epo Ela so, epo Pinon so, epo Kenas so, epo Teman so, epo Mibsal so, epo Magdiel so, epo Ilam so. Epedeme elele meyelope meyelope dle iwolotapo Edom mo pato dulu dla miyelo mepo mo kestepo ha:ha: demtaiyo.

## 37

### *Milamalo natilalo oplami Yosep*

<sup>1</sup> Yokobtapo ya: ata halale mo Keinan dla me-halaiyo. <sup>2</sup> Epapeleye Yokob yami Yoseptapo 17 sokomoko halemama ya: bapadulo Bilha ya: akimlala mate epo Silpa ya: akimlala mate yimkata ya: a aliya halo omha:ha:mdiyoye. Epele dulu dla Yoseptapo ya: bapadulota batalimale koko halomyale hapulomaye hemele ya: a watle tame esemdiyo.

<sup>3</sup> Epapele dulu dla Yokobtapo ya: maseyemala Yosep tlope sikemte malamale pato el-emdiyo. Adipalati, ya:tapo mo-totoyemala halemama Yosepye himiwapo. Epeleye alila haletapo ya: atapo Yosep watle tluka alisisi ka:dle hamiyo. <sup>4</sup> Epalati ya: bapadulotapo tluka alisisi e natipame epo malamaiyo, “Dia: atapo Yosep tlo sikemte malamale pato himhalema,” demdiyo. Epammama ya:tapo Yosep dla elle pato himha:ha:mama ya: dla sadle yu hale po-atlemdiyo.

<sup>5-8</sup> Epapeleye Yoseptapo ya:ta utula:la elemama milamalo natiliye ya: bapadulo dla esemama epo atlaiyo, “Na: wata utula:la elemama milamalo ipo nati. Dita yimkatatapo osalo dla tame witi daya kolepame keketipoliyemsiyama. Amasiyama dulu edla nolë ketepolli tlo duka dla hitomeleme hallati asiyama wua:lë keketipoliyele tlo alikili tle sillidepo ha:ha:mama nolë dla heode demha:ha:,” diyo.

Epalati ya: bapadulotapo yu i dalepame sikemte siyalasiyalademama ya: watle epo atlaiyo, “Wa: wa:ta malamaleta wa:ta dokopala hi hapame di omhalli depo mala-halemama amma:?” diyo. Epammama ya: bapadulotapo ya: dla sikemte elle pato himha:ha:iyo.

<sup>9</sup> Epame Yoseptapo mamisika: milamnatiyo. Epame ma ya: bapadulo dla esemama epo atlaiyo, “Na: milamnatili hale ipo nati. Sali mate epo mama mate epo tamili 11 matetapo na: dla heoheode dempopa;” diyo.

<sup>10</sup> Epame ya: ma tame ya:ta milamnatiliye ya: a watle atlaiyo. Epalati ya: atapo yu i dalepame alimama epo atlaiyo, “I apa koko dla milamalo natimama api? Wa: na: mate epo wa: wai mate epame wa: bapadulo mateta puame wa: hete sitali isili dla heoheodlepe depo malamama amma:?” diyo.

<sup>11</sup> Epedeme ya: bapadulotapo koko hema ya: dla siyalasiyalademama elle pato himiyo. Amasiyama ya: atapo koko hema apa koko natimama apuwo depame sikemte malamale pato me-himhalaiyo. ✧

*Yosepye ya: bapadulota Ismael so dla hamame ili*

<sup>12</sup> Epapele dulu dla alila haletapo Yosep ya: bapadulota yia: a aliyaye osamokolo delepo depame Sekem mo mateka:pi dla elemtame ha:ha:iyo. <sup>13-14</sup> Epalati Yokobta yami Yosep watle epo atlaiyo, “Wa: wa: bapadulo Sekem mo dla ha:ha:ye tame natine. Wa: tame yia: natipame yia:ta koko halomha:ha:ye natipo puame na: watle atlamane,” diyo. Epalati Yoseptapo Heblon mo saliyome ma Sekem mo dla ya: bapadulo natila taiyo. <sup>15</sup> Ya: tame Sekem mo dla ya: bapadulo totamsela:lati oplami haleta ya: natipame ya: watle epo atlaiyo, “Wa: apa totamsela:ma:?” diyo.

<sup>16</sup> Epalati asiyama Yosepta ya: watle epo atlaiyo, “Na: na: bapadulo mate epo yia: aliya mateye totamsela:ma. Wa: yia:ye me-nati?” diyo.

<sup>17</sup> Amasiyama oplami eta ma asiyama epo atlaiyo, “Yia: mo iye ma-saliyome tamale-mama ‘di Dotan mo dla tamalema’ duwa,” diyo. Epalati Yoseptapo ma Dotan mo dla tame natilati ya: bapadulota edla yia: aliya halo omha:ha:la natiyo.

<sup>18-19</sup> Amasiyama Yosepta ala pateka:mu tle pumhallati ya: bapadulotapo natipame ya:ye yumuluwedeme yu himimama epo atlamyaiyo, “Milamalo natilalo oplami mo-puapo! <sup>20</sup> Epedeme ya: yumpame munamu dulu dla hamastlowa. Epame di a watle atlemama moko esemalata yumme dena dlowepo. Epame ya:ta milamalo tlamhalale kokoye apa kokota woyamolowe depo omha:ha:lowepo,” demyaiyo.

<sup>21-22</sup> Amasiyama Lubenta ya: eidulotapo Yosep yumuluwedeme yu himili dalepame yia: watle epo atlaiyo, “Di ya:ye poyumuluwa! Amasiyama isikimi munamu dulu dla me-hamastlowa,” diyo. Epapele dulu dla Lubenta yu ipo atluwaye, ya: malamaiyo, Yosepye ma munamu dulu tle holahapame ya: a hala dla seme puluwedeme apuwapo.

<sup>23-24</sup> Epapeleye Yosepta pulati ya: bapadulotapo ya:ye hampame ya: a Yokobta tluka ka:dle asiyomelleye uptipame ya:ye munamu dulu dla hamastaiyo.

<sup>25</sup> Epame yia: daya dlowedeme popa:mama natilati Ismael elele halë sotapo Giliyad mo tle ma Isip mo dla tamalemama ullu ka:dle pamalalo alisisi mate epo dakopala mate halopo ka:mol aliya dla kolupo tamalla natiyo. <sup>26-27</sup> Epalati Yudatapo ya: bapadulo dla epo ya: eidulo dla epo atlaiyo, “Di poka:dena, di ei bidulo yumpame hemele hatiyomolloweye. Adipalati, ya:ye di ei ikadepepo. Epedeme isikimi Ismael so dla hamame ipame asiyama mani tlo halowa,” diyo. Epalati yia:tapo Yudata atlale yu dalepame solotamale himiyo.

<sup>28</sup> Epedeme Ismael sotapo mo-mateka:pi dla pumullati ya: bapadulotapo Yosepye munamu dulu tle holahapame ya:ye yia: watle hamame imama asiyama 20 elo mani tlo halomaiyo. Epalati Ismael sotapo Yosepye Isip mo dla hamame tamalaiyo. ✧

<sup>29</sup> Amasiyama Lubenye ya: eidulotapo Yosep munamu dulu tle holahale ya: ponatilalo wekiyo. Epapele koko tle ya:tapo alotle puame munamu dla toko ipo natitepo ya: ei Yosepye ma-hawa hallati sikemte dupa kolemana ya: tluka tallatalladiyo. <sup>30</sup> Epame tame ya: eidulo watle epo atlaiyo, “Yosepye ma-hawa halema. Epedeme na: apa koko hapa:?” diyo.

<sup>31</sup> Epalati Yosep ya: bapadulotapo gaut aliya yumpame Yosep ya: tlukaye omali dla sosokoliyo. <sup>32</sup> Epame omali sosokolle tlukaye hamtame yia: a Yokob watle nati-imama epo atlaiyo, “Di tluka iye mo-pumulumama api duka dla ella nati. Epedeme tluka iye ikadepe wa: maseyemala teteta: depame woloma malanatipame depame hampua,” diyo.

<sup>33</sup> Epalati Yokobtapo tluka eye woloma natipo malanatipame epo atlaiyo, “Yao, ikadepe iye na: maseyemala tlukapo. Pona:malamana, moko esemalatapo ya:ye yumme deyo,” diyo.

<sup>34</sup> Epedeme Yokobtapo ya: maseyemala Yosep yilo dupa kolle pato himimama ya: tluka tallatalladepame ma dupa kolle tluka didiyepo polaiyo. Epame ya:tapo alila selemalli dulu dla ya: maseyemala yilo dupa kolle pato himhalaiyo.

<sup>35</sup> Amasiyama Yokobtapo epo dupa kolle dulu dla hallati ya: akimlala mate epo ya: utukaka mateta ya: gadlowedeme pumulaiyo. Epapele tlope yia:tapo yia: a gadlowe polaiyo. Epammama Yokobtapo epo atlaiyo, “Na:tapo na: maseyemala yilo me-ipo dupa kolemhalemama me-polowepo,” diyo.

<sup>36</sup> Epapele alila oloma edla Ismael sotapo Yosepye Isip mo dla hamame tame oplami Potipa watle hamame imama asiyama mani tlo haiyo. Epedeme oplami Potipa iye Isip mo dokopala oplami Pelo ya: aya alikili tle omha:ha:lalo so yia: dokopala oplamipo.

## 38

### *Yuda mate epo Tama mate yia: koko*

<sup>1</sup> Epapele alila oloma edla Yudatapo ya: bapadulo medla saliyome ma Adulam mo dla hallalo oplami Hila mate halla taiyo. <sup>2</sup> Epeleye ya: edla tame halemama Keinan oplami Suwa yoti natipame me-haiyo. <sup>3</sup> Epame ya: a:ya e hapo halemama maseyemala himiyo. Epalati maseyemala e ya: hiye El diyo. <sup>4</sup> Epame ya:llu ma mopapo polopame maseyemala hale himiyo. Epalati ya: waitapo ya: hiye Onan diyo. <sup>5</sup> Epame yia: ma Kesib mo dla ha:ha:lali ya:llu ma mopapo polopame maseyemala hale hamaiyo. Epalati ya: hiye Sala diyo.

<sup>6</sup> Epeleye itapu hamale maseyemala Elta ma-ta:lali ya: a Yudatapo ya:ta a:ya halowe api ka:diyo. Epalati Eltapo a:ya Tamaye haiyo. <sup>7</sup> Amasiyama Elye GOD mila:pi tle batalimale koko patoto halomhallati GODtapo ya:ye yumiyoy.

<sup>8</sup> Epame Elta mo-polati ya: a Yudatapo yami hale Onan watle epo atlaiyo, “Di aiyalma dolumama wa: bapa ya:llu dupulapi polaye ma wa:ta hane. Epame wa: bapa powale elo dla hallowe maseyemala himine,” diyo.

<sup>9</sup> Amasiyama Onantapo ya: bapa elo dla hallowe maseyemala himilowe posolotamaiyo. Epammama ya:tapo Tama mate elale oloma edla ya: nalakaleye alikili dla o-olotimdiyo, ya:ta mopapo popollalo wekelepo depame. <sup>10</sup> Epapedeme ya:ta ipapele koko hamhallati GODta koko e natimama posiyelalo wekiyo. Epalati GODtapo ya:ye yumiyoy.

<sup>11</sup> Epedeme Yuda ya: posolotamaiyo, ya: maseyemala Salata ma Tama hapame poloweye. Epammama ya: moma Tama watle epo atlaiyo, “Wa: aseka tame wa: a mate halane. Na: maseyemala Salata alotle ta:pame wa:ye halepe,” diyo. Epela dalepame Tamata ma ilame ya: a mate halla taiyo.

<sup>12</sup> Epame sokomoko opi mo-pololepo alotle Yuda ya:llu mo-powaiyo. Epalati ya:tapo ya:llu yilo dupa kolemhalaleta ma-tame gudlati ya:mkale Adulam mo dla hallalo oplami Hila mate tame Timna mo dla ya: sipi aliya dlalo ketlemhala natila tamalaiyo.

<sup>13</sup> Amasiyama Yuda ya: moma Tamatapo Yudata Timna mo dla mo-puale kokoye me-daliyo. <sup>14</sup> Epapele dulu dla ya: mo-malamaiyo, Yuda yami Salata mo-pato depo hala kokoye. Amasiyama epapele tlope ya: moma Yudatapo yami Salaye ala ya: watle pohamilalo halaiyo. Epalati asiyama ya:tapo Yuda elemolowedeme ya: dupulapi tluka uptipame isikimi duka dla sela:lalo a:ya some ya: mila:piye tlukata bopudepo tame Enaim mo kosukulli kokoloma tala dla Timna dla tlalo api dla ompolaiyo.

<sup>15-16</sup> Epalati Yudatapo edla pumhalemama ya: momata me-polla natipo semte isikimi duka dla sela:lalo a:ya tepo depame ya: mate ella puane diyo. Epalati ya: moma eta epo atlaiyo, “Na:ta wa: mate ellepiye, wa: adisowa na: watle hamipa:?” diyo.

<sup>17</sup> Amasiyama Yudatapo ya: moma woloma pomalanatilalo wekemama ya: watle epo atlaiyo, “Na:tapo gaut aliya halo amkota:leye wa: watle hamame iliwepo,” diyo.

Epalati ma asiyama ya: momata ya: watle epo atlaiyo, “Wa:ta ikadepe na: watle gaut aliya halo hamame iliwepo depame na: watle alisisi hale hamine, wa:ta atlama koko eye ikadepe dlowedeme,” diyo.

<sup>18</sup> Epalati asiyama Yudata ya: watle epo atlaiyo, “Wa: apa alisisi halowe solotama:?” diyo.

Epalati asiyama ya:ta epo atlaiyo, “Na: solotama, wa:ta meleli sokolomama wa: hi mate himili asiyamhala eye e mate epo wa: dali ku mate halomolowama,” diyo. Epapalati Yudatapo ya: alisisi eye ya: watle halopipame ya: mate elaiyo. Epapele alotle ya: momata mopapo mo-polaiyo. <sup>19</sup> Epapeleye ya: Yuda mate elepame ma ilame tame ya: aya dla duka dla sela:lalo a:yata didiyelalo tluka didiyepo elaleye uptipame ma ya: dupulapi tluka didiyeiyo.

<sup>20</sup> Epapele dulu dla Yudatapo ya:mkale Hila watle epo atlaiyo, “Gaut aliya iye semtame a:ya e watle hamame imama asiyama na: alisisiye ilame halopo puane,” diyo. Amasiyama ya:mkale Hilaye tame totamsela:po a:ya e ponatilalo wekiyo. <sup>21</sup> Epalati ya:tapo mo edla ha:ha:lalo so watle epo atlaiyo, “Duka dla sela:lalo a:ya Enaim mo kokoloma tala dla pollaloye da:?” diyo.

Amasiyama yia:ta asiyama epo atlaiyo, “Mo hema duka dla siyamalalo wola: hawa,” diyo.

<sup>22</sup> Epalati Hilatapo ma ilame tame Yuda watle epo atlaiyo, “Na: a:ya eye ponatina. Adipalati, mo edla ha:ha:lalo sotapo na: watle atlemama duka dla siyamalalo wola: hema pohaha:semde de,” diyo.

<sup>23</sup> Epalati asiyama Yudata epo atlaiyo, “Mope, ya:ta na: alisisi me-halopo hallepo,” diyo. “Epedeme ditapo gaut aliya ya: watle hamame iliwedeme semtale tlope, di ya: ponatina. Epapedeme dita mamisika: gaut aliya iye semtelepiye, opata di natipo eimela:lepe,” diyo.

<sup>24</sup> Epapele dulu dla mama dapahatlope mo-pololepo alotle Yudaye daliyo, ya: moma Tamata meyelo duka dla sela:le koko tle mopapo polale kokoye. Epalati Yudatapo koko e dalepame siyalademama epo atlaiyo, “A:ya eye haliyamale dla hamame puame pamelepo dlapata mistaiya,” diyo.

<sup>25</sup> Amasiyama opatapo ya:ye dlapa dla mo-mistlowedeme hamame woyamalati ya:tapo ya: moma Yuda dla yu hamimama epo atlaiyo, “Oplami dali ku i mate epo meleli sokolomale i mate halopo hallalo oplamiye na: koko dulu dla pola owayemala ya: apo,” diyo.

<sup>26</sup> Epalati Yudatapo dali ku mate epo meleli sokolomale mate malanatipame na: alisisipo diyo. Epame epo atlaiyo, “Na: batalimalepo, po-ya:ta batalimale. Adipalati, na:tapo na: maseyemala Salaye ma ya: watle pohamina,” diyo. Epedeme Yudatapo ya: watle wotiyalle pohamilalo wekepame ma ya: mate pe-ellalo wekiyo.

<sup>27</sup> Epapeleye Tamata mopapo hatostlowe alilata mo-pulati ya: gadlalo a:yata ya: koko dulu dla owayimlala dapiyamte popala natiyo. <sup>28</sup> Epalati ya:ta mopapo hatostale oloma edla owayemala haletapo ya: do tatile woyamaiyo. Epalati Tama ya: gadlalo a:yatapo tluka omteka:pele hame owayemala do woyamala himomelemama epo atlaiyo, “Owayemala i tatile hatostama,” diyo. <sup>29</sup> Amasiyama epapele tlope do eye ma ilame gilidlati ma asiyama ya: bapa tatile ma-hatostaiyo. Epalati ya: gadlalo a:yatapo epo atlaiyo, “Wa: adipammama wa: tatile haliyamale dla hatostao?” diyo. Epapele



tle maseyemala e ya: hiye semama Peles\* diyo. <sup>30</sup> Epame ma ya: ei, do dla tluka omteka:peleta himomelletapo alotle hatostaiyo. Epalati ya: hiye semama Sela† diyo.

## 39

### *Yosep mate epo Potipa ya:llu mate*

<sup>1</sup> Epapele dulu dla Ismael elele halë sotapo Yosepye hamamtame Isip mo dla woyapame ya:ye oplami Potipa watle asiyama halowedeme hamame iyo. Epedeme oplami Potipa iye Isip mo dokopala oplami Pelo ya: aya alikili tle omha:ha:lalo so yia: dokopala oplamipo.

<sup>2</sup> Epapeleye Yoseptapo Potipa aya dulu dla hallati GODta ya: mate halemama ya: sikemte gademhalaiyo. ✧ <sup>3-4</sup> Epalati Potipatapo koko i natipame Yosep watle ya: aya mate epo ya: alisisi hapuloma mate omhalane diyo. <sup>5</sup> Epapedeme oloma etle kotiyapo Yoseptapo Potipa aya mate epo alisisi hapuloma mate woloma ka:depo omhallati GODta ya: mate halemama ya: sikemte gademhalaiyo. Epapele koko tle Potipatapo pakasiyamalalo alisisi sikemte pasatale oplami halaiyo. <sup>6</sup> Epedeme Yosepta ya: oko epo ka:depo hala natimama Potipatapo koko hale halowe pomalamalalo isikimi daya dlowe tlo sikemte malamdiyo.

<sup>7</sup> Amasiyama Potipa ya:llutapo Yosepta kipiliyemala ka:pi hallati natipame dupa hetamama ya: watle epo atlaiyo, “Na: solotama, wa: mate hatlope dlowedeme,” diyo.

<sup>8-9</sup> Amasiyama Yoseptapo alimama ya: watle epo atlaiyo, “Hao, na: wa: mate pohatlope dlowa. Adipalati, wa:wolali Potipatapo na: watle koko hapuloma hapimama woloma omhalane duwa. Ya:ta epo atlemama wa: tlo na:ta po-omhalane dena. Ame adipalati, wa:ye ya:llu ikadepepo. Epedeme na: adipammama batalimale koko ipapele wa: dla hapa:? Adipalati, God mila:pi tle batalimale koko ipapele halowe poka:dena,” diyo. <sup>10</sup> Amasiyama epapele dulu dla Potipa ya:llutapo Yosepta ya: mate hatlope dlepo depame alila hapuloma ya: ha:ha:mhalemndiyo. Amasiyama Yoseptapo alimama ya: tle alikili a:ma teletamdiyo.

<sup>11-12</sup> Epapedeme alila haletapo aya duluye aya siyapo Yosep meyelo hallati Potipa ya:lluta puame Yosep tluka dla hamama epo atlaiyo, “Di aya siyapo dla bidulo ha:ha:po, epedeme wa: matime na: mate hatlope dene,” diyo. Amasiyama a:yata Yosep tluka dla hamamhallati Yosepta teletlati ya: tluka tlo puahaiyo. <sup>13-15</sup> Epalati a:yatapo Yosepta teletamama tluka tlo medla pomeleme tale halla natipame ya: oko so sisilamaiyo. Epame yia:ta pula natipame yia: watle epo atlaiyo, “Hibulu oplami Yoseptapo na: uhalowedeme na: hamala mati. Epela na:ta alimama sikemte hiyella dalepo teletamama ya: tluka tlo medla pomelle ipo,” diyo.

<sup>16-17</sup> Epame ya:ta Yosep tlukaye medla himpolopo depo ya:wolalita mo-tamila:la pulati ya: watle epo atlaiyo, “Wa: oko halalo Hibulu oplami Yoseptapo na: uhala matilipo. <sup>18</sup> Epalati na:ta sikemte hiyellati dalepame teletamama ya: tluka tlo medla pomelementale ipo,” diyo.

<sup>19-20</sup> Epalati Potipatapo sikemte siyalademama Yosepye hampame amtuwale aya dulu dla ka:staiyo. Epedeme amtuwale aya iye Isip so yia: dokopala oplami Pelo mape opaye amtuwale aya hatlo medla ka:ka:timhalemndiyo.

<sup>21-23</sup> Amasiyama GODtapo Yosep mate halemama ya:ye gadle pato himhalaiyo. Epalati amtuwale aya omhallalo oplamitapo ya: dla ka:dle koko natipame ma ya: watle amtuwale aya dulu dla ha:ha:lalo so hapulomaye omhalane diyo. Epalati Yosepta amtuwale aya dulu dla ha:ha:lalo soye woloma ka:pi omhallati natipame amtuwale aya omhallalo oplamitapo koko opi pahalomalalo isikimi Yosep dla pomelepame me-omhalaiyo. ✧

\* **38:29:** Peles hi ya: dulu kokoye hatostama demama apopo. † **38:30:** Sela hi ya: dulu kokoye omteka:pele demama apopo. ✧ **39:2:** Taiya 7:9 ✧ **39:21-23:** Taiya 7:9

## 40

### *Yosepta opa dapiyamteta milamalo tlamale kokoye bobotimatimale*

<sup>1</sup> Epapele dulu dla alila haletapo Isip mo dokopala oplami Pelotapo ya: dla wain yú tipo hami demhallalo oplami mate epo ya: daya ha:lalo oplami mate dla siyaladiyo. <sup>2-3</sup> Ya: siyalademama yia:ye hohopame Yosepta amtuwale aya dulu dla hala hatlo medla ka:ka:timaiyo. <sup>4</sup> Epalati amtuwale aya dokopala oplamita Yosep watle opa dapiyamte ewolo ma wa:ta me-omhalane diyo. Epame Yosepta yia:ye alila hapuloma amtuwale aya dulu medla me-omhalaiyo.

<sup>5</sup> Epapele dulu dla alila haletapo Pelo dla wain yú tipo hamilalo oplami mate epo daya ha:lalo oplami matetapo utula:la hutiyemama milamalo tlamaiyo. Amasiyama yia:ta milamalo tlamaleye yia: dulu kokoye poyia:malamana.

<sup>6</sup> Epapeleye utulalati edla Yosepta matime natilati yia:ta madipatatapo yia: mila:piye sikemte polowastame popa:iyo. <sup>7</sup> Epalati Yoseptapo yia: watle epo atlaiyo, “Apa kokota wua: dla woyamalati mila:pi sikemte polowastame popa:ma:?” diyo.

<sup>8</sup> Epapalati asiyama yia:ta Yosep watle epo atlaiyo, “Di wata utula:la hutiyemama milamalo tlama. Amasiyama milamalo tlamale ya: dulu kokoye oplami antapo di watle bobotimatipa:, dempopa:ma,” diyo.

Epalati Yosepta yia: watle epo atlaiyo, “Hatlo God tlo ala:na, wua:ta milamalo tlamale kokoye woloma wua: watle imoloweye. Amasiyama wua:ta tlamaleye na: watle atlamaiya,” diyo.

<sup>9-10</sup> Epedeme dokopala oplami dla wain yú tipo hamilalo oplamitapo ya: tatile ya:ta milamalo natiliye Yosep watle esemama epo atlaiyo, “Na: elemama natilati gla:pi dlomoko dalita dlo dapahatlo tatlamale nati. Epeleye dlo edla dlomoko hahata pupame ma dlomoko ikadepeta dolahutiyemama ma-napo hutie. <sup>11</sup> Epapeleye na:tapo dokopala oplami Pelo ya: isilako hapame gla:pi dlomoko dlalipo dala isilako dla okolopame Pelo dla hami,” diyo.

<sup>12</sup> Epalati Yoseptapo ya: watle epo atlaiyo, “Wa:ta milamalo natili ya: dulu kokoye ipo elema. Gla:pi dali dlo dapahatlope tatlamaleye, alila dapahatlope kokoye imama apopo. <sup>13</sup> Epedeme alila dapahatlope pololepame dokopala oplami Pelotapo wa:ye amtuwale aya dulu tle alikili a:ma hamame woyamelepe. Epalati wa:tapo mamisika: ya: dla wain yú tipo hami demhallepe. <sup>14</sup> Amasiyama wa:tapo ma alikili a:ma woyapame na:ye malamama dokopala oplami Pelo dla na: kokoye atlane, na:ta amtuwale aya dulu itle alikili a:ma woyamelepo depame. <sup>15</sup> Ame adipalati, na:ye dlopi akumale tle na: mo ikadepe memelepame ma hema seme pumuluwapo. Epame na:ye koko pa:le amtuwale aya dulu hema ka:stauwapo. Amasiyama na: batalimale koko hale pohana,” diyo.

<sup>16</sup> Epapele dulu dla dokopala oplami Pelo daya ha:lalo oplamitapo Yosepta ya:mkaleta milamalo natili ya: dulu kokoye woloma ka:pi botomastlati natipame Yosep watle epo atlaiyo, “Wata utula:la na:ta milamalo natimama na:ye hakala duli tilimale dapahatlope eye palawa daya kolupame dokopala di dla ipila:po ta. <sup>17</sup> Epapele dulu dla itapu di tle pameleme polale duli dulu edla palawa daya Pelota delepo depame kolupo hame ta. Amasiyama teata puame palawa daya eye demya,” diyo.

<sup>18</sup> Epalati asiyama Yoseptapo ya: watle epo atlaiyo, “Wa:ta milamalo natili ya: dulu kokoye ipo elema. Hakala duli tilimale dapahatlope eye alila dapahatlopepo. <sup>19</sup> Epapedeme alila dapahatlope pololepame Pelotapo wa: dokopala iye ketamastepame wa: motoye deata dali di dla himomeleme ellati teata puame wa: moye delepe,” diyo.

<sup>20</sup> Epapeleye alila dapahatlope pololepo alotle Pelotapo ya: hamale daya demama ya: oko so hapuloma sisilamaiyo, daya dele dla pulupo depame. Epame ya: dla wain yú tipo hamilalo oplami mate epo daya ha:lalo oplami mate amtuwale aya dulu tle alikili a:ma eleme woyamaiya diyo. <sup>21-22</sup> Epame yia:tapo mo-pulati Pelota ya: dla wain yú tipo hami demhallalo oplamiye sepame daya ha:lalo oplami tlo yumiya diyo. Epedeme koko

hapuloma iye Yosepta atlamale koko mate ala:iyo. <sup>23</sup> Amasiyama wain yú tipo hami demhallalo oplamitapo Yosep kokoye dokopala oplami dla atlowepo depo yu himiliye mo-welipo hamastaiyo.

## 41

### *Isip mo dokopala oplami Pelota milamalo tlamale koko*

<sup>1</sup> Sokomoko dapiyamte mo-pololepo halemama dokopala oplami Pelotapo milamalo tlamaiyo. Milamalo natimama ya:ye Nael aloma peleyama dla tulume halaiyo. <sup>2</sup> Epalati bulumkiyawa aliya kakaliyapele 7tapo aloma yú tle woyapame aloma peleyama dla osamokolo dlomsiyamala natiyo. <sup>3-4</sup> Epapalati bulumkiyawa aliya opi 7 sikemte bobatlalimale mape Nael aloma yú tle wowoyapame bulumkiyawa aliya yimkadulo 7 kakaliyapeleye gola:gola:diyo. Epame Pelota koko i natipame elale tle yieliyo.

<sup>5</sup> Epame ya: sila:timpolopo mamisika: elemama milamalo haleye ipo natiyo. Epeleye ya: elemama natilati witi dali hatlo medla witi daya moko sikemte sosoumale 7ta dola hutiyela natiyo. <sup>6-7</sup> Epapele oloma medla witi daya gegeyalimaleta sosoumale 7ta ma medla wowoyapame witi daya sikemte sosoumale ka:ka:dleye gola:gola:diyo. Epapele oloma edla Peloye elale tle me-yieliyo. <sup>8</sup> Epame utulala ikadepe sila:time polomama ya:ta milamalo tlamaleye apa koko tlamama apiyo depame sikemte momalampolaiyo. Epame ya:tapo ya: opa inoma nalatimale so mate epo osolo watalo so mate sisilapame yia: watle bobotimatimaiya diyo. Amasiyama yia:tapo yeitamama yia: dulu kokoye ya: watle po-bobotimatimalalo wekiyo. ✧

<sup>9</sup> Epalati Pelo watle wain yú tipo hamilalo oplamita puame ya: watle epo atlaiyo, “Epedeme na: na:ta mo-powataliya wa: watle atli depo weluwaye ma wata wa: watle atlowama,” diyo. <sup>10</sup> “Epapedeme mo-powataliya wa:tapo na: mate epo wa: daya ha:lalo oplami mate dla siyalademama dia:ye amtuwale aya dulu dla ka:ka:timuwapo. <sup>11</sup> Edla ha:ha:mama utula:la hale dla hutiyemama dita madipatatapo milamalo tlamuwa. Epele tlope dita milamalo tlamale yia: dulu kokoye podimalamana. <sup>12</sup> Amasiyama dulu edla Hibulu oplami hale, Potipa ya: oko oplamitapo dia: mate amtuwale aya dulu edla me-haluwa. Epapeleye ditapo dita milamalo tlamale kokoye ya: watle atlamalati ya:tapo asiyama di watle yia: dulu kokoye ka:pi bobotimatimuwa. <sup>13</sup> Epedeme ya:ta di watle atlamuwa kokotapo ikadepe mo-wowoyamuwapo. Epele dulu na:ye matle na: oko kotiyamama wa: dla wain yú tipo hamilalo haluwapo. Amasiyama daya ha:lalo oplami tlo wa:ta yumiwa duwapo,” diyo.

<sup>14</sup> Epela dalepame Pelotapo Yosepye ya: hala dla seme puaiya diyo. Epapalati Yoseptapo aiyo tapo yú woloma hutupame tluka ka:ka:dle didiyepo pollati ya: seme Pelo hala dla taiyo.

<sup>15</sup> Epalati Pelotapo ya: natipame ya: watle epo atlaiyo, “Na: wata utula:la elemama milamalo nati. Amasiyama ya: dulu koko botomastloweye oplami hale ponatisema. Amasiyama na: oko oplamita atlemama wa: tlo ala:na, dulu koko botomastloweye, de,” diyo.

<sup>16</sup> Epalati Yoseptapo asiyama ya: watle epo atlaiyo, “Na: dla malamale hale hawa. Epapele tlope Godtapo wa: watle ya: dulu kokoye botomastlepe,” diyo.

<sup>17-18</sup> Epalati Pelota epo atlaiyo, “Na: elemama natilati na:ye Nael aloma pili peleyama dla tulume hala. Epalati bulumkiyawa aliya sikemte kakaliyalimale 7tapo Nael aloma yú dulu tle wowoyapame aloma pili dla osamokolo dlomsiyama. <sup>19</sup> Epapele aloma medla bulumkiyawa aliya opi sikemte bobatlalimale 7 mape Nael aloma yú tle wowoyamalati nati. Epapele dulu dla na: aliya sikemte bobatlalimale ipapele ponatisemde. <sup>20</sup> Epapeleye bulumkiyawa aliya sikemte bobatlalimale 7 iwolotapo yimkadulo sikemte kakaliyalimaleye gola:gola:de. <sup>21</sup> Amasiyama yia:ta epo gola:gola:depo ha:ha:le alotle

natilati yia: dulu dla teta:le ponatina. Amasiyama yia:ta hapulomatapo poteta:lalo isikimi mepo ka:yapa bobatlalipo ha:ha:uwaye, ma mepo ha:ha:la nati. Na: epalati ma elale tle yiele.

<sup>22</sup> Epame na: mamisika: elemama milamalo hale ipo nati. Witi dali hatlo medla witi daya sikemte sosoumale 7ta dola hutiyela nati. <sup>23-24</sup> Epalati alotle ma witi daya opi gegeyalimaleta sosoumale 7tapo dali hatlo medla wowoyapame witi daya sikemte sosoumale 7ye gola:gola:dla nati. Epedeme na:tapo na: osolo watalo so watle na:ta milamalo tlamale yia: dulu kokoye na: watle bobotimatimaiya dle tlope, yia: na: watle po-bobotimatimana,” diyo.

<sup>25</sup> Epalati Yoseptapo Pelo watle epo atlaiyo, “Wa:ta milamalo tlamale dapiyamte dulu hema yia: dulu kokoye ma-hatlope. Wa:ta milamalo tlamale koko tle Godtapo ya:ta koko halowedeme hala kokoye wa: watle ma-nati-ilipo. <sup>26</sup> Epapedeme wa:tapo bulumkiyawa aliya sikemte kakaliyapele 7 tlamale mate epame witi daya sikemte sosoumale 7 dola hutiyela tlamale mate e ya: dulu kokoye sokomoko ka:ka:dle 7po. Epedeme itapu sokomoko 7 dulu edla dlowe alisisitapo sikemte pasatepo ellepe. <sup>27</sup> Amasiyama wa:tapo bulumkiyawa aliya sikemte bobatlalimale 7 tlamale mate epo witi daya gegeyalimaleta sosoumale 7 tlamale mate yia: dulu koko mape sokomoko 7po. Amasiyama sokomoko 7 dulu edla daya pa:le kokota ellepe.

<sup>28</sup> Epedeme Godtapo ya:ta koko halowedeme hala kokoye wa: watle momolo nati-ilipo. <sup>29</sup> Epapedeme itapu sokomoko 7 pua dulu hema emale alisisitapo woloma ka:pi matamama dlowe alisisitapo sikemte pasatlepe. <sup>30-31</sup> Amasiyama ma alotle sokomoko 7 opi dulu dla emale alisisitapo woloma ka:pi pomatlalo gegeyalimama pallipe. Oloma edla dayata pa:mama Isip mo patoye sikemte batalipo hamastlepe. Epapele dulu dla opatapo daya pa:le dulu edla ha:ha:mama yia:ta ka:yapa sokomoko 7 ka:ka:dle dulu dla ha:ha:mama dlowe alisisi sikemte poposatilipo ha:ha:uwa kokoye wowellipe. <sup>32</sup> Epedeme Godtapo ikadepe koko i halowedeme ya:tapo milamalo tlamale dapiyamte iye wa: dla nati-ilipo. Epame ya:ta koko i haloweye podekellowa, ikadepe woyamelepe.

<sup>33</sup> Epedeme dokopala oplami, di ka:dena, daya alisisiye momolo itle mo-kokolumha:ha:lowa. Epapedeme wa:tapo oplami hale sikemte malamale oplamiye hulumane, dlowe alisisi kokolumolowe dla dokopala depo halloweye. <sup>34-35</sup> Epame wa: ma opa opi hohomelepe, yia:tapo sokomoko 7 ka:ka:dle dulu dla Isip mo pato dla siyamama witi daya halopo puame aya dla koluma demha:ha:lepo depame.\* <sup>36</sup> Epapedeme wa:tapo koko eye halepiye, etapo sokomoko 7 batalimale dulu dla daya pa:le kokota pulati opata dlowe alisisi me-demha:ha:lepe. Amasiyama wa:ta koko e pahalalo wekelepiye, opa hapuloma Isip mo dulu dla ha:ha: soye pallipe,” diyo.

*Pelota Yosepye Isip mo dokopala hallepo depame hulumale*

<sup>37-38</sup> Yosepta koko eye atlamalati Isip mo dokopala oplami Pelotapo ya: opa mate yu i dalepame pta ka:pi demama solotamale himmama epo atlaiyo, “Hatlo Yosep tlo ala:na, dokopala oplami halloweye. Adipalati, God ya: Sokotapo ikadepe ya: mate halapo,” diyo.

<sup>39</sup> Epame Pelotapo Yosep watle epo atlaiyo, “Godtapo na:ta milamalo natili ya: dulu kokoye wa: watle imalepo. Epedeme hatlo wa:ye sikemte ka:depo malamale oplamipo. <sup>40</sup> Epapedeme wa:tapo na: aya mate epo na: opa mate dokopala depo hallepe. Epalati opa hapulomatapo wa: yu dla salladepo siyamelepe. Amasiyama hatlo monolo na:tapo wa: dokopala oplami hallowepo. ✧ <sup>41</sup> Epedeme na:tapo wa:ye Isip mo pato dulu hema dokopala oplami hallepo depame itiyamale hamima,” diyo. <sup>42</sup> Epo atlepame Pelotapo Yosepta itiyamale ya: tle halé eye nati-iliwedeme ya: domoko dla alisisi asiyamhallaloye pustepo ma Yosep domoko dla asiyomeliyo. Epame Yosep watle tluka alisisi ka:ka:dle

\* **41:34-35:** Mo sotapo witi daya hauwalle oloma dla yia:tapo witi dayaye kokolumale 5 dla hukulupame dulu dla kolumale hatlo tlo Pelo watle halopimha:ha:lepe. ✧ **41:40:** Taiya 7:10

didiyemelepo ma ya: tumuku dla gold meleli sokolomaleye asiyomeliyo. ✧ 43 Epame ya:tapo Yosep watle ma ya: aliya koa hale hamiyo. Epapele dulu dla Yoseptapo aliya koa etle tlati ya: oko sotapo itapu tle tamalemama yu teta:le mate, “heodiya heodiya, Isip mo dokopala oplami mo-puma,” demtamalemndiyo.

44 Epame Pelotapo Yosep watle ma epo atlaiyo, “Na:ye Isip so yia: dokopala oplami Pelopo. Amasiyama epapele tlope ma wa: dla itiyamale pato elapo. Epedeme oplami haletapo wa: podallalo Isip mo dulu hema koko hale pohalowa,” diyo. 45-46 Epame Pelotapo Yosep watle hi amko hamimama Sapenat Paneya diyo. Epame ya: watle Potipela yoti Asenat hamiyo. Oplami Potipela iye Heliyopolis mo dla Isip so yia: god dla alinepi poyupo hapilalo oplami halaiyo. Epedeme Yoseptapo 30 sokomoko hallati Pelotapo ya: watle mo dokopala depo omhallowe hi hamiyo. Epalati ya:tapo Isip mo pato dulu dla sela:mama mo hapulomaye tlamtamdiyo.

47 Epedeme sokomoko 7 ka:ka:dle dulu dla alisisitapo ka:pi matamama dlowe alisisitapo sikemte pasatepo elaiyo. 48 Epalati Isip sota emale alisisi hauwalle oloma dla Yoseptapo alisisi opiye aya patoto halopo dulu edla kokolumhalaiyo. 49 Epapedeme dlowe alisisitapo sikemte poposatilimama isikimi asila some sesa:lowe api pa:po halaiyo.

50 Daya pa:le kokota ala populalo hallati Yosep ya:llu Asenattapo akimlala dapiyamte hatitimaiyo. 51 Epalati Yoseptapo itapu hamale maseyemala ya: hiye Manase† depame epo atlaiyo, “Godtapo na:ta upiyele dulu dla puwa malamale mate epame na:ta toto-somale mate mo-welipo hamastauwapo,” diyo. 52 Epame ya: maseyemala hale hiye Eplaim‡ depame epo atlaiyo, “Godtapo na:ta upiyele hamhaluwa mo hema yimlalye halopima,” diyo.

53 Epapele dulu dla Isip mo dla sokomoko 7 ka:ka:dle dulu dla ha:ha:mama dlowe alisisita pasatilipo ha:ha:le alilata ma-tame gudiyo. 54 Epalati Yosepta atlamale koko mate ala:mama ma sokomoko 7 dulu dla sali pato sisilapomama daya pa:lowe alilatapo mo-kotiyamaiyo. Epapele oloma dla mo hapulomatapo dlowe alisisita mo-pa:iyo. Amasiyama hatlo Isip mo dla Yosepta aya patoto halomale dulu dla dlowe alisisita me-posatilipo hutiyeyiyo. ✧ 55 Epedeme daya pa:le kokota Isip mo dla pulati opatapo daya teta:mama Pelo hala dla tame daya halomolowedeme daliyo. Epalati Pelota asiyama yia: watle epo atlaiyo, “Wua: Yosep hala dla tame daliya. Epame ya:ta atlamale yu e dolumaiya,” diyo. ✧

56 Epapeleye daya pa:le kokota Isip mo patoye ma-halati asiyama Yoseptapo dlowe alisisi kokolumale aya patoto halomale kokolomaye dodokotimaiyo. Epalati Isip sota ya: hala dla puame dayaye mani mate halomha:ha:iyo. 57 Epapedeme daya pa:le kokota ta:lamo pato dla pulati opatapo mo opi tle Isip mo dla Yosep hala dla mani mate daya halomala pumhalaiyo.

## 42

### *Yosep ya: bapadulota Isip mo dla daya hala tale*

1-2 Daya pa:le kokotapo Keinan mo ma me-haiyo. Epalati Yosep ya: a Yokobtapo Isip mo dla dlowe alisisita ala me-elale kokoye dalepame ya: akimlala watle epo atlaiyo, “Wua: adipalati isikimi hohola:mha:ha:ma:? Na: Isip mo dla daya hutiyeuwo dle kokoye medale. Epedeme wua: tulum dayaye halomaiya. Poka:dena, dita daya dimi ha:ha:mama palliweye,” diyo. ✧

3 Epalati Yokob ya: akimlala 10tapo yu e dalepame Isip mo dla daya halomala tuluiyo. 4 Amasiyama Yokobtapo Yosep ya: ei Benyaminye ya: bapadulo mate taiya dloweyeposolotamaiyo. Adipalati, api duka dla koko haletapo ya: dla woyamalala depame.

✧ 41:42: Da:n 5:29 † 41:51: Manase hi i ya: dulu kokoye mo-welima demama apopo. ‡ 41:52: Eplaim hi i ya: dulu kokoye yimlala isukuma demama apopo. ✧ 41:54: Taiya 7:11 ✧ 41:55: Yon 2:5 ✧ 42:1-2: Taiya 7:12



<sup>5</sup> Epapedeme Keinan so opa opitapo Isip mo dla daya halomala tullati Yokob ya: akimlala mape daya halomolowedeme yia: mate tame Isip mo dla wowoyamaiyo.

<sup>6</sup> Yia: edla tame woyapame daya halomolowedeme dokopala oplami Yosep hala dla tame ya: hete sitali isili dla heoheodiyo. <sup>7-8</sup> Epapele dulu dla ya: bapadulo iwolotapo Yosepye woloma pomalanatilalo wekiyo. Amasiyama Yosep ya: tlope ya: bapadulo iwoloye me-malanatiyo. Amasiyama epapele tlope ya:tapo yia: watle ya: kokoye pobotomastlalo wekemama yia: watle yu itiyamale mate epo atlaiyo, “Wua: apa sota?” diyo.

Epalati asiyama yia:ta epo atlaiyo, “Dia:ye Keinan sopo. Di daya pa:lali hema daya halomolowedeme pumula,” diyo.

<sup>9</sup> Epapele dulu dla Yoseptapo sokomoko mo-powataliya dla milamalo natimama ya: bapadulotapo ya: dla heoheoduwa koko malapame yia: watle epo atlaiyo, “Wua: Isip moye isikimi wota: siyamalalo so opapo. Epedeme wua: di mota itiyamale pa:po ela kokoye isikimi kolemnatila pumulo?” diyo. ✧

<sup>10-11</sup> Amasiyama yia:tapo asiyama epo atlaiyo, “Hao, dokopala oplami, di powota: tlalo so opa. Dia:ye isikimi wa: hala dla daya halomala pua. Epame di mape isikimi oplami hatlope ya: akimlalata pumula,” diyo.

<sup>12</sup> Epalati Yoseptapo asiyama yia: watle epo atlaiyo, “Hao, wua: isikimi na: dla mala-atlapo. Adipalati, wua: isikimi di mota itiyamale pa:po ela kokoye wota: natila pumulana,” diyo.

<sup>13</sup> Amasiyama yia:tapo ya: watle epo atlaiyo, “Hao, di koko edla popuwana. Adipalati, dia:ye isikimi oplami hatlo ya: akimlalapo. Di atapo akimlala 12 hatitimuwa. Epapele tlope di 10 sotapo hema pumulalepo. Epalati di ei, alo ikadepe hamaleye di a mate Keinan mo medla saliyome pumula. Amasiyama di ei yemala hale tlo mo-pouwa,” diyo.

<sup>14</sup> Amasiyama Yoseptapo yia: watle epo atlaiyo, “Medla gudiya! Adipalati, na:ta ka:yapa wua: watle ma-atlalepo, wua:ye mo hema isikimi wota: pumulalepo. <sup>15-16</sup> Amasiyama na: wua:ta atlama kokoye ikadepeta:e depame, wua: ei yemala natilowe solotama. Epapedeme wua: dulu dla haletapo ma ilamtame wua: ei yemala sempuaiya. Amasiyama opi wua:ye na:tapo amtuwale aya dulu dla ka:ka:timolowepo. Epapele dulu dla wua:tapo wua: ei yemala posempulalo wekelepiye, wua: ikadepe mo hema wota: pumulale sota ammama apelepe,” diyo. <sup>17</sup> Epame Yoseptapo yia:ta hapulomaye amtuwale aya dulu dla alila dapahatlope ha:ha:lepo depame ka:ka:timaiyo.

<sup>18</sup> Alila dapahatlope mogudlati Yoseptapo yia: watle epo atlaiyo, “Na:ye God yu dla heodlalo oplamipo. Epedeme wua: na:ta atlali koko eye halepiye, eta wua:ye popotimolowa me-ha:ha:lepe. <sup>19-20</sup> Wua: dulu dla oplami hale tlo amtuwale aya dla ka:stlowepo. Amasiyama opi wua: tlope daya halopame ma ilame wua: a hala dla tamalaiya. Amasiyama wua: ei yemalaye na: watle seme puaiya. Epele dulu dla wua:tapo ikadepe ya:ye seme pulupiye, na: eta wua:ta atlamale kokoye ikadepe tepo dlowepo. Epalati na:tapo wua:ye popotimolowa,” diyo. Epalati Yosep ya: bapadulotapo yu e dalepame yu hale po-atlalo me-ka:pi diyo.

<sup>21</sup> Epame yia:tapo yia: dulu dla yia:skamu yu hamyemama epo atlamyaiyo, “Ditapo mo-powataliya me-di ei dla batalimale koko hauwa tle asiyama di watle wotiyalle koko itapo woyamapo. Adipalati, ditapo di eiye munamu dulu dla hamastlati ya:tapo gadle yilo dia: dla otele himmama sisilamalati dita ya:ye pogadena,” demyaiyo. <sup>22</sup> Epame Lubenta epo atlaiyo, “Na:tapo wua: watle atlemama, ya: dla wotiyalle hamimiya duwapo. Amasiyama wua:tapo na: yu podallalo ya: dla wotiyalle me-hamiwapo. Epapele koko tle ya: omali asiyama dla ma dita wotiyalle hapo,” diyo. ✧

<sup>23</sup> Epele dulu dla Yoseptapo ya: bapadulota atlamyale koko hapulomaye me-dalepo halaiyo. Amasiyama ya: bapadulota malamaleye semte yia: yuye ya: podallalo

wekemapo diyo. Adipalati, Yoseptapo ya: bapadulo mate yukamhalemama isikimi Isip so yu mate yukamhallati asiyama oplami haletapo yia: watle ma Hibulu yu mate ilaha demhalaiyo. <sup>24</sup>Epeleye Yoseptapo ya: bapadulota epo yu hamyela dalepame helestame tumama amaiyo. Epame ma helestame halemama ya: bapadulo dulu dla Simiyon tlo hamame do keketipolliyepo amtuwale aya dulu dla ka:staiya, diyo.

*Yosep ya: bapadulota ma ilame Keinan mo dla tale*

<sup>25</sup> Epame Yosepta ya: bapadulo koko dla ma ya: oko so watle epo atlaiyo, “Dayaye yia: yekalo dla atilipame yia: mani mape ma ilame yia: yekalo dulu medla hatiya. Epame yia:ta duka dla tamalemama daya dlomtlowe ma halopiya,” diyo. <sup>26</sup> Epapalati Yosep ya: bapadulotapo yekalo daya atilimaleye donki aliya di dla kolupame ma Keinan mo dla ilame tamalaiyo.

<sup>27</sup> Yia: tame duka dla hutiyelowedeme popa:mama yia: bapa haletapo ya: donki aliya daya iliwedeme ya: yekalo daya atiliye towastame natilati ya:ta daya halë maniye ma ilame ya: yekalo dulu dla hamatili halla natiyo. <sup>28</sup> Epalati natipame sikemte yielepo yia: watle epo atlaiyo, “Na:ta daya halë maniye ma ilame yekalo dulu dla hamatili halema,” diyo. Amasiyama yia:tapo yu i dalepo yiyelepame dupa yulumale mate epo atlamyaiyo, “God adipalati di watle koko ipapele hama:?” demyaiyo.

<sup>29</sup> Yia: Keinan mo dla tame woyapame yia: dla wowoyamuwa koko hapulomaye yia: a watle atlamaiyo. <sup>30</sup> Epame matle ya: watle epo atlaiyo, “Isip mo dokopala oplamitapo dia: dla sikemte mukolli yu atlemama dia:ye wota: pumulale so duwa. <sup>31</sup> Amasiyama epalati ditapo asiyama ya: watle epo atluwa, ‘Dia:ye ikadepe wota: popuwana. <sup>32</sup> Epame dia:ye oplami hatlo ya: akimlalapo duwa. Epapele dulu dla di ei hale tlo mo-polati asiyama di ei mosukulu hallalo tlo mo medla di a mate me-halema,’ duwa. <sup>33</sup> Epalati Isip dokopala oplamitapo di watle ipo atluwa, ‘Wua: dulu dla wua: bapa hale tlo medla pomelepo daya halopo ma ilame tame wua: a hala dla tamalaiya,’ duwa. <sup>34</sup> ‘Amasiyama wua: ei yemala tlo hema sempuaiya. Wua:tapo wua: ei yemalaye na: hala dla sempulati natilipiye, na: eta wua: yu dla mikadepe demama wua:ye powota: pumulale so dlowepo,’ duwa. ‘Epalati na:tapo wua: bapa Simiyonye amtuwale aya tle hamame woyamalati wua:tapo daya me-haloma demha:ha:lepe,’ duwa.”

<sup>35</sup> Epame yia: a watle yu epo atlepo ha:ha:mama yia: yekalo daya atilimaleye gowalagowala depo natitepo, yia: yekalo dulu dla yia:ta daya halomale maniye ma i-ilapo yekalo dulu dla hatili halla natiyo. Epalati yia:tapo yia: a mate yia: manita ma yia: yekalo dulu dla me-hutiyela natipame yiyelepote sikemte wowota:iyo. <sup>36</sup> Amasiyama yia: a Yokobtapo koko e natipame yia: watle epo atlaiyo, “Wua: na:tapo na: akimlala hapulomaye me-pokadlepo depame ipapele kokoye halomtama:lema:? Adipalati, Yosepye mo-haoduwapo. Epame Simiyon ma mo-haodlepote. Epame wua: matle Benyamin iye hamame tlowedeme apopa? Upiyele kokota na: dla mo-woyamapo,” diyo.

<sup>37</sup> Epalati asiyama Lubentapo epo atlaiyo, “Na:tapo Benyaminye Isip mo dla seme tapame ya:ye ma ilame woloma sempuluwepote. Amasiyama wa: na:ta Benyaminye posempulalo wekelati natipame asiyama na: akimlala dapiyamteye wa:ta potimelepe,” diyo.

<sup>38</sup> Amasiyama Yokobtapo asiyama epo atlaiyo, “Hao, na: maseyemala Benyamintapo wua: mate Isip mo dla potlowa. Adipalati, ya: bapa Yosep mo-polati yia: wai Leisol ya: akimlala dulu dla ma hatlo ya:ta halapo. Epedeme ya:ta Isip mo dla tamama koko haleta ya: dla woyamelepiye, dupa kolle kokotapo na: dla sikemte pasatamama na:ye polope,” diyo.

## 43

*Yosep ya: bapadulota ma ilame Isip mo dla tale*

<sup>1</sup> Daya pa:le kokota ala Keinan mo dla me-ellati Yokobtapo ya: akimlala mate yia:ta Isip mo tle daya halopo pualeye dlomha:ha:mama mosukulu pokadiyo. <sup>2</sup> Epalati Yokobtapo ya: akimlala watle epo atlaiyo, “Ma ilame tame Isip mo dla daya opiye halomaiye,” diyo.

<sup>3-5</sup> Amasiyama Yudatapo ya: watle epo atlaiyo, “Di edla tamalemama Benyamin dimi tloweye poka:dena. Adipalati, dokopala oplamita di watle ipo atluwa, ‘Wua: ma hema ilampumulumama Benyamin posempulalo wekelepiye, wua: matle na:ta hala dla puame daya pohalomolowa,’ duwa. Epedeme di Isip mo dla ma ilame tamalemama Benyamin mate semtlowe ka:pi,” diyo.

<sup>6</sup> Epalati Yokobta asiyama ya: watle epo atlaiyo, “Wua: adipalati upiyele na: watle hamimama wua: ei yemala me-halema dle koko ya: watle atluwa?” diyo.

<sup>7</sup> Amasiyama ya: akimlalatapo ya: watle epo atlaiyo, “Dokopala oplamitapo di watle di kokoye sikemte dlalemtumama wua: a totoyemala ma me-halema:, epame wua: ei ma me-halema: demtuwa. Di epalati ya: yu asiyama dla di koko hapulomaye ya: dla atlamuwa. Epapele dulu dla ma ya:ta atlemama wua: ei ma me-sempumulaiye dla dalepame sikemte yiyeluwa,” diyo.

<sup>8</sup> Epame Yudatapo ya: a watle epo atlaiyo, “Ka:dena, wa: Benyaminye na: mate ta dene, etapo dita ma hapele tame Isip mo dla daya halopame ma ilame pulupe. Amasiyama dita pe-epapalalo wekelepiye, dita hapulomaye daya yilo pallipe. <sup>9</sup> Na: ikadepe koko wa: watle atlema, na:tapo ya:ye ma ilame wa: hala dla sempuluwepo. Amasiyama na:tapo wa: hala dla posempulalo wekelepiye, e na: batalimalepo, monolo asiyama halowepo. <sup>10</sup> Amasiyama epele dulu dla di alilaye dosomha:ha:po. Adipalati, wa:ta Benyaminye dia: mate potane desema. Wa:tapo dia:ye ka:yapa ma-hapele taiya dematiye, di etapo mo edla tepo pua dleye ma dapiyamte depo ha:ha:lemla.”

<sup>11</sup> Epalati yia: atapo yia: watle epo atlaiyo, “Epapelepiye mope, Benyaminye me-semtaiya. Amasiyama wua: tamalemama dokopala oplami dla namkale dle alisisi ipapeleye halopo tamalaiya. Ullu ka:depo pamalalo dakopala mate, epame topsiyo mate, epo isole ta mate epo bolipi ta mate halopo telepe. <sup>12</sup> Epame wua: yekalo dulu dla mani hutiyeuwaye ma ilame tame dokopala oplami watle halopiye. Pona:malamana, oplami haleta yeliyele koko tle wua: yekalo dulu dla mani hatiwayo. Epame ma mani opi wua:ta halopo taye eta daya amko halomaiye. <sup>13</sup> Epammama Benyamin ma seme ma-tamalaiya. <sup>14</sup> Epapedeme na: God dla inoma sumale yu himma, ya:tapo dokopala oplami dla sadle hamilati Benyamin mate epo Simiyon mateye ma ilame wua: mate pumullupo depame. Amasiyama Godtapo yia:ye paliya dlepiye, eta mepo palliwe ka:pi. Na: God yu dla heodlowepo,” diyo.

<sup>15</sup> Epalati Yokob ya: akimlalatapo namkale dle alisisi mate epo mani mate halopame Benyamin seme Isip mo dla Yosep hala dla ma hapele tamalaiyo. <sup>16</sup> Yia: Isip mo dla tame Yosep hala dla woyamalati Yoseptapo Benyamin natipame ya: oko oplami watle epo atlaiyo, “Opa iwolotapo wata alila dla na: mate daya delepe. Epedeme yia:ye na: aya dla eleme hetame aliya halo yumpo di daya ha:ne,” diyo.

<sup>17</sup> Epalati Yosep ya: oko oplamitapo Yosepta atlale koko dolumama yia:ye elemhetaiyo. <sup>18</sup> Amasiyama yia:ye epo elemtamallati yia: sikemte wowota:le mate epo atlamtamalaiyo, “Ka:yapa di duli dulu dla mani ma i-ilapo hatiwa koko tle ya:tapo dia:ye hema hohopo tapo. Epame ya:tapo di donki aliyaye ma ya:ta elepame dia:ye hohopo asiyama pa:le oko dla hatitimalala,” demtamalaiyo.

<sup>19</sup> Epapeleye yia: Yosep aya dla tame woyapame ya: oko oplami watle epo atlaiyo, <sup>20-22</sup> “Ditapo amka:yapa daya halomala puwa oloma edla di daya halopo tame duka dla hutiyelowedeme popa:mama natilati dita daya halomuwa maniye ma ilame di yekalo dulu dla hatili halla natiwa. Amasiyama di podimalamana, oplami antapo mani eye ma ilame di yekalo dla hatiwo. Epedeme di mani eye ma ilame wa: watle hamilowedeme hampumama dita daya amko halowe mani mate me-halopo pua,” diyo.

<sup>23</sup> Amasiyama Yosep ya: oko oplamitapo asiyama yia: watle epo atlaiyo, “Ase sikemte momalamama wowota:miya. Adipalati, wua: mate epo wua: a mate wua: Godtapo wua: maniye ma ilame wua: yekalo dulu dla hatitimuwayo. Ame adipalati, di mani wua:ta halopiwaye ma-halomuwapo,” diyo. Epame ya: yu i atlepo gudepo halemama Simiyonye yia: watle hamame matiyo.

<sup>24</sup> Epapeleye Yosep ya: oko oplamitapo yia:ye aya dulu dla elemhetame yia: hete howahalomolowe yú tipo hamipame ma yia: donki aliya daya ilimaiyo. <sup>25</sup> Epame yia: watle atlemama, “wua: na: dokopala oplami mate tamila:la daya delepe,” dlati dalepame yia:tapo Yosep watle namkale dle alisisi hamiloweye ma-dinapopo popa:iyo.

<sup>26</sup> Epapeleye Yosepta mo-pulati natipame yia:tapo namkale dle alisisiye halopo tuwame ya: hete sitali dla heoheodepo popa:iyo. <sup>27</sup> Epalati Yoseptapo yia: watle epo atlaiyo, “Wua: a totoyemala ala me-ka:depo halema:?” diyo.

<sup>28</sup> Epalati asiyama yia:tapo ya: watle epo atlaiyo, “Di a totoyemalaye me-ka:pi halema,” depame Yosep hete isili dla mamisika: heoheodiyo.

<sup>29</sup> Epame Yoseptapo Benyamin natipame yia: watle epo atlaiyo, “Iye wua: ei yemala ikadepe ipa?” diyo. Epo halemama Benyamin watle atlemama, “Na: maseyemala, Godtapo wa: mate hallepe,” diyo. <sup>30</sup> Amasiyama Yoseptapo Benyamin sikemte mala-mama ya:ta ellalo dulu dla tuwame amaiyo. <sup>31</sup> Epame amale kaiyoye hiyolepame ma haliyamale dla ulamatiyo. Epame ya:ta dupa kolle kokoye me-hamame sela:mama ya: oko so watle daya halopo matiya diyo.

<sup>32</sup> Epapeleye yia: daya dlowedeme popa:mama Yosep meyelo polaiyo. Epame ya: bapadulo ma miyelo popa:iyo. Epalati Isip so Yosep mate daya dlalo so mape miyelo popa:iyo. Adipalati, Isip sotapo yia: aiyalma dolumama Hibulu so mate yimkata daya podesemdiyo. <sup>33</sup> Amasiyama yia: ala daya dlowedeme popa:mama Yoseptapo ya: bapaduloye woloma ipila:mama ya: bapa Luben tle kotiyapo ipila:mtame ya: ei Benyamin dla tame gudiyo. Amasiyama Yosep ya: bapadulotapo koko i natipame sikemte yiyeliyo. <sup>34</sup> Epame Yoseptapo ya: oko so watle epo atlaiyo, “Wua:ta opa iwolo daya ilimama Benyamin tlo sikemte iye,” diyo. Epalati Yosep ya: bapadulotapo sisiyele mate daya pato deiyo.

## 44

### *Yosep ya: isilakoye Benyamin yekalo dulu dla hamatili*

<sup>1</sup> Epapele dulu dla ya: bapadulota daya ma-dempopa:po gudlati Yoseptapo tuwame ya: oko oplami watle epo atlaiyo, “Wa: opa iwolo dayaye yia: yekalo dla atilimama sikemte poposatilimane. Epame yia: mani mape i-ilapo hatine. <sup>2</sup> Epame yia: ei yekalo dulu dla na: silba isilako mape medla hamatine,” diyo. Epalati ya: oko oplamitapo Yosepta atlamale koko hapulomaye halomaiyo.

<sup>3</sup> Epame utulala ikadepe ya: bapadulotapo yia: yekalo daya atilimaleye yia: donki aliya dla kolupame ma-tamalaiyo. <sup>4-5</sup> Epapeleye yia: ala mo saliyome mateka:pi tiyama dla me-tamha:ha:lati Yoseptapo ya: oko oplami watle atlemama, “Wa: opa ala tamalale so alotle dodolomtame yia: watle ipo atlane, ‘Na: dokopala oplamitapo wua: dla ka:dle koko halepo. Epapele tlope wua: adipalati batalimale koko hamama ya:ta yú dlalo isilakoye uhampuo? Isilako etle na: dokopala oplamitapo itapu dla wowoyamolowe kokoye atlamdepo,’ dene,” diyo.

<sup>6</sup> Epalati Yosep ya: oko oplamitapo ma-hapele yia: ko tle dodolomtame yia: umpame Yosepta ya: watle atlale kokoye ma yia: watle atlaiyo. <sup>7</sup> Amasiyama yia:ta yu i dalepame ya: watle epo atlaiyo, “Di adipammama koko ipapele hapa:? Epapedeme di ikadepe koko wa: watle atlema, di alisisi hale upohana. <sup>8</sup> Epedeme dita amka:yapa daya halomala puwa oloma edla di daya halopo tame Keinan mo dla natilati dita daya halomuwa maniye ma ilame di yekalo dulu dla hatili haluwa. Epalati mani eye ma i-ilapo wa:

watle halopo pumuluwapo. Epapedeme di adipammama wa: dokopala oplami tle alisisi hale dita uhapa:? <sup>9</sup> Epedeme wa: di yekalo totowatipame yekalo dulu tlamtane. Epapele dulu dla wa: oplami ana yekalo dulu dla isilako e ellepiye, wa: oplami etlo polowe dla himilipe. Epalati dita hapulomatapo wa: dokopala oplami dla asiyama pa:le oko halalo so depo ha:ha:lowepo,” diyo.

<sup>10</sup> Epapalati asiyama Yosep ya: oko oplamitapo epo atlaiyo, “Me-ka:pi, epapele tlope isikimi isilako halalo oplami tlope asiyama pa:le oko halalo hallepe. Amasiyama wua:ta hapulomaye ma-tamalaiya dlowepo,” diyo.

<sup>11-12</sup> Epalati yia:tapo yia: yekalo daya atilimaleye ipila:lati Yosep ya: oko oplamitapo yekalo dulu tlamtamama yia: bapa pato Luben yekalo tle kotiyapame totamtame yia: ei yemala Benyamin yekalo dulu edla isilako ella natiyo. <sup>13</sup> Epalati ya: bapadulotapo koko i natipame sikemte dupa kolle pato himmama yia: tluka tallatalladlaimaiyo. Epame yia: yekaloye ma donki aliya dla ipila:pame ma ilame Yosep hala dla tamalaiyo.

<sup>14</sup> Epapeleye yia: Yosep aya dla tame Yosep natipame ya: hete sitali isili dla heoheodiyo. <sup>15</sup> Epalati Yosepta yia: watle epo atlaiyo, “Wua: apa koko halowedeme na: isilako uhame tao? Wua: powua:malamata:, oplami na: ipapeletapo inoma nalatimale tle opata hemele koko halomalalo tlamolowe?” diyo.

<sup>16</sup> Amasiyama Yudatapo ya: watle epo atlaiyo, “Dia: dla yu hale atlowe pa:ma. Adipalati, Godtapo dita batalimale koko halomuwa dla asiyama hamimama apeyo. Epapedeme hatlo di ei yemala Benyamintapo asiyama pa:le oko halalo pohallowa. Amasiyama dita yimkatatapo asiyama pa:le oko halomha:ha:lowepo,” diyo.

<sup>17</sup> Amasiyama epalati Yosepta asiyama ya: watle epo atlaiyo, “Hao, na: pe-epapolowa. Isikimi na: isilako uhale oplami tlope na:tapo na: asiyama pa:le oko dla pamollowepo. Amasiyama wua:ta hapulomaye wua: a hala Keinan mo dla ma-tamalaiya,” diyo.

<sup>18</sup> Epalati Yudatapo itapu dla tame halemama Yosep watle epo atlaiyo, “Dokopala oplami, na:malamana, wa:ye Pelota itiyamale hamhala epapeleye hamhalapo. Amasiyama na:ye wa: mila:pi tle koko pa:le oplami. Epapele tlope na: solotama, wa: mate woloma kulume yukamolowedeme. <sup>19</sup> Epedeme dita ka:yapa daya halomala pulati wa:ta di watle ipo atluwapo, ‘Wua: a waleta:? Epame wua: ei yemala waleta:?’ duwapo. <sup>20</sup> Epalati dita wa: watle atlemama, yao, dia: a mate epo di ei yemala Benyamin, di ata mo-totoyemala halemama himili ma me-halema, duwapo. Epedeme na: a ya:llu hale Leisol ya: akimlala dapiyamte dulu dla hatlo Benyamin tlo halapo. Adipalati, ya: bapaye mo-pouwapo. Epapele koko tle ya: atapo ya:ye sikemte malamale pato elemde.

<sup>21</sup> Epame wa:ta atlemama wua: ei yemalaye sempuaiye, na: natilowama duwapo.

<sup>22</sup> Epapalati ditapo wa: watle ipo atluwapo, ‘Maseyemala etapo ya: a saliyomtlowe poya:malamana. Ya:tapo ya: a saliyome telepiye, ya: ata isikimi mo-polope,’ duwapo.

<sup>23</sup> Amasiyama wa:tapo di watle epo atluwapo, ‘Wua:ta wua: ei yemala posempulalo wekelepiye, wua: matle puame na: mila:pi ponatilowa,’ duwapo. <sup>24</sup> Epalati ditapo ma ilame Keinan mo dla tame di a watle koko hapuloma wa:ta atlamuwa kokoye ya: watle atlamuwapo.

<sup>25</sup> Epapalati di ata atlemama, ‘ma ilame tame Isip mo dla daya opi halomaiya,’ duwapo. <sup>26</sup> Epalati asiyama ditapo ya: watle epo atluwapo, ‘di dia: ei yemalaye posemtlalo wekelepiye, di ma dokopala oplami ponatila tlowa,’ duwapo. <sup>27</sup> Amasiyama di atapo di watle epo atluwa, ‘mo-wua:malamana, na: a:ya Leisoltapo akimlala dapiyamte hatitimuwapo. <sup>28</sup> Dulu edla haleye moko esemalata yumme douwayo, epalati hatlo tlo me-halapo. <sup>29</sup> Epapedeme wua:tapo Benyamin ma seme tamama duka dla koko hale-tapo ya: dla woyamelepiye, na:tapo dupa kolle pato natimama me-polope,’ duwapo.”

<sup>30</sup> Epame Yudatapo ma Yosep watle epo atlaiyo, “Epedeme na:ye na: ei yemala dimi Keinan mo dla ilame potlowa. Adipalati, di atapo yami Benyamin tlope sikemte malamale pato elapo. Epapele dulu dla dita ma ilame tamalemama Benyaminta dia:



mate populalo wekelati natipame ya:ye polope. <sup>31</sup> Epapedeme di batalimaletapo ya:ye pomama apelepe. <sup>32</sup> Epame na: matle na: a watle ipo atluwa, ‘na:tapo Benyamin wa: hala dla ma ilame posempulalo wekelepiye, e na: batalimalepo, monolo asiyama halowepo,’ duwapo. <sup>33</sup> Epedeme ka:dena, na:tapo na: ei Benyamin mo dla halemama asiyama pa:le oko halowama. Epalati asiyama wa:ta Benyamin tlo ya: a hala dla ilamtane dene. <sup>34</sup> Adipalati, na: Benyaminta na: mate potlalo wekelepiye, na: adipo na: a hala dla tapa?: Epedeme na: dupa kolle ipapeleye na: a hala dla hamtlowe posolotamasema,” diyo.

## 45

### *Yoseptapo ya:skamu ya: kokoye ya: bapadulo dla botomastale*

<sup>1</sup> Epapele dulu dla Yoseptapo Yudata atlamale yu dalepame ya:skamu ya:ta dupa kolle koko hamoloweye po-ala:iyo. Epame ya:ta ya: oko so hapulomaye aseka alikili a:ma taiya depame meyelo ya: bapadulo mate halemama sikemte amaiyo. ✧ <sup>2</sup> Epapele dulu dla Yoseptapo sikemte di dla amalati ya: oko sotapo dalepame ma tame Pelo atlaiyo.

<sup>3</sup> Epame Yoseptapo ya: bapadulo watle epo atlaiyo, “Na:ye Yoseppo! Na: a me-halema:?” diyo. Amasiyama ya: bapadulotapo Yosepta yia: watle epo atla dalepame sikemte wowota:iyo.

<sup>4</sup> Epame Yosepta yia: watle epo atlaiyo, “Na: mateka:pi dla kulume pumulaiya,” diyo. Epalati yia:tapo mo-kulume pumullati mamisika: yia: watle epo atlaiyo, “Na:ye ikadepe wua: ei Yoseppo! Na:ye wua:tapo Ismael so dla asiyama mate hamame ilati yia:tapo na:ye Isip mo hema hamame puwapo. <sup>5</sup> Epapedeme wua:ta na: dla ipapele koko hauwa dla ase sikemte dupa kolle hatitimama wua: dulu dla alli momalamiya. Adipalati, Godtapo na:ye hema puane duwapo, na:tapo opa hapulomata daya pa:le koko dulu dla ha:ha:lali yia: pasakalo gadlepo depame. <sup>6</sup> Epedeme daya pa:le kokota elemama sokomoko dapiyamte mo-pololepo. Epame ditapo daya pa:le koko dulu dla ha:ha:lowe sokomoko ala itapu a:ma do supulastale me-hutiyepo. Dulu edla dlowe alisisita pomatlowa. <sup>7</sup> Amasiyama Godtapo na:ye momolo itapu hema tane duwapo, na:tapo wua: mate epo wua: yimlala mate wua: pasakalo gadlepo depame.

<sup>8</sup> Epapedeme yao, ikadepe, wua:tapo na:ye hema potane dena, amasiyama God meyelo na:ye momolo hema tane duwapo. Epame ya:tapo Pelota itiyamale hapulomaye na: dla hapiwapo. Epalati na:tapo Isip mo patoye dokopala depo omhalapo. <sup>9</sup> Epedeme wua: ma hapele na: a hala dla tame na:ta wua: watle atlamale kokoye ma ya: watle atlemama ‘wa: maseyemala Yosep dla Godtapo Isip mo pato omhallowe itiyamaleye hamiyo. Epapedeme wa: ma hapele ya: hala dla pulupo duwa,’ delepe. ✧ <sup>10-11</sup> Epalati wua:tapo wua: yimlala mate epame wua: mamadulo mate epame wua: aliya mate puame Isip mo dulu dla Gosen mo dla ha:ha:lepe. Epedeme wua:tapo na: mateka:pi hema ha:ha:lali na:tapo wua:ye woloma omhallowepo. Adipalati, daya pa:le kokota elloweye sokomoko do supulastale me-a:ma hutiyepo. Amasiyama wua:tapo hema populalo wekelepiye, wua: mate epo wua: yimlala matetapo daya dlowe pa:mama pallipe,” diyo.

<sup>12</sup> Epame Yoseptapo mamisika: yia: watle epo atlaiyo, “Wua: watapo wua:skamu me-malanatipo, na:ye ikadepe wua: ei Yoseppo. Epame Benyamin wa: mape na:ye me-malanatipo, na:ye ikadepe wa: bapa Yoseppo. <sup>13</sup> Epapedeme wua: tame na: a watle na:ta Isip mo hema dokopala depo itiyamale hapo hala kokoye atlaiye. Epame wua:ta hema tlama koko hapuloma mape tame ya: watle atlepame ya:ye hema ma hapele sempuaiya,” diyo.

<sup>14</sup> Epapeleye Yoseptapo yu i atlemhalepo gudepame Benyamin hamame poposila:lepo amaiyo. Epalati Benyamin mape asiyama ya:ye hamame amaiyo. <sup>15</sup> Epame matle

ya: bapadulo hapuloma hohopo poposila:lepame amhalaiyo. Epame alotle yia:tapo yimkata esempopaiyo.

<sup>16</sup> Epapele dulu dla Pelo mate epo ya: oko so mateta Yosep ya: bapadulota puale koko dalepame sikemte sisiyeiyo. <sup>17-18</sup> Epammama Pelotapo Yosep watle epo atlaiyo, “Wa: bapadulo atlamane, yia:tapo yia: dayaye donki aliya dla kolupame yia: a mate epo yia: wola: mate epo yia: yimlala mate elemala telepo depame. Epalati na:tapo Isip mo hema yia:ta ha:ha:lowe ta:la ka:dleye hamilowepo. Epalati yia:tapo edla ha:ha:mama dlowe alisisi pasatale dulu dla ha:ha:lepe. <sup>19-20</sup> Amasiyama yia: tamalemama na: aliya koa opi elemtamellepo, yia:tapo ma ilame pumulumama yia: wola: mate yia: yimlala mate epo yia: a mate elempumulluweye. Epele dulu dla yia: pumulumama yia: alisisi medla pomeleme pumullupo. Adipalati, yia:ta hema pumullati na:tapo yia: watle ta:la ka:dle mate epo alisisi ka:ka:dle mate halopiliwepo,” diyo.

<sup>21</sup> Epapeleye Yoseptapo Pelota atlamale yu dolumama ya: bapadulo watle aliya koa mate epo yia:ta duka dla tamama daya dlowe mate halopiyo. <sup>22</sup> Epame ya: bapadulo dla tluka amko didiyelowe halopiyo. Amasiyama Benyamin tlo tluka didiyelowe do supulastale mate epo 300 elo mani mate halopiyo. <sup>23</sup> Epame ya: a watle namkale dle hamimama donki aliya 10 dla Isip mo dla alisisi ka:ka:dle hutieleye kolupame hamiyo. Epame donki aliya molala 10 dla daya kolupo hamiyo, ya: atapo Isip mo dla pumama daya dempulupo depame. <sup>24</sup> Epapeleye ya: bapadulota ma-tlati yia: watle epo atlaiyo, “Wua: duka dla tamalemama woloma tamalaiye, ase sikemte momalamtamalemiyo,” diyo.

<sup>25</sup> Epapedeme yia: Isip mo saliyome tame yia: ata hala Keinan mo dla tame woyamaiyo. <sup>26</sup> Epame ya: watle epo atlaiyo, “A, Yosepye ala me-halema! Ya:ye popolalo wekena! Ya:ye Isip mo dla dokopala oplami halapo,” diyo. Amasiyama yia: a Yokobtapo yu i dalepame sikemte yielemama pomikadepe dlalo wekiyo. <sup>27</sup> Amasiyama ya:tapo Yosepta atlamale koko hapuloma dalepame ma ya:ta aliya koa halopili dla natimama edla mikadepe diyo. <sup>28</sup> Epame epo atlaiyo, “Na: watapo wua:ta atlama koko dla mikadepe dema. Adipalati, na: maseyemala Yosepye ala me-halemapo. Epedeme na: Isip mo dla tame ya: natipame edla polowepo,” diyo.

## 46

### *Yokobta Isip mo dla tale*

<sup>1</sup> Epapeleye alila haletapo Yokobta ya: wola: mate epame yia: yimlala mate Isip mo dla ma-tamalaiyo. Yia: tamalemama Belseba mo dla woyapame Yokobta ya: a Aisek ya: God hi di dla ta:demama aliya halo poyupame God watle hapiyo.

<sup>2</sup> Epalati utula:la oloma edla Godtapo milamalo tulume ya: watle epo atlaiyo, “Yokob, Yokob!” Epalati Yokobta asiyama epo atlaiyo, “Lod, na: ipo,” diyo.

<sup>3</sup> Epalati Godtapo ya: watle epo atlaiyo, “Na:ye wa: a Aisek ya: Godpo. Epedeme wa: Isip mo dla tloweye powota:lowa. Adipalati, edla na:tapo wa: mamadulo pasatepo mellowepo. <sup>4</sup> Epedeme wa:ta Isip mo dla tame hallepiye, na:tapo wa:ye woloma omhallowepo. Epame alotle na:tapo wa: mamaduloye Isip mo tle Keinan mo hema eleme puluwepo. Epame wa:ta polowedeme ellati Yoseptapo wa: gadlalo hallepe,” diyo.

<sup>5-7</sup> Epame yia: utulalati ma-tamalemama Yokob ya: akimlalatapo yia: a mate epo yia: wola: mate epame yia: yimlala mateye Pelota aliya koa hapili di dla ipila:po tamalaiyo. Yia: tamalemama yia: halo mate epo yia: alisisi Keinan dla halomale hapuloma mate me-halopo Isip mo dla tamalaiyo.\*

<sup>8</sup> Epapele dulu dla Yokob ya: akimlala, Isalael so iwolotapo yia: a Yokob mate yimkata Isip mo dla tamalaiyo. Eye iwolopo, itapu hamale maseyemalaye Lubenpo. <sup>9</sup> Epame Lubenta hatitimale akimlalaye iwolopo, Hanok, epo Palu, epo Heslon, epame Kalmi.

\* 46:5-7: Taiya 7:15

<sup>10</sup> Epame Luben ko tle himili maseyemala haleye Simiyonpo. Epalati Simiyonta hatitimale akimlalaye iwolopo, Yemuel, epo Yamin, epo Ohad, epo Yakin, epo Sohal, epo ma haleye Saul, Keinan a:yata himili.

<sup>11</sup> Epame Simiyon ko tle himili maseyemala haleye Libaipo. Epalati Libaita hatitimale akimlalaye iwolopo, Geson, epo Kohat, epame Melali.

<sup>12</sup> Epame Libai ko tle himili maseyemala haleye Yudapo. Epalati Yudata hatitimale akimlalaye iwolopo, El, epo Onan, epo Sala, epo Peles, epame Sela. Amasiyama El mate Onan mateye ala Isip mo dla populalo ha:ha:mama Keinan mo medla paliyo. Epele dulu dla Yuda yami hale Pelesta hatitimale akimlalaye Heslon mate epo Hamul matepo.

<sup>13</sup> Epame Yuda ko tle himili maseyemala haleye Isakalpo. Epalati Isakalta hatitimale akimlalaye iwolopo, Tola, epo Puwa, epo Yasub, epo Simlon.

<sup>14</sup> Epame Isakal ko tle himili maseyemala haleye Sebulunpo. Epalati Sebulunta hatitimale akimlalaye iwolopo, Seled, epo Elon, epo Yahelel.

<sup>15</sup> Epapele dulu dla akimlala iwoloye Yokob ya:llu hale Liyatapo Padan Alam mo dla ha:ha:mama hatitimalepo. Epele dulu dla ya: amseyemala hatlo tlo himiyo, ya: hiye Daina. Epedeme Liya yimlala mate epo ya: awadulo mate hatlo godepo sesa:lati 33 umaiyo.

<sup>16</sup> Epame Yokob ya:llu hale Silpata ka:yapa hamale maseyemalaye Gadpo. Epalati Gadta hatitimale akimlalaye iwolopo, Sepon, epo Hagi, epo Suni, epo Esbon, epo Eli, epo Alodi, epo Aleli.

<sup>17</sup> Epame Gad ko tle himili maseyemala haleye Aselpo. Epalati Aselta hatitimale akimlalaye iwolopo, Imna, epo Isba, epo Isbi, epo Beliya. Epame yia:otumala hatloye Selapo. Amasiyama Beliya ya: akimlalaye Hebel mate epo Malkiel matepo.

<sup>18</sup> Epapele dulu dla akimlala iwoloye Yokob ya:llu hale Silpata hatitimalepo. Epedeme ya: akimlala iwolo mate epo ya: awadulo mate hatlo godepo sesa:lati 16 umaiyo. Amasiyama Silpa iye Labanta yoti Liya watle hamame ili oko a:yapo.

<sup>19</sup> Epame ma Yokob ya:llu hale Leisolta hatitimale akimlalaye Yosep mate epo Benyamin matepo.

<sup>20</sup> Epapeleye Yoseptapo Heliyopolis mo dla alinepi poyupo god dla hamilalo oplami Potipela yoti Asenat haiyo. Epame akimlala dapiyamte hatitimaiyo, yia: hiye Manase mate epo Eplaim matepo. ✧

<sup>21</sup> Epame Benyaminta hatitimale akimlalaye iwolopo, Bela, epo Bekel, epo Asbel, epo Gela, epo Naman, epo Ehi, epo Los, epo Mupim, epo Hupim, epo Alad.

<sup>22</sup> Epapedeme Leisolta hatitimale akimlala mate epo ya: awadulo mate hatlo godepo sesa:lati 14 umaiyo.

<sup>23</sup> Epame Yokob ya:llu hale Bilhata ka:yapa hamale maseyemalaye Danpo. Epalati Dan yamiye Husimpo

<sup>24</sup> Epame Dan ko tle himili maseyemala haleye Naptalipo. Epalati Naptalita hatitimale akimlalaye iwolopo, Yasiyel, epo Guni, epo Yesel, epo Silem.

<sup>25</sup> Epapele dulu dla akimlala iwoloye Yokob ya:llu hale Bilhata hatitimalepo. Epedeme ya: akimlala mate epo ya: awadulo mate hatlo godepo sesa:lati 7 umaiyo. Amasiyama Bilha iye Labanta yoti hale Leisol watle hamame ili oko a:yapo.

<sup>26</sup> Epapedeme Yokob ya: yimlala mate epo ya: mamadulo mate hatlo godepame Isip mo dla tlowedeme sesa:lati 66 umaiyo. Amasiyama yia:ta yia:skamu sesa:le oloma dla Yokob ya: momaduloye posesa:lalo wekiyo. <sup>27</sup> Epame alotle Yokob yami hale Yosep mate epo ya: akimlala Isip mo dla hohomale mate ma hatlo godepo sesa:lati 70 umaiyo. ✧

*Yokobta ya: akimlala mate Isip mo dla tame woyamale*

<sup>28</sup> Epapele dulu dla Yokob ala Isip mo dla puluwedeme duka dla pumhalemama yami Yuda watle epo atlaiyo, “Wa: tatile tame Yosep atlane, ya: puame Gosen mo dla dia:ye umulupo,” diyo. <sup>29</sup> Epalati Yodatapo tame Yosep atlati ya:tapo ya: aliya koa tle tame Gosen mo dla ya: a umaiyo. Epame ya:tapo ya: a mila:pi natipame ya: a dla poposila:lepo hamame sikemte ammama kelliwe pa:iyo.

<sup>30</sup> Epalati ya: atapo Yosep watle epo atlaiyo, “Na: maseyemala, wa: ala me-halemapo! Epedeme na: wata oloma hema wa: mila:pi natipame polowe mleni,” diyo.

<sup>31</sup> Epame Yoseptapo ya: a mate epo ya: bapadulo mate dla epo atlaiyo, “Na: tame Pelo watle atlemama wua:ye Keinan mo tle mo-puame ma Gosen mo dla popa:ma dlowama.

<sup>32</sup> Epame ma ya: watle atlemama wua:ye aliya halo omha:ha:lalo so deme wua: aliya mate epo wua: alisisi hapuloma mate me-halopo pumulana dlowepo. <sup>33-34</sup> Epapedeme Pelotapo wua:ye sisilapame wua: watle atlemama, wua: apa oko halomha:ha:mdi? dlati, asiyama ya: watle atlemama, dia:ye di mamadulota mo-powataliya aliya omha:ha:lalo oko hampuwademe, di mape mepo aliya omha:ha:mde, diye. Adipalati, wua:tapo Pelo watle epo atellepiye, asiyama ya:tapo wua: watle atlemama Gosen mo medla ha:ha:iya dlepe. Ame adipalati, Isip soye aliya omha:ha:lalo so mate yimkata poha:ha:semde,” diyo.

## 47

### *Yokobta Gosen mo hapo halale*

<sup>1</sup> Epapeleye Yosepta Pelo hala dla tame ya: watle epo atlaiyo, “Na: a mate epo na: bapadulo mate epo yia: aliya halo mate epame yia: alisisi hapuloma mate Keinan mo tle mo-puame Gosen mo dla popa:ma,” diyo.

<sup>2-3</sup> Epalati Yosepta ya: bapadulo do supulastaleyeye Pelo hala dla elempulati Pelota yia: watle epo atlaiyo, “Wua: apa oko halomdi?” diyo.

Epalati asiyama yia:tapo ya: watle epo atlaiyo, “Dia:ye di mamadulotapo mo-powataliya aliya omha:ha:lalo ha:ha:deme, di mape aliya omha:ha:lalo ha:ha:ma.

<sup>4</sup> Amasiyama di mo Keinan dla daya pa:le kokota elemama di aliyata dlowe osamokolo ma hawa. Epalati natipame di hema ha:ha:la pumula. Epedeme ka:deta:, ditapo Gosen mo dla ha:ha:loweye?” diyo.

<sup>5</sup> Epalati Pelotapo Yosep watle epo atlaiyo, “Watapo wa: a mate epo wa: bapadulo mate mo-pumulalepo. <sup>6</sup> Epedeme ka:dena, yia:tapo Isip mo dulu hema ha:ha:loweye. Epapedeme Gosen mo ka:dleye yia: watle hamine. Epame yia: dulu dla oplami hale aliya omhallowe sikemte malastale hallepiye, ya: ka:dena na: aliya halo mate omhalloweye,” diyo.

<sup>7</sup> Epame Yoseptapo ma tame ya: a Yokobye Pelo hala dla sempulati ya:tapo Pelo dla namkale dle yu atlemama Godta wa: mate hallepe diyo. <sup>8</sup> Epalati Pelota asiyama ya: watle epo atlaiyo, “Wa: sokomoko adisowata:?” diyo.

<sup>9</sup> Epalati Yokobta asiyama ya: watle epo atlaiyo, “Na:ye ta:lamo wotiyalle dulu dla halemama 130 sokomoko pololuwa. Amasiyama na: mamadulota ha:ha:le sokomokota na: sokomokoye tla:mtana,” diyo. <sup>10</sup> Ya: epo atlepo Pelo watle atlemama Godta wa: mate hallepe depame ma-taiyo.

<sup>11</sup> Epapedeme Yoseptapo Pelo yu dolumama ya: a mate epo ya: bapadulo mate dla ta:la ka:pi Lamses mo mateka:pi dla ellaloye yia: watle hamiyo. <sup>12</sup> Epame yia: watle daya pasataleye alemdiyo.

### *Daya pa:le kokotapo mo pato halë*

<sup>13</sup> Epapeleye daya pa:le kokotapo mo pato hamama Isip mo mate epo Keinan mo mate dla dlowe alisisi emaletapo hapuloma paliyo. <sup>14</sup> Epalati opatapo Yosepta Isip mo dla aya dulu dla daya kokolumtaleyeye puame mani mate halomha:ha:iyo. Epapalati Yoseptapo

maniye halopame ma Pelo ya: mani isilako dla kolumhalaiyo. <sup>15</sup> Amasiyama Isip sota yia: maniye daya halomha:ha:mama mo-pokapokadlati Yosep hala dla tame ya: watle epo atlaiyo, “Di daya halomha:ha:mama di maniye mo-pokapokadema. Epedeme wa: di daya isikimi me-hapine. Adipalati, wa:ta pe-epapalalo wekelepiye, di pallipe,” diyo.

<sup>16</sup> Epalati asiyama Yoseptapo yia: watle epo atlaiyo, “Wua: mani ma hawa hallepiye, isikimi asiyama wua: aliya haloye na: watle hohopo iya. Epalati na:tapo asiyama wua: watle daya halopimhallowepo,” diyo. <sup>17</sup> Epapedeme opatapo Yosep watle aliya halo hohopo pumula demha:ha:lali asiyama ya:tapo daya alema demhalaiyo. Yia:ta epammha:ha:mama yia: hos aliya mate epo yia: sipi aliya mate epame yia: gaut aliya mate epo yia: bulumkiyawa aliya mate epo yia: donki aliya mate Yosep watle hapimha:ha:mdiyo. Epammtamama sokomoko hatlo ma-hamastlati opata daya halomha:ha:mama yia: aliya halo hapuloma mo-pokapokadiyo.

<sup>18</sup> Epalati yia: Yosep hala dla tame epo atlaiyo, “Ditapo wa: watle asiyama mate daya halomha:ha:mama di mani mate epame di aliya halo mate mo-pokapokadepo. Epapedeme di ma apa alisisi wa: dla halopimama asiyama daya halopa? Dia: dla di alisisi hapulomaye ma-hawa, isikimi di moto i mate epo di ta:la mate tlo me-hutiyepo. <sup>19</sup> Epapedeme poka:dena, ditapo daya teta:le koko tle palimama di ta:laye isikimi koko pa:le batalipo hamastloweye. Epedeme wa:tapo daya mate epo dlowe alisisi emolowe ale mate di watle hapilati asiyama ditapo di moto mate epo di ta:la mate wa: watle hapilowepo. Epame ditapo Pelo dla asiyama pa:le oko hamha:ha:lali ya:tapo di ta:la omhallepe,” diyo.

<sup>20</sup> Epapele dulu dla daya pa:le kokotapo Isip moye sikemte batalipo hamastlati Isip so hapulomatapo daya yilo yia: ta:la hapulomaye Yosep watle halopimama pokapokadiyo. Epalati Pelotapo yia: ta:la hapulomaye omhalaiyo. <sup>21</sup> Epame Yoseptapo Isip so hapulomaye Pelo dla asiyama pa:le oko halalo so diyo. <sup>22</sup> Amasiyama god dla alinepi poyupo hapilalo so tlo yia: ta:laye daya yilo Yosep watle pohalopilalo wekiyo. Adipalati, Pelotapo yia: oko asiyamaye hapimama daya mate halopimdiyo.

<sup>23</sup> Epame Yoseptapo opa watle epo atlaiyo, “Watapo wua: mate epo wua: ta:la mateye dokopala oplami Pelo tetepo. Epedeme na:tapo wua: watle dlowe alisisi emolowe aleye halopiliwepo. <sup>24</sup> Epalati wua:tapo dlowe alisisiye empame ma-hauwallowe oloma dla pulati hauwalemama opi tlo Pelo watle halopi demha:ha:lepe. Epame muwolo haloma dulu edla opiye tlo demama asiyama opi tlo ale emolowe koluma demha:ha:lepe,” diyo.

<sup>25</sup> Epalati asiyama yia:tapo Yosep watle epo atlaiyo, “Wa:tapo di pasakaloye gaduwapo. Epapedeme ditapo dokopala oplami Pelo dla asiyama pa:le oko hamha:ha:mama ya: yu dla salladepo siyamolowepo,” diyo.

<sup>26</sup> Epalati Yoseptapo aiyalma himiyo, Isip sota dlowe alisisi emale hauwalemama kolumale do supulastale dulu dla kolumale hatlo tlo Pelo watle hami demha:ha:lepo depame. Epapedeme aiyalma himili iye wata oloma hema ala me-elapo. Amasiyama epapele dulu dla alinepi poyupo god dla halopilalo so yia: ta:la tlo Pelo dla pohalopilalo wekiyo.

*Yokobta ya:ta polati ya: moto hamatilowe atlale*

<sup>27</sup> Epedeme Isalael sotapo Gosen mo dla ha:ha:mama yimlala sikemte isukumama opata pasatamtaiyo.

<sup>28-30</sup> Epapeleye Yokobtapo Isip mo dla tame halemama 17 sokomoko pololiyo. Epame ya:tapo ma 147 sokomoko umulati polowetapo ya: dla mo-teteka:mpuaiyo. Epalati ya:tapo ya: maseyemala Yosep sisilapame ya: watle epo atlaiyo, “Wa: ikadepe na:ye sikemte malahalema dlepiye, wa: na: motoye Isip mo hema pohamatilowa. Amasiyama wa: tame Keinan mo dla na: mamadulo hatili wabasi hatlo medla na: motoye hamatine,” diyo.✧

✧ 47:28-30: Yen 49:29-32, 50:6



Epalati Yoseptapo asiyama ya: watle epo atlaiyo, “Yao, na:ta wa:ta atlama koko hapuloma eye halowepo,” diyo.

<sup>31</sup> Epame ma Yokobtapo ya: watle epo atlaiyo, “Wa: watapo na: mila:pi tle God hi tle yu itiyapo himine, wa:ta ikadepe na: motoye Keinan mo dla hamatiloweye,” diyo. Epalati asiyama Yoseptapo God hi mate yu itiyapo himiyo, ya: a motoye Keinan mo dla hamatiloweye. Epalati Yokobtapo ya:ta ellalo dla dokopala himme elemama inoma sumaiyo.

## 48

### *Yokobtapo ya: mamadulo yilo God dla otele himili*

<sup>1</sup> Epapele dulu dla alila haletapo Yosepta ya: ata sikemte esiyem-elale dalepame ya: akimlala dapiyamte Manase mate Eplaim mate elepo Gosen mo dla ya: a natila puaiyo.

<sup>2</sup> Epapeleye ya: a Yokobta Yosepta puale dalepame esiyem-elale mepapele itiyamale hapame sila:time polaiyo. <sup>3-4</sup> Epame yami Yosep watle epo atlaiyo, “Itiyamale Godtapo mo-powataliya na:ye Keinan mo pato dulu dla Lus mo yemala dla pollati na: watle woyapo epo atluwapo, ‘Na:tapo wa: mamaduloye pasatepo mellowepo. Epalati wa: opatapo pasatamama pato dlepe. Epame na:tapo Keinan mo iye wa: mamadulo watle hamilowepo. Ta:la itapo yia: hi mate kokó mepo ellepe,’ duwapo.” ✧

<sup>5</sup> Epame Yokobtapo Yosep watle ma epo atlaiyo, “Na: ala Isip mo hema populalo hallati wa:tapo akimlala dapiyamte Eplaim mate Manase mate hatitimuwapo. Amasiyama na: solotama, na:tapo wa: akimlala dapiyamte ewoloye ma na:ta hohopame na: akimlala ikadepe dlowepo. Yia:tapo na: akimlala itapu hatitimale Luben mate epo Simiyon mate epapele some na: akimlala depo ha:ha:lepe. <sup>6</sup> Epame ma alotle wa:ta akimlala isukumelepiye, akimlala ewolotapo mo-wa: akimlala ikadepe depo ha:ha:lepe. Amasiyama yia:tapo Eplaim mate epo Manase mate yia: elo dla ha:ha:lepe. <sup>7</sup> Epedeme na:tapo wa: akimlala Eplaim mate epo Manase mateye wa: wai Leisol ya: akimlala ikadepe dlowepo. Adipalati, wa: wai Leisoltapo Keinan mo dla dia:ye Padan Alam mo tle ma Epalat\* mo dla pumha:ha:mama duka dla pouwapo. Epalati na:tapo dupa kolle pato mate ya: motoye Epalat dla tlalo api mateka:pi dla polomoluwapo.” ✧

<sup>8-10</sup> Amasiyama Yokobye mo-totoyemalata inoma pa:mama yami Yosep ya: akimlala natipo epo atlaiyo, “Akimlala iwoloye anawolota:?” diyo.

Epalati asiyama Yosepta epo atlaiyo, “Na: akimlalapo. Akimlala iwoloye na:ta Isip mo dla hallati Godtapo na: watle halopiwapo,” diyo.

Epapalati Yokobtapo ya: watle epo atlaiyo, “Yia:ye na: watle elempuane. Epalati na:tapo yia:ye hohopo inoma sumama God dla ta:dlowepo,” diyo. Epedeme Yoseptapo ya: akimlala dapiyamteye ya: hala dla elempulati Yokobtapo yia:ye hohopo poposila:lepo huhulamaiyo.

<sup>11</sup> Epame Yokobtapo ma Yosep watle epo atlaiyo, “Na:ta malamaletapo wa:ye ma ponatilalo wekelowe tepo demduwa. Amasiyama wata Godtapo hatlo wa: tlo ponatina, amasiyama wa: akimlala mape na: watle me-nati-ilipo,” diyo.

<sup>12</sup> Epame Yoseptapo ya: akimlala dapiyamteye yia: mama Yokob mulu tle hohopo alikili dla ipila:pame asiyama ya:tapo ya: a hete isili dla heodepo polaiyo. <sup>13</sup> Epame Yoseptapo ya: maseyemala pato Manaseye ya: a do dowala tiyama dla pameliyo. Epalati ya: ei Eplaimye hamame ya: a do weke tiyama dla pameliyo. <sup>14-15</sup> Amasiyama Yokobtapo akimlala dapiyamte iwolo dla inoma sumale mate yia:ye God dla ta:demama ya: dowala dotapo ya: ei Eplaim dokopala dla hamaiyo. Epalati ya: weke dotapo ya: bapa Manase dokopala dla hamaiyo. Epo halemama epo atlaiyo, “Na: mama A:iblaham mate epo na: a Aisek mate yia: God wa:tapo na: pasakaloye woloma omhalemduwapo. <sup>16</sup> Epame wa:

✧ 48:3-4: Yen 28:13-14 \* 48:7: Epalat mo hi haleye Betliyem. ✧ 48:7: Yen 35:16-19

banakaka oplamitapo na:ta wotiyalle dulu dla pollati na:ye gademduwapo. Epedeme wa: akimlala dapiyamte iwoloye gademama yia: mate halane. Epame yia: tle na: a hi mate epo na: hi mate epo na: mama hi mate ma-a:ma selemalipo melemama yia: yimlala mate epo yia: mamadulo mate pasatapo melene,” diyo.

<sup>17-18</sup> Amasiyama Yokobtapo ya: dowala dota Eplaim dokopala dla hama epela asiyama ya: weke dota ya: bapa Manase dokopala dla hama depo halemama inoma sumalati yami Yosepta koko e natipame posiyeyiyo. Epammama ya:tapo ya: a doye alikili a:ma poloko demama epo atlaiyo, “A, wa: dowala doye itapu hamale maseyemala dokopala dla pohamamhalasema. Amasiyama ma ya: ei yemala dokopala dla hamamhalapo. Epedeme wa: dowala doye itapu hamale maseyemala Manase dokopala dla hamolowe ka:pi,” diyo.

<sup>19</sup> Amasiyama ya: ata Yosep watle epo atlaiyo, “Na:ta koko i haye na:malamana. Adipalati, ya: ei yemala Eplaim ya: mamadulotapo sikemte pasatamama ya: bapa Manase ya: mamaduloye tla:mtelepe,” diyo.

<sup>20</sup> Epame Yokobtapo akimlala dapiyamte iwoloye inoma sumale mate ta:demama epo atlaiyo, “Alotle Isalael sotapo yimkadulo watle epo atlameyelepe, ‘Godtapo Eplaim mate epo Manase mate dla gadle pato himhaluwaye, epammama ya:tapo wua: watle mepo gadle pato himhallepe,’ demyelepe,” diyo. Epammama ya:tapo ya: ei yemala hi tatle itapu tle himimama asiyama ya: bapa hi tlo alotle himiyo. ✧

<sup>21</sup> Epame Yokobtapo yami Yosep watle epo atlaiyo, “Na:ye mo-polowe mateka:pi dla halapo. Epedeme Godtapo wa: mate hallepe. Epame ma ya:tapo wua:ye wua: mamadulo watle Keinan mo hamili duwa edla elemtelepe,” diyo.

<sup>22</sup> Epame Yokobtapo ma ya: watle epo atlaiyo, “Keinan mo dulu dla Sekem ta:laye pta ka:pi. Epedeme ta:la eye wa: bapadulo watle pohamilowa. Amasiyama Yosep wa: watle hamilowepo. Ta:la eye na:tapo Amoli so mate natalimama kolahauwapo,” diyo.

## 49

### *Yokobta ya: akimlala itapu kokoye molo atlamale*

<sup>1-2</sup> Yokobtapo ya: akimlala hapulomaye sisilapame yia: watle epo atlaiyo, “Wua:ta hapuloma yimkata na: mateka:pi dla puame alumaiya. Epalati na:tapo wua: watle itapu dla wowoyamolowe kokoye atlamolowepo. Adipalati, na:ye Yokob, wua: a Isalaelpo,” diyo.

<sup>3</sup> Epammama ya:tapo ya: maseyemala itapu hamale watle epo atlaiyo, “Luben wa:ye na: kipiliyemala omalita ka:yapa himili maseyemalapo. Epame wa:tapo na: akimlala hapuloma dulu dla wa:ta itapu halemama wa: eiduloye tla:mtame haluwapo. <sup>4</sup> Amasiyama wa:ye wa:skamu wa: moto hamoloweye powa:malamana. Adipalati, wa:tapo wa: wai hale uhale koko tle na: dla wota:le hampuwapo. Epapedeme wa: eidulo dulu dla wa:tapo podokopala depo hallowa.

<sup>5</sup> Epame Simiyon wa: mate epo wa: ei Libai mateye wua: dulu dla sadle halowe powua:malamana. Adipalati, wua:ye yimkadulo mate sikemte natalimha:ha:mde.

<sup>6</sup> Epedeme wua:tapo batalimale koko halomolowedeme yu hatitimale dulu dla na: mate pohallowa. Adipalati, wua: sikemte siyalasiyaladepame aipa:yata upo opaye mo-potimuwapo. Epame isikimi asupumale koko tle bulumkiyawa aliya heteye mahauwokokomuwapo. <sup>7</sup> Epapedeme na:tapo wua: koko e natimama keteyamale yu atlema. Ka:dle kokota wua: dla populuwa. Epame wua: mamadulotapo Isalael so elele dulu dla meyelope meyelope depo tame ha:ha:myelepe.

<sup>8</sup> Epame Yuda wa:ye wa: bapadulo mate epo wa: eidulo matetapo wa: dla sisiyemama wa: hete sitali isili dla heoheodemha:ha:lepe. Adipalati, wa:ta itiyamaletapo wa: dla opahale dlalo sota itiyamaleye tla:mtame hallepe. <sup>9</sup> Epame wa:ye layon esemala some

✧ 48:20: Hib 11:21

ya: nomsu yumdepame oplami haleta pohustlalo woloma ka:pi elemdiye, epapele some hallepe. ✧ <sup>10</sup> Epedeme Isael so dulu dla Yuda elele halomale sotapo dokopala ha:ha:mtelepe. Epammtamama yia: dulu tle ma ikadepe dokopala oplami halloweta alotle pulupe. Epalati opa hapulomatapo hatlo ya: yu dla heodepo sallademha:ha:lepe. <sup>11</sup> Epame wa: gla:pi dlomoko dalitapo sikemte pasatamama wain yú ma sikemte pasatepo hallepe. <sup>12</sup> Epame wa: inomatapo dikimama wain yú some hallepe. Epalati wa: a:petapo sikemte kamama memeko some hallepe.

<sup>13</sup> Amasiyama Sebulun wa:ye kaula pato peleyama dla halemsela:lepe. Epame wa:ta hallowe mo edla koa patototapo puame hedlowe koa sitali ka:pita halemyelepe. Epame wa: ta:la sukulutapo tame Saidon mo dla gudlepe.

<sup>14</sup> Epame Isakal wa:ye itiyamale donki aliyatapo upiyele alisisi pato asiyame pupo depo hedepo elemdiye, epapele some hallepe. <sup>15</sup> Epame wa:tapo puame hedlowe mo ka:dle natipame ma edla asiyama pa:le oko halowe ma po-alimhallowa.

<sup>16</sup> Amasiyama Dan wa:tapo Isael so dulu dla yia: koko gladlalo hallepe. <sup>17</sup> Epame wa:ye kolape ilama some halemama hos aliya hete dla yiellati yota ta:la dla teyu demhallepe.”

<sup>18</sup> Epapele dulu dla Yokobtapo epo atlaiyo, “Lod GOD, na: wa:ta na: pasakalo gadlowe koko dla omhalapo,” diyo. Epame ma ya: akimlala dla helestame epo atlaiyo,

<sup>19</sup> “Gad wa:ye opatapo puame hustepo dodoloma demha:ha:lepe. Epalati asiyama wa:tapo yia:ye posallati, yia:tapo wa: tle potademha:ha:lepe.

<sup>20</sup> Epame Asel wa: ta:la dla dlowe alisisi ka:ka:dleta matelepe. Epalati wa:tapo dokopala sota dlalo dlowe alisisiye halomhallepe.

<sup>21</sup> Amasiyama Naptali wa:ye diya aliya malalatapo ya: yimlala ka:ka:dle usulupame inoma tetleyamama tlesela:mdiye epapele some sela:lepe.

<sup>22</sup> Epame Yosep wa:ye dlomoko dali dlo seselemallita sikemte milimaletapo yú matala mateka:pi dla halemdiye, epapele some hallepe. <sup>23</sup> Amasiyama wa: dla opahale dlalo sotapo wa:ye sikemte siyaladle mate husta demhallepe. <sup>24</sup> Amasiyama epapele tlope wa:tapo woloma kokalepo halemama to hinale tlo woloma kokata hama demhallepe. Adipalati, Yokob ya: God itiyamaletapo wa: gadlepe. Ame adipalati, Godtapo aliya halo omhallalota ya: aliya woloma omhalemdiye, epapele some wa:ye omhallepe. Ya:ye Isael so yia: molopa kestale depo halapo. <sup>25</sup> Wa: a ya: Godtapo wa:ye gadlepe. Ya:tapo wa: watle tiyo mate epo yú matala mate halopilipe. Epame wa: watle mamadulo pasataleye halopilipe. <sup>26</sup> Epedeme na: maseyemala, na:ta atlamale ka:ka:dle koko itapo wa: dla pasatamama tamali aloweli selemalliye bopudlepe. Adipalati, wa:tapo wa: bapadulo dulu dla itapu hamale some hallepe.

<sup>27</sup> Amasiyama Benyamin wa:ye moko esemala epapele some hallepe. Wa:tapo wa: dla opahale dlalo soye potipame yia: alisisiye halopo puame wa: opa dla hukulupo alema demhallepe.”

<sup>28</sup> Epapedeme yu iye Yokobtapo itapu dla ya: akimlala 12 dla wowoyamolowe kokoye momolo atlamale yu ipo. Epedeme Yokob ya: akimlala 12 iwolotapo Isael so elele 12 sitali ha:ha:po.

### *Yokobta powale koko*

<sup>29-30</sup> Epapele dulu dla Yokobtapo ya: akimlala 12 watle epo atlaiyo, “Na:ye mo-polowe mateka:pi dla polapo. Epedeme na: motoye Makapela teiko hotuwale dulu dla na: mamadulo hatili medla hamatiye. Wabasi iye Keinan mo pato dulu dla Mamele mo yemala dla halapo. Adipalati, na: mama A:iblahamtapo wabasi eye mo-powataliya Hitai elele halë oplami Epolon tle asiyama mate hauwapo. ✧ <sup>31</sup> Epedeme mo edla A:iblaham mate epo ya:llu Sela mate hatiwapo. Epame mo hatlo medla Aisek mate epame ya:llu

✧ 49:9: Nam 24:9; Bob 5:5 ✧ 49:29-30: Yen 23:3-20

Lebeka mate hatiwapo. Epame mo hatlo medla na:tapo na: a:ya Liyaye polomoluwapo. ✧ <sup>32</sup> Ame adipalati, na: mama A:iblahamtapo popoliyelowe ta:la iye Hitai so tle asiyama mate ma-hauwapo.”

<sup>33</sup> Epapele dulu dla Yokobtapo ya: akimlala dla yu hapuloma ma-atlapo gudepame ya: heteye woloma ya:ta ellalo dla ola:po elemama mosukulu dupa ketamtuluiyo. ✧

## 50

<sup>1</sup> Epapeleye Yokobta mo-polati yami Yoseptapo ya: a dla hamame poposila:lepo ammela:iyo. <sup>2</sup> Epame ya: opa watle yu hamimama ya: a motoye hapele hutulala depame woloma dinapiya diyo. <sup>3</sup> Epalati yia:tapo Isip so yia: toto koko dolumama powale moto eye alila 40 dulu dla dinapomama dakopala mate huhutupiliyeiyo. Epapele dulu dla Isip sotapo Yokobta polati alila 70 dulu dla dupa kolle pato himha:ha:iyo.

<sup>4</sup> Epame yia:ta dupa kolletapo ma-tame gudlati Yoseptapo Pelo ya: oko so watle epo atlaiyo, “Wua: yu iye dokopala oplami Pelo watle hamtaiya. <sup>5</sup> Na: atapo mo-polowedeme elemama epo atluwa, ‘Wua: na:ta polati na: motoye Keinan mo dla hamtame na: mamadulo hatili wabasi hatlo medla hamatiye,’ duwa. Epalati na:tapo ya: motoye edla hamtame polomilowedeme God hi tle yu itiyapo himiwa. Epapedeme na: solotama, na: a motoye edla hamtame polomilipame ma ilame puluwama,” diyo. ✧

<sup>6</sup> Epalati Pelotapo yu i dalepame solotamale himmama epo atlaiyo, “Wa:ta God hi tle yu itiyapo himili e dolumama wa: a motoye edla tame polomilipame ma ilame puane,” diyo.

<sup>7-9</sup> Epapalati Yoseptapo ya: a moto polomila tlati opa hapuloma Pelo ya: oko so mate epo Pelo ya: opa aliya koa tle siyamalalo so mate epo Isip mo dokopala so mate epame Yosep ya: asiyadulo hapuloma mate yimkata tamalaiyo. Amasiyama Yosep ya: asiyadulo yimlala yimka:sikili mate epame yia: aliya halo mate tlo Gosen mo medla pomelepo tamalaiyo.

<sup>10</sup> Epapeleye yia: tame Yoden aloma mateka:pi dla Atad so yia: witi daya supulallalo mo dla woyamaiyo. Yia: edla tame woyapame Yosep mate epo opa hapuloma ya: mate tale so mate dupa kolle pato himpo a:lemha:ha:mama alila 7 pololiyo. <sup>11</sup> Amasiyama mo edla ha:ha:lalo sota yia:ta dupa kolle pato natipo epo atlaiyo, “Isip soye dupa kolle pato himha:ha:po,” diyo. Epapele koko tle opatapo mo eye semama Abel Mislaim\* diyo.

<sup>12-13</sup> Epapedeme Yosep mate epo ya: bapadulo mate yia: a Yokobta atlamale yu e dolumama ya: motoye hamtame Keinan mo dulu dla Makapela teiko hotuwale dulu dla polomiliyo. Adipalati, popoliyele hatiliwe ta:la iye A:iblahamta Hitai elele halë oplami Epolon tle asiyama mate haiyo. ✧

### *Yosep ya: bapadulotapo Yosepta yia: dla wotiyalle hamilala depo wowota:le*

<sup>14</sup> Epapedeme Yosepta ya: bapadulo mate yia: a motoye mo-wabasi dulu dla polomilipame ma yimkata Isip so mate ilame Isip mo dla pumulaiyo. <sup>15</sup> Amasiyama yia: a Yokobta mo-powale alotle Yosep ya: bapadulotapo wowota:mama yia:skamu epo atlamyaiyo, “Yoseptapo dita ya: watle batalimale koko halomuwaye ala me-malahalemama di watle di batalimale asiyama hamilala,” demyaiyo. <sup>16</sup> Epammama yia:ta Yosep watle yu hamimama epo atlaiyo, “Di atapo mo-polowedeme elemama di watle yu ipo atluwa, <sup>17</sup> ‘Wua:ta mo-powataliya Yosep watle batalimale koko hauwaye, wua: asiyama ya: watle namkale dle yu atlaiya, ya:tapo wua: batalimaleye wellipo depame,’ duwa. Epapedeme Yosep, di wa: dla otele pato himma, wa:tapo dita mo-powataliya wa: dla batalimale koko hauwaye wellipo depame. Adipalati, dia:ye di a ya:

✧ 49:31: Yen 25:9-10, 35:29 ✧ 49:33: Taiya 7:15 ✧ 50:5: Yen 47:29-31 \* 50:11: Abel Mislaim hi i ya: dulu kokoye Isip sota dupa kolle himili demama apopo. ✧ 50:12-13: Taiya 7:16

God yu dla salladepo siyamalalo sopo,” diyo. Amasiyama Yoseptapo ya: bapadulota yu hamili i dalepame dupa kolomama sikemte amaiyo.

<sup>18</sup> Epame ya: bapadulotapo puame ya: hete sitali dla heodepo popa:mama epo atlaiyo, “Dia:ye wa: yu dla salladepo siyamama asiyama pa:le oko halomha:ha:lowepo,” diyo.

<sup>19</sup> Amasiyama Yoseptapo asiyama yia: watle epo atlaiyo, “Wua: ase sikemte wowota:miya. Na:ta adipo Godta dinapele kokoye ma meyelohe depa:? <sup>20</sup> Adipalati, wua:tapo na: dla batalimale koko halowa depame apuwapo. Epapele tlope Godtapo batalimale koko etle ma ka:dle koko tlo hauwapo. Epame wua:tapo na:ye Isip mo hema hamame iwaye koko pa:le po-apena. Amasiyama opa hapuloma pasakalo gadlepo depo apuwapo. <sup>21</sup> Epedeme wua: ase na: natipo wowota:miya. Na:tapo wua: mate epo wua: yimlala mate woloma omhallowepo,” diyo. Epammama ya:tapo yia: dla polowamale mate yukamama yia: dupa malamaleye woloma hahatotimaiyo.

### *Yosepta powale koko*

<sup>22</sup> Epapele dulu dla Yoseptapo ya: bapadulo mate Isip mo dla halemama sokomoko pasatale pololiyo. <sup>23</sup> Epame ya: ala me-halemama yami Eplaimta hatitimale mate epo ya: mamadulo ewolota hatitimale mape me-tlamaiyo. Epame ma yami hale Manasetta himili maseyemala Makita hatitimale mape me-tlamaiyo.

<sup>24</sup> Epapeleye Yoseptapo mo-polowe mateka:pi dla polomama ya: bapadulo watle epo atlaiyo, “Na:ye mo-polowe mateka:pi dla polapo. Amasiyama Godtapo wua:ye woloma omhallepe. Epame ya:tapo wua:ye Isip mo tle ma Keinan mo dla elemtelepe. Adipalati, ta:la iye ya:tapo di mamadulo A:iblaham mate epo Aisek mate epo Yokob mate dla hamilowepo depo yu itiyapo himiwapo. <sup>25</sup> Epapedeme Godtapo wua:ye Isip mo tle eleme alikili a:ma woyamolowe alilata mo-pulati tamalemama na: elo mate hamtlowe dla God hi tle na: dla yu itiyapo himiya,” diyo. Epalati yia:tapo koko eye ikadepe halowa demama God hi tle yu itiyapo himiyo. ✧

<sup>26</sup> Epapele dulu dla Yoseptapo 110 sokomoko umpo halemama edla powaiyo. Epame ya: motoye Isip so yia: toto koko dolumama woloma ka:pi dinapopame ewalata wabasi tili dulu dla hamatiyo.



## Ekese des Ekese des buka ya: dulu koko

Mosesta 40 sokomoko dulu dla Isalael so eleme dalupa dulu dla sela:mama Ekese des buka i ma ilimuwapo.

Epedeme Ekese des hi i ya: dulu kokoye alikili dla woyamale demama apopo. Oloma edla Isalael sotapo Isip mo dla asiyama pa:le oko hamha:ha:mama wotiyalle dulu dla ha:ha:iyo. Epapedeme buka itapo Godta Isalael opaye adipo Isip mo tle alikili dla eleme woyamuwa dle kokoye atlamapo. Epapeleye Godta Mosesye sisilamuwapo, ya:tapo Isalael soye elepo alikili dla woyamelepo depame.

Epame buka hatlo me-itapo Godta aiyalma 10 hapili koko ma atlamapo.

### *Isalael so opata ta:le*

<sup>1-5</sup> Epedeme Yokob ya: akimlala iwolotapo yia: a mate Isip mo dla tamalaiyo. Luben, epo Simiyon, epo Libai, epo Yuda, epo Isakal, epo Sebulun, epo Benyamin, epo Dan, epo Naptali, epo Gad, epo Asel. Yia:tapo tamalemama me-yia: wola: mate epo yia: yimlala mate elemtamalaiyo. Amasiyama Yosep tlo ya: tatile Isip mo dla ma-tame halaiyo. Yokob ya: akimlala mate epo ya: mamadulo mate Isip mo dla tame hatlo godepo sesa:lati 70 umaiyo. ✨

<sup>6</sup> Yosep mate epo ya: bapadulo mate Isip mo dla ha:ha:po depo mo-totoyimlala momama paliyo. Epame yia: mate teta:le so mape mo-paliyo. <sup>7</sup> Amasiyama Isalael sota yimlala sikemte isukumama Isip mo patoye kustiplate elaiyo. ✨

<sup>8</sup> Epame alotle Yosep koko yeliyele oplamitapo Isip mo dla dokopala oplami halaiyo. ✨ <sup>9</sup> Epapeleye dokopala oplami Pelo etapo ya: opa watle epo atlaiyo, “Wua: natiya, Isalael soye sikemte pasatamama di opaye tla:mtla yakomapo. <sup>10</sup> Epapedeme di api totamolowa, Isalael sota sikemte pasatlala depo himomolloweye. Adipalati, yia:tapo yia: opata ma-ta:lati natipame potlowedeme opahale so opi mate hatlope depame dia: mate opahale dlala,” diyo. ✨

<sup>11</sup> Epammama yia:tapo Isalael sota itiyamaleta pa:lepo depame asiyama pa:le oko patoto dla hatitipame yia: omha:ha:lalo so ma hohomaiyo. Epalati Isalael sotapo mo patoto dapiyamte Pitom mate epo Lamses mate kotipo aya halomtamalaiyo, Pelotapo ya: alisisi hapuloma edla hatitimelepo depame. <sup>12</sup> Amasiyama epapele tlope yia: oko pato me-halomha:ha:mama yia: yimlala ma-a:ma sikemte isukumaiyo. Epapalati Isip sotapo Isalael sota epo sikemte me-a:ma pasatamtlati natipame wowota:iyo. <sup>13-14</sup> Epammama asiyama yia:tapo oko sikemte patoto aya halomolowe oko mate epo osalo hatitimolowe oko mate tlo yia: watle halopimha:ha:mama pasakalo kokalle dla elemtamalaiyo.

<sup>15</sup> Epapele dulu dla Isip mo dokopala oplami Pelotapo Hibulu\* so wola:ta yimlala hohomalati mopapo natilalo so wola: dapiyamte Sipla mate epo Puwa mate dla yu hamimama epo atlaiyo, <sup>16</sup> “Wua: Hibulu so wola:ta owayimlala hohomale dulu dla akimlala hohomalati e tlo potimama asiyama utukaka hohomalati e tlo woloma natidemha:ha:iye,” diyo. <sup>17</sup> Amasiyama dulu edla wola: dapiyamte iwolotapo God tlo wowota:mama dokopala oplami Pelo yu dla posalladlalo Isalael so wola:ta akimlala hohomalati popotimasemdiyo. <sup>18</sup> Epalati Pelotapo mopapo natilalo so wola: dapiyamte ewoloye sisilapame yia: watle epo atlaiyo, “Wua: adipalati Hibulu so wola:ta akimlala hohomalati popotimalalo wekemduwa?” diyo.

✨ **1:1-5:** Yen 46:8-27 ✨ **1:7:** Taiya 7:17 ✨ **1:8:** Taiya 7:18 ✨ **1:10:** Taiya 7:19 \* **1:15:** Hibulu so deye Isalael so demama apopo.

<sup>19</sup> Epalati asiyama yia:tapo epo atlaiyo, “Dokopala oplami, wa: natine, Hibulu so wola:ye owayimlala hohomolowe dla sikemte i-itiyamana, po-Isip so wola: epapena. Epapele koko tle dita ma hapele tuwame yia: gadloweye pta dekelemde,” diyo.

<sup>20-21</sup> Epalati Godta mopapo natilalo so wola: ewolo dla siyemhallati yia: ma yia: yimlala sikemte hohomaiyo. Epalati Isalael sotapo ma a:ma sikemte pasatamtaiyo.

<sup>22</sup> Epedeme Pelotapo matle Isip so hapuloma watle yu ipo hamiyo, “Wua: Hibulu wola:ta owayimlala hohomama akimlala hohomalati Nael aloma dla polole demha:ha:iye. Amasiyama utukaka hohomalati tlo po-potimha:ha:lowa,” diyo. ✧

## 2

### *Moses hamale*

<sup>1</sup> Epammtale oloma edla Libai elele halë oplami haletapo me-ya: asiya dulu dla a:ya hale haiyo. <sup>2</sup> Epame alotle a:ya eta mopapo polopame maseyemala hamaiyo. Epo natitepo owayemalatapo ka:pi hallati natipame ya:ye mama dapahatlope dulu dla hemele hatiyomeleme halaiyo. ✧ <sup>3</sup> Amasiyama mama dapahatlope mo-pololepo hallati alotle ya: waita matle owayemala hemele hatiyomolowe apiye mo-pa:iyo. Epalati ya:tapo duli ka:pi yú di dla hollalo tipa owayemalaye duli dulu dla hamatipame Nael aloma yú dla osamokolo polli dulu dla tuwame pameliyo. <sup>4</sup> Epame owayemala ya: nanata pateka:mu tle halemama apa kokota owayemala dla woyamolowe depo omhalaiyo.

<sup>5</sup> Epo alotle Isip mo dokopala oplami Pelo yotitapo aloma dla yú hutula malaiyo. Epalati ya: oko so wola: ya: mate malale sotapo aloma yú peleyama dla siyamaiyo. Epapeleye Pelo yotitapo toko ipo natitepo dulitapo osamokolo dulu dla yú tama di dla holompolla natipame ya: oko a:ya hale watle duli eye ya: watle hampuane diyo.

<sup>6</sup> Epame duli dulu gowaladepo natilati owayemala maseyemalatapo duli dulu dla elemama amme ella natiyo. Epapalati ya:tapo owayemalata amale dalepame sikemte polowamama epo atlaiyo, “Pona:malamana, owayemala iye Hibulu a:yata himiwayo,” diyo.

<sup>7</sup> Epalati owayemala ya: nana hemele haodepo halaletapo Pelo yoti hala dla matime halemama epo atlaiyo, “Ka:deta:, na:ta Hibulu a:ya haleta wa: owayemala eye nomopi ilipo depame hema sempuluweye?” diyo.

<sup>8</sup> Epalati Pelo yotitapo ka:pi demama Hibulu a:ya haleye salatane diyo. Epalati owayemala ya: nana eta tame owayemala e hamale a:ya ikadepe tlo sempuaiyo.

<sup>9</sup> Epalati Pelo yotitapo ya: watle epo atlaiyo, “Na: owayemala iye wa:ta woloma omhalemama meme imhalane. Epalati na:tapo wa: watle asiyama hamilowepo,” diyo. Epalati ya:tapo owayemala eye hamamtame woloma omhalaiyo. <sup>10</sup> Epedeme maseyemala etapo mo-pato dlati ya: waitapo Pelo yoti hala dla mo-pomolla taiyo. Epalati Pelo yotitapo asiyama maseyemala eye ma ya: maseyemala ikadepe diyo. Epame ya: hiye semama Moses\* diyo. Epame epo atlaiyo, “Na:tapo ya:ye yú di dla holomsela:lati natipo hamame holahauwapo,” diyo. ✧

### *Mosesta Isip mo tle teletale*

<sup>11</sup> Epapele dulu dla Mosesta mo-oplami depo halemama ya: opa Hibulu sota oko pato hamha:ha:leye natila taiyo. Epame ya: edla tame omhallati Isip oplamitapo Hibulu oplamiye sikemte hopolla natiyo. ✧ ✧ <sup>12</sup> Epalati Mosestapo ya:ta hala alikili dla tlama tepo oplami haleta ya: po-omhallalo wekelati asiyama ya:tapo Isip oplamiye yumpame hemele ta:la muwalepo hamatiyo. <sup>13</sup> Epame ma alila haleta tame natilati Hibulu so opa dapiyamtetapo me-ya:mkale mate nalatimha:ha:la natiyo. Epalati Mosestapo oplami

✧ 1:22: Taiya 7:19 ✧ 2:2: Taiya 7:20; Hib 11:23 \* 2:10: Moses hi ya: dulu kokoye hamame holahalowe demama apopo. ✧ 2:10: Taiya 7:21 ✧ 2:11: Hib 11:24 ✧ 2:11: Taiya 7:23-28

ya:mkale sikemte hopolemhala watle epo atlaiyo, “Wa: adipalati mo-wa: amkale Hibulu oplamiye hopolemhalema:?” diyo.

<sup>14</sup> Epalati oplami ya:mkale hopolemhalaletapo Moses watle epo atlaiyo, “Anta wa:ye dokopala hi hamilati dia:ye omhalane duwa? Wa:ye wa:ta Isip oplami yumuwaye, epammama na: ma yumuluwedeme amma:?” diyo. Epalati Mosestapo yu e dalepame ya:ta hemele koko hauwaye ma-natiwayo depo malapame wota:iyo.

<sup>15</sup> Epapeleye Pelotapo koko i dalepame Mosesye hampo yumuluwedeme totamaiyo. Amasiyama Mosestapo Pelota ya: yumili dle koko dalepame ma Midiya mo dla teletaiyo. Ya: edla teletame halemama yú kolomale mateka:pi dla tame polaiyo. ✧ <sup>16</sup> Epele dulu dla mo edla alinepi poyupo God dla hapilalo oplami halaiyo, ya: hiye Yetlo. Ya:ye ya: utukaka wolupalatalo 7 elemhalaiyo. Epapeleye yia:tapo yia: a sipi aliya halo yú ilimolowedeme yú tilimala pumulaiyo. <sup>17</sup> Amasiyama aliya omha:ha:lalo so opitapo yia: natipo posaliyo. Epalati Mosestapo utukaka ewolo gademama opa ewoloye dodolomsalepame ma utukaka yia: aliya tlo yú ilimaiyo.

<sup>18</sup> Epame yia:ye yia: a Yetlo hala dla tame woyamalati yia: atapo yia: watle epo atlaiyo, “Wua: wata ma-hapele pumuluma. Wua: aliya pasataleye adipo hapele yú ilimo?” diyo.

<sup>19</sup> Epalati asiyama yia:tapo ya: watle epo atlaiyo, “Isip oplami haletapo dia:ye gademama aliya halo omha:ha:lalo so opa opiye alikili dla dodolomsalepame di yú tilipame di aliya halo ma yú ilima,” diyo.

<sup>20</sup> Epapalati yia: atapo yia: watle epo atlaiyo, “Oplami eye da:? Wua: ya:ye isikimi duka dla pomeleme pumiya. Amasiyama wua: ya:ye di aya dla seme matame popa:mama daya iliwe ka:pi,” diyo.

<sup>21</sup> Epalati Mosesta yia: aya dla hetaiyo. Epame aya edla me-hallati oplami Yetlo etapo yoti Sipolaye ya: watle hamiyo. <sup>22</sup> Epapedeme Mosestapo Sipola hapo halemama maseyemala himpame ya: hiye Gesom† demama epo atlaiyo, “Na:ye asepe oplami some ya:mkale ta:la dla tame halema,” diyo.

<sup>23-25</sup> Epapele oloma edla sokomoko opi mo-pololepo alotle Isip mo dokopala oplami Peloye mo-powaiyo. Amasiyama Isalael sotapo wotiyalle upiyele dulu medla asiyama pa:le oko halomha:ha:mama ikiyelemha:ha:iyo. Epalati Godtapo yia:ta wotiyalle upiyele dulu dla gadle yilo a:lemha:ha:leye me-dalepame yia: sikemte malahalaiyo. Epammama ma ya:tapo A:iblaham mate epo Aisek mate epo Yokob mate dla yu itiyapo himili kokoye malamaiyo.✧

### 3

#### *Dalupa asiyale dulu dla dlapata hamdemhalale koko*

<sup>1</sup> Epapedeme alila haletapo Mosesta ya: doko Yetlo aliya halo omhalaiyo. Oplami iye Midiya mo dla aliya poyupo God dla hapilalo halaiyo. Epapeleye Mosestapo ya: doko aliyaye eleme dalupa dulu dla sela:mama Sainai tamali kikiwi isili dla tame woyamaiyo. Tamali iye God ya: aiyalma tamalipo. <sup>2</sup> Epapele dulu dla tamali edla GOD ya: banakakatapo dlapa tele aloweli mate dalupa asiyale dulu tle ya: dla woyamaiyo. Epalati Mosestapo dlapata dalupa asiyale dulu tle ullumama tleka:mhallati natitepo dlapatapo dali upaye ikadepe pohamdlalo halla natiyo. ✧ <sup>3</sup> Epalati ya:skamu epo atlaiyo, “Koko iye pta sikemte ulugiyemana. Epedeme na: ma woloma kulume tuwame natili,” diyo.

<sup>4</sup> Amasiyama Mosesta kulume pula natipame GODtapo dlapa ullumhala dulu tle ya: watle epo sisilamaiyo, “Moses, Moses.” Epalati asiyama ya:ta epo atlaiyo, “Na: ipo,” diyo.

<sup>5</sup> Epalati Godtapo ya: watle epo atlaiyo, “Wa: ase hema sikemte kulume matimiya. Adipalati, wa:ta dolemhala ta:laye aiyalma ta:lapo. Epedeme wa: hete alisisi uptimane,”

✧ **2:15:** Taiya 7:29; Hib 11:27 † **2:22:** Gesom hi ya: dulu kokoye asepe oplami demama apopo. ✧ **2:23-25:** Yen 15:13-14 ✧ **3:2:** Taiya 7:30-34

diyo. <sup>6</sup> Epame Godta ma epo atlaiyo, “Na:ye wa: mamadulo A:iblaham mate epo Aisek mate epame Yokob mate yia: Godpo,” diyo. Epalati Mosestapo God natilowe wota:mama ya: mila:piye bopudiyo.

<sup>7</sup> Epapalati Godtapo Moses watle epo atlaiyo, “Na: na: opa Isalael sotapo Isip mo dla asiyama pa:le oko hamha:ha:mama wotiyalle dulu dla ha:ha:ye me-natima. Epame Isip sotapo yia: dla wotiyalle hapimha:ha:latai a:lemha:ha: kokoye me-dalemhalemama yia:ye sikemte malahalema. <sup>8</sup> Epapedeme na:tapo yia:ye Isip mo tle alikili dla eleme mo hale ka:dle dla tlowedeme malalepo. Mo eye pta pato epame dlowe alisisi mape pta wokasemana. Wata oloma hema Keinan so mate epo Hitai so mate epo Amoli so mate epo Pelisi so mate epo Hibai so mate epo Yebusi so matetapo mo edla ha:ha:po. Amasiyama na:tapo yia: ta:la eye kolahapame ma na: opa Isalael so watle hamilowepo. <sup>9</sup> Yao, ikadepe, na: opatapo gadle yilo na: dla otele himha:ha:mama a:lemha:ha: kokoye me-daluwa. Epame Isip sotapo yia: watle wotiyalle pato hapimha:ha: koko mape me-natima. <sup>10</sup> Epapedeme na:tapo wa:ye Isip so yia: dokopala oplami Pelo hala dla tane dema, wa:tapo na: opa Isalael soye eleme Isip mo tle alikili dla woyamelepo depame.”

<sup>11</sup> Amasiyama Mosestapo God watle epo atlaiyo, “Na: po-ala:na, na:tapo wa: opa Isalael soye eleme alikili dla woyamolowedeme Pelo hala dla tame yu ka:dloweye,” diyo.

<sup>12</sup> Epalati asiyama Godta Moses watle epo atlaiyo, “Na:tapo wa: mate hallowepo. Epedeme na:tapo ikadepe wa:ye tane duwa kokoye wa: dla nati-imama Isalael so opaye alikili dla eleme woyapo puame ma tamali hema na: dla inoma sumama na: hi di dla ta:dlepe,” diyo.

<sup>13</sup> Epapele dulu dla Mosestapo God watle epo atlaiyo, “Na:tapo wa: opa Isalael so watle tame atlemama, wua: mamadulo yia: Godta na:ye wua: hala dla tane duwa, dlati ma asiyama yia:ta atlemama ya: hiye anata: dlati, na: apa kokoye yia: watle atlepa:?” diyo. ✧

<sup>14-15</sup> Epapalati Godta Moses watle epo atlaiyo, “Na:ye Na:po\* . Epedeme wa: Isalael so hala dla tame yia:ye atlamane, na:ye yia: mamadulo A:iblaham mate epo Aisek mate epo Yokob mate yia: Godpo. Epame na: hiye Na:ye Na:po. Epapedeme na: hi etapo kokó elepo ellepe. Epapedeme wata oloma itle kotiyapo tamama opa hapulomatapo na: hi eye malastlepe. ✧

<sup>16</sup> Epedeme wa: Isip mo dla tame Isalael so dokopala opaye elepame yia: watle yu iye ipo atlamelepe, na:ye yia: mamadulo A:iblaham mate epo Aisek mate epo Yokob mate yia: Lod Godpo. Na:tapo Isip sota Isalael so dla wotiyalle pato hapimha:ha: kokoye manatiwa. <sup>17</sup> Epapedeme na:tapo yia:ye Isip mo dla upiyele dulu dla ha:ha: tle alikili dla eleme woyapame yia: watle Keinan so mate epo Hitai so mate epo Amoli so mate epo Pelisi so mate epo Hibai so mate epo Yebusi so mate yia: ta:laye hamilowepo. Ta:la eye pta pato, opatapo edla ha:ha:mama dlowe alisisi dloweye pta pasatana.

<sup>18</sup> Epalati Isalael dokopala sotapo wa: yu dalepame mikadepe dlepe. Epame wa:tapo yia: mate yimkata Pelo hala dla tame ipo atlamane, ‘Hibulu so di Godtapo dia: dla woyamuwa. Epapedeme di solotama, alila dapahatlope dulu dla tlalo mo dla tame ha:ha:mama alinepi poyupame di GOD dla hapimha:ha:loweye,’ dlepe. <sup>19</sup> Amasiyama Pelotapo wua:ye po-yipta taiya dlowa. Amasiyama ya:tapo ikadepe God halema dle koko natipame eta wua:ye taiya dlepe. <sup>20</sup> Epapedeme na:tapo na:ta itiyamale pato mate Isip so dulu dla ulugiyemale koko halomama yia: dla wotiyalle hamilowepo. Epalati Pelotapo ulugiyemale koko e natimama alotle wua:ye taiya dlepe.

<sup>21</sup> Epedeme na:tapo Isip so dla wotiyalle hamilowe alotle yia:tapo wowota:mama wua:ta solotamale koko hapulomaye halopimyelepe. Epalati wua:tapo Isip mo e saliyome tamalemama yia: alisisi hapulomaye halopo tamellepe. ✧ <sup>22</sup> Epame Isalael

✧ **3:13:** Eke 6:2-3 \* **3:14-15:** God ya: hi ikadepeye YHWHpo. Epedeme hi i ya: dulu kokoye Na:ye Na:po demama apopo. Yon 8:58 dla Yesuta ya:skamu ya: hi semama Na:ye Na:po duwapo. ✧ **3:14-15:** Bob 1:4, 8 ✧ **3:21:** Eke 12:35-36

so wola:tapo yia: mateka:pi dla ha:ha:lalo Isip so wola: dla tame gold ewala mate epo silba ewala mateta mimita:pele alisisi mate epo kapala alisisi mate dlalepo halopame ma yia: yimlala dla didiyemellepe. Epapele koko tle Isalael sotapo Isip so alisisi ka:ka:dle hapulomaye halopame alikili dla woyamelepe.”

## 4

### *Godtapo Mosesta ulugiyemale koko halomolowe dla itiyamale hamili*

<sup>1</sup> Mosesta asiyama God watle epo atlaiyo, “Ame opatapo na: yu dla dalepame pomikadepe dlalo wekelati na: adipapopa:? Epame ma yia:ta atlemama GODta wa: dla powoyamana dlati na: ma adipo atlepa:?” diyo.

<sup>2</sup> Amasiyama epalati GODtapo Moses watle epo atlaiyo, “Wa: apa alisisiye wa: dota hamhalema:?” diyo. Epalati Mosestapo asiyama epo atlaiyo, “Iye na: dali kupo,” diyo.

<sup>3</sup> Epalati GODtapo epo atlaiyo, “Ta:la dla hamastane,” diyo. Epalati Mosestapo ya: dali kuye ta:la dla hamastlati ilama yieiyo. Epela natipame Mosesta ilama natipo wota:mama alikili dla pesta taiyo.

<sup>4</sup> Amasiyama GODtapo Moses watle epo atlaiyo, “Tila: dla hamame ta:dene,” diyo. Epalati Mosestapo ilamaye tila: dla hamame ta:dlati ilamatapo ma ya: dali ku yieiyo.

<sup>5</sup> Epalati GODtapo epo atlaiyo, “Dali ku i mate Isalael so opa mila:pi tle ipapele koko halepe. Epalati yia:tapo ikadepe na:tapo wa: dla woyamana depame mikadepe dlepe. Ame adipalati, na:ye yia: mamadulo A:iblaham mate epo Aisek mate epo Yokob mate yia: GODpo.”

<sup>6</sup> Epame GODta mamisika: Moses watle epo atlaiyo, “Wa: doye wa: kapumale tluka dulu dla hamatipame holahane,” diyo. Epalati Mosestapo ya: doye ya: kapumale tluka dulu dla hamatipo holahalati ya: do dla heheyapata demama kamkamyaiyo.

<sup>7</sup> Epame ma Godtapo ya: watle epo atlaiyo, “Wa: doye mamisika: tluka dulu dla hamatipame holahane,” diyo. Epalati ya:tapo ya: doye tluka dulu dla ma hamatipo holahalati ya: dotapo ma ka:pi halemama ma meyelo hallalo epo halaiyo. <sup>8-9</sup> Epame GODtapo ma epo atlaiyo, “Isalael sotapo wa: yu dalepame ma wa:ta koko e halomale dla pomikadepe dlalo wekelepiye, wa: ma Nael aloma dla yú tipame ta:la dla olostane. Epalati yútapo pakasiyamalalo omali yielepe,” diyo.

<sup>10</sup> Amasiyama Mosestapo GOD watle epo atlaiyo, “Na: opa mila:pi tle yu woloma ka:pi po-atlasemde. Epame wata na:ta wa: mate yukamhalepo alotle ma adipo ka:pi yukamalalo halepa:? Adipalati, na: ala me-yu olopo yukamhalapo,” diyo.

<sup>11</sup> Amasiyama GODtapo asiyama ya: watle epo atlaiyo, “Anta opa dla yukamolowe hamimdi? Epame anta opa dla yu pa:le mate molo pa:le mate hamimdi? Epame anta opa dla inoma pa:le hamimdi? Epame inoma kokowelalimale so dla anta ma natilowe hamimdi? Koko hapuloma eye GOD na:tapo hapimhalapo. <sup>12</sup> Epapedeme wa: Isip mo dla tane. Edla na:tapo wa: gademama wa:ta yukamolowe yuye hamilowepo,” diyo.

<sup>13</sup> Amasiyama Mosestapo God dla otele himimama epo atlaiyo, “Lod, wa: na:ye tane demiya. Amasiyama wa: oplami hale tlo tane dene,” diyo.

<sup>14</sup> Epalati GODtapo Mosesta atlale yu dalepame ya: mate siyalademama ya: watle epo atlaiyo, “Ame wa: bapa A:lon adipapeta:? Ya:ye opa mila:pi tle pta ka:pi yukamde. Epapedeme ya:ye api duka dla wa:ye umuluwedeme mo-pumhalapo. Ya:tapo wa:ye natipame siyelepe. <sup>15-16</sup> Epapedeme A:lontapo wa:ta atlamolowe yuye opa dla atlamelepe. Wa:tapo na: some halemama A:lon watle koko hapulomaye atlamhallati ma ya:tapo opa hapuloma dla atlamhallepe. Epapedeme na:tapo wua:ta madipatata yuhalowe koko dla gadle pato himilowepo. Epame wua:ta halomolowe kokoye imolowepo. <sup>17</sup> Epapedeme wa: dali ku mate hamtane. Eta wa:tapo e mate ulugiyemale kokoye halomelepe,” diyo.

### *Mosesta ma Isip mo dla ilame tale koko*



<sup>18</sup> Epapeleye koko ita gudlati Moses ma ilame tame ya: doko Yetlo watle epo atlaiyo, “Ka:deta:, na:ta ma Isip mo dla ilame tame na: asiyaduloye ala me-woloma ka:depo ha:ha:ma:depo natiloweye?” diyo.

Epalati Yetlotapo ya: watle epo atlaiyo, “Yao ka:pi, woloma tane,” diyo.

<sup>19</sup> Epapeleye Moses ala Midiya mo dla hallati GODtapo ya: watle epo atlaiyo, “Wa: Isip mo dla ma ilame tane. Adipalati, opa wa:ye yumuluwedeme yu himha:ha:le soye mopalina,” diyo. <sup>20</sup> Epapalati Mosestapo ya:llu mate epo ya: akimlala mate donki aliya di dla ipila:pame Isip mo dla tamalaiyo. Yia: tamalemama Godta hamtane dle dali ku mate hamtamalaiyo.

<sup>21</sup> Epame GODtapo Moses watle epo atlaiyo, “Wa: Isip mo dla tame dokopala oplami Pelo mila:pi tle na:ta wa: watle ulugiyemale koko halomolowe nati-iwaye e halomane. Amasiyama epapele dulu dla na:tapo ya: dupaye kokalepo mellowepo. Epalati ya:ta na: opaye yipta alikili a:ma powoyamaiya dlowa. <sup>22</sup> Epalati wa:ta ma Pelo watle ipo atellepe, Isalael soye na: itapu himili maseyemala epapele some halapo. <sup>23</sup> Epapedeme Pelotapo na: maseyemalaye hapele alikili a:ma woyamane dlepo. Epalati na: maseyemalatapo tame na: hi di dla ta:dlepo. Amasiyama Pelota ya:ye alikili a:ma powoyamane dlalo wekelepiye, asiyama na:tapo ya: maseyemala itapu hamaleye yumuluwama,” diyo. ✧

<sup>24</sup> Epapeleye Mosestapo Isip mo dla tamama ya:llu mate epo ya: yimlala mate duka dla hutiyeyiyo. Yia: duka edla hutiyelati GODtapo Mosesye yumula yakomaiyo. <sup>25-26</sup> Amasiyama ya:llu Sipolatapo ya: maseyemala kapala kestapame kapala eye hame Moses hete dla gudemama epo atlaiyo, “Na: maseyemala kapala kestale omali itapo wa: pasakaloye gadlepe,” diyo. Epapele dulu dla GODtapo Mosesye poyumina.

<sup>27</sup> Epapele oloma edla GODtapo A:lon watle epo atlaiyo, “Wa: tame dalupa dulu dla Mosesye umane,” diyo. Epalati A:lontapo yu e dalepame tame Mosesye God ya: aiyalma tamali kikiwi isili dla halla natipame ya:ye poposila:lepo huliyo. <sup>28</sup> Epame Mosestapo GODta ya:ta Isip mo dla tame atlamelepo depo yu halopili hapuloma mate epo ya:ta ulugiyemale koko halomelepo depo atlamale koko hapuloma mateye ma A:lon watle atlamaiyo.

<sup>29</sup> Epame Moses mate epo A:lon mate Isip mo dla tame Isalael so dokopala so hapuloma elepame yimkata puame alumaiyo. <sup>30</sup> Epapele oloma edla A:lontapo GODta Moses watle atlamale koko hapulomaye ma yia: watle atlamaiyo. Epame Mosestapo opa hapuloma mila:pi tle ulugiyemale koko halomalati opatapo koko e natipame mikadepe diyo. <sup>31</sup> Epedeme GODtapo ya:ta wotiyalle dulu dla ha:ha:leye natipo gadlepe depame, yia:tapo GOD dla heodepo sisiyemama ya: hi di dla ta:diyo.

## 5

### *Moses mate A:lon mate Isip mo dokopala oplami Pelo hala dla tale*

<sup>1</sup> Moses mate epo A:lon mate Isalael so dla yu atlamha:ha:po gudepame ma Pelo hala dla tame epo atlaiyo, “Isalael so dia: Lod GODtapo wa: watle epo atluwa, wa:tapo ya: opaye hapele alikili a:ma woyamaiya dloweyo, yia:tapo dalupa dulu dla tame ya: hi di dla ta:demama daya delepo depame duwa.”

<sup>2</sup> Amasiyama Pelota yia: watle epo atlaiyo, “GOD iye anata:? Na: adipammama ya: yu dla dalepo salladepame Isalael soye alikili a:ma woyamaiya depa:? Na: GOD i ya: kokoye pona:malamana. Epapedeme na: Isalael soye alikili a:ma powoyamaiya dlowa,” diyo.

<sup>3</sup> Epalati Moses mate epo A:lon mateta epo atlaiyo, “Hibulu so dia: Godtapo dia: watle woyamuwa. Epapedeme di solotama, alila dapahatlope dulu dla tlalo mo dla tame ha:ha:mama alinepi poyupame di GOD dla hapimha:ha:loweye. Amasiyama wa:ta dia:ye alikili a:ma powoyamaiya dlalo wekelepiye, Godtapo esiyele pato mate epo opahale koko mateta dia:ye poyuluwe sepena,” diyo.

✧ 4:23: Eke 12:29

4-5 Amasiyama Pelotapo asiyama yia: watle epo atlaiyo, “Wua: adipalati oko hamha:ha: so opaye eleme alikili dla woyamala yakoma? Hibulu so opa pasataletapo na: okoye hamha:ha:po. Epedeme wua:tapo yia:ye pe-eleme tlowa. Epapedeme wua: ma ilame oko halomala tamalaiya,” diyo.

6 Alila oloma edla Pelotapo Isalael so yia: omha:ha:lalo so dla epo atlaiyo, 7 “Wua: Hibulu so opata blik ewala\* mimita:pelepo depame matle osamokolo totolle pohapimha:ha:lowa. Amasiyama yia: miyelo tame osamokolo totolle totapame halopo pua demha:ha:lepe. 8 Amasiyama epapele dulu dla yia:tapo blik ewala mimita:pmama alila hatlo dulu dla adisowa mimita:mduwa, ma mesowa mimita:mha:ha:lepe. Adipalati, yia:ye sasalalimama ma na: watle atlemama, di dalupa dulu dla tame di God hi di dla ta:demama alinepi poyupo ya: watle hapilowama, demha:ha:po. 9 Epapedeme opa iwoloye oko sikemte pato halomha:ha: diya, yia:tapo Mosesta bobokolomale yu atlamsela: koko dla podallalo wekelepo depame,” diyo.

10 Epalati Isalael so omha:ha:lalo sota tame Isalael so watle epo atlaiyo, “Pelotapo yu ipo atla, ya: matle wua:ta blik ewala mimita:plowe dla osamokolo totolleye pohalopiliwa de. 11 Amasiyama muwolo tame osamokolo totolleye totapame halopo puame sokope tokeyamale mate dudukumha:ha:lepe, blik ewala mimita:ploweye. Epammha:ha:mama wua:ta ka:yapa alila hatlo dla adisowa mimita:mduwa ma mepapele mimita:mha:ha:lepe,” diyo.

12 Epalati opatapo Isip mo pato dulu dla osamokolo totolleye totamtamalaiyo. 13 Epapele dulu dla yia: omha:ha:lalo sotapo opata oko sikemte halepo depame itiyamale mate ha:ha:limyemama epo atlamha:ha:iyo, “Wua: alila hapuloma dulu dla blik ewalaye mimita:mtame sale sukulu mate dla gude demha:ha:lepe,” diyo. 14 Amasiyama Isalael sota blik ewala mimita:pmama sale sukulu dla tame pogudiyo. Epalati yia: omha:ha:lalo sotapo yia:ye hohopolemama epo atlaiyo, “Wua: ka:yapa blik ewalaye sikemte pasatale mimita:mduwapo. Ame wua: ma adipalati tatla mate epo wata mate pasto mimita:i?” diyo.

15 Epapalati asiyama Isalael so yia: dokopala sotapo ma Pelo hala dla tame epo atlaiyo, “Wa: adipalati dia: dla wotiyalle ipapele hapimhalema:?” diyo. 16 “Epedeme wa: natine, oplami haletapo di watle osamokolo totolleye pohapimhalasema. Ame wa: opata ma adipalati di watle atlemama ka:yapa blik ewala mimita:mduwa ma mesowaye mimita:piya demha:ha:ma:? Wa: opatapo dia:ye hohopollepo, amasiyama koko iye podi batalimale, mo-wa: opa yia: batalimalepo,” diyo.

17 Amasiyama Pelotapo yia: watle epo atlaiyo, “Muwolo sasalalimama oko halomala allimama apopo. Epammama wua:tapo alila hapuloma na: watle epo atlamdepo, ‘Di dalupa dulu dla tame GOD hi di dla ta:demama alinepi poyupo hapilowama,’ demdepo. 18 Epapedeme wua: ma oko hala taiya. Di wua: watle osamokolo totolle pohapilowa. Amasiyama wua: ka:yapa blik ewala mimita:mduwa mesowaye matle mimita:mha:ha:lepe,” diyo.

19 Epapele dulu dla yia:tapo Pelota yu ipo atlamala dalepame epo momalamaiyo, “Dia:ye wotiyalle dulu dla mo-tutula:lepo,” diyo. 20 Epame yia:ta Pelo mate yu hamha:ha:po ilame tamalale oloma edla Moses mate epo A:lon mateta yia: natilowedeme yia: omha:ha:iyo. 21 Epalati yia:tapo Moses mate epo A:lon mate dla epo atlaiyo, “GODtapo wua: batalimale asiyama hamilipe. Adipalati, wua:ta koko halë tle Pelo mate epo ya: oko so mateta dia: dla wotiyalle hamimama dia: potimala yakomapo,” diyo.

*Godtapo ya: opaye Isip mo tle eleme alikili dla woyamolowe yu atlale*

\* 5:7: Isip sotapo blik ewala mate yia: aya halomdiyo. Yia:tapo sokope tokeyamale mate epo osamokolo totolle mate woloma dukupame sali dla hatitimduwapo, blik ewala yielepo depame.

<sup>22</sup> Epalati Mosestapo yia: saliyomtame halemama inoma sumale yu epo atlaiyo, “Lod, wa: adipalati wotiyalle patoye wa: opa dla hampuma:? Wa: adipalati na:ye hema puane duwa? <sup>23</sup> Na:tapo Pelo hala dla tame wa:ta na: watle atlamelepo depo yu hamiwa hapulomaye ma atlamuwapo. Epapele tlope oloma etle kotiyapo puwa oloma edla Pelotapo wa: opa dla ala wotiyalle me-halopimhalapo. Epapele dulu dla wa: yia:ye woloma pogademhalasema,” diyo.

## 6

<sup>1</sup> Epalati GODtapo asiyama Moses watle epo atlaiyo, “Epedeme wa: watapo na:ta Pelo dla koko halowedeme apiye natilipe. Epapele dulu dla ya:tapo na:ta itiyamale natipame na: opaye Isip mo tle alikili a:ma woyamaiya demama yia:ye posallepe,” diyo.

<sup>2</sup> Epame Godtapo ma Moses watle epo atlaiyo, “Na:ye GODpo. ✧ <sup>3</sup> Epedeme na:tapo A:iblaham mate epo Aisek mate epo Yokob mate dla woyamalati yia:tapo na:ye itiyamale God demduwapo. Amasiyama yia: na: hi ikadepeye poyia:malamana. Adipalati, na:tapo na: hi ikadepe Na:ye Na:poye yia: watle pobotomastana. <sup>4</sup> Epame na:tapo Keinan ta:la yia: watle hamilowe yuye me-itiyapo himiwapo. Epedeme oloma edla yia: Keinan mo eye ala pahalalo isikimi asepe so some ha:ha:uwapo. <sup>5</sup> Amasiyama na: yia: watle yu itiyapo himiwaye powelina. Epame wata oloma hema Isalael sota a:lle kokoye na: me-dalemde. Adipalati, Isip sotapo yia: watle wotiyalle pato halopimha:ha:po. <sup>6</sup> Epedeme wa: tame Isalael soye atlamane, na:ye GODpo. Na:tapo na:ta itiyamale pato nati-imama yia:ye Isip sota yia: watle wotiyalle hapimha:ha: dulu etle eleme alikili dla woyamolowepo. Epame asiyama Isip so dla wotiyalle pato hamilowepo. <sup>7</sup> Epapedeme Isalael soye na:tapo na: opa ikadepe dlepe, epame na:tapo yia: God depo hallowepo. Epalati asiyama yia:tapo na:ye yia: GOD demama Isip sota yia: dla wotiyalle hamili tle alikili dla eleme tlalo God dlepe. <sup>8</sup> Epame na:tapo yia:ye na:ta A:iblaham mate epo Aisek mate epo Yokob mate dla yu itiyapo himiwa mo edla eleme tlowepo. Epame mo eye yiole ikadepe depame yia: watle hamilowepo. Na:ye GODpo.”

<sup>9</sup> Epalati Mosestapo Godta ya: watle atlamale koko hapulomaye ma Isalael so watle atlamaiyo. Amasiyama yia:tapo wotiyalle pato dulu dla ha:ha: natipame ma Moses yu dla mikadepe dloweye alliyo.

<sup>10</sup> Epedeme GODtapo Moses watle epo atlaiyo, <sup>11</sup> “Na: opa Isalael soye Isip mo tle alikili a:ma woyamelepo depame wa:ta tame Isip mo dokopala oplami Peloye atlane,” diyo.

<sup>12</sup> Amasiyama Mosestapo GOD watle epo atlaiyo, “Isalael sotapo na: yu dalepame pomikadepe desema. Epapedeme adipammama ma Pelota na: yu dalepame mikadepe depa:? Adipalati, na: opa mila:pi tle woloma poyukamasemde,” diyo.

<sup>13</sup> Amasiyama GODta Moses mate epo A:lon mate dla epo atlaiyo, “Wua: tame Pelo hala dla itiyamale hapame Isalael so opaye eleme Isip mo tle alikili dla woyamaiye,” diyo.

### *Moses mate epo A:lon mate yia: mamadulo hi*

<sup>14</sup> Isalael yami Luben ya: akimlala iwolotapo yia: elele dulu dla dokopala ha:ha:iyo, yia: hiye Hanok, epo Palu, epo Heslon epo Kalmi.

<sup>15</sup> Epame Simiyon ya: akimlala iwolotapo dokopala ha:ha:iyo, yia: hiye Yemuel, epo Yamin, epo Ohad, epo Yakin epo Sohal, epo Saul. Amasiyama Saul ya: waiye Keinan a:yayo.

<sup>16</sup> Epame Moses ya: mama Libai ya: akimlalaye iwolopo, Geson, epo Kohat, epo Melali. Epedeme Libaitapo 137 sokomoko halepame edla powaiyo. ✧

<sup>17</sup> Epame Libai yami Geson ya: akimlalaye, Libini mate epo Simei matepo.

<sup>18</sup> Epame Libai yami Kohat ya: akimlalaye iwolopo, Amlam, epo Isal, epo Heblon, epo Usiyel. Epedeme Kohattapo 133 sokomoko halepame edla powaiyo.

<sup>19</sup> Epame Libai yami Melali ya: akimlalaye Mahali mate epo Musi matepo.

Epapedeme opa iwolotapo Libai elele dulu dla dokopala so ha:ha:iyo.

<sup>20</sup> Epapele dulu dla Kohat yami Amlamtapo me-ya: a yotimala Yokebed haiyo. Epame a:ya itapo akimlala dapiyamte hohomaiyo, yia: hiye A:lon mate epo Moses matepo. Epedeme Amlamtapo 137 sokomoko halepame edla powaiyo.

<sup>21</sup> Epame Kohat yami Isal ya: akimlalaye iwolopo, Kola, epo Nepeg, epo Sikili.

<sup>22</sup> Epame ma Kohat yami Usiyel ya: akimlalaye iwolopo, Misael, epo Elsapan, epo Sitli.

<sup>23</sup> Epapeleye A:lontapo Aminadab yoti Eliseba haiyo. Eliseba ya: bapaye Nasonpo. Epeleye Elisebatapo hatitimale akimlalaye iwolopo, Nadab, epo Abihu, epo Eleyasa, epame Itamal.

<sup>24</sup> Epame Isal yami Kola ya: akimlalaye iwolopo, Asil, epo Elkana, epo Abiyasap. Epapele dulu dla opa iwolotapo Kola ya: asiya dulu dla dokopala ha:ha:iyo.

<sup>25</sup> Epame A:lon yami Eleyasatapo Putiyel yoti hale haiyo. Epeleye a:ya etapo maseyemala hatlo himiliye Pineyaspo.

Epedeme opa iwolotapo Libai elele dulu dla asiya meyelo pe meyelo pe dle dokopala ha:ha:iyo.

<sup>26</sup> Epapedeme A:lon mate epo Moses mate ewolo dla GODtapo atlemama, “Isalael so elele hapulomaye Isip mo tle eleme alikili a:ma woyamaiya,” demduwapo. <sup>27</sup> Epame iwolotapo Isip mo dokopala oplami Pelo dla atlamama, “Isalael soye alikili a:ma woyamaiya dene,” demduwapo.

### *Godta Moses mate epo A:lon mate dla yu atlale*

<sup>28</sup> Epedeme Mosestapo Isip mo dla hallati GODtapo ya: watle yukamama epo atluwapo, <sup>29</sup> “Na:ye GODpo. Epapedeme Isip so dokopala oplami Pelo watle na:ta wa: watle atlamuwa koko hapulomaye ya: watle atlamane,” diyo. <sup>30</sup> Amasiyama Mosestapo GOD watle epo atlaiyo, “Na: yu pase ka:pi yukamasemde. Epedeme Pelotapo na: yu podallowa,” diyo.

## 7

<sup>1</sup> Epalati GODta Moses watle epo atlaiyo, “Na:tapo wa:ye Pelo mila:pi tle na: some hallepo depame pamellowepo. Epalati wa: bapa A:lontapo wa:ta atlamolowe yu hapulomaye Pelo watle atlamhallepe. <sup>2</sup> Epedeme na:tapo wa: watle atlamuwa koko hapulomaye ma A:lon watle atlamane. Epalati ma ya:tapo Pelo watle atlemama Isalael soye alikili a:ma woyamelepo dlepe. <sup>3</sup> Amasiyama na:tapo Pelo ya: dupa malamaleye kokalepo mellowepo. Epame na:tapo ulugiyemale koko patotoye Isip mo dla halomolowepo. ✧ <sup>4-5</sup> Amasiyama epapele dulu dla ya:ta koko eye tlapame ya: dupa malamaleye ala pomeyelo pe dlowa, wua:ta alikili a:ma woyamoloweye. Amasiyama na:tapo na:ta itiyamale pato mate Isip so dla wotiyalle hamimama Isalael so elele hapulomaye eleme alikili a:ma woyamolowepo. Epalati Isip sotapo e natimama na:ye ikadepe GOD mleni dlepe.”

<sup>6</sup> Epalati Moses mate epo A:lon mate GOD yu dla dalepo salladepame Pelo dla tame yu i atlamaiyo. <sup>7</sup> Oloma edla Mosesye 80 sokomoko umpo halaiyo. Epalati A:lon tlo 83 sokomoko umpo halaiyo.

### *A:lon dali kutapo ilama yiele koko*

<sup>8</sup> Epame GODta Moses watle epo atlaiyo, <sup>9</sup> “Pelotapo wua: watle atlemama ulugiyemale koko halomaiya dlati, wa: A:lon atellepe, ya:tapo Pelo mila:pi tle ya: dali kuye hamastlepo depame. Epapelepiye, dali ku etapo ma ilama yielepe,” diyo.

<sup>10</sup> Epapalati Moses mate epo A:lon mate GODta atlamale yu e dolumama Pelo hala dla tamalaiyo. Yia: tame ulugiyemale koko halomama A:lontapo ya: dali kuye Pelo mila:pi

tle epo ya: oko so mila:pi tle hamastlati ilama yieiyo. <sup>11-12</sup> Epela natipame asiyama Pelotapo ya: osolo watalo so opa sisilamaiyo. Epalati yia:tapo puame yia: osolo mate ulugiyemale koko halomama yia: dali kuye polollati ilama yiyeyo. Amasiyama A:lon ya: ilamatapo osolo watalo so yia: ilama hapulomaye gola:gola:diyo. <sup>13</sup> Epalati Pelotapo GODta atlamale yu mate ala:mama ya: dupa sikemte kokalepame Moses mate epo A:lon mate yia: yu dla podaliyo.

### *Yúta ma omali yiele koko*

<sup>14</sup> Epame GODtapo Moses watle epo atlaiyo, “Pelo dupaye sikemte kokalemama na: opaye alikili a:ma woyamane dloweye alipo. <sup>15</sup> Epedeme utulala ikadepe Pelotapo Nael aloma pili dla telepe. Epalati wa: mape wa: dali ku ilama yieuwa e hame ya: hala dla tame ya: watle yu ipo atlane, <sup>16</sup> ‘Hibulu so yia: Lod GODtapo na:ye wa: hala dla tane de, wa:tapo ya: opaye alikili a:ma woyapo taiya dlati yia:tapo dalupa dulu dla tame yia: God dla inoma sumama ya: hi di dla ta:demha:ha:lepo depame. Amasiyama wa: ala yu eye woloma podalesema. <sup>17</sup> Epapedeme wata GODtapo ya:ta ikadepe GOD depo hala kokoye wa: dla nati-imama ma ulugiyemale koko hale halepe. Eye na:tapo na:ta hamhala dali ku i mate Nael aloma dla heyulati yútapo ma omali yielepe. ✧ <sup>18</sup> Epapele dulu dla amaló yú dulu dla ha:ha:lalotapo palimama yúye hutallu pamalati opatapo matle Nael aloma dla yú podlomolowa,’ dlepe,” diyo.

<sup>19</sup> Epame GODtapo ma Moses watle epo atlaiyo, “Wa: A:lon atlane, ya:tapo ya: dali ku mate aloma hapuloma dla epo yú kolomale hapuloma dla epo kaula hapuloma dla dlokomelepo depame. Epapalati yú hapuloma Isip mo dulu dla hutiyetapo ma omali yiyelepe. Epalati oloma edla dopa dla yú tilimale mate epo eto dla yú tilimale mate aya dulu dla popa:mtale hapuloma mape omali yiyelepe,” diyo.

<sup>20</sup> Epalati Moses mate epo A:lon mate GODta atlamale yu dla salladepame Nael aloma yú pili dla Pelo natila tulumalaiyo. Yia: tulumelo Pelo mate epo ya: oko so mate umpame Godta Pelo watle atlaiye dle yu hapulomaye atlamaiyo. Epame yia: mila:pi tle ha:ha:mama A:lontapo ya: dali ku mate Nael aloma dla heyuiyo. Epalati aloma yútapo omali yieiyo. <sup>21</sup> Epame amaló yú dulu dla ha:ha:laloye palimama aloma yúye hutallu pamolowe kotiyamaiyo. Epalati Isip sotapo yú dlowe ka:dle hale hawa halaiyo. Adipalati, Isip mo pato dulu dla yú hapulomaye omalita hapo halaiyo.

<sup>22</sup> Epapele dulu dla Pelo ya: osolo so mape yia: dali ku mate aloma yú dla heyulumalati aloma yútapo omali yieiyo. Epapele koko natipame Pelotapo GODta atlamale yu mate ala:mama ya: dupa sikemte kokalepame Moses mate epo A:lon mate yia: yu pohaiyo. <sup>23</sup> Epame ya:tapo ma ilame ya: aya dla tame polomama Moses mate epo A:lon mateta halomale kokoye pokoko depame mo-weliyo. <sup>24</sup> Epalati Isip sotapo yia:ta yú dlowe hawa hallati ma tame Nael aloma peleyama dla yú dlowe amko kokolalimyaiyo.

### *Gulugulepi koko*

<sup>25</sup> Nael aloma yúta omali yiepo elale dulu dla alila 7 pololepo gudlati GODtapo matle Moses watle epo atlaiyo,

## 8

<sup>1</sup> “Wa: tame Pelo dla yu ipo atlane, ya:tapo na: opaye alikili a:ma woyamaiya dlepo depame. Epalati yia:tapo tame na: dla inoma sumha:ha:mama na: hi di dla ta:demha:ha:lepo. <sup>2</sup> Epapele dulu dla Pelota allipiye, na:tapo Isip mo patoye gulugulepi mate yuluwepo. <sup>3</sup> Epapele oloma edla Nael alomaye gulugulepitapo kustipo tame ellepe. Yia:tapo aloma yú tle wowoyapame Pelo aya dla hetame ya: aya alupoli dulu dla epo ya:ta ellalo dla hehetamyelepe. Epame ya: oko so aya dla ma hehetamyemama mo so aya hapuloma dla mape wokasepo ellepe. Epame yia:tapo aya hapuloma tile mate

✧ 7:17: Bob 16:4



epo daya kolumalalo ita mate dla hehetamyelepe. <sup>4</sup> Epame gulugulepitapo ma Pelo dla epo ya: oko so dla epame ya: mo so dla hehetamyelepe.”

<sup>5</sup> Epame GODtapo matle Moses watle epo atlaiyo, “Wa: A:lon atlane, ya:tapo ya: dali ku mate aloma dla epo yú kolomale dla epo kaula dla dlokomelepo, gulugulepitapo yú dulu tle wowoyapame Isip mo pato pasatlepo depame,” diyo.

<sup>6</sup> Epapalati A:lontapo ya: dali kuye aloma dla epo yú kolomale dla epo kaula dla dloko-maiyo. Epalati gulugulepita wowoyapame Isip mo pato dla hapo elaiyo. <sup>7</sup> Amasiyama osolo watalo so yia: mape yia: osolo mate ulugiyemale koko halomalati gulugulepitapo yú dulu tle wowoyamaiyo.

<sup>8</sup> Epalati Pelotapo Moses mate epo A:lon mate ya: hala dla pumullupo depame sisilamaiyo. Epame yia: watle epo atlaiyo, “Gulugulepi ita na: tle epo na: opa tle alikili a:ma telepo depame GOD dla inoma sumaiya. Wua:ta epapelepiye, eta na:tapo wua: opaye alikili a:ma woyamaiya dlowepo. Epalati yia:tapo dalupa dulu dla tame yia: GOD hi di dla ta:demama alinepi poyupo hapilipe,” diyo.

<sup>9</sup> Epapalati Mosestapo asiyama epo atlaiyo, “Yao, ka:pi. Amasiyama wa:ta na: watle alila hamine, na:tapo wa: mate epo wa: oko so mate epo wa: opa mate yilo God dla inoma sumale himmama gulugulepiye potimelepo depame. Amasiyama Nael aloma dla gulugulepi hala tlo me-pomellepe,” diyo.

<sup>10-11</sup> Epalati Pelota asiyama epo atlaiyo, “Wa: inoma sumane, iyela gulugulepita pa:lepo depame,” diyo.

Epalati asiyama Mosesta epo atlaiyo, “Yao ka:pi, wa:ta atla koko eta me-woyamelepe. Epapele dulu dla wa: gulugulepi ita mosukulu pali kokoye natipame malamelepe, di GODta itiyamaletapo wa: godta itiyamaleye tla:mtame halapo. Amasiyama hatlo Nael aloma dla gulugulepi hala tlo me-ha:ha:lepe,” diyo.

<sup>12</sup> Epame Moses mate epo A:lon mate Pelo medla pomelepame ma ilame tamalaiyo. Epapeleye Mosestapo GODta gulugulepiye potimelepo depame otele himmama inoma sumaiyo.

<sup>13</sup> Epalati GODtapo Mosesta inoma sumale yu dalepame gulugulepi hapuloma mo dulu dla hapo elaleye potimaiyo. <sup>14</sup> Epame gulugulepi hapuloma mo-potimaleye ma yimkata hatlo kolupo pamele kolupo pamele demtamalaiyo. Epalati hutallutapo mo patoye haiyo. <sup>15</sup> Amasiyama Pelotapo gulugulepita mo-palli koko natipame GODta atlamale yu mate ala:mama ya: dupa malamaleye ala sikemte me-kokalepame Moses mate epo A:lon mate yia: yu dla podaliyo.

### *Sase kapala koko*

<sup>16</sup> Epame GODta ma Moses watle epo atlaiyo, “Wa: A:lon atlane, ya: dali ku hapame ta:la apupu dla heyulupo depame. Epalati Isip mo pato dulu dla apuputapo sase kapala yiyelepe,” diyo.

<sup>17-18</sup> Epela dalepame A:lontapo ya: dali ku mate ta:la apupu dla heyuiyo. Epapele oloma dla apuputapo sase kapala yiyepame Isip mo pato dulu dla opa hapuloma dla epo yia: aliya halo dla topulumyaiyo. Epame Pelo ya: osolo watalo so mape solotamaiyo, yia: osolo mate ta:la apupuye ma sase kapala yiyelepo depame. Amasiyama yia: po-ala:iyo. <sup>19</sup> Epalati yia: tame Pelo watle epo atlaiyo, “Podimalamana, Godta itiyamaletapo koko iye hasema,” diyo. Amasiyama Pelotapo GODta atlamale yu mate ala:mama ya: dupa sikemte kokalepame Moses mate epo A:lon mate yia: yu dla podaliyo. ✧

### *Momokama diki koko*

<sup>20</sup> Epame GODtapo matle Moses watle epo atlaiyo, “Wa: utulala ikadepe Pelotapo Nael aloma pili dla tlati tame ya: umpame ipo atellepe, ya:tapo na: opaye alikili a:ma woyamaiya dlepo depame. Epalati yia:tapo tame inoma sumale mate na: hi di dla

ta:demha:ha:lepo. <sup>21</sup> Epapele dulu dla ya:tapo na: opaye alikili a:ma powoyamaiya dlalo wekelepiye, asiyama na:tapo Isip so watle momokama diki hapulomaye tuluiya dlowepo. Epalati momokama dkitapo malame mo pato dulu dla pasatepo elemama Pelo mate epo ya: oko so mate epo ya: mo so mate dla topulumyelepe. Epame yia: aya dulu dla mape sikemte topulumyelepe. <sup>22-23</sup> Amasiyama momokama dikita pulupiye, yia: na: opa Gosen mo dla ha:ha:lalo so dla puame potopulluwa. Amasiyama yia: isikimi puame Isip so dla topulumyelepe. Epapedeme Pelotapo ipapele koko natimama ikadepe GODtapo mo hema halemapo dlepe. Epapedeme iyela na:ta ulugiyemale koko iye halati momokama dikita mallepe,” diyo.

<sup>24</sup> Epapele dulu dla GODta meyelo atlale koko dolumama alila haletapo momokama dkitapo mo-malaiyo. Epapeleye momokama diki patotota ketame pumama Pelo ya: aya mate epo ya: oko so aya mate epo mo so yia: aya mate dla topulumyaiyo. Epammama Isip mo patoye momokama dikita hapo elaiyo.

<sup>25</sup> Epalati Pelotapo Moses mate epo A:lon mate sisilapame yia: watle epo atlaiyo, “Na: wua: dla itiyamale hamima, wua:tapo wua: opa eleme alinepi poyupo God dla halopila tlepo depame. Amasiyama wua: Isip mo saliyome tamiyo, medla me-ha:ha:mama apelepe,” diyo.

<sup>26</sup> Epalati asiyama Mosesta epo atlaiyo, “Hao, di epapele koko pohalowa. Adipalati, ditapo Isip so mila:pi tle alinepi poyupo GOD dla halopimha:ha:lepiye, yia:tapo di natila allimama ewalata di kelemelepe. <sup>27</sup> Epedeme di ka:dena, GODta yu himili e dolumama alila dapahatlope dulu dla tlalo mo dla tame alinepi poyupo ya: dla hapiloweye,” diyo.

<sup>28</sup> Epalati Pelota asiyama epo atlaiyo, “Yao ka:pi, epapele tlope wua: edla tamalemama ika sikemte mo pateka:mu dla potlowa. Amasiyama wua: momokama dkitapo na: tle alikili a:ma telepo depame wata na: yilo inoma sumaiya,” diyo.

<sup>29</sup> Epalati Mosesta epo atlaiyo, “Na:tapo wa: mate yukamhalepo tame GOD dla inoma sumuluwepo. Epalati iyela momokama dkitapo pa:lepe. Amasiyama wa: dia:ye mala-atlepame ma malamale meyelo depa opata alikili a:ma woyapo tame alinepi poyupo GOD dla hapilowe apiye pohimomollowa,” diyo.

<sup>30</sup> Epame Mosestapo Pelo mate yukamhalepo gudepo tame inoma sumaiyo. <sup>31</sup> Epalati GODtapo Moses yu dalepame momokama diki hapulomaye alikili a:ma posaliyo. Epele dulu dla Isip mo pato dla momokama dikita ma-hawa ikadepe halaiyo. <sup>32</sup> Amasiyama Pelota matle ya: dupa kokalemama Isael soye alikili a:ma powoyamaiya dlalo wekiyo.

## 9

### *Aliya halota palli koko*

<sup>1</sup> Alila haleta GODta ma Moses watle epo atlaiyo, “Wa: Pelo hala dla tame ipo atlane, ya:tapo na: opaye alikili a:ma woyamaiya dlepo depame. Epalati yia:tapo tame na: dla inoma sumha:ha:mama na: hi di dla ta:demha:ha:lepo. <sup>2-3</sup> Amasiyama Pelotapo na: opaye alikili a:ma woyamaiya dlowe dla ala me-alimhallepiye, na:tapo ya: aliya halo hapuloma dla esulumale pato hamilowepo. Epalati ya: hos aliya mate epo donki aliya mate epo ka:mol aliya mate epame bulumkiyawa aliya mate epo sipi aliya mate epame gaut aliya mateta esulumale pato halomama pallipe. <sup>4</sup> Amasiyama Isael so yia: aliya tlo popalliwa, me-ka:pi ha:ha:lepe. Isikimi Isip so aliya siyapo tlo alomama pallipe. <sup>5</sup> Epedeme iyela eye alilapo, na:tapo esiyele patota yia: halo dla tulune dloweye,” diyo.

<sup>6</sup> Epapele dulu dla alila haletapo GODtapo esiyele kokota aliya halo dla tulune dlati Isip so yia: aliya halo hapuloma tlo palimama asiyama Isael so yia: aliya halo hapuloma dulu dla haleta po-polalo wekiyo. <sup>7</sup> Amasiyama Pelota Isael so halo hapuloma dulu dla haleta ikadepe popolalo wekele koko dalepame ya: dupaye ala me-kokalemama Isael soye alikili a:ma mo-woyamaiya dloweye aliyo.

### *Sose yulumale koko*

<sup>8</sup> Epame ma alila haletapo GODta Moses mate epo A:lon mate dla epo atlaiyo, “Wua: tilepu halopame Pelo mila:pi dla tame ha:ha:mama Moses wa:tapo tilepuye di dla kustepe. <sup>9</sup> Epalati tileputapo mo pato dulu dla pasalemtamama opa dla epo yia: halo dla soseta yulumtelepe,” diyo.

<sup>10</sup> Epapalati Moses mate epo A:lon mate tilepu halopame Pelo hala dla tame ha:ha:mama Mosestapo tilepuye hapame di dla kustaiyo. Epalati tileputapo Isip mo pato dulu dla pasalemtamama soseta opa hapuloma dla epo yia: aliya halo hapuloma dla yulumaiyo. ✧ <sup>11</sup> Epapele dulu dla osolo watalo sotapo ma Moses hala dla puluweye po-ala:iyo. Adipalati, yia: mape soseta sikemte yulumaiyo. <sup>12</sup> Amasiyama GODtapo Pelo ya: dupa ma-a:ma kokalepo meliyo. Epalati Pelotapo GODta atlamale yu mate ala:mama Moses mate epo A:lon mate yia: yu dla podaliyo.

### *Tiyo ewala sepeleta helle koko*

<sup>13</sup> GODta ma Moses watle epo atlaiyo, “Wa: utulala ikadepe Pelo hala dla tame ipo atlane, ya:tapo na: opaye Isip mo tle alikili a:ma woyamaiya dlepo depame. Epalati yia:tapo tame na: dla inoma sumha:ha:mama na: hi di dla ta:demha:ha:lepo.

<sup>14</sup> Amasiyama ya:tapo na: opaye potaiya dlalo wekelepiye, na:tapo asiyama ya: mate epo ya: oko so mate epo ya: mo so opa mate dla sikemte wotiyalle pato hamilowepo. Epalati ya:tapo na:ta itiyamale pato e natipame ma god opita itiyamale mate ala:lepiye, po-ala:lowa. <sup>15</sup> Epapele dulu dla na:ta itiyamaletapo ya: mate epo Isip so hapuloma mateye mo-potimelemla. <sup>16</sup> Amasiyama na:tapo ya:ye aseka me-hallepo duwapo, na:ta itiyamale nati-imama epo na: hita ta:lamo hema pato dlepo depame. ✧ <sup>17</sup> Amasiyama epapele tlope ya: ala ya:skamu ya: tlo pato demama na: opaye ma alikili a:ma woyamaiya dloweye alipo. <sup>18</sup> Epapedeme iyela utulalati na:tapo tiyo patoto ewala sepeleye omapla di tle tulune dlepe. Epapele dulu dla Isip sota ka:yapa tiyo patoto ewala sepele epapeleye ponatimdena. <sup>19</sup> Epedeme poka:dena Pelo ya: opa mate epo ya: aliya halo mate haliyamale dla ha:ha:loweye, yia:ta hapulomatapo woloma aya dulu dla ha:ha:lepe. Adipalati, na:tapo iyela tiyo patoto ewala sepeleye tulune dlowepo. Epapele dulu dla opa mate epame aliya halo mate ala me-haliyamale dla siyamelepiye, tiyo ewala sepeleta di tle helemama yia:ye potimelepe.”

<sup>20</sup> Epalati Pelo ya: oko so opitapo Moses yu dalepo mikadepe demama yia: opa mate epo yia: aliya halo mate eleme aya dulu dla tumulaiyo. <sup>21</sup> Amasiyama Pelo ya: oko so opa opitapo yu edla dalepo pomikadepe dlalo wekemama yia: opa mate epo yia: aliya halo mate aya dulu dla pe-elemtulalo wekiyo.

<sup>22</sup> Epalati GODta Moses watle epo atlaiyo, “Wa: dali ku hame omapla di dla dlokomane, tiyo patoto ewala sepeleta omapla di tle Isip so opa mate epo yia: aliya mate epo yia:ta emale alisisi mate dla hellepo depame,” diyo.

<sup>23-25</sup> Epalati Mosesta yu e dalepame omapla di dla ya: dali ku mate dlokomalati natipame Godtapo tiyo patoto ewala sepeleye hamimama omapla mate sikemte hane diyo. Epapele koko tle alikili haliyamale dla siyamale opa mate epo aliya halo mate poyuiyo. Epame emale alisisi hapuloma mate epo dali hapuloma mate batalipo hamastaiyo. Epapele dulu dla Isip sotapo ka:yapa tiyo ewala sepele patoto ipapeleye ponatimdiyo. ✧ <sup>26</sup> Amasiyama Isalael sota ha:ha: mo Gosen dla tiyo ewala sepele itapo pehellalo wekiyo.

<sup>27</sup> Epapalati Pelota Moses mate epo A:lon mate sisilapame yia: watle epo atlaiyo, “Na: wata natima, na: batalimale koko ma-hauwapo. Adipalati, wua: GOD tlo ikadepe koko atlamhaluwapo. Amasiyama na: mate epo na: opa mate tlo batalimale api dla tamalana.

<sup>28</sup> Epedeme tiyo ewala sepeleta helemhala iye medla gudlepo depame, wua: GOD dla

inoma sumale himiya. Epalati na:tapo wua:ye alikili a:ma mo-woyamaiya dlowepo,” diyo.

<sup>29</sup> Epapalati asiyama Mosestapo epo atlaiyo, “Na:tapo mo dulu tle alikili dla tame GOD dla inoma sumalati omaplata hamhala mate epo tiyo ewala sepeleta helemhala mateta medla gudlepe. Epalati wa: edla malamelepe, ta:lamo patoye GODta omhalapo. <sup>30</sup> Amasiyama na:malamanana, wa: mate epo wa: oko so mateye ala Lod GOD powowota:mha:ha:sema,” diyo.

<sup>31</sup> Epapedeme tluka mimita:polalo sematipi dali mate epo bali daya mate mo-hauwallowe oloma dla hutiyelati tiyo ewala sepeleta helemama batalipo hamastaiyo.

<sup>32</sup> Amasiyama witi daya tlo ala ta:la dulu dla emtademe pobatalimalalo wekiyo.

<sup>33</sup> Epapalati Mosestapo alikili a:ma woyapo tame inoma sumalati omapla halë mate epo tiyo ewala sepeleta helle mate medla ka:liyo. <sup>34-35</sup> Epapele dulu dla Pelotapo tiyota me-keillati natipame ma ya:ta yu himili hauwokokomaiyo. Epedeme GODta atlale yu dolumama Pelo mate epo ya: oko so mate yia: dupaye sikemte kokalalimama Isalael so opaye alikili a:ma powoyamaiya dlalo wekiyo.

## 10

### *Wolomopi koko*

<sup>1-2</sup> Epame GODta ma Moses watle epo atlaiyo, “Na:tapo Pelo mate epo ya: oko so mate yia: dupaye kokalalipo meluwapo, na:ta itiyamale kokoye yia: dla nati-imhalemama ulugiyemale koko halomhallowedeme. Epapedeme na:ta ikadepe GOD depo halemama ulugiyemale koko patoto Isip so dla halomhala iye ma wua:tapo wua: yimlala dla epo wua: mamadulo dla esemha:ha:lepe. Epapedeme wa: Pelo hala dla ma ilamtane,” diyo.

<sup>3</sup> Epalati Moses mate epo A:lon mate Pelo hala dla ilamtame epo atlaiyo, “Hibulu so dia: Lod GODtapo epo atla, ‘Wa: adipalati ya: yu dla poheodlalo ala me-dalla alimhalema:? Wa: ya: opa dia:ye hapele alikili a:ma woyamaiya dene, ditapo tame ya: dla inoma sumha:ha:mama ya: hi di dla ta:demha:ha:lepo depame. <sup>4</sup> Amasiyama wa:tapo dia:ye alikili a:ma powoyamaiya dlalo wekelepiye, ya:tapo iyela ma wua: watle wotiyalle hale hamimama wolomopiye tulune dlepe. <sup>5</sup> Epalati wolomopita sikemte pasatamama Isip moye hapo ellepe. Epapele dulu dla tiyo ewala sepeleta helemama emale alisisi hauwokokomama opi me-popomelleye ma wolomopi eta mosukulu dlopa:mele pokadlepe. Epame yia:tapo dalupa hapuloma mape dlopa:mele pokadlepe. <sup>6</sup> Epame wolomopi hapulomatapo wa: aya mate epo wa: oko so aya mate epo wa: mo so aya mate dla hehetamyelepe. Epapele dulu dla Isip sotapo ka:yapa wolomopi sikemte pasatale ipapeleye ponatimdena,’ ” diyo. Mosestapo yu iye Pelo dla atlamhalepo gudepame ma taiyo.

<sup>7</sup> Epalati Pelo ya: oko sotapo ya: hala dla puame epo atlaiyo, “Wa: adipalati oplami ita dia: dla wotiyalle me-hamimhallepo depame me-semhalema:? Ya: koko tle di Isip mo patoye mo-batalipo elapo. Epedeme wa: Hibulu so iwoloye ma hapele alikili a:ma woyamaiya dene, yia:tapo tame yia: GOD dla inoma sumama ya: hi di dla ta:demha:ha:lepo depame,” diyo.

<sup>8</sup> Epapalati Pelota yu i dalepame Moses mate epo A:lon mate ma sisilapame yia: watle epo atlaiyo, “Ka:dena, wua:tapo ma tame wua: GOD dla inoma sumama ya: hi di dla ta:demha:ha:loweye. Amasiyama epapele dulu dla wua: na: watle atlaiya, ikadepe anawolota wua: mate tapa:?” diyo.

<sup>9</sup> Epalati Mosesta asiyama epo atlaiyo, “Isalael so hapulomatapo na: mate telepe. Epapedeme opolatalo yimlala mate epame amkoteta:le so mate di aliya halo hapuloma mate eleme na: mate tamellepe. Adipalati, di ma edla tame daya pato demama di GOD hi di dla ta:dlowama,” diyo.

<sup>10</sup> Epalati asiyama Pelota epo atlaiyo, “Hao, wua: pe-epapolowa! Wua: isikimi na: dla mala-atlowedeme aposema. Epedeme na: wua: yimlala mate epo wua: wola: mate eleme alikili a:ma powoyamaiya dlowa. <sup>11</sup> Epele dulu dla wua: GOD dla inoma sumama ya: hi di dla ta:dlowedeme apelepiye, wua: isikimi opa siyapo tlo elemtaiya. Amasiyama wua: wola: mate epo wua: yimlala mate tlo medla pomelepame taiya,” diyo. Pelota epo atlepame Moses mate epo A:lon mateye ya: aya dulu tle alikili a:ma posaliyo.

<sup>12</sup> Epalati GODta Moses watle epo atlaiyo, “Wa: dali ku hapame Isip mo pato dla dlokomane. Epapalati wolomopita puame emale alisisi tiyo ewala sepeleta hele-mama hauwokokomama opi me-pomelleye ma yia:ta dlomama mosukulu pokadlepo depame,” diyo.

<sup>13-14</sup> Epalati Mosestapo ya: dali ku hame Isip mo pato dla dlokomaiyo. Epalati GODtapo mosisi patoye tulune dlati mosisitapo salita matlalo tiyama tle alila mate utula:la mate sikemte hotlomhalaiyo. Epame utulala ikadepe opata hutiyele tle sillipo natitepo wolomopi hapulomatapo Isip moye sikemte hapo ella natiyo. Epapele dulu dla ka:yapa yia:tapo wolomopi sikemte wokasemale ipapeleye ponatimdiyo. Epame matle alotle ipapele ponatilowe sepena. <sup>15</sup> Epedeme wolomopitapo Isip ta:la pato dla sikemte topulumyemama kustipo tame elaiyo. Epame yia:tapo dalupa hapuloma mate epo emale alisisi mate sikemte dlomha:ha:mama mosukulu pokapokadiyo. Epapele koko tle Isip mo patoye sikemte batalipo hamastaiyo.

<sup>16</sup> Epalati Pelotapo Moses mate epo A:lon mate ma hapele sisilapame yia: watle epo atlaiyo, “Na:tapo wua: GOD dla epame wua: dla batalimale koko ma-halepo. <sup>17</sup> Epedeme na: batalimale hiyolepo welipame GOD dla inoma sumale himiya, wolomopi hapuloma ita pa:lepo depame,” diyo.

<sup>18-19</sup> Epapele dulu dla Mosestapo ya: tle tame GOD dla inoma sumale himilati GODtapo sokomoko pato hamiyo. Epalati sokomokota bibikilimama wolomopi hapulomaye ha-hala:po tame Omteka:pele Kaula dla ka:ka:timaiyo. Epapele alotle wolomopi haletapo matle Isip mo dulu dla posela:iyo. <sup>20</sup> Amasiyama GODtapo Pelo dupa malamaleyemamisika: kokalepo mellati ya:tapo Isalael soye alikili a:ma powoyamaiya dlalo wekiyo.

### *Isip mo pato dla motiti tuwale koko*

<sup>21</sup> Epame GODta ma Moses watle epo atlaiyo, “Wa: do omapla di dla ta:depo dlokomane. Epalati motiti patota puame Isip mo patoye bopudlepe,” diyo. <sup>22</sup> Epalati Mosesta ya: doye omapla di dla ta:depo dlokomalati motiti patotapo puame Isip moye haiyo. Epapele dulu edla motiti pato tuwale etapo elemama alila dapahatlope pololiyo. <sup>23</sup> Epalati oloma edla Isip sotapo pohoholelalo isikimi hatlo aya dulu dla ha:ha:iyo. Amasiyama Isalael sota ha:ha: mo tlo motiti potulalo hela:dleta ala me-halaiyo.

<sup>24</sup> Epapalati Pelota Mosesye sisilapame ya: watle epo atlaiyo, “Epedeme wua:ta hapuloma mo-wua: wola: mate epo mo-wua: yimlala mate alikili a:ma woyapo tame wua: GOD dla inoma sumama ya: hi di dla ta:demha:ha:iya. Amasiyama wua: tamalemama wua: aliya halo tlo pe-elemtlowa,” diyo.

<sup>25</sup> Epalati Mosesta asiyama epo atlaiyo, “Hao, di pe-epapolowa. Adipalati, di aliya halo iye poyupame GOD dla namkale dle alisisi hapilowama. <sup>26</sup> Epapele dulu dla di alinepi adipapele tlo ya: dla poyupo hapipa: dle kokoye ala podimalamana. Epedeme di bidulo edla tame ha:ha:mama alinepi woloma tlapame poyupo di GOD dla hapiloweye tlamolowama. Epapedeme di aliya halo hapulomaye me-eleme tlowama,” diyo.

<sup>27</sup> Amasiyama GODta Pelo dupa malamaleyemamisika: kokalepo mellati Isalael soye ma alikili a:ma powoyamaiya dlalo wekiyo. <sup>28</sup> Epammama ya:tapo siyalademama Moses watle epo atlaiyo, “Wa: na: aya itle alikili a:ma tane. Na:ta matle wa: mila:pi natilipiye, wa: yumuluwepo,” diyo.



<sup>29</sup> Epalati Mosesta asiyama epo atlaiyo, “Ka:pi, eye wa:ta solotamale kokopo. Na: matle ilame wa: hala dla populuwa,” diyo.

## 11

### *Itapu hohomale akimlalata palliwe koko atlale*

<sup>1</sup> Epame GODtapo ma Moses watle epo atlaiyo, “Na:tapo mosukulu wotiyalle hatlopeye Pelo mate epo ya: opa Isip so mate dla hamilowepo. Epalati yia:tapo wotiyalle iye natimama asiyama Pelota wua:ye Isip mo tle alikili a:ma taiya demama mosukulu dodolomsallepe. <sup>2</sup> Epedeme wa: Isalael so dla atlamane, yia:tapo gold ewala mate epo silba ewala mateta mimita:pele alisisiye yimkadulo Isip so dla dlalepame halomelepo depame,” diyo. <sup>3</sup> Adipalati, GODtapo Isip so dla dupa malamale ka:dle hamiyo, ma yia:tapo Isalael so mate ka:pi namkale demha:ha:lepo depame. Epammama Pelo ya: oko so mate epo Isip so hapuloma matetapo ma Mosesye pato oplami demdiyo.

<sup>4</sup> Epalati Mosestapo Pelo watle epo atlaiyo, “GODtapo ipo atla, wata utula:la dukuslopi dla ya:tapo Isip mo pato duka tle tlowepo de. <sup>5</sup> Epapele oloma edla itapu hohomale akimlala hapulomata pallipe. Epele dulu dla wa: maseyemala itapu hamale tate polope, epame Isip so yia: akimlala itapu hohomale so hapuloma mape medla palimtelepe. Epame wua: aliya halo dulu dla mape itapu usulli patetalo hapuloma ma pallipe de. <sup>6</sup> Epapele dulu dla sikemte a:lle yu patotapo Isip mo pato dla ellepe. Epapedeme a:lle yu epapeleye ka:yapa podalemdena, epame a:lle yu ipapele mape alotle ma podallowa. <sup>7</sup> Amasiyama Isalael so dulu dla itapu hohomale so akimlala hapulomatapo popalilalo, me-ha:ha:lepe de. Koko hapulomatapo Isalael so dulu dla woloma me-homta ellepe. Epame yia: aliya halo dulu dla haleta popolowa. Wa:ta koko i natimama malamelepe, GODtapo Isalael so gadlalo halaye. <sup>8</sup> Epame ma wa: oko sotapo na: hete sitali dla puame heodepo otele yu mate epo atlamyelepe, ‘Wa: mo itle wa: opa mate epo wa: alisisi mate alikili a:ma mo-woyapo tane,’ demyelepe. Epalati na:tapo na: alisisi hapuloma halopo na: opa eleme alikili a:ma woyamolowepo,” diyo. Mosestapo yu iye atlemhalepo gudepame siyaladle mate Pelo aya tle alikili a:ma woyapo taiyo.

<sup>9</sup> Ka:yapa GODtapo Moses watle epo atlaiyo, “Pelotapo wa: yu dla dalepame poheodemhallowa. Epalati na:tapo ulugiyemale koko patotoye Isip mo dla halomhalowepo,” diyo. <sup>10</sup> Epapele koko tle Moses mate epo A:lon matetapo ulugiyemale koko patotoye Pelo mila:pi tle halomha:ha:iyo. Amasiyama GODtapo Pelo dupa malamaleye ala me-kokalepo meledemhalemdiyo, Isalael sota Isip mo tle alikili dla wowoyamalala depame.

## 12

### *Godta Namilatale daya dele imale*

<sup>1</sup> Epedeme Moses mate epo A:lon mate ala Isip mo dla me-ha:ha:lali GODta yia: watle epo atlaiyo, <sup>2</sup> “Itapu woyampola mama iye wua:ta ka:yapa sokomoko kotiyamolowe mamapo. <sup>3</sup> Epedeme wua: Isalael so watle yu iye atlamaiya. Mama woyampola ita alila 10 umulati yia:ta daya dlowe dla dinapomama aya hatlope hatlope dle dulu dla yia: halo amkota:leye hihimapo elempulupe. <sup>4</sup> Epapele dulu dla aya ya: atapo aliya hulumelepiye, ya: aya dulu dla ha:ha: so opata dlowe mate ala:le hulumelepe. Amasiyama ya: aya dulu dla ha:ha: sota aliya eye miyelo dlowe po-ala:lalo wekelepiye, ya: ka:dena, ya:mkadulo ya: mateka:pi dla ha:ha: so atlepame yimkata delepe. <sup>5</sup> Epame yia:ta aliya potimolowedeme hulumelepiye, woloma sokomoko hatlo hamastale sipi aliya pate epapele o gaut aliya pate epapeleta hekaka pa:talo tlo hulumelepe.

<sup>6</sup> Epedeme aliya halo huhulalimale iwoloye hihimapo ha:ha:mama mama i ya: alila 14 umulati tamila:la medla potimelepe. <sup>7</sup> Epame aliya omali tilipame yia:ta daya

✧ **12:1:** Leb 23:5; Nam 9:1-5, 28:16; Dit 16:1-2

dempopa:lowe aya kokoloma tala alikili dla huhutupiliyemtelepe. <sup>8</sup> Epame utula:la edla aliya mo eye woloma totopame palawa daya yist pa:le mate ha:po demama mala epapele mate delepe. <sup>9</sup> Yia: daya demama mo ala hesulupo ha:leye podlowa, epame tini dla atili mape podlowa. Amasiyama woloma aliya patoye mepo ka:pi totomale tlo delepe. <sup>10</sup> Epapele utula:la edla yia:tapo aliya mo hapulomaye depa:mele pokadlepe. Amasiyama yia:ta mo popokadlalo wekelepiye, mo hapuloma eye dlapa dla mistlepe. <sup>11</sup> Yia: daya dlomolowedeme woloma tluka alisisi mate epo hete alisisi mate didiyepo popa:mama dali ku mape halomelepe. Epame daya e demama ma hapele hahamale mate delepe. Epapedeme daya dele iye semama GODta Namilatale daya dele dlepe.

<sup>12</sup> Epedeme utula:la oloma edla na:tapo Isip mo pato dulu dla tamama akimlala itapu hohomale so hapuloma mate epo alinepi pate itapu usulalimale hapuloma mate potimlowepo. Epedeme na:tapo koko i hamama na:ta itiyamaleta Isip so yia: god hapuloma tla:mtame hala kokoye botomastlowepo. Adipalati, na:ye GODpo. <sup>13</sup> Epapedeme na:tapo itapu hohomale akimlala potimolowedeme mo dulu dla tumama omalita wua: aya kokoloma tala dla huhutupiliyemtale halla natilipiye, aya eye di tle namilatademtlowepo. Epapele dulu dla na:ta Isip so dla wotiyalle hamilowe etapo ma wua: akimlala dla populuwa.

<sup>14</sup> Epedeme Isalael so wua:tapo na:ta wua: di tle namilatamama wua: yimlala popotimalalo wekele kokoye powowelliwa, woloma sikemte malaha:ha:mama sokomoko hapuloma dulu dla alila i umulati na:ta Namilatale daya dele iye hademha:ha:lepe. ✧

<sup>15</sup> Epedeme Namilatale daya dele alila oloma edla wua: aya dulu dla yist hutieyelepiye, alikili dla polollepe. Epame ma alila 7 dulu dla palawa daya yist mate dukumale podemha:ha:lowa. Epapedeme dulu edla oplami antapo palawa dayaye yist mate dukupo delepiye, ya:ye Isalael so tle alikili a:ma mosukulu geda:dlepe. <sup>16</sup> Epame alila 7 dulu edla itapu kotiyamale alila mate dla epame mosukulu alila mate dla wua:ta yimkata puame na: dla inoma sumama na: hi di dla ta:demha:ha:lepe. Amasiyama itapu kotiyamale alila mate epame mosukulu gudlowe alila mate dla wua: oko pohalomha:ha:lowa. Isikimi daya dlowe tlo dinamha:ha:lepe.

<sup>17</sup> Epapedeme sokomoko hapuloma dla alila 7 dulu edla wua:tapo palawa daya yist mate podukumalalo wekele daya dele iye de demha:ha:lepe. Adipalati, wua:tapo alila oloma edla na:ta wua:ye Isip mo tle alikili a:ma eleme woyamuwa kokoye malaha:ha:lepo depame. <sup>18</sup> Epapedeme wua: daya dele iye itapu mama hema alila 14 umulati tamila:la edla kotiyapame me-tame alila 21 tamila:la dla gudlepe. Alila dulu hema ha:ha:mama palawa dayaye yist mate dukupo podlomha:ha:lowa. <sup>19-20</sup> Amasiyama alila 7 dulu edla Isalael so opa aya dulu dla yist hutieyelepiye, alikili dla polollepe. Epame dulu edla oplami antapo palawa dayaye yist mate dukupo delepiye, ya:ye Isalael so tle alikili a:ma mosukulu geda:dlepe. Epapele dulu dla asepe so opi wua: mate ha:ha: mape palawa dayaye yist mate dukupo podlomha:ha:lowa. Epedeme wua: alotle mo hadima tame ha:ha:mtelepiye, wua: koko iye me-hademha:ha:lepe.”

### *Isalael sotapo ka:yapa Godta Namilatale daya dele*

<sup>21</sup> Epapele dulu dla Godta yukamhalale mogudlati ma Mosestapo Isalael so dokopala soye sisilapame yia: watle epo atlaiyo, “Epedeme wua: Namilatale daya dlowedeme aliya halo huhulupame poyuiya. <sup>22</sup> Epame omali tilipame dali tatala hauwalepo omali dla saodepame kokoloma tala alikili dla huhutupiliyemtaiya. Epame utula:la edla oplami haletapo alikili a:ma po-ulatlowa, amasiyama woloma aya dulu dla popa:mtelepe. <sup>23</sup> Epalati GODtapo itapu hohomale akimlala potimolowedeme Isip mo dulu dla sela:lepe. Amasiyama ya: tamama aya kokoloma tala alikili dla omali huhutupiliyele halla natilipiye, di tle namilatademsela:lepe. Epammama ya:tapo

✧ 12:14: Eke 23:15, 34:18; Leb 23:6-8; Nam 28:17-25; Dit 16:3-8

powale hamsela:lalo banakaka oplami watle aya dulu edla akimlalaye popotimane dlowa. ✧

<sup>24</sup> Epapedeme sokomoko hapuloma dulu dla wua: mate epo wua: mamadulo mate daya dele koko iye ha demha:ha:lepe. <sup>25</sup> Epame alotle GODta wua: watle hamilowepo depo yu itiyapo himili mo dla tame ha:ha:mama Namilatale daya dele iye sokomoko hapuloma dulu dla me-de demha:ha:lepe. <sup>26-27</sup> Epapele dulu dla wua: yimlalatapo ‘daya dele koko iye apa kokota?’ dlati ma asiyama wua:ta yia: watle epo atellepe, ‘Iye GODta Namilatale daya delepo,’ dlepe. ‘Adipalati, GODta Isip mo dulu dla malame sela:mama itapu hohomale akimlala hapuloma tlo potimama asiyama Isalael so dia: akimlala tlo me-pomeluwapo,’ dlepe.”

Mosesta epo atla dalepame Isalael sotapo God dla heoheodepo popa:mama ya: hi di dla ta:diyo. <sup>28</sup> Epame yia: tame GODta Moses mate epo A:lon mate dla atlamale yu e woloma dolumama koko hapuloma eye halomaiyo.

### *Godta itapu hohomale akimlala potimale*

<sup>29</sup> Epapele utula:la dukuslopi oloma dla GODtapo Isip mo dulu dla sela:mama Isip so yia: itapu hohomale akimlala hapulomaye potimtaiyo. Epammama Pelo yami tatle yumpame matle Isip so yia: akimlala hapuloma itapu hohomale soye potimtaiyo. Epame itapu usulli alinepi patetalo mape potimtaiyo. ✧ <sup>30</sup> Epapedeme utula:la oloma edla Pelo mate epo ya: oko so mate epo Isip so hapuloma mate sillipame sikemte a:lemyaiyo. Adipalati, yia: aya hapuloma dulu dla yia: akimlala itapu hohomale so hapulomatapo mo-palipo hutiyemtaiyo.

### *Isalael sotapo Isip mo tle alikili dla woyapo tale*

<sup>31-32</sup> Epedeme utula:la oloma edla Pelotapo Moses mate epo A:lon mate sisilapame yia: watle epo atlaiyo, “Wua:ta hapuloma wata ma-tamalaiya! Wua: wola: mate epo wua: yimlala mate epo wua: aliya halo mate me-eleme ma-tamalaiya, wua: GOD hi di dla ta:dlowedeme. Amasiyama wua: tamama God dla inoma sumale mate na: gadiya,” diyo.

<sup>33</sup> Epammama Isip so mape Isalael so dla epo atlamyaiyo, “Wua: di mo itle ma hapele alikili a:ma woyapo tamalaiya. Adipalati, wua:ta hema me-ha:ha:lepiye, dita hapulomatapo palilala,” demyaiyo. <sup>34</sup> Epalati Isalael sota ma-tamhalemama palawa daya yist mate podudukumalalo wekeleye ita dla kukutipame tlukata popoliyepo momka:tipo tamhalaiyo. <sup>35</sup> Epame yia:tapo Mosesta yu atlamale e dolumama Isip so dla gold alisisi mate epo silba alisisi mate epo tluka alisisi mate dlalepo halopame tamalaiyo. ✧ <sup>36</sup> Adipalati, GODtapo Isip so dla dupa malamale ka:dle hamiyo, ma yia:tapo Isalael so mate ka:pi namkale demha:ha:lepo depame. Epedeme Isalael sota mo-tlowedeme Isip so watle alisisi otlomyelati Isip sotapo alisisi hapulomaye yia: watle halopiyo. Epapele koko tle Isalael sotapo ma-tamalemama Isip so yia: alisisi ka:ka:dle hapulomaye halopo alikili dla woyamaiyo.

<sup>37</sup> Epapedeme Isalael sotapo Isip mo tle ma-tamalemama Lamses mo tle ma Sukot mo dla tamalaiyo. Yia: alikili dla mo-woyapo tame ha:ha:mama opa siyapo tlo sesa:lati 600,000 umaiyo. <sup>38</sup> Yia: tamalemama yia: aliya halo hapuloma mate eleme tamalaiyo. Epame opa opi mape yia: mate me-tamalaiyo. <sup>39</sup> Epame yia: duka dla tame hedepo daya dlowedeme palawa dayaye yist mate podudukumalalo isikimi mepo halopo deiyo. Adipalati, yia:tapo yia: daya alisisiye woloma podinapolalo ma hapele Isip mo tle alikili dla woyamaiyo.

<sup>40-41</sup> Epapele dulu dla Isalael sotapo Isip mo dulu dla 430 sokomoko ha:ha:pame alikili dla woyamaiyo. ✧ <sup>42</sup> Epame utula:la oloma edla GODtapo yia:ye alikili a:ma eleme woyamolowedeme woloma ka:pi omhalaiyo. Epapedeme sokomoko hapuloma dulu dla

alila eye umulati asiyama Isalael sotapo GODta yia:ye eleme alikili a:ma woyamale koko malamama utula:la edla ompopa:demha:ha:lepe.

*Namilatale daya dele koko dla imale*

<sup>43</sup> Epapele dulu dla GODtapo Moses mate epo A:lon mate dla epo atlaiyo, “Wua:ta Namilatale daya dele iye demha:ha:lepiye, isikimi Isalael so siyapota demha:ha:lepe.

<sup>44</sup> Epedeme wua: dla asiyama pa:le oko halalo oplami hallepiye, wua: ka:yapa ya: kapala tatle kestapame alotle ya:ye Godta Namilatale dayaye dene demha:ha:lepe.

<sup>45</sup> Amasiyama kapala pokotimalalo wekele asepe sotapo Godta Namilatale daya iye podlomha:ha:lowa.

<sup>46</sup> Wua: Namilatale daya i demama woloma wua: aya dulu dla delepe. Oplami hale-tapo moye hame alikili dla powoyamolowa. Epame elo mape pohauwokokomolowa.

✧ <sup>47</sup> Epapedeme Isalael so opa hapulomatapo daya dele dulu hema ha:ha:lepe, haleta alikili dla po-ulatlowa.

<sup>48</sup> Epame asepe so wua: mate ha:ha: dulu hema yia: ma GODta Namilatale daya dele iye yia: mate dlowe solotamelepiye, yia: ka:yapa yia: opa siyapo tatle kapala kotimelepe. Epame yia:tapo wua: mate Namilatale daya deleye yimkata delepe. Daya dele iye kapala pokestlalo wekele oplamitapo podlowa. <sup>49</sup> Epame Isalael so mape me-epapena. Yia: dulu dla kapala pokotimalalo wekele so opa ha:ha:lepiye, yia: mape Godta Namilatale daya dele iye podlowa.”

<sup>50</sup> Epapedeme Isalael sotapo GODta Moses mate epo A:lon mate dla atlamale yuye woloma dolumaiyo. <sup>51</sup> Epedeme alila hatlo medla GODta Isalael so elele meyelope meyelope dle hapulomaye Isip mo tle eleme alikili a:ma woyamaiyo.

## 13

*Itapu hohomale akimlala koko mate epo palawa daya yist dimi dlowe koko mate*

<sup>1</sup> Epame GODtapo Moses watle epo atlaiyo, <sup>2</sup> “Wua: akimlala itapu hohomale soye na: watle hohopo iya. Epame wua: aliya halo patetalo itapu usulli mape na: watle hohopo iya. Adipalati, akimlala itapu hohomale mate epo aliya halo patetalo itapu usulli mate nolëpo,” diyo. ✧

<sup>3</sup> Epalati Mosestapo Isalael so watle epo atlaiyo, “Alila iye wua:tapo Isip mo dulu dla asiyama pa:le oko halomha:ha:lati GODtapo ya:ta itiyamale pato mate wua:ye eleme alikili a:ma woyamapo. Epedeme wua: alila iye malamama palawa daya yist mate dukumale podlowa. <sup>4</sup> Epedeme watapo Abib mama oloma hema wua:ye Isip mo tle ma alikili a:ma woyamapo. <sup>5</sup> Epapedeme GODtapo ka:yapa wua: mamadulo dla yu itiyapo himimama wua:ye mo hale, dlowe alisisi sikemte wokasemale dla eleme tlowepo duwapo. Amasiyama wata oloma hema Keinan so mate epo Hitai so mate epo Amoli so mate epo Hibai so mate epo Yebusi so mateta mo edla me-ha:ha:po. Amasiyama epapele tlope GODtapo yia: ta:laye ma wua: watle hamilipe. Epame wua: mo edla ha:ha:mama sokomoko hapuloma dulu dla itapu mama hema palawa daya yist mate podukumalalo wekele daya dele iye de demha:ha:lepe. <sup>6-7</sup> Epedeme alila 7 dulu dla wua: palawa daya yist mate dukumaleye podlomha:ha:lowa. Wua: dulu dla yist hutiyelepiye, alikili a:ma polollepe. Epame daya dele mosukulu alila dla daya pato demama GOD hi di dla ta:de demha:ha:lepe. <sup>8</sup> Epammha:ha:le oloma edla wua: yimlala watle wua:ta daya de ya: dulu kokoye yia: watle atlemama ipo atlemha:ha:lepe, ‘Dita koko i haye, GODta dia:ye Isip mo tle alikili a:ma eleme woyamuwa kokoye malamama apopo,’ dlepe. <sup>9</sup> Epedeme daya dele koko itapo wua: do dla epo wua: daptala dla ulu epapele some hutiyelepe, wua:tapo GODta imale kokoye wowelilala depame. Adipalati, ya:ta itiyamaleta wua:ye eleme Isip mo tle alikili dla woyamuwapo. <sup>10</sup> Epapedeme sokomoko hapuloma dulu dla

ya: alilata umulati wua:tapo palawa daya yist mate podukumalalo wekele daya dele iye de demha:ha:lepe.

<sup>11-12</sup> Godtapo wua: mamadulo dla yu itiyapo himili dolumama Keinan moye wua: watle hamilati wua:tapo edla ha:ha:mama wua: akimlala itapu hohomaleye GOD watle hohopo imha:ha:lepe. Epame aliya halo dulu dla itapu patetalo usulli mape GOD watle hohopo imha:ha:lepe. Adipalati, itapu hohomale akimlala mate epo alinepi patetalo mateye GOD tetepo.✱ <sup>13</sup> Amasiyama wa: donki aliya tlo GOD watle hamili hallepiye, wa: e tlo ma ilame hammama asiyama sipi aliya amkota:le tlo GOD watle hamilipe. Amasiyama epapele dulu dla wa: sipi aliya yumuluwe allipiye, donki aliya tlo tumuku kestlepe. Epapedeme wua: akimlala itapu hohomale GOD watle hohopo iliye ma ya: tle asiyama mate ilame hohomelepe.

<sup>14</sup> Epapedeme wua: yimlalatapo wua: watle atlemama wua: apa koko hama: dlati yu iye yia: watle atlamha:ha:lepe, 'Dita koko i haye, dita Isip mo dulu dla asiyama pa:le oko pato hamha:ha:lati GODta itiyamaletapo dia:ye eleme alikili a:ma woyamuwapo. <sup>15</sup> Epame oloma edla Pelotapo dia:ye alikili a:ma woyamaiya dloweye sikemte alimama posolotamdena. Epalati GODtapo Isip so yia: itapu hohomale akimlala mate epo yia: aliya halo itapu usulli patetalo mateye potimuwapo. Epapedeme epapele koko tle ditapo di aliya halo itapu usulli patetaloye poyupo GOD watle hapimdepo. Epame di akimlala itapu hohomale so GOD watle hohopo iliye ma ilame bidulo hohomolowedeme di halo tlo poyupo hapimdepo,' dlepe. <sup>16</sup> Epedeme God watle alinepi poyupo hapilowe koko itapo wua: do dla epo wua: daptala dla ulu epapele some hutiyelepe. Adipalati, wua:tapo GODta itiyamaleta wua:ye eleme Isip mo tle alikili dla woyamale kokoye wowelilala depame."

### *Godta ya: opa Isael soye elemtale*

<sup>17</sup> Epapeleye Pelota Isael soye ma-taiya dlati Godtapo yia:ye eleme api kiyele Pilisteya so mo dla tlalo api tle potlalo wekiyo. Adipalati, ya: malamaiyo, yia:tapo api kiyele tle tlali opahale sotapo yia: mate natalimalati ma ilame Isip mo dla tamallala depame. <sup>18</sup> Epammama ya:tapo yia:ye api selemalli dalupa dulu tle ma Omteka:pele Kaula pili dla elemtaiyo. Epame yia: tamalemama yia: opahale alisisiye mo-dinapopo tamalaiyo.

<sup>19</sup> Epedeme Mosestapo tamama Yosep powale elo mate halopo taiyo. Adipalati, Yoseptapo mo-powataliya mo-polowedeme elemama Isael so watle yu itiyamale mate epo atlaiyo, "Godtapo wua:ye Isip mo tle alikili a:ma eleme woyamalati tamalemama na: elo mate halopo tamellepe," diyo. ✱

<sup>20</sup> Epapeleye Isael sotapo Sukot mo saliyome ma Etam mo dla taiyo. Etam mo eye dalupa mateka:pi dla halapo. <sup>21</sup> Epedeme yia: alila tamallati GODtapo wuala dulu tle yia:ye elemtamdiyo. Epalati asiyama utula:la tamallati Godtapo yia: dla hela:dle hamimama dlapa ulli aloweli dulu tle yia:ye elemtamdiyo. Godtapo ipapele api tle yia:ye imtlati yia:tapo alila mate epo utula:la mate me-tamalemidiyo. <sup>22</sup> Amasiyama wuala mate epo dlapa ulli aloweli mateta yia: posaliyome tlalo itapu tle yia: elemtaiyo.

## 14

### *Omteka:pele Kaula ulli koko*

<sup>1</sup> GODta ma Moses watle epo atlaiyo, <sup>2</sup> "Opa watle yu iye atlamane, yia: ma ilame Pihahilot mo dla ta diya. Mo eye Bal Sepon mo mateka:pi, Migidol ka: epo kaula ka: duka dla halapo. Epedeme yia: tame kaula pili dla kimpo ha:ha:lepo. <sup>3</sup> Adipalati, Pelota malamelepe, Isael soye dalupa dulu dla tloweye api yeitamama wowota:msiyamayo dlepe. <sup>4</sup> Amasiyama na:tapo Pelota malamaleye mamisika: kokalepo mellowepo,



ya:tapo ya: opa mate wua:ye ma hohomala telepo depame. Amasiyama na:ta yia: watle halowe kokotapo opa hapuloma dla na:ta itiyamale kokoye nati-iliwepo. Epalati Isip sotapo na:ye ikadepe GOD mleni dlepe,” diyo. Epalati Isalael sotapo God yu i dalepo dolumaiyo.

<sup>5</sup> Epapele dulu dla Pelo mate epo ya: oko so mateta Isalael sota ma ilame popumullalo ma a:ma potale halla dalepame epo atlamyaiyo, “Wua: natiya, Isalael soye di asiyama pa:le oko halalo sopo. Epedeme di yia:ye adipalati alikili a:ma woyamaiya duwa?” demyaiyo. <sup>6</sup> Epalati Pelotapo ya: aliya koa hame ya: opa mate Isalael soye alotle dodolomtaiyo. <sup>7</sup> Ya:ta tamama 600 aliya koa ka:ka:dle mate epo aliya koa hapuloma mo dulu dla siyamalalo mate elepame taiyo. Epele dulu dla aliya koa hapuloma di edla opatapo mo-popa:mtaiyo. <sup>8-10</sup> Epapeleye GODta Pelo dupa malamale kokalepo mellati ya:tapo ya: opa mate Isalael soye dodolomtamallati Isalael sotapo sisiyele mate kaula mateka:pi dla ellalo Pihahilot mo dla mala tamalaiyo. Yia: edla tulume kim-timha:ha:mama alo dla natilati Pelotapo ya: opa mate epo ya: aliya koa hapuloma mate alotle pumulla natiyo. Epalati yia:tapo sikemte wowota:mama gadle yilo GOD dla a:liyo. <sup>11</sup> Epame Moses dla epo atlamyaiyo, “Wa: adipalati dia:ye Isip mo tle hema elempuwa? Epame wa: di Isip mo dla palilati hatiliwe wabasi hawa hallati dia:ye dalupa dulu hema pallipo depame elempuwa? <sup>12</sup> Epame ditapo wa: watle ma-atlamduwapo, ‘Wa: di memelene. Di Isip mo medla asiyama pa:le oko halomha:ha:lowama,’ demduwapo. Epapele dulu dla di asiyama pa:le oko dulu medla ha:ha:matiye, di dalupa dulu hema puame popalima,” demyaiyo.

<sup>13</sup> Epalati Mosestapo epo atlaiyo, “Wua: ase sikemte wowota:miya. Woloma kokalepo ha:ha:iya. Adipalati, wua: wata GODtapo wua: gadle kokoye natilipe. Ame adipalati, wua:tapo Isip so iwolo yia: mila:piye matle ponatilowa. <sup>14</sup> Epapedeme wua: isikimi omha:ha:iya. Epalati GODta wua: yilo nalatimelepe,” diyo.

<sup>15</sup> Epalati GODta Moses watle epo atlaiyo, “Wa: adipalati gadle yilo na: dla otele himhalema:? Wa: opa atlamane, kaula pili dla tulume popa:lepo depame. <sup>16</sup> Epame wa: dali ku hapame kaula pato di dla dlokomane. Epalati kaula patotapo meyelo duka gladlati wa: mate epo Isalael so mate ta:la sekelle tle seme dla ulumtelepe. <sup>17-18</sup> Epame na:tapo Pelo mate epo ya: opa mate yia: dupa malamaleye kokalepo mellati yia:tapo wua: alotle dodolomelepe. Amasiyama na:ta yia: watle halowe kokotapo opa hapuloma dla na:ta itiyamale kokoye nati-iliwepo. Epalati Isip sotapo na:ye ikadepe GOD mleni dlepe.”

<sup>19-20</sup> Epalati God ya: banakaka mate epo wuala mateta itapu tle api intamalaleye matle alo dla tulume Isalael so ka: epo Isip so ka: duka dla halemama Isalael so dla hela:dle hamimama asiyama Isip so watle amtuwale hamiyo. Epammama yia:tapo Isalael so hala dla puluweye amtuwaleta api himomeleme halaiyo.

<sup>21</sup> Epalati Mosestapo ya: dali ku hamhalemama kaula pato di dla dlokomaiyo. Epalati GODtapo salita matlalo tiyama tle mosisi pato hamilati mosisitapo utula:la patoye hotlomhalemama kaula yú patoye duka gladiyo. <sup>22</sup> Epalati yúta duka gladepame duka dla ta:la sekelleta woyamellati Isalael sota etle seme dla ulumha:ha:iyo. Yia: kaula patoye ta:la sekelle tle ulumha:ha:mama natilati yútapo seme mate seme mate dla kosukulli some halaiyo. ☆

<sup>23</sup> Epalati Pelo ya: opata koko e natipame yia: aliya koa mate Isalael sota ulli alotle kotiyapame uliyo. <sup>24</sup> Epapeleye ma alallowe mateka:pi dla hallati GODtapo wuala dulu tle epame dlapa ulli aloweli dulu tle Isip so natipame yia: dla yeitamale hamiyo. <sup>25</sup> Epame yia: aliya koa heteye bobtalipo mellati yia:tapo a:ma tloweye memeliyo. Epapala natipame yia:tapo yia:skamu yia: dulu dla epo atlamyaiyo, “Di itle ma ilame

☆ 14:22: 1Kol 10:1-2; Hib 11:29

tamali dla tlowa. Adipalati, GODtapo Isalael so yilo dia: mate nalatimama aposema,” demyaiyo.

<sup>26</sup> Epalati GODtapo Moses watle epo atlaiyo, “Wa: dali ku mamisika: ta:depame kaula di dla dlokomane. Epalati yúta ma ilame puame godemama Isip so mate epo yia: aliya koa mateye gola:dlepe,” diyo. <sup>27-28</sup> Utulala ikadepe salita mo-matlali Mosesta ya: dali ku di dla ta:depo halemama kaula pato dla dlokomaiyo. Epalati yútapo ma ilame mo-godla puaiyo. Isip sota epela natipame ma ilame potlati yia: mate epo yia: aliya koa mateye yúta hapuloma gola:demama potimaiyo. Epapedeme ipapele koko tle GODtapo Isip so hapulomaye potimama oplami haletapo alikili a:ma po-ulataiyo.

<sup>29-30</sup> Epedeme alila oloma edla GODtapo Isalael soye Isip so do tle eleme alikili a:ma woyamaiyo. Adipalati, ya:tapo kaula patoye duka gladepe yúta seme mate seme mate dla kosukulli some hallati Isalael sotapo ta:la sekelle tle seme dla uliyo. Asiyama Isip sotapo ullati yú patota ma godemama poyuiyo. Epalati Isalael sotapo Isip so palli motoye yú peleyama dla hutiyemyelati tlamaiyo. <sup>31</sup> Epapele dulu dla yia:tapo GODta ya:ta itiyamale nati-imama Isip so dla wotiyalle hamili koko natipame GOD dla sikemte wowota:le mate ya: dla mikadepe demama ma ya: oko oplami Moses dla mape mikadepe diyo.

## 15

### *Moses mate epo Isalael so mate God hi di dla ta:demama sala dolumale*

<sup>1</sup> Epapedeme Moses mate epo Isalael so mate GOD hi di dla ta:demama sala iye dolumaiyo.

“Na:tapo GOD hi di dla ta:demama sala iye dolumolowepo.

Adipalati, ya:tapo Isip so mate nalatimama ya:ta itiyamaletapo yia:ye ma-tla:mtalepo.

Epame ya:tapo aliya koa mate epo yo di dla popa:lalo so mate yú dla mo-yumatilipo.

✧ <sup>2</sup> Epedeme GODtapo na: dla itiyamale hamilalo halapo epame na: pasakalo gadlalo halapo.

Epedeme na: ya: dla sala solowama.

Epame na:ta ya:ye na: God ikadepe demama ya: hi di dla ta:dlowepo.

Epame na: mamadulo yia: God ikadepe demama ya: dla siyele hamilowepo.

✧ <sup>3</sup> Epapedeme GODye opahale dlalo dokopala oplamipo.

Epedeme GODye ya: hi ikadepepo.

<sup>4</sup> Epapele dulu dla Pelo ya: opa mate epo yia: aliya koa mate Godtapo Omteka:pele Kaula dulu dla mo-yumatilipo.

<sup>5</sup> Epame yútapo yia: dokolomama ewala some u-upiyemama ollotulume ta:la umpo popa:po.

<sup>6</sup> Epame GOD wa:tapo Isip soye wa:ta itiyamale pato mate mo-potipo hamastalepo.

<sup>7</sup> Epame wa:ta itiyamaletapo wa: dla opahale dlalo soye batalipo hamastalepo.

Epame wa:ta siyaladleye pta sikemte dlapa sepena.

Epapedeme wa: dla opahale dlalo soye dlapata osamokolo hamdemdiye epapelepo.

<sup>8</sup> Epame wa:ta hedletapo mosisi some bibikilimama kaula patoye duka gladuwapo.

Epalati yútapo kokalepame kosukulli some haluwapo.

<sup>9</sup> Epapedeme ka:yapa Isip sotapo hatetalemama epo atlamiyeuwapo,

‘Ditapo Isalael soye dodolomtame

yia:ye hohopo aipa:ya mate poyupame yia: alisisi hapuloma halomolowepo,’ demyeuwapo.

- <sup>10</sup> Amasiyama wa:ta hedletapo mosisi some bibikilimama  
 ya:ye yúta gola:depo poyumama yú dulu dla ewala some ollo-ollo dlalimuwapo.
- <sup>11</sup> Epapedeme god hale wa: epapele halema:?  
 Hao, hawa ikadepe.  
 Adipalati, wa:ye sikemte aiyalma depo halemama hela:dle mate itiyamale mate halapo.  
 Epame wa:tapo ulugiyemale koko patoto halomdepo.
- <sup>12</sup> Epame wa:ta itiyamale tle Isip soye ta:lamota gola:dene dlepo.
- <sup>13</sup> Epapedeme wa: kokó halepo hallalo bokotiyapo malamaletapo wa:ta ma ilame  
 hohomale opa dia:ye eleme telepe.  
 Epame wa:tapo ya:ye wa:ta hallalo mo dla eleme pulupe.
- <sup>14</sup> Epapedeme opa opitapo koko i dalepame sikemte wowota:myelepe.  
 Epapele dulu dla Pilisteya soye sikemte wowota:mama ya:ta itiyamaleye pa:lepe.
- <sup>15</sup> Epame Edom dokopala so mate epo Moab dokopala so mate sikemte eseselalalimale  
 mate dupa yulumama wowota:myelepe.  
 Epame Keinan so tlo sikemte yiyellepe.
- <sup>16</sup> Epapele dulu dla opa ewolotapo wa:ta itiyamale natipame wowota:mama dali soko-  
 talo some ha:ha:myelepe.  
 Yia:tapo mepo ha:ha:lati wa: opa, wa:ta ma ilame hohomale sotapo tamhalemama  
 tetla:mha:ha:lepe.
- <sup>17</sup> Epame wa:tapo ya:ye elemtame wa:ta hallalo tamali dla ipila:lepe.  
 Adipalati, tamali eye wa: dota mita:pele aiyalma ayapo.
- <sup>18</sup> GOD, wa:ta dokopala depo hallowe kokotapo kokó halepo hallepe.”
- <sup>19</sup> Epapedeme sala iye Isalael sotapo God hi di dla ta:demama dolumaiyo. Adi-  
 palati, Godtapo kaula patoye duka gladlati Isalael sota ta:la sekelle tle seme dla uliyo.  
 Amasiyama Isip sota ullati GODta yúye ma hame puame bopudemama ya:ye poyuiyo.
- <sup>20</sup> Epalati God yu molo atlalo a:ya, A:lon ya: nana Miliyamtapo wola: opi mate sila:sila:  
 halopo siyalemama Miliyamta itapu sala hamastepo yomaiyo. <sup>21</sup> Epammama ya: sala  
 ipo dolumaiyo,  
 “GOD hi di dla ta:demama sala iye dolumaiya.  
 Adipalati, ya:tapo Isip so mate natalimama ya:ta itiyamaletapo ya:ye ma-  
 tla:mtalepo.  
 Epame ya:tapo aliya koa mate epo yo di dla popa:lalo so mate yú dla mo-yumatilipo.”

*Yú haka:letapo ma opalli koko*

<sup>22</sup> Epame Mosestapo Isalael soye elepame Omteka:pele Kaula saliyome ma Sul dalupa  
 dulu dla tamalemama alila dapahatlope dulu dla yú dimi tamalaiyo. <sup>23</sup> Epame ya:  
 puame Mala mo dla yú natiyo. Amasiyama yú eye haka:lati podlomaiyo. Epapedeme mo  
 e ya: hiye semama Mala\* demdepo. <sup>24</sup> Epapeleye ya: edla puame natitepo yú dloweta  
 pa:lati Moses yu balemama, “Di yú hadima tame tilipo dlopa:?” demyaiyo.

<sup>25</sup> Epalati Mosestapo gadle yilo GOD dla otele himiyo. Epapalati GODtapo dali tatalaye  
 nati-iyo. Epame Mosestapo dali tatala eye hame yú dla hamastlati yútapo ma opaliyo.

Epapedeme Mala mo edla GODtapo Isalael sota ikadepe ya: dolumolowe depame  
 aiyalma amkoye ipo imaiyo, <sup>26</sup> “Wua: hatlo na: yu dla dalepo salladepo siyamama na:ta  
 solotamale koko tlo dolumha:ha:iya. Wua:ta epapelepiye, eta na:ta Isip so dla wotiyalle  
 hapiwa epapele wotiyallege ma wua: watile pohapilowa. Adipalati, na:tapo GOD depo  
 halemama wua:ta alomaleye ka:ka:dlalo halapo,” diyo.

<sup>27</sup> Epame ya:tapo Mala moye saliyome ma Elim mo dla puaiyo. Epapeleye Elim mo  
 edla yú matale 12 me-popa:iyo. Epame olo dali 70 ma medla ha:ha:iyo. Epalati ya:tapo  
 yú matale mateka:pi medla kintimaiyo.

\* 15:23: Mala hi ya: dulu kokoye haka:le demama apopo.

## 16

### *Godta Isalael so dla daya hapimhalale*

<sup>1</sup> Epapedeme Isalael sotapo Elim mo saliyome ma Sin dalupa dulu dla taiyo. Epapel-eye mo eye Sainai tamali ka: epo Elim mo ka: duka dla halaiyo. Epapele dulu dla yia: Isip mo tle woyapame mama hatlope dulu dla puame Sin dalupa dulu dla woyamaiyo.

<sup>2</sup> Epame yia: edla puame ha:ha:mama Moses mate epo A:lon mate dla yu balemyemama epo atlamyaiyo, <sup>3</sup> “Wua: adipalati dia:ye hema eleme puwa? Hema daya dlowe hawa ikadepe. Amasiyama Isip mo dla di dlowe alisisi sikemte dlomduwapo. Epapeleye ka:dena, di edla ha:ha:mama palliwe tlo ka:pipo. Amasiyama wua:tapo dia:ye daya teta:le koko tle pallipo depame hema elempuwa,” demyaiyo.

<sup>4</sup> Epalati GODtapo yia:ta yu balle koko dalepame Moses watle epo atlaiyo, “Na:tapo dayaye pepele di tle wua: dla hamimama tiyo some hellepe. Epalati opatapo tame alila hatlo mate ala:le daya haloma demha:ha:lepe. Epapele dulu dla haletapo dayaye alila hatlo dla dlowe dla tla:mtale pohalowa. Adipalati, ipapele koko tle na:tapo yia:ta ikadepe na:ta aiyalma hapili dolumha:ha:ma: depo omhallepe. ✧ <sup>5</sup> Amasiyama alila 6 umulati tlo dayaye alila dapiyamte dulu dla dlowe mate ala:le halepe.”

<sup>6-8</sup> Epapalati Moses mate epo A:lon mate Isalael so sisilapame yia: watle epo atlaiyo, “Wua: adipalati dia: dla yu balemha:ha:ma:? Wua:ta yu balemha:ha:ye dia: dla po- aposema. Amasiyama wua: GOD dla apopo. Epapele dulu dla GODtapo wua:ta ya: dla yu balle kokoye ma-daluwapo. Epapedeme wata tamila:la wua:tapo ikadepe GODta wua:ye Isip mo tle alikili a:ma eleme woyamuwa dle kokoye natilipe. Epame wua:tapo utulala ikadepe ya:ta itiyamale mamisika: natilipe. Adipalati, GOD meyelo wua:ta tamila:la dlowe mo mate epo utulalati dlowe daya mate wua: dla halopimhallati wua: natilipe,” diyo.

<sup>9</sup> Epammama Mosestapo A:lon watle epo atlaiyo, “Wa: Isalael so atlamane, GOD hala dla pulupo depame. Adipalati, Godtapo yia:ta yu balle kokoye ma-dallepo,” diyo. <sup>10</sup> Epapeleye A:lontapo ala opa dla me-yukamhalemama toko alikili dla ipo natitepo GOD ya: hela:dletapo wuala dulu dla halla natiyo.

<sup>11</sup> Epame GODta ma Moses watle epo atlaiyo, <sup>12</sup> “Na:tapo yia:ta yu balle kokoye me-daluwa. Epedeme wa: opa watle ipo atlamane, yia: tamila:la hapuloma dla mo dloma epo utulalati hapuloma dla daya dloma demha:ha:lepe. Epalati yia:ta epo dlomha:ha:mama na:ye yia: Lod GODpo dlepe,” diyo.

<sup>13</sup> Epapele tamila:la oloma edla tuluma tea hapulomatapo ketame puame kimna:ya alikili dla popa:myaiyo. Epalati utulalati ikadepe dla kimna:ya alikili tle mamdulotapo osamokolo dla popa:myaiyo. <sup>14</sup> Amasiyama mamdulotapo mo-pa:lati toko ipo natitepo amaloka kapa sepeletapo ta:la dla kamyela natiyo. <sup>15</sup> Epapele dulu dla Isalael sota koko i natipame apa alisisita: depo momalamyaiyo. Epalati Mosestapo yia: watle epo atlaiyo, “Eye GODta daya hamimama apopo. ✧ <sup>16</sup> Epedeme ya:tapo epo atlamuwapo, ‘Wua: dulu dla daya i halomama isikimi wua: kimna:ya dulu dla ha:ha:lalo so mate ala:le tlo halomelepe,’ duwapo.”

<sup>17-18</sup> Epalati opatapo Moses yu dalepo tame dayaye yia: mate ala:le halomama opa opitapo pasatale halomalati opitapo koweta halomaiyo.✧

<sup>19</sup> Epame Mosestapo epo atlaiyo, “Daya i dlomama ma utulalati dloweye pohatiti-molowa,” diyo.

<sup>20</sup> Amasiyama opa opitapo Moses yu podallalo daya utulalati dloweye me-hatitimaiyo. Epalati utulalati dayatapo hutumama hutalluta pamelati wokakata wokasepo elaiyo. Epapalati Mosesta koko e natipame opa ewolo mate sikemte siyaladiyo.

<sup>21</sup> Epapeleye opatapo utulala hapuloma dla daya yia: mate ala:le halomdiyo. Epame salitapo mo duka dla hetamama sikemte alemallati daya yia:ta halomama opi popomel-letapo potolumdiyo. <sup>22</sup> Epapele dulu dla alila 6 umulati yia:ta daya halomama alila dapiyamte dulu dla dlowe mate ala:le halomaiyo. Epapalati Isalael dokopala sota koko e natipame Moses hala dla woloma atla puaiyo. <sup>23</sup> Epalati Mosestapo yia: watle epo atlaiyo, “GODta atlale e dolumama iyelaye dita GOD dla inoma sumuluwe alilapo. Epapedeme wua: daya wata dloweye wata dukupame ha:lepe. Epame wata atilowe mape wata atilipe. Epame wua:ta iyela dlowa depo halomale alisisi tlope me-hatitimelepe,” diyo. ✧

<sup>24</sup> Epalati yia:tapo Mosesta atlale yu e woloma dolumale koko tle yia:ta inoma sumalalo alila dla dlowepo depo kolumale dayata pohutlalo wekiyo. <sup>25</sup> Epammama Mosestapo opa watle epo atlamaiyo, “Wua:ta tatla daya hatitimuwaye wata dlomaiya. Adipalati, wata alila iye GOD dla inoma sumuluwe alilapo. Epedeme ya: watapo dia: watle daya amko pohamilowa. <sup>26</sup> Epapedeme wua: alila 6 dulu dla daya haloma demha:ha:lepe. Amasiyama alila 7ye dita isikimi hedepo popa:mama God dla inoma sumuluwe alilapo. Epedeme wua: alila edla daya amko hale ponatilowa.”

<sup>27</sup> Epapele tlope opa opitapo yia:ta inoma sumalalo alila medla daya halomala taiyo. Amasiyama yia: tame natilati daya hale ponatiyo. <sup>28</sup> Epalati GODta koko e natipame Moses watle epo atlaiyo, “Wua:ye adipalalo na: yu dla dalepame dolupa:? <sup>29</sup> Epedeme na:ta wua: dla inoma sumalalo alilaye hamiwapo, wua:ta hedlepo depame. Epapele koko tle na:tapo wua: watle 6 alila umulati daya ma halopiwapo, wua:tapo alila dapiyamte dla demtelepo depame. Epedeme inoma sumalalo alila edla oplami haletapo alikili a:ma poholomsela:lowa. Amasiyama woloma yia: aya dulu dla ha:ha:lepe,” diyo. <sup>30</sup> Epalati opa hapulomatapo inoma sumalalo alila edla woloma hedepo popa:iyo.

<sup>31</sup> Epapeleye Isalael sota Godta yia: watle daya hamili e semama mena\* daya diyo. Mena daya iye dlomoko ta kamale epapele sepena. Amasiyama ya: tlo sikemte opalimama topsiyo dala mate dukumale daya some halemdiyo. ✧ <sup>32</sup> Epame Mosestapo opa watle epo atlaiyo, “GODtapo epo atlema, mena daya opiye di mamadulo alotle ha:ha:mtlowe sota natiloweye woloma hatitimelepo dema. Epapelepiye, etapo wua:ta Isip mo tle woyapo dalupa dulu dla siyamalati Godta wua:ta delepo depame mena daya hapimhaluwaye yia: ma me-natilipe.”

<sup>33</sup> Epammama Mosestapo A:lon watle epo atlaiyo, “Wa: ita dla mena dayaye kolupame GOD mila:pi tle woloma ka:pi pamelene, di mamadulo alotle ha:ha:lowe sota natilipo depame,” diyo. ✧

<sup>34</sup> Epapedeme A:lontapo GODta Moses watle atlamale yu dalepame mena daya kolumaleye woloma kokó mepo ellepo depame God mila:pi tle pameliyo.

<sup>35-36</sup> Epapele dulu dla Isalael sotapo 40 sokomoko dulu dla isikimi mena daya tlo dlomsiyamama yia:ta ha:ha:lowe mo Keinan dla puame woyamama medla gudiyo. ✧

## 17

### *Ewala dulu tle yú malale*

<sup>1</sup> Epedeme Isalael sotapo GODta atlamale yu dolumama Sin dalupaye saliyome tamalemama mo hale tle ma mo hale dla ta demsiyamama puame Lepidim mo dla kintimaiyo. Amasiyama mo edla opata yú dlowe hawa ikadepe halaiyo. <sup>2</sup> Epalati yia:tapo yú yilo Moses yu balemyemama epo atlamyaiyo, “Wa: di yú hamine,” demyaiyo.

Epapalati asiyama Mosestapo yia: watle epo atlaiyo, “Wua: adipalati na: dla yu balemha:ha:mama GODta itiyamale dla pomikadepe dlalo ha:ha:ma:?” diyo.

✧ 16:23: Eke 20:8-11 \* 16:31: Mena hi ya: dulu kokoye “i apata:?” demama apopo. ✧ 16:31: Nam 11:7-8

✧ 16:33: Hib 9:4 ✧ 16:35-36: Yos 5:12



<sup>3</sup> Amasiyama opatapo yú sikemte teta:lati Moses yu balemama epo atlamyaiyo, “Wa:ta dia:ye Isip mo tle alikili a:ma eleme woyamuwaye ipo yú teta:le koko tle dia: mate epo di yimlala mate epame di aliya halo mate pallipo depo apuwa?” demyaiyo.

<sup>4</sup> Epalati Mosestapo GOD watle otele yu himimama epo atlaiyo, “Na: opa iwolo dla apa koko hapa? Adipalati, yia:tapo na:ye ewala mate kelepame yumula yakomapo,” diyo.

<sup>5</sup> Epalati GODtapo asiyama Moses watle epo atlaiyo, “Wa: tatile opa mila:pi tle tamama Isalael dokopala so opa opiye eleme tane. Epo tamama wa:ta Nael aloma dla heyuwa dali ku mate hamtane. <sup>6</sup> Epedeme na: tatile tame Sainai tamali dla ewala dla wa: ompollowepo. Epalati wa:ta alotle puame wa: dali ku mate ewala edla heyulati yútapo alowamelepe. Epalati opatapo edla yú dlomelepe,” diyo. Epapeleye Mosestapo Godta atlamale yu dolumama dokopala so opa opi me-omha:ha:lati koko eye haiyo.

<sup>7</sup> Epame mo eye semama Masa epo Meliba\* diyo. Adipalati, Isalael sotapo Moses yu balemyemama epo atlamyaiyo, “Godye ikadepe dia: mate halema:?” demyaiyo.

### *Amalek so mate opahale dele*

<sup>8</sup> Epedeme Isalael soye Lepidim mo dla kimtipo ha:ha:lati Amalek sota puame kotlomaiyo. <sup>9</sup> Epalati Mosestapo Yosuwatapo watle epo atlaiyo, “Wa: iyela opa opi elepame Amalek so mate tame natalimane. Epalati na:tapo tamali di dla hetame God ya: dali ku hame hallowepo,” diyo.

<sup>10</sup> Epalati Yosuwatapo Mosesta atlamale yu dolumama ya: opa elepame Amalek so mate natalimolowedeme ma-tlati asiyama Mosestapo A:lon mate epo oplami hale Hul mate tamali di dla hetamalaiyo. <sup>11</sup> Epapele dulu dla Mosestapo do di dla ta:ta:depo hallati Isalael sotapo sikemte itiyamale mate natalimha:ha:iyo. Amasiyama Mosestapo ma ya: do isili a:ma hahaliyomtullati asiyama Amalek sota sikemte itiyamale mate natalimha:ha:iyo. <sup>12</sup> Epapele dulu dla Mosestapo ya: do ta:ta:depo halaleye do mopopalilati A:lon mate epo Hul mate ewala hampuame pamelepame Mosesye di edla polane diyo. Epame Mosesta ewala di edla pollati A:lontapo do seme dla hama epo Hulta do seme dla hama depame ta:ta:depo ha:ha:lati sali mo-tulumtaiyo. <sup>13</sup> Epapele tle Yosuwatapo ya: opa mate Amalek soye kotlomama potimaiyo.

<sup>14</sup> Epalati GODta Moses watle epo atlaiyo, “Opatapo wua:ta Amalek so mate natalimhala koko iye welilala depame buka dla ilimane. Epame Yosuwatapo watle sesa:po ine. Adipalati, na:tapo Amalek so hapulomaye mosukulu potipo polollowepo. Epalati opata yia: kokoye mosukulu wellipe,” diyo. ✨

<sup>15</sup> Epammama Mosestapo God dla alinepi poyupo ha:lalo tile hapame ya: hi semama, “Na:ta opahale dele dulu dla GODta na: gadlalo halapo,” diyo. <sup>16</sup> “Adipalati, na:tapo na: doye GOD dla ta:ta:depo hallati ya:tapo na:ye gadlepo. Epapedeme wata oloma itle tamama GODtapo Amalek so mate kokó mepo opahale demhallepe,” diyo.

## 18

### *Yetlota ya: doko Moses natila puale*

<sup>1-4</sup> Epapele dulu dla Mosestapo ka:yapa mo-powataliya ya:llu Sipola mate epo ya: akimlala dapiyamte mate ya: doko Yetlo hala dla taiya diyo. Moses yami ka:yapa itapu hamale hiye Gesom\* diyo. Adipalati, Mosesta epo atlaiyo, na:ye mo hema asepe puwapo. Epame yami hale hiye Eliyesel† diyo. Adipalati, Mosesta epo atlaiyo, “Na: a ya: Godta na: gademama Pelota siyaladle tle alikili a:ma seme woyamuwapo,” diyo. ✨

\* **17:7:** Masa hi ya: dulu kokoye “ikadepeta:?” demama apopo. Epame Meliba hi ya: dulu kokoye yu balle demama apopo. ✨ **17:14:** Dit 25:17-19; 1Sa:m 15:2-9 \* **18:1-4:** Gesom hi ya: dulu kokoye asepe oplami demama apopo.

† **18:1-4:** Eliyesel hi ya: dulu kokoye Godye na: gadlalopo demama apopo. ✨ **18:1-4:** Eke 2:21-22; Taiya 7:29

Epeleye Moses ya: doko Yetlo iye Midiya mo dla alinepi poyupo God dla hapilalo oplami halaiyo. Epapeleye ya:tapo GODta Moses mate epo Isalael so mate dla gademama yia:ye eleme Isip mo tle alikili dla woyamale kokoye dalepame natila puaiyo.

<sup>5-6</sup> Epedeme ya: pumama ya: doko Moses watle yu hamimama epo atlaiyo, “Na: wa: allu mate epame wa: akimlala dapiyamte mate eleme wa: natila puma,” diyo. Epammama yia:tapo Moses mate epo Isalael so mate ala dalupa dulu dla God ya: tamali mateka:pi dla kimpo popa:lati edla puame woyamaiyo.

<sup>7</sup> Epalati Mosesta ya: dokota pula natipame ya: dla tame heodepame ya:ye hamame huliyo. Epame namkale dle yu atlepame yia:ye ya: kimna:ya dla elemtuwaiyo. <sup>8</sup> Epame Mosestapo ya: doko watle GODta Isalael so yilo Pelo dla epo Isip so dla koko halomhalale hapulomaye esemaiyo. Epame yia:tapo Isip mo tle alikili dla woyapo pumama pasakalo kokalle dulu dla pulati GODta yia: gademhalale mape esemaiyo.

<sup>9-10</sup> Epapeleye ya: doko Yetlotapo yu i dalepame siyemama epo atlaiyo, “GOD hi di dla ta:diya! Adipalati, ya:tapo wua:ye Pelo mate epame ya: opa mate yia: do dulu tle eleme alikili a:ma woyamuwapo. <sup>11</sup> Epapedeme na: wata malama, wua: GODtapo god hapulomaye tla:mtame halapo. Adipalati, ya:tapo Isalael soye Isip sota itiyamale tle elepame alikili dla woyamuwapo,” diyo. <sup>12</sup> Epammama ya:tapo alinepi poyupo God watle hamimama namkale dle alisisi opi mate halopi-iyu. Epalati A:lon mate epo Isalael so dokopala so opa opi mate yimkata puame ya: mate God mila:pi tle popa:mama daya deiyo.

### *Koko gladlalo so hohomale koko*

<sup>13</sup> Epame Mosesta utulalati sila:time opa koko gladlowedeme ya:ta pollalo dla pollati Isalael sota ya: hala dla pumhalaiyo. Adipalati, yia: solotamaiyo, yia: dulu dla yu topulolle koko mate epame upiyele koko mate hutiyemyaye Mosesta ka:depo gladlepo depame. Epammama opatapo utulalati kotiyapame Moses hala dla ta demha:ha:mama tamila:la dla tame gudemdiyo. <sup>14</sup> Yia:ta epammha:ha:lati Moses ya: doko Yetlota koko i natipame ya: watle epo atlaiyo, “Wa: opa hapuloma iwolo natine. Yia: alila hapuloma wa: dla puame alupo koko gladlowedeme utulalati kotiyapo tame tamila:la dla gude demha:ha:po. Epapedeme wa: adipalati mowolo koko iye hamhalema:?” diyo.

<sup>15-16</sup> Amasiyama Mosestapo ya: watle epo atlaiyo, “Opatapo yia: dulu dla yu topulolle koko mate epo upiyele koko mate hutiyelati Godta solotamale koko dlallepo depame gadle yilo na: hala dla pumulumama ammdopo. Epalati na:tapo yia: kokoye gladepame yia: watle God ya: aiyalma kokoye imdepo,” diyo.

<sup>17</sup> Amasiyama Moses ya: dokotapo epo atlaiyo, “Wa: koko iye woloma ka:dle api tle po-ammhalasema. <sup>18</sup> Adipalati, wa: mate epame opa wa: natilowa depo pumhalale so mateye sikemte susukalemama hohopeyalimelepe. Ame adipalati, oko eye pta pato, oplami hatlota halowepe po-ala:na. <sup>19-20</sup> Epedeme na:tapo wa:ye woloma molo atlati Godtapo wa: mate hallepe. Epapele dulu dla wa:tapo opa yilo God mate yukamhalaye pta ka:pi, epame wa:tapo yia: watle God ya: aiyalma dolumha:ha:mama woloma ka:depo ha:ha:lowe koko imhalaye e ma pta ka:pi. <sup>21</sup> Amasiyama wa: opa opiye huhulumane, yia:tapo wa:ta opa koko glademhala oko ipiye yia:ta halepo depame. Epapele dulu dla wa: opa ewolo hohomama woloma God wowota:lalo so tlo hohomelepe. Epame mani yilo yimkadulo koko gladlowa depo malamalalo soye pohohomolowa. Amasiyama woloma ikadepe koko halomalalo so tlo huhulupame hohomelepe. Epame alumale meyelope meyelope dle dla ipila:mtamama opitapo 10 opa epapele omha:ha:, epame opa opitapo 50 opa epapele omha:ha:, epame opitapo 100 opa epapele omha:ha:, epame opitapo 1,000 opa epapele omha:ha:demtelepe. <sup>22</sup> Epapedeme opa iwolotapo koko gladlalo so ha:ha:lepe. Amasiyama koko patoto tlope wa: hala dla gladlowedeme pua demha:ha:lepe. Epapele koko tle yia:tapo wa: oko ipiye gademha:ha:lati wa:tapo posukallowa. <sup>23</sup> Epapedeme koko iye Godta solotamale kokopo. Epapele dulu dla wa:ta

koko i hamhallepiye, eta wa: posukallowa. Epalati opatapo yia: kokoye ka:depo gladla natipame sisiyele mate ma ilamtademha:ha:lepe.”

<sup>24</sup> Epalati Mosestapo ya: dokota molo atlale yu dalepame koko eye ka:dena demama me-haiyo. <sup>25</sup> Epammama ya:tapo alumale meyelohe meyelohe dle omha:ha:mtlowe opa ka:ka:dle hohomaiyo. <sup>26</sup> Epame yia:tapo opa koko glademha:ha:mdiyo. Amasiyama isikimi koko patoto tlo Moses hala dla halopo pumdiyo.

<sup>27</sup> Epapele dulu dla koko ita tame gudlati Moses ya: dokotapo ya: saliyome ma me-ya: mo dla taiyo.

## 19

### *Godta Sainai tamali dla malale koko*

<sup>1-2</sup> Epedeme Isalael sota Lepidim mo dla kimtipo ha:ha:po ma tamalaiyo. Epele dulu dla yia:tapo Isip mo tle alikili a:ma woyapo tamalemama mama dapiyamte pololepame Sainai dalupa dulu dla puame woyapame Sainai tamali kikiwi isili dla kimtimaiyo.

<sup>3</sup> Epame Mosestapo Sainai tamali di dla hetlati GODtapo ya: sisilamama epo atlaiyo, “Wa: Isalael so watle yu iye atlamane. <sup>4</sup> Yia:tapo na:ta Isip so dla koko halomuwaye matlamuwapo. Epame na:tapo yia:ye Isip mo tle alikili a:ma eleme woyapo na:ta hala mo hema elempumama kepilitapo ya: yemala suku dla pamelepo hollomtandiye, epapele some puwaye yia: me-natiwapo. <sup>5</sup> Epapedeme yia:tapo na: yu dalepame salladepo dolumsiyamelepiye, eta yia:ye ikadepe na: opa dlepe. Epapele dulu dla ta:lamo so hapulomaye nolëpo. Amasiyama hatlo yia: tlope ikadepe na:ta sesalemale sopo. ✧ ✧

<sup>6</sup> Epedeme yia:tapo na: ka: epo ta:lamo so opa hapuloma ka: duka dla ha:ha:lalo so depo ha:ha:lepe. Epedeme wa:tapo yu iye Isalael so watle atlamane,” diyo. ✧

<sup>7</sup> Mosestapo GODta ya: watle atlamale koko hapuloma eye dalepame tulumme ma Isalael so dokopala so sisilapame yia: watle atlamaiyo. <sup>8</sup> Epalati asiyama opa hapulomatapo yu e dalepame epo atlamyaiyo, “Di GODta atlamale koko hapuloma eye halomolowepo,” demyaiyo. Epalati Mosestapo yia:ta atlamale yu asiyamaye ma GOD dla hamila hetaiyo.

<sup>9</sup> Epame ya:tapo opata atlamale yuye GOD watle atlapo gudlati asiyama GODtapo ya: watle epo atlaiyo, “Na:tapo wuala deiyamale dulu tle wa: hala dla puluwepo. Epame na:tapo wuala deiyamale dulu etle wa: mate yukamhallati opatapo e dalepame wa:ye ikadepe na: yu molo atlalo oplami tepo dlepe,” diyo.

<sup>10</sup> Epame GODta ma Moses watle epo atlaiyo, “Wa: opa watle tame yu iye atlamane. Yia:tapo na: mateka:pi dla puluwedeme wata alila mate epame iyela mate woloma ka:pi dinapomama yia: kapala alisisi mape woloma ka:pi howahalomelepo.

<sup>11</sup> Adipalati, iyela popa:po alallati na:tapo opa hapulomata natilipo depame Sainai tamali di dla mollowepo. <sup>12-13</sup> Epedeme opata siyamama tamali kikiwi isili ikadepe edla pumullala depame sukulu himine. Adipalati, oplami antapo epame alinepi aditapo holomsela:mama sukulu himili eye me-tla:mtame tamali umulupiye, ya:ye ewala mate kelepo yumilipe o tota suma:himilipe. Epapele dulu dla oplami haletapo epo yumili oplami motoye po-umuluwa. Amasiyama hulutapo sisilamelepiye, eta opatapo sukulu himili edla puame alumelepe.” ✧

<sup>14</sup> Epame Mosestapo ma ilame tulumme Godta atlamale kokoye opa watle atlamaiyo. Epalati yia:tapo yu e dalepame woloma dinapomama yia: kapala alisisiye woloma ka:pi howahalomaiyo. <sup>15</sup> Epame Mosesta yia: watle ma epo atlaiyo, “Wua: Godta dia: dla mollowe alila dla dinapomama wua: wola: kapala po-umamolowa,” diyo.

<sup>16</sup> Epame Godta mollowe alila utulalati dla omapla halë mate epo hela:hela:dle mate hamama wuala deiyamaletapo tamali aloweli di dla bopudepo halaiyo. Epalati hulu yu:tapo sikemte palimhallati opa hapuloma kimna:ya dla popa:letapo sikemte wowota:iyo.

✧ ✧ 17 Epame Mosestapo opaye eleme tamali kikiwi isili dla God hala dla tamalaiyo. Yia: tame tamali kikiwi isili sukulu himili dla ha:ha:mama omha:ha:iyo. 18 Epalati GODtapo dlapa dulu tle Sainai tamali di edla mallati tamali eye namiletapo sikemte haiyo. Namileta epo sikemte bulamhetamhallati allu tuwale patota tuwaiyo. 19 Epapele dulu dla hulu yutapo ala pokeillalo me-hallati Mosestapo God watle yukamaiyo. Epalati Godtapo omapla halë dulu tle ya: watle asiyama yu atlaiyo.

20 Epapedeme GODtapo Sainai tamali di dla malame halemama Moses sisilamama epo atlaiyo, “Wa: tamali di hema matane,” diyo. Epalati Mosestapo tamali di dla hetaiyo.

21 Epapalati GODtapo ya: watle epo atlaiyo, “Wa: tulume opaye yu itiyamale mate atlamane, yia:tapo sukulu himili eye tla:me na:ta hala hema pulala depame. Adipalati, yia:ta epapelepiye, yia: pallipe. 22 Epame na: dla alinepi poyupo hapilalo so mape sukulu himili i tla:mpulupiye yia: ma pallipe. Epapalala depame yia: mape yu hatlo me-dolumama aiyalma depo ha:ha:lepe.”

23 Amasiyama Mosestapo GOD watle epo atlaiyo, “Opatapo tamali dla kulume populuwa. Adipalati, na:tapo wa:ta atlamale koko e dolumama tamali dla tla aiyalma depame sukulu me-himiwapo. Ame adipalati, tamali iye aiyalmapo,” diyo.

24 Epalati GODta Moses watle epo atlaiyo, “Wa: tulume A:lonye hema seme matane. Amasiyama wa: opa opi mate epame na: dla alinepi poyupo hapilalo so mateye sukulu himili tla:me hema mata demiya. Yia:ta epapelepiye, na:tapo yia: potimolowepo,” diyo.

25 Epapedeme Mosestapo ma ilame tulume opa watle Godta atlamale kokoye atlamaiyo.

## 20

### *Godta aiyalma 10 hapili*

1 Epame Godtapo epo atlaiyo,

2 “Na:ye wa: Lod GODpo. Na:tapo wa:ta Isip mo dla asiyama pa:le oko pato hamhallati seme alikili a:ma woyamuwapo. 3 Epedeme wa: Godye hatlo na:ta halapo. Wa: god hale dla pomikadepe dlowa.

4 Epame biskapa godye dlopi dota mita:pmiyo. Epedeme wa: pepele di dla ha:ha:lalo mila:pi mate epo ta:lamo dla ha:ha:lalo mila:pi mate epo yú dulu dla ha:ha:lalo mila:pi mate dla tlapame wa: dota dlopi mimita:pame edla heodepo siyemama wa: god demhalemiya. ✧ 5 Adipalati, na:tapo wa:ta epammhallati wa: yilo siyaladle mate hahamhalapo. Epapele dulu dla oplami antapo na:ye alimhallepiye, asiyama na:tapo ya: mate epo ya: yimlala mate epo ya: mamadulo mate dla ya: batalimale asiyama hamilowepo. ✧ 6 Amasiyama oplami antapo na:ye sikemte malahalemama na: yu dla dalepame salladepo sela:lepiye, asiyama na:tapo ya: mate epo ya: mamadulo alotle ha:ha:mpuluwe so dla na:ta bokotiyapo malamale patoye yia: dla himhallowepo.

7 Epedeme wa: Lod GOD hiye isikimi posolowa. Adipalati, na:tapo epapalalo oplami dla wotiyalle hamilipe.

✧ 8 Epame wa:ta inoma sumalalo alilaye woloma aiyalma depo halane. ✧ 9 Adipalati, wa: dla alila 6 me-hutiyepo, wa:tapo alila edla wa:ta solotamale oko halomoloweye.

✧ 10 Amasiyama 7 alila dla oko hala aiyalmapo. Adipalati, alila eye na: hi di dla ta:demha:ha:mama na: dla inoma sumha:ha:lowe alilapo. Epapele dulu dla alila oloma edla wa: mate epo wa: yimlala mate epame wa: oko so mate epame wa: aliya matetapo oko pohalomha:ha:lowa. Epame asepe so wa: mate ha:ha: mape oko pohalomha:ha:lowa. 11 Adipalati, alila 6 dulu dla na:ta omapla mate

✧ 19:16: Bob 4:5 ✧ 19:16: Dit 4:11-12 ✧ 20:4: Eke 34:17; Leb 19:4, 26:1; Dit 4:15-18, 27:15 ✧ 20:5: Eke 34:6-7; Nam 14:18; Dit 7:9-10 ✧ 20:7: Leb 19:12 ✧ 20:8: Eke 16:23-30, 31:12-14 ✧ 20:9: Eke 23:12, 31:15, 34:21, 35:2; Leb 23:3

epo ta:lamo mate epo kaula mate epame dulu edla ha:ha:lalo alisisi hapulomaye mimita:puwapo. Epame 7 alila dla na:ta hedepo poluwapo. Epapele koko tle na:ta 7 alila iye aiyalma duwapo.

✧ <sup>12</sup> Epame wa: a yu mate epo wa: wai yu mate dla heodepo salladepo sela:ne. Wa:ta epapelepiye, etapo na:ta wa: watle ta:la hami hema kokó hallepe.

✧ <sup>13</sup> Epame ya:mkale yumula aiyalma.

✧ <sup>14</sup> Epame upo opa mate epo upo wola: mate uhala aiyalma.

✧ <sup>15</sup> Epame ya:mkale alisisi uhala aiyalma.

✧ <sup>16</sup> Epame ya:mkale hi mate isikimi mala-atla aiyalma.

✧ <sup>17</sup> Epame ya:mkale alisisi natipame etlo na:ta: halowo depame solotamale himila aiyalma. Epapele dulu dla ya:mkale aya mate epo ya:mkale ya:llu mate epo ya: oko so mate epo ya: halo mate epo ya: alisisi hapuloma mateye na:ta halomolowo depame solotamale himila aiyalma.” ✧

<sup>18</sup> Epalati opatapo omapla yu mate epo hulu yu mate dalemama omaplata hela:hela:dle mate epo namile patota tamali di dla bulamhetamhallati natiyo. Epalati yia:tapo sikemte wowota:le mate eseselalalimama pateka:mu tle omha:ha:iyo. ✧

<sup>19</sup> Epammama yia:tapo Moses watle epo atlamyaiyo, “Wa:tapo dia: dla yukapo ilipiye, eta di dallowepo. Amasiyama Godta dia: dla yukapo ilipiye dia: palliwe sepena,” demyaiyo.

<sup>20</sup> Epalati asiyama Mosesta yia: watle epo atlaiyo, “Ase sikemte wowota:miya. God-tapo ya:ta itiyamale nati-iliwedeme ipapele api tle dia: dla mo-malalepo. Epapedeme wowota:le mate ya: yu dla salladepo siyamama batalimale koko halomiya,” diyo.

<sup>21</sup> Amasiyama opatapo ala me-pateka:mu dla ha:ha:lali Mosesta meyelope namile amtuwale dulu dla God mateka:pi dla kulume hetaiyo.

## 32

### *Opata biskapa god dlopi dota mita:pele dla sisiyemha:ha:le*

<sup>1</sup> Epame ma Mosesta tamali di dla hetame ma ilame hapele pomallalo wekelati Isalael sotapo A:lon hala dla puame alupame ya: watle epo atlaiyo, “Di Isip mo tle hema elempuwa Mosesye hapele popuasema. Di podimalamana ya:ye hadima tauwo? Epedeme wa: di elemtlowe godye dota mita:pene,” demyaiyo. ✧

<sup>2</sup> Epalati A:lontapo yia: watle epo atlaiyo, “Wua: wola: mate epo wua: akimlala mate epame wua: utukaka mateta gold sutulu molo dla didiyepo siyamaye na: watle uptipo halopiya,” diyo. <sup>3</sup> Epapalati yia:ta hapulomatapo yia: gold sutulu uptipame A:lon watle halopimyaiyo. <sup>4</sup> Epalati ya:tapo eye halopame dlapa dla holopo potollati bulumkiyawa aliya mila:pi sepeleye mita:piyo. Epame opatapo i natipame epo atlamyaiyo, “Isalael so, iye di godpo. God itapo dia:ye Isip mo tle eleme alikili a:ma woyamuwapo,” demyaiyo. ✧

<sup>5</sup> Epalati A:lonta yu i dalepame God dla alinepi poyupo ha:lalo tileye bulumkiyawa aliya ya:ta mita:pele mateka:pi dla hapame epo atlaiyo, “Iyela GOD hi di dla ta:demama daya pato dlowepo,” diyo.

<sup>6</sup> Epapeleye utulala ikadepe dla opatapo aliya haloye poyupo dlopi dota mita:pele god dla hapimama halomha:ha:iyo. Epame yia:tapo daya pato demama kawata yúye sikemte dlopame siyalemyemama wola: mate epo opa mate uhalomyaiyo. ✧

✧ **20:11:** Yen 2:1-3; Eke 31:17 ✧ **20:12:** Dit 27:16; Ma:t 15:4, 19:19; Maka 7:10, 10:19; Luk 18:20; Epe 6:2, 3 ✧ **20:13:** Yen 9:6; Leb 24:17; Ma:t 5:21, 19:18; Maka 10:19; Luk 18:20; Loum 13:9; Yei 2:11 ✧ **20:14:** Leb 20:10; Ma:t 5:27, 19:18; Maka 10:19; Luk 18:20; Loum 13:9; Yei 2:11 ✧ **20:15:** Leb 19:11; Ma:t 19:18; Maka 10:19; Luk 18:20; Loum 13:9 ✧ **20:16:** Eke 23:1; Ma:t 19:18; Maka 10:19; Luk 18:20 ✧ **20:17:** Loum 7:7, 13:9 ✧ **20:18:** Hib 12:18-19 ✧ **32:1:** Taiya 7:40 ✧ **32:4:** 1Dok 12:28; Taiya 7:41 ✧ **32:6:** 1Kol 10:7



<sup>7</sup> Epapele oloma dla Mosestapo tamali di dla ala me-hallati GODtapo opata koko halomha:ha: natipame ya: watle epo atlaiyo, “Wa: ma ilame tulune. Adipalati, opa wa:ta eleme Isip mo tle alikili a:ma woyamuwaye batalimale koko pato halomha:ha:po. <sup>8</sup> Epedeme na:tapo yia: watle molo atluwa yuye ma-hamastana. Epame yia:tapo biskapa god dlopi dota mita:pele bulumkiyawa mila:pi sepeleye mita:pame edla sisiyemha:ha:po. Epame yia:tapo alinepi poyupo ya: watle hapimha:ha:mama epo atlamha:ha:po, ‘Isalael so, iye di godpo. Ya:tapo dia:ye Isip mo tle eleme alikili a:ma woyamuwapo,’ demyapo. <sup>9</sup> Epedeme na: iwolota dupa kokalalimale kokoye ma-natima. <sup>10</sup> Epedeme na: yia: dla sikemte siyalademama yia:ye hapuloma poyupa:mollowama. Epapele dulu dla wa: na: apiye pohimomollowa. Amasiyama Moses, hatlo wa: tle na:tapo na: opaye ma pasatlowepo,” diyo.

<sup>11</sup> Amasiyama GODta malamale meyelope dlepo depame Mosestapo ya: dla otele pato himimama epo atlaiyo, “GOD, wa:ta itiyamaletapo opa iwoloye Isip mo tle eleme alikili a:ma woyamuwapo. Epapedeme wa:ta siyaladleta yia:ye potimiya. ✧ <sup>12</sup> Wa:ta yia:ye potimelepiye, asiyama Isip sotapo epo malamelepe, ‘Godta ya: opaye isikimi potimolowedeme Isip mo itle eleme alikili a:ma woyamana,’ dlepe. Epapedeme wa:ta siyalademama yia:ye potimele dleye memelene. <sup>13</sup> Adipalati, wa:tapo di mamadulo A:iblaham mate epo Aisek mate epo Yokob mate dla yu itiyapo himiwa kokoye e malamane. Ame adipalati, wa:tapo yia: watle epo atluwapo, yia: mamadulotapo sikemte pasatamama tamili some hallepe. Epame wa:ta yia: watle hamili duwa moye yia:ta halepe duwapo. Epame ta:la itapo yia: hi mate kokó mepo ellepe duwapo,” diyo. ✧ <sup>14</sup> Epalati GODtapo Moses yu dalepo ya:ta malamaleyey meyelope depame yia:ye popotimalalo wekiyo.

<sup>15-16</sup> Epame Mosestapo tamali di tle Godta ewala dapiyamte dla aiyalma 10ye seme mate seme mate hatitipo halopiliye halopo tuluiyo. <sup>17</sup> Moses ala tulumhallati ya: gadlalo oplami Yosuwata api duka dla ala me-ompolomama dallati opata siyalle yu daliyo. Epame Moses watle epo atlaiyo, “Na: opahaleta di opaye hustepo kotlomale yuye dalesema,” diyo.

<sup>18</sup> Amasiyama Mosesta ya: watle asiyama epo atlaiyo, “Hao, opahale sota kotlomale yu epapele podalesema. Amasiyama siyalemama sala sale yu tlo dalema,” diyo.

<sup>19</sup> Epedeme Mosesta kimna:ya dla tulume natilati biskapa god dota mita:pele bulumkiyawa aliya mila:pi sepele mate epo opata siyalle koko mate natipame sikemte siyaladiyo. Epammama ya:tapo ewala dapiyamteye medla pololemama susupolatalemaiyo. <sup>20</sup> Epo halemama biskapa god dlopi dota mita:peleye dlapa dla mistaiyo. Epame sikemte potolumama sokane some hallati yú dla kustaiyo. Epame yú eye Isalael so watle dlomaiya diyo. <sup>21</sup> Epo A:lon dla helestame halemama epo atlaiyo, “Opa iwolotapo wa: dla apa koko halati asiyama wa:tapo yia:ye batalimale koko pato hema elemtuluwa?” diyo.

<sup>22</sup> Epalati A:lonta asiyama Moses watle epo atlaiyo, “Wa: ase na: mate sikemte siyalademiya. Adipalati, opa iwolo kokoye mo-wa:malamana. Yia:ye alila hapuloma batalimale koko halomolowe dla ma-dinapopo siyamdepo. <sup>23</sup> Epapedeme yia:tapo puame na: watle epo atlemama dia:ye Isip mo tle alikili dla eleme woyamuwa Mosesye hadima tauwa? Epedeme wa: di elemtlowe godye dota mita:pene, duwapo. <sup>24</sup> Epalati na:tapo yia: yu dalepame yia: watle atlemama wua: gold sutulu uptipame na: watle halopo puaiya duwapo. Epame yia:tapo alisisi eye mo-halopo pulati na:tapo e halopame dlapa alemalle dla potolupo depame bulumkiyawa aliya mila:pi sepele iye mita:puwapo,” diyo.

<sup>25-26</sup> Epapele dulu dla Mosestapo A:lonta opa batalipo eleme tale koko tle opahale sota yia: natipo eimela:lala depo malapame kimna:yata popa:mtame gudle dla halemama yu

teta:le mate yia: watle epo atlaiyo, “Opa anawolotapo GOD tiyama dla ha:ha:lepiye, na:ta hala dla pumulaiya,” diyo. Epalati Libai elele halomale sotapo ya: hala dla pumulaiyo. <sup>27</sup> Epalati ya:tapo yia: watle epo atlaiyo, “Isael so di Lod GODtapo epo atlema, ‘Wua: aipa:ya halopame kimna:ya dulu dla siyamama mo-wua: amkadulo mate epame mo-wua: asiyadulo mate potimtamalaiya,’ ” diyo. <sup>28</sup> Epalati yia:tapo Moses yu dalepame kimna:ya dulu dla siyamama 3000 opaye potimaiyo.

<sup>29</sup> Epame Mosestapo Libai elele halomale so watle epo atlaiyo, “Wua:tapo God yu dalepo salladepame mo-wua: amkadulo mate epo mo-wua: asiyadulo mate potimolowe dla wowota:mama po-alina. Epapele koko tle wua:tapo Isael so dulu dla GOD ka: epo opa ka: duka dla ha:ha:lalo so depo ha:ha:lepe,” diyo.

<sup>30</sup> Epame ma alallati Mosesta opa watle epo atlaiyo, “Wua:tapo batalimale pato ma-halomalepo. Epapedeme na: ma ilame tamali di dla wua: bobtalimale yilo GOD mate yukamama otele himila hetlowepo. Adipalati, pona:malamana, ya:tapo wua: bobtalimaleye hiyollowe sepena,” diyo.

<sup>31</sup> Epammama Mosestapo ma ilame hetame GOD watle epo atlaiyo, “Opata batalimale koko pato hamama yia:skamu biskapa god dlopi dota mita:pame edla sisiyemha:ha:uwapo. <sup>32</sup> Epapedeme na: wa: dla otele pato himima, wa:tapo yia: bobtalimaleye hiyolepo wellipo depame. Amasiyama wa:tapo yia: bobtalimale hiyollowe allipiye, asiyama na: hi wa: buka dulu dla elaye e tlo hiyostane,” diyo.

<sup>33</sup> Epalati GODta asiyama Moses watle epo atlaiyo, “Opa anawolotapo na: dla batalimale koko mo-halomuwa, opa ewolo hi tlope na:tapo na: buka tle hiyotimolowepo.

<sup>34</sup> Epapedeme na:ta wua: watle hamilowepo depo yu itiyapo himiwa mo dla wa: opa eleme ma-tane. Epalati na: banakaka oplamitapo wua:ta tlati itapu tle telepe. Epapele dulu dla na:tapo yia: watle yia: bobtalimale asiyama hamilowe alilata woyamalati yia: watle yia: bobtalimale asiyamaye hamilowepo,” diyo.

<sup>35</sup> Epammama opatapo A:lonta biskapa god mita:pele dla mikadepe depo edla sisiyemha:ha:le koko tle GODtapo yia: batalimale asiyama dla esiyele pato hamiyo.

### 33

<sup>1</sup> GODta ma Moses watle epo atlaiyo, “Wa:ta Isip mo tle elempuwa opa mate mo i saliyome na:ta: mo-powataliya wua: watle hamili duwa mo dla tane. Adipalati, na:tapo A:iblaham mate epo Aisek mate epo Yokob mate dla yu itiyapo himmama mo eye yia: mamadulo watle hamili duwapo. ☆ <sup>2-5</sup> Mo eye pta ka:pi, dlowe alisisiye pta wokasemana. Wua:ta tlati na:tapo na: banakaka oplamiye wua: mate tane dlowepo, ya:tapo wua: mate halemama Keinan so mate epo Amoli so mate epo Hitai so mate epo Pelisi so mate epo Hibai so mate epo Yebusi so mateye alikili a:ma posallepe. Amasiyama Isael soye na: yu dolumolowe dla pta dupa kokalalimale sopo. Epapedeme na:ta yia: mate potlowa. Adipalati, na:tapo yia:ta duka dla tamalemama dupa kokalalimale koko natipame yia: potimalala. Epapedeme watapo yia:ta yia:skamu yia: moto dla goldta mimita:pele alisisi mate dinapele kokoye medla uptimelepe. Epalati na:tapo yia: dla halowe kokoye alotle atlowepo,” diyo.

Epalati opatapo GODta atlale yu i dalepame sikemte dupa kolle mate a:lemyemama yia:tapo goldta mimita:pele alisisi didiyepo ha:ha:leye medla uptimyaiyo. <sup>6</sup> Epapele koko tle Isael sotapo Sainai tamali kikiwi isili dla gold alisisi matle didiyepo siyamolowe medla memeliyo.

#### *God mate yukamalalo kimna:ya*

<sup>7</sup> Isael sota kintimale alikili tle Mosestapo kimna:ya hale hapame semama God mate yukamalalo kimna:ya demdiyo. Opatapo GOD tle yu dallowe solotamama

kimna:ya edla tamdiyo. <sup>8</sup> Amasiyama Mosestapo God mate yukamalalo kimna:ya edla tlati opatapo yia: kimna:ya tle sillipame kokoloma tle omha:ha:lati Mosesta kimna:ya dulu dla tumdiyo. <sup>9</sup> Mosestapo kimna:ya dulu dla mo-tulati wuala deiya-maletapo kokoloma tala dla malame bodepo halemdiyo. Epalati GODtapo Moses mate yukamhalemdiyo. <sup>10</sup> Epalati opata wualata mo-malla natipame yia: kimna:ya kokoloma tala dla ha:ha:mama God dla heoheodemdiyo. <sup>11</sup> GODtapo Moses mate yukamhalemama oplamita ya:mkale mate mila:pi hatlo atumapo yukamhalemdiye, epammhalemdiyo. Mosestapo God mate yukamhallepo gudepame ilame tlati asiyama ya: gadlalo kipiliyemala Nun yami Yosua tlopo God mate yukamalalo kimna:yaye posaliyome tasemdiyo.

### *Mosestapo Godta ya: gadlepo depo solotamale*

<sup>12</sup> Mosestapo GOD watle epo atlaiyo, “Wa:ta na: watle atlemama opa iwoloye elemtane demhalapo. Amasiyama wa: ala na: gadepo tlowe oplamiye ponati-isema. Epame wa:tapo na: natipo siyemama na:ye wa:mkale ikadepe demdepo. <sup>13</sup> Amasiyama wa:ta ikadepe na: dla siyemhalema dlepiye, na: watle wa:ta malamale kokoye imane. Epalati asiyama na:tapo wa: yu dla salladepo sela:lati wa:ta natipame siyemhala kokota mellepe. Epele dulu dla wa: malamane, opa iwoloye wa:ta sesalemale sopo,” diyo.

<sup>14</sup> Epalati GODta Moses watle epo atlaiyo, “Hawa, na:ta wa: gademama wa: mate tlowepo,” diyo.

<sup>15</sup> Epalati Mosesta epo atlaiyo, “Wa:ta ikadepe dia: mate potlalo wekeli dlepiye, dia:ye wa:ta sale mo edla taiya demiya. <sup>16</sup> Amasiyama wa:ta dia: mate telepiye, eta mo opi sotapo wa:ta ikadepe dia: dla siyemhalemama dia: mate hala kokoye malamelepe. Epame yia:tapo dia:ye ikadepe wa:ta sesalemale so opa mleni dlepe,” diyo.

<sup>17</sup> Epalati GODta Moses watle epo atlaiyo, “Na:tapo wa:ta solotamale koko halowepo. Adipalati, wa:ye namkale ikadepepo. Epedeme na: wa: dla siyema,” diyo.

<sup>18</sup> Epalati Mosesta God watle epo atlaiyo, “Na: wa:ta hela:dle mila:pi ikadepe natilowe solotama,” diyo.

<sup>19</sup> Epalati GODtapo Moses watle epo atlaiyo, “Na:ye GODpo. Epedeme na:tapo na:ta: sesalemale so dla polowamale koko mate epo bokotiyapo malamale koko mate nati-imdepo. Epapedeme na:tapo wa: watle na:ta hela:dle nati-imama na: hi ma atlowepo.

✧ <sup>20</sup> Amasiyama wa: na: mila:pi ikadepe tlo ponatilowa. Adipalati, na: mila:pi ikadepe natilalo oplamiye polope,” diyo. <sup>21</sup> Epame matle epo atlaiyo, “Na: mateka:pi dla teiko halaye wa: edla hetame halane. <sup>22</sup> Epalati na:ta hela:dle mate wa: hala dla pumama na: do mate wa:ye kukomama teiko dulu dla hemele hatiyomellowepo. <sup>23</sup> Epame na:ta wa:ye ma-tla:mtamama wa:ta isikimi na: ko tlo natilipo depame wa:ye ma haliyamale dla pamollowepo. Adipalati, opata na: mila:pi ikadepeye natilowe pta aiyalma.”

## 34

### *Ewala amko dapiyamte*

<sup>1</sup> GODta Moses watle ma epo atlaiyo, “Na:ta ka:yapa aiyalma kokoye ewala dapiyamte dla hatitipo hapilati wa:ta hauwokokomuwa epapele ewalaye ma amko mimita:pene. Epalati ma na:tapo aiyalma hatlo meye monolo hatitimolowepo. <sup>2</sup> Epapedeme wa: iyela utulalati ewala dapiyamte e halopame Sainai tamali di dla na: hala dla matelepe. <sup>3</sup> Epele dulu dla oplami haletapo wa: mate pomatlowa. Epame opa mate alinepi mateta tamali mateka:pi dla populuwa,” diyo.

<sup>4</sup> Epalati Mosestapo GODta atlale yu e dolumama ewala dapiyamte mimita:pame halopo utulalati ikadepe Sainai tamali di dla hetaiyo. <sup>5</sup> Epalati GODtapo wuala dulu dla malame Moses mate halemama ya: hi ikadepe semama na:ye GODpo diyo. <sup>6</sup> Epame

ya:tapo Mosesye me-hallati tla:mtamama epo atlaiyo, “Na:ye GODpo. Na: dla polowa-male koko mate epo sadle koko mate epo bokotiyapo malamale koko mate hutiyepo. Epapele dulu dla na: na:ta yu itiyapo hatitimale hapulomaye pohauwokokomasemde. ✧  
 7 Na: opa hapulomaye bokotiyapo malamama yia: bobtalimaleye hiyotipo welimdepo. Epapele tlope na:tapo batalimale walle oplami dla asiyama pohamilalo powekesemde. Epedeme adulo yia: bobtalimale asiyama dla na:tapo yia: yimlala dla epo yia: mamadulo dla asiyama wotiyalle hapimdepo,” diyo.

8 Mosesta alumata ta:la dla akukulumpolomama God dla heodepo epo atlaiyo, 9 “Na: God, wa:ta ikadepe na: dla siyemhalema dlepiye, di saliyome tamiya. Na:malamana, opa iwoloye wa: yu dolumolowe dla pta dupa kokalalimale so. Amasiyama epapele tlope di bobtalimaleye wa:tapo hiyostepo welipame ma wa: opa ikadepe dene,” diyo.

10 Epalati GODta epo atlaiyo, “Na:tapo yu itiyapo himma, Isalael sotapo ikadepe na:ta sesalemale so depo ha:ha:loweye. Epapedeme na:tapo yia: mila:pi tle ulugiyemale koko patoto ta:lamo hema pahalalo wekele kokoye halomolowepo. Yia:tapo na:ta wa: yilo itiyamale pato mate wa: gademhala kokoye natipame yiyellepe. 11 Epapedeme na:tapo Amoli so mate epo Keinan so mate epo Hitai so mate epo Pelisi so mate epo Hibai so mate epo Yebusi so mateye na:ta wua: watle hamilowe mo tle alikili a:ma dodolomsallowepo. Amasiyama na:ta epapelepo depame wua:tapo na:ta atla yu hema dolumha:ha:iya.

12 Eye, wua:tapo mo edla ha:ha:lalo so opa mate namkale demha:ha:miya. Wua:ta yia: mate namkale demha:ha:lepiye, yia:tapo wua:ye batalimale koko dla elemtullupe.

13 Amasiyama wua:tapo yia:ta alinepi poyupo yia: god dla ha:lalo tile hapulomaye dodokotimaiya. Epame yia: aiyalma ewalaye susupolatipame ma yia: aiyalma daliye hauwokokomaiya. ✧ 14 Epame wua: hatlo na: dla heodemha:ha:mama god opi dla mikadepe demha:ha:miya. Adipalati, na:tapo wua: yilo hahamalalo GOD halapo. 15 Epedeme wua: wolomape! Mo edla ha:ha:lalo so opa mate namkale depo ha:ha:miya. Adipalati, yia:tapo wua:ye na: tle eleme ma yia: biskapa god dla sisiyemama yia: dla hapili daya ma dlomlala. 16 Epedeme wua:tapo wua: akimlala dla edla ha:ha:lalo mo so wola: halopimiya. Adipalati, yia:tapo wua: akimlalaye eleme yia: biskapa god dla sisiyelowe dla tullala.

17 Epedeme biskapa godye dlopi dota mimita:miya. ✧

18 Sokomoko hapuloma dulu dla Abib mama umulati alila 7 dulu dla wua: yimkata alu-pame daya dele demama palawa daya yist mate podukumalalo wekele dlomha:ha:iya. Adipalati, Abib mama dulu dla alila oloma iye na:tapo wua:ye Isip mo tle alikili dla eleme woyamuwapo. ✧

19 Wua: akimlala itapu hohomale soye na: watle hohopo iya. Epame wua: aliya halo patetalo itapo usulli mape na: watle hohopo iya. ✧ 20 Amasiyama wa: donki aliya tlo na: watle hamili hallepiye, wa: e tlo ma ilame hammama asiyama sipi aliya amkota:le tlo yumpame na: watle hamilipe. Amasiyama epapele dulu dla wa: sipi aliya yumuluwe allipiye, donki aliya tlo tumuku kestlepe. Epapedeme wua: akimlala itapu hohomale na: watle hohopo iliye ma asiyama mate na: tle ilame hohomelepe.

Oplami haleta namkale dle alisisi dimi na: hala dla populuwa. ✧

21 Alila 6 dulu dla wua: oko dla ha:ha:lepe. Amasiyama alila 7ye wua:ta hedepo popa:lowe alilapo. Epele dulu dla wua: dlowe alisisi emolowe alila mate epo hauwal-lowe alila mate dla alila ita woyamelepiye, aseka mepapele hedlepe. ✧

22 Witi dayata ma-namalati hauwalepame yimkata alupo daya pato de demha:ha:lepe\*. Epame Kotiyopa alila dla Kimna:ya daya dele demama yimkata

✧ 34:6: Eke 20:5-6; Nam 14:18; Dit 5:9-10, 7:9-10 ✧ 34:13: Dit 16:21 ✧ 34:17: Eke 20:4; Leb 19:4; Dit 5:8, 27:15

✧ 34:18: Eke 12:14-20; Leb 23:6-8; Nam 28:16-25 ✧ 34:19: Eke 13:2 ✧ 34:20: Eke 13:13 ✧ 34:21: Eke 20:9-10,

23:12, 31:15, 35:2; Leb 23:3; Dit 5:13-14 \* 34:22: Witi daya hauwalepo daya dele iye ma alotle Yu sota semama Pentikos daya dele demdiyo.

alupo daya pato de demha:ha:lepe. ✧ <sup>23</sup> Epapedeme sokomoko hatlo dulu dla wua: opa hapulomatapo dapahatlo oloma dla na: mila:pi tle hetame alumademha:ha:lepe. Adipalati, na:ye Isalael so wua: Lod Godpo. <sup>24</sup> Amasiyama wua:ta ta:la halowedeme ha:ha: mo edla ha:ha:lalo soye na:tapo dodolomsalepame ma ta:la eye popolalepo mellowepo. Epalati wua:ta mo edla ha:ha:mama sokomoko hatlo dulu dla alumale dapahatlope i halomha:ha:lali opa ewolotapo ma ilampuame wua: ta:la halowedeme wua:ye pokotlomolowa.

<sup>25</sup> Wua:tapo na: watle alinepi poyupo hapimha:ha:mama wua: yist mate dukumale alisisiye pohapimha:ha:lowa. Epame wua:tapo Namilatale daya dele dla daya pomelleye pohatitimha:ha:lowa, dlapa dla mistemha:ha:lepe. ✧

<sup>26</sup> Na:ye wua: Lod Godpo. Epedeme wua:ta emale alisisitapo ka:yapa milimale alisisiye hauwalepame na: aiyalma aya dla halopo pua demha:ha:lepe.

Epame gaut aliya yemalaye ya:ya memeko mate hatlo dukupo ha:miya.” ✧

<sup>27</sup> Epame GOD matle Moses watle epo atlaiyo, “Yu iye buka dla hatitimane. Adipalati, na:tapo wa: dla epo Isalael so dla yu itiyapo himiwa ya: asiyamaye wua:tapo na:ta imuwa koko hapuloma iye woloma dolumha:ha:lepe,” diyo.

<sup>28</sup> Mosestapo tamali di dla 40 alila mate epo utula:la mate dulu dla GOD mate halemama daya mate epo yú mate podlalo halaiyo. Epame Godta ewala dapiyamte dla aiyalma koko 10ye hatitimaiyo.

*Moses ya: mila:pita sikemte hela:demama usiyemale koko*

<sup>29</sup> Mosestapo Sainai tamali di dla God mate yukamhalepo depame ewala dapiyamte dla aiyalma koko hatitimaleye halopo malaiyo. Amasiyama ya: malemama ya:ta GOD mate yukamhalale koko tle ya: mila:pita usiyemale mate halaleye ya:skamu pomalanatiyo. ✧ <sup>30</sup> Oloma edla A:lon mate epo Isalael so mate Moses mila:pitapo hela:demama usiyemale mate hallati natipame wowota:mama ya: hala dla kulume potumulaiyo. <sup>31</sup> Amasiyama Mosestapo yia: sisilamaiyo. Epalati A:lon tapo Isalael opa yia: dokopala so eleme Moses hala dla tulati ya:tapo yia: mate yukamhalaiyo. <sup>32</sup> Epame alotle Isalael so opa hapulomatapo puame ya: hala dla alumalati ya:tapo Sainai tamali di dla GODta ya: watle aiyalma koko hamiliye ma yia: watle imhalaiyo.

<sup>33</sup> Mosestapo yia: mate yukamhalepo gudepame ya: mila:piye tluka mate bopudiyo. Adipalati, ya: mila:pitapo ala me-sikemte usiyemhalaiyo. <sup>34-35</sup> Epalati Mosestapo kimna:ya dla tame GOD mate yukamolowedeme ya: mila:pi bopudlalo tlukaye alikili dla himimdiyo. Epame Godta atlamale kokoye ma Isalael so watle atlamolowedeme halemama ya: mila:pi ma bopudemdiyo. Adipalati, yia:ta natilati Moses ya: mila:pitapo sikemte usiyemale mate halemendiyo.

✧ **34:22:** Leb 23:15-21, 39-43; Nam 28:26-31 ✧ **34:25:** Eke 12:10 ✧ **34:26:** Dit 24:21, 26:2 ✧ **34:29:** 2Kol 3:7-16



## Yona Yona buka ya: dulu koko

Yona buka iye buka takala dulu dla elapo. Yonaye Yu so mo dla God yu molo atlalo oplami halaiyo. Epedeme buka dulu hema Godta Yona watle epo atlaiyo, “Wa: Niniba mo dla na: yuye hamtane,” diyo. Amasiyama Niniba so mate Yu so mate opahale demha:ha:mdiyo. Epapele koko tle Yonaye Niniba mo dla tlowe aliyo. Adipalati, ya: solotamaiyo, Godta Niniba mo so poyulupo depame.

### *Yonata God tle teletale*

<sup>1</sup> Alila haleta Godta Amitai yami Yona watle epo atlaiyo, ✧ <sup>2</sup> “Wa: Niniba mo pato dla na: yuye itiyamale mate atlamhalla tane. Adipalati, na: tapo yia: ta batalimale koko pato halomha:ha:leye ma-natima,” diyo.

<sup>3</sup> Amasiyama Yonata God yu dalepame alimama teletaiyo. Ya: Yopa mo dla tulume kaula peleyama dla koa pato natiyo. Koa eye Talsis mo dla tlowedeme elaiyo. Ya: koa edla asiyama himpame posokolopo ma Talsis mo dla taiyo, God tle hemele haod-lowedeme.

<sup>4</sup> Oloma edla GODta sokomoko patoye kaula dla hamiyo. Epalati ulo patotota sillimama koa patoye gaglatimala yakomtaiyo. <sup>5</sup> Epedeme koa sosollalo sota wowota:mama yia: god meyelo pe meyelo dle dla otele hatitimaiyo, yia: gadlepo depame. Epame yia: koata holokamelepo depame, yia: alisisi koa dulu dla hutieyele yú dulu dla pololiyo.

Amasiyama Yonaye koa dulu isili ikadepe dla tulume sikemte elaiyo. <sup>6</sup> Epalati koa dokopala oplamita tulume Yonata ellati esesa:mama epo atlaiyo, “Wa: apa ham-elema:? Sila:tipame wa: God dla inoma sumama sisilamane. Pona:malamana, wa: Godta di natipo bokotiyamama di pasakalo gadlowe sepena,” diyo.

<sup>7</sup> Epalati koa sosollalo sota yia:skamu yia: dulu dla atlanati atlanati demama epo atlamyaiyo, “Sokomoko mate epo ulo mate sila:ti iye, anta batalimaleta amma:?” demyaiyo. “Epedeme di osolo mate koko i malanatilowa,” diyo. Epame yia: osolo ipo ha:ha:mama natilati Yona tlo malanatiyo.

<sup>8</sup> Epedeme yia: Yona watle epo atlaiyo, “Di atlane, sokomoko pato puaye, anta batalimaleta api? Wa: apa oplamita:? Wa: hadima halemdi? Wa: apa oko hamdi?” demyaiyo.

<sup>9</sup> Epalati Yonata yia: watle asiyama epo atlaiyo, “Na:ye Hibulu oplami. Na: pepele di mate epo ta:lamo mate mimita:pele God dla mikadepe demde,” diyo. <sup>10</sup> Epame koa sosollalo so watle ya:ta GOD tle teleta kokoye atlaiyo. Epalati yia:ta yiyelepame Yona watle epo atlaiyo, “Wa: ka:dle koko pohasema,” demyaiyo.

<sup>11</sup> Oloma edla ulo patotota ma-a:ma ta:mntlati koa sosollalo sota Yona watle epo atlaiyo, “Sokomoko ita ka:llipo depame, di apa koko wa: dla hapa:?” diyo.

<sup>12</sup> Epalati Yonata asiyama yia: watle epo atlaiyo, “Na: batalimaletapo sokomoko patota wua: dla mo-pualepo. Epedeme na: tlo hampame kaula dla hamastaiya. Epelepiye, ulo patoto mate epo sokomoko mateta medla ka:llipe,” diyo.

<sup>13</sup> Amasiyama yia: Yona yu podallalo ma tamali dla sosolomtlowe solotamaiyo. Epele tlope sokomoko mate epo ulo matetapo itiyamama yia:ta tamali dla tlowe apiye ponatiyo. <sup>14</sup> Epedeme yia: God watle yu sisikalle mate epo atlamyaiyo, “God, dita Yonaye hamame yú dla ka:stlati asiyama wa:ta dia:ye potimiya. Adipalati, koko iye podi batalimale, wa:ta dinapele kokopo,” demyaiyo.

✧ 1:1: 2Dok 14:25

<sup>15</sup> Epame yia: Yona hamame kaula duka dla ka:stlati pakasiyamalalo oloma medla ulo mate sokomoko mate ka:ka:liyo. <sup>16</sup> Epalati yia:tapo Godta itiyamale koko i natipame wowota:mama aliya halo yupo GOD watle hamimama ya: dolumtlowe yu hatitimaiyo.

<sup>17</sup> Yonaye yú dula dla ollodemtullati GODta yu himili dolumama amalo patota puame ya:ye gola:diyo. Epalati ya:tapo amalo koko dula dla elemama alila dapahatlope pololiyo. ✧

## 2

### *Yonata inoma sumale*

<sup>1</sup> Yonaye amalo koko dula dla polomama, ya: Lod GOD dla inoma sumama epo atlaiyo,

<sup>2</sup> “Na: ewatalo ga:tulli dula dla tulume polowe mateka:pi dla polomama wa: dla sisilamalati wa:tapo na: yu daluwapo. <sup>3</sup> Wa:ta na:ye ewatalo yú ga:tulli duka dla hamastlati yú pato itiyamaletapo na:ye polumama namilatauwapo.

<sup>4</sup> Lod, na:ta malamaleye, wa:ta na:ye wa: mila:pi tle mosukulu alikili a:ma hamas-tamapo duwa. Epame Yu so aiyalma aya mape ponatilalo wekelowe tepo duwa.

<sup>5</sup> Yúta na:ye gola:dlati na:tapo yú dula dla susukulumeluwapo. Epame yú dula dla ollotulume ellati dokomakita na: dokopala dla popoliyemyeuwapo.

<sup>6-7</sup> Na: ewatalo ga:tulli dula dla tulume alikili a:ma woyamolowe pa:le dla elemama na:ta malamaleta na: pasakaloye alikili a:ma haodlowe tepo duwa. Amasiyama na:ta dula edla polomama wa: dla otele himilati wa:ta wa: aiyalma aya dla polomama na: yuye me-daluwapo. Epedeme na: GOD wa:tapo na: pasakaloye gaduwapo.

<sup>8</sup> Opa anawolotapo biskapa god dla mikadepe demdi, epapele soye Godta yia: dla bokotiyapo malamale himhala ka:dleye ponatilowa. <sup>9</sup> Amasiyama na: wa: dla siyele sala semama aliya halo yupo hamilowepo. Epame na:tapo alila hapuloma dula dla wa: yu dla salladepo sela:lowedeme solotamale himilowepo. Adipalati, pasakalo gadle kokoye hatlo GOD wa: tle puapo,” diyo.

<sup>10</sup> Epame GODtapo amalo pato dla atlaiyo, Yonaye tamali dla tame mumullupo depame.

## 3

### *Yonata ma God yu dla salladle*

<sup>1-2</sup> GODta ma Yona watle epo atlaiyo, “Wa: tame Niniba mo pato dla na:ta wa: watle atlamale yuye ma opa watle atlamelepe,” diyo.

<sup>3</sup> Oloma hema Yonatapo GOD yu dla salla depame Niniba mo pato dla God yu hamtaiyo. Niniba mo iye pta pato, oplamitapo Niniba mo eye seme tle ma seme dla ulumyeli dlepiye, ya: me-ulumhalemama alila dapahatlopeye polollepe. <sup>4</sup> Yona Niniba mo pato dla woyapame tamhalemama opa dla God yu atlamolowe kotiyaptaiyo. Ya: yu itiyamale mate epo atlamtaiyo, “40 alila alotle Godta Niniba moye batalipo hamastlepe,” demtaiyo. ✧

<sup>5</sup> Epapeleye Niniba sota God yu dalepo mikadepe demama opa hapuloma dokopala so mate epo mo so mate yia: bobtalimale tle heheletimaiyo. Epedeme yia:ta yia: bobtalimale tle heheletimale nati-imama daya podlalo ha:ha:mama dupa kolle tluka didiyepo ha:ha:iyo.

<sup>6</sup> Niniba mo dokopala oplamita koko i natipo ya:ta pollalo tle sila:time tluka ka:ka:dle uptipame ma dupa kolle tluka didiyepo tile apupu dla polaiyo. <sup>7</sup> Epame ya:tapo Niniba so hapuloma dla yu i hamiyo, “Yu iye dokopala oplami mate epo ya: gadlalo so mate tle wua: dla puapo. Opa hapuloma mate epo yia: halo hapuloma matetapo daya mate epo yú mate podlomolowa. <sup>8</sup> Amasiyama opa mate epo yia: halo mate dupa kolle tluka tlo didiyelepe. Epame opa hapulomata God dla otele himimama yia: bobtalimale tle ya:

hala dla heheletimelepe. <sup>9</sup> Adipalati, pona:malamana, Godta ya:ta malamale meyelope depame dia:ye popoyulalo wekelowe sepena,” diyo.

<sup>10</sup> Epedeme opa hapulomatapo yia: bobtalimale tle God hala dla heheletimalati Godta yia: natipame yia: polowamama yia: popoyulalo wekiyo.

## 4

### *Yonata Godta bokotiyapo malamale dla siyaladle*

<sup>1</sup> Godta Niniba so popoyulalo wekelati Yonata alimama sikemte siyaladiyo. <sup>2</sup> Epame ya: siyalademama inoma sumale yu mate God dla epo atlaiyo, “GOD, na:ta na: mo dla halemama malamawaye, wa:tapo Niniba mo so watle yia: batalimale asiyama pohamilowe tepo duwa. Epedeme na:Talsis mo dla teletauwa. Adipalati, na:malamana, wa: dla bokotiyapo malamale pato mate epo polowamale pato mate halapo. Epame wa: sadle mate halemama ma hapele posiyaladesemde, epame batalimale asiyama hamiloweye alimdepo. ✧ <sup>3</sup> Epedeme GOD, wa: na: pasakalo hane. Na: hallowe posolotamasema, polowe tlo ka:pi,” diyo. ✧

<sup>4</sup> Amasiyama GODta epo atlaiyo, “Yona, wa: apa koko dla siyaladle himma?” diyo.

<sup>5</sup> Epalati Yonata siyalademama Niniba mo tle alikili a:ma ulatame salita matlalo tiyama dla tame halemama usi hupo polaiyo. Ya: edla polomama apa kokota Niniba mo dla woyamolowe depame ompolaiyo.

<sup>6</sup> Lod GODta Yonata homale dla pollopo depame dukulu emaiyo. Epame Yonata dukulu natipo sikemte siyeiyo. <sup>7</sup> Amasiyama alila hale dla sali ala sokotalo teimhallati GODta yu himili dolumama sosota puame dukulu dlosalo kotimalati dukuluta powaiyo.

<sup>8</sup> Epame salita matlati Godta alemalle pato hamiyo. Oloma edla salita sisikalle mate tulumu Yona dokopala dla sikemte domaiyo. Epalati Yonaye powatlowe mateka:pi dla polomama polowe tlo solotamaiyo. Epammama ya:ta epo atlaiyo, “Na: pasakalo hallowe posolotamasema, polowe tlo ka:pi,” diyo.

<sup>9</sup> Amasiyama Godta Yona watle epo atlaiyo, “Yona, wa:ta dukuluta polati siyaladlowe poka:dena,” diyo. Epalati asiyama Yonata God watle epo atlaiyo, “Na: sikemte siyalademama polowe solotama,” diyo.

<sup>10</sup> Epalati GODta epo atlaiyo, “Dukulu iye utula:la haleta peapame ma utula:la haleta mo-powapo. Amasiyama wa: dukulu empame po-omhalana. Wa: adipalati dukulu yilo sikemte polowama:?” <sup>11</sup> Na:ta Niniba so yilo polowama tlo ka:pipo. Adipalati, Niniba mo pato dulu dla na: koko yeitamale so 120,000 opata yia: halo mate me-ha:ha:po,” diyo.

## Ka:dle molo atlale yu Ma:tiyuta ilimale Ma:tiyu

### Ma:tiyu buka ya: dulu koko

Ma:tiyuye Yesu ya: alotle tlalo oplami halepo. Ya: hi haleye Libai demdepo. Ya:ta Yu sotapo Yesu dla mikadepe dlepo depame yu ilimale iye hamiwapo. Epapele koko tle ya:ta yu ilimale dulu hema Yesutapo Buka Takala dla atla kokoye ala:msela:uwa depo. Epame Yesuye Yu sota omha:ha:uwa Kelisopo depo.

*Yesu ya: mamadulo  
(Luk 3:23-38)*

<sup>1</sup> Yesu Kelisoye Deibidi mate epo A:iblaham mate yia: asiya dulu tle puwapo. Epedeme Yesu ya: mamadulo hiye ipo.

<sup>2</sup> A:iblaham tle kotiyapame yamiye Aisekpo, epo Aisek yamiye Yokob, epo Yokob yamiye Yuda mate epo akimlala opi matepo.

<sup>3</sup> Epedeme Yuda ya: akimlalaye Peles mate Sela mate (yia: waiye Tama), epo Peles yamiye Heslon, epo Heslon yamiye Lam.

<sup>4</sup> Epo Lam yamiye Aminadab, epo Aminadab yamiye Nason, epo Nason yamiye Salmon.

<sup>5</sup> Epo Salmon yamiye Boas (Boas ya: waiye Leihab), epo Boas yamiye Obed (Obed ya: waiye Lut), epo Obed yamiye Yesi.

<sup>6</sup> Epo Yesi yamiye dokopala oplami halale Deibidipo. Epedeme Deibidi yamiye Solomon. (Solomon ya: waiye oplami Yulaya powale ya: sepeyamayo.)

<sup>7</sup> Epo Solomon yamiye Lehoboam, epo Lehoboam yamiye Abiya, epo Abiya yamiye Asa.

<sup>8</sup> Epo Asa yamiye Yehosapat, epo Yehosapat yamiye Yeholam, epo Yeholam yamiye Yusaya.

<sup>9</sup> Epo Yusaya yamiye Yotam, epo Yotam yamiye Ahas, epo Ahas yamiye Hesekeya.

<sup>10</sup> Epo Hesekeya yamiye Manase, epo Manase yamiye Amon, epo Amon yamiye Yosaya.

<sup>11</sup> Epo Yosaya yamiye Yekonaya mate epo akimlala opi matepo.

Oloma hema Isalael soye Babilon mo dla elemtaiyo, wotiyalle dulu dla ka:ka:timolowedeme. <sup>12</sup> Epedeme Isalael sota Babilon mo dla wotiyalle dulu dla ha:ha:le oloma edla Yekonayatapo maseyemala himiyo, ya: hiye Selatiyel. Epo Selatiyel yamiye Selubabel.

<sup>13</sup> Epo Selubabel yamiye Abiyud, epo Abiyud yamiye Eliyakim, epo Eliyakim yamiye Asol.

<sup>14</sup> Epo Asol yamiye Sadok, epo Sadok yamiye Akim, epo Akim yamiye Eliyud.

<sup>15</sup> Epo Eliyud yamiye Eleyasa, epo Eleyasa yamiye Matan, epo Matan yamiye Yokob.

<sup>16</sup> Epo Yokob yamiye Yosep. Epedeme Yoseptapo Meli hauwapo. A:ya Meli itapo Yesu opata semama Keliso dlaloye hamuwapo.

<sup>17</sup> Epedeme A:iblahamta halale oloma etle kotiyapo tame dokopala oplami Deibidita halale oloma edla, Yesu ya: mamaduloye 14 sota ha:ha:po. Epame dokopala oplami Deibidita halale oloma etle kotiyapo tame Babilon sota Isalael soye wotiyalle dulu dla elemtale oloma edla, Yesu ya: mamadulo ma 14 sota ha:ha:po. Epame etle kotiyapo tame Yesu hamale oloma edla mape Yesu ya: mamaduloye 14 sota ha:ha:po.

*Yesu Keliso hamale  
(Luk 2:1-7)*

<sup>18</sup> Yesu Keliso hamale kokoye ipo elema. Ya: wai Meliye Yosep watle hamilowedeme yu himpo ha:ha:iyo. Amasiyama yia: ala pohalalo ha:ha:mama Meli ya:skamu mala-natiyo, ya:ta Hela:dle Sokota itiyamale tle mopapo polaleye. <sup>19</sup> Amasiyama Yosepye koko iye dalepo batalipo malapame Meliye memellowe solotamaiyo. Epele tlope Yosepye koko ka:dle oplamiyo. Epapedeme ya: posolotamaiyo, opa inoma dali tle Meli memelloweye. Epammama ya: solotamaiyo, Meli halowepo depo yu himiliye hemele memellowedeme.

<sup>20</sup> Yosep ala koko hema me-momalamhallati God ya: banakakata milamalo ya: dla tulume epo atlaiyo, “Yosep, Deibidi ya: mama, wa: Meli halowe koko dla ase sikemte wota:miya. Adipalati, ya:ye Hela:dle Sokota itiyamale tle mopapo polapo. <sup>21</sup> Epedeme ya:tapo maseyemala hamelepe. Epalati wa:tapo ya: hiye Yesu\* sepilipe. Adipalati, ya:tapo ya: opaye yia: batalimale dulu tle elepo alikili dla woyamelepe,” diyo.

<sup>22</sup> Epapedeme koko hapuloma ita mo-wowoyamaiyo, Lodta ya: tle yu hapame molo atlalo oplami mati tle atlamale kokota mikadepe dlepo depame. Adipalati, ya:ta epo atluwapo,

<sup>23</sup> “Ipilalo oplami koko yeliyeletapo mopapo polopame maseyemala hamelepe.

Epalati opata ya: hiye Imanuwel sepilipe,” duwapo.

Hi i ya: dulu kokoye ipo elema, Godye dia: mate halapo.

<sup>24</sup> Yosep ya: elale tle sila:tipame Lod ya: banakakata ya: watle atlamale yu e dolumama Meli me-haiyo. <sup>25</sup> Amasiyama Yosep Meli hapo halemama ya: kapala ala po-umulalo hallati Melita maseyemala hamaiyo. Epalati Yoseptapo maseyemala hiye Yesu sepiyo.

## 2

### *Tamili sesa:lalo sota Yesu natila tale*

<sup>1</sup> Helodtapo Yu so mo dokopala oplami halale oloma edla Yudiya mo dulu dla Betliyem mo yemala dla Melitapo Yesuye hamaiyo. Yesu hamale alotle tamili sesa:lalo sotapo salita matlalo tiyama tle Yelusalem dla pumulaiyo. <sup>2</sup> Yia: puame Yelusalem dla woyapo epo atlamsiyamaiyo, “Maseyemala Yu so dokopala oplami hallowe hamaleye hadima elema? Adipalati, di ala di mo dla ha:ha:mama ya: tamilita mo-woyampolla natipame ya: hi di dla ta:dlowedeme pumula,” demsiyamaiyo.

<sup>3</sup> Amasiyama dokopala oplami Helod mate epo opa hapuloma Yelusalem dla ha:ha:lalo so mate koko i dalepame sikemte momalamaiyo. <sup>4</sup> Epammama Helodta aiyalma aya dokopala so mate epo aiyalma imalalo so mate sisilapame epo atlaiyo, “Kelisoye hadima hamelepe demduwa?” diyo.

<sup>5</sup> Epalati asiyama yia:ta epo atlaiyo, “Yudiya mo pato dulu dla Betliyem mo yemala dla hamelepe demduwa. Adipalati, God tle yu hapame molo atlalo oplamita ipo hatitimuwapo,

<sup>6</sup> ‘Betliyem so,

Yuda mo pato dulu dla wua: moye yimka:malapo.

Amasiyama wua: mo yimka:mala etle dokopala hallowe oplamiye pulupe.

Ya:tapo na: opa Isalael soye omhallepe,’ demduwapo.”

<sup>7</sup> Epalati Helodta koko i dalepame tamili sesa:lalo so tle tamilita woyamale alila dallowedeme hemele yia: sisilamaiyo. <sup>8</sup> Epame yia:ta asiyama yuye atla dalepame yia:ye Betliyem dla taiya demama yu ipo hamiyo, “Wua: tame maseyemalaye woloma totamtame natipo ma ilame puame na: atlaiye. Epalati na: ma tame ya: dla siyele hamilowepo,” diyo.

<sup>9-10</sup> Epalati tamili sesa:lalo sotapo Helod yu dalepame ma-tamallati yia:ta yia: mo dla tamili natili hatlo metlo ma natiyo. Yia: tamili e natipame sisিয়ে mate tamili eta

\* **1:21:** Yesu hi ya: dulu kokoye Hibulu yu mate pasakalo gadlalo demama apopo. Hibulu yu iye Yu so yia: yu ikadepepo.



itapu tlati dolumtamalaiyo. Yia: tamili dolumtamha:ha:lali tamilita tame maseyemalata ela aya di dla hedepo polaiyo. <sup>11</sup> Epalati tamili sesa:lalo sota maseyemalata ela aya dulu dla tuwame natilati maseyemalaye ya: wai Melita hamame polla natiyo. Epalati yia:tapo heodepo popa:mama maseyemala dla siyele hamimama ya: hi di dla ta:diyo. Epame ya: watle namkale dle alisisi ipapele halopiyo, gold mani epo ullu ka:pi pamalalo sosoko epame kapala huhutamalalo dakopala alisisi ka:dle. <sup>12</sup> Amasiyama yia: ma i-ilapo tlowedeme hutiyelati Godta milamalo yia: watle epo atlaiyo, “Wua: ma i-ilapo tamalemama Helod hala dla potlowa. Amasiyama wua: api hale tle ma wua: mo dla taiye,” diyo. Epalati yia:tapo yu e dolumama api hale tle yia: mo dla tamalaiyo.

### *Isip mo dla potale*

<sup>13</sup> Epo alotle tamili sesa:lalo sota ma-tamallati utula:la edla Yosep ellati milamalo God ya: banakakata tulume epo atlaiyo, “Wa: sila:time maseyemala mate epo ya: wai mate eleme Isip mo dla teletane. Adipalati, Helod ya: opatapo maseyemala e yumuluwedeme totampumullupe. Epedeme wua: potame Isip mo dla ha:ha:lepe. Wua: edla tame ha:ha:lali ma na:ta wua:ta ilampuluwe yuye atlowepo,” diyo.

<sup>14</sup> Epela dalepame utula:la edla Yosepta sila:time maseyemala mate ya: wai mate elepame Isip mo dla potaiyo. <sup>15</sup> Yia: edla tame Helodta polopo depame omha:ha:iyo. Epedeme koko ita mo-woyamaiyo, Lodtapo ya: tle yu hapame molo atlalo oplami mati tle atlale yuta mikadepe dlowedeme. Yu eye ipo, “Isip mo dulu tle na:tapo na: maseyemalaye sisilamuwapo.”

### *Akimlala potimale*

<sup>16</sup> Amasiyama Helodtapo tamili sesa:lalo sota ya: po-atlalo ma api hale tle yia: mo dla taleye dalepame sikemte siyaladiyo. Epalati ya:tapo ya: opa watle yu itiyamale hamiyo, yia:tapo Betliyem mo dla epo mo yimlala opi mateka:pi dla popa:mya dla tame akimlala yimka:sikili potimelepo depame. Epalati yia:tapo tame akimlala sokomoko dapiyamte oloma dla ha:ha:lalo so mate epo yia: ko tle hohomale so mate potimtaiyo. Adipalati, Helodta ya:skamu epo malamaiyo, “Tamili sesa:lalo sota tamili natiwa tle puame wata oloma hema sokomoko dapiyamte mo-pololepo. Epedeme na:ta na: opa watle akimlala sokomoko dapiyamte mate epo yia: ko tle hohomale so mate potimtaiya dlepiye, eta maseyemala e ma yumilipe,” diyo. <sup>17</sup> Epedeme ipapele kokota woyamama God tle yu hapame molo atlalo oplami Yelemayata atlamale yu mate ma-ala:uwapo. Adipalati, ya:ta ipo ilimuwapo,

<sup>18</sup> “A:lle yu mate wowolimiyale yu mate Lama mo dla dalepo.

Adipalati, a:ya Laiseltapo ya: yimlala yilo amsela:po.

Epedeme ya: sikemte amsela:mama ka:lliwe ponatisema.

Adipalati, ya: yimlala hapulomaye mo-potimuwapo.”

### *Yosepta Nasalet dla tale*

<sup>19</sup> Yosep ala Isip mo dla me-hallati dokopala oplami Helodye mo-powaiyo. Epalati God ya: banakaka oplamitapo Yosep ellati milamalo tulume epo atlaiyo, <sup>20</sup> “Wa: sila:time maseyemala mate ya: wai mate elepame Isalael mo dla ma ilamtane. Adipalati, maseyemala yumuluwa dlalo soye mo-paliwa,” diyo.

<sup>21</sup> Epalati Yosep yu i dalepame maseyemala mate ya: wai mate eleme ma ilame Isalael mo dla taiyo. <sup>22-23</sup> Amasiyama Helodta polati ma yami Akeleyosta Yudiya mo dla dokopala oplami halaiyo. Epalati Yosepta dalepame mo edla tlowe wota:iyo. Epalati God ya: banakakata mamisika: milamalo tulume ya: watle epo atlaiyo, “Wa: Yudiya mo dla potlowa,” diyo. Yoseptapo banakaka oplamita epo atla dalepame ma Ga:lili mo pato dulu dla Nasalet mo yemala dla halla taiyo. Epapedeme Godta ya: tle yu hapame molo atlalo oplami mati tle atlale kokotapo mo-mikadepe duwapo. Adipalati, ya:ta epo atluwapo,

“Opata Kelisoye semama Nasalet oplami dlepe,” duwapo.

### 3

*Yon opa yú dla ka:ka:timalalo oplamita yu atlamale  
(Maka 1:1-8; Luk 3:1-18; Yon 1:19-28)*

<sup>1</sup> Epedeme Yon opa yú dla ka:ka:timalalo oplamitapo puame Yudiya mo dalupa dulu dla God yu epo atlamsela:iyo, <sup>2</sup> “Wua: malamale meyelohe depame wua: bobtalimale tle heheletimaiya. Adipalati, Pepele dimo kokota\* puluweye mo-mateka:pi,” demsela:iyo.

<sup>3</sup> Epedeme Yon opa yú dla ka:ka:timalalo oplami kokoye God tle yu hapame molo atlalo oplami Aisayata ipo atluwapo,

“Oplami haletapo dalupa dulu dla yu ipo teta:mhalapo,

‘Lod apiye dinapiya.

Epame ya: apiye ka:depo dolepo himiya,’ demhalapo.”

<sup>4</sup> Yonye ka:mol aliya dlalota tluka dedlemale asiyamsela:mama alinepi kapalata akolo dla nosowe some asiyamsela:mdiyoye. Epo ya: wolomopi mate topsiyo mate demsela:mdiyoye. <sup>5</sup> Opa hapulomatapo Yon yu dallowedeme pumulumama opitapo Yelusalem tle epo Yudiya tle epame opitapo Yoden aloma pili dla ha:ha:lalo tle pumhalaiyo. <sup>6</sup> Yia: Yon yu dalepame yia: bobtalimale bobotimatimalati Yontapo yia:ye Yoden yú dla ka:ka:timaiyo.

<sup>7</sup> Amasiyama Pa:lisi so opa opi mate epo Sa:dusi so opa opi mate Yonta opa yú dla ka:ka:timhallati puame wowoyamaiyo. Epalati Yonta yia: natipame yia: watle epo atlaiyo, “Wua:ye ilama yimlalapo. Antapo wua: watle atlemama isikimi yú tutula:le kokota wua:ye Godta kasilamale pua tle hemele haohaodlepe duwa? <sup>8</sup> Wua:ta wua: bobtalimale tle ikadepe heheletimaleye wua:ta ha:ha:le pasakalo tle nati-ya. <sup>9</sup> Epame wuskamu wua: tlo A:iblaham ya: mamadulo depame Godta kasilamale tle hemele haohaodlepe demiya. Adipalati, na: wua: watle ikadepe koko atlema. God ya: dla itiyamale elapo, ewala popa: itapo ma A:iblaham ya: mamadulo ikadepe yiyeloweye. <sup>10</sup> Mutupa:yatapo dali tou dla ma-dinapopame womelapo. Epedeme dali aditapo dlomoko ka:dle pomilimalalo hallepiye, dali eye wostapame dlapa dla mistlepe.

<sup>11</sup> Na:tapo wua:ta wua: bobtalimale tle malamale meyelohe dle dla wua:ye isikimi yú siyapo dla ka:ka:tima. Amasiyama na: ko tle pua oplamita itiyamaletapo na: tla:mtana. Epedeme na:ta ya: hete alisisi uptipo halopo tlowe poka:dena. Ya:tapo wua:ye itiyamale hamimama Hela:dle Soko mate epo dlapa mate dla ka:ka:timelepe. <sup>12</sup> Ya:tapo witi daya mate epo daya kasili mate duka gladlowedeme ya: oko alisisi mate ma-dinapopo halapo. Ya:ta witi daya mate epo kasili mate duka gladepame daya siyapo tlo aya dla kolumelepe. Epame asiyama daya kasili tlo posumtlalo wekelalo dlapa dla mistlepe.”

*Yesuta yú tulli*

*(Maka 1:9-11; Luk 3:21-22)*

<sup>13</sup> Alila oloma edla Yesuye Ga:lili mo tle Yoden aloma dla puaiyo, Yontapo ya:ye yú dla ka:stlepo depame. <sup>14</sup> Amasiyama Yonta Yesuye yú dla ka:stlowe alimama ya: watle epo atlaiyo, “Wa: adipalati na:ta wa:ye yú dla ka:stlepo depame na: hala dla puo? Ka:dlepo, wa:ta na: tlo yú dla ka:stloweye,” diyo.

<sup>15</sup> Epalati asiyama Yesuta ya: watle epo atlaiyo, “Ka:dena, wata oloma hema wa:ta na: tlo mepo yú dla ka:stloweye. Adipalati, iye Godta solotamale koko ipo,” diyo. Epalati Yonta yu i dalepame Yesuye yú dla ka:staiyo.

<sup>16</sup> Epame Yesuye yú dla tulupo hetame halemama natilati Pepele dita gowaladepo hallati God ya: Hela:dle Sokotapo seselema tea some ya: dla malla natiyo. <sup>17</sup> Epalati

\* **3:2:** Alila hapuloma Ma:tiyutapo God ya: mo koko demama isikimi Pepele dimo koko demde.

Pepele di tle yuta epo malaiyo, “Iye na:ta sikemte dupa ellalo maseyemala ikadepepo. Na: ya: dla sikemte siyema,” diyo.

## 4

### *Saitenta Yesuye elemala natili* (Maka 1:12-13; Luk 4:1-13)

<sup>1</sup> Hela:dle Sokota Yesuye dalupa dulu dla semtaiyo, Saitenta ya:ye elemala natilipo depame. <sup>2</sup> Ya: 40 alila mate utula:la mate daya dimi sela:le oloma dla ma daya ta:le patota ya: dla puaiyo. <sup>3</sup> Epalati Saitenta puame Yesu watle epo atlaiyo, “Wa: ikadepe God Yami dlepiye, wa: ewala hutie i atlane daya yiyelepo depame,” diyo.

<sup>4</sup> Amasiyama Yesuta epo atlaiyo, “God yu bukata epo atlapo, ‘Oplamitapo daya siyapo tlo demhalemama pasakalo pohallowa.

Amasiyama ya: God yu tlo daya some demhalemama pasakalo hallepe,’ ” diyo.

<sup>5</sup> Epame matle Saitenta Yesu seme Yelusalem dla taiyo. Epame aiyalma aya dopuko di ikadepe dla Yesuye pamelepame ya: watle epo atlaiyo, <sup>6</sup> “Wa: ikadepe God Yami dlepiye, wa: dopuko di itle ta:la dla putuko dene. Adipalati, God yu bukata epo atlapo, ‘Godtapo ya: banakaka so watle,

wa:ye woloma omha:ha:iya, dlepe.

Epalati yia:tapo wa:ye yia: dota hamelepe,

wa: heteta tulume ewala dla heyulala depame.’ ”

<sup>7</sup> Amasiyama Yesuta epo atlaiyo, “God yu bukata ma epo atlapo, ‘Wa: Lod wa: Godta itiyamale natilowedeme ya:ye elemala natimiya,’ ” diyo.

<sup>8</sup> Saiten matle Yesu seme tamali pato di dla hetaiyo. Epame ya: watle ta:lamo patotota yia:ta itiyamale mate hela:dle mate hutie kokoye nalati-iyu. <sup>9</sup> Epame Saitenta ma ya: watle epo atlaiyo, “Wa: na: dla heodepo siyele ta:dlepiye, na:tapo ta:lamo pato iye wa: watle hamilowepo,” diyo.

<sup>10</sup> Epalati Yesuta ya: watle epo atlaiyo, “Saiten, wa: na: tle alikili a:ma tane. Adipalati, God yu bukata epo atlapo,

‘Wa: hatlo Lod wa: God dla heodepo siyele ta:demama ya: yu dla salladepo sela:ne.’ ”

<sup>11</sup> Epapele oloma edla Saitentapo Yesu saliyome taiyo. Epalati banakaka sotapo Yesuye puame gadiyo.

### *Yesuta Ga:lili dla ya: oko kotiyamale* (Maka 1:14-15; Luk 4:14-15)

<sup>12</sup> Yesutapo Yon opa yú dla ka:ka:timalalo oplamiye amtuwale aya dla ka:stale dalepame ma Ga:lili dla ilamtaiyo. <sup>13</sup> Ya: Nasalet mo saliyome ma Kapaniyem mo dla halla taiyo. Kapaniyem mo iye Ga:lili kaula peleyama dla halapo. Ta:la eye Sebulun mate epo Naptali mate yia: asiyadulo ta:layo. <sup>14</sup> Koko itapo mo-woyamaiyo, God tle yu hapame molo atlalo oplami Aisayatapo atlale mate ala:lowedeme. Adipalati, ya:ta yu ipo atluwapo,

<sup>15</sup> “Ga:lili so, wua: po-Yu so mate ha:ha:po.

Wua: ta:laye Ga:lili kaula peleyama dla elapo, Yoden aloma seme dla.

Epame opata wua: ta:laye Sebulun mate epo Naptali mate yia: ta:la demdepo.

Epedeme wua: na: yu daliya.

<sup>16</sup> Opa amtuwale dulu dla ha:ha:lalo so, wua: hela:dle pato natilipe.

Epame powaleta bopudepo ha:ha:lalo so, wua: dla hela:dle patota pulupe.”

<sup>17</sup> Epame oloma edla Yesutapo God yu imolowe kotiyamama epo imsela:iyo, “Wua: malamale meyelope depame wua: bobtalimale tle heheletimaiya. Adipalati, Pepele dimo kokota puluweye mo-mateka:pi,” demsela:iyo.

*Yesutapo ya: alotle tlalo so ka:yapa hohomale  
(Maka 1:16-20; Luk 5:1-11)*

<sup>18</sup> Alila haleta Yesu Ga:lili kaula peleyama tle polomyemama amalo halomsiyamalalo so opa dapiyamte Saimon mate epo ya: ei Endulu mate tlamaiyo. Saimon ya: hi haleye Pitayo. Epapeleye yia: mata yú dulu dla hatitimsiyamalati Yesuta pumama yia: natiyo.

<sup>19</sup> Epame yia: watle epo atlaiyo, “Wua: na: dolumpumulaiya. Wua: ka:yapa amalo halomalalo so depo ha:ha:uwapo. Amasiyama ma wata oloma itle wua: opaye ma God dla elempulalo so depo ha:ha:lepe,” diyo. <sup>20</sup> Epalati yia: yu e dalepame yia: mata medla pomelepame Yesu mate tamalaiyo.

<sup>21</sup> Epame yia: etle ma tamalemama amalo halomsiyamalalo so opa opi tlamaiyo, Sebedi ya: akimlala dapiyamte Yeims mate epo ya: ei Yon mate. Yia:ye yia: a mate koa dulu dla mata dinampopa:iyo. Epalati Yesuta yia: watle epo atlaiyo, “Na: dolumpumulaiya,” diyo. <sup>22</sup> Epalati yia: yu e dalepame yia: mata mate epo yia: a mate koa dulu medla salepame Yesu mate tamalaiyo.

*Yesuta esusulumale so ka:ka:dle*

<sup>23</sup> Epedeme Yesu Ga:lili mo pato dulu dla mo yimlala hapuloma dulu dla sela:mama yia:ta inoma sumalalo aya hapuloma dla ka:dle yu Pepele dimo kokoye imsela:iyo. Epamsela:mama esusulumale so hapuloma mape ka:ka:demsela:iyo. <sup>24</sup> Epalati Ga:lili mo seme Siliya demdiye edla ha:ha:lalo so mape ya:ta koko halomsela:leye daliyo. Epapele koko tle opatapo esiyele mila:pi meyelope meyelope dle so opaye Yesuta ka:ka:dlepo depame ya: hala dla hohopo pumhalaiyo. Epedeme yia:tapo esiyele mila:pi meyelope meyelope dle ipapeleye Yesu hala dla hohopo pumhalaiyo. Opatapo sikemte wotiyalle dulu dla ha:ha:lalo soye hohopo pumulaiyo, epela opitapo bataliya watalo soye hohopo pumulaiyo, epela opitapo yiyilalimale soye hohopo pumulaiyo, epela opitapo moto palli soye hohopo pumulaiyo. Epalati Yesutapo yia:ta hapulomaye ka:ka:diyo. <sup>25</sup> Epedeme opa hapuloma Ga:lili tle epame Dekapolis tle epo Yelusalem tle epame Yudiya tle epame mo opi Yoden aloma seme dla ha:ha:lalo tle Yesu hala dla puame ya: dolumtamalaiyo.

## 5

*Yesuta opa imale  
(Luk 6:20-23)*

<sup>1</sup> Yesu opa hapulomata ya: hala dla pula natipame tamali di dla hetame polaiyo. Epalati ya: alotle tlalo sota ya: dla puame alumaiyo. <sup>2</sup> Epapele oloma edla ya:tapo God yu yia: watle imolowe kotiyamama epo atlaiyo,

<sup>3</sup> “Opa anawolotapo gadle yilo God dla hitaha:ha:ma:, wua: sisiyeiya.

Adipalati, Pepele dimo kokoye wuolepo.

<sup>4</sup> Epame opa anawolotapo dupa kolle mate a:lemha:ha:ma:, wua: sisiyeiya.

Adipalati, Godtapo wua:ye gadlepe.

<sup>5</sup> Epame opa anawolotapo homta ha:ha:ma:, wua: sisiyeiya.

Adipalati, Godtapo ta:lamu patoye wua: watle hamilipe.

<sup>6</sup> Epame opa anawolotapo Godta solotamale koko tlo halomolowa depo sikemte solotamha:ha:ma:, wua: sisiyeiya.

Adipalati, Godtapo wua:ta hatlo ya:ta solotamale koko tlo halomha:ha:lepo depame wua:ye gadlepe.

<sup>7</sup> Epame opa anawolotapo yimkadulo polowamale mate ha:ha:ma:, wua: sisiyeiya.

Adipalati, asiyama Godtapo wua: dla polowamale mate hallepe.

<sup>8</sup> Epame opa anawolotapo yia: dupa dulu tle ullu pa:po ha:ha:ma:, wua: sisiyeiya.

Adipalati, wua:tapo God natilipe.

<sup>9</sup> Epame opa anawolotapo yimkaduloye sadle mate ha:ha:lepo depame gademha:ha:ma:, wua: sisiyeiya.

Adipalati, Godtapo wua:ye ya: akimlala dlepe.

<sup>10</sup> Epame opa anawolotapo Godta solotamale koko dolumha:ha:mama wotiyalle halomha:ha:ma:, wua: sisiyeiya.

Adipalati, Pepele dimo kokoye wuolepo.

<sup>11</sup> Epedeme opatapo na: koko yilo wua: putlopame hopolemyemama wua: hi mate mala-atlamelepiye, wua: sisiyeiya. <sup>12</sup> Adipalati, Pepele di dla wua:ta halowe asiyama patoye wua: hi mate ma-dinapopo hutiyepo. Epapedeme wua: malamaiya, wua: dla wotiyalle hapimha:ha: so yia: mamadulotapo ka:yapa ha:ha:uwa God yu molo atla-malalo so dla wotiyalle mepapeleye halopimha:ha:uwapo.”

*Solo mate hela:dle mate*  
(Maka 9:50; Luk 14:34-35)

<sup>13</sup> “Wua: ta:lamo so dla solo epapele some ha:ha:po. Amasiyama solotapo ya:ta opalli pa:lepiye, ma adipo ya:ta opalliye hapa:? Epedeme solo ita ya:ta opalli pa:lepiye, ya: ma koko pa:le ellepe. Epalati ta:la dla hamastlati opata di tle dolemsiyamelepe.

<sup>14</sup> Epame wua:ye ta:lamo so hapuloma dla hela:dle epapele some ha:ha:po. Adipalati, tamali di dla mo pollopiye, mo eye hemele pohaodepo pollowa. Hao, haliyamale dla gillistame polomdepo. <sup>15</sup> Epedeme oplami haletapo tulomaye otopame kawapo mate pobopudesemde. Hao. Ya: tuloma otopame haliyamale dla pamelemdepo, opatapo aya dulu dla popa:mama hela:dle natilipo depame. <sup>16</sup> Epapele tle ka:dena, wua:tapo ta:lamo so dla hela:depo ha:ha:loweye. Epapelepiye, opatapo wua:ta koko ka:dle halomha:ha: natipame yia:tapo wua: A God Pepele di dla hala hi di dla ta:dlepe.”

*Godta aiyalma koko hatitimale*

<sup>17</sup> “Epedeme wua: na:ye Godta aiyalma koko hatitimale mate epo ya: tle yu hapame molo atlamalalo sota God yu hatitimale mateye batalimolowedeme puwayo depo malamha:ha:miya. Hao, na: epapolowedeme popuana. Amasiyama na: isikimi yia:ta atlamale koko hapuloma eye ala:po pustlowedeme puwapo. <sup>18</sup> Epapedeme na: ikadepe koko wua: watle atlema. Ta:lamo mate epo pepele di mateta ala popa:lalo me-ha:ha:lati Godta aiyalma hatitimale dulu dla hi ilalimale yemala haleta alikili dla pohaodlowa. Amasiyama aiyalmata atlamale koko hapulomata mepo wowoyamelepe. <sup>19</sup> Epedeme oplami antapo Godta aiyalma hatitimale dulu dla aiyalma hatlo yimka:mala dla pos-alladlalo halemama yimkadulo ma mepapele koko imhallepiye, ya:ye Pepele dimo dla yimka:mala ikadepe hallepe. Amasiyama oplami antapo Godta aiyalma hatitimale hapuloma dla salladepo halemama yimkadulo ma mepapele koko imhallepiye, ya:ye Pepele dimo dla pato depo hallepe. <sup>20</sup> Epedeme na: ikadepe koko wua: watle atlema. Wua:ta God dla salladleta aiyalma imalalo so mate epo Pa:lisi so mateta God dla salladleye potla:mtlalo wekelepiye, wua: Pepele dimo dla po-ulatuluwa.”

*Siyaladlowe koko*

<sup>21</sup> “Epedeme Godtapo mo-powataliya di mamadulo dla yu ipo atluwaye wua: ma-daluwapo, ‘Ya:mkale yumula aiyalma, epame ya:mkale yumulalo oplamiye koko gladle dla hamamhetlepe,’ duwa kokoye. <sup>22</sup> Amasiyama na: matle koko hema ipo atlema. Oplami antapo ya:mkale dla siyaladle mate hallepiye, ya: ma koko gladle dla hamamhetlepe. Epame oplami antapo ya:mkale watle, ‘wa: poka:dle oplami’ dlepiye, ka:dena, wua: ya:ye mo dokopala so dla hamamtame ya: koko gladloweye. Epame oplami antapo ya:mkale watle, ‘wa: yiyilamale oplami’ dlepiye, ka:dena, ya:ye asiyama Dlapa mo dla ka:stloweye.

<sup>23-24</sup> Epedeme wa: God watle namkale dle alisisi hamilowedeme halemama ma pakasiyamalalo medla wa: amkaleta wa: dla elle himhala koko malamelepiye, wa: namkale dle alisisiye medla himpame ma hapele tame wa: amkale e mate namkale dlepe. Epame ma ilame puame namkale dle alisisi eye God watle hamilipe.



<sup>25</sup> Epedeme wa: alilalo oplamita wa:ye koko gladle dla semtlati wa: hapele api duka dla ya: mate tamama ya:ta wa: dla alli elaye pustlepo depame ya: mate namkale dlepe. Amasiyama wa:ta koko e pohalalo wekelepiye, ya:tapo wa:ye koko gladlalo oplami dla semtame wa: koko gladlepe. Epalati ma koko gladlalo oplamitapo wa:ye amtuwale aya omhallalo oplami dla homellepe. Epalati etle ya:tapo wa:ye ma amtuwale aya dulu dla ka:stlepe. <sup>26</sup> Epedeme na: ikadepe kokoye atlema, wa: amtuwale aya dulu edla halemama alikili dla woyamolowe apiye ponatilowa. Amasiyama wa:tapo ya:ta sale mani sukulu mate ala:po himilipiye, eta wa:ye alikili dla woyamelepe.”

*A:ya uhalowe koko mate epo a:ya mellowe koko mate*  
(*Mat 19:19; Maka 10:11-12; Luk 16:18*)

<sup>27</sup> “Epedeme wua: yu ipo atlati ma-daluwapo, ‘Ya:mkale a:ya uhala aiyalma’ duwa kokoye. <sup>28</sup> Amasiyama na: matle wua: watle ipo atlema, oplami antapo ya:mkale a:yaye inomata sikemte omelemama dupata malamale tle ya: mate hatlope dlowe solotamelepiye, ya: a:ya eye ya:ta malamale tle mo-uhapo. <sup>29</sup> Epedeme wa: dowala inomata wa:ye batalimale dla semtullupiye, ka:dena, wa: dowala inoma eye holame hamastloweye. Ame adipalati, poka:dena, wa:ta wa: inoma dapiyamte mate halemama Dlapa mo dla tloweye. Amasiyama ka:dena, wa:ta inoma hatlope mate Pepele dimo dla ulatuluweye. <sup>30</sup> Epame wa: dowala dota wa:ye batalimale dla semtullupiye, ka:dena, wa: dowala do eye ketamastloweye. Ame adipalati, poka:dena, wa:ta wa: do dapiyamte mate halemama Dlapa mo dla tloweye. Amasiyama ka:dena, wa:ta do hatlope mate Pepele dimo dla ulatuluweye.

<sup>31</sup> Epame wua: yu ipo atlati ma-daluwapo, ‘Oplami antapo ya: a:ya memellowe solotamelepiye, ya:ye a:ya mellalo pepa dla yu ilipame a:ya watle hamilipe,’ duwapo. <sup>32</sup> Amasiyama na: matle koko hema wua: watle ipo atlema, wa: a:ya pomellowa. Epapele tlope dulu hema a:yatapo oplami hale uhalepiye, wa: eta ka:dena, wa: a:ya e memelloweye. Amasiyama wa: isikimi koko pa:le wa: a:ya e memellepiye, etapo a:ya eye batalimale koko dla semtullupe. Adipalati, dulu edla a:ya etapo ma oplami hale halepiye, ya: oplami eye uhapo. Epame oplami mape a:ya eye uhapo.”

*Koko halowedeme aiyalma solowe*

<sup>33</sup> “Epame wua: di mamadulo dla yu ipo atlati ma-daluwapo, ‘Wa: God dla koko hale halowedeme aiyalma sepame aiyalma eye ma popostlowa,’ duwapo. <sup>34</sup> Amasiyama na: matle koko hema ipo atlema, wa: koko hale halowedeme aiyalma posemhallowa. Epedeme wa: Pepele dimo hi sepame aiyalma posolowa. Adipalati, eye Godta pollalo mopo. <sup>35</sup> Epame ta:lamo hi sepame aiyalma posolowa. Adipalati, eye Godta ya: hete kellepo pollalo mopo. Epame Yelusalem mo hi sepame aiyalma posolowa. Adipalati, mo eye dokopala oplami ya: mopo. <sup>36</sup> Epame wa: dokopala umpame aiyalma posolowa. Adipalati, wa:ta atla kokotapo wa: dokopala dulu kokosase haleye mila:pi pomeyelope-desemde. <sup>37</sup> Epedeme wa: koko hale halowedeme solotamelepiye, isikimi ‘yao, na: mesolotama’ dlepe. Epame koko hale halowe allipiye, isikimi ‘hao, na: posolotamasema’ dlepe. Adipalati, wua:ta pe-epapalalo isikimi aiyalma tlo selepiye, wa: yu eye Saiten tle pua atlapo.”

*Asiyama halowe koko*  
(*Luk 6:29-30*)

<sup>38</sup> “Epame wua: yu ipo atlati ma-daluwapo, ‘Wa: ya:mkale heyumama inoma topa:dlepiye, ka:dena, oplami haleta asiyama wa: heyumama inoma topa:dloweye. Epame matle wa: ya:mkale a:pe nama dla heyumama a:pe hatlo holamastlepiye, ka:dena, ma asiyama oplami haleta wa: a:pe nama dla heyumama a:pe holamastloweye.’ <sup>39</sup> Amasiyama na: koko edla ma ipo atlema, wa: oplami haleta wa: dla batalimale koko adipapele halepiye, wa: asiyama epapele kokoye ya: watle ponati-iliwa. Epedeme

oplami haletapo wa: damta dla heyulupiye, ka:dena, ma damta seme dla heyulupo depame ya: dla haiyeloweye. <sup>40</sup> Epame oplami haleta wa: sede halowe solotamama wa:ye koko gladle dla hamamtelepiye, ka:dena, wa:tapo wa: sede e mate epame wa: kapumale tluka mate ya: watle me-hapine. <sup>41</sup> Epame oplami haletapo wa: mate mo hale dla tlowa depo puame ha:ha:melepiye, ka:dena, wa: ya: gademama ya: mate telepe. <sup>42</sup> Epedeme oplami haleta wa: dla alisisi otelepiye, ya: dla isikimi me-hamine.”

*Wua: dla opahale demha:ha: soye sikemte bokotiyapo malamha:ha:iya*  
(Luk 6:27-28, 32-36)

<sup>43</sup> “Epedeme wua: yu ipo atlati ma-daluwapo, ‘Wa: amkale tlo bokotiyapo malamama asiyama wa: dla opahale dlalo oplami tlo aline’ duwaye. <sup>44</sup> Amasiyama na: ma koko hema wua: watle ipo atlema, wua: dla opahale demha:ha: soye bokotiyapo malamha:ha:iya. Epammama wua: dla wotiyalle hapimha:ha: so yilo inoma sumale himme ha:ha:iya. <sup>45</sup> Epedeme wua:ta ipapele koko hamha:ha:lepiye, eta wua:ye Pepele di dla hala A God ya: akimlala ikadepe dlepe. Epapele dulu dla Godtapo ka:ka:dle so dla epo bobtalimale so dla sali ka:depo silaple mate epo tiyo mate hapimhalapo.

<sup>46</sup> Epapedeme wua: isikimi hatlo wua: dla sikemte malamale himha:ha: so tlo malamha:ha:lepiye, wua: asiyama ka:pi hapa? Hao, pahalowa. Adipalati, batalimale so mape mepamdepo. <sup>47</sup> Epame wua: isikimi wua: amkadulo tlo namkale demhalepiye, e ka:dle kokota? Hao, alikili so ma koko mepapele hamdepo. <sup>48</sup> Epedeme wua: A Godta opa hapuloma sikemte bokotiyapo malamhalaye, mepammama wua: ma opa hapulomaye bokotiyapo malamha:ha:iya.”

## 6

*Atali so gadlowe koko*

<sup>1</sup> “Epapedeme wua: isikimi opata natilipo depame ka:ka:dle koko halomha:ha:miya. Adipalati, wua: koko ipapele halomha:ha:lepiye, wua: A God Pepele di dla hala tle asiyama pahalowa.

<sup>2</sup> Epapele dulu dla wa: atali so watle alisisi halopiliwedeme haliyamale opa inoma dali tle halopimiya. Adipalati, yiskamu pepeyalimalalo sotapo opata yia: tlo ka:ka:dle so dlepo depame ipapele kokoye inoma sumalalo aya dla epame mo duka dla halomsiyamdepo. Epedeme na: ikadepe koko wua: watle atlema. Yia:ta epapele koko halomha:ha:lati opata yia: natipo sisiyemha:ha: tle yia: asiyama ma-hamha:ha:po. Epapedeme yia: God tle asiyama hale pahalowa. <sup>3-4</sup> Epedeme wa: atali so watle alisisi halopiliwedeme apelepiye, wa: hemele yia: watle halopilipe. Epalati wa: A Godta wa:ta hemele ka:dle koko ha e natipame wa: watle asiyama hamilipe.”

*Inoma sumolowe koko*  
(Luk 11:2-4)

<sup>5</sup> “Epame wua: inoma sumama yiskamu pepeyalimalalo so some ha:ha:miya. Adipalati, yia:ye opata yia: natilipo depame mo duka dla epame inoma sumalalo aya dulu dla itapu ikadepe dla tuwame ha:ha:mama inoma sumha:ha:mdepo. Epedeme na: ikadepe koko wua: watle atlema. Yia:ta epapele koko halomha:ha: tle yia: asiyama ma-hamha:ha:po. Epapedeme yia: God tle asiyama hale pahalowa. <sup>6</sup> Amasiyama wa: inoma sumolowedeme wa: aya dulu dla tuwame kokoloma himomelepame opata ponatilalo wekelalo A God dla inoma sumelepe. Epalati ya:tapo wa:ta ya: watle epo inoma sumale himhala natipame wa: watle asiyama hamilipe.

<sup>7</sup> Epame wua: inoma sumama God koko yeitamale sota inoma sumalalo some inoma sumha:ha:miya. Adipalati, yia:ta inoma sumale dulu dla isikimi koko pa:le yu sikemte seselemalli atlamtamdepo. Adipalati, yia:ta malamaletapo Godta yia:ta inoma sumale yu seselemalli atlamalati tlo sikemte dallowe solotama demdepo. <sup>8</sup> Epedeme wua:

yia: some koko pa:le inoma sumale yu atlamha:ha:miya. Adipalati, wua:ta solotamale kokoye wua: A God ya: tatile mo-malapo halemdepo. <sup>9</sup> Amasiyama wua:ta inoma sumale dulu dla ipo inoma sumha:ha:lepe,

'Di A Pepele di dla hallalo,

hatlo wa: hita alila hapuloma dulu dla aiyalma depo hallepe.

<sup>10</sup> Epame di solotama, wa: mo kokota pulupo depame.

Epame Pepele dimo dla wa:ta solotamale koko halomha:ha: epapele kokoye ma ta:lamo sota halomha:ha:lepe.

<sup>11</sup> Epame alila hapuloma dulu dla dita dlowe alisisiye halopimhalane.

<sup>12</sup> Epame di bobtalimaleye hihiyotipo woweline.

Adipalati, di mape diamkadulota dia: dla batalimale koko halomde hapulomaye wowelimdepo.

<sup>13</sup> Epame dia:ye elemala natili kokalle dla elemtaiya demiya.

Amasiyama dia:ye Saitenta itiyamale tle alikili dla eleme woyamane.'

<sup>14</sup> Epedeme wua:tapo wua: amkadulota wua: dla batalimale koko halati yia: batalimaleye wellipe. Wua:ta epapelepiye, asiyama wua: A Pepele di dla halatapo wua: bobtalimaleye hiyotipo wowellipe. <sup>15</sup> Amasiyama wua:tapo wua: amkadulota wua: dla bobtalimale koko halati yia: bobtalimaleye powelilalo wekelepiye, asiyama wua: Atapo wua: bobtalimaleye pohiyotipo welilowa."

#### *Daya dimi inoma sumha:ha:lowe koko*

<sup>16</sup> "Epame wua: daya dimi inoma sumha:ha:mama ase yiskamu pepeyalimalalo sota aplalo some amha:ha:miya. Adipalati, yia: daya dimi ha:ha:mama yia: mila:pi sikemte alistame ha:ha:mdepo, opatapo yia:ta daya dimi ha:ha: koko natilipo depame. Epedeme na: ikadepe koko wua: watle atlema. Yia:ta epapele koko hamha:ha: tle yia: God tle asiyama pahalowa. <sup>17</sup> Amasiyama wa: daya dimi inoma sumpollowedeme apelepiye, wa: mila:pi woloma howahapame alisisi woloma dinapopo siyele mila:pi himimpollepe. <sup>18</sup> Wa:ta epo pollopiye, opata wa:ta daya dimi hala kokoye pomalanatilowa. Amasiyama opata ponatilalo wekelalo A Godtapo wa:ta hemele daya dimi pola kokoye natipame wa: watle asiyama ka:dle hamilipe."

#### *Alisisi poposatilipo ha:ha:lowe koko*

*(Luk 12:33-34)*

<sup>19</sup> "Epapedeme wua: ase ta:lamo hema alisisi sikemte poposatilipame kokolupo ha:ha:miya. Adipalati, ta:lamo hema wua: alisisi opiye musasuta dlomdepo. Epame opiye miyelo batalimdepo. Epame opiye uhalalo sotapo tuwame uhalomdepo.

<sup>20</sup> Amasiyama wua: Pepele dimo dla alisisi sikemte kokolupo ha:ha:iya. Adipalati, mo edla musasutapo alisisi podlomasemde, epo alisisitapo miyelo pobatalimasemde, epame uhalalo sota tuwame alisisi upohalomasemde. <sup>21</sup> Epapedeme wua: alisisi pasatale kokotapo mo hadima hutiyelepiye, wua:ta malamale mape edla hatitipo ha:ha:mdepo.

<sup>22</sup> Epedeme wa: inomatapo wa: moto pato dla tuloma epapele some halapo. Epedeme wa: inomata ka:depo hallepiye, wa: moto patota hela:dle dulu dla hallepe. <sup>23</sup> Amasiyama wa: inomata batalimelepiye, wa: moto patoye amtuwale dulu dla hallepe. Epapele dulu dla wa: dla hela:dle elaye sumtame hallepiye, wa: ikadepe sikemte amtuwale dulu dla halapo.

<sup>24</sup> Epapedeme oplamitapo dokopala so dapiyamte yu dla salladepo sela:mama oko haloweye po-ala:na. Adipalati, ya: dokopala oplami hale tlo solotamama haleye allipe. Epammama ya:tapo dokopala oplami hale yu dla salladepo sela:mama ma hale yu dla posalladlowa. Epapedeme wa: poka:dena, God dla salladepo sela:lalotapo matle mani dla salladepo sela:loweye."

*Hatlo God dla hitaha:ha:iya  
(Luk 16:13, 12:22-31)*

<sup>25</sup> “Epedeme na: wua: dla atlema, wua:ta ha:ha:mama daya demha:ha:lowe mate epo tluka didiyemha:ha:lowe mate dla ase sikemte momalamha:ha:miya. Adipalati, dlowe alisisita koko pato pohalasema. Hao. Amasiyama wua: pasakalota koko pato halapo. Epame tluka alisisita koko pato pohalasema. Hao. Amasiyama wua: motota koko pato halapo. <sup>26</sup> Epapedeme wua: tea natipame malamaiya. Yia: dlowe alisisiye empame ma pohauwalesemde. Epame yia: dla yia:ta dlowe alisisi kokolumolowe aya hawapo. Amasiyama epapele tlope wua: A Pepele di dla halatapo yia:ye dlowe alisisi ilimhalapo. Amasiyama wua: A God mila:pi tle teata pase koko pato pohalasema, amasiyama wua:tapo ya: mila:pi tle koko patoto ha:ha:po. <sup>27</sup> Epedeme oplami antapo tluka alisisi mate epo daya dlowe koko mate dla sikemte momalamhalemama ya: pasakaloye ma a:ma selemalemdi?”

<sup>28</sup> Epedeme wua: adipalati tluka alisisi dla sikemte momalamha:ha:ma:? Amasiyama wua: isikimi moku dla dali haha ka:ka:dleta ha:ha:mde dla natimama malamaiya. Adipalati, yia:tapo yiskamu gadlowe dla oko hapame ma yia: tluka podedlalimasemde. <sup>29</sup> Epedeme na: wua: watle atlema, ka:yapa Solomonta dokopala oplami haluwa oloma edla ya:tapo tluka alisisi mila:pi ka:ka:dle didiyemhaluwapo. Amasiyama moku dla dali haha ha:ha:mde yia: mila:pitapo Solomonta tluka didiyemhaluwa mila:piye tla:mtame halapo. <sup>30</sup> Epedeme dali haha ka:dletapo wata u-uplatipo ha:ha:po depame ma alila hale dla pakasiyamalalo mo-totolemdepo. Epapele tlope Godtapo dali haha dla mepo tluka ka:ka:dle didiyemelemhalema dlepiye, na: ma mikadepe dema, Godtapo wua:ye tluka ka:ka:dle didiyemelemhalapo. Wua: ase mikadepe dle pa:talo so some ha:ha:miya.

<sup>31</sup> Epapedeme wua: ase sikemte momalamha:ha:mama ipo atlemha:ha:miya, ‘Di dita daya mate yú mate dlowe hadima hapa:? Epame dita tluka didiyelowe ma hadima hapa:?’ demha:ha:miya. <sup>32</sup> Adipalati, alikili sotapo ipapele alisisi yilo sikemte momalamha:ha:mdepo. Amasiyama wua: A Pepele di dla halaye me-ya:malamana, wua:ta ipapele alisisi halomolowedeme solotamale himha:ha:ye. <sup>33</sup> Epedeme wua: Pepele dimo koko totamama wua: Ata solotamale koko tatile ala:iya. Wua:ta epapelepiye, asiyama ya:tapo wua:ta totamha:ha: alisisi hapulomaye wua: watle hapilipe. <sup>34</sup> Epedeme wua: iyelata koko halopo puluwe dla ase sikemte momalamha:ha:miya. Adipalati, iyela kokoye e iyela kokopo. Amasiyama wua: wata alila dla koko wowoyamolowe tlo momalamaiya.”

## 7

*Yimkadulo kokoye isikimi glademha:ha:miya  
(Luk 6:37-38, 41-42)*

<sup>1</sup> “Wa: wa: amkaleye batalimale oplami demiya, epalati asiyama wa:ye pobatalimale oplami dlowa. <sup>2</sup> Adipalati, wa:tapo ya:mkale kokoye adipo gladlepiye, asiyama wa: koko ma mepo gladlepe.

<sup>3</sup> Wa: adipalati wa: amkale inoma dla hakaka yemala ela tlo sikemte natimama asiyama wa: inoma dla sokotalo patota ela tlo ponatilalo wekema:? <sup>4</sup> Epame wa: inoma dla sokotalo pato elaye ponatilalo, wa: ma adipalati wa: amkale dla atlemama, ‘Wa: inoma dla hakaka yemala elaye holahamastali,’ demdi? <sup>5</sup> Wa: ikadepe wa:skamu pepemalalo oplamipo. Adipalati, wa: ka:dena, wa: inoma dla sokotalo pato ela e tatile holamastloweye. Eta wa: amkale inoma dla hakaka yemala elaye woloma natipo holamastlepe.

<sup>6</sup> God watle halopiliwe alisisiye esemala watle halopimiya. Adipalati, esemalaye isikimi ilame wa: yellepe. Epame wa: dla ka:ka:dle alisisi hutiyeye aliya dla pololemiya. Adipalati, aliyata alisisi eye dlolemsele:mama batalimelepe.”

*Totamelepiye, natilipe*  
(Luk 11:9-13)

<sup>7</sup> “Epapedeme na: wua: dla atlema, wua: atlanatiya. Epapelepiye, wua: dla hapilipe. Epame wua: totamaiya. Epapelepiye, wua: natilipe. Epame wua: kokoloma dla heyulumaiya. Epapelepiye, kokolomaye wua: dla gowaladlepe. <sup>8</sup> Adipalati, atlanatilalo oplamitapo koko halepe. Epame totalalalo oplamitapo koko natilipe. Epame kokoloma dla heyulumalalo oplami watle kokolomaye gowaladlepe.

<sup>9</sup> Epapedeme adulo wua: daliya. Oplami antapo ya: maseyemalata daya yilo amalati ya: watle ewala hamimdi? <sup>10</sup> Epame ya: tapo ma amalalo yilo amalati wa: ya: watle wa: ha: le hamimdi? <sup>11</sup> Wua: batalimale so tlope, wua: malamana, wua: yimlala dla ka: ka: dle alisisi tlo halopiliweye. Epapedeme dimalamana, A God Pepele di dla halata ya: watle alisisi otomha: ha: lalo so dla alisisi ka: ka: dle hapimhalapo. <sup>12</sup> Wua: apa kokoye opata wua: dla halepo depo solotamelepiye, ka: dena, wua: tatile yia: dla epapele kokoye halepe. Adipalati, Mosesta aiyalma hatitimale mate epo God tle yu hapame molo atlamalalo sota hatitimale mateta imale yia: dulu kokoye ipo.”

*Kokoloma kokotomale*  
(Luk 13:24)

<sup>13</sup> “Epapedeme kokoloma kokotomale tle u-ulapo tuwaiya. Adipalati, Dlapa mo dla tlalo api kokolomaye pta pato epame api mape pta pato. Epapele tle opa hapulomatapo kokoloma etle u-ulapo api medla tamhalapo. <sup>14</sup> Amasiyama pasakalo apiye pta yimka: mala. Epame api edla ulatulalo kokoloma ma pta yimka: mala. Epame isikimi opa pastotapo api e natipame api etle tamhalapo.”

*Biskapa God yu molo atlamalalo so woloma natiya*  
(Luk 6:43-44)

<sup>15</sup> “Ka: e, wolomape! Wua: biskapa God yu molo atlamalalo soye woloma natiya. Adipalati, yia: ye kapala di tle ka: ka: dle so some pumdepo. Amasiyama yia: opasi dulu tle moko esemala kakasilamale epapele some pumdepo. <sup>16</sup> Epedeme wua: yia: ta moto mate koko halomale tle yia: ta ha: ha: kokoye malanatimdepo. Adipalati, pigi dlomoko mate epo gla: pi dlomoko mate biskapa dali dla pomilimasemde. <sup>17</sup> Epedeme dlomoko dali ka: dletapo dlomoko ka: ka: dle siyapo tlo mimdepo. Epame dlomoko dali batalimaletapo dlomoko bobtalimale siyapo tlo mimdepo. <sup>18</sup> Epedeme dlomoko dali ka: dletapo dlomoko batalimale pomisemde. Epame dlomoko dali batalimaletapo dlomoko ka: dle pomisemde. Hao. <sup>19</sup> Epapele dulu dla dlomoko dali aditapo dlomoko ka: ka: dle pomilalo hallepiye, dali eye wostapame dlapa dla mistlepe. <sup>20</sup> Epapele koko tle wua: biskapa God yu molo atlamalalo soye yia: ta dlomoko milimale tle yia: kokoye malanatilipe.

<sup>21</sup> Epedeme pase opa hapulomata Lod, Lod demha: ha: sotapo Pepele dimo dla polahetlowa. Amasiyama opa anawolotapo na: A Pepele di dla halata solotamale koko tlo halomha: ha: ma:, ewolota hetlepe. <sup>22</sup> Epapedeme koko gladle oloma dla opa opitapo na: watle puame epo atlamyelepe, ‘Lod, Lod, di wa: hi tle God yu atlamsiyamduwapo, epame wa: hi tle bataliya yimlalaye opa dulu tle alikili dla dodolomsalemsiyamama ulugiyemale koko ma halomsiyamduwapo,’ demyelepe. <sup>23</sup> Amasiyama na: tapo yia: watle asiyama epo atellepe, ‘Wua: pona: opa ikadepe, na: tle alikili a: ma dla tamalaiya, wua: bobtalimale sopo.’ ”

*Opa dapiyamteta aya halomale*  
(Luk 6:47-49)

<sup>24</sup> “Oplami antapo na: yu dalepame salladepo sela: lepiye, ya: ye oplamita aya hamama munamu sikemte mumuwalepo alumiti kellepo aya hale epapele some halapo. <sup>25</sup> Adipalati, sokomoko mate tiyo mate puame aya dla heyulati ayata me-kokalepo



polaiyo. Ame adipalati, aya alumiti munamuye sikemte halopo kelliyo. <sup>26</sup> Amasiyama oplami antapo na: yu dalepame posalladlalo sela:ma:, ya:ye oplamitapo aya hamama munamu pase mumuwallalo wekele epapele some halapo. <sup>27</sup> Adipalati, sokomoko mate tiyo mate ya: aya dla puame heyulati ayata pokokallalo dokalamhamastauwapo.”

<sup>28</sup> Yesuta imhalepo gudlati opa hapulomata ya:ta imale koko natipame sikemte yiyeliyo. <sup>29</sup> Adipalati, ya:ta imale dulu dla po-aiyalma imalalo sota imalalo epapiyo. Amasiyama ya:ye sikemte itiyamale oplamita imalalo epapele some halaiyo.

## 8

### *Yesuta kapala batalimale oplami ka:dle*

*(Maka 1:40-45; Luk 5:12-16)*

<sup>1</sup> Yesu tamali di tle mallati opa hapulomatapo ya: alotle dolumtamalaiyo. <sup>2</sup> Epapele oloma edla kapala batalimale oplamita puame Yesu hete sitali dla polomama epo atlaiyo, “Lod, wa: na: ka:dlowe solotamelepiye, na: ka:dene,” diyo.

<sup>3</sup> Epalati Yesuta ya: do mate oplami ummama epo atlaiyo, “Na: wa: ka:dlowe solotama, epedeme wa: ma-ka:dene,” diyo. Epalati pakasiyamalalo ya: kapala batalimaleta ma-ka:diyo.

<sup>4</sup> Epame Yesuta ya: watle epo atlaiyo, “Wa: tame opa opi watle na:ta wa: ka:dle kokoye atlemiyo. Amasiyama wa: tame God ka: epo opa ka: duka dla hallalo oplami watle wa: kapalata ka:dle kokoye nati-ine. Epame wa:ta ka:dle koko dla Mosesta atlale namkale dle alisisi mate God watle hapine, opata koko etle wa:ta ka:dle kokoye malanatilipo depame,” diyo.

### *Loum opahale so omhallalo oplamita mikadepe dle koko*

*(Luk 7:1-10)*

<sup>5</sup> Yesu Kapaniyem mo dla tame woyamalati Loum opahale so omhallalo oplamita gadle yilo Yesu watle puame epo atlaiyo, <sup>6</sup> “Lod, na: oko oplami haleye sikemte esiyeme elemama sila:tilowe wekepo elema,” diyo.

<sup>7</sup> Epalati Yesuta ya: watle epo atlaiyo, “Na: tame ya:ye ka:dlowepo,” diyo.

<sup>8</sup> Amasiyama Loum opahale so omhallalo oplamita epo atlaiyo, “Lod, wa:ta na: aya dla puluwe poka:dena. Adipalati, na: batalimale oplami. Wa: isikimi metle halemama yu tlo atlane, na: oko oplamita ka:dlepo depame. <sup>9</sup> Adipalati, na: ma opa opi isili tle oko hamhalemama yia: yu dla salladepo sela:mdepo. Epame opa opi mape na: isili tle ha:ha:mama na: yu dla salladepo siyamdepo. Epedeme na:ta na: oko oplami hale watle, ‘huma tane,’ dlati ya: edla tamdepo. Epame ma hale watle atlemama, ‘hema puane,’ dlati ya: ma pumdepo. Epame matle hale watle, ‘wa: koko i hane,’ dlati ya: ma koko e hamdepo. Epapedeme wa: mape isikimi yu tlo atlane, na: oko oplamita ka:dlepo depame.”

<sup>10</sup> Yesuta yu i dalepo yelepame ya: alotle dolumtale so hapuloma watle epo atlaiyo, “Na: ikadepe koko wua: watle atlema. Na:ta Isael mo dla sela:uwa dla mikadepe dle kokalle oplami ipapele ponatimdena. <sup>11</sup> Epapedeme na: wua: watle atlema, opa hapuloma ta:lamo meyelope meyelope dle tle puame Pepele dimo dla A:iblaham mate epo Aisek mate epo Yokob mate yimkata daya dlowedeme puame popa:lepe. <sup>12</sup> Amasiyama Yu soye alikili amtuwale dla polollepe. Epalati edla ha:ha:mama a:lle mate a:pe tetekelalimha:ha:lepe.”

<sup>13</sup> Epo halemama Yesuta Loum opahale so omhallalo oplami watle epo atlaiyo, “Wa: aya dla ma-tane. Wa:ta mikadepe dle tle wa:ta solotamale koko eta ma-hallepe,” diyo. Epapele oloma medla Loum opahale so omhallalo oplami ya: oko oplami aya dla esiyeme elaletapo ma-ka:diyo.

*Yesuta opa hapuloma ka:ka:dle koko  
(Maka 1:29-34; Luk 4:38-41)*

<sup>14</sup> Epame Yesuye Pita aya dla taiyo. Ya: edla tame natilati Pita ya: dokotapo aya dulu edla esiyeme ella natiyo. <sup>15</sup> Epalati Yesuta a:ya e ya: do dla hamalati esiyeleta ya: tle pa:iyo. Epame ya:tapo sila:time daya ha:po Yesu watle hamiyo.

<sup>16</sup> Epapele tamila:la oloma edla opatapo bataliya watalo so hapulomaye Yesu hala dla hohopo pumhalaiyo. Epalati ya:tapo yu itiyamale mate bataliya yimlalaye opa dulu tle alikili dla dodolomsalepame esusulumale so opa hapuloma mape ka:ka:diyo.

<sup>17</sup> Epedeme God tle yu hapame molo atlalo oplami Aisayata atlamale yu mate ala:lowedeme apiyo. Adipalati, ya:ta ipo atluwapo,

“Ya:tapo dia: dla hutiyeye esusulumale koko hapulomaye ma ya:ta halomama dia: tlo ka:ka:depo meluwapo.”

*Yesu dolumtlowe koko  
(Luk 9:57-62)*

<sup>18</sup> Yesutapo opa hapulomata ya: hala dla puame alумыela natipame ya: alotle tlalo so watle epo atlaiyo, “Di kaula seme dla ulluwa,” diyo. <sup>19</sup> Epalati oloma medla aiyalma imalalo oplami haleta puame ya: watle epo atlaiyo, “Imalalo oplami, wa:ta hadima adipo tamsela:lepiye, na: wa: dolumsela:lowepo,” diyo.

<sup>20</sup> Yesu asiyama ya: watle epo atlaiyo, “Moku dla moko esemalata ha:ha:laloye me-ha:ha:po, epame tea hapulomata hutiyelalo etoye me-popa:po. Amasiyama Opa Yami dla ya:ta ellalo ayaye pohalasema, hawa,” diyo.

<sup>21</sup> Epapalati opa opi Yesu alotle dolumsiyamale so dulu dla oplami haletapo Yesu watle epo atlaiyo, “Lod, na: wa: dolumtlowe solotama. Amasiyama wa: aseka na: dla alila hamine, na:ta na: a polati hamatilipo depame,” diyo.

<sup>22</sup> Amasiyama Yesuta ya: watle epo atlaiyo, “Wa: na: dolumpuane. Adipalati, soko tle palli sotapo miyelo palli soye hatimha:ha:lepe,” diyo.

*Yesuta sokomoko mate ulo mate ka:lli  
(Maka 4:35-41; Luk 8:22-25)*

<sup>23</sup> Epame Yesu mate epo ya: alotle tlalo so mate koa dla tulume alupame tamalaiyo. <sup>24</sup> Yia: tamha:ha:lali sokomoko patota bibikilimama ulo patotota silliyo. Epame ulo patotota sillimama yia: koa dla yúta pasataiyo. Amasiyama Yesuye koa dulu dla sikemte pa:tame elaiyo. <sup>25</sup> Epalati Yesu ya: alotle tlalo sota tuwame ya: esesa:mama epo atlaiyo, “Lod, wa: di gadene. Di yú dla tutula:la yakoma,” diyo.

<sup>26</sup> Amasiyama Yesuta elale tle yeipo yia: watle epo atlaiyo, “Wua: adipalati sikemte wowota:ma:? Wua:ta mikadepe dleye pta yimka:sikili ikadepe,” diyo. Epame ya: sila:time sokomoko mate ulo mateta keidlepo depame yu itiyamale mate atlaiyo. Epalati sokomoko mate epo ulo mateta medla keidlali kaulata ma woloma keilipo elaiyo.

<sup>27</sup> Epalati Yesu ya: alotle tlalo sota koko i natipame yiyelepame wowota:mama epo atlamyaiyo, “Oplami iye adipapele oplamita:? Mosisi mate epo ulo mateta ya: yu dla dalepame keidlepo,” demyaiyo.

*Yesuta bataliya watalo so opa dapiyamte ka:ka:dle  
(Maka 5:1-20; Luk 8:26-39)*

<sup>28</sup> Epame Yesu kaula seme dla ulumyame Gadala mo so ta:la dla tame woyamaiyo. Ya: edla tame woyamalati bataliya watalo so opa dapiyamteta popliyele hatili mo tle ya: hala dla puame wowoyamaiyo. Opa dapiyamte iwolota yiyilamsiyamama sikemte itiyamale mate siyamalati mo sota popliyele hatili api etle posiyamasemdiyo. <sup>29</sup> Epalati bataliya watalo sotapo puame Yesu watle yu teta:le mate epo atlaiyo, “God Yami, wa: dia: dla apa koko hala puo? Wa:ye Godta alila himili ala me-hallati duka medla dia:ye mo-batalimala puo?” diyo.

<sup>30</sup> Yia:ta ha:ha: mateka:pi medla aliya halo hapulomatapo ketame modlomsiyamaiyo.  
<sup>31</sup> Epalati bataliyatapo Yesu watle otomama epo atlaiyo, “Wa: dia:ye alikili dla dodolom-sallowedeme apelepiye, ka:dena, wa: dia:ye aliya dulu dla tuwaiya dene,” diyo.

<sup>32</sup> Epapalati Yesuta yia: watle aliya dulu dla tuwaiya diyo. Epapele oloma edla bataliya yimlalatapo opa dapiyamte iwolo tle u-ulapo tame ma aliya dulu dla tumulaiyo. Epalati aliya hapulomatapo donapi di tle ullumtulume yú dla tutula:mama paliyo.

<sup>33</sup> Aliya omha:ha:lalo sotapo koko i natipame ma hapele yia: mo dla ullumtame aliya dla koko woyamale mate epo opa dapiyamteta ma ka:dle koko mate atlamtaiyo.

<sup>34</sup> Epalati mo dulu edla ha:ha:lalo so opa hapulomatapo Yesu natila taiyo. Yia: tame ya: natipo ya: watle otomama epo atlamyaiyo, “Wa: di mo itle alikili a:ma tane,” demyaiyo.

## 9

### *Yesuta akoloyale oplami ka:dle (Maka 2:1-12; Luk 5:17-26)*

<sup>1</sup> Epame Yesu ya: ma koa dulu dla posokolepame ilame ya:ta hallalo mo Kapaniyem dla uliyo. <sup>2</sup> Ya: edla yame woyamalati opatapo akoloyale oplamiye wa:ya dla himpame ya: hala dla hamampumulaiyo. Epalati Yesu yia:ta mikadepe dle natipame akoloyale oplami watle epo atlaiyo, “Namkale, wa: ase sikemte wota:miya. Wa: bobtalimaleye mo-hiyotipame wellipo,” diyo.

<sup>3</sup> Amasiyama aiyalma imalalo so opa opitapo Yesuta ipo atla dalepame allimama ipo momalampopa:iyo, “Oplami iye God hi mate putlopo atlalepo. Adipalati, hatlo God tlo ya: dla batalimale hiyotimolowe itiyamale elapo,” dempopa:iyo.

<sup>4</sup> Amasiyama Yesu yia:ta momalamale ma-natipame epo atlaiyo, “Wua: adipalati na:ta atlale kokoye batalipo momalampopa:mama sikemte allimpopa:ma:? <sup>5</sup> Wua: akoloyale oplami i natiya. Ya: dla adipo atlowe tlo kokaleta:? ‘Na:ta wa: batalimaleye ma-hiyostalepo,’ dlowe kokota kokaleta:? O ‘Wa: sila:time ma-tane,’ dlowe kokota kokaleta:?”

<sup>6</sup> Epedeme Opa Yamita ta:lamo hema batalimale hiyotimolowe dla itiyamale hamsela:ye wua:ta natilipo depame na:tapo wata akoloyale oplami iye ka:dlowepo.” Epo atlepame Yesutapo akoloyale oplami watle epo atlaiyo, “Wa: sila:time wa: wa:ya hame wa: aya dla ma-tane,” diyo. <sup>7</sup> Epalati akoloyale oplamita sila:time ya: aya dla ma-taiyo. <sup>8</sup> Epame opa hapulomata koko i natipo yiyelepame God hi di dla ta:demyaiyo. Adipalati, Godta itiyamale iye opa dla hamili natipame.

### *Yesuta Ma:tiyu sisilamale (Maka 2:13-17; Luk 5:27-32)*

<sup>9</sup> Koko i gudlati alotle Yesu ma tamama natilati ta:kis mani halomalalo oplami Ma:tiyuta ta:kis mani halomalalo aya dulu dla polla natiyo. Epalati ya: watle epo atlaiyo, “Wa: na: dolumpuane,” diyo. Epalati ya: sila:time Yesu mate taiyo.

<sup>10</sup> Yesutapo ya: alotle tlalo so mate Ma:tiyu aya dla hetame daya dempopa:lali ta:kis mani halomalalo so mate epo batalimale so mateta puame yia: mate hatlo godepo daya dempopa:iyo. <sup>11</sup> Amasiyama Pa:lisi sotapo koko i natipame allimama Yesu ya: alotle tlalo so watle epo atlaiyo, “Wua: imalalo oplami adipapalati ta:kis mani halomalalo so mate epo batalimale so mate daya dempoloma:?” diyo.

<sup>12</sup> Epalati Yesuta yu i dalepame asiyama epo atlaiyo, “Esiyele pa:talo sotapo dakopala ilalo oplami hala dla potasemde. Amasiyama isikimi esusulumale sotapo dakopala ilalo oplami hala dla tamdepo. <sup>13</sup> Epedeme God yu buka dla ipo atlapo, ‘Na: ya:mkale gadlowe tlo sikemte malamama asiyama wua:ta na: dla alinepi poyupo hapilowe koko tlo pase malamasemde,’ depo. Epapedeme wua: tame yu ipo atla ya: dulu kokoye woloma totamaiya. Adipalati, na:ta puwaye, ka:ka:dle soye sisilamolowedeme popuana. Amasiyama bobtalimale so tlo sisilamolowedeme puwapo.”

*Daya aiyalma depo hallowe koko dla atlanatili  
(Maka 2:18-22; Luk 5:33-39)*

<sup>14</sup> Alila haletapo Yon ya: alotle tlalo sota puame Yesu watle epo atlaiyo, “Dia: mate epo Pa:lisi so mate inoma sumha:ha:mama daya aiyalma depo ha:ha:mdepo. Ame adipalati wa: alotle tlalo so tlo daya po-aiyalma dlalo ha:ha:ma:?” diyo.

<sup>15</sup> Epalati asiyama Yesuta yia: watle wayu mate epo atlaiyo, “A:ya halalo oplamita a:ya halowedeme daya dinapopo yimkadulo sisilamelepe. Epalati yimkadulota puame, dayaye aiyalma depo popa:pa:? Hao. Yia: sisiyele mate a:ya halalo oplami mate popa:mama dayaye yimkata dempopa:lepe. Amasiyama alila haleta a:ya halalo oplamiye yia: tle alikili dla hamame telepiye, eta yia:tapo daya aiyalma depo popa:lepe.”

<sup>16</sup> Yesu ma wayu mate epo atlaiyo, “Oplamitapo tluka takala dla tluka amko ketahame badepo podedlemasemde. Adipalati, tluka amkota itiyamama tluka takalaye tallatalademama opokoko sikemte pato dlepe. <sup>17</sup> Epedeme matle oplamitapo wain yú amkoye aliya kapalata ita iwale takala dla posimasemde. Adipalati, wain yú amkota itiyamama aliya kapalata iwale ita takalaye gladlati wain yúye alikili dla olotlepe. Epapedeme ka:dena, wain yú amkoye woloma aliya kapalata iwale ita amko dla simoloweye. Epapelepiye, eta wain yú mate epo ita mate pobatalimolowa.”

*Yesuta amseyemala ka:dle mate epo a:ya hale ka:dle mate  
(Maka 5:21-43; Luk 8:40-56)*

<sup>18</sup> Yesu yu ala atlempollati inoma sumalalo aya omhallalo oplamita puame ya: hete sitali dla heodepo polomama epo atlaiyo, “Na: amseyemalaye ala poa. Epedeme wa: puame ya:ta ka:dlepo depame wa: dotapo ya:ye umane,” diyo. <sup>19</sup> Epalati Yesu mate epo ya: alotle tlalo so mate sillipame oplami ya: mate tamalaiyo.

<sup>20-21</sup> Yia: ala me-tamaha:ha:lati a:ya hale 12 sokomoko dulu dla ya: toto koko natimama ka:liliwe pa:le esiyele hampollalota yia: mate tamama epo malamtaiyo, “Na: isikimi Yesu tluka ipi tlo umili, eta na:ye ka:dlepe,” diyo. Ya: epo malapame opa dulu tle tuwame Yesu tluka ipi umaiyo.

<sup>22</sup> Epapele oloma medla Yesu helestame a:ya natipo ya: watle epo atlaiyo, “Namkale, wa: ase wota:miya. Wa:ta mikadepe dletapo wa:ye ma-ka:dlepo,” diyo. Epalati a:yatapo oloma medla ma-ka:diyo.

<sup>23</sup> Epame Yesu ma etle tame inoma sumalalo aya omhallalo oplami aya dla hetaiyo. Yia: edla hetame natilati opa opitapo dupa kolle salaye pitikako epapele mate sesa:lalimyaiyo. Epalati opitapo wowolimyemama a:lemyaiyo. <sup>24</sup> Yesuta koko e natipame yia: watle epo atlaiyo, “Wua: alikili a:ma taiya. Amseyemala iye popowame elasema. Amasiyama ya:ye isikimi elema,” diyo. Epalati yia:ta hapulomata Yesu yu dalepame pomikadepe dlalo isikimi eimelemyaiyo. <sup>25</sup> Amasiyama Yesutapo opa hapulomaye alikili dla posalepame amseyemalata elale aya dla tuwame ya: do dla hamaiyo. Epalati amseyemalata mo-powame elale tle ma-sila:tiyo. <sup>26</sup> Epapalati mo hapulomata koko iye ma-dlalemtaiyo.

*Yesuta inoma pa:talo so mate epo yu pa:le oplami mate ka:ka:dle*

<sup>27</sup> Yesu aya etle tulume tamhallati inoma pa:talo so opa dapiyamtetapo ya: alotle dolumtamalaiyo. Yia: tamalemama yu teta:limale mate ipo atlamtamalaiyo, “Deibidi Yami, wa: di polowamama di gadene,” demtamalaiyo.

<sup>28</sup> Epame Yesu ma aya dulu dla hetlati inoma pa:talo so iwolota ya: hala dla pumulaiyo. Epalati Yesuta yia: watle epo atlaiyo, “Wua:ye ikadepe na:ta wua: ka:dlepe demama na: hala dla pumulo?” diyo. Epalati asiyama yia:ta epo atlaiyo, “Yao Lod, di mikadepe dema,” diyo.

<sup>29</sup> Epapalati Yesuta yia: inoma dla ummamama epo atlaiyo, “Wua:ta mikadepe dle koko tle wua: dla wua:ta solotamale kokota woyamelepe,” diyo. <sup>30</sup> Epalati yia: inomatapo ma-ka:ka:diyo. Amasiyama Yesutapo yu itiyamale mate yia: watle epo atlaiyo, “Wua: tame koko iye opa opi dla atlamiyo,” diyo. <sup>31</sup> Amasiyama yia:ta dapiyamteta tame opa hapuloma dla Yesu kokoye atlamtaiyo.

<sup>32</sup> Inoma pa:talo so ala alikili a:ma woyapo tamha:ha:lati opata ma bataliya walle oplamiye Yesu hala dla seme pumulaiyo. Oplami iye bataliyatapo ya: dulu dla halemama yu pa:po halaiyo. <sup>33</sup> Epapeleye Yesutapo bataliya yemalaye ya: tle alikili a:ma dla dodolomalati ya:tapo matle yukamolowe kotiyamaiyo. Epalati opa hapulomata koko i natipo yiyelepame epo atlamyaiyo, “Di Isalael mo dulu dla ipapele koko ponatimha:ha:mdena,” demyaiyo.

<sup>34</sup> Amasiyama Pa:lisi sotapo epo atlamyaiyo, “Bataliya yimlala yia: dokopala oplamitapo Yesu watle itiyamale hamilati itiyamale etle bataliya yimlalaye alikili dla dodolomsalemsela:ma,” demyaiyo.

### *Yesuta opa sikemte polowamale*

<sup>35</sup> Epedeme Yesuta mo hapuloma dulu dla sela:mama Yu sota inoma sumalalo aya hapuloma dla ka:dle yu Pepele dimo kokoye insela:mdiyoye. Epame esusulumale so hapuloma ma ka:ka:demsela:mdiyoye. <sup>36</sup> Epapeleye Yesutapo opa hapuloma natipame sikemte polowamaiyo. Adipalati, yia:ye gadle pa:le ha:ha:mama sipi aliyata yia: omhallalota pa:lati ha:ha:mdiyoye, epapele some popa:iyo. <sup>37</sup> Epo halemama Yesutapo ya: alotle tlalo so watle epo atlaiyo, “Osalo dulu dla alisisi hapulomata ma-hauwallowe oloma dla ha:ha:ma. Amasiyama alisisi hauwallowe so tlo pase pasatana. <sup>38</sup> Epedeme wua: inoma sumale yu mate osalo omhallalo oplami dla atlaiya, ya:tapo ya: osalo dulu dla emale alisisi hauwallalo soye taiya dlepo depame,” diyo.

## 10

### *Yesuta opa 12 hohomale*

*(Maka 3:13-19; Luk 6:12-16)*

<sup>1</sup> Yesutapo ya: alotle tlalo so 12 sisilapame yia: watle itiyamale hamiyo, yia:tapo opa dulu tle bataliya yimlalaye alikili dla dodolomsalemsiyamama esusulumale so ma ka:ka:demsiyamelepo depame.

<sup>2</sup> Epapedeme Yesutapo Taiya dle so 12 iwoloye hohomaiyo. Saimon, ya: hi hale Pita, epame ya: ei Endulu, epo Sebedi ya: akimlala dapiyamte Yeims mate epo ya: ei Yon mate, <sup>3</sup> epame Pilipi, epo Batolome, epo Tomas, epo ta:kis mani halomalalo oplami Ma:tiyu, epame Alpiyes yami Yeims, epo Tadiyes, <sup>4</sup> epame Loum gamani so mate opahale demhalale oplami Saimon, epo Yudas Iskaliyot, alotle Yesuye opahale so do tama dla homelle oplami.

### *Yesuta opa 12 taiya dle*

*(Maka 6:7-13; Luk 9:1-6)*

<sup>5</sup> Yesuta opa 12 iwoloye taiya demama yia: watle yu ipo hamiyo, “Wua: tamalemama po-Yu so mate epo Samaliya so mate dla potlowa. <sup>6</sup> Amasiyama Isalael so opa dla telepe. Adipalati, yia:ye sipi aliya halota yia: omhallalo pa:le ha:ha:mdiyoye, epapele some ha:ha:po. <sup>7</sup> Epedeme wua: tamama God yu ipo atlamtelepe, ‘Pepele dimo kokoye momateka:pi halema,’ demtamellepe. <sup>8</sup> Epammama esusulumale so ma ka:ka:dlepe, epo palli so dla ma pasakalo hapilipe, epame kapala bobtalimale so ma ka:ka:dlepe, epame bataliya yimlalaye opa dulu tle alikili dla dodolomsallepe. Na:ta wua: watle itiyamale hami iye asiyama pa:na. Epapedeme wua: ma opa gagademsiyamama asiyama yilo pototomsiyamolowa.



<sup>9</sup> Wua: tamama mani mate pohalopo tlowa. <sup>10</sup> Epame duli pohalopo tlowa. Epame sede ma dapiyamte pohalopo tlowa. Epo hete alisisi ma pohalopo tlowa. Epame dali ku ma pohalopo tlowa. Adipalati, oko soye yia: oko asiyama halomdepo.

<sup>11</sup> Wua: mo hadima telepiye, wua: edla tame koko ka:dle oplami hale totamelepe. Wua: epapele oplami hale natipame ya: mate ya: aya dla ha:ha:lepe. Epame wua:ta mo etle mo-tlowedemeta aya eye saliyomta demsiyamelepe. <sup>12</sup> Wua: aya hadima eleme hetlepiye, wua: aya edla ha:ha:lalo so watle namkale dle yu atlemama, 'Godta sadleta wua: mate hallepe,' dlepe. <sup>13</sup> Epalati aya dulu edla ha:ha:lalo sota wua: mate namkale demama sadle mate wua:ye elemhetlepiye, wua:ta namkale dle yu atlamaletapo yia: mate hallepe. Amasiyama yia:ta wua:ye pe-elemhetlalo wekelepiye, wua:ta namkale dle yu atlamaletapo yia: mate pohallowa.

<sup>14</sup> Epame wua: mo hadima tlati opata wua:ye pe-elemhetlalo wekemama wua: yu ma podallalo wekelepiye, wua: mo e saliyome tlowedeme yia: mo sokopeta wua: hete dla popolahaleye hihiyollepe, Godta kasilamale kokota yia: dla pua kokoye imolowedeme.

<sup>15</sup> Epedeme na: mikadepe koko wua: dla atlema. Koko gladle oloma edla wua: alilalo so epapeleye asiyama sikemte wotiyalle pato halepe. Amasiyama Sodom so mate epo Gomola so mate yia: asiyama wotiyalle yimka:mala halepe."

*Pumhala wotiyalle koko*

*(Maka 13:9-13; Luk 21:12-17)*

<sup>16</sup> "Epapedeme na: wua:ye sipi aliya halo epapele some moko esemala kakasilamale dulu dla taiya dema. Epedeme wua: ilamata kakaletalimale epapele some ha:ha:iya. Epame wua: ma banapita ullu pa:pame salladepo sela:mdiye, wua: ma epapiya.

<sup>17</sup> Epedeme wua: wolomape. Opata wua:ye hohopame koko gladlalo aya dla eleme ta demha:ha:lepe. Epame wua:ye yia: inoma sumalalo aya dla eleme hetame hohopole demha:ha:lepe. <sup>18</sup> Epo na: koko tle wua:ye dokopala so patoto mila:pi dla elemhetame ipila: demha:ha:lepe. Amasiyama wua:ta edla na: kokoye yia: watle epo po-Yu so dla atlama demha:ha:lepe. <sup>19</sup> Epapele dulu dla opata wua:ye koko gladle aya dla hohopo hetlati wua: ase wua:ta atlowe dla sikemte pomomalamolowa. Adipalati, oloma edla Hela:dle Sokotapo wua:ta atlowe malamale ka:dleye hapilalo hallepe. <sup>20</sup> Epalati wua: muwolo poyuhalowa, amasiyama God ya: Hela:dle Sokota wua: mate halemama yukamelepe.

<sup>21</sup> Oloma edla oplamitapo ya: bapa mate ya: ei mateta pallipo depame yia: allimha:ha: so dla homellepe. Epame atapo ya: yimlala dla ma mepapelepe. Epame akimlalatapo sillipame yia: adulo mate epo waidulo mate palliwe dla eleme telepe. <sup>22</sup> Adipalati, wua:ta na: dla mikadepe dle koko tle opa hapulomata wua: dla elle pato himha:ha:lepe. Amasiyama antapo ya:ta mikadepe dleye kokalepo halemama mosukulu dla tame woyamelepiye, ya: pasakalo hallowe halepe. <sup>23</sup> Epedeme wua: opata wua: dla wotiyalle hamilati ma etle mo hale dla potlepe. Epame ma mo edla ha:ha:lalo sota wua: dla wotiyalle hamilati wua: ma mo hale dla pota demsiyamelepe. Amasiyama na: ikadepe koko wua: watle atlema. Wua: ala mepamsiyamalati Opa Yamita medla me-pulupe.

<sup>24</sup> Epedeme imalalo oplamiye ya: alotle tlalo sota potla:mtame halasema. Epame oko halalo sota yia: dokopala oplamiye potla:mtame ha:ha:sema. <sup>25</sup> Epapele dulu dla yia: imalalo oplami dla apa kokota woyamelepiye, ya: alotle tlalo so ma ma-dinapopo ha:ha:lepe, mepapele kokota yia: dla woyamalala depame. Epame dokopala oplami dla apa kokota woyamelepiye, ya: oko halalo oplami ma ma-dinapopo hallepe, ya: dla mepapele kokota woyamalala depame. Epedeme aya ya: ata hi batalimale hapo hallepiye, aya dulu edla ha:ha:lalo so ma hi batalimale halopo ha:ha:lepe."

*Ta:la so wowota:miya*

*(Luk 12:2-7)*

<sup>26</sup> “Epapedeme wua: alimha:ha: so dla ase sikemte wowota:miya. Adipalati, hemele towalipo hutiyeye koko hapulomaye ma haliyamale dla bobotimatimelepe. Epame opata podallalo wekemduwa kokoye ma haliyamale dla atlamelepe. <sup>27</sup> Epedeme na:ta wua: mate sela:mama hemele atlamsela: koko hapulomaye ma wua:tapo haliyamale dla bobotimatimelepe. Epame na:ta apa kokoye wua: dla hemele molo yu atlamsela:ma:, ma alotle aya dopuko di tle koko eye yu sisiyatlemale mate atlamelepe. <sup>28</sup> Epedeme wua: opa wua: alimha:ha: so natipo ase wowota:mha:ha:miya. Adipalati, yia: isikimi wua: moto tlo potipame ma koko hale haloweye po-ala:na. Amasiyama wua: hatlo God tlo wowota:mha:ha:iya. Adipalati, ya:tapo wua: motoye potipame matle wua: sokoye Dlapa mo dla ka:ka:timoloweye ala:na. <sup>29</sup> Epedeme wua: malamaiya, daliyama tea yimlala dapiyamteye isikimi palli manita halomdepo. Amasiyama dulu edla tea yimlala haleta poloweye wua: A God tatile malamdepo. <sup>30</sup> Epapedeme God me-ya:malamana, wua: dokopala dla kokosase hapuloma ha:ha:ye. Adipalati, ya:tapo hapuloma eye masesa:uwapo. <sup>31</sup> Epapedeme wua: ase sikemte wowota:mha:ha:miya. Adipalati, God mila:pi tle teata koko pato pohalasema. Hao. Wua:tapo koko pato ha:ha:po.

<sup>32</sup> Epedeme oplami antapo opa mila:pi tle halemama ya:ta na: dla mikadepe dle kokoye botomastlepiye, asiyama na:tapo na: A God Pepele di dla hala ya: mila:pi tle ya:ye na: oplami dlowepo. <sup>33</sup> Amasiyama oplami antapo opa mila:pi tle halemama ya:ta na: dla mikadepe dle kokoye botomastlowe wota:lepiye, asiyama na:tapo na: A God Pepele di dla hala ya: mila:pi tle ya:ye welliwepo.”

*Duka gladlowe koko*  
(Luk 12:51-53, 14:26-27)

<sup>34</sup> “Epedeme wua: na:tapo ta:lamo hema sadle hampuwayo depo malamha:ha:miya. Adipalati, na: sadle koko pohampuana, asiyama duka gladle kokoye hampuwapo. <sup>35</sup> Epapedeme na:ta puwa ya: dulu koko epapena.

Akimlalatapo me-yia: adulo mate duka gladle ellepe.

Epame utukakatapo me-yia: waidulo mate duka gladle ellepe.

Epame meneledulotapo me-yia: meneledulo mate duka gladle ellepe.

<sup>36</sup> Epapele dulu dla mo-wa: asiyadulotapo wa: mate duka gladle ellepe.

<sup>37</sup> Oplami antapo ya: a mate epo ya: wai mate epo yami mate epo yoti mate dla sikemte malamale pato himhalemama, asiyama na: dla malamale yimka:mala himhallepiye, ya:ye na: dolumtlowe po-ala:na. <sup>38</sup> Epame oplami antapo meyelo ya: dali yekelehmihili maka:himme na: dolumpuluwe allipiye, ya:ye na: mate po-ala:na. <sup>39</sup> Epedeme oplami antapo ya: pasakalo meyelo omhalli dlepiye, ya: pasakaloye haodlepe. Amasiyama oplami antapo na: koko dla ya: pasakalo haodlepiye, ya: halepo halepo pasakalo halepe.”

*Asiyama ka:pi halowe*  
(Maka 9:41)

<sup>40</sup> “Oplami antapo wua:ye ya: aya dla semhetlepiye, ya:ye na: semhetamama apopo. Epedeme oplami antapo na:ye semhetlepiye, ya:ye na: A na: tane duwaye e semhetamama apelepe. <sup>41</sup> Epame oplami antapo God tle yu hapame molo atlalo oplamiye ya: aya dla semhetlepiye, ya: God tle yu hapame molo atlalo oplamita asiyama haloweye, ya: ma asiyama epapele halepe. Epame ma oplami antapo ka:dle oplamiye ya: aya dla semhetlepiye, ya:ye ka:dle oplamita asiyama haloweye, ya: ma asiyama epapele halepe. <sup>42</sup> Epame oplami antapo na: dolumalalo oplamita yú ta:lali yú tipo hamilipiye, ya: ma asiyama pato halepe. Epedeme koko iye ikadepepo.”

## 11

<sup>1</sup> Yesuta ya: alotle tlalo so 12 dla koko i atlamhalepo gudepame ma Ga:lili mo pato dulu dla God yu imsela:la taiyo.

*Yesu mate epo Yon opa yú dla ka:ka:timalalo mate  
(Luk 7:18-35)*

<sup>2</sup> Yon opa yú dla ka:ka:timalalo oplamitapo amtuwale aya dulu dla halemama Kelisota koko halomsela:le dalepame ya: alotle tlalo so opa opi watle Yesu hala dla taiya diyo.

<sup>3</sup> Epalati yia: tame Yesu hala dla woyapo ya: watle epo atlaiyo, “Yonta dia:ye wa: watle taiya demama yu ipo hami, ‘Wa: ikadepe Keliso, dita omha:ha:uwa oplamita:? O, di ala oplami hale tlo me-omha:ha:pa:?’ de,” diyo.

<sup>4</sup> Epalati asiyama Yesuta yia: watle epo atlaiyo, “Wua: ma ilame tame Yon watle wua:ta tlamale koko mate epo dlalle koko mate atlamaiye. <sup>5</sup> Adipalati, inoma pa:talo sota ma tlamapo. Epame akoloyalemale so mape ma ka:ka:depo siyamapo. Epame kapala bobtalimale so mape ma ka:ka:depo siyamapo. Epame molo pa:talo so mape ma ka:ka:depo dlalemsiyamapo. Epame palli so mape ma sillipo siyamapo. Epame ka:dle yuye atali sota ma-dalepo. <sup>6</sup> Epapedeme opa anawolota na: koko tle pokustamtlalo wekelepiye, Godta yia: dla siyelepe.”

<sup>7</sup> Yon ya: alotle tlalo sota ma ilame tlati Yesuta opa watle Yon koko atlemama epo atlaiyo, “Wua: dalupa dulu dla apa koko natila tauwa? Mosisita osamokolo dla yumama holumhallati natila tauwa? <sup>8</sup> Wua: oplamita tluka ka:ka:dle didiyepo pollati natila tauwa? Hao. Adipalati, tluka ka:ka:dle didiyelalo soye dokopala sota popa:lalo aya dla popa:mdepo. <sup>9</sup> Epame wua: God tle yu hapame molo atlalo oplami natila tamama apuwa? Yao, wua:ta tame natiwa oplami Yon etapo God tle yu hapame molo atlamalalo so ka:yapa ha:ha:uwaye ma-tla:mtame halapo. <sup>10</sup> Adipalati, God yu buka dla ipo atlaleye Yon koko atlapo,

‘Na:tapo na: yu hamsela:lalo oplami tatile tane dlowepo.

Ya:tapo wa: apiye dinapelepo depame,’ depo.

<sup>11</sup> Epapedeme na:tapo ikadepe kokoye wua: watle atlema. Yonta ka:yapa ha:ha:mpuwa opa hapulomaye tla:mtame halapo. Amasiyama epapele tlope oplami antapo Pepele dimo koko dla yimka:mala depo hallepiye, ya:tapo Yonye tla:mtame halapo. <sup>12</sup> Epapedeme Yonta God yu atlamsela:uwa oloma etle kotiyapo puame wata oloma hema batalimale sotapo Pepele dimo kokoye batalipo hamastlowedeme sikemte akumyemama ma yia:ta eledostla yakomduwapo. <sup>13</sup> Yon ala pohallalo hallati Mosesta aiyalma hatitimale mate epo God tle yu hapame molo atlamalalo sota hatitimale mateta Pepele dimo kokoye atlamhaluwapo. <sup>14</sup> Epapedeme wua: yia:ta atlamale yu hema mikadepe dlepiye, eta wua:tapo Yonye ma Ilayapo dlepe. Adipalati, God yu bukatapo Ilayata puluwe kokoye ma-atlamhaluwapo. <sup>15</sup> Epapedeme molo watalo so, wua: yu iye woloma daliya.”

<sup>16</sup> Epame Yesu matle epo atlaiyo, “Wata oloma hema opa ha:ha:ye adipapele sota:? Yia:ye akimlala yimka:sikili some api duka dla popa:mama yimkadulo watle asiyama atla asiyama atla dempopa:mama ipo atlampopa:mdepo, <sup>17</sup> ‘Dita siyele sala dodolumpopa:lati wua:ta posiyalemдена. Epame dita dupa kolle sala dodolumpopa:lati wua:ta po-a:lemдена,’ demdepo. <sup>18</sup> Wua: ma epapele so some ha:ha:po. Adipalati, Yon opa yú dla ka:ka:timalalota puwaye, ya: daya mate wain yú mate podemsela:na. Amasiyama wua:ta ya:ye bataliya walena demyapo. <sup>19</sup> Epame Opa Yami mape mopuwapo. Ya:ta puame daya mate wain yú mate demsela:lati wua:ta ya:ye daya mate wain yú mate sikemte dlalo oplami demyapo. Epame wua:tapo ya:ye ta:kis mani halomalalo so mate epo batalimale so mate namkale dlalo oplami demyapo. Amasiyama God ya: opata ka:depo ha:ha:la natipame opa opitapo e natimama God kokoye ka:pi demha:ha:lepe.”

*Yesuta pomikadepe dle so moye sikemte atlamale  
(Luk 10:13-15)*

<sup>20</sup> Yesutapo mo opi dla ulugiyemale koko hapuloma halomsela:lali mo so opata yia: bobtalimale tle poheheletimalalo wekelati ya:tapo ipapele so koko dla sikemte atlemama epo atlaiyo, <sup>21</sup> “Ka:e, Kolasin so mate epo Betsaida so mate, wua: wolomape! Wotiyalle patota wua:ye omelapo. Adipalati, na:ta wua: mo dla ulugiyemale koko patoto halomsela:uwa epapeleye ma po-Yu so mo Taya mate epo Saidon mate dla halomsela:matiye, yia: pakasiyamalalo yia: bobtalimale tle heheletimelemla. Epame yia:ta yia: bobtalimale koko tle ma-heheletimale kokoye nati-imama tluka bobtalimale didiyepame tilepu huhutapo siyamelemla. <sup>22</sup> Epedeme na: wua: dla atlema, Godta koko gladle oloma dla Taya so mate epo Saidon so mate dla wotiyalle yimka:mala hamilipe. Amasiyama Kolasin so wua: mate epo Betsaida so wua: mate dla wotiyalle pato hamilipe. <sup>23</sup> Amasiyama Kapaniyem so, wua: alila oloma edla wua:ye Pepele dimo dla ta:dlepo depo momalaha:ha:ma? Hao. Wua:ye hohopame Dlapa mo dla ka:ka:timelepe. Na:ta wua: mo dla ulugiyemale koko patoto halomsela:uwa epapeleye ma Sodom mo dla halomsela:matiye, wata oloma hema Sodom moye pobatalimalalo ala me-hallemla. <sup>24</sup> Amasiyama na: wua: dla atlema, Godta koko gladle oloma edla Sodom mo so dla wotiyalle yimka:mala hamilipe. Amasiyama Kapaniyem so wua: dla wotiyalle pato hamilipe.”

*Na: hala dla puame hedle haiya*

*(Luk 10:21-22)*

<sup>25</sup> Epalati Yesuta epo atlaiyo, “A, pepele di mate epo ta:lamo mate wa:tapo Lod depo halapo. Epedeme na: wa: dla siyele hamima. Adipalati, wa:tapo wa: mo koko hemele hutiyeye, koko malamale so dla pobotomastlalo wekuwapo. Amasiyama wa:tapo isikimi koko yeitamale so dla botomastauwapo. <sup>26</sup> Yao A, ikadepe, koko iye wa:ta solotamale kokopo.”

<sup>27</sup> Yesu ma opa watle epo atlaiyo, “Na: Atapo koko hapulomaye na: watle ma-halopiwapo. Oplami haletapo Yamiye poya:malamana. Amasiyama hatlo A tlo Yamiye ya:malamana. Epame oplami haletapo Aye poya:malamana. Amasiyama hatlo Yami tlo Aye ya:malamana. Epame opa anawolo dla Yamita A kokoye botomastlowe solotamelepiye, opa ewoloye A kokoye yia: ma malamelepe.

<sup>28</sup> Epedeme opa anawolotapo upiyele alisisi didiyepo siyamama susukalle mate siyama:, wua: na: hala dla puaiya. Epalati na:tapo wua: watle hedle hamilowepo. <sup>29</sup> Epame na:ta imale kokoye hapame na: koko natipo dolumaiya. Adipalati, na:ye pta sikemte sadena. Epapedeme wua: puame na: dla hedle haiya. <sup>30</sup> Adipalati, na:ta imale koko wua: dla hamilowedeme halaye pase kokalena. Epame na:tapo wua:ta didiyepo telepo depame alisisi kokomale hamilowedeme hala iye pta sikemte holokamana.”

## 12

*Pa:lisi sota yia:ta inoma sumalalo alila koko dla Yesu mate yu topulolle*

*(Maka 2:23-28; Luk 6:1-5)*

<sup>1</sup> Yu so inoma sumalalo alila hale dla Yesuta ya: alotle tlalo so mate witi daya emale dulu tle tamalaiyo. Epame Yesu ya: alotle tlalo sota daya teta:mama witi dlomoko hauwalepame dlomtamaiyo. <sup>2</sup> Epalati Pa:lisi sota koko i natipame Yesu watle epo atlaiyo, “Wa: alotle tlalo sota adipalati dita inoma sumalalo alila dla dlowe alisisi hauwali? Yia: di aiyalma ma-hauwokokomalepo,” diyo.

<sup>3</sup> Yesuta asiyama epo atlaiyo, “Wua: God yu buka dla Deibidi mate ya:mkadulo mate yia:ta daya teta:lali koko halëye posesamdi? <sup>4</sup> Adipalati, Deibiditapo God ya: aiyalma aya dulu dla tuwame aiyalma dayaye hapame ya:mkadulo mate douwapo. Amasiyama aiyalma daya iye di aiyalma dolumama isikimi God ka: epo opa ka: duka dla ha:ha:lalo so siyapota dlomduwapo. Epapele tlope Deibiditapo di aiyalma postamama ya: opa mate mepele dlomuwapo. <sup>5</sup> Epame wua: Mosesta aiyalma hatitimale dulu dla yu haleta ipo

atlaye wua: posesa:semndi? Eye God ka: epo opa ka: duka dla ha:ha:lalo soye dita inoma sumalalo alila dla aiyalma aya dulu dla yia: oko halomdepo. Yia:ta epamha:ha:mdiye eta yia: ma aiyalma hauwokokomdepo. Amasiyama Godta koko e natimama pobatalimana desemde. <sup>6</sup> Epedeme na: wua: dla atlema, koko hale amkotapo wata oloma hema mo-puame halemama aiyalma ayata itiyamaleye mo-tla:mtame halapo. <sup>7</sup> Epapedeme God yu bukata epo atlapo,

‘Na: ya:mkale gadlowe tlo sikemte malamama

asiyama wua:ta na: dla alinepi poyupo hapilowe koko tlo pase malamasema,’ depo. Wua: yu e ya: dulu koko ikadepe sikemte malastame ha:ha:lepiye, wua: na: alotle tlalo soye pobatalimale so dlowa. <sup>8</sup> Adipalati, Opa Yamitapo wua:ta inoma sumalalo alilaye ya:ta dokopala depo halapo.”

*Yesuta do seme powale oplami ka:dle  
(Maka 3:1-6; Luk 6:6-11)*

<sup>9</sup> Yesuta yu i atlamhalepo gudepame ma etle yia:ta inoma sumalalo aya dla hetaiyo. <sup>10</sup> Epame aya dulu edla oplami hale do seme powale ma me-polaiyo. Epapele dulu dla Pa:lisi sotapo Yesuye batalimale oplami dlowe api totamama ya: watle epo atlaiyo, “Dita inoma sumalalo alila dla oplami ka:dloweye ka:deta:?” diyo.\*

<sup>11</sup> Amasiyama Yesutapo yia: watle epo atlaiyo, “Wua: dulu dla wua: sipi aliya epapeleta dita inoma sumalalo alila dla munamu dulu dla teyulupiye, wua: ya:ye poholahalalo wekepa:? Hao. Wua: ya:ye munamu dulu tle holalepe. <sup>12</sup> Epapedeme God mila:pi tle sipi aliyatapo koko pato pohalasema. Hao. Oplamitapo koko pato halapo. Epapedeme oplamitapo dita inoma sumalalo alila dla ka:dle koko haloweye aiyalma kokota pobatalimana desema.”

<sup>13</sup> Epammama Yesutapo do seme powale oplami watle epo atlaiyo, “Wa: do powal-eye mo-dolene,” diyo. Epalati oplamita ya: do powaleta mo-dollati ya: dota maka:demama ma ya: do seme ka:dle some halaiyo. <sup>14</sup> Epalati Pa:lisi sotapo koko i natipame siyalasiyalademama yia:ta inoma sumalalo aya tle alikili dla tamalaiyo. Yia: tame yiskamu yia: dulu dla Yesuye adipo hampo yumpa: dle kokoye esemaiyo.

*Yesuye Godta sale oplamipo*

<sup>15</sup> Epedeme Yesu yia:ta yu hatitimpopa:le koko dalepame ma mo hale dla taiyo. Epalati opa hapulomatapo ya: dolumtamalaiyo. Epapalati ya:tapo yia: dla esusulumale hutiyele hapulomaye ka:ka:depame yia: watle itiyamale mate epo atlaiyo, <sup>16</sup> “Na: kokoye ase opa hapuloma dla esemsiyamiyo,” diyo. <sup>17</sup> Eye God tle yu hapame molo atlalo oplami Aisayata atlamale mate ala:lowedeme apiyo. Adipalati, ya:tapo epo atluwapo,

<sup>18</sup> “Na: oko oplami natiya.

Ya:ye na:ta sale oplamipo.

Na: ya:ye sikemte malamama

ya: dla siyema.

Na:tapo na: Sokoye ya: watle hamilowepo.

Epalati ya:tapo ikadepe kokoye po-Yu so hapuloma dla atlamelepe.

<sup>19</sup> Epame ya:tapo oplami hale mate yu ga:ga:lemama yu potopulolowa.

Epo oplami haletapo ya:ta yu topulolle yuye mo duka dla podallowa.

<sup>20</sup> Epame ya:tapo osamokolo illiye popostlowa.

Epo tuloma yimka:mala ullumhallaloye posumtlowa.

Epedeme ya:tapo opaye epo gagademhala kokoye yipta pomellowa.

Amasiyama opa hapulomata Godta solotamale koko tlo dolumha:ha:la natipame medla gudlepe.

\* **12:10:** Palisi sotapo Yesu watle ipo atlaiyo, adipalati, yia: aiyalma koko dolumama yia:ta inoma sumalalo alila dla esiyele oplami hale ka:dloweye aiyalmayo.



<sup>21</sup> Epapedeme ya: hi tle po-Yu so opa hapulomatapo yia:ta omha:ha:mama dalemha:ha: pasakaloye halepe.”

*Yesu mate Belsebul mate  
(Maka 3:20-30; Luk 11:14-23)*

<sup>22</sup> Oloma edla opatapo oplami hale bataliya yemalata ya: dulu dla tuwame halemama inoma mate epo yu mate pa:po halaleye Yesu hala dla hamampumulaiyo. Epalati Yesutapo ya:ye ka:diyo. Epapele oloma medla oplamitapo ya: inoma mo-towanatipame yukamolowe ma mo-kotiyamaiyo. <sup>23</sup> Opa hapulomata koko i natipo yiyelepame epo atlamyaiyo, “Oplami iye Deibidi Yami mle,” demyaiyo.

<sup>24</sup> Amasiyama Pa:lisi sotapo koko i dalepame epo atlamyaiyo, “Yesuye Belsebulta itiyamale tle bataliya yimlalaye alikili dla dodolomsalemsela:ma. Adipalati, Belsebulye bataliya yimlala yia: apo,” demyaiyo.

<sup>25</sup> Amasiyama Yesu yia:ta malamaleye momalanatipame yia: watle epo atlaiyo, “Mo hatlope sotapo yiskamu yia: dulu dla duka gladeleme opahale dlepiye, mo eye pohal-lowwa, batalimelepe. Epame asiya hatlope sota yiskamu yia: dulu dla duka gladeleme opahale dlepiye, asiya ewoloye poha:ha:lowwa, batalimelepe. <sup>26</sup> Epapedeme Saiten-tapo bataliya yimlalaye alikili dla dodolomsalemhallepiye, eta ya:skamu ya: alumale dulu dla duka gladeleme opahale dlepe. Ya:ta epapelepiye, adipammama ya: mo kokota kokó elepa:? Batalimelepe. <sup>27</sup> Amasiyama na:ta bataliya yimlalaye alikili dla dodolomsalemsela: itiyamale iye ikadepe Belsebulta itiyamale tle amsela:ma dlepiye, ame mo-wua: opata bataliya yimlala alikili dla dodolomsalemsiyamaye itiyamale adi tle hapo siyamama amma:? Epedeme wua: opa ewolotapo wua:ta na: dla atlamyaleye pomikadepe dlowa. <sup>28</sup> Amasiyama na:tapo God ya: Sokota itiyamale tle bataliya yimlalaye alikili dla dodolomsalemsela:ma dlepiye, God ya: mo kokotapo wua: dla mo-puwapo.

<sup>29</sup> Epedeme oplami haletapo itiyamale oplami aya dla hetame alisisi uhalo-molowedeme apelepiye, ya: ka:yapa itiyamale oplami tate dea mate yupo himilipe. Epame alotle ya: aya dulu dla hetame ya: alisisi uhalomelepe.

<sup>30</sup> Epapedeme oplami antapo na: tiyama tle pohallalo wekelepiye, ya:ye na: mate opahale demhalapo. Epame oplami antapo na: mate opaye God hala dla pe-elempulalo wekelepiye, ya:tapo opaye God tle ma alikili dla dodolomsalemhalapo. <sup>31</sup> Epedeme na: wua: watle ikadepe koko atlema. Batalimale koko hapuloma opata halomde mate epo yu batalimale God hi mate putlopo atlepiye, Godta howahapo hiyostlepe. Amasiyama oplami antapo Hela:dle Soko watle putlopo atlepiye, Godta ya: batalimaleye pohowahapo hiyostlowa. <sup>32</sup> Epedeme oplami antapo Opa Yami dla batalipo putlopo atlepiye, Godtapo ya: batalimaleye howahapo hiyostlepe. Amasiyama oplami antapo Hela:dle Soko dla batalipo putlopo atlepiye, ya: kokó elepo ellalo batalimale hapo. Epedeme ya: batalimaleye Godtapo pohowahapo hiyostlowa.”

*Dlomoko tle dali malanatimdepo  
(Luk 6:43-45)*

<sup>33</sup> “Epedeme dlomoko dali ka:dletapo dlomoko ka:ka:dle mimdepo. Epame dlomoko dali batalimaletapo dlomoko batalimale mimdepo. Epedeme dlomoko dali hapulo-maye yia: dlomoko tle malanatimdepo. <sup>34</sup> Epedeme wua: ilama yimlalapo. Wua: bobtalimale so depo ha:ha: tle ma adipammama ka:ka:dle koko atlapa:? Epapedeme adipapele kokotapo oplami dupa dulu dla pasatepo ellepiye, ya: mati tle epapele kokoye atlamdepo. <sup>35</sup> Epedeme ka:dle oplamitapo ka:ka:dle koko ya: dupa dulu dla hutiyeye ya: mati tle halopo wowoyamdepo. Epalati batalimale oplamitapo ya: dupa dulu tle bobtalimale kokoye halopo wowoyamdepo. <sup>36</sup> Epapele dulu dla na: mikadepe koko wua: watle atlema. Kokó gladle oloma edla opa hapuloma hatlope hatlope dletapo yia:ta bobtalimale yu atlamale hapulomaye God dla bobotimatimelepe. <sup>37</sup> Epedeme

Godtapo wa: koko glademama mowolo yu adipo atlamsela:mduwa yu e mate wa: kokoye gladlepe. Epapele dulu dla wa: yu ka:ka:dle tlo atlamsela:mduwayo, ya:tapo wa:ye ka:dle oplami dlepe. Amasiyama wa: yu bobtalimale tlo atlamsela:mduwayo, ya:tapo wa:ye batalimale oplami dlepe.”

*Opata ulugiyemale koko natilowe solotamale  
(Maka 8:11-12; Luk 11:29-32)*

<sup>38</sup> Alila hale dla Pa:lisi so opi mate epo aiyalma imalalo so opi mate Yesu hala dla puaiyo. Yia:tapo Yesuta itiyamale hamsela:ye ikadepe God tle malata: depame ya: watle epo atlaiyo, “Imalalo oplami, di wa:ta ulugiyemale koko hale halati natilowe solotama,” diyo.

<sup>39</sup> Yesuta asiyama yia: watle epo atlaiyo, “Wata oloma hema ha:ha: so opaye pta bobtalimana. Epame yia: ma God kokoye pokoko desemde. Epammama yia: isikimi ulugiyemale koko tlo tlamha:ha:lowedeme na: watle atlamha:ha:po. Amasiyama na: yia: dla ulugiyemale koko hale ponati-iliwa. Isikimi God tle yu hapame molo atlalo oplami Yona koko tlo yia: watle nati-iliwepo. <sup>40</sup> Yonatapo alila dapahatlope amalalo pato koko dulu dla eluwapo. Epammama Opa Yami mape alila dapahatlope ta:la dulu dla ellepe. <sup>41</sup> Epedeme Niniba sotapo koko gladle oloma dla wua: mate ha:ha:mama wua: kokoye gladepo wua:ye batalimale so dlepe. Adipalati, Yonata God yuye yia: dla hampulati yia:tapo yia: bobtalimale tle ma-heheletimuwapo. Amasiyama na:tapo Yonaye tla:mtame halapo. Epapele tlope na:ta God yuye wua: dla hampulati wua:ta dalepame wua: bobtalimale tle poheheletimana. <sup>42</sup> Epame koko gladle oloma dla Siba mo dokopala a:ya mape wua: mate koko gladle dla halemama wua: kokoye gladepo wua:ye batalimale so dlepe. Adipalati, ya:tapo mo pateka:mu tle pato oplami Solomonta imale koko dalla puwapo. Amasiyama na:ta Solomonye tla:mtame halapo. Epapele tlope wua:tapo na: yuye dalla allipo.”

*Bataliyata ma ilame puluwe koko  
(Luk 11:24-26)*

<sup>43</sup> “Epedeme bataliya yemalata oplami tle alikili dla ulatelepiye, ya: tame dalupa dulu dla ya:ta hedlowe moye totamsela:lepe. Ya: epo totamsela:mama ya:ta hedlowe mo ponatilalo wekelati ma ya:skamu epo atellepe, <sup>44</sup> ‘Na: na:ta haluwa aya dla ma ilame tali,’ dlepe. Ya: epo puame natili dla ayata ala aya siyapo woloma hakaka towalipo hallati natilipe. <sup>45</sup> Epalati ya: ma tame bataliya yimlala opi 7 sikemte i-itiyamale tlo elempuame aya edla hallepe. Epapelepiye, oplami itapo ya:ta ka:yapa haluwaye memelepame ma sikemte batalipo hallepe. Epapedeme wata oloma hema batalimale dulu dla ha:ha:lalo so dla epapele kokota woyamelepe.”

*Yesu ya: wai mate epo ya: eidulo mate  
(Maka 3:31-35; Luk 8:19-21)*

<sup>46</sup> Yesu opa alumale dla ala me-yukamhallati ya: wai mate epo ya: eidulo mateta alikili tle puame ha:ha:mama ya: mate yukamolowe solotamaiyo. <sup>47</sup> Epalati oplami haletapo Yesu watle epo atlaiyo, “Wa: wai mate epo wa: eidulo mateta wa: mate yukamolowe solotamama alikili dla puame omha:ha:ma,” diyo.

<sup>48</sup> Amasiyama Yesutapo ya: watle epo atlaiyo, “Na: wai anata:? Epo na: eidulo ma anawolota:?” diyo. <sup>49</sup> Epame ya:ta ya: alotle tlalo so dla do dlokomama epo atlaiyo, “Iwoloye na: wai mate epo na: eidulo matepo. <sup>50</sup> Adipalati, opa anawolotapo na: A Pepele di dla halata solotamale koko halomha:ha:lepiye, ewoloye na: eidulopo, epo notimadulopo, epo na: waidulo ikadepepo.”

## 13

### *Witi daya ale ka:ka:lle mate wayu atlale*

*(Maka 4:1-9; Luk 8:4-8)*

<sup>1</sup> Alila hatlo medla Yesu aya dulu tle alikili dla woyapame Ga:lili kaula peleyama dla polla tuluiyo. <sup>2</sup> Ya: edla tulumme impollati opa hapulomatapo ya:ta imale dallowedeme ya: hala dla puame sikemte alumaiyo. Epalati Yesuta koa dla posokolome polomama impollati opa hapulomata tamali tle dalempopa:iyo.

<sup>3</sup> Epame ya:tapo koko hapulomaye wayu mate opa hapuloma dla impolomama epo atlaiyo, “Alila haleta oplami haletapo witi daya aleye ka:ka:lla taiyo. <sup>4</sup> Ya: witi daya ale ka:ka:lemsela:mama ale opitapo api duka dla teteyuiyo. Epalati teata puame deiyo. <sup>5-6</sup> Epalati witi daya ale opitapo ewala ta:la dla teteyupame hapele popeyalimaiyo. Amasiyama yia:ye sali alemalleta yumama pakasiyamalalo paliyo. Adipalati, ta:la popta:deme yia: keseye ta:la dulu dla sikemte potutula:lalo wekiyo. <sup>7</sup> Epo ma witi daya ale opita osamokolo dulu dla teteyuiyo. Yia: epame pakasiyamalalo popeyalimaiyo. Amasiyama yia:ta teta:le oloma edla osamokolota yia: mate matamama dukuluta popoliyelati yia:ta hapulomata paliyo. <sup>8</sup> Epame witi daya ale opita ta:la ka:dle dla teteyuiyo. Epame yia:tapo popeyalipo teta:pame dlomoko sikemte milimaiyo. Epele dulu dla witi daya ale opitapo 100 dlomoko milimaiyo. Epo opitapo 60 dlomoko milimaiyo. Epo opitapo 30 dlomoko milimaiyo. <sup>9</sup> Epedeme molo watalo so opa, wua: yu i daliya.”

### *Adipalati Yesuta wayu mate imsula:mduwa?*

*(Maka 4:10-12; Luk 8:9-10)*

<sup>10</sup> Epalati Yesu ya: alotle tlalo sota puame Yesu watle epo atlaiyo, “Wa: adipalati opa watle wayu mate imsula:mdi?” diyo.

<sup>11</sup> Yesu asiyama yia: watle epo atlaiyo, “Wua:tapo Pepele dimo kokoye malastlepe. Adipalati, ka:yapa Godta ya: mo kokoye hemele hatiyomeleme haluwaye wata wua: dla botomastapo. Amasiyama ya: opa opi dla pobotomastana. <sup>12</sup> Epedeme woloma ka:pi dallalo oplami dla Godtapo ka:pi malamale pasataleye hamilipe. Amasiyama oplami antapo na: yuye podallalo wekelepiye, Godtapo ya: dla ka:dle malamale yemala elaye kolahalepe. <sup>13</sup> Na:tapo opa watle wayu mate imsula:mdepo. Adipalati, ‘yia:tapo natimama ya: dulu kokoye woloma ponatilalo wekelepo depame.

Epame yia:tapo dalepame woloma ya: dulu kokoye pomalamalalo wekelepo depame.’

<sup>14</sup> Epalati Aisayata atlale yutapo yia: tle ikadepe depo. Adipalati, ya:ta ipo atluwapo, ‘Wua: woloma kulume dallepe,  
amasiyama wua: woloma pomalamolowa.

Epame wua: woloma kulume natilipe,  
amasiyama wua: woloma pomalanatilowa.

<sup>15</sup> Adipalati, yia: dupa dulu malamaleye pta kokalalimana.

Epapedeme yia: molo mate epo yia: inoma mateye ma-hihimamuwapo.

Amasiyama yia:ta inomata natipo molota dalepame malamale hapo na: dla ilame pumatiye,

Eta na:ta yia: bobtalimaleye hiyotimelemla.’

<sup>16</sup> Amasiyama Godtapo wua: dla siyemhalapo. Adipalati, wua: inomatapo koko tlamha:ha:po, epame wua: molotapo koko dlalemha:ha:po. <sup>17</sup> Epedeme na: wua: watle ikadepe koko atlema. God tle yu hapame molo atlalo so ka:yapa ha:ha:uwa mate epo God mila:pi tle ka:ka:dle so opa matetapo wua:ta wata tlamde kokoye natilowa depame omha:ha:uwapo. Amasiyama yia: potlamana. Epame wua:ta wata dlalemde koko mape dallowa depame omha:ha:uwapo. Amasiyama yia: podalena.”

*Wayu ya: dulu koko  
(Maka 4:13-20; Luk 8:11-15)*

<sup>18</sup> Yesu ma epo atlaiyo, “Epapedeme witi daya ale ka:ka:lle wayu i ya: dulu kokoye woloma daliya. <sup>19</sup> Epapedeme opa opitapo witi ale api duka dla teteyuli epapele some ha:ha:po. Yia: ka:dle yu Pepele dimo kokoye dalepame woloma pahalalo wekelepiye, Saitenta puame God yu iye yia: dupa dulu tle kolahamdepo.

<sup>20</sup> Epalati opa opitapo witi daya aleta ewala ta:la dla teteyuli epapele some ha:ha:po. Epedeme yia:ta:po God yu atla dalepame siyele mate ma-hamdepo. <sup>21</sup> Amasiyama God yutapo yia: dupa dulu dla kese woloma potutula:semde. Epedeme yia:ta God yuye dalepame isikimi alila kiyele dla mikadepe demdepo. Amasiyama yia:ta God yu hamale koko tle kokalle koko mate epo wotiyalle koko mateta yia: dla woyamalati yia:ta God yu dla ha:ha: etle ma-hapele alikili dla potamdepo.

<sup>22</sup> Epalati opa opitapo witi daya ale osamokolo dulu dla teteyuli epapele some ha:ha:po. Yia:ta:po God yu dalepame hamdepo. Amasiyama ta:lamo pasakalo momala-male mate epo alisisi poposatilipo ha:ha:lowe malamale mateta yia:ta mikadepe dleye yumdepo. Epapele koko tle yia:ta mikadepe dle kokota dlomoko pomilimasemde.

<sup>23</sup> Epapalati opa opitapo witi daya ale ta:la ka:dle dla teteyuli epapele some ha:ha:po. Yia:ta:po God yu dalepame woloma hamdepo. Epammama yia:ta dlomoko milimama opita 100 dlomoko milimdepo, epo opita 60 dlomoko milimdepo, epo opita 30 dlomoko milimdepo.”

*Witi daya ale mate epo osamokolo ale mate*

<sup>24</sup> Epame matle Yesutapo wayu hale mate ipo imaiyo, “Pepele dimo kokoye ipapena. Oplami haletapo witi daya aleye ya: ta:la dla ka:ka:liyo. <sup>25</sup> Amasiyama utula:la edla opa hapulomata mo-hutiyelati ya: dla opahale dlalo oplamitapo puame ya:ta witi daya ale ka:ka:lle di tle osamokolo aleye ka:ka:lemtaiyo. <sup>26</sup> Epedeme witi dayata matapame dlomoko milimale oloma edla osamokolo ma mataiyo.

<sup>27</sup> Epalati ya: oko sota puame epo atlaiyo, ‘Wa: osalo dulu dla witi daya ale siyapo tlo ka:ka:luwapo. Amasiyama adipammama osamokolo ma dulu medla matama?’ diyo.

<sup>28</sup> Epapalati asiyama ya:ta epo atlaiyo, ‘Dia: mate opahale dlalo oplamitapo puame ka:ka:luwayo,’ diyo.

Epame ya: oko sotapo ya: watle epo atlaiyo, ‘Ka:deta:, dita tame osamokolo eye poptalipo alikili dla pololloweye?’ diyo.

<sup>29</sup> Amasiyama ya:ta:po yia: watle epo atlaiyo, ‘Hao, wua: pe-epapolowa. Adipalati, wua: osamokolo e poptalimama witi daya mate poptalilala. <sup>30</sup> Epedeme aseka yia:ta yimkata mepo teta:lepo. Epame hauwallowe oloma dla na:ta:po na: oko so watle osamokolo tatile poptalipame dlapa dla mistaiya dlowepo. Amasiyama witi daya tlo woloma hauwalepame na: aya dla hampuame kolumaiya dlowepo.’ ”

*Masted dlomoko ale yimka:mala mate epo yist mate dla Yesuta wayu imale  
(Maka 4:30-32; Luk 13:18-21)*

<sup>31</sup> Epame matle Yesutapo wayu hale mate ipo imaiyo, “Pepele dimo kokoye ipapena. Oplamitapo masted dlomoko ale yemala yimka:mala ikadepeye hamtame emomellepe.

<sup>32</sup> Amasiyama dlomoko ale yemala etapo peyapame ta:lepiye, osalo dulu edla dlomoko dali eta pato hallepe. Epalati teatapo puame ya: dlo dla eto tilimyelepe.”

<sup>33</sup> Epame matle Yesutapo wayu hale mate ipo imaiyo, “Pepele dimo kokoye ipapena. A:yatapo palawa daya ha:lowedeme ka:yapa dukumama palawa daya pato dulu dla yist yimka:malaye kustamdepo. Epalati yist yimka:mala etapo palawa dayaye sikemte ta:mdepo.”

<sup>34</sup> Epedeme Yesutapo isikimi wayu ipapele mate opa hapulomaye imsula:mdiyu.  
<sup>35</sup> Ya:ta ipapele koko halomsela:uwaye God tle yu hapame molo atlalo oplamita atluwa koko mate ala:lowedeme apuwapo. Adipalati, ya:ta ipo atluwapo,  
 “Na:tapo opa watle God yu imama  
 wayu mate imsula:lowepo.  
 Epame na:tapo ka:yapa ta:lamo kotiyamale tle hemele hahatuyopo hutiyele kokoye  
 ma haliyamale dla bobotimatimelepe.”

*Witi daya mate epo osamokolo mate wayu atlale ya: dulu koko*

<sup>36</sup> Yesu opa alumaleye medla pomelepame ma aya dulu dla hetaiyo. Epalati ya: alotle tlalo sota ya: watle puame epo atlaiyo, “Wa: di watle witi daya ale mate osamokolo ale mate ka:ka:lle wayu ya: dulu kokoye woloma imane,” diyo.

<sup>37</sup> Epapalati Yesuta yia: watle epo atlaiyo, “Witi daya ale ka:ka:lle oplamiye e Opa Yamipo. <sup>38</sup> Epalati witi daya ale ka:ka:lle osaloye ta:lamopo. Epedeme witi daya aleye God ya: akimlalapo. Amasiyama osamokolo aleye Saiten ya: akimlalapo. <sup>39</sup> Epapele dulu dla osamokolo ale ka:ka:lle oplamiye Saitenpo. Epapedeme hauwallowe alilaye ta:lamo mosukulupo. Epalati witi daya hauwallalo soye God ya: banakaka sopo.

<sup>40</sup> Epedeme osamokoloye potopame dlapa dla mistemdiye, epammama ta:lamo mosukulu dla Opa Yamita Saiten ya: akimlalaye dlapa dla epo mistlepe. <sup>41-42</sup> Epapele dulu dla Opa Yamitapo ya: banakaka soye taiya dlepe, yia:tapo tame opa anawolotapo yimkaduloye batalimale koko dulu dla elemtullalo so mate epo batalimale koko halomalalo so mateye eleme Dlapa mo dla ka:ka:timelepe. Epalati yia:tapo dulu edla a:lemha:ha:mama yia: a:pe tetekelalimyelepe. <sup>43</sup> Amasiyama Godta ka:dena dle sotapo yia: A God mo dla sali some silapompopa:lepe. Epedeme molo walle oplamitapo yu iye dallepe.”

*Mani hemele hatiyomeleme elale koko mate wayu atlale*

<sup>44</sup> “Epapedeme Pepele dimo kokoye ipapena. Oplamitapo ta:la muwalem tamama oplami haleta mani sikemte pato mo-powataliya hemele hatiyomelleye natilipe. Ya: mani e natipame matle ta:la mate kakapulomelepe. Epame ma siyele mate ya: aya dla ilame tame ya: alisisi hapulomaye opa watle hapipame asiyama mani tlo halepe. Ya: epame mani e mate ta:la e halepe. Epammama dulu edla mani pato hemele hatiyomeleme ela eye e ma ya:tapo halepe.”

*Moli ka:dle mate wayu atlale*

<sup>45</sup> “Epame Pepele dimo koko ma ipapena. Oplamitapo moli epapele totamsela:lepe. <sup>46</sup> Ya: totamsela:mama moli sikemte ka:dle natilipiye, ya: tame ya: alisisi hapulomaye opa watle hapipame asiyama mani tlo halepe. Ya: epame mani e mate moli ka:dle eye halepe.”

*Amalo halalo mata mate wayu atlale*

<sup>47</sup> “Epame Pepele dimo koko ma ipapena. Amalo halomalalo sotapo yia: mataye yú dulu dla pololepame amalo sikemte halomdiye epapena. <sup>48</sup> Epapele dulu dla amalota yia: mata dla sikemte tumulale hallepiye, yia: mata eye hallumhetame tamali di dla popa:mama hukullupe. Yia: hukulumama amalo ka:ka:dle tlo duli dulu dla hamama, asiyama huhutalemale tlo polollepe. <sup>49</sup> Epapedeme ta:lamo mosukulu dla koko epapeleta me-woyamelepe. Epammama God ya: banakaka sotapo ta:lamo pato dla tame ka:ka:dle so mate bobtalimale so mate duka gladlepe. <sup>50</sup> Epame bobtalimale so tlope Dlapa mo dla ka:ka:timelepe. Epalati yia:tapo dulu edla a:lemha:ha:mama yia: a:pe tetekelalimyelepe.”



<sup>51</sup> Yesu epo halemama ya: alotle tlalo so dla epo atlaiyo, “Wua: na:ta atlama ya: dulu kokoye woloma malama:?” diyo. Epalati yia:tapo asiyama epo atlaiyo, “Yao, di me-malama,” diyo.

<sup>52</sup> Epalati Yesuta yia: watle epo atlaiyo, “Aiyalma imalalo oplami antapo Pepele dimo kokoye sikemte malastame hallepiye, ya:ye aya ya: a epapele some halapo. Ya:tapo aya dulu etle alisisi amko mate epo takala mate halopo pua demhallepe.”

*Yesuye ya: mo sota alli  
(Maka 6:1-6; Luk 4:16-30)*

<sup>53</sup> Yesu opa hapulomaye wayu mate imhalepo gudepame ma-taiyo. <sup>54</sup> Ya: ma ilame tame ya: mo ikadepe Nasalet dla halemama yia:ta inoma sumalalo aya dla hetame opaye God yu mate imhalaiyo. Epalati opa hapulomatapo ya:ta imale dalepame sikemte yiyelemama epo atlamyaiyo, “Oplami ita imale hamsela:leye hadima hauwa? Epame ya:ta ulugiyemale koko halomsela:ye, apa kokota:? <sup>55</sup> Ya: isikimi Meli yamipo. Epame ya:ye isikimi hema hallalo aya halalo oplami yamipo. Epo ya:ye Yeims mate epo Yosep mate epo Saimon mate epo Yudas mate yia: bapapo. <sup>56</sup> Epame yotumadulo mape dia: mate midla popa:po. Epapedeme Yesuta koko halomsela: iye hadima hauwa?” demyaiyo. <sup>57</sup> Epedeme yia:ta ipo malamale tle Yesuta imale haloweye alliyo.

Epalati Yesuta yia: watle epo atlaiyo, “Opatapo God tle yu hapame molo atlalo oplami yu dla dalepame heodemdepo. Amasiyama ya: mo so mate epo ya: asiyadulo mateta ya: yu dla dalepame poheodesemde,” diyo.

<sup>58</sup> Epedeme Yesu yia:ta ya: dla mikadepe dle pa:le natipame ya: mo edla ulugiyemale kokoye pase halomaiyo.

## 14

*Yon opa yú dla ka:ka:timalalo oplami yumili  
(Maka 6:14-29; Luk 9:7-9)*

<sup>1-12</sup> Alila haleta Ga:lili mo omhallalo oplami Helodtapo ya: ei Pilipi ya:llu Helodiyasye kolahaiyo. Epalati Yonta koko i natipame Helodye sikemte atlemama epo atlemdiyo, “Wa:ta wa: ei ya:llu kolahaloweye poka:dena. Adipalati, eye aiyalmapo,” demdiyo.

Epalati Helodta sikemte siyaladepame Yonye amtuwale aya dla ka:staiyo. Epam-mama ya: solotamaiyo, Yon yumuluwedeme. Epele tlope ya: opa wota:mama poyumiyo. Adipalati, opa hapulomata Yonye God tle yu hapame molo atlalo oplami demdiyo.

Epame alotle Helod ya: hamale alilata umalati ya:tapo ya:mkadulo mate eleme puame daya dempolaiyo. Epalati Helodiyas yotitapo puame yia: mila:pi tle ka:pi yomama Helod dla siyele hamiyo. Epalati asiyama Helodtapo yu itiyamale himimama ya: watle epo atlaiyo, “Wa:ta solotamale alisisiye na: watle atlepiye, na:ta alisisi eye wa: watle hamilowepo,” diyo. Ya: epo atla dalepo yomhalepo gudepame ya: wai hala dla tuwame ya:ta solotamale kokoye daliyo. Epo ma ilame matime Helod watle epo atlaiyo, “Na: Yon opa yú dla ka:ka:timalalo oplami dokopala tlo solotama. Epedeme wa: watapo ya: dokopalaye ketahapo kowepa dla himme puame na: watle hamine,” diyo.

Helodta koko i dalepame Yon dokopala ketahapo hamiloweye posolotamaiyo. Amasiyama ya:ta amseyemala watle yu itiyapo himili kokoye ya: mate daya dempopa:le so ma me-daliyo. Epapedeme ya:tapo koko hema alliweye api ponatiyo. Epedeme ya:tapo ya: opa watle yu itiyamale hamiyo, yia:tapo tame Yon dokopalaye ketahame hampulupo depame. Epalati ya: opatapo tame Yon dokopalaye ketahapo kowepa dla himimpuame amseyemala watle hamiyo. Epalati ma ya:tapo ya: wai watle hamiyo. Epalati Yon ya: alotle tlalo sota puame Yon motoye hamtame wabasi dla hamatiyo. Epo tame Yesu watle atlaiyo.

Epapele koko alotle Helodtapo Yesuta koko halomsela:le dalepame ya: oko so watle epo atlaiyo, “Oplami iye Yon opa yú dla ka:ka:timalalo oplami mle. Epedeme ya:tapo powale tle sila:time ma ulugiyemale koko ipapele halomsela:po,” diyo.

*Yesuta 5,000 opa daya ilimale*

*(Maka 6:30-44; Luk 9:10-17; Yon 6:1-14)*

<sup>13</sup> Yesuye Helodta Yon yumili koko dalepame koa dla tulume posokoleme homta ellalo mo dla hedlowedeme taiyo. Amasiyama opa hapuloma mo meyelo meyelo dle dla ha:ha:lalo sota koko i dalepame tamali api tle Yesu hala dla tamalaiyo. <sup>14</sup> Yesu koa tle tamali dla posokolome halemama opa hapuloma alumale natipame yia:ye sikemte polowamama esusulumale soye ka:ka:diyo.

<sup>15</sup> Yesu epamsela:lati ya: alotle tlalo sota tamila:la puame ya: watle epo atlaiyo, “Sali mo-tulupo. Epedeme wa: opa hapuloma iye ma-taiya dene, yia:tapo mo mateka:pi hema popa: dla tame daya halomelepo depame. Adipalati, dita popa: mo iye daya pa:na,” diyo.

<sup>16</sup> Epalati Yesuta yia: watle epo atlaiyo, “Wua: yia:ye daya halomala taiya demiya. Amasiyama muwolo yia:ye daya halopiya,” diyo.

<sup>17</sup> Epalati asiyama yia:tapo ya: watle epo atlaiyo, “Dia: dla isikimi daya mo-halomale do supulastale mate amalalo dapiyamte mateta hutiyema,” diyo.

<sup>18</sup> Epalati Yesuta asiyama epo atlaiyo, “Daya e mate epo amalalo e mate na: watle halopo puaiya,” diyo. <sup>19</sup> Epame ya: opa hapulomaye tuptu dla popa:iya depame daya mo-halomale do supulastale mate amalalo dapiyamte mate halopame pepele di dla omhalemama God dla siyele yu atlepame daya hauwokokomaiyo. Epame ya: alotle tlalo so watle hapiyo, yia:tapo ma opa hapuloma watle alemelepo depame. <sup>20</sup> Opa hapulomatapo daya dlopame sikemte susukalemama daya popokadiyo. Epalati Yesu ya: alotle tlalo sota daya akutu mate amalalo akutu mate popomelleye yekalo 12 dla atilimama sikemte poposatilimaiyo. <sup>21</sup> Epedeme opa mate epo wola: mate epame yimlala mate daya i deiyo. Amasiyama sesa:le oloma edla opa siyapo tlo sesa:mama 5,000 umaiyo.

*Yesuta yú di tle tale*

*(Maka 6:45-52; Yon 6:15-21)*

<sup>22</sup> Yesuta 5,000 opa daya ilipo gudepame ya: alotle tlalo so watle epo atlaiyo, “Wua: tatle koa hame kaula seme dla uliya. Na: opa iwoloye taiye depo alotle puluwamo,” diyo.

<sup>23</sup> Epame ya: opa alumaleye ma-taiya depame ma meyelo hallowedeme tamali di dla inoma sumala hetaiyo. Ya: tamali di edla hetame hallati ma-amtuwaiyo. <sup>24</sup> Amasiyama oloma edla ya: alotle tlalo sotapo koa dla alupame mo-kaula dukuslopi dla tamha:ha:iyo. Epalati mosisita ulo mate puame yia: koa dla heyulati yia:tapo sikemte itiyamale mate koa sosolemtamalaiyo.

<sup>25</sup> Epo utulala ikadepe ala iki yulumhallati Yesutapo yú di tle yia: hala dla taiyo.

<sup>26</sup> Epalati yia:tapo Yesu natipame sikemte yiyelepo wowota:mama ikiyeliyo. Adipalati, yia:ta malamaleta semte bataliyata pumapo diyo.

<sup>27</sup> Amasiyama Yesuta yia: watle epo atlaiyo, “Ase sikemte wowota:miya. Na:ta puma,” diyo.

<sup>28</sup> Epalati Pitata epo atlaiyo, “Lod, ikadepe wa:ta puma dlepiye, wa: ma na:ye yú di tle puane dene,” diyo.

<sup>29</sup> Epalati asiyama Yesuta epo atlaiyo, “Puane.” Epapele oloma dla Pitata tulume yú dla posokolome yú di tle kotiyapo Yesu hala dla taiyo. <sup>30</sup> Amasiyama ya: tamama ulo patotota pumhalla natipame sikemte wota:iyo. Epapele oloma edla ya:tapo yú dlu dlu mo-ollodemtulumama yu teta:le mate epo atlaiyo, “Lod, na: gadene,” diyo.

<sup>31</sup> Epalati Yesuta pakasiyamalalo ya: dota ola:mtulume ya:ye hampame ya: watle epo atlaiyo, “Wa:ta mikadepe dleye pta yimka:mala. Wa: adipalati malamale tatlamu?” diyo.

<sup>32</sup> Epame yia:ta madipatata koa dulu dla poposokollati mosisita medla ka:liyo. <sup>33</sup> Epalati ya: alotle tlalo sota Yesu hete sitali dla tulume heodepo popa:mama epo atlaiyo, “Wa:ye ikadepe God Yamipo,” diyo.

*Genesalet mo dla esusulumale sota Yesu hala dla puale  
(Maka 6:53-56)*

<sup>34</sup> Yesu mate ya: alotle tlalo so mate kaula ulume Genesalet mo dla tame woyapame koa himiyo. <sup>35</sup> Edla ha:ha:lalo opata Yesu malanatipame mo meyelo pe meyelo pe dle dla yu hamtamalaiyo. Epalati opata esusulumale so opa hapulomaye Yesu hala dla hohopo pumhalaiyo. <sup>36</sup> Epalati esusulumale sota Yesu watle otomama epo atlamyaiyo, “Di isikimi wa: tluka ipi tlo umamolowama,” demyaiyo. Epapele dulu dla Yesu tluka ipi umamale so hapulomata ma-ka:ka:dlalimaiyo.

## 15

*Godta aiyalma imale mate opata aiyalma imale mate  
(Maka 7:1-13)*

<sup>1</sup> Pa:lisi so opa opi mate epo aiyalma imalalo so opa opi mate Yelusalem tle puame Yesu hala dla alupame ya: watle epo atlaiyo, <sup>2</sup> “Wa: alotle tlalo sota di toto koko podolumalalo wekemama yia: doye woloma pohowahalomalalo daya dlompopa:ye adipalati amma?” diyo.

<sup>3</sup> Amasiyama Yesuta yia: watle epo atlaiyo, “Ame wua: adipalati Godta imale aiyalma kokoye melepame ma opata imale aiyalma koko dolumsiyama:?” <sup>4</sup> Adipalati, Godta epo atluwapo, ‘Wa: a mate wa: wai mate yia: yu dla heodepo salladepo siyamaiya. Amasiyama antapo ya: a mate ya: wai mate dla yu batalimale atlepiye, ya:ye yumuluwe ka:pi,’ duwapo. <sup>5</sup> Amasiyama wua:ta atlemama oplamitapo ya: a mate ya: wai mate gadlowe yilo alisisi himhalaleye ma God watle hamiloweye ka:pi demdepo. <sup>6</sup> Epapele koko tle wua:tapo oplamita ya: a mate ya: wai mate gadlowe yilo dinapopo halaleye humatlemdepo. Wua:ta ipapele koko hamha:ha:mama Godta aiyalma hamili koko tlo podolumalalo, ma wua: toto koko tlo dolumha:ha:po. <sup>7</sup> Wua: wuskamu pepemalalo sopo. God tle yu hapame molo atlalo oplami Aisayata ikadepe koko atluwapo, wua: epapele so dla. Adipalati, ya:ta ipo ilimuwapo,

<sup>8</sup> ‘Opa iwolotapo isikimi mati tle na: dla siyele ta:demdepo.

Amasiyama yia: dupa dulu dla na: malamaleye hawa ikadepe.

<sup>9</sup> Epedeme yia:ta na: dla heodepame na: hi di dla ta:demha:ha:ye dulu koko pa:na.

Adipalati, yia:tapo opata imale aiyalmaye na:ta imale tepo depame ma opa watle insiyamapo.’ ”

*Apa kokota opaye batalimdi?  
(Maka 7:14-23)*

<sup>10</sup> Yesuta opa hapuloma sisilapame yia: watle epo atlaiyo, “Wua:ta hapuloma na: yu dalepame malamale haiya. <sup>11</sup> Epedeme wua: natiya, oplamitapo dlowe alisisi demdeta ya: dupa duluye pobatalimasemde. Amasiyama oplami ya: dupa dulu tle malamale woyamdeta ya: dupa duluye batalimdepo,” diyo.

<sup>12</sup> Epalati ya: alotle tlalo sota ya: watle puame epo atlaiyo, “Wa: Pa:lisi sotapo wa:ta atlamale koko dla siyalasiyaladeye me-malanatima:?” diyo.

<sup>13</sup> Amasiyama Yesuta asiyama yia: watle epo atlaiyo, “Dlomoko dali adiye na: Ata pe-emalalo wekuwa, dlomoko dali hapuloma eye kese mate dodokalepo polollepe.

<sup>14</sup> Epedeme Pa:lisi soye dlomoko dali epapele some ha:ha:po. Wua: yia: ase sikemte malamiya. Yia: inoma pa:talo so epapele some ha:ha:mama opaye elemtapo. Epa-pedeme inoma pa:le oplamitapo ya:mkale inoma pa:le oplami haleye semtlepiye, yia:ta madipatata munamu dulu dla teteyulupe.”

<sup>15</sup> Epalati Pitata epo atlaiyo, “Wa:ta atla wayu ya: dulu kokoye di watle woloma imane,” diyo.

<sup>16</sup> Epapalati asiyama Yesutapo epo atlaiyo, “Wua: ala yu i ya: dulu kokoye yeitam-popa:pa? <sup>17</sup> Epedeme wua: natiya, wua:ta dlowe alisisi hame dlomdeta wua: dupa dulu pobatalimasemde. Adipalati, dlowe alisisi iye isikimi koko dulu dla tulupame ma alikili dla ulatamdepo. <sup>18</sup> Amasiyama oplami mati tle yukamde koko hapulomatapo ya: dupa dulu tle woyapame ya:ye batalimdepo. <sup>19</sup> Adipalati, ya: dupa dulu tle ipapele kokota wowoyamdepo, batalimale koko malamolowe, epo ya:mkale yumuluwe, epo ya:mkale ya:llu mate ya:mkale ya:wolali mate uhalowe, epo opa mate wola: mate uhalomolowe, epo upo alisisi uhalowe, epo ya:mkale mala-atlowe, epo ya:mkale hi mate putlopo atlowe. <sup>20</sup> Epedeme batalimale koko hapuloma itapo wa:ye batalimale oplami demdepo. Amasiyama do pohowahalalo daya dlomdetapo wa:ye pobatalimale oplami desemde.”

*Po-Yu a:yata mikadepe dle koko*

*(Maka 7:24-30)*

<sup>21</sup> Yesu mo eye saliyome ma Taya mo mate epo Saidon mo mate dla taiyo. <sup>22</sup> Ya: edla tame woyamalati a:ya haletapo ya: hala dla puaiyo. A:ya eye Keinan a:yayo. Epapeleye ya:tapo Yesu natipame yu teta:le mate epo atlaiyo, “Lod, Deibidi Yami, wa: na: polowamane. Adipalati, na: amseyemalaye bataliyata ya: dulu dla tuwame halemama ya: dla wotiyalle pato hapimhalemde,” diyo.

<sup>23</sup> Amasiyama Yesuta yu e dalepame yu hale po-atlaiyo. Epalati ya: alotle tlalo sota Yesu watle puame epo atlaiyo, “A:ya iye di dolumsela:mama sikemte yu teta:msela:ma. Epedeme wa: ya:ye ma-tane dene,” diyo.

<sup>24</sup> Epalati Yesutapo yia: watle epo atlaiyo, “Godtapo na:ye isikimi Isalael so dla tane duwapo. Adipalati, Isalael soye ma sipi aliya halo epapele some mo-haohaodepo ha:ha:po,” diyo.

<sup>25</sup> Epedeme a:yatapo ma puame Yesu hete sitali dla heodepo polomama epo atlaiyo, “Lod, na: gadene,” diyo.

<sup>26</sup> Epalati Yesuta asiyama a:ya watle wayu mate epo atlaiyo, “Yimlala dayaye halopame ma esemala dla ilimoloweeye poka:dena,” diyo.

<sup>27</sup> Amasiyama a:yatapo Yesu watle epo atlaiyo, “Yao, Lod, wa: ikadepe atlapo. Epapele tlope esemalaye yia: ata daya demama akutu ta:la dla teteyulati dlomsiyamdepo,” diyo.

<sup>28</sup> Epalati Yesuta ya: watle epo atlaiyo, “A:ya, wa:ta mikadepe dleye pta pato. Epedeme na:tapo wa:ta atlale kokoye ala:lowepo,” diyo. Epapele oloma medla a:ya e ya: amseyemalata ma-ka:diyo.

*Yesuta 4,000 opa daya ilimale*

*(Maka 8:1-10)*

<sup>29</sup> Yesu mo e saliyome ma Ga:lili kaula peleyama tle polomyaiyo. Ya: etle ma hetame tamali di dla polaiyo. <sup>30</sup> Epalati opata Yesu watle esusulumale so hohopo puame ya: hete sitali dla ipila:iyo. Opitapo akoloyalemale so hohopo pumhalaiyo, epo opitapo inoma pa:talo so, epo opitapo moto palli so, epo opitapo yu pa:talo so, epame esusulumale opi mila:pi meyelohe meyelohe dle so opi ma me-hohopo pumhalaiyo. Epalati Yesutapo esusulumale so hapulomaye ka:ka:diyo. <sup>31</sup> Epapele dulu dla opata koko i natipame sikemte yiyelemama Isalael so yia: God dla siyele pato ta:diyo. Adipalati, yu pa:talo sota ma yuhamyaiyo, epame moto palli so ma mo-sillipo siyamaiyo, epame akoloyalemale so ma ka:ka:depo siyamaiyo, epame inoma pa:talo so ma ma-tlamaiyo.

<sup>32</sup> Epalati Yesutapo ya: alotle tlalo so sisilapame epo atlaiyo, “Opa alumale iwoloye na: mate alila dapahatlope dla siyamuwapo. Epame ma yia:ta daya dimi popa:lati natipame yia: sikemte bokotiyama. Na: yia: daya po-ilimalalo ma-taiya dlowe tlope yia: api duka dla tamalemama daya yilo hopeyalimelepe,” diyo.

<sup>33</sup> Epalati ya: alotle tlalo sota ya: watle epo atlaiyo, “Dlowe pa:le mo hema dita hadima dlowe hapo opa pato iwolo ilipa:?” diyo.

<sup>34</sup> Epalati Yesuta asiyama epo atlaiyo, “Wua: dla daya adisowata hutiyema:?” diyo.

Epalati yia:ta asiyama epo atlaiyo, “Isikimi daya 7 mate epo amalo dapiyamte yemalata hutiyema,” diyo.

<sup>35-36</sup> Epalati Yesuta opa hapulomaye ta:la dla popa:iya depame daya 7 mate epo amalo mate halopo siyele yu God dla hamiyo. Epo daya mate amalo mate hauwokokopo ya: alotle tlalo so watle hapiyo, opa watle alemelepo depame. <sup>37</sup> Opa hapulomata daya dlopo sikemte susukaliyo. Epalati ya: alotle tlalo sota daya akutu ipi popomelleye yekalo 7 dla atilimama poposatilimaiyo. <sup>38</sup> Epedeme opa mate epo wola: mate epame yimlala mate daya i deiyo. Amasiyama sesa:le oloma dla opa siyapo tlo sesa:mama 4,000 umaiyo. <sup>39</sup> Yesu opa hapuloma ma-taiya depame ya: alotle tlalo so mate koa dla tulum alumaiyo. Epame Magadan mo mateka:pi dla uliyo.

## 16

### *Opata ulugiyemale koko natilowe solotamale*

*(Maka 8:11-13; Luk 12:54-56)*

<sup>1</sup> Epame Pa:lisi so mate epo Sa:dusi so mate Yesu hala dla puame ya:ta itiyamale hamsela:ye ikadepe God tle malata: depame epo atlaiyo, “Wa: pepele di tle ulugiyemale koko di watle nati-ine,” diyo.

<sup>2-3</sup> Amasiyama Yesuta yia: watle epo atlaiyo, “Wua: tamila:la salita ka:pi tutula:la natipame epo atlemdepo, ‘Iyela sali ka:pi hallepe,’ demdepo. Epame wua: ma utulalati wuala dikilita pepele di bopudepo ellati natipame, ‘Wata tiyo hellepe,’ demdepo. Epedeme wua: ipapele kokota wowoyamoloweye mo-wua:malamana. Amasiyama wata oloma hema wowoyamhala koko hapuloma yia: dulu kokoye powua:malamana. <sup>4</sup> Wata oloma hema ha:ha: so opaye pta bobtalimana. Epame yia: ma God kokoye pokoko desemdepo. Epammama yia: ulugiyemale koko tlo tlamha:ha:lowedeme na: watle atlamha:ha:po. Amasiyama na: yia: dla ulugiyemale koko hale ponati-iliwa, isikimi Yona koko tlo yia: watle nati-iliwepo.” Yesu koko i atlepo gudepame yia: saliyome ma-taiyo.

### *Pa:lisi so mate epo Sa:dusi so mate yia:ta imale dolumiya*

*(Maka 8:14-21)*

<sup>5</sup> Epame Yesu mate epo ya: alotle tlalo so mate kaula seme dla uliyo. Yia: edla tame popa:mama ya: alotle tlalo sota yia:ta daya dimi puale kokoye momalampopa:iyo. <sup>6</sup> Yia: epo momalampopa:lati Yesuta yia: watle epo atlaiyo, “Ka:e, wolomape! Pa:lisi so mate Sa:dusi so mate yia:ta imale kokoye daya haka:le sepena. Adipalati, daya amko ka:dleye daya haka:le mate dukumelepiye, daya amko ka:dleye batalimelepe.”

<sup>7</sup> Amasiyama Yesu ya: alotle tlalo sota koko i dalepame yiskamu yia: dulu dla esempopa:mama epo atlamyaiyo, “Dita daya pohame pulalo wekele koko tle Yesutapo di natipo yu epo atlapo,” demyaiyo.

<sup>8</sup> Epapalati Yesuta yia:ta momalampopa:leye ma-natipame yia: watle epo atlaiyo, “Wua: adipapalati wua:ta daya pohampulalo wekele koko dla sikemte momalampopa:ma:? Wua:ta mikadepe dleye pta yimka:sikilipo. <sup>9</sup> Epame wua: na:ta itiyamale dla ala pomikadepe dlalo ha:ha:pa? Epame wua: na:ta 5,000 opaye daya do supulastale mate hauwokokopo ilimuwaye mo-woweluwapa? Epame yia:ta daya dlopo popomellati wua:tapo yekalo adisowa dla atilimuwa? <sup>10</sup> Epame wua: ma na:ta 4,000 opaye daya 7 mate hauwokokopo ilimuwaye wua: e ma mo-woweluwapa? Epame yia:ta daya dele popomelleye yekalo adisowa dla atilimuwa? <sup>11</sup> Epedeme na: daya kokoye wua: watle potlana. Wua: koko iye adipalati ala pomalamalalo popa:ma:? Amasiyama na:ta atlama kokoye wua:tapo Pa:lisi so mate epo Sa:dusi so mate yia:ta imale dla tullala depame wuskamu woloma omha:ha:lepo depo yu i atlepo.” <sup>12</sup> Epalati ya: alotle tlalo sotapo



edla malanatiyo, Yesuta ikadepe daya koko dla po-atlalo, isikimi Pa:lisi so mate epo Sa:dusi so mateta imale koko dla atlaleye.

*Pitata Yesu kokoye botomastale*  
(Maka 8:27-30; Luk 9:18-21)

<sup>13</sup> Yesuta tame Kasaliya Pilipi mo dla sela:mama ya: alotle tlalo so watle epo atlaiyo, “Opatapo Opa Yamiye ana demdi?” diyo.

<sup>14</sup> Epalati yia:ta ya: watle epo atlaiyo, “Opa opitapo wa:ye Yon opa yú dla ka:ka:timalalo demdepo. Epame ma opita wa:ye Ilaya mle demdepo. Epalati asiyama opita wa:ye Yelemaya mle demdepo. Epame ma opita wa:ye God tle yu hapame molo atlamalalo so ka:yapa ha:ha:uwa oplami hale mle demdepo.”

<sup>15</sup> Epalati Yesuta asiyama yia: watle epo atlaiyo, “Amasiyama wua:ta na:ye ana demdi?” diyo.

<sup>16</sup> Epalati Saimon Pitata asiyama epo atlaiyo, “Wa:ye Keliso, kokó halepo halemhala God Yamipo,” diyo.

<sup>17</sup> Epapalati asiyama Yesuta ya: watle epo atlaiyo, “Saimon Pita, Yona yami, wa:ye siyene. Adipalati, oplami haletapo wa: watle koko iye po-imana. Amasiyama na: A Pepele di dla halatapo wa: imalepo. <sup>18</sup> Epedeme Pita, na: wa: dla atlema, wa:ye ewalapo. Epedeme na:tapo ewala tama hema na: sosye kotiyamolowepo. Epapele dulu dla polowe itiyamaletapo sos eye potla:mtlowa. <sup>19</sup> Epame na: Pepele dimo kokoloma eloye wa: watle hapilowepo. Epedeme wa: apa kokoye ta:lamo hema polupo ellepiye, Pepele dimo dla ma mepo polupo ellepe. Epame wa: apa kokoye ta:lamo hema towastlepiye, Pepele dimo dla ma mepo towastlepe.”

<sup>20</sup> Ya: epo halemama yu itiyamale mate ya: alotle tlalo so watle epo atlaiyo, “Wua: opa watle atlemama na:ye Kelisopo demiyo,” diyo.

*Yesuta ya:ta polowe koko atlale*  
(Maka 8:31-33; Luk 9:22)

<sup>21</sup> Epame oloma etle Yesutapo ya: alotle tlalo so watle ya:ta polowe kokoye atlam-sela:lowe kotiyamaiyo. Epammama ya:ta yia: watle epo atlaiyo, “Na:ye Yelusalem dla hetlati Yu so dokopala so mate epo aiyalma aya dokopala so mate epo aiyalma imalalo so mateta na: dla wotiyalle hamilipe. Epame opata na:ye yumulati wabasi dulu dla powame elepo alila dapahatlope dla ma pasakalo depame sila:tilipe,” diyo.

<sup>22</sup> Epalati Pitata Yesuye alikili dla hamamtame halemama ya: watle epo atlaiyo, “Hao Lod, koko ipapeleta wa: dla woyamoloweye poka:dena,” diyo.

<sup>23</sup> Amasiyama Yesuta Pita dla helestame halemama epo atlaiyo, “Saiten, na: tle alikili a:ma tane. Wa:ta yu ipo atlatapo na:ye pogadesema. Adipalati, wa:ta yu atlaleye God tle popuasema. Amasiyama opata malamale tle puapo,” diyo.

*Yesu yilo hallowe*  
(Maka 8:34-38; Luk 9:23-26)

<sup>24</sup> Yesu matle ya: alotle tlalo so dla epo atlaiyo, “Oplami antapo na: dolumpuluwe solotamelepiye, ya: ya:skamu ya:ta solotamale koko hamsela:ye memelepame ya: dali yekelemhimiliye maka:himsela:mama na: dolumpulupe. <sup>25</sup> Amasiyama oplami antapo ya: pasakaloye meyelo gadlowedeme apelepiye, ya: pasakaloye haodlepe. Amasiyama oplami antapo na: yilo ya: pasakaloye haodlepiye, ya: matle halepo halepo pasakalo halepe. <sup>26</sup> Amasiyama oplami antapo ta:lamo pato hema halemama ya:ta solotamale koko hapulomaye ma-halopame hatlo pasakalo hallowe koko tlo hotlepiye, ya: ma apa koko hapa:? Hawa. Adipalati, ya:ta alisisi hapuloma ta:lamo hema halopo halale e mate halepo halepo pasakalo pahalowa. <sup>27</sup> Epapedeme Opa Yamitapo ya: ata hela:dle mate epo ya: banakaka so mate pumama opa hapuloma dla yia:ta halomha:ha:le asiyamaye mepo ala:po halopilipe. <sup>28</sup> Epapele dulu dla na: mikadepe koko wua: watle atlema. Wua:

dulu dla opa opi me-ha:ha:po. Yia:tapo Opa Yamita ya: Pepele dimo koko mate pulati natipame alotle pallipe.”

## 17

*Yesuta Moses mate Ilaya mate yukamhalale  
(Maka 9:2-10; Luk 9:28-36)*

<sup>1</sup> Epame alila 6 mogudlati Yesutapo Pita mate epo Yeims mate epo Yeims ya: ei Yon mate tamali di ikadepe dla miyelo ha:ha:la hetaiyo. <sup>2</sup> Yia: edla hetame popa:mama natilati Yesutapo ya: Pepele dimo mila:pi himhalla natiyo. Epalati ya: mila:pitapo sali some hela:demama usiyemaiyo. Epame ya: tlukatapo sikemte kamama hela:dle some halaiyo. <sup>3</sup> Yia: edla me-ompopa:mama natilati Moses mate epo Ilaya mate wowoyapo Yesu mate yuhamha:ha:iyo. <sup>4</sup> Epalati Pitata Yesu watle epo atlaiyo, “Lod, di mo hema ha:ha:lowe ka:pi. Epedeme wa:ta ka:dena dlepiye, na: hema kimna:ya dapahatlope kintimolowepo. Kimna:ya haleye wolëpo, epame haleye Moses tete, epame haleye Ilaya tete dlowepo,” diyo.

<sup>5</sup> Pita ala me-yukamhallati wuala sikemte hela:dletapo malame yia:ye bopudiyo. Epalati wuala dulu tle yuta epo atlaiyo, “Iye na:ta sikemte malamama dupa ellalo maseyemalapo. Na: ya: dla sikemte siyema. Epedeme ya: yu dla daliya,” diyo.

<sup>6</sup> Epalati Pita wolota koko i natipame sikemte wowota:mama ta:la dla tulume hutiyemama yia: mila:pi isili dla poutalepo hutiyeyo. <sup>7</sup> Amasiyama Yesuta puame yia: dla umama epo atlaiyo, “Wua: silliya. Ase sikemte wowota:miya,” diyo. <sup>8</sup> Epalati yia:ta sillipame toko natitepo Yesuta meyelo halla natiyo.

*Yesu ya: alotle tlalo sotapo Ilaya koko dla atlanatili  
(Maka 9:11-13)*

<sup>9</sup> Epame yia: tamali di tle malemha:ha:mama Yesuta yia: watle epo atlaiyo, “Wua:ta tlamale kokoye opa opi watle atlamiyo. Amasiyama Opa Yamita popo sila:time mehetlati alotle atlamsiyamaiye,” diyo.

<sup>10</sup> Epalati Pita wolota Yesu watle epo atlanatiyo, “Adipalati aiyalma imalalo sota imama ‘Ilayata itapu pulati Kelisota alotle pulupe’ demdi?” diyo.

<sup>11</sup> Yesuta asiyama yia: watle epo atlaiyo, “Ikadepe, Ilaya tatile puame koko hapulomaye ma woloma ka:ka:depo dinapelepe. <sup>12</sup> Amasiyama na: wua: dla atlema, Ilayaye mopuwapo. Epapele tope opatapo ya:ye woloma pomalanatilalo ya: dla wotiyalle halopimyeuwapo. Epammama yia:tapo Opa Yami dla ma mepo wotiyalle halopimyelepe.”

<sup>13</sup> Epalati yia:tapo Yesuta epo atla dalepame asiyama yia:ta malamaleta Yon opa yú dla ka:ka:timalaloye semte ikadepe Ilayata pua tepo diyo.

*Yesuta bataliya walle maseyemala ka:dle  
(Maka 9:14-29; Luk 9:37-43)*

<sup>14</sup> Yesuta ya: alotle tlalo so dapahatlope mate tamali di tle tulume opa hapuloma yia: ompopale so dla woyamalati oplami haleta puame Yesu hete isili dla heodepo polomama epo atlaiyo, <sup>15</sup> “Lod, wa: na: maseyemalaye polowamane. Adipalati, ya:tapo yiyilamaleta ya: dla halati ya:skamu yú dulu dla epo dlapa dulu dla tutula:msela:mama wotiyalle pato hamde. <sup>16</sup> Epapeleye na:tapo maseyemala eye wa: alotle tlalo so dla puame nati-ilati yia:tapo ya:ye poka:dena,” diyo.

<sup>17</sup> Asiyama Yesuta epo atlaiyo, “Wua:ye mikadepe dle pa:talo bobtalimale sopo. Wua:ta na: dla mikadepe dlepo depame na: alila adisowaye wua: mate halepa: Amasiyama maseyemala eye na: watle hamampuaiya,” diyo. <sup>18</sup> Epame Yesuta maseyemala dulu tle bataliyaye alikili dla dodolomaiyo. Epapele oloma edla maseyemalatapo ma-ka:diyo.

<sup>19</sup> Koko ita tame gudlati alotle Yesu ya: alotle tlalo sotapo miyelo popa:mama Yesu watle epo atlaiyo, “Di adipalati bataliyaye maseyemala tle alikili dla dodolomolowe dla itiyamale hawa halo?” diyo.

<sup>20</sup> Epalati Yesuta asiyama yia: watle epo atlaiyo, “Wua:ta mikadepe dleye pta yimka:sikili ikadepe. Epapele koko tle wua:ta bataliya i alikili dla dodolomolowe itiyamale hawa halalepo. Epedeme na: ikadepe koko wua: dla atlema. Wua:ta mikadepe dleta dlomoko ale yimka:sikili epapele some wua: dla me-hutiyelepiye, eta wua: ala:na, tamali watle atlemama ‘ma huma tame polane’ dlepiye, mepapelepe. Epedeme koko haletapo wua: dla pokokallowa. [<sup>21</sup> Amasiyama bataliya ipapeleye isikimi daya aiyalma depo halemama inoma sumale mate alikili dla dodolomlala.”]

*Yesuta ya:ta polowe koko dla ma atlale  
(Maka 9:30-32; Luk 9:43-45)*

<sup>22</sup> Yesu ya: alotle tlalo sota puame Ga:lili dla alupame ha:ha:lati Yesuta yia: watle epo atlaiyo, “Opa Yamiye opa do tama dla homellepe. <sup>23</sup> Epalati yia:tapo ya:ye yumilipe. Amasiyama ya:ye powame elepame ma dapahatlope alila dla ma pasakalo depame sila:tilipe.” Epalati Yesu ya: alotle tlalo sotapo yu i dalepame sikemte dupa koliyo.

*Aiyalma aya gadlowe koko dla ta:kis mani hatitimolowe*

<sup>24</sup> Epame matle Yesu mate epo ya: alotle tlalo so mate tame Kapaniyem mo dla woyamalati aiyalma aya gadlowe koko dla ta:kis mani halomalalo sotapo Pita watle puame epo atlaiyo, “Wua: imalalo oplamiye aiyalma aya gadlowe koko dla ta:kis mani hatitimdi?” diyo.

<sup>25</sup> Epalati Pitata asiyama epo atlaiyo, “Yao, me-hatitimdepo,” diyo. Amasiyama Pita ala aya dulu dla tumhallati Yesuta ya: watle epo atlaiyo, “Pita, wa: koko iye na: dla atlane. Ta:lamo dokopala sotapo opa anawolo tle ta:kis mani halomdi? Me-yia: yimlala tle halomdi, o opa opi tle halomdi?” diyo.

<sup>26</sup> Epalati Pitata asiyama epo atlaiyo, “Opa opi tle halomde,” diyo.

Epalati asiyama Yesuta epo atlaiyo, “Epedeme dokopala oplami ya: yimlalatapo yia: a watle ta:kis mani pohatitimolowa. <sup>27</sup> Amasiyama di poka:dena, aiyalma aya gadlowe koko dla ta:kis mani halomalalo so iwolo dla siyaladle hamilowe. Epapedeme wa: tame kaula dla tudi pololepame amalo yelene. Epame ya: mati gowalastame elo mani natilipe. Epame wa: mani e hamtame yia: dla ta:kis mani hamimama nolë mate epo wolë mate hatitimane,” diyo.

## 18

*Pepele dimo dulu dla anta pato halema:?  
(Maka 9:33-37; Luk 9:46-48)*

<sup>1</sup> Alila oloma edla Yesu ya: alotle tlalo sotapo puame Yesu watle epo atlaiyo, “Pepele dimo dulu dla anta pato halema:?” diyo.

<sup>2</sup> Epalati Yesutapo maseyemala hale sisilapame yia: dulu dla pamelepo halemama ya: alotle tlalo so watle epo atlaiyo, <sup>3</sup> “Na: ikadepe koko wua: watle atlema. Wua: malamale meyelope depame maseyemala yimka:mala ipapele some poha:ha:lalo wekelepiye, wua: Pepele dimo dla po-u-ulapo tuluwa. <sup>4</sup> Epedeme oplami antapo maseyemala yimka:mala ipapele some ya:skamu isili dla hamtulupo hallepiye, ya:ye Pepele dimo dulu dla pato depo halapo.

<sup>5</sup> Epame oplami antapo maseyemala ipapeleye na: hi tle ya: aya dla seme hetlepiye, ya: na:ye seme hetamama apelepe. <sup>6</sup> Amasiyama na: dla mikadepe dlalo maseyemala yimka:mala ipapeleye oplami antapo seme batalimale koko dla tullupiye, ka:dena, oplami eye ewala patota tumuku dla himomeleme ewatalo dla hamastloweye.

<sup>7</sup> Ka:e, ta:lamo dla ha:ha:lalo so, wua: yimkadulo! Adipalati, ta:lamo pato hema wua: batalimale dla elemtullalo kokoye pta pasatana. Epedeme epapele kokota me-pumhallepe. Amasiyama oplami antapo ipapele koko kotiyamhalema:, wa:ye wolomape! Godtapo epapele oplami dla wotiyalle sikemte pato hamilipe. <sup>8</sup> Epedeme wa: do aditapo wa:ye batalimale dla hamame tullupiye, ka:dena, do seme e ketamastloweye. Ame adipalati, ka:dlepo, wa:ta do hatlope mate Pepele dimo dla ulatuluweye. Amasiyama poka:dena, wa:tapo do dapiyamte mate halemama kokó elepo ellalo Dlapa mo dla tulluweye. Epame wa: hete aditapo wa:ye batalimale dla hamame tullupiye, ka:dena, hete seme e ketamastloweye. Ame adipalati, ka:dlepo, wa:ta hete hatlope mate Pepele dimo dla ulatuluweye. Amasiyama poka:dena, wa:tapo hete dapiyamte mate halemama kokó elepo ellalo Dlapa mo dla tulluweye. <sup>9</sup> Epame wa: inoma adita wa:ye batalimale dla hamame tullupiye, ka:dena, inoma seme eye holamastloweye. Ame adipalati, ka:dlepo, wa:ta inoma hatlope mate Pepele dimo dla ulatuluweye. Amasiyama poka:dena, wa:ta inoma dapiyamte mate halemama Dlapa mo dla tulluweye.

<sup>10</sup> Epedeme wua: wolomape. Yimlala yimka:sikili iye koko pa:talo so demiya. Adipalati, yia: banakaka soye Pepele dimo dla na: A mila:pi tle me-ha:ha:po. [ <sup>11</sup> Epedeme Opa Yamitapo alikili dla haohaodle soye gadla puwapo.”]

*Sipi aliyata haodle  
(Luk 15:3-7)*

<sup>12</sup> “Oplamitapo 100 sipi aliya haloye omhallepe. Epapele dulu dla hatlota haodlepiye, ya: ma apa koko hapa:? Ka:dena, ya:tapo 99 sipi aliya opiye medla pomelepame ma hatlo haodle tlo totamtlepe. <sup>13</sup> Epedeme na: ikadepe koko wua: watle atlema. Ya: 99 aliya halo pohahaodlalo wekele dla siyele me-elapo. Amasiyama ya: hatlo haodleye totapo ma natili dla sikemte siyele pato elapo. <sup>14</sup> Epapedeme wua: A Pepele di dla halata posolotamasema, yimlala ipapele dulu dla haleta haodloweye.”

*Wa: amkale mikadepe dle oplamita batalimale dulu dla tullati gadene*

<sup>15</sup> “Epedeme wa: amkale mikadepe dle oplamitapo wa: dla batalimale koko halepiye, ka:dena, wa: hemele ya: hala dla tame atellepe. Epapele dulu dla ya:ta wa: yu dallepiye, wa: oplami eye batalimale dla ma-tlati ma ka:dle api dla sempumama apelepe. <sup>16</sup> Amasiyama ya:tapo wa: yu dalepo pahalalo wekelepiye, wa: epalati ma mikadepe dle so opa opiye ya: hala dla elemtelepe, yia:ta wa: gadlepo depame. <sup>17</sup> Epapele dulu dla ya:tapo ma yia: yu podallalo wekelepiye, epalati koko iye sos dokopala so dla atlane. Amasiyama ya: ala me-sos dokopala so yu dla podallalo wekelepiye, wa: epalati ya:ye ma alikili oplami dlepe.

<sup>18</sup> Epedeme na: ikadepe koko wua: dla atlema. Wua: apa kokoye ta:lamo hema polupo ellepiye, Pepele dimo dla ma mepo polupo ellepe. Epame wua: apa kokoye ta:lamo hema towastlepiye, Pepele dimo dla ma mepo towastlepe.

<sup>19</sup> Epedeme na: ma ikadepe koko wua: dla atlema. Ta:lamo hema opa dapiyamtetapo malamale hatlope depame koko hadima inoma sumale pato himimpopa:lepiye, yia: koko eye na: A Pepele dimo dla hala tle ma-halepe. <sup>20</sup> Epapedeme opa dapiyamte epapele o dapahatlope epapeleta na: hi tle puame alupo popa:lepiye, na: yia: mate me-halapo.”

*Ya:mkale popolowamalalo wekelalo oplami*

<sup>21</sup> Epapele oloma edla Pitata puame Yesu watle epo atlaiyo, “Lod, namkale mikadepe dle oplamita na: dla batalimale koko halomhallati asiyama na:ta ya: batalimaleye adisowa oloma dla wowelipa:? 7 oloma dla tame gudepa:?” diyo.

<sup>22</sup> Epalati asiyama Yesuta epo atlaiyo, “Hao, 7 oloma edla ya: batalimaleye powelilowa, amasiyama 77 oloma dla ya: batalimaleye wowellipe.

<sup>23</sup> Epedeme Pepele dimo kokoye ipapena. Dokopala oplami ya: oko sotapo ya: tle ya: maniye isikimi samta halomaiyo, alotle ma mesowa ya: watle hapilowedeme.

<sup>24</sup> Epapeleye ya: oko oplami hale, ya: tle mani pato holaleye, ya: hala dla sempuaiyo.

<sup>25</sup> Amasiyama oplami etapo mani mesowa ilame hamiloweye po-ala:iyo. Epalati dokopala oplamitapo ya: opa watle epo atlaiyo, 'Oplami i mate epo ya:llu mate epo ya: yimlala mate epame ya: alisisi hapuloma mate tame opa opi watle hohopo ipame asiyama mani tlo hapo ma na: watle hampuaiya,' diyo.

<sup>26</sup> Epalati oko oplami etapo ya: dokopala oplami hete sitali isili dla teyume alumata kellepo polomama otele mate epo atlaiyo, 'Wa: na: polowamama aseka alila yimka:mala omhalane. Na: monolo alotle asiyama mesowa himilowepo,' diyo.

<sup>27</sup> Epalati dokopala oplamita ya:ye sikemte polowamama ya: watle epo atlaiyo, 'Wa:ta na: mani hauwa asiyama dla wa:ta na: watle alotle hamili dleye memelene. Adipalati, na: ma koko eye mo-welima. Epedeme wa: siyele mate tane,' diyo.

<sup>28</sup> Epalati oko oplamita ma ilame tamama natilati ya:mkaleta pula natiyo. Oplami itapo oko oplami ya: tle mani pastoye isikimi samta haiyo. Epapeleye oko oplami etapo ya: natipame tumuku dla hamame popokalemama epo atlaiyo, 'Wa:ta na: tle mani hauwaye wata asiyama mesowaye na: watle hamine,' diyo.

<sup>29</sup> Epalati asiyama ya:mkale etapo oko oplami e ya: hete isili dla teyume alumata kellepo polomama otele mate epo atlaiyo, 'Wa: na: polowamama aseka alila yimka:mala omhalane. Adipalati, na: ma monolo alotle mani mesowaye wa: watle hamilowama,' diyo. <sup>30</sup> Amasiyama oko oplamitapo ya:mkaleta epo atlati alimama ya:ye hamamtame amtuwale aya dulu dla ka:staiyo, ya:tapo hapele asiyama mesowa hamilipo depame.

<sup>31</sup> Amasiyama dokopala oplami ya: oko so opitapo koko i natipame dupa kolemmama yia: dokopala oplamiye atla tamalaiyo. <sup>32</sup> Epalati dokopala oplamita koko i dalepame ya: oko oplami eye sisilapame ya: watle epo atlaiyo, 'Wa:ye sikemte batalimale oplami ikadepepo. Wa:ta isikimi yepa:ta na: mani pato hapame ma alotle himiloweye wa: dla po-ala:lalo wekelati na:ta wa:ye polowamama mope memelene duwapo. <sup>33</sup> Epedeme wa: ma asiyama wa: amkale polowamama epapolowe ka:pipo,' diyo. <sup>34</sup> Epo atlepame dokopala oplamitapo siyalademama ya: oko oplami e watle epo atlaiyo, 'Wa:ta wa: amkale popolowamalalo amtuwale aya dla ka:staleye, na: ma asiyama wa:ye mepo amtuwale aya dla ka:stlowepo. Epame wa:tapo na: tle mani pato isikimi samta hauwaye ma mesowa himilipe,' diyo."

<sup>35</sup> Yesuta yu i atlepo gudepame ma opa watle epo atlaiyo, "Epedeme wua:tapo wua: amkale mikadepe dle oplami ya: batalimaleye wua: dupa dulu tle powelilalo ha:ha:lepiye, asiyama na: A Pepele di dla halatapo wua: batalimaleye powelilowa."

## 19

### *Yesuta a:ya mellowe koko dla imale (Maka 10:1-12)*

<sup>1</sup> Yesu koko i atlemhalepo gudepame Ga:lili mo saliyome ma Yudiya mo dla tamama Yoden aloma ulumtaiyo. <sup>2</sup> Ya: edla tlati opa hapulomatapo ya: dolumtamalaiyo. Epalati Yesutapo yia: dulu dla esusulomale hutiyele hapulomaye ka:ka:diyo.

<sup>3</sup> Epame oloma edla Pa:lisi so opita puame Yesu dla batalimale koko natilowedeme ya: watle epo atlaiyo, "Oplamitapo isikimi koko pa:le dla a:ya melloweye aiyalma elema:?" diyo.

<sup>4</sup> Epalati Yesuta asiyama yia: watle epo atlaiyo, "Wua: God yu posesalalo wekemdi? Godtapo ta:lamo mita:ple oloma edla oplami mate epo a:ya mate mimita:puwapo.

<sup>5</sup> Epame Godta epo atluwapo, 'Epedeme oplamitapo ya: a mate epo ya: wai mate melepame ma ya:llu mate hatlope depo hallepe. Epame yia:ta madipatatapo moto hatlope depo ha:ha:lepe,' duwapo. <sup>6</sup> Epedeme yia:ta ha:ha:le dulu dla yia: podapiyamte,



amasiyama yia: ma hatlopepo. Epapedeme Godta yia:ta dapiyamte ma-hatlope dleye ma oplami haleta poduka gladlowa.”

<sup>7</sup> Amasiyama Pa:lisi sota ma asiyama Yesu watle epo atlaiyo, “Ame adipalati Mosesta atlemama a:ya mellowedeme isikimi a:ya mellalo pepa tlo ilipo a:yaye ma-tane demha:ha:iye duwa?” diyo.

<sup>8</sup> Epalati asiyama Yesuta epo atlaiyo, “Mosestapo wua: dupa dulu kokalalimale tlapame wua:ta wua: wola: memelloweye me-ka:pi duwapo. Amasiyama kotiyamale sitali dla Godtapo a:ya mellowe kokoye po-atlana. <sup>9</sup> Epedeme na: wua: watle atlema, oplamitapo ya:llu pomellowa. Amasiyama a:ya etapo oplami hale uhalepiye, etapo ya:wolalitapo ya:ye mellowe ka:pi. Epedeme oplamitapo ya:lluye isikimi koko pa:le melepame ma a:ya hale halepiye, ya: a:ya eye uhapo.”

<sup>10</sup> Epalati Yesu ya: alotle tlalo sotapo ya: watle epo atlaiyo, “Epedeme epapele kokotapo ellepiye, poka:dena, oplamitapo a:ya halowe,” diyo.

<sup>11</sup> Epalati Yesuta yia: watle epo atlaiyo, “Imale koko iye opa hapuloma dla potasema. Amasiyama isikimi wola: halomalalo so dla tapo. <sup>12</sup> Adipalati, opa opiye wola: halopo yimlala hatitimolowe po-ala:na. Adipalati, yia: waidulota yia: hohomale tle yia: mepa-pena. Epapele koko tle yia: wola: pohalomasemde. Epalati opa opiye me-yimkadulotapo yia: moto dla ulu hatitimale koko tle yia: mape wola: pohalomha:ha:sema. Epalati asiyama opa opitapo Pepele dimo koko yilo wola: pohalomha:ha:sema. Epedeme oplami antapo a:ya hali dlepiye, ya: ka:dena, na:ta a:ya halowe koko dla ima iye dolumelepe.”

*Yesu mate yimlala yimka:sikili mate  
(Maka 10:13-16; Luk 18:15-17)*

<sup>13</sup> Opa opitapo yia: yimlalaye Yesu hala dla elempumulaiyo, Yesutapo yia: yilo inoma sumama ya: do mate yia: u-umamelepo depame. Epalati ya: alotle tlalo sota koko e natipame yia:ye humatlaiyo. <sup>14</sup> Amasiyama Yesuta ya: alotle tlalo so watle epo atlaiyo, “Yimlalaye na: hala dla pumula diya, yia: humatlemiya. Adipalati, ipapele sotapo Pepele dimo dla u-ulapo tulupe,” diyo. <sup>15</sup> Epame ya:tapo ya: do mate yia: u-umapame ma mo hale dla taiyo.

*Alisisi pasatale oplami  
(Maka 10:17-31; Luk 18:18-30)*

<sup>16</sup> Oplami haleta Yesu watle puame epo atlaiyo, “Imalalo oplami, na: apa koko ka:dle hapo, halepo halepo pasakalo hapa:?” diyo.

<sup>17</sup> Epalati Yesu asiyama ya: watle epo atlaiyo, “Wa: adipalati na: watle puame ka:dle koko dalema:? Hatlo God tlo ka:dle halapo. Epapedeme wa: halepo halepo pasakalo halowedeme apelepiye, wa: aiyalma koko dolumhalane.”

<sup>18</sup> Asiyama oplamita epo atlaiyo, “Apa aiyalma kokota:?” diyo.

Epalati Yesu ya: watle epo atlaiyo, “Wa: ya:mkale yumula aiyalma, epo wa: upo a:ya uhala aiyalma, epo wa: upo alisisi uhala aiyalma, epo wa: amkale hi mate isikimi mala-atla aiyalma, <sup>19</sup> amasiyama wa: a mate epo wa: wai mate yia: yu dla heodepame salladepo sela:lepe, epame wa: wa:skamu sikemte bokotiyapo malamdiye, epammama wa: amkale ma sikemte bokotiyapo malamelepe.”

<sup>20</sup> Amasiyama oplamitapo Yesu watle epo atlaiyo, “Aiyalma koko hapuloma iye na:ta mo-dolumhaluwapo. Epele tlope na: ma apa koko hapa:?” diyo.

<sup>21</sup> Epalati Yesuta ya: watle asiyama epo atlaiyo, “Wa: ullu pa:po halemama woloma Godta solotamale koko mate ala:po halli dlepiye, wa: tame wa: alisisi hapulomaye opa opi watle hapipame asiyama mani tlo hapo puame atali so dla hapine. Wa:ta epapelepiye, Pepele dimo dla alisisi pasataletapo wa: hi mate ellepe. Epame ma na: dolumpuane,” diyo.

<sup>22</sup> Oplamitapo Yesu yu i dalepame sikemte dupa kolle mate taiyo. Adipalati, ya:ye alisisi pasatepo halaiyo. <sup>23</sup> Epalati Yesuta ya: alotle tlalo so watle epo atlaiyo, “Na: ikadepe kokoye wua: dla atlema. Alisisi pasatale oplamitapo Pepele dimo dla ulatuluweye pta kokalena. <sup>24</sup> Epedeme na: matle wua: dla atlema, ka:mol aliyatapo tluka dedlemalalo tuwale opokoko tle ulatuluweye ka:deta:? Hao, po-ulatuluwa. Epedeme e ma epapena, alisisi pasatale sota Pepele dimo dla ulatuluweye pta kokalena,” diyo.

<sup>25</sup> Amasiyama ya: alotle tlalo sota imale i dalepame yiyelemama epo atlaiyo, “Ame epo kokalleye oplami anta ulatupa:?” diyo.

<sup>26</sup> Epalati Yesuta yia: watle omhalemama epo atlaiyo, “Oplamita meyelo ya: pasakalo gadloweye po-ala:na. Amasiyama God tlo ala:na. Adipalati, ya:ta koko hapuloma haloweye pokokalena,” diyo.

<sup>27</sup> Epalati Pitata Yesu watle epo atlaiyo, “Dia:ye wa: dolumpumama di alisisi hapulomaye medla pomelepo pumulalepo. Epapedeme di asiyama apa koko hapa:?” diyo.

<sup>28</sup> Epalati asiyama Yesuta epo atlaiyo, “Na: ikadepe kokoye wua: watle atlema. Godta koko hapuloma ma-amko dlowe oloma edla Opa Yamitapo dokopala depame ya:ta pollalo mo dla pollope. Epalati oloma edla na: dolumsiyamalalo so 12 wua: mape dokopala sota popa:lalo mo 12 dla popa:mama Isalael so elele 12ye ompopa:lepe.

<sup>29</sup> Epame oplami antapo na: hi yilo ya: bapadulo mate epo ya: eidulo mate epo ya: nanadulo mate epo yotumadulo mate epo ya: a mate ya: wai mate epo ya: yimlala mate epo ya: ta:la mate epo ya: aya mate salepame na: dolumpulupiye, ya:ta wata oloma hema asiyama pato halepe. Epame ma alotle ya:tapo halepo halepo pasakaloye halepe.

<sup>30</sup> Epedeme itapu dla ha:ha:lalo so opita ma alo dla ha:ha:lepe. Asiyama alo dla ha:ha:lalo so opita ma itapu dla ha:ha:lepe.”

## 20

### *Oko so koko dla wayu atlale*

<sup>1</sup> “Pepele dimo kokoye ipapena. Osalo ya: atapo utulala ikadepe oko so elemala telepe, ya:ta gla:pi dlomoko emale dla oko halepo depame. <sup>2</sup> Epame ya:tapo opa opi natipo yia: mate yia: oko asiyama dla esemama alila hatloye elo mani hatlo hamilipe diyo. Epame yia:ye mo-oko hala taiya diyo.

<sup>3</sup> Epedeme osalo ya: atapo sali inoma 9 oloma dla hallati ya: mamisika: mo dulu dla tamama natilati opa opitapo isikimi koko pa:le duka dla siyamalati natiyo. <sup>4</sup> Epalati ya:tapo yia: watle epo atlaiyo, ‘Wua: ma tame na: alisisi emale dla oko haiya. Epalati na:tapo tamila:la dla wua: oko asiyama mate ala:le mani hapilowepo,’ diyo. <sup>5</sup> Epame yia:ye mo-oko dla taiyo.

Epame alila hatlo medla sali inoma mo-duka dla hallati ya: opa opi mape elemtame ya: osalo dulu dla oko haiya diyo. Epame ma alila hatlo medla sali inoma dapahatlope oloma dla hallati ya: matle opa opiye eleme tame oko hapiyo. <sup>6</sup> Epame ma alila hatlo medla sali inoma do supulastale oloma dla hallati ya: ma mo dulu dla ilamtame natilati opa opitapo koko pa:le siyamalati natiyo. Epalati ya:tapo yia: watle epo atlaiyo, ‘Wua: adipalati koko pa:le alila pato isikimi hema ha:ha:ma:?’ diyo.

<sup>7</sup> Epalati asiyama yia:ta epo atlaiyo, ‘Oplami haleta dia:ye ya: oko halepo depo di watle po-atlana,’ diyo. Epalati ya:ta yia: watle atlemama, ‘wua: ma na: osalo dla oko hala puaiya,’ diyo.

<sup>8</sup> Epame tamila:la oloma edla osalo ya: atapo ya: oko oplami hale watle epo atlaiyo, ‘Osalo dulu dla oko halomalalo so sisilapame yia: oko asiyama mani halopine,’ diyo. ‘Epedeme wa: mani halopimama opa alo ikadepe tle pumulale so tatile halopine,’ diyo.

<sup>9</sup> Epapalati oko sotapo asiyama halomolowedeme mo-puame alumalati alotle oko hala tlalo so tatile yia: oko asiyama dla elo mani hatlope hatlope dle halopiyo. <sup>10</sup> Epalati opa yia: tatile utulala ikadepe oko hala tamalale sota koko e natipame yia:ta malamaleta

yia: tlo yia: oko asiyamaye pato halomelepe depo momalampopa:iyo. Amasiyama yia: ma elo mani hatlo me-epapele halomaiyo. <sup>11</sup> Yia: mani i halopame allimama osalo ya: a watle epo atlaiyo, <sup>12</sup> ‘Dia: tlo alila pato sali alemalle dla oko hamha:ha:lepo. Amasiyama opa iwoloye isikimi sali inoma kiyele dla oko halepo. Epapele tlope wa: adipalati yia: watle mani hapili mepapeleye ma di watle hapi?’ diyo.

<sup>13</sup> Epalati osalo ya: ata yia: dulu dla oplami hale watle epo atlaiyo, ‘Na: batalimale koko hale wa: dla pohana. Adipalati, wa: alila hatlope oko asiyama elo mani hatlo me-epapeleye hali depame oko halowe solotamalepo. <sup>14</sup> Epedeme wa: mani e hame ma-tane. Na: solotama, na:tapo wa: watle mani hamili mepapeleye ma opi watle hapilowedeme. <sup>15</sup> Adipalati, na: ka:dena, na:tapo na: mani mate na:ta solotamale koko haloweye. Epapele tlope wa: adipalati na:ta ka:dle koko halati ma na: watle siyaladema:?’ diyo.”

<sup>16</sup> Epalati Yesuta ma epo atlaiyo, “Epedeme wata oloma hema alo dla ha:ha: sotapo ma itapu dla ha:ha:lepe. Epame ma itapu dla ha:ha: sotapo ma alo dla ha:ha:lepe.”

*Yesu mamisika: ya:ta polowe koko atlale  
(Maka 10:32-24; Luk 18:31-34)*

<sup>17</sup> Yesu Yelusalem dla hetamama ya: alotle tlalo soye alikili dla hohopo tame hale-mama yia: watle epo atlaiyo, <sup>18</sup> “Ka:e! Di Yelusalem dla matamayo. Edla Opa Yamiye Yu so aiyalma aya dokopala so mate epo aiyalma imalalo so mate dla home-llepe. Epalati yia:tapo ya: koko gladepo, ya:ta polowe kokoye atlepame ma po-Yu so dla homellepe. <sup>19</sup> Epame po-Yu sota ya:ye hampame ya: dla tetlemyemama put-lopo atlamyelepe. Epame ya:ye hopolemtame dali yekelehmihili di dla gogodlepe. Amasiyama ya:ye wabasi dulu dla powame elepame ma dapahatlope alila dla pasakalo depame sila:tilipe.”

*Yeims mate epo Yon mate yia: waita solotamale koko  
(Maka 10:35-45)*

<sup>20</sup> Epame Sebedi ya: akimlala Yeims mate epo Yon mateye yia: waita eleme Yesu hala dla puaiyo. Epame yia: waitapo ya: akimlala koko dla Yesu watle dalla natilowedeme ya: hete sitali dla polaiyo.

<sup>21</sup> Epalati Yesuta ya: watle epo atlaiyo, “Wa: apa kokoye na: watle atla puo?” diyo. Epalati asiyama ya:ta Yesu watle epo atlaiyo, “Wa: mo kokota pulati na: akimlala dapiyamte dulu dla haletapo wa: dowala tiyama dla pola epo haletapo wa: weke tiyama dla pola dlowe ka:deta:?” diyo.

<sup>22</sup> Amasiyama Yesuta yia: watle epo atlaiyo, “Wua: wua:ta atla kokoye powua:malama. Wua: na:ta wotiyalle pato halowedeme halaye wua: ma mepapele halowe ala:ta:?” diyo. Epalati asiyama yia:ta epo atlaiyo, “Yao, di ma-ala:na,” diyo.

<sup>23</sup> Epalati Yesuta asiyama yia: watle epo atlaiyo, “Ikadepe, wua: ma wotiyalle mepa-pele halepe. Amasiyama na: dowala tiyama dla popa:lalo so mate epo na: weke tiyama dla popa:lalo so mate sesalemoloweye na: dla itiyamale hawa. Amasiyama isikimi na: Ata ma-sesalemale so siyapotapo mo edla popa:lepe.”

<sup>24</sup> Epapele dulu dla Yesu ya: alotle tlalo so opa opitapo yu i dalepame Yeims mate epo Yon mate dla sikemte siyalasiyaladiyo. <sup>25</sup> Epalati Yesuta yia: sisilapame yia: watle epo atlaiyo, “Po-Yu so dokopala sotapo yia: isili tle ha:ha:lalo soye sikemte itiyamale mate omha:ha:mdepo. <sup>26</sup> Amasiyama wua: dulu dla epapolowe poka:dena. Epedeme wua: dulu dla anta pato hallowe solotamelepiye, ya: ka:yapa wua: yu dla salladepo sela:lepe. <sup>27</sup> Epame antapo itapu hallowe solotamelepiye, ya: ka:yapa ya:skamu isili dla hamtulupame ya: motoye yimkadulo gadlowe oko dla himilipe. <sup>28</sup> Adipalati, Opa Yamita ta:lamo hema puwaye, opata ya: gadlepo depame popuana. Amasiyama ya:ta opaye gadlowedeme puwapo. Epo opata pasakalo halepo depame polowedeme puwapo.”

*Yesuta inoma pa:talo opa dapiyamte ka:ka:dle  
(Maka 10:46-52; Luk 18:35-43)*

<sup>29</sup> Yesutapo ya: alotle tlalo so mate Yeliko mo meleme tamha:ha:lati opa hapulomatapo ya: dolumtamalaiyo. <sup>30</sup> Epapele oloma edla inoma pa:talo so opa dapiyamteta api duka dla popa:iyo. Yia:tapo Yesuta pua koko dalepame yu teta:le mate epo atlampopa:iyo, “Lod, Deibidi Yami, wa: di polowamama di gadene,” dempopa:iyo.

<sup>31</sup> Amasiyama opata yia: watle epo atlaiyo, “Wua: yu dimi popa:iya,” diyo. Amasiyama opata yia: watle epo atlati yia:tapo yia: yu podallalo ma sikemte yu teta:le mate epo atlempopa:iyo, “Deibidi Yami, wa: di polowamama di gadene,” dempopa:iyo.

<sup>32</sup> Epalati Yesutapo medla hedepame yia: sisilapo yia: watle epo atlaiyo, “Wua: na:ta wua: watle apa koko halepo depo solotama:?” diyo.

<sup>33</sup> Epapalati asiyama yia:ta ya: watle epo atlaiyo, “Di inoma ka:dene. Di ma tlam-siyamolowe solotama,” diyo.

<sup>34</sup> Yesuta yia: polowamama yia: inomaye u-umamaiyo. Epalati pakasiyamalalo yia: inomata ma-ka:ka:dlati yia:tapo Yesu alotle dolumtamalaiyo.

## 21

*Yesuta Yelusalem dla tale  
(Maka 11:1-11; Luk 19:28-40; Yon 12:12-19)*

<sup>1</sup> Yesu mate ya: alotle tlalo so mate Yelusalem mo mateka:pi dla tamalemama Olipi tamali kikiwi isili dla mo yemala Betapage dla woyamaiyo. Yia: edla puame woyapo ha:ha:mama Yesuta ya: alotle tlalo so opa dapiyamteye taiya demama epo atlaiyo, <sup>2</sup> “Wua: mo yemala itapu pola huma taiya. Wua: edla tame natilati donki aliyata ya: yemala mate kikitama hihimapo ha:ha:lati natilipe. Epalati wua: yia: kikitamaye totowatipame na: watle elempulupe. <sup>3</sup> Epapele dulu dla oplami haletapo wua:ye atlepiye, wua: asiyama atlemama, ‘Lodta aliya i solotamuwo,’ dlepe. Epalati oplamita wua: watle me-elemtaiya dlepe,” diyo.

<sup>4</sup> Epedeme koko ita wowoyamaleye God tle yu hapame molo atlamalalo oplamita atlamale yu mate ala:lowedeme apiyo. Adipalati, ya:ta ipo atluwapo,

<sup>5</sup> “Wua: Yelusalem so atlaiya, ‘Wua: dokopala oplamiye wua: dla mo-puapo. Ya:ye pta sadena. Ya:ye donki aliya yemala tle puapo.’ ”

<sup>6</sup> Epapeleye Yesu ya: alotle tlalo sotapo tame Yesuta atlamale koko eye halomaiyo.

<sup>7</sup> Yia: tame donki ya:ya mate epo donki yemala mate eleme pumulaiyo. Epame yia: kapumale tluka uptipame donki aliya dimsisi di dla kolumalati Yesutapo di dla hetame polaiyo. <sup>8</sup> Epalati opa hapulomatapo yia: kapumale tlukaye uptipame api duka dla yalemtlati opitapo usiye kolepame Yesuta tlowe api dla yalemtaiyo. <sup>9</sup> Epalati Yesutapo aliya di tle ma-tamhallati itapu dla tamha:ha:le so opa mate epo Yesu ko tle pumha:ha:le so matetapo yu teta:le mate epo atlamtamalaiyo, “Deibidi Yami dla sisiyeiya.

Lod hi tle pua oplami dla sisiyeiya.

Di ikadepe dla hallalo God dla sisiyeiya,” demtamalaiyo.

<sup>10</sup> Yesu Yelusalem mo dulu dla mo-ulatulati opa hapuloma edla ha:ha:le sotapo yiyelepame epo atlamyaiyo, “Oplami iye anata:?” demyaiyo.

<sup>11</sup> Epalati opa alumaletapo asiyama epo atlaiyo, “Iye God tle yu hapame molo atlalo oplami Yesupo. Ya:ye Ga:lili mo pato dulu dla Nasalet mo yemala tle puapo,” diyo.

*Yesuta opaye Yu so aiyalma aya tle dodolomsalle  
(Maka 11:15-19; Luk 19:45-48; Yon 2:13-22)*

<sup>12</sup> Yesu Yelusalem dla puame aiyalma aya dla hetaiyo. Ya: hetame natilati opata aiyalma aya dulu edla alinepi mate alisisi opi mateye asiyama mate halomyela natiyo. Epela natipame alimama ya:tapo aya dulu dla hutiyele alisisi yia: adulo mate epo alisisi e

halomalalo so opa mate alikili dla dodolomsaliyo. Epo mani mila:pi meyelope meyelope dle omha:ha:lalo sota mani kolumalaloye dodokotipo pololiyo. Epame opata seselema tea halopo puame hatitimalalo mape dodokotimaiyo.

<sup>13</sup> Epame Yesuta yia: watle epo atlaiyo, “God yu bukata ipo atlapo, ‘Na: aiyalma ayaye inoma sumalalo aya demha:ha:lepe,’ depo.

Amasiyama epapele tlope wua:tapo God ya: aya iye ma uhalalo aya dlepo,” diyo.

<sup>14</sup> Epapele oloma edla Yesu aiyalma aya dulu dla hallati inoma pa:talo so mate epo akoloyalemale so mate ya: hala dla pumulaiyo. Epalati ya:tapo yia:ye ka:ka:diyo.

<sup>15</sup> Amasiyama aiyalma aya dokopala so mate epo aiyalma imalalo so mate Yesuta koko ka:dle halomale natipame sikemte siyalasiyaladiyo. Epammama yia:tapo yimlalata aiyalma aya dulu dla ha:ha:mama “Yesu Deibidi Yami dla sisiyeiya” demyela dalepame sikemte alliyo. <sup>16</sup> Epame ma yia:ta Yesu watle epo atlaiyo, “Wa: yimlalata atlamya kokoye me-dalema:?” diyo.

Epalati asiyama Yesuta yia: watle epo atlaiyo, “Yao, me-dalema. Amasiyama wua: God yu bukata atla kokoye ala posesa:lalo ha:ha:ma? Adipalati, God yu bukata epo atlapo, ‘Godtapo yimlala mate epo owayimlala mateta ya: hi di dla ta:dlowe kokoye me-imuwapo,’ depo.”

<sup>17</sup> Epame Yesu yia: saliyome Yelusalem tle ma Betani mo dla ella taiyo.

### *Pigi dlomoko dalita powale*

*(Maka 11:12-14, 20-24)*

<sup>18</sup> Utulalati Yesu ma Yelusalem dla ilame tamama daya ta:iyo. <sup>19</sup> Epalati tamama pigi dlomoko dalita api duka dla hallati dlomoko mita: depo natila tuwaiyo. Amasiyama dlomoko tlo pomilalo isikimi upa siyapo asipo halla natiyo. Epalati Yesutapo pigi dlomoko dali edla epo atlaiyo, “Wa: matle dlomoko pomimhallowa,” diyo. Epapele oloma medla dalitapo pakasiyamalalo mo-powaiyo.

<sup>20</sup> Yesu ya: alotle tlalo sotapo koko i natipo yiyelepame epo atlaiyo, “Pigi dlomoko dali iye adipammama pakasiyamalalo mo-poma:?” diyo.

<sup>21</sup> Epalati Yesutapo asiyama yia: watle epo atlaiyo, “Na: ikadepe koko wua: watle atlema. Wua: mikadepe depo ha:ha:mama malamale potatlamalalo hallepiye, na:ta dali hema koko halëye wua: ma epapele koko haloweye ala:lepe. Epame hatlo koko ipapele tlo pohalomolowa. Amasiyama wua: koko opi patoto ma me-halomelepe. Epammama wua:ta tamali hema atlemama ‘wa:skamu dokastapame yú dulu dla tulune,’ dlepiye, koko eta mepapelepe. <sup>22</sup> Epapedeme wua: apa koko solotamama koko eye ikadepe hali depo mikadepe dle mate God dla otele himilipiye, wua: koko eye halepe.”

### *Yesuta itiyamale dla atlanatili*

*(Maka 11:27-33; Luk 20:1-8)*

<sup>23</sup> Yesu ma Yu so aiyalma aya dla hetame opa watle God yu imhallati aiyalma aya dokopala so mate epo Yu so dokopala so mateta puame Yesu watle epo atlaiyo, “Wa: apa itiyamale tle koko iye hamsela:ma? Anta wa: watle itiyamale iye hamiwa?” diyo.

<sup>24-25</sup> Epalati Yesuta asiyama yia: watle epo atlaiyo, “Na: mape wua: watle atlanatili yu hatlo atlowama. Anta Yon watle itiyamale hamiwa, opa yú dla ka:ka:timelepo depame? Godta itiyamale hamiwa, o oplamita itiyamale hamiwa? Epedeme wua:ta asiyama yu na: watle atlepiye, epalati na: ma asiyama na:ta itiyamale hamsela: iye wua: watle atlowepo,” diyo.

Epalati yia:ta yu i dalepame yiskamu yia: dulu dla esemyemama epo atlamyaiyo, “Di adipo atlepa:? Di Yonta itiyamaleye God tle puwa dlepiye, ma asiyama Yesuta di watle epo atellepe, ‘Ame wua: adipalati Yon yu dla pomikadepe dlalo wekuwa?’ dlepe.

<sup>26</sup> Epame di ma ya:ta itiyamaleye oplami tle puwa dlepiye, ma asiyama opata dia: dla siyalasiyaladlepe. Adipalati, opa hapulomata Yonye God tle yu hapame molo atlalo



oplami ikadepe demdepo.” <sup>27</sup> Epammama yia:ta asiyama Yesu watle epo atlaiyo, “Di podimalamana, Yonta itiyamale halë sitaliye,” diyo.

Epalati asiyama Yesuta yia: watle epo atlaiyo, “Na: ma asiyama wua: watle na:ta itiyamale hamsela: iye po-atlowa,” diyo.

*Yesuta akimlala dapiyamte mate wayu atlale*

<sup>28</sup> “Epedeme wua: koko hema apa koko malama:? Oplami haletapo akimlala dapiyamte elemhalaiyo. Epapeleye ya:tapo ka:yapa hamale maseyemala dla epo atlaiyo, ‘Wa: tame na: gla:pi dlomoko emale osalo dla oko hane,’ diyo.

<sup>29</sup> Amasiyama maseyematapo atlemama, ‘Na: alima,’ depame ma alotle malamale meyelo depame oko hala taiyo.

<sup>30</sup> Epame ya: ata ma tame ya: maseyemala hale dla epo atlaiyo, ‘Wa: tame na: gla:pi dlomoko emale osalo dla oko hane,’ diyo. Epalati ya: maseyemalata atlemama, ‘Yao, na: oko hala tlowepo,’ depame ma potlalo wekiyo.

<sup>31</sup> Epedeme akimlala dapiyamte dulu hema maseyemala aditapo ya: ata solotamale koko hauwa?”

Epalati asiyama aiyalma aya dokopala so mate epo Yu so dokopala so mateta epo atlaiyo, “Ka:yapa hamale maseyematapo ya: ata solotamale kokoye hauwapo,” diyo.

Epalati Yesuta yia: watle epo atlaiyo, “Na: ikadepe koko wua: watle atlema. Ta:kis mani halomalalo so mate epame opa ala:msiyamalalo so wola: matetapo yia: tatile Pepele dimo dla u-ulapo tumama asiyama wua: tlo alikili dla pomellepe. <sup>32</sup> Adipalati, Yontapo wua:ye api ka:dle nati-ilati wua: ya: yu dalepame pomikadepe dena. Amasiyama bobtalimale so ewolotapo Yon yu dalepame mikadepe duwapo. Epame wua:tapo yia:ta mikadepe dle koko natipame malamale pomeyelo dlalo ha:ha:mama Yon yu dla ala pomikadepe dlalo wekuwapo.”

*Batalipo omha:ha:lalo so kokoye wayu mate atlale*

*(Maka 12:1-12; Luk 20:9-19)*

<sup>33</sup> “Epame wayu hale i ma daliya. Alila haleta osalo ya: atapo ya: osalo dla gla:pi dlomoko ale emaiyo, epame alikili kosukuliyo. Epo dlomoko dala okolloweye ta:la dla munamu muwalepame matle alisisi e ompollowe kimna:ya di dla haiyo. Ya: epame opa opi watle omha:ha:iye depame ma mo hale pateka:mu dla halla taiyo. <sup>34</sup> Ya: edla tame hallati dlmokota milipame namolowe alilata mo-puaiyo. Epalati ya:tapo ya: oko so opi watle ya: osalo dla tame dlmokoye halopo puaiye diyo. <sup>35</sup> Amasiyama osalo omha:ha:lalo sota yia:ta pula natipame hohopo opi tlo hohopoliyo. Epame opi tlo ewala mate kelepo potimaiyo. <sup>36</sup> Epalati osalo ya: ata koko i dalepame matle oko so pasataleye taiya diyo. Amasiyama osalo omha:ha:lalo sotapo yia: mape mepo hohopolemama opi tlo ewalata kelepo potimaiyo. <sup>37</sup> Epalati ma mosukulu dla ya: maseyemala tlo tane demama epo malamaiyo, ‘Osalo omha:ha:lalo sotapo na: maseyemala dla heodemama ya:ye poyumlowa,’ diyo.

<sup>38</sup> Amasiyama osalo omha:ha:lalo sotapo osalo ya: a yamita pulati natipame yiskamu yia: dulu dla epo atlamyaiyo, ‘Maseyemala itapo osalo ya: a elo dla hallala. Epedeme ya:ye yumpame osalo iye dita halowa,’ demyaiyo. <sup>39</sup> Epammama yia:tapo maseyemala eye osalo alikili dla hamamtame yumiyo. <sup>40</sup> Epedeme osalo ya: ata puame ya: osalo omha:ha:lalo so dla apa koko hapa:?”

<sup>41</sup> Epalati aiyalma aya dokopala so mate epo Yu so dokopala so mateta asiyama epo atlaiyo, “Osalo ya: ata puame osalo omha:ha:lalo soye potipame osaloye ma opa opi watle omha:ha:iya dlepe. Epedeme opa ewolotapo dlmoko ma hauwallowe oloma edla hauwalepame yoye halopi demha:ha:lepe.”

<sup>42</sup> Epalati Yesuta yia: watle epo atlaiyo, “Wua: God yu bukata atlama kokoye posesa:lalo wekemdi? Adipalati, edla ipo atlapo, ‘Aya halalo sota alumiti allimama

alumiti hamastaletapo ma wata aya duka dla molopa kestale some halapo. Epedeme koko iye Lodta hauwapo.

Epalati dita koko i natipo yiyelemama sikemte ka:dena depo.'

<sup>43</sup> Epedeme na: ikadepe koko wua: watle atlema. Pepele dimo kokoye wua: tle kola-hapame ma opa anawolotapo Godta solotamale koko tlo halomha:ha:ma:, ma ewolo watle halopilipe. <sup>44</sup> Epedeme oplami antapo alumiti edla kustamtame teyulupiye, ya:ye susupulastepo hamastlepe. Epame alumiti etapo oplami haleye goludlepiye, oplami eye totola:timtame ellepe," diyo.

<sup>45</sup> Epalati aiyalma aya dokopala so mate epo Pa:lisi so mate Yesuta wayu atlamale koko dalepame "di koko atlemhalema," depo momalamaiyo. <sup>46</sup> Epammama yia:tapo Yesu hamolowe apiye totamaiyo. Amasiyama opa hapulomatapo Yesuye God tle yu hapame molo atlalo oplami ikadepe demyelati dalepame ya:ye hamolowe wowota:iyo.

## 22

### *A:ya hamili daya dele dla wayu atlale (Luk 14:15-24)*

<sup>1</sup> Epame Yesu matle wayu mate ipo atlaiyo, <sup>2</sup> "Pepele dimo kokoye ipapena. Dokopala oplamitapo yamita a:ya halowe dla daya pato dinapiyo. <sup>3</sup> Ya: daya ma dinapopo gudepame ma ya: oko so watle taiya demama epo atlaiyo, 'Wua: na:ta daya dinapele dla pulupo depame yu halopimtauwa opaye elempuaiya,' diyo. Epalati ya: oko sota yu hamtame opa ewolo atlamalati asiyama yia:ta pula alliyo. <sup>4</sup> Epela dalepame dokopala oplamitapo ya: oko so opa opiye mamsika: tame atlamama epo atlaiye diyo, 'Aliya haloye mo-poyupo halema, epame daya ma ma-dinapopo halema. Epapedeme wua: a:ya hamili daya dele dla puame daya deiya diye,' diyo. <sup>5</sup> Amasiyama yia:tapo yu hamtame atlati opa opita yu i dalepame allimama ma yia: oko dla tamalaiyo. <sup>6</sup> Epalati ma opa opitapo yu i dalepo dokopala oplami ya: oko so opaye hohopolepame potimaiyo. <sup>7</sup> Epalati dokopala oplamitapo koko i dalepo sikemte siyaladepame ya: opa hapuloma watle atlemama, 'Yimkadulo potimalalo so ewoloye potipame yia: mo ma dlapa mistaiya,' diyo.

<sup>8</sup> Epame dokopala oplamitapo ya: oko so watle ma epo atlaiyo, 'Daya patoye mo-dinapopo elema. Amasiyama na:ta sisilamale soye me-yia: batalimale koko tle populalo wekelepo. <sup>9</sup> Epedeme wua: tame mo duka dla siyama opa hapulomaye daya delepo depame elempuaiya,' diyo. <sup>10</sup> Epalati ya: oko sota tame opa hapuloma ka:ka:dle so mate epo bobtalimale so mate elepame daya dele dla pumulaiyo. Epapele oloma edla aya dulu eye opata alumama sikemte pasataiyo.

<sup>11</sup> Amasiyama dokopala oplamita aya dulu edla opa natila hetamama natilati oplami haletapo a:ya hamili dla tluka didiyelalo epapele po-asilalo puame polla natiyo.

<sup>12</sup> Epalati dokopala oplamita ya: watle epo atlaiyo, 'Namkale, wa: a:ya hamili dla tluka didiyelalo epapele po-asiyampolasema. Wa: aya dulu hema adipo matao?' diyo. Amasiyama oplami etapo asiyama atlowe yu pa:iyo.

<sup>13</sup> Epalati dokopala oplamitapo ya: oko so watle epo atlaiyo, 'Oplami iye do mate epo hete mate kokotipoliyepame alikili amtuwale dla hamastaiya. Ya: edla halemama amale mate a:pe tetekelemhallepe,' diyo.

<sup>14</sup> Epedeme Godtapo opa hapulomaye ma-sisilamhalapo. Amasiyama ya: isikimi opa opi tlo elemhalapo."

### *Sisa dla ta:kis mani hapilowe koko (Maka 12:13-17; Luk 20:20-26)*

<sup>15</sup> Epame Pa:lisi sotapo alikili dla tame Yesutapo batalimale koko atlati ya:ye hamolowe kokoye esemaiyo. <sup>16</sup> Epammama yia:tapo yia: opa mate epo Helod ya: opa mate Yesu hala dla taiya diyo. Epalati opa ewolota tame Yesu watle epo atlaiyo, "Imalalo

oplami, dimalamana, wa:ye ikadepe koko tlo halalo oplamipo. Epame wa:ta God koko imama ikadepe koko siyapo tlo imdepo. Epame wa: opa powota:semde. Epo wa: opa isikimi kapala di dla potlamasemde. <sup>17</sup> Epedeme wa: di atlane, di ka:deta:, Loum dokopala oplami Sisa watle ta:kis mani halopiliweye?” diyo.

<sup>18</sup> Yesu yia:ta batalipo malamale kokoye momalanatipame yia: watle epo atlaiyo, “Wua:wuskamu pepemalalo sopo. Wua: adipalati na:ye elemala natilowedeme amma:?” <sup>19</sup> Epedeme wua:ta ta:kis mani kolumha:ha:lalo mani haleye na: watle nati-ya.” Epalati yia:ta ya: watle elo mani hale hamiyo. <sup>20</sup> Epalati Yesutapo yia: watle epo atlaiyo, “Mani hema ana mila:pi mate epo ana hi mate hutiyema:?” diyo.

<sup>21</sup> Epalati asiyama yia:ta epo atlaiyo, “Sisa mila:pi mate epo ya: hi mateta hutiyema,” diyo. Epapalati Yesuta yia: watle epo atlaiyo, “Wua: epapedeme Sisa teteye Sisa watle halopiya, epame God teteye God watle halopiya,” diyo.

<sup>22</sup> Yia:tapo yu i dalepo sikemte yiyelepame Yesu saliyome ma-tamalaiyo.

*Palli tle ma silliwé dla Yesu watle atlanatili*  
(Maka 12:18-27; Luk 20:27-40)

<sup>23</sup> Epame alila oloma edla Sa:dusi so opa opita Yesu hala dla pumulaiyo. Opa iwolota atlemama, “Palli sota ma posilliwa,” demdepo. Epeleye yia:tapo puame Yesu watle epo atlaiyo, <sup>24</sup> “Imalalo oplami, Mosesta di watle molo atlale yuye ipo ilipo hamiwapo. ‘Oplamitapo a:ya hapo yimlala pohatitimalalo halepo polopiye, ma oplami e ya: eita sepeyama eye hapo ya: bapa elo dla ha:ha:lowe yimlala hatitimelepe,’ duwapo. <sup>25</sup> Epapedeme oplami haletapo akimlala 7 hatitimaiyo. Epame yia: bapa tate a:ya haiyo. Epo yimlala pohatitimalalo halemama powaiyo. Epalati ma medla hallalota ya: bapa ya:llu sepeyama me-eye haiyo. <sup>26</sup> Ya: mape yimlala pohatitimalalo powaiyo. Epela ma medla hallalota sepeyama hatlo me-eye haiyo. Amasiyama ya: mape yimlala pohatitimalalo powaiyo. Epamtamama akimlala 7 hapuloma ewolotapo yimlala pohatitimalalo pataiyo. <sup>27</sup> Epo a:ya sepeyama eta mosukulu powaiyo. <sup>28</sup> Epapedeme palli tle silliwé oloma edla a:ya eye ikadepe ana ya:llu depa:?” Adipalati, yia:ta 7ta a:ya hatlo metlo halompuwapo,” diyo.

<sup>29</sup> Amasiyama Yesuta asiyama yia: watle epo atlaiyo, “Wua:ye yeitamale sopo. Adipalati, wua: Godta itiyamale mate epo ya: yu mate ala yeitamha:ha:po. <sup>30</sup> Adipalati, palli sota wabasi tle sillipiye, yia: matle wola: mate epo opa mate pahalomha:ha:lowa. Amasiyama yia:tapo God ya: banakaka sota Pepele di dla ha:ha:ye epapele some ha:ha:lepe. <sup>31</sup> Epedeme wua: Godtapo palli sota matle pasakalo depo silliwé koko dla atlale yuye posesa:semde? Adipalati, ya:ta epo atluwapo, <sup>32</sup> ‘Na:ye A:iblaham ya: Godpo, epo Aisek ya: Godpo, epame Yokob ya: Godpo,’ duwapo. Epapedeme God iye popalli so yia: God. Hao, pasakalo ha:ha:lalo so yia: Godpo.” <sup>33</sup> Epalati opatapo Yesuta imale koko i dalepame sikemte yiyeliyo.

*Aiyalma hatitimale dulu dla adita patota:?*  
(Maka 12:28-34; Luk 10:25-28)

<sup>34</sup> Yesuta Sa:dusi sota yuhalowe api himomelle koko natipame asiyama Pa:lisi sotapo yimkata alupame esemaiyo. <sup>35</sup> Epame yia: dulu dla aiyalma imalalo oplami haleta Yesu elemala natilowedeme puame ya: watle epo atlaiyo, <sup>36</sup> “Imalalo oplami, Mosesta aiyalma hatitimale dulu dla aiyalma adi tlo sikemte patota:?” diyo.

<sup>37</sup> Epalati Yesutapo asiyama epo atlaiyo,  
“ ‘Wa: Lod wa: Godye sikemte malahalane,

wa: dupa dulu malamale tle, epo wa: soko tle, epame wa:ta malamale tle.’

<sup>38</sup> Epedeme aiyalma hatitimale dulu dla aiyalma itapo ikadepe pato halapo. <sup>39</sup> Epame ya: ko tle aiyalma hale pato me-epapele sepeleye ipo,  
‘Wa:ta wa:skamu sikemte malamdiye,

epammama wa: amkale ma sikemte malamhalane.’

<sup>40</sup> Epedeme Mosesta aiyalma hatitimale hapuloma mate epo God tle yu hapame molo atlamalalo sota hatitimale hapuloma matetapo aiyalma dapiyamte iwolo dla hitaha:ha:po.”

*Kelisoye ana yamita:?*

*(Maka 12:35-37; Luk 20:41-44)*

<sup>41</sup> Pa:lisi so ala yimkata me-alupo popalati Yesuta yia: watle epo atlaiyo, <sup>42</sup> “Wua: Keliso kokoye adipo malama:, ya:ye ana yamita:?” diyo. Epalati yia:tapo epo atlaiyo, “Deibidi yamipo,” diyo.

<sup>43</sup> Epalati asiyama Yesuta yia: watle epo atlaiyo, “Ame adipalati Deibiditapo Soko tle atlemama Kelisoye ya: Lod duwa? Deibidita meyelo epo atluwapo, adipalati,

<sup>44</sup> ‘Godta na: Lod watle epo atluwapo,  
Wa: na: dowala tiyama dla polane.

Epalati na:tapo wa: watle opahale demha:ha: soye wa: hete sitali isili dla hatiti-molowepo,’ duwapo.

<sup>45</sup> Epedeme Deibidita Kelisoye ya: Lod duwapo. Ame adipammama Kelisoye Deibidi yami depa:?” diyo. <sup>46</sup> Epalati oplami haletapo ya: yu ipi dla yu hale asiyama potlaiyo. Epedeme oloma etle ma oplami haletapo Yesu watle atlanatili yu hale atloweye wowota:mdiyo.

## 23

*Yesuta aiyalma imalalo so mate epo Pa:lisi so mate yia: koko dla imale*

*(Maka 12:38-39; Luk 11:43-46, 20:45-46)*

<sup>1</sup> Epame Yesuta ma opa hapuloma dla epo ya: alotle tlalo so dla epo atlaiyo, <sup>2</sup> “Aiyalma imalalo so mate epo Pa:lisi so mate yia: dla itiyamale elapo, yia:tapo Mosesta aiyalma hatitimale wua: dla imoloweye. <sup>3</sup> Epedeme yia: yu dla salladepo siyamama yia:ta atlamha:ha: kokoye halomha:ha:iya. Amasiyama wua: yia:ta moto mate koko halomha:ha: e natipame wua: ma e halomiya. Adipalati, yia: aiyalma koko wua: dla ipo ma miyelo moto mate koko eye pohalomasemde. <sup>4</sup> Epapedeme yia:ta aiyalma imale kokotapo opa dla upiyele pato hapimdepo. Amasiyama yia:tapo yimkadulo gagademama upiyele ipi eye ma miyelo pohasemde.

<sup>5</sup> Epedeme yia:ta koko halomale dulu dla isikimi opatapo yia:ye natilipo depo am-mdepo. Epame yia: God yu ipi ilalimaleye dawale patoto tilimale epapele dulu dla hatitipo didiyepo siyamdepo, opata natilipo depame. Epame opata natilipo depame yia:ta inoma sumama tluka didiyelalo patoto seselemalliye didiyepo siyamdepo. <sup>6</sup> Yia: epame dita inoma sumalalo aya dla epo daya pato dele dla itapu ikadepe dla popa:lowe tlo solotamdepo. <sup>7</sup> Epame api duka dla opata yia: dla heodepame namkale dle yu atlamalati yia: sikemte dallowe tlo solotamdepo. Epame yia: ma solotamdepo, opatapo yia: watle imalalo so dlepo depame.

<sup>8</sup> Amasiyama poka:dena, opatapo wua: watle atlemama imalalo oplami dloweye. Adipalati, wua: imalalo oplamiye hatlopepo. Epame wua: dulu dla haleta potla:mtamhalasema. <sup>9</sup> Epame ta:lamo hema oplami hale watle atlemama a demiya. Adipalati, wua: A hatlope Pepele dimo dla halapo. <sup>10</sup> Epame poka:dena, oplami haletapo wua: watle atlemama dokopala oplami dloweye. Adipalati, wua: dokopala oplami mape hatlo Kelisopo. <sup>11</sup> Epedeme wua: dulu dla salladepo sela:lalo oplamitapo pato halapo. <sup>12</sup> Epapedeme opa anawolotapo yiskamu yia:ye di dla halopo hetamha:ha:ma:, asiyama Godtapo yia:ye isili dla ipila:lepe. Amasiyama opa anawolotapo yiskamu yia:ye isili dla halopo tulumha:ha:ma:, yia:ye asiyama Godta di dla ipila:lepe.”

*Ka:e, aiyalma imalalo so mate epo Pa:lisi so mate!  
(Luk 11:39-52, 20:47)*

<sup>13</sup> “Epapedeme ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: yimkadulota Pepele di dla ulatuluweye api komha:ha:po. Epame wua: muwolo edla po-ulatuwase mde.

[ <sup>14</sup> Ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: isikimi elemale tle sepeyamataloye dodolomsalepame yia: ayaye kokolahamdepo. Epame wua: opa hapuloma inoma dali tle inoma sumale yu seselemalli atlamdepo. Epedeme wua: asiyama wotiyalle pato halepe.]

<sup>15</sup> Ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: solotamde, po-Yu so opatapo ma Yu so dlepo depame ta:lammo pato dla opaye totamsiyamdepo. Epame wua:ta oplami hale ma-hampame wua:ta batalipo imale koko mate ya:ye sikemte batalipo hamastamdepo. Epapele koko tle wua:tapo ya:ye Dlapa mo dla semtamama ammddepo.

<sup>16</sup> Ka:e, wua: wolomape! Wua: inoma watalo so tlope ma inoma pa:talo so some opaye elemtapo. Epame wua:tapo ipo imdepo, ‘Oplami haletapo yu itiyapo himimama aiyalma aya hi mate aiyalma soloweye pase koko pato,’ demdepo. ‘Amasiyama oplami antapo aiyalma aya dulu dla mani ela hi tle yu itiyapo himimama aiyalma selepiye, e tlo koko pato,’ demdepo. ‘Epammama ma alotle yu itiyapo himili eye pohauwokokomolowa,’ demdepo. <sup>17</sup> Wua: yiyilamale sopo! Manita koko pato pohalasema. Amasiyama aiyalma ayata koko pato halapo. Adipalati, mani eta aiyalma aya dulu dla ellati mani e ma aiyalma depo elapo.

<sup>18</sup> Epame wua: ma ipo imdepo, ‘Oplami haletapo yu itiyapo himimama God watle namkale dle alisisi ha:po hamilalo tile, aiyalma aya dulu dla pola, e ya: hi tle aiyalma soloweye pase koko pato,’ demdepo. ‘Amasiyama ya:ta yu itiyapo himimama tile edla namkale dle alisisi himili e hi tle aiyalma selati e tlo sikemte koko pato,’ demdepo.

<sup>19</sup> Wua: inoma pa:talo sopo. Aiyalma aya dulu dla tile pola dla himili alisisita koko pato pohalasema. Amasiyama tileta koko pato halapo. Adipalati, tiletapo namkale dle alisisi hamili eye aiyalma demdepo. <sup>20</sup> Epedeme oplami antapo yu itiyapo himimama tile hi tle aiyalma selepiye, ya: isikimi tile hi siyapo mate aiyalma posolowa. Amasiyama ya:tapo tile hi mate epo tile edla namkale dle alisisi himili e ya: hi mate aiyalma selepe. <sup>21</sup> Epame oplami antapo yu itiyapo himimama aiyalma aya hi tle aiyalma selepiye, ya: isikimi aiyalma aya hi siyapo mate aiyalma posolowa. Amasiyama ya:tapo aiyalma aya hi mate epame dulu edla hallalo God hi mate aiyalma selepe. <sup>22</sup> Epame oplami antapo yu itiyapo himimama Pepele dimo hi tle aiyalma selepiye, ya: isikimi Pepele dimo hi siyapo mate aiyalma posolowa. Amasiyama God hi mate epo ya:ta pollalo hi mate aiyalma selepe.

<sup>23</sup> Epapedeme ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: God dla namkale dle alisisi hapimama mala mate epo sosoko mate epo alisisi opi yimka:sikili mate woloma kolumale 10 dulu dla kolumale hatlope God watle hapi demha:ha:mama asiyama aiyalma hatitimale dulu dla koko patoto hutiyehalomolowe tlo wowelimdepo. Eye ka:dle koko halowe mate, epo ya:mkale bokotiyapo malamolowe koko mate, epo mikadepe dlowe koko matepo. Epedeme koko patoto e tlo woloma halomha:ha:iya. Epammama God dla namkale dle alisisi halopiliwe koko ma wowelimiya. <sup>24</sup> Wua: inoma pa:talo sopo. Wua: amama yemalata wua: daya dla pollati woloma natipame alikili dla auwemdepo. Amasiyama aliya patota wua: mila:pi dla ellati e ponatilalo me-gola:demdepo.

<sup>25</sup> Epapedeme ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: muwolo kapo mate epo palita mate alikili tlo sikemte howahalomama asiyama dulu tlo pohowahalalo wekemdiye, wua: ma mepo ha:ha:po. Adipalati, wua:tapo kapala di tlo howahalomdepo. Amasiyama wua:



dupa duluye batalimale koko mate epame alisisi solotamolowe koko mateta sikemte poposatilipo hutiyepo. <sup>26</sup> Pa:lisi so, wua: ikadepe sikemte inoma pa:talo sopo. Wua: ka:yapa wua: kapo dulu mate epo palita dulu mate tatile howahalomaiya. Epapelepiye, alikili ma mepo ullu pa:po hallepe.

<sup>27</sup> Epapedeme ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua: wabasi ka:pi dinapopo halemdiye, epapele some ha:ha:po. Adipalati, wabasi di tle tlo sikemte ka:pi dinapopo halemdepo. Amasiyama duluye powale elo mate hutallu mate sikemte wokasepo elemdepo. <sup>28</sup> Epammama wua: opa mila:pi tle wuskamu wua:ye ka:ka:dle so demsiyamdepo. Amasiyama wua: isikimi wuskamu pepeyalimalalo sopo. Adipalati, wua: opasi duluye batalimale kokota poposatilipo hutiyepo.

<sup>29</sup> Epapedeme ka:e, aiyalma imalalo so mate epo Pa:lisi so mate, wua: wuskamu sikemte pepeyalimalalo sopo! Wua:ta God tle yu hapame molo atlamalalo so palli hatili wabasi di tle aya yimlala halopame ka:pi dinapomha:ha:po. Epammama ka:ka:depo ha:ha:le sota palli wabasi mape wua:ta mepo ka:depo dinapomha:ha:po. <sup>30</sup> Epame wua: ma epo atlamha:ha:po, 'Di mamadulota ha:ha:uwa oloma edla di ma me-ha:ha:matiye, di God tle yu hapame molo atlamalalo soye dia: mate pe-epo potima,' demha:ha:po.

<sup>31</sup> Amasiyama wua:ta epo atlamha:ha: koko tle muwolo wuskamu wua:ye God tle yu hapame molo atlamalalo so potimale yia: mamadulopo demha:ha:po. <sup>32</sup> Epedeme wua: mamadulotapo batalimale koko kotiyapo meluwaye ma wua:ta mosukulu dla tame gudiya. <sup>33</sup> Wua: ilama yimlalapo. Apa kokotapo wua:ta Dlapa mo dla tamalaye himomelepa:?

<sup>34</sup> Epedeme na: wua: watle God tle yu hapame molo atlamalalo so mate epo ka:ka:dle so mate epo God yu imalalo so mate taiya dlowepo. Amasiyama wua:tapo opiye potimelepe. Epo opiye dali yekelehmihili dla gogodlalimelepe. Epame opiye aiyalma aya dulu dla hohopollepe. Epalati opiye wua:tapo wotiyalle hapimha:ha:mama mo hale tle ma mo hale dla dodolomsalemha:ha:lepe. <sup>35</sup> Epedeme ta:lamo hema wua: mamadulotapo ka:ka:depo ha:ha:lalo soye mo-potimpuwapo. Epammama yia:tapo ka:dle oplami Eibol tle yumuluwe kotiyapame potimpuame Belekaya yami Sekalaya yumpo guduwapo. Epedeme yia:tapo Sekalayaye aiyalma aya ka: epo God dla alinepi poyupo halomalalo tile ka: duka dla hallati yumuwapo. Epapedeme wata ha:ha: so wua:tapo wua: mamadulota ka:yapa God tle yu hapame molo atlamalalo so potimpuwa yia: batalimale asiyamaye wua:ta halepe. <sup>36</sup> Epedeme na: ikadepe kokoye wua: dla atlema. Wua:tapo wua: mamadulo batalimale asiyamaye halepe."

*Yesuta Yelusalem koko dla dupa kolle*

*(Luk 13:34-35)*

<sup>37</sup> "Yelusalem, Yelusalem, wa: adipalati God tle yu hapame molo atlamalalo so potimama Godta taiya dle soye ewala mate kelehalemndi? Na: alila adisowa dla gagapota ya: yimlalaye woloma suku dulu dla ipila:po opolomdiye, epapolowedeme na:ta wa: yimlalaye elempuluwe solotamduwapo. Amasiyama yia: posolotamdena.

<sup>38</sup> Epapedeme Yelusalem so, wua: daliya. Wua: aiyalma ayaye aya siyapo hallepe.

<sup>39</sup> Epedeme na: ikadepe kokoye wua: watle atlema. Wua: matle na: mila:piye ponatilowa. Amasiyama alilata pulati wua:tapo epo atlamyelepe, 'God hi mate pua oplami dla sisiyeiya,' demyelepe. Epapele oloma edla wua:tapo ma na: mila:pi natilipe."

## 24

*Yesuta aiyalma aya dokostlowe atlale*

*(Maka 13:1-2; Luk 21:5-6)*

<sup>1</sup> Yesu aiyalma aya saliyome ma-tamhallati ya: alotle tlalo sota puame ya: watle atlemama "aiyalma aya ka:pi dinapele pola i natine," diyo. <sup>2</sup> Amasiyama Yesuta epo

atlaiyo, “Wua: koko hapuloma iye woloma natiya. Na: ikadepe koko wua: watle atlema. Aya hema ewala haletapo matle yimkadulo tama di dla popopa:lowa. Amasiyama aya e dokostlati ewala hapuloma etapo matle ta:la dla teteyupo tulume popa:myelepe,” diyo.

*Wotiyalleta kotiyamolowe alila*

*(Maka 13:3-23; Luk 21:7-24)*

<sup>3</sup> Epame Yesu Olipi tamali di dla hetame pollati ya: alotle tlalo sota miyelo puame ya: watle ipo atlanatiyo, “Wa: di atlane, aiyalma aya dokostlowe alilaye adipalalota? Epame wa:ta puluwedeme hallati apa kokota woyapa? Epame ta:lamo mosukuluta woyamolowedeme hallati ma apa kokota di watle nati-ipa:?”

<sup>4</sup> Amasiyama Yesuta ma yia: watle epo atlaiyo, “Ka:e wolomape! Oplami haleta wua:ye ikadepe api tle ma alikili dla elemtullala. <sup>5</sup> Adipalati, opa opitapo na: hi mate puame atlamyemama yiskamu yia:ye Kelisopo demyelepe. Epamyemama yia:ta opa pasataleye ikadepe api tle alikili dla eleme telepe. <sup>6</sup> Epapedeme wua: opahale koko mate epo nalatimale koko mateta wowoyamalati dalepame ase sikemte wowota:miyo. Ame adipalati, koko ipapele tatlle wowoyamelepe. Amasiyama dulu edla mosukulu alilata yipta populuwa.

<sup>7</sup> Mo haletapo mo hale mate opahale de demyelepe. Oloma edla mo opi dla daya pa:le kokotapo pulupe. Epo allutuwale patotota mo opi dla ellepe. <sup>8</sup> Epapele kokota wowoyamelepiye, wotiyalle alilata kotiyamama apelepe.

<sup>9</sup> Epapele dulu dla opatapo wua: dla wotiyalle hapipame potimolowe dla eleme telepe. Epame wua:ta na: dla mikadepe dle koko tle opa hapulomatapo wua: dla elle pato himha:ha:lepe. <sup>10</sup> Epapele oloma edla opa opitapo yia:ta mikadepe dleye polollepe. Epammama yia:tapo yimkadulo mikadepe dle soye allimama yia: dla opahale demha:ha: so dla hohopo ilipe. <sup>11</sup> Epame biskapa God yu molo atlamalalo sotapo wowoyapame opa opiye elemala natilipe. <sup>12</sup> Epapele dulu dla batalimale kokota sikemte ta:mhetlati asiyama opatapo ya:mkale bokotiyapo malamolowe kokota pomelepe. <sup>13</sup> Amasiyama oplami antapo ya:ta mikadepe dleye kokalepo halemama mosukulu dla tame woyamelepiye, ya: pasakalo hallowe halepe. <sup>14</sup> Epedeme mo hapuloma dla opa hapulomata ikadepe koko dlallepo depame ka:dle yu Pepele dimo kokoye atlamtelepe. Epalati ka:dle yuye opa hapuloma dla ma-atlamtepo gudepo hallati ta:lamo mosukuluta edla woyamelepe.

<sup>15</sup> Epedeme sesa:lalo oplami, wa: yu i ya: dulu kokoye woloma hane. Adipalati, God tle yu hapame molo atlalo oplami Da:niyolta epo atluwapo, ‘Wua: ulugiyemale alisisi batalimaletapo aiyalma aya dulu dla tulumhalla natilipe,’ duwapo. <sup>16</sup> Epalati Yudiya sotapo ulugiyemale alisisi e natipame tamali di dla pohetlepe. <sup>17</sup> Epame oloma edla aya potopali dla pollalo oplamitapo poka:dena, ma aya dulu dla tuwame ya: alisisi halomolowe. <sup>18</sup> Epame osalo dulu dla sela:lalo oplamitapo ma ilame aya dla ya: tluka alisisi pahalomala flowa. <sup>19</sup> Epo oloma edla mopapo koko watalo so mate epo oway-implala meme ilimalalo so matetapo potloweye pta kokalle pato natilipe. <sup>20</sup> Epapedeme wua:ta potlowe alilata teneyapi dla o dita inoma sumalalo alila dla powoyamalalo wekelepo depame God dla inoma sumale yu himme ha:ha:iya. <sup>21</sup> Adipalati, oloma edla wotiyalle koko patota pulupe. Epedeme ta:lamo kotiyamale oloma etle pualeye, opatapo wotiyalle koko ipapele ponatimdena. Epame wotiyalle koko pato ita tame gudlepiye, ma alotle wotiyalle koko ipapeleye ponatilowa. <sup>22</sup> Amasiyama epapele tlope Godta wotiyalle alila iye kiyepo mellepe. Adipalati, ya:ta alila selemalipo melematiye, oplami haleta wotiyalle dulu edla halloweye po-ala:ma. Amasiyama wotiyalle dulu edla Godta sesa:lemale so opa ma me-ha:ha:deme ya:tapo alila eye kiyepo mellepe.

<sup>23</sup> Oloma edla oplami haleta puame, wua: watle atlemama, ‘Iye Kelisopo’ o ‘Huma natine, eye Kelisopo,’ dlatiye, ya: yu dla mikadepe demiyo. <sup>24</sup> Adipalati, biskapa elemala natilalo keliso mate epo biskapa God yu molo atlamalalo so matetapo puame

ulugiyemale koko patoto halomyelepe, Godta sesa:le so elemolowa depame. <sup>25</sup> Epedeme koko iye ala powowoyamalalo hallati na: tatile wua:ye molo atlamayo.

<sup>26</sup> Epapedeme oplami haletapo wua: watile atlemama ‘Kelisoeye dalupa dulu dla halema,’ dlati natila tamiyo. Epame ma ya:tapo ‘Kelisoeye aya dulu dla halema,’ dlati mikadepe demiyo. <sup>27</sup> Adipalati, omaplatapo hela:hela:demama ta:lamo pato hela:demdiye, epapele some wua:tapo Opa Yamita pulati natilipe. <sup>28</sup> Mo hadima hutale ellepiye, kepilitapo hutale e dlowedeme tame edla topulumdepo.”

*Opa Yamita puluwe koko*

*(Maka 13:24-37; Luk 21:25-36, 17:26-36)*

<sup>29</sup> “Epame wotiyalle alila ita tame gudlati pakasiyamalalo ‘salita sumtlepe.

Epalati mamata ma hela:dle pohamilowa.

Epo tamili mape omapla di dla popa:ye ta:la dla teteyulupe.

Epame itiyamale alisisi omapla di dla ha:ha:tapo hohoulalumama itiyamale pa:lepe.’

<sup>30</sup> Oloma edla Opa Yamita puluwe kokoye omapla di dla imale koko hamilati opata natilipe. Epalati opa hapulomatapo koko e natipame dupa kolle mate sikemte a:lemyelepe. Epapele oloma edla opatapo Opa Yamiye wuala dulu tle hela:dle mate epo itiyamale pato mate pulati natilipe. <sup>31</sup> Epame ya:ta pumama ya: banakaka soye hulu yu mate taiya dlepe, Godta sesa:le so opa hapuloma ta:lamo pato dla ha:ha:mtaye elemtelepo depame.

<sup>32</sup> Epedeme wua: ipili dali tle koko i malamaiya. Wua: ipili tokiyeta matlati nati-pame sali silaplowe alilata mo-kotiyama depo malamdepo. <sup>33</sup> Epedeme koko i ma epapena. Wua: na:ta atlama koko ita wowoyamalati natipame Opa Yamita puluweye mo-mateka:pi mle dlepe. <sup>34</sup> Na: ikadepe kokoye wua: watile atlema. Wata oloma hema ha:ha: soye ala me-ha:ha:lali koko hapuloma ita wowoyamelepe. <sup>35</sup> Epedeme pepele di mate epo ta:lamo mate pa:lepe. Amasiyama na: yu tlo popa:lowa.

<sup>36</sup> Epedeme Opa Yamita puluwe alilaye oplami haleta poya:malamana. Epame God ya: banakaka so Pepele di dla ha:ha: mate epo God Yami mate yia: ma poyia:malamana. Amasiyama hatlo God tlo alila eye ya:malamana. <sup>37</sup> Epedeme Nowata haluwa oloma edla koko wowoyamuwaye, epammama ma Opa Yamita puluwe oloma dla mepo woyamelepe. <sup>38</sup> Adipalati, Nowata halale oloma edla yúta ala populalo hallati opatapo daya mate epo yú mate dlomha:ha:mama opa mate wola: mate halomha:ha:mdiyo. Epamha:ha:le oloma edla alila haleta Nowatapo koa dulu dla tuwaiyo. <sup>39</sup> Nowata koa dulu dla tulati opa hapulomatapo koko woyamoloweye ala yeitapo ha:ha:lali yúta puame poyuiyo. Epammama Opa Yamita puluwe alila dla opa hapulomata dinapopo ha:ha:lali populuwa. <sup>40</sup> Amasiyama alila oloma edla opa dapiyamtetapo osalo dulu dla oko hamsiyamalati hale tlo hamame hetamama hale tlo medla pomellepe. <sup>41</sup> Epame oloma edla wola: dapiyamtetapo daya yulumha:ha:lali hale tlo hamame hetamama hale tlo medla pomellepe.

<sup>42</sup> Epedeme wua: woloma dinapopo omha:ha:iya. Adipalati, powua:malamana Lodta puluwe alilaye. <sup>43</sup> Amasiyama wua: koko iye woloma malamaiya. Oplamitapo uhalalo oplamita ya: aya dla puluwe alilaye dallepiye, ya: ma-dinapo polo-mama ompollepe. Epame uhalalo oplamita mo-pulati natipame ya:ye dodolomelepe. <sup>44</sup> Epapedeme wua: mape ma-dinapopame dalemha:ha:mama omha:ha:iya. Adipalati, wua: powua:malamana, Opa Yamita puluwe alilaye.”

*Okoko ka:depo halalo oplami mate epo okoko batalipo halalo oplami mate*  
*(Luk 12:41-48)*

<sup>45</sup> “Koko dla salladepo sela:mama oko ka:depo hamhallalo oplami anata:? Dokopala oplamitapo epapele oplami dla itiyamale hamilipe, ya:tapo ya: oko so hapuloma omhalemama ma yia: dla daya alemhallepo depame. <sup>46</sup> Adipalati, dokopala oplamitapo haka:ma dla tame halepo puame natilati ya: oko oplamita woloma ya: okoye ka:depo hamhalale natipame ya: dla siyele hamilipe. <sup>47</sup> Epapedeme na: wua: dla mikadepe koko atlema. Dokopala oplamitapo ya: oko oplamita woloma okoye ka:depo hamhalla natilipiye, ya:tapo ma ya: watle ya: alisisi hapulomaye omhalane dlepe.

<sup>48-49</sup> Amasiyama oko batalipo halalo oplamitapo ya: dokopala oplamita ala hapele populalo hallati natipame epo atellepe, ‘Na: dokopala oplami hapele popuasema,’ depame ya:mkadulo oko soye hopolemhalemama kawata yú dlalo so eleme daya mate yú mate dlomhalemdepo. <sup>50</sup> Ya: epamhalemama podinapolalo hallati ya: dokopala oplamita puame woyamelepe. <sup>51</sup> Epalati ya: dokopala oplamitapo puame ya:ye sikemte hopolepame alikili dla ka:stlepe, ya:tapo yiskamu pepemalalo so mate hallepo depame. Epalati ya:tapo edla tame halemama amale mate a:pe tetekelemhallepe.”

## 25

### *Ipilatalo 10 koko dla wayu atlale*

<sup>1</sup> “Alila oloma edla Pepele dimo kokota puluweye ipapena. Ipilatalo 10tapo yia: tuloma halopo a:ya hala pua oplami dla ompopa:la taiyo. <sup>2</sup> Epapeleye yia: dulu dla wola: 5 opiye sikemte sasalalimale soyo. Asiyama wola: 5 opi tlo sikemte hutulli soyo. <sup>3</sup> Epapele dulu dla sasalle so wola: yia: tamalemama tuloma yú pasto tilipo tamalaiyo. <sup>4</sup> Amasiyama hutulli so tlo tuloma yú pato tilipo tamalaiyo. <sup>5</sup> Yia: tame ompopa:lati a:ya halowedeme pua oplamiye yipta popuaiyo. Epalati yia:ta hapulomata inoma teta:mama mo-hutiyeiyo.

<sup>6</sup> Epame mo-utula:la dukuslopi dla oplami haletapo yu teta:le mate epo atlaiyo, ‘A:ya hala pulalo oplamiye mo-mateka:pi dla pumhalemo. Epedeme wua: tame ya:ye umaiya,’ diyo.

<sup>7</sup> Epalati ipilatalo hapulomata yimkata sillipame yia: tuloma o-ota:timaiyo.

<sup>8</sup> Amasiyama sasalle sotapo hutulli so wola: watle epo atlaiyo, ‘Di tuloma yúye mopokadla yakoma. Wua: di tuloma yú hapiya,’ diyo.

<sup>9</sup> Epalati asiyama hutulli so wola:tapo yia: watle epo atlaiyo, ‘Hao. Dita di tuloma yúye wua: tuloma dla sisimamelepiye, dia: mate po-ala:lowa. Epapedeme wua: tame alisisi aya dla tuloma yú amko tilimaiya,’ diyo.

<sup>10</sup> Amasiyama yia: ala tuloma yú tilimala tlati a:ya hala pulalo oplamita mo-puame woyamaiyo. Epalati hutulli so wola: ya: ompopa:letapo ya: mate daya dlowedeme aya dulu dla me-hetaiyo. Yia: aya dulu edla me-hetame popa:lati kokolomaye mo-godiyo.

<sup>11</sup> Amasiyama sasalle sotapo ma-alotle puame kokoloma dla heyulumama epo atlaiyo, ‘Kokoloma gowaladiya, di aya dulu dla tuluwama,’ demha:ha:iyo.

<sup>12</sup> Amasiyama a:ya hala pulalo oplamitapo asiyama yia: watle epo atlaiyo, ‘Hao. Wua: pomatiliwa. Adipalati, na: wua: kokoye ikadepe pona:malamana,’ diyo.

<sup>13</sup> Epedeme wua: woloma omha:ha:mama dalemha:ha:iya. Adipalati, Opa Yamita puluwe alilaye powua:malamana.”

### *Oko so dapahatlope koko dla wayu atlale*

#### *(Luk 19:11-27)*

<sup>14</sup> “Epame Pepele dimo koko ma ipapele some hallepe. Dokopala oplamitapo mo pateka:mu dla tlowedeme ya: oko so sisilamaiyo. Epame yia: watle ya: alisisi woloma omha:ha:iye diyo. <sup>15</sup> Epammama ya:ta ya: oko so dla mani halopimama yia:ta momalale mate ala:le maniyeye halopiyo. Epammama ya:tapo sikemte malamale oplami watle 5,000 elo mani halopiyo. Epo ma oplami hale ya: ko tle hallalo watle 2,000 elo mani

halopiyo. Epame ma mosukulu alo dla hallalo oplami watle 1,000 elo mani halopiyo. Epame ya: ma mo pateka:mu dla halla taiyo. <sup>16</sup> Epapalati ya: oko so dulu dla 5,000 elo mani halomale oplamitapo mani e mate tame alisisi aya tipo halemama ma 5,000 elo mani opi halomaiyo. <sup>17</sup> Epalati 2,000 elo mani halomale oplami mape mepapiyo. Epammama ya:tapo 2,000 elo mani mate ma tame alisisi aya tipo halemama ma 2,000 elo mani opi halomaiyo. <sup>18</sup> Amasiyama 1,000 elo mani halomale oplamiye ya: mani e hapame tame koko hale pohalalo isikimi ta:la muwalepo dulu dla hamatiyo. Epapele koko tle ya: mani hale pohaiyo.

<sup>19</sup> Dokopala oplamitapo mo pateka:mu dla tame halepo depame ma ilame mo-puaiyo. Ya: puame ya:ta mani halopili soye sisilamaiyo, ya:ta yia: watle mani hapiliye ma adis-owa hutiyema: depo dallowedeme. <sup>20</sup> Epalati 5,000 elo mani halomale oplamitapo mani hampuame epo atlaiyo, ‘Dokopala oplami, wa:ta na: watle 5,000 elo mani halopiwaye ma wata mo-pasatamama 10,000 elo mani umpo elapo,’ diyo.

<sup>21</sup> Epalati dokopala oplamitapo asiyama ya: watle epo atlaiyo, ‘Wa: ka:depo oko halalo oplamipo. Wa:ta oko ka:pi halë natipo na: siyema. Epedeme wa:ta yimka:sikili koko woloma omhaluwa tle asiyama na:tapo wa: watle ma patoto kokoye omhalane dlowepo. Epedeme wa: na: mate matime daya dele dla polomama siyele mate polane,’ diyo.

<sup>22</sup> Epalati 2,000 elo mani halomale oplamitapo mani hampuame ya: dokopala oplami watle epo atlaiyo, ‘Dokopala oplami, wa:ta na: watle 2,000 elo mani halopiwaye ma wata mo-pasatamama 4,000 elo mani umpo elapo,’ diyo.

<sup>23</sup> Epalati dokopala oplamitapo asiyama ya: watle epo atlaiyo, ‘Wa: ka:depo oko halalo oplamipo. Wa:ta oko ka:pi halë natipo na: siyema. Epedeme wa:ta yimka:sikili koko woloma omhaluwa tle asiyama na:tapo wa: watle ma patoto kokoye omhalane dlowepo. Epedeme wa: na: mate matime daya dele dla polomama siyele mate polane,’ diyo.

<sup>24</sup> Epalati ma 1,000 elo mani halomale oplamitapo puame ya: dokopala oplami watle epo atlaiyo, ‘Dokopala oplami, na:malamana, wa:ye sikemte itiyamale oplami. Epame wa: opa opita emale alisisiye wa:ta isikimi me-hauwalemdepo. <sup>25</sup> Epedeme na: wota:mama wa: mani mate koko hale pohalalo isikimi tame ta:la muwalepo dulu dla hamatiwa. Epedeme wa:ta na: watle mani hamiwa mesowata ela ipo,’ diyo.

<sup>26</sup> Epalati ya: dokopala oplamitapo asiyama ya: watle epo atlaiyo, ‘Wa: sikemte batalipo omhallalo oko oplamipo. Wa:ta malamaleta na:ye ya:mkale alisisi emaleye isikimi me-hauwalemde dlepo. <sup>27</sup> Amasiyama wa: adipalati na: manita ta:lepo depame hamtame mani omha:ha:lalo so aya dla pohimilalo wekuwa? Wa:ta na: maniye edla tame himimatiye, eta na:ta ilame puale oloma dla manita mo-pato depo ellati halemla,’ diyo.

<sup>28</sup> Epedeme dokopala oplamitapo ya: opa dla epo atlaiyo, ‘Wua: ya: watle 1,000 elo mani hutiyeye e halopame ma 10,000 elo mani halomalalo oplami watle halopiya.

<sup>29</sup> Adipalati, opa anawolotapo yia: dla hapili alisisiye woloma ka:depo omha:ha:lepiye, asiyama yia: dla ma pasataleye hapilipe. Amasiyama opa anawolota yia: dla hapili alisisiye batalipo omha:ha:lepiye, yia: dla hutiyeye alisisi hapuloma kokolahalepe.

<sup>30</sup> Epedeme batalipo omhallalo oko oplamiye alikili amtuwale dulu dla hamastaiya. Ya: edla halemama amale mate a:pe tetekelemhallepe.’ ”

### *Mosukulu alila dla koko gladle*

<sup>31</sup> “Opa Yamitapo ya:ta itiyamale mate epo banakaka so hapuloma mate pulupiye, oloma edla ya:ta hela:dle pato mate puame ya:ta pollalo mo dla pollope. <sup>32</sup> Epalati ta:lamo meyelo meyelope dle so hapulomaye banakaka sotapo elempuame ya: mila:pi dla ipila:lepe. Epalati ya:tapo aliya omhallalo oplamitapo ya: aliya duka hukulumama sipi aliya ma meyelo ipila: epame gaut aliya ma meyelo ipila: demdiye, epammama ya:tapo ta:la so hapulomaye duka hukulupame alumale dapiyamte dla



ipila:lepe. <sup>33</sup> Epammama ya:tapo opa alumale haleye ya: dowala tiyama dla ipila:pame ma alumale haleye ya: weke tiyama dla ipila:lepe.

<sup>34</sup> Ya: epame ya: dowala tiyama dla ha:ha: so watle epo atellepe, ‘Na: ata sesa:le so opa wua: puaiya, Godta ta:lamo kotiyamale dla wua: yilo dinapopo himili moye halowedeme. <sup>35</sup> Adipalati, na:ta daya ta:mpollati wua:tapo daya hapimduwapo. Epo na:ta yú ta:mpollati wua:tapo yú imduwapo. Epame na: asepe oplami some pulati wua:tapo na:ye wua: aya dla seme hetamduwapo. <sup>36</sup> Epame na: tluka alisisi pa:le pollati wua:tapo na:ye tluka didiyemelemduwapo. Epame na:ta esiyemellati wua:tapo na:ye woloma gademduwapo. Epame na: amtuwale aya dulu dla pollati wua:tapo na:ye puame natimduwapo,’ dlepe.

<sup>37</sup> Epalati asiyama ya: dowala tiyama dla ipila:le ka:ka:dle so opatapo epo atellepe, ‘Lod, di adipalalo wa:ta daya ta:msela:lali natipo daya imduwa? Epame di adipalalo wa:ta yú ta:mpollati natipo yú imduwa? <sup>38</sup> Epame di adipalalo wa:ta asepe oplami some pula natipame di aya dla seme hetamduwa? Epame di adipalalo wa:ta tluka alisisi pa:le sela:lali tluka alisisi didiyemelemduwa? <sup>39</sup> Epame di adipalalo wa:ta esiyemellati wa:ye woloma gademduwa? Epame di adipalalo wa:ta amtuwale aya dulu dla pollati wa: natila tamduwa?’ demyelepe.

<sup>40</sup> Epalati dokopala oplamitapo asiyama epo atellepe, ‘Na: ikadepe kokoye wua: dla atlema. Wua:ta opa opi gagademduwaye na: dla ammduwapo,’ dlepe.

<sup>41</sup> Epame dokopala oplamita ma ya: weke tiyama dla ha:ha: so dla epo atellepe, ‘Wua: na: tle alikili a:ma taiya. Adipalati, wua:ye Godta kasilamale dulu dla ha:ha:lalo sopo. Epedeme wua:ye Godta Saiten mate epo ya: banakaka so mate dla posumtlalo wekele dlapa dinapopo himili dla taiya. <sup>42</sup> Adipalati, na: daya ta:mpollati wua:tapo na:ye daya po-imdena. Epame yú ta:mpollati yú po-imdena. <sup>43</sup> Epame na:ta asepe oplami some pulati na:ye poseme hetamdena. Epame na:ta tluka pa:le pollati wua:tapo na:ye tluka podidiyemelemdena. Epame na:ta esiyemellati wua:tapo na:ye woloma pogademdena. Epame na:ta amtuwale aya dulu dla pollati wua:tapo puame na: ponatimdena,’ dlepe.

<sup>44</sup> Epalati asiyama yia:ta epo atellepe, ‘Lod, di adipalalo wa:ta daya ta:le mate yú ta:le mate polla natiwa? Epame di adipalalo wa:ta asepe oplami some pulati natiwa? Epame di adipalalo wa:ta tluka pa:le pollati natiwa? Epame di adipalalo wa:ta esiyemellati natiwa? Epo di adipalalo wa:ta amtuwale aya dulu dla pollati natiwa?’ demyelepe.

<sup>45</sup> Epalati dokopala oplamitapo asiyama epo atellepe, ‘Na:ta wua: watle ikadepe koko atlema. Wua:ta opa opi gadla allimduwaye na: dla ammduwapo,’ dlepe.

<sup>46</sup> Epedeme opa iwoloye kokó elepo ellalo wotiyalle dla tame ha:ha:lepe. Amasiyama Godta ka:dena dle sotapo kokó elepo ellalo pasakalo dla ulatulupe.”

## 26

### *Yesu yumuluwedeme yu himili*

*(Maka 14:1-2; Luk 22:1-2; Yon 11:45-53)*

<sup>1</sup> Yesuta koko hapuloma iye atlepo gudepame matle ya: alotle tlalo so watle epo atlaiyo, <sup>2</sup> “Wua: mo-wua:malamana, Godta Namilatale daya dele kotiyamoloweye alila dapiyamte ma a:ma hutiyepo. Epame alila oloma edla Opa Yamiye dali yekelehmihili di dla gogodlepo depame opahale so dla homellepe,” diyo.

<sup>3</sup> Epame oloma edla Yu so dokopala so mate epame aiyalma aya dokopala so mateta yia: dokopala oplami Kayapas aya dla alupame esemaiyo. <sup>4</sup> Yia:ta esemale dulu dla isikimi mala-atlale koko tle Yesuye hampame yumuluwa depo yu himiyo. <sup>5</sup> Epammama yia:ta epo atlaiyo, “Di daya dele alila dla ya:ye poyumulowa. Adipalati, opata siyaladle ta:dlala,” diyo.

*Betani mo dla a:yata dakopala ullu ka:dle mate Yesu dokopala dla simale*

*(Maka 14:3-9; Yon 12:1-8)*

<sup>6</sup> Yesu Betani mo dla Saimon kapala batalimale oplami aya dla taiyo. <sup>7</sup> Ya: edla halemama daya dempollati a:ya hale isilako dla dakopala ullu ka:dle tipo hampuaiyo. Ya: dakopala hampuame Yesu dokopala di dla simaiyo. Amasiyama dakopala iye mani pta patota halë alisisipo.

<sup>8</sup> Epalati Yesu ya: alotle tlalo sota koko i natipame sikemte allimama epo atlaiyo, “A:ya i adipalati dakopala ullu ka:dleye koko pa:le dla simama me-pokadi?” <sup>9</sup> Ya: ka:dena, dakopala ullu ka:dleye opa watle hamipame asiyama mani pato hapo, alisisi pa:talo so gadloweye,” diyo.

<sup>10</sup> Amasiyama Yesuta yia:ta alli kokoye natipame yia: watle epo atlaiyo, “A:ya ita halë koko natipame ya: dla batalipo atlemiya. Adipalati, ya:tapo na: dla ka:dle koko halëpo. <sup>11</sup> Epedeme alisisi pa:talo sotapo alila hapuloma dulu dla wua: mate ha:ha:lepe. Amasiyama na: alila hapuloma dulu dla wua: mate pohallowa. <sup>12</sup> Ya:tapo na: motota wabasi dla ellowe malamama dakopalata na: dla simalepo. <sup>13</sup> Na: wua: watle mikadepe koko atlema. Opata ta:lamo hadima ka:dle yu atlamtelepiye, yia:tapo a:ya ita koko halë ma atlamtelepe. Epalati opata ya: koko ma malamelepe.”

*Yudasta Yesu hamame iliwe yu ka:dle*

*(Maka 14:10-11; Luk 22:3-6)*

<sup>14</sup> Epame Yesu ya: alotle tlalo so 12 dulu dla hallalo hale Yudas Iskaliyotta aiyalma aya dokopala so watle tame epo atlaiyo, <sup>15</sup> “Na:ta Yesu wua: watle hamame ilipiye, wua: asiyama apa alisiye na: watle hamipa:?” diyo. Epalati asiyama yia:tapo 30 elo maniye ya: watle halopiyo. <sup>16</sup> Epalati oloma etle tamama Yudastapo Yesuye yia: do dla hamame iliwe api totamaiyo.

*Yesuta ya: alotle tlalo so mate Godta Namilatale daya dele*

*(Maka 14:12-21; Luk 22:7-13, 21-23; Yon 13:21-30)*

<sup>17</sup> Isip mo tle alikili dla woyamale malamale daya dele kotiyamale alila dla Yesu ya: alotle tlalo sota tame Yesu watle epo atlaiyo, “Di hadima tame Namilatale daya dloweye dinapopa:?” diyo.

<sup>18</sup> Epalati Yesuta asiyama epo atlaiyo, “Wua: Yelusalem dla tame oplami hale natipo ipo atellepe, ‘Imalalo oplamita epo atla, Ya:ta sale alilata mo-puwo. Epedeme ya:ta ya: alotle tlalo so eleme wa: aya dla Namilatale daya dele dloweyo,’ dlepe.” <sup>19</sup> Yesuta epo atla dalepame ya: alotle tlalo sotapo yu e dolumama tame Namilatale daya dinapiyo.

<sup>20</sup> Epame Yesutapo tamila:la oloma edla ya: alotle tlalo so eleme daya dlowedeme polaiyo. <sup>21</sup> Yia: edla daya dempopa:mama Yesuta epo atlaiyo, “Na: ikadepe koko wua: watle atlema. Wua: dulu dla oplami haletapo na:ye opahale do tama dla homellepe,” diyo.

<sup>22</sup> Yesu ya: alotle tlalo sota yu i dalepame dupa kolle mate popa:mama Yesu watle epo atlamyaiyo, “Lod, na:ta: na:ta:?” demyaiyo.

<sup>23</sup> Yesu asiyama yia: watle epo atlaiyo, “Oplami antapo na: mate palita hatlope dla daya saodepo delepiye, oplami eye na: opahale do tama dla hamame iliwe epo.

<sup>24</sup> Amasiyama God yu bukata atla e dolumama Opa Yamitapo polope. Amasiyama Opa Yami opahale do tama dla homallalo oplamiye wolomape. Ya: wotiyalle dulu dla tullupe. Epapalala depame ya: waita ya:ye pohamalalo wekematiye, eta ya: ka:dlemla.”

<sup>25</sup> Epalati Yesu opahale do tama dla homallalo oplami Yudasta epo atlaiyo, “Imalalo oplami, na:ta:?” diyo. Epalati Yesuta asiyama ya: watle epo atlaiyo, “Yao, mowolo ma-atlapo,” diyo.

*Lod malamale daya dele*

*(Maka 14:22-26; Luk 22:19-20; 1Kol 11:23-25)*

<sup>26</sup> Yia: daya dempopa:lati Yesuta daya hapame God dla siyele yu atlepame hauwokoko-maiyo. Epame ya: alotle tlalo so watle alemama epo atlaiyo, “Daya halopo deiya. Iye na: motopo,” diyo.

<sup>27</sup> Epame Yesu matle isilako hapame God dla siyele yu atlepo gudepame ya: alotle tlalo so watle hamimama epo atlaiyo, “Wua:ta hapuloma yú i deiya. <sup>28</sup> Iye na: omalipo, opa hapuloma yia: bobtalimale howahalowe yilo dla olostapo. Na: omalitapo Godta opa mate yu itiyapo himili amkoye kokalepo. <sup>29</sup> Epedeme na: ikadepe koko wua: watle atlema. Na: wata oloma itle tamama wain yú matle podlowa. Amasiyama na:tapo alotle wua: mate wain yú amkoye na: A mo dla dlowepo.”

<sup>30</sup> Epame yia:tapo siyele sala sepo gudepo ma Olipi tamali dla taiyo.

*Yesuta Pitata ya: welilowe kokoye atlale  
(Maka 14:27-31; Luk 22:31-34; Yon 13:36-38)*

<sup>31</sup> Yesuta matle ya: alotle tlalo so watle epo atlaiyo, “Wua:ta hapulomata wata utula:la na: saliyome potlepe. Adipalati, God yu bukata epo atlapo, ‘Godtapo sipi omhallalo oplamiye yumulati sipi hapulomata ya: tle potlepe.’ ”

<sup>32</sup> Epame Yesu ma epo atlaiyo, “Amasiyama na: powale tle sila:tipame na: tatile tame Ga:lili dla wua: omhallowepo.”

<sup>33</sup> Epalati Pitata asiyama Yesu watle epo atlaiyo, “Opa hapulomatapo wa: saliyome potlepiye, asiyama na: tlo wa: posaliyome tlowa,” diyo.

<sup>34</sup> Amasiyama Yesuta ya: watle epo atlaiyo, “Na: wa: watle ikadepe koko atlema. Wata utula:la gagapo ala poyulumalalo hallati wa:tapo na: kokoye dapahatlope oloma dla wellipe,” diyo.

<sup>35</sup> Amasiyama Pitata ya: watle epo atlaiyo, “Na: pe-epapolowa. Opata wa:ye yumama yumilipiye, na: mate polowepo,” diyo. Epalati ya: alotle tlalo so hapulomata ma yu hatlo mepo atlamyaiyo.

*Yesuta Getsemani osalo dla God dla inoma sumhalale  
(Maka 14:32-42; Luk 22:39-46)*

<sup>36</sup> Yesuta Getsemani osalo dla ya: alotle tlalo so mate tame halemama yia: watle epo atlaiyo, “Wua: midla popai:ye. Na: huma tame inoma sumolowama,” diyo. <sup>37</sup> Ya: epo halemama isikimi Pita mate epo Sebedi ya: akimlala dapiyamte mate tlo eleme hetaiyo. Ya: hetame hallati dupa kolle mate opasi upiyele mateta ya: dla puaiyo. <sup>38</sup> Epalati ya:ta yia: watle epo atlaiyo, “Na: opasi duluye upiyele patota hetamama polowe mateka:pi dla puma. Epedeme wua: hema ha:ha:mama omha:ha:iye,” diyo.

<sup>39</sup> Yesu epo atlepame yia: tle alikili a:ma tame alumata kellepo ta:la dla heodepo polomama inoma sumpolaiyo. Ya: inoma sumama epo atlaiyo, “A, wa: solotamelepiye, na: dla wotiyalle pua iye alikili a:ma hamastane. Amasiyama mowolo solotamale koko tlo hane, pona:ta solotamale koko,” diyo.

<sup>40</sup> Epame ya: inoma sumhalepo tame natilati ya: alotle tlalo so dapahatlopeta mohutiyelati natiyo. Epalati natipame Pita watle epo atlaiyo, “Saimon, wua: adipalati hutiyema:? Wua: poka:deta:, alila yimka:mala dla na: mate inoma sumha:ha:loweye?

<sup>41</sup> Wua: omha:ha:mama inoma sumha:ha:iya, wua:tapo elemala natili dla tullala depame. Adipalati, soko wua: dulu dla halatapo solotamapo, itiyamolowedeme. Amasiyama wua: motota hohopeyamapo,” diyo.

<sup>42</sup> Ya: matle tame ipo inoma sumaiyo, “A, na:ta wotiyalle halowe koko hema api hatlo ita ellepiye, na: wotiyalle me-halowepo. Adipalati, na:tapo wa:ta solotamale koko tlo halowepo.”

<sup>43</sup> Yesu ma tame inoma sumhalepo depo puame natilati ya: alotle tlalo so dapahatlopetata inoma teta:mama mo-hutiyela natiyo. <sup>44</sup> Epalati Yesu matle ilame tame dapahatlopete oloma dla inoma sumale yu hatlo metlo atlamaiyo.

<sup>45</sup> Ya: matle ilame puame ya: alotle tlalo so dla epo atlaiyo, “Wua: ala me-sikemte hutiyepa? Adipalati, Opa Yamiye batalimale so dla hamame iliwe alilata mo-puapo.

<sup>46</sup> Epedeme huma natiya, na: batalimale so watle hamame iliwe oplamiye mo-puapo. Epedeme silliya, medla tlowa.”

*Opata Yesu yumuluwedeme hamame tale  
(Maka 14:43-50; Luk 22:47-53; Yon 18:3-12)*

<sup>47</sup> Yesu ala me-yukamhallati ya: alotle tlalo so oplami hale Yudastapo Yesu hamolowe so opa elempuame edla woyamaiyo. Epapeleye Yesu hamolowe so opa iwoloye aiyalma aya dokopala so mate epo Yu so dokopala so mateta taiya diyo. Epalati yia:ta pumama aipa:ya mate epo bulukupi mate halopo puaiyo. <sup>48</sup> Epapele dulu dla Yudasta ala puluwedeme halemama Yesu hamolowe so watle epo atlaiyo, “Na:ta tame oplami hullupiye, oplami epo. Wua: epalati ya:ye woloma hamame taiye,” diyo. <sup>49</sup> Epedeme Yudas opa me-eleme puame halemama Yesu hala dla tame epo atlaiyo, “Namkale, imalalo oplami,” depame ya:ye huliyo.

<sup>50</sup> Epalati Yesuta ya: watle epo atlaiyo, “Namkale, wa:ta hala puale kokoye hane,” diyo. Epalati opata puame Yesu ma-hamaiyo. <sup>51</sup> Amasiyama ya: alotle tlalo so oplami haleta aipa:ya hame aiyalma aya dokopala oplami ya: oko oplami haleye heyumama molo ketamastaiyo.

<sup>52</sup> Epalati Yesuta ya: watle epo atlaiyo, “Wa: aipa:ya alikili dla himine. Adipalati, yimkadulo potimolowedeme aipa:ya halopo siyamalalo soye yia: ma aipa:ya tama dla pallipe. <sup>53</sup> Epedeme wa: powa:malamata:, na:ta gadle yilo na: A dla atlepiye, ya:tapo na: gadlepo depame ya: banakaka so hapulomaye tuluiya dlepe. <sup>54</sup> Amasiyama na:ta epelepiye, God yu buka dla na:ta wotiyalle hapo polowe koko dla atlaleye adipo ala:pa?” diyo.

<sup>55</sup> Epame Yesuta ya: hamala puale so opa watle epo atlaiyo, “Wua: na: uhalalo oplamita hallati natipame na:ye hamolowedeme aipa:ya mate epo bulukupi mate halopo pumulo? Amasiyama wua: na:ye alila hapuloma aiyalma aya dulu dla imselala natimduwapo. Ame wua: adipalati na:ta edla hallati pohamalalo wekemduwa? <sup>56</sup> Epele tlope wata wua:ta na: hamala puale kokotapo God tle yu hapame molo atlamalalo sota atlamale yu mate ma-ala:po.” Epalati oloma edla Yesu ya: alotle tlalo so hapulomata ya: saliyome mo-potaiyo.

*Opata Yesuye dokopala so dla hamamtale  
(Maka 14:53-65; Luk 22:54-55, 63-71; Yon 18:13-14, 19-24)*

<sup>57</sup> Opata Yesu hamame aiyalma aya dokopala oplami Kayapas aya dla seme hetaiyo. Amasiyama aya dulu edla aiyalma imalalo so mate epo Yu so dokopala so mate yia: tatile ma-alupo popa:iyo. <sup>58</sup> Epalati Pitata alo ikadepe tle Yesu dolumtame aiyalma aya dokopala oplami aya alikili dla halaiyo. Ya: edla aiyalma aya dokopala oplami ya: oko so mate polomama Yesu dla apa koko halowe depo ompolaiyo.

<sup>59</sup> Epalati aiyalma aya dokopala so mate epo Yu so dokopala so mate Yesu yumuluwedeme ya: batalimale totamaiyo. <sup>60</sup> Epammama opata isikimi Yesu hi mate mala-atlamyemama koko meyelope meyelope dle atlamyaiyo. Amasiyama yia:ta koko meyelope meyelope dle atlamyale dulu dla ikadepe koko hale ponatiyo, yia:tapo Yesu yumuluweye.

<sup>61</sup> Epalati opa dapiyamteta ma alotle puame epo atlaiyo, “Di Yesuta epo atla daluwa, ‘Na: dla itiyamale elapo, aiyalma aya iye dokostapame ma alila dapahatlopete dulu dla amko halowe,’ duwa.”

<sup>62</sup> Epalati aiyalma aya dokopala oplamita sila:time Yesu watle epo atlaiyo, “Wa: opata wa: koko dla yu meyelo pe meyelo pe dle atlamya dla asiyama yu po-atlalo wekepa:?” diyo. <sup>63</sup> Amasiyama Yesu yu hale po-atlaiyo. Epalati aiyalma aya dokopala oplamita matle ya: watle epo atlaiyo, “Na: God hi tle wa: dla atlema, wa: di atlane, wa: ikadepe God Yami Kelisota:?” diyo.

<sup>64</sup> Yesu asiyama epo atlaiyo, “Yao, mowolo ma-atlapo. Epame na: wua: dla ma-atlema. Wua: Opa Yamiye God dowala tiyama dla polla natilipe. Epame ya: tapo pepele di tle wuala dulu dla malla natilipe.”

<sup>65</sup> Aiyalma aya dokopala oplamita yu i dalepame sikemte alimama ya: tluka tallatal-lademama epo atlaiyo, “Oplami iye God hi mate putlopo atlema. Epedeme di ya: koko gladlowe dla ma yu opi dlallowe posolotamasema. Adipalati, wua: ma-dallepo ya: ta God hi mate putlopo atlaleye. <sup>66</sup> Epedeme wua: apa koko ya: dla halowe solotama:?” diyo.

Epalati asiyama Yu so dokopala sota epo atlaiyo, “Ya: polowe ka:dena,” diyo.

<sup>67</sup> Epame yia: tapo ya: dla mitikape tilitipame tetlemyaiyo. Epame ya: mila: pi dla heyulumyemama ya: watle epo atlamyaiyo, <sup>68</sup> “Keliso, anta wa: ye heyu?” demyaiyo.

### *Pitata Yesu welli*

*(Maka 14:66-72; Luk 22:56-62; Yon 18:15-18, 25-27)*

<sup>69</sup> Pita ala aya alikili dla me-pollati aiyalma aya dokopala oplami ya: oko a: ya haleta puame ya: watle epo atlaiyo, “Wa: mape Yesu Ga: lili oplami mate sela: uwa oplami halepo,” diyo.

<sup>70</sup> Epalati Pitata opa hapuloma mila: pi tle epo atlaiyo, “Na: wa: ta atla kokoye pona: malamana,” diyo.

<sup>71</sup> Ya: epame aya kosukulli kokoloma tala dla hallati oko a: ya haletapo ya: nati-pame opa edla ha: ha: le so dla epo atlaiyo, “Oplami i mape Yesu Nasalet oplami mate sela: uwapo,” diyo.

<sup>72</sup> Epalati Pitata matle yu itiyamale mate epo atlaiyo, “Na: ikadepe koko atlema. Na: oplami e ya: kokoye pona: malamana,” diyo.

<sup>73</sup> Alila yimka: mala popa: pame edla ha: ha: le so opata puame Pita watle epo atlaiyo, “Ikadepe, wa: ma Yesu mate sela: uwa oplami hale wa: po. Adipalati, wa: ta yukamatapo Ga: lili sota yuhalaloye epo yukamapo. Epedeme wa: ta yukamale kokota wa: kokoye botomastapo,” diyo.

<sup>74</sup> Epalati Pitata yu itiyamale mate God hi tle aiyalma semama yia: watle epo atlaiyo, “Na: pona: malamana, oplami eye,” diyo. Pitata epo atlepo hallati gagapota moyulumaiyo. <sup>75</sup> Epalati Pitata gagapota yulumalati dalepame Yesuta atlale yu malamaiyo. Adipalati, Yesuta ya: watle ipo atluwapo, “Wa: gagapota ala poyulumalalo hallati wa: tapo dapahatlope oloma dla na: kokoye wellipe,” duwapo. Epapedeme ya: yu e malapame alikili dla ulatame sikemte dupa kolle mate amaiyo.

## 27

### *Yudasta ya: skamu yumili*

<sup>1</sup> Utulalati ikadepe aiyalma aya dokopala so hapuloma mate epo Yu so dokopala so hapuloma mateta Yesu yumuluwe koko dla esempopa: mama yu mo-kokalepo himiyo.

<sup>2</sup> Epame yia: ta Yesu doye deata kokotipolliyepame gamani dokopala oplami Paelet hala dla semtaiyo.

<sup>3</sup> Yesu opahale do tama dla homallalo oplami Yudasta Yesuye ikadepe mo-yumuluwe dla halema dla dalepame sikemte dupa yumama wota: iyo. Epammama ya: ta 30 elo mani halomaleye matle aiyalma aya dokopala so mate epo Yu so dokopala so mate dla hamila taiyo. <sup>4</sup> Ya: tame yia: watle epo atlaiyo, “Na: batalimale koko hauwa. Adipalati, batalimale pa: le oplamiye na: tapo opahale so dla homeluwapo,” diyo. Amasiyama dokopala sota asiyama epo atlaiyo, “E podi koko. Wa: kokopo. Mowolo ka: dene,” diyo.



<sup>5</sup> Epalati dalepame Yudasta mani eye aiyalma aya medla kustapame ma ilame tame ya:skamu tumuku dla dea himomelepo yumiyo.

<sup>6</sup> Epalati aiyalma aya dokopala sota mani kikilamha:ha:mama epo atlamyaiyo, “Mani iye ma ilame aiyalma aya dla hamilowe poka:dena. Adipalati, mani iye omali olostlowe dla asiyama himiwapo,” demyaiyo. <sup>7</sup> Yia: epame mani e mate koko haloweye esepame isilako mimita:plalo oplami ya: ta:la haiyo, po-Yu sota palilati hatimha:ha:loweye. <sup>8</sup> Epapedeme opata ta:la e semama omali ta:la demdepo. <sup>9-10</sup> Epalati oloma edla koko etapo God tle yu hapame molo atlalo oplami Yelemayata atlale mate ma-ala:iyo. Adipalati, ya:ta epo atluwapo,

“Yia:tapo Isalael sota ya: moto asiyama dla sale 30 elo maniye halopame matle isilako mimita:plalo oplami ta:laye haiyo, Lodta na: watle atlale yu e dolumama.”

*Paeletta Yesu koko gladle*

*(Maka 15:2-15; Luk 23:3-5, 13-25; Yon 18:33-19:16)*

<sup>11</sup> Yesuye Loum gamani oplami Paelet hala dla seme hetlati asiyama gamani oplamita ya: watle epo atlaiyo, “Wa:ye ikadepe Yu so dokopala oplamita:?” diyo. Epalati Yesuta asiyama ya: watle epo atlaiyo, “Yao, wa:ta atla mepo,” diyo.

<sup>12</sup> Epalati aiyalma aya dokopala so mate epo Yu so dokopala so mateta Yesuye batalimale pasatale oplami depame ya: dla batalimale yu atlamyelati ya: asiyama yu hale po-atlaiyo. <sup>13</sup> Epalati Paeletta ya: watle epo atlaiyo, “Wa: opata wa: koko dla yu meyelope meyelope dle atlamyaye podallalo wekema:?” diyo. <sup>14</sup> Amasiyama Yesuta yu hale po-atlalo wekelati gamani oplamita koko e natipame sikemte momalamaiyo.

<sup>15</sup> Sokomoko hapuloma dulu dla Paeletta Yu sota sisiyelepo depame Godta Namilatatale daya dele oloma edla opata solotamale oplami haleye amtuwale aya dulu tle hamame alikili dla woyamdiyo. <sup>16</sup> Oloma edla batalimale pasatale oplami hale Balabasye amtuwale aya dulu dla halaiyo. <sup>17</sup> Epeleye opa hapulomata alupalati Paeletta yia: watle epo atlaiyo, “Na: oplami adi tlo amtuwale aya tle alikili dla hamame woyapa: Balabasta:, o Yesu, opata Keliso demdeta:?” diyo. <sup>18</sup> Epele dulu dla ya: mo-malanatiyo, Yu so dokopala sota Yesu dla sikemte elle himimama ya: watle hamame pualeye.

<sup>19</sup> Paelet ala koko gladlalo mo dla me-pollati ya:lluta ya: watle yu hamimama epo atlaiyo, “Wa: batalimale pa:le oplami edla koko hale hamiyo. Adipalati, na: wata utula:la milamalo ya: koko dla pta batalipo nati,” diyo.

<sup>20</sup> Amasiyama aiyalma aya dokopala so mate epo Yu so dokopala so mateta opa hapuloma watle ha:ha:limyemama epo atlamyaiyo, “Paelet watle atlemama ‘Yesu tlo yumama Balabas tlo alikili dla hamame woyamane,’ diya,” demyaiyo.

<sup>21</sup> Epalati Paeletta opa hapuloma dla epo atlaiyo, “Wua: oplami adi tlo na:ta amtuwale aya dulu tle alikili dla hamame woyamolowe solotama:?” diyo. Epalati opa hapulomata ya: yu ipi dla epo atlamyaiyo, “Balabas tlo alikili dla hamame woyamane,” demyaiyo.

<sup>22</sup> Epalati Paeletta epo atlaiyo, “Na:ta Balabasye amtuwale aya tle alikili dla hamame woyamelepiye, ame na: Yesu, opata Keliso demdiye, adipapopa:?” diyo.

Epalati asiyama opa hapulomata yu teta:le mate epo atlamyaiyo, “Ya:ye dali yekelehmihili di dla gogodiya,” demyaiyo.

<sup>23</sup> Asiyama Paeletta yia: watle epo atlaiyo, “Wua: ya:ta apa batalimale koko halë hallati natipo ya:ye yumuluwedeme amma:?” diyo. Amasiyama opa hapulomata sikemte yu sisikalle mate epo atlamyaiyo, “Ya:ye dali yekelehmihili di dla gogodiya,” demyaiyo.

<sup>24</sup> Epalati opata ya:ta solotamale koko pahalalo wekemama siyaladle ta:dla natipame ya:tapo yú tipo opa hapuloma mila:pi tle ya: do howahamama epo atlaiyo, “Wua:ta oplami i ya: omali olostlepiye, pona: mate, amasiyama wua: kokopo,” diyo.

<sup>25</sup> Epalati opa hapulomata epo atlaiyo, “Ya: omalita olostta asiyamaye dita di yimlala mate halowepo,” diyo.

<sup>26</sup> Epedeme Paelettapo Balabasye amtuwale aya tle alikili dla hamame woyamaiyo. Epame ya: opa watle “Yesuye tuwale dea mate hopolepame dali yekelemhimili di dla gogodiya,” diyo.

*Opahale sota Yesu tetlemyale  
(Maka 15:16-20; Yon 19:2-3)*

<sup>27</sup> Epalati opahale sota Yesuye tuwale dea mate hopolepo Paelet aya dukuslopi haliya-male dla hamame hetaiyo. Epame edla opahale so opi hapuloma sisilapo alumaiyo. <sup>28</sup> Yia: edla alupo Yesuye tetlowedeme ya: tluka uptipo ma patoto sota didiyelalo tluka omteka:ple selemalli didiyemeliyo. <sup>29</sup> Epame tuwale dea tipo ya: dokopala dla asiyomelepame ya: dowala do dla dali hamiyo. Epame Yesu dla tetlemyemama ya: dla heodepame epo atlamyaiyo, “Yu so dokopala oplami dla sisiyeiya,” demyaiyo. <sup>30</sup> Epame ya: dla mitikape tilitimyemama ya: dla dali hamiliye ma kolahapame ya: dokopala dla siyomyaiyo. <sup>31</sup> Epapopo gudepame opahale sotapo ya:ta tluka didiyepo halaleye uptipame ma ya: tluka ikadepe didiyemeliyo. Epame ya:ye seme dali yekelemhimili di dla gogodlowedeme taiyo.

*Yesu dali yekelemhimili di dla gogodle  
(Maka 15:21-32; Luk 23:26-43; Yon 19:17-27)*

<sup>32</sup> Opahale sota Yesu seme mo dulu tle alikili dla ulatame tamama Kulene oplami Saimon umaiyo. Ya: umpame Yesuta dali yekelemhimili hamtaleyeye ma ya: watle hamtane diyo. <sup>33</sup> Yia: epo tame Golgota mo dla woyamaiyo. Mo hi ya: dulu kokoye dokopala elo. <sup>34</sup> Yia: edla puame Yesu watle wain yúye etle yú mate dukupo hamiyo. Amasiyama Yesu yú iye isikimi yimka:mala dla natipame memeliyo. <sup>35</sup> Epame opahale sota Yesuye dali yekelemhimili di dla gogodepame Yesu tluka hukulluwedeme yia: dulu dla ewala mate tatipiyeye hale tatipiyeyiyo. <sup>36</sup> Yia: Yesu tluka hukulupo popa:mama ya: ompopa:iyo. <sup>37</sup> Epame oplami haleta yia:ta Yesu yumili sitali kokoye opata natilipo depame Yesu dokopala di dla ipo ilipo badiyo,

IYE YU SO DOKOPALA OPLAMI YESUPO

<sup>38</sup> Epame uhalalo so opa dapiyamte mape dali yekelemhatitimale di dla gogodlalmiyo, haleta ya: dowala tiyama dla epo haleta ya: weke tiyama dla diyo.

<sup>39</sup> Epalati opata api etle tetla:po tamhalemama Yesu natipo yia: dokopala popokalimyaiyo. Epame ya: watle batalipo tetlalimiyemama tepelemyaiyo. <sup>40</sup> Epamyemama ya: watle epo atlamyaiyo, “Wa:ta ipo atluwapo, ‘Na:ta aiyalma ayaye dokostapame ma alila dapahatlope dulu dla amko halepe,’ duwapo. Epapedeme wa: ikadepe God Yami dlepiye, wa: dali yekelemhimili di tle malame wa:skamu wa: gadene,” demyaiyo. <sup>41</sup> Epame aiyalma aya dokopala so mate epo aiyalma imalalo so mate epo Yu so dokopala so mate yia: mape Yesuye tepelemiyemama epo atlamyaiyo, <sup>42</sup> “Ya:ye opa opi tlo gagademsela:mduwapo, amasiyama ya: wata ya:skamu ya: pogadesema. Ya:ye ikadepe Keliso, di Isalael so dokopala oplami dlepiye, ya: dali yekelemhimili di tle mollowe ka:pi. Di eta ya:ta malla natipame ya: dla mikadepe dlowepo. <sup>43</sup> Ya:ye God dla mikadepe demduwapo. Epedeme Godta ya: dla siyemhalematiye, eta Godta wata ya: pasakalo gadlemla. Adipalati, ya:ye ya:skamu atlemama, ‘na: God Yami,’ demsela:mduwapo.”

<sup>44</sup> Epame uhalalo so opa dapiyamte Yesu mate dali yekelemhimili di dla gogodle so mape ya: watle putlopo atlamyaiyo.

*Yesuta powale koko  
(Maka 15:33-41; Luk 23:44-49; Yon 19:28-30)*

<sup>45</sup> Sali mo-dukuslopi dla hallati mo patota motiti tumama sali inoma dapahatlope pololiyo. <sup>46</sup> Epame motiti tuwaleta ma hawa hallati Yesuta yu teta:le mate epo sisilamaiyo, “*Ilai, Ilai, lama sabakatani.*” Yu i dulu kokoye ipapena, “Na: God, na: God, wa: adipalati na: melema:?”

<sup>47</sup> Epalati opa mateka:pi dla ha:ha:leta Yesuta semte Ilaya sisilamapo depame epo atlaiyo, “Wua: daliya. Ya:ye Ilaya sisilamapo,” diyo. <sup>48</sup> Epame oplami haleta dali selemalli ipi dla tluka polupo wain yú haka:le dla saodepame Yesu mati dla haiyeiyo, ya:tapo delepo depame. <sup>49</sup> Epalati opata epo atlaiyo, “Di ya:ye Ilayata puame hamame tulluwe depame aseka me-omha:ha:lowa,” diyo.

<sup>50</sup> Epame oloma edla Yesu yu sikemte di dla teta:pame powaiyo.

<sup>51</sup> Epalati Yesuta powale oloma edla aiyalma aya dulu dla tluka deiyamaleta komaleye di tle tallademtulume isili dla gudiyo. Epame allu patota tumama teita meyelo glaglade-myaiyo. <sup>52-53</sup> Epame wabasi mape gowalagowaladiyo. Epalati God ya: opa opi pallitapo sillipo yia: wabasi tle alikili dla wowoyapo siyamaiyo. Epame Yesuta popo sila:tili alotle yia: mape Yelusalem dla tame yiskamu yia:ye opa opi dla nalati-iyo.

<sup>54</sup> Epalati opahale so omhallalo oplami mate epo ya: mate Yesu omha:ha:le so mateta allutuwale mate epo koko opi edla wowoyamale mate tlapame sikemte wowota:mama epo atlamyaiyo, “Ikadepe, oplami iye God Yamipo,” demyaiyo.

<sup>55</sup> Epame wola: opi Yesu mate Ga:lili tle pumulale sota pateka:mu tle Yesu dali yekelehmihili di dla ellati omha:ha:iyo. Wola: iwoloye Yesu mate Ga:lili tle pumulumama ya: gadempumulaiyo. <sup>56</sup> Epapeleye wola: opiye iwolopo. Meli Magadalin, epo Yeims mate Yosep mate yia: wai Meli, epame Sebedi ya:llupo.

### *Yesu wabasi dla hamatili*

*(Maka 15:42-47; Luk 23:50-56; Yon 19:38-42)*

<sup>57</sup> Tamila:la oloma edla alisisi pasatale oplami hale Alimatiya mo tle puaiyo. Ya: hiye Yosep. Ya: mape Yesu dolumtlalo oplami hale halaiyo. <sup>58</sup> Epapeleye ya:tapo tame Paelet watle Yesu moto halowedeme daliyo. Epalati Paelettapo ya: opa watle atlemama “Yesu motoye Yosep watle hamiya,” diyo. <sup>59-60</sup> Epalati Yosepta Yesu motoye hapame tluka amko kamale mate polupame me-ya: wabasi tei seselemale dla muwalle dulu dla hamatiyo. Epame wabasi dulu dla tullalo kokolomaye ewala patota kokolum-malame himomeleme taiyo. <sup>61</sup> Epalati Meli Magadalin mate epo Meli hale mateta wabasi mateka:pi dla popa:mama ompopa:iyo.

### *Yesu wabasi alikili tle woloma omha:ha:le*

<sup>62-63</sup> Epo alallati Yu sota inoma sumalalo alila dla aiyalma aya dokopala so mate epo Pa:lisi so mateta Paelet hala dla tame ya: watle epo atlaiyo, “Isikimi mala-atlalo oplami Yesu itapo epo atlemduwapo, ‘Na:ye wabasi dulu dla alila dapiyamte elepame ma dapahatlope alila dla sila:tilowepo,’ demduwapo. <sup>64</sup> Epapedeme di solotama, wa: opata alila dapahatlope dulu dla wabasi alikili tle omha:ha:lepo depame. Adipalati, ya: alotle tlalo sota puame ya: moto uhamtapame ma isikimi mala-atlemama ya: motoye mo-sila:time hetana dlala depame. Epapelepiye, alotle mala-atlowe koko itapo ya:ta ka:yapa mala-atlale kokoye tla:mtelepe.”

<sup>65</sup> Epalati Paeletta epo atlaiyo, “Wua: na: opa opi elemtame wabasiye woloma ka:pi omha:ha:iya,” diyo. <sup>66</sup> Epalati yia:ta hapulomata tame wabasi dla ha:ha:mama wabasi dulu dla ulatulalo api ewalata himomelle dla ulu himiyo, oplami haleta hemele tumama ewala alikili dla gilidle hallati natilowedeme. Epo gudepame omha:ha:lalo so watle omha:ha:iya diyo.

### *Yesuta wabasi tle sila:tili*

*(Maka 16:1-10; Luk 24:1-12; Yon 20:1-10)*

<sup>1</sup> Yu sota inoma sumalalo alilata tame gudepo alallati Meli Magadalin mate epo Meli hale mateta wabasi natila tamalaiyo.

<sup>2</sup> Yia: ala wabasi dla tamha:ha:lali pakasiyamalalo allutuwale patota tulati Lod ya: banakakata pepele di tle malame ewalaye alikili dla kokolustame di dla polaiyo. <sup>3</sup> Ya: tapo tluka kamkamale didiyepo polomama sikemte hela:dle mate usiyepo polaiyo. <sup>4</sup> Epalati wabasi omha:ha:lalo so opatapo sikemte wowota:mama eseselalle mate powatatalepo palli some hutiyeyo.

<sup>5</sup> Amasiyama banakaka oplamita wola: dapiyamte watle epo atlaiyo, “Wua: ase sikemte wowota:miya. Na: malamana, wua: Yesu dali yekelemhimili di dla gogoduwaye e totamsiyamapo. <sup>6</sup> Ya: hema pe-elasma. Ya:ta meyelo atluwa yu e dolumama ya: masila:time hetana. Epedeme wua: puame ya: motota elale mo natiya. <sup>7</sup> Epame wua: ma hapele tame ya: alotle tlalo so watle ipo atlaiye, ‘Yesuye ma-sila:time hetana. Epame ya: tatile tame yia:ye Ga:lili dla ompolapo. Yia: edla tame ya:ye natilipe,’ diye. Iye na: yupo, wua: dla.”

<sup>8</sup> Epo atla dalepame wola:ta ma ilame hapele sisiyele mate tamalemama me-wowota:mtamalaiyo, ya: alotle tlalo so atlamolowedeme. <sup>9</sup> Epo wowota:mtamalati pakasiyamalalo Yesuta api duka dla yia: umpame epo atlaiyo, “Namkadulo,” diyo. Epalati wola: dapiyamte iwolotapo puame ya: hete sitali dla heodepo ya: hete dla hohopo popa:mama ya: dla siyele hamiyo. <sup>10</sup> Epalati Yesuta yia: watle epo atlaiyo, “Wua: ase sikemte wowota:miya. Wua: tame na: alotle tlalo soye atlaiye, yia: tapo tame Ga:lili dla na: natilipo,” diyo.

### *Wabasi omha:ha:laloye manita inoma bopudle*

<sup>11</sup> Wola: dapiyamte iwolota Yesu ya: alotle tlalo soye ala atla tamha:ha:lali wabasi omha:ha:lalo sota tame aiyalma aya dokopala so watle wabasi dla koko wowoyamale hapulomaye atlamaiyo. <sup>12</sup> Epela dalepame aiyalma aya dokopala sota Yu so dokopala so mate esemaiyo. Yia: esepame mani pato wabasi alikili tle omha:ha:lalo so watle hamimama epo atlaiyo, <sup>13</sup> “Wua: opa dla ipo atlaiye, ‘Di utula:la sikemte hutiyelati Yesu ya: alotle tlalo sota hemele puame Yesu motoye hamta’ diye. <sup>14</sup> Epame gamani oplami Paeletta koko i dalepo siyaladlepiye, ditapo ya:ta siyaladleye pustamama wua: koko ka:dlowepo,” diyo. <sup>15</sup> Epalati wabasi omha:ha:lalo sotapo mani hapame yia:ta haiya dle kokoye haiyo. Epapele koko tle mala-atlale koko eye Yu sotapo yia: dulu dla yu hamsiyamama ala me-hamsiyamapo.

### *Yesuta ya: alotle tlalo so watle taiya dle*

*(Maka 16:14-18; Luk 24:36-49; Yon 20:19-23; Taiya 1:6-8)*

<sup>16</sup> Yesu ya: alotle tlalo so 11ta Yesuta atlale yu dolumama Ga:lili dla tame tamali hale dla hetaiyo. <sup>17</sup> Yia: edla hetame Yesu natipame ya: dla siyele hamiyo. Amasiyama yia: dulu dla opitapo malamale tatlalimaiyo. <sup>18</sup> Epalati Yesuta yia: mateka:pi dla puame halemama epo atlaiyo, “Pepele dimo mate epo ta:lamo mate dla koko hapuloma omhallowe itiyamaleye na: watle ma-hamiwapo. <sup>19</sup> Epapedeme wua: opa hapuloma ta:lamo meyelo meyelo dle dla ha:ha:mta so dla tame yia:ta na: dla mikadepe dlepo depame ka:dle yuye atlamtaiya. Epammama yia:ye A hi tle epo Maseyemala hi tle epame Hela:dle Soko hi tle yú dla ka:ka:timtaiya. <sup>20</sup> Epame molo atlale yu na:ta wua:ta dolumha:ha:lepo depo hamiwaye ma yia: watle hamiya, ma yia:ta yu eye dolumha:ha:lepo depame. Amasiyama wua: malamaiya, wata oloma itle kotiyapame ta:lamo mosukulu dla telepiye, na: tapo alila hapuloma dulu dla wua: mate hallowepo.”

## **Ka:dle molo atlale yu Makata ilimale** **Maka** **Maka buka ya: dulu koko**

Makaye po-Yesu alotle tlalo oplami ikadepe. Amasiyama pona:malamana, ya: mape Yesuta koko hamsela:lali natilowedeme dolumsela:uwayo. Ya:tapo Polo mate Banabas mate gagademsela:mama ma alotle Pita gadlalo haluwapo. Makatapo yu iye po-Yu so watle ilipo hamiwapo, yia:tapo Yesu dla mikadepe dlepo depame. Ya:ta yu ilimale dulu hema koko patoye ipapena. Eye, Yesuta itiyamaletapo Saitenta itiyamaleye tla:mtame halapo. Adipalati, Yesutapo ta:lamo hema sela:mama esusulumale so ka:ka:demsela:mama ulugiyemale koko patoto halomsela:uwapo. Epame bataliya yimlala mape opa dulu tle alikili dla dodolomsalemsela:uwapo.

*Yonta Yesu api dinapele koko*

*(Mat 3:1-12; Luk 3:1-18; Yon 1:19-28)*

<sup>1</sup> Epedeme ka:dle molo atlale yu God yami Yesu Keliso kokoye ipo kotiyamaiyo.

<sup>2</sup> God tle yu hapame molo atlalo oplami Aisayata ya: buka dla ipo hatitimuwapo, “Na:ta na: yu hamsela:lalo oplamiye tane dlowepo.

Epalati ya: tatile tame wa: apiye dinapelepe.

<sup>3</sup> Ya:ye dalupa dulu dla ipo sisilamhalapo,

‘Lod apiye dinapiya.

Epame ya: apiye ka:depo dolepo himiya.’ ”

<sup>4</sup> Epedeme Yontapo dalupa dulu dla woyapame opaye yú dla ka:ka:timpuaiyo. Ya:ta epo atlamsela:iyo, “Wua: bobtalimale tle heheletipame yú dla tutula:iya. Epalati Godtapo wua: bobtalimaleye hiyotipo wellipe,” demsela:iyo.

<sup>5</sup> Epedeme Yudiya so opa hapuloma mate epo Yelusalem so opa hapuloma mate Yon yu dalla tamalaiyo. Yia: Yon yu dalepame yia: bobtalimale bobotimatimalati Yontapo yia:ye Yoden yú dla ka:ka:timaiyo.

<sup>6</sup> Yonye ka:mol aliya dlalota tluka dedlemale asiyamsela:mama alinepi kapalata akolo dla nosowe some asiyamsela:mdiyo. Epo ya: wolomopi mate epo topsiyo mate demsela:mdiyo. <sup>7</sup> Ya: opa dla ipo atlamsela:iyo, “Oplami hale na: ko tle pulupe. Ya:ta itiyamaleye pato, na:ta itiyamaleye tla:mtana. Na: poka:dena, ya: hete sitali dla heodepame ya: hete alisisi uptimoloweye. <sup>8</sup> Na:tapo wua:ye yú siyapo dla ka:ka:tima, amasiyama ya:tapo wua:ye itiyamale hamimama Hela:dle Soko dla ka:ka:timelepe.”

*Yesu yú tulli mate elemala natili mate*

*(Mat 3:13-4:11; Luk 3:21-22, 4:1-13)*

<sup>9</sup> Alila oloma edla Yesu Ga:lili mo pato dulu dla Nasalet mo tle Yon hala dla pulati Yonta ya:ye Yoden yú dla ka:staiyo. <sup>10</sup> Yesu yú tulupo hetame halemama natilati Pepele dita gowaladepo hallati Hela:dle Sokota seselema tea some ya: dla malla natiyo. <sup>11</sup> Epalati Pepele di tle yuta epo malaiyo, “Wa:ye na: dupa ellalo maseyemala ikadepepo, na: wa: dla sikemte siyema,” diyo.

<sup>12</sup> Koko ita tame gudlati Sokota Yesuye dalupa dulu dla semtaiyo. <sup>13</sup> Ya: 40 alila dulu edla alinepi mate hallati Saitenta ya:ye elemala natimdiyo. Epalati God ya: banakaka sota ya:ye gademdiyo.

*Yesuta ya: alotle tlalo so ka:yapa hohomale*

*(Mat 4:12-22; Luk 4:14-15, 5:1-11)*

<sup>14</sup> Yu so dokopala oplami Helodta Yon amtuwale aya dla ka:stale alotle Yesu Ga:lili mo pato dla tame God tle puale ka:dle yuye epo atlamsela:iyo, <sup>15</sup> “Ka:dle alilata mo-puapo,



epame God ya: mo kokota puluweye mo-mateka:pi. Epedeme wua: malamale meyelope depame wua: bobtalimale tle heheletipo ka:dle yu dla mikadepe diya.”

<sup>16</sup> Alila haleta Yesu Ga:lili kaula peleyama tle tamhalemama natilati amalalo halomalalo so opa Saimon mate ya: ei Endulu mate mata hatitimsiyamala natiyo. <sup>17</sup> Yesuta yia: watle epo atlaiyo, “Na: dolumpumulaiya. Wua: ka:yapa amalalo halomsiyamuwapo. Amasiyama wata oloma itle wua: opaye ma God dla elempulalo so depo ha:ha:lepe,” diyo. <sup>18</sup> Epalati yia: yu e dalepame yia: mata medla pomelepame Yesu mate tamalaiyo.

<sup>19</sup> Yia: ma etle tamalemama amalalo halomsiyamalalo opa opi tlamaiyo, Sebedi ya: akimlala Yeims mate epo Yon mate. Yia: koa dulu dla mata dinampopa:iyo. <sup>20</sup> Yesu yia: natipame yia: watle epo atlaiyo, “Na: dolumpumulaiya,” diyo. Epalati yia:tapo pakasiyamalalo yia: a Sebedi mate epo ya: oko so opa mate koa dulu medla salepame Yesu mate tamalaiyo.

*Bataliya walle oplami  
(Luk 4:31-37)*

<sup>21</sup> Yesu ya: alotle tlalo so mate Kapaniyem mo dla taiyo. Yia: edla tame ha:ha:lali Yu sota inoma sumalalo alilata puaiyo. Epalati Yesu inoma sumalalo aya dla hetame God yu imolowe kotiyamaiyo. <sup>22</sup> Epapele dulu dla opa hapulomatapo ya:ta imale koko dalepame sikemte yiyeliyo. Adipalati, ya:ta imale dulu dla po-aiyalma imalalo sota imalalo epapiyo. Amasiyama ya:ye sikemte itiyamale oplamita imalalo epapele some imhalaiyo.

<sup>23</sup> Epalati pakasiyamalalo bataliya walle oplami edla polaleta Yesuta imale dalepame yu teta:mama epo atlaiyo, <sup>24</sup> “Yesu Nasalet oplami, wa: apa hamsela:ma? Wa: dia:ye bobtalimala puo? Na:malamana, wa:ye God tle malale aiyalma oplamipo,” diyo.

<sup>25</sup> Epalati Yesuta bataliya yemala watle yu itiyamale mate epo atlaiyo, “Keidene, epo ya: tle alikili dla ulatane,” diyo.

<sup>26</sup> Epalati bataliya yemalata oplami watle eseselalle pato hamipame hiyelle mate ya: tle alikili dla ulataiyo. <sup>27</sup> Opata i natipame yiyelle mate yimkadulo watle ipo atlanati atlanati demyaiyo, “Koko i adipapeta:? Imale amko sepena. Adipalati, Yesuta bataliya yemala watle itiyamale mate atlati ya: yu dla salladepo alikili dla ulatalepo.”

<sup>28</sup> Epalati Ga:lili mo pato dla opa hapulomata koko i pakasiyamalalo dlalemtaiyo.

*Yesuta esusulumale so ka:ka:dle  
(Mat 8:14-17; Luk 4:38-41)*

<sup>29</sup> Inoma sumaleta tame gudlati Yesutapo Yeims mate epo Yon mate eleme tame Saimon mate Endulu mate yia: aya dla hetaiyo. <sup>30-31</sup> Amasiyama aya dulu edla a:ya hale Saimon ya: doko esiyeme elaiyo. Yesuta esiyele koko iye dalepame ya: natila tuwaiyo. Epapeleye ya:ta ellalo dla tuwame halemama ya: do dla hamame sila:time pabelle oloma dla esiyeleta mo-pa:iyo. Epalati ya:tapo sila:time daya ha:po yia: watle alemaiyo.

<sup>32-33</sup> Tamila:la edla salita mo-tulli hallati opata Yesu hala dla esusulumale so hapuloma mate epo bataliya watalo so hapuloma mate elempumulaiyo. <sup>34</sup> Epalati Yesuta esiyele mila:pi meyelope meyelope dle halomale soye ka:ka:diyo. Epame bataliya yimlala opa dulu dla ha:ha:leye alikili dla dodolomsalemama yia: watle yu hamiyo diyo. Adipalati, bataliya yimlala hapulomaye yia:malamaiyo, Yesuye ikadepe God Yamipo.

*Yesuta Ga:lili mo pato dulu dla yu hamtale  
(Luk 4:42-44)*

<sup>35</sup> Utulala ikadepe ala pohela:dlalo hallati Yesu elale tle sila:time aya saliyome keilipo elale mo dla inoma sumala taiyo. <sup>36</sup> Epalati Saimon mate epo yimkadulo mate toko sillipo natitepo Yesuta hawa hallati ya: totamtaiyo. <sup>37</sup> Yia: tame Yesu natipame ya: watle epo atlaiyo, “Opa hapulomata wa: totamsiyama. Epedeme wa: ilamtloweyo,” diyo.

<sup>38</sup> Amasiyama Yesuta yia: watle epo atlaiyo, “Hao, di ilame potlowa. Amasiyama di mo yimlala opi mateka:pi popa:mya dla tlowepo. Edla tame na:tapo God yu atlamolowepo. Adipalati, na: ipapele koko hala puwapo,” diyo.

<sup>39</sup> Epedeme ya: Ga:lili mo pato dulu dla mo yimlala hapuloma dla tame Yu so inoma sumalalo aya dla God yu atlamsela:iyo. Epame bataliya yimlala mape opa dulu tle alikili dla dodolomsalemsela:iyo.

### *Kapala batalimale oplami*

*(Mat 8:1-4; Luk 5:12-16)*

<sup>40</sup> Kapala batalimale oplamita Yesu watle puame alumata kellepo polomama epo atlaiyo, “Wa: na: ka:dlowe solotamelepiye, na: ka:dene,” diyo.

<sup>41</sup> Yesu ya: sikemte polowamale mate ya: ummama ya: watle epo atlaiyo, “Na: wa: ka:dlowe solotama, epedeme wa: ma-ka:dene,” diyo. <sup>42</sup> Epalati pakasiyamalalo ya: kapala batalimaleta ma-ka:diyo.

<sup>43</sup> Yesuta ya:ye ma-tane demama yu itiyamale mate ipo atlaiyo, <sup>44</sup> “Wa: tame na:ta wa: ka:dleye opa opi dla atlamiyo. Amasiyama wa: tame God ka: epo opa ka: duka dla hallalo oplami watle wa: kapalata ka:dle kokoye nati-ine. Epame wa:ta ka:dle koko dla Mosesta atlale namkale dle alisisi mate God watle hapine, opata koko etle wa:ta ka:dle kokoye malanatilipo depame.”

<sup>45</sup> Amasiyama ya: Yesu yu hamastapame ma opa hapuloma watle ya: kapala ka:dle kokoye esemsela:iyo. Epapele tle Yesuta mo hadima tama:, opa hapulomata ya: natilowedeme sikemte aluma demsiyamdiyo. Epedeme ya: ma mo opi dla opa inoma dali dla potademsela:iyo. Amasiyama ya: opa pa:le mo dla hallati opata mepele mo meyelope meyelope dle tle ya: hala dla pumhalemdiyo.

## 2

### *Yesuta akoloyale oplami ka:dle*

*(Mat 9:1-8; Luk 5:17-26)*

<sup>1</sup> Alila opi alotle Yesu ma ilame Kapaniyem mo dla pulati opata ya:ta puale kokoye mo edla ma-dlalemtaiyo. <sup>2</sup> Epedeme opa hapulomata puame ya: aya dulu mate alikili mate sikemte alumalati Yesuta yia: watle God yu imhalaiyo.

<sup>3</sup> Epalati akoloyale oplami haleye opa dapiyamte dapiyamte dleta dea tili dla himpo Yesuta hala aya dla hamame pumulaiyo. <sup>4</sup> Yia: solotamaiyo, Yesu hala dla hamame tuluwedeme, amasiyama opata kustimama api ponatiyo. Yia: epalati oplami akoloyale eye dea tili mate aya dopuko di dla hamame hetaiyo. Epame Yesuta yukamhala oloma etle opokoko pokolepo dea tili mate isili a:ma halumtuluiyo. <sup>5</sup> Opata akoloyale oplami dopuko di tle halumtulumhimilati Yesuta yia:ta mikadepe dle natipame akoloyale oplami watle epo atlaiyo, “Namkale, wa: bobtalimaleye mo-hiyotipo wellipo,” diyo.

<sup>6</sup> Amasiyama edla popa:le aiyalma imalalo so opa opita Yesuta atlale yu i dalepame alimama ipo momalampopa:iyo, <sup>7</sup> “Oplami iye adipalati ipo atlo? Ya: God hi mate putlopo atlalepo. Adipalati, hatlo God dla itiyamale elapo, opa batalimale hiyotimoloweye,” dempopa:iyo.

<sup>8</sup> Amasiyama Yesu yia:ta momalampopa:leye ma-natipame yia: watle epo atlaiyo, “Wua: adipalati na:ta atlale koko dla sikemte momalampopa:mama allimpopa:ma:?”

<sup>9</sup> Wua: akoloyale oplami i natiya. Ya: dla koko adipo atlowe tlo kokaleta:? ‘Na:ta wa: batalimaleye ma-hiyostalepo,’ dlowe kokota kokaleta:? O, ‘wa: sila:time wa: wa:ya hame ma-tane,’ dlowe kokota kokaleta:?

<sup>10</sup> Epedeme Opa Yamita ta:lamo hema batalimale hiyotimolowe dla itiyamale hamsela:ye wua:ta natilipo depame na:tapo wata akoloyale oplami iye ka:dlowepo,” diyo. Epo atlepame Yesuta akoloyale oplami watle epo atlaiyo,

<sup>11</sup> “Wa: sila:time wa: wa:ya hame wa: aya dla tane,” diyo. <sup>12</sup> Epalati opa hapulomata me-ompopa:lati akoloyale oplamita pakasiyamalalo sila:time ya: wa:ya hame ya: aya

dla ma-taiyo. Epapeleye akoloyale oplamita ma-sila:timtla natipame yia:ta hapulomata sikemte yiyelepame God dla siyele ta:demyemama epo atlamyaiyo, “Di koko ipapele ponatisemde,” demyaiyo.

*Yesuta Libai sisilamale  
(Mat 9:9-13; Luk 5:27-32)*

<sup>13</sup> Yesu Ga:lili kaula pili dla ma ilamtlati opa hapulomata ya: hala dla puame alumaiyo. Epalati ya:tapo yia: watle God yu imhalaiyo. <sup>14</sup> Epame Yesu kaula pili dla sela:mama natilati oplami hale Alpiyes yami Libaiye ta:kis mani halomalalo aya dla polla natiyo. Epalati Yesuta ya: watle epo atlaiyo, “Wa: na: dolumpuane,” diyo. Epalati ya:tapo sila:time Yesu mate taiyo.

<sup>15</sup> Yesutapo ya: alotle tlalo so mate Libai aya dla hetame daya dempolaiyo. Epalati ta:kis mani halomalalo so mate epo batalimale so Yesu dolumsiyamale so mate yia: ma Yesu mate hetame hatlo godepo daya dempopa:iyo. <sup>16</sup> Amasiyama Pa:lisi so opa mate epo aiyalma imalalo so opa mate koko i natipame allimama, Yesu ya: alotle tlalo so watle epo atlaiyo, “Yesu adipapalati ta:kis mani halomalalo so mate epo batalimale so mate daya dempoloma:?” diyo.

<sup>17</sup> Yesu yu i dalepame yia: watle epo atlaiyo, “Esiyele pa:talo sotapo dakopala ilalo oplami hala dla potasemde. Amasiyama isikimi esusulumale sotapo dakopala ilalo oplami hala dla tamdepo. Epedeme na:ta puwaye, ka:ka:dle soye sisilamolowedeme popuana. Amasiyama bobtalimale so tlo sisilamolowedeme puwapo.”

*Daya aiyalma depo hallowe koko dla atlanatili  
(Mat 9:14-17; Luk 5:33-39)*

<sup>18</sup> Alila haleta Yon opa yu dla ka:ka:timalalo ya: alotle tlalo so mate epo Pa:lisi so yia: alotle tlalo so mate God dla inoma sumha:ha:lowedeme daya aiyalma depo ha:ha:iyo. Epalati opa opita puame Yesu watle epo atlaiyo, “Wa: natine, Yon ya: alotle tlalo so mate epo Pa:lisi so yia: alotle tlalo so mateta daya aiyalma depo ha:ha:po. Ame adipalati wa: alotle tlalo so tlo daya po-aiyalma dlalo ha:ha:ma:?” diyo.

<sup>19</sup> Epalati asiyama Yesuta yia: watle wayu mate epo atlaiyo, “A:ya halalo oplamita a:ya halowedeme daya dinapopo yimkadulo sisilamelepe. Epalati yimkadulota puame dayaye aiyalma depo popa:pa:? Hao. Yia: sisiyele mate a:ya halalo oplami mate popa:mama dayaye yimkata dempopa:lepe. Adipalati, poka:dena, a:ya halalo oplamita yia: mate pollati yia:ta daya aiyalma depo popa:loweye. <sup>20</sup> Amasiyama alila haleta a:ya halalo oplamiye yia: tle alikili dla hamame telepiye, eta yia:tapo daya aiyalma depo popa:lepe.”

<sup>21</sup> Yesuta ma wayu hale mate epo atlaiyo, “Oplamitapo tluka takala dla tluka amko ketahame badepo podedlemasemde. Adipalati, tluka amkota itiyamama tluka takalaye tallatallademama opokoko sikemte pato dlepe. <sup>22</sup> Epedeme matle oplamitapo wain yú amkoye aliya kapalata ita iwale takala dla posimasemde. Adipalati, wain yú amkota itiyamama aliya kapalata iwale ita takalaye gladlati wain yúye alikili dla olotlepe. Epapedeme ka:dena, wain yú amkoye woloma aliya kapalata iwale ita amko dla simoloweye.”

*Yu so inoma sumalalo alila dla atlanatili  
(Mat 12:1-8; Luk 6:1-5)*

<sup>23</sup> Yu sota inoma sumalalo alila haleta Yesuta ya: alotle tlalo so mate witi daya emale dulu tle tamalaiyo. Yia: tamalemama ya: alotle tlalo sota witi dlomoko hauwalepo demtamalaiyo. <sup>24</sup> Epalati Pa:lisi sota koko i natipame Yesu watle epo atlaiyo, “Wa: alotle tlalo soye adipalati dita inoma sumalalo alila dla dlowe alisisi hauwali? Yia: di aiyalmaye ma-hauwokokomalepo,” diyo.

<sup>25</sup> Epalati Yesuta asiyama yia: watle epo atlaiyo, “Wua: God yu buka dla Deibidi mate ya:mkadulo mate yia:ta daya teta:lati koko halëye posesa:mdi? <sup>26</sup> Adipalati, Abiyatata aiyalma aya dokopala depo halale oloma edla Deibidita ya: opa mate daya teta:lati aiyalma aya dulu dla hetame aiyalma daya God dla hamili douwapo. Amasiyama di aiyalma dolumama isikimi God ka: epo opa ka: duka dla ha:ha:lalo sota daya e dlomduwapo. Epapele tlope Deibidita mepele daya e demama ya: opa watle hapiwapo.”

<sup>27</sup> Yesu matle Pa:lisi so watle epo atlaiyo, “Godta di watle inoma sumalalo alila i himiwaye di watle wotiyalle koko hamiwa? Hao, pe-epapena. Isikimi di gadlowe dla inoma sumalalo alila iye himiwapo, dita hedepo popa: demha:ha:lepo depame.

<sup>28</sup> Epedeme Opa Yamitapo wua:ta inoma sumalalo alilaye ya:ta dokopala depo halapo.”

### 3

#### *Yesuta do seme powale oplami ka:dle (Mat 12:9-14; Luk 6:6-11)*

<sup>1</sup> Yu so inoma sumalalo alila haleta Yesu yia:ta inoma sumalalo aya dla hetaiyo. Aya dulu edla do seme powale oplami hale me-polaiyo. <sup>2</sup> Epapeleye Pa:lisi sotapo Yesuta yia: aiyalma hale postamama do seme powale oplami ka:dlowe depo omsiyamaiyo. Adipalati, yia: aiyalma koko dolumama yia:ta inoma sumalalo alila dla esiyele oplami hale ka:dloweye aiyalmayo.

<sup>3</sup> Yesuta do seme powale oplami watle epo atlaiyo, “Wa:ta pola metle sila:timpuame haliyamale hema halane,” diyo. <sup>4</sup> Epame Yesu Pa:lisi so watle epo atlaiyo, “Dita inoma sumalalo alila dla apa koko haloweta aiyalmata:? Ka:dle koko haloweta:, o batalimale koko haloweta:? Epame pasakalo gadloweta:, o pasakalo yumuluweta:?” Epalati Pa:lisi sota ya: yu dalepame allimama yu opi po-atlamaiyo. <sup>5</sup> Yesuta Pa:lisi so tlapame yia: watle sikemte siyaladiyo. Amasiyama ya: ma yia: yilo sikemte dupa koliyo. Adipalati, yia:ta oplami i gadlowe dla dupa kokalalimale tlapame. Epame do seme powale oplami watle epo atlaiyo, “Wa: do dolene,” diyo. Epalati oplamita ya: do dolle oloma edla ya: dota ma-ka:diyo.

<sup>6</sup> Epalati Pa:lisi sota koko i natipame allimama yia:ta inoma sumalalo aya tle alikili dla tamalaiyo. Yia: tame Helod ya: alumale so mate Yesuye adipo hampo yumpa: dle kokoye esemaiyo.

#### *Opa hapulomata Yesu dolumtale*

<sup>7-8</sup> Yesu ya: alotle tlalo so mate Ga:lili kaula dla tlati opa hapulomata ya: dolumtaiyo. Opa hapuloma iwoloye mo meyelo pe meyelo pe dle itle pumulaiyo, opita Ga:lili tle epo Yudiya tle epo Yelusalem tle epo Idumiya tle epo Yoden aloma seme dla ha:ha:lalo mo tle epo Taya mate epo Saidon mate epame mo e mateka:pi dla ha:ha:lalo mo tle. Epedeme opa hapulomata Yesuta koko hamsela:le dlalepame mo meyelo pe meyelo pe dle itle Yesu hala dla pumulaiyo.

<sup>9-10</sup> Opa hapuloma iwolota Yesu hala dla alumalati Yesuta esusulumale so opiye ka:ka:diyo. Epalati natipame esusulumale so opi hapulomata Yesu tluka ipi umulwedeme opa alumale dulu dla sikemte akumtumulaiyo. Epedeme opata epo sikemte akumtumullati Yesuta ya: alotle tlalo so watle epo atlaiyo, “Na: koa hale momolo himme popa:iya,” diyo.

<sup>11</sup> Epapele dulu dla bataliya watalo sota Yesu natipame ya: hete sitali dla teteyupo ikiyelemhutiyemama epo atlamyaiyo, “Wa:ye God Yamipo,” demyaiyo. <sup>12</sup> Epalati Yesuta bataliya yimlala watle yu itiyamale mate epo atlamaiyo, “Wua: opa watle atlemama na:ye God Yamipo demiyo,” diyo.

#### *Yesuta Taiya dle so 12 hohomale (Mat 10:1-4; Luk 6:12-16)*

<sup>13</sup> Yesu tamali di dla hetame halemama ya:ta solotamale so opa tlo sisilamaiyo. <sup>14</sup> Epame yia: dulu dla ma opa 12 tlo hohomaiyo, ya: mate siyamelepo depame. Epame yia: watle Taiya dle so hi halopimama yia: watle epo atlaiyo, “Na:ta wua:ye taiya dlowepo, God yu atlamsiyamelepo depame. <sup>15</sup> Epo wua: watle itiyamale hamilowepo, wua:tapo bataliya yimlala opa dulu dla ha:ha:ye alikili dla dodolomsalemsiyamelepo depame,” diyo.

<sup>16</sup> Epapele dulu dla Yesuta opa 12 iwolo hohomaiyo, Saimon (Yesuta ya: hi hale sepo iyo, Pita) <sup>17</sup> epo Sebedi ya: akimlala dapiyamte Yeims mate epo ya: ei Yon mate. (Yesutapo yia: hi hale sepo ilimaiyo, Bouwaneges. Adipalati, hi i dulu kokoye omapla some halalo so.) <sup>18</sup> Epo Endulu epo Pilipi epo Batolome epo Ma:tiyu epo Tomas epo Alpiyes yami Yeims epo Tadiyes epo Loum gamani so mate opahale demhalale oplami Saimon <sup>19</sup> epo Yudas Iskaliyot (alotle Yesu opahale do tama dla homelle.)

*Yesu mate Belsebul mate*  
(*Mat 12:22-32; Luk 11:14-23, 12:10*)

<sup>20</sup> Yesu ma ilame aya dla tlati opata matle sikemte alumaiyo. Opata edla alumtumama Yesu mate ya: alotle tlalo so mate daya dlowe alila ponatiyo.

<sup>21</sup> Epalati Yesu ya: asiyadulota Yesuta daya podlalo koko hamsela:le dalepame Yesu hamala puaiyo. Adipalati, yia:ta malamaleta Yesuye semte yiyilamselemapo depame.

<sup>22</sup> Epalati aiyalma imalalo so Yelusalem tle pumulaleta epo atlaiyo, “Yesuye bataliya walena. Ya: dulu dla bataliya yimlala yia: dokopala oplami Belsebulta halapo. Epedeme ya:tapo Yesu dla itiyamale hamilati bataliya yimlala opa dulu dla ha:ha:ye alikili dla dodolomsalemhalapo,” diyo.

<sup>23</sup> Epalati Yesuta aiyalma imalalo so sisilapame yia: watle wayu mate epo imaiyo, “Saiten adipo ya:skamu opa dulu tle alikili dla dodolomsalepa:? <sup>24</sup> Epedeme mo hatlope sotapo yiskamu yia: dulu dla duka gladepame opahale dlepiye, mo eye pohallowa, batalimelepe. <sup>25</sup> Epame asiya hatlope sota yiskamu yia: dulu dla duka gladepame opahale dlepiye, asiya ewoloye poha:ha:lowa, batalimelepe. <sup>26</sup> Epo Saitentapo ya:skamu ya: opa mate duka gladepame opahale dlepiye, ya: mo kokota kokó pe-ellowa, medla pa:lepe.

<sup>27</sup> Epedeme oplami haleta itiyamale oplami aya dla hetame alisisi uhalomolowedeme apelepiye, ya: ka:yapa itiyamale oplami tatle dea mate yupo himilipe. Epame alotle ya: aya dulu dla hetame alisisi uhalomelepe. <sup>28</sup> Epedeme na: wua: watle ikadepe koko atlema, batalimale koko hapuloma opata halomde mate epo yu batalimale God hi mate putlopo atlamde mateye Godta howahapo hiyostlepe. <sup>29</sup> Amasiyama oplami antapo Hela:dle Soko watle putlopo atlepiye, ya: kokó elepo ellalo batalimale hapo. Epedeme ya: batalimaleye pohowahapo hiyostlowa.”

<sup>30</sup> Epapele dulu dla aiyalma imalalo sota Yesuye bataliya walena dlali Yesuta koko iye yia: watle epo atlamaiyo.

*Yesu ya: wai mate epo ya: eidulo mate*  
(*Mat 12:46-50; Luk 8:19-21*)

<sup>31</sup> Epame Yesu ya: wai mate ya: eidulo mateta ya: natila pumulaiyo. Epeleye yia: puame alikili dla ha:ha:mama Yesu mate yukamolowe solotamama oplami hale watle Yesu atla tuane diyo. <sup>32</sup> Epalati opa hapuloma Yesu mate popa:leta ya: watle epo atlaiyo, “Wa: wai mate epo wa: eidulo mate alikili dla wa: omha:ha:uwo,” diyo.

<sup>33</sup> Epalati Yesuta asiyama yia: watle epo atlaiyo, “Na: wai anata:? Epo na: eidulo ma anawolota:?” diyo. <sup>34</sup> Amasiyama Yesuta opa hapuloma ya: mate popa:le so dla tlapame yia: watle epo atlaiyo, “Wua:ye na: wai mate epo na: eidulo matepo. <sup>35</sup> Adipalati, opa anawolotapo Godta solotamale koko halomha:ha:lepiye, ewoloye na: eidulopo epo notimadulopo epo na: waidulo ikadepepo.”



## 4

### *Witi daya ale ka:ka:lle mate wayu atlale*

*(Mat 13:1-9; Luk 8:4-8)*

<sup>1</sup> Alila haleta Yesu Ga:lili kaula pili dla imhallati opa hapulomata dallowedeme ya: hala dla puame sikemte alumaiyo. Epalati Yesuta koa dla posokolome yú duka tiyama dla akustepo polomama opaye impolaiyo. Epalati opa hapulomata tamali tle popa:mama dalempopa:iyo.

<sup>2</sup> Yesuta imsela:le dulu dla isikimi wayu mate imsela:mdiyoy. Epedeme ya: wayu i mate opa iwolo imama epo atlaiyo, <sup>3</sup> “Na:ta koko atlowedeme apiye wua: daliya. Alila haleta oplami haletapo witi daya aleye ka:ka:lala taiyo. <sup>4</sup> Ya: witi daya ale ka:ka:lemsela:mama ale opitapo api duka dla teteyuiyo. Epalati teata puame deiyo. <sup>5-6</sup> Epalati witi daya ale opitapo ewala ta:la dla teteyupame hapele popeyalimaiyo. Amasiyama yia:ye sali alemalleta yumama pakasiyamalalo paliyo. Adipalati, ta:la popta:deme yia: keseye ta:la dulu dla sikemte potutula:lalo wekiyo. <sup>7</sup> Epo ma witi daya ale opita osamokolo dulu dla teteyuiyo. Yia: epame pakasiyamalalo popeyalimaiyo. Amasiyama yia:ta teta:le oloma edla osamokolota yia: mate matamama dukuluta popoliyelati yia:ta hapulomatapo dlomoko pomilimalalo paliyo. <sup>8</sup> Epame witi daya ale opita ta:la ka:dle dla teteyuiyo. Epame yia:tapo popeyalipo teta:pame dlomoko sikemte milimaiyo. Epele dulu dla witi daya ale opitapo 100 dlomoko milimaiyo. Epo opitapo 60 dlomoko milimaiyo. Epo opitapo 30 dlomoko milimaiyo.”

<sup>9</sup> Yesuta yu mosukulu gudemama epo atlaiyo, “Molo watalo so, wua: yu iye woloma daliya,” diyo.

### *Adipalati Yesu wayu mate imsela:mduwa?*

*(Mat 13:10-17; Luk 8:9-10)*

<sup>10</sup> Yesuta opa impolopo gudlati yia:ta hapulomata ma yia: mo dla i-ilapo tamalaiyo. Epalati Yesu ya: alotle tlalo so mate epo opa opi Yesu dolumtale so mate medla popa:mama ya: watle epo atlaiyo, “Wa: adipalati opa watle wayu mate imsela:mdi?” diyo.

<sup>11</sup> Epalati Yesu asiyama yia: watle epo atlaiyo, “Wua:tapo God ya: mo kokoye malastlepe. Adipalati, ka:yapa God ya: mo kokoye hemele hatiyomme eluwaye, wata wua: dla mo-botomastapo. Amasiyama alikili sotapo wayu tlo dallepe, epele tlope yia:tapo wayu yia: dulu kokoye woloma pomalamolowa. <sup>12</sup> Adipalati, God yu bukata ipapele so opa watle epo atlalo,

‘Opa ipapele sotapo woloma kulume natilipe,  
amasiyama yia: pomalanatilowa.

Epame yia: woloma kulume dallepe,  
amasiyama yia: woloma pomalamolowa.

Epedeme yia: natipame dalemama malamale meyelope dematiye,  
eta Godta yia: batalimaleye hiyotimelemla.’ ”

### *Yesuta witi daya ale ka:ka:lle wayu dulu koko imale*

*(Mat 13:18-23; Luk 8:11-15)*

<sup>13</sup> Yesuta ma yia: watle epo atlaiyo, “Wayu i ya: dulu kokoye pase kokalena. Ame adipalati wua: wayu i ya: dulu kokoye woloma pomalamalalo wekema:? Epedeme wua: wayu i woloma pomalamalalo wekiye, wayu opi mape adipo malapa:?”

<sup>14</sup> Epedeme witi daya ale ka:ka:llalo oplamiye God yu atlalo oplami epapelepo. Ya:tapo God yuye witi daya ale some ka:ka:lemdepo. <sup>15</sup> Epapedeme opa opitapo witi daya ale opi api duka dla teteyuli epapele some ha:ha:po. Yia: God yu ma-dalemdepo, amasiyama Saitentapo pakasiyamalalo yia: tle kolahamdepo.

<sup>16</sup> Epame opa opiye witi daya ale ewala ta:la dla teteyuli epapele some ha:ha:po. Yia: God yu atla dalepame siyele mate ma-hamdepo. <sup>17</sup> Amasiyama God yutapo yia: dupa dulu dla kese woloma potutula:semde. Epedeme yia:ta God yuye dalepame isikimi alila kiyele dla mikadepe demdepo. Amasiyama yia:ta God yu hamale koko tle kokalle koko mate epo wotiyalle koko mateta yia: dla woyamalati yia:ta God yu dla ha:ha: etle ma-hapele alikili dla potamdepo.

<sup>18</sup> Epalati opa opitapo witi daya ale osamokolo dulu dla teteyuli epapele some ha:ha:po. Yia:ta:po God yu dalepame hamdepo. <sup>19</sup> Amasiyama ta:lamo pasakalo moma-lamale mate epo alisisi poposatilipo ha:ha:lowe momalamale mate epo batalimale koko momalamale mateta yia:ta mikadepe dleye yumdepo. Epapele koko tle yia:ta mikadepe dle kokota dlomoko pomilimasemde.

<sup>20</sup> Epapalati opa opitapo witi daya ale ta:la ka:dle dla teteyuli epapele some ha:ha:po. Yia:ta:po God yu dalepame yia: dupa dulu dla woloma hatitimdepo. Epammama yia:ta dlomoko milimama opita 100 dlomoko milimdepo, epo opita 60 dlomoko milimdepo, epo ma opita 30 dlomoko milimdepo.”

*Yesuta tuloma bopudlowe wayu atlale  
(Luk 8:16-18)*

<sup>21</sup> Yesu matle wayu hale imama epo atlaiyo, “Wua: tuloma otopo kawapota di tle bopudemdi? Hao. Wua: tuloma otopame woloma haliyamale dla pamelemdepo. <sup>22</sup> Epedeme watapo na: wayuye tuloma kawapota bopudle epapele some hutiyepo. Amasiyama alotle na: wayu koko ita haliyamale dla wowoyamelepe. <sup>23</sup> Epedeme molo walle oplamitapo na:ta atlama koko i dallepe.”

<sup>24-25</sup> Epame Yesuta matle yia: watile epo atlaiyo, “Na: yu iye woloma dalepame haiya. Adipalati, oplami antapo na: yuye hapame woloma dolumsela:lepiye, alotle Godtapo ya: watile malamale ka:dle hamilipe. Amasiyama oplami antapo na: yuye woloma podallalo wekelepiye, alotle Godta ya: dla malamale ka:dle yemala elaye kolahalepe.”

*Yesuta God ya: mo kokota ta:leye dlomoko ale tle imale  
(Mat 13:31-34; Luk 13:18-19)*

<sup>26</sup> Yesu matle wayu mate epo atlaiyo, “God ya: mo kokoye ipapena. Oplamitapo dlomoko aleye ta:la dla ka:ka:llepe. <sup>27</sup> Epo ya: utula:la hapuloma mate alila hapuloma mate elepo sila:ti elepo sila:ti demhalemama ya:ta dlomoko ale ka:ka:lleta popeyalipo teta:ye ponatisemde. Epedeme ya: poya:malamana, ya: dlomoko ale ka:ka:lleta adipo teta:ma: dle kokoye. <sup>28</sup> Amasiyama dlomoko aleta ta:la dulu dla hutiyemama meyelo popeyalipo teta:mdepo. Epame yia: teta:mama mupamu tatle wowoyamdepo. Epo alotle upata u-uplatimalati yia: moto ma edla wowoyamdepo. Epame alotle yia: motota teta:pame dlomoko milimdepo. <sup>29</sup> Epalati dlomoko teta:po napo hutiyelati yo ka:ka:llalo oplamita puame dlalimdepo.”

<sup>30</sup> Yesu matle yia: watile epo atlaiyo, “God ya: mo kokoye adipapeta? Na: adipapele koko mate God ya: mo kokoye wua: dla ipa:? Epedeme God ya: mo koko ipapena. <sup>31</sup> Oplamitapo masted dlomoko ale yemala yimka:mala ikadepeye hamtame emomellepe. <sup>32</sup> Amasiyama dlomoko ale yemala etapo peyapame ta:lepiye, osalo dulu edla dlomoko dali eta pato hallepe. Epalati ya: dlota pateka:mu dla yalemtilati teata homale edla puame eto tilimyelepe.”

<sup>33</sup> Yesu opa dla God yu atlamsela:mama wayu ipapele mate sikemte atlamsela:mdiyo. Adipalati, wayu ipapeleta yia:ta malamale mate ala:mdiyo. <sup>34</sup> Epapele tlope ya: opa hapuloma watile wayu ya: dulu kokoye po-imsela:mdiyo. Amasiyama ya: alotle tlalo sota miyelo ya: mate popa:lali ya:ta:po wayu ya: dulu kokoye woloma yia: watile imdiyo.

*Yesuta sokomoko mate ulo mate ka:lli  
(Mat 8:23-27; Luk 8:22-25)*

<sup>35</sup> Alila eta sali mo-tullati Yesutapo ya: alotle tlalo so watle epo atlaiyo, “Di kaula seme dla ulluwa,” diyo. <sup>36</sup> Epame Yesu ya: alotle tlalo so mate ya:ta God yu atlampolale koa e hame opa saliyome kaula seme dla uliyo. Epalati opa opi mape koa opi dla alupo alotle pumulaiyo.

<sup>37</sup> Yia: seme dla ulumha:ha:lati pakasiyamalalo sokomoko patota bibikilimaiyo. Epalati yia: ala me-tamha:ha:lati ulo patotota sillipame yia: koa dulu dla yúta sosowalatamama yia: koaye yú dulu dla ollodla yakomaiyo.

<sup>38</sup> Amasiyama Yesu kei dla matali himme elaiyo. Epalati ya: alotle tlalo sotapo ya: esesa:mama ya: watle epo atlaiyo, “Imalalo oplami, wa: dita yú tutula:la yakomaye wa: me-natima:?” diyo.

<sup>39</sup> Epalati Yesuta elale tle yelepó sila:time halemama sokomoko mate epo ulo mate dla epo atlaiyo, “Wua: medla kekeidiya,” diyo. Epalati oloma edla sokomoko mate ulo mateta medla kekeidiyo. <sup>40</sup> Yesu koko i hapo halemama ya: alotle tlalo so watle epo atlaiyo, “Wua: adipalati wowota:ma:? Wua: ala mikadepe dle me-pa:po ha:ha:pa?” diyo. <sup>41</sup> Amasiyama ya: alotle tlalo sotapo sikemte wowota:mama yiskamu yia: dulu dla atlanati atlanati demyemama epo atlamyaiyo, “Oplami iye anata:? Sokomoko mate epo ulo mateta ya: yu dalepo keka:llipo,” demyaiyo.

## 5

### *Yesuta bataliya walle oplami ka:dle*

*(Mat 8:28-34; Luk 8:26-39)*

<sup>1</sup> Epedeme Yesuta ya: alotle tlalo so mate Ga:lili kaula seme dla uliyo. Yia: tame Gelasa so yia: mo ipi dla yia: koa himiyo. <sup>2</sup> Epo Yesu ala koa tle tamali dla hetamhallati bataliya walle oplamita pakasiyamalalo popliyele hatili mo tle woyapame Yesu hala dla puaiyo.

<sup>3-4</sup> Oplami iye popliyele hatili mo dla halemndiyo. Ya:ye sikemte itiyamaiyo. Epapele koko tle opata ya: do mate epo ya: hete mate oli deata yupo himmdiyo. Amasiyama ya:ta itiyamaleta oli deaye mepele gelledemdiyo. Epame oplami haleta ya: omhalloweye po-ala:mdiyo. <sup>5</sup> Ya: alila hapuloma mate epo utula:la hapuloma mate popliyele hatili mo dla epo koloma di dla hehetamsela:mama ewalata ya:skamu ya: kapala kotimsela:mama hihiyelemsela:mdiyo.

<sup>6</sup> Epedeme oplami itapo Yesu ala pateka:mu tle natipame kukulumtame ya: hete sitali isili dla heodepo polaiyo. <sup>7-8</sup> Epalati Yesuta ya: watle epo atlaiyo, “Bataliya, wa: ya: tle alikili dla ulatane,” diyo. Amasiyama Yesu ala epo atlemhallati bataliya walle oplamita asiyama yu teta:le mate epo atlaiyo, “Yesu, sikemte di dla hallalo God Yami, wa: apa koko na: dla hala puo? Na: God hi mate wa: dla atlema, na: dla wotiyalle hamimiya,” diyo.

<sup>9</sup> Epalati Yesuta ya: watle epo atlaiyo, “Wa: hi anata:?” diyo. Epalati ya:ta asiyama Yesu watle epo atlaiyo, “Na: hiye Atumkaka. Adipalati, dia:ye sikemte pasatana,” diyo.

<sup>10</sup> Epame ya:ta Yesu watle ma otomama epo atlaiyo, “Wa: dia:ye mo itle alikili dla dodolomsalemiya,” diyo.

<sup>11</sup> Epapele oloma dla donapi di dla aliya halo hapulomatapo ketame modlomsiyamaiyo. <sup>12</sup> Epela natipame Atumkakata Yesu watle otomama epo atlaiyo, “Wa: dia:ye aliya dulu dla tuwaiya dene,” diyo.

<sup>13</sup> Epalati Yesuta yia:ye aliya dulu dla tumulaiya diyo. Oloma edla bataliya yimlalata oplami tle u-ulapo tame ma aliya dulu dla tumulaiyo. Epalati 2,000 aliya epapeleta donapi di tle ullumtulume yú dulu dla tutula:mama me-paliyo.

<sup>14</sup> Epalati aliya omha:ha:lalo sota koko i natipame potame yia: mo dla epo yia: dakase aya dla atlamtaiyo. Epalati mo sota koko i dalepame woloma natila tamalaiyo. <sup>15</sup> Opa hapulomata puame Yesu hala dla natitepo bataliya walle oplamita malamale ma-ka:depo tluka didiyepo polla natiyo. Epalati yia:ta hapulomatapo sikemte wowota:iyo.

<sup>16</sup> Epame aliya omha:ha:lalo sotapo Yesuta bataliya walle oplami ka:dle mate epo aliyata

palli koko mate yia: watle matle woloma atlamaiyo. <sup>17</sup> Epalati opata koko i dalepame wowota:mama Yesu watle epo atlaiyo, “Wa: di mo itle alikili a:ma woyapo tane,” diyo.

<sup>18</sup> Epalati Yesuta ma ilame tlowedeme koa dla posokolome hallati oplami ya:ta ka:dleta ya: watle epo atlaiyo, “Na: wa: mate tlowe solotama,” diyo. <sup>19</sup> Amasiyama Yesuta ya: watle epo atlaiyo, “Hao, wa: na: mate potlowa. Wa: ma aya dla ilame tame Lodta wa: polowamama wa: dla koko pato halëye wa: asiyadulo dla atlamane,” diyo. <sup>20</sup> Epalati ya: ma ilame tame Dekapolis mo dla Yesuta ya: gadle kokoye atlamsela:iyo. Ya:ta koko i atlamsela:lati opata dalepame sikemte yiyeliyo.

*Yesuta Yelus yoti ma pasakalo hamili mate epo esiyele a:ya ka:dle mate  
(Mat 9:18-26; Luk 8:40-56)*

<sup>21</sup> Yesu ma ilame ya: alotle tlalo so mate kaula seme dla uliyo. Yia: yame kaula seme peleyama dla ha:ha:lati opa hapulomata yia: hala dla alumaiyo. <sup>22</sup> Opa alumale dulu dla oplami hale halaiyo, ya: hiye Yelus. Ya:tapo mo edla Yu so inoma sumalalo aya omhalemdiyo. Ya: Yesu natipame ya: hete sitali isili dla tulume heodepo polomama otele mate epo atlaiyo, <sup>23</sup> “Na: amseyemala me-ipilalo yemalaye mo-polowe mateka:pi dla elema. Epedeme wa: puame na: amseyemalaye dota hamame inoma sumane, ya:ta ka:depo hallepo depame,” diyo. <sup>24</sup> Epalati Yesuta ya: yu dalepame ya: mate taiyo.

Amasiyama dulu edla opa hapulomata Yesu mate tamama sikemte kustipo tamalaiyo. <sup>25-26</sup> Epalati opa alumale dulu edla a:ya hale ya: toto koko natimama ka:lliwe pa:le esiyele hamhalaiyo. Ya: 12 sokomoko dulu dla esiyele i mate halemama dakopala ilalo sota ya:ye ka:dlepo depame mani pato yia: watle hamastamdiyo. Amasiyama yia:tapo ya:ye poka:dlalo isikimi ya: dla wotiyalle tlo me-hapimha:ha:mama esiyelela me-ta:mtaiyo. <sup>27-28</sup> Epedeme ya: Yesuta opa ka:ka:demsela: dalepame ya: epo malamaiyo, “Na: isikimi tame Yesu tluka ipi tlo umili, eta na:ye ka:dlepe,” diyo. Ya: epo malapame opa dulu tle tuwame Yesu tluka ipi umaiyo. <sup>29</sup> Ya:ta tame Yesu tluka ipi umale oloma edla ya: toto koko natili esiyelela ya: tle mo-pa:iyo. Epame esiyelela mo-pa:lati ya: ya:skamu epo malamaiyo, “Wata esiyele iye na: tle mo-pa:po,” diyo.

<sup>30</sup> Epalati Yesu pakasiyamalalo ya:ta itiyamaleta alikili dla ulatlati natipo helestame halemama opa dla epo atlaiyo, “Oplami anta na: tluka ipi umo?” diyo. <sup>31</sup> Epalati ya: alotle tlalo sota ya: watle epo atlaiyo, “Wa: adipapalati ‘oplami anta na: umo,’ dema:? Wa: natine, opa hapulomata wa: mate kustipo tamalemama wa: umamtamalapo.”

<sup>32</sup> Amasiyama Yesu me-tlamhalaiyo, ya: tluka umale oplami natilowedeme. <sup>33</sup> Epalati a:ya Yesu tluka umaleta ya:skamu ya:ta ka:dle koko malapame wota:mama eseselalle mate Yesu hete sitali isili dla puame polomama ya:ta ka:dle kokoye Yesu watle atlaiyo. <sup>34</sup> Epalati Yesuta asiyama ya: watle epo atlaiyo, “Namkale, wa:ta na: dla mikadepe dletapo wa:ye ma-ka:dlepo. Epedeme siyele mate tane. Adipalati, esiyelela wa: tle mo-pa:lepo,” diyo.

<sup>35</sup> Yesu ala me-yukamhallati opa Yelus aya tle puame Yelus watle epo atlaiyo, “Wa: amseyemala mo-powame elema. Epedeme wa:ta imalalo oplami sempuluweye koko pa:na,” diyo. <sup>36</sup> Amasiyama Yesuta yia:ta atlale yu dalepame yia: yu pohalalo Yelus watle epo atlaiyo, “Wa: ase sikemte wota:miya. Isikimi na: dla mikadepe dene,” diyo.

<sup>37</sup> Yesu epame Yelus aya dla tamama opa hapuloma medla pomelepo ma isikimi Pita mate epo Yeims mate epo Yeims ya: ei Yon mate tlo elemtaiyo. <sup>38</sup> Epame yia: tame Yelus aya dla natilati opa hapulomata a:lemyemama sikemte wowolimyaiyo. <sup>39</sup> Epalati Yesuta aya dulu dla hetame halemama yia: watle epo atlaiyo, “Wua: adipalati a:lemyemama wowolimyema:? Amseyemala iye popowame elasema. Ya: isikimi elapo,” diyo.

<sup>40</sup> Amasiyama yia:tapo Yesu yu dalepame eimelemyaiyo. Epalati Yesuta yia: watle, “aya dulu itle alikili a:ma u-ulapo taiya,” diyo. Epame ya: alotle tlalo so mate amseyemala ya: a mate epo ya: wai mate elepame amseyemalata ela aya dulu dla tuwaiyo.

<sup>41</sup> Yesu tuwame amseyemala powame ela do dla hamame halemama epo atlaiyo,

“Amseyemala, wa: sila:tine,” diyo. <sup>42</sup> Epapele oloma edla amseyemala mo-powame elaleta ma sila:timsela:iyo. Epalati opa hapulomata koko i natipame sikemte yiyeliyo. <sup>43</sup> Epame Yesuta yia: watle yu itiyamale mate epo atlaiyo, “Wua: na:ta amseyemala i ka:dle kokoye opa opi watle atlamiyo,” diyo. Epo halemama “amseyemalaye daya hamiya,” diyo.

## 6

*Ya: mo sota yia: oplami alli*

*(Ma:t 13:53-58; Luk 4:16-30)*

<sup>1</sup> Yesu ya: alotle tlalo so mate mo etle ma ilame ya: mo ikadepe Nasalet dla taiyo. <sup>2</sup> Ya: mo edla tame hallati Yu so inoma sumalalo alilata puaiyo. Epalati Yesuta yia:ta inoma sumalalo aya dla hetame halemama opaye God yu mate imhalaiyo.

Epalati opa hapulomata ya:ta imale dalepame sikemte yiyelemama epo atlamyaiyo, “Oplami ita malamale adipapeta:? Ya:ta imale hamsela:leye hadima hauwa? Epame ya: dota ulugiyemale koko halomsela:ye, apa kokota:? <sup>3</sup> Ya: isikimi Meli yami, aya halalo oplamipo. Epo ya:ye Yeims epo Yosep epo Yudas epo Saimon yia: bapapo. Epame yotumadulo mape dia: mate midla popa:po,” demyaiyo. Epedeme yia:ta ipo malamale tle Yesuta imale haloweve alliyo.

<sup>4</sup> Epalati Yesuta yia: watle epo atlaiyo, “Opatapo God tle yu hapame molo atlalo oplami yu dla dalepame heodemdepo. Amasiyama ya: mo so mate epo ya: asiyadulo mate epo ya: aya dulu dla ha:ha:lalo so matetapo ya: yu dla dalepame peheodesemde,” diyo.

<sup>5</sup> Epedeme Yesu yia:ta ya: dla allimama mikadepe dle pa:le natipame ya: ulugiyemale koko pase halomaiyo. Isikimi esusulumale so hatlope hatlope dle tlo ya: do mate hohopame ka:ka:diyo. <sup>6</sup> Epapeleye ya: yia:ta mikadepe dle pa:le natipo yelepame Nasalet mo tle ma mo opi yimka:sikili dla God yu imsela:la taiyo.

*Yesuta ya: alotle tlalo so 12 taiya dle*

*(Ma:t 10:5-15; Luk 9:1-6)*

<sup>7</sup> Yesu ya: alotle tlalo so 12 sisilapame yimkata alumaiyo. Epalati Yesuta yia: dulu dla dapiyamte dapiyamte depo hohomtapame, “Mo meyelohe meyelohe dle dla taiya,” diyo. Yia: watle taiya demama bataliya yimlala alikili dla dodolomsallowe itiyamale mate hamiyo.

<sup>8</sup> Yesuta yia: watle yu itiyamale mate epo hamiyo, “Wua: tamama alisisi opi pohalopo tlowa, isikimi dali ku tlo halopo tamellepe. Epame daya ma pohalopo tlowa. Epo duli ma pohalopo tlowa. Epo mani ma pohalopo tlowa. <sup>9</sup> Amasiyama hete alisisi didiyepame tluka alisisi mape isikimi wua:ta didiyepo ha:ha: metlo didiyepo tamellepe.

<sup>10</sup> Wua:ta mo dla tame woyamale oloma edla opata wua:ye yia: aya dla seme hetlepiye, wua: aya hatlo medla hutiyemha:ha:lepe. Epame wua:ta mo etle mo-tlowedemeta aya eye saliyomta demsiyamelepe. <sup>11</sup> Epame wua: mo hadima tlati opata wua:ye pe-elemhetlalo wekemama wua: yu ma podallalo wekelepiye, wua: mo e saliyome tlowedeme yia: mo sokopeta wua: hete dla popolahaleye hihiyollepe, Godta kasilamale kokota yia: dla pua kokoye imolowedeme.”

<sup>12</sup> Epapeleye Yesuta ya: alotle tlalo so watle koko i ipo gudepame yia:ye taiya diyo. Epalati yia: tame God yu opa dla atlamsiyamama epo atlamsiyamaiyo, “Wua: malamale meyelohe depame wua: bobtalimale tle heheletimaiya,” demsiyamaiyo. <sup>13</sup> Epame bataliya yimlala opa dulu dla ha:ha:leye yia:ta alikili dla dodolomsalemsiyamaiyo. Epame esusulumale so mape dakopala mate yia: dokopala dla huhutupiliyelati esiyelela yia: tle pa:mdiyo.

<sup>14-16</sup> Epalati alotle Yesuta itiyamale mate ulugiyemale koko halomsela:lati opata Yesu koko dla epo atlemdiyo, “Oplami iye Yon opa yu dla ka:ka:timalalo oplami mle. Epedeme ya: powale tle ma-sila:timpuame ulugiyemale koko i halomsela:yo,” demdiyo. Epo opa



opita ma epo atlemdiyo, “Yesuye God tle yu hapame molo atlalo oplami hale Ilaya mle,” demdiyo. Epalati ma opa opitapo epo atlemdiyo, “Ya: God tle yu hapame molo atlalo so ka:yapa ha:ha:uwa so epapele oplami hale mle,” demdiyo.

Amasiyama Helodta Yesu koko dalepame epo atlaiyo, “Ya:ye Yonpo. Na:ta dokopala ketamastauwata matle powale tle pasakalo depo sila:timsela:yo,” diyo.

*Yon opa yú dla ka:ka:timalalo yumili  
(Mat 14:1-12; Luk 9:7-9)*

<sup>17-20</sup> Alila haleta Helodta ya: ei Pilipi ya:llu Helodiyasye kolahalati Yon opa yú dla ka:ka:timalalota ya:ye sikemte golemama epo atlemdiyo, “Wa:ta wa: ei ya:llu kolahaleye, koko e poka:dena,” demdiyo.

Epalati Helodiyasta siyaladepame tame Helod watle Yon amtuwale aya dulu dla ka:stlepo depame atlaiyo. Epalati Helodta ya: opaye taiya dlati yia:tapo tame Yon hampame amtuwale aya dulu dla ka:staiyo.

Amasiyama Helodiyasta Yon sikemte alimama ya: yumuluwe solotamaiyo. Epele tlope Helodta Yon yumuluwe wota:mama ya:ye woloma omhalaiyo. Adipalati, Helod ya: malamaiyo, Yonye ka:dle oplamipo. Epedeme Helodta Yonta God yu atlemhallati dalepame halowe ye malamale tatlamdiyo. Epele tlope ya: Yon yuye me-dallowe solotamdiyo.

<sup>21</sup> Amasiyama alotle Helodiyas dla Yon yumuluwe alila ka:dleta puaiyo. Epedeme Helod hamale alila dla daya pato dlowedeme gamani dokopala so mate epo ya: opahale dokopala so mate epo Ga:lili mo dulu dla dokopala ha:ha:lalo so hapuloma mate Helodta sisilamaiyo. <sup>22</sup> Yia: puame daya dempopa:lati Helodiyas yotita puame yia: watle siyele hamimama yomaiyo. Ya: yopo gudlati Helodta ya: watle epo atlaiyo, “Wa:ta apa koko solotamale na: dla atlepiye, na: koko eye wa: dla hamilowepo,” diyo. <sup>23</sup> Ya: epo polomama ya:skamu aiyalma saiyo, meyelo yu himili postlala depo. Epame matle ya: watle epo atlaiyo, “Na: watle wa:ta solotamale koko atlemama na: ta:la seme mate halowe solotamelepiye, na: wa: watle hamilipe,” diyo.

<sup>24</sup> Epalati amseyemalata tame ya: wai Helodiyas hala dla ya:ta solotamale koko daliyo. Epapalati ya: waita epo atlaiyo, “Wa: tame ipo atlane, ‘Na: Yon dokopala ketahalë halowe solotama’ dene,” diyo. <sup>25</sup> Epalati amseyemalata ya: wai yu dalepo hapele ilamtame Helod watle epo atlaiyo, “Na: solotama, Yon dokopalaye ketahapo kowepa dla himimpulati halowama,” diyo.

<sup>26</sup> Helodta yu i dalepame sikemte dupa koliyo. Amasiyama ya: opa hapuloma inoma dali dla ya:ta aiyalma sale postloweye wota:mama amseyemala yu dla alliw-eye posolotamaiyo. <sup>27-28</sup> Epammama ya:tapo amtuwale aya omhallalo oplami hale watle epo atlaiyo, “Wa: tame Yon dokopalaye ketahapo kowepa dla himimpuane,” diyo. Epalati ya: tame amtuwale aya dulu dla Yon dokopalaye ketahapo kowepa dla himimpuame amseyemala watle hamiyo. Epalati amseyemalatapo dokopala eye hame ma ya: wai watle hamiyo.

<sup>29</sup> Epalati Yon ya: alotle tlalo sota koko i dalepame puame Yon moto hapame ta:la dla muwalepo polomeliyo.

*Yesuta 5,000 opa daya ili  
(Mat 14:13-21; Luk 9:10-17; Yon 6:1-14)*

<sup>30</sup> Yesuta ya: alotle tlalo so watle taiya dlati yia: tame siyapo ma i-ilapo puame Yesu hala dla alupame yia:ta koko halomsiyamale mate epo yia:ta imsiyamale mate Yesu watle atlamaiyo. <sup>31</sup> Amasiyama opa hapulomata Yesu hala dla ta epo pua demsiyamalati Yesu mate ya: alotle tlalo so mate daya dlowe alila ka:dle ponatiyo. Epedeme Yesuta ya: alotle tlalo so watle epo atlaiyo, “Di aseka bidulo keilipo elale mo dla hedla tlowa,” diyo.

<sup>32</sup> Epame Yesuta ya: alotle tlalo so mate tulumme koa dla alupo kaula seme dla homta ellalo mo dla uliyo. <sup>33</sup> Yia: kaula seme dla ala ulumha:ha:lati opata yia: natipame mo meyelope meyelope dle tle Yesuta ta mo edla yia: tatile tamali api ullumtamalaiyo. Yia: ma-tame edla ompopa:lati Yesuta ya: alotle tlalo so mate koa tle pumulaiyo. <sup>34</sup> Yesu koa tle tamali dla posokolome halemama opa hapuloma alumale natipame yia: sikemte polowamaiyo. Adipalati, yia:ye sipi aliya halota omhallalo pa:le epapele some popa:iyo. Epalati natipame Yesuta yia: watle God koko hapuloma imolowe kotiyamaiyo.

<sup>35-36</sup> Yesu ala opa dla me-imhallati salita mo-tulumtaiyo. Epalati ya: alotle tlalo sota ya: watle epo atlaiyo, “Sali mo-tulupo. Epedeme wa: opa hapuloma iye ma-taiya dene, yia:tapo mo mateka:pi hema popa: dla tame daya halomelepo depame. Adipalati, dita popa: mo iye daya pa:na,” diyo.

<sup>37</sup> Amasiyama Yesuta yia: watle epo atlaiyo, “Muwolo yia:ye daya halopiya,” diyo. Epalati ya: alotle tlalo sota Yesu watle epo atlaiyo, “Wa: adipalati dimsilamale koko dia: dla atlema:? Wa: natine, oplamitapo opa alumale isowa daya ilimolowe mani halowedeme sokomoko hatlo dulu dla oko halepiye, mani eta opa hapuloma iye po-ala:lowa,” diyo.

<sup>38</sup> Amasiyama Yesuta yia: watle epo atlaiyo, “Wua: dla daya adisowata hutiyema:? Tame tlamaiya,” diyo.

Epalati yia:ta tame tlapo puame epo atlaiyo, “Isikimi daya mo-halomale do supulastale mate epo amalalo dapiyamte mateta me-hutiyema,” diyo. <sup>39</sup> Epalati Yesuta ya: alotle tlalo so watle atlemama “Opaye tuptu dla alupo popa: alupo popa: demtaiya,” diyo. <sup>40</sup> Epalati opata alumale meyelope meyelope depo popa:mtamama opita 100 sota popa: epo opita 50 sota popa: demtaiyo. <sup>41</sup> Epalati Yesuta daya mo-halomale do supulastale mate amalalo dapiyamte mate halopame pepele di dla omhalemama God dla siyele yu atlepame daya hauwokokomaiyo. Epame ya: alotle tlalo so watle hapiyo, yia:tapo ma opa hapuloma watle alemelepo depame. Ya: epame amalalo ma hauwokokopo ya: alotle tlalo so watle alemaiya diyo.

<sup>42</sup> Opa hapulomata daya dlopo sikemte susukalemama daya popokadiyo. <sup>43</sup> Epalati Yesu ya: alotle tlalo sota daya akutu mate amalalo akutu mate popomelleye yekalo 12 dla atilimama poposatilimaiyo. <sup>44</sup> Epedeme opa mate epo wola: mate epame yimlala mate daya i deiyo. Amasiyama sesa:le oloma dla opa siyapo tlo sesa:mama 5,000 umaiyo.

### *Yesuta yú di tle tale*

*(Mat 14:22-33; Yon 6:15-21)*

<sup>45</sup> Daya dele gudlati Yesuta ya: alotle tlalo so watle epo atlaiyo, “Wua: tatile kaula seme Betsaida dla uliye. Na: opa iwoloye taiye depo alotle puluwamo,” diyo. <sup>46</sup> Yesu opa hapulomaye ma-taiya depame meyelo tamali di dla inoma sumala hetaiyo.

<sup>47</sup> Epame tamila:la eta ya: alotle tlalo so koaye mo-kaula dukuslopi dla tamhallati Yesu meyelope tamali dla ala me-haloiyo. <sup>48-49</sup> Ya: halemama natilati mosisita puame ya: alotle tlalo so koa dla sikemte yulati yia:ta koa sosolemtamama susukalle mate tamha:ha:la natiyo.

Epo utulala ikadepe ala iki yulumhallati Yesutapo yú di tle yia: hala dla taiyo. Yesu yia: koa ala tla:me tamhallati ya: alotle tlalo sota ya: natipame semte bataliya tepo depame ikiyeliyo. <sup>50</sup> Epalati Yesuta ya: alotle tlalo sota ya: natipo wowota:mama ikiyellati yia: watle epo atlaiyo, “Ase sikemte wowota:miya. Na:ta puma,” diyo. <sup>51</sup> Epame ya: ma koa dulu dla posokollati oloma edla mosisita ka:liyo. Epo ya: alotle tlalo sota koko i natipame sikemte yiyeliyo. <sup>52</sup> Adipalati, yia:ye Yesuta 5,000 opa dla daya ilimale edla Yesuta itiyamaleye woloma pomalanatiyo. Ame adipalati, yia: dupa sikemte kokalalimaiyo.

### *Yesuta Genesalet mo dla esusulumale so ka:ka:dle*

*(Mat 14:34-36)*

<sup>53</sup> Yia: kaula ulume Genesalet mo dla tame woyapame koa himiyo. <sup>54</sup> Yia:ta koa tle tamali dla posokoleme tale oloma edla opatapo Yesu pakasiyamalalo malanatiyo. <sup>55</sup> Opata Yesu malanatipame mo meyelo pe meyelo pe dle dla yu hame ullumtamalaiyo, esusulumale soye Yesu hala dla hohopo pumullupo depame.

<sup>56</sup> Epedeme Yesuta mo hadima tamsela:uwa edla opata esusulumale soye hohopo puame haliyamale dla ipila: demsiyamdiyo, Yesuta yia:ye ka:ka:dlepo depame. Epalati esusulumale so hapulomata Yesu watle otomama epo atlamyaiyo, “Di isikimi wa: tluka ipi tlo umamolowama,” demyaiyo. Epapele dulu dla ya: tluka ipi umamale so hapulomata ma-ka:ka:dlimaiyo.

## 7

### *Godta aiyalma imale mate opata aiyalma imale mate (Mat 15:1-9)*

<sup>1</sup> Pa:lisi so mate epo Yelusalem tle pumulale aiyalma imalalo so mateta Yesu hala dla puame alumaiyo. <sup>2</sup> Yia: puame natilati Yesu ya: alotle tlalo so opita yia: toto koko mate podolumalalo yia: do pohowahalomalalo daya me-dlompopa:la natiyo. <sup>3</sup> Epapele dulu dla Pa:lisi so mate Yu so opi mate yia: toto koko dolumama yia: do howahalopo daya dlomdepo. Adipalati, yia:ta malamdepo, yia:ta do pohowahalomalalo daya delepiye, eta yia: dupa dulu batalimelepe, demdepo. <sup>4</sup> Epame yia: alisisi halomalalo aya tle alisisi halopo puame dlowedeme yia: tate yú ka:pi huhutapame daya dlomdepo. Yia: epo yia: toto koko opi dolumama, yia: kapo epo yia: eto epo yia: disisi mape woloma howahalomdepo.

<sup>5</sup> Epedeme Pa:lisi so mate aiyalma imalalo so mate Yesu watle epo atlaiyo, “Wa: alotle tlalo sota di toto koko podolumalalo wekemama yia: doye woloma pohowahalomalalo daya dlompopa:ye adipalati amma:?” diyo. <sup>6</sup> Amasiyama Yesuta yia: watle epo atlaiyo, “Wua: wuskamu pepemalalo sopo. God tle yu hapame molo atlalo oplami Aisayata wua: koko dla ikadepe koko ipo atluwapo,

‘Opa iwolotapo isikimi mati tle na: dla siyele ta:demdepo.

Amasiyama yia: dupa dulu dla na: malamaleye hawa ikadepe.

<sup>7</sup> Epedeme yia:ta na: dla heodepame na: hi di dla ta:demha:ha:ye dulu koko pa:na.

Adipalati, yia:tapo opata imale aiyalmaye na:ta imale tepo depame ma opa watle insiyamapo.’ ”

<sup>8</sup> Yesu ma yia: watle epo atlaiyo, “Wua:ye Godta imale aiyalma dla dolumsiyamuwaye memelepame ma opata aiyalma imale dolumsiyamapo,” diyo.

<sup>9</sup> Yesu me-yukamhalemama epo atlaiyo, “Wua: Godta aiyalma hatitimaleye wua:ta woloma ma alikili dla himina, ma wua: toto koko dolumolowedeme. <sup>10</sup> Epedeme Mosesta aiyalma hatitimaleta epo atlapo,

‘Wa: a mate wa: wai mate yia: yu dla heodepo salladepo siyamaiya.

Amasiyama antapo ya: a mate ya: wai mate dla putlomale yu atlepiye, ya:ye yumuluwe ka:pi.’

<sup>11</sup> Epedeme oplamitapo God watle namkale dle alisisi hamilowedeme yu himimdepo. Epame alotle ma ya: a mate ya: wai mate alisisi pa:lali yia: gadlowedeme solotamdepo.

<sup>12</sup> Amasiyama aiyalma imalalo so, wua:tapo ya: watle epo atlemdepo, ‘Wa: a mate wa: wai mate matle gadlowe poka:dena. Adipalati, wa: yu me-himiwapo, wa: alisisi God watle hapilowedeme,’ demdepo. <sup>13</sup> Epedeme ipapele koko tle wua:ta aiyalma opa dla insiyamama Godta aiyalma imaleye ma-hamastauwapo. Epame wua: koko opi hapuloma ipapele ma halomsiyamapo.”

### *Oplami dupa dulu batalimolowe koko (Mat 15:10-20)*

<sup>14</sup> Yesuta opa hapuloma sisilapame yia: watle epo atlaiyo, “Wua:ta hapuloma na: yu dalepame malamale haiya. <sup>15-16</sup> Epedeme wua: natiya, oplamitapo dlowe alisisi demdeta ya: dupa duluye pobatalimasemde. Amasiyama oplami ya: dupa dulu tle malamale batalimale woyamdeta ya: dupa duluye batalimdepo. Epedeme molo walle oplamita yu i dallepe.”

<sup>17</sup> Yesu opa saliyome aya dulu dla hetlati ya: alotle tlalo sota ya: watle epo atlaiyo, “Wa: di watle wa:ta wayu esemale ya: dulu kokoye imane,” diyo. <sup>18</sup> Epalati Yesu ma yia: watle epo atlaiyo, “Wua: mape yu i dulu kokoye ala me-yeitampopa:pa? Epedeme wua: natiya, wua:ta dlowe alisisi hame dlomdeta wua: dupa duluye pobatalimasemde. <sup>19</sup> Adipalati, dlowe alisisiye isikimi koko dulu dla tulupame ma alikili dla ulatamdepo.” Epapedeme Yesuta koko i atlemama dlowe alisisi hapulomaye me-dlowe ka:pi diyo.

<sup>20</sup> Yesu ma epo atlaiyo, “Oplami dupa dulu tle batalimale koko woyamdeta ya:ye batalimdepo. <sup>21</sup> Epedeme oplami dupa dulu tle ipapele kokota wowoyamdepo, eye batalimale koko malamolowe, epo opa mate wola: mate uhalomolowe, epo upo alisisi uhalowe, epo ya:mkale yumuluwe, epo ya:mkale ya:llu mate ya:mkale ya:wolali mate uhalowe, <sup>22</sup> epo alisisi sikemte halomolowe malamale, epo poka:ka:dle koko halomolowe, epo ya:mkale mala-atlowe, epo opa inoma dali dla wota:le koko halowe, epo ya:mkale ellewe, epo ya:mkale hi mate putlopo atlowe, epo ya:skamu di dla hamhetlowe, epo dokopala pa:msiyamolowe. <sup>23</sup> Epedeme batalimale koko hapuloma ita oplami dupa dulu tle woyapame oplamiye batalimdepo.”

*Po-Yu a:yata mikadepe dle koko  
(Mat 15:21-28)*

<sup>24</sup> Yesutapo sila:time mo e saliyome Taya mo mate epo Saidon mo mate dla tame woyamaiyo. Ya: posolotamaiyo, ya:ta mo edla tame woyapame aya hale dla pollati opata puame ya: natilowe. Amasiyama epapele tope ya:tapo ya:skamu opata ya: natilala depame hemele haodloweye api ponatiyo.

<sup>25-26</sup> Epalati po-Yu a:ya hale Ponesiya Siliya mo dla hallalota Yesu koko dalepame ya: hala dla puaiyo. Ya: puame Yesu hete sitali dla teyume elemama epo atlaiyo, “Na: amseyemalaye bataliya walena. Epedeme wa: puame na: amseyemala dulu dla bataliya halaye alikili a:ma dodolomane,” diyo.

<sup>27</sup> Yesu ya: yu dalepame wayu mate epo atlaiyo, “Yimlala dayaye hapo esemala watle ilimolowe poka:dena. Yimlala tatile daya ilimolowe ka:pi,” diyo.

<sup>28</sup> A:ya asiyama Yesu yu dla epo atlaiyo, “Yao Lod, wa: ikadepe atlapo. Amasiyama esemalatapo ta:la dla siyamama yimlalata daya dele akutuye dlomsiyamdepo,” diyo. <sup>29</sup> Epalati Yesuta asiyama ya: watle epo atlaiyo, “Wa:ta asiyama yu ka:dle na: watle hamilipo. Epedeme wa: tame aya dla wa: amseyemala natine, ma-ka:depo polapo. Bataliyaye wata ya: dulu dla ma-hawa,” diyo.

<sup>30</sup> Epalati ya: tame yoti natilati bataliyata ya: dulu dla ma-hawa hallati ma-ka:depo polaiyo.

*Molo mate yu mate pa:le oplami ka:dle*

<sup>31</sup> Yesu matle Taya mo saliyome Saidon mo tle tame Dekapolis mo dla woyapo ma Ga:lili kaula dla tuluiyo. <sup>32</sup> Yesu Ga:lili mo dla tame woyamalati opa opita oplami yu pa:mama molo mate pa:leye ya: hala dla hamampuaiyo. Yia: puame epo atlaiyo, “Wa: dota oplami i hamame inoma sumane, ya:ta ka:dlepo depame,” diyo. <sup>33</sup> Epalati Yesuta oplami iye hamame alumale dulu tle alikili dla pameliyo. Yesu epo halemama oplami ya: molo opokoko dla domokota kekesopame mitikape do dla tupodepame ya: te dla umaiyo. <sup>34</sup> Yesu pepele di dla omhalemama inoma supo hedemama ya: watle ya: yu mate epo atlaiyo, “Epata,” diyo. Yu i ya: dulu kokoye mo-gowalagowaladiya demama apopo.

<sup>35</sup> Oloma edla oplami ya: molota ma-ka:depo daliyo. Epo ya: teta ma-ka:depo yukamolowe kotiyamaiyo. <sup>36</sup> Epame Yesuta opa hapuloma watle yu itiyamale mate epo atlaiyo, “Wua: oplami ita ka:dle kokoye opa opi watle atlamiyo,” diyo. Amasiyama ya:ta yia: watle sikemte atlemama, “Ya: kokoye opa opi dla atlemiyo,” dleye, ma opata yu e podallalo ma sikemte opa opi watle me-atlamsiyamaiyo.

<sup>37</sup> Epedeme opa hapulomatapo koko hema dlalepame sikemte yiyelepame epo atlamyaiyo, “Yesu koko hapuloma woloma ka:depo halomsela:po. Ya: molo pa:talo so mate yu pa:talo so mate ka:ka:demsela:mdepo,” demyaiyo.

## 8

### *Yesuta 4,000 opa daya ili (Mat 15:32-39)*

<sup>1-2</sup> Alila haleta opa hapuloma ma Yesu hala dla alupame ya: mate siyamaiyo. Edla siyamama Yesuta opata daya dimi popa:le natipame ya: alotle tlalo so sisilapame yia: watle epo atlaiyo, “Opa alumale iwoloye na: mate alila dapahatlope siyamuwapo. Epame ma yia:ta daya dimi popa:lati natipame yia: sikemte bokotiyama. <sup>3</sup> Na: yia: daya po-ilimalalo ma-taiya dlowe tlope, yia: api duka dla tamalemama daya yilo hopeyalimelepe. Adipalati, opa opi yia: mo pateka:pi,” diyo.

<sup>4</sup> Yesu ya: alotle tlalo sota ya: watle epo atlaiyo, “Dlowe pa:le mo hema dita hadima tame dlowe hapo opa pasatale iwolo adipo ilipa:?” diyo. <sup>5</sup> Epalati Yesuta ya: alotle tlalo so watle epo atlaiyo, “Wua: dla daya adisowata hutiyema:?” diyo. Epapalati yia:ta asiyama epo atlaiyo, “Isikimi daya mo-halomale 7 tlo me-hutiyema,” diyo.

<sup>6</sup> Epalati Yesuta opa hapulomaye ta:la dla popa:iya depame daya 7 halopo siyele yu God dla hamiyo. Epo daya hauwokokopo ya: alotle tlalo so watle hapiyo, ma yia:ta opa watle alemelepo depame. <sup>7</sup> Epame yia: dulu dla amalo yimlala ma me-hutiyeiyo. Epalati Yesuta amalo yimlala e halopame siyele yu God watle hamiyo. Epame ya: alotle tlalo so watle hapiyo, ma yia:ta opa watle alemelepo depame.

<sup>8</sup> Opa hapulomata daya dlopo sikemte susukaliyo. Epalati ya: alotle tlalo sota daya akutu ipi popomelleye yekalo 7 dla atilimama sikemte poposatilimaiyo.

<sup>9</sup> Yia:ta daya dele alotle opa siyapo sesa:mama 4,000 umaiyo. Epo alotle Yesuta opaye ma i-ilapo yia: aya dla taiya diyo. <sup>10</sup> Ya: opa hapuloma ma-taiya depame ya: alotle tlalo so mate koa dulu dla tulume alupame Dalmanuta mo dla uliyo.

### *Pa:lisi sota ulugiyemale koko natilowe solotamale (Mat 16:1-4)*

<sup>11</sup> Yia: tame Dalmanuta mo dla woyamalati Pa:lisi sota puame Yesu mate yu dlo-maiyo. Adipalati, yia: solotamaiyo, Yesuta itiyamaleye ikadepe God tle puma: depo natilowedeme. Epammama yia:ta Yesu watle “ulugiyemale koko hane,” diyo.

<sup>12</sup> Epalati Yesuta yia:ta mikadepe dle pa:le natipame alimama yia: watle epo atlaiyo, “Wua: adipalati ulugiyemale koko natilowe tlo sikemte solotama:? Wua: adipapele ulugiyemale koko natipo Godta itiyamale dla mikadepe dlowama:? Epedeme na: wua: dla ikadepe koko atlema. Na: wua:ta natilipo depame ulugiyemale koko hale pahalowa,” diyo.

<sup>13</sup> Yesu yu i atlepame ya: alotle tlalo so mate koa dulu dla tulume alupo ma kaula seme dla uliyo.

### *Pa:lisi so mate epo Helod mate yia: koko dla Yesuta daya haka:le mate wayu atlale (Mat 16:5-12)*

<sup>14</sup> Yia: kaula seme dla ulumama Yesu ya: alotle tlalo sota daya pato halowe welimama isikimi yinka:mala tlo hame tamalaiyo.



<sup>15</sup> Epalati Yesuta yia: watle molo atlemama epo atlaiyo, “Ka:e wolomape! Pa:lisi so mate epo Helod mate yia:ta imale kokoye daya haka:le sepena. Adipalati, daya amko ka:dleye daya haka:le mate dukumelepiye, daya amko ka:dleye batalimelepe.”

<sup>16</sup> Amasiyama Yesu ya: alotle tlalo sota koko i dalepame yiskamu yia: dulu dla esempopa:mama epo atlamyaiyo, “Dita daya pohampulalo wekele koko tle Yesutapo di natipo yu epo atlapo,” demyaiyo.

<sup>17</sup> Epalati Yesuta yia:ta momalampopa:leye ma-natipame yia: watle epo atlaiyo, “Wua: adipapalati wua:ta daya pohampulalo wekele koko dla sikemte momalam-popa:ma:? Epame wua: na:ta itiyamale dla ala pomikadepe dlalo ha:ha:mama dupa kokalalipo ha:ha:pa? <sup>18-19</sup> Wua: inoma watalo sopo, amasiyama wua: inoma eta pot-lamasemde. Epame wua: molo watalo sopo, amasiyama wua: molo eta podlalesemde. Epedeme wua: na:ta 5,000 opa daya do supulastale mate hauwokokopo ilimuwaye mo-woweluwapa? Epame yia:ta daya dlopo popomellati wua: yekalo adisowa dla daya akutu popomelle atilimuwa?”

Epalati ya: alotle tlalo sota ya: watle epo atlaiyo, “Yekalo 12 dla atilimuwa,” diyo.

<sup>20</sup> Yesu matle yia: watle epo atlaiyo, “Epame 4,000 opaye na:ta daya 7 mate hauwokokopo ilimalati wua: yekalo adisowa dla daya akutu popomelle atilimuwa?” diyo.

Epalati yia:ta asiyama epo atlaiyo, “Yekalo 7 dla atilimuwa,” diyo. <sup>21</sup> Epalati Yesuta yia: watle epo atlaiyo, “Amasiyama wua: koko e tlapame ma na:ta itiyamale dla ala pomikadepe dlalo ha:ha:pa?” diyo.

### *Yesuta Betsaida mo dla inoma pa:le oplami ka:dle*

<sup>22</sup> Yesu mate ya: alotle tlalo so mate ma Betsaida mo dla uliyo. Yia: edla tame woyamalati opata inoma pa:le oplami Yesu watle hamampuame epo atlaiyo, “Wa: dota oplami i hamame inoma sumane, ya:ta ka:dlepo depame,” diyo.

<sup>23</sup> Epalati Yesuta oplami iye hamame opa dulu tle alikili dla pameliyo. Yesu epo halemama ya: inoma dla mitikape tupodepame dota ya: inoma u-umapo halemama epo atlaiyo, “Wa: wata me-natima:?” diyo. <sup>24</sup> Epalati oplamita alikili dla tlapame epo atlaiyo, “Yao, na: wata me-natima. Amasiyama opa siyama tlo woloma pomalanatisema, isikimi dali some siyama,” diyo. <sup>25</sup> Epalati Yesu matle oplami inoma dla ya: dota umamaiyo. Oloma edla oplamita ya: inoma sikemte towanatipame alisisi woloma ka:pi tlamaiyo. <sup>26</sup> Yesu oplami i ka:depame ya: aya dla tane demama epo atlaiyo, “Wa: koko iye opa opi watle atlamaiyo,” diyo.

### *Pitata Yesu kokoye botomastale*

*(Mat 16:13-20; Luk 9:18-21)*

<sup>27</sup> Yesu matle ya: alotle tlalo so mate Kasaliya Pilipi mo yimlala dla sela:mama ya: alotle tlalo so watle epo atlaiyo, “Wua: na: atlaiya, opata na:ye ana demdi?” diyo.

<sup>28</sup> Epalati yia:ta asiyama ya: watle epo atlaiyo, “Opa opita wa:ye Yon opa yú dla ka:ka:timalalo demdepo. Epalati ma opita wa:ye Ilaya mle demdepo. Epalati ma opita wa:ye God tle yu hapame molo atlalo so ka:yapa ha:ha:uwa oplami hale mle demdepo.”

<sup>29</sup> Amasiyama Yesuta yia: watle epo atlaiyo, “Amasiyama wua:ta na:ye ana demdi?” diyo.

Epalati Pitata Yesu watle epo atlaiyo, “Wa:ye Godta sale oplami Kelisopo,” diyo.

<sup>30</sup> Epalati Yesuta yia: watle epo atlaiyo, “Opa opi watle atlemama na:ye Kelisopo demiyo,” diyo.

### *Yesuta meyelo polowe koko atlale*

*(Mat 16:21-23; Luk 9:22)*

<sup>31</sup> Yesutapo ya: alotle tlalo so watle ya:ta polowe kokoye imolowe kotiyamama epo atlaiyo, “Opa Yamiye sikemte wotiyalle natilipe. Epapele dulu dla Yu so dokopala so mate epo aiyalma aya dokopala so mate epo aiyalma imalalo so mateta ya: dla sikemte

elle pato himilipe. Epame opata ya:ye yumilipe. Amasiyama ya:tapo wabasi dulu dla powame elepame ma dapahatlope alila dla sila:tilipe.” <sup>32</sup> Yesuta ya: koko iye ya: alotle tlalo so watle haliyamale dla botomastepo atlaiyo.

Epalati Pitata koko i dalla alimama Yesu hamame alikili dla woyapo halemama ya: watle “epo atlemiya,” diyo. <sup>33</sup> Amasiyama Yesutapo ya: alotle tlalo so watle omhalemama Pita watle epo atlaiyo, “Saiten, na: tle alikili a:ma tane. Adipalati, wa:ta yu atlaleye God tle popuasema. Amasiyama opata malamale tle puapo.”

*Yesuta ya: alotle tlowe koko imale*

*(Mat 16:24-28; Luk 9:23-27)*

<sup>34</sup> Yesuta opa hapuloma mate ya: alotle tlalo so mate sisilapame yia: watle epo atlaiyo, “Oplami antapo na: dolumpuluwe solotamelepiye, ya: ya:skamu ya:ta solotamale koko hamsela:ye memelepame ya: dali yekelemhimiliye maka:himsela:mama na: dolumpulupe. <sup>35</sup> Amasiyama oplami antapo ya: pasakaloye meyelo gadlowedeme apelepiye, ya: pasakaloye haodlepe. Amasiyama oplami antapo na: yilo epame ka:dle yu yilo ya: pasakaloye haodlepiye, ya: matle kokó halepo halepo pasakalo halepe. <sup>36</sup> Amasiyama oplami antapo ta:lamo pato hema halemama ya:ta solotamale koko hapulomaye mo-halopame hatlo pasakalo hallowe koko tlo hotlepiye, ya: ma apa koko hapa? Hawa. <sup>37</sup> Adipalati, ya:ta alisisi hapuloma ta:lamo hema halopo halale e mate kokó halepo halepo pasakalo pohalowa.

<sup>38</sup> Epedeme wata oloma hema batalimale alila dla ha:ha:mama opata God mo-wowelipo. Amasiyama opa anawolota dulu edla ha:ha:mama na: mate epo na:ta imale mate dla wowota:mha:ha:lepiye, asiyama Opa Yamita ya: Ata hela:dle mate epo ya: banakaka so mate puame ya: dla wota:le hamilipe.”

## 9

<sup>1</sup> Yesu ma epo atlaiyo, “Epedeme na: mikadepe koko wua: watle atlema. Wua: dulu dla opa opi me-ha:ha:po. Yia:tapo God ya: mo kokota itiyamale mate pulati natipame alotle pallipe.”

*Yesuta Moses mate Ilaya mate yukamhalale*

*(Mat 17:1-8; Luk 9:28-36)*

<sup>2</sup> Epame 6 alila mogudlati alotle Yesuta Pita mate epo Yeims mate epo Yon mate eleme tamali di dla miyelo ha:ha:la hetaiyo. Yia: edla hetame popa:mama natilati Yesuta ya: Pepele dimo mila:pi himhalla natiyo. <sup>3</sup> Epalati ya: tlukata sikemte kamama wapoko some halemama sikemte usiyemaiyo. Epedeme ta:lamo oplami haleta ya: tluka howahamama ipo kamoloweye api hawa.

<sup>4</sup> Yia: edla me-ompopa:mama natilati Moses mate epo Ilaya mate wowoyapo Yesu mate yuhamha:ha:iyo. <sup>5-6</sup> Epalati natipame wowota:mama Pitatapo woloma poma-lamalalo Yesu watle epo atlaiyo, “Dokopala oplami, di mo hema ha:ha:lowe ka:pi. Epedeme di kimna:ya dapahatlope kimtimolowepo. Kimna:ya haleye wolëpo, epame haleye Moses tete, epame haleye Ilaya tete dlowepo,” diyo.

<sup>7</sup> Amasiyama Pitata ala me-yukamhallati wualata puame yia:ye bopudiyo. Epalati yuta wuala dulu tle epo atlaiyo, “Iye na:ta sikemte malamama dupa ellalo maseyemalapo. Epedeme ya: yu dla daliya,” diyo.

<sup>8</sup> Epalati Pita wolota yu i dalepame alikili tlamaiyo. Amasiyama yia: oplami hale ponatiyo. Isikimi Yesuta meyelo yia: mate halla natiyo.

<sup>9</sup> Epame yia: tamali di tle malemha:ha:mama Yesuta yia: watle epo atlaiyo, “Wua:ta tlamale kokoye opa opi watle atlamaiyo. Amasiyama Opa Yamita popo sila:time me-hetlati alotle opa opi dla atlamsiyamaiye,” diyo.

<sup>10</sup> Epalati Pita wolota Yesu yu dalepame woloma haiyo. Epame yia: dulu dla powale tle sila:tilowe koko tlo esemama ya: dulu kokoye woloma totamaiyo.

*Yesu ya: alotle tlalo sota Ilaya koko dla atlanatili  
(Mat 17:9-13)*

<sup>11</sup> Matle Pita wolota Yesu watle epo atlanatiyo, “Adipalati aiyalma imalalo sota imama ‘Ilayata itapu pulati Kelisota alotle pulupe’ demdi?”

<sup>12</sup> Epalati Yesuta asiyama yia: watle epo atlaiyo, “Ikadepe, Ilaya tatile puame koko hapulomaye ma woloma ka:depo dinapelepe. Ame adipalati God yu bukata atlemama ‘Opa Yamiye opata elle pato himimama wotiyalle pato hamilipe’ demdi? <sup>13</sup> Amasiyama na: wua: watle atlema, Ilayaye mo-puwapo. Epalati opata God yu bukata atla mate ala:mama ya: watle wotiyalle koko ma-hapiwapo.”

*Yesuta bataliya walle maseyemala ka:dle  
(Mat 17:14-21; Luk 9:37-43)*

<sup>14</sup> Yesuta ya: alotle tlalo so dapahatlopeye tamali di tle eleme malame halemama natilati ya: alotle tlalo so opita aiyalma imalalo so mate yu dlomha:ha:la natiyo. Epalati opa hapulomata puame edla alupo ha:ha:iyo. <sup>15</sup> Epo alupo ha:ha:mama Yesu natipo yiyelepame sisiyele mate Yesu hala dla ullumtamalaiyo. <sup>16</sup> Epalati Yesuta yia: watle epo atlaiyo, “Wua:ta yu dlomha:ha:leye apa koko dla api?” diyo.

<sup>17</sup> Epalati alumale dulu edla oplami haleta epo atlaiyo, “Imalalo oplami, na: maseyemala yu pa:leye wa: watle hamampua. Adipalati, ya:ye bataliya walena. <sup>18</sup> Epedeme bataliyata ya: dla hetlati teyume kikiyamtame elemama a:pe tetekelle mate mitikape totowa:leme elemde. Epeleye na:ta wa: alotle tlalo so watle ‘bataliya iye alikili dla dodolomaiya,’ dlati yia:ta pododolomana.”

<sup>19</sup> Epalati Yesuta yia: watle epo atlaiyo, “Wua:ye mikadepe dle pa:le bobtalimale sopo. Wua:ta na: dla mikadepe dlepo depame na: alila adisowaye wua: mate halepa:? Amasiyama maseyemala eye na: watle hamampuaiya.” <sup>20</sup> Epalati opatapo maseyemalaye Yesu hala dla hamapulati bataliyata Yesu natipame maseyemala watle eselalle hamiyo. Epalati maseyemalata ta:la dla teyume duduplumelemama mitikape totowa:lemelaiyo.

<sup>21</sup> Epalati Yesuta maseyemala ya: a watle epo atlaiyo, “Maseyemala iye adipalalo koko i kotiyamuwa?” diyo. Amasiyama ya: ata Yesu watle epo atlaiyo, “Ya: ala yimka:mala halemama koko iye kotiyamuwa. <sup>22</sup> Epedeme bataliyata maseyemala i yumuluwedeme dlapa dulu dla epo yú dulu dla ka:ka:timhalemde. Epedeme wa: dla ala:lepiye, dia:ye polowamama na: maseyemala i ka:dene,” diyo.

<sup>23</sup> Epalati Yesuta ya: watle epo atlaiyo, “Wa: adipalati na: watle atlemama ‘wa: dla ala:lepiye’ dema:? Amasiyama anta God dla mikadepe dlepiye, koko hapuloma ya: dla pokokalena,” diyo.

<sup>24</sup> Maseyemala ya: ata Yesu yu dalepame yu teta:le mate epo atlaiyo, “Na: God dla mikadepe dema, epedeme na:ta mikadepe dle yimka:malaye ma pato depo melene,” diyo.

<sup>25</sup> Opata Yesu hala dla puame ala me-alumyelati Yesuta bataliya watle epo atlaiyo, “Wa: opa dla molo mate yu mate pa:le hapilalo soko, na: wata yu itiyamale mate wa: dla atlema. Maseyemala ya: tle alikili dla ulatane. Epame matle ya: dla potuluwa,” diyo.

<sup>26</sup> Epalati bataliyata maseyemalaye ta:la dla hamastapame hiyelle mate alikili dla ulataiyo. Maseyemala ta:la dla teyume elemama powale some elaiyo. Epalati opa hapulomata epo atlamiyaiyo, “Maseyemala iye mo-powame elayo,” demyaiyo. <sup>27</sup> Amasiyama Yesuta maseyemalaye do dla hamame sila:time pameliyo.

<sup>28</sup> Epame Yesuta ma aya dulu dla hetlati ya: alotle tlalo sota miyelo ya: mate popa:mama ya: watle epo atlaiyo, “Di adipalati bataliyaye maseyemala tle alikili dla dodolomolowe dla itiyamale hawa halo?” diyo. <sup>29</sup> Epalati Yesuta asiyama yia: watle epo atlaiyo, “Bataliya yimlala ipapeleye isikimi daya aiyalma depo halemama inoma sumhalale koko tle alikili dla dodolomlala,” diyo.

*Yesuta ya:ta polowe koko ma atlale*  
(*Mat 17:22-23; Luk 9:44-45*)

<sup>30</sup> Yesu matle ya: alotle tlalo so mate mo e meleme Ga:lili mo dulu tle tamalaiyo. Amasiyama ya: posolotamaiyo, oplami haleta ya:ta hala natilowe. <sup>31</sup> Adipalati, ya: isikimi ya: alotle tlalo so tlo imsela:mama yia: watle epo atlaiyo, “Opa Yamiye opa do tama dla homellepe. Epalati yia:tapo ya:ye yumilipe. Amasiyama ya:ye powame elepame ma dapahatlope alila dla ma pasakalo depame sila:tilipe,” diyo.

<sup>32</sup> Epalati ya: alotle tlalo sota yu i dulu kokoye woloma pomalamalalo wekemama ya: watle atlanatilowe ye wowota:iyo.

*Anta pato halema:?*  
(*Mat 18:1-5; Luk 9:46-48*)

<sup>33</sup> Yesuta ya: alotle tlalo so mate Kapaniyem dla mo-puaiyo. Yia: puame aya dulu dla hetame popa:mama Yesuta yia: watle epo atlaiyo, “Wua: api duka dla pumulumama apa koko balempumulo?” diyo. <sup>34</sup> Amasiyama ya: alotle tlalo sota ya: yu dalepo titiyalepo popa:iyo. Adipalati, yia: dulu dla anta pato halema: dle kokoye api duka dla pumulumama balempumulaiyo.

<sup>35</sup> Epalati Yesuta yia: sisilapo polomama yia: watle epo atlaiyo, “Epedeme anta pato hallowe solotamelepiye, ya: ya:skamu ya:ye alo dla himpame ya: motoye yimkadulo gadlowe dla himilipe.” <sup>36</sup> Yesu epame maseyemala hamame duka dla pamelepo matle ya: mulu dla pamelemama epo atlaiyo, <sup>37</sup> “Oplami antapo maseyemala ipapeleye na: hi tle ya: aya dla seme hetlepiye, ya: na:ye seme hetamama apelepe. Epame oplami antapo na:ye ya: aya dla seme hetlepiye, ya:tapo na: a na: tane duwaye seme hetamama apelepe.”

*Anta di watle po-opahale dlalo halema; ya:ye diamkalepo*  
(*Luk 9:49-50*)

<sup>38</sup> Epalati Yonta Yesu watle epo atlaiyo, “Imalalo oplami, di oplami hale wa: hi mate bataliya yimlalaye alikili dla dodolomsalemhalla natiwa. Epalati dita ya:ye humatluwa. Adipalati, ya: di alumale dulu dla pohalase mde,” diyo.

<sup>39</sup> Amasiyama Yesuta epo atlaiyo, “Ya: humatlemiya. Adipalati, anta na: hi mate ulugiyemale koko halepiye, ya: na: hi dla poputlopo atlasema. <sup>40</sup> Epedeme anta dia: dla po-opahale dlalo halema; ya:ye diamkalepo. <sup>41</sup> Na: wua: watle mikadepe koko atlema. Oplami antapo Keliso dolumalalo oplamita yú ta:mpollati yú tipo hamilipiye, ya: koko edla asiyama halepe.”

*Batalimale dla hamame tulluwe*  
(*Mat 18:6-9; Luk 17:1-2*)

<sup>42</sup> “Epedeme na: dla mikadepe dlalo maseyemala yimka:malaye oplami antapo seme batalimale koko dla tullupiye, ka:dena, oplami eye ewala patota tumuku dla himo-meleme ewatalo dla hamastloweye.

<sup>43</sup> Epame wa: do aditapo wa:ye batalimale dla hamame tullupiye, ka:dena, do seme eye geda:dloweye. Ame adipalati, ka:dlepo, wa:ta do hatlope mate siyele mo dla ulatuluweye. Amasiyama wa:ta do dapiyamte halemama Dlapa mo dla tloweye poka:dena. Adipalati, Dlapa mo edla dlapata posumtasemde. <sup>44</sup> (-)

<sup>45</sup> Epame wa: hete aditapo wa:ye batalimale dla hamame tullupiye, ka:dena, hete seme eye geda:dloweye. Ame adipalati, ka:dlepo, wa:ta hete hatlope mate siyele mo dla ulatuluweye. Amasiyama wa:ta hete dapiyamte halemama Dlapa mo dla tloweye poka:dena. <sup>46</sup> (-)

<sup>47</sup> Epame wa: inoma aditapo wa:ye batalimale dla hamame tullupiye, ka:dena, inoma seme eye holamastloweye. Ame adipalati, ka:dlepo, wa:ta inoma seme tiyape mate God

ya: mo dla ulatuluweye. Amasiyama wa:ta inoma dapiyamte halemama Dlapa mo dla tloweeye poka:dena. <sup>48</sup> Adipalati,

‘Dlapa mo edla wokakata popalisemde,  
epame dlapa ma posumtasemde.’

<sup>49</sup> Opa hapulomaye solota dlapa some dusukopo hamastlepe.

<sup>50</sup> Epedeme soloye ka:pi alisisipo. Amasiyama solota ya:ta opalli pa:lepiye, ma adipo ya:ta opalli hapa:? Pahalowa. Epame dimalamana, solotapo dlowe alisisi dla opalli hamimdepo. Epedeme wua: mape solo some ha:ha:mama yimkadulo sadle mate ka:pi ha:ha:iya.”

## 10

*Yesuta a:ya mellowe koko dla imale*

*(Mat 19:1-12; Luk 16:18)*

<sup>1</sup> Yesu Ga:lili mo saliyome Yudiya dla tamama Yoden aloma ulumtaiyo. Ya: edla tlati opa hapulomatapo ya: dolumtamalaiyo. Epalati yia: watle ya:ta imalalo epo imaiyo.

<sup>2</sup> Epalati Pa:lisi so opita puame Yesu dla batalimale koko natilowedeme ya: watle epo atlaiyo, “Oplamita ya:llu melloweeye aiyalma elema:?” diyo.

<sup>3</sup> Yesu asiyama yia: watle epo atlaiyo, “Koko hema Mosesta wua: watle apa aiyalma imuwa?” diyo. <sup>4</sup> Epalati yia:ta epo atlaiyo, “Mosesta di watle imama ‘a:ya memelowedeme isikimi a:ya mellalo pepa tlo ilipo, a:yaye ma-tane de demha:ha:iye,’ duwa.”

<sup>5</sup> Yesu matle yia: watle epo atlaiyo, “Mosesta wua: dupa kokalalimale tlapame wua: watle aiyalma ipo imuwapo. <sup>6</sup> Amasiyama Godta ta:lamo mita:ple oloma edla ‘ya: oplami mate a:ya mate mimita:puwapo. <sup>7</sup> Epedeme oplamitapo ya: a mate ya: wai mate melepame ma ya:llu mate hatlope depo hallepe. <sup>8</sup> Epame yia:ta madipatatapo moto hatlope depo ha:ha:lepe.’ Epedeme yia:ta ha:ha:le dulu dla yia: podapiyamte, amasiyama yia: ma hatlopepo. <sup>9</sup> Epapedeme Godta yia:ta dapiyamte ma-hatlope dleye ma oplami haleta poduka gladlowa.”

<sup>10</sup> Alotle Yesu ya: alotle tlalo sota aya dulu dla popa:mama a:ya mellowe kokoye mamisika: Yesu watle atlanatiyo. <sup>11</sup> Epalati Yesuta asiyama yia: watle epo atlaiyo, “Oplami antapo ya:llu memelepame matle a:ya hale halepiye, ya: a:ya eye uhapo. Epammama ya:tapo ya:llu takala dla batalimale koko hamipo. <sup>12</sup> Epame ma a:ya haleta ya:wolali memelepame ma oplami hale halepiye, ya: mape oplami eye uhapo.”

*Yesu mate yimlala yimka:sikili mate*

*(Mat 19:13-15; Luk 18:15-17)*

<sup>13</sup> Opa opitapo yia: yimlala eleme Yesu hala dla hohopo pumulaiyo, Yesutapo yia:ye ya: do mate u-umamelepo depame. Amasiyama ya: alotle tlalo sota koko e natipame yia:ye humatlaiyo. <sup>14</sup> Epalati Yesuta yia: watle siyaladle mate epo atlaiyo, “Yimlalaye na: hala dla pumula diya, yia: humatlemiya. Adipalati, epapele sota God ya: mo koko dla u-ulapo tulupe. <sup>15</sup> Epedeme na: mikadepe koko wua: watle atlema. Oplami antapo yimlala ipapele some God ya: mo kokoye pahalalo wekelepiye, ya: mo edla po-ulatuluwa.”

<sup>16</sup> Epame Yesuta yimlalaye mulu dla ipila:po ya: dota yia: hohopo polomama inoma supo yia: watle siyele hamiyo.

*Alisisi pasatale oplami*

*(Mat 19:16-30; Luk 18:18-30)*

<sup>17</sup> Yesu mo e saliyome tlowedeme hallati oplami haleta kukulumpuame ya: hete sitali dla alumata kellepo polomama ya: watle epo atlaiyo, “Ka:depo imalalo oplami, na: apa koko hapo, halepo halepo pasakalo hapa:?” diyo.

<sup>18</sup> Yesu asiyama ya: watle epo atlaiyo, “Wa: adipalati na: watle ka:dle oplami dema:? Oplami haletapo ka:dle oplami pahalasema. Amasiyama hatlo God tlo ka:dle halapo.



<sup>19</sup> Epedeme wa: di aiyalma kokoye mo-wa:malamana. Wa: ya:mkale yumula aiyalma, epo wa: upo a:ya uhala aiyalma, epo wa: upo alisisi uhala aiyalma, epo wa: amkale hi mate isikimi mala-atla aiyalma, epo wa: ya:mkale elemale tle ya: alisisi uhala aiyalma, amasiyama wa: a mate wa: wai mate yia: yu dla salladepo sela:lepe.”

<sup>20</sup> Amasiyama oplamita Yesu watle epo atlaiyo, “Imalalo oplami, na:ta yimka:mala tle sila:tiwaye aiyalma koko hapuloma eye mo-dolumpuwapo,” diyo.

<sup>21</sup> Epalati Yesuta ya: dla omhalemama ya: bokotiyapo malamale mate ya: watle epo atlaiyo, “Wa: dla koko hatlo tlo hotepo halapo. Epedeme wa: tame wa: alisisi hapulomaye opa opi watle hapipame asiyama mani tlo hame puame atali so watle hapine. Epalati Pepele dimo dla alisisi pasataletapo wa: hi mate ellepe. Epame wa: ma na: dolumpuane,” diyo.

<sup>22</sup> Oplami koko i dalepame posiyelalo mila:pi sikemte upiyestame taiyo. Adipalati, ya:ye sikemte alisisi pasatepo halaiyo.

<sup>23</sup> Epame Yesu oplamita ma-tlati omhalemama ya: alotle tlalo so watle epo atlaiyo, “Alisisi pasatale sotapo God ya: mo koko dla ulatuluweye pta kokalena,” diyo.

<sup>24</sup> Amasiyama ya: alotle tlalo sota yu i dalepame sikemte yiyeliyo. Epalati Yesu matle yia: watle epo atlaiyo, “Namkadulo, God ya: mo koko dla ulatuluweye pta kokalena.

<sup>25</sup> Epedeme ka:mol aliya patota tluka dedlemalalo tuwale opokoko tle ulatuluwe ka:deta? Hao, po-ulatuluwa. Epedeme e ma epapena, alisisi pasatale sota God ya: mo koko dla ulatuluweye pta kokalena.”

<sup>26</sup> Amasiyama ya: alotle tlalo sota imale i dalepame sikemte yiyelepo epo atlamiyaiyo, “Ame epo kokallege anta ulatupa:?” demyaiyo.

<sup>27</sup> Epalati Yesuta yia: watle omhalemama epo atlaiyo, “Oplamita meyelo ya: pasakalo gadloweye po-ala:na. Amasiyama God tlo ala:na. Adipalati, ya:ta koko hapuloma halomoloweye pokokalena,” diyo.

<sup>28</sup> Epalati Pitata Yesu watle epo atlaiyo, “Dia:ye wa: dolumpumama di alisisi hapulomaye medla pomelepo pumuluwapo,” diyo.

<sup>29-30</sup> Amasiyama Yesuta yia: watle epo atlaiyo, “Na: wua: watle mikadepe koko atlema. Oplami antapo na: dolumpumama ya: aya mate epo ya: bapadulo mate epo ya: eidulo mate epo ya: nanadulo mate epo yotumadulo mate epo ya: a mate ya: wai mate epo ya: yimlala mate epo ya: ta:la mate salepame na: yu ka:dle yilo na: dolumpulupiye, ya:tapo wata oloma hema asiyama pato halepe. Epame matle ta:lamo hema ya:ta aya mate epo asiyadulo mate epo ta:la mate poposatilipo hallepe. Epame ya:ta na: yu yilo wotiyalle ma me-natimhalemama alotle halepo halepo pasakalo halepe. <sup>31</sup> Epedeme itapu dla ha:ha:lalo so opita ma alo dla ha:ha:lepe. Asiyama alo dla ha:ha:lalo so opita ma itapu dla ha:ha:lepe.”

*Yesu mamisika: ya:ta polowe koko atlale  
(Mat 20:17-19; Luk 18:31-34)*

<sup>32</sup> Yesuta ya: alotle tlalo so eleme Yelusalem dla hetamama Yesu meyelo itapu taiyo. Epalati ya: alotle tlalo sota ya: ko tle tamalemama sikemte momalamtamalaiyo. Amasiyama opa opita ya: ko tle dolumtamalemama sikemte wowota:mtamalaiyo.

Epalati Yesu matle ya: alotle tlalo so tlo hohopo alikili dla tame halemama Yelusalem dla koko woyamoloweye yia: watle ipo atlamaiyo, <sup>33</sup> “Ka:e! Di Yelusalem dla matamayo. Edla Opa Yamiye Yu so aiyalma aya dokopala so mate epo aiyalma imalalo so mate dla homellepe. Epalati yia:tapo ya: koko gladepo ya:ta polowe kokoye atlepame ma po-Yu so watle homellepe. <sup>34</sup> Epame po-Yu sota ya: hampame ya: dla tetlemyemama putlopo atlamyelepe. Epame ya: watle mitikape tilitimyemama tuwale dea mate hopolepame yumilipe. Amasiyama ya:ye wabasi dulu dla powame elepame ma dapahatlope alila dla ma pasakalo depame sila:tilipe.”

*Yeims mate Yon mate yia:ta solotamale koko Yesu watle atlale  
(Mat 20:20-28)*

<sup>35</sup> Sebedi ya: akimlala Yeims mate Yon mate Yesu watle puame epo atlaiyo, “Imalalo oplami, di wa: watle dita solotamale koko hale atlowama,” diyo. <sup>36</sup> Epalati Yesu asiyama epo atlaiyo, “Wua: apa kokoye na: watle atlowe solotama:?” diyo. <sup>37</sup> Asiyama yia:ta epo atlaiyo, “Di solotama, wa: mo kokota pulati dita dapiyamte dulu dla haleta wa: dowala tiyama dla pola epame haleta wa: weke tiyama dla pola dloweye,” diyo.

<sup>38</sup> Amasiyama Yesuta yia: watle epo atlaiyo, “Wua: wua:ta atla kokoye powua:malamana. Epedeme wua: na:ta wotiyalle pato halowedeme halaye, wua: ma mepapele halowe ka:deta:? Epame na:ta polowedeme halaye, wua: ma halowe ka:deta:?”

<sup>39</sup> Epalati yia:ta asiyama epo atlaiyo, “Yao, di ka:dena, e haloweye,” diyo.

Epalati Yesuta asiyama epo atlaiyo, “Ikadepe, wua: mape na:ta wotiyalle halowedeme halaye e halepe. Epame na:ta polowedeme halaye, wua: mape e halepe. <sup>40</sup> Amasiyama na: dowala tiyama dla popa:lowe so mate epo na: weke tiyama dla popa:lowe so mate sesalemoloweye na: dla itiyamale hawa. Amasiyama isikimi na: Ata ma-sesalemale so siyapotapo mo edla popa:lepe.”

<sup>41</sup> Epalati Yesu ya: alotle tlalo so opita yu i dalepame Yeims mate Yon mate dla sikemte siyalasiyaladiyo. <sup>42</sup> Yesu koko i natipame yia: sisilapo epo atlaiyo, “Po-Yu so dokopala sotapo yia: isili tle ha:ha:lalo soye sikemte itiyamale mate omha:ha:mdepo. <sup>43</sup> Amasiyama wua: dulu dla epapolowe poka:dena. Epedeme wua: dulu dla anta pato hallowe solotamelepiye, ya: ka:yapa wua: yu dla salladepo sela:lepe. <sup>44</sup> Epame antapo itapu hallowe solotamelepiye, ya: ka:yapa ya:skamu isili dla hamtulupame ya: motoye yimkadulo gadlowe oko dla himilipe. <sup>45</sup> Epedeme Opa Yamita ta:lamo hema puwaye, opata ya: gadlepo depame popuana. Amasiyama ya:ta opaye gadlowedeme puwapo. Epo opata pasakalo halepo depame polowedeme puwapo.”

*Yesuta inoma pa:le oplami Batimayos ka:dle  
(Mat 20:29-34; Luk 18:35-43)*

<sup>46-47</sup> Yesu mate epo ya: alotle tlalo so mate ma Yeliko mo dla puaiyo. Epame yia: ma Yeliko mo ma-saliyome tamalemama opa hapulomata yia: dolumtamalaiyo. Yia: ma-tamha:ha:lali Timaes yami Batimayos inoma pa:le api duka dla otompollalota Yesuta pua koko daliyo. Ya: Yesu Nasalet oplamita pua dalepame yu teta:le mate epo atlaiyo, “Yesu, Deibidi Yami, na: polowamama na: gadene,” dempolaiyo. <sup>48</sup> Epalati opa opita ya: watle humatlemama epo atlamyaiyo, “Wa: yu dimi polane,” demyaiyo. Amasiyama opata ya: watle epo atlamyelati ya:tapo yia: yu podallalo ma sikemte yu teta:le mate epo atlempolaiyo, “Deibidi Yami, wa: na: polowamama na: gadene,” dempolaiyo.

<sup>49</sup> Epalati Yesuta hedepo halemama epo atlaiyo, “Oplami e hema pua diya,” diyo. Epame opata inoma pa:le oplami watle epo atlaiyo, “Ase sikemte malamiya. Wa: sila:timtane. Yesu wa: sisilamapo,” diyo. <sup>50</sup> Epalati inoma pa:le oplamita hapele sila:time ya: kapumale tlukaye ya:ta polale medla hamastapo Yesu hala dla taiyo.

<sup>51</sup> Epalati Yesuta ya: watle epo atlaiyo, “Wa: na:ta wa: watle apa koko halepo depo solotama:?” diyo. Epalati inoma pa:le oplamita asiyama epo atlaiyo, “Imalalo oplami, na: inoma ka:dene. Na: ma natilowe solotama,” diyo.

<sup>52</sup> Epalati Yesuta ya: watle epo atlaiyo, “Wa: ma-tane. Wa:ta mikadepe dleta wa:ye ma-ka:dlepo,” diyo. Epalati pakasiyamalalo inoma pa:le oplamitapo ya: inomata ma-ka:dlati Yesu dolumtaiyo.

## 11

*Yesuta Yelusalem dla tuwale koko  
(Mat 21:1-11; Luk 19:28-40; Yon 12:12-19)*

<sup>1</sup> Yesuta ya: alotle tlalo so mate Yelusalem dla tamama Olipi tamali kikiwi isili dla mo yimlala Betapage mate epo Betani mate mateka:pi dla puame woyamaiyo. Yia: edla puame ha:ha:mama Yesu ya: alotle tlalo so dapiyamte taiya demama epo atlaiyo, <sup>2</sup> “Wua: mo yemala itapu pola huma taiya. Wua: mo edla tame donki aliya amkota:le kikitama himomeleme halla natilipe. Ya:ye opata di dla ala popopa:lalo wekelalo. Epeleye wua:ta kikitama towastepo hema sempuaiye. <sup>3</sup> Epapele dulu dla wua:ta epo sempulati oplami haleta wua: watle atlemama, ‘Wua: adipalati donki aliya kikitama towastepo semtama:?’ dlatiye, wua: asiyama ya: watle atlemama, ‘Lodta aliya i solotamuwo, epame ma alotle ilame semtaiya dloweyo,’ dlepe.”

<sup>4</sup> Epalati ya: alotle tlalo so dapiyamteta mo edla tame natilati aliya eye aya hale alikili dla himomeleme hallati kikitama towastaiyo. <sup>5</sup> Yia: aliya kikitama towastamha:ha:lati opa opita puame yia: watle epo atlaiyo, “Wua: adipalati aliya kikitama towastamha:ha:ma:?” diyo. <sup>6</sup> Epalati ya: alotle tlalo sota asiyama yu atlemama Yesuta ipo atlaiye dleye epo atlaiyo. Epalati opata aliyaye yia: watle me-semtaiya diyo.

<sup>7</sup> Yia: aliya seme puame Yesu hala dla woyamaiyo. Epame yia: kapumale tluka uptipame donki aliya dimsisi di dla kolumalati Yesutapo di dla hetame polaiyo. <sup>8</sup> Opa hapulomata Yesu watle sisiyemama yia: kapumale tluka uptipo api dla yalemtilati opa opita usi kolepame Yesuta tlowe api dla yalemtaiyo.

<sup>9</sup> Epame Yesuta ma-tamhallati itapu dla tamha:ha:le so opa mate epo Yesu ko tle pumha:ha:le so matetapo yu teta:le mate epo atlamtamalaiyo, “God hi di dla ta:diya.

Lod hi tle pua oplami dla sisiyeiya.

<sup>10</sup> Epedeme wua: God ya: mo koko dla sisiyeiya.

Adipalati, ya:tapo di mama Deibidita omhaluwa mo koko epapeleye hampuapo. Di ikadepe dla hallalo God dla sisiyeiya,” demtamalaiyo.

<sup>11</sup> Epame Yesu Yelusalem dla tame Yu so aiyalma aya dla hetame woloma tlamsela:iyo. Epo ma-apomtilati ya: alotle tlalo so 12 eleme ma Betani mo dla taiyo.

*Yesuta pigi dlomoko dali dla yu atlale  
(Mat 21:18-19)*

<sup>12</sup> Yesu Betani dla elepo ma Yelusalem dla pumama daya ta:iyo. <sup>13</sup> Ya: daya ta:le mate pumama natilati pateka:mu dla pigi dlomoko dalita upa asipo halla natiyo. Epalati ya: dlomoko tlo dlowedeme dlomoko mipo halema: depo natila tuwaiyo. Amasiyama ya: tame natilati dlomoko pomilalo upa tlo asipo halaiyo. Adipalati, oloma eye pigi dlomokota pomilimolowe alila. <sup>14</sup> Epalati Yesuta pigi dlomoko dali dla epo atlaiyo, “Wa: matle dlomoko pomimhallowa,” diyo.

Yesuta epo atlati ya: alotle tlalo so ma me-daliyo.

*Yesuta opaye Yu so aiyalma aya tle dodolomsalle  
(Mat 21:12-17; Luk 19:45-48; Yon 2:13-22)*

<sup>15</sup> Yesu Yelusalem dla puame Yu so aiyalma aya dla hetaiyo. Ya: hetame natilati opata alinepi mate alisisi opi mateye asiyama mate halomyela natiyo. Epela natipame alimama ya:tapo aya dulu dla hutiyele alisisi yia: adulo mate epo alisisi e halomalalo so opa mate alikili dla dodolomsaliyo. Epo mani mila:pi meyelo pe meyelo pe dle omha:ha:lalo sota mani kolumalaloye dodokotipo pololiyo. Epame opata seselema tea halopo puame hatitimalalo mape dodokotimaiyo.

<sup>16</sup> Yesu ma epo halemama opa watle epo atlaiyo, “Oplami haleta ma alisisi halopo pumama di aiyalma aya dulu itle olomasepele potuwa demha:ha:lowa,” diyo.

<sup>17</sup> Epammama opa watle ma ipo imaiyo, “God yu bukata epo atlapo, ‘Na: aiyalma ayaye opa hapulomata inoma sumalalo aya demha:ha:lepe.’ Amasiyama epapele tlope wua:tapo God ya: aya iye ma uhalalo aya dlepe.”

<sup>18</sup> Epalati aiyalma aya dokopala so mate epo aiyalma imalalo so mate yu i dalepame wowota:mama Yesu yumuluwe api totamaiyo. Adipalati, yia: natiyo, opa hapulomata ya:ta imale koko dalepame woloma haiyo.

<sup>19</sup> Epame tamila:la edla Yesuta ya: alotle tlalo so mate Yelusalem saliyomtaiyo.

*Yesuta pigi dali tle imale*

*(Ma:t 21:20-22)*

<sup>20</sup> Alila hale utulala ikadepe yia: ma Betani tle Yelusalem dla tamalemama natilati pigi dali Yesuta atlaleta mo-powame halla natiyo. Yia:ta dali i natili dla dlo tle tulume dlosalo hapuloma haleta pasakalo pohalaiyo. <sup>21</sup> Epalati Pitata koko i natipame Yesuta atlale yu malamaiyo. Epammama Yesu watle epo atlaiyo, “Imalalo oplami, wa: natine, dali tatla wa:ta isikimi yu mate atluwaye mo-powame halapiye,” diyo.

<sup>22</sup> Epalati Yesuta asiyama epo atlaiyo, “Wua: God dla mikadepe diya. <sup>23</sup> Epedeme na: ikadepe koko wua: watle atlema. Oplami antapo tamali watle atlemama ‘wa: dokalamtame kaula dla tulune’ demama ya: dupa dulu dla malamale potatlamalalo wekemama ya:ta atla yu dla mikadepe dlepiye, Godta koko e halepe. <sup>24</sup> Epedeme na: wua: watle atlema, wua: God watle apa koko otomama koko eye mikadepe ma-hana dlepiye, wua: koko eye ma-halepe.

<sup>25</sup> Epame wa: inoma sumama apa batalimale wa: amkaleta wa: dla ma hauwa, wa: batalimale eye wellipe. Epalati wa: A God Pepele di dla halata asiyama wa: batalimaleye hiyostepo wellipe. <sup>26</sup> Amasiyama wa:ta wa: amkale batalimaleye pow-elilalo wekelepiye, asiyama wa: A God Pepele di dla halata wa: batalimale pohiyostepo welilowa.”

*Yesuta itiyamale dla atlanatili*

*(Ma:t 21:23-27; Luk 20:1-8)*

<sup>27-28</sup> Yia: mo-puame Yelusalem dla woyapame Yesu aiyalma aya dla hetame sela:iyo. Ya: edla hetame sela:lati aiyalma aya dokopala so mate epo aiyalma imalalo so mate epo Yu so dokopala so mateta ya: watle puame epo atlaiyo, “Wa: apa itiyamale tle koko i hamsela:ma:? Anta wa: watle itiyamale i hamiwa?” diyo.

<sup>29-30</sup> Epalati Yesuta asiyama yia: watle epo atlaiyo, “Na: mape wua: watle atlanatili yu hatlo atlowama. Anta Yon watle itiyamale hamiwa, opa yú dla ka:ka:timelepo depame? Godta itiyamale hamiwa, o oplamita itiyamale hamiwa? Epedeme wua:ta asiyama yu na: watle atlepiye, epalati na: ma asiyama na:ta itiyamale hamsela: iye wua: watle atlowepo,” diyo.

<sup>31</sup> Epalati yia:ta yu i dalepame yiskamu yia: dulu dla esemyemama epo atlamyaiyo, “Di adipo atlepa:? Di Yonta itiyamaleye God tle puwa dlepiye, ma asiyama Yesuta di watle epo atellepe, ‘Ame wua: adipalati Yon yu dla pomikadepe dlalo wekuwa?’ dlepe. <sup>32</sup> Epame di ma ya:ta itiyamaleye oplami tle puwa dlepiye, ma asiyama opata dia: dla siyalasiyaladlepe. Adipalati, opa hapulomata Yonye God tle yu hapame molo atlalo oplami ikadepe demdepo.” <sup>33</sup> Epedeme yia: asiyama Yesu watle epo atlaiyo, “Di podimalamana, Yonta itiyamale halë sitaliye,” diyo. Epalati Yesuta asiyama yia: watle epo atlaiyo, “Na: ma asiyama wua: watle na:ta itiyamale hamsela: iye po-atlowa,” diyo.

## 12

*Batalipo omha:ha:lalo so kokoye wayu mate atlale*

*(Ma:t 21:33-46; Luk 20:9-19)*

<sup>1</sup> Yesu matle wayu mate yia: watle epo atlaiyo, “Alila haleta oplami hale osalo himpame gla:pi dlomoko ale empo alikiliye kosukuliyo. Epo dlomoko dala okolloweye ta:la dla munamu muwalepame matle alisisi e ompollowe kimna:ya di dla haiyo. Ya: epame opa opi watle omha:ha:iye depame ma mo hale pateka:mu dla halla taiyo.

<sup>2</sup> Ya: edla tame hallati dlomokota milipame namolowe alilata mo-puaiyo. Epalati ya:tapo ya: oko oplami hale watle ya: osalo dla tame dlomokoye halopo puane diyo. <sup>3</sup> Amasiyama ya: edla tame woyamalati osalo omha:ha:lalo sota ya:ye hopolopame alisisi dimi ma ilame tane diyo. <sup>4</sup> Epela natipame osalo ya: ata ma ya: oko oplami hale tane diyo. Amasiyama ya: mape omha:ha:lalo sota ya:ye hopolemama dokopala dla ulu hatitipame ya: watle wota:le hamipo tane diyo. <sup>5</sup> Epalati osalo ya: ata matle ya: oko oplami hale tane diyo. Amasiyama omha:ha:lalo sota ya: ma hopolopo yumiyo. Epamtamama osalo ya: ata ya: oko so hapuloma taiya diyo. Amasiyama dlomoko emale omha:ha:lalo sota opa opi hohopolemama opa opi tlo potimaiyo.

<sup>6</sup> Epame osalo ya: ata ya: oko so hapuloma mo-pokadiyo. Epalati ma ya:ta bokotiyapo malamale maseyemala hatlo tlo tane demama epo malamaiyo, 'Osalo omha:ha:lalo sotapo na: maseyemala dla heodemama ya:ye poyumuluwa,' diyo.

<sup>7</sup> Amasiyama osalo omha:ha:lalo sotapo osalo ya: a yamita pulati natipame yiskamu yia: dulu dla epo atlamyaiyo, 'Maseyemala itapo osalo ya: a elo dla hallala. Epedeme ya:ye yumpame osalo iye dita kolahalowepo,' demyaiyo. <sup>8</sup> Epame yia: maseyemala hamamtame yumpo ya: motoye dlomoko emale kosukulli alikili dla hamastaiyo.

<sup>9</sup> Epedeme osalo ya: ata puame ya: osalo omha:ha:lalo so dla apa koko hapa?: Ya: puame yia:ye potipame ma opa amko hohopo ya: osaloye omha:ha:iya dlepe. <sup>10</sup> Epedeme wua: God yu bukata atlama kokoye posesa:lalo wekemdi? Adipalati, edla ipo atlapo,

'Aya halalo sota alumiti allimama

alumiti hamastaletapo ma wata aya duka dla molopa kestale some halapo.

<sup>11</sup> Epedeme koko iye Lodta hauwapo.

Epalati dita koko i natipo yiyelemama sikemte ka:dena depo.' "

<sup>12</sup> Epalati Yu so dokopala sota wayu i dalepame epo momalamaiyo, "Yesuye di koko atlapo," demyaiyo. Epammama yia:ta Yesu hamolowe api totamaiyo. Amasiyama yia: opa wowota:mama pohamalalo ma i-ilapo tamalaiyo.

*Ta:kis mani halopiliwe koko*

*(Mat 22:15-22; Luk 20:20-26)*

<sup>13</sup> Epame Yu so dokopala so hapulomata Pa:lisi so opi mate Helod ya: opa mate Yesu hala dla taiya diyo, yia:tapo Yesuta batalimale yu sepele atlati ya:ye hamolowedeme.

<sup>14</sup> Epedeme Pa:lisi so mate Helod ya: opa mate puame Yesu watle epo atlaiyo, "Imalalo oplami, dia: dimalamana, wa:ye ikadepe koko tlo atlamalalo oplamipo. Epo wa: ma opaye powota:semde. Epame wa: opa kapala di dla potlamasemde. Amasiyama wa: ikadepe God koko tlo insela:mdepo. <sup>15</sup> Epedeme wa: di atlane, di ka:deta:, Loum dokopala oplami Sisa watle ta:kis mani halopiliweye?" diyo.

Yesu yia:ta ya: elemala natiliye malanatipo epo atlaiyo, "Wua: adipalati na:ye elemala natima?: Elo mani hema hampuaiya, na: natili," diyo. <sup>16</sup> Epalati opata ya: watle elo mani hamiyo. Yesu elo mani hame halemama yia: watle epo atlaiyo, "Mani hema ana mila:pi mate epo ana hi mate hutiyema:?" diyo. Epalati opata asiyama epo atlaiyo, "Sisa mila:pi mate epo ya: hi mateta hutiyema," diyo.

<sup>17</sup> Yesu asiyama yia: watle epo atlaiyo, "Wua: epapedeme Sisa teteye Sisa watle halopiya, epame God teteye God watle halopiya," diyo.

Epalati opata Yesu yu i dalepame sikemte yiyeliyo.

*Palli tle silliwe dla Yesu watle atlanatili*

*(Mat 22:23-33; Luk 20:27-40)*

<sup>18</sup> Epame alila oloma edla Sa:dusi so opa opita Yesu hala dla pumulaiyo. Opa iwolota atlemama, "Palli sota ma posilliwa," demdepo. Epeleye yia:tapo puame Yesu watle epo atlaiyo, <sup>19</sup> "Imalalo oplami, Mosesta di watle molo atlale yuye ipo ilipo hamiwapo, 'Oplamitapo a:ya hapo yimlala pohatitimalalo halepo polopiye, ma oplami



e ya: eita sepeyama eye hapo ya: bapa elo dla ha:ha:lowe yimlala hatitimelepe,' duwapo. <sup>20</sup> Epapedeme oplami haletapo akimlala 7 hatitimaiyo. Epame yia: bapa tatile a:ya haiyo. Epo yimlala pohatitimalalo halemama powaiyo. <sup>21</sup> Epalati ma medla hallalota ya: bapa ya:llu sepeyama me-eye haiyo. Ya: mape yimlala pohatitimalalo powaiyo. Epela ma medla hallalota sepeyama hatlo me-eye haiyo. Amasiyama ya: mape yimlala pohatitimalalo powaiyo. <sup>22</sup> Epamtamama akimlala 7 hapuloma ewolotapo yimlala pohatitimalalo pataiyo. Epo a:ya sepeyama eta mosukulu alotle powaiyo. <sup>23</sup> Epapedeme palli tle silliwede oloma edla a:ya eye ikadepe ana ya:llu depa:?' Adipalati, yia:ta 7ta a:ya hatlo metlo halompuwapo," diyo.

<sup>24</sup> Yesu asiyama yia: watle epo atlaiyo, "Wua:ye yeitamale sopo. Adipalati, wua: Godta itiyamale mate epo ya: yu mate ala yeitamha:ha:po. <sup>25</sup> Adipalati, palli sota wabasi tle ma sillipiye, yia: matle wola: mate epo opa mate pohalomha:ha:lowa. Amasiyama yia:tapo God ya: banakaka sota Pepele di dla ha:ha:ye, epapele some ha:ha:lepe. <sup>26</sup> Wua: Mosestapo ya: buka dla palli sota matle pasakalo depo silliwede koko dla ilimaleye posesalalo wekuwa? Adipalati, yu eye dalupa asiyale dulu tle dlapata hamdemhallati Godta dlapa dulu tle Moses watle epo atluwapo, 'Na:ye A:iblaham ya: Godpo, epo Aisek ya: Godpo, epame Yokob ya: Godpo,' duwapo. <sup>27</sup> Epapedeme God iye popalli so yia: God. Hao, pasakalo ha:ha:lalo so yia: Godpo. Epedeme wua: pta sikemte yeitamale sopo."

*Aiyalma hatitimale dulu dla adita patota:?*

*(Mat 22:34-40; Luk 10:25-28)*

<sup>28</sup> Epalati aiyalma imalalo oplami haleta puame Yesu ya: Sa:dusi so mate yu demhallati natiyo. Epame Yesuta Sa:dusi sota atlanatili yu ipi dla asiyama yu ka:ka:dle hapimhalla dalepame ya:tapo Yesu watle epo atlaiyo, "Mosesta aiyalma hatitimale dulu dla aiyalma adi tlo sikemte patota:?" diyo.

<sup>29</sup> Epalati asiyama Yesuta ya: watle epo atlaiyo, "Di aiyalma hatitimale dulu dla aiyalma patoye ita elapo,

'Isalael so wua: daliya.

Lodye di Godpo. Ya:ta hatlo di God halapo.

<sup>30</sup> Epedeme wua: Lod wua: Godye sikemte malamaiya, wua: dupa dulu malamale tle, epo wua: soko tle, epo wua:ta malamale tle, epo wua:ta itiyamale tle.'

<sup>31</sup> Epame aiyalma pato haleye ipo,

'Wa: wa:skamu sikemte malamdiye,

epammama wa: amkale ma sikemte malamhalane.'

Epedeme aiyalma dapiyamte iwolotapo koko patoto ha:ha:po."

<sup>32</sup> Epalati aiyalma imalalo oplamita Yesu watle epo atlaiyo, "Imalalo oplami, wa: ikadepe koko atlalepo. Epedeme Lod hatlo ya:ta God halapo, god hale hawa. <sup>33</sup> Epedeme di Lod sikemte malamolowa, di dupa dulu malamale tle, epo dita malamale tle, epo dita itiyamale tle. Epame diskamu sikemte malamdiye, epammama dia: amkadulo ma sikemte malamolowepo. Epedeme aiyalma dapiyamte iwolo dolumoloweta koko pato halapo. Adipalati, aiyalma dapiyamte iwolotapo God watle alinepi poyupo dlapa dla halomalalo mate epo alisisi God watle hapilalo mate tla:mtame halapo."

<sup>34</sup> Yesu oplamita asiyama yu ka:dle atla dalepame ya: watle epo atlaiyo, "Wa: God ya: mo koko dla ulatuluweye mo-mateka:pi dla halapo," diyo.

Epalati oplami haleta ma Yesu watle atlanatiloweye wowota:iyo.

*Kelisoye ana yamita:?*

*(Mat 22:41-46; Luk 20:41-44)*

<sup>35</sup> Yesu Yu so aiyalma aya dla opa hapuloma imhalemama epo atlaiyo, “Adipalati aiyalma imalalo sotapo Kelisoye Deibidi yamipo demdi? <sup>36</sup> Deibiditapo meyelo Hela:dle Soko tle ipo atluwapo,

‘Godta na: Lod watle epo atluwapo,

Wa: na: dowala tiyama dla polane.

Epalati na:tapo wa: watle opahale demha:ha: soye wa: hete sitali isili dla hatiti-molowepo,’ duwapo.

<sup>37</sup> Epedeme Deibidita Kelisoye ‘na: Lod’ duwapo. Ame adipalati aiyalma imalalo sotapo Kelisoye Deibidi yami demdi?”

Epalati opa hapulomata sisiyele mate Yesu yu woloma daliyo.

*Yesuta aiyalma imalalo so opa koko atlale*

*(Mat 23:1-36; Luk 20:45-47)*

<sup>38</sup> Yesu matle epo atlaiyo, “Ka:e! Wua: aiyalma imalalo so opa woloma natiye. Yia: tluka ka:ka:dle tlo didiyepo siyamdepo. Epo yia: solotamde, opata yia: natipame yia: watle heodepo siyele yu atlamelepo depame. <sup>39</sup> Yia: epame dita inoma sumalalo aya dla epo daya pato dele dla itapu ikadepe dla popa:lowe tlo solotamdepo. <sup>40</sup> Yia: epo isikimi elemale tle sepeyamataloye dodolomsalepame yia: ayaye kokolahamdepo. Epame yia:tapo isikimi opata dallepo depame inoma sumale yuye sikemte seselemalli atlamdepo. Epedeme yia: asiyama wotiyalle pato halepe.”

*A:ya sepeyamata namkale dle alisisi himili*

*(Luk 21:1-4)*

<sup>41</sup> Opata aiyalma aya dulu dla namkale dle mani kolumha:ha:lati Yesu mani kolumalalo isilako mateka:pi dla polomama ompolaiyo. Yesu ompollati alisisi pasatale so opa hapulomata namkale dle alisisi patoto kolumha:ha:iyo.

<sup>42</sup> Epalati sepeyamata puame palli mani elo dapiyamte tlo isilako dulu dla kolumaiyo.

<sup>43</sup> Yesu sepeyama e natipame ya: alotle tlalo so sisilapo epo atlaiyo, “Na: wua: watle mikadepe koko atlema. A:ya sepeyama itapo hamilita alisisi pasatale sota hapiliye ma-tla:mtalepo. <sup>44</sup> Adipalati, alisisi pasatale soye mani patoto yia: dla me-hutiyelati mani opihata tlo hapilipo. Amasiyama sepeyama iye, ya: dla mani mosukulu elaleye etlo hamilipo. Epedeme ya: dla daya dlowe mani ma-hawapo.”

## 13

*Yesuta aiyalma aya dokostlowe atlale*

*(Mat 24:1-2; Luk 21:5-6)*

<sup>1</sup> Yesu ya: alotle tlalo so mate aiyalma aya tle tulumha:ha:mama ya: alotle tlalo so oplami haleta ya: watle epo atlaiyo, “Imalalo oplami, wa: di aiyalma aya i natine. Ewala aya pta ka:pi ikadepe. Ewala tlamane, pta patoto,” diyo. <sup>2</sup> Yesuta asiyama ya: watle epo atlaiyo, “Aya iye woloma natine. Adipalati, aya hema ewala haletapo matle yimkadulo tama di dla popopa:lowa. Amasiyama aya e dokostlati ewala hapuloma etapo matle ta:la dla teteyupo tulumu popa:myelepe.”

*Wotiyalleta kotiyamolowe alila*

*(Mat 24:3-28; Luk 21:7-24)*

<sup>3</sup> Yesu ma etle Olipi tamali di dla hetame polomama aiyalma aya ompolaiyo. Epalati Pita mate Yeims mate epo Yon mate epo Endulu mate miyelo puame Yesu watle epo atlaiyo, <sup>4</sup> “Wa: di atlane, aiyalma aya dokostlowe alilaye adipalalota:? Epame koko ita mo-puluwe mateka:pi dla hallati apa kokota di watle nati-ipa:?” diyo.

<sup>5</sup> Yia:ta epo atlati Yesuta yia: watle imolowe kotiyamama epo atlaiyo, “Ka:e, wolomape! Oplami haleta wua:ye ikadepe api tle ma alikili dla eleme tullala. <sup>6</sup> Adipalati,

opa opitapo na: hi mate puame atlamyemama yiskamu yia:ye Kelisopo demyelepe. Epamyemama yia:ta opa pasataleye ikadepe api tle alikili dla me-eleme telepe.”

<sup>7</sup> Epame Yesu ma epo atlaiyo, “Epapedeme wua: opahale koko mate epo nalatimale koko mateta wowoyamalati dalepame ase sikemte wowota:miyo. Ame adipalati, koko ipapele tate wowoyamelepe. Amasiyama dulu edla mosukulu alilata yipta populuwa.

<sup>8</sup> Mo haletapo mo hale mate opahale de demyelepe. Epame allutuwale patotota mo opi dla ellepe. Oloma edla mo opi dla daya pa:le kokotapo pulupe. Epapele kokota wowoyamelepiye, wotiyalle alilata kotiyamama apelepe.

<sup>9</sup> Epedeme wua: wolomape! Opata wua:ye hohopame koko gladlalo aya dla eleme ta demha:ha:lepe. Epame wua:ye yia: inoma sumalalo aya dla eleme hetame hohopole demha:ha:lepe. Epo na: koko tle wua:ye dokopala so patoto mila:pi dla elemhetame ipila: demha:ha:lepe. Amasiyama wua:ta edla na: kokoye yia: watle atlama demha:ha:lepe.

<sup>10</sup> Epedeme ka:dle yu tate ta:lamo pato dla atlamtepo gudupo hallati ta:lamo mosukulu edla woyamelepe.

<sup>11</sup> Epo opata wua:ye koko gladle aya dla hohopo hetlati wua: ase wua:ta atlowe dla sikemte pomomalamolowa. Amasiyama Hela:dle Sokota wua: watle oloma edla wua:ta atlowe yu hamilipiye, yu etlo atlamelepe. Adipalati, wua: muwolo poyuhalowa, amasiyama Hela:dle Sokota wua: mate halemama yuhalepe.

<sup>12</sup> Oloma edla oplamitapo ya: bapa mate ya: ei mateta pallipo depame yia: allimha:ha: so dla homellepe. Epame atapo ya: yimlala dla ma mepapelepe. Epame akimlalatapo sillipame yia: adulo mate epo waidulo mate palliwe dla eleme telepe. <sup>13</sup> Adipalati, wua:ta na: dla mikadepe dle koko tle opa hapulomata wua: dla elle pato himha:ha:lepe. Amasiyama antapo ya:ta mikadepe dleye kokalepo halemama mosukulu dla tame woyamelepiye, ya: pasakalo hallowe halepe.

<sup>14</sup> Epedeme sesa:lalo oplami, wa: yu i ya: dulu kokoye woloma hane. Adipalati, wua:tapo ulugiyemale alisisi batalimaletapo ya:ta pohallalo wekele mo dla tulumhalla natilipiye, Yudiya so wua:ye tamali di dla ma hapele pohetlepe. <sup>15</sup> Epame oplami aya potopali dla pollalo ya: mape ya: poka:dena, ma aya dulu dla tuwame ya: alisisi halomoloweye. Amasiyama ya: ma hapele tamali di dla telehetlepe. <sup>16</sup> Epame osalo dulu dla sela:lalo oplami ya: mape ma ilame aya dla ya: tluka alisisi pahalomala tlowa.

<sup>17</sup> Epo oloma edla mopapo koko watalo so mate epo owayimlala ala meme ilimalalo so matetapo potloweye pta kokalle pato natilipe. <sup>18</sup> Epapedeme wua:ta potlowe alilata teneyapi dla powoyamalalo wekelepo depame God dla inoma sumale yu himme

ha:ha:iya. <sup>19</sup> Adipalati, oloma edla wotiyalle koko patota pulupe. Epedeme ta:lamo kotiyamale oloma etle pualeye, opatapo wotiyalle koko ipapele ponatimdena. Epame wotiyalle koko pato ita tame gudlepiye, ma alotle wotiyalle koko ipapeleye ponatilowa.

<sup>20</sup> Amasiyama epapele tlope Godta wotiyalle alila iye kiyepo mellepe. Adipalati, ya:ta alila selemalipo melematiye, oplami haleta wotiyalle dulu edla halloweye po-ala:ma. Amasiyama wotiyalle dulu edla Godta sesalemale so opa ma me-ha:ha:deme ya:tapo alila eye kiyepo mellepe.

<sup>21</sup> Oloma edla oplami haleta puame wua: watle atlemama, ‘Iye Kelisopo,’ o ‘Huma natine, eye Kelisopo,’ dlatiye, ya: yu dla mikadepe demiyo. <sup>22</sup> Adipalati, biskapa elemala natilalo keliso mate epo biskapa God yu molo atlamalalo so matetapo puame ulugiyemale koko patoto halomyelepe, Godta sesa:le so elemolowa depame. <sup>23</sup> Epedeme koko iye ala powowoyamalalo hallati na: tate wua:ye molo atlamayo. Epedeme wuskamu woloma omha:ha:iya.”

*Opa Yamita puluwe koko*

*(Mat 24:29-44; Luk 21:25-33)*

<sup>24</sup> “Epame wotiyalle alila ita tame gudlati, ‘salita sumtlepe.

Epalati mamata ma hela:dle pohamilowa.

<sup>25</sup> Epo tamili mape omapla di dla popa:ye ta:la dla teteyulupe.

Epame itiyamale alisisi omapla di dla ha:ha:tapo hohoulalumama itiyamale pa:lepe.'

<sup>26</sup> Oloma edla opata Opa Yamiye wuala dulu tle hela:dle mate itiyamale pato mate pulati natilipe. <sup>27</sup> Epame ya:ta pumama ya: banakaka soye taiya dlepe, Godta sesa:le so opa hapuloma ta:lamo pato dla ha:ha:mtaye elemtelepo depame.

<sup>28</sup> Epedeme wua: ipili dali tle koko i malamaiya. Wua: ipili tokiyeta matlati natipame sali silaplowe alilata mo-kotiyama depo malamdepo. <sup>29</sup> Epedeme koko i ma epa-pena. Wua: na:ta atlama koko ita wowoyamalati natipame Opa Yamita puluweye mo-mateka:pi halayo depo malamelepe. <sup>30</sup> Epedeme na: mikadepe koko wua: watle atlema.

Wata oloma hema ha:ha: soye ala me-ha:ha:lali koko hapuloma ita wowoyamelepe. <sup>31</sup> Epedeme pepele di mate epo ta:lamo mate pa:lepe. Amasiyama na: yu tlo popa:lowa.

<sup>32</sup> Epedeme Opa Yamita puluwe alilaye oplami haleta poya:malamana. Epame God ya: banakaka so Pepele di dla ha:ha: mate epo God Yami mate yia: ma poyia:malamana. Amasiyama hatlo God tlo alila eye ya:malamana. <sup>33</sup> Epo wua: mape alila eta puluweye powua:malamana. Epedeme wua: dinapo omha:ha:iya.

<sup>34</sup> Alila eye ipapena. Oplamitapo mo hale dla tamama ya: oko so watle ya: ayaye omha:ha:iye depo telepe. Ya: epo ya: oko so watle aya e omha:ha:lowe oko meyelope meyelope dle hapilipe. Epame kokoloma omhallalo watle 'woloma ka:pi omhalane,' dlepe.

<sup>35</sup> Epapedeme aya yoye na:po. Epedeme wua: woloma omha:ha:iye. Adipalati, wua: powua:malamana, na:ta puluwe alilaye. Epapedeme pona:malamana, tamila:la puluwe, o utula:la dukuslopi puluwe, o iki ala yulumhallati puluwe, o utulala ikadepe puluwe. <sup>36</sup> Alila hapuloma dinapopo omha:ha:iya. Adipalati, na:ta puame wua:ye hutiyela natiloweye poka:dena.

<sup>37</sup> Epedeme na: wua: watle epo opa hapuloma watle koko i atlema, wua: woloma dinapopo omha:ha:iya."

## 14

### *Dokopala sota Yesu yumuluwedeme esemale*

*(Mat 26:1-5; Luk 22:1-2; Yon 11:45-53)*

<sup>1</sup> Godta Namilatale daya dele dlowe mate epo Isip mo tle alikili dla woyamale malamale daya dele dlowe mate alila dapiyamte umuluwe ma a:ma hutiyeyiyo. Epalati aiyalma aya dokopala so mate epo aiyalma imalalo so mateta esemama isikimi mala-atlale koko tle Yesuye hampo yumuluwedeme api totamaiyo. <sup>2</sup> Amasiyama yia: yiskamu epo atlaiyo, "Di daya dele dulu dla ya:ye poyumuluwa. Adipalati, opata siyaladle ta:dlala," diyo.

### *Betani mo dla a:yata dakopala ullu ka:dle mate Yesu dokopala dla simale*

*(Mat 26:6-13; Yon 12:1-8)*

<sup>3</sup> Yesu Betani mo dla Saimon kapala batalimale oplami aya dla taiyo. Ya: edla hetame daya dempollati a:ya hale isilako dla ullu ka:depo pamalalo dakopala tipo hampuaiyo. Ya: puame isilako glastepo Yesu dokopala di dla simaiyo.

<sup>4</sup> Epalati opa opi edla popa:le sotapo koko i natipame sikemte allimama yiskamu epo atlamiyaiyo, "A:ya i adipalati dakopala ullu ka:dleye koko pa:le dla simama me-pokadi?"

<sup>5</sup> Ya: ka:dena, dakopala ullu ka:depo pamalalo iye opa watle hamipame asiya mani pato hapo alisisi pa:talo so gadloweye," demyaiyo. Yia:ta epo atlemama a:yaye batalipo atlamiyaiyo.

<sup>6</sup> Amasiyama Yesuta yia: watle epo atlaiyo, "A:ya ita koko ha dla natipo ya:ye batalipo atlamiya. Adipalati, ya:tapo na: dla ka:dle koko halëpo. <sup>7</sup> Epedeme alisisi pa:talo sotapo

alila hapuloma dulu dla wua: mate ha:ha:lepe. Epalati wua:ta yia:ye gagademha:ha:lepe. Amasiyama na: alila hapuloma dulu dla wua: mate pohallowa. <sup>8</sup> Epedeme a:ya itapo ya:ta haleli dle kokoye na: dla halëpo. Ya:tapo na: motota wabasi dulu dla ellowe ye malamama dakopalata na: dla simalepo. <sup>9</sup> Na: wua: watle mikadepe koko atlema. Opata ta:lamo hadima ka:dle yu atlamtelepiye, yia:tapo a:ya ita koko halë ma atlamtelepe. Epalati opata ya: koko ma malamelepe.”

*Yudasta Yesu hamame iliwe yu ka:dle*  
(*Mat 26:14-16; Luk 22:3-6*)

<sup>10</sup> Epame Yesu ya: alotle tlalo so 12 dulu dla hallalo oplami hale Yudas Iskaliyotta aiyalma aya dokopala so watle tame Yesu hamame iliweye yu himiyo. <sup>11</sup> Epalati yia:ta yu i dalepame sikemte sisiyemama ya: watle asiyama mani hamilowe yu atlaiyo. Epalati Yudastapo Yesuye yia: do dla hamame iliwe api totamaiyo.

*Yesuta ya: alotle tlalo so mate Godta Namilatale daya dele*  
(*Mat 26:17-25; Luk 22:7-14, 21-23; Yon 13:21-30*)

<sup>12</sup> Isip mo tle alikili dla woyamale malamale daya dele kotiyamale alila dla Yu sota Godta Namilatale daya dele tatile dlowedeme sipi aliya haloye poyumdiyo. Epedeme Yesu ya: alotle tlalo sota Yesu watle epo atlaiyo, “Di hadima tame Namilatale daya dloweye dinapopa:?” diyo.

<sup>13</sup> Epalati Yesuta asiyama ya: alotle tlalo so dapiyamte tlo taiya demama epo atlaiyo, “Wua: Yelusalem dla tuwaiya. Wua: edla tuwame natilati oplami haleta yú tipo tamhallati umulepe. Wua: ya: umpame ya: dolumtelepe. <sup>14</sup> Wua: ya:ta tame aya dulu dla hetlati ha:ha:mama aya yo ikadepe watle ipo atellepe, ‘Imalalo oplamita ya: alotle tlalo so mate Godta Namilatale daya dlowe mo da:?’ dlepe. <sup>15</sup> Epalati ya:tapo aya alupoli pato di dla hallaloye wua: watle nati-ilipe. Wua: epalati dita Godta Namilatale daya dloweye edla dinapelepe,” diyo.

<sup>16</sup> Epalati Yesu ya: alotle tlalo so dapiyamteta Yelusalem dla ma-taiyo. Yia: tame natilati koko hapuloma Yesuta yia: watle atlamaletapo mepo hutiyela tlamaiyo. Epalati yia:tapo Namilatale daya dloweye edla dinapiyo.

<sup>17</sup> Epo ma tamila:la oloma edla Yesuta ya: alotle tlalo so 12 eleme puame aya dulu edla hetaiyo. <sup>18</sup> Yia: edla daya dempopa:mama Yesuta yia: watle epo atlaiyo, “Na: ikadepe koko wua: watle atlema. Wua: dulu dla oplami hale na: mate daya dempolatapo na:ye opahale do tama dla homellepe,” diyo.

<sup>19</sup> Yesu ya: alotle tlalo sota yu i dalepame dupa kolle mate popa:mama Yesu watle epo atlamyaiyo, “Na:ta:, na:ta:?” demyaiyo.

<sup>20</sup> Yesu asiyama yia: watle epo atlaiyo, “Wua:ta 12 dulu dla oplami antapo na: mate palita hatlope dla daya saodepo delepiye, oplami eta na:ye opahale do tama dla hamame ilipe. <sup>21</sup> Amasiyama God yu bukata atla e dolumama Opa Yamitapo polope. Amasiyama Opa Yami opahale do tama dla homallalo oplamiye wolomape. Ya: wotiyalle dulu dla tullupe. Epapalala depame ya: waita ya:ye pohamalalo wekematiye, eta ya: ka:dlemla.”

*Lod malamale daya dele*  
(*Mat 26:26-30; Luk 22:19-20*)

<sup>22</sup> Yia: daya dempopa:lati Yesu daya hame God watle siyele yu atlepame daya hauwokomaiyo. Epame ya: alotle tlalo so watle alemama epo atlaiyo, “Daya halopo deiya. Iye na: motopo,” diyo.

<sup>23</sup> Epame Yesu matle isilako hapame God dla siyele yu atlepo gudepame ya: alotle tlalo so watle hamiyo. Epalati yia:ta hapulomata yú deiyo. <sup>24</sup> Yesu ma epo atlaiyo, “Iye na: omalipo, opa hapuloma yia: bobtalimale howahalowe yilo dla olostapo. Na: omali itapo Godta opa mate yu itiyapo himili amkoye kokalepo. <sup>25</sup> Epedeme na: ikadepe koko wua:



watle atlema. Na: wata oloma itle tamama wain yú matle podlowa. Amasiyama alotle God ya: mo dla wain yú amkoye dlowepo.”

<sup>26</sup> Epame yia:tapo siyele sala sepo gudepo ma Olipi tamali dla taiyo.

*Yesuta Pitata ya: welilowe kokoye atlale  
(Ma:t 26:31-35; Luk 22:31-34; Yon 13:36-38)*

<sup>27</sup> Yesuta matle ya: alotle tlalo so watle epo atlaiyo, “Wua:ta hapulomata na: saliyome potlepe. Adipalati, God yu bukata epo atlapo, ‘Godtapo sipi omhallalo oplamiye yumulati sipi hapulomata ya: tle potlepe,’ depo.”

<sup>28</sup> Epame Yesu ma epo atlaiyo, “Amasiyama na: powale tle ma sila:tipame na: tatile tame Ga:lili dla wua: omhallowepo,” diyo.

<sup>29</sup> Epalati Pitata asiyama Yesu watle epo atlaiyo, “Opa hapulomatapo wa: salepame potlepiye, asiyama hatlo na: tlo wa: posaliyome tlowa,” diyo.

<sup>30</sup> Amasiyama Yesuta ya: watle epo atlaiyo, “Na: wa: watle ikadepe koko atlema. Wata utula:la gagapota dapiyamte oloma dla ala poyulumalalo hallati wa:tapo na: kokoye dapahatlope oloma dla wellipe,” diyo.

<sup>31</sup> Amasiyama Pitata Yesu yu ipi dla yu itiyamale mate epo atlaiyo, “Na: pe-epapolowa. Opata wa:ye yumama yumilipiye, na: wa: mate polowepo,” diyo. Epalati ya: alotle tlalo so hapuloma ma yu hatlo me-epo atlamyaiyo.

*Yesuta Getsemani osalo dla inoma sumhalale  
(Ma:t 26:36-46; Luk 22:39-46)*

<sup>32</sup> Epame Yesu ya: alotle tlalo so mate Getsemani osalo dla tamalaiyo. Epame Yesuta yia: watle epo atlaiyo, “Na: tame inoma sumhallati wua: hema ompopa:iye,” diyo.

<sup>33</sup> Ya: epame isikimi Pita epo Yeims epo Yon tlo eleme hetaiyo. Ya: edla hetame hallati dupa kolle mate opasi upiyele mateta ya: dla puaiyo. <sup>34</sup> Epalati ya: Pita wolo watle epo atlaiyo, “Na: opasi duluye upiyele patota hetamama polowe mateka:pi dla puma. Epedeme wua: hema ha:ha:mama omha:ha:iye,” diyo.

<sup>35-36</sup> Epame ya: yia: tle yimka:mala alikili dla tame alumata ta:la dla kellepo polomama ipo inoma sumpolaiyo, “A, koko hapulomaye wa: dla pokokalena. Epedeme wa: solotamelepiye, wotiyalle pato na: dla puaye alikili dla hamastane. Amasiyama pona:ta solotamale koko, wa:ta solotamale koko tlo hane.”

<sup>37</sup> Yesu inoma sumhalepo tame natilati ya: alotle tlalo so dapahatlopeta mo-hutiyela natiyo. Epalati natipame Pita watle epo atlaiyo, “Saimon, wa: adipalati elema:? Wa: poka:deta:, alila yimka:mala dla na: mate inoma sumhalloweye? <sup>38</sup> Epedeme wua: omha:ha:mama inoma sumha:ha:iya, wua:tapo elemala natili dulu dla tullala depame. Adipalati, soko wua: dulu dla halatapo solotamapo, itiyamolowedeme. Amasiyama wua: motota hopeyamapo.”

<sup>39</sup> Epame Yesu matle tame ya:ta ka:yapa inoma sumale yu atlamale hatlo metlo mamisika: atlamaiyo. <sup>40</sup> Epo matle ilampuame natilati ya: alotle tlalo so dapahatlopeta inoma teta:mama mo-hutiyela natiyo. Epapele dulu dla yia:tapo yiyelepame wowota:mama Yesu watle yu hale atlowe pa:iyo.

<sup>41</sup> Epame Yesu matle tame inoma sumhalepo ilampuame natilati ya: alotle tlalo so dapahatlopeta ma hutiyela natiyo. Epalati yia: watle epo atlaiyo, “Wua: ala me-sikemte hutiyepa? Wua: hutiyepa mogudiya. Adipalati, Opa Yamiye batalimale so dla hamame iliwe alilata mo-puapo. <sup>42</sup> Epedeme huma natiya, na: batalimale so watle hamame iliwe oplamiye mo-puapo. Epedeme wua: silliya, medla tlowa.”

*Opata Yesu yumuluwedeme hamame tale  
(Ma:t 26:47-56; Luk 22:47-53; Yon 18:3-12)*

<sup>43</sup> Yesu ala me-yukamhallati ya: alotle tlalo so oplami hale Yudastapo Yesu hamolowe so opa elempuame edla woyamaiyo. Epapeleye Yesu hamolowe so opa iwoloye aiyalma aya dokopala so mate epo Yu so dokopala so mateta taiya diyo. Epalati yia:ta pumama aipa:ya mate epo bulukupi mate halopo puaiyo.

<sup>44</sup> Epapele dulu dla Yudasta ala puluwedeme halemama Yesu hamolowe so watle epo atlaiyo, “Wua: na:ta tame oplami hullupiye, oplami epo. Wua: epalati ya:ye woloma hamame taiye,” diyo. <sup>45</sup> Epedeme Yudas opa me-eleme puame halemama Yesu hala dla tame epo atlaiyo, “Namkale, imalalo oplami” depame ya:ye huliyo. <sup>46</sup> Epalati opata Yesu ma-hamaiyo.

<sup>47</sup> Amasiyama ya: alotle tlalo so oplami haleta aipa:ya hame aiyalma aya dokopala oplami ya: oko oplami haleye heyumama molo ketamastaiyo.

<sup>48</sup> Epame Yesuta ya: hamala puale so opa watle epo atlaiyo, “Wua: na: uhalalo oplamita hallati natipame na:ye hamolowedeme aipa:ya mate epo bulukupi mate halopo pumulo? <sup>49</sup> Amasiyama wua: na:ye alila hapuloma aiyalma aya dulu dla im-sela:la natimduwapo. Ame wua: adipalati na:ta edla hallati pohamalalo wekemduwa? Epele tlope wua:ta na: hamala puale kokotapo God tle yu hapame molo atlamalalo sota atlamale yu mate ma-ala:po.”

<sup>50</sup> Epalati ya: alotle tlalo so hapulomata ya: saliyome mo-potaiyo. <sup>51</sup> Epapele dulu dla kipiliyemala haleta tluka siyapo tlo polupo Yesu hamame tlati alotle dolumtaiyo. <sup>52</sup> Epalati opata ya: hamolowedeme tluka dla hamalati ya: tluka tlo yia: dla pomelepo ya: tlo tidali siyapo teletaiyo.

*Yesuye dokopala so hala dla koko gladlowedeme hamamhetale*

*(Mat 26:57-68; Luk 22:54-55, 63-71; Yon 18:13-14, 19-24)*

<sup>53</sup> Opata Yesuye aiyalma aya dokopala oplami aya dla hamame hetaiyo. Epalati aiyalma aya dokopala so mate epo Yu so dokopala so mate epo aiyalma imalalo so mateta aya edla alumaiyo.

<sup>54</sup> Epalati Pitata alo ikadepe tle Yesu dolumtame aiyalma aya dokopala oplami aya alikili tle halaiyo. Ya: edla halemama aya e oko so mate kakapumalati dlapa tilimpopa:iyo.

<sup>55-56</sup> Epalati aiyalma aya dokopala so mate epo Yu so dokopala so mate Yesu yumuluwedeme ya: batalimale totamaiyo. Epammama opata isikimi Yesu hi mate mala-atlamyemama koko meyelope meyelope dle atlamyaiyo. Amasiyama yia:ta koko meyelope meyelope dle atlamyale dulu dla ikadepe koko hale ponatiyo, yia:tapo Yesu yumuluweye.

<sup>57</sup> Epalati opa opita sillipame Yesu hi mate ipo mala-atlamyaiyo, <sup>58</sup> “Di oplami ita ipo atla daluwa, ‘Na: opata halë aiyalma aya iye dokostepo ma alila dapahatlope dulu dla opata dota pahalalo wekele aiyalma aya amko halowepo’ duwa.” <sup>59</sup> Amasiyama yia:ta yu meyelope meyelope dle atlamyale dulu dla ikadepe koko ponatiyo.

<sup>60</sup> Epalati aiyalma aya dokopala oplamita opa alumale dulu tle sila:tipame halemama Yesu watle epo atlaiyo, “Wa: opata wa: koko dla yu meyelope meyelope dle atlamya dla asiyama yu po-atlalo wekepa:?” diyo. <sup>61</sup> Amasiyama Yesuta ya: watle asiyama yu hale po-atlaiyo. Epalati aiyalma aya dokopala oplamita matle ya: watle epo atlaiyo, “Wa: God Yami Kelisota:?” diyo.

<sup>62</sup> Yesu asiyama epo atlaiyo, “Yao, na:po. Epedeme wua: Opa Yamiye ya: A God dowala tiyama dla polla natilipe. Epame ya:tapo pepele di wuala dulu tle malla natilipe,” diyo.

<sup>63</sup> Aiyalma aya dokopala oplamita yu i dalepame sikemte alimama ya: tluka tallatal-lademama epo atlaiyo, “Oplami iye God hi mate putlopo atlema. Epedeme di ya: koko gladlowe dla ma yu opi dlallowe posolotamasema. <sup>64</sup> Adipalati, wua: ma-dallepo, ya:ta God hi mate putlopo atlaleye. Epedeme wua: apa koko ya: dla halowe solotama:?” diyo.

Epalati Yu so dokopala so hapulomata epo atlamyaiyo, “Yesuye pta batalimale oplami. Epedeme ya: polowe ka:dena,” demyaiyo. <sup>65</sup> Yia: epo atlapame Yesu dla tetlemyemama ya: watle mitikape tilitimyaiyo. Epalati opita Yesu inoma bopudepame ya: heyulumyemama epo atlamyaiyo, “Anta wa:ye heyu?” demyaiyo. Epame aiyalma aya dokopala oplami ya: oko sota Yesuye hopoliyo.

*Pitata Yesu welli koko*

*(Mat 26:69-75; Luk 22:56-62; Yon 18:15-18, 25-27)*

<sup>66-67</sup> Pita ala dlapa me-timpollati aiyalma aya dokopala oplami ya: gadlalo a:ya haleta puame Pita malanatipame ya: watle epo atlaiyo, “Wa: ma Nasalet oplami Yesu mate sela:uwa hale wa:po,” diyo.

<sup>68</sup> Epalati Pitata koko eye isikimi demama asiyama epo atlaiyo, “Na: pona:malamana, wa:ta atla oplami kokoye,” diyo. Pita epo atlepo ma ya: tle alikili a:ma teletaiyo. Epalati oloma edla gagapota ka:yapa yulumaiyo.

<sup>69</sup> Epame a:ya hatlo meta matle Pitata opa opi mate halla natipame yia: watle epo atlaiyo, “Oplami iye Yesu mate sela:uwa hale ya:po,” diyo. <sup>70</sup> Amasiyama Pitata koko eye ma isikimi demama epo atlaiyo, “Na: oplami e kokoye pona:malamana,” diyo.

Epame opata ma yimka:mala ha:ha:po Pita watle epo atlaiyo, “Ikadepe, wa: ma Yesu mate sela:uwa oplami hale wa:po. Adipalati, wa: mape Ga:lili oplamipo,” diyo. <sup>71</sup> Epalati Pitata yu itiyamale mate koko eye isikimi depo God hi tle aiyalma semama yia: watle epo atlaiyo, “Na: pona:malamana, wua:ta atla oplami e ya: kokoye,” diyo.

<sup>72</sup> Pitata epo atlepo hallati gagapota dapiyamte oloma dla yulumaiyo. Epalati Pitata Yesuta ya: watle atlale yu i malamaiyo, “Wa: gagapota yulumale ala podapiyamte dlalo hallati wa: na: kokoye dapahatlope oloma dla wellipe.” Epapedeme ya: yu i malapame dupa kolle pato hapame sikemte amaiyo.

## 15

*Yesu Paelet watle hamame hetale*

*(Mat 27:1-2, 11-14; Luk 23:1-5; Yon 18:28-38)*

<sup>1</sup> Epedeme utulala ikadepe aiyalma aya dokopala so mate epo aiyalma imalalo so mate epo dokopala so opi hapuloma mate esempopaiyo. Yia: esepo gudepame Yesu doye deata kokotipoliyepame gamani oplami Paelet hala dla semtaiyo.

<sup>2</sup> Epalati Paeletta Yesu natipame ya: watle epo atlaiyo, “Wa: ikadepe Yu so dokopala oplamita:?” diyo. Epalati Yesuta asiyama epo atlaiyo, “Yao, wa:ta atla hatlo mepo,” diyo. <sup>3</sup> Epalati aiyalma aya dokopala sota Yesu dla batalipo atlamyemama ya: watle batalimale pasatale oplami demyaiyo. <sup>4</sup> Epalati Paelet ma Yesu watle epo atlaiyo, “Wa: opata wa: koko dla yu meyelohe meyelohe dle atlamyaye podallalo wekema:?” diyo. <sup>5</sup> Amasiyama Yesu yia: watle yu hale po-atlaiyo. Epalati Paeletta koko e natipame sikemte yeliyo.

*Paeletta Yesu tlo alikili dla hamame woyamolowedeme solotamale*

*(Mat 27:15-26; Luk 23:13-25; Yon 18:39-19:16)*

<sup>6</sup> Sokomoko hapuloma dulu dla Paeletta Yu sota sisiyelepo depame Godta Namilatale daya dele oloma edla opata solotamale oplami haleye amtuwale aya dulu tle hamame alikili dla woyamdiyo.

<sup>7</sup> Epapeleye oloma edla oplami hale ya: hi Balabasye amtuwale aya dulu dla halaiyo. Adipalati, ya: ka:yapa yimkadulo mate Loum gamani so opa mate natalimama oplami hale yumiyoye.

<sup>8</sup> Epedeme opa hapulomata puame Paelet watle epo atlaiyo, “Wa: amtuwale aya dulu dla hallalo oplami hale alikili dla hamame woyamdepo. Epedeme wa: ma sokomoko hema oplami hale alikili dla hamame woyamane,” diyo.

<sup>9-10</sup> Epele dulu dla Paelet mo-malanatiyo, Yu so dokopala sota Yesu dla sikemte elle himimama ya: watle hamame pualeye. Epammama ya:ta opa hapuloma watle epo atlaiyo, “Wua: solotama:, na:ta wua: dokopala oplami Yesu tlo alikili dla hamame woyamoloweye?” diyo. <sup>11</sup> Amasiyama aiyalma aya dokopala sota opa hapuloma watle ha:ha:limyemama epo atlamyaiyo, “Paelet watle atlemama, ‘Yesu tlo yum mama Balabas tlo alikili dla hamame woyamane,’ diya,” demyaiyo.

<sup>12</sup> Epalati Paeletta koko i dalepo yia: watle epo atlaiyo, “Na:ta Balabasye amtuwale aya tle alikili dla hamame woyamelepiye, ame na: Yesu, wua:tapo wua: dokopala oplami demdiye, adipapopa:?” diyo. <sup>13</sup> Epalati yia:ta asiyama Paelet watle epo atlamyaiyo, “Ya:ye dali yekelehmihili di dla gogodiya,” demyaiyo. <sup>14</sup> Epalati Paelet asiyama yia: watle epo atlaiyo, “Wua: ya:ta apa batalimale koko halë hallati natipame ya:ye yumuluwedeme amma:?” diyo. Amasiyama opa hapulomata sikemte yu sisikalle mate epo atlamyaiyo, “Ya:ye dali yekelehmihili di dla gogodepo himiya,” demyaiyo.

<sup>15</sup> Epalati Paeletta opa hapulomata sisiyelepo depame Balabasye amtuwale aya tle alikili dla hamame woyamaiyo. Epame ya: opa watle asiyama Yesuye tuwale dea mate hopolepame dali yekelehmihili di dla gogodiya diyo.

### *Opahale sota Yesu tetlemyale*

*(Mat 27:27-31; Yon 19:2-3)*

<sup>16</sup> Epalati opahale sota Yesuye tuwale dea mate hopolepo Paelet aya dukuslopi haliya-male dla hamame hetaiyo. Epame edla opahale so opi hapuloma sisilapo alumaiyo. <sup>17-18</sup> Yia: edla alupo Yesuye tetlemyelowedeme patoto sota didiyelalo tluka omteka:ple selemalli asiyomeliyo. Epame tuwale dea tipo ya: dokopala dla asiyomelepame epo atlamyaiyo, “Yu so dokopala oplami dla heodepo sisiyeiya,” demyaiyo. <sup>19</sup> Epame bulukupita Yesu dokopala dla hohopolemyemama ya: watle mitikape tilitimyaiyo. Epo tetlemyemama ya: dla alumata ta:la dla kellepo heoheodlalimyaiyo. <sup>20</sup> Epo gudepame opahale sota ya: tluka omteka:pele asiyomelleye pustapame ma ya: tluka ikadepeye asiyomeliyo. Epame Paelet aya tle Yesu ma-hamame dali yekelehmihili di dla gogodlowedeme semtamalaiyo.

### *Yesu dali yekelehmihili di dla gogodle*

*(Mat 27:32-44; Luk 23:26-43; Yon 19:17-27)*

<sup>21</sup> Opahale sota Yesu edla hamame tamha:ha:mama Kulene oplami hale ya: hi Saimonye api duka dla Yelusalem dla pumhalla umaiyo. Epalati yia:tapo ya:ye hampame “Yesu dali yekelehmihili hamtane,” diyo. Saimon iye Alesenda mate Lupus mate yia: ayo.

<sup>22</sup> Yia: Yesu hamame Golgota mo dla taiyo. Mo hi ya: dulu kokoye dokopala elo.

<sup>23</sup> Epame edla semtame ha:ha:mama oplami haleta Yesu watle wain yúye wotiyalle pa:lalo yú mate dukupo hamiyo. Amasiyama Yesu yú e dloweye aliyo.

<sup>24-25</sup> Epame salita mo-kokalem tlati opahale sota Yesuye dali di dla mo-gogodepo himiyo. Epo yia:tapo Yesu tluka hukulupo halomolowedeme yia: dulu dla ewala mate tatipiyele hale tatipiyeyiyo. <sup>26</sup> Epame oplami haleta yia:ta Yesu yumili sitali kokoye opata natilipo depame Yesu dokopala di dla yu ipo ilipo badiyo,

YU SO DOKOPALA OPLAMI

<sup>27</sup> Epame uhalalo so opa dapiyamte mape dali yekelehmhatitimale di dla gogodlalmiyo, haleta ya: dowala tiyama dla epo haleta ya: weke tiyama dla diyo. [ <sup>28</sup> Epedeme God yu bukata epo atlapo,

“Ya:ye uhalalo oplami some polope.”

Epeleye Yesutapo uhalalo oplami some mo-polowedeme elemama yu iye mikadepe duwapo.]

<sup>29</sup> Epalati opata api tle tetla:po tamhalemama Yesu natipo yia: dokopala popokalimyemama ya: watle batalipo tetlemyaiyo. Epamyemama ya: watle epo atlamyaiyo, “Wa: ipo

atluwapo, ‘Na:tapo aiyalma ayaye dokostapame ma alila dapahatlope dulu dla amko halepe’ duwapo. <sup>30</sup> Epedeme wa: dali yekelehmihili di tle malame wa:skamu wa: gadene,” demyaiyo.

<sup>31</sup> Epame aiyalma aya dokopala so mate epo aiyalma imalalo so mate yia: mape yiskamu yia: dulu dla Yesu tetlemyemama epo atlamyaiyo, “Ya:ye opa opi tlo gagadem-sela:mduwapo, amasiyama ya: wata ya:skamu pogadesema. <sup>32</sup> Epame ya:ye ikadepe Keliso, di Isalael so dokopala oplami dlepiye, ya: dali yekelehmihili di tle mollowe ka:pi. Di eta ya:ta malla natipame ya: dla mikadepe dlowepo,” demyaiyo.

Epame uhalalo so opa dapiyamte Yesu mate dali yekelehmihili di dla gogodle so mape ya: watle putlopo atlamyemama tetlemyaiyo.

### *Yesuta powale koko*

*(Mat 27:45-56; Luk 23:44-49; Yon 19:28-30)*

<sup>33</sup> Sali mo-dukuslopi dla hallati mo patota motiti tumama sali inoma dapahatlope pololiyo. <sup>34</sup> Epame motiti tuwaleta ma hawa hallati Yesuta yu teta:le mate epo sisilamaiyo, “*Ilai, Ilai, lama sabakatani.*” Yu i dulu kokoye ipapena, “Na: God, na: God, Wa: adipalati na: melema:?”

<sup>35</sup> Epalati opa mateka:pi dla ha:ha:leta Yesuye semte Ilaya sisilamapo depame epo atlamyaiyo, “Wua: daliya, ya:ye Ilaya sisilamapo,” demyaiyo. <sup>36</sup> Epame oplami haleta dali selemalli ipi dla tluka polupo wain yú haka:le dla saodepame Yesu mati dla haiyeiyo, ya:tapo delepo depame. Ya: epame epo atlaiyo, “Di ya:ye Ilayata puame hamame tulluwe depame aseka me-omha:ha:lowa,” diyo.

<sup>37</sup> Epame oloma edla Yesu yu sikemte di dla teta:pame powaiyo.

<sup>38</sup> Epalati Yesuta powale oloma edla aiyalma aya dulu dla tluka deiyamaleta komaleye di tle tallademtulume isili dla gudiyo.

<sup>39</sup> Epame opahale so omhallalo oplamita Yesu dali yekelehmihili isili dla halemama Yesuta powale kokoye woloma natipame epo atlaiyo, “Ikadepe, oplami iye God Yamipo,” diyo.

<sup>40-41</sup> Epame wola: opi Yesu mate Ga:lili tle pumulale sota pateka:mu tle Yesu dali yekelehmihili di dla ellati omha:ha:iyo. Alumale dulu edla ha:ha:le so wola:ye Meli Magadalin mate epo Meli hale (Yeims yimka:mala mate Yosep mate yia: wai), epo Salome matepo. Epeleye wola: dapahatlope iwoloye Yesu mate Ga:lili dla siyamama Yesuye gademsiyamaiyo.

### *Yesu wabasi dla hamatili*

*(Mat 27:57-61; Luk 23:50-56; Yon 19:38-42)*

<sup>42-43</sup> Epame ma tamila:la oloma edla Yosep Alimatiya oplamita Paelet hala dla taiyo. Ya: mape Yu so dokopala oplami hale halemama God ya: mo kokota puluwe dla omhalaiyo. Epeleye Yu so inoma sumalalo alila umuluwe mo-mateka:pi hallati ya:tapo powota:lalo Paelet watle Yesu moto hame tlowedeme tame daliyo. <sup>44</sup> Amasiyama Paeletye Yesuta mo-powale yu dalepame sikemte yelepame ya: opahale dokopala oplami sisilapame ya: watle epo atlaiyo, “Yesu mo-pouwo de, mikadepeta:?” diyo. <sup>45</sup> Epalati asiyama yuye ya: opahale dokopala oplamita atla dalepame Yosep watle “Yesu motoye hamtane,” diyo.

<sup>46</sup> Epalati Yosepta tame tluka selemalli hapo Yesu moto dali yekelehmihili tle hamtulume tlukata poliyo. Epame Yesu motoye hamtame tei seselemale dulu dla wabasi muwalle dla hamatiyo. Epo ewala patota kokolum-malame tulalo api himomeliyo.

<sup>47</sup> Amasiyama Meli Magadalin mate epo Meli Yosep ya: wai mateta Yesu moto hamatili moye me-natiyo.



## 16

*Yesu ma wabasi dulu dla pe-elasema  
(Mat 28:1-8; Luk 24:1-12; Yon 20:1-10)*

<sup>1</sup> Epame Yu sota inoma sumalalo alilata tamila:la ma-tame mogudlati Meli Magadalin mate epo Meli Yeims ya: wai mate epo Salome mate ka:depo ullu pamalalo dakopala Yesu moto dla huhutupiliyelowe halomaiyo. <sup>2</sup> Epame Sande alila utulala ikadepe sali mo-matamhallati yia: Yesu wabasi natila taiyo. <sup>3</sup> Yia: tamalemama epo atlamtaiyo, “Ewala pato wabasi tulalo api himomelleye, anta alikili dla kokolustlowe?” demtamalaiyo.

<sup>4</sup> Amasiyama yia: tame natilati ewala pato eye mo-kokolustale halla natiyo. <sup>5</sup> Epalati wola: ewolota wabasi dulu dla tuwame yia: dowala tiyama dla natilati kipiliyemalata tluka kamkamale selemalli asiyame polla natipame sikemte wowota:iyo.

<sup>6</sup> Amasiyama ya:ta yia: watle epo atlaiyo, “Wua: ase sikemte wowota:miya. Na:malamana, wua:ye Yesu Nasalet oplami dali yekelehmihili di dla gogoduwaye totamsiyamapo. Amasiyama ya:ye hema hawa. Wua: puame ya:ta elale natiya. Ya: hema pe-elasema. Ya: powale tle mo-sila:time hetana. <sup>7</sup> Epedeme wua: tame Pita mate epo Yesu ya: alotle tlalo so opi mate dla atlaiye, yia:tapo Ga:lili dla telepo depame. Adipalati, Yesuye ya: tatile tame Ga:lili dla yia:ye ompolapo. Epedeme yia: tame Ga:lili dla Yesuye natilipe. Adipalati, Yesuta ka:yapa yia: watle koko iye ma-atluwapo.”

<sup>8</sup> Epalati wola:tapo wabasi tle wowota:le mate ullumtamalemama eseselalalimtamalaiyo. Amasiyama yia: api duka dla tamalemama oplami hale po-atlaiyo. Adipalati, yia: sikemte wowota:le mate tamalaiyo.

*Yesuta ka:yapa opa opi watle tame woyamale  
(Mat 28:9-10; Yon 20:11-18)*

<sup>9</sup> Yesuta Sande alila utulala ikadepe powale tle sila:tipo ya: ka:yapa Meli Magadalin hala dla tame woyamaiyo. Meli iye Yesuta ka:yapa ala popolalo sela:mama bataliya yimlala 7ye ya: tle alikili dla dodolomsaliyo. <sup>10-11</sup> Epeleye Meli itapo Yesu natipame tame Yesu mate siyamale so opa dupa kolle mate a:lempopa:lati yia: watle epo atlaiyo, “Na: Yesuye powale tle ma-sila:time sela:la nati,” diyo. Amasiyama yia:tapo ya: yu dalepame pomikadepe diyo.

<sup>12</sup> Epo ma alotle Yesuta ya: mila:pi meyeloje depo ya: mate siyamale opa dapiyamte api duka dla tamha:ha:lati tame woyamaiyo. <sup>13</sup> Epalati ma opa dapiyamte iwolota yia:ta Yesu natiliye tame opa Yesu mate siyamale watle atlamalati yia:tapo yia: yu dla ma pomikadepe diyo.

*Yesuta ma ya: alotle tlalo so 11 dla tame woyamale  
(Mat 28:16-20; Luk 24:36-49; Yon 20:19-23; Taiya 1:6-8)*

<sup>14</sup> Epame alotle Yesu ma ya: alotle tlalo so 11ta daya dempopa:lati tame woyamaiyo. Epame yia: watle yu itiyamale mate epo atlaiyo, “Wua: mikadepe dle pa:talo sopo. Wua: adipalati opa opita ka:yapa na: natipo puame atlamalati edla pomikadepe dlalo weki?” diyo.

<sup>15</sup> Yesu ma yia: watle epo atlaiyo, “Wua: ta:lamo pato dla tame ka:dle yuye opa hapuloma dla atlamsiyamaiya. <sup>16</sup> Epedeme oplami antapo ka:dle yu dla mikadepe depo yu dla tullupiye, ya:ye kokó elepo ellalo pasakalo halepe. Amasiyama oplami antapo ka:dle yu dla pomikadepe dlalo wekelepiye, ya:ye Dlapa mo dla ka:stlepe.

<sup>17</sup> Epame ka:dle yu dla mikadepe dle sota na:ta itiyamale mate ulugiyemale koko halomsiyamelepe. Epedeme yia:tapo bataliya yimlalaye na: hi tle alikili dla dodolom-salemsiyamelepe, epo ulugiyemale yu mate yuhamyelepe, <sup>18</sup> epame yia:tapo ilama dota hohomsiyamelepe, epame yati dala dlomelepiye, yia: popalliwa, epame yia: dota esusulumale soye hohomsiyamalati esusulumale sota ma-ka:ka:dlalimelepe.”

<sup>19</sup> Lod Yesuye yu i atlemhalepo gudlati Godta itiyamaleta ya:ye Pepele dimo dla hamame hetaiyo. Epame ya: God ya: dowala tiyama dla polaiyo.

<sup>20</sup> Epalati Yesu ya: alotle tlalo sota Yesu yu dolumama ta:lamo pato dla ka:dle yu atlamtaiyo. Epalati Lodta yia: mate hallati ulugiyemale koko halomsiyamaiyo, opata ka:dle yu dla dlalepo mikadepe dlepo depame.]

## Ka:dle molo atlale yu Lukta ilimale Luk Luk buka ya: dulu koko

Oplami Luk iye po-Yu oplami epame po-Yesu alotle tlalo oplami. Amasiyama ya:ye tuwale siyomalalo tiyama tle dokota oplami halemama ya:mkale Polota God yu ham-sela:lati ya: mate sela:iyo. Koko pato Lukta buka hema ilimaleye ipapena. Eye, Yesutapo hatlo Yu so tlo gadlowedeme popuana. Amasiyama ya:tapo Yu so mate epo ta:lamo so hapuloma mate gadlowedeme puwapo. Epame wotiyalle dulu dla ha:ha:lalo so mate epo dupa kolle dulu dla ha:ha:lalo so mate gadlowedeme puwapo. Epame Yesuta opa imsula:le kokoye ya: buka hema ilimuwapo.

<sup>1-2</sup> Godta dia: dulu dla oko hamhaluwaye opa opitapo kotiyamale tle koko e tlapame yia: ma God oko hamama opa dulu dla koko eye atlamsiyamuwapo. Yia:ta atlamsiyama koko eye di ma me-daluwa. Epalati ma opa opitapo ikadepe yo dlalle so mate epo koko e tlamale so mateta atlamala dalepame yia: koko eye buka dla ilalimuwapo. <sup>3-4</sup> Epedeme na: ma koko hapuloma eye na:ta woloma kotiyamale tle malastademe na: mape yu iye woloma ilima. Epapedeme Tiyopoles namkale, wa:ta daluwa koko eye wa:ta woloma ikadepe koko dlepo depame na:ta wa: watile yu ilimale iye hamima.

### *Yon opa yú dla ka:ka:timalalo hamolowe kokoye botomastale*

<sup>5</sup> Helodta Yudiya mo dla dokopala oplami halale oloma edla God ka: epo opa ka: duka dla hallalo oplami hale halaiyo, ya: hiye Sekalaya. Ya: God ka: epo opa ka: duka dla ha:ha:lalo so alumale hale Abiya alumale dulu dla halaiyo. Epo ya:llu hiye Elisabet, ya: ma A:lon ya: asiyapo. <sup>6</sup> Epapeleye Sekalaya mate Elisabet mate God mila:pi tle woloma ka:ka:depo ha:ha:mama Godta molo atlale yu woloma dolumha:ha:iyo. <sup>7</sup> Amasiyama yia: yimlala hawa ha:ha:iyo. Adipalati, Elisabet ya:ye hamkapi a:ya polomama ma-alluyemala halaiyo. Epalati Sekalaya mape mo-totoyemala halaiyo.

<sup>8</sup> Alila haleta Sekalaya ya: alumale sota oko halowe alilata pulati Sekalayata Yu so aiyalma aya dla hetame God mila:pi tle halemama oko hamhalaiyo. <sup>9</sup> Epalati God ka: epo opa ka: duka dla ha:ha:lalo sota yia: dulu dla oplami hale hulumulowedeme ewala mate tatipiyele hale tatipiyemdiyo. Epapedeme yia:ta yia: dulu dla epo ewala mate tatipiyemama Sekalayata tla:mtaiyo. Epalati yia:ta Sekalayaye Lod ya: aiyalma aya dulu dla ullu ka:dle seyamale ha:lepo depame hulumaiyo. Epedeme Sekalayata Yu so aiyalma aya dla hetame ullu ka:dle seyamale ha:mhalaiyo. <sup>10</sup> Epame ya:tapo ullu ka:dle seyamale ha:mhallati opa hapulomata aiyalma aya alikili tle ha:ha:mama inoma sumha:ha:iyo.

<sup>11</sup> Sekalayaye aiyalma aya dulu dla me-hallati God ya: banakaka oplamita ullu ka:dle seyamale ha:lalo tile dowala tiyama dla woyame halaiyo. <sup>12</sup> Epalati Sekalayata banakaka oplami natipame sikemte yelepame wota:iyo. <sup>13</sup> Amasiyama God ya: banakakata ya: watile epo atlaiyo, "Sekalaya, wa: ase sikemte wota:miya. Godta wa:ta inoma sumhaluwaye ma-daluwapo. Wa: allu Elisabetta mopapo polopame maseyemala hamelepe. Epalati wa:tapo maseyemala ya: hiye Yon dlepe. <sup>14</sup> Ya:tapo wa: dla siyele hampulupe, epame opa hapulomata ya: hamalati sisiyelepe. <sup>15</sup> Adipalati, ya:tapo Lod mila:pi tle pato oplami hallepe. Epedeme ya:tapo kawata yú podlowa. Amasiyama ya:ye ya: waita ya: hamale tle kotiyapo Hela:dle Sokota pasatepo hallepe. <sup>16</sup> Ya:tapo Isalael soye mamisika: Lod yia: God hala dla elempulupe. <sup>17</sup> Ya: Ilayata itiyamale mate haluwa epapele some halemama Lodta puluwedeme hallati ya: tatile olomasepele pulupe. Epame ya:tapo opaye Lodta pua koko dla dinapomama adulo mate yia: yimlala

mateye sadle koko dla elempulupe. Epame ya:tapo God yu dla posalladepo siyamalalo sota malamaleye ma ka:dle koko halowe malamale dla elempulupe.”

<sup>18</sup> Amasiyama Sekalayata God ya: banakaka oplami watle epo atlaiyo, “Na: apa koko natipame wa:ta atla kokoye ikadepe depa:? Adipalati, na:ye mo-totoyemala halapo, epame na: a:ya ma ma-alluyemala polapo,” diyo.

<sup>19</sup> God ya: banakaka oplamita asiyama ya: watle epo atlaiyo, “Na: hiye Ga:ibilyelipo. Na:ye God mila:pi tle halemdepo. Godtapo na:ye tulune de, na:tapo wa: watle ka:dle yu iye atlepo depame. <sup>20</sup> Amasiyama wa: dalene, wa: yu pa:le oplami depa hallepe. Adipalati, wa: na: yu dla pomikadepedesema. Epedeme wa: yu pa:po hallati na:ta wa: watle atlamale koko ita wowoyamolowe alilata umulati edla natipame matle yukamelepe,” diyo.

<sup>21</sup> Sekalayata aiyalma aya dulu dla halemama kokó dlati opa hapulomata alikili dla omha:ha:mama epo atlamyaiyo, “Ya: apa koko hamhalemama amma:?” demyaiyo.

<sup>22</sup> Epalati Sekalayata aiyalma aya tle matime poyukamalalo halemama isikimi do yu mate atlamaiyo. Epalati opata koko e natipame momalamaiyo, “Ya:ye aiyalma aya dulu dla halemama inomata meyelope dlati ulugiyemale koko tlamayo,” diyo.

<sup>23</sup> Sekalayata aiyalma aya dulu dla oko hamhalale alilata mo-puame gudlati ya: ma ilame ya: mo dla taiyo. <sup>24</sup> Alotle Sekalaya ya:llu Elisabetta mopapo pollati mama 5 dulu dla ya:ta hatlo ya: aya dulu dla halaiyo. <sup>25</sup> Epame Elisabetta ya:skamu epo malamdiyo, “Lodta na: gaduwapo, epame ya:tapo na:ta opa mila:pi dla hamkapi polo-mama wota:mduwaye ma-hamastauwapo,” demdiyo.

### *Yesu hamolowe kokoye botomastale*

<sup>26-27</sup> Elisabetta mopapo polaleye mama 6 mo-pololepo hallati Godta ma ya: banakaka oplami Ga:ibilyelye tulune diyo, homta pollalo ipilalo Meli watle. Meliye Ga:lili mo pato dulu dla Nasalet mo dla hallalo a:yayo. Epapeleye Deibidi mate asiya hatlope oplami haleta Meli halowedeme halaiyo, ya: hiye Yosep. <sup>28</sup> Epeleye God ya: banakaka oplamita tulume Meli watle epo atlaiyo, “Namkale, Godta sale a:ya wa:po. Godta wa: mate halapo,” diyo.

<sup>29</sup> Meli yu i dalepo yelepame yu i ya: dulu kokoye sikemte momalamaiyo. <sup>30</sup> Amasiyama God ya: banakaka oplamita asiyama Meli watle epo atlaiyo, “Meli, wa: ase sikemte wota:miya. Adipalati, Godta sale a:ya wa:po. <sup>31</sup> Wa:tapo mopapo polopame maseyemala hamelepe. Epame wa:tapo ya:ye Yesu sepilipe. <sup>32</sup> Ya:tapo pato hallepe, epame ya:ye di ikadepe dla hallalo God Yami dlepe. Epame Lod Godta ya: mama Deibidita dokopala haluwa moye ma ya: watle hamilipe. <sup>33</sup> Epalati ya:tapo Yokob ya: asiya dulu dla dokopala oplami hallepe. Epame ya:ta dokopala depa hallowe kokota sukulu pa:le ellepe,” diyo.

<sup>34</sup> Epalati Melita asiyama God ya: banakaka watle epo atlaiyo, “Koko iye adipo na: dla epo woyapa:? Na: oplami koko yeliyena,” diyo.

<sup>35</sup> Amasiyama God ya: banakaka oplamita epo atlaiyo, “Hela:dle Sokota wa: dla tullupe, epame di ikadepe dla hallalo Godta itiyamaleta wa:ye bopudlepe. Epapedeme wa:ta hamolowe maseyemalaye aiyalmapo, epame ya:ye God Yami dlepe. <sup>36</sup> Epedeme wa: dalene. Wa: aya Elisabet malamane. Ya:ye mo-alluyemala polomama hamkapi a:ya poloma duwapo. Amasiyama ya:ye watapo mopapo pola mama ma 6 halapo. <sup>37</sup> Adipalati, God ya: dla koko hapuloma dulu dla kokalle hawa,” diyo.

<sup>38</sup> Melita epo atlaiyo, “Na:ye Lod ya: yu dla salladepo sela:lalo a:yapo. Epedeme wa:ta atlamale kokota na: dla wowoyamelepe,” diyo. Epalati God ya: banakaka oplamita Meli saliyo me taiyo.

### *Melita Elisabet natila tale*

<sup>39-40</sup> Epame oloma edla Melitapo dinapopame ma hapele Elisabet natila taiyo. Ya: Yudiya tamali mo dla hetame Sekalayata hala mo yemala dla woyapame ma Sekalaya aya dla taiyo. Ya: Sekalaya aya dla hetame Elisabet natipame namkale dle yu atlaiyo. <sup>41</sup> Elisabetta Melita namkale dle yu atla dalle oloma edla owayemalatapo ya: koko dulu dla humsela:iyo. Epame Elisabetye Hela:dle Sokota tulume ya: dla haiyo. <sup>42</sup> Epalati ya:ta yu teta:le mate epo atlaiyo, “Wola: hapuloma dulu dla Godta wa: dla siyele pato hamimama wa: koko dulu dla pola maseyemala dla mape siyele hamipo. <sup>43</sup> Na: popato a:ya tlope, na: Lod ya: waita na: natila pualepo. Koko edla na: sikemte siyema. <sup>44</sup> Epame wa:ta na: watle namkale dle yu atlati owayemala na: koko dulu dla polata siyemama humsela:. <sup>45</sup> Wa: Lodta wa: dla woyamolowe koko atlati dalepame yu edla mikadepe duwa koko tle Lodta wa: dla siyele hamilipe,” diyo.

*Melita God hi di dla ta:demama siyele hamili*

<sup>46</sup> Epame Melita epo atlaiyo,  
 “Na: dupa dulu tle Lod dla siyele yu atlama.  
<sup>47</sup> Epame na: sokota na: God na: pasakalo gadlalo dla siyema.  
<sup>48</sup> Adipalati, ya:ta malamale pato himiwapo,  
 ya: yu dla salladepo sela:lalo koko pa:le a:ya na: dla.  
 Epedeme oloma itle tamama opa hapulomatapo na: watle siyele a:ya dlepe.  
<sup>49</sup> Adipalati, itiyamale Godtapo na: dla koko patoto ma-halomuwapo.  
 Ya: hiye aiyalmapo.  
<sup>50</sup> Opa anawolotapo God wowota:mha:ha:ma,  
 yia: dla Godta polowamaletapo kokó ellepe.  
<sup>51</sup> Ya: dotapo koko patotoye ma-halomuwapo.  
 Epame ya:tapo yiskamu yia: tlo ka:ka:dena depo di dla halopo hetlalo soye alikili a:ma posaluwapo.  
<sup>52</sup> Epo ya:tapo dokopala depo popa:lalo soye ma isili dla ipila:pame atali soye gagademama di dla halopo hetauwapo.  
<sup>53</sup> Epame ya:tapo daya pa:talo soye ka:ka:dle alisisi mate gadepame asiyama alisisi poposatilimale soye alisisi dimi alikili a:ma posaluwapo.  
<sup>54-55</sup> Epame ya:tapo di mamadulo mate yu itiyapo himiwaye e dolumama ya: yu dla salladepo siyamalalo Isalael soye gaduwapo.  
 Epedeme ya:ta polowamale kokotapo A:iblaham mate ya: mamadulo mate dla kokó ellepe.”  
<sup>56</sup> Meliye Elisabet mate halemama mama dapahatlope pololepo gudepame ma ilame ya: mo dla taiyo.

*Yon opa yú dla ka:ka:timalalo hamale*

<sup>57</sup> Elisabetta owayemala hamolowe alilata mo-pulati ya: maseyemala hamaiyo.  
<sup>58</sup> Godta Elisabet watle koko ka:dle halë edla ya: asiyadulo mate epo ya: mateka:pi dla ha:ha:lalo so mate koko i dalepo siyele yimkata Elisabet mate ta:diyo. <sup>59</sup> Epame maseyemala hamale alotle alila 8 umulati yia:ta hapuloma maseyemala e ya: kapala kestlowedeme puame alumaiyo. Epame yia: solotamaiyo, maseyemala hiye ya: a Sekalaya hi sepilowedeme. <sup>60</sup> Amasiyama ya: waita epo atlaiyo, “Hao, ya: hiye Yon dlepe,” diyo.  
<sup>61</sup> Amasiyama yia:ta Elisabet watle epo atlaiyo, “Yonye powa: toto hi,” diyo.  
<sup>62</sup> Epame yia: ma maseyemala ya: a watle maseyemala hi dallowedeme do yu mate atlaiyo. <sup>63</sup> Epalati Sekalayata opa watle hotowe mate namkalapi mate daliyo, maseyemala hi himilowedeme. Epame ya:ta maseyemala hiye epo himiyo, “Ya: hiye Yon.” Epalati opa hapulomata koko i natipo sikemte yiyelepame momalamyaiyo. <sup>64</sup> Epame



pakasiyamalalo Sekalayata poyukamalalo halaleta matle yukamolowe kotiyapame God dla siyele ta:demsela:iyo.

<sup>65</sup> Epalati mo edla ha:ha:lalo sotapo koko i natipo wowota:iyo. Epame Yudiya tamali mo dla ha:ha:lalo so mape koko iye dlalemtaiyo. <sup>66</sup> Epame koko i dallalo sota moma-lamama epo atlamyaiyo, “Maseyemala iye adipapele oplamita halepa:?” demyaiyo. Adipalati, yia: natiyo, Lodta itiyamaleta ya: mate hallati.

*Sekalayata God hi di dla ta:demama siyele hamili*

<sup>67</sup> Yon ya: a Sekalayata Hela:dle Sokota pasatepo halemama amile dla wowoyamolowe kokoye momolo epo atlamaiyo,

<sup>68</sup> “Isalael so yia: Lod God hi di dla ta:diya.

Adipalati, ya:tapo puame asiyama mate dia:ye ya: hala dla elempulupe.

<sup>69</sup> Epame dia: dla God ya: oko oplami Deibidi ya: asiya dulu tle pasakalo gadlalo oplami pato di watle ma-hamipo.

<sup>70</sup> Koko iye Godta ka:yapa ya: mila:pi tle aiyalma depo ha:ha:uwa molo atlamalalo so mati tle di watle ma-atlamuwapo.

<sup>71</sup> Epapedeme Godtapo dia:ye dia: mate opahale demha:ha: sota itiyamale tle epo dia: dla allimha:ha: so dulu tle alikili dla eleme woyamelepe.

<sup>72-73</sup> Epame ya:tapo di mamadulo dla polowamale kokoye himhalli duwapo.

Epame ya:tapo A:iblaham mate yu itiyapo himili eye malahalli duwapo.

<sup>74</sup> Epapedeme Godtapo dia:ye dia: mate opahale demha:ha: so do dulu tle eleme alikili dla woyamelepe,

ditapo God ya: oko hamha:ha:mama wota:le pa:po ha:ha:lepo depame.

<sup>75</sup> Adipalati, ya:tapo dia:ye ya: mila:pi tle mo-ullu pa:talo so dlepe.

<sup>76</sup> Amasiyama na: maseyemala, wa:ye opatapo di ikadepe dla hallalo God yu molo atlalo oplami dlepe.

Adipalati, wa:tapo Lodta puluwedeme hallati wa: tatile tame ya: apiye dinapelepe.

<sup>77</sup> Wa:tapo ya: opaye pasakalo halowe kokoye imelepe, eye Godta yia: bobtalimale howahalowe kokoye apopo.

<sup>78</sup> Godtapo dia:ye polowamama sikemte malahalapo.

Epapedeme Pepele di tle dia: dla alila amkota alallowedeme pulupe.

<sup>79</sup> Hela:dle itapo polowe dulu dla ha:ha: so mate epo amtuwale dulu dla ha:ha: so mate dla domala pulupe.

Epame hela:dle itapo dia:ye Godta sadle dla elemtelepe.”

<sup>80</sup> Yontapo ta:mama Soko tle itiyamale oplami depo halaiyo. Ya:tapo dalupa dulu dla halepo depame ma alilata pulati Isalael so opa dla ka:dle yu atla puaiyo.

## 2

*Yesu hamale  
(Mat 1:18-25)*

<sup>1</sup> Oloma edla Sisa Augustusta Loum mo dokopala depo halemama hi halalo so watle yu hamimama epo atlaiyo, “Wua: tame Loum mo pato dulu dla opa hapuloma hi halomtelepe,” diyo. <sup>2</sup> Hi halomtale iye hi pahalomalalo ha:ha:po depame ka:yapa hi halomolowe kotiyamama apiyo. Hi halomtale iye Kuleniyosta Siliya mo dla dokopala halale oloma dla apiyo. <sup>3</sup> Epalati opa hapulomata yia: hi hapilowedeme yia: mo ikadepe dla tamalaiyo.

<sup>4</sup> Epedeme Yosepye Deibidi ya: mama halepo. Epapedeme ya: Ga:lili mo dulu dla mo hale Nasalet tle ma Yudiya mo dla mo hale Betliyem dla ya: hi hamilowedeme hetaiyo. Adipalati, Betliyem mo eye Deibidi ya: asiyadulo mo ikadepepo. <sup>5</sup> Ya: Meli, ya: watle hamilowa depo yu himme ha:ha:leye me-seme hetaiyo, hi halopiliwedeme. Amasiyama oloma edla Meliye mopapo mo-polaiyo. <sup>6</sup> Yia: ala Betliyem mo dla tame woyamalati

Melita owayemala hamolowe alilata mo-puaiyo. <sup>7</sup> Epalati ya:tapo ka:yapa owayemala hammama maseyemala hamaiyo. Ya: maseyemala hampame tlukata polupo aliyata daya dlalo aya helemale dla himiyo. Adipalati, asepe sota ha:ha:lalo aya dulu edla alupoli hale hawa halaiyo.

*Halo omha:ha:lalo sota Yesu hamale koko dalle*

<sup>8</sup> Yesu hamale utula:la edla halo omha:ha:lalo sota Betliyem mateka:pi dla yia: sipi aliya ompopa:iyo. <sup>9</sup> Epalati Lod ya: banakakata pakasiyamalalo yia: mateka:pi dla woyamaiyo. Epame Lod ya: hela:dleta yia: halati yia: sikemte wowota:iyo. <sup>10</sup> Amasiyama banakaka oplamita yia: watle epo atlaiyo, “Wua: ase sikemte wowota:miya. Adipalati, na:tapo opa hapulomata sisiyelowe ka:dle yuye wua: dla hampualepo. <sup>11</sup> Watapo Deibidi mo dla opa pasakalo gadlowe maseyemalaye ma-hamalepo. Ya:ye wua:ta dalemha:ha:mama omha:ha:uwa Keliso Lodpo. <sup>12</sup> Wua:tapo ya:ye ipo malanatilipe, maseyemala eye tlukata polupo aliyata daya dlalo aya helemale dla ella natilipe,” diyo.

<sup>13</sup> Epalati pakasiyamalalo banakaka so alumale patota malame ka:yapa malale banakaka oplami mate hatlo godepame God dla siyele ta:demama epo atlamyaiyo,

<sup>14</sup> “Pepele di dla hallalo God dla siyele ta:diya.

Epame ta:lamo hema Godta solotamale so dla sadleta ellepe,” demyaiyo.

<sup>15</sup> Banakaka sota ma i-ilapo pepele di dla hetlati halo omha:ha:lalo sota yiskamu yia: dulu dla epo atlamyaiyo, “Di Betliyem mo dla tame Lodta di watle atlamale kokoye natila tlowa,” demyaiyo.

<sup>16</sup> Yia: ma hapele tame natilati Meli mate Yosep mate maseyemalaye aliyata daya dlalo aya helemale dla himimpopa:la natiyo. <sup>17</sup> Yia: tame maseyemala natipame ma Yosep mate Meli mate dla banakaka oplamita yia: watle maseyemala ya: koko dla atlamale yuye ma yia: watle atlamaiyo. <sup>18</sup> Epalati halo ompopa:lalo sota maseyemala koko dla atlamala dallalo so hapulomata sikemte yiyeliyo. <sup>19</sup> Amasiyama Melitapo koko i dalepame alila hapuloma dulu dla powelilalo me-malahalaiyo. <sup>20</sup> Halo omha:ha:lalo sota ma ilame tamalemama yia:ta dalle koko mate epo tlamale koko mate dla God watle siyele pato ta:diyo. Adipalati, yia:ta tlamale hapulomaye banakaka oplamita atlamale yu mate ma-ala:iyo.

<sup>21</sup> Epame owayemala hamale alotle alila 8 umulati maseyemalaye kapala ke staiyo. Epame ya: watle Yesu hiye sepilaiyo. Adipalati, hi iye ka:yapa ya: ala Meli koko dulu dla popollalo hallati banakaka oplamita hi iye hamiyo.

*Yesuye aiyalma aya dla hamame hetale*

<sup>22-24</sup> Meli mate Yosep mate Mosesta aiyalma hatitimale dolumama yia:ta God mila:pi tle ma ullu pa:po ha:ha:lowedeme dinapele alilata tame gudlati\* yia: Yesu seme Yelusalem dla taiyo. Epame yia: Yu so aiyalma aya dla hetame yia:ta ma God mila:pi tle ullu pa:po ha:ha:lowedeme tea dapiyamte poyupo God dla halopiyo. Adipalati, Lod ya: aiyalmata epo atlapo, “Wua: seselema tea dapiyamte o hilipi tea yimlala dapiyamteye na: dla poyupo halopiya,” depo. Epammama yia: aiyalma aya dla hetame Yesuye ma God watle hamiyo. Adipalati, Lod ya: aiyalmata epo atlapo, “Itapu hohomale akimlala hapulomaye God watle halopiya,” depo.

<sup>25</sup> Alila oloma edla Yelusalem dla totoyemala hale halaiyo, ya: hiye Simiyon. Ya:ye God mila:pi tle ka:dle oplami halemama God tlo sikemte malahalem diyo. Epapeleye ya:tapo Godta Isael so dla upiyele ela e hamastlowe alilata puluwe dla dalemhalemama omhalaiyo. Epalati Hela:dle Sokotapo ya: mate halaiyo. <sup>26</sup> Amasiyama Hela:dle Sokota ka:yapa ya: watle ma-atlaiyo, ya:tapo totoyemala ikadepe halemama Lodta sale

\* **2:22-24:** Yu so a:yatapo Mosesta aiyalma hatitimale dolumama owayemala hampame 40 alila dulu dla ullu walle depame meyelo ya: aya dla polom diyo. Epame 40 alila eta mogudlati ma ullu pa:le a:ya dlowedeme tame Yu so aiyalma aya dla God watle namkale dle alisisi halopim diyo.

Kelisoye natipame poloweye. <sup>27</sup> Epapedeme Hela:dle Sokota Simiyonye aiyalma aya dla semhetlati Meli mate Yosep mate owayemala Yesuye aiyalma koko dolumolowedeme aiyalma aya dla hamame hetla natiyo. <sup>28</sup> Ya: Yesu natipo hamame halemama God dla siyele yu atlaiyo. <sup>29</sup> Ya:ta God dla siyele yu atlemama epo atlaiyo,

“Lod, wa:ta na:ye Keliso natipame polope duwapo.

Epedeme na: siyema, wata na:tapo sadle mate poloweye.

<sup>30-31</sup> Adipalati, na: inoma mate pasakalo gadlalo oplami, wa:tapo opa hapuloma dla hamiwaye na: ma-natilipo.

<sup>32</sup> Ya:ye hela:dlepo, po-Yu so opa dla God kokoye botomastlepo depame. Epame ya:tapo wa: opa Isalael so dla hela:dleye hampulupe.”

<sup>33</sup> Yesu ya: a mate ya: wai mate Simiyonta atlamale yu dalepame sikemte yiyeliyo.

<sup>34</sup> Epame Simiyontapo God hi tle yia: dla siyele hamimama Meli watle epo atlaiyo, “God-tapo maseyemala iye ma-sauwapo, Isalael so opita ya: tle kustamtame teteyumha:ha:lati asiyama opitapo ya: tle gadle hapame ma sillimha:ha:lepo depame. Epame opa opitapo ya: koko haloweye allimama ya: mate opahale dlepe. <sup>35</sup> Epapele koko tle ya:tapo yia: dupa dulu dla hemele koko hutiyeye haliyamale dla bobotimatimelepe. Epame dupa kolle kokotapo wa: dupaye aipa:yata suma sepelepe,” diyo.

<sup>36</sup> Oloma edla God tle yu hapame molo atlalo a:ya hale aiyalma aya dulu edla halaiyo, ya: hiye Ana. Ya: Asel elele halë a:yayo. Epame ya: a hiye Panuwel. Ya: ma-alluyemala halaiyo. Ya: ka:yapa oplami hapame sokomoko 7 dulu dla oplami mate halepo depame ya:wolaliye mo-powaiyo. <sup>37</sup> Epame ya:ye dupulapi polomama 84 sokomoko umaiyo. Ya: aiyalma ayaye posaliyome tlalo alila mate utula:la mate God hi di dla ta:demhalemama daya aiyalma depo inoma sumhalem diyo. <sup>38</sup> Epapeleye Simiyonta Meli mate Yosep mate yukamhallati ya: ma oloma medla puaiyo. Ya: puame God dla siyele yu atlemama Yelusalemye upiyele dulu tle alikili a:ma woyamolowe dla omha:ha: so watle Yesu kokoye atlamaiyo.

<sup>39</sup> Yosep mate Meli mate Lodta atlamale aiyalma koko hapulomaye ma-halopo gudepame ma Ga:lili mo dulu dla yia: mo ikadepe Nasalet dla taiyo. <sup>40</sup> Maseyematapo itiyamale mate ta:pame ka:depo malamaletapo ya: dla pasatepo halaiyo. Epalati Godta bokotiyapo malamaleta ya: mate halaiyo.

### *Maseyemala Yesuta aiyalma aya dla hetame polale*

<sup>41</sup> Sokomoko hapuloma dulu dla Yesu ya: wai mate ya: a mate Yelusalem dla Godta Namilatale daya dla hetam diyo. <sup>42</sup> Sokomoko haleta yia: matle Namilatale daya dlowedeme hetaiyo. Oloma edla Yesuye sokomoko 12 halaiyo. <sup>43</sup> Epapeleye daya dele alilata mo-puame gudlati yia: ma Nasalet mo dla ilame ma-taiyo. Amasiyama maseyemala Yesuye ya: a mate ya: wai mate podallalo Yelusalem dla me-halaiyo. <sup>44</sup> Amasiyama ya: a mate ya: wai mate yia:ta malamaleta Yesuye semte yimkadulo mate ma-tamapo depame yia: ma ma-tamalaiyo. Yia: tame duka dla hutiyelowedeme popa:mama Yesuye yimkadulo dulu dla totamaiyo. <sup>45</sup> Yia: edla totamama Yesuye ponatilalo wekelati ma ilame Yelusalem dla Yesu natila taiyo. <sup>46</sup> Yia: Yesu totamale alila dapahatlope gudepame natilati Yesuye Yu so aiyalma aya dla aiyalma imalalo so mate yuhampopa:lati natiyo. Dulu edla Yesuta aiyalma imalalo sota imha:ha:lati dalempolomama asiyama atlanatili yu atlampolaiyo. <sup>47</sup> Epalati asiyama aiyalma imalalo sota atlanatili yu ipi dla ya:ta asiyama yu ka:ka:dle atlampolla dalepame opa hapulomata ya:ta malamale ka:pi natipame sikemte yiyeliyo. <sup>48</sup> Yesu ya: wai mate ya: a mate Yesuta aiyalma imalalo so mate yukampollati natipame sikemte yiyeliyo. Epame ya: waita epo atlaiyo, “Maseyemala, wa: adipalati di watle ipapele koko hao? Wa: a mate na: mate wa: totamsiyamama dupa sikemte kiyetame siyama,” diyo.

<sup>49</sup> Amasiyama Yesuta yia: watle epo atlaiyo, “Wua: adipalati na: totamsiyamo? Wua: powua:malamata:, na:ta na: A aya dla halloweye?” diyo. <sup>50</sup> Amasiyama yia: Yesu yu ya: dulu kokoye woloma pomalamaiyo.

<sup>51</sup> Epame Yesuye ma yia: mate Nasalet dla ilame taiyo. Epame edla yia: mate halemama yia: yu dla salladepo sela:iyo. Epapedeme Melitapo alila hapuloma dulu dla koko hapuloma iye me-malahalem-diyo. <sup>52</sup> Yesuye ta:mama ka:depo malamale mate ta:iyo. Epalati Godta ya: dla siyemhallati opa ma ya: dla sikemte sisiyem-diyo.

### 3

*Yon opa yú dla ka:ka:timalalo oplamita yu atlamale  
(Mat 3:1-12; Maka 1:1-8; Yon 1:19-28)*

<sup>1</sup> Taibiliyes Sisata 15 sokomoko Loum dokopala oplami halale oloma edla opa iwolotapo ya: isili tle dokopala popa:iyo, Pontes Paeletta Yudiya mo omhalaiyo, epalati Helodta Ga:lili mo omhalaiyo, epalati ya: ei Pilipita Ituliya mo mate Tlakonitis mo mate omhalaiyo. Epalati Lisaniyasta Abilene mo omhalaiyo. <sup>2</sup> Epalati Anas mate Kayapas mate Yu so aiyalma aya dokopala so ha:ha:iyo. Alila oloma edla Sekalaya yami Yonta dalupa dulu dla hallati God yuta ya: dla puaiyo. <sup>3</sup> Epalati ya: tame Yoden aloma pili dla sela:mama opa watle God yuye epo atlamsela:iyo, “Wua: bobtalimale tle heheletipame yú dla tutula:iya. Epalati Godtapo wua: bobtalimaleye hiyotipo wellipe,” demsela:iyo. <sup>4</sup> Koko iye God tle yu hapame molo atlalo oplami Aisayata ya: buka dla hatitimale yu mate ma-ala:po. Adipalati, ya:ta ya: buka dla ipo ilimuwapo, “Oplami haletapo dalupa dulu dla yu ipo teta:mhalapo, ‘Lod apiye dinapiya.

Epame ya: apiye ka:depo dolepo himiya.

<sup>5</sup> Epame koloma walle apiye ma woloma kekesomaiya, apita woloma ka:depo ellepo depame.

Epame api doduluwelalimaleye ma woloma ka:depo dololepo hatitimaiya.

Epame api dla momkalalimale hapulomaye ma woloma badiya.

<sup>6</sup> Epalati opa hapulomatapo God tle pasakalo gadle puaye natilipo depame.’ ”

<sup>7</sup> Opa alumaleta Yonta yia:ye yú dla ka:ka:timelepo depo pumullati Yonta yia: watle epo atlaiyo, “Wua:ye ilama yimlalapo. Antapo wua: watle atlemama isikimi yú tutula:le kokota wua:ye Godta kasilamale pua tle hemele haohaodlepe duwa? <sup>8</sup> Wua:ta ha:ha:le pasakalo tle wua:ta wua: bobtalimale tle ikadepe heheletimaleye nati-iya. Epame wuskamu wua: tlo A:iblaham ya: mamadulo depame Godta kasilamale tle hemele haohaodlepe demiya. Adipalati, na: wua: watle ikadepe koko atlema. God ya: dla itiyamale elapo, ewala popa: itapo ma A:iblaham ya: mamadulo ikadepe yiyeloweye.

<sup>9</sup> Mutupa:yatapo dali tou dla ma-dinapopame womelapo. Epedeme dali aditapo dlomoko ka:ka:dle pomilimalalo hallepiye, dali eye wostapame dlapa dla mistlepe.”

<sup>10</sup> Epalati opata Yon yu dalepame asiyama epo atlaiyo, “Ame di apa koko hapa:?” diyo.

<sup>11</sup> Epalati asiyama Yonta yia: watle epo atlaiyo, “Wa: dla sede dapiyamte hutiyelepiye, ka:dena, wa:tapo hale hame wa: amkale sede pa:le oplami dla hamiloweye. Epame wa: dla daya ellepiye, ka:dena, wa:tapo wa: amkale daya pa:le oplami mate daya dloweye,” diyo.

<sup>12</sup> Epame ta:kis mani halomalalo so mape yia: ma yú tutula:lowedeme Yon watle puame epo atlaiyo, “Imalalo oplami, di ma apa koko hapa:?” diyo.

<sup>13</sup> Yonta asiyama epo atlaiyo, “Wua:ta opa dla mani halomha:ha:mama seme wua:ta halowa depo malamama ta:kis mani himilowe saleye ase sikemte tla:mtame hademha:ha:miya. Amasiyama ala:le tlo opa dla hademha:ha:iya,” diyo.

<sup>14</sup> Epame opahale sota Yon watle epo atlaiyo, “Di ma apa koko hapa:?” diyo.

Epalati asiyama Yontapo yia: watle epo atlaiyo, “Wua: yimkadulo mani uhalowedeme yia:ye ha:ha:limha:ha:miya. Epame yimkadulo mani uhalowedeme isikimi yia: mala-atlamsiyamiya. Amasiyama isikimi wua:ta wua: oko asiyama dla mani hademha:ha: dla mepo ha:ha:iya,” diyo.

<sup>15</sup> Opa hapulomata Keliso tlo omha:ha:le dla Yonta pulati natipame yia:ta malamaleta Yonye semte Keliso tepo diyo. <sup>16</sup> Amasiyama Yonta yia: watle epo atlaiyo, “Na:tapo wua:ye isikimi yú siyapo dla ka:ka:tima. Amasiyama na: ko tle pua oplamita itiyamaleta na: tla:mtana. Epedeme na: poka:dena, ya: hete alisisi uptimoloweye. Ya:tapo wua:ye itiyamale hamimama Hela:dle Soko mate epo dlapa mate dla ka:ka:timelepe. <sup>17</sup> Ya:tapo witi daya mate epo daya kasili mate duka gladlowedeme ya: oko alisisi mate madinapopo halapo. Ya:ta witi daya mate epo kasili mate duka gladepepe daya siyapo tope aya dla kolumelepe. Epame asiyama daya kasili tlo posumtlalo wekelalo dlapa dla mistlepe.” <sup>18</sup> Yontapo ka:dle yu mate api meyelo meyelo dle tle opa elempulowedeme God yu atlamsela:iyo.

<sup>19</sup> Amasiyama Ga:lili mo dokopala oplami Helodta batalimale koko hamsela:mama ya: ei ya:llu Helodiyasye kolahaiyo, ya:wolali me-hallati. Epalati Yonta koko i natipame ya: atlemama ya: batalimale opi mate ya: dla bobotimatimaiyo. <sup>20</sup> Epalati alotle Helodta siyaladepepe ya: batalimale pato hale hamama Yonye amtuwale aya dla ka:staiyo.

### *Yesu yú dla ka:stale*

*(Mat 3:13-17; Maka 1:9-11)*

<sup>21</sup> Yonta opa yú dla ka:ka:timhalale oloma edla Yesu ma yú dla ka:staiyo. Yesu yú tulupo hetame inoma sumhallati pepele di kokolomata gowaladiyo. <sup>22</sup> Epalati Hela:dle Sokotapo seselema tea some ya: dla malaiyo. Epalati pepele di tle yuta epo malaiyo, “Wa:ye na: dupa ellalo maseyemala ikadepepo. Na: wa: dla sikemte siyema,” diyo.

### *Yesu ya: mamadulo hi*

*(Mat 1:1-17)*

<sup>23</sup> Yesuye sokomoko 30 oloma dla halemama God yu atlowe mo-kotiyamaiyo. Opa hapulomatapo Yesuye Yosep yamipo depo malamdiyo.

Yosep ya: a hiye Heli, <sup>24</sup> Heli ya: a hiye Matat, Matat ya: a hiye Libai, Libai ya: a hiye Melki, Melki ya: a hiye Yanai, Yanai ya: a hiye Yosep,

<sup>25</sup> Yosep ya: a hiye Matatias, Matatias ya: a hiye Amos, Amos ya: a hiye Nahum, Nahum ya: a hiye Esli, Esli ya: a hiye Nagai, <sup>26</sup> Nagai ya: a hiye Mat, Mat ya: a hiye Matatias, Matatias ya: a hiye Semei, Semei ya: a hiye Yosek, Yosek ya: a hiye Yoda,

<sup>27</sup> Yoda ya: a hiye Yowana, Yowana ya: a hiye Lesa, Lesa ya: a hiye Selubabel, Selubabel ya: a hiye Selatiyel, Selatiyel ya: a hiye Neli, <sup>28</sup> Neli ya: a hiye Melki, Melki ya: a hiye Adi, Adi ya: a hiye Kosam, Kosam ya: a hiye Elmadam, Elmadam ya: a hiye El,

<sup>29</sup> El ya: a hiye Yosuwa, Yosuwa ya: a hiye Eliyesel, Eliyesel ya: a hiye Yolim, Yolim ya: a hiye Matat, Matat ya: a hiye Libai, <sup>30</sup> Libai ya: a hiye Simiyon, Simiyon ya: a hiye Yuda, Yuda ya: a hiye Yosep, Yosep ya: a hiye Yonam, Yonam ya: a hiye Eliyakim,

<sup>31</sup> Eliyakim ya: a hiye Meleya, Meleya ya: a hiye Mena, Mena ya: a hiye Matata, Matata ya: a hiye Neiten, Neiten ya: a hiye Deibidi, <sup>32</sup> Deibidi ya: a hiye Yesi, Yesi ya: a hiye Obed, Obed ya: a hiye Boas, Boas ya: a hiye Salmon, Salmon ya: a hiye Nason,

<sup>33</sup> Nason ya: a hiye Aminadab, Aminadab ya: a hiye Adimin, Adimin ya: a hiye Alni, Alni ya: a hiye Heslon, Heslon ya: a hiye Peles, Peles ya: a hiye Yuda, <sup>34</sup> Yuda ya: a hiye Yokob, Yokob ya: a hiye Aisek, Aisek ya: a hiye A:iblaham, A:iblaham ya: a hiye Tela, Tela ya: a hiye Nahol,

<sup>35</sup> Nahol ya: a hiye Selug, Selug ya: a hiye Leu, Leu ya: a hiye Peleg, Peleg ya: a hiye Ebel, Ebel ya: a hiye Sala, <sup>36</sup> Sala ya: a hiye Keinan, Keinan ya: a hiye Alpaksad, Alpaksad ya: a hiye Sem, Sem ya: a hiye Nowa, Nowa ya: a hiye Lamek,



<sup>37</sup> Lamek ya: a hiye Metusela, Metusela ya: a hiye Inok, Inok ya: a hiye Yaled, Yaled ya: a hiye Mahalael, Mahalael ya: a hiye Keinan, <sup>38</sup> Keinan ya: a hiye Enos, Enos ya: a hiye Set, Set ya: a hiye A:dam, A:dam ya: aye God.

## 4

### *Saitenta Yesuye elemala natili*

*(Ma:t 4:1-11; Maka 1:12-13)*

<sup>1</sup> Yesuta Yoden aloma tle ma ilamtlati Hela:dle Sokota ya: dla pasatapame ya:ye dalupa dulu dla semtaiyo. <sup>2</sup> Ya: 40 alila dalupa dulu dla hallati Saitentapo ya:ye elemala natimhalem-diyo. Ya: alila dulu edla sela:mama daya dimi halaiyo. Epo 40 alila eta tame gudlati ya: dla daya ta:leta puaiyo.

<sup>3</sup> Epela natipame Saitenta ya: watle epo atlaiyo, “Wa: ikadepe God Yami dlepiye, wa: ewala ela i atlane daya yelepo depame,” diyo.

<sup>4</sup> Amasiyama Yesuta epo atlaiyo, “God yu bukata epo atlapo, ‘Oplamitapo daya siyapo tlo demhalemama pasakalo pohallowa,’ ” diyo.

<sup>5</sup> Saiten matle Yesu seme tamali di dla hetaiyo. Epame Saitenta Yesu watle pakasiya-malalo ta:lamo pato hapulomaye nalati-iyu. <sup>6-7</sup> Epo Yesu watle epo atlaiyo, “Ka:yapa Godta alisisi hapuloma iye na: watle hapilati na:tapo omhaluwapo. Amasiyama wa: wata na: dla heodepo siyele ta:dlepiye, ta:lamo pato i mate epo alisisi hapuloma dulu dla ha:ha: mate wa: watle hapilowepo. Adipalati, na: dla itiyamale elapo, ma oplami hale dla hapiloweye.”

<sup>8</sup> Epalati Yesuta asiyama Saiten watle epo atlaiyo, “God yu bukata epo atlapo, ‘Wa: hatlo Lod wa: God dla heodepo siyele ta:demama ya: yu dla salladepo sela:ne.’ ”

<sup>9</sup> Epame matle Saitenta Yesu seme Yelusalem dla taiyo. Epame aiyalma aya dopuko di ikadepe dla Yesuye seme hetame pamelepame ya: watle epo atlaiyo, “Wa: ikadepe God Yami dlepiye, wa: dopuko di itle ta:la dla putuko dene. <sup>10</sup> Adipalati, God yu bukata epo atlapo,

‘Godtapo ya: banakaka so watle,  
wa:ye woloma omha:ha:iya, dlepe.

<sup>11</sup> Epalati yia:tapo wa:ye yia: dota hamelepe,  
wa: heteta tulumewala dla heyulala depame.’ ”

<sup>12</sup> Asiyama Yesuta epo atlaiyo, “God yu bukata ma epo atlapo,  
‘Wa: Lod wa: Godta itiyamale natilowedeme ya:ye elemala natimiya,’ ” diyo.

<sup>13</sup> Saitenta Yesuye elemala natimsela:le mogudlati ma ilampuluwe malamama aseka alila yimka:mala dla Yesu saliyome taiyo.

### *Yesu ya: mo sota ya:ye alli*

*(Ma:t 13:53-58; Maka 6:1-6)*

<sup>14-15</sup> Yesuye Hela:dle Sokota pasatapame itiyamale mate ma Ga:lili dla ilame taiyo. Epame ya:tapo Yu so inoma sumalalo aya hapuloma dla imsela:lati opata ya: dla sisiyem-diyo. Epalati Ga:lili mo pato dulu dla opa hapulomata Yesu koko dlalem-taiyo.

<sup>16</sup> Alila haleta Yesu ya:ta ta:le mo ikadepe Nasalet dla taiyo. Epame Yu sota inoma sumalalo alila dla ya: ma meyelo aplalo epammama yia:ta inoma sumalalo aya dla hetame halemama God yu buka sesa:lowedeme sila:tiyo. <sup>17</sup> Epalati God tle yu hapame molo atlalo oplami Aisayata ilimale bukaye ya: watle hamiyo. Ya: buka hapame dollomtame yu hatitimale oloma hema gowaladepo yu iye sesa:iyo,

<sup>18</sup> “Lod ya: Hela:dle Sokoye na: mate halapo.

Adipalati, ya:tapo na:ye sauwapo, ka:dle yuye atali so dla hampulupo depame.  
Epame ya:tapo na:ye tane duwapo,

amtuwale aya dulu dla deata popolliyepo ha:ha: soye dea totowatimelepo depame.

Epame inoma pa:talo sota matle ka:depo tlamelepo depame.

Epame Lodtapo na:ye tane duwapo,

opata allimha:ha: soye upiyele etle elepame alikili dla woyamelepo depame.

<sup>19</sup> Epame na:tapo Lodta namkale dle alilata puaye opa watle imolowedeme.”

<sup>20</sup> Yesu buka sesa:po gudepame ma ilame buka omhallalo watle hamipame polaiyo. Epalati opa hapuloma aya dulu edla popa:le sotapo Yesu watle woloma inoma kokata omhutiyeiyo. <sup>21</sup> Epame ya:ta yia: watle epo atlaiyo, “Wua:ta God yu buka dla atla dalle kokotapo wata wua: dla mo-woyamalepo,” diyo.

<sup>22</sup> Epalati ya: yu dallalo so opa hapulomatapo ya:ye ka:dle oplami depame ya:ta atlamale yu ma ka:pi diyo. Yia: epo atlepame ma epo atlamyaiyo, “Dimalamana, ya:ye Yosep yamipo. Epapele tlope ya: adipammama yu ipo ka:pi atlo?” demyaiyo.

<sup>23</sup> Yesuta ma yia: watle epo atlaiyo, “Na: mikadepe dema, wua:tapo na: watle epo atlamyelepe, ‘Dakopala ilalo oplami, wa:skamu wa: ka:dene. Epame wa:ta Kapaniyem mo dla ulugiyemale koko halomuwaye ma wa: mo ikadepe hema halomane,’ demyelepe,” diyo.

<sup>24</sup> Amasiyama Yesu ma yia: watle epo atlaiyo, “God tle yu hapame molo atlalo oplamiye ya: mo so ikadepeta allipe. <sup>25</sup> Epedeme wua: daliya, Ilayata halale oloma edla sali silaple patota puwapo. Epalati sokomoko dapahatlope epo mama 6 dulu dla tiyota pehellalo haluwapo. Oloma edla Isalael mo dla dupulapitalo me-popa:uwapo.

<sup>26</sup> Amasiyama dulu edla Godta Ilayaye yia: gadlepo depame po-atlana. Amasiyama ya: Ilayaye isikimi po-Yu a:ya Saidon mo dulu dla mo hale Salipat dla pollalo dupulapi tlo gadla tane duwapo. <sup>27</sup> Epame ma Ilaisata halale oloma edla Isalael mo dla kapala bobtalimale sota wokasepo ha:ha:uwapo. Amasiyama Ilaisata opa ewoloye pogadena. Amasiyama ya: po-Yu oplami Naman, Siliya mo dla hallalo tlo gademama ya:ye ka:duwapo,” diyo.

<sup>28</sup> Opa inoma sumalalo aya dla popa:leta yu i dalepame sikemte siyalasiyaladiyo.

<sup>29</sup> Epame yia: sillipame Yesuye hamame tamalaiyo, mo alikili dla tei seselemale halale di tle ka:stlowedeme. <sup>30</sup> Amasiyama Yesu opa alumale dulu metle alikili a:ma woyapame taiyo.

### *Bataliya walle oplami*

*(Maka 1:21-28)*

<sup>31</sup> Epame Yesu matle Ga:lili mo dulu dla mo hale Kapaniyem mo dla taiyo. Ya: edla tame halemama inoma sumalalo alila haleta yia:ta inoma sumalalo aya dla hetame God yuye imhalaiyo. <sup>32</sup> Epalati opata ya:ta imale dalepame sikemte yiyeliyo. Adipalati, ya:ye sikemte itiyamale mate imhalaiyo.

<sup>33</sup> Inoma sumalalo aya edla bataliya walle oplami hale polaiyo. Ya:tapo yu teta:le mate Yesu watle epo atlaiyo, <sup>34</sup> “Hei, Yesu Nasalet oplami, wa: dia: dla apa koko hala puo? Wa: di bobtalimala puo? Amasiyama wa: di meleme tane. Adipalati, na:malamana, wa:ye God tle malale aiyalma oplamipo,” diyo.

<sup>35</sup> Epalati Yesuta bataliya yemala watle itiyamale mate epo atlaiyo, “Wa: keidepame oplami dulu etle alikili dla ulatane,” diyo. Yesuta epo atlati bataliya yematatapo ulatlowedeme oplamiye opa inoma dali dla ka:stapame wa:ya dla teyume ellati ya: tle alikili dla ulataiyo. Amasiyama bataliya yematata ya: tle ulatamama ya: dla wotiyalle hale pohamilalo wekiyo.

<sup>36</sup> Epalati opatapo koko i natipame yiyelle mate epo atlamyaiyo, “Ya:ta atlale kokoye adipapeta? Adipalati, ya:tapo itiyamale mate bataliya yimlala watle yu atlati yia:tapo ya: yu dla dalepo salladepame alikili dla u-ulapo tamdepo,” demyaiyo. <sup>37</sup> Epalati opatapo koko i natipame mo opi edla popa:mta dla esemtaiyo.

### *Yesuta opa ka:ka:dle*

*(Mat 8:14-17; Maka 1:29-34)*

<sup>38</sup> Yesu inoma sumalalo aya tle ma Saimon aya dla taiyo. Aya dulu edla a:ya hale Saimon ya: dokoye esiyeme elaiyo. Epalati opatapo ya:ye Yesuta ka:dlepo depame Yesuye atlaiyo. <sup>39</sup> Epalati Yesuta tuame ya:ta ela mateka:pi dla halemama esiyele alikili dla ayalemama epo atlaiyo, “Wa: ya: tle alikili a:ma woyamane,” diyo. Epalati pakasiyamalalo esiyelela ya: tle ma-hawa hallati ya:tapo ma-ka:depame sila:tipo daya ha:po yia: watle alemaiyo.

<sup>40</sup> Salita mo-tullati opata esusulumale so hapulomaye Yesu watle eleme pumhalaiyo. Epalati ya:tapo ya: do mate esusulumale so hapulomaye hohopame ka:ka:diyo. <sup>41</sup> Epame Yesuta bataliya watalo soye ka:ka:dlati bataliya yimlalata yia: tle u-ulapo tamhalemama yu teta:le mate “Wa:ye God Yamipo,” demyaiyo. Amasiyama Yesuta itiyamale mate yia: watle epo atlaiyo, “Wua: yuhamiya,” diyo. Adipalati, bataliya yimlalaye yia:malamana, Yesuye Godta sale Kelisopo.

<sup>42</sup> Ma utulala ikadepe Yesu elale tle sila:time keilipo elale mo dla taiyo. Amasiyama ya: ko dla opatapo ya: hawa hallati ya: totamsiyamaiyo. Opata Yesu totamtame natipame ya: watle epo atlaiyo, “Wa: di saliyome tamiya,” diyo. <sup>43</sup> Amasiyama Yesutapo yia: watle epo atlaiyo, “Na: ka:dena, mo opi dla ma God ya: mo kokoye atlamtloweye. Adipalati, Godta koko edla na:ye tane duwapo,” diyo. <sup>44</sup> Epame Yesutapo Yu so mo pato dla yia:ta inoma sumalalo aya hapuloma dla God yu imsela:mdiyo.

## 5

*Yesuta ya: alotle tlalo so ka:yapa hohomale  
(Mat 4:18-22; Maka 1:16-20)*

<sup>1</sup> Alila hale dla Yesuta Ga:lili kaula peleyama dla God yu atlemhallati opa hapulomata dallowedeme alumama sikemte kustimtame elaiyo. <sup>2</sup> Yesu me-halemama amalo halomalalo sota yia: mata howahalomolowedeme koa dapiyamte tamali di dla hallumhetame hatitimaleye natiyo. <sup>3</sup> Yesu koa dapiyamte dulu dla Saimon koa dla tulum polomama Saimon watle, “Koaye yú duka tiyama dla akustane,” diyo. Epame koa dulu etle polomama opata tamali di dla popa:lali God yu impolaiyo.

<sup>4</sup> Yesu opa dla God yu atlepo gudepame Saimon watle epo atlaiyo, “Wa: koa yú duka dla solemtuame wua: amkadulo mate wua: mataye amalo tulupo depame yú dulu dla pololiya,” diyo.

<sup>5</sup> Amasiyama Saimonta epo atlaiyo, “Imalalo oplami, di wata utula:la mata pololemsiyamama oko pato ha, epele tlope amalo pohana. Amasiyama wa:ta atlademe na: mataye yú dulu dla polollowepo,” diyo.

<sup>6</sup> Yia: epame yia: mataye yú dulu dla polollati amalo hapulomata yia: mata dulu dla tumama yia: mataye tallatalladla yakomaiyo. <sup>7</sup> Epalati yia:tapo yimkadulo koa hale dla ha:ha:lalo soye do yu mate sisilamaiyo, yia: gadlepo depame. Epo yia:ta mo-pulati yia: koa dapiyamteye amalota sikemte poposatilimama koa ollo-ollodla yakomaiyo.

<sup>8</sup> Saimon Pitata koko i natipame Yesu hete sitali dla heodepo polomama epo atlaiyo, “Lod, na: tle alikili a:ma tane, na:ye batalimale oplami,” diyo. <sup>9</sup> Adipalati, ya: mate ya:mkadulo mate yia:ta amalo hapuloma halomale natipame sikemte yiyeliyo. <sup>10</sup> Epame Saimon mate oko halalo so Yeims mate Yon mate yia: ma koko i natipame sikemte yiyeliyo. Opa dapiyamte Yeims mate Yon mate iwoloye Sebedi ya: akimlalayo.

Epame Yesuta Saimon watle epo atlaiyo, “Wa: ase sikemte wota:miya. Wa: ka:yapa amalo halomalalo haluwapo. Amasiyama wata oloma itle wa:ye ma opaye God dla elempulalo hallepe,” diyo. <sup>11</sup> Epame yia: tame yia: koaye tamali dla himpame alisisi hapuloma medla salepame ma Yesu mate tamalaiyo.

*Yesuta kapala batalimale oplami ka:dle  
(Mat 8:1-4; Maka 1:40-45)*

<sup>12</sup> Alila haleta Yesu ma mo hale dla taiyo. Mo edla kapala batalimale oplami halaiyo. Oplami itapo Yesu natipame Yesu hete sitali dla heodepo polomama epo atlaiyo, “Lod, wa: na: ka:dlowe solotamelepiye, na: ka:dene,” diyo.

<sup>13</sup> Epalati Yesuta ya: do mate oplami ya: dla ummama epo atlaiyo, “Na: wa: ka:dlowe solotama, epedeme wa: ma-ka:dene,” diyo. Epalati pakasiyamalalo ya: kapala batali-maleta ma-ka:diyo.

<sup>14</sup> Epame Yesuta ya: watle yu itiyamale mate epo atlaiyo, “Wa: tame opa opi watle na:ta wa: ka:dle kokoye atlemiyo. Amasiyama wa: tame God ka: epo opa ka: duka dla hallalo oplami watle wa: kapalata ka:dle kokoye nati-ine. Epame wa:ta ka:dle koko dla Mosesta atlale namkale dle alisisi mate God watle hapine, opata koko etle wa:ta ka:dle kokoye malanatilipo depame,” diyo.

<sup>15</sup> Epapele tlope opatapo Yesu kokoye mo hapuloma dla esemtlati opa hapulomata ma-dlalem taiyo. Epalati opa hapulomata Yesuta God yu atla dallowedeme pumhalaiyo. Epame ya:ta yia: dla esusulumale hutiyeye ka:ka:dlepo depame. <sup>16</sup> Amasiyama ya: alila hapuloma opa hapuloma tle alikili dla woyapame meyelo homta ellalo mo dla inoma sumala tamdiyo.

*Yesuta akoloyale oplami ka:dle  
(Ma:t 9:1-8; Maka 2:1-12)*

<sup>17</sup> Alila haleta Yesu opa imhallati Pa:lisi so mate aiyalma imalalo so mate yia: ma medla popa:iyo. Opa iwoloye opita Ga:lili mo hapuloma tle epo opita Yudiya tle epame opita Yelusalem tle pumulaiyo. Epalati Yesutapo esusulumale so ka:ka:dlepo depame Lodta itiyamaleta ya: mate halaiyo.

<sup>18</sup> Epalati oloma edla opa opita akoloyale oplamiye dea tili dla himpo Yesuta hala aya dla hamame pumulaiyo. Yia: solotamaiyo, Yesu hala dla hamame tuluwedeme.

<sup>19</sup> Amasiyama opata kustimama api ponatiyo. Yia: epalati oplami akoloyale dea tili dla himili memmate aya dopuko di dla hamame hetaiyo. Epame aya dopuko di tle opokoko pokolopame dea tili mate Yesuta hala oloma dla halumtuluiyo.

<sup>20</sup> Epalati Yesu yia:ta mikadepe dle natipame akoloyale oplami watle epo atlaiyo, “Namkale, wa: bobtalimaleye mo-hiyotipame wellipo,” diyo.

<sup>21</sup> Amasiyama edla popa:le aiyalma imalalo so mate epo Pa:lisi so mateta ya: yu dalepame epo momalampopa:iyo, “Oplami i anata:? Ya: God hi mate putlopo atlalepo. Adipalati, hatlo God tlo ya: dla batalimale hiyotimolowe itiyamale elapo,” dempopa:iyo.

<sup>22</sup> Amasiyama Yesu yia:ta momalamale ma-natipame epo atlaiyo, “Wua: adipalati na:ta atlale koko dla sikemte momalampopa:mama allimpopa:ma:? <sup>23</sup> Wua: akoloyale oplami i natiya. Ya: dla adipo atlowe tlo kokaleta:? ‘Na:ta wa: batalimaleye ma-hiyostalepo,’ dlowe kokota kokaleta:? O, ‘Wa: sila:time ma-tane,’ dlowe kokota kokaleta:?”

<sup>24</sup> Epedeme Opa Yamita ta:lamo hema batalimale hiyotimolowe dla itiyamale ham-sela:ye wua:ta natilipo depame na:tapo wata akoloyale oplami iye ka:dlowepo,” diyo. Epo atlepame Yesuta akoloyale oplami dla omhalemama ya: watle epo atlaiyo, “Na:ta wa: dla atlema, wa: sila:time wa: wa:ya hame wa: aya dla ma-tane,” diyo. <sup>25</sup> Epalati akoloyale oplamita pakasiyamalalo yia: inoma dali dla sila:time ya: wa:ya hame ma-tamama God dla siyele ta:demtaiyo. <sup>26</sup> Opa hapulomatapo koko i natipo yiyelepame wowota:le mate God dla siyele ta:demama epo atlamyaiyo, “Di wata pta ulugiyemale koko pato nati,” demyaiyo.

*Yesuta Libai sisilamale  
(Ma:t 9:9-13; Maka 2:13-17)*

<sup>27</sup> Koko ita tame gudlati alotle Yesu aya dulu tle alikili dla woyapo taiyo. Ya: tamama natilati ta:kis mani halomalalo oplami Libaita ta:kis halomalalo aya dulu dla polla natiyo. Epalati ya: watle epo atlaiyo, “Wa: na: dolumpuane,” diyo. <sup>28</sup> Epalati Libaita sila:time alisisi hapuloma medla pomelepame Yesu mate taiyo.

<sup>29</sup> Epame Libaita Yesu watle daya pato dinapiyo. Epalati ta:kis mani halomalalo so hapuloma mate epo opa opi mate puame aya edla Yesu mate daya dempopa:iyo. <sup>30</sup> Amasiyama Pa:lisi so mate epo aiyalma imalalo so mate koko i natipame allimama Yesu ya: alotle tlalo so watle epo atlaiyo, “Wua: adipapalati ta:kis mani halomalalo so mate epo batalimale so mate daya dempopa:ma:?” diyo.

<sup>31</sup> Epalati Yesuta asiyama epo atlaiyo, “Esiyele pa:talo sotapo dakopala ilalo oplami hala dla potasemde. Amasiyama isikimi esusulumale sotapo dakopala ilalo oplami hala dla tamdepo. <sup>32</sup> Epapedeme na:ta puwaye, ka:ka:dle soye sisilamolowedeme popuana. Amasiyama bobtalimale sota yia: bobtalimale tle ma heheletimelepo depame puwapo,” diyo.

*Daya aiyalma depo hallowe koko dla atlanatili  
(Mat 9:14-17; Maka 2:18-22)*

<sup>33</sup> Opa opita Yesu watle epo atlaiyo, “Yon ya: alotle tlalo sotapo inoma sumha:ha:mama dayaye aiyalma depo ha:ha:mdepo. Epame Pa:lisi so yia: alotle tlalo so ma epamdepo. Ame adipalati wa: alotle tlalo sota alila hapuloma daya mate yú mate dlomha:ha:ma:?” diyo.

<sup>34</sup> Epalati asiyama Yesuta wayu mate yia: watle epo atlaiyo, “A:ya halalo oplamita a:ya halowedeme daya dinapopo yimkadulo sisilamelepe. Epalati yimkadulota puame dayaye aiyalma depo popa:pa:? Hao. Yia: sisiyele mate a:ya halalo oplami mate popa:mama dayaye yimkata dempopa:lepe. <sup>35</sup> Amasiyama alila haleta a:ya halalo oplamiye yia: tle alikili dla hamame telepiye, eta yia:tapo daya aiyalma depo popa:lepe.”

<sup>36</sup> Epame Yesuta ma wayu mate yia: watle epo atlaiyo, “Oplamitapo ya: tluka amko dla ketahame tluka takala dla badepo podedlemasemde. Epapelepiye, tluka amkoye batalimelepe. Epame tluka amko tle ketahame takala dla badepo dedlemaleta tluka takala mate po-ala:lowa. <sup>37</sup> Epedeme matle oplamitapo wain yú amkoye aliya kapalata ita iwale takala dla posimasemde. Adipalati, wain yú amkota itiyamama aliya kapalata iwale ita takalaye gladlati wain yúye alikili dla olotlepe. <sup>38</sup> Epapedeme ka:dena, wain yú amkoye woloma aliya kapalata iwale ita amko dla simoloweye. <sup>39</sup> Epedeme oplamitapo wain yú takala delepiye, ya: matle wain yú amko pota:lowa. Adipalati, ya:ta epo atellepe, ‘Wain yú takala tlo pta sikemte opalina,’ dlepe.”

## 6

*Pa:lisi sota yia:ta inoma sumalalo alila koko dla Yesu mate yu topulolle  
(Mat 12:1-8; Maka 2:23-28)*

<sup>1</sup> Yu so inoma sumalalo alila hale dla Yesuta ya: alotle tlalo so mate witi daya emale dulu tle tamalaiyo. Epame ya: alotle tlalo sota witi dlomokoye hauwalepame kapala o-osomama moko dulu tlo dlomtaiyo. <sup>2</sup> Epalati Pa:lisi so opita koko i natipame yia: watle epo atlaiyo, “Wua: adipalati dita inoma sumalalo alila dla dlowe alisisi hauwali? Wua: di aiyalma ma-hauwokokomalepo,” diyo.

<sup>3</sup> Yesuta asiyama yia: watle epo atlaiyo, “Wua: God yu buka dla Deibidi mate ya:mkadulo mate yia:ta daya teta:lati koko halëye posesa:semde? <sup>4</sup> Adipalati, Deibiditapo God ya: aiyalma aya dla tuwame aiyalma dayaye hapame ya:mkadulo mate douwapo. Amasiyama aiyalma daya iye di aiyalma dolumama isikimi God ka: epo opa ka: duka dla ha:ha:lalo so siyapota dlomduwapo. Epapele tlope Deibiditapo di aiyalma postamama ya: opa mate mepele daya eye dlomuwapo,” diyo. <sup>5</sup> Yesu matle yia: watle epo atlaiyo, “Opa Yamitapo wua:ta inoma sumalalo alilaye ya:ta dokopala depo halapo,” diyo.

*Yesuta do seme powale oplami ka:dle  
(Mat 12:9-14; Maka 3:1-6)*



<sup>6</sup> Yu sota inoma sumalalo alila hale dla Yesuye inoma sumalalo aya dla hetame opaye imhalaiyo. Aya dulu edla oplami do seme powale ma me-polaiyo. <sup>7</sup> Amasiyama aiyalma imalalo so mate Pa:lisi so mateta Yesuye woloma omsiyamaiyo, ya:tapo yia:ta inoma sumalalo alila dla do seme powale oplami ka:dla natipame ya:ye aiyalma postlalo oplami dlowedeme. Adipalati, yia: aiyalma koko dolumama yia:ta inoma sumalalo alila dla esiyele oplami hale ka:dloweye aiyalmayo. <sup>8</sup> Epapele tlope yia:ta malamaleye Yesuta momalanatipame do seme powale oplami watle epo atlaiyo, “Wa: sila:time haliyamale hema puame halane,” diyo. Epalati do seme powale oplamita sila:time haliyamale dla tuwame halaiyo.

<sup>9</sup> Epame Yesuta Pa:lisi so mate epo aiyalma imalalo so mate dla epo atlaiyo, “Di aiyalmata dita inoma sumalalo alila koko dla apa koko atlema:? Alila edla ka:dle koko haloweta ka:pita:? O batalimale koko haloweta ka:pita:? Epame aiyalma koko eta di watle dita inoma sumalalo alila dla oplami pasakalo gadlowe koko atlema:? O oplami pasakalo yumuluwe koko atlema:?” diyo.

<sup>10</sup> Yesu yia: watle epo atlepame ma yia: dla omhalemama do seme powale oplami dla epo atlaiyo, “Wa: do seme powaleye mo-dolene,” diyo. Epalati oplamitapo ya: do powaleye mo-dollati ya: dota ma-ka:diyo. <sup>11</sup> Epapalati Pa:lisi so mate aiyalma imalalo so mate koko i natipame sikemte siyalasiyalademama yiskamu yia: dulu dla Yesuye adipo hampo yumpa: dle kokoye esemyaiyo.

*Yesuta ya: alotle tlalo so 12 hohomale  
(Mat 10:1-4; Maka 3:13-19)*

<sup>12</sup> Alila haletapo Yesu tamali di dla hetame utula:la patoye God dla inoma sumhalaiyo. <sup>13</sup> Epame alallati ya:tapo ya: dolumtamalale so opa hapuloma sisilapame ma yia: dulu dla ya: opa 12 tlo hohopame yia: watle Taiya dle so hi hapiyo. Epedeme Yesuta Taiya dle so hohomaleye iwolopo. <sup>14</sup> Saimon (oplami iye Yesuta ya: hi haleye ma Pita diyo), epo Saimon ya: ei Endulu, epo Yeims, epo Yon, epo Pilipi, epo Batolome, <sup>15</sup> epo Ma:tiyu, epo Tomas, epo Alpiyes yami Yeims, epo Loum gamani so mate opahale demhalale oplami Saimon, <sup>16</sup> epame Yeims yami Yudas, epo Yudas Iskaliyot (alotle Yesuye opahale so do tama dla homelle.)

*Yesuta opa imhalemama opa hapuloma ka:ka:dle  
(Mat 4:23-25)*

<sup>17</sup> Yesuye tamali di tle ya: alotle tlalo so 12 mate tulum tamali kikiwi isili wou mo dla ha:ha:iyo. Yia: edla tulum ha:ha:mama natilati Yesu dolumsiyamalalo so hapuloma mate epo opa opi hapuloma Yudiya tle epo Yelusalem tle epo kaula pato peleyama pili dla ha:ha:lalo Taya mo mate Saidon mo mate tle pumulale so tlamaiyo. <sup>18</sup> Yia:tapo Yesuta God yu atlati dallowedeme pumulaiyo. Epame yia: dla esusulumale hutiyeye ka:ka:dlepo depame pumulaiyo. Epapele dulu dla Yesutapo opa dulu dla bataliya yimlalata wotiyalle hapimha:ha:leye ka:ka:diyo. <sup>19</sup> Opa hapulomatapo Yesu kapalaye umuluwedeme solotamaiyo. Adipalati, yia: natiyo, itiyamaleta Yesu tle woyapame opa hapulomaye ka:ka:demhallati.

*Wua: sisiyeiya  
(Mat 5:1-12)*

<sup>20</sup> Yesuta ya: alotle tlalo so watle omhalemama epo atlaiyo, “Alisisi pa:talo so, wua: sisiyeiya.

Adipalati, God ya: mo kokoye wuolepo.

<sup>21</sup> Daya teta:mha:ha: so, wua: sisiyeiya.

Adipalati, wua:ye daya susukallepe.

Epame dupa kolle mate a:lemha:ha: so, wua: sisiyeiya.

Adipalati, wua:ta eimelelowe alilata pulupe.

22-23 Epedeme Opa Yami koko tle opata wua:ye allimama ayalemyelepiye, wua: sisiyeiya. Epame yia:tapo wua:ye batalimale so depame wua: putlomyelepiye, wua: oloma edla sisiyele pato mate ha:ha:iya. Adipalati, Pepele di dla wua:ta halowe asiyama patoye wua: hi mate ma-dinapopo elapo. Epapedeme wua: malamaiya, wua: dla wotiyalle hapimha:ha: so yia: mamadulotapo ka:yapa ha:ha:uwa God yu molo atlamalalo so dla wotiyalle mepapeleye halopimha:ha:uwapo.”

*Ka:e wolomape!*

24 “Ka:e, alisisi poposatilimale so, wua: wolomape!

Adipalati, wua:ta siyele kokoye ma-hauwapo.

25 Ka:e, daya wata susukalemha:ha: so, wua: wolomape!

Adipalati, alotle wua: dla daya ta:le kokota pulupe.

Ka:e, eimelemha:ha: so, wua: wolomape!

Adipalati, wua: alotle dupa kolle mate a:lemha:ha:lepe.

26 Ka:e, opa hapulomata ka:ka:dena demha:ha: so, wua: wolomape!

Adipalati, wua: dla ka:ka:dena demha:ha: so yia: mamadulotapo biskapa God yu molo atlamalalo so dla mepo ka:ka:dena demha:ha:uwapo.”

*Wua: dla opahale demha:ha: soye bokotiyapo malamha:ha:iya  
(Mat 5:38-48, 7:12)*

27 “Anawolota na: yu dalema:, na: wua: watle atlema, wua: dla opahale demha:ha: so dla bokotiyapo malamha:ha:iya, epame wua: dla allilalo so dla ka:ka:dle koko halomha:ha:iya. 28 Wua: dla puputlomalalo so yilo inoma sumha:ha:iya. Epame wua: dla wotiyalle halopilalo so yilo inoma sumha:ha:iya. 29 Epame oplami haletapo wa: damta dla heyulupiye, ka:dena, damta seme ma haiyeloweye. Epame oplami haleta wa: kapumale tlukaye hamtlati ya: watle wa: sede ma me-hamine. 30 Epame opa opita wa: dla alisisi otlati yia: watle isikimi me-hapine. Epame opata wa: alisisi halopo tlati yia: tle matle ilame halomli demiya. 31 Wua: apa kokoye opata wua: dla halepo depo solotamelepiye, ka:dena, wua: tatile yia: dla epapele kokoye halepe.

32 Wua: isikimi wua: bokotiyapo malamalalo so dla bokotiyapo malamha:ha:lepiye, opata wua:ye ka:ka:dle so depa:? Hao. Adipalati, batalimale so mape yia: bokotiyapo malamalalo so dla asiyama bokotiyapo malamha:ha:mdepo. 33 Epame wua: isikimi wua: dla ka:ka:dle koko halomalalo so dla ka:ka:dle koko halomha:ha:lepiye, opata wua:ye ka:ka:dle so depa:? Hao. Adipalati, batalimale so mape mepamdepo. 34 Epame wua: isikimi wua: dla ma ilame hapilalo ala:le so dla alisisi hapimha:ha:lepiye, opata wua:ye ka:ka:dle so depa:? Hao. Adipalati, batalimale so mape mepamdepo. Yia:ta asiyama ilame halowe malamama yia: alisisiye opa opi dla hapimdepo. 35 Amasiyama wua:ye wua: dla opahale demha:ha: so dla bokotiyapo malamha:ha:iya. Epame yia: dla ka:ka:dle kokoye halomha:ha:iya. Epame yia: dla alisisiye isikimi hapipame matle yia: dla asiyama halowa depo malamiya. Wua:ta ipapele koko tlo halomha:ha:lepiye, wua: asiyama pato halepe. Epame wua:ye di dla hallalo God ya: yimlala dlepe. Adipalati, Godtapo ya: dla haiyalle yu po-atlalo wekelalo so mate epo bobtalimale so mate dla ka:ka:dle koko halopilalo halapo. 36 Wua: A Godye yimkadulo polowamalalo halapo. Epapedeme wua: mape yimkadulo polowamale mate ha:ha:iya.”

*Yimkadulo batalimale kokoye ase sikemte malamiya  
(Mat 7:1-5)*

37 “Wa: wa: amkale kokoye isikimi glademhalemiya, epalati asiyama wa: kokoye poglademhallowa. Epame wa: amkaleye batalimale oplami demiya, epalati asiyama wa:ye pobatalimale oplami dlowa. Epame apa batalimaleye wa: amkaleta wa: dla hauwa, wa: ya: batalimale eye weline. Wa:ta epapelepiye, asiyama wa: batalimaleye wellipe. 38 Epedeme wa: isikimi hamilowe tlo hapimhalepiye, wa: ma asiyama halepe.

Wa:ta opa opi dla hapimhallelepiye, Godta wa: dla asiyama pato hamilipe. Epapedeme Godta wa: dla hamili koko itapo wa: dla pasatamama alikili dla kulumhallepe. Wa:ta adisowaye wa: amkale watle hamilipiye, asiyama Godta mesowaye wa: watle hamilipe.”

<sup>39</sup> Epame Yesu matle wayu i atlamaiyo, “Inoma pa:le oplamita ya:mkale inoma pa:le semtlowe ka:deta:? Hao. Adipalati, yia:ta madipatata munamu hatlo medla teteyulupe.

<sup>40</sup> Epedeme ala malamale hamhallalo maseyemalata ya: imalalo oplamita malamaleye potla:mtame halasema. Hao. Amasiyama ya: imalalo oplamita maseyemalaye woloma ipo gudlepiye, eta maseyemalata malamaleye imalalo oplamita malamale mate ma-ala:lepe.

<sup>41</sup> Wa: adipalati wa: amkale inoma dla hakaka yemala ela tlo sikemte natimama asiyama wa: inoma dla sokotalo patota tuwame ela tlo ponatilalo wekemdi? <sup>42</sup> Epame wa: inoma dla sokotalo pato elaye ponatilalo, wa: ma adipalati wa: amkale dla atle-mama, ‘Wa: inoma dla hakaka yemala elaye holahamastali,’ demdi? Wa: ikadepe wa:skamu pepemalalo oplamipo. Adipalati, wa: ka:dena, wa: inoma dla sokotalo pato ela tate holamastloweye. Eta wa: amkale inoma dla hakaka yemala elaye woloma natipo holamastlepe.”

### *Dlomoko tle dali malanatimdepo*

*(Mat 7:16-20, 12:33-35)*

<sup>43</sup> “Epedeme dlomoko dali ka:dletapo dlomoko batalimale pomisemde. Epame dlomoko dali batalimaletapo dlomoko ka:dle pomisemde. Hao. <sup>44</sup> Adipalati, dlomoko dali hapulomaye yia: dlomoko tle malanatimdepo. Epapedeme pigi dlomoko mate gla:pi dlomoko mate biskapa dali dla pomilimasemde. Hao. <sup>45</sup> Epedeme ka:dle oplamitapo ka:ka:dle koko ya: dupa dulu dla hutiyeye ya: mati tle halopo wowoyamdepo. Epalati batalimale oplamitapo ya: dupa dulu tle bobtalimale koko hutiyeye halopo wowoy-amdepo. Epapedeme adipapele kokota oplami dupa dulu dla pasatepo ellepiye, ya: mati tle epapele kokoye atlamelepe.”

### *Opa dapiyamteta aya halomale*

*(Mat 7:24-27)*

<sup>46</sup> “Wua: adipalati na: dla ‘Lod, Lod,’ demha:ha:mama asiyama na:ta atla kokoye pohalalo ha:ha:ma:? <sup>47</sup> Oplami antapo na: dla puame na: yu dalepame salladepo sela:lepiye, ya:ye ipapena. <sup>48</sup> Ya:ye oplamita aya hamama munamu sikemte mumuwalepo alumiti kellepo aya halë epapele some halapo. Adipalati, yúta pupo tulumama aya dla heyulati ayata podokalamhamastana. Ayata me-ka:pi kokalepo poluwapo. <sup>49</sup> Amasiyama oplami antapo na: yu dalepame posalladlalo sela:ma:, ya:ye oplamitapo aya hamama munamu pase mumuwallalo wekele epapele some halapo. Adipalati, yúta pupo tulumama ya: aya dla heyulati ayata pokokallalo dokalamhamastauwapo.”

## 7

### *Loum opahale so omhallalo oplamita mikadepe dle koko*

*(Mat 8:5-13)*

<sup>1</sup> Yesuta koko hapuloma iye opa dla imhalepo gudepame ma Kapaniyem mo dla taiyo. <sup>2</sup> Kapaniyem mo edla Loum opahale so omhallalo oplami halaiyo. Epeleye oloma edla ya: oko oplami haleta a:mhalemama mo-polowe mateka:pi dla halaiyo. Amasiyama ya:ta ya: oko oplami itlo sikemte malamdiyo. <sup>3</sup> Epapeleye ya:ta Yesuta puale dalepame Yu so dokopala opa opi watle Yesu salataiya diyo, Yesutapo puame ya: oko oplamiye ka:dlepo depame. <sup>4</sup> Epalati Yu so dokopala so opa ewolota puame Yesu watle otele mate epo atlaiyo, “Di sikemte solotama, wa:ta tame opahale so omhallalo oplamiye gadlepo depame. <sup>5</sup> Adipalati, ya:tapo di opaye sikemte malamama di inoma sumalalo ayaye hauwapo,” diyo. <sup>6</sup> Epalati Yesuta yu i dalepame yia: mate taiyo.

Yesu ala aya mateka:pi dla tamhallati opahale omhallalo oplamita ya:mkaduloye taiya dlati yia:ta puame Yesu watle epo atlaiyo, “Opahale so omhallalo oplamita wa: watle yu ipo hami. Wa:ta ya: aya dla tloweye ya: pase malamasemuwo. Adipalati, ya: ya:skamu batalimale oplami depame wa:ye ya: aya dla pumiyo de. <sup>7</sup> Epame ya: ma wa: hala dla puluweye pase malamasemuwo. Epapele tlope ya: solotamuwo, wa:tapo isikimi wa:ta hala metle ya: oko oplamita ka:dlepo depame yu tlo atlane, de. <sup>8</sup> Epame ya: ma epo atla, ya: ma opa opi isili tle oko hamhalemama yia: yu dla salladepo sela:mduwo. Epame ya: ma ya: isili dla oko halalo so opa opi me-ha:ha:uwo. Epedeme ya:tapo ewolo watle huma taiya dlati yia: ma tamduwo. Epame hema puaiya dlati yia: ma pumduwo. Epame koko e haiya dlati yia: ma koko e hamduwo. Epedeme ya: koko epapele hamdedeme, wa: ma isikimi metle halemama yu tlo atlepo de, ya: oko oplamita ka:dlepo depame.”

<sup>9</sup> Epalati Yesuta opahale omhallalota yu hamili dalepame sikemte yeliyo. Epame opa alumale ya: dolumpuale dla helestame omhalemama epo atlaiyo, “Na:ta Isalael mo dla sela:uwa dla mikadepe dle kokalle oplami ipapele ponatimdena,” diyo.

<sup>10</sup> Epapalati opahale omhallalo oplamita taiya dle sota ma ilame tame natilati opahale omhallalo oplami ya: oko oplamita ma-ka:depo polla natiyo.

### *Yesuta sepeyama yamiye powale tle ma pasakalo dle*

<sup>11</sup> Epame alila opi alotle Yesu mo hale Nain dla taiyo. Epalati ya: alotle tlalo so mate epo opa opi hapuloma mateta ya: dolumtamalaiyo. <sup>12</sup> Ya: tame mo kosukulli kokoloma mateka:pi dla tamhallati opatapo mo dulu tle kipiliyemala powale motoye momka:tipo pumulaiyo. Kipiliyemala powale iye sepeyama hale yami hatlope ikadepeyo. Epalati opa hapulomata sepeyama mate pumulaiyo. <sup>13</sup> Lodta sepeyama i natipame ya: sikemte polowamama ya: watle epo atlaiyo, “Ase sikemte ammiya,” diyo.

<sup>14</sup> Epame Yesuta tame powale moto tomsosomale dali ipi dla umulati powale moto hamtamha:ha:leye medla hediyo. Epalati Yesuta kipiliyemala powale watle epo atlaiyo, “Maseyemala, na: wa: dla atlema, wa: sila:tine,” diyo. <sup>15</sup> Epalati maseyemalata sila:time polomama yukamalati Yesuta maseyemalaye ya: wai watle semtaiyo.

<sup>16</sup> Opa hapulomata koko i natipame sikemte yiyelepame God dla siyele yu ta:demyaiyo. Epamyemama yia:ta epo atlamyaiyo, “God tle yu hapame molo atlalo oplami patotapo dia: dulu dla mo-woyamalepo. Epame Godtapo ya: opa gadlowedeme mo-pualepo,” demyaiyo. <sup>17</sup> Opata Yesuta koko halë i natipame Yu so mo hapuloma dla epame mo opi dla ma esemtamalaiyo.

### *Yon opa yú dla ka:ka:timalalota Yesu koko dalepame atlanatili*

*(Mat 11:2-6)*

<sup>18</sup> Yon ya: alotle tlalo sota Yesuta koko halomsela:leye Yon watle atlamaiyo. Epalati Yonta koko i dalepame ya: alotle tlalo so dapiyamteye tame Yesu watle ipo atlanatiye diyo, <sup>19</sup> “Wa: ikadepe Keliso, dita omha:ha:uwa oplamita:? O di ala oplami hale tlo me-omha:ha:pa:? diye,” diyo.

<sup>20</sup> Epalati yia: tame Yesu watle epo atlaiyo, “Yon opa yú dla ka:ka:timalalo oplamita dia:ye wa: watle taiya demama yu ipo hami, ‘Wa:ye ikadepe Keliso, dita omha:ha:uwa oplamita:? O di ala oplami hale me-omha:ha:pa:?’ de,” diyo.

<sup>21</sup> Amasiyama oloma edla Yesutapo esusulumale so mate epo bataliya watalo so mate epame inoma pa:talo so mate ka:ka:demsela:iyo. <sup>22</sup> Ya: epamsela:deme ya:ta Yon ya: alotle tlalo so watle epo atlaiyo, “Wua: ma ilame tame Yon watle wua:ta tlamale koko mate epo dlalle koko mate atlamaiye. Adipalati, inoma pa:talo sota ma tlamapo. Epame akoloyalemale so mape ma ka:ka:depo siyamapo. Epame kapala bobtalmale so mape ma ka:ka:depo siyamapo. Epame molo pa:talo so mape ma ka:ka:depo dlalemsiyamapo. Epame palli so mape ma sillipo siyamapo. Epame ka:dle yuye atali sota ma-dalepo.

<sup>23</sup> Epapedeme oplami antapo na: koko tle pokustamtlalo wekelepiye, Godta ya: dla siyemhalapo.”

*Yesutapo Yon opa yú dla ka:ka:timalalo oplami koko atlale  
(Mat 11:7-19)*

<sup>24</sup> Yon ya: alotle tlalo sota ma ilame tlati Yesuta opa watle Yon koko atlemama epo atlaiyo, “Wua: dalupa dulu dla apa koko natila tauwa? Mosisita osamokolo dla yumama holumhallati natila tauwa? <sup>25</sup> Wua: oplamita tluka ka:ka:dle didiyepo pollati natila tauwa? Hao. Adipalati, tluka ka:ka:dle didiyelalo soye dokopala sota popa:lalo aya ka:ka:dle dla popa:mdepo. <sup>26</sup> Amasiyama wua: God tle yu hapame molo atlalo oplami natila tamama apuwa? Yao, wua:ta tame natiwa oplami Yon eta God tle yu hapame molo atlalo so ka:yapa ha:ha:uwaye ma-tla:mtame halapo. <sup>27</sup> Adipalati, God yu buka dla ipo atlaleye Yon koko atlapo,

‘Na:tapo na: yu hamsela:lalo oplami tatile tane dlowepo.

Ya:tapo wa: apiye dinapelepo depame.’

<sup>28</sup> Epapedeme na:tapo ikadepe kokoye wua: watle atlema. Yonta ka:yapa ha:ha:mpuwa opa hapulomaye tla:mtame halapo. Amasiyama epapele tlope oplami antapo God ya: mo koko dla yimka:mala depa hallepiye, ya:tapo Yonye tla:mtame halapo,” diyo.

<sup>29</sup> Opa hapuloma mate epo ta:kis mani halomalalo so opi mate yu i dalepame God yuye ka:pi demyaiyo. Adipalati, yia: mape Yonta yú dla ka:ka:timaiyo. <sup>30</sup> Amasiyama Pa:lisi so mate epo aiyalma imalalo so mate Godta solotamale koko yia:ta halepo dleye e halomala allimama yú dla potutula:lalo wekiyo.

<sup>31</sup> Epame Yesu matle epo atlaiyo, “Wata oloma hema opa ha:ha:ye adipapele sota:?” <sup>32</sup> Yia:ye akimlala yimka:sikili some api duka dla popa:mama yimkadulo watle asiyama atla asiyama atla dempopa:mama ipo atlampopa:mdepo, ‘Dita siyele sala dolumpopa:lati wua: posiyalemdena. Epame dita dupa kolle sala dolumpopa:lati wua:ta po-a:lemdena,’ demdepo. <sup>33</sup> Wua: ma epapele some ha:ha:po. Adipalati, Yon opa yú dla ka:ka:timalalota puwaye, ya: daya mate wain yú mate podemsela:na. Amasiyama wua:ta ya:ye bataliya walena demdepo. <sup>34</sup> Epame Opa Yami mape mo-puwapo. Ya:ta puame daya mate wain yú mate demsela:lati wua:ta ya:ye daya mate wain yú mate sikemte dlalo oplami demyapo. Epame wua:tapo ya:ye ta:kis mani halomalalo so mate epo batalimale so mate namkale demhalema demyapo. <sup>35</sup> Amasiyama opa anawolotapo Godta malamaleye malastapame dolumha:ha:lepiye, yia:ta Godta malamaleye ka:pi demha:ha:po.”

*Batalimale a:yata Yesu hete howahalë*

<sup>36</sup> Alila hale dla Pa:lisi oplami hale Saimonta Yesuye seme ya: aya dla daya dla hetaiyo. <sup>37</sup> Mo edla a:ya hale opa ala:msela:lalo halaiyo. Epapeleye ya: Yesuta Pa:lisi oplami aya dla daya dempolale dalepame ullu ka:dle pamalalo dakopalaye isilako dla tipo hampuaiyo. <sup>38</sup> Epame Yesu ko tle heodepo ampolomama ya: kaiyota Yesu heteye delikiyetaiyo. Ya: epame ya: kokosase mate hiyolempolomama Yesu heteye hulumpolaiyo. Epame dakopala ullu ka:dle pamalalota Yesu hete dla simpolaiyo.

<sup>39</sup> Epalati Pa:lisi oplami Saimonta koko e natipame epo momalampolaiyo, “Oplami iye ikadepe God tle yu hapame molo atlalo oplami dematiye, eta a:ya ya: umpolaye malanatlimla. Adipalati, a:ya iye batalimale a:yapo,” diyo.

<sup>40</sup> Amasiyama Yesuta Pa:lisi oplami watle epo atlaiyo, “Saimon, na: wa: watle koko hale atlowe solotama,” diyo.

Epalati Saimonta epo atlaiyo, “Imalalo oplami, atlane,” diyo.

<sup>41</sup> Epalati Yesuta ya: watle epo atlaiyo, “Oplamitapo opa dapiyamte watle mani halopiyo. Ya:tapo oplami hale watle 500 elo mani hamimama ma oplami hale watle 50 elo mani hamiyo. <sup>42</sup> Amasiyama alotle opa dapiyamte iwolotapo yia: dla mani hawa



hallati asiyama mesowa yo dla pahalopilalo wekiyo. Epalati yota koko e natipame yia: watle epo atlaiyo, ‘Mope weliya,’ diyo. Epedeme opa dapiyamte dulu hema adita yoye sikemte malamuwawa?” diyo.

<sup>43</sup> Saimonta asiyama ya: watle epo atlaiyo, “Mani pato holahalale oplamita yoye sikemte malamuwawa,” diyo.

Epalati Yesuta Saimon watle epo atlaiyo, “Wa: ikadepe koko atlalepo,” diyo.

<sup>44</sup> Yesuta a:ya watle ompolomama ma Saimon watle epo atlaiyo, “Wa: a:ya i natine. Na:ta wa: aya dla pulati na: hete howahalowe yúye na: watle pohamina. Amasiyama a:ya itapo ya: kaiyo mate na: hete howahapame ya: kokosase mate na: heteye hihiyollepo.

<sup>45</sup> Epame na:ta wa: aya dla pulati wa:ta siyemama na:ye pohuluna. Amasiyama na:ta wa: aya dla puale oloma dla a:ya itapo na: hete hulumpolomama duka pogudena. <sup>46</sup> Epame wa:tapo dakopala ullu ka:dle mate na: dokopala dla posimana. Amasiyama a:ya itapo na: hete dla simalepo. <sup>47</sup> Epapedeme na:ta wa: dla ikadepe koko atlema. A:ya i ya: batalimale hapulomaye mo-howahapo wellipo. Epedeme ya:tapo na: sikemte malamale kokoye haliyamale dla botomastalepo. Amasiyama oplami antapo na:ta ya: batalimale yimka:malaye howahapo wellipiye, asiyama ya:ta na: malamaleye pase pato,” diyo.

<sup>48</sup> Epame Yesuta a:ya watle epo atlaiyo, “Wa: batalimale hapulomaye mo-howahapo wellipo,” diyo.

<sup>49</sup> Epalati opa opi yia: mate daya dempola:le sota koko i natipame yiskamu yia: dulu dla epo atlamyaiyo, “Oplami i anata:? Ya: batalimale kokoye adipo howahapo weli demsela:ma:?” demyaiyo.

<sup>50</sup> Yia: epo atlampopala:lati Yesuta a:ya watle epo atlaiyo, “Wa:ta na: dla mikadepe dle kokotapo wa: pasakalo hallowe kokoye ma-halepo. Epedeme wa: siyele mate tane,” diyo.

## 8

### *Yesu wolo gagademsiyamale wola:*

<sup>1</sup> Koko ita tame gudlati Yesuta ka:dle yu God ya: mo kokoye imsela:mama mo hale tle ma mo hale dla ta demsela:iyo. Epalati ya: alotle tlalo so 12 mape ya: mate siyamaiyo.

<sup>2</sup> Epalati esusulumale so wola: Yesuta ka:ka:dle mate epo bataliya watalo so wola: Yesuta ka:ka:dle mateta ya: mate siyamaiyo. Wola: ewoloye iwolopo. Meli, ya: hi haleye Magadalin. Yesutapo a:ya i ya: opasi dulu tle bataliya yimlala 7 alikili dla dodolomsaliyo.

<sup>3</sup> Epo a:ya hale Helod ya: aya omhallalo oplami Kusa ya:llu Yowana, epo Susana, epame wola: opi mape yia: mate me-siyamaiyo. Wola: iwolotapo Yesu mate epo ya: alotle tlalo so mateye yia: alisisi mate gagademsiyamdiyo.

### *Witi daya ale ka:ka:lle mate wayu atlale*

*(Mat 13:1-9; Maka 4:1-9)*

<sup>4</sup> Opa hapulomata mo meyelope meyelope dle tle puame alumhallati Yesuta wayu i mate esemhalaiyo. <sup>5</sup> “Alila haleta oplami haletapo witi daya aleye ka:ka:lla taiyo. Ya: witi daya ale ka:ka:lemsela:mama ale opitapo api duka dla teteyuiyo. Epalati opata api tle tamhalemama hete mate witi aleye dlolemhallati teata puame deiyo. <sup>6</sup> Epalati witi daya ale opitapo ewala ta:la dla teteyuiyo. Epame yia:ta popeyapo teta:le oloma dla ma pakasiyamalalo paliyo. Adipalati, ewala ta:la dulu dla yú hawa halaiyo. <sup>7</sup> Epo witi daya ale opita osamokolo dulu dla teteyuiyo. Yia: epame pakasiyamalalo popeyamaiyo. Amasiyama teta:le oloma dla osamokolota yia: mate matamama dukuluta popoliyelati yia:ta hapulomata paliyo. <sup>8</sup> Epame witi daya ale opita ta:la ka:dle dla teteyuiyo. Epame yia:tapo popeyapo teta:pame sikemte milimaiyo. Epele dulu dla witi daya ale hapulomatapo milimama 100 dlomoko milimtaiyo.”

Yesuta yu i atlepo gudepame yu teta:le mate epo atlaiyo, “Molo watalo so, wua: yu iye woloma daliya,” diyo.

*Wayu ya: dulu koko  
(Mat 13:10-23; Maka 4:10-20)*

<sup>9</sup> Yesu ya: alotle tlalo sota Yesu watle atlemama epo atlaiyo, “Wayu i ya: dulu kokoye adipo elema:?” diyo. <sup>10</sup> Epalati Yesu asiyama ya: watle epo atlaiyo, “Wua:tapo God ya: mo kokoye malastlepe. Adipalati, ka:yapa Godta ya: mo kokoye hemele hatiyomme eluwaye wata wua: dla botomastapo. Amasiyama opa opi dla na: wayu siyapo tlo atlemde. Adipalati,

‘ya:tapo natimama ya: dulu koko woloma ponatilalo wekelepo depame.

Epame ya:tapo dalepame woloma ya: dulu kokoye pomalamalalo wekelepo depame.’

<sup>11</sup> Epapedeme wayu i ya: dulu kokoye ipo. Witi daya aleye God yupo. <sup>12</sup> Epedeme opa opitapo witi daya ale api duka dla teteyuli epapele some ha:ha:po. Ya:tapo ka:dle yuye ma-dalemdepo. Amasiyama Saitenta God yu iye ya: dupa dulu tle alikili a:ma dla hame tamdepo, ya:tapo mikadepe depame pasakalo hallowe halala depame.

<sup>13</sup> Epalati opa opitapo witi daya aleta ewala ta:la dla teteyuli epapele some ha:ha:po. Epedeme ya:tapo God yu atla dalepame siyele mate ma-hamdepo. Amasiyama witi daya aleta ewala ta:la dla kese woloma potutula:lalo wekeleye, ya: ma epamdepo. God yutapo ya: dupa dulu dla kese woloma potutula:semde. Epedeme ya:ta God yuye dalepame isikimi alila kiyele dla mikadepe demdepo. Amasiyama ya:ta God yu hamale koko tle kokalle koko mate epo wotiyalle koko mateta ya: dla woyamalati ya:ta God yu dla ha:ha: etle ma alikili dla potamdepo.

<sup>14</sup> Epalati opa opitapo witi daya ale osamokolo dulu dla teteyuli epapele some ha:ha:po. Ya:tapo God yu dalepame hamdepo. Amasiyama ta:lamo pasakalo malamale mate epo alisisi poposatilipo ha:ha:lowe malamale mate epo ya: motota solotamale koko mateta ta:mama ya:ta mikadepe dleye yumdepo. Epapele koko tle ya:ta mikadepe dle kokota dlomoko pomilimasemde.

<sup>15</sup> Epapalati opa opitapo witi daya ale ta:la ka:dle dla teteyuli epapele some ha:ha:po. Ya:tapo ya: dupa dulu tle ka:depo malamale mate epo hutulli mate God yu dalepame woloma ya: dupa dulu dla kokata hatitimdepo. Epame ya:tapo kokalepo ha:ha:mama dlomokoye sikemte milimdepo.”

*Na:yu dla woloma daliya  
(Maka 4:21-25)*

<sup>16</sup> “Oplami haletapo tulomaye otopame kawapo mate pobopudesemde, epame hemele pohimisemde. Hao. Ya: tuloma otopame haliyamale dla pamelemdepo, opatapo aya dulu dla matimama hela:dle natilipo depame. <sup>17</sup> Adipalati, koko hapuloma wata hemele towalipo hutiyeye alotle ma haliyamale dla botomastlepe. Epame opata podal-lalo wekemduwa kokoye ma haliyamale hela:dle dla botomastlepe. <sup>18</sup> Wua: na: yu iye woloma daliya. Adipalati, woloma ka:pi dallalo oplami dla Godtapo ka:pi malamaley hamilipe. Amasiyama oplami antapo ya:skamu ya:ye God ya: mo kokoye ya:malamana depame ma na: yuye podallalo wekelepiye, Godtapo ya: dla malamale yemala ela eye kolahalepe.”

*Yesu ya: asiyadulo ikadepe  
(Mat 12:46-50; Maka 3:31-35)*

<sup>19</sup> Alila haleta Yesu ya: wai mate ya: eidulo mate ya: natila pumulaiyo. Amasiyama opata sikemte pasatame hallati ya: Yesu hala dla pokulumtuwaiyo. <sup>20</sup> Epalati oplami haletapo Yesu watle epo atlaiyo, “Wa: wai mate epo wa: eidulo mateta wa: mate yukamolowe solotamama alikili dla puame omha:ha:ma,” diyo. <sup>21</sup> Epalati Yesuta asiyama ya: watle epo atlaiyo, “Opa anawolotapo Godta imale dalepame salladepo siyama, ewoloye na: wai mate na: eidulo matepo,” diyo.

*Yesuta sokomoko mate ulo mate ka:lili*  
(*Mat 8:23-27; Maka 4:35-41*)

<sup>22</sup> Alila haleta Yesuta ya: alotle tlalo so watle epo atlaiyo, “Di kaula seme dla ulluwa,” diyo. Epame yia: tulum koa dla alupo ma-tamalaiyo. <sup>23</sup> Yia: kaula duka dla molumha:ha:lali Yesu ellelali elaiyo. Epalati pakasiyamalalo sokomoko patota bibikilimama kaula dla ulo patotota silliyoy. Epame ulo patotota sillimama yia: koa dla yúta pasatapame yia:ye koa mate yú dulu dla ollodla yakomaiyo.

<sup>24</sup> Epalati ya: alotle tlalo sota tuwame Yesu esesa:mama epo atlamyaiyo, “Dokopala oplami, di yú dulu dla tutula:la yakoma,” demyaiyo. Epalati Yesuta elale tle sila:time sokomoko mate ulo mateta keidlepo depame yu itiyamale mate atlaiyo. Epalati sokomoko mate epo ulo mateta medla keidlali kaulata ma woloma keilipo elaiyo.

<sup>25</sup> Epame Yesuta ya: alotle tlalo so watle epo atlaiyo, “Wua:ta mikadepe dle da:?” diyo.

Epalati Yesu ya: alotle tlalo sota koko i natipame yiyelepame wowota:mama epo atlamyaiyo, “Oplami i anata:? Mosisi mate epo ulo mateta ya: yu dla dalepame keidlepo,” demyaiyo.

*Yesuta bataliya walle oplami ka:dle*  
(*Mat 8:28-34; Maka 5:1-20*)

<sup>26</sup> Epame Yesu mate ya: alotle tlalo so mate Ga:lili tle kaula ulumyame seme Gelasa so mo dla woyamaiyo. <sup>27</sup> Yesu koa tle alikili dla postatumama bataliya walle oplami natiyo. Oplami iye mo-powataliya tluka dimi moku dla sela:mama popliyele hatili mo dla halemdiyo. <sup>28-29</sup> Epame bataliyata itiyamaleta ya:ye halali opata ya:ye oli dea mate keketipoliyepo himmdiyo. Amasiyama bataliyata itiyamaleta oli dea keketipoliyele kotipame oplami seme moku dla teletamdiyo. Epapeleye oplami itapo Yesu natipame ta:la dla teyume hiyeleme elaiyo. Epalati Yesuta ya: watle epo atlaiyo, “Bataliya, wa: ya: tle alikili dla ulatane,” diyo. Amasiyama Yesu ala epo atlemhallali bataliya walle oplamita asiyama yu teta:le mate epo atlaiyo, “Yesu, sikemte di dla hallalo God Yami, wa: apa koko na: dla hala puo? Na: wa: dla atlema, na: dla wotiyalle hamimiya,” diyo.

<sup>30</sup> Epalati Yesuta ya: watle epo atlaiyo, “Wa: hi anata:?” diyo.

Epalati asiyama ya:ta epo atlaiyo, “Di hiye Atumkaka,” diyo. Adipalati, bataliya yimlala hapulomatapo ya: dulu dla ha:ha:iyo. <sup>31</sup> Epame Atumkakata Yesu watle otomama epo atlaiyo, “Wa: dia:ye Dlapa mo dla taiya demiya,” diyo.

<sup>32</sup> Epapele oloma dla donapi di dla aliya halo hapulomatapo ketame modlomsiyamaiyo. Epela natipame Atumkakata Yesu watle otomama epo atlaiyo, “Dia:ye aliya dulu dla tuwaiya dene,” diyo.

Epalati Yesuta yia:ye aliya dulu dla tumulaiya diyo. <sup>33</sup> Epalati bataliya yimlala hapulomata oplami etle alikili dla u-ulapo tame ma aliya dulu dla tumulaiyo. Epalati aliya hapulomatapo donapi di tle ullumtulume yú dla tutula:mama paliyo.

<sup>34</sup> Epalati aliya omha:ha:lalo sota koko i natipame potame yia: mo dla epo yia: dakase aya dla atlamtaiyo. <sup>35</sup> Epalati opata koko i dalepame natila pumulaiyo. Yia: puame natitepo bataliya walle oplamitapo ma-ka:depame Yesu hete sitali dla polomama mala-male ka:dle mate tluka didiyepo polla natiyo. Epalati yia:ta hapulomatapo sikemte wowota:iyo. <sup>36</sup> Epalati aliya omha:ha:lalo sota Yesuta bataliya walle oplami ka:dle kokoye yia: watle atlamaiyo. <sup>37</sup> Epalati Gelasa so hapulomatapo sikemte wowota:mama Yesu watle epo atlamyaiyo, “Wa: mo itle alikili dla woyamane,” demyaiyo. Epapalati Yesuta mo-tlowedeme ya: koa dla tulum posokoliyo.

<sup>38</sup> Amasiyama bataliya walle oplami Yesuta ka:dletapo Yesu mate tlowe solotamaiyo. Amasiyama Yesuta ya: watle epo atlaiyo, <sup>39</sup> “Hao, wa: na: mate potlowa. Amasiyama wa: aya dla ilame tame Godta wa: dla koko pato haléye opa dla atlamane,” diyo. Epalati ya: ma ilame tame opa hapuloma watle Yesuta ya: ka:dle kokoye atlamselaiyo.

*Yesuta Yelus yoti ma pasakalo hamili koko mate epo esiyele a:ya ka:dle koko mate (Mat 9:18-26; Maka 5:21-43)*

<sup>40</sup> Yesu matle kaula seme dla ullati opa hapuloma ya: ompopa:letapo ya:ta pula nati-pame sikemte sisiyeiyo. <sup>41</sup> Epalati pakasiyamalalo oplami hale Yu so inoma sumalalo aya omhallalo oplami Yelusta puame Yesu hete sitali isili dla heodepo polomama ya: watle epo atlaiyo, “Wa: na: aya dla puane. <sup>42</sup> Adipalati, na: amseyemala hatlope 12 sokomoko dla hallaloye a:mama mo-pola yakomelema,” diyo. Epalati Yesutapo api duka dla ala Yelus aya dla tamhallati opa hapulomatapo ya: mate tamama sikemte kustipo tamalaiyo.

<sup>43</sup> Epalati opa alumale dulu edla a:ya hale ma me-taiyo. Ya:ye ya: toto koko natimama ka:lliwe pa:le esiyele hame halemama sokomoko 12 pololiyo. Amasiyama oplami haleta ya:ye poka:diyo. <sup>44</sup> Epapeleye a:ya itapo Yesu tamhallati hemele ko tle puame Yesu tluka ipi dla umaiyo. Epalati pakasiyamalalo ya:ta esiyele hame sela:leta medla pa:iyo.

<sup>45</sup> Epalati Yesuta epo atlaiyo, “Anta na:ye umo?” diyo. Amasiyama opa hapulomata epo atlamyaiyo, “Dita wa:ye po-umana,” demyaiyo. Epalati Pitata Yesu watle epo atlaiyo, “Dokopala oplami, opa hapulomatapo wa: mate tamama wa: umamtamalapo,” diyo.

<sup>46</sup> Amasiyama Yesuta epo atlaiyo, “Hao, pe-epapena. Oplami haleta na:ye uma. Adipalati, opa ka:ka:dlalo itiyamale na: dla elaleta na: tle alikili dla woyamaleyе na: me-nati,” diyo.

<sup>47</sup> A:ya ita koko halëye ma haliyamale dla botomastla yakomalati ya:tapo hemele haodlowe pa:iyo. Epalati ya:tapo eseselalle mate tame Yesu hete sitali dla heodepo polaiyo. Epame opa hapulomata me-dalemha:ha:lati ya:tapo ya: dla esiyele elale koko mate epame ya:ta ka:dle koko mateye Yesu watle esemaiyo. <sup>48</sup> Epalati Yesuta a:ya watle epo atlaiyo, “Namkale, wa:ta mikadepe dleta wa:ye ma-ka:dlepo. Epedeme wa: siyele mate tane,” diyo.

<sup>49</sup> Yesu ala a:ya i watle atlemhallati oplami haleta Yelus aya tle puame Yelus watle epo atlaiyo, “Wa: amseyemalaye mo-powame elema. Epedeme wa:ta imalalo oplami hema sempuluweye koko pa:na,” diyo.

<sup>50</sup> Amasiyama Yesuta koko i dalepame Yelus watle epo atlaiyo, “Wa: ase sikemte wota:miya. Isikimi na: dla mikadepe dene. Epelepiye, wa: amseyemalata ma-ka:dlepe,” diyo.

<sup>51</sup> Yia: tame aya dla ha:ha:lati Yesutapo isikimi Pita mate epo Yon epo Yeims epame amseyemala ya: wai mate epo ya: a mate tlo eleme aya dulu dla hetaiyo. <sup>52</sup> Yia: aya dulu dla tuwame natilati opa hapulomatapo amseyemalata powame ellati a:lemyemama wowolimyaiyo. Epalati Yesuta yia: watle epo atlaiyo, “Wua: a:lempopa:ye medla gudiya. Adipalati, amseyemalaye popowame elasema. Amasiyama ya: isikimi elapo,” diyo.

<sup>53</sup> Amasiyama yia: Yesutapo epo atlati eimelemyaiyo. Adipalati, yia: amseyemalata powale kokoye mo-malanatiyo. <sup>54</sup> Epapele tlope Yesutapo amseyemala powale do dla hampame ya: watle epo atlaiyo, “Amseyemala, wa: sila:tine,” diyo. <sup>55</sup> Epalati amseyemalaye mo-powame elaleta ma sila:tiyo. Epalati Yesutapo yia: watle atlemama “Ya: watle daya hamiya,” diyo. <sup>56</sup> Amseyemala ya: a mate ya: wai mate koko i natipame sikemte yiyeliyo. Amasiyama Yesutapo yia: watle epo atlaiyo, “Opa opi dla wua:ta natili koko iye atlemiyo,” diyo.

## 9

*Yesuta ya: alotle tlalo so 12 taiya dle (Mat 10:5-15; Maka 6:7-13)*

<sup>1</sup> Yesutapo ya: alotle tlalo so 12 sisilapame yia: watle itiyamale hamiyo, yia:tapo bataliya yimlalaye opa dupa dulu tle alikili dla dodolomsalemsiyamama esusulumale

so ma ka:ka:demsiyamelepo depame. <sup>2</sup> Epame ya:tapo yia:ye taiya diyo, yia:tapo opaye God ya: mo koko imsiyamama esusulumale so ma ka:ka:demsiyamelepo depame. <sup>3</sup> Epammama ya:tapo yia: watle epo atlaiyo, “Wua: tamalemama wua: dali ku pahalopo tlowa, epo duli ma pahalopo tlowa, epo daya ma pahalopo tlowa, epo mani ma pahalopo tlowa. Epame sede mape dapiyamte pahalopo tlowa, isikimi hatlo tlo halopo telepe.

<sup>4</sup> Wua:ta mo dla tame woyamale oloma edla opata wua:ye yia: aya dla seme hetlepiye, aya hatlo medla hutiyemha:ha:lepe. Epame wua:ta mo etle mo-flowedemeta aya eye saliyomta demsiyamelepe. <sup>5</sup> Epame wua: mo hadima tlati opata wua:ye pe-elemhetlalo wekelepiye, wua: mo e saliyome tlowedeme yia: mo sokopeta wua: hete dla popolahal-eye hihiyollepe, Godta kasilamale kokota yia: dla pua kokoye nati-iliwedeme.”

<sup>6</sup> Epalati yia:tapo ma-tamalaiyo. Yia: mo hale tle ma mo hale dla ta demsiyamama ka:dle yu atlamsiyamaiyo, epame esusulumale so hapuloma ma ka:ka:demsiyamaiyo.

*Helodta Yesu koko dla totokoleyaple  
(Mat 14:1-12; Maka 6:14-29)*

<sup>7</sup> Yesuta koko halomsela:le hapulomaye Galili mo omhallalo oplami Helodta medaliyo. Epame koko itapo ya: watle totokoleyaple hamiyo. Adipalati, opa opitapo Yesu koko dla epo atlamdiyo, “Yon opa yú dla ka:ka:timalalo mo-powaleta ma ilame puame koko i halomsela:ma,” demdiyo. <sup>8</sup> Epalati opita epo atlamdiyo, “Ya:ye God tle yu hapame molo atlalo oplami llaya mle,” demdiyo. Epalati ma opa opita epo atlamdiyo, “Ya:ye God tle yu hapame molo atlalo so ka:yapa ha:ha:uwa haleta ma ilame puwayo,” demdiyo. <sup>9</sup> Epedeme Helodta epo atlaiyo, “Yonye na:ta yumiya dlati mo-yumuwapo. Ame i anata, na:ta koko patoto dlalemhalaye?” diyo. Epammama ya:tapo Yesu natiloweye sikemte solotamaiyo.

*Yesuta 5,000 opa daya ilimale  
(Mat 14:13-21; Maka 6:30-44; Yon 6:1-14)*

<sup>10</sup> Yesuta taiya dle so 12tapo ma ilame puame Yesu watle yia:ta halomsiyamale koko hapulomaye atlamaiyo. Epame Yesuta yia: eleme Betsaida mo dla miyelo ha:ha:la tamalaiyo. <sup>11</sup> Amasiyama opa hapulomata koko i dalepame yia: mape alotle tamalaiyo. Epalati Yesutapo yia:ta pula natipame yia: watle puaiya depame yia: watle God ya: mo kokoye imhalemama esusulumale so mape ka:ka:demhalaiyo.

<sup>12</sup> Yesu epamsela:lali ya: alotle tlalo sota tamila:la puame ya: watle epo atlaiyo, “Opa hapuloma iye ma-taiya dene, yia:tapo mo mateka:pi hema popa: dla tame daya mate yia:ta hutiyelowe aya mate tlamelepo depame. Adipalati, dita popa: mo iye daya dlowe mate hutiyelowe aya mate pa:na,” diyo.

<sup>13</sup> Amasiyama Yesuta yia: watle epo atlaiyo, “Muwolo yia:ye daya halopiya,” diyo.

Epalati asiyama yia:ta epo atlaiyo, “Opa iye pta pasatana. Amasiyama dia: dla isikimi daya mo-halomale do supulastale mate amalalo dapiyamte mateta hutiyema. Epele tlope wa: ma dita daya opi halomala telepo depame atlema:?” diyo. <sup>14</sup> Adipalati, oloma edla alumale dulu dla opa siyapo sesa:mama 5,000 umaiyo.

Amasiyama Yesuta ya: alotle tlalo so watle epo atlaiyo, “Opa hapulomata daya dlowedeme 50 opata alumale hatlo tipo popa: epo 50 opata alumale hatlo tipo popa: demtaiya diya.” <sup>15</sup> Epalati opata daya dlowedeme epo popa:mtaiyo. <sup>16</sup> Epalati Yesutapo daya mo-holomale do supulastale mate amalalo dapiyamte mate halopame pepele di dla omhalemama God dla siyele yu atlepame daya hauwokokomaiyo. Epame ya: alotle tlalo so watle hapiyo, yia:tapo ma opa hapuloma watle alemelepo depame. <sup>17</sup> Opa hapulomatapo daya dlopame sikemte susukalemama daya popokadiyo. Epalati Yesu ya: alotle tlalo sota daya akutu mate amalalo akutu mate popomelleye yekalo 12 dla atilimama sikemte poposatilimaiyo.



*Yesuye Kelisopo**(Mat 16:13-19; Maka 8:27-29)*

<sup>18</sup> Alila haleta Yesu meyelo inoma sumpollati ya: alotle tlalo sota ya: hala dla pumulaiyo. Epalati Yesuta ya: watle epo atlaiyo, “Opatapo na:ye ana demdi?” diyo.

<sup>19</sup> Epalati asiyama ya:ta epo atlaiyo, “Opa opita wa:ye Yon opa yú dla ka:ka:timalalo demdepo. Epame ma opita wa:ye Ilaya mle demdepo. Epalati asiyama opita wa:ye God tle yu hapame molo atlamalalo so ka:yapa ha:ha:uwa haleta ma ilame puana demdepo.”

<sup>20</sup> Epalati Yesuta asiyama ya: watle epo atlaiyo, “Amasiyama wua:ta na:ye ana demdi?” diyo.

Epapalati Pitata asiyama epo atlaiyo, “Wa:ye Godta sale Kelisopo,” diyo.

<sup>21</sup> Epalati Yesutapo ya: alotle tlalo so watle epo atlaiyo, “Wua: opa opi watle atlemama na:ye Kelisopo demiyo,” diyo.

*Yesuta ya:ta polowe koko atlale**(Mat 16:21; Maka 8:31)*

<sup>22</sup> Epame Yesu matle ya: alotle tlalo so watle epo atlaiyo, “Opa Yamiye sikemte wotiyalle natilipe. Epalati Yu so dokopala so mate epame ya: aiyalma aya dokopala so mate epo aiyalma imalalo so mateta ya: dla sikemte elle pato himilipe. Epame opata ya:ye yumilipe. Amasiyama ya:tapo wabasi dulu dla powame elepo ma dapahatlope alila dla sila:tilipe.”

*Yesuta ya: alotle tlowe koko imale**(Mat 16:24-28; Maka 8:34-38)*

<sup>23</sup> Yesu matle opa hapuloma dla epo atlaiyo, “Oplami antapo na: dolumpuluwe solotamelepiye, ya: ya:skamu ya:ta solotamale koko hamsela:ye memelepame alila hapuloma ya: dali yekelemhimiliye maka:himsela:mama na: dolumpulupe.

<sup>24</sup> Amasiyama oplami antapo ya: pasakaloye meyelo gadlowedeme apelepiye, ya: pasakaloye haodlepe. Amasiyama oplami antapo na: yilo ya: pasakaloye haodlepiye, ya: matle halepo halepo pasakalo halepe. <sup>25</sup> Amasiyama oplami antapo ta:lamo pato hema halemama ya:ta solotamale koko hapulomaye mo-halopame hatlo pasakalo hallowe koko tlo hotlepiye, ya: ma apa koko hapa:? Hawa. <sup>26</sup> Epame oplami antapo na: mate epo na: yu mate dla wota:mhallepiye, asiyama Opa Yamita ya: hela:dle mate epo ya: ata hela:dle mate epame God ya: banakaka sota hela:dle mate puame ya: dla wota:le hamilipe. <sup>27</sup> Epapedeme na: wua: dla mikadepe koko atlema. Wua: dulu dla opa opi me-ha:ha:po. Yia:tapo God ya: mo kokota pulati natipame alotle pallipe.”

*Yesuta Moses mate Ilaya mate yukamhalale**(Mat 17:1-8; Maka 9:2-8)*

<sup>28</sup> Epame 8 alila epapeleta mogudlati alotle Yesuta Pita epo Yon epo Yeims iwolo tlo tamali di dla eleme inoma sumala hetaiyo. <sup>29</sup> Yesu inoma sumhallati ya: mila:pita meyelo depame ya: tlukata sikemte kamama usiyemaiyo. <sup>30</sup> Epalati pakasiyamalalo opa dapiyamte Moses mate epo Ilaya mate wowoyapo Yesu mate yuhamha:ha:iyo.

<sup>31</sup> Yia:tapo Pepele di hela:dle usiyemale mate wowoyapame Yesuta God yu dolumama Yelusalem dla tame polowe ye esemha:ha:iyo. <sup>32</sup> Pita wolo sikemte hutiyepo sillipame toko ipo natitepo Yesuta hela:dle mate halemama opa dapiyamte mate yuhamha:ha:la natiyo. <sup>33</sup> Opa dapiyamteta Yesu mate yuhamha:ha:po mo-tlowedeme ha:ha:lati Pitata woloma pomalamalalo Yesu watle epo atlaiyo, “Dokopala oplami, di mo hema ha:ha:lowe ka:pi. Epedeme di kimna:ya dapahatlope kimtimolowepo. Kimna:ya haleye wolëpo, epame haleye Moses tete, epame haleye Ilaya tete dlowepo,” diyo.

<sup>34</sup> Pita ala me-yukampollati wualata malame ya:ye bopudlati sikemte wowota:iyo.

<sup>35</sup> Epalati pakasiyamalalo wuala dulu tle yuta epo atlaiyo, “Oplami iye na:ta sale maseyemalapo. Epedeme ya: yu dla daliya,” diyo. <sup>36</sup> Wuala dulu tle yuta yukamhalepo

gudlati yia: Yesuta meyelo halla natiyo. Pita wolotapo yia:ta tamali di dla tlamale koko iye opa opi watle yipta po-atlamaiyo.

*Yesuta bataliya walle maseyemala ka:dle*

*(Mat 17:14-18; Maka 9:14-27)*

<sup>37</sup> Yia: epo ma alallati tamali di tle malemha:ha:lati opa hapulomata ma hapele Yesu hala dla pumulaiyo. <sup>38</sup> Epalati opa alumale dulu tle oplami haleta Yesu watle yu teta:le mate epo atlaiyo, “Imalalo oplami, wa: na: maseyemala hatlope ikadepe i natine. <sup>39</sup> Adipalati, bataliyata ya: opasi dulu dla hetlati ya:tapo yiyelle mate teyupame hiyeleme elemama mati tle atulu totowa:lemelemde. Bataliyatapo ya: dla wotiyalle hapimhallati ya:tapo alila hapuloma dulu dla pase ka:depo sela:semde. <sup>40</sup> Epeleye na:tapo wa: alotle tlalo so watle ‘bataliya iye alikili dla dodolomaiya’ dlati yia:ta pododolomana.”

<sup>41</sup> Asiyama Yesuta epo atlaiyo, “Wua:ye mikadepe dle pa:le bobtalimale sopo. Wua:ta na: dla mikadepe dlepo depame na: alila adisowaye wua: mate halepa:? Amasiyama wa: maseyemalaye na: watle hamampuane,” diyo.

<sup>42</sup> Maseyemala ala Yesu hala dla hamame pumhallati bataliyata ya: dla hetaiyo. Epalati ya:ta yiyelle mate ta:la dla teyuiyo. Epalati Yesuta bataliyaye alikili dla dodolopo maseyemalaye ma-ka:depame ya: a watle semtaiyo. <sup>43</sup> Epalati opa hapulomatapo Godta itiyamale koko natipame sikemte yiyeliyo.

Yesuta koko halomale hapuloma dla opata ala me-momalamyelati Yesuta ya: alotle tlalo so watle epo atlaiyo, <sup>44</sup> “Opa Yamiye opa do tama dla homellepe. Epedeme wua: wata na:ta koko atla iye wowelimiyo,” diyo. <sup>45</sup> Amasiyama ya: alotle tlalo sota Yesuta atlale ya: dulu kokoye woloma pomalamalalo wekiyo. Adipalati, ya: dulu kokoye yia: tle hemele haodepo elaiyo. Epapedeme yia:ta ma Yesu watle atlanatiloweye wowotaiyo.

*Anta pato halema:?*

*(Mat 18:1-5; Maka 9:33-37)*

<sup>46</sup> Yesu ya: alotle tlalo sota yia: dulu dla anta pato halema: depame yia: dulu dla yu dlomaiyo. <sup>47</sup> Amasiyama Yesuta yia:ta momalampopa:leye ma-natipame maseyemala yimka:malaye hampo ya: mateka:pi dla puame hallati ya: alotle tlalo so watle epo atlaiyo, <sup>48</sup> “Oplami antapo maseyemala ipapeleye na: hi tle ya: aya dla seme hetlepiye, ya: na:ye seme hetamama apelepe. Epame oplami antapo na:ye ya: aya dla seme hetlepiye, ya:tapo na: A na: tane duwaye seme hetamama apelepe. Epapedeme wua: dulu dla anta ya:skamu yimka:mala dlepiye, ya:tapo pato hallepe.”

*Anta wa: mate po-opahale dlalo halema: ya:ye wa: amkalepo*

*(Maka 9:38-40)*

<sup>49</sup> Epalati Yon epo atlaiyo, “Dokopala oplami, di oplami haleta bataliyaye wa: hi mate oplami dulu tle alikili dla dodolomsela:lati natiwa. Epalati dita ya:ye humatluwa. Adipalati, ya: di alumale dulu dla pohalasepeme,” diyo.

<sup>50</sup> Amasiyama Yesuta ya: watle epo atlaiyo, “Ya: humatlemiya. Adipalati, anta wua: dla po-opahale dlalo halema:, ya:ye wua: amkalepo.”

*Samaliya sota Yesu alli*

<sup>51</sup> Yesu ya:ye ma-hamame Pepele di dla hetlowe alilata mo-teteka:mpulati ya: solotamaiyo, Yelusalem dla tlowedeme. <sup>52</sup> Epammama ya:tapo opa opi tatile Samaliya mo yemala hale dla taiya diyo, yia:tapo tame edla ya:ta ellowe mo dinapelepo depame. <sup>53</sup> Amasiyama mo sota Yesuta Yelusalem dla tama dle koko dalepame ya: hamolowe allimama ya: watle ellowe aya pohamiyo. <sup>54</sup> Epalati Yesu ya: alotle tlalo so Yon mate Yeims mate koko i dalepame ya: watle epo atlaiyo, “Lod, wa: solotama: ditapo mo so iwoloye poyulupo depame pepele di tle dlapaye malane dlowne,” diyo. <sup>55</sup> Amasiyama Yesuta yia: dla helestame halemama yia:ye sikemte atlamaiyo. <sup>56</sup> Epame yia: ma mo hale dla tamalaiyo.

*Yesu dolumtlowa depo yu atlamale so  
(Mat 8:19-22)*

<sup>57</sup> Yesu ya: alotle tlalo so mate api tle tamha:ha:lati oplami haleta puame Yesu watle epo atlaiyo, “Wa:ta hadima adipo tamsela:lepiye, na: wa: dolumsela:lowepo,” diyo.

<sup>58</sup> Yesu asiyama ya: watle epo atlaiyo, “Moku dla moko esemalata ha:ha:laloye me-ha:ha:po, epame tea hapulomata hutiyelalo etoye me-popa:po. Amasiyama Opa Yami dla ya:ta ellalo ayaye pohalasema, hawa,” diyo.

<sup>59</sup> Epame Yesu matle oplami hale watle epo atlaiyo, “Wa: na: dolumpuane,” diyo. Amasiyama oplamita asiyama epo atlaiyo, “Lod, wa: aseka na: dla alila hamine, na:tapo na: a polati hamatilipo depame,” diyo.

<sup>60</sup> Epalati Yesuta asiyama ya: watle epo atlaiyo, “Ka:dena, soko tle palli sotapo miyelo palli soye hatimha:ha:lepe. Amasiyama wa: puame God yuye opa dla atlamsela:ne,” diyo.

<sup>61</sup> Epalati oplami haleta ma epo atlaiyo, “Lod, na: wa: dolumtlowe solotama. Amasiyama na: aseka tame na: yimlala dla namkale dle yu atlowama,” diyo.

<sup>62</sup> Yesu ma asiyama ya: watle epo atlaiyo, “Oplami antapo na: dolumtamama ma ilame tlowedeme alo dla natimtelepiye, epapele oplamita God ya: mo koko yilo oko haloweye po-ala:na,” diyo.

## 10

*Yesuta 72 opaye taiya dle*

<sup>1</sup> Koko ita tame gudlati Lodtapo 72 opa hohomaiyo. Epame yia: dulu dla opa dapiyamte dapiyamte depo hohomtapame ya:ta tlowe olomasepele dla mo yimlala popa:mta dla yia: tatile taiya diyo. <sup>2</sup> Epammama ya:tapo yia: watle epo atlaiyo, “Osalo dulu dla alisisi hapulomata ma-hauwallowe oloma dla ha:ha:ma. Amasiyama alisisi hauwallowe so tlo pase pasatana. Epedeme osalo omhallalo oplami dla atlaiya, ya:tapo ya: osalo dulu dla emale alisisi hauwallalo soye taiya dlepo depame. <sup>3</sup> Epapedeme wua: taiya. Amasiyama wua: malamale mate telepe. Adipalati, na:tapo wua:ye aliya halo epapele some moko esemala kakasilamaleta ha:ha: dulu medla taiya dema. <sup>4</sup> Wua: tamama mani mate epo duli mate epo hete alisisi mate pohalopo tlowa. Epame wua: api duka dla tamama opa opi umpame yia: mate poyuhademtlowa.

<sup>5</sup> Wua: mo hale dla tame woyamalati aya hadima eleme hetlepiye, wua: tatile aya edla popa: so watle namkale dle yu atlemama, ‘Godta sadle kokotapo wua: mate hallepe,’ dlepe. <sup>6</sup> Epalati sadle opatapo aya edla ha:ha:lepiye, wua:ta namkale dle yu atlamaletapo yia: mate me-hallepe. Amasiyama aya dulu edla sadle oplami hale hawa hallepiye, wua:ta namkale dle yu atlamaletapo yia: mate pohallowa. <sup>7</sup> Epame aya adiyeye wua: watle hamilipiye, wua: aya hatlo medla ha:ha:lepe. Epame wua:ta aya hatlo medla ha:ha:mama yia:ta wua: watle dlowe alisisi hapilati dlomha:ha:lepe. Adipalati, oko halalo soye yia: oko asiyama halomdepo. Epapedeme wua: aya hale dla ha:ha:mama ma aya hale dla potademsiyamolowa.

<sup>8</sup> Wua: mo hale dla tlati opata wua: dla namkale demama dlowe alisisi hapilipiye, metlo dlomha:ha:iya. <sup>9</sup> Epame mo edla esusulumale soye ka:ka:demama yia: watle ‘God ya: mo kokoye wua: mateka:pi dla halapo,’ dlepe. <sup>10-11</sup> Amasiyama wua: mo hale dla tame woyamalati opa edla ha:ha: sota wua:ye allimama aya pohamilalo wekelepiye, wua: mo duka dla tame yu teta:le mate yia: mo sokopeta wua: hete dla popolahaleyeye ma yia: inoma dali dla hihiyollepe, Godta kasilamale kokota puaye yia: dla imama. Epame yia: watle epo atellepe, ‘Wua: malamaiya, God ya: mo kokoye wua: mateka:pi dla halema,’ dlepe. <sup>12</sup> Epapedeme na: wua: dla mikadepe koko atlema, mo so aditapo wua:ta pulati natipame siyele mate wua:ye pe-elemalalo wekelepiye, asiyama Godta

koko gladle alila dla yia:ta wotiyalle pato halepe. Amasiyama Sodom sota wotiyalle yimka:mala halepe.”

*Yesuta pomikadepe dle so moye sikemte atlamale  
(Mat 11:20-24)*

<sup>13</sup> “Ka:e, Kolasin so mate epo Betsaida so mate, wua: wolomape! Wotiyalle patota wua:ye omelapo. Adipalati, na:ta wua: mo dla ulugiyemale koko patoto halomsela:uwa epapeleye ma po-Yu so mo Taya mate epo Saidon mate dla halomsela:matiye, yia: pakasiyamalalo yia: bobtalimale tle heheletimelemla. Epame yia:ta yia: bobtalimale koko tle ma-heheletimale kokoye nati-imama tluka bobtalimale didiyepame tilepu huhutapo siyamelemla. <sup>14</sup> Epapele koko tle Godta koko gladle oloma dla Taya so mate epo Saidon so mate dla wotiyalle yimka:mala hamilipe. Amasiyama Kolasin so mate epo Betsaida so mate dla wotiyalle pato hamilipe. <sup>15</sup> Amasiyama Kapaniyem so, wua: alila oloma edla wua:ye Pepele dimo dla ta:dlepe depo momalaha:ha:ma:? Hao. Wua:ye hohopame Dlapa mo dla ka:ka:timelepe.

<sup>16</sup> Epapedeme oplami antapo wua: yuye dalepame halepiye, ya: na: yuye hamama apelepe. Amasiyama oplami antapo wua: yu dalepame wua:ye sikemte allipiye, ya: na:ye alimama apelepe. Amasiyama oplami antapo na:ye allipiye, ya: na: A na: tane duwa oplamiye alimama apelepe.”

*72 sota ma ilampuale*

<sup>17</sup> Yesuta 72 opa taiya dle sota sisiyele mate ma ilame puame epo atlaiyo, “Lod, dita wa: hi mate atlamsiyamalati bataliya yimlala opa dulu dla ha:ha:leta di yu dalepo salladepame alikili dla potamduwa,” diyo.

<sup>18</sup> Yesu asiyama yia: watle epo atlaiyo, “Na: Saitentapo pakasiyamalalo omaplata hela:hela:demdiye epapele some Pepele di tle teyulati natiwa. <sup>19</sup> Epedeme wua: daliya, na:tapo wua:ta ilama mate kalepateyewala mateye di dla wua: hete mate dlolem-siyamelepo depame itiyamale ma hamiwapo. Epapedeme itiyamale etapo Saitenta itiyamaleye tla:mtame halapo. Epedeme alisisi haleta wua: dla wotiyalle pohamilowa. <sup>20</sup> Amasiyama bataliya yimlalata wua: yu dalepo salladepame alikili dla potale koko dla ase sikemte sisiyemiya. Amasiyama wua: hita ikadepe Pasakalo Buka dla hutiyeko koko dla sisiyeiya.”

*Yesuta ya: A God dla siyele hamili  
(Mat 11:25-27, 13:16-17)*

<sup>21</sup> Epalati Yesu Hela:dle Sokota ya: dla pasatapame siyele mate halemama epo atlaiyo, “A, Pepele dimo mate epo ta:lamo mate wa:tapo Lod depo halapo. Epedeme na: wa: dla siyema. Adipalati, wa:tapo wa: mo koko hemele hutiyeye, koko malamale so dla pobotomastlalo wekuwapo. Amasiyama wa:tapo isikimi koko yeitamale so dla botomastauwapo. Yao A, ikadepe, koko iye wa:ta solotamale kokopo.

<sup>22</sup> Na: Atapo koko hapulomaye na: watle ma-halopiwapo. Epedeme oplami haletapo Yamiye poya:malamana. Amasiyama hatlo A tlo Yamiye ya:malamana. Epame oplami haletapo Aye poya:malamana. Amasiyama hatlo Yami tlo Aye ya:malamana. Epame opa anawolo dla Yamita A koko botomastlowe solotamelepiye, opa ewoloye A kokoye yia: ma malamelepe.”

<sup>23</sup> Epame ya: alotle tlalo so siyapo dla helestame halemama yia: watle epo atlaiyo, “Wua:tapo tlamde koko dla sisiyeiya. <sup>24</sup> Adipalati, na: wua: watle ikadepe koko atlema. God tle yu hapame molo atlalo so ka:yapa ha:ha:uwa mate epo Yu so dokopala so ka:yapa ha:ha:uwa mateta wua:ta wata tlamde kokoye natilowa depame omha:ha:uwapo. Amasiyama yia: potlamana. Epame wua:ta wata dlalemde koko mape dlallowa depame omha:ha:uwapo. Amasiyama yia: podlalena.”

*Samaliya oplamita namkale dle koko*

<sup>25</sup> Alila hale dla aiyalma imalalo oplami haleta puame Yesuye ikadepe Godta aiyalma hatitimale hapulomaye malastepo halema: depame epo atlaiyo, “Imalalo oplami, na: pasakalo hallowe halowedeme apa koko hapa:?” diyo.

<sup>26</sup> Yesu asiyama epo atlaiyo, “God yu bukata adipo atlema:? Epame wa: sesa:pame malamale hamdi?” diyo.

<sup>27</sup> Oplamita asiyama epo atlaiyo,

“Wa: Lod wa: Godye sikemte malamhalane, wa: dupa dulu malamale tle epo wa: soko tle epame wa:ta itiyamale tle epame wa:ta malamale tle. Epame wa:ta wa:skamu sikemte malamdiye, epammama wa: amkale ma sikemte malamhalane,” diyo.

<sup>28</sup> Yesu asiyama ya: watle epo atlaiyo, “Wa: ikadepe koko atlalepo. Epedeme wa: ipapele koko halomhallepiye, eta wa: pasakalo hallowe halepe,” diyo.

<sup>29</sup> Amasiyama oplamita ya:skamu ya: tlo ka:dena demama epo atlaiyo, “Ame namkale anata:?” diyo.

<sup>30</sup> Epalati Yesuta ya: watle esemale hale i esemaiyo, “Oplami haletapo Yelusalem tle ma Yeliko dla tulumhalaiyo. Ya: ala api duka dla tulumhallati uhalalo sota ya:ye hopolopame api duka medla himpo ya: tluka mate epo ya: alisisi hapuloma mate uhalopo taiyo. <sup>31</sup> Ya: api duka medla pola yakomellati God ka: epo opa ka: duka dla hallalo oplami haleta api hatlo metle pumama natiyo. Ya: pumama natitepo oplamita mo-pola yakomellati natipame alikili tle olostame taiyo. <sup>32</sup> Epalati ya: ko tle aiyalma aya dla oko halalo Libai asiya oplami hale ma pumama natitepo oplamita api duka dla ella natipame alikili tle olostame taiyo. <sup>33</sup> Amasiyama Samaliya oplami mape api hatlo metle pumama natitepo oplamita api duka dla mo-pola yakomella natiyo. Ya: oplami i natipame ya:ye sikemte polowamaiyo. <sup>34</sup> Epame ya: oplamita ela dla tuwame ya: kapala kotimale dla dakopala hutupamalalo mate wain yú mate sisimapo populiyeyiyo. Epame ya:ye ya: aliya koa di dla himpo ma asepe so aya dla hamame tame ya: omhalaiyo. <sup>35</sup> Epame ma alallati Samaliya oplami etapo asepe so aya omhallalo oplami watle elo mani dapiyamte halopimama epo atlaiyo, ‘Oplami iye wa:ta woloma omhalane. Amasiyama wa:ta oplami i omhalemama mani i pokadepame ma wa: mani mate gademhallepiye, ma na:ta puale oloma dla asiyama mesowa wa: watle hamilowepo,’ diyo.”

<sup>36</sup> Epame Yesu matle epo atlaiyo, “Opa dapahatlope dulu hema uhalalo sota hopolle oplami ya:mkale ikadepe anata:?” diyo.

<sup>37</sup> Epalati aiyalma imalalo oplamita asiyama epo atlaiyo, “Oplamita ya: polowamama ya: gadle oplami tlo ya:mkale ikadepepo,” diyo.

Epalati Yesuta ya: watle epo atlaiyo, “Yao, ikadepe. Epedeme wa: ma tame epapele koko hamsela:ne,” diyo.

### *Meli mate Mata mate*

<sup>38</sup> Yesu mate ya: alotle tlalo so mate tamalemama mo hale dla tame woyamaiyo. Epalati mo edla hallalo a:ya hale Matatapo Yesuye ya: aya dla seme hetaiyo. <sup>39</sup> Epalati Mata ya:la Melita puame Yesu hete sitali dla polomama ya: yu dalempolaiyo. <sup>40</sup> Oloma edla Matata aya dulu dla Yesu ya: alumale so daya ha:mselemama okota pasatlati puame Yesu watle epo atlaiyo, “Lod, na:latapo wa: mate pollati na:tapo monolo oko hamsela: pta sukalema. Epedeme wa: poka:deta:, ya:ta na: gadla pulupo depame ya: atloweye?” diyo.

<sup>41</sup> Amasiyama Lodta epo atlaiyo, “Mata namkale, wa: koko hapuloma halom-sela:mama sikemte momalamsela:po. <sup>42</sup> Amasiyama koko hapuloma dulu dla koko hatlo tlo patopo. Epapeleye Melitapo ka:dle koko pato eye ma-halëpo. Epedeme oplami haleta koko eye ya: tle pokolahalowa,” diyo.



# 11

## *Yesuta inoma sumolowe koko imale* (*Mat 6:9-13, 7:7-11*)

<sup>1</sup> Alila haleta Yesu mo hale dla tame inoma sumhalepo gudlati ya: alotle tlalo so oplami haleta epo atlaiyo, “Lod, Yonta ya: alotle tlalo so dla inoma sumolowe imsula:uwaye, epammama wa: ma dia:ye inoma sumolowe koko imane,” diyo.

<sup>2</sup> Epalati Yesuta yia: watle epo atlaiyo, “Wua: inoma sumama ipo atellepe, A, hatlo wa: hita alila hapuloma dulu dla aiyalma depo hallepe. Epame di solotama, wa: mo kokota pulupo depame.

<sup>3</sup> Epame alila hapuloma dulu dla dita dlowe alisisiye halopimhalane.

<sup>4</sup> Epame di bobtalimaleye hihiyotipo woweline.

Adipalati, di mape diamkadulota dia: dla batalimale koko halomde hapulomaye wowelimdepo.

Epame dia:ye elemala natili kokalle dla elemtaiya demiya.”

<sup>5-6</sup> Yesu inoma sumale yu i imhalepo gudepame ma yia: watle epo atlaiyo, “Wua: yu hale iye malamaiya. Asepe oplami haletapo utula:la dukuslopi dla wa: aya dla pulupe. Amasiyama wa: dla ya: daya iliwe hawa hallati wa: mo dulu dla wa: amkale hala dla daya hala telepe. Wa: tame wa: amkale aya kokoloma dla heyulumhalemama epo atellepe, ‘Namkale, asepe oplami haleta na: aya dla pua, amasiyama na: dla ya: gadlowe daya hawa. Epedeme na: wa: hala dla daya hala pua,’ dlepe.

<sup>7</sup> Epalati wa: amkale aya dulu dla elata epo atellepe, ‘Wa: ma ilame tane. Adipalati, na: mate na: yimlala mate kokolomaye ma-himomeleme hutiyema. Epedeme na: sila:time wa: dla alisisi hale pohamilowa,’ dlepe. <sup>8</sup> Amasiyama na: wua: dla ikadepe koko atlema. Ya:ta wa:ye isikimi namkale depame sila:time alisisi pohalopiliwa. Amasiyama wa:ta kokoloma dla me-heyulumhalemama otomhallelepiye, eta ya:tapo sila:time wa: dla alisisi halopilipe.

<sup>9</sup> Epapedeme na: wua: dla atlema, wua: atlanatiya. Epelepiye, wua: dla hapilipe. Epame wua: totamaiya. Epelepiye, wua: natilipe. Epame wua: kokoloma dla heyulumaiya. Epelepiye, kokolomaye wua: dla gowaladlepe. <sup>10</sup> Adipalati, atlanatilalo oplamitapo koko halepe. Epame totalalalo oplamitapo koko natilipe. Epame kokoloma dla heyulumalalo oplami watle kokolomaye gowaladlepe.

<sup>11</sup> Epapedeme adulo wua: daliya. Oplami antapo ya: maseyemalata amalo yilo amalati ya: watle wa:ha:le hamimdi? <sup>12</sup> Epame ya:tapo temoko yilo amalati wa: ya: watle kalepateyewala hamimdi? <sup>13</sup> Wua: batalimale so tlope, wua:malamana, wua: yimlala dla ka:ka:dle alisisi tlo halopiliweye. Epapedeme dimalamana, A God Pepele di dla halatapo ya: dla otele himha:ha:lalo so dla Hela:dle Soko isikimi me-hapimhalapo.”

## *Yesu mate Belsebul mate* (*Mat 12:22-30; Maka 3:20-27*)

<sup>14</sup> Alila hale Yesuta yu pa:le oplami dupa dulu tle bataliyaye alikili dla dodolomaiyo. Epame bataliyata oplami dulu tle alikili dla ulatlati yu pa:le oplamita ma yukamaiyo. Epalati opa hapulomata koko i natipame sikemte yiyeliyo. <sup>15</sup> Amasiyama opa opita epo atlamyaiyo, “Yesuye Belsebulta itiyamale tle bataliya yimlalaye alikili dla dodolomsalemsela:ma. Adipalati, Belsebulye bataliya yimlala yia: dokopala oplamipo,” demyaiyo. <sup>16</sup> Epalati opa opitapo Yesuta itiyamale hamsela:ye ikadepe God tle malata: depame ya: watle epo atlaiyo, “Wa: pepele di tle ulugiyemale kokoye di watle nati-ine,” diyo.

<sup>17</sup> Amasiyama Yesu yia:ta malamaleye momalanatipame yia: watle epo atlaiyo, “Mo hatlope sotapo yiskamu yia: dulu dla duka gladepame opahale dlepiye, mo eye pohalowa, batalimelepe. Epame asiya hatlope sota yiskamu yia: dulu dla duka gladepame opahale dlepiye, asiya ewoloye poha:ha:lowa, batalimelepe. <sup>18</sup> Epapedeme Saitentapo

ya:skamu ya: alumale dulu dla duka gladepame opahale demha:ha:lepiye, adipamama ya: mo kokota kokó elepa:? Batalimelepe. Adipalati, wua:ta na:ye Belsebulta itiyamale mate bataliyaye alikili dla dodolomsalemsela:ma dlati koko iye wua: dla atlema. <sup>19</sup> Amasiyama na:ta bataliya yimlalaye alikili dla dodolomsalemsela: itiyamale iye ikadepe Belsebulta itiyamale tle amsela:ma dlepiye, ame mo-wua: opata bataliya yimlala alikili dla dodolomsalemsiyamaye itiyamale adi tle hapo siyamama amma:? Epedeme yia:tapo wua:ta na: dla atlamyaleye pomikadepe dlowa. <sup>20</sup> Amasiyama na:tapo Godta itiyamale tle bataliya yimlalaye alikili dla dodolomsalemsela:ma dlepiye, God ya: mo kokotapo wua: dla mo-puapo.

<sup>21</sup> Epapedeme itiyamale oplamita ya: to mate epo ya: uma mate halopo ya: aya omhallepiye, ya: aya dla hutiyeye alisisiye upohalomolowa. <sup>22</sup> Amasiyama ma oplami hale sikemte itiyamaleta pulupiye, ya:tapo aya omhallaloye hopolopame ya: to mate ya: uma mate kokolahalepe. Epame aya dulu dla hetame ya: alisisi hapuloma halopame ma opa opi watle alemelepe.

<sup>23</sup> Epapedeme oplami antapo na: tiyama tle pohallalo wekelepiye, ya:ye na: mate opahale demhalapo. Epame oplami antapo na: mate opaye God hala dla pe-elempulalo wekelepiye, ya:tapo opaye God tle ma alikili dla dodolomsalemhalapo.”

### *Bataliyata ma ilame puluwe koko*

*(Mat 12:43-45)*

<sup>24</sup> “Epedeme bataliyata oplami tle alikili dla ulatelepiye, ya: tame dalupa dulu dla ya:ta hedlowe moye totamsela:lepe. Ya: epo totamsela:mama ya:ta hedlowe mo ponatilalo wekelati ma ya:skamu epo atellepe, ‘Na: na:ta haluwa aya dla ma ilame tali,’ dlepe. <sup>25</sup> Ya: epo puame natili dla ayata woloma hakaka towalipo hallati natilipe. <sup>26</sup> Epalati ya: ma tame bataliya yimlala opi 7 sikemte i-itiyamale tlo elempuame aya edla hallepe. Epapelepiye, oplami itapo ya:ta ka:yapa haluwaye memelepame ma sikemte batalipo hallepe.”

### *Anawolota sisiyele mate ha:ha:ma:?*

<sup>27</sup> Yesu koko iye opa dla atlemhallati a:ya haleta opa alumale dulu tle yu teta:le mate epo atlaiyo, “Ka:dena, Godtapo a:ya wa: hampame wa: imsula:uwa dla siyele hamilowe ka:pi,” diyo.

<sup>28</sup> Amasiyama Yesuta ya: watle epo atlaiyo, “Hao, namkale, koko pe-epo elasema. Opa anawolotapo God yu dalepame salladepo siyama:, ewolo dla Godtapo siyele hapimhalapo,” diyo.

### *Opata ulugiyemale koko natilowe solotamale*

*(Mat 12:38-42)*

<sup>29</sup> Opata Yesu hala dla puame alumalati Yesuta yia: watle epo atlaiyo, “Wata oloma hema ha:ha: so opaye pta bobtalimana. Epame yia: ma God kokoye pokoko de-semde. Epammama yia: isikimi ulugiyemale koko tlo tlamha:ha:lowedeme na: watle atlamha:ha:po. Amasiyama na: yia: dla ulugiyemale koko hale ponati-iliwa. Isikimi Yona koko tlo yia: watle nati-iliwepo. <sup>30</sup> Adipalati, Godta Yona dla koko hauwatapo Niniba so dla imuwapo, ya:ta ikadepe Yonaye tane duwa kokoye. Epapedeme Opa Yami dla koko woyamolowe mape wata oloma hema ha:ha: so watle imelepe, Godtapo ikadepe ya:ye tane duwa kokoye.”

<sup>31</sup> Epame koko gladle oloma dla Siba mo dokopala a:ya mape wua: mate koko gladle dla halemama wua: kokoye gladepo wua:ye batalimale so dlepe. Adipalati, ya:tapo mo pateka:mu tle pato oplami Solomonta imale koko dalla puwapo. Amasiyama na:ta Solomonye tla:mtame halapo. Epapele tope wua:tapo na: yuye dalla allipo. <sup>32</sup> Epedeme Niniba sotapo koko gladle oloma dla wua: mate ha:ha:mama wua: kokoye gladepo wua:ye batalimale so dlepe. Adipalati, Yonata God yuye yia: dla hampulati yia:tapo yia:

bobtalimale tle ma-heheletimuwapo. Amasiyama na:tapo Yonaye tla:mtame halapo. Epapele tope na:ta God yuye wua: dla hampulati wua:ta dalepame wua: bobtalimale tle poheheletimana.

*Di moto dla inomata hela:dle halapo  
(Ma:t 5:15, 6:22-23)*

<sup>33</sup> “Oplamitapo tuloma otopame hemele pohimisemde, epame kawapota pobopude-semde. Hao. Ya: tuloma otopame haliyamale dla pamelemdepo, opatapo aya dulu dla matimama hela:dle natilipo depame. <sup>34</sup> Epapedeme wa: moto pato dulu dla wa: inomatapo tuloma some halapo. Epedeme wa: inomata ka:depo hallepiye, wa: moto patota hela:dle dulu dla hallepe. Amasiyama wa: inomata batalimelepiye, wa: moto patoye amtuwale dulu dla hallepe. <sup>35</sup> Epapedeme wolomape! Wa: moto dla hela:dle halata amtuwa demiya. <sup>36</sup> Epedeme wa: moto dla hela:dle patota halemama amtuwale hale hawa hallepiye, wa: motoye tulomata hela:dle dulu dla hala sepelepe.”

*Yesuta Pa:lisi so mate epo aiyalma imalalo so mate dla sikemte atlamale  
(Ma:t 23:1-36; Maka 12:38-40)*

<sup>37</sup> Yesu yu atlemhalepo gudlati Pa:lisi oplami haletapo ya: seme ya: aya dla daya dla taiyo. Epalati Yesuta ya: mate tame daya dlowedeme polaiyo. <sup>38</sup> Pa:lisi oplamitapo Yesuta Yu so toto koko dolumama daya dlowedeme do pohowahalalo wekelati nati-pame sikemte yelepo momalamaiyo.

<sup>39</sup> Amasiyama Lodta ya: watle epo atlaiyo, “Pa:lisi so wua:ye isikimi mo-wua: kapo mate epo palita mate alikili tlo sikemte howahalomama asiyama dulu tlo pohowahalalo wekemdiye, wua: ma epapele some ha:ha:po. Adipalati, wua:tapo kapala alikili tlo howahalomdepo. Amasiyama wua: dupa duluye batalimale koko mate epame alisisi solotamolowe koko mateta sikemte poposatilipo hutiyepo. <sup>40</sup> Wua: dokopala pa:talo sopo. Adipalati, Godtapo alikili mate epo dulu mate mimita:puwapo. <sup>41</sup> Epapedeme wua: palita dulu dla hutiyete mate epo kapo dulu dla hutiyete mate atali so watle halopiya. Wua:ta epamha:ha:lepiye, eta wua:ye kapala di tle epo dupa dulu tle ullu pa:talo so depo ha:ha:lepe.

<sup>42</sup> Ka:e, Pa:lisi so, wua: wolomape! Adipalati, wua:tapo God dla namkale dle alisisi hapimama mala mate epo sosoko mate epo alisisi opi yimka:sikili mate woloma kolumale 10 dulu dla kolumale hatlope God watle hapi demha:ha:mama asiyama aiyalma hatitimale dulu dla koko patoto hutiyete halomolowe tlo wowelimdepo. Eye atali so gadlowe koko mate epo God malamolowe koko matepo. Epapedeme wua: God dla alisisi halopimha:ha:mama koko patoto dapiyamte i ma halomha:ha:iya.

<sup>43</sup> Ka:e, Pa:lisi so, wua: wolomape! Adipalati, opata wua: natilipo depame inoma sumalalo aya dla hetame itapu dla popa:lowe tlo solotamdepo. Epame api duka dla opata wua: dla heodepame namkale dle yu atlati wua: sikemte solotamdepo.

<sup>44</sup> Ka:e, Pa:lisi so, wua: wolomape! Adipalati, wua:ye wabasi some ha:ha:po. Opata wabasi pomalanatilalo di metle me-siyamde, wua: epapele some ha:ha:po.”

<sup>45</sup> Epalati aiyalma imalalo oplami haleta Yesu watle epo atlaiyo, “Imalalo oplami, wa:ta Pa:lisi so dla bobtalimale so dleta dia: dla ma siyaladle hami,” diyo.

<sup>46</sup> Epalati Yesutapo ma aiyalma imalalo so watle epo atlaiyo, “Ka:e, aiyalma imalalo so, wua: wolomape! Adipalati, wua:ta aiyalma imale kokotapo opa dla upiyele pato hapimdepo. Amasiyama wua:tapo yia:ye gademama upiyele ipi eye ma muwolo pohasemde.

<sup>47</sup> Ka:e, aiyalma imalalo so, wua: wolomape! Adipalati, wua:ta God tle yu hapame molo atlamalalo so hatili wabasi di tle aya yimlala halopame ka:pi dinamha:ha:po. Amasiyama wua: powua:malamata:, opa ewoloye wua: mamadulota potimuwapo.

<sup>48</sup> Wua:tapo wua: mamadulota koko halomuwaye ka:dena depame yia:ta potimale so

wabasi diye wua:ta dinamha:ha:po. <sup>49</sup> Epapedeme Godta wua:ta koko halomha:ha: kokoye ya: tatile ma-natipame epo atluwapo, 'Na:tapo God tle yu hapame molo atlamalalo so mate epo taiya dle so mate Isalael so dla taiya dlowepo. Amasiyama yia:tapo opi tlo potimama opi tlo isikimi wotiyalle tlo hapilipe,' duwapo. <sup>50-51</sup> Epedeme ta:lamo kotiyamale tle pumama wua: mamadulotapo God tle yu hapame molo atlamalalo soye potimpuwapo. Epammama yia:tapo Eibol tle yumuluwe kotiyapame potimpuame Sekalaya yumpo guduwapo. Adipalati, yia:tapo Sekalayaye aiyalma aya ka: epo God dla alinepi poyupo halomalalo tile ka: duka dla yumuwapo. Epapedeme wata ha:ha: so wua:tapo wua: mamadulota ka:yapa God tle yu hapame molo atlamalalo so potimpuwa yia: batalimale asiyamaye wua:ta halepe. Epedeme na: ikadepe kokoye wua: dla atlema. Adipalati, wua:tapo wua: mamadulo batalimale asiyama halepe.

<sup>52</sup> Epapedeme ka:e, aiyalma imalalo so, wua: wolomape! Adipalati, wua:ta God ya: mo koko malamolowe kokoloma eloye wua:ta hemele hatiyomeleme ha:ha:po. Epo wua:tapo opata kokoloma etle tulala depame himomelepame ma muwolo potumulasema."

<sup>53</sup> Yesutapo Pa:lisi so mate aiyalma imalalo so mate dla atlemhalepo gudlati yia:tapo sikemte siyalasiyaladepame Yesu watle atlanatili kokalle atlamyaiyo. <sup>54</sup> Adipalati, yia: solotamaiyo, Yesutapo asiyama yu atlale dulu dla Mosesta aiyalma hatitimale hale postlati ya:ye hampame wotiyalle hamilowedeme. Amasiyama Yesuta yia: saliyome ma-taiyo.

## 12

### *Yesuta yiskamu pepeyalimalalo so dla molo atlale (Mat 10:26-27)*

<sup>1</sup> Oloma edla opa hapulomatapo Yesu hala dla sikemte alumtumama kustipo tame elaiyo. Epalati Yesuta ka:yapa ya: alotle tlalo so watle epo atlaiyo, "Wua: wolomape! Pa:lisi sota yiskamu pepeyalimde kokotapo daya haka:le epapele some halapo. Adipalati, daya amko ka:dleye daya haka:le mate dukumelepiye, daya amko ka:dleye batalimelepe. <sup>2</sup> Epedeme hemele towalipo hutiyeye koko hapulomatapo ma haliyamale dla bobotimatimelepe. Epame opata podallalo wekemduwa kokoye ma haliyamale dla atlamelepe. <sup>3</sup> Epedeme wua:tapo hemele atlamuwa yuye ma opata haliyamale dla dlallepe. Epame wua:ta aya dulu dla hemele molo yu atlamuwa kokoye ma alotle opa hapulomata dallepo depame aya dopuko di tle yu sisiyatlemale mate atlamelepe."

### *Hatlo God tlo wowota:mha:ha:iya (Mat 10:28-31)*

<sup>4</sup> "Epapedeme namkadulo, na: wua: dla ikadepe koko atlema. Wua: opa wua: alimha:ha: so natipo ase wowota:mha:ha:miya. Adipalati, yia: isikimi wua: moto tlo potipame ma koko hale haloweye po-ala:na. <sup>5</sup> Amasiyama na:ta wua: watle atlema, wua: God tlo wowota:mha:ha:iya. Adipalati, hatlo ya:tapo oplamiye yumpame ma Dlapa mo dla ka:stlowe itiyamale elapo. Epedeme wua: hatlo ya: tlo wowota:mha:ha:iya. <sup>6</sup> Epedeme wua: malamaiya, daliyama tea yimlala do supulastaleyeye isikimi palli manita halomdepo. Amasiyama epapele dulu dla Godtapo tea yimlala iye powelisemde. <sup>7</sup> Epapedeme God me-ya:malamana, wa: dokopala dla kokosase hapuloma ha:ha:ye. Adipalati, ya:tapo hapuloma eye ma-sesa:uwapo. Epapedeme wua: ase sikemte wowota:mha:ha:miya. Adipalati, God mila:pi tle teata koko pato pohalasema. Hao. Wua:ta koko patoto ha:ha:po."

### *Opa inoma dali dla Keliso kokoye bobotimatimaiya (Mat 10:32-33, 12:32, 10:19-20)*

<sup>8</sup> "Epapedeme na: ikadepe koko wua: watle atlema. Oplami antapo opa mila:pi tle halemama ya:ta na: dla mikadepe dle kokoye botomastlepiye, asiyama na:tapo God ya:

banakaka so mila:pi tle halemama ya:ye na: oplami dlowepo. <sup>9</sup> Amasiyama oplami antapo opa mila:pi tle halemama ya:ta na: dla mikadepe dle kokoye botomastlowe wota:lepiye, asiyama na:tapo God ya: banakaka so mila:pi tle halemama ya:ye welli-wepo. <sup>10</sup> Epame oplami antapo Opa Yami dla batalipo putlopo atlepiye, Godtapo ya: batalimaleye howahapo hiyostlepe. Amasiyama oplami antapo Hela:dle Soko dla batalipo putlopo atlepiye, ya: batalimaleye Godtapo pohowahapo hiyostlowa.

<sup>11</sup> Epapedeme opata wua:ye inoma sumalalo aya dla epo dokopala so aya dla wua: koko gladlowedeme eleme hetlati wua:tapo wuskamu gadlowe yu atlowe dla ase sikemte momalamiya. <sup>12</sup> Adipalati, wua:ta edla hetame halemama yukamolowe yuye Hela:dle Sokota wua:ye imelepe.”

### *Yesuta alisisi pasatale oplami koko mate wayu atlale*

<sup>13</sup> Opa alumale dulu dla oplami haleta epo atlaiyo, “Imalalo oplami, wa: na: bapa atlane, ya:ta di a powale elo dla halemama alisisi hapuloma omhalaye seme na: watle hapilipo depame,” diyo.

<sup>14</sup> Yesu asiyama ya: watle epo atlaiyo, “Namkale, na: dla itiyamale elema:, na:tapo wua:ta dapiyamte dla wua: a alisisi duka hukulupo alemolowe?” diyo. <sup>15</sup> Yesu ma opa hapuloma edla popa:le so watle epo atlaiyo, “Ka:e, wua: wolomape! Wua: alisisi poposatilipo halopo ha:ha:lowe koko dla ase sikemte solotamiya. Adipalati, alisisi poposatilipo ha:ha:lowe kokotapo pasakalo ikadepeye pohalopimhalasema,” diyo.

<sup>16</sup> Yesu yu i atlepame ma wayu i atlaiyo, “Alisisi pasatale oplami ta:la dla ya:ta alisisi emaletapo dlowe alisisi sikemte milimaiyo. <sup>17</sup> Epapalati ya:tapo ya:skamu epo atlaiyo, ‘Na: dla dlowe alisisi i kolumolowe aya hawa. Epedeme na: ma apa koko hapa:?’ depame epo atlaiyo, <sup>18</sup> ‘Na: na: alisisi kolumalalo aya takala iye dokostepo ma aya amko patoto halomolowepo. Epame na:ta dlowe alisisi mate alisisi opi mate dulu edla kokolumolowepo. <sup>19</sup> Epapelepiye, na: dla alisisi ka:ka:pi pasataleta sokomoko hapuloma dulu dla kolupo ellepe. Epedeme na:tapo ma oko hale pohamhallowa. Amasiyama isikimi hatlo halemama siyele mate daya mate epo yú mate demhallowepo,’ diyo.

<sup>20</sup> Amasiyama Godta ya: watle epo atlaiyo, ‘Wa: yiyilamale oplamipo. Epapedeme wata utula:la na:tapo wa: pasakaloye wa: tle kolahalowepo. Epalati wa:ta wa:skamu gadlowe alisisi kokolupo haluwaye ma oplami anta hapa:?’ diyo.”

<sup>21</sup> Epedeme Yesu ma epo atlaiyo, “Oplami antapo ta:lamo hema alisisi pasatale kolupo halemama asiyama God mila:pi tle Pepele di dla alisisi pokolumalalo hallepiye, ipapele kokota ya: dla woyamelepe,” diyo.

### *Hatlo God dla hitaha:ha:iya (Ma:t 6:25-34, 19-21)*

<sup>22</sup> Yesu ma ya: alotle tlalo so watle epo atlaiyo, “Wua: wua:ta ha:ha:mama daya demha:ha:lowe mate epo tluka didiyemha:ha:lowe mate dla ase sikemte momalamha:ha:miya. <sup>23</sup> Adipalati, dlowe alisisita koko pato pohalasema. Hao. Amasiyama wua: pasakalota koko pato halapo. Epame tluka alisisita koko pato pohalasema. Hao. Amasiyama wua: motota koko pato halapo. <sup>24</sup> Epapedeme wua: tea natipame malamaiya. Yia: dlowe alisisiye empame ma pohauwalesemde. Epame yia: dla yia:ta alisisi kokolumolowe aya hawapo. Amasiyama epapele tlope Godtapo yia:ye dlowe alisisi ilimhalapo. Amasiyama God mila:pi tle teata koko pato pohalasema, amasiyama wua:tapo koko patoto ha:ha:po. <sup>25</sup> Epedeme oplami antapo tluka alisisi mate epo daya dlowe koko mate dla sikemte momalamhalemama ya: pasakaloye ma a:ma sele-malemdi? <sup>26</sup> Wua: dla koko yimka:mala epapele halowe itiyamale hawa hallepiye, ame wua: ma adipalati koko opi hapuloma halomolowe dla sikemte momalamha:ha:mdi?”



<sup>27</sup> Epame wua: ma moku dla dali haha ka:ka:dleta ha:ha:mde dla natimama mala-maiya. Adipalati, yia:tapo yiskamu gadlowe dla oko hapame ma yia: tluka poded-lalimasemde. Epedeme na: wua: watle atlema, ka:yapa Solomonta dokopala oplami haluwa oloma edla ya:tapo tluka alisisi mila:pi ka:ka:dle didiyemhaluwapo. Amasiyama moku dla dali haha ha:ha:mde yia: mila:pitapo Solomonta tluka didiyemhaluwa mila:piye tla:mtame halapo. <sup>28</sup> Epedeme dali haha ka:dletapo wata u-uplatipo ha:ha:po depame ma alila hale dla pakasiyamalalo mo-totolemdepo. Epapele tlope Godtapo dali haha dla mepo tluka ka:ka:dle didiyemelemhalema dlepiye, na: ma mikadepe dema, Godtapo wua:ye tluka ka:ka:dle didiyemelemhalapo. Wua: ase mikadepe dle pa:talo so some ha:ha:miya. <sup>29</sup> Epame wua:ta daya mate yú mate dlomha:ha:lowe dla ase sikemte momalamha:ha:miya. <sup>30</sup> Adipalati, ta:lamo sota ipapele alisisi yilo sikemte momalamha:ha:mdepo. Amasiyama wua: Aye me-ya:malamana, wua:ta ipapele alisisi halomolowedeme solotamale himha:ha:ye. <sup>31</sup> Epedeme wua: ka:yapa ya: mo koko tatle totamaiya. Wua:ta epapelepiye, asiyama ya:tapo wua:ta totamha:ha: alisisi hapulomaye wua: watle hapilipe.

<sup>32</sup> Epapedeme wua: ase sikemte wowota:mha:ha:miya. Adipalati, sipi aliya halo omha:ha:lalota ya: aliya woloma omha:ha:mdiye, epapele some Godtapo wua:ye woloma omhalapo. Epedeme wua: wowota:le mate ha:ha:miya. Adipalati, wua: Ata wua: watle ya: mo kokoye hamilowedeme solotamhalapo. <sup>33</sup> Wua: alisisiye opa watle hapipame asiyama mani halopame ma atali so watle alemaiya. Wua:ta epapelepiye, asiyama Pepele dimo dla alisisi pasatale kokotapo wua: hi mate omellepe. Alisisi pasatale koko etapo Pepele dimo dla elemama popa:lowa. Adipalati, mo edla uhalalo sota alisisi upohalomasemde, epame musasuta tluka alisisiye podlomasemde. <sup>34</sup> Epapedeme wua: alisisi pasatale kokotapo mo hadima hutiyelepiye, wua:ta malamale ma edla hatitipo ha:ha:mdepo.”

*Opa Yamita puluwe koko dla dinapopo ha:ha:iya  
(Mat 24:45-51)*

<sup>35</sup> “Epedeme wua: tluka dinapopame koko dla dalemha:ha:mama tuloma o-otopo ha:ha:iya. <sup>36</sup> Adipalati, oko sotapo yia: dokopala oplamita a:ya hamili daya dele tle pulati natilowedeme omha:ha:mdiye, epapele some ha:ha:iya. Adipalati, ya:tapo puame kokoloma dla heyulumalati yia:ta hapele tuwame kokoloma gowaladlowedeme. <sup>37</sup> Oko sotapo ya:ta puluwe dla dalemha:ha:mama me-ompopa:lepiye, eta dokopala oplamiye puame yia: natipo siyelepe. Epedeme na: wua: dla ikadepe koko atlema. Dokopala oplami etapo ya: oko so natipo siyemama yia: watle popa:iya depame ya:tapo yia: daya dinapelepe. <sup>38</sup> Epedeme pona:malamana, dokopala oplamita puluwe alilaye. Ya: utula:la dukuslopi dla puluwe, o ala iki yulumhallati puluwe. Amasiyama ka:dlepo, ya: oko sotapo ya:ta pua dla dalemha:ha:mama me-omha:ha:lepiye, eta ya: natipo yia: dla siyelepe. <sup>39</sup> Amasiyama wua: koko iye woloma malamaiya. Oplamitapo uhalalo oplamita ya: aya dla puluwe alilaye dallepiye, ya: ma-dinapo polomama ompollepe. Epame uhalalo oplamita mo-pulati natipame ya:ye dodolomelepe. <sup>40</sup> Epapedeme wua: ma ma-dinapopame dalemha:ha:mama omha:ha:iya. Adipalati, wua: powua:malamana, Opa Yamita puluwe alilaye.”

<sup>41</sup> Epalati Pitata epo atlaiyo, “Lod wa: wayu iye isikimi hatlo dita dallepo depo amma; o opa hapulomata dallepo depo amma:?” diyo.

<sup>42</sup> Epalati Lodta asiyama epo atlaiyo, “Koko dla salladepo sela:mama oko ka:depo hamhallalo oplami anata:? Dokopala oplamitapo epapele oplami dla itiyamale hamilipe, ya:tapo ya: oko so hapuloma omhalemama ma yia: dla daya alemhallepo depame. <sup>43</sup> Epame dokopala oplamitapo ma haka:ma dla tame halepo puame natilati ya: oko oplamita woloma ya: okoye ka:depo hamhalale natipame ya: dla siyele hamilipe. <sup>44</sup> Epapedeme na: wua: dla mikadepe koko atlema. Dokopala oplamitapo ya: oko

oplamita woloma okoye ka:depo hamhalale natilipiye, ya:tapo ma ya: watle ya: alisisi hapulomaye omhalane dlepe.

<sup>45</sup> Amasiyama oko batalipo halalo oplamitapo ya: dokopala oplamita ala hapele populalo hallati natipame epo atellepe, 'Na: dokopala oplami hapele popuasema,' depo ya:mkadulo oko soye hopolepame daya mate kawata yú mate demhalemama yiyil-amhallepe. <sup>46</sup> Ya: epamhalemama podinapolalo hallati ya: dokopala oplamita puame woyamelepe. Epalati ya: dokopala oplamitapo puame ya:ye sikemte hopolepame alikili dla ka:stlepe, ya:tapo posalladepo siyamalalo so mate hallepo depame.

<sup>47</sup> Epedeme oko oplami antapo ya: dokopala oplamita solotamale kokoye mo-malapame ma koko e pohalomalalo hallepiye, ya:ye asiyama sikemte hopollepe.

<sup>48</sup> Amasiyama oko oplami antapo ya: dokopala oplamita solotamale koko pomalamalalo halemama koko e pohalalo hallepiye, ya:ye asiyama pase sikemte hopollowa. Epedeme Godtapo opa anawolo watle oko pato halomha:ha:lepo depame malamale patoto mo-halopiwa, ya: solotamapo, malamale e mate oko e halomha:ha:lepo depame. Epame Godta opa anawolo watle isikimi oko yimka:sikili mo-halopiwa, ya: solotama, oko yimka:sikili eye halomha:ha:lepo depame."

*Sadle koko hawa, amasiyama duka gladleta ellepe  
(Ma:t 10:34-36)*

<sup>49</sup> "Na:tapo ta:lamo hema puwaye, ta:lamo iye dlapa seledla puwapo. Amasiyama na: solotama, dlapa etapo mo-ullumhallati natilowedeme. <sup>50</sup> Amasiyama na:ta wotiyalle halowe alila ma mo-puapo. Epedeme na: dla dupa yuli patota elema. Epapele tlope na:ta wotiyalle dulu etle ulatelepiye, eta dupa yuli na: dla ela iye medla pa:lepe. <sup>51</sup> Epedeme wua:ta malamaleta na:ye ta:lamo hema sadle hampuwa depo malamdi? Hao, duka gladle kokoye hampuwapo. <sup>52</sup> Epapedeme wata oloma itle tamama aya hatlo dla ha:ha:lalo so dulu dla duka gladle ellepe. <sup>53</sup> Epammama adulotapo yia: akimlala mate duka gladle ellepe. Epame waidulo mape yia: utukaka mate duka gladle ellepe. Epame meneledulotapo me-yia: meneledulo dulu dla duka gladle ellepe."

*Kokota wowoyamolowe alilaye woloma malanatilowe  
(Ma:t 16:2-3)*

<sup>54</sup> Yesu ma opa watle epo atlaiyo, "Wua: pepele di dla natitepo wualata dikipo pula natilipiye, wua: pakasiyamalalo epo atlemdepo, 'Wata tiyo hellepe,' demdepo. Epalati tiyota me-helemdepo. <sup>55</sup> Epame wua: pepele di dla natitepo pepele dikili siyapota ella natilipiye, wua: ma pakasiyamalalo epo atlemdepo, 'Wata sali ka:dlepe,' demdepo. Epalati salitapo mepo ka:demdepo. <sup>56</sup> Wua: koko yeitamale sopo. Wua: tiyota hellowe koko mate epo salita silaplowe koko mate mo-wua:malamana. Ame adipalati wua: wata oloma hema wowoyamhala kokoye pomalanatilalo ha:ha:ma:?"

*Wa: dla opahale depo hala oplami mate sadle yu himine  
(Ma:t 5:25-26)*

<sup>57</sup> "Wua: adipalati muwolo ka:ka:dle koko halomolowe tlo pomalamalalo ha:ha:ma:?  
<sup>58</sup> Epedeme wa: alilalo oplamita wa:ye koko gladle dla semtlati wa: hapele api duka dla ya: mate tamama ya:ta wa: dla alli elaye pustlepo depame ya: mate namkale dlepe. Amasiyama wa:ta koko e pohalalo wekelepiye, ya:tapo wa:ye koko glادلalo oplami dla semtame wa: koko gladlepe. Epalati ma koko glادلalo oplamitapo wa:ye amtuwale aya omhallalo oplami dla homellepe. Epalati etle ya:tapo wa:ye ma amtuwale aya dulu dla ka:stlepe. <sup>59</sup> Epedeme na: ikadepe kokoye atlema. Wa: amtuwale aya dulu edla halemama alikili dla woyamolowe apiye ponatilowa. Amasiyama wa:tapo ya:ta sale mani sukulu mate ala:po himilipiye, eta wa:ye alikili dla woyamelepe."

## 13

*Wua: wua: bobtalimale tle poheheletimalalo wekelepiye, wua: pallipe*

<sup>1</sup> Alila oloma edla opata puame Yesu watle Ga:lili so opita God dla alinepi poyupo halomha:ha:lati Paeletapo yia:ye potimale kokoye atlaiyo. <sup>2</sup> Epalati Yesutapo asiyama yia: watle epo atlaiyo, “Wua: koko i natimama adipo malama:? Ga:lili so opi potimale iwolota Ga:lili so hapuloma dulu dla hatlo yia:ta batalimale koko patoto halomha:ha:lati apuwa? <sup>3</sup> Hao, pe-epapena. Amasiyama wua:ta wua: bobtalimale tle malamale meye-lope depame God dla poheheletimalalo wekelepiye, wua: ma mepapelepe. <sup>4</sup> Epame wua: ma koko hale i malamaiya. Sailoam mo dla aya di ikadepe dla halëta dokolahapo tulumama 18 opa potimuwapo. 18 opa potimale iwolotapo Yelusalem so dulu dla batalimale koko patoto halomha:ha:lati apuwa? <sup>5</sup> Hao, pe-epapena. Amasiyama wua:ta wua: bobtalimale tle malamale meye-lope depame God dla poheheletimalalo wekelepiye, wua: ma mepapelepe.”

<sup>6</sup> Epame Yesutapo yia: watle wayu hale i atlaiyo, “Oplamita gla:pi dlomoko emale dulu dla pigi dlomoko dali halaiyo. Epeleye alila haleta yo emalalo oplamitapo pigi dlomoko halowedeme natila puaiyo. Amasiyama ya: puame natitepo pigi dlomoko dalita dlomoko pomilalo halaiyo. <sup>7</sup> Epalati ya:tapo ya: oko oplami watle epo atlaiyo, ‘Sokomoko dapahatlope dulu dla na: solotamduwa, pigi dali ita dlomoko mila dlowedeme. Amasiyama ya: dlomoko pomimhalana. Epapedeme wostane. Poka:dena, ya:ta na: alisisi emale dulu dla halloweye,’ diyo.

<sup>8</sup> Epalati asiyama ya: oko oplamitapo ya: watle epo atlaiyo, ‘Di aseka sokomoko hatlo dulu dla omha:ha:mama na:tapo woloma ta:la imhallowepo. <sup>9</sup> Epapele dulu dla ya:ta dlomoko milipiye, ka:dena. Amasiyama ya:ta dlomoko pomilalo wekelepiye, eta di dlomoko dali e wostlowepo,’ diyo.”

*Yesuta poutamsela:lalo aya ka:dle*

<sup>10</sup> Yu sota inoma sumalalo alila hale dla Yesutapo yia:ta inoma sumalalo aya hale dla hetame imhalaiyo. <sup>11</sup> Oloma edla a:ya hale 18 sokomoko dulu dla halemama bataliyata ya: dulu dla hallati ya:ta alila hapuloma dulu dla poutamsela:mdiyo. <sup>12</sup> Epapeleye Yesutapo ya: natipame ya:ye itapu dla sisilapame ya: watle epo atlaiyo, “A:ya, wa:ta alila hapuloma poutamsela: kokoye wata mo-pa:lepe,” diyo. <sup>13</sup> Epo atlepame Yesuta ya: do mate a:ya eye umaiyo. Epalati pakasiyamalalo poutamsela:lalo a:yatapo matle dolepo sela:lowe kotiyapame God dla siyele ta:diyo.

<sup>14</sup> Epapalati inoma sumalalo aya omhallalotapo Yesuta yia:ta inoma sumalalo alila dla a:ya ka:dle natipame sikemte siyalademama opa watle epo atlaiyo, “Sande hatlo dulu dla alila 7 me-hutiyepo. Epedeme opata isikimi 6 alila dulu dla oko halowe tlo ka:pi. Epapedeme ka:dlepo, wua:tapo alila 6 dulu hema esusulumale so elempuame ka:ka:dloweye. Amasiyama poka:dena, wua:ta dita inoma sumalalo alila dla puame epapele koko haloweye,” diyo.

<sup>15</sup> Epalati asiyama Lodta yia: watle epo atlaiyo, “Wua: wuskamu pepeyalimalalo sopo. Adipalati, wua:ta hapulomatapo dita inoma sumalalo alila dla wua: donki aliya mate bulumkiyawa aliya mate kikitama totowatipame yú ilimolowedeme elemtamdepo. <sup>16</sup> Epapedeme wua:tapo dita inoma sumalalo alila dla wua: alinepi gagademdepo. Ame poka:deta:, na:ta dita inoma sumalalo alila dla A:iblaham ya: mama hale a:ya iye ka:dloweye? Adipalati, Saitenta itiyamaletapo a:ya iye 18 sokomoko dulu dla dea some populiyepo haluwapo.”

<sup>17</sup> Yesuta yu i atlale kokotapo ya: mate siyalasiyaladle so dla wota:le hamiyo. Amasiyama opa opi tlo Yesuta koko ka:ka:dle halomale natipame sikemte sisiyeiyo.

*God ya: mo kokoye Yesuta wayu mate imale  
(Mat 13:31-33; Maka 4:30-32)*

<sup>18</sup> Epame Yesu ma yia: watle epo atlaiyo, “God ya: mo kokoye adipapeta:? Na: adipapele koko mate God ya: mo kokoye wua: dla ipa:? <sup>19</sup> Epedeme God ya: mo kokoye ipapena. Oplamitapo masted dlomoko ale yemalaye hamtame ya: osalo dulu dla emomellepe. Epalati dlomoko ale yemala etapo peyapo ta:pame dlo yalemtilati teatapo edla puame eto tilimyemdepo.

<sup>20</sup> Epame na: ma adipapele koko tle God ya: mo kokoye ipa:? <sup>21</sup> Eye ipapena. A:yatapo palawa daya ha:lowedeme ka:yapa dukumama palawa daya pato dulu dla yist yemalaye kustamdepo. Epalati yist yemala etapo palawa dayaye sikemte ta:mdepo.”

*Kokoloma kokotomale*  
(*Mat 7:13-14, 21-23*)

<sup>22</sup> Yesutapo Yelusalem dla tamama mo yimlala opi api duka dla popa:myaleye tetla:mtamama God yu imtaiyo. <sup>23</sup> Epamtilati oplami haletapo Yesu watle epo atlanatiyo, “Lod, opa isikimi pastota pasakalo hallowe hapa:?” diyo.

Epalati asiyama ya:ta epo atlaiyo, <sup>24</sup> “Wua: kokoloma kokotomale tle ulatuluwedeme sikemte itiyamaiya. Adipalati, na: wua: watle ikadepe kokoye atlema. Opa hapulomatapo kokoloma kokotomale etle tuluwedeme sikemte itiyameyelepe, amasiyama yia: potuluwa. <sup>25</sup> Adipalati, aya yotapo sila:time kokoloma godlepe. Epalati wua:tapo alikili tle siyamama kokoloma heyulumyelepe, kokoloma gowaladlepo depame. Epammama epo atlamyelepe, ‘Dokopala oplami, kokoloma gowaladene. Di tuluwama,’ demyelepe.

Amasiyama ya:tapo epo atellepe, ‘Na: wua: koko pona:malamana, wua: apa sota:?’ dlepe.

<sup>26</sup> Epalati asiyama wua:ta epo atellepe, ‘Di wa: mate siyamama daya mate yú mate yimkata dlomsiyamduwapo. Epame di mo dla wa:tapo di watle ka:dle yuye im-sela:uwapo,’ dlepe.

<sup>27</sup> Amasiyama ya:tapo wua: watle ma epo atellepe, ‘Na: wua:ye pona:malamana. Wua: apa sota:? Wua: na: hala dla pumulumiya. Na: tle alikili a:ma taiya, wua: bobtalimale koko halomalalo sopo,’ dlepe.

<sup>28</sup> Epedeme wua:ye God ya: mo koko tle alikili dla pomallati alikili tle ha:ha:mama A:iblaham mate epo Yokob mate epo Aisek mate epo God tle yu hapame molo atlamalalo so mate God ya: mo koko dulu dla popa:lati natipame a:lemyemama a:pe tetekelal-imha:ha:lepe. <sup>29</sup> Epalati ta:lamo pato dulu dla mo hapuloma tle opatapo God ya: mo koko dulu dla daya dlowedeme puame popa:lepe. <sup>30</sup> Epalati oloma edla itapu dla ha:ha:lalo so opitapo ma alo dla ha:ha:lepe. Epalati asiyama alo dla ha:ha:lalo so opitapo ma itapu dla ha:ha:lepe.”

*Yesutapo Yelusalem malamale koko*  
(*Mat 23:37-39*)

<sup>31</sup> Alila oloma edla Pa:lisi so opita puame Yesu watle epo atlaiyo, “Wa: mo i melepame ma mo hale dla tane. Adipalati, Helodye wa: yumuluwe solotama,” diyo.

<sup>32</sup> Epalati asiyama Yesuta yia: watle epo atlaiyo, “Wua: tame esemala e atlaiye, na:ye wata mate epo iyela mate bataliya watalo so mate esusulumale so mate ka:ka:demhallowamo. Epame ma alallati na:ta na: oko gudlepe de diye. <sup>33</sup> Ikadepe, wata mate epo iyela mate epame alallati mate na:tapo na: okoye me-hamtlowepo. Adipalati, opatapo God tle yu hapame molo atlalo oplamiye Yelusalem mo alikili dla yumuluweye poka:dena.

<sup>34</sup> Yelusalem, Yelusalem, wa: adipalati God tle yu hapame molo atlamalalo so potimama Godta taiya dle soye ewala mate kelemhalemdi? Na: alila adisowa dla gagapota ya: yimlalaye woloma suku dulu dla ipila:po opolomdiye, epapolowedeme na:ta wa: yimlalaye elempuluwe solotamduwapo. Amasiyama wa: posolotamdena.

<sup>35</sup> Epapedeme Yelusalem so, wua: daliya. Wua: aiyalma ayaye aya siyapo hallepe. Epedeme na: ikadepe kokoye wua: watle atlema. Wua: matle na: mila:piye ponatilowa.

Amasiyama alilata pulati wua:tapo epo atlamyelepe, ‘God hi mate pua oplami dla sisiyeiya,’ demyelepe. Epapele oloma edla wua:tapo ma na: mila:pi natilipe.”

## 14

### *Yesuta Pa:lisi oplami aya dla tale*

<sup>1</sup> Yu sota inoma sumalalo alila haleta Yesuye Pa:lisi so dokopala oplami aya dla hetame daya dlowedeme polaiyo. Epalati opata Yesuye woloma kulume natimyaiyo.

<sup>2</sup> Adipalati, aya dulu edla oplami hale esiyele patota hamama ya: moto hapuloma hoholopo elaiyo. <sup>3</sup> Epapele natipame Yesuta Pa:lisi so mate epo aiyalma imalalo so mate dla epo atlaiyo, “Di aiyalmata dita inoma sumalalo alila dla opa ka:ka:dloweye ka:pi dema:?” diyo. <sup>4</sup> Amasiyama ya: yu hale po-atlaiyo. Epalati Yesuta oplami eye ya: do mate umpame ka:diyo. Epame ya:ye ma-tane diyo.

<sup>5</sup> Epame ya: ma Pa:lisi so mate epo aiyalma imalalo so mate dla epo atlaiyo, “Wua: dulu dla wua: maseyemala hale epapeleta o bulumkiyawa epapeleta dita inoma sumalalo alila dla munamu dulu dla teyulupiye, wua: ya:ye poholahalalo wekepa:? Hao. Wua: ya:ye munamu dulu tle holalepe,” diyo. <sup>6</sup> Epalati ya:tapo Yesu watle asiyama yu atloweye pa:iyo.

### *Ya:skamu di dla hamhetlowe koko mate epo isili dla hamtuluwe koko mate*

<sup>7</sup> Yesu aya dulu edla polomama natilati opata daya dele dla pumhalemama itapu dla popa:lowe tlo sikemte solotamaiyo. Epapalati Yesutapo wayu i mate ya: watle epo atlaiyo, <sup>8</sup> “Oplami haletapo wa: watle a:ya hamili daya dele dla puane dlati wa: puame daya dlowedeme yipta itapu ikadepe dla tuwame polomiya. Adipalati, pato oplami haleta wa: ko tle puluwe sepena. <sup>9</sup> Epalati aya yotapo wa: watle epo atellepe, ‘Wa:ta pola eye pato oplamita pollopo. Epedeme wa: sila:time alo tiyama dla tuwame polane,’ dlepe. Epalati wa: sikemte wota:le mate alo ikadepe dla tuwame pollope. <sup>10</sup> Amasiyama a:ya hamili daya dele dla wa:ye puane dlati wa: puame daya dlowedeme polomama aseka alo ikadepe dla tuwame pollope. Wa:ta alo edla polla natipame yo meyelo puame wa:ye itapu dla tuwame polane dlepe. Epalati daya dele edla popa:le sotapo koko i natipame wa: dla sisiyelepe. <sup>11</sup> Epedeme opa anawolotapo yiskamu ya:ye di dla halopo hehetamha:ha:ma:, asiyama ya:ye Godta isili dla halopo tullupe. Amasiyama opa anawolotapo yiskamu ya:ye isili dla halopo tulumha:ha:ma:, asiyama ya:ye Godta di dla halopo hetlepe.”

<sup>12</sup> Epame Yesuta ma ya: puane dle Pa:lisi oplami watle epo atlaiyo, “Wa: daya dele pato dinapomama wa: hatlo wa: amkadulo mate epo wa: bapadulo mate epo wa: asiyadulo mate epame wa: amkadulo alisisi poposatilimale so mate tlo sisilamiya. Adipalati, ya: ma asiyama wa:ye mepo gadlepe. Epapele koko tle wa: asiyama hale pahalowa. <sup>13</sup> Amasiyama wa: daya dele pato dinapomama isikimi atali so mate epo akoloyeyalemale so mate epame inoma pa:talo so mate tlo elemelepe. <sup>14</sup> Adipalati, wa:tapo koko ipapele halepiye, Godta wa:ye asiyama hamilipe. Ame adipalati, ya:tapo asiyama wua:ye mepo gadloweye po-ala:na. Epapedeme God mila:pi tle ka:ka:depo ha:ha:lalo sota palli tle silliwe oloma edla Godta wa:ye asiyama hamilipe.”

### *Wayu mate daya dele pato koko dla esemale*

*(Ma:t 22:1-10)*

<sup>15</sup> Yesu mate yimkata daya dempopa:le so haleta yu i dalepame Yesu watle epo atlaiyo, “God ya: mo koko dla hetame yimkata daya dlowe so, wua: sikemte sisiyeiya,” diyo.

<sup>16</sup> Epalati Yesuta ya: watle epo atlaiyo, “Oplami haletapo daya dele pato dinapopame opa hapuloma sisilamaiyo. <sup>17</sup> Epame daya mo-dlowedeme, ya: oko oplami hale watle tame ya:ta sisilamale soye elempuane diyo.



<sup>18</sup> Epalati ya: oko oplamita yia:ye me-elemala pulati natipame yia:tapo daya dele dla pula allimama ma koko opi dla epo pestame atlamyaiyo. Epammama oplami haleta ya: watle epo atlaiyo, 'Na: ala ta:la hauwa. Epedeme na: tame ta:la eye natilowama. Epedeme wa: tame wa: dokopala oplami atlane, na: daya dele dla populuwa dene,' diyo.

<sup>19</sup> Epalati ma oplami haleta epo atlaiyo, 'Na: ala bulumkiyawa 10 hohomuwa. Epedeme aliya ewolo mate oko haloweye ka:deta: depame yia: mate oko hala tlowama. Epapedeme wa: tame wa: dokopala oplami atlane, na: daya dele dla populuwa dene,' diyo.

<sup>20</sup> Epame ma oplami haleta epo atlaiyo, 'Na: ala a:ya hauwa. Epapedeme na: daya dele dla populuwa,' diyo.

<sup>21</sup> Opata epo atlamyelati yu hamtlalo oplamita ma ilame tame ya: dokopala oplami watle opata atlamyale koko hapulomaye ya: watle atlamaiyo. Epalati daya dele dokopala oplamiye sikemte siyalademama ma ya: oko oplami watle epo atlaiyo, 'Wa: hapele tame mo duka dla atali so mate epo akoloyeyalemale so mate epo inoma pa:talo so mate elempuane,' diyo.

<sup>22</sup> Epalati pakasiyamalalo ya: oko oplamita tame opa elempuame ya: dokopala oplami watle epo atlaiyo, 'Na: opa opi me-eleme puale tlope, asiyama aya alupoli opiye ala me-aya siyapo halema,' diyo.

<sup>23</sup> Epalati dokopala oplamita ma ya: oko oplami watle epo atlaiyo, 'Wa: ma tame api duka dla isikimi hohola:msiyama so mate epo dakase aya dla ha:ha:lalo so mate elempuane, na: aya dulu dla alupoli siyapo elata ma-ala:mama pasatlepo depame.

<sup>24</sup> Epapedeme na: ikadepe koko wa: watle atlema. Daya dele dulu hema na:ta ka:yapa opa sisilamalati pula alli sotapo na:ta dinapele dayaye podlowa,' diyo."

### *Yesu dolumtlowe kokoye adipapeta:?*

*(Mat 10:37-38)*

<sup>25</sup> Opa hapulomatapo Yesu dolumtlati Yesutapo yia: watle helestame halemama epo atlaiyo, <sup>26</sup> "Oplami antapo ya: a mate epo ya: wai mate epo ya:llu mate epo ya: yimlala mate epo ya: asiyadulo mate epame ya: pasakalo mate dla malamale pato himhalemama asiyama na: dla malamale yimka:mala himhallelepiye, ya: na: dolumolowe po-ala:na. <sup>27</sup> Epame oplami antapo meyelo ya: dali yekelehmihili maka:himme na: dolumpuluwe allipiye, ya:ye pona: oplami.

<sup>28</sup> Oplamitapo kapo aya halowe solotamelepiye, ya: ka:yapa polomama ya:ta kapo aya halowe maniye ma-ala:ta: depame ya: mani sesa:lepe. <sup>29</sup> Adipalati, ya: ka:yapa mani tatile posesa:lalo oko kotiyapo hamtelepiye, manita pa:mama oko ma duka dla gudlepe. <sup>30</sup> Epalati opata ayaye pogudlalo pollati natipame eimelemymama epo atellepe, 'Oplami iye mani ala:leta kapo aya hauwa,' demyelepe.

<sup>31</sup> Wayu haleye ipapena. Mo dapiyamtetapo opahale dlepe. Epapele dulu dla mo hale so tlo 10,000 opa elepo pulupe. Epalati mo haletapo 20,000 opa elepo pulupe. Amasiyama 10,000 opa eleme opahale dla tlalo dokopala oplamitapo ka:yapa woloma polomama 20,000 opa mate natalimoloweye momalampollope. <sup>32</sup> Epame ya:ta ya: opa mate 20,000 opa mate natalimoloweye po-ala:lalo wekelepiye, ya:tapo ya: oplami haleye 20,000 opa eleme pua dokopala oplami dla yu hamtane dlepe, ya: mate ma sadle halowedeme.

<sup>33</sup> Epapedeme oplami antapo na: dolumpuluwe solotamelepiye, ya:tapo ya: alisisi hapulomaye medla salepame na: dolumpulupe.

<sup>34</sup> Soloye ka:pi alisisipo. Amasiyama ya:ta opallita pa:lepiye, wa: ma adipo ya:ta opalliye hapa:? <sup>35</sup> Epedeme solo eye koko pa:le ellati opata hamastlepe. Amasiyama molo walle oplamitapo koko iye woloma dallepe."

## 15

### *Yesuta sipi aliyata alikili dla haodle koko mate wayu atlale*

*(Ma:t 18:12-14)*

<sup>1</sup> Ta:kis mani halomalalo so mate epo batalimale so mate Yesu yu dallowedeme puame popa:iyo. <sup>2</sup> Amasiyama Pa:lisi so mate aiyalma imalalo so mateta koko i natipame allimama epo atlamyaiyo, “Oplami itapo batalimale so elepame yia: mate daya demsela:mdepo,” demyaiyo.

<sup>3</sup> Epalati Yesutapo wayu iye yia: watle epo atlaiyo, <sup>4</sup> “Oplamitapo 100 sipi aliya haloye omhallepe. Epapele dulu dla hatlota haodlepiye, ya: ma apa koko hapa?: Ka:dena, ya:tapo 99 sipi aliya opiye medla pomelepame ma hatlo haodle tlo totamtlepe. <sup>5-6</sup> Ya: totamtame natilipiye, ya: siyemama sipi aliya eye aya dla asiyame pulupe. Epo ya:mkaduloye sisilapame epo atellepe, ‘Na: sipi aliya alikili dla haodleye wata ma-nati. Epedeme wua: puame na: mate siyele ta:diya,’ dlepe. <sup>7</sup> Epapedeme na: wua: watle mikadepe koko atlema. Pepele dimo dla 99 ka:ka:dle so koko dla siyele kokota me-elapo. Amasiyama batalimale oplami hatlota ya: batalimale tle malamale meyeloje depame ma God hala dla helestlepiye, Pepele dimo dla sikemte siyele patota ellepe.”

### *Yesuta elo manita alikili dla haodle koko tle wayu atlale*

<sup>8</sup> “Alila hale dla a:ya hale ya: elo mani 10 dulu dla hatloje tlo alikili dla haodlepe. Epalati ya: apa koko hapa?: Ya:tapo tuloma otopame totamsela:mama ya: aya duluye pumoko mate towallipe. <sup>9</sup> Epame ya:tapo ya: elo mani alikili dla haodle e natilipiye, ya:tapo ya:mkaduloye sisilapame epo atellepe, ‘Na: elo mani alikili dla haodleye wata ma-nati. Epapedeme wua: puame na: mate siyele ta:diya,’ dlepe. <sup>10</sup> Epapedeme na: wua: watle mikadepe koko atlema. God mila:pi tle batalimale oplami hatlopetapo ya: batalimale tle malamale meyeloje depame ma God hala dla helestlepiye, God ya: banakaka so Pepele di dla ha:ha:tapo siyele pato ta:dlepe.”

### *Yesuta maseyemalata alikili dla haodle koko tle wayu atlale*

<sup>11</sup> Yesu matle wayu hale i mate opa watle epo esemaiyo, “Oplami haletapo ya: akimlala dapiyamte elemhalaiyo. <sup>12</sup> Epapeleye alila haleta ya: ei yemalatapo ya: a watle epo atlaiyo, ‘Wa:ta polati na:ta wa: alisisi halomoloweye momolo wata na: watle halopine,’ diyo. Epalati ya: atapo ya: akimlala dapiyamte dulu dla ya: alisisiye duka hukulupo halopiyo.

<sup>13</sup> Epalati ya: ei yemala etapo alila opi alotle ya: ata ya: watle halopili alisisiye halopame ma mo hale pateka:mu dla taiyo. Ya: edla tame poka:ka:dle koko dulu dla halemama ya: mani patoye pokadiyo. <sup>14</sup> Ya:ta ya: mani pato pokadle oloma edla sali silapomama daya pa:le kokota mo edla puaiyo. Epalati ya:tapo ma atali yemala some halemama daya ta:le pato natimdiyo. <sup>15</sup> Epalati ya:tapo mani oko halowedeme mo so oplami hale dla tame woyamaiyo. Epalati mo so oplamitapo ya:ye dakase aya dla tame ya: aliyaye omhalane diyo. <sup>16</sup> Epalati maseyemala etapo tame aliyaye daya ilimhalemama aliyata dlalo dayaye natipame dlowe solotamdiyo. Amasiyama oplami haletapo aliya daya e mate epo daya opi mate ya:ta delepo depame pohapimdiyo.

<sup>17</sup> Ya:ta epamhalale dulu dla alila hale dla ya: dla malamale ka:dleta pulati ya:ta epo malamaiyo, ‘Na: a ya: oko so hapuloma dulu dla oplami haleta daya ta:le ipapele mate pohalasejde. Amasiyama na:tapo hema daya ta:mhalemama pola yakomhalapo. <sup>18</sup> Epapedeme na: ilame tame na: a watle ipo atlowepo, “A, na:tapo God mate epo wa: mate dla batalimale kokoye ma-hauwa. <sup>19</sup> Epapedeme matle wa:tapo na:ye na: maseyemala dloweye poka:dena. Amasiyama ka:dena, wa:tapo na:ye wa: oko oplami hale dlepe,” diyo. <sup>20</sup> Epame ya:tapo ya: a hala dla ma-taiyo.

Amasiyama ya: ala pumhallati ya: ata ya:ye pateka:mu tle malanatipame ya: maseyemala yilo sikemte malamaiyo. Epammama ya:tapo ma hapele kukulumtame ya: maseyemala dla batalipo poposila:lipo huliyo.

<sup>21</sup> Epalati yamitapo ya: watle epo atlaiyo, 'A, na: God mate epo wa: mate dla batalimale koko ma-hauwa. Epedeme wa:tapo na:ye ma na: maseyemala dloweye poka:dena,' diyo.

<sup>22</sup> Amasiyama ya: atapo ya: oko so watle epo atlaiyo, 'Tluka alisisi ka:ka:dle mate epo hete alisisi mate epo do dla didiyelalo alisisi mate hapele halopo puame ya: dla didiyemeleiya. <sup>23</sup> Epame na: halo dulu dla bulumkiyawa aliya kakaliyapele tlo yumpo ha:iya. Epame yimkata daya demama sisiyelowepo. <sup>24</sup> Adipalati, na: maseyemala iye mo-pouwa tlope ma pasakalo depo. Epame mo-haoduwa tlope ma wata ma-natilipo,' diyo. Epame yia:tapo yimkata daya demama siyele ta:diyo.

<sup>25</sup> Yia: epamha:ha:liti ya: bapaye ya: alisisi emale dulu dla oko hamsela:leta pumama ya: a aya dulu dla opata siyele ta:demama sala sale yu daliyo. <sup>26</sup> Epalati ya:tapo ya: oko oplami hale sisilapame ya: watle ya: a aya dulu dla apa kokoye hamha:ha:ma: depame daliyo. <sup>27</sup> Epalati ya: oko oplamitapo ya: watle epo atlaiyo, 'Wa: eiye wata mo-pua. Epedeme wa: atapo ya: maseyemalata ma ka:pi ilame pula natipame siyemama aliya halo kakaliyapeleye yumpo daya demha:ha:po,' diyo.

<sup>28</sup> Epalati ya: bapatapo koko i dalepame alimama daya dele dulu dla potuwaiyo. Epapalati ya: atapo puame yami patota daya dele dla tulupo depame ha:ha:maiyo.

<sup>29</sup> Amasiyama ya:ta ya: a watle epo atlaiyo, 'Na:tapo sokomoko hapuloma dulu dla wa: oko oplami some wa: yu dla salladepo sela:mama oko pato hamhaluwapo. Epapele tlope wa: gaut aliya halo yemalaye na: watle yumpo wa: amkadulo mate dene pe-epamdena. <sup>30</sup> Amasiyama wa: maseyemala itapo wa: alisisi mate wa: mani mate halopo tame duka dla siyamalalo wola: mate halemama pokadepo pulati asiyama wa:tapo ya: dla siyemama aliya kakaliyapeleye yumpame daya pato demha:ha:pa?' diyo.

<sup>31</sup> Amasiyama ya: ata yami watle epo atlaiyo, 'Na: maseyemala, wa:tapo alila hapuloma na: mate halemduwapo. Epapedeme na: alisisi hapulomaye wolëpo. <sup>32</sup> Amasiyama watapo dita sisiyelowe ka:pi. Adipalati, wa: ei yemala iye mo-pouwa tlope ma pasakalo dlepo. Epame mo-haoduwa tlope ma wata ma-natilipo,' diyo."

## 16

### *Mani batalipo omhallalo oplami*

<sup>1</sup> Yesutapo ya: alotle tlalo so watle epo atlaiyo, "Alila hale alisisi pasatale oplamitapo ya: mani omhallalo semhalaiyo. Epapele dulu dla alisisi pasatale oplami ya: daliyo, ya: mani omhallalo oplamita hemele ya: mani udemhalaleye. <sup>2</sup> Epame ya:tapo ya: mani omhallaloye sisilapame ya: watle epo atlaiyo, 'Wa: na: maniye batalipo omhalana. Epedeme wa: ka:dena, wa:ta hamhaluwa koko hapulomaye buka dla ilipame na: watle nati-ilipe. Adipalati, poka:dena, ma wa:ta na: mani omhalloweye. Epedeme wa: oko wata mellepe,' diyo.

<sup>3</sup> Epalati mani omhallalo oplamita epo momalamaiyo, 'Na: dokopala oplamita na: okoye ma-ketahamastalepo. Epedeme na: ma apa koko hapa:? Na: dla alisisi emolowedeme ta:la muwalloweye itiyamale hawa. Epame na:ta opa dla mani isikimi otomsela:loweye pta wota:ma. <sup>4</sup> Amasiyama na:ta na: oko mellati namkadulota na:ye yia: aya dla semhetlepo depame na:ta koko haloweye wata mo-malama,' diyo.

<sup>5</sup> Epo malapame ya:tapo ya: dokopala oplami dla alisisi isikimi dota halomha:ha:le soye sisilalimaiyo. Epame ka:yapa oplami hale watle epo atlaiyo, 'Wa:ta na: dokopala oplami dla apa alisisi hauwaye ma asiyama ilame pohamilalo halema:?' diyo.

<sup>6</sup> Epalati oplami etapo asiyama epo atlaiyo, 'Na: 100 palastiki dla tuloma yú tilimale halomuwaye asiyama ala pohamilalo halema,' diyo.

Epalati asiyama mani omhallalo oplamita ya: watle epo atlaiyo, 'Dokopala oplami ya: bukaye ipo. Epedeme wa: hapele polomama buka hema wa:ta 100 palastiki dla tuloma yú tilimale halomaleye hiyostapame ma isikimi 50 palastiki dla tilimale tlo halomuwa dene,' diyo.

<sup>7</sup> Epame mani omhallalo oplamitapo ma oplami hale watle epo atlaiyo, 'Wa:ta na: dokopala oplami dla apa alisisi halomuwaye ma asiyama ilame pohamilalo halema:?' diyo.

Epalati asiyama ya:ta epo atlaiyo, 'Na: 100 yekalo dla palawa daya atilimale halomuwaye asiyama ala pohamilalo halema,' diyo.

Epalati asiyama mani omhallalo oplamita ya: watle epo atlaiyo, 'Dokopala oplami ya: bukaye ipo. Epedeme wa: hapele polomama buka hema wa:ta 100 yekalo dla palawa daya atilimale halomuwaye hiyostapame ma isikimi 80 yekalo dla atilimale tlo halomuwa dene,' diyo.

<sup>8</sup> Amasiyama ya: dokopala oplamitapo koko i dalepame ya: mani batalipo omhallalo watle epo atlaiyo, 'Wa:tapo wata opa opi gagadletapo ma alotle wa: gadlepe,' diyo."

Epapedeme Yesu ma epo atlaiyo, "Yao, ta:lamo sotapo yiskamu yia: tlo malamama yimkadulo tle gadle halowe api hapulomaye sikemte malastana. Amasiyama God ya: opaye epapele koko halowe pase malamasemde. <sup>9</sup> Epapedeme na: wua: dla mikadepe koko atlema. Ta:lamo hema ha:ha:mama wua: mani mate wua: alisisi mate yimkadulo gagademha:ha:mama namkale demha:ha:iya. Wua:ta epamha:ha:lepiye, asiyama alisisi eta pa:lali Godta wua:ye Pepele di dla kokó hallalo aya dla elemhetlepe.

<sup>10</sup> Epedeme wa: yimka:mala kokoye woloma ka:pi omhallepiye, eta wa: ma pato kokoye woloma omhallowe ala:lepe. Epame oplami antapo yimka:mala koko dla omhallowe po-ala:lalo wekelepiye, ya: ma pato koko omhallowe po-ala:lowa.

<sup>11</sup> Epapedeme wa:tapo ta:lamo alisisiye woloma ka:pi po-omhallalo wekelepiye, wa: ma adipo Pepele dimo alisisiye woloma omhalepa:? <sup>12</sup> Epame wa: ma wa: amkadulo alisisiye woloma ka:pi po-omhallalo wekelepiye, wa: ma adipo mo-wa: alisisi ikadepeye omhalepa:?

<sup>13</sup> Epapedeme oplamitapo dokopala so dapiyamte yu dla salladepo sela:mama oko halowe po-ala:na. Adipalati, ya: dokopala oplami hale tlo solotamama haleye allipe. Epammama ya:tapo dokopala oplami hale yu dla salladepo sela:mama ma hale yu dla posalladlowa. Epapedeme wa: poka:dena, God dla salladepo sela:lalotapo matle mani dla salladepo sela:lowe."

<sup>14</sup> Epalati Pa:lisi sotapo Yesuta atlale yu i dalepame ya: yu ipi dla tepelemama eimelemyaiyo. Adipalati, Pa:lisi so iwoloye mani sikemte solotamale sopo. <sup>15</sup> Amasiyama Yesuta yia: watle epo atlaiyo, "Wua:ye isikimi opata ka:ka:dle so dlepo depame wua:tapo wuskamu pepemdepo. Epapele dulu dla Godtapo wua: dupa duluye natimdepo. Epapedeme opata wua: koko natipame ka:ka:dena demdiye, asiyama Godta wua: koko eye batalimana demhalapo.

<sup>16</sup> Godta aiyalma koko hatitimale mate epo God tle yu hapame molo atlamalalo sota yu hatitimale mateta opaye elempuame Yonta haluwa oloma dla puame guduwapo. Epalati ma Yon ko tle ka:dle yu God ya: mo kokoye opa dla atlampuwapo. Epalati opatapo God ya: mo koko edla tuluwedeme sikemte itiyamapo. <sup>17</sup> Epapedeme ta:lamo mate epo pepele di mate pa:lepe. Amasiyama Godta aiyalma hatitimale dulu dla hi ilalimale yemala haleta alikili dla pohaodlowa.

<sup>18</sup> Epapedeme oplami antapo ya:llu memelepame ma a:ya hale halepiye, ya: a:ya eye uhapo. Epame oplami antapo a:ya ya:wolalita memelleye ma ya:ta halepiye, ya: ma a:ya eye uhapo."

*Alisisi pasatale oplami mate Lasales mate*

<sup>19</sup> “Alila hale alisisi pasatale oplami halaiyo. Ya:tapo alila hapuloma tluka ka:ka:dle siyapo tlo didiyemhalemama daya ma isikimi ka:ka:dle siyapo tlo demhalemndiyo. <sup>20-21</sup> Oloma edla alisisi pa:le oplami hale halaiyo, ya: hiye Lasales. Ya: moto hapulomaye hiliyamama hekakata sikemte yulupo halaiyo. Epapeleye ya:tapo alila hapuloma alisisi pasatale oplami aya kokoloma tala dla elemama ya:ta daya ka:dle dele hulluta teteyulati dlowe solotamndiyo. Epalati esematapopuame ya: hekakaye sosopo demyemndiyo.

<sup>22</sup> Amasiyama alila opi alotle alisisi pa:le oplami Lasalesye mo-powaiyo. Epalati God ya: banakaka sota ya:ye hamame tame A:iblahamta hala mateka:pi dla pameliyo. Epalati alotle alisisi pasatale oplami ma mo-powaiyo. Epalati opatapo ya: motoye wabasi dulu dla hamatiyo. <sup>23</sup> Ya: popo tame palli sota ha:ha:lalo mo dla halemama wotiyalle dulu dla halaiyo. Ya: edla halemama toko di dla natitepo A:iblahamtapo Lasales seme pateka:mu dla halla natiyo. <sup>24</sup> Epalati ya:tapo sisilamama epo atlaiyo, ‘A A:iblaham, wa: na: polowamane. Epammama Lasalesye na: watle tane dene, ya:tapo puame ya: domoko mate yú dla saodepame na: te dla ummama pomale hamilipo depame. Adipalati, na:ye dlapa dulu hema wotiyalle mate halema,’ diyo.

<sup>25</sup> Amasiyama A:iblahamta asiyama epo atlaiyo, ‘Na: maseyemala, wa: malamane, wa:tapo pasakalo haluwa oloma edla wa:tapo isikimi ka:ka:dle alisisi siyapo tlo halomhaluwapo. Amasiyama Lasalestapo alisisi dimi isikimi atali oplami haluwapo. Epapedeme watapo Lasalestapo hema siyele mate hallati asiyama wa:tapo wotiyalle dulu dla halapo. <sup>26</sup> Epame koko haleye, wua: ka: epo di ka: dukaye ga:tulliye pta pato, opata seme dla ulluweye po-ala:na. Epedeme dia: tiyama tle opata wua:ta ha:ha: dla ulluweye api hawa ikadepe. Epame wua:ta ha:ha: etle opata dita ha:ha: hema ulluwe mape api hawa ikadepe,’ diyo.

<sup>27</sup> Amasiyama alisisi pasatale oplamita epo atlaiyo, ‘A A:iblaham, na: solotama, wa:tapo Lasalesye na: a aya dla ma ilame tane dlepo depame. <sup>28</sup> Adipalati, na: a aya dla na: eidulo 5 me-ha:ha:ma. Epedeme ka:dena, Lasalesta ma ilame tame yia:ye molo atloweye, yia:tapo palipame ma wotiyalle mo hema pulala depame,’ diyo.

<sup>29</sup> Epalati asiyama A:iblahamta epo atlaiyo, ‘Yia: dla Mosesta aiyalma hatitimale mate epo God yu molo atlamalalo sota God yu hatitimale mate me-hutiyeipo. Epedeme ka:dena, yia:tapo molo atlale yu e dalepame malamale ka:dloweye,’ diyo.

<sup>30</sup> Amasiyama alisisi pasatale oplamitapo epo atlaiyo, ‘Hao, pe-epapolowa. Powale oplami haletapo ma ilame tame yia:ye atlepiye, eta yia:tapo yia: bobtalimale tle mala-male meyelope depame God hala dla heheletimelepe,’ diyo.

<sup>31</sup> Amasiyama A:iblahamta ma epo atlaiyo, ‘Yia:tapo Mosesta aiyalma hatitimale mate epo God yu molo atlamalalo sota God yu hatitimale mate dla dalepame pomikadepe dlalo wekelepiye, yia: adipammama mo-powale oplamita puame atlati mikadepe depa:?’ diyo.”

## 17

### *Batalimale dla seme tulluwe koko (Ma:t 18:6-7, 21-22; Maka 9:42)*

<sup>1</sup> Alila haleta Yesutapo ya: alotle tlalo so watle epo atlaiyo, “Opata kustamtame batalimale dla tulluwe kokoye me-pumhallepe. Amasiyama oplami antapo koko eye kotiyamsela:ma:, ya: wolomape! <sup>2</sup> Epapedeme ka:dena, epapele oplamiye ewala patota tumuku dla himomeleme ewatalo dla hamastloweye. Adipalati, poka:dena, ya:tapo maseyemala yimka:malaye batalimale koko dla semtloweye. <sup>3</sup> Epapedeme wua: wuskamu woloma omha:ha:iya.

Epedeme wa: amkale mikadepe dle oplamitapo batalimale koko hala natilipiye, ya: atlane. Epame ya:tapo ya: batalimale koko dla dupa kolle mate ma ilame pulupiye, ya: batalimale kokoye weline. <sup>4</sup> Epame ya:tapo alila hatlo dulu dla wa: watle batalimale



koko pasatale hapame matle puame namkale dle yu atla demsela: ma pasatlepiye, wa: ka:dena, ya: batalimale kokoye weli demhalloweye.”

*Mikadepe dle koko*

<sup>5</sup> Taiya dle sotapo Lod watle epo atlaiyo, “Dita mikadepe dle kokoye ta:po melene,” diyo.

<sup>6</sup> Epalati asiyama Lodta epo atlaiyo, “Wua:ta mikadepe dleta dlomoko ale yimka:mala epapele some wua: dla me-hutiyelepiye, eta wua: ala:na, dakiyako dlomoko dali hema atlemama ‘wa: wa: kese mate dodokalepo tame ma kaula dla halane,’ dlepiye, mepa-pelepe,” diyo.

*Dokopala oplami ya: oko oplami koko*

<sup>7</sup> “Oko oplamitapo ya: dokopala oplami osalo dla ta:la muwalemhalale tle o sipi aliya halo omhalale tle pulupiye, ya: isikimi puame daya tlo podlowa, hao. <sup>8</sup> Ya: ka:yapa ya: dokopala oplami daya tatle ha:pame ya: watle hamilipe. Epame ya: dokopala oplamita daya ma-depo gudlati ma ya:tapo alotle daya mate yú mate delepe. <sup>9</sup> Amasiyama ya: epo oko hamsela: dla ya: dokopala oplamitapo asiyama ya: watle namkale dle yu potlowa. Adipalati, eye ya: okopo. <sup>10</sup> Epapedeme wua: ma epapolowe ka:pi. Wua: apa kokoye na:ta wua: watle haiya dlepiye, wua:tapo koko e halopame ma epo atlowe tlo ka:pi, ‘dia:ye isikimi oko so. Epapedeme di dita oko hamsiyama iye koko hale halowa depo po-aposema’ dlepe,” diyo.

*Yesuta kapala bobtalimale so 10 ka:ka:dle*

<sup>11</sup> Yesu ala Yelusalem dla tamama Ga:lili ka: epo Samaliya ka: duka dla taiyo. <sup>12</sup> Ya: ala api duka dla mo yemala hale dla tamhalemama kapala bobtalimale so 10 natiyo. Kapala bobtalimale sotapo Yesu natipo ya: mateka:pi dla popumulaiyo. Amasiyama isikimi pateka:mu tle ha:ha:mama yu teta:le mate Yesu watle epo atlaiyo, <sup>13</sup> “Yesu, dokopala oplami, wa:ta di polowamama di gadene,” diyo.

<sup>14</sup> Epalati ya:ta yia: natipame epo atlaiyo, “Wua: tame God ka: epo opa ka: duka dla ha:ha:lalo so watle wuskamu wua:ye nati-iye,” diyo. Yia: Yesuta epo atla dalepame tamalale oloma edla yia: kapalatapo ma-ka:ka:diyo.

<sup>15</sup> Epalati yia: dulu dla oplami haleta ya: kapalaye ma-ka:dla natipame Yesu hala dla ilame pumama yu teta:le mate God dla siyele ta:dempuaiyo. <sup>16</sup> Epo puame Yesu hete sitali dla heodepo polomama Yesu watle siyele hamiyo. Oplami iye Samaliya oplamiyo.

<sup>17</sup> Epalati Yesutapo epo atlaiyo, “Na: 10 opaye ka:ka:dlepo. Amasiyama opa opi ewolo da:? <sup>18</sup> Ame adipalati, po-Yu oplami itapo meyelo God dla siyele hamilowedeme ma ilame puo?” diyo. <sup>19</sup> Epame Yesuta oplami i watle epo atlaiyo, “Wa:ta na: watle mikadepe dletapo wa:ye ma-ka:dlepo. Epedeme wa: sila:time ma-tane,” diyo.

*God ya: mo kokota puluwe koko*

*(Ma:t 24:23-28, 37-41)*

<sup>20</sup> Alila hale dla Pa:lisi sota Yesu watle epo atlaiyo, “God ya: mo kokoye adipalalo pupa:?” diyo.

Epalati asiyama Yesutapo yia: watle epo atlaiyo, “God ya: mo kokoye haliyamale dla pula opata ponatilowa. <sup>21</sup> Epame opatapo God ya: mo kokoye hema halema o huma halema pe-epapolowa. Adipalati, God ya: mo kokoye wua: dulu dla halapo,” diyo.

<sup>22</sup> Epame ma ya: alotle tlalo so dla epo atlaiyo, “Alilata pulupe, wua:tapo Opa Yami ya: alilata pulati natilowe solotamoloweye. Amasiyama wua: ponatilowa. <sup>23</sup> Epame ma opata wua: watle atlemama ‘Opa Yami huma halema’ o ‘hema halema’ dlati yia: yu dla mikadepe depame edla tame natimiyo. <sup>24</sup> Amasiyama Opa Yamita puluwe oloma edla opa hapulomatapo poyeitapo ha:ha:lowa. Adipalati, omaplatapo hela:hela:demama ta:lamo pato hela:demdiye, epapele some wua:tapo Opa Yamita

pulati natilipe. <sup>25</sup> Epapele tlope Opa Yamitapo ka:yapa ya: tatile wotiyalle dulu dla ulatulupe. Epalati wata oloma hema ha:ha: sotapo ya:ye elle pato himilipe.

<sup>26</sup> Nowata haluwa oloma edla koko wowoyamuwaye, epammama ma Opa Yamita puluwe oloma dla mepo wowoyamelepe. <sup>27</sup> Adipalati, Nowata halale oloma edla opatapo daya mate epo yú mate dlomha:ha:mama opa mate wola: mate halomha:ha:mdiyoy. Epamha:ha:le oloma edla alila haleta Nowatapo koa dulu dla tulati yúta puame opa hapulomaye poyuiyo.

<sup>28</sup> Epame ma epapele kokota Lotta halale oloma edla woyamuwapo. Adipalati, Lotta halale oloma edla opatapo daya mate yú mate dlomha:ha:mdiyoy. Epame alisisiye yimkadulo watle asiyama hami asiyama hami demha:ha:mdiyoy. Epame dlowe alisisi ma ema epo aya ma haloma demha:ha:mdiyoy. <sup>29</sup> Epamha:ha:lali alila haleta Lottapo Sodom mo saliyome tlali pepele di tle dlapa mate epo ewala teleka:le mateta malame Sodom moye hamdeiyoy.

<sup>30</sup> Epedeme Opa Yamita puluwe oloma edla opa hapulomatapo ipapele koko dulu medla ha:ha:myelati pulupe. <sup>31</sup> Epame oloma edla aya potopali dla pollalo oplamitapo poka:dena, ma aya dulu dla tuwame ya: alisisi halomoloweye. Epame poka:dena, oplami osalo dulu dla sela:lalota ma ilame aya dla puluweye. <sup>32</sup> Ame adipalati, wua: Lot ya:llu kokoye malamaiya. <sup>33</sup> Epedeme oplami antapo ya: pasakaloye meyelo gadlowedeme apelepiye, ya: pasakaloye haodlepe. Amasiyama oplami antapo na: koko dla ya: pasakaloye haodlepiye, ya: halepo halepo pasakalo halepe. <sup>34</sup> Epapedeme na: ikadepe koko wua: watle atlema. Alila oloma edla opa dapiyamtetapo aya hatlo dla hutiyelepe. Epalati hale tlo hamame hetamama hale tlo medla pomellepe. <sup>35</sup> Epame oloma edla wola: dapiyamtetapo daya yulumha:ha:lepe. Epalati a:ya hale tlo hamame hetamama hale tlo medla pomellepe. [ <sup>36</sup> Epame alila oloma edla opa dapiyamtetapo osalo dulu dla oko hamsiyamelepe. Epalati oplami hale tlo hamame hetamama hale tlo medla pomellepe.”]

<sup>37</sup> Yesuta yu ipo atlepo gudlati ya: alotle tlalo sota ya: watle epo atlaiyo, “Lod, koko iye hadima wowoyapa:?” diyo. Epalati Lodta asiyama yia: watle epo atlaiyo, “Mo hadima hutale ellepiye, kepilitapo hutale e dlowedeme tame edla topulumdepo,” diyo.

## 18

### *Dupulapi mate koko gladlalo oplami mate*

<sup>1</sup> Yesu matle ya: alotle tlalo so watle wayu i mate imaiyo, yia:tapo alila hapuloma hutulli mate inoma sumha:ha:mama posusukallalo wekelepo depame. <sup>2</sup> Epammama ya:ta epo atlaiyo, “Mo hale dla koko gladlalo oplami halaiyo. Epapeleye ya:ta Godye powota:lalo halemama opa ma pomalamalalo halaiyo. <sup>3</sup> Epame mo hatlo medla dupulapi hale ma me-halaiyo. Epeleye a:ya itapo alila hapuloma koko gladlalo oplami hema puame otomama epo atlemdiyo, ‘Wa: na: gademama na: dla opahale demhala oplami ya: kokoye gladene,’ demdiyo.

<sup>4</sup> Amasiyama koko gladlalo oplamita ka:yapa a:ya i gadloweye posolotamdiyo. Epapele tlope a:ya itapo alila hapuloma ya: dla pumhallati natipame epo malamaiyo, ‘Na: Godye powota:semde epame opa mape pomalamasemde. <sup>5</sup> Amasiyama na: a:ya i ya: yu dalemhala pta sukalema. Epapedeme ya:tapo mamsika: na: aya dla populalo wekelepo depame ya: gadlowepo,’ diyo.”

<sup>6</sup> Epapedeme Lodta epo atlaiyo, “Koko batalipo gladlalo oplami koko i natipame woloma malamale haiya. Adipalati, koko gladlalo oplami ita ka:yapa a:ya i gadloweye alimhalepame ma alotle ya: gaduwapo. <sup>7</sup> Epapedeme poka:deta:, Godta ya:ta sesalemale sota ya: dla utula:la mate alila mate otele himha:ha:la natipame pogadlalo wekemdi? Epame ya:ye yia:ta inoma sumale yu dalepame asiyama hamiloweye dekelemdi?

<sup>8</sup> Amasiyama na:ta wua: dla mikadepe kokoye atlema. Godtapo ya: opata ya: dla otele

himila natipame ya: hapele solotamale mate yia: gademdepo. Amasiyama Opa Yamita ma ilame puale oloma edla ya: ta:lamo hema mikadepe dle kokota ella natipa:?”

*Pa:lisi oplami mate ta:kis mani halomalalo oplami mate*

<sup>9</sup> Opa opitapo yiskamu yia: tlo ka:ka:dena depame asiyama opa opi tlo bobtalimana dlalo so dla Yesutapo wayu iye atlaiyo. <sup>10</sup> “Opa dapiyamte Pa:lisi oplami mate epo ta:kis mani halomalalo oplami mate Yu so aiyalma aya dla inoma sumala hetaiyo. <sup>11</sup> Pa:lisi oplamitapo sila:time halemama ipo inoma sumaiyo, ‘God, na: wa: dla siyele yu atlema. Adipalati, na:ye opa opi pe-epapena. Ame adipalati, yia:tapo upo alisisi halomdepo, epame poka:ka:dle koko halomdepo, epame upo opa mate upo wola: mate uhalomdepo. Epame na: ma wa: dla siyele yu atlema. Adipalati, na: ta:kis mani halomalalo oplami hala pe-epapena. <sup>12</sup> Adipalati, na: Sande hatlo dla alila dapiyamte dulu dla inoma sumhalemama dayaye aiyalma depo halemde. Epame na:ta alisisi halomde oloma dla na: 10 alisisi dulu dla hatlo tlo wa: wadle hamimde,’ diyo.

<sup>13</sup> Amasiyama ta:kis mani halomalalo oplamitapo alo ikadepe tle sila:time ya:skamu ya: yilo dupa kolle mate heodepo halemama epo inoma sumaiyo, ‘God, na:ye batalimale oplami ikadepe. Epedeme wa: na: gadene,’ diyo.

<sup>14</sup> Epedeme na: wua: dla ikadepe kokoye atlema. Ta:kis mani halomalalo oplami itapo ya: aya dla ilame tamama God mila:pi tle ka:dle oplami depo tauwapo. Amasiyama Pa:lisi oplami dla ipapeleta pe-elana. Epapedeme yiskamu di dla halopo hetlalo soye asiyama Godta yia:ye isili dla halopo tutula:lepe. Amasiyama yiskamu isili dla halopo tutula:lalo soye asiyama Godta yia:ye di dla halopo hetlepe.”

*Yesu mate yimlala yimka:sikili mate*

*(Mat 19:13-15; Maka 10:13-16)*

<sup>15</sup> Opa opitapo yia: yimlalaye Yesu hala dla elempumulaiyo, Yesutapo yia:ye ya: do mate u-umamelepo depame. Epalati ya: alotle tlalo sota koko e natipame yia:ye humatlaiyo. <sup>16</sup> Amasiyama Yesuta yimlalaye sisilapame ya: alotle tlalo so watle epo atlaiyo, “Yimlalaye na: hala dla pumula diya, yia: humatlemiya. Adipalati, ipapele sotapo God ya: mo koko dla u-ulapo tulupe. <sup>17</sup> Epapedeme na: wua: watle mikadepe kokoye atlema. Oplami antapo yimlala yimka:sikili ipapele so some God ya: mo kokoye pohalalo wekelepiye, ya: mo edla po-ulatuluwa.”

*Alisisi pasatale oplami*

*(Mat 19:16-30; Maka 10:17-31)*

<sup>18</sup> Dokopala oplami haleta Yesu watle puame epo atlaiyo, “Ka:depo imalalo oplami, na: apa koko hapo, halepo halepo pasakalo hapa:?” diyo.

<sup>19</sup> Epalati Yesu asiyama ya: watle epo atlaiyo, “Wa: adipalati na:ye ka:dle oplami dema:? Oplami haletapo ka:dle oplami pohalasema. Amasiyama hatlo God tlo ka:dle halapo. <sup>20</sup> Epedeme wa: di aiyalma kokoye mo-wa:malamana. Upo a:ya uhala aiyalma, epame ya:mkale yumula aiyalma, epame upo alisisi uhala aiyalma, epame wa: amkale hi mate mala-atla aiyalma, amasiyama wa: a mate wa: wai mate yia: yu dla heodepame salladepo sela:lepe.”

<sup>21</sup> Amasiyama oplamita Yesu watle epo atlaiyo, “Na:ta yimka:mala tle sila:tiwaye na: aiyalma koko hapuloma eye mo-dolumpuwapo,” diyo.

<sup>22</sup> Epalati Yesuta ya: yu dalepame asiyama epo atlaiyo, “Wa: dla ala koko hatlo tlo hotepo halapo. Epedeme wa: tame wa: alisisi hapulomaye opa opi watle hapipame asiyama mani tlo hapo puame atali so dla hapine. Epalati Pepele dimo dla alisisi pasataletapo wa: hi mate ellepe. Epame wa: ma na: dolumpuane,” diyo.

<sup>23</sup> Oplamitapo Yesu yu i dalepame sikemte dupa koliyo. Adipalati, ya:ye alisisi sikemte pasatepo halaiyo. <sup>24</sup> Oplamita ma ilame tla omhalemama Yesuta ya: alotle tlalo so watle epo atlaiyo, “Alisisi pasatale oplamitapo God ya: mo koko dla ulatuluweye

pta kokalena. <sup>25</sup> Epedeme ka:mol aliyatapo tluka dedlemalalo tuwale opokoko tle ulatuluweye ka:deta:? Hao, po-ulatuluwa. Epedeme e ma epapena, alisisi pasatale sota God ya: mo koko dla ulatuluweye pta kokalena,” diyo.

<sup>26</sup> Amasiyama ya: alotle tlalo sota imale i dalepame epo atlaiyo, “Ame epo kokalloye anta ulatupa:?” diyo.

<sup>27</sup> Epalati Yesuta yia: watle epo atlaiyo, “Oplamita meyelo ya: pasakalo gadloweye po-ala:na. Amasiyama God tlo ala:na. Adipalati, ya:ta koko hapuloma haloweye pokokalena,” diyo.

<sup>28</sup> Epalati Pitata Yesu watle epo atlaiyo, “Di wa: dolumpumama di alisisi hapulomaye salepo pumulalepo,” diyo.

<sup>29-30</sup> Yesu asiyama yia: watle epo atlaiyo, “Na: ikadepe kokoye wua: watle atlema. Oplami antapo God ya: mo koko yilo ya: aya mate epo ya:llu mate epo ya: bapadulo mate epo ya: eidulo mate epo ya: a mate ya: wai mate epo ya: yimlala mate salepame pulupiye, ya:tapo wata oloma hema asiyama pato halepe. Epame ma alotle ya:tapo halepo halepo pasakaloye halepe,” diyo.

*Yesu matle ya:ta polowe koko atlale*

*(Mat 20:17-19; Maka 10:32-34)*

<sup>31</sup> Epalati Yesu matle ya: alotle tlalo so 12 tlo hohopo alikili dla elemtame halemama yia: watle epo atlaiyo, “Di wata Yelusalem dla me-hetapo. Epapedeme God tle yu hapame molo atlamalalo sota ka:yapa Opa Yami koko dla hatitimale koko hapulomatapo edla wowoyamelepe. <sup>32</sup> Epalati ya:ye po-Yu so dla homellepe. Epalati yia:tapo ya: dla tetlemyemama putlopo atlamyelepe. Epame ya: dla mitikape tilitimyemama tuwale dea mate hopolepame yumilipe. <sup>33</sup> Amasiyama ya:ye wabasi dulu dla powame elepame ma dapahatlope alila dla ma pasakalo depame sila:tilipe,” diyo.

<sup>34</sup> Amasiyama Yesu ya: alotle tlalo sota yu e dalepame ya: dulu kokoye woloma pohana.

*Yesuta inoma pa:le oplami ka:dle*

*(Mat 20:29-34; Maka 10:46-52)*

<sup>35</sup> Yesuta Yeliko mo mateka:pi dla pumhallati inoma pa:le oplamitapo Yesuta pua api duka dla polomama opa watle mani otompolaiyo. <sup>36</sup> Epammama ya:tapo opa alumale patota yuhampula dalepame opa opi watle, “apa kokota woyama:,” depame dalla natiyo. <sup>37</sup> Epalati opata ya: watle atlemama epo atlaiyo, “Yesu Nasalet oplamitapo opa mate tamama amma,” diyo.

<sup>38</sup> Ya: epela dalepame yu teta:le mate epo sisilamaiyo, “Yesu Deibidi Yami, wa: na: polowamama na: gadene,” dempolaiyo.

<sup>39</sup> Amasiyama itapu tlalo sotapo ya: watle yu itiyamale mate epo atlaiyo, “Wa: yu dimi polane,” diyo. Amasiyama opata ya: watle epo atlamyelati ya:tapo yia: yu podallalo ma sikemte yu teta:le mate epo atlempolaiyo, “Deibidi Yami, wa: na: polowamama na: gadene,” dempolaiyo.

<sup>40</sup> Epalati Yesu ya: yu dalepame medla hedepo halemama opa opi watle epo atlaiyo, “Oplami eye hema sempuaiya,” diyo. Epapeleye inoma pa:le oplamiye Yesu hala dla mo-sume puame ha:ha:lali Yesuta ya: watle epo atlaiyo, <sup>41</sup> “Wa: na:ta wa: watle apa koko halepo depo solotama:?” diyo.

Epalati inoma pa:le oplamita asiyama epo atlaiyo, “Lod, na: inoma ka:dene. Na: ma natilowe solotama,” diyo.

<sup>42</sup> Epalati Yesuta ya: watle epo atlaiyo, “Epedeme wa: wata wa: inoma mo-towanatine. Adipalati, wa:ta mikadepe dleta wa:ye ma-ka:dlepo,” diyo. <sup>43</sup> Epalati pakasiyamalalo ya: inomatapo ma-ka:ka:diyo. Epalati ya:tapo Yesu alotle tamama God dla siyele ta:demtaiyo. Epame koko i natili so hapuloma ma God dla siyele ta:demtamalaiyo.

## 19

### *Ta:kis mani halomalalo oplami Sa:kiyes koko*

<sup>1</sup> Yesu Yeliko dla puame woyapame ma mo duka tle tamhalaiyo. <sup>2</sup> Mo edla ta:kis mani halomalalo dokopala oplami hale halaiyo, ya: hiye Sa:kiyes. Epame ya:ye alisisi pta pasatale halaiyo. <sup>3</sup> Yesuta api duka tle tamhallati opatapo ya: natimyemama sikemte kustimtame elaiyo. Epalati Sa:kiyes ya: ma Yesu natilowe solotamaiyo, amasiyama ya:ye sikemte elo kiyedeme ya:ta Yesu natilowe apiye opata kukomaiyo. <sup>4</sup> Epapalati Sa:kiyes ya: Yesu natilowedeme ya: tatile api olomasepele dla kukulumtame dali di dla hetame polaiyo.

<sup>5</sup> Yesuta puame Sa:kiyesta dali di dla pollati natipame ya: watle epo atlaiyo, “Wa: hapele malane. Na: solotama, wa: mate wa: aya dla tlowedeme,” diyo. <sup>6</sup> Epalati ya:tapo malame sikemte siyele mate Yesuye ya: aya dla semtaiyo.

<sup>7</sup> Epalati opata koko i natipame sikemte allimama epo atlamyaiyo, “Yesuye batalimale oplami aya dla tapa?” demyaiyo.

<sup>8</sup> Epalati yia: tame Sa:kiyes aya dla popa:mama Sa:kiyesta sila:time epo atlaiyo, “Lod, na: wata ipapele koko halowama. Na: na: alisisi semeye atali so watle halopilowama. Epame na: opa mani na:ta isikimi elemale tle halomuwaye, ma ilame yia: watle pato halopilowama,” diyo.

<sup>9</sup> Epalati Yesuta Sa:kiyes yu dalepame epo atlaiyo, “Watapo aya dulu hema ha:ha:lalo so dla pasakalo halowe kokoye ma-hampualepo. Adipalati, oplami Sa:kiyes i mape A:iblaham ya: mama halepo. <sup>10</sup> Ame adipalati, Opa Yamita puwaye opa alikili dla haohaodle soye totapo hohopame yia: pasakalo gadlowedeme puwapo,” diyo.

### *Dokopala oplamita ya: oko so watle mani hapili*

*(Ma:t 25:14-30)*

<sup>11</sup> Opata Yesu yu i dalempopa:mama epo momalampopaiyo, “Yesu wata Yelusalem mateka:pi dla puame polapo. Epedeme God ya: mo kokota woyamolowe ma momateka:pi mle,” demyaiyo. Epela natipame Yesuta wayu iye atlaiyo, <sup>12-13</sup> “Pato oplami haleye mo pateka:mu dla tame halepo dokopala hi hapo ma ilame puluwedeme halemama ya: oko so 10 sisilapame yia: watle mani oplami dokopala walleye hatlope hatlope depo halopimtaiyo. Epame ya:tapo yia: watle epo atlaiyo, ‘Wua: na:ta ma-ilame puluwe dla omtamama mani ita ta:lepo depame alisisi aya tilimolowe kokotiyamaiye,’ diyo.

<sup>14</sup> Amasiyama ya: epo ma-tlati ya: mo sotapo ya:ta dokopala hi halowe dla allimama ya: ko tle opa opi taiya diyo, yia:tapo yia:ta alli kokoye tame botomastlepo depame.

<sup>15</sup> Amasiyama epapele tlope oplami etapo dokopala hi hapame ma ilame puaiyo. Ya: puame ya:ta mani halopili soye sisilamaiyo, mani ma adisowa hutiyema: depo natilowedeme.

<sup>16</sup> Epalati itapu hallalo oplamita puame epo atlaiyo, ‘Wa:ta na: watle mani oplami dokopala walle hamiwa e mate alisisi aya tipo halemama ma mepapele 10 halomuwa,’ diyo.

<sup>17</sup> Epalati dokopala oplamitapo ya: dla siyele yu atlemama epo atlaiyo, ‘Wa: ka:pi apuwapo. Epedeme wa:tapo yimka:mala koko hema woloma ka:pi natili tle wa: ma mo 10ye wa:ta dokopala depo halemama omhallepe,’ diyo.

<sup>18</sup> Epalati ma medla hallalo oko oplamita puame epo atlaiyo, ‘Na: mape wa:ta mani oplami dokopala walle hamiwa e mate alisisi aya tipo halemama ma mepapele 5 halomuwa,’ diyo.

<sup>19</sup> Epalati asiyama dokopala oplamitapo ya: watle ‘Mo 5ye wa:ta dokopala depo halemama omhallepe,’ diyo.

<sup>20</sup> Epalati ma mosukulu dla hallalo oko oplamita puame epo atlaiyo, ‘Dokopala oplami, wa: mani ipo. Na: wa:ta hamilati hamtame tluka mate polupo hemele himiwa.

<sup>21</sup> Adipalati, wa:ye pta itiyamale oplami, epedeme na: wa: pta wota:uwa. Epame



na:malamana, wa:ye wa:ta itiyamale tle opa opita hatitimale alisisiye halomdepo. Epame opa opita emale alisisiye hauwalemdepo,' diyo.

<sup>22</sup> Epalati ya: dokopala oplamita ya: watle epo atlaiyo, 'Wa: batalipo omhallalo oko oplamipo. Epedeme mowolo yu ipo atlamale koko tle na:tapo wa: kokoye gladlowepo. Ame adipalati, wa:ta atlemama na:ye sikemte itiyamale oplami dlepo. Epame wa:tapo na: watle atlemama na:ta itiyamale tle opata hatitimale alisisiye isikimi halomde dlepo. Epame opa opita emale alisisiye isikimi me-hauwalemde dlepo. <sup>23</sup> Epapele dulu dla wa: adipalati na: maniye ta:lepo depame mani omha:ha:lalo aya dla pohimilalo wekuwa, na:ta ma ilame puame mani eye halepo depame?' diyo.

<sup>24</sup> Ya: epo halemama ya: opa watle epo atlaiyo, 'Wua: ya: dla mani oplami dokopala walle elaye holapame ma mani oplami dokopala walle 10 halomale oplami watle hamiya,' diyo.

<sup>25</sup> Epalati yia:tapo ya: watle epo atlaiyo, 'Dokopala oplami, wa: natine, ya: mani oplami dokopala walle 10 mo-halopo halapo,' diyo.

<sup>26</sup> Amasiyama dokopala oplamitapo yia: watle epo atlaiyo, 'Na: ikadepe koko wua: watle atlema. Opa anawolotapo yia: dla hapili alisisiye woloma omha:ha:lepiye, yia: dla ma pasataleye halopilipe. Amasiyama opa anawolota yia: dla hapili alisisiye woloma po-omha:ha:lalo wekelepiye, yia: dla alisisi yimka:sikili hutiyeye alikili dla halopo woyamelepe. <sup>27</sup> Epedeme opa anawolota na:ta dokopala oplami hi halowedeme apalati na: dla alliwa, yia:ye haliyamale hema eleme puame potimaiya,' diyo."

### *Yesuta Yelusalem dla tale*

*(Mat 21:1-11; Maka 11:1-11; Yon 12:12-19)*

<sup>28</sup> Yesu yu iye atlemhalepo gudepame ma Yelusalem dla mu himtaiyo. <sup>29</sup> Ya: tame Olipi tamali kikiwi isili dla mo dapiyamte Betapage mate epo Betani mate matekapi dla tame woyamaiyo. Epame ya: alotle tlalo so dapiyamte watle taiya demama epo atlaiyo, <sup>30</sup> "Wua: mo yemala itapu pola huma taiya. Wua: mo edla tame donki aliya amkota:le kikitama himomeleme halla natilipe. Ya:ye opata di dla ala popopa:lalo wekelalo. Epeleye wua:ta kikitama towastepo hema sempuaiye. <sup>31</sup> Epapele dulu dla oplami haletapo puame wua: watle atlemama, 'Wua: adipalati donki aliya kikitama towastama:?' dlatiye, wua: asiyama ya: watle atlemama, 'Lodta aliya i solotamuwo,' dlepe."

<sup>32</sup> Epalati ya: alotle tlalo sota Yesuta atlamale yu dalepame mo edla ma-tamalaiyo. Yia: tame natilati koko hapulomaye Yesuta atlamale yu mate ma-ala:po hutiyeyo. <sup>33</sup> Epalati yia: donki aliya kikitama towastamha:ha:lati aliya yota yia: watle epo atlaiyo, "Wua: adipalati aliya kikitama towastamha:ha:ma:?" diyo.

<sup>34</sup> Epalati asiyama yia:ta epo atlaiyo, "Lodta aliya iye solotamuwo," diyo.

<sup>35</sup> Epammama yia: donki aliya iye Yesu hala dla sempuaiyo. Epame yia: kapumale tluka uptipo donki aliya dimsisi di dla hatitipame Yesuye hamame di dla pameliyo. <sup>36</sup> Ya: aliya di tle tamhallati opatapo yia: kapumale tlukaye uptipame ya:ta tlowe api dla yalemtaiyo.

<sup>37</sup> Epame Yesuta Olipi tamali di tle Yelusalem dla tulumhallati ya: dolumsiyamalalo so hapulomatapo ya:ta ulugiyemale koko halomsela:le koko dla God dla siyele pato ta:demtuluiyo. <sup>38</sup> Epammama yia:tapo yu teta:le mate epo atlamyaiyo, "God hi tle pua dokopala oplami dla sisiyeyia.

Epame Pepele di dla sadletapo ellepe.

Di ikadepe dla hallalo God dla sisiyeyia," demyaiyo.

<sup>39</sup> Amasiyama alumale pato dulu edla Pa:lisi so opa opi me-ha:ha:iyo. Yia:tapo Yesu watle epo atlaiyo, "Imalalo oplami, wa: wa: alotle tlalo sotapo yu keillipo depame yu itiyamale mate atlamane," diyo.

<sup>40</sup> Amasiyama Yesuta asiyama yia: watle epo atlaiyo, “Na: ikadepe koko wua: watle atlema. Opa iwolotapo yia:ta yu dimi telepiye, asiyama ewala hutiyemyatapo yu teta:lalimyelepe,” diyo.

*Yesuta Yelusalem mo natipame amale*

<sup>41</sup> Yesu Yelusalem mateka:pi dla tamhalemama Yelusalem mota itapu dla polla natipo ammama epo atlaiyo, <sup>42</sup> “Yelusalem so, wua: adipapeta?: Na: sikemte solotama, wata wua:tapo sadle hame puluwe koko tope sikemte malamelepo depame. Amasiyama wua: koko eye woloma pomalamasema. Adipalati, sadle koko eye wua: tle hemele haodepo elapo. <sup>43</sup> Epedeme alilatapo wua: dla pulupe, wua: dla opahale dlalo sota wua: moye polemama olostame guguwoudepo ha:ha:lepe. <sup>44</sup> Epame yia:tapo wua: aya dodokotipame opa hapulomaye poyulupe. Epame wua: mo dodokotimale dulu edla ewala haletapo ma woloma yimkadulo tama di dla popopa:lowa. Epapedeme ipapele kokotapo woyamelepe. Adipalati, Godtapo wua: gadlowedeme puwaye wua:ta e woloma pomalanatina.”

*Yesuta Yu so aiyalma aya dla hetale*

*(Mat 21:12-17; Maka 11:15-19; Yon 2:13-22)*

<sup>45</sup> Yesu Yelusalem mo dla tuwame Yu so aiyalma aya dla hetaiyo. Ya: aya dulu edla tuwame halemama natilati opatapo alisisiye asiyama mate halomyela natiyo. Epalati ya:tapo alisisi yia: adulo hapulomaye aya dulu etle alikili dla dodolomsalemama epo atlemsela:iyo, <sup>46</sup> “Wua: malamaiya, God yu bukata epo atlapo, ‘Na: aiyalma ayaye isikimi inoma sumalalo ayapo,’ depo. Amasiyama epapele tope wua:tapo God ya: aya iye ma mo-uhalalo aya dlepo,” diyo.

<sup>47</sup> Yesu Yelusalem mo dla tame halemama alila hapuloma Yu so aiyalma aya dla hetame opa watle God yu imhalemndiyo. Amasiyama aiyalma aya dokopala so mate epo aiyalma imalalo so mate epame Yu so dokopala so mate Yesu yumuluweye api totamaiyo. <sup>48</sup> Epapele tope yia: Yesu yumuluweye api ponatiyo. Adipalati, opatapo Yesuta imale kokoye sikemte kulume dalemymdiyo.

## 20

*Yesuta itiyamale dla atlanatili*

*(Mat 21:23-27; Maka 11:27-33)*

<sup>1</sup> Alila hale dla Yesu Yu so inoma sumalalo aya dla hetame opa watle God yu imhallati aiyalma aya dokopala so mate epo aiyalma imalalo so mate epame Yu so dokopala so mateta puame Yesu watle epo atlaiyo, <sup>2</sup> “Wa: apa itiyamale tle koko iye hamsela:ma? Anta wa: watle itiyamale iye hamiwa?” diyo.

<sup>3</sup> Epalati Yesuta asiyama yia: watle epo atlaiyo, “Na: mape wua: watle atlanatili yu hatlo atlowama. Epapedeme wua:ta na: atlaiya, <sup>4</sup> Anta Yon watle itiyamale hamiwa, opa yú dla ka:ka:timsela:lepo depame? Godta itiyamale hamiwa o oplamita itiyamale hamiwa?” diyo.

<sup>5</sup> Epalati yia:ta yu i dalepame yiskamu yia: dulu dla esemyemama epo atlamyaiyo, “Di adipo atlepa?: Di Yonta itiyamaleye God tle puwa dlepiye, ma asiyama Yesuta di watle epo atellepe, ‘Ame wua: adipalati Yon yu dla pomikadepe dlalo wekuwa?’ dlepe. <sup>6</sup> Epame di ma ya:ta itiyamaleye oplami tle puwa dlepiye, ma asiyama opata dia: dla siyalasiyalademama dia:ye ewalata kelemelepe. Adipalati, opa hapulomata Yonye God yu molo atlalo oplami ikadepe demdepo,” demyaiyo.

<sup>7</sup> Epammama yia:ta asiyama Yesu watle epo atlaiyo, “Di podimalamana, Yonta itiyamale halë sitaliye,” diyo.

<sup>8</sup> Epalati asiyama Yesuta yia: watle epo atlaiyo, “Na: ma asiyama wua: watle na:ta itiyamale hamsela: iye po-atlowa,” diyo.

*Batalipo omha:ha:lalo so kokoye wayu mate atlale  
(Ma:t 21:33-46; Maka 12:1-12)*

<sup>9</sup> Epame Yesu ma wayu hale i mate opa watle epo atlaiyo, “Alila haleta oplami hale ya: osalo dulu dla gla:pi dlomoko emaiyo. Ya: dlomoko empame opa opi watle omha:ha:iye depame ma mo hale pateka:mu dla halla taiyo. <sup>10</sup> Ya: edla tame hallati dlomokota milipame namolowe alilata mo-puaiyo. Epalati ya:tapo ya: oko oplami hale watle ya: osalo dla tame dlomokoye halopo puane diyo. Amasiyama ya: edla tame woyamalati osalo omha:ha:lalo sota ya:ye hopolopame alisisi dimi ma ilame tane diyo. <sup>11</sup> Epela natipame yotapo ma oplami haleye tane diyo. Amasiyama omha:ha:lalo sota oplami i mape hopolemama ya: watle wota:le hamipame alisisi dimi ma ilame tane diyo. <sup>12</sup> Epalati yota mamisika: ya: oko oplami haleye ma tane diyo. Amasiyama ya: mape omha:ha:lalo sotapo hopolepame alikili a:ma dodolomaiyo.

<sup>13</sup> Epela natipame yotapo ya:skamu epo malamaiyo, ‘Na: apa koko hapa:? Na: matle na: dupa ellalo maseyemala tlo tane dlowepo. Pona:malamana, epelepiye, yia:ta ya: dla heodepame ya: yu dla salladlowe sepena,’ diyo.

<sup>14</sup> Amasiyama osalo omha:ha:lalo sotapo osalo ya: a yamita pulati natipame yiskamu yia: dulu dla epo atlamyaiyo, ‘Maseyemala itapo osalo ya: a elo dla hallala. Epedeme ya:ye yumpame osalo iye dita halowa,’ demyaiyo. <sup>15</sup> Epammama yia: maseyemala eye osalo alikili dla hamame tame yumiyoye.”

Yesutapo yu iye atlepo gudepame halemama ya: yu dalempopa:lalo so watle epo atlaiyo, “Osalo yota ma osalo omha:ha:lalo so dla apa koko hapa:? <sup>16</sup> Ya: puame yia:ye potipame ma opa amko hohopo ya: osaloye omha:ha:iya dlepe,” diyo.

Epalati opa hapuloma Yesu yu dalempopa:letapo epo atlamyaiyo, “Koko ipapeleta woyamoloweye poka:dena,” demyaiyo.

<sup>17</sup> Amasiyama Yesuta yia: dla omhalemama epo atlaiyo, “Ame adipalati God yu bukata ipo atlema:?”

‘Aya halalo sota alumiti allimama

alumiti hamastaletapo ma aya duka dla molopa kestale some halapo.’

<sup>18</sup> Epedeme oplami antapo alumiti edla kustamtame teyulupiye, ya:ye susupulastepo hamastlepe. Epame alumiti etapo oplami haleye goludlepiye, oplami eye totola:timtame ellepe,” diyo.

<sup>19</sup> Epalati aiyalma imalalo so mate epo aiyalma aya dokopala so mateta, “Yesuye wayu i mate di kokoye atlemhalema,” depame ya:ye medla hamolowedeme api totamaiyo. Amasiyama yia: Yesu hamoloweye opa alumale pato natipame wowota:iyo.

*Sisa dla ta:kis mani hapilowe koko  
(Ma:t 22:15-22; Maka 12:13-17)*

<sup>20</sup> Epapele dulu dla aiyalma imalalo so mate epo aiyalma aya dokopala so mateta Yesu yumuluwe api totamama opa opi taiya demama epo atlaiyo, “Wua: tame Yesu mate namkale depo siyamama ya: watle atlanatili yu atlamsiyamaiye. Epapele dulu dla Yesuta asiyama yu batalimale adipapele atlepiye, dita ya:ye hampame gamani dokopala oplami dla homellowepo,” diyo. <sup>21</sup> Yia: epalati tame Yesu watle yu o-opalimama epo atlaiyo, “Imalalo oplami, dimalamana, wa:ta imale dulu dla wa: isikimi ka:dle koko siyapo tlo imdepo. Epame wa: opaye isikimi kapala di hema potlamasemde. Amasiyama wa: ikadepe God koko tlo imsela:mde. <sup>22</sup> Epedeme wa: di atlane, di ka:deta:, Loum dokopala oplami Sisa watle ta:kis mani halopiliweye?” diyo.

<sup>23</sup> Amasiyama Yesuye yia:ta yu o-opalli mate ya: hamolowedeme apele malanatipame yia: watle epo atlaiyo, <sup>24</sup> “Na: watle elo mani hale nati-iya,” diyo. Epame ya:ta mani hapo halemama epo atlaiyo, “Mani hema ana mila:pi mate epo ana hi mate hutiyema:?” diyo.

<sup>25</sup> Epalati asiyama yia:ta epo atlaiyo, “Sisa mila:pi mate epo ya: hi mateta hutiyema,” diyo. Epapalati Yesuta halemama yia: watle epo atlaiyo, “Wua: epapedeme Sisa teteye Sisa watle halopiya, epame God teteye God watle halopiya,” diyo.

<sup>26</sup> Epalati yia:ta Yesuta asiyama yu ka:depo hamilati dalepame sikemte yiyelemama yu opi po-atlamaiyo. Epammama yia:tapo Yesuta opa mila:pi tle batalipo atlati ya:ye hamoloweye api ponatiyo.

*Palli tle ma silliwe dla Yesu watle atlanatili*  
(*Ma:t 22:23-33; Maka 12:18-27*)

<sup>27</sup> Epame Sa:dusi so opa opita Yesu hala dla pumulaiyo. Opa iwolota atlemama, “palli sota ma posilliwa,” demdepo. Epeleye yia:tapo puame Yesu watle epo atlaiyo, <sup>28</sup> “Imalalo oplami, Mosesta di watle molo atlale yuye ipo ilipo hamiwa, ‘Oplamitapo a:ya hapo yimlala pohatitimalalo halepo polopiye, ma oplami e ya: eita sepeyama eye hapo ya: bapa elo dla ha:ha:lowe yimlala hatitimelepe’ duwapo. <sup>29</sup> Epapedeme oplami haletapo akimlala 7 hatitimaiyo. Epame yia:bapa tatle a:ya haiyo. Epo yimlala pohatitimalalo halemama powaiyo. <sup>30</sup> Epalati ma medla hallalota ya: bapa ya:llu sepeyama me-eye haiyo. Ya: mape yimlala pohatitimalalo powaiyo. <sup>31</sup> Epo ma medla hallalota sepeyama hatlo me-eye haiyo. Amasiyama ya: mape yimlala pohatitimalalo powaiyo. Epamtamama akimlala 7 hapuloma ewolotapo yimlala pohatitimalalo pataiyo. <sup>32</sup> Epo a:ya sepeyama eta mosukulu powaiyo. <sup>33</sup> Epedeme palli tle silliwe oloma edla a:ya eye ikadepe ana ya:llu depa:? Adipalati, yia:ta 7ta a:ya hatlo metlo halompuwapo,” diyo.

<sup>34</sup> Amasiyama Yesuta asiyama yia: watle epo atlaiyo, “Wata ha:ha: oloma hema opatapo wola: haloma epo wola:tapo opa haloma demha:ha:po. <sup>35</sup> Amasiyama Godta sesa:le sotapo palli tle sillipo ha:ha:lepiye, yia: matle opa mate epo wola: mate po-halomha:ha:lowa. <sup>36</sup> Adipalati, yia:ye God ya: banakaka so some ha:ha:mama matle popalliwa. Epame yia:ye God ya: akimlala depo ha:ha:lepe. Adipalati, Godtapo yia:ye palli tle me-elepo ta:ta:duwapo. <sup>37</sup> Epedeme Mosesta mo-powataliya ya: buka dla opata palli tle silliwe kokoye me-imuwapo. Adipalati, ya:tapo dali upaye dlapata hamdemhallati natili kokoye ilipo hamimama epo atluwapo, ‘Lodye A:iblaham mate epo Aisek mate epo Yokob mate yia: Godpo,’ duwapo. <sup>38</sup> Epapedeme God iye popalli so yia: God. Hao, pasakalo ha:ha:lalo so yia: Godpo. Adipalati, Godta natili dulu dla opa hapulomaye pasakalo ha:ha:po.”

<sup>39</sup> Epalati aiyalma imalalo so opitapo Yesuta yu atlamale dalepame ka:pi demyaiyo. <sup>40</sup> Epalati dulu edla ma oplami haleta Yesu watle atlanatili yu hale atloweye wowota:iyo.

*Kelisoye ana yamita:?*

(*Ma:t 22:41-46; Maka 12:35-37*)

<sup>41</sup> Epame Yesuta ma opa watle atlanatili yu i atlaiyo, “Adipalati opa opita Kelisoye Deibidi yami demdi? <sup>42</sup> Amasiyama Deibidi meyelo Sam buka dulu dla ipo atluwapo, ‘Godta na: Lod watle epo atluwapo,

Wa: na: dowala tiyama dla polane.

<sup>43</sup> Epalati na:tapo wa: watle opahale demha:ha: soye wa: hete sitali isili dla hatitimolowepo,’ duwapo.

<sup>44</sup> Epedeme Deibidita Kelisoye ya: Lod duwapo. Ame adipammama Kelisoye Deibidi yami depa:?” diyo.

*Yesuta aiyalma imalalo so koko atlale*

(*Ma:t 23:1-36; Maka 12:38-40*)

<sup>45</sup> Opa hapulomata ala me-dalemha:ha:lati Yesuta ya: alotle tlalo so watle epo atlaiyo, <sup>46</sup> “Ka:e! Wua: aiyalma imalalo so opa woloma natiye. Yia: tluka ka:ka:dle tlo didiyepo siyamdepo. Epo yia: solotamde, opata yia: natipame yia: watle heodepo siyele yu at-lamelepo depame. Yia: epame dita inoma sumalalo aya dla epo daya pato dele dla itapu

ikadepe dla popa:lowe tlo solotamdepo. <sup>47</sup> Yia: epo isikimi elemale tle sepeyamataloye dodolomsalepame yia: ayaye kokolahamdepo. Epame yia: opa hapuloma inoma dali tle inoma sumale yu seselemalli atlamdepo. Epedeme yia: asiyama wotiyalle pato halepe.”

## 21

*A:ya sepeyamata namkale dle alisisi himili*

*(Maka 12:41-44)*

<sup>1</sup> Yesu aiyalma aya dla ala me-halemama natilati alisisi pasatale sota namkale dle mani isilako dla kolumha:ha:iyo. <sup>2</sup> Epalati oloma edla sepeyama a:ya haleta palli mani dapiyamteye puame kolumalati natiyo. <sup>3</sup> Epalati Yesuta natipame epo atlaiyo, “Na: ikadepe kokoye wua: watle atlema. A:ya sepeyama itapo hamilita alisisi pasatale sota hapiliye ma tla:mtalepo. <sup>4</sup> Adipalati, alisisi pasatale so yia: mani patoto yia: dla me-hutiyelati mani opihata tlo hapilipo. Amasiyama sepeyama iye, ya: dla mani mosukulu elaleye etlo hamilipo. Epedeme ya: dla daya dlowe mani ma-hawapo,” diyo.

*Yesuta aiyalma aya dokostlowe mate ta:lamo mosukulu dla koko wowoyamolowe mate atlale*

*(Ma:t 24:1-14; Maka 13:1-13)*

<sup>5</sup> Oloma edla opa opitapo aiyalma aya ewalata ka:depo halë mate epo opata God dla hapili alisisita aiyalma aya dulu dla hutiyelati natipame pta ka:ka:pi demyaiyo. Amasiyama Yesuta yia:ta atlamyale yu dalepame yia: watle epo atlaiyo, <sup>6</sup> “Wua:ta wata aya mate epo alisisi mate tlapame ka:ka:pi dleye alotle dokostlepe. Epapele dulu dla ewala haletapo ma yimkadulo tama di dla popopa:lowa. Amasiyama aya e dokostlati ewala hapuloma etapo matle ta:la dla teteyupo tulumu popa:myelepe,” diyo.

<sup>7</sup> Epalati opata ya: watle epo atlaiyo, “Imalalo oplami, aiyalma aya dokostlowe alilaye adipalalota? Epame koko ita wowoyamolowedeme hallati apa kokota di watle nati-ipa:?” diyo.

<sup>8</sup> Amasiyama Yesuta ma yia: watle epo atlaiyo, “Ka:e wolomape! Oplami haleta wua:ye ikadepe api tle ma alikili dla elemtullala. Adipalati, opa opitapo na: hi mate puame atlamyemama yiskamu yia:ye Kelisopo demyelepe. Epamyemama yia:tapo God ya: alilata mo-puapo demyelati yia: yu dla dalepame edla tulumiyoye. <sup>9</sup> Epapedeme wua: opahale koko mate epo natalimale koko mateta wowoyamalati dalepame ase sikemte wowota:miyo. Ame adipalati, koko ipapele tatile wowoyamelepe. Amasiyama dulu edla mosukulu alilata yipta populuwa.”

<sup>10</sup> Epame Yesu mamisika: yia: watle epo atlaiyo, “Mo haletapo mo hale mate opahale de demyelepe. <sup>11</sup> Epame oloma edla mo opi dla allutuwale patota ellepe, epo daya pa:le kokotapo pulupe. Epame esiyele mila:pi meyelope meyelope dletapo mo pato dla pasalalemtelepe. Epapele oloma edla opatapo ulugiyemale kokota omapla di dla wowoyamalati natipame wowota:lepe.

<sup>12</sup> Amasiyama koko itapo ala powowoyamalalo hallati wua:tapo na: hi yilo wotiyalle pato halepe. Epapele dulu dla opatapo wua: kokoye gladlowedeme yia: inoma sumalalo aya dla elemheta demha:ha:lepe. Epame yia:tapo wua:ye amtuwale aya dla ka:ka:tima demha:ha:lepe. Epo ma yia:tapo na: koko tle wua:ye dokopala so patoto mila:pi dla elemhetame ipila: demha:ha:lepe. <sup>13</sup> Amasiyama oloma edla alila ka:dleta me-woyamelepe, wua:tapo na: kokoye yia: watle botomastloweye. <sup>14</sup> Epedeme wua: koko iye woloma malamaiya. Adipalati, opatapo wua:ye koko gladle dla elemhetlatiye, ase wua:ta yu atlamolowe koko dla sikemte momalamiyo. <sup>15</sup> Ame adipalati, oloma edla na:tapo wua: watle malamale ka:pi mate epo yu atlamolowe ka:pi mate halopiliwepo, wua: dla alli sotapo wua: yu dalepame asiyama yu atlowe pa:lepo depame. <sup>16</sup> Epame oloma edla wua: adulo mate epo wua: waidulo mate epo wua: bapadulo mate epo wua: eidulo mate epo wua: asiyadulo mate epame mo-wua: amkadulo matetapo wua:ye wua:



dla wotiyalle hapimha:ha: so do tama dla pomellepe. Epame yia:tapo wua: dulu dla opa opiye potimelepe. <sup>17</sup> Epapedeme opa hapulomatapo na: yilo wua: dla elle pato himha:ha:lepe. <sup>18</sup> Amasiyama wua: dokopala di dla kokosase yemala haletapo pohaodlowa. <sup>19</sup> Epedeme woloma kokalepo ha:ha:iya. Wua:ta epo kokalepo ha:ha:lepiye, eta wua: pasakalo hallowe halepe.”

*Yesuta Yelusalem mota batalimolowe koko atlale*  
(*Mat 24:15-21; Maka 13:14-19*)

<sup>20</sup> “Epapedeme wua: Yelusalem moye opahale sota aya polemyemama olostame guguwoudepo hallati natilipiye, wua: eta malamelepe, Yelusalem moye mo-batalimolowedeme apopo dlepe. <sup>21</sup> Epalati oloma edla Yudiya mo dla ha:ha:lalo so wua: tamali di dla pohetlepe. Epame opa anawolotapo oloma edla Yelusalem mo dulu dla me-ha:ha:lepiye, yia: ma hapele potlepe. Epame opa anawolotapo oloma edla Yelusalem mo alikili tle ha:ha:lepiye, yia: ma mo dulu edla potuluwa. <sup>22</sup> Adipalati, oloma edla Godtapo ya: yu buka dla atlamale koko mate ala:mama wotiyalle asiyama hamimama apelepe. <sup>23</sup> Epalati oloma edla mopapo koko watalo so mate epo owayimlala ala meme ilimalalo so mate yia: dla sikemte kokalle koko natilipe. Adipalati, oloma edla Godta kasilamaleta pulati dupa kolle pato mate wotiyalle pato mateta mo hema pulupe. <sup>24</sup> Dulu edla opa opiye opahale so aipa:yata potimelepe. Epame opa opiye deata keketipoliyepo asiyama pa:le oko halowedeme mo opi dla elemta demha:ha:lepe. Epalati oloma edla Yelusalemye po-Yu sotapo kolahapame hete dollepe. Yia: me-hete dolemha:ha:lali Godta yia:ta gudlowe alila hamilipe.”

*Opa Yamita puluwe koko*  
(*Mat 24:29-35; Maka 13:24-31*)

<sup>25</sup> “Epapedeme ulugiyemale kokotapo sali dla epo mama dla epo tamili dla wowoyamelepe. Epalati ta:lamo hema kaula dla ulo patotota hehetamama sikemte bibikilimale yu dallepe. Epalati opata sikemte dupa yulumama wowota:myelepe. <sup>26</sup> Epame pepele di dla itiyamale alisisi hutiyetapo houlalimelepe. Epalati opatapo yia: dla apa kokota wowoyama:e depame wowota:mama powatatalemyelepe. <sup>27</sup> Epalati oloma edla opatapo Opa Yamiye itiyamale mate epo hela:dle mate wuala dulu dla pulati natilipe. <sup>28</sup> Epedeme wua: koko hapuloma itapo mo-kokotiyamla natilipiye, wua: wowota:le pa:po sillipame omha:ha:iya. Adipalati, Godta wua: dla pasakalo hallowe hamiloweye mo-mateka:pi puapo.”

*Ipili tokiye tle wayu atlale*  
(*Mat 24:32-35; Maka 13:28-31*)

<sup>29</sup> Yesu ma koko hema wayu i mate epo atlaiyo, “Wua: ipili dali natimama dali opi ma tlamaiya. <sup>30</sup> Wua: ipili dali tokiyeta matlati natipame sali silaplowe alilata mokotiyama depa malamdepo. <sup>31</sup> Epapedeme e ma epapena. Wua: na:ta atlama koko ita wowoyamalati natipame God ya: mo kokota puluweye mo-mateka:pi mle dlepe. <sup>32</sup> Epedeme na: mikadepe koko wua: watile atlema. Wata oloma hema ha:ha:soye ala me-ha:ha:lali koko hapuloma ita wowoyamelepe. <sup>33</sup> Epedeme pepele di mate epo ta:lamo mate pa:lepe. Amasiyama na: yu tlo popa:lowa.”

*Wuskamu woloma omha:ha:iya*

<sup>34</sup> “Epapedeme wua: wuskamu woloma omha:ha:iya. Epame wua: ase daya mate yú mate dlomha:ha:mama ta:lamo koko malamaletapo wua:ta malamale dla sikemte poposatilimiya. Ame adipalati, aliyatapo dea susumale dulu dla godemdiye, epamama na:ta puluwe alilata wua: dla epo yiyelle hamilala. <sup>35</sup> Adipalati, alila etapo opa hapuloma ta:lamo hema ha:ha: so dla pulupe. <sup>36</sup> Epedeme wua: wuskamu woloma omha:ha:mama inoma sumale pato himha:ha:iya, wua:tapo alila eta woyamolowe

dla itiyamale mate ulatulupo depame, epame Opa Yami mila:pi tle itiyamale mate ha:ha:lepo depame.”

<sup>37</sup> Yesu alila hapuloma Yu so aiyalma aya dla hetame opa watle God yu imhalepo gudepame ma utula:la me-ellowedeme Olipi tamali dla ta demhalem-diyo. <sup>38</sup> Epalati opatapo Yesuta imale koko dallowedeme utulala ikadepe aiyalma aya dla puame alum-diyo.

## 22

*Yudasta Yesuye dokopala so dla hamame iliwedeme yu ka:dle*  
(Ma:t 26:14-16, 14:10-11)

<sup>1</sup> Isip mo tle alikili dla woyamale malamale daya dele alilata mo-teteka:mpuaiyo. Daya dele iye Yu sota ma semama Godta Namilatale daya dele dem-diyo. <sup>2</sup> Alila oloma edla aiyalma aya dokopala so mate epo aiyalma imalalo so mateta opa alumale pato natipame wowota:mama hemele Yesu yumuluwedeme api totamaiyo.

<sup>3</sup> Epapele oloma edla Saitenta Yudas Iskaliyot opasi dulu dla tuwaiyo. Yudas iye Yesu ya: alotle tlalo so 12 dulu dla ya: ma halepo. <sup>4</sup> Epedeme Yudasta aiyalma aya dokopala so mate epo aiyalma aya alikili tle omha:ha:lalo so mate dla taiyo, ya:ta Yesuye yia: watle hamame iliwe kokoye esemolowedeme. <sup>5</sup> Epalati yia:ta koko i dalepame ka:pi depame sisiyemama Yudas watle mani hamilowe yu atlaiyo. <sup>6</sup> Epapalati Yudasta ya: ma koko hema ka:pi demama Yesuye hemele yia: do dla hamame iliwe api totamaiyo.

*Godta Namilatale daya dele dlowedeme dinapele*  
(Ma:t 26:17-25; Maka 14:12-21; Yon 13:21-30)

<sup>7</sup> Isip mo tle alikili dla woyamale malamale daya dele kotiyamale alila dla Yu sota Godta Namilatale daya dele tatle dlowedeme sipi aliya haloye poyum-diyo. <sup>8</sup> Epedeme Yesu ma Pita mate Yon mate dla epo atlaiyo, “Wua: tame dita Namilatale daya dloweye dinapiye,” diyo.

<sup>9</sup> Epalati asiyama yia:ta ya: watle epo atlaiyo, “Di hadima tame daya dloweye dinapopa:?” diyo.

<sup>10-11</sup> Epalati Yesuta asiyama yia: watle epo atlaiyo, “Wua: Yelusalem dla tuwaiya. Wua: edla tuwame natilati oplami haleta yú tipo tamhallati umulepe. Wua: ya: umpame ya: dolumtelepe. Wua: ya:ta tame aya dulu dla ulatulati ha:ha:mama aya yo ikadepe watle ipo atellepe, ‘Imalalo oplamita ya: alotle tlalo so mate Godta Namilatale daya dlowe mo da:?’ dlepe. <sup>12</sup> Epalati ya:tapo aya alupoli pato di dla hallaloye wua: watle nati-ilipe. Wua: epalati dita Godta Namilatale daya dloweye edla dinapelepe,” diyo.

<sup>13</sup> Epalati Pita mate Yon mate yu i dalepo tame natilati koko hapuloma Yesuta atlamaletapo mepo hutiyela tlamaiyo. Yia: epapalati Namilatale daya dloweye edla dinapiyo.

*Lod malamale daya dele*  
(Ma:t 26:26-29; Maka 14:22-25; 1Kol 11:23-25)

<sup>14</sup> Epedeme yia:ta daya dlowe alilata mo-pulati Yesuta ya: alotle tlalo so mate daya dlowedeme polaiyo. <sup>15</sup> Yesu polomama ya: alotle tlalo so watle epo atlaiyo, “Na: solotamale pato himhaluwa, na:ta wotiyalle dulu dla ala po-ulatulalo halemama wua: mate Godta Namilatale daya dloweye. <sup>16</sup> Adipalati, na: wua: watle ikadepe koko atlema. Na: matle Godta Namilatale daya dele iye yipta podlowa. Amasiyama God ya: mo kokota pumama daya dele i ya: dulu koko ikadepeye haliyamale dla botomastlepiye, eta na: daya dele iye matle dlowepo,” diyo.

<sup>17</sup> Epame Yesu isilako hapame God dla siyele yu atlepo gudepame yia: watle hami-mama epo atlaiyo, “Wua: isilako i hapame ya:mkaleta depo gudepo ma ya:mkale dla

hami demtaiya. <sup>18</sup> Adipalati, na: wata oloma itle tamama wain yú matle podlowa. Amasiyama God ya: mo kokota pulati na: matle yú eye dlowepo,” diyo.

<sup>19</sup> Yesu ma daya hapame God watle siyele yu atlepame daya hauwokokomaiyo. Epame ya: alotle tlalo so watle alemama epo atlaiyo, “Iye na: motopo, wua: yilo hamipo. Epedeme wua: na: malamale mate ha:ha:mama daya iye dlomha:ha:lepe,” diyo.

<sup>20</sup> Yia: daya depo gudepame Yesu ma isilako hapame God dla siyele yu atlaiyo. Epame ya: alotle tlalo so watle hamimama epo atlaiyo, “Isilako iye Godta na: omali tle yu itiyapo himili amko ipo. Na: omali itapo wua: yilo olostapo.

<sup>21</sup> Amasiyama wua: natiya, na:ye opahale do tama dla homellowe oplamiye dulu hema na: mate me-daya dempolapo. <sup>22</sup> Epedeme Opa Yamiye Godta yu himili dolumama polope. Amasiyama Opa Yami opahale do tama dla homallalo oplamiye wolomape. Ya: wotiyalle dulu dla tullupe.”

<sup>23</sup> Epalati ya: alotle tlalo sota yu i dalepame yiskamu yia: dulu dla atlamyemama, “Anta dia: dulu dla koko ipapele hapa:?” demyaiyo.

### *Anta pato halema: dle koko dla yu topulolle*

<sup>24</sup> Epame Yesu ya: alotle tlalo sota me-yiskamu yia: dulu dla anta pato halema: demyemama yu topuloliyo. <sup>25</sup> Epalati Yesuta koko i natipame yia: watle epo atlaiyo, “Po-Yu so dokopala sotapo yia: isili tle ha:ha:lalo soye sikemte itiyamale mate omha:ha:mdepo. Epapele tlope miyelo yiskamu yia:ye opa dla ka:ka:dle koko halomalalo so demdepo.

<sup>26</sup> Amasiyama wua: dulu dla epapolowe poka:dena. Epedeme wua: dulu dla anta pato halema:? Ka:dena, ya: ka:yapa ya:skamu ya:ye yimka:mala depame isili dla hamtulu-pame salladepo siyamalalo oko halepe. <sup>27</sup> Epedeme wua: natiya, daya dlowedeme pollalo oplami mate epo daya alemalalo oplami mate dulu dla anta pato halema:? Eye polomama daya dlalo oplamita pato halapo. Amasiyama wua: dulu dla na:ye daya alemalalo oplami epapele some halapo.

<sup>28</sup> Wua: na:ta upiyele dulu dla sela:lali wua:tapo na:ye pomelemtamdena. <sup>29</sup> Epapedeme na: Atapo ya: opa omhallowe itiyamale na: watle hamiwaye, epammama na: ma itiyamale epapeleye wua: watle hamilowepo. <sup>30</sup> Epedeme na: mo kokota pulati dulu edla wua: na: mate popa:mama daya dlowepo. Epame wua:tapo dokopala oplamita pollalo mo dla popa:mama Isalael so elele 12ye omha:ha:lepe,” diyo.

### *Yesuta Pitata ya: welilowe koko atlale*

*(Mat 26:31-35; Maka 14:27-31; Yon 13:36-38)*

<sup>31</sup> Yesu ma polomama Saimon Pita watle epo atlaiyo, “Saimon, Saimon, Saiten-tapo wua:ye ikadepe kokaleta:e depame elemala natilowedeme God tle itiyamale ma-hauwapo. <sup>32</sup> Amasiyama na: wa: yilo inoma sumale pato me-himiwa, wa:ta mikadepe dleye haodlala depame. Epame wa:ta na: hala dla ma ilame puale oloma edla wa: amkadulo mikadepe dle soye itiyamale hamilipe,” diyo.

<sup>33</sup> Amasiyama Pitata asiyama ya: watle epo atlaiyo, “Lod, na: wa: mate amtuwale aya dulu dla epo polowe dla tulluweye mo-dinapopo sela:ma,” diyo.

<sup>34</sup> Yesuta asiyama Pita watle epo atlaiyo, “Pita, na: wa: watle ikadepe koko atlema. Wata utula:la gagapo ala poyulumalalo hallati wa: dapahatlope oloma dla na: kokoye wellipe,” diyo.

<sup>35</sup> Yesu ma ya: alotle tlalo so watle epo atlaiyo, “Wua: na:ta ka:dle yu atlamsiyamelepo depame taiya demama mani mate epo duli mate epo tluka alisisi opi mate halopo tamiyo duwapo. Amasiyama wua: dulu edla siyamama kokalle koko natiwa?” diyo.

Epalati asiyama yia:ta ya: watle epo atlaiyo, “Hao, ponatina,” diyo.

<sup>36</sup> Amasiyama Yesuta ma yia: watle epo atlaiyo, “Wata oloma hema oplami antapo ya: dla mani mate epo duli mate hutiyelepiye, me-halopo telepe. Epame oplami antapo ya: dla aipa:ya hawa hallepiye, ya:tapo ya: kapumale tlukaye oplami hale watle hamimama

asiyama mani tlo hapo aipa:ya halepe. <sup>37</sup> Adipalati, God yu bukata epo atlapo, 'Ya:ye batalimale so mate hatlope depo ellepe,' depo. Epedeme God yu bukata atlamale koko eta na: dla woyamelepe. Yao, ikadepe, God yu bukata na: koko dla atlamale koko hapulomata mo-woyamala puapo," diyo.

<sup>38</sup> Amasiyama ya: alotle tlalo sota ya: watle epo atlaiyo, "Lod, wa: natine, dia: dla aipa:ya dapiyamte me-hutiyepo," diyo. Amasiyama Yesuta yia: watle epo atlaiyo, "Medla gudiya," diyo.

*Yesuta olipi tamali dla inoma sumhalale*

*(Mat 26:36-46; Maka 14:32-42)*

<sup>39</sup> Yesu meyelo aplalo epammama Yelusalem tle alikili a:ma woyapo Olipi tamali dla taiyo. Epalati ya: alotle tlalo sota ya: mate taiyo. <sup>40</sup> Epame yia: tame edla ha:ha:mama Yesuta yia: watle epo atlaiyo, "Wua: inoma sumale himha:ha:iya, wua:tapo elemala natili dulu dla tullala depame," diyo. <sup>41</sup> Yesu epo atlepame yia: tle alikili a:ma tame alumata kellepo polomama inoma sumpolaiyo. <sup>42</sup> Ya: inoma sumama epo atlaiyo, "A, wa: solotamelepiye, na: dla wotiyalle pua iye alikili a:ma hamastane. Amasiyama mowolo wa:ta solotamale koko tlo hane, pona:ta solotamale koko," diyo. <sup>43</sup> Epalati God ya: banakakata Pepele di tle malame ya:ye gademama itiyamale hamiyo. <sup>44</sup> Epapele dulu dla ya:tapo dupa yuli pato mate God dla sikemte inoma sumale pato himimpolaiyo. Epalati ya: ekukullitapo omali some ta:la dla tatakalemhalaiyo.

<sup>45</sup> Epame ya: inoma sumhalepo gudepo tame natilati ya: alotle tlalo soye dupa kolempopa:po depo mo-hutiyele halla natiyo. <sup>46</sup> Epalati Yesuta yia: watle epo atlaiyo, "Wua: adipalati hutiyema? Wua: sillipame inoma sumale himimpopa:iya, wua:tapo elemala natili dla tullala depame," diyo.

*Opata Yesu yumuluwedeme hamame tale*

*(Mat 26:47-56; Maka 14:43-50; Yon 18:3-11)*

<sup>47</sup> Yesu ala ya: alotle tlalo so dla me-yukamhallati ya: alotle tlalo oplami hale Yudastapo opa alumaleye elempuame woyamaiyo. Epame Yudastapo Yesuye hul-luwedeme puaiyo. <sup>48</sup> Amasiyama Yesuta ya: watle epo atlaiyo, "Yudas, wa: Opa Yamiye hulli mate hampame opahale do tama dla homellowedeme apopa?" diyo.

<sup>49</sup> Epalati Yesu ya: alotle tlalo sotapo opata Yesu hamala pua koko natipame epo atlaiyo, "Lod, di aipa:ya mate nalatipa?" diyo. <sup>50</sup> Epammama Yesu ya: alotle tlalo oplami haletapo aiyalma aya dokopala oplami ya: oko oplami haleye aipa:yata heyumama ya: dowala molye ketamastaiyo.

<sup>51</sup> Amasiyama Yesuta ya: alotle tlalo so watle epo atlaiyo, "Medla gudiya, koko epapele hamiya," diyo. Epame oplami ya: molo dla umpame ya:ye ka:diyo.

<sup>52</sup> Yesu epo halemama ya:ye hamala pumulale aiyalma aya dokopala so mate epo aiyalma aya alikili tle omha:ha:lalo so mate epo Yu so dokopala so mate dla epo atlaiyo, "Wua: na: uhalalo oplamita hallati natipame na:ye hamolowedeme aipa:ya mate epo bulukupi mate halopo pumulo? <sup>53</sup> Amasiyama wua: na:ye alila hapuloma aiyalma aya dulu dla imsela:la natimduwapo. Ame wua: adipalati na:ta edla hallati pohamalalo wekemduwa? Amasiyama wata iye wua: alilata mo-pualepo. Adipalati, wata iye amtuwale dokopala oplami Saiten ya: alilapo," diyo.

*Pitata Yesu welli*

*(Mat 26:69-75; Maka 14:66-72; Yon 18:15-18, 25-27)*

<sup>54</sup> Epame opata Yesuye hampame aiyalma aya dokopala oplami aya dla semtaiyo. Epalati Pitata alo ikadepe tle dolumtaiyo. <sup>55</sup> Ya: dolumtame opata aya alikili dla dlapa mipo dlapa tilimpola:lati ya: ma yia: mate dlapa timpolaiyo. <sup>56</sup> Pita ala dlapa me-timpollati aya edla oko halalo ipilalo haleta puame Pita watle woloma omhalemama epo atlaiyo, "Oplami i mape Yesu mate sela:uwa halepo," diyo.

<sup>57</sup> Amasiyama Pitata asiyama epo atlaiyo, “A:ya, na: oplami eye pona:malamana,” diyo.

<sup>58</sup> Epo ma alotle oplami haleta puame ya: natipo ya: watle epo atlaiyo, “Wa: ma Yesu mate sela:uwa oplami halepo,” diyo.

Epalati Pitata asiyama epo atlaiyo, “Oplami eye pona:,” diyo.

<sup>59</sup> Epo ma edla pola ma alowellati ma oplami haleta yu itiyamale mate puame epo atlaiyo, “Mikadepe, oplami i mape ya: mate sela:uwa halepo. Adipalati, ya: mape Ga:lili oplamipo,” diyo.

<sup>60</sup> Epalati Pitata asiyama epo atlaiyo, “Oplami, wa:ta atla kokoye na: ikadepe sikemte yeliyena,” diyo. Pita ala me-yukamhallati gagapotapo mo-yulumaiyo. <sup>61</sup> Epalati Lodta alo dla helestepo Pita watle omelaiyo. Epapele oloma dla Pitatapo Yesuta atlale yu iye malamaiyo, “Wa: wata utula:la gagapo ala poyulumalalo hallati wa:tapo na: kokoye dapahatlope oloma dla wellipe,” dleye. <sup>62</sup> Epapedeme ya: yu e malapame alikili dla ulatame sikemte dupa kolle mate amaiyo.

### *Yesuye dokopala sota esemale dla semhetale*

*(Mat 26:59-68; Maka 14:55-65; Yon 18:19-24)*

<sup>63</sup> Epame Yesu hamame popa:lalo sotapo ya:ye tetlemyemama hopoliyo. <sup>64</sup> Epame yia:ta ya: inomaye tluka mate ketopolipame heyulumyemama, “Anta wa:ye heyu,” demyaiyo. <sup>65</sup> Epamyemama yu batalimale opi mate ya: watle atlamyaiyo.

<sup>66</sup> Epo ma alallati Yu so dokopala so mate epo aiyalma aya dokopala so mate epo aiyalma imalalo so mate yimkata alumaiyo. Epame Yesuye yia:ta esemale edla semhetaiyo. <sup>67</sup> Epalati yia:tapo popa:mama Yesu watle epo atlaiyo, “Wa: di watle atlane, wa:ye ikadepe Godta sale Kelisota:?” diyo.

Yesu asiyama yia: watle epo atlaiyo, “Na:ta wua: watle atlepiye, wua: na:ye pomikadepe dlowa. <sup>68</sup> Epame na:ta wua: watle atlanatili yu atlepiye, wua: asiyama yuye na: watle ilame po-atlowa. <sup>69</sup> Amasiyama wata oloma itle Opa Yamiye pato Godta ya: dowala tiyama dla pabellepe,” diyo.

<sup>70</sup> Epalati asiyama yia:ta hapulomata epo atlaiyo, “Epedeme wa:ye ikadepe God Yamita:?” diyo. Epalati asiyama Yesuta yia: watle epo atlaiyo, “Wua:ta na:ye God Yami dleye, e mikadepepo,” diyo.

<sup>71</sup> Epalati yia:ta epo atlaiyo, “Epedeme di ya: koko gladlowe dla ma yu opi dlallowe posolotamasema. Adipalati, ya: meyelo ya: kokoye mo-botomastamama ya:ye God Yami dlepo. Epedeme wata ya: yumuluwe ka:pi,” diyo.

## 23

### *Yesuye Paelet mate epo Helod mate dla seme hetale*

*(Mat 27:1-2, 11-26; Maka 15:1-15; Yon 18:28-19:16)*

<sup>1</sup> Epame dokopala so alumaletapo sillipame Yesuye Paelet watle semtaiyo. <sup>2</sup> Yia: tame Paelet watle Yesu kokoye atlamyemama epo atlamyaiyo, “Di oplami itapo di opaye batalimale api dla elemtlati natipame hamuwa. Adipalati, ya:tapo di opata Sisa watle ta:kis mani kolumde dla humatlepame ma ya:skamu ya:ye dokopala oplami Keliso demsela:mduwapo,” demyaiyo.

<sup>3</sup> Epalati Paeletapo Yesu watle epo atlaiyo, “Wa: ikadepe Yu so dokopala oplamita:?” diyo.

Epalati Yesuta asiyama epo atlaiyo, “Yao, wa:ta atla mepo,” diyo.

<sup>4</sup> Epalati Paeletta Yu so aiyalma aya dokopala so mate epo opa opi edla alupo ha:ha:le so watle epo atlaiyo, “Na: ya: hamolowe dla batalimale koko hale ponatisema,” diyo.

<sup>5</sup> Amasiyama yia: koko eye memellowe allimama yu itiyamale mate epo atlamyaiyo, “Opata Loum gamani so dla siyalasiyaladlepo depame ya:tapo Yudiya mo pato dulu dla



opa watle yiyilamale kokoye imsula:mduwapo. Ya: koko iye Ga:lili mo tle kotiyapame ma hema puame ammsela:po,” demyaiyo.

<sup>6</sup> Epalati Paeletta koko i dalepame Yesuye ikadepe Ga:lili oplamita:e depame opa watle dalla natiyo. <sup>7</sup> Epapele dulu dla ya:tapo Yesuye ikadepe Ga:lili oplami dle kokoye malanatipame Yesuye Helod watle semtaiya diyo. Adipalati, Helodta Ga:lili mo dla dokopala oplami halaiyo. Oloma edla Helodye Yelusalem dla puame hallati apiyo.

<sup>8</sup> Epapele dulu dla Helodtapo Yesu natipame sikemte siyeiyo. Adipalati, ya: mopowataliya Yesu kokoye dlalemhalemama ya: natilowe solotamdiyo. Epammama ya:ye Yesuta ulugiyemale koko ya: mila:pi tle halepo depame sikemte solotamaiyo.

<sup>9</sup> Epapedeme Helodtapo Yesu watle atlanatili yu pasatale atlamaiyo. Amasiyama dulu edla Yesuta ya: watle yu hale po-atlaiyo. <sup>10</sup> Oloma edla aiyalma aya dokopala so mate epo aiyalma imalalo so mate Yesu dla batalipo atlamyemama ya:ye batalimale pasatale oplami demyaiyo. <sup>11</sup> Epame Helodtapo ya: opa mate Yesuye tetlemyemama ya: watle dokopala sota didiyelalo tluka alisiye asiyomeliyo. Epame ya:ye Paelet watle ilame semtaiya diyo. <sup>12</sup> Alila oloma edla Helod mate epo Paelet mate namkale diyo. Yia:ta ka:yapa ha:ha:leye namkale dle ipapeleta yia: dulu dla pe-elaiyo.

<sup>13</sup> Yesuye Paelet watle ilame semtlati natipame Paeletta aiyalma aya dokopala so mate epo Yu so dokopala so mate epo opa hapuloma mate sisilapame epo atlaiyo, <sup>14</sup> “Wua:tapo oplami iye Yu sota Loum gamani so dla siyaladlepo depame yiyilamale koko imsula:ma demyemama na: watle sempualepo. Amasiyama na:tapo wua: inoma dali tle ya: koko gladleye, ya: dla batalimale koko hale ponatina. <sup>15</sup> Epapele dulu dla Helod mape Yesu dla batalimale koko hale ponatina. Epammama ya:tapo ya:ye ma di watle semtaiya dlepo. Epedeme wua: me-natipo, oplami i yumuluweye, ya: dla batalimale hale hawa ikadepe. <sup>16</sup> Epapedeme na:ta isikimi ya:ye hopolepame tane dlowepo.”

[ <sup>17</sup> Amasiyama Paeletta Yu sota sisiyelepo depame yia:ta Godta Namilatale daya dele oloma edla oplami haleye amtuwale aya dulu tle alikili dla hamame woyamdiyo.]

<sup>18</sup> Epapeleye opa hapulomatapo yu teta:le mate epo atlamyaiyo, “Yesu tlo yumama asiyama Balabasye amtuwale aya tle alikili dla hamame woyamane,” demyaiyo.

<sup>19</sup> Oplami Balabas iye Loum gamani so mate opahale demama oplami hale yumiyoy. Epapele tle ya:ye amtuwale aya dulu dla ka:staiyo.

<sup>20</sup> Paeletta Yesuye alikili a:ma hamame woyamoloweye sikemte solotamama mamisika: opa watle atlaiyo. <sup>21</sup> Amasiyama opata asiyama ya: watle yu teta:le mate epo atlamyaiyo, “Ya:ye dali yekelehmihili di dla gogodiya, dali yekelehmihili di dla gogodiya,” demyaiyo.

<sup>22</sup> Epalati Paeletta ma opa dla atlemama epo atlaiyo, “Wua: ya:ta apa batalimale koko halë hallati natipame ya:ye yumuluwedeme amma:? Na:ta ya: koko gladle oloma edla na: ya: yumuluwe dla hamame tulluwe batalimale koko hale ponatina. Epedeme na:tapo ya:ye isikimi hopoliya depame tane dlowepo,” diyo.

<sup>23</sup> Amasiyama opa hapulomatapo yu sikemte di dla teta:lalimale mate “Yesuye dali di dla gogodepo himiya,” demyaiyo. Yia:ta epamyelati Paeletta dalemhalepo depame sukalemama yia: watle mope diyo. <sup>24</sup> Epammama ya:tapo yia: yu dalepame opata solotamale koko haiyo. <sup>25</sup> Epedeme Paeletta Loum gamani so dla opahale demama ya:mkale yumulalo oplami Balabas tlo amtuwale aya dulu tle alikili a:ma woyamane diyo. Amasiyama ya: Yesuye dali yekelehmihili di dla polopo depame opa dla homeliyo.

*Yesu dali yekelehmihili di dla gogodle*

*(Mat 27:32-44; Maka 15:21-32; Yon 19:17-27)*

<sup>26</sup> Epame opahale sota Yesuye mo dulu tle ma alikili dla semtamha:ha:lati Kulene oplami Saimonye api duka dla Yelusalem dla pumhallati umaiyo. Epame yia:tapo dali yekelehmihiliye hapame ma ya: maka: dla himpame Yesu ko tle tane diyo. <sup>27</sup> Epalati

oloma edla opa hapulomatapo Yesu hamame tamhallati alotle dolumtamalaiyo. Epapele dulu dla wola: opi ma me-tamalemama Yesu yilo a:lle mate wowolimtamalaiyo. <sup>28</sup> Epalati Yesuta helestame yia: dla omhalemama epo atlaiyo, “Yelusalem so wola: wua: na: yilo ase sikemte a:limiya. Amasiyama wuskamu wua: yilo a:lemama wua: yimlala yilo ma a:liya. <sup>29</sup> Adipalati, wotiyalle alilata mo-pulati opata yu ipo atlamyelepe, ‘Yimlala pohohomalalo wekelalo so wola: wua: mate epo wola: yimlala pohohopo meme ilimalalo so wola: wua: mate sisiyeiya.’ <sup>30</sup> Adipalati, epapele oloma edla ‘opatapo epo atlamyelepe,

“Tamali mate tutuka: pentalalimale mate, dia: dla illipo malame bopudiya,” demyelepe.

<sup>31</sup> Epapedeme ipapele kokotapo dali upa pasakalo dla woyamelepiye, ma apa kokotapo dali upa tolle dla woyapa?” diyo.

<sup>32</sup> Epame oloma edla opahale sota Yesu semtamama uhalalo so dapiyamte ma dali yekelemhimili di dla potimolowedeme elemtamalaiyo. <sup>33</sup> Yia: puame mo alikili tamali hale, ya: hi Dokopala elo demdiye, edla puame woyamaiyo. Yia: epame Yesuye dali yekelemhimili di dla gogodiyo. Epame uhalalo so dapiyamte ma gogodemama haleta ya: dowala tiyama dla gogode epo haleta ya: weke tiyama dla gogode diyo. <sup>34</sup> Amasiyama Yesuta dali yekelemhimili di dla elemama epo atlaiyo, “A, opa iwolota batalimale koko ipapele na: dla halëye hiyostepo weline. Adipalati, yia: yia:ta koko halë iye poyia:malamana,” diyo. Epame opahale sota Yesu tlukaye hukulupo halomolowedeme yia: dulu dla ewala mate tatipiyele hale tatipiyeyiyo.

<sup>35</sup> Opa hapulomatapo alikili tle omha:ha:lati Yu so dokopala sota Yesuye tepelemale mate tetlemyemama epo atlamyaiyo, “Ya: opa opi tlo gagademsela:mduwapo. Epedeme ya:ye ikadepe Godta sale oplami Keliso dlepiye, ya: ya:skamu ya: gadlowe ka:pi,” demyaiyo.

<sup>36</sup> Epame opahale so yia: mape Yesuye tetlemyaiyo. Epammama wain yú haka:le sipo Yesuta delepo depame ya: watle hamimama epo atlaiyo, <sup>37</sup> “Wua: ikadepe Yu so yia: dokopala oplami dlepiye, wa: wa:skamu wa: gadene,” diyo.

<sup>38</sup> Yesu ya: dokopala di tle yu ilimale ipo ilipo badiyo,

OPLAMI IYE YU SO DOKOPALA OPLAMIPO

<sup>39</sup> Oloma edla uhalalo oplami hale Yesu ela seme tle gogodepo elaletapo tepelemale yu mate Yesu watle epo atlaiyo, “Wa: ikadepe Keliso dlepiye, wa: wa:skamu gademama di ma gadene,” diyo.

<sup>40</sup> Amasiyama uhalalo oplami haleta ya:mkale yu ipi tle yu itiyamale mate epo atlaiyo, “Wa: God powota:ma:? Adipalati, ya:ta wotiyalle haye wa: ma mepapele hapo.

<sup>41</sup> Amasiyama wa: mate epo na: mateye di batalimale asiyama dla palipo. Ame Yesuye, ya: dla batalimale hale hawa,” diyo.

<sup>42</sup> Epame ya: ma Yesu watle epo atlaiyo, “Yesu, wa:ta wa: mo dla ulatumama na:ye malamelepe,” diyo.

<sup>43</sup> Epalati Yesuta ya: watle epo atlaiyo, “Na: wa: dla ikadepe koko atlema. Watapo wa:ye na: mate siyele mo dla pollope,” diyo.

*Yesuta powale koko*

*(Mat 27:45-56; Maka 15:33-41; Yon 19:28-30)*

<sup>44</sup> Sali mo-dukuslopi dla hallati mo patota motiti tumama sali inoma dapahatlope pololiyo. <sup>45</sup> Epalati aiyalma aya dulu dla tluka deiyamaleta komaleye meyelo duka talladiyo. <sup>46</sup> Epapele oloma edla Yesuta yu teta:le mate epo atlaiyo, “A, na: na: pasakaloye wa: do dla hamima,” diyo. Yesu yu mosukulu ipo atlepame powaiyo.

<sup>47</sup> Epalati opahale so omhallalo oplamita Yesu dali yekelemhimili isili tle omhalemama Yesuta powale koko natipame God hi di dla ta:demama epo atlaiyo, “Ikadepe, oplami iye batalimale hale hawa ikadepe mleni,” diyo. <sup>48</sup> Epame opa hapuloma edla

natilowa depo tame omha:ha:le sotapo koko e natipo ma i-ilapo tamalemama sikemte dupa kolle mate tamalaiyo. <sup>49</sup> Amasiyama Yesu ya: amkadulota alikili tle koko iye omha:ha:iyo. Epame yia: dulu dla wola: opi Yesu mate Ga:lili tle pumulale so yia: mape medla ha:ha:mama omha:ha:iyo.

*Yesu wabasi dulu dla hamatili  
(Ma:t 27:57-61; Maka 15:42-47; Yon 19:38-42)*

<sup>50-51</sup> Dulu edla oplami hale halaiyo, ya: hiye Yosep. Ya: Yudiya mo pato dulu dla Alimatiya mo yemala dla hallalo oplamiyo. Ya:ye ka:dle oplami halemama God ya: mo kokota puluweye omhalaiyo. Epame ya:ye Yu so dokopala so alumale dulu dla ya: ma hale halaiyo. Amasiyama Yu so dokopala sota Yesuye Loum gamani sota yumulupo depo yia: dla homallati ya: koko edla alimama humatlaiyo. <sup>52</sup> Epapeleye ya: Yesu powale moto halowedeme Paelet wadle dalla taiyo. <sup>53</sup> Epame ya: Yesu motoye dali yekelehmihili di tle isili dla hame tulume tlukata polupame tei seselemale dulu dla wabasi muwalle dla tuwame himiyo. Wabasi eye ala amko ikadepe, oplami powale moto haleye ala dulu edla pohamatilalo ha:ha:iyo. <sup>54</sup> Amasiyama alila oloma eye Yu sota inoma sumolowe alilata mo-kotiyamalati apiyo.

<sup>55</sup> Epapele dulu dla wola: Yesu mate Ga:lili tle pumulale sotapo Yosepta Yesu motoye wabasi dla hamatiliwedeme tlati yia: ma dolumtamalaiyo. Yia: tame Yosepta Yesu moto wabasi dulu dla hamatili kokoye woloma natiyo. <sup>56</sup> Epame yia: ma ilame tame dakopala ullu ka:depo pamalaloye Yesu moto dla huhutupiliyelowedeme dinapiyo. Amasiyama yia: Yu sota inoma sumolowe alilata mo-kotiyamalati Mosesta aiyalma hatitimale e dolumama aseka hedepo popa:iyo.

## 24

*Yesuta wabasi dulu tle ma sila:time hetale  
(Ma:t 28:1-10; Maka 16:1-8; Yon 20:1-10)*

<sup>1</sup> Sande alila utulala ikadepe wola: iwolota yia:ta ullu ka:depo pamalalo dakopala dinapeleye halopo Yesu wabasi dla tamalaiyo. <sup>2</sup> Yia: tame natilati kokoloma tala dla ewala himomeleme elaleye ma alikili a:ma dla kokolustame ella natiyo. <sup>3</sup> Amasiyama yia: tuwame natilati Lod Yesu motoye hawa halaiyo. <sup>4</sup> Yia: tuwame ala me-omha:ha:mama momalamha:ha:lali opa dapiyamte tluka kamkamaleta sikemte usiyemale didiyepo pakasiyamalalo yia:ta ha:ha: mateka:pi dla wowoyapo ha:ha:iyo. <sup>5</sup> Epalati yia:ta yiyelepo sikemte wowota:mama yia: dokopala isili dla potalepo tuluiyo. Amasiyama opa dapiyamteta yia: wadle epo atlaiyo, “Wua: adipalati pasakalo hallalo oplamiye ma wabasi dulu dla totamsiyama:? <sup>6</sup> Ya: dulu hema pe-elasema. Amasiyama ya:ye ma sila:time hetana. Epedeme wua: ya:ta wua: mate Ga:lili dla sela:mama atlamuwa kokoye mo-woweluwapa? <sup>7</sup> Adipalati, ya:tapo epo atluwapo, ‘Opa Yamiye batalimale so dla homallati yia:tapo ya:ye dali yekelehmihili dla gogodlepe. Epame ya:ye wabasi dulu dla alila dapiyamte elepame ma dapahatlope alila dla sila:time hetlepe,’ duwapo.” <sup>8</sup> Epalati wola:tapo yu e dalepame Yesuta atlamsela:le yuye mo-malamaiyo.

<sup>9</sup> Epame yia: wabasi tle ma ilame tame Taiya dle so 11 mate epo opa hapuloma Yesu dolumtale so mate dla yia:ta tlamale koko hapulomaye atlamaiyo. <sup>10</sup> Epedeme koko i tlamale so wola:ye iwolopo, Meli Magadalin epo Yowana epo Yeims ya: wai Meli epame wola: opi. <sup>11</sup> Amasiyama wola: iwolota puame Taiya dle so dla atlamalati yia:tapo pomikadepe dlalo wekemama ma wola: wadle, “Wua: isikimi bobokolomale yu atlamyema,” demyaiyo. <sup>12</sup> Amasiyama Pitata sila:tipame wabasiye natilowedeme kukulumtaiyo. Ya: tame wabasi dla heodepo tuwame halemama toko ipo natitepo Yesu moto bopudepo elale tluka siyapota wabasi dulu dla me-ella natiyo. Epalati Pitata ma ilame tamama koko hema sikemte momalamtaiyo.

*Opa dapiyamteta Emaus mo dla tamalemama Yesu natili*

<sup>13</sup> Alila hatlo medla Yesu alotle dolumsiyamalalo so dapiyamtetapo Yelusalem mo saliyome ma Emaus mo dla tamalaiyo. Emaus mo eye Yelusalem mo tle pase pateka:mu, isikimi 11 kilomita selemalli enamaiyo. <sup>14</sup> Yia: tamalemama Yesu dla koko wowoyamale hapulomaye esemtamalaiyo. <sup>15</sup> Epame yia: me-tamalemama esemtamallati Yesuta ko tle puame yia: umpame ma yia: mate tamalaiyo. <sup>16</sup> Amasiyama opa dapiyamte iwoloye Yesu woloma pomalanatiyo. Adipalati, Godta yia:ta Yesu woloma malanatiloweye api himomeliyo.

<sup>17</sup> Epalati Yesuta yia: watle epo atlaiyo, “Wua: apa kokoye esemtamalemama yuham-tamalema:?” diyo.

Amasiyama yia: api duka medla hedepo ha:ha:mama dupa kolle mate yia: mila:pi upiyestame ha:ha:iyo. <sup>18</sup> Epammama yia: dulu dla oplami hale hi Keleopas demdiye, eta Yesu watle epo atlaiyo, “Yelusalem mo dla asepe so ha:ha: dulu edla hatlo wa: tlo koko edla wowoyamaleye podallalo wekelepa?” diyo.

<sup>19</sup> Epalati Yesuta asiyama ya: watle epo atlaiyo, “Wa: apa koko atlema:?” diyo.

Epapalati asiyama yia:ta ya: watle epo atlaiyo, “Di Yesu Nasalet oplami kokoye atlema. Adipalati, ya:ye God tle yu hapame molo atlalo oplami depa halemama God mila:pi tle epo opa mila:pi tle God yuye itiyamale mate atlamsela:mduwapo. Epammama ya:tapo ulugiyemale koko patotoye halomsela:mduwapo. <sup>20</sup> Amasiyama aiyalma aya dokopala so mate epo di dokopala so mateta ya:ye Loum gamani sota yumulupo depame yia: dla homeluwapo. Epalati yia:tapo ya:ye dali yekelemhimili di dla gogodepo yumuwapo. <sup>21</sup> Amasiyama dita malamaleta ya:ta Isalael soye Loum gamani sota itiyamale tle alikili dla eleme woyamelepe depa dalemha:ha:mama omha:ha:uwapo. Epedeme koko hapuloma iye tatla huta wowoyamuwapo. <sup>22-23</sup> Epame di alumale dulu dla wola: opita di watle yiyelle hami. Adipalati, wata utulalati yia: toko tame wabasi natitepo Yesu moto hawa halla natiwo. Epalati yia:ta puame di watle atlemama ‘dia:ye inomata meyelope demama God ya: banakaka so nati,’ de. Epalati banakaka sotapo Yesuta ma pasakalo hala kokoye yia: watle atluwo. <sup>24</sup> Epame di alumale dulu dla ha:ha:lalo so opa opi yia: mape toko tame wabasiye natitepo, wola:ta atlamale koko mate alemama Yesu motoye hawa halla natiwo.”

<sup>25</sup> Epalati Yesuta yia: watle asiyama epo atlaiyo, “Wua: sikemte yeitamale sopo. Wua: adipalati God tle yu hapame molo atlamalalo sota atlamale koko dla ala pomikadepe dlalo ha:ha:pa? <sup>26</sup> Adipalati, yia:tapo epo atluwapo, ‘Godta sale Kelisoye wotiyalle koko ipapele hapame ma hela:dle mate epo itiyamale mate God hala dla hetame pollope,’ duwapo.” <sup>27</sup> Epame Yesuta yia: watle Moses mate epo God tle yu hapame molo atlamalalo so hapuloma mateta Keliso koko dla hatitimale yu ya: dulu kokoye woloma yia: watle imaiyo.

<sup>28</sup> Yia: Emaus mo mateka:pi dla pumha:ha:mama Yesuta yia: watle epo atlaiyo, “Na: hema pohedlowa. Amasiyama na: ala me-tlowama,” diyo. <sup>29</sup> Amasiyama opa dapiyamteta yu itiyamale mate ya: watle epo atlaiyo, “Namkale, wa: yipta tamiya, wa: dia: mate elane. Adipalati, ma-apola yakoma,” diyo. Epedeme ya: yia: mate ella taiyo.

<sup>30</sup> Epame yia: aya dla hetame daya dlowedeme popa:mama Yesu daya hapame siyele yu atlepo gudepame hauwokokopo yia: watle alemaiyo. <sup>31</sup> Epapele oloma edla pakasiyamalalo yia:tapo Yesuye woloma malanatiyo. Yia: Yesuye malanatilati ya:tapo meyelo me-haodiyo. <sup>32</sup> Epalati yia:ta dapiyamteta popa:mama yiskamu epo atlampopa:iyo, “Yao ikadepe, di api duka dla pumha:ha:lali ya:tapo God yu ya: dulu kokoye di watle atlamalati di dupa dulu dla sikemte siyeleta heta,” diyo.

<sup>33</sup> Epo yia: sillipame ma hapele Yelusalem dla tamalaiyo. Yia: tame natilati Taiya dle so 11 mate epo Yesu dolumsiyamale opa hapuloma mate yimkata edla alupo popa:la natiyo. <sup>34</sup> Epalati opa edla alupo popa:leta yia: watle epo atlamyaiyo, “Yao,

ikadepe, Lodye powale tle ma sila:time hetana. Epame ya: ma Saimon Pita hala dla tame woyamalepo,” demyaiyo. <sup>35</sup> Epalati asiyama opa dapiyamte iwolota yia:ta Yesuye api duka dla tamalemama umale mate epo Yesuta yia: mate polomama daya hauwokokomalati malanatili koko mate yia: watle atlamaiyo.

*Yesuta ya: alotle tlalo so dla tame woyamale*

*(Mat 28:16-20; Maka 16:14-18; Yon 20:19-23; Taiya 1:6-8)*

<sup>36</sup> Yia: ala koko hema me-yuhampopala:lati Yesuta pakasiyamalalo yia:ta popa: duka metle me-woyapo halaiyo. Ya: epo halemama yia: watle epo atlaiyo, “Namkadulo, sadleta wua: mate ellepe,” diyo.

<sup>37</sup> Amasiyama yia:tapo ya:ye semte bataliya tepo depame sikemte yiyelepo wowota:iyo. <sup>38</sup> Epalati asiyama Yesuta yia: watle epo atlaiyo, “Wua: adipalati epo sikemte wowota:mama totokoleyaple kokota wua: dulu dla elema:? <sup>39</sup> Epedeme wua: na: do mate epo na: hete mate tlapame ikadepe na:po depo malamaiya. Epame na: moto umaiya, wua:tapo na:ye ikadepe moto walle tepo depo malamelepo depame. Adipalati, bataliya yimlalaye yia: dla moto hawa,” diyo.

<sup>40</sup> Ya: yu iye atlapame yia: watle ya: do ulu mate epo hete ulu mate nalati-iyo. <sup>41</sup> Amasiyama yia:tapo sisiyele mate yiyelepo popa:mama ala yia: dupa dulu dla metotokoliyapele mate popa:la natipame Yesuta yia: watle epo atlaiyo, “Wua: dla dlowe alisisi yemala hale elema:?” diyo. <sup>42</sup> Epalati yia:tapo ya: watle amalalo totomale yemala hamiyo. <sup>43</sup> Epapalati ya:tapo yia: inoma dali tle amalalo eye deiyo.

<sup>44</sup> Epame ya:tapo yia: watle epo atlaiyo, “Na:ta wua: mate sela:uwa oloma edla na: wua: watle ipo atlamduwapo, ‘Na: koko dla Mosesta hatitimale mate epo God yu molo atlamalalo sota hatitimale mate epo Sam buka dla hatitimale mateta na: dla woyamelepe,’ demduwapo. Epedeme wata koko itapo na: dla mo-woyamapo,” diyo.

<sup>45</sup> Epame Yesuta yia:ta God yu bukata atlama kokoye woloma malastlepo depame yia:ta malamaleye hohototimaiyo. <sup>46</sup> Yesu epo halemama yia: watle epo atlaiyo, “Epedeme God yu bukatapo ipo atlapo, ‘Godta sale Kelisoye wotiyalle hapame alila dapiyamte wabasi dulu dla powame elepo gudepame ma dapahatlope alila dla sila:time hetlepe.’ ” <sup>47</sup> Epame Yesuta ma yia: watle epo atlaiyo, “Wua: Yelusalem tle kotiyapame ta:lamu pato dla tame na: hi tle opa watle ipo imsiyamaiya, ‘Wua: malamale meyelo depame wua: bobtalimale tle heheletimaiya. Epalati Godtapo wua: bobtalimaleye hiyotipo wellipe,’ demsiyamelepe. <sup>48</sup> Epapedeme wua:ta na: koko iye tlapame atlam-siyamelepe. <sup>49</sup> Epedeme wua: yipta Yelusalemye meleme tamiyo. Amasiyama wua: aseka medla me-ha:ha:lati Pepele di tle itiyamale mallati halepe. Adipalati, na:tapo na: Ata atlale yu e dolumama wua: watle Hela:dle Soko hamilowepo,” diyo.

*Yesuye Pepele di dla hamame hetale*

*(Maka 16:19-20; Taiya 1:9-11)*

<sup>50</sup> Epame Yesuta ya: alotle tlalo so eleme Betani mo mateka:pi dla tamalaiyo. Yia: edla tame woyapame Yesuta ya: do ta:ta:depame yia: yilo inoma sumama siyele yu atlaiyo.

<sup>51</sup> Ya: epamhallati Pepele di dla ya:ye hamame hetaiyo. <sup>52</sup> Epalati yia:tapo Yesu hiye di dla ta:depame sisiyele mate Yelusalem dla i-ilapo tamalaiyo. <sup>53</sup> Epame yia: alila hapuloma dulu dla Yu so aiyalma aya dla ha:ha:mama God dla siyele ta:demha:ha:mdiyo.



## Ka:dle molo atlale yu Yonta ilimale Yon Yon buka ya: dulu koko

Yon buka iye Yesu ya: alotle tlalo oplami hale Yonta ilimuwapo. Ya:ta yu ilimale dulu dla koko pato ipo elema. Yesuye Kelisopo epame ya:ye God Yami ikadepepo. Epedeme dita Yesu dla mikadepe dlepiye, eta ditapo pasakalo hallowe halepe.

### *Yuta ma oplami moto ye*

<sup>1</sup> Ka:yapa ta:lamo ala pomita:plalo hallati Yu tatlale haluwapo. Yu etapo God mate haluwapo. Epame Yu eye Godpo. <sup>2</sup> Ya:ye ka:yapa ta:lamo kotiyamale oloma edla God mate haluwapo.

<sup>3</sup> Epedeme alisisi haleye ya: dimi mita:ple hawa ikadepe. Amasiyama alisisi hapulomaye hatlo ya: tle mimita:puwapo. <sup>4</sup> Epapele dulu dla pasakaloye hatlo ya: dulu dla eluwapo. Pasakalo etapo opa hapuloma dla hela:dle hamilalo haluwapo. <sup>5</sup> Epedeme hela:dle etapo amtuwale dulu dla hela:dle hamimhalapo. Epalati hela:dle eye amtuwaleta sumtuloweye po-ala:na.

<sup>6</sup> Epedeme oloma edla Godtapo oplami hale tane duwapo, ya: hiye Yon. <sup>7</sup> Ya:tapo opa dla hela:dleta puluwe kokoye atlamolowedeme puwapo. Epalati opa hapulomatapo yu e dalepame mikadepe dlepo depame. <sup>8</sup> Yon ya:ye pohela:dle, amasiyama ya:ye opa dla ikadepe hela:dle kokoye atlamolowedeme puwapo. <sup>9</sup> Adipalati, hela:dle ikadepe etapo ta:lamo pato dla dompumama opa hapuloma dla hela:dle hamilowe kokota momateka:pi dla hallati apuwapo.

<sup>10</sup> Epapedeme Yuye ta:lamo dla haluwapo. Epame ta:lamo patoye ka:yapa ya: tle mita:puwapo. Amasiyama ta:lamo sotapo ya:ye woloma pomalanatina. <sup>11</sup> Ya:ye ya: opa ikadepe dla puwapo. Amasiyama ya: opa ikadepeta ya:ye posolotamana. <sup>12</sup> Amasiyama opa anawolotapo ya:ye hampame ya: dla mo-mikadepe duwa, ya: opa ewolo dla itiyamale ma-hamiwapo, yia:tapo God ya: akimlala depo ha:ha:lepo depame. <sup>13</sup> Epapedeme yia:tapo God ya: akimlala duwaye, opa ikadepeta owayimlala hohomde api tle popena. Amasiyama Godta solotamale tle yia:ye God ya: akimlala duwapo.

<sup>14</sup> Epedeme Yutapo oplami moto yepame dia: dulu dla haluwapo. Ya:ye bokotiyapo malamale mate epo ikadepe koko mateta pasatepo haluwapo. Epame ditapo ya:ta hela:dleye me-natiwapo. Hela:dle eye Atapo Yami hatlo dla hamilalo hela:dle epapelepo.

<sup>15</sup> Yontapo ya: koko dla atlemama yu teta:le mate epo atluwapo, "Na:tapo atlam-sela:mama, oplami hale na: ko tle pulupe demsela:uwaye, oplami eye ipo. Ya:ta itiyamaletapo na:ta itiyamaleye tla:mtana. Adipalati, ya:ye na: ala pohallalo hallati ya: tatlale ka:yapa ma-haluwapo."

<sup>16</sup> Epedeme ya: dla bokotiyapo malamale pasatale ela dulu tle ditapo alila hapuloma ya: tle bokotiyapo malamaleye halomha:ha:po. <sup>17</sup> Epapedeme aiyalma kokoye Moses tle puwapo. Amasiyama bokotiyapo malamale koko mate epo ikadepe koko mateye Yesu Keliso tle puwapo. <sup>18</sup> Epapele dulu dla oplami haletapo Godye ya: inoma mate ponatina. Amasiyama God Yami hatlotapo di watle God kokoye mo-botomastauwapo. Adipalati, ya:tapo God mateka:pi dla halemama ikadepe God depo halapo.

### *Yon opa yú dla ka:ka:timalalota Keliso kokoye botomastale (Mat 3:1-12; Maka 1:1-8; Luk 3:1-18)*

<sup>19</sup> Yelusalem dla ha:ha:lalo Yu so dokopala sotapo God ka: epo opa ka: duka dla ha:ha:lalo so mate epo Libai elele halë so opa mate Yon hala dla taiya diyo, yia:tapo Yonye ikadepe anata: depo dalla natilowedeme. Epedeme yia: Yon hala dla tame epo atlaiyo,

“Wa:ye ikadepe anata:?” diyo. <sup>20</sup> Epalati Yontapo yia: yu ipi dla asiyama yu atloweye po-aliyo. Epammama ya:tapo yia: watle haliyamale dla atlemama epo atlaiyo, “Na:ye po-Keliso,” diyo.

<sup>21</sup> Epalati yia: ma asiyama ya: watle epo atlaiyo, “Ame wa:ye anata:? Wa:ye Ilayata:?” diyo.

Epalati asiyama ya:tapo epo atlaiyo, “Hao, pona:,” diyo.

Epalati ma asiyama yia:tapo ya: watle epo atlaiyo, “Wa:ye God tle yu hapame molo atlalo oplami pulupe depo omha:ha:uwa oplami wa:ta:?” diyo.

Epalati asiyama ya:tapo yia: watle epo atlaiyo, “Hao, pona:.”

<sup>22</sup> Epalati ma yia:ta epo atlaiyo, “Ame wa: anata:? Di solotama, dia: dokopala so dla asiyama yu tame atlowama. Epapedeme wa:skamu wa:ye ana demdi?” diyo.

<sup>23</sup> Epalati asiyama Yontapo God tle yu hapame molo atlalo oplami Aisayata atlale yu mate yia: watle epo atlaiyo,

“Na:ye dalupa dulu dla sisilamhala oplamipo,

Wua: Lod apiye ka:depo dolepo himiya.”

<sup>24</sup> Epalati Yu so dokopala sota taiya dle so Pa:lisi sotapo asiyama Yon watle epo atlaiyo, <sup>25</sup> “Wa:ta atlemama, ‘na:ye po-Keliso epo na:ye po-Ilaya epame na:ye podita omha:ha:uwa God tle yu hapame molo atlalo oplami,’ dlepo. Ame wa: adipalati opaye yú dla ka:ka:timsela:ma:?” diyo.

<sup>26</sup> Epalati asiyama Yonta yia: watle epo atlaiyo, “Na:tapo opaye isikimi yú siyapo dla ka:ka:tima. Amasiyama oplami haleye wua: dulu dla me-halapo. Epapele tlope wua: ya: kokoye powua:malamana. <sup>27</sup> Ya:ye na: ko tle pua oplamipo. Amasiyama na:tapo ya: hete alisisi dea totowatimoloweye po-ala:na.”

<sup>28</sup> Epedeme Yontapo Betani mo dla opaye Yoden aloma seme dla yú ka:ka:timhallati koko iye woyamaiyo.

### *Yesuye God ya: La:mpo*

<sup>29</sup> Alila hale dla Yesuta ya: hala dla pulati Yonta natipame epo atlaiyo, “Natiya, iye God ya: La:mpo.\* Ya:tapo ta:lamo so yia: bobtalimale hapulomaye howahalopo wellipe.

<sup>30</sup> Epedeme na:tapo pulupe depo atlamsela:uwa oplami eye ipo. Adipalati, na:tapo epo atlamsela:uwapo, oplami hale na: ko tle pulupe. Ya:ta itiyamaletapo na:ta itiyamaleye tla:mtana demduwapo. Epame ya:ye na: ala pohallalo hallati ya: tatile ka:yapa mahaluwapo demduwapo. <sup>31-33</sup> Epedeme Isael sota ya: kokoye woloma malastlepo depame na:tapo yia:ye yú dla ka:ka:timala puwapo.”

Epedeme Yonta ma ya:ta natili kokoye epo atlaiyo, “Na: ka:yapa Kelisoye anata: depame woloma pomalanatina. Amasiyama Godtapo na: watle epo atluwapo, ‘Wa: Kelisoye ipo malanatilipe. Sokota ya: dla malame ya: mate hallati natilipe. Epedeme ya:tapo opa dla itiyamale hamimama Hela:dle Soko dla ka:ka:timalalo hallepe,’ duwapo. Godta epo atlati dalepame alotle na: Hela:dle Sokoye seselema tea some malame ya: dla kolepo pollati natiwa. <sup>34</sup> Epapedeme na: koko iye ikadepe natipame ya:ye mikadepe God Yamipo demama yu iye wua: dla atlama.”

### *Yesuta ya: alotle tlalo so ka:yapa hohomale*

<sup>35</sup> Alila haletapo Yonta ya: alotle tlalo so opa dapiyamte mate mo hatlo medla ma me-ha:ha:iyo. <sup>36</sup> Epapele oloma edla Yesuta tlati natipame yia: watle epo atlaiyo, “Wua: natiya, eye God ya: La:mpo,” diyo.

<sup>37</sup> Epalati Yon ya: alotle tlalo so opa dapiyamteta yu e dalepame Yesu alotle dolum-tamalaiyo. <sup>38</sup> Epalati Yesuta yia:ta dapiyamteta ya: alotle dolumpumullati natipame helestame yia: watle epo atlaiyo, “Wua: apa koko hala puma:?” diyo.

\* **1:29:** La:m deye sipi aliya halo amkota:le semama apopo. Adipalati, Isael sotapo batalimale howahalowe dla sipi aliya amkota:le ipapeleye yumpame God watle hapimdiyo.

Epapalati asiyama yia:tapo ya: watle epo atlaiyo, “Labai, wa: hadima halemdi?” diyo. Labai hi ya: dulu kokoye imalalo oplami depo.

<sup>39</sup> Epalati asiyama ya:tapo epo atlaiyo, “Wua: puame natiya,” diyo. Epalati opa dapiyamte iwolotapo sali inoma mo-tamila:la halemtlati yia:tapo Yesu mate tame ya:ta halemde moye natiyo. Epame ya: mate alila pato medla ha:ha:iyo.

<sup>40</sup> Epedeme opa dapiyamte iwolo dulu dla oplami hale hiye Endulupo, Saimon Pita ya: ei. <sup>41</sup> Epapedeme Enduluta Yesu natipame ya: bapa Saimon totamaiyo. Ya: totamtame ya: natipame ya: watle epo atlaiyo, “Di Mesaya ma-nati,” diyo. Mesaya deye Keliso demama apopo.† <sup>42</sup> Epame Enduluta Saimonye Yesu hala dla semtaiyo. Epalati Yesuta ya: natipame ya: watle epo atlaiyo, “Saimon, Yon yami, wa: hiye ma Kepas dlepe.” Kepas deye Pita demama apopo.‡

### *Yesuta Pilipi mate Nataniyol mate sisilamale*

<sup>43</sup> Epame ma alila haleta Yesu ya: solotamaiyo, ma Ga:lili dla tlowedeme. Epapele oloma dla ya: oplami hale Pilipi umpame ya: watle epo atlaiyo, “Wa: na: dolumpuane,” diyo.

<sup>44</sup> Oplami Pilipi iye Betsaida oplamipo. Epapele dulu dla Betsaida mo iye Endulu mate epo Pita mate yia: mo ikadepepo. <sup>45</sup> Epapeleye Pilipita tame Nataniyol natipame ya: watle epo atlaiyo, “Di Moses mate epo God tle yu hapame molo atlamalalo so mateta yia: buka dla yu ilimama oplami hale alotle pulupe demduwa oplami eye ma-nati. Ya:ye Yosep yami, Nasalet mo dla hallalo oplami Yesupo,” diyo.

<sup>46</sup> Amasiyama Nataniyoltapo Pilipi watle epo atlaiyo, “Adipammama koko ka:dle Nasalet mo tle woyapa:?” diyo. Epalati Pilipita asiyama ya: watle epo atlaiyo, “Mowolo puame natine,” diyo.

<sup>47</sup> Epalati Nataniyolta Yesu mateka:pi dla pulati Yesuta ya: natipame epo atlaiyo, “Wua: natiya, oplami iye Isael oplami ikadepepo. Ya:ye ikadepe koko atlalo oplamipo,” diyo.

<sup>48</sup> Epapalati asiyama Nataniyolta ya: watle epo atlaiyo, “Wa: adipo na: kokoye malamo?” diyo. Epalati asiyama Yesuta ya: watle epo atlaiyo, “Na: wa:ye Pilipita ala po-tame natilalo hallati wa:ye pigi dali tou dla pollati nati,” diyo.

<sup>49</sup> Epalati Nataniyolta Yesu watle epo atlaiyo, “Labai, wa:ye God Yamipo. Epame wa:ye Isael so yia: dokopala oplamipo,” diyo.

<sup>50</sup> Epapalati asiyama Yesuta Nataniyol watle epo atlaiyo, “Wa: na:ta wa:ye dali tou dla pollati nati dla dalepame mikadepe dema:? Amasiyama koko eye yimka:mala, wa: alotle koko patotoye tlamelepe. <sup>51</sup> Epedeme na: ikadepe koko wua: watle atlema. Wua: Pepele dimo kokolomatapo gowaladepo hallati God ya: banakaka sotapo Opa Yami tle heta tulu heta tulu demha:ha:la natilipe,” diyo.

## 2

### *Ka:na mo dla oplamita a:ya halë*

<sup>1</sup> Alila dapiyamte mo-pololepo alotle Ga:lili mo pato dulu dla Ka:na mo yemala dla oplamita a:ya halë daya deiyo. Oloma edla Yesu ya: wai ma medla halaiyo. <sup>2</sup> Epalati Yesu mate epo ya: alotle tlalo so mateye daya dele edla pulupo depame sisilamaiyo. <sup>3</sup> Daya dele oloma edla wain yútapo mo-pokadlati natipame Yesu ya: waita Yesu watle epo atlaiyo, “Wain yúye mo-pokadena,” diyo.

<sup>4</sup> Epalati asiyama Yesuta ya: watle epo atlaiyo, “Wai namkale, wa: na:ta apa koko halepo depame na: hala dla puo? Na: alila ala po-umasema,” diyo.

† **1:41:** Epedeme Hibulu yuta Mesaya de mate epo Guliki yuta Keliso de mate ya: dulu kokoye hatlo Godta sale oplami demama apopo. ‡ **1:42:** Epedeme Hibulu yuta Kepas de mate epo Guliki yuta Pita de mate ya: dulu kokoye hatlo ewala semama apopo.

<sup>5</sup> Epapalati asiyama ya: waita aya dulu dla oko halalo so watle epo atlaiyo, “Wua: Yesuta wua: watle yu atlaiyo e dalepame koko eye haiya,” diyo.

<sup>6</sup> Epapele dulu edla ewalata mimita:ple eto 6 popa:iyo. Epapeleye eto 6 eye 100 lita yú tilimalalo etopo. Yu sotapo yia: toto koko dolumama eto dulu edla yú tilipame do mate palita mate woloma howahalomdiyo.

<sup>7</sup> Epapeleye Yesutapo aya dulu dla oko halalo so watle epo atlaiyo, “Eto hapuloma iye yúta poposatilimaiya,” diyo. Epalati yia:tapo eto hapulomaye yúta poposatilimaiyo.

<sup>8</sup> Epame ya:tapo oko so watle ma epo atlaiyo, “Wua: yú tipame daya dele dla dokopala dlalo oplami watle tame hamiya,” diyo. <sup>9</sup> Epalati yia:ta tame eto 6 dulu dla yú tilimama natilati wain yúta mo-popa:la natiyo. Epalati yia:tapo wain yú tipo hamtame dokopala oplami dla hamiyo. Epalati dokopala oplamitapo wain yú eye dla natiyo. Epapele dulu dla ya: wain yú ita puale sitaliye ya: yeliyena. Amasiyama ya: oko so tlo yia:malamana. <sup>10</sup> Epammama ya:tapo a:ya hala puale oplamiye sisilapame ya: watle epo atlaiyo, “Opata daya dele oloma edla yia: wain yú opalli tatile ilimdepo. Epame opatapo yú e mopokadlati natipame ma wain yú pase opalilalo wekeleye ilimdepo. Amasiyama wa: wain yú sikemte opalliye himimpolopo depo alotle hame woyamalepo,” diyo.

<sup>11</sup> Epedeme Ga:lili mo pato dulu dla Ka:na mo yemala dla Yesutapo ka:yapa itapu ulugiyemale koko nati-imama ya:ta hela:dle mate nati-iyo. Epalati ya: alotle tlalo sotapo koko e natipame ya: dla mikadepe diyo.

<sup>12</sup> Epedeme koko ita tame gudlati Yesutapo ya: wai mate epo ya: eidulo mate epame ya: alotle tlalo so mate Kapaniyem mo dla tamalaiyo. Epame yia: edla tame ha:ha:mama alila opi pololiyo.

*Yesuta aiyalma aya dla opa dodolomsalle koko  
(Ma:t 21:12-13; Maka 11:15-17; Luk 19:45-46)*

<sup>13</sup> Epapele dulu dla Yu sota Namilatale daya dele alilata mo-teteka:mpulati Yesutapo Yelusalem dla hetaiyo. <sup>14</sup> Epame ya: edla hetame natilati opatapo aiyalma aya dulu dla bulumkiyawa aliya mate epo sipi aliya mate epo hilipi tea mateye asiyama mate halomha:ha:la natiyo. Epame opa opitapo mani mila:pi meyelope meyelope dleye i-ilapo halomha:ha:la natiyo. <sup>15</sup> Epalati Yesutapo alimama dea halopame kikitama epapele tipo kikitama e mate aliya ompopa:le so hapulomaye heyulumtamama yia: aliya mate alikili dla dodolomsaliyo. Epame mani i-ilapo halompopa:le helemale mape alikili dla heheletipo polollati manita alikili a:ma dla kukutipo hutiyemyaiyo. <sup>16</sup> Epame ma hilipi tea ipila:po ompopa:lalo so watle epo atlaiyo, “Alisisi hapuloma iye itle alikili a:ma halopo woyamaiya. Wua: na: A ayaye ma wua:ta alisisi halomalalo aya demiya,” diyo.

<sup>17</sup> Epapedeme koko ita woyamalati natipame Yesu ya: alotle tlalo sotapo God yu buka dulu dla ipo atlama kokoye malamaiyo, “Na:ta wa: aya koko dla sikemte malamama na: dupa duluye dlapa some sikemte teleka:ma.”

<sup>18</sup> Epalati Yu so dokopala sota Yesuta alisisi hapuloma hatitipo ompopa:le soye aiyalma aya dulu tle alikili dla dodolomsalle koko natipame ya: watle epo atlaiyo, “Wa: apa itiyamale hapame koko ipapele hao? Epedeme wa: itiyamale iye God tle hauwa dlepiye, wa: ka:dena, di watle ulugiyemale koko hale nati-ine,” diyo.

<sup>19</sup> Epalati asiyama Yesuta yia: watle epo atlaiyo, “Wua:tapo aiyalma aya iye dokostlepiye, na:tapo matle alila dapahatlope dulu dla halowepo,” diyo.

<sup>20</sup> Epalati yia:tapo ya: watle epo atlaiyo, “Di 46 sokomoko dulu dla aya iye hauwapo. Epapele dulu dla wa: adipammama ma alila dapahatlope dulu dla aya i hapa:?” diyo.

<sup>21</sup> Amasiyama Yu so dokopala so iwolota Yesuta atlamale kokoye woloma pomalamana. Adipalati, Yesutapo aiyalma aya koko atlaleye ya:skamu ya: moto atlemama apiyo.

<sup>22</sup> Epapedeme Yesuta popo sila:timhetale alotle Yesu ya: alotle tlalo sotapo Yesuta

atlamale koko iye malamaiyo. Epammama yia:tapo God yu bukata atlale mate epo Yesuta atlamale yu mate dla mikadepe diyo.

<sup>23</sup> Yesuta Namilatale daya dele oloma dla Yelusalem dla hetame ulugiyemale koko halomhallati opa hapulomata e natipame ya: dla mikadepe diyo. <sup>24</sup> Amasiyama Yesuta yia:ta ya: dla mikadepe dle koko e natimama pase mikadepe diyo. Adipalati, ya: opa hapuloma dupa dulu malamaleyeye ya: malastana. <sup>25</sup> Epedeme ya: dla oplami haletapo opata yia: dupa dulu dla malamale hutiyeye imoloweye po-ala:na. Adipalati, ya: tatile yia: dupa dulu dla malamale hutiyeye hapulomaye mo-malastame halaiyo.

### 3

#### *Nikodimasta Yesu hala dla puale*

<sup>1</sup> Epedeme oplami hale halaiyo, ya: hiye Nikodimas. Ya:ye Pa:lisi oplami halemama Yu so dokopala so dulu dla ya: ma dokopala oplami hale halaiyo. <sup>2</sup> Epapeleye ya:tapo utula:la Yesu hala dla puame ya: watle epo atlaiyo, “Labai, dimalamana, wa:ye Godta tane dle imalalo oplami wa:po. Adipalati, oplamitapo isikimi meyelo ulugiyemale koko ipapele pohalomsela:lowa. Amasiyama Godtapo ya: mate hallepiye, eta ya: ulugiyemale koko ipapeleye halomelepe,” diyo.

<sup>3</sup> Epapalati Yesuta asiyama ya: watle epo atlaiyo, “Na: ikadepe koko wa: watle atlema. Oplamita mamisika: pohamalalo wekelepiye, ya: God ya: mo koko dla po-ulatulawa,” diyo.

<sup>4</sup> Amasiyama Nikodimasta asiyama epo atlaiyo, “Oplamitapo mo-ta:po halemama ma-adipammama ya: waita mamisika: hampa:? Ya: po-ala:na, ma yimka:mala dlati ya: waita ma hamoloweye,” diyo.

<sup>5</sup> Amasiyama Yesuta ma epo atlaiyo, “Na: ikadepe koko wa: watle atlema. Oplamitapo yú tle epo Hela:dle Soko tle ma po-amko dlalo hallepiye, ya: God ya: mo koko dla po-ulatulawa. <sup>6</sup> Ta:lamo sotapo ta:lamo yimlala hatitimdepo. Amasiyama Hela:dle Sokota pasakalo hapimhala soye God ya: akimlala demha:ha:po. <sup>7</sup> Epapedeme wa: na:ta wa: watle atlemama, ma amko dene dle yu dalemama ase sikemte yelemiya. <sup>8</sup> Wa: mosisita ya:ta solotamale dla hotlomde yuye me-dalemdepo. Amasiyama wa: ya:ta pumde api mate epo tamde api mate powa:malamana. Epedeme Hela:dle Sokota pasakalo hapimha:ha: so dla ma epamhalapo.”

<sup>9</sup> Epalati Nikodimasta epo atlaiyo, “Koko iye adipo woyapa:?” diyo.

<sup>10</sup> Epapalati Yesuta ya: watle epo atlaiyo, “Wa: Isael so dulu dla imalalo oplami hala metlo, ma ala koko iye pomalamalalo halapa? <sup>11</sup> Epedeme na: ikadepe koko wa: watle atlema. Na:ta momalamale mate epo na:ta tlamale koko mateye Yu so wua: dla atlamsela:po. Epapele tlope wua: na: yu hala allipo. <sup>12</sup> Epedeme na:ta wua: watle ta:lamo hema koko hapuloma hutiyeye wua: dla atlamalati wua: pomikadepe dlalo wekelepo. Epapele dulu dla wua: ma adipo na:ta Pepele dimo dla hutiyeye koko wua: dla atlati mikadepe depa:? <sup>13</sup> Epapedeme hatlo Opa Yamitapo Pepele di tle ta:lamo hema maluwapo. Epame hatlo ya:tapo ma ilame Pepele dimo dla hetlepe. <sup>14</sup> Epedeme Mosesta dalupa dulu dla olita mita:ple ilama hame ta:duwaye, epammama opata Opa Yami mape epo hamame ta:dlepe. <sup>15</sup> Epapedeme opa anawolotapo ya: dla mikadepe dlepiye, yia:ye kokó halepo hallalo pasakalo halepe.

<sup>16</sup> Godtapo di ta:la so sikemte bokotiyapo malapame Yami hatlope tulune duwapo. Epedeme opa anawolotapo ya: dla mikadepe dlepiye, yia: popalliwa, amasiyama yia:ye halepo halepo pasakalo halepe. <sup>17</sup> Epapedeme Godtapo Yami ta:lamo hema tulune duwaye, ta:lamo so batalimale asiyama hamilipo depo po-apena. Amasiyama ta:lamo sota ya: tle pasakalo gadle halepo depame tulune duwapo. <sup>18</sup> Epedeme opa anawolotapo God Yami dla mikadepe depo ha:ha:ma:, yia: watle batalimale asiyama pohamilowa. Amasiyama opa anawolotapo ya: dla pomikadepe dlalo ha:ha:ma:, yia:ye



yia: bobtalimale asiyama mo-halomolowedeme ha:ha:po. Adipalati, yia: God Yami hatlo dla pomikadepe dena. <sup>19</sup> Epedeme hela:dletapo ta:lamo hema mo-puwapo. Amasiyama ta:la sotapo hela:dle eye posolotamalalo wekepame ma amtuwale tlo sikemte solotamuwapo. Adipalati, yia:ta moto mate koko halomha:ha:leye pta batalimana. Epapele koko tle Godtapo yia: batalimale asiyama hamilipe. <sup>20</sup> Epapedeme batalimale koko halomha:ha:lalo soye hela:dle allimama hela:dle dla puluweye sikemte wowota:mdepo. Adipalati, hela:dletapo yia:ta batalimale koko halomha:ha:leye haliyamale dla nati-ilala depame. <sup>21</sup> Epedeme opa anawolotapo ikadepe koko halomha:ha:ma:, yia: hela:dle dla matiloweye powowota:semde. Adipalati, eta yia:ta Godta solotamale koko halomha:ha:ye nati-ipo.”

*Yon opa yú dla ka:ka:timalalota Yesu koko atlale*

<sup>22</sup> Epame matle koko ita tame gudlati Yesutapo ya: alotle tlalo so mate Yelusalem meleme ma Yudiya mo seme dla tamalaiyo. Yia: edla tame ha:ha:mama opaye yú dla ka:ka:timaiyo. <sup>23-24</sup> Amasiyama Yon ya: ala amtuwale aya dulu dla poka:stlalo hallati Salim mo mateka:pi Ainon dla opaye yú dla ka:ka:timhalaiyo. Adipalati, mo edla yú pato halaiyo. <sup>25</sup> Epapele oloma edla Yon ya: alotle tlalo sotapo Yu sota yia: toto koko dolumama do mate epo hete mate howahalomde koko dla Yu oplami hale mate yu topuloliyo. <sup>26</sup> Epame yia: puame Yon watle epo atlaiyo, “Labai, wa:ta ka:yapa Yoden aloma seme dla di watle oplami hale koko atlemama ya:ye Kelisopo duwaye, oplami etapo wata ma opaye yú dla ka:ka:timhalema. Epalati opa hapulomatapo ma ya: hala dla tamhalapo,” diyo.

<sup>27</sup> Amasiyama Yonta epo atlaiyo, “Oplamitapo isikimi meyelo koko pohalowa. Amasiyama Godta ya: watle itiyamale hamilipiye, ya: eta koko e halepe. <sup>28</sup> Epedeme wua: na:ta atlemama na:ye po-Keliso duwa kokoye ma-daluwapo. Amasiyama na:ye isikimi ya: api dinapolowe koko dla tane dle oplamipo. <sup>29</sup> Epapedeme oplamitapo a:ya halepiye, ya: gadlalo oplamitapo ya: mateka:pi dla halemama ya: yu dalepame sikemte siyemdepo. Epapele api tle na: mape wata sikemte siyele mate halapo. <sup>30</sup> Epedeme ka:dena, Kelisota di ikadepe dla hallati asiyama na:ta isili ikadepe dla hallowe ka:pi.

<sup>31</sup> Epedeme Pepele di tle puale oplamitapo opa hapuloma tla:mtame halapo. Amasiyama ta:lamo tle puale oplamiye e ta:lamo oplamipo. Adipalati, ya: isikimi ta:lamo hema koko hutiyehapuloma tlo atlamdepo. Epapedeme Pepele di tle puale oplamitapo di ikadepe dla halapo. <sup>32</sup> Ya: ya:ta tlamale koko mate epo dlalle koko mate ma-atlamdepo. Amasiyama oplami haletapo ya: yu pohasemde. <sup>33</sup> Amasiyama oplami antapo ya: yu dalepame mikadepe dlepiye, ya:tapo God yuye ikadepe demama apelepe. <sup>34</sup> Epedeme Godta tane dle oplamitapo God tle yu hapame atlamsela:lepo. Adipalati, Godtapo ya: Hela:dle Soko sukulu pa:le ya: watle ma-hamiwapo. <sup>35</sup> Godtapo Yami bokotiyapo malamama koko hapulomaye ya:ta dokopala depohallepo depame itiyamale ma-hamiwapo. <sup>36</sup> Epedeme oplami antapo ya: dla mikadepe dlepiye, ya:ye halepo halepo pasakalo halepe. Amasiyama oplami antapo ya: dla pomikadepe dlalo wekelepiye, ya:ye halepo halepo pasakalo pohalowa. Amasiyama Godta siyaladletapo ya: mate kokó me-hallepe.”

## 4

*Yesu mate epo Samaliya a:ya mate*

<sup>1</sup> Pa:lisi sotapo Yesuta opa pasatale yú dla ka:ka:timsela:mama Yonta opa yú dla ka:ka:timsela:le tla:mtale kokoye daliyo. Epame opa hapulomatapo Yesu dolumtale koko ma me-daliyo. <sup>2</sup> Epapele dulu dla Yesu meyelo opaye yú dla poka:ka:timsela:na. Amasiyama ya: alotle tlalo sotapo opaye yú dla ka:ka:timsiyamaiyo. <sup>3</sup> Epeleye Yesutapo

Pa:lisi sota ya: koko mo-malamale koko dalepame Yudiya mo saliyome ma Ga:lili mo dla ilame taiyo.

<sup>4</sup> Epame ya: Ga:lili dla ilame tamama Samaliya mo dla tlalo api tle taiyo. <sup>5</sup> Yesuta Samaliya mo edla puame mo yemala Saika demde dla puame woyamaiyo. Epedeme Saika mo yemala iye Yokobtapo yami Yosep watle ta:la hamili mateka:pi dla halapo.

<sup>6</sup> Epapeleye Yokobta yú kolomaleye edla ala me-polaiyo. Epapele dulu dla Yesu ya: mo selemalli pualeta sukalemama hopeyamalati yú kolomale mateka:pi edla hedepo polaiyo. Oloma eye sali mo-dukuslopi dla hallati apiyo.

<sup>7-8</sup> Epame Yesu ya: alotle tlalo soye mo dulu dla daya halomala tlati Samaliya a:yata yú kolomale edla yú tila puaiyo. Epalati Yesutapo ya: watle epo atlaiyo, “Na: yú tipo hamine,” diyo.

<sup>9</sup> Amasiyama a:yata ya:ta atlale dalepame yeliyo. Adipalati, Yu so mate epo Samaliya so mate posadepo ha:ha:mdiyoy. Epapedeme a:yatapo Yesu watle epo atlaiyo, “Wa: adipalati na: watle yú dalema:? Adipalati, wa:ye Yu oplamipo. Amasiyama na:ye Samaliya a:yapo,” diyo.

<sup>10</sup> Epalati asiyama Yesuta ya: watle epo atlaiyo, “Wa: Godta isikimi hapimhala koko malastapame epo wa: watle yú yilo otele oplami ya: koko ma malastale hallepiye, wa: ya: watle pasakalo hapimhala yú dallepe. Epalati asiyama ya:tapo wa: watle hamilipe,” diyo.

<sup>11</sup> Amasiyama a:yatapo asiyama Yesu watle epo atlaiyo, “Wa: pasakalo hamilalo yú iye hadima tipa:? Epame wa: dla yú tilowe eto hawa. Epame yú kolomale i mape pta sikemte ga:tluna. <sup>12</sup> Epedeme wa: di mama Yokobye isili dla hamtulumama ma asiyama wa: tlo di dla hamhetapa? Adipalati, di mama Yokobtapo yú kolomale iye kolomuwapo, epame ya:tapo ya: akimlala mate epo ya: aliya mate yú kolomale hatlo hema yú dlomha:ha:mduwapo.”

<sup>13</sup> Epalati asiyama Yesuta ya: watle epo atlaiyo, “Opa anawolotapo yú kolomale hema yú dlomelepiye, yia: ma alotle yú teta:lepe. <sup>14</sup> Amasiyama oplami antapo na:ta yú hami iye delepiye, ya: ma alotle yú pota:lowa. Epedeme pasakalo hamilalo yú na:ta hami etapo ya: tle matale pokostapame alowamhalemama halepo halepo pasakaloye hapimhallepe.”

<sup>15</sup> Epalati asiyama a:yatapo ya: watle epo atlaiyo, “Wa:ta atla yú eye na: watle hamine, na:ta ma alotle yú pota:lalo hallepo depame. Epame na: ma posolotamasema, hema puame ma yú tidemhallowe,” diyo.

<sup>16</sup> Epapalati Yesuta ya: watle epo atlaiyo, “Wa: tame wa:wolali sempuane,” diyo.

<sup>17</sup> Epalati asiyama a:yata ya: watle epo atlaiyo, “Na: oplami hawa,” diyo.

Epalati asiyama Yesuta epo atlaiyo, “Wa:ta oplami hawa dleye, wa: ikadepe koko atlalepo. <sup>18</sup> Amasiyama dulu edla wa: opa do supulastale epapele mo-halopo haluwapo. Epapedeme oplami watapo wa: mate halaye, powa:wolali ikadepe,” diyo.

<sup>19</sup> Epalati asiyama a:yata ya: watle epo atlaiyo, “Wa:ye God yu molo atlalo oplami hale mle. <sup>20</sup> Epedeme di mamadulotapo tamali di hema God dla sisiyemha:ha:mduwapo. Amasiyama Yu so wua:tapo atlemama hatlo Yelusalem mo dla God dla sisiyelowe ka:pi demdepo,” diyo.

<sup>21</sup> Epapalati Yesuta asiyama ya: watle epo atlaiyo, “Na: ikadepe koko wa: watle atlema. Alilata mo-pulupe, opatapo A God dla sisiyelowedeme Yelusalem dla ma potlalo weke epo Samaliya dla ma potlalo weke demha:ha:lowe. <sup>22</sup> Samaliya so wua:ye, wua:ta sisiyemde kokoye powua:malamana. Amasiyama di Yu so, dia: tlo dita sisiyemde kokoye dimalamana. Adipalati, pasakalo gadle halowe kokoye hatlo Yu so tle puapo. <sup>23</sup> Epapedeme alilata pulupe, amasiyama alila eye mo-puapo, mikadepe ya: dla sisiyelalo sotapo woloma Soko tle epame ikadepe koko tle A God dla sisiyelowe. Adipalati, A Godta ipapele api tle ya: dla sisiyelalo so tlo sikemte totamhalapo. <sup>24</sup> Epapedeme God

ya:ye Sokopo. Epedeme ya: dla sisiyelalo sotapo woloma Soko tle epame ikadepe api tle ya: dla sisiyelowe ka:pi,” diyo.

<sup>25</sup> Epalati asiyama a:yata epo atlaiyo, “Na:malamana, Mesaya, opata semama Keliso demdiye, mo-pulupe. Epedeme ya:ta puame di watle koko hapulomaye woloma imelepe,” diyo.

<sup>26</sup> Epalati asiyama Yesuta ya: watle epo atlaiyo, “Eye wa: mate yukamhala oplami na:po,” diyo.

<sup>27</sup> Epamha:ha:le oloma edla Yesu ya: alotle tlalo sota mo dulu tle puame Yesuta a:ya mate yukamhallati natipame sikemte yiyeliyo. Amasiyama oplami haletapo ya:ta a:ya mate yukamhalale koko dla atlanatili yu hale po-atlaiyo.

<sup>28</sup> Epame a:ya etapo ya: eto medla pamelepame ma mo dulu dla opa atla taiyo.

<sup>29</sup> A:yata tame epo atlaiyo, “Wua: puame oplami hale i natiya. Ya:tapo na:ta koko halomhaluwa hapulomaye atlamhalalepo. Epedeme pona:malamana, ya:ye Keliso sepena.” <sup>30</sup> Epalati mo so hapulomatapo Yesu natila tamalaiyo.

<sup>31</sup> Opa hapulomatapo ala Yesu natila pumha:ha:lati Yesu ya: alotle tlalo sota Yesu watle epo atlamyaiyo, “Imalalo oplami, daya dene,” demyaiyo.

<sup>32</sup> Amasiyama Yesuta yia: watle epo atlaiyo, “Na:ta daya dlowe me-elapo. Amasiyama na: daya eye powua:malamana,” diyo.

<sup>33</sup> Epalati Yesu ya: alotle tlalo sotapo yiskamu yia: dulu dla epo atlamyaiyo, “Oplami haleta ya: dla daya ma-hamiyo,” demyaiyo.

<sup>34</sup> Amasiyama Yesutapo yia: watle epo atlaiyo, “Na: dayaye Godta solotamale koko halowe kokopo. Epame ya:ta na:ye tane duwapo, ya:ta oko hamiliye hamtame mosukulu dla gudlepo depame. <sup>35</sup> Epedeme wua: ipo atlamha:ha:po, ‘mama dapiyamte dapiyamte dle pololepame alisisi emaleye hauwallowe,’ demha:ha:po. Amasiyama na: ikadepe koko wua: watle atlema. Wua: inoma towanatipame alisisi emale dla natiya. Adipalati, alisisi emaleye ma-hauwallowe oloma dla ha:ha:po. <sup>36</sup> Epapedeme alisisi emale hauwallalo sotapo asiyama ka:dle halomha:ha:po. Adipalati, yia:tapo opaye dlomoko some dalepame halopo puame kokó halepo halepo pasakalo halowe mo dla kolumelepe. Epedeme alisisi emalalo so mate epo alisisi hauwallalo so mate yimkata sisiyelepe. <sup>37</sup> Epapele dulu dla yuta ipo atla kokotapo ikadepe depo, ‘Opa opitapo alisisiye emelepe. Epalati ma opa opitapo alisisi eye hauwallepe.’ <sup>38</sup> Epedeme na: wua:ta alisisi pe-emalalo wekele mo dla emale alisisi hauwalla taiya dema. Adipalati, mo edla opa opitapo oko pato ma-hauwapo. Epapele tlope ma wua:ta tame hauwallepe.”

### *Samaliya sota mikadepe dle koko*

<sup>39</sup> Samaliya a:yatapo opa watle tame atlemama, “Na:ta koko halomhalale hapulomaye ya:ta na: watle atlepa:mele de,” dlati Samaliya sotapo yu e dalepame Yesu dla mikadepe diyo. <sup>40</sup> Epammama yia:tapo puame Yesu watle atlemama, “Wa: aseka dia: mate halane,” diyo. Epalati Yesutapo alila dapiyamte yia: mate halaiyo. <sup>41</sup> Epapele dulu dla opa hapuloma mape ya:ta atlamale yu dalepame ya: dla mikadepe diyo. <sup>42</sup> Epammama yia:tapo a:ya watle epo atlaiyo, “Di ka:yapa wa:ta Yesu kokoye di watle atlamalati wa: yu dla dalepame mikadepe duwapo. Amasiyama di watapo bidulo ya:ta atlamhallati dalepame mikadepe dema. Epedeme dimalama, oplami iye ta:lamo opa hapuloma yia: pasakalo gadlalo oplamipo,” diyo.

<sup>43-44</sup> Epapele dulu dla Yesutapo Samaliya sota mikadepe dle koko natipame ya:skamu epo atlaiyo, “God tle yu hapame molo atlalo oplamiye ya: mo so ikadepeta allipe,” diyo. Yesu alila dapiyamte Samaliya dla halepo gudepame ma Ga:lili mo dla taiyo. <sup>45</sup> Epame ya: Ga:lili dla puame woyamalati opata ya:ye sadle mate semhetaiyo. Adipalati, yia: mape Yesuta Yelusalem dla Namilatale daya dele oloma dla ulugiyemale kokó halomhalaleye me-natiyo.

*Yesuta gamani oplami yami ka:dle*

<sup>46</sup> Epame Yesu Ga:lili mo dla halemama ma Ka:na mo dla taiyo. Mo eye ya:tapo yú ikadepeye ma wain yú dla yepo meluwapo.

Epapele oloma dla Kapaniyem mo dla gamani oplami hale yamitapo esiyemhalaiyo.

<sup>47</sup> Epapeleye gamani oplami etapo Yesuta Yudiya mo tle ma Ga:lili mo dla puale koko dalepame Yesu hala dla taiyo. Ya: tame Yesu watle epo atlaiyo, “Na: maseyemalaye esiyemhalemama mo-pola yakomelema. Epedeme wa: puame na: maseyemalaye ka:dene,” diyo.

<sup>48</sup> Amasiyama Yesuta epo atlaiyo, “Wua: adipalati ulugiyemale koko tlo tlapame mikadepe dlowe tlo sikemte sosolotama:?” diyo.

<sup>49</sup> Epalati asiyama oplami eta Yesu dla epo atlaiyo, “Wa: na: maseyemala mo-polala depame hapele puame ya:ye ka:dene,” diyo.

<sup>50</sup> Amasiyama Yesuta ya: watle epo atlaiyo, “Wa: ma ilamtane. Wa: maseyemalaye ma-ka:dlepo,” diyo.

Epapalati oplamitapo Yesuta atlamale koko dla dalepo mikadepe depame ma ya: mo dla ilamtaiyo. <sup>51</sup> Epame ya: ala me-api duka dla tamhallati ya: oko sota puame ya: watle epo atlaiyo, “Wa: maseyemalaye mo-ka:depo poloma,” diyo.

<sup>52</sup> Epalati oplami eta asiyama yia: watle epo atlaiyo, “Ya: sali inoma oloma hadima hallati esiyelea ya: tle kelestauwa?” diyo. Epapalati asiyama yia:ta epo atlaiyo, “Tatla alila salita mo-gidlati oloma edla kelestauwa,” diyo.

<sup>53</sup> Epalati oplami ya: malamaiyo, adipalati, sali mo-gidle oloma eye Yesutapo ya: watle atlemama, “wa: maseyemalaye mo-ka:dlepo,” dle oloma epo. Epedeme oplami ya: mate epo ya: aya dulu dla ha:ha:lalo so mate Yesu dla mikadepe diyo.

<sup>54</sup> Epapedeme Yesutapo Yudiya mo tle ma Ga:lili mo dla puame ulugiyemale koko halëye ita ma dapiyamte diyo.

## 5

*Yesuta Betesda yú kolomale dla oplami ka:dle*

<sup>1</sup> Epedeme koko ita tame gudlati Yu sotapo daya dele hale dlowedeme Yelusalem dla hetlati Yesu ya: mape edla hetaiyo. <sup>2</sup> Epapeleye Yelusalem mo kosukulli dla kokoloma hale Sipi Aliya Kokoloma demde mateka:pi dla dlopi dota yú huhutamalalo kolomale me-polaiyo. Yú huhutamalalo kolomale ya: hiye Yu so yu mate semama Betesda demdepo. Epeleye yú kolomale alikili tle aya halomale 5ta popa:iyo. <sup>3-4</sup> Epapeleye esusulumale so mate epo inoma kokowele so mate epo akoloyalemale so mate epo moto palli so mateta aya edla hutiyemdiyo. [Epedeme yia: edla hutiyemama banakaka oplami haleta tulume yúye pumelepo depame omhutiyemdiyo. Adipalati, banakaka oplamita yú pumhalepo gudlati alotle ya: tatile yú dulu edla tullalo oplamiye ma-ka:dlepe demdiyo.] <sup>5</sup> Epapeleye esusulumale so hutiyele dulu edla oplami hale 38 sokomoko dulu dla esiyemhalale oplami elaiyo. <sup>6</sup> Yesuta ya:ta mo-powataliya esiyemhalale natipame ya: watle epo atlaiyo, “Wa: matle ka:dlowe solotama:?” diyo.

<sup>7</sup> Epalati asiyama oplami eta ya: watle epo atlaiyo, “Yúta mo-pumhallati na: gademama na: hamame tuluwe oplamita pa:mde,” diyo. “Adipalati, na: ala tulluwe me-dekelemhallati oplami hale ya: tatile tulumde,” diyo.

<sup>8</sup> Epalati Yesuta ya: watle epo atlaiyo, “Wa: sila:time wa: wa:ya hame ma-tane,” diyo.

<sup>9</sup> Epapele oloma medla oplamitapo ma-ka:depo sila:time ya: wa:ya hame ma-taiyo. Amasiyama koko ita woyamaleye Yu sota inoma sumalalo alila dla apiyo. <sup>10</sup> Epedeme Yu so dokopala sotapo oplamita wa:ya hamtla natipame ya: watle epo atlaiyo, “Inoma sumalalo alila hema oplami haleta wa:ya hamtla aiyalma,” diyo.

<sup>11</sup> Amasiyama oplamita asiyama epo atlaiyo, “Oplami na: ka:dletapo atlemama, ‘Wa: wa:ya hame ma-tane,’ dlati na: epalati ma-tama,” diyo.

<sup>12</sup> Epalati asiyama yia:tapo ya: watle epo atlaiyo, “Oplami anta wa: watle atlemama, ‘wa: wa:ya hamtane,’ di?” diyo.

<sup>13</sup> Amasiyama oplami etapo ya: ka:dle oplamiye woloma pomalamalalo wekiyo. Adipalati, opa hapulomata sikemte alumtulati Yesuye ya: saliyome ma-tale halaiyo.

<sup>14</sup> Alotle Yesutapo oplami eye aiyalma aya dla pollati natipame ya: watle epo atlaiyo, “Wa: natine, wa: wata ma-ka:dlepo. Epedeme wa: matle batalimale koko halom-sela:miyo. Wa: matle batalimale koko halomsela:lepiye, koko batalimale patota ma wa: dla woyamalala,” diyo. <sup>15</sup> Epalati oplamitapo tame Yu so dokopala so dla atlemama epo atlaiyo, “Yesuta na:ye ka:de,” diyo.

<sup>16</sup> Epapele dulu dla Yesutapo Yu sota inoma sumalalo alila dla koko ipapele halati Yu so dokopala sotapo siyalasiyalademama ya: dla sikemte alliyi. <sup>17</sup> Amasiyama Yesutapo yia: watle epo atlaiyo, “Na: Aye alila hapuloma dulu dla oko hamhalapo. Epapedeme na: mape alila hapuloma dulu dla ala me-oko hamhalapo,” diyo.

<sup>18</sup> Yesuta yu epo atlati asiyama yia:tapo ya: yumuluweye sikemte solotamaiyo. Adipalati, ya:tapo hatlo Yu sota inoma sumalalo alilaye popostana, amasiyama Godye ma ya: A ikadepe depame ma ya:skamu ya:ye God mate hatlopepo dlati apiyo.

### *Yesuta Godta itiyamale hamhala koko*

<sup>19</sup> Epedeme Yesutapo Yu so dokopala so watle epo atlaiyo, “Na: ikadepe kokoye wua: watle atlema. Maseyematapo meyelo solotamale tle koko hale pahalowa. Amasiyama Maseyematapo isikimi ya: Ata koko halomde e natipame ya: ma koko eye hamdepo. <sup>20</sup> Epedeme Atapo Yami sikemte bokotiyapo malamama ya:ta koko halomhalemde hapulomaye Yami watle nati-imdepo. Epapedeme wua:tapo Yamita koko halati natipo yiyellepo depame Atapo ya: watle koko sikemte patoto halomolowe nati-ilipe. <sup>21</sup> Epapele dulu dla Atapo palli soye ma pasakalo hapimhalaye, epammama Yami mape ya:ta solotamale so dla pasakalo hapimhalapo. <sup>22</sup> Epedeme Aye opa koko pogladesemde. Amasiyama ya:tapo Maseyemala watle itiyamale ma-hamiwapo, ya:tapo opa hapuloma koko gladlalo hallepo depame. <sup>23</sup> Epapele dulu dla Atapo koko i hauwapo, opatapo A dla heodemama sisiyemdiye, epammama yia:ta Maseyemala dla ma heodepo sisiyelepo depame. Epapedeme oplami antapo Maseyemala dla heodepo siyele pohamilalo halema:, ya:ye A God ya: tane dle oplami dla mape heodepo siyele pohamimhalasema.

<sup>24</sup> Epedeme na: ikadepe koko wua: watle atlema. Oplami antapo na: yuye dalepame na:ye tane dle oplami dla ma mikadepe dlepiye, ya:ye halepo halepo pasakalo ma-hamhalapo. Epapele oplamiye ya: batalimale asiyama pohamilowa. Ya:ye powale tle mo-ulatame pasakalo dla halapo. <sup>25</sup> Epapedeme na: ikadepe kokoye wua: watle atlema. Alilatapo pulupe, amasiyama alila eye mo-puapo, soko palli sotapo God Yami yu dalloweye. Epapele dulu dla opa anawolotapo ya: yu dalepame ya: dla mikadepe dlepiye, yia:ye pasakalo hallowe halomelepe. <sup>26</sup> Adipalati, Atapo pasakalo hapilowe dla itiyamale hamhalaye, epammama ya:tapo itiyamale hatlo me-epapeleye Maseyemala watle ma-hamiwapo. <sup>27</sup> Epame Atapo Maseyemala watle itiyamale ma-hamiwapo, ya:tapo opa hapuloma yia: koko gladlepo depame. Adipalati, ya:ye Opa Yamipo.

<sup>28</sup> Epedeme na:ta atlamale yu hema dalepo ase sikemte yiyelemiya. Adipalati, alilatapo mo-pulupe, palli so yia: wabasi dulu dla hutiyele sotapo Opa Yami yu dalepame yia: wabasi dulu tle silliweye. <sup>29</sup> Epapele dulu dla opa anawolotapo ka:ka:dle koko halomha:ha:uwa, yia:ye halepo halepo pasakalo halomolowe dla sillipe. Amasiyama opa anawolotapo batalimale koko halomha:ha:uwa, yia:ye yia: batalimale asiyama halomolowe dla sillipe. <sup>30</sup> Epedeme na: monolo koko pahalomasemde. Adipalati, Atapo na:ye tane demama koko gladlowe koko ma na: watle imuwapo. Epapedeme na:ta koko gladleye pta sikemte ala:na. Adipalati, na: na:ta solotamale tle koko pahalomsela:semde. Amasiyama na: isikimi na:ye tane dle oplamita solotamale koko tlo halomsela:po.



<sup>31</sup> Epedeme na:tapo naskamu na: kokoye opa dla atlamsela:loweye po-ala:na. <sup>32</sup> Amasiyama haletapo na: kokoye ikadepe atlamhalapo. Adipalati, na:malamana, ya:ye na: koko dla woloma ikadepe koko tlo atlamhalapo.

<sup>33</sup> Epedeme wua:tapo opaye Yon hala dla taiya duwapo. Epalati ya:tapo yia: dla ikadepe koko atluwapo. <sup>34</sup> Amasiyama na: koko dla mikadepe atlamhalaye oplami tle po-apesema. Amasiyama na: wua:ta pasakalo hallowe halepo depame koko hapuloma iye wua: watle atlamapo. <sup>35</sup> Yonye tuloma epapele some hela:dle wua: watle hampuwapo. Epalati wua:tapo alila kiyele dulu dla hela:dle dulu edla ha:ha:lowedeme sikemte sisiyeuwapo.

<sup>36</sup> Epedeme Yontapo na: koko dla ikadepe kokoye atlamsela:uwapo. Amasiyama epapele tope wua:ta na: dla mikadepe dlepo depame Godtapo na: tle koko patoto halomhalatapo Yonta na: koko atlamsela:uwaye ma-tla:mtamhalapo. Adipalati, na:ta koko halomhala etapo Ata na:ye tane duwa kokoye nati-ipo. <sup>37</sup> Epame na: A, na:ye tane duwa mape na: koko dla ikadepe koko atlapo. Amasiyama wua: ya:ta yukamala dallowe powua:malamana, epame ya: mila:pi ma natilowe powua:malamana. <sup>38</sup> Epapedeme wua: God yu dalepame wua: dupa dulu dla pomikadepe desemde. Adipalati, wua: Ata tane dle oplami dla pomikadepe desema.

<sup>39</sup> Wua: God yu bukaye woloma ka:pi sesa:pame momalamha:ha:mama asiyama yu etapo wua: dla pasakalo hamilipe demha:ha:mdepo. Amasiyama wua:ta yu sesa:mha:ha:mde eye isikimi na: koko tlo atlapo. <sup>40</sup> Epapele tope wua:tapo na:ta wua: watle pasakalo hamilipo depame na: hala dla popuasemde.

<sup>41</sup> Epame na: ma wua:ta na: dla adipapele koko atlamde dla na: pase sikemte malamasema. <sup>42</sup> Adipalati, na:malamana, wua: dla God sikemte malamolowe kokoye hawa. <sup>43</sup> Epedeme na:tapo na: A God hi tle puwapo. Epapele tope wua:ta na:ye posolotamana. Amasiyama wua: oplamitapo meyelo ya: hi tle pulati ya: tlo solotamama ya:ye semdepo. <sup>44</sup> Epame wua: isikimi opata wua: hi di dla ta:dlepo depame solotamha:ha:mama asiyama God hatlota wua: hi ta:dlowe tlo posolotamha:ha:sema. Ame wua: adipammama na: dla mikadepe depa:?

<sup>45</sup> Epedeme wua: na:tapo wua:ye A mila:pi tle batalimale so dlepe depo malamiya. Amasiyama Moses, wua:tapo wua: pasakalo gadlalo oplami demduwatapo wua:ye A mila:pi tle batalimale so dlepe. <sup>46</sup> Epapele dulu dla wua: Mosesta atlamale yu dla mikadepe dematiye, eta wua: ma na:ta atlamale yu dla dalepo mikadepe dlemla. Adipalati, Mosestapo na: kokoye buka dla ilimuwapo. <sup>47</sup> Amasiyama wua: Mosesta hatitimaleye pomikadepe dlalo ha:ha:po. Epedeme wua: ma adipammama na:ta atlama koko dla ma mikadepe depa:?"

## 6

### *Yesuta 5,000 opa daya ilimale*

*(Mat 14:13-21; Maka 6:30-44; Luk 9:10-17)*

<sup>1</sup> Epedeme koko ita tame gudlati Yesutapo ma Ga:lili kaula seme dla uliyo. Ga:lili kaula i ya: hi haleye Taibiliyes kaula demdepo. <sup>2</sup> Epapeleye Yesutapo esusulumale so opa hapuloma ka:ka:demhalale koko tle opa hapulomatapo e natipame ya: dolumtamalaiyo. <sup>3</sup> Epapalati Yesuta ya: alotle tlalo so mate tamali di dla hetame polaiyo. <sup>4</sup> Epapedeme oloma edla Yu so yia: Namilatale daya dele alilatapo ma-teteka:mpuaiyo.

<sup>5</sup> Epapele oloma edla Yesuta opa hapulomata ya: hala dla pula natipame Pilipi watle epo atlaiyo, "Di daya hadima hapo opa hapuloma iye ilipa:?" diyo. <sup>6</sup> Epedeme Yesu ya:ta opa iwolo dla halowe kokoye mo-malapo halemama ma isikimi Pilipita mikadepe dle natilowedeme ya: watle ipo atluwapo.

<sup>7</sup> Epalati asiyama Pilipita epo atlaiyo, “Di mani pato hadima hapo daya halopame opa pasatale iye ilipa? Adipalati, oplamitapo opa iwolo daya ilimolowe mani halowedeme sokomoko hatlo dulu dla oko halepiye, mani eta opa hapuloma iye po-ala:lowa,” diyo.

<sup>8-9</sup> Epalati Yesu ya: alotle tlalo oplami hale Saimon Pita ya: ei Endulutapo epo atlaiyo, “Dulu hema maseyemala hale dla daya do supulastale mate epo amalo dapiyamte mate me-halopo halema. Amasiyama dlowe alisisi yemala eye opa hapuloma i mate po-ala:na,” diyo.

<sup>10</sup> Epalati Yesutapo ya: alotle tlalo so watle epo atlaiyo, “Opa hapulomata popa:lepo depame atlamaiya,” diyo. Epapalati opa hapulomatapo tuptu dla mo-popa:myaiyo. Epapele dulu dla isikimi opa siyapo sesa:mama 5,000 epapele umaiyo. <sup>11</sup> Epalati Yesutapo daya hapame God dla namkale dle yu atlepo hauwokokopame opa hapuloma dla alemaiya diyo. Epame amalo ma hapame mepo apiyo. Epalati opa hapulomatapo daya dlomama sikemte susukaliyo.

<sup>12</sup> Yia:ta daya dlopo mo-susukalepo popa:lati Yesutapo ya: alotle tlalo so watle epo atlaiyo, “Daya akutu opi popomelle hapulomaye kikilahaiya,” diyo <sup>13</sup> Epalati Yesu ya: alotle tlalo sotapo daya akutuye kikilahamtapame yekalo 12 dla atilimama poposatili-maiyo. Daya iye isikimi do supulastale tle pasatamama akutu popomelle ipo.

<sup>14</sup> Opa hapulomatapo Yesuta ulugiyemale koko halë i natipame epo atlamyaiyo, “Ikadepe, oplami iye God tle yu hapame molo atlalo oplami dita pulupe depo omha:ha:uwa oplamipo,” demyaiyo. <sup>15</sup> Epame Yesutapo yia: dokopala oplami hallepo depame solotamama Yesu watle puame akumyaiyo. Amasiyama Yesuta yia:ta mala-male ma-natipame ma meyelo tamali di dla hetaiyo.

### *Yesuta yú di tle tale*

*(Mat 14:22-33; Maka 6:45-52)*

<sup>16</sup> Tamila:la oloma edla Yesu ya: alotle tlalo sotapo Yesu ompopa:lowedeme koa sitali dla tuluiyo. <sup>17</sup> Amasiyama Yesu ala populalo hallati ma-amtuwaiyo. Epalati yia:tapo koa dla tulume alupame Kapaniyem mo dla kotiyapo tamalaiyo. <sup>18</sup> Yia: ala mesosolemtamha:ha:lati mosisi patota pumama ulo patototapo hehetamhalaiyo. <sup>19</sup> Yia: 5 kilomita selemalli epapele tamha:ha:lati Yesutapo yú di tle yia: hala dla pula natiyo. Yia: epalati sikemte wowota:iyo. <sup>20</sup> Amasiyama Yesutapo yia: watle epo atlaiyo, “Wua: ase sikemte wowota:miya. Na:ta puma,” diyo. <sup>21</sup> Epalati asiyama yia:tapo sisiyele mate ya:ye koa dulu dla posokolene diyo. Epapele oloma edla koatapo pakasiyamalalo yia:ta ta mo dla tame tamali dla gusulludiyo.

### *Yesuye pasakalo dayapo*

<sup>22</sup> Alila hale utulalati Yesuta daya ilimale so hapulomatapo koa sitali hatlo medla tulume Yesu ompopa:iyo, yia:ta malamaleta semte Yesuye ala medla me-halemapo depame. Adipalati, yia: Yesu ya: alotle tlalo sotapo yia: tatile miyelo koa hamtlati natiyo.

<sup>23</sup> Epapele oloma dla koa opita Taibiliyes mo tle puame yia:ta popa: dla woyamaiyo.

<sup>24</sup> Epapele dulu dla yia:ye Yesu mate epo ya: alotle tlalo so mate potlamalalo wekelati ma koa etle Kapaniyem mo dla Yesu totamala taiyo.

<sup>25</sup> Yia: ulumtame Kapaniyem mo dla woyapame Yesu natipo epo atlaiyo, “Labai, wa: adipalalo hema puwa?” diyo.

<sup>26</sup> Epalati Yesutapo asiyama epo atlaiyo, “Na: ikadepe kokoye wua: watle atlema. Wua:ta na: totampualeye na:ta ulugiyemale koko halomhallati natiwa koko tle popuana. Amasiyama wua: isikimi na:ta wua: daya ilimalati sikemte susukaluwa koko tle ma na: totampumulalepo. <sup>27</sup> Epedeme wua: pakasiya pa:lalo alisisi daya epapele dla ase sikemte totamsiyamiya. Amasiyama wua: kokó elepo ellalo pasakalo daya tlo totamsiyamaiya. Opa Yamitapo daya iye wua: watle hamilipe. Adipalati, A Godtapo meyelo ya: uluye Yami dla me-himiwapo.”

<sup>28</sup> Epalati asiyama yia:ta epo atlaiyo, “Godta apa kokoye dita hamha:ha:lepo depame sikemte solotama:?” diyo.

<sup>29</sup> Amasiyama Yesutapo asiyama yia: watle epo atlaiyo, “God ya: solotamapo, wua:tapo ya:ta tane dle oplami dla mikadepe dlepo depame.”

<sup>30-31</sup> Epapalati opatapo ya: watle epo atlaiyo, “Dita wa: dla mikadepe dlepo depame wa: apa ulugiyemale koko di watle nati-ipa:? Adipalati, God yu bukata atlemama di mamadulotapo dalupa dulu dla siyamuwa oloma edla Mosestapo pepele di tle mena dayaye yia: watle hapimduwapo. Epapedeme Mosestapo di mamadulo dla epapele koko hauwapo. Ame wa: dita wa: dla mikadepe dlepo depame apa kokoye di watle nati-ipa:?” diyo.

<sup>32</sup> Epalati asiyama Yesutapo yia: watle epo atlaiyo, “Na: ikadepe koko wua: watle atlema. Mosestapo wua: mamadulo watle pepele di tle daya pohapina. Amasiyama na: Atapo yia: watle daya eye hapimduwapo. Epapedeme ma ya:tapo woloma ikadepe dayaye Pepele di tle wua: watle hamilipe. <sup>33</sup> Epedeme God ya: pasakalo dayaye Pepele di tle ma ta:lamo hema malale oplamipo. Adipalati, ya:tapo ta:la so dla pasakalo hapimhalapo.”

<sup>34</sup> Epalati asiyama opatapo ya: watle epo atlaiyo, “Wa: alila hapuloma dulu dla di watle pasakalo daya eye hapimhalane,” diyo.

<sup>35</sup> Epame Yesutapo epo atlaiyo, “Na:ye pasakalo dayapo. Epedeme oplami antapo na: hala dla pulupiye, ya: matle daya pota:lowa. Epame oplami antapo na: dla mikadepe dlepiye, ya: yú ma pota:lowa. <sup>36</sup> Epapedeme na: wua: watle koko hapulomaye ma-atlamuwapo, epame wua: na: koko ma-natiwapo. Amasiyama wua: ala na: dla pomikadepe desema. <sup>37</sup> Epedeme na: Ata na: watle hapili sotapo na: hala dla pumullupe. Epalati na:tapo yia: dulu dla oplami haleye po-alliwa. <sup>38</sup> Adipalati, na:tapo Pepele di tle ta:lamo hema maluwaye, monolo solotamale koko halowedeme pomalana. Amasiyama na: A, na: tane dle oplamita solotamale koko tlo hala maluwapo. <sup>39</sup> Epapele dulu dla ya:ta solotamale kokoye ipo. Ya: posolotamasema, ya:ta na: watle hapili so dulu dla oplami haletapo haodloweye. Amasiyama mosukulu alila dla na:tapo yia:ye palli tle ma pasakalo dla hohopo ta:ta:dlowepo. <sup>40</sup> Adipalati, na: Ata solotamapo, opa anawolotapo Maseyemala natipame ya: dla mikadepe dlepiye, yia:ye halepo halepo pasakalo halepe. Epalati na:tapo mosukulu alila dla yia:ye palli tle hohopo ta:ta:dlowepo.”

<sup>41</sup> Epapele oloma edla Yesutapo atlemama, “Na:ye Pepele di tle malale dayapo,” dlati Yu sotapo dalepame siyalasiyalademama yu baliyo. <sup>42</sup> Epame yia:tapo epo atlamyaiyo, “Oplami iye Yosep yami Yesupo. Adipalati, di ya: a mate epo ya: wai mate dimalamana. Epapedeme ya:ye adipo atlemama, ‘na:ye Pepele di tle maluwa,’ demsela:ma:?” demyaiyo.

<sup>43</sup> Amasiyama Yesuta asiyama yia: watle epo atlaiyo, “Wua: dulu dla yu balle koko elaye medla gudiya,” diyo. <sup>44</sup> “Adipalati, Atapo na:ye tane duwapo. Epapedeme oplamitapo meyelo na: hala dla populuwa. Amasiyama Atapo ha:ha:mhallalo oplamita na: hala dla pulupe. Epalati na:tapo mosukulu alila dla ya:ye powale tle hamame ta:dlowepo. <sup>45</sup> Epapedeme God tle yu hapame molo atlalo oplami haletapo epo hatitimuwapo, ‘God-tapo opa hapulomaye imelepe,’ duwapo. Epedeme opa anawolotapo A yu dalepame ya: tle koko malamelepiye, yia:ta na: hala dla pulupe. <sup>46</sup> Epedeme oplami haletapo Aye ponatina. Amasiyama hatlo A God tle malale oplamitapo A natiloweye, ya:malamana. <sup>47</sup> Epapedeme na: ikadepe kokoye wua: watle atlema. Oplami antapo na: dla mikadepe dlepiye, ya:ye halepo halepo pasakalo halepe. <sup>48</sup> Epedeme na:ye pasakalo hamilalo dayapo. <sup>49</sup> Epapele dulu dla wua: mamadulotapo dalupa dulu dla mena daya dlom-siyamduwapo. Epapele tlope daya e dele soye mo-paliwapo. <sup>50</sup> Amasiyama pasakalo hamilalo daya iye Pepele di tle maluwapo. Epapele dulu dla daya e dlalo sotapo popalliwa. <sup>51</sup> Epedeme Pepele di tle malale pasakalo daya eye na:po. Epapele dulu dla

opa anawolotapo daya eye dlomelepiye, yia:ye kokó ha:ha:po ha:ha:lepe. Epedeme na:ta hamilowe daya eye na: mopo, ta:lamo sotapo pasakalo halepo depame.”

<sup>52</sup> Epalati Yu sotapo yu i dalepame yia: dulu dla yu balemyemama epo atlamyaiyo, “Oplami iye adipo ya: moye di watle delepo depo hamipa:?” demyaiyo.

<sup>53</sup> Epalati Yesutapo yia: watle epo atlaiyo, “Na: ikadepe koko wua: watle atlema. Wua: Opa Yami omali mate mo mate podlalo wekelepiye, ikadepe pasakalotapo wua: dulu dla pohallowa. <sup>54</sup> Epedeme opa anawolotapo na: mo mate epo na: omali mate dlomelepiye, yia:ye halepo halepo pasakalo halomelepe. Epalati mosukulu alila dla na:tapo yia:ye palli tle hohopo ta:ta:dlowepo. <sup>55</sup> Na: omali mate epo na: mo mateye dlowe alisisi ikadepepo. <sup>56</sup> Epapele dulu dla opa anawolotapo na: mo mate epo na: omali mate dlomha:ha:ma:, yia:ye na: dulu dla ha:ha:po. Epalati na: mape yia: dulu dla halapo. <sup>57</sup> Epedeme na: tane duwa Atapo pasakalo halemhallati na: mape halapo. Epapedeme na: mo mate epo na: omali mate demhallalo oplamitapo na: tle pasakalo hamhallepe. <sup>58</sup> Epapele dulu dla na:ye wua: mamadulotapo daya dlomsiyamale pe-epapena. Adipalati, yia:ta daya e dlomsiyamuwatapo yia: dla pasakalo pohamina. Amasiyama na:ye Pepele di tle malale pasakalo daya ikadepepo. Epedeme oplami antapo daya iye delepiye, ya:ye kokó halepo halepo pasakalo hallepe.”

<sup>59</sup> Yesutapo Kapaniyem inoma sumalalo aya dulu dla opa hapulomaye imhalemama koko hapuloma iye atlamhalaiyo.

### *Pasakalo hamilalo yu*

<sup>60</sup> Epapeleye Yesu ya: dolumsiyamale so opa opitapo Yesuta imale koko dalepame epo atlamyaiyo, “Imale koko iye pta sikemte kokalena. Oplami anta yu i halowe ala:ta:?” demyaiyo.

<sup>61</sup> Epapele dulu dla Yesutapo ya: dolumsiyamale sota yia: dulu dla yu balempopale malapame yia: watle epo atlaiyo, “Na:ta atlama koko itapo wua: dla wotiyalle hamima:?”

<sup>62</sup> Koko ita wua: dla wotiyalle hamima dlepiye, amasiyama wua: Opa Yamita ma ilame Pepele di dla hetla natipo adipo malapa:?” <sup>63</sup> Epedeme Sokotapo pasakalo hapimhalapo. Amasiyama mota solotamale kokotapo pasakalo pohapimhalasema. Epapedeme na:ta wua: watle atlamale yu dulu hema Soko mate pasakalo mate elapo.”

<sup>64</sup> Yesu ya: tate ma-natiyo, opa anawolotapo ya: dla pomikadepe dlalo wekelowe soye. Epame ya:ye hamame opahale do tama dla homellowe oplami mape ma-natiyo. Epapedeme ya:tapo yia: watle epo atlaiyo, “Opa opi wua: dulu dla ha:ha:ye ala na: dla pomikadepe desema. <sup>65</sup> Epapele koko tle na:tapo yu iye wua: watle ma-atlalepo, ‘Oplami haletapo isikimi na: hala dla populuwa. Amasiyama Atapo ha:ha:mhallalo oplamita na: hala dla pulupe,’ dlepo.”

<sup>66</sup> Yesutapo yu i atlamhalepo gudlati ya: dolumsiyamalalo so opa opitapo ma ya: dolumala allimama ya: tle alikili a:ma potamalaiyo.

<sup>67</sup> Epalati Yesutapo ya: alotle tlalo so 12 watle epo atlaiyo, “Wua: ma na: saliyomtapa:?” diyo.

<sup>68</sup> Amasiyama Saimon Pitata epo atlaiyo, “Lod, di ana hala dla tapa:?” Hatlo wa: yutapo pasakalo hapimhalapo. <sup>69</sup> Epedeme di wa: dla mikadepe dema. Adipalati, dimalamana, wa:ye God tle malale aiyalma oplamipo,” diyo.

<sup>70</sup> Amasiyama Yesu asiyama yia: watle epo atlaiyo, “Na:tapo opa 12 wua:ye mo-hohomuwapo. Amasiyama wua: dulu dla bataliya walle oplami ma me-halapo.”

<sup>71</sup> Epedeme Yesutapo yu ipo atluwaye, Saimon Iskaliyot yami Yudas kokoye atlemama apuwapo. Adipalati, Yudasye ya: mape Yesu ya: alotle tlalo so 12 alumale dulu dla haluwapo. Amasiyama alotle ya:tapo Yesuye hamame opahale do tama dla home-luwapo.

## 7

*Yesu ya: eidulota Yesu dla pomikadepe dle koko*

<sup>1</sup> Epedeme koko ita tame gudlati Yesutapo Yudiya mo dla sela:la alimama ma isikimi Ga:lili mo dla sela:iyo. Adipalati, Yudiya mo edla Yu so dokopala sotapo Yesu yu-muluwe api totamsiyamaiyo. <sup>2</sup> Epapeleye Yu sotapo yia: Kimna:ya daya dele alilata mo-teteka:mpuaiyo. <sup>3</sup> Epalati Yesu ya: eidulotapo ya: watle epo atlaiyo, “Wa: mo i melepame ma Yudiya mo dla tane, wa: dolumsiyamalalo sotapo wa:ta ulugiyemale koko halati natilipo depame. <sup>4</sup> Adipalati, oplamitapo opa hapulomata ya: koko malastlepo dlepiye, ya: hemele pohaohaodemsela:lowa. Epedeme wa: ulugiyemale kokoye woloma haliyamale dla halomsela:ne, opata wa: koko natilipo depame,” diyo. <sup>5</sup> Epapele dulu dla Yesu ya: eiduloye ala Yesu dla pomikadepe dlalo ha:ha:iyo.

<sup>6</sup> Epalati Yesuta asiyama yia: watle epo atlaiyo, “Na:ta Yelusalem dla tlowe alilaye ala po-umasema. Amasiyama wua: tlo tamalaiya. <sup>7</sup> Epedeme ta:lamo sotapo wua:ye po-allisemde. Amasiyama yia:tapo na: tlo allimdepo. Adipalati, na:tapo yia:ta batalimale koko halomale hapulomaye haliyamale dla bobotimatipo atlamhalapo. <sup>8</sup> Epapedeme wua: tlo daya dele dla tamalaiya. Amasiyama na: tlo potlowa. Adipalati, na: alila ala po-umasema.” <sup>9</sup> Yesuta epo atlepame Ga:lili mo medla me-halaiyo.

*Yesutapo Kimna:ya daya dele dla opa imhalale koko*

<sup>10</sup> Yesu ya: eidulota Kimna:ya daya dele dlowedeme Yelusalem dla me-hetale hallati Yesu ya: ma alotle hetaiyo. Amasiyama ya: opa inoma dali dla tla alimama hemele hetaiyo. <sup>11</sup> Epalati daya dele dulu edla Yu so dokopala sotapo Yesu totamyemama, “Yesu da:?” demyaiyo.

<sup>12</sup> Epalati opa alumale patotapo hemele yia: dulu dla Yesu koko dla yu topulolemye-mama opita, “Yesuye oplami ka:pi,” dlati asiyama opita, “Hao, ya:ye opa isikimi elemale tle alikili dla elemtama,” demyaiyo. <sup>13</sup> Amasiyama yia:tapo dokopala so wowota:mama yia:ta Yesu koko dla yu topulolleye haliyamale dla po-apena.

<sup>14</sup> Epame daya demha:ha:le mo-duka dla hallati Yesutapo aiyalma aya dla hetame God yu imolowe mo-kotiyamaiyo. <sup>15</sup> Epalati Yu sotapo ya:ta imale koko natipame sikemte yiyeliyo. Yia:tapo yiyelemama epo atlamyaiyo, “Oplami iye adipammama God yu hapulomaye sikemte malastepo halema:? Adipalati, ya:ye posukulu dena,” demyaiyo.

<sup>16</sup> Epalati asiyama Yesutapo yia: watle epo atlaiyo, “Na:ta imale koko iye isikimi na: tle popuasema. Amasiyama na: tane dle God tle puapo. <sup>17</sup> Epedeme Godta solotamale koko tlo hali depo malamalalo oplamitapo na:ta imale koko ita ikadepe God tle puaye malanatilipe. Epame na:ta isikimi monolo malamale tle po-imalalo wekemde koko ma malanatilipe. <sup>18</sup> Epapedeme oplamitapo isikimi ya:ta malamale tle imsela:lepiye, ya:ye ya:skamu ya: hi di dla ta:dlowedeme apopo. Amasiyama oplami antapo isikimi ya: tane dle oplami koko tlo imsela:lepiye, ya:ye ya: tane dle oplami hi tlo di dla ta:dlowedeme apelepe. Epapedeme ipapele oplami dla woloma ka:dle koko mate ikadepe koko mateta elapo. <sup>19</sup> Epedeme Mosestapo wua: watle aiyalma hatitimale ma-hamiwapo. Epapele tlope wua: dulu dla oplami haletapo aiyalma eye woloma podolumhalasema. Epame wua: ma adipalati na: yumuluwedeme amma:?”

<sup>20</sup> Epalati opatapo asiyama ya: watle epo atlaiyo, “Wa: bataliya yemalata wa: dulu dla hetlati yu epo atlapo. Di wa: yumuluwe yu po-atlempopa:sema,” diyo.

<sup>21</sup> Amasiyama Yesutapo yia: watle asiyama epo atlaiyo, “Na:tapo wua:ta inoma sumalalo alila dla ulugiyemale koko hatlo halati wua:ta hapulomata nati-pame me-yiyeluwapo. <sup>22</sup> Epapele dulu dla wua: mape Mosesta aiyalma hatitimale dolumha:ha:mama wua:ta inoma sumalalo alila dla oko me-halomha:ha:mdepo. Adipalati, wua:tapo Mosesta aiyalma hatitimale dolumama wua: akimlala opiye wua:ta inoma sumalalo alila dla kapala kotimdepo. Epele dulu dla ikadepe Mosestapo kapala



kotimolowe dla aiyalma hatitimale iye pohamina. Amasiyama wua: mama A:iblahamta hamiwapo. <sup>23</sup> Epapedeme wua: tapo Mosesta aiyalma hatitimale hauwokokomalala depame inoma sumalalo alila dla owayimlala kapala kotimha:ha:mdepo. Ame wua: adipalati na:ta esiyele oplamiye wua:ta inoma sumalalo alila dla ka:dlati na: watle siyalasiyaladema:? <sup>24</sup> Epapedeme wua: koko iye woloma sikemte momalamelepiye, eta wua: tapo na:ta atlama kokoye ikadepe mleni dlepe.”

### *Yesuye ikadepe Kelisota:?*

<sup>25</sup> Epedeme Yesuta yu ipo atlanti dalepame Yelusalem so opa opitapo yia: dulu dla epo atlamyaiyo, “Oplami iye di dokopala sota yumuluwa demde oplami eye ipa? <sup>26</sup> Amasiyama ya: tapo opa hapuloma inoma dali tle imhallati oplami haletapo yu hale po-atlasema. Epedeme di dokopala sota ya:ye ikadepe Keliso mle deyo. <sup>27</sup> Amasiyama dita omha:ha: Kelisota pulupiye, oplami haletapo ya:ta puale mo woloma pomalam-olowa. Epapele tlope Yesuta puale moye, ma-dimalamana,” demyaiyo.

<sup>28</sup> Epalati Yesutapo aiyalma aya dla imhalemama yu teta:le mate epo atlaiyo, “Yao, ikadepe, wua: na: koko mate epo na:ta hallalo mo mate mo-wua:malamana. Amasiyama na: monolo solotamale tle hema puame pohalasema. Hao, na: tane duwa oplamiye ikadepepo, epele tlope wua: ya:ye powua:malamana. <sup>29</sup> Asiyama hatlo na: tlo na:malamana. Adipalati, na: ya: tle puwa oplamipo, ya: tapo na:ye wua: dla tane duwapo.”

<sup>30</sup> Epapele oloma edla dokopala so yia: solotamaiyo, Yesuye medla hamolowedeme. Amasiyama oplami haletapo ya: dla koko hale pohaiyo. Adipalati, ya: alilatapo ala popuana. <sup>31</sup> Amasiyama opa opitapo Yesu dla mikadepe demama epo atlamyaiyo, “Oplami haleta ulugiyemale koko halomsela:mama Yesuta ulugiyemale koko halomsela: iye potla:mtlowa. Epedeme Yesu iye ikadepe dita omha:ha:uwa Kelisopo,” demyaiyo.

<sup>32</sup> Epapeleye opatapo Yesu koko dla epo atlamyelati Pa:lisi so mate epo dokopala so mateta dalepame aiyalma aya alikili tle omha:ha:lalo so watle, “Yesu hamala taiya,” diyo.

<sup>33</sup> Yesu ma opa dla atlemama epo atlaiyo, “Na: ala alila kiyele yemala hema wua: mate hallowepo. Epame ma ilame na:ye tane duwa oplami hala dla tlowepo. <sup>34</sup> Epalati wua: ma oloma edla na:ye totamelepe. Amasiyama wua: na: ponatilowa. Adipalati, wua: na:ta tame hallowe mo dla tloweye po-ala:na,” diyo.

<sup>35</sup> Epalati Yu sotapo yiskamu yia: dulu dla epo atlamyaiyo, “Di ya:ye hadima tale hallati ya: ponatilalo wekepa? Podimalamana, ya: ma di opa opita Guliki so mo dla tame ha:ha:ye, ya: ma edla tame hallowedeme apeyo. Epame Guliki so dla God yu insela:lowedeme apeyo. <sup>36</sup> Epame ya:ta di watle atlemama ‘Wua: na: totamelepe, amasiyama wua: na: ponatilowa,’ dleye, apa koko atlemama api? Epame, ‘wua: na:ta tame hallowe mo dla tloweye po-ala:na,’ dle ma apa koko atlemama api?” demyaiyo.

### *Pasakalo yú koko*

<sup>37</sup> Epapeleye Kimna:ya daya dele mosukulu alilaye pta koko pato. Epedeme alila oloma edla Yesuta sila:time halemama yu teta:le mate epo atlaiyo, “Oplami antapo yú ta:mhallepiye, ya: puame na: hala dla yú delepe. <sup>38</sup> Epame God yutapo epo atlapo, ‘Oplami antapo na: dla mikadepe dlepiye, pasakalo halemhala yú tapo ya: dulu tle alowamhallepe.’ ” <sup>39</sup> Epedeme Yesutapo koko i atluwaye, ya: dla mikadepe dle so dla Hela:dle Soko hamilowe kokoye atlemama apuwapo. Amasiyama oloma edla Hela:dle Soko eye ala opa watle pohamina. Adipalati, Yesuye ala A hala dla pehetana.

<sup>40</sup> Epapedeme opa opitapo Yesuta atlamale yu dalepame epo atlamyaiyo, “Oplami iye ikadepe God tle yu hapame molo atlalo oplami dita pulupe depo omha:ha:uwa oplami i mle,” demyaiyo.

<sup>41</sup> Epalati opa opitapo epo atlamyaiyo, “Ya:ye Kelisopo,” demyaiyo. Amasiyama ma opita epo atlamyaiyo, “Hao, ya:ye po-Keliso. Adipalati, Keliso adipammama Ga:lili mo tle pupa:?” <sup>42</sup> Ame adipalati, God yu bukata epo atlapo, ‘Kelisoye Deibidi ya: mamadulo dulu tle pulupe. Epame ya:ye Deibidi ya: mo Betliyem dla hamelepe,’ depo,” demyaiyo.

<sup>43</sup> Epammama Yesu koko dla opa dla duka hukulli elaiyo. <sup>44</sup> Epame opa opi yia: solotamaiyo, Yesuye hamolowedeme. Amasiyama oplami haletapo ya: dla koko hale pohaiyo.

### *Yu so dokopala sotapo pomikadepe dle koko*

<sup>45</sup> Epapele oloma edla Yesu hamala taiye dle sota ma isikimi ilame pula natipame Yu so dokopala so mate epo Pa:lisi so mateta yia: watle epo atlaiyo, “Wua: adipalati Yesu hema pohamame pulalo weki?” diyo.

<sup>46</sup> Amasiyama yia:tapo asiyama epo atlaiyo, “Di oplami haleta Yesuta yu atlemhalale epo atlati podalesemde,” diyo.

<sup>47</sup> Epapalati asiyama Pa:lisi sota yia: watle epo atlaiyo, “Wua: mape ya:ta imale koko dla mo-tuluyo?” <sup>48</sup> Amasiyama Pa:lisi so dia: dulu dla epo dokopala so dia: dulu dla oplami haleta ya: dla mikadepe dle pohalasema, hao. <sup>49</sup> Amasiyama isikimi mo sotapo ya: dla mikadepe demyapo. Adipalati, yia: Mosesta aiyalma hatitimaleye poyia:malamana. Epedeme yia:ye Godta kasilamale dulu dla ma-ha:ha:po.”

<sup>50</sup> Epapeleye yia: dulu dla Pa:lisi oplami hale me-halaiyo, ya: hiye Nikodimas. Ya:ye ka:yapa utula:la Yesu natila tale oplamipo. Epedeme ya:tapo epo atlaiyo, <sup>51</sup> “Mosesta aiyalma hatitimale dolumama di poka:dena, oplamiye ya: koko tatile pogladlalo isikimi ya: batalimale asiyama hamiloweye,” diyo.

<sup>52</sup> Epalati Pa:lisi so opa opi mate epo dokopala so mateta ya: watle epo atlaiyo, “Wa: mape Ga:lili oplamita:? Wa: God yu woloma sesa:pame malamane. Adipalati, God yu bukata atlemama, God tle yu hapame molo atlalo oplami haleye Ga:lili mo tle populuwa depo.”

[ <sup>53</sup> Epame esemale medla gudepame opa hapulomatapo me-yia: aya dla tamalaiyo.

## 8

### *A:yata upo oplami uhalë koko*

<sup>1</sup> Amasiyama Yesu tlo Olipi tamali dla taiyo. <sup>2</sup> Epame utulala ikadepe ma aiyalma aya dla hetame hallati opa hapulomatapo ya: hala dla pumulaiyo. Epalati ya:tapo edla polomama opaye impolaiyo.

<sup>3</sup> Epapele oloma edla aiyalma imalalo so mate epo Pa:lisi so mateta upo oplami uhalë a:yaye hamame puame opa mila:pi tle pameliyo. <sup>4</sup> Epammama yia:tapo Yesu watle epo atlaiyo, “Imalalo oplami, di a:ya itapo upo oplamiye uhamse:lati natipo hema hamampua. <sup>5</sup> Epedeme Mosesta aiyalma hatitimaletapo epo atlapo, ‘A:ya hale antapo koko ipapele halepiye, ya:ye ewala mate kelepo yumi demha:ha:lepe,’ depo. Epapedeme wa: di atlane, di a:ya hema apa koko hapa:?” diyo. <sup>6</sup> Epapele dulu dla yia:tapo apa api tle Yesuye hampa: depame ya: watle atlanatili iye atlaiyo.

Amasiyama Yesuta ta:la dla heodepo polomama ya: do mate ta:la dla ilimpolaiyo. <sup>7</sup> Amasiyama yia: atlanatili yu ala me-atlamha:ha:lati Yesutapo sila:time halemama yia: watle asiyama epo atlaiyo, “Epapedeme wua: dulu dla oplami anta batalimale koko pohalalo wekendi, ya: tatile a:ya hema ewala hame hotlepe,” diyo. <sup>8</sup> Yesu epo ma ta:la dla tulumme heodepo polomama ya: do mate ta:la dla ilimpolaiyo.

<sup>9</sup> Epalati opata Yesu yu dalepame wowota:mama tototalo tle kotiyapo meyelo teleta meyelo teleta demtamama amkoteta:le dla tame gudiyo. Yia:ta hapulomata potamama isikimi Yesu mate a:ya mate tlo medla pomeliyo. <sup>10</sup> Epalati Yesutapo sila:timhalemama

a:ya e watle epo atlaiyo, “A:ya, wa: alilalo so opa hapuloma hema ha:ha:le da? Oplami haleta wa: watle wa: batalimale asiyama dla wotiyalle hamilowe, me-pomeli?” diyo.

<sup>11</sup> Epalati asiyama a:ya eta Yesu watle epo atlaiyo, “Hao, oplami hale popomelena. Yia:ta hapulomata mosukulu pota,” diyo.

Epapalati Yesutapo ya: watle epo atlaiyo, “Na: mape wa: watle batalimale asiyama pohamilowa. Epedeme wa: ma-tane. Amasiyama wa: batalimale koko matle halomhalemiyo,” diyo.]

### *Yesuye ta:lamo hela:dlepo*

<sup>12</sup> Epame Yesuta matle opa dla imhalemama epo atlaiyo, “Na:ye ta:lamo hela:dlepo. Epedeme na: dolumpulalo oplamitapo amtuwale dulu dla posela:lowa. Amasiyama ya:tapo pasakalo halemhallalo dla semtlalo hela:dleye halepe,” diyo.

<sup>13</sup> Epalati Pa:lisi sotapo asiyama epo atlaiyo, “Wa: isikimi wa:skamu wa: koko tlo atlamhalema. Epedeme di wa:ye pomikadepe desema,” diyo.

<sup>14</sup> Epapalati Yesutapo asiyama yia: watle ma epo atlaiyo, “Yao ikadepe, na:ta atlama koko iye naskamu na: kokoye atlamama apopo. Epapele tlope na:ta atlama koko iye ikadepe. Adipalati, na: na:malamana, na:ta halepo maluwa moye. Epame na: ma na:malamana, na:ta tame hallowe moye. Amasiyama wua: na:ta puwa mo mate epo na:ta tlowe mo mateye ala powua:malamana. <sup>15</sup> Epedeme wua: ta:la sota yimkadulo koko glademde api tle koko glademdepo. Amasiyama na: ya:mkale koko pogladesemde. <sup>16</sup> Epapele tlope na:ta opa koko gladli dlepiye, na: woloma ikadepe koko tle ka:depo koko gladlepe. Adipalati, na:ye monolo pohalasema. Na: A, na:ye tane duwatapo na: mate halapo. <sup>17</sup> Epapedeme Mosesta aiyalma hatitimaletapo epo atlapo, ‘Koko hatlo dla opa dapiyamtetapo mikadepe dlepiye, koko eye ikadepepo,’ depo. <sup>18</sup> Epapedeme na: mape aiyalma koko edla dolumama naskamu na: koko dla mikadepe koko atlapo. Epame na: A mape na: koko dla ya: ma ikadepe koko atlapo.”

<sup>19</sup> Epalati asiyama Pa:lisi sota ya: watle epo atlaiyo, “Wa: a da:?” diyo. Amasiyama Yesutapo yia: watle epo atlaiyo, “Wua: ala na: A koko mate epo na: koko mate po-malamalalo ha:ha:pa? Wua: na: koko malamaleta ammatiye, eta na: A koko mape wua:malamelemla,” diyo.

<sup>20</sup> Epedeme Yesutapo koko hapuloma iye aiyalma aya dulu dla mani kolumalalo mo mateka:pi dla halemama opaye imhalaiyo. Amasiyama oplami haletapo ya:ye pohamana. Adipalati, ya: alila ikadepeye ala popuana.

### *Yesuta ya:skamu ya: koko atlale*

<sup>21</sup> Epame Yesutapo ma epo atlaiyo, “Wua: na:ta haka:ma dla tlali na: totamelepe. Amasiyama wua: na:ta ta mo dla puluweye po-ala:na. Epedeme wua: batalimale dulu dla me-ha:ha:mama batalimale mate me-pallipe,” diyo.

<sup>22</sup> Amasiyama Yu sotapo epo atlamyaiyo, “Yesu adipammama ipo atlema:, ‘wua: na:ta ta mo dla puluweye po-ala:na,’ dema:? Pona:malamana, Yesu ya:skamu yumuluwedeme apeyo,” demyaiyo.

<sup>23</sup> Epalati Yesuta yia: yu dalepame asiyama epo atlaiyo, “Wua: mo isili hema ha:ha:lalo sopo. Amasiyama na:ye di dla hallalo oplamipo. Epapedeme wua:ye ta:lamo sopo. Amasiyama na:ye pota:lamo oplami. <sup>24</sup> Epapele koko tle na:tapo wua: watle atlemama, wua: batalimale dulu dla pallipe dlepo. Adipalati, na:tapo ‘Na:ye Na:po’ dlati wua: na:ye pomikadepe dlalo wekelepiye, wua:tapo wua: batalimale dulu dla pallipe.”

<sup>25</sup> Epalati asiyama yia:ta epo atlaiyo, “Ame wa:ye anata:?” diyo. Epalati asiyama Yesutapo yia: watle epo atlaiyo, “Ka:yapa kotiyamale dla na:tapo na: koko hapulomaye wua: watle ma-atlamuwapo. <sup>26</sup> Epedeme na:tapo wua: dla batalimale so dlowe kokoye pta pasataleta elema. Amasiyama na: isikimi na: tane duwa oplamita atlamale koko tlo ma opa dla atlamsela:mde. Adipalati, ya:ye isikimi ikadepe koko tlo atlalo oplami.”

<sup>27</sup> Epapele dulu dla Yesutapo ya: A koko atlemhalaleye, Yu sotapo dalepame woloma pomalamalalo wekiyo. <sup>28</sup> Epalati Yesutapo ma yia: watle epo atlaiyo, “Epedeme wua:tapo Opa Yamiye hamame ta:dlepiye, edla wua:tapo na: kokoye woloma malanatilipe. Epame wua: mape na:ta monolo solotamale tle koko pohalomalalo wekem-sela: ma malanatilipe. Adipalati, na:ye isikimi na: Ata imale koko tlo atlamsela:po. <sup>29</sup> Epedeme na: tane duwa oplamiye na: mate halapo. Epapedeme ya: na:ye pomeleme tasemde. Adipalati, na: isikimi ya: dla siyele hamilowe koko tlo halomsela:po.” <sup>30</sup> Epapeleye Yesuta koko iye atlamhallati opa hapulomatapo ya: dla mikadepe diyo.

*Ikadepe kokota batalimale dulu tle opa eleme alikili dla woyamolowe koko*

<sup>31</sup> Epapele dulu dla Yesutapo ya: dla mikadepe dle so watle epo atlaiyo, “Wua:tapo na:ta imale kokoye woloma kokata hampame e dolumsiyamelepiye, eta wua:ye ikadepe na: dolumalalo so dlepe. <sup>32</sup> Epame wua: mape ikadepe koko ma malastlepe. Epalati asiyama ikadepe kokotapo wua:ye wotiyalle upiyele dulu tle alikili dla eleme woyamelepe.”

<sup>33</sup> Epapalati ma yia:tapo Yesu watle epo atlaiyo, “Dia:ye A:iblaham ya: mamadulopo. Epedeme dia:ye oplami haleta dokopala depo halemama wotiyalle dulu dla asiyama pa:le oko dla pohatitipo halana. Ame wa: adipalati di watle atlemama, ‘wotiyalle upiyele dulu tle ma alikili dla woyamaiya,’ dema:?”

<sup>34</sup> Epalati Yesutapo asiyama yia: watle epo atlaiyo, “Na:ye ikadepe koko wua: watle atlema. Oplami antapo batalimale koko halepiye, batalimaletapo ya:ye dokopala depo halapo. <sup>35</sup> Epedeme wua: malamaiya, asiyama pa:le oko halalo oplamitapo ya: dokopala oplami mate woloma aya dulu dla kokó pohalasemde. Amasiyama Maseyematapo ya: A aya dulu dla kokó halepo halemdepo. <sup>36</sup> Epapedeme Maseyematapo wua:ye batalimale dulu tle alikili dla eleme woyamelepiye, wua:ye dulu etle ikadepe ma alikili a:ma woyamapo. <sup>37</sup> Epedeme na:malamana, wua:ye A:iblaham ya: mamadulopo. Amasiyama epapele tlope wua: na: yumuluwedeme sikemte solotamapo. Adipalati, wua: na:ta imale kokoye woloma pohasema. <sup>38</sup> Epedeme na:tapo na: Ata na: watle imale kokoye wua: watle atlamsela:po. Amasiyama wua: mape wua: ata imale kokoye dolumsiyamapo.”

<sup>39</sup> Epalati yia: Yesu watle asiyama epo atlaiyo, “Di aye A:iblahampo,” diyo.

Amasiyama Yesuta asiyama yia: watle epo atlaiyo, “Wua:ye ikadepe A:iblaham ya: akimlala depo ha:ha:leta ammatiye, eta wua:ye A:iblahamta koko halomhalale epapele kokoye ma wua:ta halomha:ha:lemla. <sup>40</sup> Epapele tlope wua: na:ta Godta na: watle ikadepe koko hamiliye atlamsela:lati na:ye yumuluwedeme sikemte solotamapo. Amasiyama A:iblahamtapo epapele kokoye pohamdena. <sup>41</sup> Epapedeme wua:tapo wua: ata koko halomhalale hatlo metlo ma wua:ta halomha:ha:po.”

Epalati yia:tapo Yesu watle epo atlaiyo, “Dia:ye pogupa yimlala. Amasiyama Godye hatlo di A ikadepepo,” diyo.

<sup>42</sup> Amasiyama Yesutapo ma asiyama yia: watle epo atlaiyo, “Godye wua: A ikadepe dematiye, wua: na:ye sikemte bokotiyapo malamelemla. Adipalati, na:ye God tle puame hema halapo. Ya:tapo na:ye tane duwapo. Epedeme na: monolo solotamale tle puame hema pohalasema. <sup>43</sup> Wua: adipalati na:ta atlamhala koko iye dalepame woloma pohalalo wekema: Pona:malamana, wua: na:ta imale koko iye dalla allimapo apopo. <sup>44</sup> Epapedeme wua: aye Saitenpo. Epedeme wua:tapo ya: koko natipame ya:ta solotamale koko halowe tlo sikemte solotamha:ha:po. Adipalati, ya:tapo ka:yapa kotiyamale sitali tle ya:mkale yumulalo oplami halemama ya:mkale mala-atlalo oplami depo haluwapo. Ame adipalati, ya: dulu dla ikadepe koko hale hawa ikadepe. Epedeme ya:tapo mala-atlepiye, ya:tapo isikimi ya:skamu ya:ta hala koko ikadepeye nati-imdepo. Adipalati, ya:ye mala-atlalo oplami ikadepepo. Epapele dulu dla ya:ye mala-atlalo koko hapuloma dulu dla yia: a ikadepe hatlo ya:ta halapo. <sup>45</sup> Amasiyama na: ikadepe koko tlo

atlamse:lati wua:tapo na:ta atlamse: koko dla pomikadepe desema. <sup>46</sup> Epedeme wua: dulu dla oplami hale halema:, na:ye batalimale oplami dloweye? Hao, pohalasema. Wua: adipalati na:ta ikadepe koko tlo atlamse:lati na: dla pomikadepe dlalo wekema:? <sup>47</sup> Epedeme God ya: opatapo God yu dalepame yu eta atlama kokoye halomha:ha:lepe. Amasiyama wua:ye po-God ya: opa. Epapele koko tle wua: ya: yuta atlama koko dalepame pohasema.”

*Yesuta A:iblaham tla:mtamhala koko*

<sup>48</sup> Epame Yu sotapo asiyama Yesu watle epo atlaiyo, “Dita wa:ye Samaliya oplami bataliya walle dleye, ikadepe atlalepo.”

<sup>49</sup> Amasiyama Yesutapo asiyama yia: watle epo atlaiyo, “Na: dulu dla bataliya yemala haleta pohalasema, hawa ikadepe. Amasiyama na: isikimi hatlo na: A hi di dla ta:demama apopo. Epapele tlope wua:tapo na: dla putlomale yu atlalepo. <sup>50</sup> Epedeme opata na: hi di dla ta:dlepo depame na:tapo koko iye pohamsela:sema. Amasiyama haletapo sikemte solotamapo, opata na: hi di dla ta:dlepo depame. Ya:ye koko glادلalo oplamipo. <sup>51</sup> Epapedeme na: ikadepe koko wua: watle atlema. Oplami antapo na: yu dalepame salladepo sela:lepiye, ya:ye popolowa.”

<sup>52</sup> Epalati Yu sotapo Yesu watle epo atlaiyo, “Di wata mo-malanatima, wa:ye bataliya walle oplamipo. Adipalati, wa:tapo ka:yapa ipo atlalepo, ‘oplami antapo na: yu dalepame salladepo sela:lepiye, ya:ye popolowa,’ dlepo. Amasiyama di mama A:iblaham mate epo God tle yu hapame molo atlamalalo so mate mo-paliwapo. <sup>53</sup> Epedeme wa: di mama A:iblahamye wa:ta tla:mtlowedeme amma:? Adipalati, di mama A:iblahamye mo-pouwapo, epame God yu molo atlamalalo so mape mo-paliwapo. Epapele dulu dla wa: wa:skamu wa:ye ana depo malama:?” diyo.

<sup>54</sup> Epalati Yesutapo ma asiyama yia: watle epo atlaiyo, “Na:ta koko hamsela: ita isikimi na: hi tlo di dla ta:dlowe kokota ammatiye, na:ta koko hamsela: iye koko pa:le hallemla. Amasiyama na: Atapo na: hi di dla ta:demhalapo. Ya:ye wua:tapo wua: God demdepo.

<sup>55</sup> Amasiyama wua:ye ya: powua:malamana. Amasiyama na: tlo na:malamana, ya:ye. Ame adipalati, na:ta atlemama, ‘na: ya: kokoye yeliyena,’ dematiye, na: mape wua:ta mala-atlamha:ha:ye epammama naskamu na:ye mala-atlalo oplami dlemla. Epapele tlope na: ya: kokoye na:malamana, epame na: ya:ta atlamhala koko dla salladepo sela:po.

<sup>56</sup> Epedeme wua: mama A:iblahamtapo na:ye natipame sikemte siyeuwapo.”

<sup>57</sup> Epalati asiyama yia:tapo ya: watle epo atlaiyo, “Wa: ala wa:ta halaleye 50 sokomoko po-umasema. Epapele tlope wa: adipammama, ‘na:ye A:iblaham me-natiwa,’ dema:?”

<sup>58</sup> Amasiyama Yesutapo asiyama yia: watle epo atlaiyo, “Na:tapo ikadepe kokoye wua: watle atlema. Na:ye Na:po. Adipalati, A:iblaham ala pohallalo hallati na: tate ka:yapa ma-haluwapo.” <sup>59</sup> Yesuta epo atla dalepame yia:tapo siyalasiyaladepame ewala halopo ya:ye ewala mate kelemala yakomaiyo. Amasiyama Yesutapo aiyalma aya dulu tle hemele alikili a:ma woyamaiyo.

## 9

*Yesutapo oplami mepo inoma pa:le hamale ka:dle*

<sup>1</sup> Epedeme Yesu ya: tamhalemama oplami hale natiyo. Ya:ye ya: waita hammama mepo inoma pa:le hamaiyo. <sup>2</sup> Epapeleye Yesu ya: alotle tlalo sotapo Yesu watle epo atlaiyo, “Labai, ana batalimaletapo ya:ye mepo inoma pa:le hamuwa? Me-ya: batalimaleta apuwa, o ya: wai mate epo ya: a mate yia: batalimaleta apuwa?” diyo.

<sup>3</sup> Epalati Yesutapo epo atlaiyo, “Oplami inoma pa:le iye me-ya: batalimaleta po-apena, epame ya: wai mate epo ya: a mate yia: batalimaleta po-apena. Amasiyama oplami etapo mepo inoma pa:le hamuwa ya: dulu kokoye ipo elema. Godtapo ya:ta itiyamale kokoye ya: tle nati-iliwedeme apuwapo. <sup>4</sup> Epedeme di alila ala me-hela:depo hallati na: tane dle oplami ya: oko hamtlowepo. Epame utula:lata mo-pulati opatapo ma oko



pohamha:ha:lowa. <sup>5</sup> Epedeme na:tapo ta:lamo hema ala me-halatapo ta:lamo tuloma epapele some halapo.”

<sup>6</sup> Yesu yu iye atlepame ta:la dla mitikape tisitepo dota giligidepame oplami inoma dla hutupameliyo. <sup>7</sup> Epame oplami watle epo atlaiyo, “Wa: tame Sailoam yú kolomale dla wa: inoma solopahane,” diyo. Epedeme Sailoam de ya: dulu kokoye tane demama apopo. Epalati oplamitapo tame inoma solopapame inoma mo-towanatipo taiyo.

<sup>8</sup> Epapele dulu dla oplami e ya: asiyadulo mate epo opa opi mate ya:ta alila hapuloma dulu dla api duka dla otompolomduwa koko malapame sikemte yiyeliyo. Epame yia:ta epo atlamyaiyo, “Api duka dla otompolomduwa oplami ita:?” demyaiyo.

<sup>9</sup> Epalati opa opitapo epo atlamyaiyo, “Yao, oplami hatlo mepo,” demyaiyo. Amasiyama opa opitapo epo atlamyaiyo, “Hao, oplami poya: mle, oplami hale ya: sepele mle,” demyaiyo. Epalati oplami meyelo epo atlaiyo, “Oplami eye ikadepe na:po,” diyo.

<sup>10</sup> Epalati yia:tapo ya: watle epo atlaiyo, “Wa: inoma adipammama ma-ka:di?” diyo.

<sup>11</sup> Epalati ya:tapo epo atlaiyo, “Oplami ya: hi Yesu demdiye, etapo sokope solupame na: inoma dla hutupamele, epame na: watle, ‘Sailoam yú kolomale dla inoma solopahala tane,’ de. Na: epalati tame yú dla na: inoma solopahalati na: inomata mo-ka:de,” diyo.

<sup>12</sup> Epapalati yia:tapo ya: watle epo atlaiyo, “Oplami eye da:?” Amasiyama ya:tapo yia: watle epo atlaiyo, “Na: pona:malamana,” diyo.

### *Pa:lisi sotapo Yesuta inoma pa:le oplami ka:dle ya: sitali totamale*

<sup>13-14</sup> Yesutapo inoma pa:le oplami i ka:dleye Yu sota inoma sumalalo alila dla apiyo. Epapedeme opatapo Yesuta inoma kowele oplami ka:dle iye Pa:lisi so hala dla semtaiyo. <sup>15</sup> Epalati Pa:lisi sotapo ya: watle epo atlaiyo, “Wa: inoma adipammama ka:di?” diyo. Epalati asiyama ya:tapo yia: watle epo atlaiyo, “Yesutapo sokope solupame na: inoma dla hutupamele. Epame na:ta na: inoma yú dla howahalati na: inomata mo-towanati,” diyo.

<sup>16</sup> Epela dalepame Pa:lisi sotapo epo atlamyaiyo, “Oplami Yesu iye God tle popuana. Adipalati, ya:ye God tle pualeta ammatiye, ya: dita inoma sumalalo alila dla oko halowe aiyalma himiliye popostlalo wekelemla,” demyaiyo.

Amasiyama opitapo epo atlamyaiyo, “Adipammama batalimale oplamitapo ulugiye-male koko ipapele halomsela:ma:?” demyaiyo. Epapele koko tle Pa:lisi sotapo Yesu koko dla yia: dulu dla duka gladle elaiyo.

<sup>17</sup> Epame Pa:lisi sotapo mamisika: oplami dla atanatiyo, “Wa: oplami wa: inoma ka:dleye ana depo malama:?” diyo. Epalati oplamitapo asiyama epo atlaiyo, “Na: ya:ye God tle yu hapame molo atlalo oplami dema,” diyo.

<sup>18</sup> Amasiyama oplami itapo ikadepe inoma kowepo halale kokoye Yu so dokopala sotapo woloma pomikadepe diyo. Epammama yia:tapo oplami ya: a mate epo ya: wai mate sisilamaiyo, mikadepeta: depo dallowedeme. <sup>19</sup> Epame yia:ta mo-puame ha:ha:lati dokopala sota yia: watle epo atlaiyo, “Maseyemala iye wua:tapo mepo inoma pa:le hamuwa? Epame ya: ma adipammama watapo inoma mo-ka:depo poloma:?” diyo.

<sup>20</sup> Epalati ya: a mate epo ya: wai mateta asiyama epo atlaiyo, “Yao, iye di maseyemala ikadepepo, ya:ye mepo inoma pa:le hamuwa. <sup>21</sup> Amasiyama di podimalamana, ya:ta ya: inoma ka:dle kokoye. Epame di ma podimalamana, ya: ka:dle oplamiye. Epedeme wua: maseyemala ya: dla dalla natiya. Adipalati, ya:ye mo-patopo, ya:ta ya:skamu ya: koko wua: watle atloweye,” diyo. <sup>22</sup> Yia:tapo yia: dokopala so natipo wowota:mama isikimi yia: watle yu ipo atlaiyo. Adipalati, Yu so dokopala so ewolotapo yu himimama epo himiyo, “Oplami antapo Yesuye Kelisopo dlepiye, ya:ye aiyalma aya dulu tle hi kestepo alikili dla polokode demha:ha:lowepo,” diyo. <sup>23</sup> Epapele koko tle ya: a mate epo ya: wai mateta atlemama, “Ya:ye mo-patopo. Ya:ta ya:skamu ya: koko atloweye ma-ala:na,” diyo.

<sup>24</sup> Epedeme Yu so dokopala sota inoma kowele oplamiye mamisika: sisilapame ya: watle epo atlaiyo, “Wa: God mila:pi tle ikadepe kokoye di watle atlane. Adipalati, dimalamana, wa: ka:dle oplamiye batalimale oplamipo.”

<sup>25</sup> Amasiyama oplamitapo asiyama epo atlaiyo, “Na: pona:malamana, ya:ye batalimale oplamita: o ka:dle oplamita:. Epapele dulu dla koko hatlo na:ta sikemte malamaye, na: ka:yapa inoma kokowepo sela:uwapo. Amasiyama na: watapo na: inomaye mo-ka:depo sela:po.”

<sup>26</sup> Epalati asiyama yia:tapo ya: watle epo atlaiyo, “Oplami itapo wa: watle apa koko halati wa: inomata mo-ka:di?” diyo.

<sup>27</sup> Epalati oplami eta asiyama epo atlaiyo, “Na:ta wua: watle koko hapuloma matlamalepo. Amasiyama wua: na: yu eye woloma podalena. Epame wua: ma adipalati koko eye mamisika: dallowama:? Epedeme wua: ma ya: alotle dolumolowe solotamama amma:?” diyo.

<sup>28</sup> Epapalati yia:tapo sikemte siyalasiyalademama ya: watle epo atlaiyo, “Wa: tlo ya: dolumtlalo oplamipo. Amasiyama dia:ye Moses ya: alotle dolumtlalo sopo. <sup>29</sup> Adipalati, dimalamana, Godtapo Moses watle yukamuwaye. Amasiyama di podimalamana, wa: ka:dle oplami kokoye.”

<sup>30</sup> Epalati oplami etapo asiyama epo atlaiyo, “Koko iye adipapeta:? Ya:tapo na: inomaye ka:dlepo. Amasiyama wua: ya: kokoye ala me-yeitapo ha:ha:pa? <sup>31</sup> Adipalati, dimalamana, God ya:ye batalimale koko halomalalo so yu dla podalemhalasema. Amasiyama ya:ye ya: yu dla salladepame ya:ta solotamale koko halomsiyamalalo so yu tlo dalemhalapo. <sup>32</sup> Epedeme ka:yapa ta:lamo kotiyamale tle puwa oloma edla oplami haletapo mepo inoma pa:le hamale oplamiye ka:diyo dle koko atlati podalemдена. <sup>33</sup> Amasiyama Yesutapo na: inomaye ka:dlepo. Epapele dulu dla ya:ye God tle pomallalo wekematiye, ya:ye na: inoma poka:dlalo wekelemla.”

<sup>34</sup> Epalati yia:tapo allimama asiyama ya: watle epo atlaiyo, “Wa:ye wa: hamale oloma etle puwa dla mepo batalimale oplami depo haluwapo. Epapedeme wa: adipammama ma dia: watle koko imala yakoma:?” diyo. Epame yia:tapo ya:ye inoma sumalalo aya dulu tle alikili dla ka:staiyo.

### *Soko tle inoma kokowepo hallowe koko*

<sup>35</sup> Epapeleye Yu so dokopala sotapo inoma pa:le oplamiye inoma sumalalo aya tle ka:stlati Yesutapo ya: natipame ya: watle epo atlaiyo, “Wa: Opa Yami dla mikadepe dema:?” diyo.

<sup>36</sup> Epalati oplamita asiyama epo atlaiyo, “Opa Yamiye anata:? Na: atlane, epalati na:tapo ya: dla mikadepe dlowepo,” diyo.

<sup>37</sup> Epalati Yesuta ya: watle epo atlaiyo, “Wa: ya:ye ma-natilipo. Epedeme ya:tapo wata wa: mate yukamhalapo,” diyo.

<sup>38</sup> Epalati oplamita asiyama epo atlaiyo, “Lod, na: wa: dla mikadepe dema.” Epamama ya:tapo Yesu dla heodepo siyele hamiyo.

<sup>39</sup> Epapedeme Yesutapo epo atlaiyo, “Na:tapo ta:lamo hema puwatapo koko gladle hampuwapo. Eye inoma pa:talo sotapo ma towanatilipo depame, epame inoma ka:ka:dle sotapo ma inoma kokoweipo depame.”

<sup>40</sup> Epapeleye Pa:lisi so opa opitapo Yesuta yu ipo atla dalepame ya: watle epo atlaiyo, “Wa: di ma inoma pa:talo so depo atlema:?” diyo.

<sup>41</sup> Epalati Yesutapo asiyama yia: watle epo atlaiyo, “Wua: inoma kokowele so depo ha:ha:leta ammatiye, wua:ye pobatalimale so dema. Amasiyama wuskamu wua:ye inoma pokokowelalimale so dletapo wua:ye ala me-batalimale so depo ha:ha:po.”

## 10

### *Sipi aliya mate epo yia: omhallalo oplami mate*

<sup>1</sup> Yesu ma epo atlaiyo, “Na: ikadepe koko wua: watle atlema. Oplamitapo sipi aliya kosukulli dulu dla tumama woloma kokoloma tle potulalo ma kosukulli alikili tle hauwokokopo tulupiye, ya:ye uhalalo oplamipo. <sup>2</sup> Amasiyama woloma kokoloma tle ulatulalo oplamiye sipi omhallalo oplami ikadepepo. <sup>3</sup> Epedeme kokoloma omhallalo oplamitapo ya:ta tulupo depame kokolomaye gowala demdepo. Epame sipi aliyaye yia: omhallalo yu dallowe yia:malamana. Adipalati, ya:tapo yia: hiye sesalepame yia:ye eleme sela:mdepo. <sup>4</sup> Epapedeme ya:ta ya: aliyatapo mo-u-ulapo tapa:mele dlati ya:tapo itapu tamdepo. Epalati yia:ta ya: ko tle dolumtamdepo. Adipalati, yia:ye yia: a yu yia:malamana. <sup>5</sup> Amasiyama yia:tapo isikimi oplami haleta tlati podolumalalo, ya: tle potlepe. Adipalati, yia:ye oplami e ya: yu dallowe poyia:malamana.”

<sup>6</sup> Yesutapo wayu i mate opa watle imaiyo. Amasiyama yia: wayu e ya: dulu kokoye woloma pomalamana.

### *Yesuye kokolomapo*

<sup>7</sup> Epalati Yesutapo matle yia: watle epo atlaiyo, “Na: ikadepe koko wua: watle atlema. Na:ye sipi aliya kosukulli kokolomapo. <sup>8</sup> Epedeme na: ala populalo hallati yia: tate puale soye uhalalo sopo. Epapele koko tle sipi aliyatapo yia: yu podalena. <sup>9</sup> Epapedeme na:ye kokolomapo. Oplami antapo na: tle ulatulupiye, ya:ye pasakalo gadle kokoye halepe. Ya:tapo tua epo mati demhalemama Godta gadle ka:pi natimhallepe. <sup>10</sup> Epedeme uhalalo oplamita pulupiye, ya: isikimi uhalowe koko dla puapo, epame ya:mkale yumuluwe koko dla puapo, epame alisisi bobtalimolowedeme puapo. Amasiyama na:ta puwaye, wua:tapo pasakalo gadle kokoye halomha:ha:mama koko ka:dle siyapo tlo halomha:ha:lepo depame puwapo.”

### *Yesuye sipi aliya omhallalo oplami ka:dlepo*

<sup>11</sup> “Epapedeme na:ye ka:dle sipi aliya halo omhallalo oplamipo. Na:tapo na: sipi aliya halo yilo polowedeme puwapo. <sup>12</sup> Amasiyama isikimi asiyama yilo halo omha:ha:lalo sota sipi aliyaye batalipo omha:ha:mdepo. Adipalati, sipi aliya iye poyia: halo ikadepe. Epapedeme yia:tapo moko esemala epapeleta pula natipame aliyaye isikimi medla salepo potamdepo. Epalati moko esemalata puame sipi aliya haloye poyumama opiye alikili a:ma dodolomsalemdepo. <sup>13</sup> Adipalati, asiyama dla oko halalo sotapo sipi aliya halo pasakaloye woloma pomalamalalo isikimi potamdepo.

<sup>14-15</sup> Epapedeme na:ye ka:dle sipi aliya halo omhallalo oplamipo. Epapele dulu dla Atapo na: kokoye sikemte malastepo hallati asiyama na:tapo A kokoye malastepo halapo. Epapedeme na: aliya halota na: malastepo halaye, epammama na: ma asiyama yia: malastepo halapo. Epedeme na:tapo na: sipi aliya halo yilo polowedeme puwapo. <sup>16</sup> Epame na: dla aliya halo opi alumale dulu hema poha:ha:lalo wekele soye me-ha:ha:po. Epedeme na: solotama, yia: mape dulu hema hohopo eleme puame ip-ila:lowedeme. Epalati yia:tapo na: yu dallepe. Epame yia:tapo yimkata alumale hatlope depo ha:ha:mama omhallalo oplami mape hatlope depo hallepe.

<sup>17</sup> Epedeme Atapo na:ye sikemte bokotiyapo malamhalapo. Adipalati, na:tapo na: pasakaloye opa yilo alikili dla himpame mamisika: halepo depame. <sup>18</sup> Epapedeme oplami haletapo na: pasakaloye na: tle pokolahalowa. Amasiyama na: pasakaloye monolo opa yilo isikimi me-hamilowepo. Epapele dulu dla na: dla itiyamale me-elapo, na:tapo na: pasakaloye opa yilo hamipame mamisika: monolo haloweye. Adipalati, koko iye na: Atapo na:ta halepo depame atluwapo.”

<sup>19</sup> Epapeleye Yu sotapo Yesu yu dalepame yiskamu yia: dulu dla yu topulolemama duka gladiyo. <sup>20</sup> Epammama opa opitapo epo atlamyaiyo, “Ya:ye bataliya yemalata tuwame hallati yiyilamsela:po. Epedeme ya: yu dla dalemiya,” demyaiyo.

<sup>21</sup> Amasiyama opa opitapo epo atlamyaiyo, “Bataliya walle oplamitapo adipammama koko ka:dle ipapele atlamsela:pa:? Epame bataliya walle oplamita adipammama inoma pa:le oplamiye ka:depa:?” demyaiyo.

*Yu sota Yesu dla pomikadepe dle koko*

<sup>22-23</sup> Epedeme tene oloma dla Yelusalem dla Yu sotapo yia: aiyalma aya kokoloma gowaladle daya dele elaiyo. Epalati daya dele alilata umulati Yesutapo aiyalma aya dulu edla Solomon potopali dla sela:iyo. <sup>24</sup> Epalati Yu sotapo ya: natipo puame ya:ye silligodepo ha:ha:mama ya: watle epo atlaiyo, “Di alila pasatale dulu dla wa: koko dla sikemte momalamha:ha:ma. Epedeme wa: kokoye di watle haliyamale dla atlane, wa:ye ikadepe Kelisota:?” diyo.

<sup>25</sup> Amasiyama Yesutapo yia: watle epo atlaiyo, “Na:tapo na: koko hapulomaye wua: watle ma-atlamuwapo. Epapele tlope wua: koko edla pomikadepe dena. Epedeme na:tapo na: A hi tle ulugiyemale koko halomdetapo wua: watle na: kokoye me-imdepo. <sup>26</sup> Amasiyama wua:tapo pomikadepe desema. Adipalati, wua:ye pona: sipi aliya halo. <sup>27</sup> Epedeme na: sipi aliya halotapo na: yuye dalemdepo. Epame na: mape yia:ye na:malamana. Epedeme yia:tapo na:ye dolumdepo. <sup>28</sup> Epapedeme na:tapo yia: watle kokó halepo halepo pasakaloye hapilati yia:tapo popalliwa. Epame oplami haletapo na: do dulu tle yia:ye pokolahalowa. <sup>29</sup> Epedeme na: Atapo na: sipi aliya halo iye na: watle ma-hapiwapo. Adipalati, ya:ta itiyamaletapo opa opita itiyamaleye tla:mtame halapo. Epapedeme oplami haletapo na: sipi aliya haloye na: A do dulu tle kolahalowe po-ala:na. <sup>30</sup> Epapele dulu dla na: mate epo A mateye hatlopepo.”

<sup>31</sup> Epalati Yu sotapo matle ewala halopame Yesu kelemala yakomaiyo. <sup>32</sup> Amasiyama Yesutapo asiyama yia: watle epo atlaiyo, “Ata na: dla itiyamale hamilati na:tapo wua: dulu dla ka:ka:dle koko hapulomaye halomsela:uwapo. Amasiyama wua:tapo ka:ka:dle koko hapuloma dulu hema adi tlo batalimana depame na:ye yumuluwedeme amma:?” diyo.

<sup>33</sup> Amasiyama ma yia:ta epo atlaiyo, “Di wa:ta ka:dle koko halomuwa dla wua:ye yumuluwedeme po-apsema. Amasiyama wa:tapo God dla putlomale yu atlaleye, di epalati wa:ye yumuluwedeme apopo. Adipalati, wa:ye isikimi oplami ikadepe tlope, ma wa:ta atlemama, ‘na:ye Godpo’ demhalapo.”

<sup>34</sup> Epapalati Yesutapo yia: watle epo atlaiyo, “Mo-wua: aiyalma hatitimale dulu dla Godtapo epo atlapo, ‘Wua:ye god opipo,’ depo. <sup>35</sup> Epele dulu dla dimalamana, God yu bukata atlama kokoye ikadepe koko atlamapo. Epedeme Godtapo hema ya: yu halalo so watle epo atluwapo, ‘Wua:ye god opipo,’ duwapo. <sup>36</sup> Ame wua: adipapalati na:tapo, ‘na:ye God Yamipo,’ dlati matle na: watle atlemama, ‘wa:ye God putlomhalema,’ dema:? Adipalati, Atapo na:ye sepame ta:lamo dla tane duwapo.

<sup>37</sup> Epedeme wua: na: Ata koko halomhalemde koko eye na:ta pahalomalalo hallepiye, eta wua: na: dla mikadepe demiya. <sup>38</sup> Amasiyama wua:ta na: dla pomikadepe dlalo wekemamaye, isikimi na:ta koko halomsela: i natimama edla mikadepe diya. Adipalati, wua:ta epapelepiye, eta na:ta A mate hatlope depo hala kokoye nati-ilipe.”

<sup>39</sup> Epalati opatapo yu i dalepame Yesuye mamisika: hamolowe solotamaiyo. Amasiyama Yesutapo yia: tle alikili a:ma taiyo.

<sup>40-41</sup> Epame Yesu ma ilame Yoden aloma ulume taiyo, Yontapo ka:yapa opa yú dla ka:ka:timhalale mo dla. Ya: edla tame hallati opa hapulomatapo ya: hala dla puame ha:ha:mama yiskamu yia: dulu dla epo atlamyaiyo, “Yonye ulugiyemale koko pahalomsela:mde. Amasiyama ya:tapo Yesu koko atlamsela:mduwa hapulomaye ikadepe mleni,” demyaiyo. <sup>42</sup> Epame oloma edla opa hapuloma ewolotapo Yesu dla mikadepe diyo.

# 11

## *Lasalesta powale koko*

<sup>1-2</sup> Betani mo dla hallalo oplami hale esiyemhalaiyo, ya: hiye Lasales. Epame ya: nanadulo Meli mate epo Mata mate yia: mape Betani mo edla ha:ha:mdiyo. A:ya Meli iye alotle Lod Yesu hete dla dakopala ullu ka:dle pamalalo mate sipame ya: kokosase mate hiyolle a:ya ipo. <sup>3</sup> Epapeleye Meli mate epo Mata mate oplami hale dla yu hamiyo, ya:tapo Yesu atla telepo depame. Epalati ya:ta tame Yesu dla epo atlaiyo, “Lod, wa:ta sikemte malamalalo oplamiye esiyemelema,” diyo.

<sup>4</sup> Amasiyama Yesu yu e dalepame epo atlaiyo, “Esiyele ya: dla ela etapo ya: dla polowe pohampuluwa. Epedeme koko itapo woyamaye, opata koko itle Godta itiyamale mate epo Yamita itiyamale mate natilipo depame apopo,” diyo. <sup>5</sup> Epapele dulu dla Yesutapo Mata mate epo ya:la Meli mate epo yia: ei Lasales mate sikemte malamaiyo. <sup>6</sup> Epapele tope ya: Lasalesta esiyemhalale kokoye dalepame yipta potlalo, aseka alila dapiyamte medla me-halaiyo.

<sup>7</sup> Alila dapiyamte e mogudlati Yesutapo ya: alotle tlalo so watle epo atlaiyo, “Di ma ilame Yudiya mo dla tlowa,” diyo.

<sup>8</sup> Amasiyama ya: alotle tlalo sotapo ya: watle epo atlaiyo, “Labai, wa: ala edla hallati Yu sotapo wa:ye ewalata kelemala yakomuwapo. Epapeleye wa: ma adipalati ma edla ilame tla yakoma:?” diyo.

<sup>9</sup> Epalati Yesuta epo atlaiyo, “Alila hatlo dulu dla sali inoma 12 me-hutiyepo. Epedeme oplamitapo alila sela:lepiye, ya: hete pokustamtlowa. Adipalati, ya:ye hela:dle dulu dla sela:po. <sup>10</sup> Amasiyama oplamitapo utula:la sela:lepiye, ya:ye kustantelepe. Adipalati, ya: dla hela:dle hawa.”

<sup>11</sup> Yesuta yu iye atlemhalepame ma epo atlaiyo, “Dia: amkale Lasalesye me-elapo. Epedeme na: tame ya:ye esesa:lowama,” diyo.

<sup>12</sup> Epalati ya: alotle tlalo sotapo epo atlaiyo, “Lod, ya:ye isikimi elaleta ammatiye, ya: matle sila:tilimla,” diyo.

<sup>13</sup> Amasiyama Yesuta atlale ya: dulu kokoye Lasalesta ikadepe mo-powame elale kokoye atlaiyo. Epapele tope Yesu ya: alotle tlalo sota Lasalesye semte ikadepe elemapo depame epo malamaiyo.

<sup>14</sup> Epammama Yesutapo yia: watle haliyamale dla epo atlaiyo, “Lasalesye mo-powame elema. <sup>15</sup> Epedeme na: siyema, na:ta wua: yilo hapele ya: ponatila tana. Amasiyama wata wua:tapo na:ta tame ya: dla koko halati natipame na: dla mikadepe dlepe. Epedeme ya: hala dla tlowa.”

<sup>16</sup> Epalati Tomas ya: hi hale Didimas demdetapo alotle tlalo so opa opi watle epo atlaiyo, “Di ma Yudiya mo dla tame yimkata Yesu mate palliwepo,” diyo.

## *Yesuye opa palli tle ta:ta:depame pasakalo hapilalo halapo*

<sup>17</sup> Yesuta puame Betani mo edla woyamale oloma dla Lasalesye wabasi dulu dla elemama alila dapiyamte dapiyamte dle mo-pololepo halaiyo. <sup>18</sup> Betani mo iye Yelusalem tle pase pateka:muyo, isikimi 3 kilomita api selemalli epapiyo. <sup>19</sup> Epedeme Yu so opa opitapo Yelusalem tle Meli mate epo Mata mate yia: Lasalesta powale koko dla yimkata dupa kolle himilowedeme mo-puame ha:ha:iyo.

<sup>20</sup> Epapeleye Matatapo Yesuta puale koko dalepame api duka dla ya:ye umuluwedeme taiyo. Amasiyama Meli tlo aya dla me-polaiyo. <sup>21</sup> Epalati Matatapo Yesu umpo ya: watle epo atlaiyo, “Lod, wa: hema me-halematiye, eta na: eiye popolalo wekema. <sup>22</sup> Amasiyama na:malamana, wa: apa koko God dla atlanatiliye, Godtapo koko eye wa: watle hamilipe,” diyo.

<sup>23</sup> Epalati Yesuta asiyama epo atlaiyo, “Wa: eiye matle sila:time pasakalo dlepe,” diyo.



<sup>24</sup> Epalati Matatapo asiyama epo atlaiyo, “Na: malamana, ya:ye mosukulu alila dla palli sotapo matle silliwe oloma edla ya:ye matle sila:time pasakalo dlepe,” diyo.

<sup>25</sup> Epapalati Yesutapo ya: watle epo atlaiyo, “Na: tapo opaye palli tle ta:ta:depame yia: watle pasakalo hapilalo halapo. Epedeme oplami antapo na: dla mikadepe depo halemama polopiye, ya:ye ikadepe popolowa. Amasiyama ya: ala me-hallepe. <sup>26</sup> Epame oplami antapo popolalo halemama na: dla mikadepe dlepiye, ya:ye popolowa, kokó hallepe. Epedeme Mata, wa: koko hema mikadepe dema:?”

<sup>27</sup> Epalati asiyama Matata epo atlaiyo, “Yao, Lod, na: koko hema mikadepe dema. Adipalati, wa:ye God Yami Keliso, ta:lamo hema pulupe demduwa oplamipo,” diyo.

<sup>28</sup> Matatapo yu i atlemhalapo gudepame ma ilame tame ya:la Meli watle hemele epo atlaiyo, “Imalalo oplamiye mo-puame halema. Epedeme ya: wa: natilowe solotamuwo,” diyo. <sup>29</sup> Melitapo yu i dalepame sila:time hapele taiyo, Yesu natilowedeme.

<sup>30</sup> Yesu mo dulu dla pomatilalo, ala Matata tame ya: umale mo medla me-halaiyo. <sup>31</sup> Epedeme Yu sotapo Meli gademama ya: mate aya dla me-popa:iyo. Epapeleye ya:ta ma hapele sila:time tale koko natipame ya: mate tamalaiyo. Yia:ta malamaleta Meliye wabasi dla tame amolowedeme ammapo diyo.

<sup>32</sup> Amasiyama Melitapo Yesuta hala mo dla tame ya: hete sitali dla heodepo polomama epo atlaiyo, “Lod, wa: hema halematiye, eta na: eiye popolalo wekema,” diyo.

<sup>33</sup> Yesutapo Meli mate epo Yu so opi, Meli mate pumulale sota yimkata a:lle koko natipame sikemte dupa koliyo. <sup>34</sup> Epammama ya: tapo yia: watle epo atlaiyo, “Wua: ya:ye hadima polomoluwa?” diyo. Epalati asiyama yia:ta epo atlaiyo, “Lod, wa: aseka hema puame natine,” diyo.

<sup>35</sup> Epalati Yesu ya: mape Lasales yilo me-amaiyo.

<sup>36</sup> Epalati Yu sotapo koko e natipame epo atlaiyo, “Natiya. Yesuye Lasales sikemte malamapo,” diyo.

<sup>37</sup> Amasiyama opa opitapo epo atlamyaiyo, “Oplami iye inoma pa:le oplamiye ka:duwapo. Ame ya:ye adipalati Lasalesye poka:dlalo wekuwa?” demyaiyo.

### *Yesuta Lasalesye ma pasakalo dle koko*

<sup>38</sup> Yesu ala me-dupa kolle pato mate Lasales polomilli mo mateka:pi dla tuwaiyo. Wabasi iye tei seselemale dulu dla mita:ple munamu halaiyo. Epame kokolomaye ewala patota himomelepo halaiyo.

<sup>39</sup> Epapeleye Yesutapo opa watle atlemama, “Ewala eye alikili dla kokolustaiya,” diyo. Epalati Lasales ya: nana Matatapo epo atlaiyo, “Lod, ya:ye ma-alila dapiyamte dapiyamte dle dulu dla wabasi dulu dla elademe hutallu pato mo-pamayo,” diyo.

<sup>40</sup> Epapalati Yesuta asiyama ya: watle epo atlaiyo, “Na:ta wa: dla ma-atlalepo. Epedeme wa: na: dla mikadepe dlepiye, wa: Godta itiyamaleye natilipe,” diyo.

<sup>41</sup> Epalati opatapo wabasi kokoloma tulalo dla himomeleme polale ewalaye alikili dla kokolustaiyo. Epame Yesutapo pepele di dla omhalemama epo atlaiyo, “A, na: siyema, wa:ta na:ta inoma sumale yuye me-dalemdepo. <sup>42</sup> Epame na: malamana, wa:ye alila hapuloma na:ta inoma sumaleye dalemdepo. Amasiyama opa hema ha:ha: sotapo wa:ta na:ye tane duwa koko dla mikadepe dlepo depame na: koko iye atlema.”

<sup>43</sup> Yesutapo yu epo atlemhalepo gudepame yu teta:le mate epo atlaiyo, “Lasales, wa: wabasi tle ma haliyamale dla ulamatine,” diyo. <sup>44</sup> Epalati Lasalestapo haliyamale dla ulamatime halemama ya: do mate epo ya: hete mate epo ya: mila:pi mate tlukata me-popoliyepo halaiyo. Epapalati Yesutapo opa watle epo atlaiyo, “Wabasi tluka ya: dla popoliyepo halaye alikili a:ma totowatimaiya,” diyo.

### *Yesu yumuluwe api totamale*

*(Mat 26:1-5; Maka 14:1-2; Luk 22:1-2)*

<sup>45</sup> Epedeme Yu so opa opi Meli mate ha:ha:le sotapo koko i natipame Yesu dla mikadepe diyo. <sup>46</sup> Amasiyama opitapo Pa:lisi so hala dla tame Yesuta koko halëye atlaiyo. <sup>47</sup> Epapalati aiyalma aya dokopala so mate epo Pa:lisi so mateta Yu so dokopala so hapuloma sisilapame epo atlaiyo, “Di apa koko hapa:? Adipalati, oplami iye ulugiyemale koko pasatale mo-halomsela:po. <sup>48</sup> Di koko hale pahalalo wekelepiye, opa hapulomatapo ya: dla mikadepe demama ya: dolumelepe. Epalati Loum gamani sotapo di aiyalma ayaye batalipo hamastamama di opa ma batalimelepe,” diyo.

<sup>49</sup> Epapeleye sokomoko oloma edla aiyalma aya dokopala hallalo oplami Kayapastapo opa alumale so ewolo dla epo atlaiyo, “Wua: koko yeitamale sopo. <sup>50</sup> Epedeme wua: ala pomalamalalo ha:ha:pa? Oplami hatlopetapo opa hapuloma yilo polowe ka:pi. Epapelepiye, opa hapulomaye pobobtalimolowa,” diyo.

<sup>51</sup> Epapedeme Kayapastapo koko i atluwaye, isikimi meyelo malamale tle po-atlana. Amasiyama ya:ye sokomoko oloma edla aiyalma aya dokopala halemama Yesutapo Yu so yilo polowe kokoye momolo natipame atluwapo. <sup>52</sup> Amasiyama hatlo Yu so yilo polowedeme po-apena. Amasiyama God ya: opa meyelo meyelo depo ha:ha:mtaye ma hatlope dlowedeme apuwapo. <sup>53</sup> Epapele alila oloma etle kotiyapo tamalemama Yu so dokopala sotapo Yesu yumuluwe api totamtalaiyo.

<sup>54</sup> Epapele koko tle Yesuta matle Yu so mila:pi tle haliyamale dla posela:mdiyo. Amasiyama ya:ye etle ma dalupa mateka:pi dla mo yemala hale, Eplaim demdiye, edla ya: alotle tlalo so mate tame halaiyo.

<sup>55</sup> Epame Godta Namilatale daya dele alilata mo-teteka:mpulati Yu so mo yimlala yimka:sikili dla ha:ha:mtale so opitapo Yelusalem dla hetamalaiyo, yiskamu yia:ye God mila:pi tle dinapolowedeme. <sup>56</sup> Epedeme yia:tapo Yelusalem dla hetame Yesuye totamaiyo. Epammama aiyalma aya dla tame yiskamu yia: dulu dla epo atlamiyaiyo, “Wua:ta malamale adipamma:? Yesuye daya dele hema puluwe?” demyaiyo.

<sup>57</sup> Amasiyama aiyalma aya dokopala so mate epo Pa:lisi so mateta opa watle yu hamimama epo atlaiyo, “Oplami antapo Yesuta hala mo malamale hallepiye, ya: puame di atellepe, epalati dita tame ya:ye hamolowepo,” diyo.

## 12

### *Melita Yesu hete dla dakopala ullu ka:dle simale (Mat 26:6-13; Maka 14:3-9)*

<sup>1</sup> Namilatale daya dloweye alila 6 a:ma me-ellati Yesu ya:ye Lasalesta hallalo mo Betani dla ilame taiyo. Lasales iye Yesuta powale tle ma pasakalo dle oplami ipo.

<sup>2</sup> Epame tamila:la oloma edla Yesu ya:mkadulotapo Yesu dla daya pato dinapiyo. Epapele dulu edla Matatapo daya alemsele:iyo. Epalati Lasales ya: mape dulu medla Yesu mate daya dempolaiyo. <sup>3</sup> Epalati Melitapo ullu ka:dle pamalalo dakopala hapame Yesu hete dla simaiyo. Epame Yesu heteye ya: kokosase mate hiyolempollati ya: ullu ka:dletapo aya duluye haiyo. Amasiyama ullu ka:dle pamalalo alisisi iye mani patota halalo alisisipo.

<sup>4</sup> Epapele oloma edla Yesu ya: alotle tlalo oplami hale edla polaiyo, ya: hiye Yudas Iskaliyot. Oplami iye alotle Yesuye opahale do tama dla homellowedeme haluwapo. Epapele ya:tapo epo atlaiyo, <sup>5</sup> “Ullu ka:dle pamalalo dakopala iye mani pta patota hamdepo. Ame poka:deta:, dakopala ka:dle iye opa watle hamipame ma asiyama mani tlo hapo alisisi pa:talo so watle hapiloweye,” diyo. <sup>6</sup> Amasiyama Yudasta yu ipo atluwaye, ya: atali so dla polowamale elemama yu iye po-atlana. Amasiyama ya:ye uhalalo oplami deme ya:tapo yu ipo atluwapo. Adipalati, ya:tapo Yesu ya: alotle tlalo so mani omhalemama mani hemele me-uhamhaluwapo.

<sup>7</sup> Epame Yesuta epo atlaiyo, “Melita koko ha dla natipo ya:ye batalipo atlemiya. Adipalati, ya:ta koko halëye na:ta polowe koko dla dinapomama koko i halëpo. <sup>8</sup> Epedeme

alिसिसi pa:talo sotapo alila hapuloma dulu dla wua: mate ha:ha:lepe. Amasiyama na: alila hapuloma dulu dla wua: mate pohallowa,” diyo.

*Dokopala sota Lasales yumuluwedeme esemale*

<sup>9</sup> Epapele dulu dla Yu so hapulomatapo Yesuta Betani mo dla puame halale koko dalepame Yesu natila tamalemama Lasales ma me-natila tamalaiyo. Adipalati, Yesu-tapo ya:ye powale tle ma pasakalo duwapo. <sup>10</sup> Epapele koko tle aiyalma aya dokopala sotapo Lasales ma me-yumuluwe solotamaiyo. <sup>11</sup> Adipalati, Lasalesta ma pasakalo dle koko tle Yu so opa opitapo yia: dokopala so salepame ma Yesu dla mikadepe demyaiyo.

*Yesuta Yelusalem dla tale*

*(Mat 21:1-11; Maka 11:1-11; Luk 19:28-40)*

<sup>12</sup> Epame alila haletapo opa hapuloma Yelusalem dla Namilatale daya dla tale sotapo Yesuta puale kokoye daliyo. <sup>13</sup> Epame yia:tapo usi kolepame Yesu umula tamalemama yu teta:le mate epo atlamtamalaiyo, “God hi di dla ta:diya.

Lod hi tle pua oplami dla sisiyeiya.

Epame Isael so yia: dokopala oplami dla sisiyeiya,” demtamalaiyo.

<sup>14</sup> Epapele oloma dla Yesutapo donki aliya amkota:leye natipame ya: dimsisi di dla polaiyo. Koko itapo woyamaleye God yu bukata atlamale koko mate ala:mama apuwapo. Adipalati, God yutapo epo atlapo,

<sup>15</sup> “Yelusalem so, wua: ase wowota:miya.

Wua: dokopala oplamitapo donki aliya dimsisi di dla pollati sempuapo,” depo.

<sup>16</sup> Amasiyama oloma edla Yesu ya: alotle tlalo sotapo koko iye woloma pomalamaiyo. Amasiyama Yesutapo popo sila:tili alotle yia:tapo Yesu dla wowoyamuwa koko hapulomata God yu bukata atlale mate ala:uwa kokoye malanatiwapo.

<sup>17</sup> Epedeme Yesuta Lasalesye ma wabasi dulu tle sisilapame ma pasakalo dle natili sotapo ma tame opa opi watle atlamyaiyo. <sup>18</sup> Epalati opa hapulomatapo Yesuta ulugiye-male koko halë e dalepame ya: natila tamalaiyo. <sup>19</sup> Amasiyama Pa:lisi sotapo yiskamu yia: dulu dla epo atlamyaiyo, “Wua: natiya. Dia: dla itiyamale mo-pa:po. Adipalati, opa hapulomatapo ma ya: tlo mo-doluntamalapo,” demyaiyo.

*Yesutapo ya:ta polowe koko atlale*

<sup>20</sup> Epapedeme Guliki so opitapo Yelusalem dla Namilatale daya dele dla hetlalo so mate hetaiyo. <sup>21</sup> Epapeleye yia: tame Ga:lili mo dulu dla Betsaida mo yemala dla hallalo oplami Pilipi watle epo atlaiyo, “Namkale, di Yesu natilowe solotama,” diyo. <sup>22</sup> Epalati asiyama Pilipitapo Endulu atlepame yia:ta madipatata Yesu tame atlaiyo.

<sup>23</sup> Epapalati asiyama Yesuta yia: watle epo atlaiyo, “Alilatapo mo-puapo, Opa Yami-tapo ya:ta hela:dle haloweye. <sup>24</sup> Epedeme na: ikadepe koko wua: watle atlema. Dlomoko-tapo ta:la dla podowatullalo ala dali dlo di dla me-dowa ellepiye, ya: tle ale amkota yipta po-peyamolowa. Amasiyama dlomokotapo ta:la dla mo-dowatulume elemama hutulupiye, eta ya: moko tle ale amkota peyapo pato depame dlomoko pasatale milipe.

<sup>25</sup> Epapedeme opa anawolotapo yia: pasakalo dla sikemte malamale pato hutiyelepiye, yia: pasakaloye haodlepe. Amasiyama ta:lamo hema ya: pasakalo dla pase malamale pato himhallalo oplamitapo ya: pasakaloye pohaodlowa. Amasiyama ya: halepo halepo pasakalo halepe. <sup>26</sup> Epedeme oplami antapo na: oko halowe solotamelepiye, ya: na: dolumpulupe. Epelepiye, oplami etapo na:ta hallowe mo dla ya: mate hallepe. Epedeme na: oko halalo oplami dla na: Atapo siyemhalapo.

<sup>27</sup> Epapele dulu dla na: wata oloma hema sikemte dupa kolema. Epedeme na: ka:deta:, A watle atlemama, ‘A, wotiyalle na: dla pua iye alikili a:ma hamastane,’ dloweye? Hao, pe-epapolowa. Ame adipalati, na: wotiyalle e halowedeme ta:lamo hema mo-puwapo.

<sup>28</sup> Epedeme A, opa dla wa: hita pato depo hala kokoye nati-ine.”

Epalati yutapo pepele di tle epo malaiyo, “Na: opa dla na: hita pato depo hala kokoye ma-nati-iwapo. Epame na: matle yia: watle nati-iliwepo,” diyo. <sup>29</sup> Amasiyama opata yu i dalepame, “semte omaplata hamapo,” diyo. Epalati opa opita malamaletapo, “semte banakaka oplamita Yesu mate yukamhalemapo,” diyo.

<sup>30</sup> Epame Yesutapo ma epo atlaiyo, “Yu etapo pualeye na: gadlowedeme popuana. Amasiyama wua: gadlowedeme pualepo. <sup>31</sup> Epapedeme Godtapo ta:lamo so koko gladlowe alilaye mo-puapo. Epame wata ta:lamo dokopala oplami Saitenye alikili a:ma ka:stlepe. <sup>32</sup> Epedeme opatapo na:ye ta:la tle di dla ta:dlepiye, na:tapo opa hapulomaye na: hala dla elempuluwepo.” <sup>33</sup> Yesutapo koko i atluwaye, ya:ta adipo popa: dle kokoye atlemama apuwapo.

<sup>34</sup> Epalati opatapo epo atlamyaiyo, “Dita aiyalma hatitimale koko tle dalemkiye, Kelisoye kokó hallepe dla dalemdepo. Ame wa: adipalati Opa Yamiye ma ta:la tle di dla ta:dlepe dema:? Epame Opa Yami iye anata:?” demyaiyo.

<sup>35</sup> Amasiyama Yesutapo yia: watle epo atlaiyo, “Hela:dleta alila kiyele dla wua: mate hallepe. Epapedeme hela:dle dulu edla siyamaiya, amtuwaletapo ma wua: bopudlala depame. Epapele dulu dla wua: amtuwale dulu dla siyamelepiye, wua: wua:ta ta apiye woloma pomalanatilowa. <sup>36</sup> Epedeme hela:dleta ala wua: mate me-hala dla hela:dle edla mikadepe diya. Wua:ta epapelepiye, wua: eta hela:dle ya: akimlala depo ha:ha:lepe.” Yesu yu i atlemhalepo gudepame opata ya:ye ma natilala depame hemele haka:ma dla taiyo.

*Yu sota Yesu dla ala pomikadepe dlalo wekele koko*

<sup>37</sup> Yesutapo ulugiyemale koko hapuloma opa mila:pi tle halomhalaiyo. Amasiyama opatapo ala ya: dla pomikadepe diyo. <sup>38</sup> Epedeme koko ita woyamaleye God tle yu hapame molo atlalo oplami Aisayata atlamale koko mate ala:mama apiyo. Ya:tapo epo atluwapo,

“Lod, anta dita atlama kokoye mikadepe duwa?

Epame Lodta itiyamaleye anawolo watle bobotimatimuwa?” duwapo.

<sup>39</sup> Epapedeme opatapo Yesu dla pomikadepe dena. Adipalati, Aisayatapo matle epo atluwapo,

<sup>40</sup> “Lodtapo opa hapuloma inomaye mo-hihimamuwapo.

Epame ya:tapo yia:ta malamale hapulomaye mo-hihimamuwapo,

yia:tapo woloma ponatilalo wekelepo depame,

epame woloma pomalamalalo wekelepo depame,

epame ma Lod dla heheletipame gadle pahalalo wekelepo depame.”

<sup>41</sup> Epedeme Aisayata Yesuta hela:dle natipame ya: koko dla epo atlamuwapo.

<sup>42</sup> Epapele tope opa opi mate epo Yu so dokopala so opi mateta Yesu dla mikadepe diyo. Amasiyama yia:ta Pa:lisi so wowota:mama yia:ta mikadepe dle kokoye haliyamale dla pobotomastaiyo. Adipalati, Pa:lisi sotapo yia: hi inoma sumalalo aya dulu dla hutieyele kotimalala depame. <sup>43</sup> Epapele koko tle yia:ta yia: dokopala so wowota:mama God tle siyele halowe tlo pase malamalalo asiyama opa tle siyele halowe tlo sikemte momalamdiyo.

<sup>44</sup> Amasiyama Yesutapo yu teta:le mate epo atlaiyo, “Oplami antapo na: dla mikadepe dlepiye, ya:ye na: tane duwa oplami dla ma mikadepe demhalemama apopo. <sup>45</sup> Epame oplami antapo na:ye natilipiye, ya:ye na: tane duwa oplami ma natimama apopo.

<sup>46</sup> Epedeme na:tapo ta:lamo amtuwale hema puwaye, tuloma epapele some hela:dle hampuwapo. Epapele dulu dla oplami antapo na: dla mikadepe dlepiye, ya:ye amtuwale dulu dla ma posela:lowa.

<sup>47</sup> Epapedeme oplami antapo na: yu dalepame posalladlalo wekelepiye, na:tapo ya: kokoye pogladlowa. Adipalati, na:tapo ta:lamo hema puwaye, opa koko gladlowedeme popuana. Amasiyama opa pasakaloye gadlowedeme puwapo. <sup>48</sup> Epapele dulu dla

oplami antapo na: alimama na:ta imale koko ma hala allipiye, asiyama mosukulu alila dla na:ta atlamhala yu itapo ya: kokoye gladlepe. <sup>49</sup> Adipalati, na: monolo isikimi na:ta malamale tle yu iye po-atlamasema. Amasiyama na: A, na: tane duwata atlamane dlati yu eye atlamhalapo. <sup>50</sup> Epedeme Godta atlamale yu itapo opa dla halepo halepo pasakalo hampulupe. Epapele koko tle na:tapo na: Ata atlamale koko ikadepeye ma wua: watile atlamhalapo.”

## 13

### *Yesuta ya: alotle tlalo so heteye yú mate howahalomale*

<sup>1</sup> Yu sota Namilatale daya dlowe alilata mo-mateka:pi hallati Yesu ya: ma malamaiyo, ya:ta ta:lamo i saliyome ma ya: A hala dla hetlowe alilata mo-mateka:pi dla puaye. Epapedeme ya:tapo ta:lamo hema halemama ya: alotle tlalo soye sikemte bokotiyapo malamale mate halemama ya:ta polowe sukulu dla tame gudiyo.

<sup>2</sup> Epapedeme Yesutapo ya: alotle tlalo so mate tamila:la daya dempopa:iyo. Epapele dulu edla Saimon Iskaliyot yami Yudas watile Saitenta malamale batalimale ma-hamiyo, ya:tapo Yesuye opahale do tama dla homellepo depame. <sup>3</sup> Epame Yesu ya:ye mo-malamaiyo, ya: Atapo koko hapuloma omhallowe itiyamale ya: dla hamiwaye. Epame ya: ma mo-malamaiyo, ya:tapo God tle pupame ma God hala dla ilame hetlowe kokoye. <sup>4</sup> Epammama ya:tapo daya dempopa:le tle sila:tipo ya:ta asilalo tluka hale pustepo kapala hiyollalo tluka hapame ya: akolo dla poliyo. <sup>5</sup> Epame ita dulu dla yú sipo ya: alotle tlalo so heteye howahalomtapame ma kapala hiyollalo tluka ya: akolo dla asiyame halale hame yia: heteye hihiyoliyo.

<sup>6</sup> Epamtame Saimon Pita hete howahalowedeme apalati Saimon Pitatapo epo atlaiyo, “Lod, wa: na: hete ma howahalowedeme apopa?” diyo.

<sup>7</sup> Epalati Yesuta epo atlaiyo, “Wa: na:ta wata koko ha i ya: dulu kokoye woloma poma-lamolowa. Amasiyama alotle wa:tapo wata na:ta koko ha ya: dulu kokoye malamelepe,” diyo.

<sup>8</sup> Epapalati Pitatapo epo atlaiyo, “Wa: na: heteye pohowahalowa,” diyo. Epalati Yesutapo asiyama epo atlaiyo, “Wa: na:ta wa: hete pohowahalalo wekelepiye, wa:ye pona: oplami,” diyo.

<sup>9</sup> Epalati Saimon Pitatapo ma epo atlaiyo, “Lod, wa: hatlo na: hete siyapo tlo pohowahalowa. Amasiyama na: do mate epo na: dokopala mate hapuloma howahalomane,” diyo.

<sup>10</sup> Amasiyama Yesutapo epo atlaiyo, “Yú mo-hutale oplami moto dla ulluye ma hawa halapo. Epedeme ya: ka:dena, ma isikimi ya: hete siyapo tlo howahaloweye. Epapedeme wua:ye ullu ma-hawa ha:ha:po. Amasiyama epapele tlope wua: dulu dla oplami hale ala ullu mate me-halapo.” <sup>11</sup> Epedeme Yesu ya: mo-malamaiyo, ya: hamame opahale do tama dla homellowe oplamiye. Epammama ya:tapo epo atlaiyo, “Oplami hale wua: dulu dla ala ullu mate me-halema,” diyo.

<sup>12</sup> Yesutapo ya: alotle tlalo so hete howahalomtepo gudepame ma tluka asiyampolla tumama epo atlaiyo, “Wua: na:ta ala edla koko hale ya: dulu kokoye me-malama:?”

<sup>13</sup> Epedeme wua:ta na: watile atlemama, ‘imalalo oplami,’ epo ‘Lod,’ demdepo. Wua:ta na: dla epo atlamde kokoye ikadepepo. Eye na:po. <sup>14</sup> Epapedeme wua: imalalo oplami epo wua: Lod na:tapo wua: heteye mo-howahalomalepo. Epedeme wua: mape wua: amkadulo heteye asiyama howahaloma asiyama howahaloma demha:ha:iya. <sup>15</sup> Na:ta wua: dla koko hale i natipo dolumaiya. <sup>16</sup> Epedeme na: ikadepe koko wua: watile atlema. Isikimi oko halalo oplamita ya: dokopala oplamiye tla:mtame pohalasema. Epame do sesa:le hamtlalo oplamita ya: tane dle oplamiye tla:mtame pohalasema. <sup>17</sup> Epapele dulu dla wua: koko iye malapame epo hamha:ha:lepiye, Godtapo koko iye natimama siyelepe.



<sup>18</sup> Epedeme na:ta atlama kokoye pase wua:ta hapuloma dla po-atlasema. Adipalati, na:malamana, na:ta mo-hohomuwa soye. Amasiyama God yu bukata epo atlapo, ‘Oplami na: mate daya dempolatapo na: mate opahale dlepe.’ Epapedeme God yu bukata epo atla kokota ikadepe woyamolowe tlo ka:pi. <sup>19</sup> Epapedeme koko ita ala powoyamalalo hallati na:tapo wua: watle koko iye atlema. Amasiyama koko itapo ikadepe woyamelepiye, eta wua:ta na:ye ikadepe Keliso mleni dlepe. <sup>20</sup> Epedeme na: ikadepe koko wua: watle atlema. Oplami antapo na:ta tane dle oplamiye ya: aya dla seme hetlepiye, ya: na:ye seme hetamama apelepe. Epame oplami antapo na:ye ya: aya dla seme hetlepiye, ya: na: A na: tane duwaye e seme hetamama apelepe.”

*Yesuta ya:ye opahale do tama dla homelle oplami botomastale  
(Mat 26:20-25; Maka 14:17-21; Luk 22:21-23)*

<sup>21</sup> Yesutapo yu i atlemhalepo gudepame dupa kolle mate halemama ya: alotle tlalo so watle epo atlaiyo, “Na: ikadepe koko wua: watle atlema. Wua: dulu dla oplami haletapo na:ye opahale so do tama dla homellepe,” diyo.

<sup>22</sup> Epapalati ya: alotle tlalo sota yiskamu yia: dulu dla asiyama nati asiyama nati demyemama, “koko iye ana watle atlema;,” demyaiyo. <sup>23</sup> Epapele oloma edla Yesu ya: alotle tlalo so dulu dla Yesuta sikemte malamalalo oplamiye ya: mateka:pi dla me-polaiyo. <sup>24</sup> Epapeleye Saimon Pitata oplami e watle inomata gidiyo, ya:tapo Yesuta atlamale kokoye oplami anta apopa: depa dalla natilowedeme.

<sup>25</sup> Epalati ya:tapo Yesu dla hitapolomama ya: watle epo atlaiyo, “Lod, oplami anta wa:ye opahale so do tama dla homelepa:?” diyo.

<sup>26</sup> Epapalati Yesuta asiyama epo atlaiyo, “Na:tapo dayata dala dulu dla saodepame hamilipiye, oplami etapo na:ye opahale so do tama dla homellepe.” Epame Yesutapo daya hapo dala dla saodepame Saimon Iskaliyot yami Yudas watle hamiyo. <sup>27</sup> Yudasta daya e halë oloma edla Saitentapo ya: opasi dulu dla me-hetaiyo. Epalati Yesutapo ya: watle epo atlaiyo, “Wa:ta koko halowedeme malapola kokoye ma hapele hane,” diyo. <sup>28</sup> Epapele dulu dla Yesuta Yudas watle epo atluwa ya: dulu kokoye ya: alotle tlalo sotapo woloma pomalamaiyo. <sup>29</sup> Adipalati, yia:ta malamaletapo semte Yudasta Namilatata daya ma hala telepo demapo diyo. Epalati opa opita malamaleta maniye semte atali so dla hapila tane demapo diyo. Adipalati, Yesu ya: alotle tlalo so dulu dla Yudasta mani omhalem-diyo. <sup>30</sup> Epedeme mo-utula:la hallati Yudastapo Yesuta daya hamili hapame alikili a:ma ulataiyo.

*Molo atlale yu amko*

<sup>31</sup> Yudasta ma-alikili a:ma ulatale hallati Yesutapo epo atlaiyo, “Epedeme Opa Yamita hela:dleye wata mo-botomastapo. Epame Godta hela:dleye Yami tle mo-botomastapo. <sup>32</sup> Epapedeme Godta hela:dleye Yami tle botomastlepiye, asiyama Godtapo Yamita hela:dleye me-ya: dulu dla botomastlepe. Epedeme koko eye ya:ta ma hapele halepe.

<sup>33</sup> Epedeme namkadulo, na: ala alila kiyele dulu dla wua: mate me-hallepe. Epame na:ta ma-tlati wua: ma na: totamelepe, amasiyama wua: na: ponatilowa. Epapedeme na:ta Yu so dla ma-atlamuwa kokoye mamisika: wata wua: watle atlama. Wua: na:ta ta mo dla wua: ma tloweye po-ala:na.

<sup>34</sup> Epapedeme na: ma molo atlale yu amkoye wua: watle hamima. Wua:tapo wua: amkaduloye asiyama bokotiyapo malama asiyama bokotiyapo malama demha:ha:lepo depame. Na:ta wua: sikemte bokotiyapo malamhala epammama, wua: amkale asiyama bokotiyapo malama asiyama bokotiyapo malama demha:ha:iya.

<sup>35</sup> Epapele dulu dla wua:ta ya:mkale asiyama bokotiyapo malama ya:mkale asiyama bokotiyapo malama dle dulu dla ha:ha:lepiye, etapo opa hapulomata wua:ye ikadepe na: dolumtlalo so mleni dlepe.”

*Pitata Yesu welilowe kokoye Yesuta momolo atlale  
(Mat 26:31-35; Maka 14:27-31; Luk 22:31-34)*

<sup>36</sup> Amasiyama Saimon Pitatapo epo atlaiyo, “Lod, wa: hadima tlowedeme amma:?” diyo. Epalati Yesuta asiyama epo atlaiyo, “Wa: wata oloma hema na:ta ta dla puluweye po-ala:na. Amasiyama alotle wa: ma me-pulupe,” diyo.

<sup>37</sup> Epapalati Pitata ma epo atlaiyo, “Lod, na: adipalati wata wa: mate tloweye po-ala:lalo wekema:? Na: wa: yilo poloweye ma-dinapopo halapo,” diyo.

<sup>38</sup> Amasiyama Yesuta asiyama epo atlaiyo, “Wa: ikadepe na: yilo poloweye ma-dinapopo halema:? Epedeme na: ikadepe koko wa: watle atlema. Wa: gagapota ala poyulumalalo hallati wa: tatile na: kokoye dapahatlope oloma dla wellipe,” diyo.

## 14

*Yesuye apipo A hala dla hetloweye*

<sup>1</sup> Epedeme Yesutapo epo atlaiyo, “Wua: ase sikemte dupa momalamale mate ha:ha:miyo. Amasiyama wua: God dla mikadepe demama na: dla ma mikadepe diya.

<sup>2</sup> Adipalati, na: A aya dla alupoli sikemte pasatale me-hutiyepo. Epapedeme koko itapo ikadepe pe-ellalo wekematiye, na: koko iye wua: watle po-atlamalalo wekelemla. Epedeme na: edla wua:ta tame ha:ha:lowe moye dinapela tlowepo. <sup>3</sup> Epedeme na:ta tame koko hapulomaye mo-dinapopo gudepame ma ilame puame wua:ye elemolowepo. Epame wua: ma mo edla yinkata na: mate ha:ha:lowepo. <sup>4</sup> Epapedeme wua: na:ta ta mo apiye mo-wua:malamana.”

<sup>5</sup> Amasiyama Tomastapo Yesu watle epo atlaiyo, “Lod, di wa:ta ta moye di yeitamana. Di adipammama wa:ta ta apiye malapa:?” diyo.

<sup>6</sup> Epalati Yesutapo epo atlaiyo, “Na:ye apipo. Epame na:ye ikadepe kokopo. Epame na:ye pasakalopo. Epedeme oplami haletapo isikimi api hale tle A hala dla potlowa. Amasiyama ya: hatlo na: tle A hala dla telepe. <sup>7</sup> Wua: na: kokoye malamelepiye, eta wua: na: A koko ma malamelepe. Amasiyama wata oloma itle wua:tapo ya:ye mo-malamapo. Epame wua: ma ya:ye ma-natipo.”

<sup>8</sup> Epalati Pilipitapo epo atlaiyo, “Lod, wa: di watle Aye nati-ilipiye, di eta selledlepe,” diyo.

<sup>9</sup> Amasiyama Yesutapo asiyama Pilipi watle epo atlaiyo, “Na: alila pasatale dulu dla wua: mate ma-haluwapo. Epapele dulu dla wa: ala na: kokoye pomalamalalo halapa? Epedeme oplami antapo na:ye ma-natiwa, ya:ye A ma ma-natiwapo. Epapedeme wa: adipalati na: watle atlemama, ‘Aye di watle nati-ine,’ dema:? <sup>10</sup> Epapele dulu dla wa: na:ta A dulu dla hala koko mate epo Ata na: dulu dla hala koko mate dla ala pomikadepe dlalo halapa? Epedeme na:ta wua: watle yu atlamsela: iye monolo malamale tle hame po-atlamsela:sema. Amasiyama Atapo na: mate halemama na: tle ya: okoye hamhalapo. <sup>11</sup> Epedeme na:ta atlemama, Aye na: dulu dla halapo, epame na: mape A dulu dla halapo, dle koko dla dalepame mikadepe diya. Amasiyama wua: na:ta atlamale yu hema pomikadepe dlalo wekelepiye, na:ta ulugiyemale koko halomsela:uwa dla natipame mikadepe diya.

<sup>12</sup> Epapedeme na: ikadepe koko wua: watle atlema. Oplami antapo na: dla mikadepe dlepiye, ya: na:ta ulugiyemale koko halomsela: ipapeleye ya: ma me-halomelepe. Yao, ikadepe, ya:tapo ulugiyemale koko opi sikemte patoto ma me-halomelepe. Adipalati, na:ye A hala dla tama. <sup>13</sup> Epapele dulu dla wua: apa kokoye na: hi tle dalla natilipiye, na: koko eye halepe, Ata hela:dleye Maseyemala tle botomastlepo depame. <sup>14</sup> Epapedeme wua: apa kokoye na: hi tle dalla natilipiye, na: koko eye halowepo.”

*Yesutapo Hela:dle Sokota puluwe kokoye atlale*

<sup>15</sup> “Wua: na:ye malaha:ha:lepiye, eta wua: ma na:ta molo atlale yu dla salladepo siyamelepe. <sup>16</sup> Epalati na:tapo A watle dalla natilowepo, ya:tapo wua: watle gadlalo hale hamilipo depame. Gadlalo etapo wua: mate kokó halepo hallepe. <sup>17</sup> Gadlalo eye Hela:dle Sokopo. Ya:tapo wua: watle ikadepe kokoye nati-imhallepe. Epapele dulu dla ta:lamo sotapo ya: hamoloweye po-ala:lowa. Adipalati, yia:tapo ya:ye ponatilowa, epame ya: koko mape pomalamolowa. Amasiyama wua: tlo ya: koko mo-wua:malamana. Adipalati, ya:ye wua: mate halapo. Epame wua: dulu dla kokó mepo hallepe.

<sup>18</sup> Epedeme na:tapo wua:ye atali yimlala some isikimi duka dla popomelepo hallowa. Amasiyama na: matle ilame wua: hala dla puluwepo. <sup>19</sup> Epapele dulu dla alila kiyele dla ta:lamo sotapo na: mila:pi ma ponatilowa. Amasiyama wua: alotle na: mila:piye ma me-natilipe. Epapele dulu dla na:ta pasakalo depa halademe wua: mape pasakalo ha:ha:lepe. <sup>20</sup> Epapele dulu dla na:tapo powale tle ma pasakalo dlepiye, eta wua:tapo na:ta A dulu dla hala kokoye malamelepe. Epame wua:tapo na: dulu dla ha:ha:lali na:tapo wua: dulu dla halapo. <sup>21</sup> Epedeme oplami antapo na:ta molo atlale yu dla dalepame salladepo sela:lepiye, oplami etapo na:ye sikemte malahalapo. Epame na: dla sikemte malahalalo oplami dla asiyama na: Atapo ya:ye sikemte bokotiyapo malamhalapo. Epame na: mape ya:ye sikemte bokotiyapo malamhalapo. Epame na:tapo ya: dla na: kokoye nati-iliwepo.”

<sup>22</sup> Epalati Yudas Iskaliyot ya: daiyotapo epo atlaiyo, “Lod, wa: adipalati wa:skamu wa:ye ta:lamo so dla ponati-ilalo wekemama ma di watle nati-iliwepo dema:?” diyo.

<sup>23</sup> Amasiyama Yesutapo asiyama epo atlaiyo, “Oplami antapo na:ye sikemte malahallepiye, ya: na:ta imale koko dla ma salladepo sela:lepe. Epalati na: Atapo ya:ye sikemte bokotiyapo malamhallepe. Epame na: mate epo na: A mate ya: hala dla puame yimkata ya: mate ha:ha:lepe. <sup>24</sup> Amasiyama oplami antapo na:ye pomalamalalo halema:, ya: na:ta imale dla posalladepo sela:sema. Epapele dulu dla na:ta imale iye monolo malamale tle wua: dla po-imhalasema. Amasiyama imale iye na: A, na:ye tane duwa tle puapo.

<sup>25</sup> Epapedeme na: ala wua: mate me-halemama koko hapuloma iye wua: dla ma-atlamhaluwapo. <sup>26</sup> Amasiyama na: Atapo Hela:dle Sokoye na: hi tle wua: hala tulune dlepe, ya:tapo wua:ye gadlalo halemama koko hapulomaye imelepo depame. Epame ma ya:tapo koko hapuloma na:ta wua: watle me-imuwaye, ma wua: watle malamale hapimhallepe.

<sup>27</sup> Epedeme na:ta sadleye wua: dla hamima. Sadle na:ta hami iye ta:lamo sota wua: watle hamilalo pe-epapena. Epapedeme wua: ase dupa sikemte momalamale mate epo wowota:le mate ha:ha:miya.

<sup>28</sup> Epedeme wua: na:ta atlemama, ‘na:ye na: A hala dla tame halepo ma ilame puluwepo,’ duwa kokoye, wua: me-daluwapo. Epapedeme wua: ikadepe na:ye sikemte malamha:ha:leta ammatiye, wua: eta na:ta na: A hala dla heta koko dla sisiyelemla. Adipalati, ya:tapo na:ye tla:mtamhalapo. <sup>29</sup> Epapele dulu dla na:tapo koko hapuloma ala powowoyamalalo hallati wua: watle koko hapuloma iye ma-atlamalepo, wua:tapo koko eta alotle woyamalati natipame mikadepe dlepo depame. <sup>30</sup> Epedeme watapo na:ta wua: imolowe alilata mogudlowe mo-mateka:pi halapo. Adipalati, ta:lamo dokopala oplami Saitenye mo-puapo. Amasiyama ya: dla itiyamale hawa ikadepe, na:ye tla:mtloweye. <sup>31</sup> Epapedeme ta:lamo sotapo na:ta A sikemte malahala kokoye malastlepo depame na:tapo na: Ata solotamale koko halowepo.

Epapedeme sillipame mo-tlowa.”

## 15

*Yesuye ikadepe dlomoko dalipo*

<sup>1</sup> “Epedeme na:ye ikadepe dlomoko dalipo. Epalati na: Atapo osalo omhallalo halapo. <sup>2</sup> Epame ya:tapo na: dla gugoudepo ha:ha: dali dlotapo dlomoko pomilimalalo wekelati kotipame alikili dla pololemalapo. Amasiyama dlo aditapo dlomoko mimhalema:, ya: dali dlo e tlope woloma hulumhalapo, ya:tapo dlomoko ma sikemte milipo depame. <sup>3</sup> Epapele dulu dla na:ta wua: watle imuwa kokotapo wua:ye dlomoko dali some mohulupo ha:ha:po. <sup>4</sup> Epedeme wua: na: dla gugoudepo ha:ha:iya. Epalati na: mape wua: dla gugoudepo hallowepo. Epapedeme dlotapo isikimi meyelo halemama dlomoko pomiliwa. Amasiyama dlotapo dali moto dla gugoudepo hallepiye, eta dlomoko milipe. Epapele api tle wua: isikimi muwolo ha:ha:lepiye, dlomoko pomilimolowa. Amasiyama wua:ye na: dla puame gugoudepo ha:ha:iya.

<sup>5</sup> Epedeme na:ye dlomoko dalipo. Epalati wua:tapo dlo ha:ha:po. Epapele dulu dla oplami antapo na: dla puame gugoudepo hallepiye, na: mape ya: mate gugoudepo hallowepo. Epame ya: dlomoko ma sikemte milipe. Amasiyama wua: na: dimi ha:ha:lepiye, wua: isikimi koko pa:le ha:ha:lepe. <sup>6</sup> Epedeme oplami antapo na: dla puame pogugoudlalo hallepiye, ya:ye dlomoko dali dlo dlomoko pomilalo wekelati alikili dla hamastale epapele some halapo. Epapedeme epapele dlo palli tatalaye halopame dlapa dulu dla kustamdepo. <sup>7</sup> Epapele dulu dla wua: na: dla puame gugoudepo ha:ha:mama na:ta imale koko dla dolumsiyamama salladepo siyamelepiye, eta wua: apa koko yilo na: dla otele himha:ha:lepiye, wua: koko eye ma-halepe. <sup>8</sup> Epedeme wua:tapo dlomoko sikemte milimolowe kokotapo na: Ata hela:dleye botomastlepe, epame wua:ta na: alotle dolumtlalo so depo ha:ha: koko ma botomastlepe.

<sup>9</sup> Epapedeme na: Atapo na:ye bokotiyapo malamhala epammama na:tapo wua:ye epo bokotiyapo malamhalapo. Epedeme na:ta bokotiyapo malamale dulu dla ha:ha:iya. <sup>10</sup> Epapele dulu dla na:tapo na: Ata molo atlale yu dla dolumsela:mama ya:ta bokotiyapo malamale dulu dla halapo. Epapele api tle wua:tapo na:ta molo atlamale yu dla salladepo siyamelepiye, eta wua: mape na:ta bokotiyapo malamale dulu dla ha:ha:lepe.

<sup>11</sup> Epedeme na: koko iye wua: watle ma-atlamalepo, wua:tapo na: dulu dla siyele elaye wua: ma e halepo depame. Epame siyele etapo wua: dulu dla pasatamama alikili a:ma alowamelepe. <sup>12</sup> Epapedeme na:ta molo atlale yuye ipo. Na:ta wua: dla sikemte bokotiyapo malamhalaye, epammama wua: mape wua: amkadulo asiyama sikemte bokotiyapo malama asiyama sikemte bokotiyapo malama demha:ha:iya. <sup>13</sup> Epapele dulu dla oplamitapo ya:mkadulo dla sikemte bokotiyapo malamale pato nati-imama yia: yilo ya: pasakalo polowe dla himiloweta koko pato halapo. <sup>14</sup> Epedeme wua: na: dla salladepo siyamelepiye, wua:ye namkadulo ikadepepo. <sup>15</sup> Epapedeme wua:ye isikimi na: oko halalo so depo poha:ha:sema. Adipalati, isikimi oko halalo oplamiye ya: dokopala oplamita koko hamhalaye poya:malamana. Amasiyama na: wua:ye namkadulo ikadepe dema. Ame adipalati, na:tapo na: Ata na: watle atlamale koko hapulomaye wua: watle ma-imuwapo. <sup>16</sup> Epapele dulu dla wua:tapo na:ye posana. Amasiyama na:tapo wua:ye sesalemuwapo, wua:tapo dlomoko sikemte milimha:ha:lepo depame. Dlomoko eye kokó halepo hallowe dlomokopo. Epapele dulu dla wua: koko ipapele halomha:ha:lepiye, eta na: Atapo wua:ta apa koko yilo na: hi tle otele himha:ha:lali ya:tapo wua: watle hamilipe. <sup>17</sup> Epedeme iye na:ta molo atlale yupo, wua: dla. Wua: wua: amkadulo asiyama bokotiyapo malama asiyama bokotiyapo malama demha:ha:iya.”

### *Ta:lamo sota alli koko*

<sup>18</sup> “Ta:lamo sotapo wua:ye allipiye, wua: malamelepe, ewolotapo ka:yapa na:ye ma-alliwapo. <sup>19</sup> Epapele dulu dla wua: ta:lamo so mate hatlope depo ha:ha:lepiye, yia:tapo wua:ye sikemte malamha:ha:lepe. Amasiyama na:tapo wua:ye ta:lamo so dulu tle mo-sesalemuwapo, wua:tapo yia: mate pohatlope depo ha:ha:lalo wekelepo depame. Epapele koko tle yia:tapo wua: dla elle pato himha:ha:po. <sup>20</sup> Epapedeme wua: na:ta

atluwa kokoye malamaiya. Adipalati, na:tapo ipo atluwapo. Isikimi oko halalo oplamita ya: dokopala oplamiye tla:mtame pohalasema. Epapele dulu dla opatapo na: dla wotiyalle hamilipiye, yia:ta ma wua: dla wotiyalle mepapeleye hamilipe. Epame yia:tapo na:ta imale dla salladepo siyamelepiye, eta yia:ta wua:ta imale dla ma mepo salladepo siyamelepe. <sup>21</sup> Amasiyama wua:tapo na: dolumtamala koko tle yia:tapo wua: watle wotiyalle hamilipe. Adipalati, yia:ye na: tane duwa oplamiye yeitamana.

<sup>22</sup> Epapele dulu dla na:ta yia: watle puame yu po-atlamalalo wekematiye, eta yia: batalimaleye ponatilalo wekelemla. Amasiyama wata oloma hema yiskamu yia: batalimaleye hemele hatiyomollowe po-ala:na. Adipalati, yia: batalimaleta haliyamale dla mo-hutiyepo. <sup>23</sup> Epapedeme oplami antapo na: dla elle himhallepiye, ya: na: A dla ma elle himhalapo. <sup>24</sup> Epedeme na:ta ulugiyemale koko halomhala ipapeleye oplami haletapo epapele koko pohalomhalana. Epame na:tapo yia: dulu dla ipapele koko pohalomalalo wekematiye, eta yia:ta yia: bobtalimaleye ponatilalo wekelemla. Amasiyama yia:ye na:ta koko halomhallati ma-natimduwapo. Epapele tlope yia: na: A mate epo na: mate dla elle pato ala me-himha:ha:po. <sup>25</sup> Epapedeme koko itapo mo-woyamuwapo, God yu bukata atlama koko mate ala:lowedeme. Adipalati, God yu bukata epo atlapo,

‘Yia:tapo koko pa:le na: dla elle himha:ha:po,’ depo.

<sup>26</sup> Epedeme na:tapo wua: gadlalo Hela:dle Sokoye wua: watle hamilowepo. Hela:dle Soko etapo A tle malame wua: watle ikadepe kokoye imelepe. Epame Hela:dle Soko etapo na: kokoye botomastlepe. <sup>27</sup> Epame wua: mape opa dla na: kokoye botomastlepe. Adipalati, wua:tapo ka:yapa na:ta oko kotiyamuwa oloma etle na: mate siyamuwapo.”

## 16

<sup>1</sup> “Epedeme na:tapo wua:ta mikadepe dle tle ma alikili dla tlala depame wua: watle koko hapuloma iye ma-atlamalepo. <sup>2</sup> Adipalati, opatapo wua: hiye inoma sumalalo aya dulu dla hutiyeye kotipame wua:ye ma alikili dla dodolomsallepe. Epame alilata me-pulupe, opatapo mikadepe dle so potimolowe kokoye semte God oko hamapo depo malamolowe. <sup>3</sup> Epedeme yia:tapo koko ipapeleye wua: dla halomha:ha:lepe. Adipalati, yia:ye na: A koko mate epo na: koko mate poyia:malamana. <sup>4</sup> Epapedeme na: koko iye wata wua: watle atlama. Epapele dulu dla koko itapo ikadepe woyamalati wua: na:ta atlama koko iye malamelepe.”

### *Hela:dle Sokota puluwe koko atlale*

“Epedeme na: koko iye na: oko ka:yapa kotiyamale oloma edla wua: watle po-atlamana. Adipalati, na: oloma edla wua: mate me-haluwapo. <sup>5</sup> Amasiyama watapo na:ye na: tane duwa oplami hala dla ma ilame tama. Epalati wua: dulu dla oplami haletapo na:ta ta koko hema, ‘wa: hadima tama;’ depo podalla natisema. <sup>6</sup> Epapedeme wua: wata na:ta ta kokoye wua: dla atlamalati dalemama wua: dupa sikemte kolepo. <sup>7</sup> Amasiyama na: ikadepe koko wua: watle atlema. Na:ta wua: saliyome haka:ma dla tlowe kokota wua:ye gadlepe. Adipalati, na:ta telepiye, asiyama Hela:dle Sokoye wua: watle hamilowepo, ya:tapo wua: ma gadlalo hallopo depame. Amasiyama na:tapo potlalo wekelepiye, Hela:dle Sokoye wua: hala dla populuwa.

<sup>8</sup> Epapele dulu dla Hela:dle Sokotapo pulupiye, ya:tapo ta:lamo sota batalimale koko halomha:ha:ye haliyamale dla botomastlepe. Epame opata God mila:pi tle woloma poka:depo ha:ha:ye haliyamale dla botomastlepe. Epame Godta koko gladlowe koko mape haliyamale dla botomastlepe. <sup>9</sup> Epame Hela:dle Sokotapo na: dla pomikadepe dlalo wekelowe kokoye e batalimale koko sitalipo dlepe. <sup>10</sup> Epame ya:tapo na:ta A God hala dla heta koko tle God mila:pi tle ka:depo hallowe kokoye botomastlepe. Amasiyama na:tapo na: A hala dla hetlati wua:ta na: ma ponatilowa. <sup>11</sup> Epame Hela:dle Sokotapo



Godta koko gladlowe kokoye haliyamale dla botomastlepe. Adipalati, ta:lamo dokopala oplami Saitenye koko gladle dulu dla ma-halapo.

<sup>12</sup> Epapedeme na: dla koko pasatale me-hutiyeipo, wua: watle atlamolowedeme. Amasiyama wata oloma hema wua:ta koko pasatale iye momalamolowepe po-ala:na. <sup>13</sup> Amasiyama Hela:dle Sokotapo wua: dla mallepiye, ya:tapo wua:ye ikadepe koko hapuloma dla elemtelepe. Ya:tapo meyelo ya:ta malamale tle po-atlamsela:lowa. Amasiyama ya:tapo na: tle dalle kokoye atlamsela:lepe. Epame ya:tapo alotle wowoyamolowe kokoye momolo wua: watle imelepe. <sup>14</sup> Epedeme Hela:dle Sokotapo na: hi di dla ta:demama na:ta atlamale yuye ma wua: watle hamilipe. <sup>15</sup> Epapedeme koko hapuloma Ata halopo halaye nolëpo. Epapele koko tle na:tapo ipo atlalepo, Hela:dle Sokotapo na:ta atlamale yuye halopame ma wua: watle atlamelepe dlepo.”

*Dupa kolle kokota ma siyele hampuluwe koko*

<sup>16</sup> “Alila kiyele ha:ha:po alotle wua: ma na: mila:pi ponatilowa. Amasiyama wua: ma alila kiyele alotle wua: mamisika: na: mila:piye me-natilipe.”

<sup>17</sup> Epalati Yesu ya: alotle tlalo so opitapo yiskamu yia: dulu dla epo atlamyaiyo, “Ya:ta di watle atlemama, ‘wua: ma alila kiyele ha:ha:po alotle na: mila:piye ponatilowa,’ depame ma, ‘alila kiyele alotle mamisika: natilipe’ dleye adipo atlemama api? Epame ya:ta atlemama, ‘Na:ye A hala dla hetama,’ dleye adipo atlemama api? <sup>18</sup> Epame ya:ta di watle atlemama, ‘alila kiyele,’ dleye apa koko atlemama api? Di ya: yu dulu koko woloma pomalamasema,” demyaiyo.

<sup>19</sup> Yesuta ya: alotle tlalo sotapo ya: watle atlanatilowedeme momalampopa:leye malanatipame yia: watle epo atlaiyo, “Wua: na:ta atlemama, ‘Alila kiyele ha:ha:po alotle na: mila:pi ponatilowa,’ dle mate epo, ‘alila kiyele ha:ha:po alotle mamisika: na: mila:pi natilipe,’ dle koko mate dla atlanatilowedeme momalampopa:ma:? <sup>20</sup> Epapele dulu dla na: ikadepe koko wua: watle atlema. Wua:tapo dupa kolomama a:llepe. Amasiyama ta:lamo so tlo sisiyelepe. Yao ikadepe, wua:ye dupa kollepe. Amasiyama wua:ta dupa kolle etapo matle wua: dla siyele koko hampulupe. <sup>21</sup> Epapedeme wua: natiya, a:yatapo owayemala hamale oloma edla ya: wotiyalle natimdepo. Amasiyama ya:ta owayemala ma-hamale alotle wotiyalle ya:ta natiliye mo-welimdepo. Adipalati, ya:tapo owayemala amko hamale koko dla sikemte siyemdepo. <sup>22</sup> Epapedeme wua: ma mepapele some ha:ha:po. Adipalati, wua: watapo dupa kolle mate ha:ha:po. Amasiyama na: matle puame wua: natilowepo. Epapele oloma edla wua:tapo sikemte sisiyelepe. Siyele eye oplami haletapo wua: tle alikili a:ma pohamtlowa. <sup>23</sup> Alila oloma edla wua:tapo koko hale yilo na: dla po-atla natilowa. Amasiyama na: ikadepe koko wua: watle atlema. Wua: apa koko halowedeme na: hi tle A hala dla dalla natilipiye, ya:tapo wua:ta dalla nati koko meye hamilipe. <sup>24</sup> Epedeme wua: ka:yapa kotiyapo pumulumama koko opi yilo na: hi tle podalla natimdena. Amasiyama wata oloma itle tamalemama wua: apa koko halowedeme na: hi tle dalla natilipiye, wua: koko eye halepe. Epapelepiye, eta siyele wua: dulu dla elata ma sikemte pato dlepe.”

*Yesuta ta:lamo dokopala oplami mo-tla:mtale*

<sup>25</sup> “Epapedeme na:tapo koko hapuloma iye atlamsela:mama wayu mate atlamsela:uwapo. Amasiyama alilata me-pulupe, na:tapo koko hapulomaye matle wayu mate wua: watle po-atlamsela:lowa. Amasiyama na:tapo A kokoye haliyamale dla atlamsela:lowepo. <sup>26</sup> Epedeme alila oloma edla na:ta wua: koko dla A hala dla po-dalla natilowa. Adipalati, wua:tapo muwolo koko yilo na: hi tle A hala dla dalla natimha:ha:lepe. <sup>27</sup> Ame adipalati, wua:tapo na:ye ikadepe A tle malatepo depame na:ye sikemte bokotiyapo malamha:ha:uwa koko tle asiyama Atapo wua:ye sikemte bokotiyapo malamhalapo. <sup>28</sup> Epedeme na:ye Ata hala tle ta:lamo hema maluwapo. Epame matle wata oloma hema ta:lamo saliome A hala dla ilame hetlowama.”

<sup>29</sup> Epalati ya: alotle tlalo sotapo ya: watle epo atlaiyo, “Wa: watapo koko iye matle wayu mate di watle po-atlasema. Amasiyama wa: koko hapulomaye di watle ma haliyamale dla atlamalepo. <sup>30</sup> Epedeme ditapo wa:ye ikadepe God tle malana depame wa: dla mikadepe dema. Adipalati, wa:ye koko hapuloma sikemte malastana. Ame adipalati, wa: oplami haleta wa: watle atlanatilowedeme halla natipame wa: tatile asiyama yuye ya: watle ma-atlemdepo. Epapedeme koko itle di wa:ta ikadepe God tle malaleye malamama mikadepe dema.”

<sup>31</sup> Epalati asiyama Yesutapo epo atlaiyo, “Wua: watapo mikadepe dema?  
<sup>32</sup> Amasiyama wua: daliya. Alilatapo mo-pulupe, epapeleye alila eye wata mo-puapo, wua:tapo na: salepame meyelo pe meyelo pe depo tamhalloweye. Epapele tlope na:ye monolo posela:lowa. Adipalati, Atapo na: mate hallepe. <sup>33</sup> Epedeme wua:tapo na: tle sadle halepo depame na:tapo wua: watle koko hapuloma iye ma-atlamalepo. Epapedeme wua:ta ta:lamo hema ha:ha:lowe oloma edla wua: ala wotiyalle dulu medla me-ha:ha:lepe. Amasiyama wua: wota:le pa:po kokalepo ha:ha:iya. Adipalati, na:tapo ta:lamo dokopala oplamiye mo-tla:mtame halapo.”

## 17

### *Yesuta ya:skamu inoma sumale himili*

<sup>1</sup> Yesu yu eye ma-atlepo gudepame pepele di dla omhalemama epo inoma sumaiyo, “A, na: alilatapo wata mo-puapo. Epedeme wa: Maseyemalata hela:dleye opa hapuloma dla nati-ine. Epapalati wa: Maseyemalatapo asiyama wa:ta hela:dleye opa hapuloma dla nati-iliwepo. <sup>2</sup> Adipalati, wa:tapo opa hapulomaye omhallepo depame Maseyemala watle itiyamale ma-hamiwapo, ma ya:tapo wa:ta ya: watle hapili opa dla halepo halepo pasakalo hapilipo depame. <sup>3</sup> Epapedeme halepo halepo pasakalo kokoye wa: koko malamolowe kokopo. Adipalati, wa:ye God ikadepe halapo. Epame halepo halepo pasakalo eye wa:ta tane dle oplami Yesu Keliso koko malamolowe kokopo. <sup>4</sup> Epedeme na:tapo ta:lamo hema wa:ta na: watle hamiwa okoye moguduwapo. Epapele koko tle na:tapo ta:lamo hema wa:ta hela:dleye opa dla ma-nati-imsela:uwapo. <sup>5</sup> Epedeme A, ta:lamo ala pomita:plalo hallati na:ta wa: mate halemama hela:dle hamhaluwaye ma wata na: watle hamine.”

### *Yesuta ya: alotle tlalo so yilo inoma sumale himili*

<sup>6</sup> “A, na:tapo wa:ta na: watle ta:lamo so dulu tle hapiwa opa dla wa: kokoye ma-nati-iwapo. Opa iwoloye wolëpo, wa:tapo na: watle halopiwapo. Epame yia:tapo wa: yu dla mo-salladepo siyamuwapo. <sup>7</sup> Epedeme na:ta wa: tle koko hapuloma halomhalaye, wata yia: ma me-yia:malamana. <sup>8</sup> Epame wa:ta na: watle imale hamiwaye, ma yia: watle hamilati ma yia:tapo imale eye mikadepe depame hamuwapo. Epame yia:ye ma-yia:malamana, na:ta wa: tle puwa kokoye. Epame yia: mape wa:ta na:ye tulune duwa koko dla ma mikadepe demdepo.

<sup>9</sup> Epedeme na:ta inoma sumale yu himi iye ta:lamo so yilo po-aposema. Amasiyama wa:ta na: watle hapili so yilo inoma sumale yu himima. Adipalati, yia:ye wolëpo. <sup>10</sup> Epapele dulu dla na:ta omhala opaye wolëpo. Epalati asiyama wa:ta omhala opaye nolëpo. Epapele koko tle na:ta hela:dleye yia: tle botomastamhalapo. <sup>11</sup> Epapedeme na:ta ma ta:lamo hema pohallalo wekelowe alilata mo-teteka:mpuapo. Adipalati, na:ta wa: hala dla mo-puapo. Amasiyama na: alotle tlalo so tlo ta:lamo medla me-ha:ha:lepe. A, wa:ye aiyalma ikadepepo. Wa:ta wa: hi na: watle hamiwa, itiyamale hi etle opa iwoloye woloma omhalane. Epapelepiye, yia:tapo wa:ta na: mate hatlope depo halaye, epammama yia:tapo yimkata hatlope depo ha:ha:lepe. <sup>12</sup> Epapele dulu dla na:ta yia: mate haluwa oloma edla na:tapo wa: hi itiyamale etle yia:ye woloma omhallati oplami haletapo pohaodena. Amasiyama God yu bukata atla mate ala:mama isikimi oplami

hatlo tlo ikadepe api tle ma alikili dla polatamama haodlepe duwa oplamitapo mo-haoduwapo.

<sup>13</sup> Epedeme na:ye wa: hala dla mo-puma. Amasiyama na: ala ta:lamo dla me-halemama koko iye atlema, na: alotle tlalo sotapo na: dla siyele ela iye ma yia: dulu dla pasatepo ellepo depame. <sup>14</sup> Na:tapo wa: yuye yia: watle ma-atlamuwapo. Amasiyama ta:lamo sotapo yia:ye allipo. Adipalati, na:tapo pota:lamo oplami depo halaye, epammama yia: ma ta:lamo so depo poha:ha:sema. <sup>15</sup> Epedeme A, na:ta ipo inoma sumale yu himiye, wa:tapo na: alotle tlalo soye ta:lamo itle alikili a:ma elemtelepo depo popesema. Amasiyama wa:tapo yia:ye batalimale oplami Saitenta hohomalala depo woloma omhallepo depo amma. <sup>16</sup> Epapedeme na:tapo pota:lamo oplami depo halaye, yia: ma epammama pota:lamo so depo poha:ha:sema. <sup>17</sup> Epapele dulu dla yia:ye wa: yu mate imhalemama yia:ye ullu pa:talo so depo melene. Adipalati, wa: yuye ikadepepo. <sup>18</sup> Epedeme wa:ta na:ye tane duwa epammama ma na:tapo yia:ye ta:lamo dla taiye dema. <sup>19</sup> Epame na:tapo yia: yilo ullu pa:po halapo, yia:tapo ikadepe ullu pa:talo so depo ha:ha:lepo depame.”

*Yesuta mikadepe dle so hapuloma yilo inoma sumale himili*

<sup>20</sup> “Epedeme na:tapo hatlo na: alotle tlalo so yilo inoma sumale yu po-atlasema. Amasiyama opa anawolotapo yia:ta imalati dalepame na: dla mikadepe dlalo so dla ma inoma sumale yu iye atlema. <sup>21</sup> Epame A, na: inoma sumale yuye ipo atlema. Na:tapo wa: dulu dla hallati ma asiyama wa:tapo na: dulu dla halaye, epammama yia: mape epo yimkata yia: dulu dla hatlope depo ha:ha:lepo depo amma. Epame ma ipo inoma suma, yia: mape dia: mate yimkata hatlope dlepo depame. Epapelepiye, eta ta:lamo sotapo na:ye ikadepe wa:ta tane dena depame na: dla mikadepe dlepe. <sup>22</sup> Epapedeme wa:ta na: watle hela:dle hamiwaye, ma na:tapo yia: watle hamiwapo, yia:tapo yia: dulu dla hatlope depo ha:ha:lepo depame. Dita madipatata hatlope depo ha:ha:po. <sup>23</sup> Epame na:tapo yia: dulu dla halapo, epame wa: mape na: dulu dla halapo. Dita epo ha:ha: koko tle yia: mape ikadepe yimkata hatlope depo ha:ha:lepe. Epalati ta:lamo sotapo e natipame na:ye ikadepe wa:ta tane dena depo malamelepe. Epame wa:ta na:ye sikemte bokotiyapo malamhalaye, epammama ta:lamo sotapo wa:ta mikadepe dle so ma sikemte malahala kokoye malanatilipe.

<sup>24</sup> Epedeme A, wa:ta na: watle mikadepe dle so hamiwa iwolota na:ta tame hallowe mo dla yia: mate ha:ha:lepo depame solotama. Epame na: ma solotama, yia:tapo wa:ta na: watle hela:dle hamiwa eye natilipo depame. Hela:dle eye ta:lamo ala pomita:plalo hallati wa:ta na: bokotiyapo malapame na: watle hamiwapo.

<sup>25</sup> Epapedeme A, wa: tlo ka:dlepo. Epapele dulu dla ta:lamo soye wa: koko yeitamana. Amasiyama na: tlo wa: kokoye na:malamana. Epame wa:ta na: tane duwa kokoye mikadepe dle so mo-yia:malamana. <sup>26</sup> Na:tapo wa: hiye yia: watle mo-botomastauwapo, epame ma me-botomastamhallepe, wa:ta na: dla bokotiyapo malamhala epapeleta ma yia: dulu dla ellepo depame. Epammama na: mape yia: dulu dla me-hallowepo.”

## 18

*Opata Yesu yumuluwedeme hamame tale  
(Mat 26:47-56; Maka 14:43-50; Luk 22:47-53)*

<sup>1</sup> Yesu inoma sumhalepo gudepame ma ya: alotle tlalo so mate Kidlon koloma koleme hetame seme dla tamalaiyo. Mo seme edla osalo me-halaiyo. Epapeleye Yesutapo ya: alotle tlalo so mate edla tuwaiyo.

<sup>2</sup> Epapele dulu dla Yudas, Yesu opahale do tama dla homelle oplami ya: mape mo eye mo-ya:malamaiyo. Adipalati, Yesuta alila opi dla ya: alotle tlalo so mate dulu edla tuwa demhalem-diyo. <sup>3</sup> Epapeleye Yudastapo Loum opahale so elempumama aiyalma aya

dokopala so mate epo Pa:lisi so mateta taiya dle so opa elempuaiyo. Yia:ta pumama tuloma mate epo opahale dlalo alisisi mate halopo puame woyamaiyo.

<sup>4</sup> Epapele dulu dla Yesu ya: tatile ya: dla woyamolowe koko hapulomaye ma-natipame yia: watle tame epo atlaiyo, “Wua: oplami anaye totamsiyama:?” diyo.

<sup>5</sup> Epalati asiyama yia:tapo epo atlaiyo, “Di Yesu Nasalet oplami totamsiyama,” diyo. Epapalati Yesuta asiyama yia: watle epo atlaiyo, “Wua:ta totamsiyama oplami eye na:po,” diyo. Epapele oloma edla Yudas, Yesu opahale do tama dla homallalo oplami mape edla yia: mate me-halaiyo. <sup>6</sup> Amasiyama Yesutapo atlemama eye na:po dla dalepame yia:ta hapulomatapo alo a:ma gilidepame ta:la dla teteyuiyo.

<sup>7</sup> Epalati Yesutapo mamisika: yia: watle atlanatimama epo atlaiyo, “Wua: oplami anaye totamsiyama:?” diyo. Epapalati ma asiyama yia:tapo ya: watle epo atlaiyo, “Di Yesu Nasalet oplami totamsiyama,” diyo.

<sup>8</sup> Amasiyama Yesutapo asiyama epo atlaiyo, “Na:ta wua: watle ma-atlemama oplami eye na:po dlepo. Epedeme wua: ikadepe na: totamasiyama dlepiye, ka:dena, opa opi na: mate siyama iwoloye ma-taiya diya.” <sup>9</sup> Epapedeme koko itapo epo woyamuwapo. Adipalati, Yesuta ka:yapa ya: alotle tlalo so mate sela:mama atlamale yu mate ala:lowedeme. Ame adipalati, ya:tapo epo atluwapo, “Wa:ta na: watle hapiwa soye na:tapo woloma omhalemama oplami haletapo pohaodena,” duwapo.

<sup>10</sup> Epame Saimon Pitatapo aipa:ya hapame aiyalma aya dokopala oplami ya: oko oplami hale Malakus demdiye ya: dowala moloye ketamastaiyo. <sup>11</sup> Epalati Yesutapo Pita watle epo atlaiyo, “Wa: aipa:ya alikili dla himine. Ka:dena, na:tapo Ata na: watle hamilowedeme hala wotiyalle e haloweye,” diyo.

<sup>12</sup> Epapeleye Loum opahale so mate epo yia: dokopala oplami mate epo Yu so dokopala sota taiya dle so mateta Yesuye hampame dea mate kokotipoliyeyiyo. <sup>13</sup> Epame yia:tapo ya:ye Kayapas ya: doko Anas hala dla hamame tamalaiyo. Kayapas eye sokomoko oloma edla aiyalma aya dokopala oplami halaiyo. <sup>14</sup> Kayapas hatlo me-itapo Yu so dokopala so watle Yesu koko dla epo atluwapo, “Ka:dena, oplami hatlo itapo opa hapuloma yilo poloweye,” duwapo.

*Pitata Yesu welli koko*

*(Mat 26:69-70; Maka 14:66-68; Luk 22:54-57)*

<sup>15</sup> Saimon Pita mate epame Yesu dolumtlalo oplami hale mate opata Yesuye hamame tlali alotle dolumtamalaiyo. Amasiyama aiyalma aya dokopala oplamitapo Pita mate tale oplami iye ya:malamaiyo. Epapedeme yia: aiyalma aya dokopala oplami aya dla puame woyamalati kosukulli kokoloma omhallalo a:yatapo Pita mate puale oplamiye malanatipame ya: tlo Yesuta tuwale dla tulupo depame itiyamale hamiyo. <sup>16</sup> Amasiyama Pita tlo kosukulli kokoloma alikili tle me-omhalaiyo. Epalati Pita mate puale oplamita ma ilame matime kokoloma omhallalo a:ya mate yu ka:depame Pitaye komale dulu dla semtuwaiyo.

<sup>17</sup> Epalati a:ya etapo Pita natipo ya: watle epo atlaiyo, “Wa: mape, Yesu ya: alotle tlalo oplami hale wa:po,” diyo. Epalati Pitata asiyama epo atlaiyo, “Hao, oplami eye pona:,” diyo.

<sup>18</sup> Epapele dulu dla aiyalma aya dokopala oplami ya: oko sotapo kakapumalati dlapa mipo dlapa tilimha:ha:iyo. Epalati Pita mape tame yia: mate dlapa timhalaiyo.

*Anastapo Yesu watle atlanatili*

*(Mat 26:59-66; Maka 14:55-64; Luk 22:66-71)*

<sup>19</sup> Oloma edla aiyalma aya dokopala oplamitapo Yesu watle ya:ta imale koko mate epo ya: alotle tlalo so koko mate dla atlanatiyo.

<sup>20</sup> Amasiyama Yesutapo asiyama ya: watle epo atlaiyo, “Na:tapo koko hapuloma iye opa hapuloma mila:pi tle haliyamale dla ma-atlamsela:uwapo. Epame na:tapo

alila hapuloma inoma sumalalo aya dla epo aiyalma aya dulu dla hetame opa im-sela:mduwapo. Adipalati, mo edla opa hapulomata puame alumduwapo. Epapele dulu dla na: koko opiye hemele po-atlemdena. <sup>21</sup> Epapedeme wa: adipalati na: watle atlanatili yu atlema:? Wa: aseka na:ta imhalla dallalo so dla dalla natine. Yia: tlo yia:malamana, na:ta atlamsela:mduwa kokoye.”

<sup>22</sup> Yesuta koko iye atlemhallati aiyalma aya dokopala oplami ya: oko oplami haletapo Yesuye mila:pi dla heyumama epo atlaiyo, “Wa: poka:dena, wa:ta di aiyalma aya dokopala oplami dla asiyama yu epo atloweye,” diyo.

<sup>23</sup> Epalati Yesutapo ya: yuli oplami watle asiyama epo atlaiyo, “Wa: na:ta atlale dulu hema batalimale yu hale atlale hallepiye, wa: koko eye haliyamale dla na: watle nati-ine. Amasiyama na:ta yukamale dulu hema ikadepe koko tlo atlale hallepiye, ame wa: adipalati na:ye heyu?” diyo. <sup>24</sup> Epapalati Anastapo Yesu do keketipoliyele mepo hallati aiyalma aya dokopala oplami Kayapas hala dla semtaiya diyo.

*Pitata matle Yesu welli*

*(Mat 26:71-75; Maka 14:69-72; Luk 22:58-62)*

<sup>25</sup> Saimon Pitata ala dlapa me-timhallati opa opitapo ya: natipame epo atlaiyo, “Wa: Yesu alotle tlalo oplami hale wa:ta:?” diyo. Epalati Pitatapo epo atlaiyo, “Hao, pona:,” diyo.

<sup>26</sup> Epapele dulu edla aiyalma aya dokopala oplami ya: oko oplami hale me-halaiyo, ya:ye Pitata molo kestale oplami e mate asiya hatlopeyo. Epapeleye ya:tapo Pita watle epo atlaiyo, “Na: wa:ye Yesu mate osalo dulu dla sela:lati natiwa,” diyo. <sup>27</sup> Epalati Pitata matle epo atlaiyo, “Oplami eye pona:,” diyo. Epapele oloma edla gagapotapo mo-yulumaiyo.

*Yesu Paelet aya dla semtale*

*(Mat 27:1-2, 11-14; Maka 15:1-5; Luk 23:1-5)*

<sup>28</sup> Utulala ikadepe Yu so dokopala sotapo Yesuye Kayapas aya tle ma Loum gamani oplami Paelet aya dla semtamalaiyo. Amasiyama yia: posolotamaiyo, aya dulu edla u-ulapo tuluwedeme, epammama alikili dla me-ha:ha:iyo. Adipalati, yia: posolotamaiyo, yia:ta po-Yu oplami aya dulu dla tuwaleta ullu walle so depame Namilatale daya dele hotloweye.\* <sup>29</sup> Epedeme Paeletapo alikili dla matime halemama yia: watle epo atlaiyo, “Wua: oplami ita apa batalimale koko halë hallati natipame hema sempuo?” diyo.

<sup>30</sup> Epalati asiyama yia:ta ya: watle epo atlaiyo, “Oplami iye batalimale koko pohalalo wekeleta ammatiye, di ya:ye wa: hala dla po-ipo sempuma,” diyo.

<sup>31</sup> Amasiyama Paeletapo yia: watle epo atlaiyo, “Muwolo ya:ye hamame tame wua: aiyalma mate ala:mama ya: kokoye gladiya,” diyo.

Epalati asiyama Yu so dokopala sota epo atlamyaiyo, “Dia: ya:ye yumuluwe solotama. Amasiyama Loum so wua:tapo dia: watle opa koko gladepo opa potima demha:ha:lowe itiyamaleye pohamina,” demyaiyo. <sup>32</sup> Epapedeme koko itapo mo-wowoyamuwapo, Yesutapo ya:ta adipo polowe koko atlamsela:leta mikadepe dlowedeme.

<sup>33</sup> Yia:ta epo atla dalepame Paeletta ma aya dulu dla tuwame polomama Yesu sisila-pame ya: watle epo atlaiyo, “Wa: ikadepe Yu so dokopala oplamita:?” diyo.

<sup>34</sup> Epalati asiyama Yesutapo epo atlaiyo, “Atlanatili wa:ta na: watle atla eye isikimi mowolo malamale tle atlema:, o, opa opita wa: watle na: kokoye atlo?” diyo.

<sup>35</sup> Epapalati Paeletapo epo atlaiyo, “Na:ye po-Yu oplami. Epapele tlope mo-wa: opa mate epo me-yia: dokopala so matetapo wa:ye na: hala dla hamampualepo. Epedeme wa: apa batalimale koko hauwa?”

<sup>36</sup> Amasiyama Yesutapo asiyama epo atlaiyo, “Na:ta dokopala depo hallowe kokotapo ta:lamo itle populuwa. Epapele dulu dla na: motapo ta:lamo hema elaleta ammatiye,

\* **18:28:** Yu so aiyalma haletapo epo elapo, “Yu oplamitapo po-Yu oplami aya dulu dla tulupiye, ya:ye mo-ullu walle oplami depo.”



Yu sotapo na:ye yumuluwedeme hamalala depame na: alotle tlalo sotapo na: yilo nala-timelemla. Amasiyama na:ta dokopala depo hallowe kokotapo ta:lamo itle populuwa.”

<sup>37</sup> Epalati Paeletta ma epo atlaiyo, “Epapedeme wa: ikadepe dokopala oplami wa:ni?” diyo.

Epapalati Yesuta epo atlaiyo, “Wa:ta na: watle atlemama, ‘wa:ye ikadepe dokopala oplami wa:ni,’ dleye, e mikadepepo. Koko edla na:ye ta:lamo hema hamuwapo. Epame na:tapo opa dla ikadepe kokoye atlamolowedeme ta:lamo hema puwapo. Epapedeme opa anawolotapo ikadepe koko dulu dla ha:ha:ma:, yia: na: yu dalemha:ha:po.”

<sup>38</sup> Amasiyama Paeletta asiyama epo atlaiyo, “Ikadepe kokoye apata:?” diyo.

### *Paeletta Yesuye me-yumulupo depame itiyamale hamili*

*(Mat 27:15-31; Maka 15:6-20; Luk 23:13-25)*

Paelet ma alikili dla ulatame halemama Yu so dokopala so watle epo atlaiyo, “Na: oplami hema batalimale hale ponatisema. <sup>39</sup> Amasiyama na: wua: toto koko dolumama wua:ta Namilatale daya dele alila dla amtuwale aya dulu dla hallalo oplami haleye alikili a:ma woyamane dlowama. Epapedeme wua: ka:dena dema:, na:tapo Yu so wua: dokopala oplami iye alikili a:ma hamame woyamoloweye?” diyo.

<sup>40</sup> Epalati asiyama yia:tapo yu teta:le mate epo atlamyaiyo, “Hao, di posolotamasema, oplami eta alikili a:ma woyamoloweye. Amasiyama wa: Balabas tlo alikili a:ma hamame woyamane,” demyaiyo. Epele dulu dla Balabas itapo Loum dokopala so dla opahale demhalem diyo.

## 19

<sup>1</sup> Epame Paeletta ya: opa watle “Yesuye hamame tame tuwale dea mate hopoliya,” diyo. <sup>2</sup> Epalati opahale sotapo ya:ye hopolepame ma tuwale dea tipo ya: dokopala dla asiyomelepame tluka omteka:peleta asiyomeliyo. <sup>3</sup> Epame yia:tapo tetlemyemama ya: watle, “Wa:ye Yu so dokopala oplamipo,” demyemama ya: mila:pi dla heyulumyaiyo.

<sup>4</sup> Epame Paeletta mamisika: ya: aya tle matime halemama Yu so dokopala so watle epo atlaiyo, “Na:ta Yesuye wua: watle hamame matilowepo, na:tapo ya: dla batalimale koko hale hawa halla natili kokoye wua: watle nati-iliwedeme,” diyo. <sup>5</sup> Ya:ta epo atlati Yesuta matimama tuwale deata tiliye dokopala dla asipame tluka omteka:pele ma-asiyame haliyamale dla matiyo. Epalati Paeletta ya: watle epo atlaiyo, “Wua: oplami i natiya,” diyo.

<sup>6</sup> Epapele oloma edla aiyalma aya dokopala so mate epo yia: oko so mate Yesu natipame yu teta:le mate epo atlamyaiyo, “Ya:ye dali yekelehmihili di dla gogodepo himiya. Ya:ye dali yekelehmihili di dla gogodepo himiya,” demyaiyo.

Amasiyama Paeletta ya: watle epo atlaiyo, “Muwolo ya:ye dali yekelehmihili di dla gogodiya. Adipalati, na: ya: dla batalimale hale ponatisema,” diyo.

<sup>7</sup> Epalati Yu so dokopala sotapo asiyama epo atlaiyo, “Di aiyalmata epo atlema, ya:ye polowe ka:pi. Adipalati, ya:tapo ya:skamu atlemama ya:ye God Yamipo demduwapo,” diyo.

<sup>8-9</sup> Amasiyama Paeletta koko i dalepame sikemte wota:mama ma aya dulu dla ilame tuwame halemama Yesu watle epo atlaiyo, “Wa: apa oplamita:?” diyo. Amasiyama Yesutapo Paelet yu ipi dla asiyama yu hale po-atlaiyo. <sup>10</sup> Epalati Paeletta ya: watle epo atlaiyo, “Wa: na: watle asiyama yu atla alipa? Adipalati, wa: powa:malamata:, na: dla itiyamale elapo, na:tapo wa:ye alikili a:ma woyamane dloweye, epame wa:ye dali yekelehmihili di dla gogodiya dloweye?” diyo.

<sup>11</sup> Epalati Yesutapo asiyama ya: watle epo atlaiyo, “Wata wa:ta itiyamale hamhala eye mowolo pohana. Amasiyama Godtapo wa: watle itiyamale eye hamiwapo. Epapedeme wa: batalimaleye pase pato. Amasiyama na:ye hamame wa: do tama dla homelle oplami ya: batalimale tlo sikemte patopo,” diyo.

<sup>12</sup> Paeletta yu i dalepame ya: solotamaiyo, Yesuye alikili a:ma ma-tane dloweye. Amasiyama Yu so dokopala sotapo yu teta:le mate epo atlamyaiyo, “Oplami antapo ya:skamu ya:ye dokopala oplami demsela:lepiye, ya:ye Loum dokopala oplami Sisa mate opahale demama apopo. Epame wa: oplami iye alikili a:ma hamame woyamelepiye, wa:po-Sisa ya:mkale ikadepe,” demyaiyo.

<sup>13</sup> Yu sota epo atlamyelati Paelettapo dalepame Yesuye hamame aya alikili dla semtame pamelepo ya: tlo koko gladdlalo oplamita pollalo mo dla polaiyo. Mo eye semama ewalata giyalladle mo demdepo. Epame ma Hibulu yu mate semama Gabata demdepo. <sup>14</sup> Epapedeme koko iye yia:ta Namilatatale daya dele wiki dulu edla yia:ta inoma sumalalo alila koko dla dinapele alila dla apiyo. Oloma edla sali inoma mape mo-duka dla umula hetama halaiyo. Epalati Paelettapo Yu so watle epo atlaiyo, “Natiya. Wua: dokopala oplamiye ipo,” diyo.

<sup>15</sup> Epapalati yia:tapo yu teta:le mate epo atlamyaiyo, “Ya:ye yumiya. Ya:ye yumiya. Ya:ye dali yekelehmimili di dla gogodiya,” demyaiyo.

Epalati Paelettapo yia: watle epo atlaiyo, “Wua: solotama:, na:tapo wua: dokopala oplami dali yekelehmimili di dla gogodloweye?” diyo.

Epalati aiyalma aya dokopala sotapo asiyama ya: watle epo atlamyaiyo, “Di dokopala oplami pato hatlo Sisapo, hale hawa ikadepe,” demyaiyo.

<sup>16</sup> Epapala dalepame Paelettapo Yesuye yia: dla me-pomeliyo, ya:ye dali yekelehmimili di dla gogodlepo depame. Epalati opahale sotapo Yesuye hamame tamalaiyo.

*Yesu dali yekelehmimili di dla gogodle*

*(Mat 27:32-44; Maka 15:21-32; Luk 23:26-43)*

<sup>17</sup> Opahale sotapo Yesuye hamame tamama Yesu meyelo ya: dali yekelehmimiliye maka:himme mo hale hi dokopala elo demdiye edla taiyo. Mo eye Hibulu yu mate semama Golgota demdepo. <sup>18</sup> Epame yia: edla tame Yesuye dali yekelehmimili di dla gogodepo himiyo. Epalati opa dapiyamte mape Yesuta duka dla ellati haleta seme tle gogode epo haleta seme tle gogode depo hatitimaiyo.

<sup>19</sup> Epapele dulu dla Paelettapo hi hatitipame Yesuta ela dokopala di tle badiya diyo. Hi etapo epo elaiyo,

YESU NASALET OPLAMI, YU SO YIA: DOKOPALA OPLAMIPO

<sup>20</sup> Epedeme hi hatitimale iye Yu so yu mate epo Loum so yu mate epo Guliki so yu mate hatitimale halaiyo. Epapele hallati opa hapulomatapo hi hatitimale eye sesa:sesa:demha:ha:iyo. Adipalati, Yesu dali di dla gogodepo himili moye Yelusalem tle pase pateka:muyo. <sup>21</sup> Epapele dulu dla aiyalma aya dokopala sotapo puame Paelet watle epo atlaiyo, “Wa: oplami ya: dokopala di dla hi himimama Yu so dokopala oplami depo himimiya. Amasiyama ipo himine, ‘Oplami itapo ya:skamu ya:ye Yu so yia: dokopala oplami demsela:mduwapo’ dene,” diyo.

<sup>22</sup> Amasiyama Paeletta asiyama yia: watle epo atlaiyo, “Na:ta hatitimale hiye mepo ellepe, oplami haleta pomeyelope dlowa,” diyo.

<sup>23</sup> Opahale so dapiyamte dapiyamte dletapo Yesuye dali yekelehmimili di dla gogodepame ya: tlukaye yia: dulu dla miyelo hukulupo halomaiyo. Epame ya: sede selemalli ma yia:ta haiyo. <sup>24</sup> Epame yiskamu yia: dulu dla epo atlaiyo, “Di tluka iye isikimi duka dla potallatalladlowa. Amasiyama tluka iye anta halowe depame ewala mate tatipiyele hale tatipiyelowa,” diyo. Epapedeme koko itapo mo-woyamuwapo, God yu bukata atlale koko mate ala:lowedeme. Adipalati, God yu eta epo atlapo, “Yia:tapo na: tlukaye yia: dulu dla hukuluwapo.

Epame na: sede ma halowedeme ewala mate tatipiyele hale tatipiyeuwapo,” depo. Epapedeme opahale sotapo koko eye ma-hauwapo.

<sup>25</sup> Epapele dulu dla Yesu ya: wai mate epo ya:la mate epo Kolopas ya:llu Meli mate epame Meli Magadalin mateta Yesu dali yekelehmimili di dla ellati isili tle omha:ha:iyo.

<sup>26</sup> Epalati Yesutapo ya: wai mate epo ya: alotle tlalo oplami hale ya:ta sikemte bokotiyapo malamalalo mateta ya: mateka:pi dla ha:ha:lali natipame ya: wai watle epo atlaiyo, “Wai namkale, oplami iye wa: maseyemalapo,” diyo. <sup>27</sup> Epame ma ya: alotle tlalo oplami watle epo atlaiyo, “Namkale, iye wa: waipo,” diyo. Oloma etle Yesu ya: alotle tlalo oplami etapo Meliye ya: aya dla semtame halaiyo.

*Yesuta mo-powale*

*(Mat 27:45-56; Maka 15:33-41; Luk 23:44-49)*

<sup>28</sup> Epedeme koko ita tame gudlati Yesu ya: malamaiyo, koko hapulomaye mo-puame gudepo, epammama God yu bukata atlama koko mate ala:lowedeme epo atlaiyo, “Na: yú ta:ma,” diyo. <sup>29</sup> Epapele oloma edla wain yú haka:le isilako dla tiliye me-polaiyo. Epapeleye opahale sotapo tlukaye dali dla popolupame wain yú haka:le edla saodepame Yesu mati dla kikisiliyo. <sup>30</sup> Yesutapo wain yú haka:le eye mo-depame epo atlaiyo, “Wata mogudepo,” diyo. Epame ya: dokopala isili dla heodepame powaiyo.

<sup>31</sup> Epapedeme alila eye Yu sota inoma sumalalo alila koko dla dinapolowe alilapo. Amasiyama yia:ta inoma sumalalo alila eye pta koko pato. Adipalati, yia:ta Namilatale daya dele ma me-elaiyo. Epapele koko tle Yu so dokopala sotapo posolotamaiyo, opa moto etapo yia:ta inoma sumalalo alila edla dali yekelehmihili di dla me-hutiyeloweye. Epammama yia:ta Paelet watle epo atlaiyo, “Opa dali yekelehmihili di dla hutiyeye hapele pallipo depame hete hauwokokopo moto isili dla halopo malame ma alikili dla halopo taiya,” diyo. <sup>32</sup> Epapedeme opahale sotapo puame Yesu mateka:pi dla gogodepo halaleye hete hauwokokomaiyo. Epame ma Yesu seme tle halale mape ya: hete hauwokokomaiyo. <sup>33</sup> Amasiyama yia: puame Yesu natili oloma edla ya:ye mo-powame ellati natipame ya: heteye pohauwokokomalalo wekiyo. <sup>34</sup> Amasiyama opahale oplami haletapo ya: benisi hapame Yesu oti seme dla sumaiyo. Epalati omali mate epo yú mateta pakasiyamalalo sumale etle alikili dla sodiyo.

<sup>35</sup> Epapedeme koko ita woyamala natili oplamitapo koko iye ikadepe demama atlamuwapo. Epedeme ya:malamana, ya:ta atlama kokoye ikadepe kokopo. Epapele dulu dla ya:ta koko ipo atlama kokoye wua:tapo koko edla mikadepe dlepo depame apopo.

<sup>36</sup> Epedeme God yu bukata atlamale koko mate ala:lowedeme koko itapo mo-wowoyamuwapo. Adipalati, God yu bukatapo epo atlapo, “Ya: moto dulu dla hutiyeye elo haletapo popostlowa,” depo.

<sup>37</sup> Epame God yu bukata ma epo atlapo, “Opatapo miyelo sumale oplami dla omha:ha:lepe,” depo.

*Yesu moto wabasi dulu dla hamatili*

*(Mat 27:57-61; Maka 15:42-47; Luk 23:50-56)*

<sup>38</sup> Epame alotle Alimatiya dla hallalo oplami Yoseptapo Yesu moto hame tlowedeme Paelet watle tame daliyo. Yosep eye hemele Yesu ya: alotle dolumtlalo oplami halaiyo. Adipalati, ya: Yu so dokopala so wota:mdiyo. Epapeleye Paeletapo ya: watle itiyamale hamiyo, ya:tapo Yesu moto hamtelepo depame. Epalati Yoseptapo puame Yesu motoye dali yekelehmihili di tle hamtuluiyo. <sup>39</sup> Epapalati Nikodimastapo ya: gadepame ya: mate taiyo. Oplami Nikodimas iye ka:yapa utula:la Yesu hala dla tale oplami ipo. Epapeleye ya:tapo ullu ka:depo pamalalo alisisiye Yesu moto dla hutupamellowedeme halopo puaiyo. Ullu ka:depo pamalalo alisisi ita upiyeleye daya yekalo pato dla atilita upiyele epapele sepiyo. <sup>40</sup> Epedeme opa dapiyamte iwolotapo Yesu powale motoye hame tame Yu sota palli hatimdiye, epammama yia:tapo ullu ka:depo pamalalo alisisi mate Yesu motoye huhutupiliyepo tlukata poliyo. <sup>41</sup> Epapeleye Yesuta dali yekelehmihili di dla gogodepo elale mo mateka:pi edla osalo hale me-halaiyo. Osalo dulu hema wabasi amko, oplami powale moto hale ala pohamatilalo wekele wabasiye me-halaiyo. <sup>42</sup> Epapeleye yia:tapo yia:ta inoma sumolowe alilata mo-kotiyamolowe mateka:pi hallati Yesu motoye hapele wabasi edla polomeliyo. Adipalati, wabasi eye mateka:piyo.

## 20

### *Yesuta powale tle ma-sila:tili*

*(Mat 28:1-8; Maka 16:1-8; Luk 24:1-12)*

<sup>1</sup> Sande utulala ikadepe ala me-amtuwame hallati Meli Magadalintapo Yesu wabasi natila taiyo. Ya: tame toko natitepo ewala patota wabasi dla tulalo kokoloma hi-momeleme elaleye ma-alikili dla kokolustale halla natiyo. <sup>2</sup> Epalati Melitapo ma kukulumtame Saimon Pita mate epo Yesuta sikemte bokotiyapo malamalalo alotle tlalo oplami mate dla epo atlaiyo, “Lod motoye ma haka:ma dla hame tamalana. Epame di yia:ta moto hame tame himili moye podimalamana,” diyo.

<sup>3</sup> Epalati Pita mate epo alotle tlalo oplami hale e mate wabasi natila tamalaiyo. <sup>4</sup> Yia: ullumtamama alotle tlalo oplami haletapo ya: tatile Pita tla:mtame wabasi dla woyamaiyo. <sup>5</sup> Epapeleye ya: toko wabasi dulu dla heodepo natitepo Yesu moto polli tluka tlo me-elaiyo. Amasiyama ya:ye wabasi dulu dla potuwaiyo. <sup>6</sup> Epalati Saimon Pitatapo alotle puame woyapame wabasi dulu dla tuwame toko ipo natitepo Yesu moto polli tluka tlo me-ella natiyo. <sup>7</sup> Epame Yesu dokopala dla polli tlukaye woloma polupo himili halla natiyo. <sup>8</sup> Epalati alotle tlalo oplami hale ya: tatile tame wabasi natilitapo alotle wabasi dulu dla tuwaiyo. Ya: tuwame koko eye natipame mikadepe diyo. <sup>9</sup> Epapele dulu dla yia: God yu bukata atlemama ya:ye matle powale tle sila:time pasakalo dlepe dle kokoye woloma pomalamalalo ha:ha:iyo. <sup>10</sup> Epame yia:ta madipatata ma ilame aya dla tamalaiyo.

### *Yesutapo Meli Magadalin dla woyamale*

*(Mat 28:9-10; Maka 16:9-11)*

<sup>11-12</sup> Amasiyama Meli Magadalinta wabasi alikili tle halemama amhalaiyo. Ya: edla amsela:mama toko wabasi dulu dla ipo heodepo natitepo banakaka so dapiyamteta tluka kamkamale didiyepo popa:la natiyo. Yia: Yesu motota ela dla popa:mama haleta dokopala tiyama tle pola, epalati haleta hete tiyama tle pola dla natiyo.

<sup>13</sup> Epalati banakaka so opa dapiyamtetapo ya: watle epo atlaiyo, “A:ya, wa: adipalati amsela:ma:?” diyo.

Epalati Melita epo atlaiyo, “Yia:tapo na: Lod motoye ma haka:ma dla hamtana. Amasiyama na: pona:malamana, yia:tapo ya: moto hamtame himili moye,” diyo. <sup>14</sup> Meli yu ipo atlepo halemama toko ipo helestame natitepo Yesuta medla hallati natiyo. Amasiyama ya:ta malamaleta Yesuye semte oplami hale mle diyo.

<sup>15</sup> Epalati Yesutapo ya: watle epo atlaiyo, “A:ya, wa: anaye totamsela:mama amsela:ma:?” diyo.

Epalati Melita semte ya:ye osalo omhallalo oplami tepo depame ya: watle epo atlaiyo, “Namkale, wa:ta oplami moto iye haka:ma dla tame himili hallepiye, wa: na: atlane. Na: epalati tame moto eye halowama,” diyo.

<sup>16</sup> Epalati Yesutapo ya: watle, “Meli,” diyo.

Epalati Melita helestame ya: watle Hibulu yu mate epo atlaiyo, “Laboni.” Yu i ya: dulu kokoye imalalo oplami demama apopo.

<sup>17</sup> Epedeme Yesutapo ya: watle epo atlaiyo, “Na: dla puame hammiya. Adipalati, na:ye ala A hala dla pehetasema. Amasiyama wa:ye tame na: alotle tlalo soye atlamane, ‘Na:ye na: A God hala dla hetama. A God hatlo eye wua: ma wua: A Godpo’ dene,” diyo.

<sup>18</sup> Epalati Meli Magadalintapo ma ilame puame Yesu ya: alotle tlalo so watle epo atlaiyo, “Na:ye Yesu nati,” diyo. Epame ya:tapo Yesuta ya: watle atlamale koko hapulomaye ma yia: watle atlamaiyo.

### *Yesuta ma ya: alotle tlalo so dla tame woyamale*

*(Mat 28:16-20; Maka 16:14-18; Luk 24:36-49)*

<sup>19</sup> Sande tamila:la oloma edla Yesu ya: alotle tlalo sotapo Yu so dokopala so wowota:mama yimkata alupo aya yia:ta ha:ha:le kokoloma hihimapo popa:iyo. Epalati pakasiyamalalo Yesutapo yia:ta alupo popa: duka dla me-woyapo halemama epo atlaiyo, “Sadle mate ha:ha:iya,” diyo. <sup>20</sup>Ya:tapo yu epo atlepame halemama ya: do ulu mate epo ya: oti seme dla sumale ulu mate yia: watle nalati-iyo. Epalati Yesu ya: alotle tlalo sotapo ya: natipame sikemte sisiyeiyo.

<sup>21</sup> Epame Yesutapo mamisika: yia: watle epo atlaiyo, “Sadle mate ha:ha:iya. Epedeme Atapo na:ye tane duwaye, epammama ma na:tapo wua:ye taiya dema,” diyo. <sup>22</sup>Yesutapo koko iye atlemhalepame ma yia: watle mati mate opudemama epo atlaiyo, “Wua: Hela:dle Soko haiya,” diyo. <sup>23</sup> Epame ma yia: watle epo atlaiyo, “Wua: amkadulo bobtalimaleye howahapo wellipiye, opa ewolo yia: bobtalimaleye mosukulu hiy-olepo hamastlepe. Amasiyama wua:tapo wua: amkadulo bobtalimaleye pohowahapo welilalo wekelepiye, yia: bobtalimale eye pohiyotimolowa,” diyo.

### *Tomasta Yesu natipame mikadepe dle*

<sup>24</sup> Amasiyama Yesu ya: alotle tlalo oplami hale Tomas, ya: hi hale Didimas demdiye, Yesuta ya: alotle tlalo so dla tame woyamale oloma edla ya:ye ya:mkadulo mate popo-laiyo. <sup>25</sup> Epapeleye Yesu ya: alotle tlalo sotapo ya: watle epo atlamyaiyo, “Di Lod manati,” demyaiyo. Amasiyama Tomastapo yia: watle epo atlaiyo, “Na: yipta wua:ta atlati dalepame pomikadepe dlowa. Amasiyama na: monolo ya: do dla ulu hutiyeye natipo na: domokota umpame epo ma ya: oti seme benisita sumale dla ulu elaye umpame edla mikadepe dlowepo,” diyo.

<sup>26</sup> Epame Sande hatlo ma-hamastapame Yesu ya: alotle tlalo sotapo aya hatlo medla alupo popa:iyo. Oloma edla Tomas ma yia: mate me-polaiyo. Amasiyama yia: kokoloma hapuloma hihimapo popa:lati Yesutapo yia:ta popa: duka dla woyapo halemama epo atlaiyo, “Sadle mate ha:ha:iya,” diyo. <sup>27</sup> Epo halemama Tomas watle epo atlaiyo, “Wa: domokota na: do dla ulu hutiyeye umpame natine. Epame na: oti seme hema benisita sumale ulu ma umane. Epedeme wa:ta malamale tatlamale mate halemama mikadepe dle pa:le halaye me-melepame ma mikadepe dene,” diyo.

<sup>28</sup> Epalati Tomasta asiyama epo atlaiyo, “Na: Lod epo na: God,” diyo.

<sup>29</sup> Amasiyama Yesutapo ya: watle epo atlaiyo, “Wa: na: mila:pi natipame mikadepe dema:? Amasiyama opa anawolotapo na: mila:pi ponatilalo isikimi na: dla mikadepe demha:ha:ma:, Godta asiyama yia: dla siyemhalapo,” diyo.

### *Yonta yu i ilimale ya: dulu koko*

<sup>30</sup> Epapedeme Yesutapo ya: alotle tlalo so mila:pi tle ulugiyemale koko pasataleye mahalomaiyo. Epapele tlope Yesuta ulugiyemale koko hapuloma halomale eye buka dulu hema po-ilimalalo wekena. <sup>31</sup> Amasiyama yu i ilimuwaye, wua:tapo Yesuye ikadepe Keliso depame ya: dla mikadepe dlepo depo apuwapo. Epame wua:tapo ya:ye ikadepe God Yami depame ya: dla mikadepe dle koko tle pasakalo halepo depo apuwapo.

## 21

### *Yesutapo Ga:lili kaula dla ya: alotle tlalo so dla woyamale*

<sup>1</sup> Epame ma alotle Yesutapo ya: alotle tlalo sota Ga:lili kaula peleyama dla tame siyamalati edla woyamaiyo. Epapeleye koko itapo ipo woyamaiyo.

<sup>2</sup> Oloma edla Yesu ya: alotle tlalo so iwolotapo yimkata alupo popa:iyo. Saimon Pita, epo Tomas ya: hi hale Didimas demde, epame Ga:lili mo pato dulu dla Ka:na mo yemala dla hallalo oplami Nataniyol demde, epo Sebedi ya: akimlala dapiyamte, epame Yesu ya: alotle tlalo so opa opi dapiyamte ma medla me-popa:iyo. <sup>3</sup> Epapeleye Saimon Pitatapo ya:mkadulo watle epo atlaiyo, “Na: mata pololla tlowama,” diyo. Epalati asiyama ya:mkadulota epo atlaiyo, “Dia: mate yimkata tlowa,” diyo. Epame yia:tapo yimkata



koa dla alupame amalo api tamalaiyo. Amasiyama yia: utula:la pato dulu dla mata pololemsiyamama amalo hale pahalalo wekiyo.

<sup>4</sup> Epapeleye utulala ikadepe oloma edla Yesutapo kaula peleyama dla woyapo halaiyo. Epalati Yesu ya: alotle tlalo sota koa dulu dla ha:ha:mama Yesu natipo yia:ta malamaleta Yesuye semte oplami hale tepo diyo. <sup>5</sup> Amasiyama Yesutapo peleyama metle halemama yia: watle epo atlaiyo, “Namkadulo, wua: amalo halomo?” diyo. Epalati asiyama yia:ta epo atlaiyo, “Hao, di amalo hale pohana,” diyo.

<sup>6</sup> Epalati Yesutapo yia: watle epo atlaiyo, “Wua: matle mata halopame wua: dowala tiyama dla pololiya, eta wua: amalo natilipe,” diyo. Epapalati yia: Yesu yu dalepame koko eye haiyo. Epapele oloma edla amalo sikemte pasataleta yia: mata dulu dla tumama yia:tapo mata hame ta:depo koa dulu dla himiloweye po-ala:lalo wekiyo.

<sup>7</sup> Epalati Yesu ya: alotle tlalo oplami hale Yesuta sikemte bokotiyapo malamalalota Pita watle epo atlaiyo, “Eye Lodpiye,” diyo. Pitata epela dalepame ya: tluka uptipo sela:leye matle didiyepo Yesu hala dla hutumtlowedeme yú dulu dla posta tuluiyo.

<sup>8</sup> Amasiyama Yesu ya: alotle tlalo so opitapo koa tle me-sosolemtamama yia: mata amalo pasatale mate yú dulu tle peleyama dla hallume tamalaiyo. Adipalati, etle tamaliye pase pateka:muyo, isikimi 100 mita selemalli epapiyo. <sup>9</sup> Epedeme yia:tapo koa tle alupo puame tamali dla koa gusullu depame tamali dla popoteliyele oloma edla dlapa militapo me-teleka:mhalla natiyo. Epame amalo mate daya mateta dlapa di dla mohutiyela natiyo.

<sup>10</sup> Epalati Yesutapo yia: watle epo atlaiyo, “Amalo ala wua:ta halëye hema halopo puaiya,” diyo.

<sup>11</sup> Epalati Saimon Pitatapo koa dulu dla tulume mata amalo tuwaleye hallumhetame tamali dla himiyo. Mata dulu edla amalo patotota pasatamama, 153 amalo epapeleta hutiyeyiyo. Epapele dulu yia: amalo sikemte pasatame halë tlope, yia: mata potallatal-ladlalo wekiyo. <sup>12</sup> Epame Yesutapo yia: watle epo atlaiyo, “Wua: puame daya deiya,” diyo. Amasiyama Yesu ya: alotle tlalo so dulu dla oplami haletapo Yesu watle atlemama, “wa:ye anata;” pe-epo atlaiyo. Adipalati, yia: mo-malamaiyo, ya:ye mo-Lodpo diyo.

<sup>13</sup> Epame Yesutapo amaloye daya mate hame yia: watle hamiyo.

<sup>14</sup> Epapedeme iye Yesutapo popo sila:timhetale alotle dapahatlope oloma dla ya: alotle tlalo so dla woyamale koko ipo.

### *Yesutapo Pitaye matle sale*

<sup>15</sup> Epedeme yia: daya mate epo amalo mate mo-depo gudepame Yesutapo Saimon Pita watle epo atlaiyo, “Saimon, Yon yami, wa:ta na:ye sikemte malamaleta wa: amkadulota na: malamaleyè tla:mtame halema:?” diyo.

Epalati asiyama Pitatapo epo atlaiyo, “Yao Lod, wa:malamana, na:ta wa: sikemte malahala kokoye,” diyo.

Epalati Yesuta asiyama ya: watle epo atlaiyo, “Na: sipi aliya haloye woloma ilimhalane,” diyo.

<sup>16</sup> Epame Yesutapo matle epo atlaiyo, “Saimon, Yon yami, wa: ikadepe na:ye sikemte malahalema:?” diyo.

Epalati asiyama ya:tapo Yesu watle epo atlaiyo, “Yao, Lod, wa:malamana, na:ta wa: sikemte malahala kokoye,” diyo.

Epalati Yesuta ya: watle epo atlaiyo, “Na: sipi aliya haloye woloma omhalane,” diyo.

<sup>17</sup> Epame ma dapahatlope oloma dla Saimon watle epo atlaiyo, “Saimon, Yon yami, wa: na:ye sikemte malahalema:?” diyo.

Epalati Pitatapo Yesuta ma dapahatlope oloma dla atlemama wa: na:ye sikemte malahalema: dlati dalepame sikemte dupa koliyo. Amasiyama ya:tapo asiyama epo atlaiyo, “Lod, koko hapulomaye wa: malastana. Epedeme wa:malamana, na:ta wa: sikemte malahala kokoye,” diyo.

Epalati Yesutapo ya: watle epo atlaiyo, “Na: sipi aliya haloye woloma ilimhalane. <sup>18</sup> Epedeme na: ikadepe koko wa: watle atlema. Wa:ta ka:yapa amkota:le haluwa oloma edla wa: alisisi dinapopame mowolo solotamale koko dla sela:mduwapo. Amasiyama wa:ta mo-totoyemala hallepiye, oplami haletapo wa: do dla deata himomeleme hale-mama ma wa:ta posolotamalalo wekelalo mo dla hallumtelepe.” <sup>19</sup> Epapedeme Yesutapo Pita watle atlale koko iye, Pitatapo adipapele api tle pomama God hi di dla ta:dlowe kokoye atlemama apiyo. Epame Yesutapo Pita watle epo atlaiyo, “Wa: na: dolumane,” diyo.

<sup>20</sup> Epapele alotle Pita helestame natilati Yesuta sikemte bokotiyapo malamalalo oplamitapo ya: ko tle pula natiyo. Yesu ya: alotle tlalo oplami iye ka:yapa Yesuta ya: alotle tlalo so mate daya dempopa:le dulu dla Yesu dla hitapolomama, “Lod, oplami antapo wa:ye opahale do tama dla homelepa:?” duwa oplami ipo. <sup>21</sup> Epapeleye oplami etapo ya: alotle dolumtlati natipo Pitatapo Yesu watle epo atlaiyo, “Lod, oplami eye adipapopa:?” diyo.

<sup>22</sup> Amasiyama Yesutapo ya: watle epo atlaiyo, “Na:tapo ya:ye ala me-hallati ma-ilame puame natili dlepiye, e mepapelepe. Amasiyama koko eye powa: koko. Wa: isikimi na: dolumane,” diyo. <sup>23</sup> Epalati Yesuta atlale yu eye ya: alotle tlalo so dulu dla balemmtamama epo atlamyaiyo, “Yesuta atlale oplami eye popolowa,” demyaiyo. Amasiyama Yesu ya:ta atlemama oplami eye popolowa pe-epo atlana. Ya: isikimi ipo atluwapo, “Na:tapo ya:ye ala me-hallati ma-ilame puame natili dlepiye, e mepapelepe. Amasiyama koko eye powa: koko,” duwapo.

<sup>24</sup> Epapedeme Yesu ya: alotle tlalo oplami itapo ya:ta tlamale koko hapulomaye buka dulu hema ma-hatitimuwapo. Epedeme dimalamana, ya:ta hatitimale koko hapulomaye ikadepepo.

<sup>25</sup> Epedeme Yesutapo koko i mate epo koko opi hapuloma mate ma halomuwapo. Epapele tlope koko hapuloma eye buka dla pohatitimana. Amasiyama koko hapuloma eye buka dla hatitimaleta ammatiye, eta ta:lamo iye bukata pasatamama hatitimolowe mota pa:lemle.

## Taiya dle so Taiya dle so buka ya: dulu koko

Lukta ka:yapa ya: buka dla ka:dle yu Yesu Keliso kokoye ilipame matle Taiya dle so buka iye ilimuwapo.

Oplami Luk iye ka:yapa tuwale siyomalalo tiyama tle dokota oplami halemama ya:mkale Polota God yu hamsela:lati ya: mate sela:iyo.

Buka itapo Yesuta popo sila:time Pepele di dla hetlati alotle sosta kotiyamale kokoye atlapo. Taiya dle so buka dulu hema atlamale kokoye sokomoko 30 epapele dulu dla pumama wowoyampuaiyo.

Epapedeme di sapta 1-7 edla natipo ka:yapa ka:dle yuye Yu so siyapo miyelo Yelusalem dla hame ha:ha:uwapo. Amasiyama sapta 8-12 dla di natipo, ka:dle yuye Yu so opi Yelusalem alikili dla ha:ha:le so dla hamtaleye. Epame ma sapta 10 edla di natipo po-Yu sota ka:yapa ka:dle yu dalepame mikadepe dleye. Epame alotle sapta 13 tle tame mosukulu dla di natipo Polota mo meyelo meyelo dle hapuloma Yu so dla epo po-Yu so dla ka:dle yu hamtale kokoye.

Luktapo Taiya dle so buka dulu hema ilimale koko patoto dapiyamte ipo.

Ka:dle yuye opa hapuloma mo meyelo meyelo dle dla ha:ha:mta so yiolepo. Adipalati, Godtapo Ka:dle yu i hamiwaye hatlo Yu so dla pohamina, hao, po-Yu so watle ma hamiwapo.

Epame ma koko haleye ipo. Taiya dle so bukata ka:yapa Hela:dle Sokota mikadepe dle so dla tulli kokoye imapo. Epame etle kotiyapame puame wata oloma hema Hela:dle Sokota sos hapuloma dla gademhalemama itiyamale hapimhalapo.

### *Yesu Pepele dimo dla hamamhetale*

<sup>1-2</sup> Tiyopoles namkale,

Na:ta buka ka:yapa ilipo wa: watle hamiwa dulu dla Yesuta koko hamsela:le mate imale mate ma-ilimuwapo. Epame ya:ye Pepele di dla hamamhetlowe mape ma-ilimuwapo. Epedeme Yesu ya: ala pohamame hetlalo halemama Hela:dle Sokota itiyamale tle Taiya dle so ya:ta hohomale watle molo atlale yu atlamuwapo. <sup>3</sup> Ya: epame wabasi tle sila:time 40 alila dulu dla sela:mama Taiya dle so watle tame wowoyam-sela:uwapo, ya:tapo ikadepe ma pasakalo dle koko dla yia:ta mikadepe dlepo depame. Epo yia: mate sela:mama God ya: mo kokoye atlamsela:uwapo.

<sup>4</sup> Epedeme alila haleta Taiya dle sota Yesu mate yimkata Olipi tamali di dla tame alupo popa:lati Yesuta yia: watle yu itiyamale mate ipo atlaiyo, "Wua: Yelusalem meleme tamiyo. Amasiyama na: Ata atlale koko eta puluwe dla dalemha:ha:mama omha:ha:iye. Adipalati, na:ta yu iye wua: watle ma-atlamuwapo. <sup>5</sup> Epapedeme, Yonta opa yu siyapo dla ka:ka:timuwapo. Amasiyama alila mateka:pi dla wua:ye Hela:dle Soko dla ka:ka:timelepe," diyo.

<sup>6</sup> Epalati yia:ta Yesu watle epo atlaiyo, "Lod, wa: Isael sota mo hapuloma ma omha:ha:lepo depame itiyamale wata ma hamipa:?" diyo.

<sup>7</sup> Amasiyama Yesuta yia: watle epo atlaiyo, "Hatlo Atapo alila epapeleye ya:ta itiyamale tle hatitimdepo. Epedeme wua:ta alila epapeleye malamolowe poka:dena.

<sup>8</sup> Amasiyama Hela:dle Sokota wua: dla tullupiye, wua: itiyamale halepe. Epame wua: na: kokoye opa hapuloma dla atlamtelepe, Yelusalem tle kotiyapame Yudiya mo pato dla epo Samaliya dla epame ta:lamo pato sukulu gugudle dla," diyo.

<sup>9</sup> Yesu yu i atlepo hallati Pepele dimo dla hamame hetaiyo, yia: me-omha:ha:lati. Epalati wualata puame Yesuye bopudemama yia:ta natilowe kukomaiyo. <sup>10</sup> Amasiyama yia: ala me-omha:ha:lati opa dapiyamte tluka kamkamale didiyeleta pakasiyamalalo

yia: mateka:pi dla woyapo ha:ha:mama epo atlaiyo, <sup>11</sup> “Ga:lili so, wua: adipapalati omapla di dla ala me-omha:ha:ma:? Wua: inoma dali tle hamame hetale Yesu iye matle ilame pumama mepo mallepe,” diyo.

### *Taiya dle oplami hale Matiyas hamale*

<sup>12</sup> Taiya dle sota Yesu Pepele dimo dla hetla omha:ha:po depo Olipi tamali di tle ma Yelusalem dla ilame tamalaiyo. Yelusalem eye Olipi tamali tle pase pateka:muyo. <sup>13</sup> Yia: Yelusalem dla tame yia:ta ha:ha:lalo aya dla hetaiyo. Taiya dle so iwolotapo aya dulu hema ha:ha:iyo, Pita mate epo Yon mate epo Yeims mate epo Endulu mate epo Pilipi mate epo Tomas mate epo Batolome mate epo Ma:tiyu mate epame Alpiyes yami Yeims mate epame Loum gamani so mate opahale demhalale oplami Saimon mate epo Yeims yami Yudas. <sup>14</sup> Epapeleye Taiya dle so iwolotapo wola: opi mate epo Yesu ya: wai Meli mate epo Yesu ya: eidulo mate alila hapuloma alupame inoma sumsiamdiyo.

<sup>15</sup> Alila haleta mikadepe dle so hapuloma, <sup>120</sup> epapeleta yimkata alupo popa:iyo. Epalati Pitata sila:time yia: watle epo atlaiyo, <sup>16-20</sup> “Mikadepe dle so namkadulo, na:ta wua: watle Yudas kokoye atlowepo. Ya:ye di alumale dulu dla dia: mate oko hatlo hamsela:uwapo. Epapele tope ya:tapo Yesuye opahale so dla hamame iwapo. Epalati asiyama aiyalma aya dokopala sota ya: watle mani hamiwapo. Epalati Yudastapo mani e hamtame ta:la hauwapo. Epedeme ya: ta:la edla tame teyumama kokota hopostepo elepalota gowala tulumama pouwapo. Epalati Yelusalem so hapulomata koko i dalepo, ta:la iye yia: yu mate hi ipo sauwapo, ‘Akeledama.’ Hi i ya: dulu kokoye omali ta:la demama apopo.

Epapedeme God yu bukata atlale yuye mo-mikadepe duwapo. Adipalati, Hela:dle Sokota imale tle Deibidita Yudas kokoye mo-powataliya God yu buka dla ilimuwapo. Epapele tle ya: Sam buka dla yu eye ipo ilimuwapo,

‘Ya: ayata aya siyapo hallepe,  
oplami haleta pohallowa.’

Epame ma epo ilimuwapo,

‘Oplami haletapo ya: oko ipiye halepe.’ ”

<sup>21-22</sup> Pita ma epo atlaiyo, “Di ma Yudasta haluwa mo dla hallowe oplami hale hamolowa, ya:tapo dia: mate Yesuta popo sila:tili kokoye atlamsiyamoloweye. Epapedeme oplami iye dia: mate sela:mama Yon opa yú dla ka:ka:timsela:la natili mate epo Yesuye Pepele di dla hamame hetla natili mate tlo hamolowa,” diyo.

<sup>23</sup> Epame mikadepe dle so hapulomatapo opa dapiyamte Yosep mate epo Matiyas mate huhulumaiyo. Epeleye oplami hale Yosep iye, ya: hi dapahatlopeyo, ya: hi opiye Balesabas epo Yustus. <sup>24-25</sup> Yia: opa dapiyamte iwolo huhulupo popa:mama ipo inoma sumaiyo, “Lod, wa: opa hapulomata momalamale wa:malamana. Epedeme opa dapiyamte hema wa:ta sale oplamiye di watle nati-ine, ya:tapo Yudasta hallalo mo dla halemama Taiya dle so oko ipi halepo depame. Adipalati, Yudasye batalimale koko hademe ya: asiyama wotiyalle ma-hauwapo,” diyo.

<sup>26</sup> Yia: inoma sumale gudepame alotle ewala mate tatipiyele hale tatipiyeyiyo, yia:ta opa dapiyamte huhulumale dulu dla Godta sale oplami tlo hamolowedeme. Yia: epo tatipiyemtumama oplami hatlo Matiyas tlo hamaiyo. Epalati ya:tapo Taiya dle so oko halowedeme Taiya dle so opi mate hatlo godiyo.

## 2

### *Hela:dle Sokota tulli*

<sup>1</sup> Pentikos alilata mo-pulati mikadepe dle so hapulomata aya hatlo dla alupo ha:ha:iyo.

<sup>2</sup> Epalati pakasiyamalalo omapla di tle sokomoko some bibikilimale yuta yia:ta popa:le aya dulu dla haiyo. <sup>3</sup> Epapalati dlapa teleka:le aloweli epapele some opa hapuloma dulu

edla popa:le u-umamta natiyo. <sup>4</sup> Epammama Hela:dle Sokota yia: dla tulume halati yia:tapo Hela:dle Sokota itiyamale tle yu meyelope meyelope dle yuhamyaiyo.

<sup>5</sup> Amasiyama God koko sikemte momalamale Yu soye mo hapuloma tle puame Yelusalem dla me-ha:ha:mdiyo. <sup>6</sup> Epapeleye yia:ta sokomoko some bibikilimale yu dalepame koko e natila puaiyo. Yia: puame daletapo mikadepe dle so hapulomata yu meyelope meyelope dle mate yuhamyela daliyo. Yia:ta epamyela dulu medla daletapo opa ewolotapo ma yia: yu mate yuhamyela dalepame sikemte yiyeliyo. <sup>7</sup> Epalati yia:tapo yiyelepame momalamale mate popa:mama epo atlamyaiyo, “Opa ipo yuhamyaye Ga:lili sota apopo. <sup>8</sup> Amasiyama adipammama yia:ta di yu meyelope meyelope dle mate yuhamyela dalema:?” <sup>9</sup> Adipalati, di hapuloma mo meyelope meyelope dle itle pumulale sopo, Patiya tle epo Midiya tle epo Elam tle epo Mesopotamiya tle epo Yudiya tle epo Kapadokiya tle epo Pontus tle epo Asiya tle <sup>10</sup> epo Piligiya tle epo Pampiliya tle epo Isip tle pumulale sopo, epame di opiye Libiya mo pato dulu dla Kulene mo mateka:pi tle pumulale sopo. Epame opiye Loum tle pumulale sopo, epo opiye Loum tle pumulale po-Yu so, Yu so God dla mikadepe dle tle Yu so hi halomale sopo. <sup>11</sup> Epame di opiye Kiliti mate Alabiya mate etle pumulale sopo. Di mo meyelope meyelope dle itle pumulale so tlope di yia:ta di yu meyelope meyelope dle mate yuhamyela me-dalepo. Epedeme yia:ta yuhamyaye Godtapo koko patoto halomale e atlamyemama apopo.”

<sup>12</sup> Yia: yiyelle mate malamale tatlamale mate ha:ha:mama yimkadulo watle epo atlamyaiyo, “I apa kokota:, i apa kokota:?” demyaiyo.

<sup>13</sup> Amasiyama opita mikadepe dle so dla tetlemyemama epo atlamyaiyo, “Opa iwoloye kawata yú dlopo yiyilalimsiyama,” demyaiyo.

### *Pitata yu atlale*

<sup>14</sup> Epalati Pitata koko i dalepame Taiya dle so mate sillipame yu teta:le mate opa alumale watle epo atlaiyo, “Yu so Yelusalem dla ha:ha:lalo so mate epo isikimi asepe pumulale so mate wua: na: yu daliya. <sup>15</sup> Opa opi wua:tapo di watle, ‘kawata yú dlopo yiyilalimsiyama,’ dlepo, amasiyama di pe-epapesema. Adipalati, sali ala utulala ikadepe hallati opata kawata yú dlopo poyiyilalimasemde. <sup>16</sup> Amasiyama wua:ta dalle yu mate epo natili koko mateye God tle yu hapame molo atlalo oplami Yowelta atlale yu mate ma-ala:po. Adipalati, ya:ta God yu buka dla ipo ilimuwapo,

<sup>17</sup> ‘Godta epo atluwapo,

Mosukulu alila dla na:ta Hela:dle Sokoye opa hapuloma watle hamilowepo.

Epalati wua: akimlala mate wua: utukaka mate amile kokoye momolo atlam-siyamelepe.

Epame wua: kiptalo mape yia: inomata meyelope demama God tle pua koko tlamelepe.

Epalati wua: opolatalota God tle pua kokoye milamalo tlamha:ha:lepe.

<sup>18</sup> Epame na: oko halalo so hapuloma opa mate epo wola: mate edla na:ta Hela:dle Soko hamilowepo.

Epalati yia:tapo amile kokoye momolo atlamsiyamelepe.

<sup>19</sup> Epapalati na:tapo omapla di dla epo ta:la isili hema ulugiyemale koko nalati-iliwepo.

Oloma edla ta:lamo hema wua:tapo omali mate dlapa mate epo namile pato mate tlamelepe.

<sup>20</sup> Epalati omapla di dla wua:tapo salita amtula natilipe, epame mamatapo omali some omteka:pela natilipe.

Kokota ipapelepiye, Lod ya: alilata puluwedeme hallati apelepe.

<sup>21</sup> Amasiyama opa anawolotapo dulu edla ha:ha:mama

Lod watle gadle yilo ya: hi sisilamha:ha:lepiye, asiyama Lodta yia: watle pasakalo hallowe hapilipe.’

<sup>22</sup> Epedeme Isael so opa, wua: yu i daliya. Yesu Nasalet oplamiye Godtapo wua: yilo mo-sauwapo. Epalati Yesuta wua: dulu dla ulugiyemale koko halomsela:mama Godta



ya: sale kokoye mo-botomastauwapo. Epedeme wua: malamana, koko eta wua: dulu dla woyamuwaye. <sup>23</sup> Amasiyama God ya: meyelo solotamale tle mo-powataliya Yesuye wua: watle hamame iliweye yu itiyamale me-himiwapo. Epapele tle ya:ta Yesuye wua: watle hamame ilati wua:tapo batalimale so opa mate ya:ye dali yekelehmihili di dla gogodepo yumuwapo. <sup>24</sup> Amasiyama God tapo Yesuye powale itiyamale tle hamame ta:duwapo. Adipalati, powaleta ya:ye hamoloweye po-ala:na. <sup>25</sup> Epedeme Deibiditapo Yesu kokoye God yu buka dla ipo atluwapo,

'Na: alila hapuloma Godta na: mila:pi tle halla natimdepo.

Ya: na: mateka:pi dla halapo, epedeme na: powota:lowa.

<sup>26</sup> Epedeme na: opasi dulu dla siyele patota hetamama siyele yu i atlema.

Na: ma polowe dla powota:lowa.

<sup>27</sup> Adipalati, wa: na: sokoye powame tame ha:ha:lalo mo dla popomollowa.

Epame na: moto ikadepe mape wabasi dulu dla pohutuluwa.

<sup>28</sup> Epame wa:tapo pasakalo ka:depo hallowe kokoye na: watle me-imuwapo.

Epedeme na:ta wa: mate halemama sikemte siyelowepo.'

<sup>29</sup> Namkadulo, Deibiditapo koko i atluwaye ya:skamu ya: koko po-atlana. Adipalati, ya: polati ya:ye wabasi dla hamatiwapo. Epo ya: wabasiye wata oloma hema di me-natimdepo. <sup>30</sup> Amasiyama ya: God tle yu hapame molo atlalo oplami hallati Godta ya: watle yu itiyamale himili kokoye ya: momalahaluwapo. Adipalati, God tapo ya: mate yu itiyapo himimama epo atluwapo, 'Deibidi ya: mamadulo haletapo Deibidita dokopala haluwa mo dla ma dokopala hallepe,' duwapo. <sup>31</sup> Epedeme Deibidita itapu koko i ma-natipame Godta sale Kelisota wabasi tle sila:tilowe koko dla ipo atluwapo, 'Godta ya:ye powame tame ha:ha:lalo mo dla popomollowa, epame ya: motota pohutuluwa,' duwapo.

<sup>32</sup> Epedeme Godta Yesuye powale tle ma pasakalo dla hamame sila:tiwapo. Eye dita hapulomata ma-natiwapo. <sup>33</sup> Epame Yesuye Godta Pepele dimo dla hamame hetame ya: dowala tiyama dla pamoluwapo. Epo ya: yu itiyamale himili dolumama ya: Hela:dle Sokoye Yesu watle hamilati ya:tapo ma di watle hamiwapo. Epedeme Hela:dle Soko hamilowe koko eye wata wua:ta natimama dalepo.

<sup>34</sup> Epapedeme Deibidita Pepele di dla pehetana. Hao. Ya:ta ipo atluwaye, Yesu koko atlemama apuwapo,

'Godta na: Lod watle epo atluwapo,

Wa: na: dowala tiyama dla polane.

<sup>35</sup> Epalati na:tapo wa: watle opahale demha:ha: soye wa: hete sitali isili dla hatitimolowepo,' duwapo.

<sup>36</sup> Epedeme Isael so, wua: koko i woloma malamaiya. Yesu wua:ta dali yekelehmihili di dla gogoduwa iye God tapo ya:ye Lod depo Keliso duwapo."

<sup>37</sup> Epalati opata yu i dalepame yiskamu yia: batalimale malanatipame dupa yulumale mate Pita wolo watle epo atlaiyo, "Namkadulo, di apa koko hapa:?" diyo.

<sup>38</sup> Asiyama Pitata yia: watle epo atlaiyo, "Wua:ta hapuloma, wua: malamale meyelo depa wua: bobtalimale tle heheletipame Yesu hi tle yú tutula:iya. Epapelepiye, wua: bobtalimaleye hiyotipo wowellipe. Epapalati wua:ta Godta isikimi namkale dle tle hapimhala Hela:dle Sokoye hamelepe. <sup>39</sup> Epedeme koko ka:pi iye wua: mate epo wua: yimlala mate epo mo pateka:mu dla ha:ha: so dla mo-puwapo. Epapedeme opa anawoloye Godta sisilamhalema:, yia: dla ma mo-puwapo," diyo.

<sup>40</sup> Epame Pitata yu selemalli mate sikemte atlemama epo atlaiyo, "Epedeme wua: batalimale koko dulu tle alikili dla potaiya. Adipalati, God tapo bobtalimale so asiyama wotiyalle hamilati wua: pohalalo wekelepo depame," diyo.

<sup>41</sup> Epalati opa anawolota Pita yu dla dalepo mikadepe duwa, ewoloye Taiya dle sota Yesu hi tle yú dla ka:ka:timaiyo. Epedeme alila edla 3,000 opata yú dla tutula:iyo. <sup>42</sup> Epo

yia: yú dla tutula:pame alila hapuloma dulu dla yimkata alupame Taiya dle sota imalati woloma ka:pi dalem-diyo. Epammama yia: ma Lod malamale daya dlomsiyamama alila hapuloma inoma sumsiyam-diyo.

### *Mikadepe dle sota ha:ha:le koko*

<sup>43</sup> Taiya dle sota Godta itiyamale mate ulugiyemale koko patoto halomsiyamalati opa hapulomata natipo sikemte wowota:mdiyo. <sup>44</sup> Amasiyama mikadepe dle so hapulomatapo alila hapuloma yimkata hatlo alupame alisisi mate asiyama gade asiyama gade dem-diyo. <sup>45</sup> Epamsiyamama yia: ta:la mate yia: alisisi mate opa watle hapipame asiyama mani hapo mani e mate mikadepe dle so opa opi alisisi pa:talo soye gagademsiyam-diyo. <sup>46-47</sup> Epame alila hapuloma yia:tapo inoma sumolowedeme Yu so aiyalma aya dla yimkata alum-diyo. Amasiyama yia:ta Yesu malamale daya dlomsiyamama yia: aya meyelope meyelope dle dla dlomsiyam-diyo. Epamsiyamama yia: dupa dulu tle malamale hatlope depame siyele yu God dla atlamsiyam-diyo. Epalati Yelusalem so hapulomata yia: kokoye ka:pi dem-diyo. Epame Lodta alila hapuloma dla opa opi watle pasakalo hallowe hapim-diyo. Epammama mikadepe dle sota pasatam-diyo.

## 3

### *Pitata akoloyale oplami ka:dle*

<sup>1</sup> Alila haleta tamila:la halem-tlati Pita mate Yon mate Yu so aiyalma aya dla inoma sumala hetamalaiyo. <sup>2</sup> Yia: hetame natilati akoloyale oplamiye kokoloma tala hale, ya: hi ka:pi kokoloma dem-diye, edla polla natiyo. Oplami iye ya:yata hammama mepo akoloyale hamaiyo. Epeleye alila hapuloma ya:mkadulota ya:ye hohopo hetame kokoloma tala hema pamelem-diyo. Epalati ya:tapo edla polomama opata aiyalma aya dla hetamha:ha:latai yia: watle mani otompolom-diyo. <sup>3</sup> Ya: edla otompolomama natilati Pita mate Yon mate aya dulu dla tulati yia: watle mani otiyo. <sup>4</sup> Epalati Pita mate Yon mate ya: watle omha:ha:mama Pitata epo atlaiyo, “Di watle natine,” diyo. <sup>5</sup> Epalati ya:ta malamaleta semte ya: watle mani hamilowedeme ha:ha:mama ammapo depame yia: watle natiyo.

<sup>6</sup> Amasiyama Pitata ya: watle epo atlaiyo, “Na: dla mani hawa. Amasiyama na: isikimi na: dla ela alisisi tlo wa: watle hamilowepo. Epedeme na: Yesu Keliso Nasalet oplami hi tle wa:ye atlema, sila:tipo tane,” diyo. <sup>7</sup> Ya: epo halemama akoloyale oplamiye dowala do dla hamame halemama ya: ta:dlati ya: heteta ma-ka:diyo. <sup>8</sup> Ya: heteta ma-ka:dlati sila:tipo sela:mama Pita wolo mate aiyalma aya dla tuwaiyo. Ya: aiyalma aya dla tuwame puputukolemsela:mama God dla siyele ta:demsela:iyo.

<sup>9-10</sup> Opa hapuloma akoloyale oplamita sela:mama God dla siyele ta:demsela:la natipo yiyeliyo. Epo yiskamu epo atlamyaiyo, “Oplami iye akoloyale oplami kokoloma tala dla polomama mani otompolomduwa ipo. Amasiyama ya: adipo sila:time sela:mama ipapele koko hamsela:ma:?” demyaiyo.

### *Pitata aiyalma aya dla yu atlale*

<sup>11</sup> Akoloyale oplami ala Pita mate Yon mate dla poposila:lipo Solomon potopali dla siyamala natipame opa hapulomata yiyelepame yia: hala dla ullumpumulaiyo.

<sup>12</sup> Amasiyama Pitata opa hapuloma i natipame yia: watle epo atlaiyo, “Isalael so, wua: adipalati dia: dla omha:ha:mama sikemte momalama:? Adipalati, oplami iye dita itiyamale mate epo dita ka:ka:depo ha:ha:le tle poka:depo sela:sema. <sup>13</sup> Amasiyama di mamadulo A:iblaham mate epo Aisek mate epo Yokob mate yia: Godtapo ya: oko oplami Yesu watle itiyamale pato ma-hamipame ya: hi di dla ta:duwapo. Amasiyama wua:tapo ya:ye yumulupo depame Yu so dokopala so dla homeluwapo. Epame ya: koko gladlowedeme Paelet dla hamamtlati Paelettapo atlemama, ‘na: ya: dla batalimale koko hale ponatisema,’ dlati wua:tapo mepapele Yesuye me-alliwapo. <sup>14</sup> Amasiyama

Yesu ya:ye ka:dle batalimale pa:le oplamipo. Epapele tlope wua:tapo ya:ye allimama ma ya:mkale yumulalo oplami Balabas tlo Paelet watle amtuwale aya tle alikili dla hamame woyamane duwapo. <sup>15</sup> Epedeme wua: Yesu opa pasakalo hallowe dla elemtlalo oplamiye wua:ta mo-yumuwapo. Amasiyama Godta ya:ye powale tle pasakalo dla ma-ta:duwapo. Epedeme di bidulo ya:ta powale tle sila:timsela:lati natiwa koko eye atlamsiyamapo. <sup>16</sup> Epapedeme Yesu e ya: hi dla mikadepe dle koko tle akoloyale oplami iye ka:dlepo. Epapele dulu dla wua:ta hapuloma mo-wua:malamana, oplamiye ka:yapa akoloyale haluwapo. Amasiyama di Yesu hi dla mikadepe depame wua:ta nati oplami iye ka:dlepo.”

<sup>17</sup> Epame Pitata opa hapuloma alumale dla ma epo atlaiyo, “Namkadulo, na:malamana, wua:ta wua: dokopala so mate God Yami Yesu yeitamama ya: dla koko hauwaye. <sup>18</sup> Amasiyama Godta ya: yu hapo molo atlamalalo so ka:yapa ha:ha:uwa tle Yami Kelisota wotiyalle haloweye ma-atluwapo. Epapedeme yu eta wata mikadepe depo. <sup>19</sup> Epedeme wua: malamale meyeloje depame wua: bobtalimale tle God dla heheletimaiya. Epalati Godta wua: bobtalimaleye hiyotipo wellipe. Epame wua: watle itiyamale amko hamilipe. <sup>20</sup> Epame Yami Yesu, ya:ta sale Kelisoye wua: dla tulune dlepe. <sup>21</sup> Amasiyama wata alila oloma iye Yesu aseka Pepele di dla hallepe. Ya: ala Pepele di dla me-hallati Godta koko hapuloma ma amko dlati edla mallepe. Epedeme Godta ya: tle yu hapame molo atlamalalo so ka:yapa ha:ha:le tle koko iye ma-atlamuwapo. <sup>22</sup> Epedeme Mosesta God yu buka dla epo atluwapo,

‘Godta wua: yilo wua: dulu tle ya: yu molo atlalo oplami hale, na: sepele hulumelepe.

Epalati wua:ta ya:ta koko hapuloma atlamale dla salladepo siyamelepe.

<sup>23</sup> Amasiyama oplami hale antapo ya: yu dalepame posalladlalo sela:lepiye, oplami eye God ya: opa alumale dulu tle alikili a:ma woyapame polope,’ duwapo.

<sup>24</sup> God tle yu hapame molo atlalo oplami Sa:muwel mate epo God tle yu hapame molo atlamalalo so opi Sa:muwel ko tle ha:ha:leta wata oloma hema wowoyamolowe kokoye ma-atlamuwapo. <sup>25</sup> Epedeme Godta wua: mamadulo mate epo ya: yu molo atlalo so ka:yapa ha:ha:uwa mate yu itiyamale hatitimale eye, wuolepo. Adipalati, ya: A:iblaham watle epo atluwapo,

‘Wa: mamadulo hale tle na:tapo opa hapuloma ta:lamo dla ha:ha: so watle siyele hamilowepo,’ duwapo.

<sup>26</sup> Epapedeme Godta ya:ta hulumale oko oplami Yesuye wua: watle tane duwapo, wua: tate yu ka:dle dallepo depame. Epame wua:tapo ya:ta gadle tle wua:ta malamale meyeloje depame wua: bobtalimale tle heheletimelepo depo.”

## 4

### *Pita mate Yon mate koko gladle dla hohopo hetale*

<sup>1-2</sup> Pita mate Yon mate ala opa alumale dla yu atlamha:ha:mama epo atlamyaiyo, “Yesuta powale tle sila:tilita opa hapuloma mape palli tle sillipe,” demyaiyo. Amasiyama God ka: epo opa ka: duka dla ha:ha:lalo so mate epo aiyalma aya alikili tle omha:ha:lalo so yia: dokopala oplami mate epo Sa:dusi so mateta puame Pitata palli tle ma silliwe koko dla atlemhallati dalepame sikemte siyalasiyaladiyo. <sup>3</sup> Epammama yia:ta Pita mate Yon mate hohomaiyo. Amasiyama ma-apomtlati yia:ye aseka amtuwale aya dulu dla ka:ka:timaiyo. Epame ma-alallati Yu so dokopala so dla elemtlowedeme.

<sup>4</sup> Amasiyama Pita yu dalepo mikadepe dle so mate epo mikadepe dle so opi hapuloma mate hatlo godlati mo-5,000 umaiyo.

<sup>5</sup> Epedeme utulalati Yu so dokopala so hapuloma mate epo aiyalma imalalo so hapuloma mate Yelusalem edla alumaiyo. <sup>6</sup> Yia:ta alumale dulu edla aiyalma aya dokopala oplami Anas mate ya: asiyadulo Kayapas mate epo Yon mate epo Alesenda mate epo ya: asiyadulo opi mate alumaiyo. <sup>7</sup> Epalati Pita mate Yon mateye mo-elepume ha:ha:lati

dokopala sota yia: watle epo atlaiyo, “Wua: adipo akoloyale oplami i ka:duwa? Wua: anta itiyamale mate epo ana hi mate ya: ka:duwa?” diyo.

<sup>8</sup> Pita Hela:dle Sokota ya: dla pasatepo halemama yia: watle asiyama yu epo atlaiyo, “Dokopala so, wua: na: yu daliya. <sup>9</sup> Wua: dita akoloyale oplami gademama ya: ka:dlati wua: e natipo di koko gladlowedeme di hohopo matalepa? <sup>10</sup> Amasiyama wua: mate epo Isalael so hapuloma mate koko i malamolowe ka:pi. Adipalati, Yesu Keliso Nasalet oplami wua:ta yumulati Godta ma powale tle pasakalo duwa, ya: hi itiyamale tle di wata wua:ta nati oplami iye ka:dlepo. <sup>11</sup> Epedeme Yesu kokoye God yu buka dla epo atlapo, ‘Aya halalo so wua:tapo alumiti alimama

alumiti hamastale etapo ma wata aya duka dla molopa kestale some halapo,’ depo.

<sup>12</sup> Yao, epapedeme Yesu hatlo ya:tapo pasakalo halowe halapo. Epedeme ta:lamo pato hema oplami hale hawa ikadepe opata pasakalo hallowe halowe, hatlo Yesupo.”

<sup>13</sup> Epalati dokopala sota Pita mate Yon mate yia:ta powowota:lalo asiyama yu ka:pi atlamalati dalepame yia: sikemte yiyeliyo. Adipalati, Pita woloye sukulu yeitamale soyo, isikimi mo dulu dla ha:ha:lalo soyo. Epammama dokopala sota malamaiyo, opa dapiyamte iwoloye Yesu mate siyamale sopo, diyo. <sup>14</sup> Epame akoloyale oplami Pita wolota ka:dleta Pita mate Yon mate halla natipame dokopala sota asiyama yu hale atlowe pa:iyo. <sup>15</sup> Yia: asiyama yu hale atlowe pa:lali Pita wolo watle aya alikili dla wowoyapo omha:haiye, diyo. Dokopala sota Pita wolo alikili a:ma taiya depame miyelo yia: dulu dla esemaiyo. <sup>16</sup> Yia: esemama epo atlaiyo, “Di opa iwolo dla apa koko hapa:? Adipalati, Yelusalem so hapulomata yia:ta ulugiyemale koko pato hauwaye manatiwapo. Epedeme di koko hema isikimi mala-atlowe poka:dena. <sup>17</sup> Amasiyama di koko ipapeleta ta:lala depame opa dapiyamte iwoloye hohopame ma Yesu hi mate opa dla imsiyamiyo dlowepo,” diyo.

<sup>18</sup> Epame dokopala sota ma Pita woloye sisilapo yia: watle epo atlaiyo, “Wua: matle Yesu hi mate imsiyamama koko opi halomsiyamiyo,” diyo.

<sup>19</sup> Amasiyama Pita mate Yon mate asiyama yia: watle epo atlaiyo, “Epedeme wua: wuskamu koko iye woloma natiya. Ka:deta:, God mila:pi tle dita wua: yu dla salladepo siyamama God yu dla posalladlalo wekelowe? <sup>20</sup> Adipalati, di bidulo Yesuta koko hamsela:la natiwa mate epo Yesuta koko atlamala dlaluwa mate atlamsiyamolowe pomellowa,” diyo.

<sup>21</sup> Epalati dokopala sota yia: watle yu itiyamale mate sikemte gogolepame koko gladle aya tle ma-taiya diyo. Adipalati, opa hapulomata akoloyale oplami ka:dle dla sikemte sisiyelati dokopala sota Pita wolo dla wotiyalle hamilowe api ponatiyo.

<sup>22</sup> Epedeme Pita mate Yon mate akoloyale oplami ka:dleye 40 sokomoko tla:mtame hallati apiyo.

### *Mikadepe dle sota God dla inoma sumale himili*

<sup>23</sup> Pita mate Yon mate koko gladle aya tle alikili a:ma u-ulapo tame mikadepe dle so alumale watle aiyalma aya dokopala so mate epo Yu so dokopala so mateta atlamale kokoye ma yia: watle atlamaiyo. <sup>24</sup> Epalati yimkadulo mikadepe dle sota koko i dalepame yimkata inoma sumale yu God dla ta:diyo. Yia:ta inoma sumama epo atlaiyo, “Lod God, wa:tapo ta:lamo mate Pepele dimo mate epo kaula mate epame dulu edla ha:ha:lalo alisisi hapuloma mate mimita:puwapo. <sup>25</sup> Epapedeme wa:ta di mama Deibidi mati tle Hela:dle Soko tle ipo atluwapo, ‘Adipapalati po-Yu sota siyalasiyalademdi?

Epo adipapalati opatapo koko pa:le batalipo momalamale hatitimama ammdi?

<sup>26</sup> Ta:lamo dokopala sota miyelo yimkata alupame

Lod mate epo ya:ta sale oplami mate dla opahale dlowedeme dinapopo ha:ha:po,’ duwapo.

<sup>27</sup> Epedeme Deibiditapo ikadepe koko atluwapo. Adipalati, Helod mate epo Pontes Paelet mate epo Isalael so opa mate epo po-Yu so mate yimkata Yelusalem mo hema alupame Yesu Keliso, wa:ta sale oko oplami yuluwedeme yu ka:demduwapo. <sup>28</sup> Amasiyama Lod, yia:ta koko halë iye wa: mo-powataliya malapame wa:ta itiyamale tle dinapuwapo. <sup>29</sup> Epedeme Lod, watapo dokopala so iwolota wa: oko so di watle batalimale yu atlamal-eye wa: ma-dallepo. Epedeme di watle itiyamale hamine, ditapo wa: yu atlamsiyamama wota:le pa:po siyamelepo depame. <sup>30</sup> Epame wa:ta itiyamale nati-imama esusulumale soye ka:ka:dene. Epo wa: oko oplami Yesu hi tle ulugiyemale koko patoto nalati-ine.”

<sup>31</sup> Amasiyama yia: inoma sumaleta tame gudlati yia:ta popa:le ayaye holuiyo. Epalati Hela:dle Sokota yia: dla halati yia:tapo wowota:le pa:po God yu atlamsiyamaiyo.

### *Mikadepe dle sota ha:ha:le koko*

<sup>32</sup> Epalati mikadepe dle so alumaletapo yia: dupa dulu tle malamale hatlope depo ha:ha:mama yia: dulu dla haleta alisisi podatimdiyo. Amasiyama yia:ta hapulomata alisisi mate yimkadulo asiyama gade asiyama gade demdiyo. <sup>33</sup> Epalati dulu edla Taiya dle sota itiyamale pato mate Yesuta popo sila:tili koko atlamsiyamalati Godta yia:ta hapuloma dla siyele pato hamimdiyo. <sup>34-35</sup> Epamsiyamama mikadepe dle sota yia: ta:la mate aya mate opa watle hapipame asiyama mani halopo puame Taiya dle so opa watle hapimdiyo. Epalati Taiya dle sota mani eye halopo hukulupame mikadepe dle so opi alisisi pa:talo so watle hapimdiyo. Epapele koko tle yia: dulu dla haleta alisisi pa:le pohalaiyo.

<sup>36-37</sup> Epapele dulu dla mikadepe dle oplami hale Libai ya: asiya oplami Yoseptapo ya: ta:laye opa watle hamipame asiyama mani tlo hampuame Taiya dle so watle hamiyo. Yosep iye Saiples mo dla hallalo oplamipo. Epeleye Taiya dle sota ya: watle hi hale hamiyo, Banabas. Hi i dulu kokoye ya:mkale gadlalo oplami demama apopo.

## 5

### *Ananayas mate ya:llu Sapila mate yia: koko*

<sup>1</sup> Amasiyama oplami hale halaiyo, ya: hiye Ananayas, epo ya:llu hiye Sapila. Yia: mape yia: ta:la ipi yemalaye opa watle hamipame asiyama mani haiyo. <sup>2</sup> Epo puame aya dla yia:ta madipata esepo mani seme hemele himipo mani seme tlo Ananayasta Taiya dle so dla hampuaiyo.

<sup>3</sup> Epalati Pitata Ananayas watle epo atlaiyo, “Wa: adipalati Saitenta wa:ta malamale dla oko ha di? Epo adipalati God ya: Hela:dle Soko dla elemala natimama wa: ta:la mani seme hemele himi? <sup>4</sup> Ta:la iye opa watle pohamilalo haluwaye eta wolë haluwapo. Epame wa:ta opa watle ta:la hamipame asiyama mani hauwaye mani e ma wolëpo. Epedeme wa: mani e mate wa:ta solotamale koko halowe ka:pipo. Ame adipalati wa:ta mani seme wa: aya dla hemele himiliye di watle po-atlalo, ma isikimi atlemama ‘na: mani hapuloma mepo hampua,’ di? Epedeme wa: hatlo dia: dla pomala-atlana, amasiyama wa: God dla mala-atlalepo,” diyo.

<sup>5-6</sup> Epo atlale oloma edla Ananayasta yu i dalepo powame teyuiyo. Ya: powame ellati kiptalota matime tlukata ya: moto polupo hamtame ta:la muwalepo hamatiyo. Epalati opa koko i dalle sota sikemte wowota:iyo.

<sup>7</sup> Amasiyama Ananayas ya:llu Sapila koko edla woyamaleye podallalo wekiyo. Epapeleye ya: alotle sali inoma dapahatlope mo-pokadepo hallati Pita wolo hala dla puaiyo. <sup>8</sup> Epalati Pitata ya: watle epo atlaiyo, “Na: watle atlane, wua:ta ta:laye opa watle hamipame mani hauwaye asiyama me-isowapa?” diyo. Epalati Ananayas ya:lluta asiyama epo atlaiyo, “Yao, mani dita hauwaye me-epo,” diyo.



<sup>9</sup> Amasiyama Pitata epo atlaiyo, “Adipalati wua:ta madipatata God ya: Hela:dle Soko dla elemala natilowedeme solotamale himi? Wa:natine, kiptalo wa:wolali hamatili soye kokoloma dla ha:ha:po. Ma hatlo yia:tapo wa:ta polati hamatilipe,” diyo.

<sup>10</sup> Epo atlale oloma medla Ananayas ya:lluye powame Pita hete sitali dla teyuiyo. Epalati kiptalota puame natitepo mo-powame ellati ya: motoye hamtame ya:wolali wabasi seme dla hamatiyo. <sup>11</sup> Epalati mikadepe dle so opa hapuloma mate epo opa koko i dalle so mate sikemte wowota:iyo.

### *Taiya dle sota ulugiyemale koko patoto halomale*

<sup>12</sup> Taiya dle sotapo ulugiyemale koko patoto opa dulu dla sikemte halomsiyamaiyo. Epalati mikadepe dle so hapulomatapo Solomon potopali dla yimkata puame alumdiyo.

<sup>13</sup> Epalati pomikadepe dle sota yia: natipame yia:ye koko ka:pi demdiyo, amasiyama yia:ta yia: mate hatlo alumolowe wowota:mdiyo. <sup>14</sup> Epapele tlope alila hapuloma dulu dla opa mate wola: mate Lod dla mikadepe depame mikadepe dle so alumale mate hatlope demdiyo. <sup>15</sup> Taiya dle sota ulugiyemale koko halomsiyamale natipame opa hapulomata esusulumale so hapuloma hohopo puame api duka dla yia: wa:ya yiyalepo ipila:mtamdiyo. Adipalati, Pitata tamama salita ya: dla domale ya:nasamata kukomama yia: ka:ka:dlepo depame.

<sup>16</sup> Epalati Yelusalem mateka:pi dla mo yimlala popa:mtale sota esusulumale so mate epo bataliya watalo so mate hohopo pumhalemdiyo. Epalati Taiya dle sota yia:ye ka:ka:demdiyo.

### *Taiya dle sota Yesu koko dla wotiyalle halë*

<sup>17</sup> Taiya dle sota ulugiyemale koko i halomsiyamalati aiyalma aya dokopala oplami mate epo yimkadulo Sa:dusi so opa mate koko i natipame Taiya dle so watle sikemte allimama elle pato himha:ha:iyo. <sup>18</sup> Epammama yia:tapo Taiya dle soye amtuwale aya dla ka:ka:timaiyo. <sup>19</sup> Amasiyama utula:la edla Lod ya: banakaka oplamita malame amtuwale aya kokoloma gowaladiyo. Epame Taiya dle soye amtuwale aya tle alikili dla hohopo tame halemama yia: watle epo atlaiyo, <sup>20</sup> “Wua: aiyalma aya dla tame opa watle pasakalo amko koko iye atlamaiye,” diyo. <sup>21</sup> Epalati Taiya dle sota ya: yu dla mikadepe depame utulalati sali ala matamhallati aiyalma aya dla tuwame Yesu koko imolowe kotiyamaiyo.

Epapalati aiyalma aya dokopala oplami mate Sa:dusi so mate Taiya dle so koko dla esemolowedeme Yu so dokopala so hapuloma sisilamaiyo. Epame yia:ta amtuwale aya omha:ha:lalo so watle yu hamiyo, Taiya dle so elempulupo depame. <sup>22</sup> Amasiyama opata yu hamtame natilati Taiya dle soye amtuwale aya dulu dla hawa halaiyo. Epalati yia: ma ilamtame dokopala so watle epo atlaiyo, <sup>23</sup> “Di tame amtuwale aya natilati kokolomaye sikemte himomelle hala, epame omha:ha:lalo soye alikili tle me-omha:ha:la nati. Amasiyama di kokoloma gowaladepame aya dulu tuwame natilati opa ewoloye hawa hala,” diyo.

<sup>24</sup> Amasiyama aiyalma aya dokopala so mate epo aiyalma aya alikili tle omha:ha:lalo so yia: dokopala oplami mate koko i dalepame sikemte momalamaiyo, ma-alotle apa kokota woyamolowe depame.

<sup>25</sup> Epalati oplami haleta puame yia: watle epo atlaiyo, “Natiya, wua:ta opa amtuwale aya dla ka:ka:timuwaye, ma tame aiyalma aya dla opa imha:ha:po,” diyo. <sup>26</sup> Epela dalepame aiyalma aya alikili tle omha:ha:lalo so yia: dokopala oplamita ya: opa mate Taiya dle soye ma hohomala taiyo. Yia: tame yia:ye hohopolle mate pohohomaiyo. Adipalati, asiyama mo sota ma yia:ye allimama ewala mate potimalala depame.

<sup>27</sup> Amasiyama yia: isikimi Taiya dle soye hohopame puame dokopala so mila:pi tle ipila:iyo. Epalati aiyalma aya dokopala oplamita yia: watle epo atlaiyo, <sup>28</sup> “Di wua: watle yu itiyamale mate ipo hamiwapo, ‘Wua: matle Yesu hi mate imsiyamama koko

opi halomsiyamiyo,' duwapo. Amasiyama wua: di yu pohana. Epedeme wua: natiya. Wua:ta imale kokotapo Yelusalem mo patoye ma-hauwapo. Epame wua: Yesuta powale kokoye ma dia: dla gudlowedeme apopo," diyo.

<sup>29</sup> Amasiyama Pita mate Taiya dle so opi mate asiyama epo atlaiyo, "Di Godta solotamale koko tlo hamsiyama, amasiyama opata solotamale koko pohalowa. <sup>30</sup> Adipalati, wua:tapo Yesuye dali yekelehmihili di dla gogodepame yumuwapo. Amasiyama di mamadulo Godta wua:ta yumuwa Yesuye powale tle ma pasakalo duwapo. <sup>31</sup> Epedeme Godtapo Yesuye powale tle ma pasakalo depame ya: dowala tiyama dla pamoluwapo, ya:tapo dokopala halemama pasakalo gadlalo oplami hallepo depame. Epapedeme hatlo ya: dla itiyamale elapo, Isalael so hapulomata yia:ta malamale meyeloje depame yia: bobtalimale tle heheletimalati ya:tapo yia: bobtalimaleye howahapo weliloweje. <sup>32</sup> Epapedeme di koko hapuloma iye Yesuta halomsela:le mate epo ya: dla woyamuwa koko mate bidulo tlapame ma opa dla atlamsiyamapo. Epame Hela:dle Soko dia: dulu dla hala mape koko hema mikadepe yu atlapo. Ame adipalati, Godta ya: Hela:dle Sokoye isikimi ya: yu dla salladepo siyamalalo so dla halopimhalapo."

<sup>33</sup> Epalati Yu so dokopala sota koko i dalepame sikemte siyalasiyalademama Taiya dle soye potimolowe solotamaiyo. <sup>34</sup> Amasiyama yia: dulu dla Pa:lisi oplami hale ya: hi Gamaliyel demdeta sila:time halemama Taiya dle soye aseka alikili dla elemtaiya diyo. Epedeme oplami iye opa hapulomata ya:ye ka:depo aiyalma imalalo oplami demama ya:ye di dla pamelemdiyo. <sup>35</sup> Epapeleye ya:tapo dokopala so watle epo atlaiyo, "Isalael so, wua: opa iwolo dla koko halowedeme woloma koko momalapo apiye. <sup>36</sup> Adipalati, wua: malamaiya, ka:yapa oplami hale Teudasta ipapele koko hamama ya:skamu ya:ye pato duwapo. Epame 400 opata ya: mate ma siyamuwapo. Amasiyama opata ya:ye yumulati ya: mate siyamalalo so 400 opaye potauwapo. <sup>37</sup> Epame ya: ko tle gamani sota opa hi halomsiyamale oloma edla oplami hale Yudas, Ga:lili dla hallalota moyoyamuwapo. Ya: mape ya:skamu pato depame opa elemsela:uwapo. Amasiyama opata ya:ye yumulati ya: mate siyamalalo so hapulomata potauwapo. <sup>38</sup> Epedeme na: koko i malapame wua:ye atlema, opa iwolo watle koko hale hamiya. Adipalati, yia:ta koko halomsiyamaye oplami tle puana dlepiye, koko ita pa:lepe. <sup>39</sup> Amasiyama yia:ta koko halomsiyama iye God tle puma dlepiye, koko ita pogudlowa. Epedeme wua:ta yia:ye humatlepiye, yia: podallowa. Amasiyama wua: isikimi God mate opahale demama apelepe," diyo.

<sup>40</sup> Epalati dokopala sota Gamaliyel yu dla mikadepe diyo. Epame yia:tapo Taiya dle soye ma elemumulaiya, diyo. Epo Taiya dle sota mo-puame ha:ha:liti yia: opa watle hohopoliya, diyo. Epame hohopolepo gudepame dokopala sota yia:ye ma-taiya demama epo atlaiyo, "Wua: matle Yesu hi mate imsiyamiyo," diyo.

<sup>41</sup> Taiya dle sota yia:ta Yesu dla mikadepe dle kokota wotiyalle ha natipame matamalemama sisiyemtamalaiyo. <sup>42</sup> Epame yia: alila hapuloma aiyalma aya dulu dla epo opa aya dulu dla opa watle ka:dle yuye imsiyamama Yesuye Godta sale Kelisopo dloweje poka:liyo.

## 6

### *Dikon so 7 ka:yapa hohomale*

<sup>1</sup> Alila oloma edla mikadepe dle sota mo-pasatamtaiyo. Amasiyama mikadepe dle so dulu dla Guliki yu yuhalalo sota Hibulu\* yu yuhalalo so mate yu topuloliyo. Adipalati, yia:ta alumale dulu dla daya alemtamama Guliki yuhalalo so sepeyamataloye daya pase pasatale halomdiyo. <sup>2</sup> Epalati Taiya dle sota mikadepe dle so hapuloma sisilapo epo atlaiyo, "Di poka:dena, God yu atlamsiyama i meleme matle sepeyamatalo so daya ilimsiyamoloweje. <sup>3</sup> Epedeme wua: dulu dla yimkadulo gadlalo so 7 hohomaiya.

\* **6:1:** Hibulu yu iye Yu so yia: yu ikadepepo.

Wua:ta yia: hohomelepiye, woloma ka:ka:dle so God ya: Hela:dle Sokota poposatilimale tlo hohomelepe. Epame dita opa iwoloye yimkadulo gadlowe oko dla hatitimolowepo.

<sup>4</sup> Amasiyama dia:ye isikimi God yu atlamsiyamama inoma sumsiyamolowepo,” diyo.

<sup>5</sup> Epalati mikadepe dle so hapulomata yu i dalepame ka:pi demama opa 7 iwolo hohomaiyo, Stiben (oplami iye mikadepe dle kokalle halemama Hela:dle Sokota pasatepo halaiyo) epo Pilipi epo Plokolos epo Nikanol epo Timon epo Palmenas epo Antiyoka oplami Nikolas. Nikolas iye po-Yu oplami, amasiyama ya:ta Yu so God dla mikadepe dle koko tle Yu oplami hi haiyo.

<sup>6</sup> Yia: opa 7 iwolo hohopame Taiya dle so hala dla elempuaiyo. Epalati Taiya dle sota opa iwoloye dokopala dla hohopo inoma sumaiyo.

<sup>7</sup> Epalati God yuta opa dulu dla ellati mikadepe dle sota Yelusalem mo dulu dla pasatamtaiyo. Epame God ka: epo opa ka: duka dla ha:ha:lalo so opi mape Yesu dla mikadepe dlalimaiyo.

### *Opata Stiben yumuluwedeme hamale*

<sup>8</sup> Godta Stiben mate halemama ya: watle itiyamale pato hamiyo. Epalati ya:tapo opa dulu dla sela:mama ulugiyemale koko patoto halomsela:iyo. <sup>9</sup> Amasiyama Yu so opa opi, Libetini inoma sumalalo aya dla ha:ha:lalo sota ya:ye eliyo. Opa iwoloye Kulene dla ha:ha:lalo sopo, epo opiye Alesendiliya dla ha:ha:lalo sopo, epo opiye Kilikiya dla ha:ha:lalo sopo, epo opiye Asiya dla ha:ha:lalo sopo. Opa iwolota puame Stiben mate yu topuloliyo. <sup>10</sup> Amasiyama yia:ta yu topulolle dulu dla Stibenta Hela:dle Sokota itiyamale tle yukamama opa iwolota yuhalowe api pa:iyo.

<sup>11</sup> Epalati Stiben mate yu topulolle sota ma hemele tame opa opi ha:ha:limaiyo, yia:ta Stiben hi mate mala-atlamelepo depame. Epalati opa ewolota tame ma mo so dla epo atlamsiyamaiyo, “Di Stibenta batalimale yu God hi mate epo Moses hi mate edla atlamsela:la daluwa,” demyaiyo. <sup>12</sup> Epame opa hapuloma mate epo Yu so dokopala so mate epo aiyalma imalalo so mate yu i dalepame sikemte siyalasiyalademama Stiben hamaiyo. Epame yia: Stiben hamame dokopala sota esemale dla seme hetaiyo. <sup>13</sup> Yia: edla hetame ha:ha:lati Stiben koko dla mala-atlamalalo sota epo atlamiyaiyo, “Oplami iye di aiyalma ayaye sikemte batalipo atlemde, epo Mosesta aiyalma hatitimale koko dla sikemte batalipo atlemde. <sup>14</sup> Epame di ma ya:ta ipo atla daluwa, ‘Yesu Nasalet oplamita di aiyalma ayaye dokostepo ma Mosesta aiyalma hatitimaleye ma meyelope dlepe’ dla daluwa.”

<sup>15</sup> Epalati dokopala so hapulomata ma Stiben watle ompopa:mama natilati Stiben mila:pita God ya: banakaka oplami mila:pi some halla natiyo.

## 7

### *Stibenta yu pato atlale*

<sup>1</sup> Epalati aiyalma aya dokopala oplamita Stiben watle epo atlaiyo, “Opata wa: watle atlamiyale koko iye ikadepeta:?” diyo.

<sup>2</sup> Stiben asiyama dokopala so watle atlemama ipo atlaiyo, “Bapadulo epo adulo, wua: na: yu daliya. Di pato Godta di mama A:iblaham watle woyamuwapo, ya: ala Halan mo dla potlalo Mesopotamiya mo dla hallati. <sup>3</sup> Epedeme Godta A:iblaham watle epo atluwapo, ‘Wa: mo mate wa: opa mate melepame na:ta wa: watle mo nati-iliwe dla tane,’ duwapo. <sup>4</sup> Epalati A:iblahamta Mesopotamiya meleme ma Halan mo dla halla tauwapo. Epapeleye A:iblaham ya: ata polati Godta A:iblahamye ma wata wua:ta ha:ha: mo hema sempuwapo. <sup>5</sup> God epame A:iblaham watle mo hema ta:la hale pohamina. Amasiyama Godta A:iblaham mate yu itiyamale me-himiwapo, ya: mate epo ya: mamadulo mateta alotle ta:la i halowe. A:iblaham ya: ala maseyemala pohimilalo hallati yu i himiwapo.

<sup>6</sup> Epame matle Godta ya: watle epo atluwapo, ‘Wa: mamadulota asepe so some mo hale dla tame ha:ha:lepe. Epalati mo sota yia:ye asiyama pa:le oko pato dla

hatitimelepe. Epalati yia:tapo wotiyalle dulu dla ha:ha:mama 400 sokomoko polollepe. <sup>7</sup> Amasiyama na:ta wa: mamadulo watle wotiyalle hapimha:ha: so watle asiyama wotiyalle hamilowepo. Epalati wa: mamadulota mo e melepame ma hema puame na: dla siyele hapimha:ha:lepe,' duwapo.

<sup>8</sup> Epame Godta A:iblaham mate yu itiyapo himimama epo atluwapo, 'Na:tapo wa: mate epo wa: mamadulo mate wua: God halemama wua: mateka:pi dla hallowepo. Epalati asiyama wua:ta na: dla mikadepe dle koko nati-imama wa: mate epo wa: akimlala mate epo wa: mamadulo hapuloma alotle ha:ha:lowe so mate kapala kotimha:ha:lepe,' duwapo. Epedeme A:iblahamta maseyemala Aisek hampame alila 8 pololepo hallati kapala kestauwapo. Epame alotle A:iblaham yami Aisekta maseyemala Yokob hampame ya: kapala ma kestauwapo. Epame alotle Yokob mape ya: akimlala 12 ma kapala kotimuwapo. Epeleye Yokob ya: akimlala 12 ewolotapo di elele 12 sitali ha:ha:po.

<sup>9</sup> Epapeleye Yokob ya: akimlala iwolota yia: ei Yosep sikemte elemduwapo. Epamama yia:ta yia: ei Yosepye Isip so watle semtlepo depame asiyama mate hamame iwapo, ya:tapo edla tame asiyama pa:le oko pato dla hallepo depame. <sup>10</sup> Amasiyama Godta ya: mate halemama wotiyalle koko dulu dla ya: sikemte gademduwapo. Epame Godta Yosep watle ka:dle malamale pato hamiwapo. Epeleye Isip so dokopala oplamita koko i natipame Yosep sikemte solotamduwapo. Epammama ya: watle epo atluwapo, 'Wa:tapo na: isili tle oko hamhalemama Isip mo pato wa:ta omhallepe. Epame na: aya mape omhallepe,' duwapo.

<sup>11</sup> Epame Isip mo mate Keinan mo mate edla sali silaple patota elemama dayata pa:uwapo. Epalati opa edla ha:ha:le soye dayata pa:lati wotiyalle dulu dla ha:ha:uwapo. Epame di mamadulo mape daya dimi ha:ha:uwapo. <sup>12</sup> Amasiyama Yokobta Isip dla daya elale dalepame ya: akimlalaye taiya duwapo, daya halepo depame. Epalati yia:ta tame daya halopo pumuluwapo. <sup>13</sup> Yia: daya halopo pumulaleye mo-pokadlati matle Isip dla daya halomala tamaluwapo. Yia: tame daya halowedeme ha:ha:lati Yosepta ya: bapadulo watle ya: koko botomastauwapo. Epalati Isip so dokopala oplami mape Yosep ya: asiyadulo koko daluwapo. <sup>14</sup> Epalati Yosepta yu hamiwapo, ya: a Yokob mate epo ya: asiyadulo mate puame Isip mo dla ha:ha:lepo depame. Epela dalepame yia:ta hapuloma 75 sota pumuluwapo. <sup>15</sup> Epedeme Yokobta Isip mo dla tame halemama ya: mate ya: akimlala mate medla paliwapo. <sup>16</sup> Alotle yia:ta pallati yia: motoye Sekem mo dla hatiliwedeme halopo tauwapo. Epedeme popliyele ta:la iye amka:yapa A:iblahamta Hamol ya: akimlala watle asiyama mate hauwapo.

<sup>17</sup> Alotle Godta A:iblaham watle ta:la hamilowe yu itiyamale himilita mateteka:mpulati di mamadulo Isip mo dla ha:ha:le sota ma-pasatamtauwapo. <sup>18</sup> Epalati dokopala oplami amko Yosep koko yeliyeleta Isip mo omhaluwapo. <sup>19</sup> Dokopala oplami ita di mamadulo sikemte alimama yia: dla elemale mate wotiyalle hapimhaluwapo. Epammama ya: yu itiyamale tle di mamadulo yia: owayimlalaye pallipo depame hohopo tame moku dla hatitimduwapo.

<sup>20</sup> Epamha:ha:le oloma edla a:ya hale owayemala ka:pi hamuwapo, ya: hiye Moses. Amasiyama mama dapahatlope dulu dla Mosesye hemele ya: a aya dulu dla ya: wai mate haluwapo. <sup>21</sup> Epame mama dapahatlope mo-pokadlati moku dla himiwapo. Epalati Isip dokopala oplami yotita ya: natipo hampame ya: maseyemala depo nomopi iwapo. <sup>22</sup> Epalati Mosesta ta:lati Isip sota ya:ye sukulu malamale ka:dle imuwapo. Epame ya:ta yukamale mate epo motota koko halë mate itiyamale pato halemduwapo.

<sup>23</sup> Epame Mosesta 40 sokomoko halale oloma dla ya: solotamuwapo, tame ya: opa Isalael so natilowedeme. <sup>24</sup> Ya: tamama natilati Isip oplami haleta Isalael oplami haleye yumhalla natipame ya:ta asiyama Isip oplami tlo yumuwapo. <sup>25</sup> Epame Mosesta epo malamduwapo, 'Na:ta Isalael soye wotiyalle dulu tle alikili a:ma eleme woyamelepe,' demduwapo. Amasiyama Isalael soye koko e pomalaha:ha:na. <sup>26</sup> Ma alila haleta

Isalael so opa dapiyamteta nalatimha:ha:lati natipame yia: hohomolowedeme tuwame epo atluwapo, 'Namkadulo, wua: adipalati nalatimha:ha:ma:? Wua: mo hatlope sopo,' duwapo. <sup>27-28</sup> Epalati oplami hale ya:mkale yumhalaleta Moses polokodemama epo atluwapo, 'Wa: di dokopala oplamita:? Eta di humatlaye. Wa: Isip oplami hale tatla yumuwapo. Epedeme wa: na: ma yumula puo?' duwapo. <sup>29</sup> Epalati Mosesta yu i dalepame wota:mama Isip mo tle ma Midiya mo dla teletauwapo. Epame Midiya mo dla asepe oplami some halemama a:ya hapo akimlala dapiyamte hatitimuwapo.

<sup>30-31</sup> Moses Midiya mo dla tame sokomoko 40 pololepo halemama matle Sainai tamali kikiwi isili dla tame sela:mama natilati dali upa asiyale dulu dla dlapata ullumhalla natipo sikemte yeluwapo. Amasiyama dlapa dulu edla God ya: banakakata haluwapo. Epapeleye Moses ya: solotamuwapo, dlapaye kulume tuwame natilowedeme. Ya: epo tumhallati Lodta ya: watle epo atluwapo, <sup>32</sup> 'Na:ye wa: mamadulo A:iblaham epo Aisek epo Yokob yia: Godpo,' duwapo. Epalati Mosesta wota:le mate esesalalimama matle ponatina. <sup>33</sup> Epalati Lodta ya: watle ma epo atluwapo, 'Ta:la wa:ta halaye aiyalmapo. Epedeme wa: hete alisisi uptimane. <sup>34</sup> Na: na: opata Isip mo dla wotiyalle hamha:ha:ye ma-natiwa. Epame yia:ta wotiyalle dulu dla ha:ha:mama a:lemha:ha:uwaye ma-daluwa. Epalati yia: eleme Isip mo tle alikili a:ma woyamolowedeme mala. Epedeme na: wata wa:ye Isip mo dla ma ilamtane dema.'

<sup>35</sup> Epedeme Moses iye ka:yapa Isalael sota allimama, 'Wa: pta di dokopala oplamita:?' duwapo. Epeleye Godta Moses hatlo me-iye mo-sauwapo, ya:tapo Isalael so dokopala oplami halemama yia:ye wotiyalle dulu tle alikili a:ma eleme woyamelepo depame. Epapedeme dali upa asiyale dulu dla dlapata hamdemhalemama Godta ya: banakaka oplami tle koko i atluwapo. <sup>36</sup> Epedeme Mosesta ya: opa Isip mo tle eleme woyamolowedeme ulugiyemale koko patoto Isip mo dla epo Omteka:pele Kaula dla halomuwapo. Epame ya: opa Isalael so eleme Isip mo tle alikili dla woyamuwapo. Epo ya:tapo dalupa dulu dla ya: opa eleme sokomoko 40 dulu dla sela:mama ulugiyemale koko patoto opi halomsela:uwapo.

<sup>37</sup> Epedeme Moses hatlo me-ita ya: opa Isalael so watle epo atluwapo, 'Godta wua: yilo wua: dulu tle ya: yu molo atlalo oplami hale na: sepele hulumelepe,' duwapo. <sup>38</sup> Epame Moses hatlo me-ita di mamadulo mate dalupa dulu dla sela:uwapo. Ya: epame Sainai tamali di dla hetame hallati Lod ya: banakakata ya: mate yukamhalemama ya: watle pasakalo yu hapiwapo. Epalati ya:tapo ma di watle hapiwapo.

<sup>39</sup> Amasiyama di mamadulota Moses allimama ya: yu dla posalladena. Epame yia: solotamuwapo, Isip mo dla ma ilame tlowedeme. <sup>40</sup> Epammama Moses ala tamali di dla me-hallati opata Moses ya: bapa A:lon watle epo atlamyeuwapo, 'Mosesta dia:ye Isip mo tle elempuwapo. Amasiyama di podimalamana, ya: hadima tauwo? Epedeme wa: di elemtlowe godye mita:pene,' demyeuwapo. <sup>41</sup> Epapele tle Isalael sota biskapa god aliya sepele yia: dota mita:puwapo. Epo yia:ta biskapa god mita:ple mogudlati sisiyele pato mate ya: hi di dla ta:demama daya douwapo. Epame ya: dla siyele hamimama aliya halo poyuwapo. <sup>42</sup> Epalati Godta koko i natipame alimama yia: tle kostauwapo. Epapele dulu dla yia:ta omapla di dla popa: alisisi tamili epapele mate epo sali epapele mate dla god some yia: dla sisiyemha:ha:lati Godta yia:ye pohumatlana. Epedeme God tle yu hapame molo atlalo oplami haleta koko hema ipo atluwapo, 'Isalael so, wua: daliya.

Wua: dalupa dulu dla sokomoko 40 dulu dla siyamama

na: watle namkale dle alisisi mate epo aliya mate poyupo halopimduwa?

Hao. Wua: na: dla pohapimdena.

Amasiyama wua: biskapa god dla hapimduwapo.

<sup>43</sup> Epame wua: aiyalma aya tlukata halëye momka:tipo siyamduwapo.

Epo wua:ta aya dulu edla siyele ta:demduwaye, na: dla pa-amdena.



Amasiyama wua:ta dota mimita:ple biskapa god Molok mate Lekan mate dla amm-duwapo.

Epedeme na:tapo wua:ye wua: mo ikadepe tle ma mo pateka:mu Babilon seme a:ma dla dodolomsallowepo,' duwapo.

<sup>44</sup> Epedeme aiyalma aya tlukata halë iye Godta Moses watle hane duwapo. Epalati opata God yu tle dolumama aya e hauwapo. Epame di mamadulota dalupa dulu dla aiyalma aya i hamsiyamama 'Godta dia: mate halema,' demduwapo. <sup>45</sup> Epame alotle ma Yosuwata di mamadulo eleme mo i hala pumama aiyalma aya e mate hampuwapo. Epalati Godta di mamadulo gademama mo so hapulomaye mo itle alikili dla posaluwapo. Epo yia:ta mo hema aiyalma aya tlukata halë e mate hame ha:ha:mama Deibidi oloma dla puame umuwapo. <sup>46</sup> Epame Godta Deibidiye sikemte bokotiyapo malamhaluwapo. Epalati Deibidita aiyalma aya amko haloweye God watle dalla natiwapo. <sup>47</sup> Amasiyama aya amko ikadepeye ya:ta pohana. Ya: maseyemala Solomonta hauwapo.

<sup>48</sup> Epapele tlope di pato Godye opata dota halë aya dla pohalase mde. Epedeme God tle yu hapame molo atlalo oplamita God koko dla epo atluwapo,

<sup>49</sup> 'Pepele dimoye na:ta polomama ompollalo mopo.

Epame ta:lamo patoye na: heteta kellepo pollalo mopo.

Epedeme wua:ta na: aya halowe ka:deta:?

Epame wua: dla itiyamale elema:, na:ta hedepo pollowe mo dinapoloweye?

<sup>50</sup> Amasiyama wua: malamaiya,

koko hapulomaye na:ta mimita:puwapo,' duwapo."

<sup>51</sup> Stiben ya: yu mosukulu dla ma dokopala so watle epo atluwapo, "Wua: dupa kokalalimale sopo. Epedeme wua: dupa dulu dla mikadepe dle hawapo. Epame God yu dallowe dla molo hihimomale sopo. Epedeme wua: mamadulota Hela:dle Sokota imale allimama hamastauwaye, wua: ma mepammama Hela:dle Sokota imale allimama hamastapo. <sup>52</sup> Epame wua: mamadulota Hela:dle Sokota imale allimama God tle yu hapame molo atlalo so opa hapulomaye wotiyalle hapiwapo. Epammama God tle yu hapame molo atlalo so opita atlemama 'Ka:dle Oplami Kelisoye alotle pulupe,' dlati wua: mamadulota opa ewoloye mo-potimuwapo. Epapele dulu dla Ka:dle Oplami Kelisoye mo-puwapo. Amasiyama wua:ta ya:ye elemama ya: yumuluwedeme yu ka:depame mo-yumuwapo. <sup>53</sup> Epo wua:tapo God ya: banakaka sota Godta aiyalma hatitimale wua: watle hapilati wua:ta e podolumalalo hamastauwapo."

### *Stiben yumili*

<sup>54</sup> Epalati dokopala sota Stiben yu dalepame sikemte siyalasiyalademama yia: a:pe tetekelalimyaiyo. <sup>55</sup> Epapalati Stibenta Hela:dle Sokota pasatlati Pepele di dla natitepo Godta hela:dle dulu dla Yesuta ya: A dowala tiyama dla halla natiyo. <sup>56</sup> Epalati dokopala so watle epo atlaiyo, "Natiya. Na: Pepele dimo kokolomaye gowalastepo ellati Opa Yamita God dowala tiyama dla halla natima," diyo.

<sup>57</sup> Epalati yia:ta hapulomata sikemte siyalasiyaladepame Stiben yu dla dalla allimama molo hihimapo puame yu teta:le mate Stiben hamaiyo. <sup>58</sup> Epo yia:tapo Stibenye mo dulu tle hamame tame pamelepo ewalata kelemolowe kotiyamaiyo. Epapalati Stiben koko dla mala-atlamyale sota yia: ma ewalata Stibenye kelemolowedeme yia: kapumale tlukaye uptipame oplami hale ya: hi Sol demde hete sitali dla kolumaiyo. <sup>59</sup> Epame opa hapulomata ya: watle ewalata me-kelema:ha:lali Stibenta inoma sumama epo atlaiyo, "Lod Yesu, na: sokoye hamane," diyo. <sup>60</sup> Epame yia:ta Stibenye ala me-ewalata kelema:ha:lali ya:tapo ta:la dla teyume alumata kellepo polomama yu teta:le mate epo atlaiyo, "Lod, opa iwolo yia: batalimale iye howahapo hiyostane," diyo. Stiben yu i atlepame powaiyo.

## 8

*Opata mikadepe dle so dla alli*

<sup>1-3</sup> Sol edla halemama opa Stiben ewala mate kelemha:ha: so watle siyele yu atlemhailaiyo. Epame alotle mikadepe dle so opa opita puame Stiben motoye ta:la dla hamati-pame sikemte a:liyo.

Stiben yumili alila oloma edla Yelusalem dla ha:ha:lalo mikadepe dle soye opata siyalasiyalademama wotiyalle hapilowe kotiyamaiyo. Epalati Solta aya hapuloma dla hehetamsela:mama mikadepe dle so opa mate wola: mate hohopo tame amtuwale aya dla ka:ka:timdiyo. Epamhallati mikadepe dle so hapulomata Yelusalem tle pota-malemama mo opi hapuloma dla Yudiya mo dulu dla epame Samaliya mo dulu dla potamalaiyo. Amasiyama Taiya dle so hapuloma tlo Yelusalem dla pomeliyo.

*Pilipita Samaliya dla God yu atlale*

<sup>4</sup> Epalati mikadepe dle sota Yelusalem tle potame mo yimlala meyelope meyelope dle dla God yu atlamsiyamaiyo. <sup>5</sup> Epedeme Pilipita Samaliya mo dla tame woyapame Keliso kokoye opa watle atlamaiyo. <sup>6</sup> Epame Pilipita God yu atlepame ulugiyemale koko mate halomsela:lati natipame opata ya: yu woloma haiyo. <sup>7</sup> Dulu edla Pilipita bataliya yimlala opa dulu dla ha:ha:leye alikili a:ma dodolomsallati yia:tapo yu teta:le mate alikili a:ma u-ulapo tamalaiyo. Epame ya:tapo akoloyeyemale so mape ka:ka:diyo. <sup>8</sup> Epalati mo dulu edla opa hapuloma dla siyele patota elaiyo.

<sup>9-11</sup> Amasiyama Samaliya mo dulu edla osolo walle oplami Saimon halaiyo. Epapeleye alila hapuloma dulu dla ya: osolo mate ulugiyemale koko halomhalemama opa watle yiyelle halopimhalemndiyo. Epammama ya: solotamdiyo, ya:skamu ya: tlo ka:dena demama di dla hamhetlowedeme. Epalati opa hapuloma patoto mate epo yimlala yimka:sikili mate ya:ta ulugiyemale koko halomale natipame ya: yu dla heodepo salladepo siyamama Saimon watle epo atlemndiyo, “Oplami iye godpo. Ya: hiye Itiyamale Pato,” demdiyo.

<sup>12</sup> Amasiyama Pilipita God yu atlemama God ya: mo koko mate Yesu Keliso koko mate atlamsela:iyo. Epalati opa mate wola: mate ya: yu dla mikadepe dlati ya:tapo yia:ye yú dla ka:ka:timsela:iyo. <sup>13</sup> Epame osolo walle oplami Saimon i mape Pilipi yu dla mikadepe depame yú tulupo Pilipi mate sela:iyo. Epo sela:mama Pilipita ulugiyemale koko halomsela:lati natipame ya: sikemte yiyelemsela:iyo.

<sup>14</sup> Amasiyama Yelusalem dla Taiya dle so ha:ha:leta Samaliya sota God yu dalepo mikadepe dle kokoye dalepame Pita mate Yon mate Samaliya dla taiya diyo. <sup>15-17</sup> Epapele dulu dla Samaliya dla mikadepe dle so Yesu hi tle yú tutula:po ha:ha:leye Hela:dle Soko ala yia: dla potullalo halaiyo. Epalati Pita mate Yon mate Samaliya dla puame ha:ha:mama mikadepe dle so dla dota hohopo inoma sumalati Hela:dle Sokota yia: dla malaiyo.

<sup>18</sup> Epapalati Saimonta koko i natipame Taiya dle so watle mani hamimama epo atlaiyo, <sup>19</sup> “Na: ma solotama, na: dota opa hohopo inoma sumalati Hela:dle Sokota yia: dla mala demhallepo depame. Epedeme wua:ta itiyamale hamsiyamaye na: ma hamiya,” diyo.

<sup>20</sup> Amasiyama Pitata ya: watle epo atlaiyo, “Wa: mate epo wa: mani mate Dlapa mo dla telepe. Adipalati, wa:ta malamaleta Godta isikimi namkale dle tle Hela:dle Soko hapimhalaye mani mate hali dlepo. <sup>21</sup> Epedeme wa: dia: mate God oko yimkata halowe po-ala:na. Adipalati, God mila:pi tle wa: koko pta batalimana. <sup>22</sup> Epedeme wa: watapo wa:ta batalipo malampolaleye memelepame God dla inoma sumane. Epalati pona:malamana, ya:tapo wa:ta batalipo malamaleye howahapo hiyostlowe sepena,” diyo. <sup>23</sup> Epame Pita ma ya: watle epo atlaiyo, “Na: natima, wa: dupa dulu dla ya:mkale

elle pato ala me-elema. Epame batalimale kokota wa:ye dokopala depame wa:ye semsela:po,” diyo.

<sup>24</sup> Epalati Saimonta wota:mama ma Pita wolo watle epo atlaiyo, “Na: solotama, wua:ta dapiyamteta na: yilo Lod dla inoma sumelepo depame. Adipalati, wua:ta atlamale kokota na: dla powoyamalalo wekelepo depo,” diyo.

<sup>25</sup> Epo alotle Pita mate Yon mate Yesu kokoye opa dla atlapame matle Yelusalem dla tamama Samaliya mo yimlala opi dla opa watle God yu atlamtaiyo.

*Pilipita Itiyopiya oplami yú dla ka:stale*

<sup>26</sup> Alila haleta God ya: banakaka oplamita matle Pilipi watle epo atlaiyo, “Wa: sila:time Yelusalem tle Gasa dla tlalo api dla tane. Api eye haowo tiyama dalupa dulu dla elapo,” diyo. <sup>27-28</sup> Epalati Pilipita sila:time taiyo. Ya: api duka dla tamhalemama natilati Itiyopiya mo dla hallalo pato oplami hale aliya koa tle tamhalla natiyo. Oplami iye Itiyopiya dokopala a:ya Kandake mani omhalemidiyo. Epeleye ya: Yu so God dla mikadepe depo Yelusalem dla inoma sumala taleta ma api duka dla pumhalaiyo. Ya: api duka dla ya: aliya koa tle pumhalemama God tle yu hapame molo atlalo oplami Aisayata ilimale buka sesa:mpolaiyo. <sup>29</sup> Epalati Hela:dle Sokota Pilipi watle epo atlaiyo, “Wa: tame oplami ya: mateka:pi dla halane,” diyo.

<sup>30</sup> Epapalati Pilipita oplami mateka:pi dla kukulumtamama dallati oplamita Aisaya buka tle sesa:mpolla daliyo. Epalati Pilipita ya: watle epo atlaiyo, “Wa: wa:ta sesa:mpola yu ya: dulu kokoye wa: malamata:?” diyo.

<sup>31</sup> Amasiyama oplamita ya: watle epo atlaiyo, “Hao, ya: dulu koko pona:malamana. Adipalati, oplami haleta yu i ya: dulu kokoye na: po-imasemde,” diyo. Ya: epo atlepame ma Pilipiye ya: mate matame polane diyo.

<sup>32</sup> Epedeme ya:ta sesa:mpolale yuye ipo, “Ya:ye aliya halo some yumuluwedeme semtauwapo. Ya:ye sipi aliya dlalo kestlati woloma yu dimi hayeme elemdiye, epapele some eluwapo. Epammama ya: yu hale po-atlana.

<sup>33</sup> Opata ya:ye yimka:mala demama koko pa:le ya: dla poka:ka:dle kokoye halomyeuwapo. Epo ya:ye ya: elo dla hallowe pohatitimana.

Epame ta:lammo hema ya:ta hallowe pasakaloye mosukulu kestauwapo.”

<sup>34</sup> Epalati ya:ta Pilipi watle epo atlaiyo, “Na: atlane, God tle yu hapame molo atlalo oplami iye ana koko atlema:? Ya:skamu ya: koko atlema:, o oplami hale koko atlema:?” diyo. <sup>35</sup> Epalati asiyama Pilipita yu i dulu kokoye ya: watle imama ka:dle yu Yesu Keliso kokoye ya: watle atlaiyo.

<sup>36</sup> Yia:ta madipata tamalemama aloma yemala dla tame woyamaiyo. Epalati Itiyopiya oplamita Pilipi watle epo atlaiyo, “Wa: natine, aloma yemala ipiye. Epedeme na:ta yú tulluweye apata na: api himomelema:?” diyo.

[ <sup>37</sup> Pilipita asiyama epo atlaiyo, “Wa: dupa dulu dla mikadepe dle ellepiye, eta wa: yú tulluwe ka:dena,” diyo.

Epalati asiyama Pilipi watle epo atlaiyo, “Yao, na: Yesu Kelisoye God Yamipo demama mikadepe dema,” diyo.]

<sup>38</sup> Epalati Itiyopiya oplamita ya: koa hamsela:lalo oplami watle “koaye medla hedene,” diyo. Epame yia:ta madipatata tulume aloma dla ha:ha:mama Pilipita Itiyopiya oplamiye yú dla ka:staiyo. <sup>39-40</sup> Epame yia:tapo aloma tle matale oloma edla Lod ya: Hela:dle Sokota Pilipiye hamame mo hale pateka:mu Asotus dla tame pameliyo. Epalati Itiyopiya oplamita ma ya: ponatiyo. Epame ya:tapo tamama siyele mate ya: mo dla taiyo.

Amasiyama Pilipita Asotus mo dla woyapame God yu atlepo matle Kasaliya mo dla tamama mo yimlala hapuloma dla God yu atlamtaiyo.

## 9

*Yesuta Sol dla woyamale*

<sup>1-2</sup> Yelusalem dla Solta mikadepe dle so dla ala me-elle pato elemama yia:ye poti-molowa demdiyo. Epammama ya:tapo Damasko mo dla mikadepe dle so opa mate wola: mate hohopo Yelusalem dla elempuluwedeme aiyalma aya dokopala oplami natila taiyo. Epalati aiyalma aya dokopala oplamita ya: watle yu itiyamale ilimale hamimama epo atlaiyo, “Yu ilimale ita wa: watle itiyamale hamipo, wa:tapo Damasko mo dla tame Yesu dla mikadepe dle so hapuloma hohomelepo depame. Epedeme wa: tame Damasko dla Yu so inoma sumalalo aya dokopala so watle yu ilimale iye hamine,” diyo.

<sup>3</sup> Epalati Solta Damasko mo dla mikadepe dle so hohomolowedeme ma-taiyo. Ya: tame Damasko mo mo-mateka:pi dla hallati pakasiyamalalo pepele di tle hela:dleta tulume ya: dla haiyo. <sup>4</sup> Epalati Solye ta:la dla teyume elemama yu daliyo. Epame yuta ya: watle epo atlaiyo, “Sol, Sol, wa: adipalati na: watle wotiyalle hapimhalema:?” diyo.

<sup>5</sup> Epalati asiyama Solta epo atlaiyo, “Lod, wa: anata:?” diyo.

Asiyama yuta ya: watle epo atlaiyo, “Na:ye Yesupo. Wa:ta mikadepe dle so dla wotiyalle hapimhalaye, na: watle amhalapo. <sup>6</sup> Epedeme wa: sila:time Damasko mo dla tane. Epalati edla oplami haletapo wa:ta koko haloweye atellepe,” diyo.

<sup>7</sup> Epapalati opa Sol mate tale sota koko i natipame sikemte yiyeliyo. Yia: mape yu me-daliyo, amasiyama oplami tlo ponatiyo. <sup>8</sup> Sol ta:la tle sila:time inoma towanatitepo ya: inoma dapiyamteye kokowepo ha:ha:la natiyo. Epalati ya: mate tale so opa opita ya:ye Damasko dla tamama do dla hamame taiyo. <sup>9</sup> Sol inoma kokowepo Damasko dla tame halemama alila dapahatlope dulu dla daya mate yú mate podemhalaiyo.

<sup>10</sup> Amasiyama Damasko mo dulu dla mikadepe dle oplami hale halaiyo, ya: hiye Ananayas. Oloma edla Lodta Ananayas inomaye meyelope depame ya: mate yukamama epo atlaiyo, “Ananayas.” Epalati asiyama Ananayasta epo atlaiyo, “Lod, na: ipo,” diyo.

<sup>11</sup> Epalati Lodta ya: watle epo atlaiyo, “Wa: sila:time api hale ya: hi Dolle demdiye, etle tame Yudas aya dla hetame Talesas oplami Sol dalene. Ya: aya dulu edla God dla inoma sumpolomama wa:ye ompolapo. <sup>12</sup> Adipalati, na:ta ya: inomaye meyelope depame wa:ta puame wa: dota ya: hamalati ya: inoma ka:dloweye ya: watle ma-atla,” diyo.

<sup>13</sup> Amasiyama Ananayasta epo atlaiyo, “Lod, opa hapulomata oplami i ya: kokoye na: watle me-esemuwa. Epedeme ya:ta Yelusalem dla mikadepe dle so watle wotiyalle hapimduwaye, na:malamana. <sup>14</sup> Epapeleye aiyalma aya dokopala oplamita ya: watle itiyamale ma-hamilati Damasko dla mikadepe dle so hohopo ma Yelusalem dla elemt-lowedeme pualepo,” diyo.

<sup>15</sup> Amasiyama Lodta Ananayas watle epo atlaiyo, “Mepele tane. Adipalati, na:ta Solye ma-hamuwapo, ya:ta na: yu hamsela:lalo oplami hallepo depame. Epedeme ya:tapo po-Yu so dla epo yia: dokopala so patoto dla epo Yu so hapuloma dla na: kokoye botomastlepe. <sup>16</sup> Epo na:tapo ya:ta na: hi tle wotiyalle pato haloweye ya: watle nati-iliwepo,” diyo.

<sup>17</sup> Epalati Ananayasta tame Yudas aya dla hetame Solye ya: do mate ummama epo atlaiyo, “Namkale, Lod Yesu wa:ta api duka dla pumhalemama natiwaye, eta na: tane de. Epo ya:tapo wa: inoma ka:depame ma Hela:dle Sokoye wa: dla hamili de,” diyo.

<sup>18</sup> Oloma edla amalo kapa sepeleta Sol inoma tle teyulati ya: inoma kokoweleta ma ma-ka:diyo. Epalati Ananayasta ya:ye semtulume yú dla ka:staiyo. <sup>19</sup> Epame Solye daya depame itiyamale ma-haiyo.

*Solta Damasko dla God yu atlale*

Epame alila opi dulu dla Solta mikadepe dle so opa opi mate Damasko dla halaiyo. <sup>20</sup> Edla halemama yia:ta inoma sumalalo aya dla hetame God yu atlowe kotiyamama ipo imaiyo, “Yesuye God Yamipo,” diyo.

<sup>21</sup> Epalati opa hapuloma yu i dalle sota yiyelepame epo atlamyaiyo, “Oplami ita Yelusalem dla halemama opata Yesu hi dla mikadepe dlati yia: dla wotiyalle hapimduwapo. Epame aiyalma aya dokopala sota ya:ye tane dlati ya:tapo mikadepe dle so hema ha:ha:ye hohopame Yelusalem dla tlowedeme puwapo,” demyaiyo.

<sup>22</sup> Epapalati Sol dla God yu atlowe itiyamaletapo sikemte pato diyo. Epammama ya:ta Yesuye Godta sale Kelisopo depo imalati Yu so Damasko dla ha:ha:lalo sota asiyama yu atlowe malamale hawa halemndiyo.

<sup>23</sup> Epame alila opi alotle Yu sotapo Sol yumuluwedeme yu ka:diyo. <sup>24</sup> Yia:tapo mo alikili kosukulli kokoloma dla Solye hamame yumuluwedeme alila mate epo utula:la hapuloma mate ompopa:mdiyo. Amasiyama Sol ya: koko i ma-daliyo. <sup>25</sup> Epalati Sol yimkadulota ya: gademama utula:la hale dla Solye hamame tame yekalo dulu dla hamatipo mo kosukulli di tle alikili a:ma halumtuluiyo, ya:tapo teletlepo depame.

<sup>26</sup> Epalati Solta Yelusalem dla puame mikadepe dle so edla ha:ha:le mate hatlope dlowedeme apalati yia:ta ya:ye wowota:iyo. Adipalati, yia:ta Solta Lod dla mikadepe dle kokoye pase mikadepe diyo. <sup>27</sup> Amasiyama Banabasta ya:ye gademama Taiya dle so watle Sol semtame epo atlaiyo, “Lodtapo Solye Damasko api duka dla tamhallati woyapame ya: watle yukamaiyo. Epalati Solta mikadepe depame Damasko dla itiyamale mate God yu Yesu Keliso koko atloweye powota:iyo,” diyo.

<sup>28</sup> Epame Solta mikadepe dle so mate Yelusalem dla halemama mo dulu edla God yu sikemte itiyamale mate atlemsela:iyo. <sup>29</sup> Epammama ya:ta Guliki yuhalalo Yu so mate Yesu koko dla yu topulolemdiyo. Epapele koko tle yia:tapo ya:ye yumuluwe solotamaiyo. <sup>30</sup> Epapalati mikadepe dle sota koko i dalepame Sol semtame Kasaliya dla woyamaiyo. Epame ma etle ya: mo ikadepe Talesas dla tane diyo.

<sup>31</sup> Mo hapuloma Yudiya dla epo Ga:lili dla epo Samaliya dla mikadepe dle so dla wotiyalle hapilowe kokota mo-pa:lati alikili so mate epo mikadepe dle so mate ma yimkata sadepo ha:ha:iyo. Epammama yia: sosta itiyamama mikadepe dle sota pasataiyo. Adipalati, Hela:dle Sokota yia: gadlati yia:tapo God wowota:mama ya: yu dla salladepo ha:ha:iyo.

### *Pitata Aeniyas ka:dle*

<sup>32</sup> Pitata Yu so mo hapuloma dla sela:mama God ya: opaye God yu mate gagadem-sela:mdiyo. Epamsela:mama God ya: opa opi Lida mo dla ha:ha:lalo dla tame woyamaiyo. <sup>33</sup> Ya: mo edla tame natilati akoloyale oplami Aeniyasta ya:ta ellalo dla ella natiyo. Ya: akoloyelati 8 sokomoko dulu dla isikimi elemhalaiyo. <sup>34</sup> Epeleye Pitata ya: natipame ya: watle epo atlaiyo, “Aeniyas, Yesu Kelisota wa:ye ma-ka:depo, epedeme wa: sila:time wa: wa:ya popolomane,” diyo. Epalati oloma edla Aeniyasta ma-ka:depame sila:tiyo. <sup>35</sup> Epapalati opa Lida mo dla ha:ha:lalo so mate epo Sa:lon mo dla ha:ha:lalo so mate akoloyale oplamita sela:lati natipame God dla heheletimaiyo.

### *Pitata Tabita ka:dle*

<sup>36</sup> Amasiyama Yopa mo dla mikadepe dle a:ya hale halaiyo, ya: hiye Tabita. (Ya: hi hale Guliki yu mate semama Dokas demdiyo.) Ya: yimkadulo polowamale pato elemama yimkadulo alisisi pa:talo so sikemte gagademsela:mdiyo. <sup>37</sup> Epeleye Pita ala Lida mo dla me-hallati Tabitaye esiyemama mo-powaiyo. Epalati yimkadulota ya: motoye howahapame aya alupoli hale dla himiyo. <sup>38</sup> Amasiyama Lida moye Yopa mo mateka:piyo. Epedeme mikadepe dle so Yopa dla ha:ha:lalota Pitata Lida dla halale dalepame opa dapiyamteta Pita watle yu hamtaiyo. Yia: tame Pita watle epo atlaiyo, “Pita, wa: hapele di mo dla puane,” diyo.



<sup>39</sup> Epalati Pita yia: mate taiyo. Ya: tame Yopa mo dla woyamalati yia:tapo Pitaye a:ya powaleta ela alupoli dla semhetaiyo. Aya dulu edla sepeyamatalo a:lempopalaleta Pita natipame ya: watle Tabitata ka:yapa sela:mama tluka tilimaleye nati-yio.

<sup>40</sup> Epalati Pitatapo sepeyamatalo mate epo opa opi mate alikili dla taiya depame alumata kellepo polomama inoma sumpolaiyo. Ya: inoma supo polomama Tabita watle epo atlaiyo, “Tabita, wa: sila:tine,” diyo. Epalati Tabitata inoma towanatipame Pita natipo sila:time polaiyo. <sup>41</sup> Epalati Pitata ya: gademama ya: do dla hamame sila:time pameliyo. Epame sepeyamatalo so mate epo mikadepe dle so opi mate sisilapo “Tabitata ka:depo polaye natiya,” diyo. <sup>42</sup> Epalati opa Yopa mo dla ha:ha:lalo sota yu i dalepame Lod dla mikadepe diyo. <sup>43</sup> Epame Pita Yopa dla alila pasatale halemama aliya kapala mate oko halalo oplami Saimon aya dla halaiyo.

## 10

### *Godta po-Yu oplami Konelias watle yukamale*

<sup>1</sup> Kasaliya mo dla Loum opahale so alumale hale halaiyo. Alumale ya: hiye Itali mo so alumale. Epeleye oplami Koneliyastapo alumale eye omhalem-diyo. <sup>2</sup> Konelias iye ka:depo hallalo oplamiyo. Epo ya: mate epo ya: aya dulu dla ha:ha:lalo so mate Yu so God dla wowota:mama mikadepe dem-diyo. Epeleye ya:tapo namkale dle alisisiye atali so watle halopimhalemama alila hapuloma dulu dla God watle inoma sumale himme halem-diyo.

<sup>3</sup> Epo alila haleta tamila:la dla hallati Godta Konelias inomaye meyelope dlati ya:tapo God ya: banakaka oplami natiyo. Banakaka oplamita puame ya: watle epo atlaiyo, “Konelias,” diyo.

<sup>4</sup> Epalati Koneliyasta God ya: banakaka oplami dla wota:le mate omhalemama epo atlaiyo, “Lod, wa: apa solotama:?” diyo.

Asiyama God ya: banakaka oplamita ya: watle epo atlaiyo, “Wa:ta God dla inoma sumhaluwaye, ya: ma-daluwapo. Epame wa:ta atali so gagademhaluwaye, Godta ma-natiwapo. <sup>5</sup> Epedeme wa: watapo opa opi Yopa dla taiya dene, yia:tapo Saimon Pitaye wa: watle sempulupo depame. <sup>6</sup> Ya:ye aliya kapala mate oko halalo oplami Saimon aya dla halapo. Oplami ya: ayaye kaula pato peleyama dla polapo,” diyo.

<sup>7</sup> Epame God ya: banakaka oplamita ya: mate yukamhalepo ma-tlati ya: oko so opa dapiyamte mate epo opahale oplami hale, Yu so yia: God dla mikadepe dlalo mate sisilalimaiyo. Opahale oplami iye Konelias gadlalo oplamiyo. <sup>8</sup> Epapeleye Koneliyasta yia: sisilalipame yia: watle God ya: banakakata atlale yuye atlepame ma Yopa dla taiya diyo. <sup>9</sup> Epalati yia:tapo Yopa dla ma-tamalemama duka dla hutiyeyio. Epo ma-alallati tamama sali duka dla pollati Yopa mo mateka:pi dla tame woyamaiyo.

### *Pitata inoma meyelope dle*

Oloma edla Pita inoma sumolowedeme aya di dla hetaiyo. <sup>10</sup> Epame ya: inoma sumpollati daya ta:leta ya: dla puaiyo. Epalati opata ala ya: daya ha:mpopalaleti Godta ya: inoma tlo meyelope diyo. <sup>11</sup> Godta ya: inoma meyelope dlati ya:tapo pepele di kokolomata gowaladepo halla natiyo. Epalati pepele di tle soula sepeleye deata soula akutu dla hihimapo halum-malla natiyo. <sup>12</sup> Epo soula dulu edla alinepi mila:pi meyelope meyelope dle ta:la dla siyamalalo mate epo di dla siyamalalo tea mateta ha:ha:la tlamaiyo. <sup>13</sup> Epalati ma pepele di tle yuta ya: watle epo atlaiyo, “Pita, wa: sila:time alinepi dulu hema alinepi hale yumme dene,” diyo.

<sup>14</sup> Amasiyama Pitata epo atlaiyo, “Hao, Lod, na: epapele alisisi podesemde. Adipalati, mowolo alinepi epapeleye demiyo duwapo. Epedeme na: hale yumme podlowa,” diyo.

<sup>15</sup> Epalati asiyama yuta ma epo atlaiyo, “Godta alisisi hapuloma iye ma-ka:dena dleye, ma wa:ta batalimana demiya,” diyo.

<sup>16</sup> Godta koko iye dapahatlope oloma dla Pita watle nalati-ipame ma soula sepeleye pepele di dla hamhetaiyo. <sup>17</sup> Pita ya:ta inomata meyelo pe dlati tlamale ya: dulu kokoye ala momalampollati Koneliyasta taiya dle so opata puame Saimon aya natipame kokoloma tala dla omha:ha:iyo. <sup>18</sup> Yia:ta omha:ha:mama epo atlaiyo, “Oplami hale Saimon Pita demdiye aya dulu hema poloma:?” diyo.

<sup>19</sup> Amasiyama Pita ala ya:ta tlamale koko me-momalampollati Hela:dle Sokota ya: watle epo atlaiyo, “Pita, opa dapahatlopeye wa: totamsiyamapo. <sup>20</sup> Epedeme wa: sila:tine tulume isikimi yia: mate tane. Adipalati, na:tapo yia:ye wa: natila taiya dlepo,” diyo.

<sup>21</sup> Epalati Pitata tulume yia: watle epo atlaiyo, “Wua:ta totamsiyama oplamiye na:po. Epedeme wua: hema apa koko hala puo?” diyo.

<sup>22</sup> Epalati asiyama yia:ta Pita watle epo atlaiyo, “Di pato oplami Koneliyas, Loum opahale so omhallalo oplamita dia:ye taiya duwa. Adipalati, God ya: banakaka oplamita tulume Koneliyas watle atlemama, wa:tapo tame Koneliyas watle God yu atloweyo, diyo. Epedeme dita wa:ye Koneliyas watle semtlowedeme pua. Koneliyas iye God wota:lalo ka:dle oplamipo. Epame Yu so hapulomata ya:ye solotamama ka:dle oplami demde,” diyo.

<sup>23</sup> Epalati yia:ta koko i atlepo gudlati Pitata opa ewoloye ya:ta ellalo aya dla el-emhetaiyo.

### *Pitata Koneliyas aya dulu dla po-Yu so watle God yu atlale*

Koneliyasta taiya dle sota edla hutiyepo alallati Pitaye Koneliyas hala dla ma-semtlati mikadepe dle so opa opi Yopa dla ha:ha:le so mape yia: mate tamalaiyo. <sup>24</sup> Yia: tame duka dla hutiyepo ma alila haleta Kasaliya dla tame woyamaiyo. Koneliyas ya: alila edla ompolomama ya: asiyadulo mate yimkadulo mate aya dulu dla sisilalipo ompolaiyo. <sup>25</sup> Epame Pitata Koneliyas aya dulu dla matilati Koneliyasta Pita hete sitali dla tulume polomama ya: dla heodiyo. <sup>26</sup> Amasiyama Pitata ya: watle epo atlaiyo, “Wa: sila:tine, na: dla heodemiya. Adipalati, na:ye isikimi ta:la oplamipo,” diyo.

<sup>27</sup> Epame Pita mate Koneliyas mate aya dulu dla yuhamtumama natilati aya duluye opata mo-pasatame halaiyo. <sup>28</sup> Epalati Pitata po-Yu so hapulomata alupo popa:lati natipo yia: watle epo atlaiyo, “Namkadulo, wua: Yu so aiyalma koko mo-wua:malamana. Epedeme Yu oplami haletapo po-Yu so mate hatlope dloweye aiyalma demdepo. Amasiyama Godta na: inoma meyelo pe depame na: watle ipo imuwa, Yu so dia: mate epo po-Yu so wua: mate God mila:pi tle ma-hatlopepo. Epedeme na: po-Yu so oplami haleye pobatalimana desema. <sup>29</sup> Epapedeme wua:ta na: sisilamalati wua: hala dla puluweye po-alina. Epedeme wua:ta solotamale kokoye wata na: watle atlaiya,” diyo.

<sup>30</sup> Epalati Koneliyasta ya: watle epo atlaiyo, “Na: alila hale tamila:la na: aya dulu dla inoma sumpoluwa. Epalati pakasiyamalalo oplami hale tluka kamaleta usiyemale didiyepo na: mateka:pi dla puame halla natiwa. <sup>31</sup> Ya:ta na: watle epo atluwa, ‘Koneliyas, Godta wa:ta inoma sumhaluwaye, ya: ma-daluwapo. Epame wa:ta atali so gagademhaluwaye, Godta ma-natiwapo. <sup>32</sup> Epedeme wa: watapo opa opi Yopa dla taiya dene, yia:tapo Saimon Pitaye wa: watle sempulupo depame. Ya:ye aliya kapala mate oko halalo oplami Saimon aya dla halapo. Oplami ya: ayaye kaula pato peleyama dla polapo,’ duwa. <sup>33</sup> Epedeme na:ta wa:ye puane dlati wa:ta puale dla na: siyema. Epapedeme dita hapulomata God mila:pi tle mo-puame popa:po, Godta wa: tle dia: dla yu atloweyo dleye e dallowedeme,” diyo.

<sup>34</sup> Epalati Pitata asiyama epo atlaiyo, “Na: wata natima, Godta natili tle opa hapuloma dulu dla oplami haleta ya:mkale tla:mtale pohalasema. <sup>35</sup> Epame ta:lamo pato hema mo meyelo pe meyelo pe dle dulu dla oplami antapo God dla mikadepe depame ka:ka:dle koko halomhallepiye, Godta ya: dla siyemhalapo.

<sup>36</sup> Epedeme wua: Godta Isalael so watle ka:dle yu hamiwaye wua: ma-daluwapo. Ka:dle yu eye ipo, Yesu Kelisota opa hapuloma dulu dla yia: Lod halapo. Epedeme ya:tapo dia: watle sadepo hallowe kokoye hampuwapo. <sup>37</sup> Epedeme wua: ma-daluwayo, Yesu Keliso Nasalet oplamita Ga:lili tle kotiyapo Isalael so opa dulu dla koko ham-sela:uwaye. Ya:ye Yon opa yú dla ka:ka:timalalo oplami ko tle puwapo. <sup>38</sup> Epapeleye Godta ya:ye sepo ya: dla Hela:dle Soko mate epo itiyamale mate hamiwapo. Epalati Godta ya: mate halemama ya:tapo Yu so mo hapuloma dla ka:ka:dle koko halom-sela:mama Saitenta itiyamale dulu dla ha:ha:lalo soye ka:ka:demsela:uwapo.

<sup>39</sup> Epapedeme di Taiya dle so dia:ye Yesuta Yelusalem dla epame Yu so mo opi dla koko hapuloma i halomsela:uwaye di me-natiwapo. Epame di ma me-natiwapo, Yu so Yelusalem dla ha:ha:lalota Yesuye dali yekelehmihili di dla gogodepo yumuwaye. <sup>40-41</sup> Amasiyama ya: alila dapiyamte wabasi dla powame elepame ma alila dapahatlope dla Godta ya:ye powale tle ma pasakalo dla ta:duwapo. Epame Yesuye powale tle sila:time sela:mama opa hapuloma dla powowoyamsela:na. Amasiyama isikimi Godta sesa:le so di watle wowoyamsela:uwapo. Epame ya:ta powale tle sila:time sela:lali di ya: mate siyamama daya mate yú mate dlomsiyamuwapo. <sup>42</sup> Ya: di watle yu itiyamale mate atluwapo, ditapo opa watle God yu atlamsiyamelepo depame. Epame Godta Yesuye mo-pamoluwapo, ya:tapo pasakalo ha:ha: so mate epo palli so mate yia: koko gladlalo oplami hallepo depame. Epedeme dita koko iye botomastapame haliyamale dla atlamsiyamapo. <sup>43</sup> Epame God tle yu hapame molo atlamalalo so hapulomata Yesu koko dla epo atluwapo, ‘Oplami antapo ya: dla mikadepe dlepiye, ya: batalimaleye ya: hi tle howahapo wellipe,’ duwapo.”

### *Hela:dle Sokota ka:yapa po-Yu so dla tulli*

<sup>44-46</sup> Pitata ala yu me-atlemhallati Hela:dle Sokota malame opa Pita yu dalempopa:le dla tuluiyo. Epalati Hela:dle Sokota itiyamale tle yia:tapo yu meyelo pe meyo pe dle yuhamyemama God hi di dla ta:demyaiyo. Epalati Pita mate pumulale Yu so mikadepe dle sota koko i natipame sikemte yiyelepo epo momalamaiyo, “God adipalati po-Yu so opa watle Hela:dle Sokoye hamima:?” demyaiyo.

Amasiyama Pitata yia: watle epo atlaiyo, <sup>47</sup> “Dita Hela:dle Soko hamuwaye, epam-mama yia: ma hamapo. Epedeme oplami antapo yia:ta yú tutula:loweye api himo-melepa:?” diyo. <sup>48</sup> Epo atlepame, “Yia:ye Yesu hi tle yú dla ka:ka:timaiya,” diyo.

Epalati yia:ta Yesu hi tle yú dla tutula:pame solotamaiyo, Pitata yia: mate alila yimka:mala halepo telepo depame.

## 11

### *Pitata po-Yu so kokoye Yelusalem dla atlamale*

<sup>1</sup> Taiya dle so mate mikadepe dle so Yudiya dla ha:ha:lalo mate po-Yu sota God yu dalepame mikadepe dleye daliyo. <sup>2</sup> Epapeleye Pitata po-Yu so mate halepo ma ilame Yelusalem dla pulati Yu so mikadepe dle sota ya:ye sikemte atlemama epo atlaiyo, <sup>3</sup> “Wa: adipalati po-Yu so mo dla tame yia: mate halemama daya demhaluwa? Koko eye poka:dena,” diyo.

<sup>4</sup> Epalati Pitata koko iye woloma yia: watle epo atlaiyo, <sup>5-6</sup> “Na: Yopa mo dla halemama inoma sumpollati Godta na: inomaye meyelo pe duwa. Epapele dulu dla natilati soula sepeleta pepele di tle deata soula akutu dla hihimapo halum-malla natiwa. Alisisi eta malame na: mateka:pi dla halla natilati dulu edla alinepi mila:pi meyelo pe meyo pe dle ta:la dla siyamalalo alinepi mate epo di dla siyamalalo tea mate ha:ha:la tlamuwa. <sup>7</sup> Epalati oloma edla pepele di tle yuta na: watle epo atluwa, ‘Pita, wa: sila:time alinepi dulu hema hale yumme dene,’ duwa.

<sup>8</sup> Amasiyama na: ya: watle epo atluwa, 'Hao, Lod, na: epapele alisisi podesemde. Adipalati, mowolo ipapele alisisiye demiyo duwapo,' duwa.

<sup>9</sup> Amasiyama pepele di tle ma yuta epo atluwa, 'Godta alisisi hapuloma iye ma-ka:dena dleye, ma wa:ta batalimana demiyo,' duwa. <sup>10</sup> Koko hapuloma iye dapahatlope oloma dla wowoyapame ma pepele di dla hame hetauwa.

<sup>11</sup> Epalati pakasiyamalalo opa dapahatlopeta Kasaliya mo tle na: natila taiya dle sota na:ta ellalo aya dla puame na: dla woyamuwa. <sup>12</sup> Epele dulu dla Hela:dle Sokota na: imuwa, na:tapo yia: mate Kasaliya mo dla telepo depame. Epame mikadepe dle so 6 hema popa: iwolota na: mate tamaluwa. Epo tame yimkata Konelias aya dulu dla hetauwapo. <sup>13</sup> Epalati Konelias etapo God ya: banakakata ya: aya dulu dla halla natiliye na: watle atluwa. Epame God ya: banakakata ya: watle atlemama wa: opa opi Yopa dla taiya dene, diyo. Yia:ta tame Yopa dla na:ye Konelias dla seme pulupo depame. <sup>14</sup> Epo na:ta puame ya: watle yu atlepiye, yu etapo ya: mate epo ya: asiyadulo mate pasakalo hallowe halepe, diyo, duwa.

<sup>15</sup> Epapeleye na:ta tame God yuye yia: dla atlowe kotiyamalati Hela:dle Sokota dia: dla maluwaye, epammama yia: dla tuluwa. <sup>16</sup> Epalati na: Lodta atlale yu iye malamuwa, ya:ta epo atluwapo, 'Yontapo opaye yú siyapo dla ka:ka:timuwapo. Amasiyama Godtapo wua:ye Hela:dle Soko dla ka:ka:timelepe,' dleye. <sup>17</sup> Epedeme dita ka:yapa Yesu Keliso dla mikadepe dlati Godta di watle Hela:dle Soko hamiwaye, epammama yia:ta mikadepe dlati Godta yia: watle Hela:dle Sokoye hamiwapo. Epedeme na: adipammama God ya: okoye humatlepa:?"

<sup>18</sup> Amasiyama Yu so mikadepe dle sota Pita yu dalepame ya: dla batalipo atlamyaley medla gudiyo. Epame God dla siyele yu ta:demama epo atlaiyo, "Godtapo po-Yu so opa mape kokoloma mo-gowaladuwapo, yia:tapo God hala dla heheletipame pasakalo hallowe halepo depame," diyo.

### *Antiyoka mo dla sos kotiyamale*

<sup>19</sup> Stiben yumili oloma edla wotiyalle kokota ta:lali mikadepe dle so hapulomata Yelusalem tle mo meyelo meyelo dle dla potamalaiyo. Epo potamalemama opita Ponesiya dla potamalaiyo. Epo opita Saiples hasu dla epo opita Antiyoka mo dla epo potamalaiyo. Epame edla tame Yesu Keliso kokoye isikimi Yu so watle atlamsiyamaiyo.

<sup>20</sup> Amasiyama Yelusalem tle epo potamalale so dulu dla Kulene so opa opi mate Saiples so opi mate Antiyoka mo dla puame Guliki so watle Yesu Keliso koko ma atlamsiyamaiyo. <sup>21</sup> Epalati Lodta yia: mate hallati Guliki so opa pasataleta yia: dupa dulu malamale meyelo depame God dla heheletimaiyo.

<sup>22</sup> Epapalati mikadepe dle so Yelusalem dla ha:ha:lalota po-Yu sota mikadepe dle koko i dalepame Banabasye Antiyoka dla tane diyo. <sup>23-24</sup> Banabasye ka:dle oplami halaiyo. Ya: mikadepe dle kokalle halemama Hela:dle Sokota pasatepo halaiyo. Epapeleye ya: tame Antiyoka dla woyamalati Lodta gadleye opa dulu dla natipame sikemte siyeiyo. Epame yia: watle gadle yu atlaiyo, yia:tapo Lod dulu dla ha:ha:mama kokalepo ha:ha:lepo depame. Epalati mikadepe dle sota ma-ta:mtaiyo.

<sup>25</sup> Banabas matle Talesas mo dla Sol totamtaiyo. <sup>26</sup> Ya: Sol natipame ma Antiyoka dla semtaiyo. Epame sokomoko hatlo dulu dla yia:ta madipata sos dulu dla oko hamha:ha:mama opa hapuloma imha:ha:iyo. Epalati Antiyoka mo dla mikadepe dle soye ka:yapa alikili sota semama Keliso alotle tlalo so demdiyo.

<sup>27</sup> Oloma edla God tle yu hapame molo atlalo so opi Yelusalem tle Antiyoka dla pumulaiyo. <sup>28</sup> Yia: dulu dla oplami hale ya: hi Agabusyo. Epapeleye ya:ta sila:time Hela:dle Sokota itiyamale tle halemama epo atlaiyo, "Ta:lamo pato hema kokalle kokota pumama dlowe alisisita pa:lepe," diyo. (Epapeleye koko eta Sisa Kolodiyasta Loum mo patoye dokopala oplami halale oloma edla mo-puaiyo.) <sup>29</sup> Epalati Antiyoka mikadepe dle sota yimkadulo Yudiya dla ha:ha:lalo soye gadlowedeme mani pato kolumaiyo.

Epapele dulu dla alisisi poposatilimale sotapo mani pato mate gadiyo. Epalati alisisi pase poposatilimale sotapo mani yimka:mala mate gadiyo. <sup>30</sup> Epame Banabas mate Sol mate watle hamilati yia:tapo Yelusalem sos dokopala so watle mani eye hamtaiyo.

## 12

### *Helodta mikadepe dle so watle wotiyalle hamili*

<sup>1</sup> Alila oloma edla Yu so dokopala oplami Helodta ma mikadepe dle so opi watle wotiyalle hapimhalaiyo. <sup>2</sup> Epammama ya:tapo Taiya dle oplami hale, Yon ya: bapa Yeimsye hampame ya: opa watle aipa:ya mate yumiya diyo. Epalati yia:ta Yeims moyumiyo. <sup>3</sup> Epapalati Yu sota koko i natipame sisiyemama ka:dena dlati Helodta matle Pita yumuluwedeme hamaiyo. Koko i woyamaleye Isip mo tle alikili dla woyamale malamale daya dele alila oloma edla apiyo. <sup>4</sup> Helod ya: solotamaiyo, Godta Namilatatale daya dele alilata gudlati opa inoma dali dla Pitaye yumuluwedeme. Epammama Pitaye aseka amtuwale aya dulu dla ka:staiyo. Epame ya: opahale so 16 hohopame Pitaye woloma omha:ha:iye diyo. <sup>5</sup> Amasiyama Pitaye amtuwale aya dulu dla hallati mikadepe dle sota ya: yilo God dla inoma sumale pato himha:ha:iyo.

<sup>6</sup> Pita mosukulu utula:la dla ipo momalamelaiyo, “Iyela Helodta na:ye yumilipe,” demelaiyo. Epame utula:la edla opahale so dapiyamteta Pita semhutiye mama yia: doye Pita do mate oli deata keketipoliyepo hutiyeyiyo. Epapalati opahale so opita kokoloma dla omha:ha:iyo. <sup>7</sup> Epalati pakasiyamalalo Lod ya: banakakata yia: mateka:pi dla woyapo hallati hela:dleta amtuwale aya duluye haiyo. Epo God ya: banakaka oplamita Pita esesa:mama epo atlaiyo, “Pita, wa: hapele sila:tine,” diyo. Epalati oloma edla oli deatapo miyelo Pita do tle totowatimaiyo.

<sup>8</sup> Epame banakaka oplamita ya: watle ma epo atlaiyo, “Wa: sila:time wa: tluka alisisi mate hete alisisi mate didiyepo na: mate puane,” diyo. Epalati Pitata banakaka oplami yu dalepame koko eye haiyo. <sup>9</sup> Amasiyama Pita ya: koko i natimama semte ya:ta malamaleta Godta ya: inoma meyelo dlati koko tlamapo diyo. <sup>10</sup> Ya: epo malapame banakaka oplami mate kokoloma omha:ha:lalo so alumale dapiyamteta me-omha:ha:mtulati tetla:mtuwaiyo. Epamtuwame kokoloma mosukulu pato dla ha:ha:lali kokolomata meyelo gowaladiyo. Epalati yia:tapo amtuwale aya dulu tle u-ulapo tamha:ha:lali God ya: banakaka oplamita meyelo me-pa:iyo.

<sup>11</sup> Epapele oloma dla Pitata edla malamaiyo, “Yao, koko iye ikadepe haliyamale dla apotepo,” diyo. “Epedeme na: wata malama, Lodta ya: banakaka oplamiye na: dla tulune dlepo, ya:tapo na:ye Helod do tle alikili dla hamame woyamelepo depame. Epedeme watapo Helodta Yu so opa mila:pi tle na:ye poyumuluwa,” diyo.

<sup>12</sup> Ya: epo momalamale mate tame Yon Maka ya: wai Meli aya dla hetaiyo. Aya dulu hema opa hapulomata alupo inoma sumpopa:iyo. <sup>13</sup> Pitata tame kokoloma dla heyulumalati aya dulu edla oko halalo a:ya Lodata kokoloma gowaladla matiyo. <sup>14</sup> Ya: kokoloma gowaladla matimama daletapo Pita yu maladalepame sikemte siyemama kokoloma gowaladlowe welipame ma matime opa watle epo atlaiyo, “Pitaye kokoloma tala dla puame halema,” demhalaiyo.

<sup>15</sup> Amasiyama opata yu e dalepame asiyama ya: watle epo atlaiyo, “Wa: yiyilamama amma:?” diyo. Amasiyama ya: koko i atloweye poka:liyo. Epalati opa opita epo atlaiyo, “Podimalamana, Pita ya:nasama mle?” diyo.

<sup>16</sup> Pita ya: ala alikili dla me-halemama kokoloma me-heyulumhalaiyo. Epalati opata kokoloma gowaladepo natitepo Pita natipame sikemte yiyeliyo. <sup>17</sup> Epalati Pitata yia:ta yuhamyaleye do yu mate keka:lipo yia: watle Lodta ya:ye amtuwale aya dulu tle alikili dla hamame woyamale kokoye atlamaiyo. Ya: epame epo atlaiyo, “Sos dokopala oplami Yeims mate epo mikadepe dle so opi mate dla na: koko atlamaiye,” diyo. Pita yu i atlepame ma mo hale dla taiyo.



<sup>18</sup> Utulalati opahale so Pita omha:ha:leta Pitata hawa hallati sikemte yiyelepame wowota:iyo. <sup>19</sup> Epalati Helodta ya: opa mate Pitaye sikemte totamaiyo. Amasiyama yia: Pita ponatilalo wekelati ma i-ilapo tame Pita omha:ha:lalo so dla koko woloma dlaliyo. Epame ya: opa opi watle, “Pita omha:ha:lalo soye potimaiya,” diyo.

### *Helodta powale koko*

Koko eta tame gudlati alotle Helodta Yudiya mo tle ma Kasaliya mo dla halla taiyo. <sup>20</sup> Helod ya: Kasaliya dla halemama Taya so mate epo Saidon so mate dla sikemte siyaladepo halaiyo. Epalati Taya so mate Saidon so mate sadepo ha:ha:lowedeme yimkata Helod mate esemala taiyo. Adipalati, yia: Helod mo tle daya halomha:ha:mdiyo. Epapeleye Helodta yia: mate siyaladepo halemama yia:ta daya halomha:ha:lowe api himomellala depame Helod mate yu ka:dla puaiyo. Epammama yia:ta puame Helod aya omhallalo oplami Balastus mate namkale diyo, ya:tapo yia: tiyama tle halemama yia: kokoye Helod mate ka:dlepo depame.

<sup>21</sup> Epame Helodta yia: mate esemolowedeme alila himiyo. Epo alila edla Helodta yia: mate esemolowedeme ya:tapo dokopala sota didiyelalo tluka alisisi ka:ka:dle didiyepo dokopala oplamita pollalo dla polaiyo. Epo polomama opa hapuloma watle yu atlaiyo.

<sup>22</sup> Ya:tapo yu atlepo gudlati opa hapulomata yu teta:le mate ya: watle epo atlamyaiyo, “Wa:ye ikadepe godpo, po-oplami ikadepe,” demyaiyo. <sup>23</sup> Amasiyama koko itle Helodta God hi di dla pota:dena, ya:skamu ya: hi tlo di dla ta:diyo. Epapedeme God ya: banakaka oplamita pakasiyamalalo ya: watle esiyele hamiyo. Epalati oseta ya: moto dlati powaiyo.

<sup>24</sup> Amasiyama God yuta opa dulu dla ellati mikadepe dle sota pasatamtaiyo.

<sup>25</sup> Banabas mate Sol mate Antiyoka sota mani kolumaleye hampuame Yelusalem sos dokopala so dla hamipame ma i-ilapo Antiyoka dla tamalemama Yon Maka semta-malaiyo.

## 13

### *Banabas mate Sol mate hohopame taiya dle*

<sup>1</sup> Antiyoka sos dulu dla God tle yu hapame molo atlalo so mate sos dokopala so mate iwolota ha:ha:iyo. Yia: hiye Banabas, epo Simiyon (ya: hi haleye Nigele), epo Kulene oplami Lukiyus, epo Manae (dokopala oplami Helod mate madipata teta:le), epo Sol.

<sup>2</sup> Yia:ta yimkata daya aiyalma depa ha:ha:mama inoma sumpopa:lati Hela:dle Sokota yia: watle epo atlaiyo, “Banabas mate Sol mate hohopame na:ta hapilowe oko dla ipila:iye,” diyo. <sup>3</sup> Epalati yia:ta daya aiyalma depa ha:ha:po gudepame Banabas mate Sol mate dota hohopo inoma supame God oko dla taiya diyo.

### *Banabas mate Sol mate Saiples hasu dla tale*

<sup>4-5</sup> Banabas mate Sol mate Hela:dle Sokota taiya dlati Selukiya mo tle koa hame ma Saiples hasu dla tamalemama yia: gadlowe oplami Yon Maka semtaiyo. Yia: puame Saiples hasu dla Salamis mo dla koa himiyo. Epame mo edla Yu so inoma sumalalo aya dla hehetamsiyamama God yu atlamsiyamaiyo.

<sup>6-8</sup> Epame ala hasu hatlo medla me-siyamama mo hale Papos dla tame woyamaiyo. Yia: edla tame natilati Yu oplami hale osolo walle halaiyo. Ya: hiye Baleyesu (ya: hi haleye Elimayas demdiyo. Adipalati, hi i ya: dulu kokoye osolo walle oplami demama apopo.) Ya: mo edla biskapa God yu molo atlalo oplami halaiyo. Ya:ye hasu dokopala oplami Selegiyus Paulus ya:mkaleyo. Hasu dokopala oplami eye ka:dle oplamiyo. Epedeme ya: God yu dallowe solotamama Banabas mate Sol mate sisilamaiyo. Amasiyama osolo walle oplami Elimayas posolotamaiyo, dokopala oplamitapo God yu dalepame Yesu dla mikadepe dloweye. Epammama ya:tapo Banabas mate Sol mateta God yu atloweye humatlaiyo.

<sup>9</sup> Amasiyama oloma edla Sol, ya: hi hale Polo demdeta Hela:dle Sokota pasatale mate halemama osolo walle oplami Elimayas watle inoma kokata omhalemama epo atlaiyo, <sup>10</sup> “Wa:ye Saiten yamipo. Wa: ka:ka:dle koko hapuloma dla opahale demhalapo. Wa:ye alila hapuloma dulu dla opaye isikimi elemala natimhalapo. Epame wa: adipalati Lod yu ka:dleye ma meyelope depame ma opa dla mala-atlamhalema:?” <sup>11</sup> Epedeme watapo Lodta wa: watle batalimale asiyama hamimama wa: inoma dapiyamteye kokowepe. Epalati wa:ta alila opi dulu dla salita hela:dle ponatilowa,” diyo.

Epalati oloma edla amtuwaleta ya: inoma dla bodlati ya: inomata mo-kokoweiyo. Epapalati ya:tapo oplami hale ya: api imtlowe totamsela:iyo. <sup>12</sup> Epalati hasu dokopala oplamita koko i natipo yelepame Lod dla mikadepe diyo. Adipalati, Polo mate Banabas mate yia:ta God yu atlale dulu dla itiyamale natiyo.

*Polota Pisidiya mo pato dulu dla Antiyoka mo dla God yu atlale*

<sup>13</sup> Polo mate ya: mate pumulale so mate Papos mo tle koa hame kaula pato ulupo ma Pampiliya mo pato dla puame woyamaiyo. Mo dulu edla Pelega mo dla koa himiyo. Edla Yon Makata yia: saliyome ma ilame Yelusalem dla taiyo. <sup>14</sup> Epame Polo mate Banabas mate Pelega saliyome ma ta:la api Pisidiya mo pato dulu dla Antiyoka mo dla tame woyamaiyo. Yia: edla ha:ha:lati Yu so inoma sumalalo alilata pulati yia: inoma sumolowedeme inoma sumalalo aya dulu dla hetame popa:iyo. <sup>15</sup> Epalati inoma sumalalo aya dokopala sota Mosesta aiyalma hatitimale mate epo God tle yu hapame molo atlalo sota hatitimale mate sesa:iyo. Epame ma Polo mate Banabas mate dla yu hamimama epo atlaiyo, “Namkadulo, wua: dla di watle gadlowe yu atlamolowe hutiyelepiye, me-atlamaiya,” diyo.

<sup>16</sup> Epalati Polota sila:tipo do ta:demama epo atlaiyo, “Namkadulo Isalael so mate epame God dla mikadepe dle po-Yu so wua: mate yu i daliya. <sup>17</sup> Di Isalael so Godtapo di mamaduloye me-lemuwapo. Epame yia:tapo Isip mo dla ha:ha:lati Godta yia:ye woloma omhaluwapo. Epalati Isalael so opata pasatauwapo. Epapalati Godta yia:ye itiyamale mate Isip mo tle alikili dla eleme woyamuwapo. <sup>18</sup> Epame yia:ta sokomoko 40 dalupa dulu dla God watle allimama ya: dla kostame siyamalati asiyama Godta yia: pomelemdena. <sup>19</sup> Epame Godta Keinan mo dulu dla yu meyelope meyelope dle 7 mo so hapulomaye alikili dla dodolomsalepo yia: ta:la kolahapame ma ya: opa Isalael so watle hamiwapo. <sup>20-21</sup> Epalati di mamadulota Isip mo dla ha:ha:po ma mo i hala pumuluwaye, sokomoko 450 mo-pololuwapo.

Epame di mamadulota mo edla me-ha:ha:lati Godta koko gladlalo soye hatitimuwapo, yia: omha:ha:lepo depame. Amasiyama alotle God tle yu hapame molo atlalo oplami Sa:muwelta halale oloma edla Isalael sota ma solotamuwapo, yia: omhallowe dokopala oplami ikadepe hamolowedeme. Epalati Godta Benyamin elele dulu dla oplami hale, Kis yami Solye dokopala oplami ikadepe hallowe dla hulumuwapo. Epapalati Solta sokomoko 40 dulu dla Isalael so dokopala oplami haluwapo. <sup>22</sup> Epame Godta Sol alimama alikili dla gilidepame matle Yesi yami Deibidita yia: dokopala oplami hallepo depame pamoluwapo. Epammama Godta Deibidi koko dla ipo atluwapo, ‘Na: Yesi yami Deibidi dla ka:dle koko natima. Epedeme ya:ta na:ta solotamale koko hapuloma halomhallepe,’ duwapo.

<sup>23</sup> Epedeme Godta ka:yapa yu itiyamale mate himimama epo atluwapo, ‘Deibidi asiya dulu tle Isalael so dla pasakalo hallowe hapilalo oplami pulupe,’ duwapo. Epedeme oplami eta mo-puwapo. Eye Yesupo. <sup>24</sup> Amasiyama Yesu ala populalo hallati Yon tatile puame Isalael so hapuloma watle God yu atlamsela:mama epo atlemsela:mduwapo, ‘Wua: malamale meyelope depame yú dla tutula:iya,’ demduwapo. <sup>25</sup> Epame Yonta ya: oko mosukulu gudla tamama epo atlemsela:mduwapo, ‘Wua:ta na:ye ana demdi? Godta sale Kelisoye pona:. Amasiyama ya:ye na: ko tle pulupe. Epedeme na:ta ya: hete alisisi uptimoloweye po-ala:na,’ demduwapo.

<sup>26</sup> Namkadulo Yu so wua: mate epo po-Yu so di God dla mikadepe dlalo so wua: mate na: yu daliya. Pasakalo hallowe kokoye Godta dia: watle Yesu tle hamiwapo. <sup>27-28</sup> Amasiyama Yu so mate yia: dokopala so mate Yesuye woloma pomalanatina. Epapedeme yia: solotamuwapo, Yesuye yumuluwedeme. Epedeme yia: koko pa:le tame Paelet watle Yesu yumulupo depame ha:ha:limuwapo. Yia:ta koko i halomsiyamaley God tle yu hapame molo atlamalalo sota ka:yapa hatitimale yu mate ma-ala:uwapo. Epapedeme Yu sota inoma sumalalo alila hapuloma dla God tle yu hapame molo atlamalalo sota hatitimale yuye sikemte sesa:nduwapo. Amasiyama yia:tapo dulu koko woloma pohamdena.

<sup>29</sup> Epedeme God tle yu hapame molo atlamalalo sota Yesu koko dla atlamale koko hapulomata Yesu dla mo-wowoyapo gudlati yia:tapo Yesu motoye dali yekelehmihili di tle hamtulume wabasi dla himiwapo. <sup>30</sup> Amasiyama Godta ya:ye powale tle ma pasakalo duwapo. <sup>31</sup> Epalati alotle alila pasatale dulu dla Yesuta ya: mate Ga:lili tle Yelusalem dla pumulale so watle ya:skamu nalati-imsela:uwapo. Epedeme opa ewolotapo yia:ta Yesu powale tle sila:time sela:la natili kokoye di opa Yu so watle atlamsiyamapo.

<sup>32-33</sup> Epapedeme dita ka:dle yuye wua: dla hampualepo. Epedeme ka:yapa Godta di mamadulo mate yu itiyapo himiwaye koko etapo wata dia: dla mo-woyamalepo, ya:tapo ya: maseyemala Yesuye mo-powale tle ma pasakalo duwa koko tle. Epedeme Sam 2ta koko hema epo atlapo,

‘Wa:ye na: maseyemala ikadepe.

Watapo na:ta wa:ye ma-hamalepo’ depo.

<sup>34</sup> Epame Godta Yesuye powale tle ma pasakalo duwapo. Epedeme ya: matle ya: maseyemalaye poa pe-epapolowa. Epapele koko tle Godta epo atluwapo,

‘Na:ta ka:yapa Deibidi watle yu itiyamale mate koko ka:ka:dle hapilowe atluwaye ma wa: watle hamilowepo,’ duwapo.

<sup>35</sup> Epame God yu buka dla ma epo atlapo,

‘God tle malale aiyalma oplamitapo wabasi dulu dla pohutuluwa,’ depo.

<sup>36</sup> Epedeme God yu iye Deibidi koko po-atlana. Adipalati, Deibidita God ya: oko hapuloma halomsela:po gudepame pouwapo. Epalati ya: motoye ya: mamadulo wabasi seme dla hamatilati ya: motota edla hutuwapo. <sup>37</sup> Amasiyama Yesu motoye wabasi dulu dla elemama pohutana. Adipalati, Godta ya:ye powale tle ma pasakalo duwapo.

<sup>38-39</sup> Epedeme namkadulo, wua: dita atlama yu i woloma daliya. Adipalati, Godtapo Yesuta koko halë tle wua: bobtalimaleye hiyolepame ullu pa:talo so dlepe. Ame adipalati, Mosesta aiyalma hatitimaleta wua:ye wua: bobtalimale tle alikili dla eleme woyapame po-ullu pa:talo so dena. Amasiyama oplami antapo Yesu dla mikadepe dlepiye, Yesuta ya:ye batalimaleta itiyamale tle alikili dla hamame woyamelepe.

<sup>40</sup> Epapedeme wua: woloma na: yu hapame mikadepe dle dulu dla ha:ha:iya. Adipalati, God tle yu hapame molo atlalo sota atlamale koko ita wua: dla pulala depame,

<sup>41</sup> ‘Wua:ta ha:ha:le oloma edla na:tapo koko pato halepe.

Amasiyama wua:ta koko i natipame pomikadepe dlowa.

Epame oplami haleta ya: dulu kokoye wua: dla atlamelepiye, wua: ma woloma pahalowa.

Epapedeme na: yu dla asupumlalo so, wua: koko i natipo yiyelepame pallipe.’ ”

<sup>42</sup> Epo Polo mate Banabas mate yu atlamha:ha:po gudepame inoma sumalalo aya tle tulumha:ha:lali opata puame yia: watle epo atlaiyo, “Wua: matle inoma sumalalo alila haleta puame wua:ta God yu atlaleye ma atlaiye,” diyo. <sup>43</sup> Inoma sumaleta ma tame gudlati opata sillipo ma yia: aya dla tamhalaiyo. Epalati Yu so opi mate epo po-Yu sota God dla mikadepe dlalo so opi mate Polo wolota tamallati dolumtamalaiyo. Epalati Polo

mate Banabas mate yia: watle epo atlaiyo, “Wua:ta Godta bokotiyapo malamale dulu dla ha:ha:ye, medla mepo ha:ha:iye,” diyo.

<sup>44</sup> Epo ma inoma sumalalo alila haleta mo so hapulomata Lod yu dalla pumulaiyo.

<sup>45</sup> Epalati Yu sota opa alumale pato natipame Polo mate Banabas mate dla elle pato himiyo. Epame yia:tapo Polota God yu atlemhallati sillipame Polo yu ipi tle isikimi koko atlemhalema demyemama Polo mate yu dlomaiyo.

<sup>46</sup> Amasiyama Polo mate Banabas mate powowota:lalo asiyama yuye yia: watle epo atlamaiyo, “Ka:dlepo, wua: tatile dita God yuye wua: dla atlamolowe. Amasiyama wua:ta pasakalo hallowe halowe allipo. Epedeme di wua: melepame ma po-Yu so watle God yu atlamsiyamolowe. <sup>47</sup> Adipalati, Lodta di watle ipo atluwapo, ‘Na:ta wa:ye hamuwapo, wa:tapo po-Yu so dulu dla hela:dlalo hallopo depame.

Epame wa:tapo pasakalo hallowe yuye opa hapuloma ta:lamo pato sukulu gugudle dla hamtelepo depame.’ ”

<sup>48</sup> Epalati po-Yu sota Polo yu dalepame sisiyemama Lod yuye ka:pi diyo. Epame yia: dulu dla Godta pasakalo hallowe dla sesa:le so hapulomata mikadepe diyo. <sup>49</sup> Epalati mo edla opa hapulomata God yuye dlamentaiyo.

<sup>50</sup> Amasiyama Yu sotapo Polo dla elle pato himimama yia:ta tame God dla mikadepe dlalo po-Yu so patoto wola: mate epo mo dokopala so mateta siyalasiyaladlepo depame Polo wolo kokoye yia: watle mala-atlamaiyo. Epalati yia:tapo Polo woloye wotiyalle hapipame mo etle alikili dla dodolomsaliyo. <sup>51</sup> Epapalati Polo mate Banabas mate ma Ikoniom mo dla tlowedeme ha:ha:mama yia:ta Yu so dla alli koko nati-imama yia: hete sokopeye Yu so opa inoma dali dla hihiyoliyo.

<sup>52</sup> Amasiyama mikadepe dle soye Hela:dle Sokota poposatilimalati sisiyeiyo.

## 14

### *Polo mate Banabas mate Ikoniom mo dla ha:ha:le*

<sup>1</sup> Ikoniom mo dla Polo mate Banabas mate mamisika: Yu so inoma sumalalo aya dla God yu atlowedeme hetaiyo. Edla yia:ta itiyamale mate God yu atlamala dalepame Yu so hapuloma mate epo Guliki so hapuloma mate Lod dla mikadepe diyo. <sup>2</sup> Amasiyama Yu so opita Polo yu hala allimama mo so watle Polo kokoye isikimi mala-atlamsiyamaiyo, mo sota mikadepe dle so dla siyalasiyaladlepo depame. <sup>3</sup> Amasiyama dulu edla Polo mate Banabas mate Ikoniom dla weya alila selemalli ha:ha:iyo. Yia: edla ha:ha:mama powota:lalo God kokoye opa watle atlamha:ha:iyo. Epalati opata yia: yu dla mikadepe dlepo depame Lodta Polo mate epo Banabas mate dla ulugiyemale koko halowe itiyamale hamaiyo. <sup>4</sup> Epapalati mo dulu dla opata duka gladle pato elaiyo. Opa opita Polo wolo tiyama tle ha:ha:, epalati opa opita Yu so tiyama tle ha:ha: diyo.

<sup>5</sup> Epapele dulu edla Yu so tiyama tle ha:ha:lalo so mate epo yia: dokopala so mate Polo woloye ewalata siyomtimolowa depame yu ka:diyo. <sup>6-7</sup> Epalati Polo mate Banabas mate yu i dalepame Likaoniya mo pato dla potamalaiyo. Epo edla potame ha:ha:mama Listla mo mate epo Delebe mo mate epo mo yimlala opi mate dla God yu atlamsiyamaiyo.

### *Polo mate Banabas mate ma Listla dla tame ha:ha:le*

<sup>8</sup> Epame Listla mo dulu dla oplami hale ya:yata hammama mepo akoloyale hamaiyo. <sup>9</sup> Epapeleye ya: polomama Polota God yu atlamhallati woloma dalempolaiyo. Polota akoloyale oplami dla omhalemama malamaiyo, ya:ta mikadepe dleta ala:na ya:ye ka:dloweye. <sup>10</sup> Epedeme ya:ta akoloyale watle yu teta:le mate epo atlaiyo, “Wa:ye sila:tine,” diyo. Epalati akoloyale oplamita sila:tipame sela:iyo.

<sup>11</sup> Amasiyama opa alumaleta Polota oplami ka:dle natipame yu teta:limyemama Likaoniya yu mate epo atlamyaiyo, “Di godta opa some yiyepo pepele di tle dia: dla malana,” demyaiyo. <sup>12</sup> Epamyemama yia:tapo Banabasye yia: biskapa god pato Sus hi

sepiyo. Epame Poloye biskapa god hale Sus ya: yu hamsela:lalo oplami Helmes hi sepiyo. Adipalati, Polotapo alila hapuloma yu atlamsela:iyo.

<sup>13</sup> Sus god dla sisiyelalo ayaye mo kosukulli alikili dla polaiyo. Epeleye Sus god dla inoma sumalalo dokopala oplamita bulumkiyawa aliya mate plaplawa mate halopo puame mo kosukulli kokoloma dla hatitimaiyo. Adipalati, ya: mate epo mo so mate solotamaiyo, Polo mate epo Banabas mate dla sisiyemama aliya poyuluwedeme. Adipalati, yia: malamaiyo, Polo woloye semte god tepo depame.

<sup>14</sup> Amasiyama Polo mate epo Banabas mate koko i dalepame yia:ta alli kokoye opa dla nati-imama yia: tluka tallatalladiyo. Epame opa dulu dla ullumsiyamama yu teta:le mate epo atlamsiyamaiyo, <sup>15</sup> “Namkadulo, wua: adipapalati ipapele kokoye dia: dla hama:? Adipalati, di ma ta:la so, wua: epapelepo. Epeleye dita wua: dla yu ka:dle hampuapo, wua:tapo biskapa god eye memelepame ma pasakalo halemhallalo God dla mikadepe dlepo depame. Adipalati, ya:tapo pepele di mate epo ta:lamo mate epame kaula mate epo alisisi hapuloma dulu dla ha:ha:lalo mate mimita:puwapo. <sup>16</sup> Epedeme Godta ka:yapa opata miyelo solotamale koko halomyelati natipame pohumatlamdena. <sup>17</sup> Amasiyama wua:ta dulu edla ha:ha:lali Godta ya:ta bokotiyapo malamale nati-imama pepele di tle tiyo hamimduwapo, epame emale alisisita ka:depo matlepo depame gadle himmduwapo. Epo wua: dla dlowe alisisi pato hamipame ma wua: dla siyele hamimduwapo. Epedeme Godtapo ya:skamu ya: koko botomastamama koko hapuloma iye wua: dla halopimduwapo,” demyaiyo. <sup>18</sup> Epedeme Polo mate Banabas mate mo sota yia: watile sisiyemama aliya poyupo hapilowe koko atlamaleye api godlowedeme yia: watile yu pato sikemte atlamaiyo.

<sup>19</sup> Amasiyama Yu so opa opi Antiyoka mo tle epo Ikoniom mo tle pumulaiyo. Yia:ta puame mo sota siyalasiyaladlepo depame Polo koko dla isikimi mala-atlamyaiyo. Epalati opata siyalasiyaladepame Poloye ewalata kelepo mo alikili dla hallumtame himiyo. Epame yia: epo malamaiyo, yia:ta Poloye mo-yumulepo diyo. <sup>20</sup> Amasiyama mikadepe dle sota Polota ela dla tame alupo ha:ha:lali Poloye sila:tiyo. Epalati yimkata mo dulu dla ilame tamalaiyo. Epame ma-alallati Polo mate Banabas mate Delebe mo dla tamalaiyo.

### *Polo mate Banabas mate ma Siliya mo pato dulu dla Antiyoka dla ilame tale*

<sup>21-22</sup> Polo mate Banabas mate ma Delebe mo dla God yu atlamsiyamalati opa hapulomata mikadepe diyo. Epame yia: ma Delebe mo tle ma ilame mo opi Listla mate epo Ikoniom mate epame Antiyoka dla mikadepe dle soye mamisika: God yu mate gagademsiyamala taiyo, yia:tapo mikadepe dle dulu dla ha:ha:mama kokalepo ha:ha:lepo depame. Epammama yia:ta epo atlamsiyamaiyo, “Mikadepe dle so ditapo wotiyalle dulu tle God ya: mo koko dla ulatulupe,” demsiyamaiyo. <sup>23</sup> Epamsiyamama Polo wolotapo sos hapuloma dla dokopala so hohomtamalaiyo. Epame daya aiyalma depo ha:ha:mama inoma sumale mate yia:ye Lod do tama dla hatitimdiyo. Adipalati, yia:tapo Lod dla mo-mikadepe duwapo.

<sup>24</sup> Epame yia: Pisidiya mo tle ma Pampiliya mo dla pumulaiyo. <sup>25</sup> Yia: Pelega mo dla God yu atlepo gudepame matle Ataliya mo dla tuluiyo. <sup>26</sup> Epame Ataliya mo tle koa hame ma Siliya mo dla ulupo ma Antiyoka mo dla taiyo. Epedeme mo hema ka:yapa mikadepe dle sota Polo mate Banabas mate yia: hohopame mo opi dla God yu hamtaiya demama epo atlaiyo, “Godta wua: mate hallepe,” diyo. Epalati yia:tapo God yu mahame mo opi dla tame siyapo depo okota mogudlati ma i-ilapo puame yia: mo ikadepe Antiyoka dla woyamaiyo.

<sup>27</sup> Epedeme Polo mate Banabas mate puame Antiyoka dla woyapame mikadepe dle so hapuloma sisilapame hatlo alumaiyo. Epame yia:ta God yu hame mo hapuloma dla



atlamsiyamalati Godta yia: mate halale kokoye opa watle atlamaiyo. Epame Godta po-Yu sota mikadepe dlowe kokoloma dokostale koko mape atlamaiyo. <sup>28</sup> Epo gudepame Polo mate Banabas mate mikadepe dle so yimkadulo mate mo medla me-ha:ha:iyo.

## 15

### *Yelusalem dla po-Yu so koko esemale*

<sup>1</sup> Epapele dulu dla opa opi Yudiya tle Antiyoka dla puame po-Yu so mikadepe dle so watle imama epo atlaiyo, “Wua: Mosesta di watle kapala kestlowe koko imuwaye, e podolumalalo wekelepiye, wua: pasakalo hallowe pohalowa,” diyo. <sup>2</sup> Epalati Polo mate Banabas mate imale i dalepame allimama yia: mate yu dlomaiyo. Epapalati mikadepe dle sota Polo mate Banabas mate epo mikadepe dle so opi mate hohopo Yelusalem dla taiya diyo, yia:tapo tame Taiya dle so opa mate epo Yelusalem sos dokopala so mate koko iye woloma esemelepo depame.

<sup>3</sup> Yia: sostapo yia:ye taiya dlati tamalemama Ponesiya mo tle epo Samaliya mo tle tamalaiyo. Edla tamalemama sos hapuloma dla po-Yu sota yia: biskapa god melepame ma Yesu dla mikadepe dle kokoye atlamtamalaiyo. Epalati mikadepe dle so hapulomata koko i dalepame sikemte sisiyeiyo.

<sup>4</sup> Epapedeme yia:ta puame Yelusalem dla woyamalati sos dokopala so mate Taiya dle so mate epame mikadepe dle so hapulomata yia: natipame sikemte sisiyeiyo. Epalati Polo mate Banabas mate Godta yia: tle oko halë kokoye yia: watle atlamaiyo. <sup>5</sup> Amasiyama mikadepe dle so opa opi Pa:lisi so alumale dulu tle sillipame epo atlaiyo, “Po-Yu sota pasakalo gadle halowa dlepiye, yia: ka:dena, kapala kotipo Mosesta aiyalma hatitimale dolumsiyamoloweye,” diyo.

<sup>6</sup> Epapalati Taiya dle so mate dokopala so mate yu i dulu kokoye woloma es-emolowedeme hatlo alumaiyo. <sup>7</sup> Alila selemalli dulu dla koko i esempopa:pame Pitata sila:time epo atlaiyo, “Namkadulo, wua: malamaiya. Ka:yapa Godta wua: dulu tle na:ye ma-hamuwapo, po-Yu so watle God yu hamtelepo depame. Epalati yia:tapo na: tle God yu dalepame mikadepe duwapo. <sup>8</sup> Epalati God opa dupa dulu natilalotapo po-Yu sota mikadepe dle koko i natipame ka:pi duwapo. Adipalati, ya:ta koko iye mikadepe demama ya: Hela:dle Sokoye dia: dla hamiwa epammama ma yia: dla hamiwapo. <sup>9</sup> Epedeme Godta natili dulu dla di Yu so mate epo po-Yu so mate pomeyelo-pedesema. Epapedeme yia:ta mikadepe dlati Godta yia: bobtalimaleye mo-howahapo woweluwapo. <sup>10</sup> Epedeme wua: God elemala natimiya. Epame po-Yu so mikadepe dle soye Mosesta aiyalma hatitimale dolumelepo depame ha:ha:limiya. Wua:ta epapelepiye, wua:ta yia: watle upiyele alisisi epapele some goludemama apelepe. Adipalati, dia: mate epo di mamadulo mate woloma upiyele alisisi eye pohampuana. <sup>11</sup> Amasiyama di mikadepe dema, di Lod Yesu di watle bokotiyapo malamale tle pasakalo hallowe hamiwaye, epammama po-Yu so mape api hatlo metle pasakalo hallowe halepe,” diyo.

<sup>12</sup> Epalati alumale patotapo Pita yu dalepame yu dimi popa:iyo. Epo yia:ta yu dimi popa:lati Polo mate Banabas mate Godta yia: tle ulugiyemale koko po-Yu so dulu dla halomsiyamaleye yia: dla atlamaiyo.

<sup>13</sup> Yia:ta yuhapo gudlati ma Yeimsta sila:time epo atlaiyo, “Namkadulo, na: yu daliya. <sup>14</sup> Saimon Pitata di watle ma-atlalepo, Godta ka:yapa po-Yu soye ya:ta bokotiyapo malamale tle ya: akimlala depo hohomale kokoye. <sup>15</sup> Epapedeme koko itapo God tle yu hapame molo atlalo sota atlamale yu mate ma-ala:po. Adipalati, God yu buka dla yu ilimaleta ipo elapo,

<sup>16</sup> ‘Koko i gudlati na: matle ilame puluwepo.

Adipalati, Dokopala oplami Deibidita omhaluwa mo kokoye aya epapele some mo-kitlotame elapo.

Amasiyama na:ta puame dinapopame  
mamisika: halowepo.

<sup>17</sup> Epedeme na:ta sisilamale po-Yu so opa hapulomatapo na:ye totamelepe.

<sup>18</sup> Epapedeme opata koko i malamelepo depame  
Lodtapo mo-powataliya atluwapo.'

<sup>19</sup> Epapedeme na: posolotamasema, dita po-Yu sota God hala dla puluwe api himomol-  
loweye. <sup>20</sup> Amasiyama di isikimi yu ilimale tlo po-Yu so watle hamimama epo atlowepo,  
'Wua: biskapa god watle hamili dlowe alisisi halopo podlowa. Adipalati, dlowe alisisi  
eye mo-batalimalepo. Epame batalimale koko opa uhalomolowe mate wola: uhalo-  
molowe mate pohalomolowa. Epame omali podlowa, epammama mo ma ala omali  
mate hallati podlowa.' <sup>21</sup> Epedeme po-Yu soye woloma koko i dolumha:ha:lowe ka:pi.  
Adipalati, mo-powataliya Yu sotapo mo hapuloma dulu dla yia: inoma sumalalo aya  
dla ipapele kokoye halomiyo demama haliyamale dla ma-atlamduwapo. Epammama  
yia:tapo Mosesta aiyalma hatitimaleye inoma sumalalo alila hapuloma dla opa watle  
ma sesa:po imduwapo."

*Yu ilimale po-Yu so mikadepe dle so watle hamili*

<sup>22</sup> Epame Taiya dle so mate epo sos dokopala so mate epo mikadepe dle so hapuloma  
matetapo solotamale himpame opa opi hohopo Polo wolo mate ma Antiyoka dla taiya  
diyo. Epammama yia:ta dokopala so alumale dulu tle opa iwolo hohomaiyo, Yudas  
Balesabas mate Saeles mate. <sup>23</sup> Epalati yia:ta yimkata Antiyoka dla tamalemama yu  
ilimale i hame tamalaiyo,

"Epedeme namkadulo, di Taiya dle so mate epo sos dokopala so mate yu iye ilima.  
Epapedeme di yu iye po-Yu so mikadepe dle so hapuloma Antiyoka dla epo Siliya dla  
epo Kilikiya dla ha:ha:lalo so wua: dla hamima.

<sup>24</sup> Epapedeme di alumale dulu tle opa opita tame wua: dla yiyilamale koko imalati  
wua:ta sikemte momalamuwaye di me-daluwa. Amasiyama dita yia: watle atlali po-  
apena. <sup>25-27</sup> Epapedeme di ma Polo mate Banabas mate ma ilame wua: dla taiya  
dema. Adipalati, opa iwoloye Lod Yesu Keliso koko dla yia: pasakalo hatitimoloweye  
po-allisemde. Epele dulu dla dita solotamale tle di alumale dulu dla Yudas mate  
Saeles mate hohomuwa, yia:ta Polo wolo mate wua: hala dla telepo depame. Epedeme  
yia:tapo wua: dla tame yu hatlo dita ilimale iye atlamelepe.

<sup>28</sup> Adipalati, di Hela:dle Soko mate malamale ma-hatlope depo himiwapo. Epedeme  
di wua: watle upiyele hale pohamilowa. Amasiyama wua: isikimi koko hatlo itlo  
dolumaiya. <sup>29</sup> Wua: biskapa god watle hapili dlowe alisisi halopo podlowa. Epame  
omali podlowa, epammama mo ala omali mate hallati podlowa. Epame batali-  
male koko wola: uhalowe epo opa uhalowe mate pohalomolowa. Wua:ta di yu i  
dolumha:ha:lepiye, eta wua:ye ka:depo ha:ha:lepe.

Eso namkadulo, di yu epo."

<sup>30</sup> Epedeme opa iwolota yu ilimale i hame Yelusalem tle Antiyoka dla ma-tamalaiyo.  
Epame yia: Antiyoka dla puame woyapame opa hapuloma sisilapame yu ilimaleye yia:  
watle hamiyo. <sup>31</sup> Epalati Antiyoka sos sotapo gadle yu ilimale i sesa:pame sikemte  
sisiyeiyo. <sup>32</sup> Epame God tle yu hapame molo atlalo so Yudas mate Saeles mate gadle  
yu atlamama mikadepe dle so dla itiyamale hamiyo. <sup>33</sup> Epame alila opi Antiyoka dla  
ha:ha:po gudlati mikadepe dle sota Yudas mate Saeles mate ma Yelusalem dla woloma  
i-ilapo taiye diyo. [ <sup>34</sup> Amasiyama yia:tapo ilame ma-tamallati asiyama Saeles tlo  
Antiyoka medla halli diyo.] <sup>35</sup> Epalati Polo mate Banabas mate Antiyoka mo dla me-  
ha:ha:mama opa opi mate God yu atlamha:ha:iyo.

*Polo mate Banabas mate duka gladepe tale*

<sup>36</sup> Alotle alila haleta Polotapo Banabas watle epo atlaiyo, “Di matle ilame tame dita ka:yapa Lod yu hamtauwa mo yimlala hapulomaye tlamtlowa. Adipalati, na: edla mikadepe dle so ha:ha:ye sikemte malamama yia: tame natilowe solotama,” diyo. <sup>37</sup> Epalati Banabasta solotamaiyo, Yon Makaye ya:ta semtlowedeme. <sup>38</sup> Amasiyama Polo posolotamaiyo, Banabasta Yon Maka semtloweye. Adipalati, yia:ta ka:yapa tale dulu dla Yon Makaye hamalati ya:ta oko dla hutulli woloma ponatiyo. Epapele koko tle Yon Makatapo yia:ye Pampiliya mo tle saliyome ilamtaiyo. <sup>39</sup> Epalati Polo mate Banabas mate sikemte yu dlopo yimkata siyamale tle duka gladepe ma meyelope meyelope depo tamalaiyo. Epammama Banabasta Yon Maka seme Saiples hasu dla koa tle uliyo. <sup>40</sup> Epalati asiyama Polota Saeles tlo saiyo, ya: mate tloweye. Epalati mikadepe dle sota yia:ye taiya demama epo atlaiyo, “Taiya, Lodta gadletapo wua: mate hallepe,” diyo. <sup>41</sup> Epapalati yia:ta tame Siliya mo mate epo Kilikiya mo mate dla mikadepe dle soye God yu mate gagademsiyamama itiyamale hapimsiyamaiyo.

## 16

### *Timotita Polo mate tale*

<sup>1</sup> Polo wolota tame Delebe mo dla woyapame ma Listla mo dla tame natilati mikadepe dle oplami hale halaiyo, ya: hiye Timoti. Timoti ya: waiye mikadepe dle Yu a:yayo. Epalati ya: a tlo Guliki oplamiyo. <sup>2</sup> Epapeleye mikadepe dle so Listla dla ha:ha:lalo mate Ikoniom dla ha:ha:lalo mateta Timotiye koko ka:dle oplami demdiyo. <sup>3</sup> Epapele dulu dla Polota solotamaiyo, Timoti mate sela:lowedeme. Amasiyama Yu so hapuloma edla ha:ha:le soye me-yia:malamaiyo, Timoti ya: aye Guliki oplami. Epapedeme Polota Yu sota sisiyelepe depame Yu so yia: toto koko dolumama Timoti hamame kapala kestaiyo. <sup>4</sup> Epalati Polo wolota Taiya dle so mate epo dokopala so mateta Yelusalem dla yu ilimaleye opata dolumelepe depame mo hapuloma dla yu e atlamsiyamaiyo. <sup>5</sup> Epapalati mikadepe dle sota mo-pasatamtamama sos hapulomata itiyamale mate hutiyemtaiyo.

### *Godtapo Poloye Makedoniya dla tane dle*

<sup>6</sup> Polota yimkadulo mate tame Asiya dla God yu atlamoloweye Hela:dle Sokota api himomeliyo. Epalati yia:tapo tamalemama Piligiya mo ka: epo Galasiya mo ka: duka tle tamalaiyo. <sup>7</sup> Epame yia:tapo Misiya mo mateka:pi dla puame woyapame ma Bituniya mo dla tlowedeme apalati Yesu ya: Sokota yia: api himomeliyo. <sup>8</sup> Epapalati yia: Misiya mo tla:me ma Tlowas dla tuluiyo.

<sup>9</sup> Yia: Tlowas mo dla puame woyamale utula:la oloma edla Polotapo ya: inomata meyelope dlati Makedoniya oplami natiyo. Oplami etapo ya: watle otele mate epo atlaiyo, “Wa: kaula ulumpuame Makedoniya dla di gadene,” diyo. <sup>10</sup> Epapele dulu dla di Godta dita Makedoniya so watle ka:dle yu hamtelepe depame di taiya duwa kokoye malapame Makedoniya dla tlowedeme me-dinapuwa.

### *Lidiyata mikadepe dle koko*

<sup>11</sup> Di koa hame Tlowas mo melepame Samoteleis hasu dla uluwa. Edla hutiyepo alallati ma Neyapolis dla uluwa. <sup>12</sup> Epame etle ma ta:la api Pilipi dla tauwa. Mo iye Makedoniya mo dulu dla mo pato halepo. Loum so mape mo hema me-ha:ha:uwa. Epalati di mo edla alila pasatale sepele ha:ha:uwa.

<sup>13</sup> Epame di Yu so inoma sumalalo alila dla aloma pili dla tulumuluwa. Adipalati, di malamauwa, Yu soye edla inoma sumdeyo depame. Epame edla tulumu wola: opi edla popa:lali yia: watle yu atlampopa:uwa. <sup>14</sup> Wola: edla di yu dalempopa:uwa dulu dla Tayatila dla hallalo a:ya hale poluwa, ya: hiye Lidiya. A:ya ya: okoye tluka omteka:ple kolepame mani halowedeme opa watle asiyama mate hapimhalemidiyo. Epame ya: mape Yu so yia: God dla mikadepe demdiyo. Epapeleye Polota yu atlampollati Godtapo a:ya ita yu woloma ka:depo halepo depame ya: gaduwa. <sup>15</sup> Epapele koko tle ditapo

ya: mate epo ya: aya dulu dla ha:ha:lalo so mate yú dla ka:ka:timuwa. Epalati ya:tapo dia:ye ya: aya dulu dla elemhetlowedeme epo atluwa, “Wua:tapo na:ye ikadepe Lod dla mikadepe dlalo a:ya dlepiye, wua: matame na: aya dulu dla na: mate ha:ha:iya,” duwa. Ya:ta epo atlati asiya dita ya: mate ya: aya dla hetame ha:ha:uwa.

*Polo mate Saeles mate amtuwale aya dla ka:ka:timale*

<sup>16</sup> Alila haleta di inoma sumolowedeme aloma pili dla tulumha:ha:lali oplami hale ya: oko a:yata duka dla di umuwa. Epapeleye a:ya itapo ilama ya:nasamata ya: dla kukutupo hallati ya:tapo opa watle amile dla koko wowoyamoloweye momolo atlamsela:mdiyu. Ya:ta epamsela:lali ya: patoto sota mani pato hamdiyo. <sup>17</sup> Epapeleye a:ya itapo di ko tle pumama yu teta:le mate epo atlempuwa, “Opa iwoloye di dla hallalo God ikadepe ya: oko sopo. Epedeme ya:tapo wua:ta pasakalo halowe apiye atlamsiyamapo,” duwa. <sup>18</sup> Epame ma ya:tapo alila hapuloma dulu dla di watle mepo atlamsela:mduwa. Epalati Polota alimama helestame ilama ya:nasama ya: dulu dla hala watle epo atluwa, “Na: Yesu Keliso hi tle wa: watle atlema, wa: ya: tle alikili dla ulatane,” duwa. Epalati pakasiyamalalo ilama ya:nasamatapo ya: tle alikili dla ulatauwa.

<sup>19-20</sup> Epapalati a:ya ya: omha:ha:lalota ya:ta mani halalo api kestale natipame puame Polo mate Saeles mate hohopame gamani so dla elemtauwa. Yia: Polo mate Saeles mate elemtame haliyamale dla ipila:pame Loum gamani so watle epo atluwa, “Opa iwoloye Yu sopo. Epame ya:tapo di mo dulu hema siyaladle ta:demsiyama. <sup>21</sup> Epapedeme ya:ta imale kokotapo di Loum so aiyalma mate po-ala:sema. Epedeme di Loum sotapo ya:ta imale koko halowe poka:dena,” duwa.

<sup>22</sup> Epammama mo so hapulomata Polo mate Saeles mate sikemte alliwa. Epalati gamani sota yia: opa watle Polo mate Saeles mate yia: tlukaye tallatalladepame uptipo dali mate hohopoliya duwa. <sup>23</sup> Epalati opata yia:ye sikemte hohopolepame amtuwale aya dulu dla ka:ka:timuwa. Epame ya:ta amtuwale aya omhallalo oplami watle epo atluwa, “Wa: woloma yia:ye omhalane,” duwa. <sup>24</sup> Epapalati dalepame amtuwale aya omhallalota aya dulu ikadepe kokoloma gowaladepame Polo mate Saeles mate elemtuwame aya dulu edla yia: heteye dali opokoko dulu dla hatitipame elota siyomaiyo.

<sup>25</sup> Utula:la dukuslopi oloma dla hallati Polo mate Saeles mate inoma sumpopa:mama siyele sala God watle dodolumpopa:iyo. Epapalati amtuwale aya dulu dla ha:ha:lalo so yimkadulo ma me-dalempopa:iyo. <sup>26</sup> Epalati pakasiyamalalo allutuwale patota tumama amtuwale aya holuiyo. Epammama amtuwale aya kokoloma hapulomaye dodokotimaiyo. Epame oli deata amtuwale aya dulu dla ha:ha:lalo so kokotipoliyeleye miyelo suwasuwadiyo. <sup>27</sup> Epapele dulu dla amtuwale aya omhallalota sila:time natitepo kokoloma hapuloma dodokotipo halla natiyo. Epapala natipame ya:ta malamaleta amtuwale aya dulu dla ha:ha:lalo so hapuloma mo-potayo depame aipa:ya hame ya:skamu yumuluwedeme apiyo. <sup>28</sup> Amasiyama Polota yu teta:le mate ya: watle epo atlaiyo, “Wa:skamu yummiya. Dita hapuloma ala me-ha:ha: ini,” diyo.

<sup>29</sup> Epalati amtuwale aya omhallalota ya:mkale watle tuloma hampuane diyo. Epame tuloma hame amtuwale aya dulu dla kukulumtuwame wota:mama eseselalle mate Polo mate Saeles mate yia: hete sitali dla alumata kellepo polaiyo. <sup>30</sup> Epame Polo mate Saeles mate alikili dla elemtuwame yia: watle epo atlaiyo, “Opa, na: apa koko hapo pasakalo hallowe hapa:?” diyo.

<sup>31</sup> Epalati Polo mate Saeles mate ya: watle epo atlaiyo, “Wa: Lod Yesu dla mikadepe dene. Eta wa:ye pasakalo hallowe halepe. Epedeme wa: mate epo wa: aya dulu dla ha:ha:lalo so mateta Lod Yesu dla mikadepe dlepiye, eta wua: pasakalo hallowe halepe,” diyo.

<sup>32</sup> Epame ya:tapo Polo mate Saeles mate ya: aya dla elemtaiyo. Epalati Polo wolotapo ya: mate epo ya: aya dulu dla ha:ha:lalo so mate dla Lod yu atlamaiyo. <sup>33</sup> Epapalati utula:la edla amtuwale aya omhallalo oplamita Polo woloye opata hohopolemama

kapala kotimaleye howahalomaiyo. Epame oloma edla Polo wolota amtuwale aya omhallalo oplami mate epo ya: aya dulu dla ha:ha:lalo so mate yú dla ka:ka:timaiyo. <sup>34</sup> Yia:ye yú dla ka:ka:timalati asiyama amtuwale aya omhallalo oplamita Polo mate Saeles mateye ya: aya dla elemtame daya ilimaiyo. Epame ya: mate epo ya: aya dulu dla ha:ha:lalo so mate yia:ta God dla mikadepe dle koko dla sikemte sisiyeiyo.

<sup>35</sup> Epo utulalati gamani sota yia: opaye amtuwale aya omhallalo oplami watle taiya demama epo atlaiyo, “Polo woloye ma alikili dla woyamelepo,” diyo. Epalati yia:ta tame amtuwale aya omhallalo oplami watle Polo wolota alikili dla woyamolowe yu gamani sota atlaleye ya: watle atlaiyo.

<sup>36</sup> Epalati amtuwale aya omhallalo oplamita yu i dalepame tame Polo watle epo atlaiyo, “Gamani sota atlemama, wua:ye ma-taiya duwo. Epedeme wua: woloma taiya,” diyo.

<sup>37</sup> Amasiyama Polota gamani sota taiya dle opa watle tame epo atlaiyo, “Wua: patoto sotapo di kokoye woloma pogladena. Epammama yia:tapo wua: watle itiyamale hamilati wua:tapo dia:ye opa inoma dali dla hohopoluwapo. Epapedeme yia: poka:dena, Loum mo so ikadepe dla epapele koko haloweye. Adipalati, na: mate Saeles mate di ma Loum mo so opa ikadepepo. Epapele tlope wua:tapo dia:ye hohopoluwapo. Epame wua: patoto sota dia:ye amtuwale aya dulu dla ka:ka:timuwapo. Ma epame yia:tapo dia:ye amtuwale aya tle hemele alikili dla eleme woyamolowedeme apopa? Poka:dena, epapoloweye. Epedeme miyelo puame dia:ye amtuwale aya itle alikili dla eleme woyamolowe ka:pi,” diyo.

<sup>38</sup> Epalati gamani sota taiya dle opata ma ilame tame Polota atlale yuye gamani so watle atlaiyo. Epapalati gamani sota Polo mate Saeles mateye ikadepe Loum soyo dlati dalepame sikemte yiyelepame wowota:iyo. <sup>39</sup> Epame miyelo puame Polo mate Saeles mate dla namkale dle yu atlaiyo. Epo yia:ye amtuwale aya dulu tle alikili dla eleme woyamama epo atlaiyo, “Wua: wata mo itle alikili a:ma woyapo taiya,” diyo.

<sup>40</sup> Epalati Polo mate Saeles mateta amtuwale aya dulu tle woyapame Lidiya aya dla taiyo. Edla tame mikadepe dle so dla gadle yu atlapame ma-tamalaiyo.

## 17

### *Polo mate Saeles mate Tesalonika dla tale*

<sup>1</sup> Polo mate Saeles mateta Tesalonika mo dla tamalemama Ampipolis mo mate epo Apoloniya mo mate tetla:po tamalaiyo. Epele dulu dla Yu so inoma sumalalo ayaye Tesalonika mo dla polaiyo. <sup>2</sup> Polo ma mo edla meyelo aplalo epammama Yu so inoma sumalalo aya dla hetaiyo. Epame Yu so inoma sumalalo alila dapahatlope dulu dla Polota God yu buka dulu tle Yu so watle Keliso kokoye haliyamale dla imdiyo. <sup>3</sup> Ya:tapo God yu imama epo atlemdiyo, “Godtapo yu me-himiwapo, ya:ta sale Kelisotapo wotiyalle hapame popo ma powale tle pasakalo dloweye. Epedeme na:tapo wua: watle Yesu koko atlamhala iye Kelisopo. Ya:ye Godtapo sepame tane dle oplami ikadepe wua:ta omha:ha:uwapo,” demdiyo.

<sup>4</sup> Epalati Yu so opitapo Polo mate Saeles mate yia: yu dla dalepo mikadepe demama yia: mate hatlope demdiyo. Epalati God dla mikadepe dle Guliki so mate epo patoto so wola: opi mate yia: mape mikadepe demama Polo wolo mate hatlope demdiyo.

<sup>5</sup> Amasiyama Polo yu dla pomikadepe dle Yu sotapo Polo wolo dla sikemte elle pato himiyo. Epammama yia:tapo mo dulu dla poka:ka:depo siyamalalo opa hohopame alumale tipo siyaladle ta:diyo. Yia:ta siyaladle ta:depame Yason aya dla ullumtame Polo mate Saeles mate hohopo opa inoma dali dla ipila:lowedeme totamaiyo. <sup>6</sup> Amasiyama yia:ta Polo wolo ponatilalo wekelati Yason mate mikadepe dle so opi mate hohopame mo dokopala so dla elemtaiyo. Epalati siyaladle ta:dlalo sota dokopala so watle yu teta:le mate Polo wolo koko dla epo atlamyaiyo, “Opa iwolotapo mo hapuloma dla opa



watle yiyilamale koko imsiyamama ma di mo hema mo-puwapo. <sup>7</sup> Epalati oplami Yason itapo yia:ye hohopame ya: aya dla elemhetame halapo. Epedeme opa iwolotapo di pato oplami Sisata aiyalma hatitimaleye hauwokokomsiyama. Adipalati, yia:ta atlemama Sisaye podi pato oplami, amasiyama oplami hale, Yesu tlo di pato oplami demde,” demyaiyo.

<sup>8</sup> Epalati mo so mate dokopala so mate yu i dalepame sikemte yiyelepame alliyo.

<sup>9</sup> Epame dokopala sota asiyama mani hatitimaiya dlati Yason wolotapo dokopala so watle mani hatitipame alikili dla woyamaiyo.

### *Polo wolota Beleya mo dla tale*

<sup>10</sup> Epo utula:la oloma edla mikadepe dle sota Polo mate Saeles mate Beleya dla taiya diyo. Epalati yia:ta Beleya dla tame Yu so inoma sumalalo aya dla hetaiyo. <sup>11</sup> Epapele dulu dla Polota Tesalonika dla halale oloma edla Yu so edla ha:ha:leta ya: yu dallowe alliyo. Amasiyama Beleya mo hema Yu sota Polota God yu atlanti hutulli mate ya: yu hapame yu e ya: dulu kokoye woloma totamdiyo. Epame yia:tapo Polota imaleye mikadepeta: depame alila hapuloma dulu dla God yu buka sikemte sesa:mha:ha:mdiyo. <sup>12</sup> Yu sota mikadepe dlati Guliki so patoto wola: opi mate epo opa opi mate yia: ma mikadepe diyo.

<sup>13</sup> Amasiyama Tesalonika dla ha:ha:lalo Yu sota Polo woloye Beleya dla God yu atlamha:ha:uwo dla dalepame yia: ma Beleya dla pumulaiyo. Yia: Beleya dla puame mo so watle Polo wolo kokoye isikimi mala-atlamalati opata siyaladle ta:diyo. <sup>14-15</sup> Epapalati Saeles mate Timoti mate Beleya mo medla me-ha:ha:lali mikadepe dle sota Polo tlo hapele koa sitali dla semtuluiyo, ya:tapo etle koa hame Atene mo dla telepo depame. Epame yia: Atene mo dla tame woyamalati Polota ya: semtale so watle epo atlaiyo, “Wua: ilame tame Timoti mate epo Saeles mate atlaiye, yia: ma hapele na: hala dla pumullupo,” diyo.

### *Polota Atene mo dla God yu atlale*

<sup>16</sup> Polo ala Atene dla Saeles mate Timoti mate omhalaiyo. Ya: edla yia: omhalemama natilati mo dulu dla opata dota mimita:ple biskapa godta wokasepo elaiyo. Epalati tlapame ya: dupa dulu dla upiyele patota elemama sikemte momalamaiyo. <sup>17</sup> Epame Yu so inoma sumalalo aya dla Yu so opi mate epo God dla mikadepe dle Guliki so mate esemdiyo. Epame alila hapuloma dulu dla mo duka dla isikimi siyamalalo so mate yuhamsiyamdiyo.

<sup>18</sup> Epalati Epikuliya alumale dla ha:ha:lalo malamale patoto so mate epo Sitoiki alumale dla ha:ha:lalo malamale patoto so mateta puame Polo mate esemama yu dlomaiyo. Epame Polota Yesu koko mate epo palli sota ma palli tle silluwe koko mateye yia: watle atlanti dalepame asiyama yia:tapo epo atlamyaiyo, “Oplami iye ya:ta atla ya: dulu kokoye yeliyena. Ya: apa koko imolowedeme amsela:ma:?” demyaiyo. Epo opita epo atlamyaiyo, “Ya: di watle mo opi yia: god kokoye imolowedeme amsela:mama apeyo,” demyaiyo.

<sup>19</sup> Epedeme yia: Polota ya:ta imsela: kokoye woloma atlepo depame Aleopagi tamali di dla patoto sota esemale dla semtamalaiyo. Edla semhetame yia:tapo Polo watle epo atlaiyo, “Wa:ta imale amko hamsela:ye di watle woloma atlane. <sup>20</sup> Adipalati, wa:ta imsela:ye di podimalamana. Epedeme di woloma dallowe solotama,” diyo. <sup>21</sup> (Epalati Atene dla ha:ha:lalo so mate epo mo opi tle pumhalale so mate alila hapuloma yia:ta solotamale koko halowe alilaye memelepame ma isikimi imale amko koko tlo esemha:ha:mama yu some balemha:ha:mdiyo.)

<sup>22</sup> Epame Polotapo alumale dulu tle sila:time halemama epo atlaiyo, “Atene so opa, wua: na: yu daliya. Wua: api pasatale tle god hapuloma dla sisiyele hapilowe mo-wua:malamana. <sup>23</sup> Adipalati, na:ta wua: mo dulu dla tlamsele:mama wua:ta sisiyelalo

god tlamuwaye meyeloape meyeloape dle tlamuwa. Epo dulu edla god hale dla siyele yu ipo ilimale ella natiwa, 'Opata pomalamalalo wekelalo god watle sisiyelalo aya,' dleye natiwa. Epedeme wua: ponatilalo wekelalo God dla mikadepe demdepo. Epapeleye na:tapo wua: watle God e ya: kokoye atlowepo.

<sup>24</sup> Epapedeme God etapo ta:lamo pato mate pepele di mate yia: Lod depo halapo. Adipalati, ta:lamo mate epo pepele di mate epame dulu dla ha:ha:lalo alisisi hapuloma mateye hatlo ya:ta mimita:puwapo. Epedeme ya: opata dlopi dota halë aya dla pohalase mde. <sup>25</sup> Epapedeme God itapo pasakalo mate alisisi hapuloma mate opa dla hapilalo halapo. Epapedeme dita ya: gadloweye api hawa. Adipalati, ya: dla alisisi hapuloma ya: mate ma-ala:po halapo.

<sup>26</sup> Epedeme Godta ka:yapa oplami hatlo mita:puwapo. Epame oplami hatlo ya: tle ta:lamo patoye opa mila:pi meyeloape meyeloape dleta pasatauwapo. Epame Godtapo yia: mo sukulu mate alila sukulu mate ma hatitimuwapo. <sup>27</sup> Adipalati, Godtapo solotamuwapo, opatapo inoma pa:talo so some ya: totapame ya: natilipo depame. Amasiyama ya: dia: tle pateka:mu dla pohalase ma. <sup>28</sup> Adipalati, dia:ye ya:ta itiyamale tle siyamama ha:ha:po. Epedeme yu iye wua: opata atlamale yu mate ma-ala:na. Adipalati, ka:yapa wua: dulu dla haluwa oplami haleta ipo atluwapo, 'Di ma God ya: akimlalapo,' duwapo.

<sup>29</sup> Di God ya: akimlala depo ha:ha:mama po-ipo malamolowa, 'Godye dlopi opata ewala mate epo alisisi opi mate mita:pena,' depo pomalamolowa. <sup>30</sup> Epalati Godtapo opaye amka:yapa epapele koko dulu dla me-ha:ha:lali po-atlemdena. Adipalati, yia: God ikadepeye yeitapo ha:ha:iyo. Amasiyama wata oloma hema Godta epo atlapo, 'Opa hapuloma mo hapuloma dulu dla wua: bobtalimale tle heheletimaiya,' depo. <sup>31</sup> Adipalati, ya:ta alila me-himiwapo, ta:lamo so hapuloma yia: kokoye woloma ka:pi gladloweye. Eye ya:ta ka:yapa sale oplamita apelepe. Epedeme Godtapo yu hema mikadepe demama ya:ta sale oplamiye powale tle ma-ta:duwapo."

<sup>32</sup> Polota imale koko tle opata Yesuta powale tle sila:tili dalepame opita eimelemyaiyo. Amasiyama opita Polo watle epo atlamyaiyo, "Di koko iye mamisika: dallowe solotama," demyaiyo. <sup>33</sup> Epame Polo yu atlepo gudepame ma-taiyo. <sup>34</sup> Amasiyama dulu edla opa opitapo Polo yu dalepame mikadepe depame ya: mate hatlope diyo. Polo yu dla mikadepe dle so dulu hema oplami hale Dainosus, Aleopagi alumale dulu dla hallalo oplami. Epo a:ya haleye Damalis epame opa opi mape mikadepe diyo.

## 18

### *Polota Kolin mo dla halale*

<sup>1</sup> Polota Atene mo dla halepame ma Kolin mo dla taiyo. <sup>2</sup> Ya: mo edla tame Yu oplami hale umaiyo, ya: hiye Akwila, ya: mo ikadepeye Pontus. Oplami iye ya:llu Plisila mate ala Itali mo tle Kolin mo dla pumulaiyo. Adipalati, Sisa Kolodiyasta Yu so hapulomaye Loum tle alikili dla dodolomsaliyo. <sup>3</sup> Epapeleye Polota tame oplami Akwila mate ya:llu Plisila mate yia: aya dla yimkata ha:ha:iyo. Adipalati, yia: yimkata tlukata aya halomalalo oko hamha:ha:iyo. <sup>4</sup> Yu so inoma sumalalo alila hapuloma dla Polotapo Yu so mate Guliki so mate Yesu dla mikadepe dlepo depame yia:ta inoma sumalalo aya dla Yesu kokoye esemsela:iyo.

<sup>5</sup> Epalati Saeles mate Timoti mate Makedoniya tle Polo hala dla pulati Polotapo ya: oko melepame alila hapuloma dla isikimi God yu atlowe kotiyapo sela:iyo. Epammama ya:tapo Yu so watle Yesu koko haliyamale dla imsula:mama Yesuye Godta sale Kelisopo demsula:iyo. <sup>6</sup> Amasiyama yia:ta Polota imale yu halowe allimama ma Polo watle putlomale yu atlamyaiyo. Epalati Polota Godta kasilamale kokoye yia: watle imama ya: tluka ullu ka:ka:lepame yia: watle epo atlaiyo, "Na: wua: yilo oko pato ma-hauwapo. Epapele tlope wua:ta pasakalo hallowe pohalalo wekelepiye, mo-wua: batalimalepo,

amasiyama pona: batalimale. Epapedeme na: wata oloma itle ma po-Yu so dla God yu hamtlowepo,” diyo.

<sup>7</sup> Epame Polo Yu so inoma sumalalo aya melepame ma mateka:pi po-Yu oplami Titiyus Yustus aya dla halla taiyo. Oplami iye Yu so God dla mikadepe dlalo oplamiyo. <sup>8</sup> Epo dulu edla inoma sumalalo aya dokopala oplami Klispus mate epo ya: aya dulu dla ha:ha:lalo so mate Lod Yesu dla mikadepe diyo. Epame Kolin so opi mape Polo yu dalepame mikadepe dlati yia:ye yú dla ka:ka:timaiyo.

<sup>9</sup> Epo utula:la haleta Lodta Polo inoma meyelope depame ya: watle epo atlaiyo, “Wa: ase wota:miya. Epame wa:ta yu atlemsela:ye melemiya. <sup>10</sup> Adipalati, na:tapo wa: mate hallepe. Epalati oplami haleta wa: watle wotiyalle pohamilowa. Adipalati, Kolin mo pato dulu hema na:ta sesa:le so opa hapuloma me-ha:ha:po,” diyo.

<sup>11</sup> Epalati Polota Kolin mo dla God yu imhalemama sokomoko hatlo hamastapame epo ma sokomoko hale kotiyapo tamama mama 6 tlo pololiyo.

### *Yu sota Poloye gamani oplami Galiyo watle hamame hetale*

<sup>12</sup> Loum oplami Galiyota Kolin mo dla halemama Akaya mo pato omhalaiyo. Epapel-eye Polota Kolin mo dulu dla God yu insela:lali Yu so hapulomatapo allimama Poloye Galiyo watle hamame pumulaiyo. <sup>13</sup> Epammama yia:ta Polo hamampuame Galiyo watle epo atlaiyo, “Oplami itapo api hale tle God dla sisiyelowe insela:mama di aiyalma mate po-ala:msela:sema,” diyo.

<sup>14</sup> Epame Polo ala yu hale atlowedeme hallati Galiyotapo Yu so watle epo atlaiyo, “Yu so, wua: batalimale koko patoto na: dla halopo pumatiye, eta na:ta wua: koko woloma gladle mla. <sup>15</sup> Amasiyama wua: aiyalma koko tle yimka:mala koko hampudeme muwolo gladepame ka:diya. Epedeme na: epapele koko gladlowe alima,” diyo. <sup>16</sup> Ya: yu iye yia: watle atlapame koko gladlalo aya tle ma-taiya diyo.

<sup>17</sup> Epame opa hapulomata inoma sumalalo aya dokopala oplami Sostenesye ham-pame hopoliyo. Amasiyama Galiyotapo koko i natipame ya: dla pokoko diyo.

### *Polota Antiyoka dla ma ilamtale*

<sup>18</sup> Polo Kolin mo dla mikadepe dle so mate alila pasatale halaiyo. Epame ya:ye Siliya dla ilame tlowedeme halemama Akwila mate Plisila mate yimkata Kenekeleya mo dla pumulaiyo. Edla puame Polo ya:ta God mate yu itiyamale himili dolumama ya: kokosase kestaiyo.\* <sup>19</sup> Epame yia: koa hapame ma Epeses dla uliyo. Epeses dla tame woyapame Plisila mate Akwila mate medla pomeliyo. Polo ala Epeses dla halemama Yu so inoma sumalalo aya dla hetame Yu so mate yukampolaiyo. <sup>20</sup> Epalati mikadepe dle sota Polo watle epo atlaiyo, “Wa: alila selemalli dia: mate hallowe ka:dena,” diyo. Amasiyama Polo mo edla hallowe posolotamalalo wekele koko atlepame ma epo atlaiyo, <sup>21</sup> “Godta solotamelepiye, eta na: ma wua: dla ilame puluwepo,” diyo. Epame ya: koa hapame Epeses mo tle ma Kasaliya mo dla taiyo.

<sup>22</sup> Polo Kasaliya dla puame koa himpo ma Yelusalem dla taiyo, mikadepe dle so dla namkale dle yu atlowedeme. Polo Yelusalem mikadepe dle so watle namkale dle yu atlepame ma Antiyoka dla ilame taiyo. <sup>23</sup> Epame Antiyoka dla alila yimka:mala halepo depame ma Galasiya mo mate epo Piligiya mo mate dla sela:mama mikadepe dle soye gagademsela:la taiyo.

### *Apolosta Epeses mo mate Kolin mo mate dla yu atlamale*

<sup>24</sup> Oloma edla Yu oplami hale Apolos, Alesendiliya dla hallaloye Epeses dla puaiyo. Ya: God yu buka sikemte malastaiyo, epapedeme ya:ta God yu atlale oloma dla pta ka:pi atlemdiyo. <sup>25</sup> Oplami iye Lod Yesu kokoye oplami haleta me-imaiyo. Epedeme

\* **18:18:** Yu sota kokosase kestlowe dulu kokoye epapena. Yu oplamitapo God mate yu itiyamale himimama alila semdepo, ya:tapo alila sale dulu edla God oko hamhalemama ya: kokosase pokeslalo hallowedeme. Epame alotle ya: oko eta tame gudlati ya: kokosase kestandepo.

ya:ta Yesu kokoye itiyamale mate imselaiyo. Amasiyama ya:ye opa yú dla Yesu hi tle ka:ka:timolowe koko pomalamalalo halemama isikimi Yonta opa yú dla ka:ka:timale koko tlo malapo halaiyo. <sup>26</sup> Epapeleye Apolosta Yu so inoma sumalalo aya dla hetame powota:lalo God yuye itiyamale mate atlemhalaiyo. Epalati Plisila mate Akwila mate ya: yu dalempopa:pame ya:ye yia: aya dla semtaiyo, God koko hapulomaye ya: watle woloma ka:pi imolowedeme.

<sup>27</sup> Epame alotle Apolosta Akaya dla tlowe solotamaiyo. Epalati mikadepe dle sota ka:pi demama yu ilimaleye Akaya mikadepe dle so dla hamiyo, yia:tapo Apolosye solotamale mate ya: oko gademha:ha:lepo depame. Epalati ya:tapo edla tame Godta bokotiyapo malamale tle mikadepe dle soye woloma ka:pi gadlalo oplami halaiyo. <sup>28</sup> Adipalati, ya:ta God koko sikemte malastale koko tle Yu sotapo Yesu koko dla yu ballalo so mate yu dlomama ya:ta malamaleta yia: tla:mtamdiyo. Epammama ya:tapo God yu buka tle imama Yesuta ikadepe Godta sale Keliso depo hala kokoye opa watle haliyamale dla indiyoye.

## 19

### *Polota Epeses mo dla halale*

<sup>1-2</sup> Apolos ala Kolin mo dla me-hallati Polota ta:la api tame Epeses mo dla woyamaiyo. Polota edla tame mikadepe dle so opi umpame yia: watle epo atlaiyo, “Wua: mikadepe dlati Hela:dle Sokota wua: dla mo-maluwa?” diyo.

Epalati asiyama yia:ta epo atlaiyo, “Wa: apa kokoye di watle atlema:? Di Hela:dle Soko kokoye yeitamana,” diyo.

<sup>3</sup> Epalati yia: watle epo atlaiyo, “Wua: anta imale tle yú dla tutula:uwa?” diyo.

Asiyama yia:ta Polo watle epo atlaiyo, “Di Yon opa yú dla ka:ka:timalalota imale dolumama yú tutula:uwa,” diyo.

<sup>4</sup> Epapalati Polota yia: watle epo atlaiyo, “Yon opa yú dla ka:ka:timalalota imale ya: dulu kokoye epapena. Opatapo Kelisota puluwe koko dla dinapomama yia:ta yia: batalimale tle heheletimalati yú dla ka:ka:timduwapo. Amasiyama ya:ta epamsela:mama epo atlemduwapo, ‘Na: ko tle pua oplami dla mikadepe diya,’ demduwapo. Oplami eye Yesupo,” diyo.

<sup>5</sup> Epedeme yia: koko e dalepame Yesu hi tle yú dla tutula:iyo. <sup>6</sup> Epame Polota yia: dokopala dla hohopame inoma sumalati Hela:dle Sokota yia: dla malaiyo. Epalati yia:tapo ulugiyemale yu meyelope meyelope dle mate yuhamyemama amile kokoye momolo atlamyaiyo. <sup>7</sup> Epapele dulu dla alumale dulu hema 12 opa epapeleta apiyo.

<sup>8</sup> Epalati Yu sota mikadepe dlepo depame Polotapo yia:ta inoma sumalalo aya dla hetame mama dapahatlope dulu dla powota:lalo God yu atlemhalemndiyo. <sup>9</sup> Amasiyama Yu so opitapo mikadepe dloweye dupa kokalalimama opa inoma dali dla Yesu kokoye putlopo atlamyaiyo. Epalati Polotapo yia: salepo mikadepe dle so tlo elepame Tilano sukulu aya dla taiyo. <sup>10</sup> Epame edla Polota sokomoko dapiyamte dulu dla alila hapuloma Lod kokoye imhalemndiyo. Epapele dulu dla ya:ta God yu atlaleta Asiya mo pato dla dalemntaiyo. Epammama Yu so hapuloma epame Guliki so hapuloma edla ha:ha:lalota God yu daliyo.

<sup>11</sup> Godtapo Polo tle ulugiyemale koko patoto halomaiyo. <sup>12</sup> Epalati opatapo Polota ekukullati hiyollalo tluka mate epo ya: tluka opi mate halopo tame esusulumale so di dla hatitimalati esusulumale sota ka:ka:demndiyo. Epammama bataliya yimlala mape alikili dla dodolomsalemndiyo.

<sup>13</sup> Amasiyama Yu so opi isikimi duka dla siyamalalo sota bataliya yimlala opa dulu tle alikili dla dodolomsalemsiyamndiyo. Yia:ta Polota Yesu koko atlemsela:la dalepame matle Lod Yesu hi mate bataliya yimlalaye alikili dla dodolomsalemsiyamolowe kotiyyamaiyo. Epammama yia:ta bataliya yimlala watle epo atlemndiyo, “Di Polota imselaiyo.”

Yesu hi tle wa: dla atlema, wa:ye alikili dla woyamane,” demdiyo. <sup>14</sup> Ipapele koko halomsiyamaleye Yu so aiyalma aya dokopala oplami Sikiba ya: akimlala 7ta amsiyamaiyo. <sup>15</sup> Epamsiyamale dulu dla alila hale yia:ta bataliya yemalaye alikili dla dodolomalati asiyama bataliya yemalata yia: watle epo atlaiyo, “Na:malamana Yesuye, epo na:malamana Poloye. Amasiyama wua: anawolota:?” diyo. <sup>16</sup> Epame bataliya walle oplamitapo yia:ye hohopame sikemte itiyamale mate yia: hohopoliyo. Epalati yia:tapo ya: aya tle omali mate tluka dimi potamalaiyo.

<sup>17</sup> Epapalati Epeses dla ha:ha:lalo Guliki so mate Yu so mate koko i dalepame sikemte wowota:mama hatlo Lod Yesu hi dla heodiyo. <sup>18</sup> Epame mikadepe dle so hapulomatapo yia: bobtalimaleye haliyamale dla bobotimatimaiyo. <sup>19</sup> Epalati yia: dulu dla anawolotapo osolo mate koko halomsiyamuwa, epapele sota yia: osolo bukaye haliyamale opa inoma dali dla hatlo kolupame dlapa mistaiyo. Osolo buka i yia: asiyamaye 50,000 elo mani tla:mtaiyo. <sup>20</sup> Epapele dulu dla God yutapo sikemte itiyamale mate mo pato dla hamtaiyo.

<sup>21</sup> Koko ita gudlati Polo solotamaiyo, Makedoniya mate Akaya mate dla tapame ma etle Yelusalem dla tlowedeme. Epammama ya: ma epo atlaiyo, “Na: Yelusalem dla tapame ma Loum dla tlowepo,” diyo. <sup>22</sup> Epame Polotapo ya: gadlalo so opi Timoti mate Elastus mate Makedoniya dla yia: tatile taiya depame ya: tlo ala Asiya mo medla mehalaiyo.

### *Epeses dla opata siyaladle pato ta:dle*

<sup>23</sup> Polo ala Epeses dla me-hallati opata Yesu koko dla siyaladle pato hamta:diyo. <sup>24</sup> Adipalati, Epeses mo dla biskapa god Atemis dla sisiyelalo aya polaiyo. Epalati oplami hale Damatliyosta ya: opa eleme aya mila:pi me-epapele sepele ma yia: do mate siyedle mimita:pame opa watle hapimama asiyama yia:ta mani patoto halomdiyo. <sup>25</sup> Epapeleye Damatliyosta ya: opa mate epame opa opi yia: mate oko hatlo halalo epapele so mate sisilapame esemaiyo. Epame Damatliyosta esemama yia: watle epo atlaiyo, “Opa, wua: daliya. Di oko i hamha:ha:mama mani pato hamha:ha:po. <sup>26</sup> Amasiyama wua: oplami Polota koko hamsela:ye mo-wua:malamana. Ya:ta atlemama opata dota mimita:ple godye pogod ikadepe demsela:lali opa pato Asiya dla ha:ha:lalo mate epo Epeses dla ha:ha:lalo mateta ya: mo-dolumsiyamapo. <sup>27</sup> Epedeme di wolomape! Opata Polota imale tlo dolumama di allipiye, di oko ka:pi tle mani patoto halomha:ha:ye kestlowe sepena. Epame koko hale ipo, opa hapuloma Asiya mo hema ha:ha:lalo so mate epo mo opi dla ha:ha:lalo so mate di god hatlo Atemis dla mikadepe demama sisiyemdepo. Amasiyama opata Polota imale dla mikadepe dlepiye, ma yia:ta di god Atemisye biskapa god dlepe. Epame ya: dla sisiyelalo aya mape allipe,” diyo.

<sup>28</sup> Damatliyosta koko i atlemhallati ya: yu dalempopa:le sota siyalasiyaladepame sikemte yu teta:le mate epo atlamyaiyo, “Di Epeses so god Atemista hatlo pato halapo, epedeme god haleta ya:ye pobuluhimuluwa,” demyaiyo. <sup>29</sup> Koko itapo Epeses mo pato dulu dla siyaladle ta:diyo. Epammama opa hapulomatapo mo dulu dla yu sikemte teta:limyemama mo haliyamale opata esemalalo dla ullumtamalaiyo. Yia: ullumta-malemama Polo ya:mkadulo Makedoniya so Gaiyus mate Alistakus mate hohopame tamalaiyo.

<sup>30</sup> Epalati Polo solotamaiyo, opa alumale dla tame yu atlowedeme. Amasiyama mikadepe dle sotapo ya: humatlaiyo. <sup>31</sup> Epame Polo ya:mkadulo opi, Asiya mo dokopala so mape Polota edla potlalo wekelepo depame ya: watle yu hamiyo.

<sup>32</sup> Epapalati alumale dulu dla opa opita yu teta:le mate koko meyelo atlamya epo opa opita koko meyelo atlamya demyaiyo. Epamyemama opa hapulomata yia:ta alumale dulu koko woloma pomalanatiyo. <sup>33</sup> Epalati Yu sota oplami hale, Alesendaye alumale itapu dla akumtuwame pameliyo, ya:tapo alumale dla yu atlemama koko iye Yu so poyia: batalimale dlepo depame. Epalati ya:tapo opata yuhamyaleye medla



ka:llipo depame ya: do popokaliyo. <sup>34</sup> Amasiyama alumaleta Alesendaye Yu oplami dle kokoye malanatipame posolotamalalo wekemama yu teta:limale mate mamisika: epo atlamyaiyo, “Di Epeses god Atemista hatlo pato halapo, epedeme god haleta ya:ye pobuluhimuluwa,” demyaiyo. Yia: epo yu teta:le mate atlamyemama sali inoma dapiyamte pololiyo.

<sup>35</sup> Epalati mo omhallalo dokopala oplamita sila:tilati alumale patota yuhamyaleye medla ka:liyo. Epapalati ya:ta epo atlaiyo, “Epeses so wua: daliya, opa hapuloma me-yia:malamana, di pato god Atemis dla sisiyelalo ayaye dita omha:ha:po. Epame ya: mila:pi sepeleye omapla di tle di watle teyuwa mape me-yia:malamana. <sup>36</sup> Epapele koko tle wua: siyalasiyalademyaleye medla gudiyaya, epame batalimale koko hale hamiya. <sup>37</sup> Epame wua:tapo opa iwoloye koko pa:le hema hohopo pumulalepo. Amasiyama yia:tapo di god dla putlopo po-atlana, epame yia:ta di god dla sisiyelalo aya dulu dla alisisi hale upohana. <sup>38</sup> Epedeme Damatliyos, wua: mate epo wua:ta alli so mate koko glادلalo aya dla tame wua: koko glادلowe ka:pi. Adipalati, koko glادلalo so me-ha:ha:po. Epedeme wua: edla tame wua: koko gladiya. <sup>39</sup> Amasiyama wua: dla ala koko hale esemolowe ellepiye, ka:dlepo, mo sota esemde alila oloma edla hame motloweye. <sup>40</sup> Epapedeme wua: wolomape, wata wua:ta koko halë hema Loum sota di watle batalimale asiyama hamilala. Epedeme Loum sotapo di watle koko epapele halepiye, di diskamu gadloweye api ponatilowa. Adipalati, wata dita siyaladle ta:dleye koko pa:na,” diyo. <sup>41</sup> Epame dokopala oplamita yu i atlepo gudepame mo soye ma-taiya diyo.

## 20

### *Polota Makedoniya mo mate Akaya mo mate dla tale*

<sup>1</sup> Epeses mo dla siyaladle pato sila:tilita mogudlati Polota mikadepe dle so hapuloma sisilapo yia: watle gadle yu atlepame ma Makedoniya mo dla taiyo. <sup>2-3</sup> Epame ya:tapo Makedoniya mo pato dulu dla mikadepe dle soye God yu mate gagademse:lama itiyamale halopimsela:iyo. Epo ma Akaya mo dla tame halemama mama dapahatlope pololiyo.

Epame Polota mama dapahatlope Akaya dla pololepo gudepame matle Siliya mo dla ulluwedeme hallati Yu sota ya: watle wotiyalle hamilowedeme esemale yu daliyo. Epapele koko dalepame Akaya tle koa hapo potlalo, ma ilame tame Makedoniya dla koa hapo Siliya mo dla tali diyo. <sup>4</sup> Epapele oloma edla opa iwolotapo Polo mate siyamuwapo, Pilus yami Sopata, Beleya dla hallalo, Epo Tesalonika so Alistakus mate Sekundus mate, epo Delebe oplami Gaiyus, epo Timoti, epame Asiya so opa Tikikus mate Tlopiimus mate. <sup>5</sup> Epapedeme opa iwolotapo yia: tatile tame Tlowas mo dla di ompopa:uwa. <sup>6</sup> Epalati di ta:la api tame Pilipi dla ha:ha:mama Isip mo tle alikili dla woyamale malamale daya dele alila dulu dla ha:ha:uwa. Epame daya dele alila eta mogudlati Pilipi tle koa hame ma Tlowas dla ulumha:ha:mama kaula duka dla alila 5 pololuwa. Epo Tlowas mo dla tame opa iwolo umpame mo edla ha:ha:mama alila 7 pololuwa.

### *Polota Tlowas so dla God yu mosukulu atlale*

<sup>7</sup> Di Tlowas mo dla ha:ha:mama Sande alila dla Yesu malamale daya dlowedeme mikadepe dle so mate yimkata alumuwa. Epalati Polotapo alumale dla God yu atluwa. Amasiyama Polo ya: alallati ma mo hale dla mo-tlowedeme halemama utula:la edla God yu sikemte selemalli atlemama utula:la dukuslopi dla tame guduwa. <sup>8</sup> Epalati di aya dulu edla tuloma pasatale ota:mtipo popa:mama Polo yu dalempopa:uwa.

<sup>9</sup> Aya dulu edla kipiliyemala hale Yutikusye mosisi kokoloma di dla poluwa. Ya: Polota God yu selemalli atlemhallati dalempolomama inoma ta:mpoluwa. Ya: epo inoma ta:mpolomama aya di tle ta:la dla teyuwa. Ya: ta:la dla teyulati opata tulumeya: hamame natilati mo-powame eluwa. Adipalati, ayaye sikemte di ikadepe dla poluna. <sup>10</sup> Epame

Polo mape tulumu alumata ta:la dla kellepo ya: hamame polomama epo atluwa, “Ase sikemte momalamiya. Ya:ye ma pasakalo dema,” duwa. <sup>11</sup> Epame Polo matle aya dla hetame daya depo mamisika: God yu atlemhalemama alehimiwa. Epo ma utulala ikadepe mo e saliyome mo-tauwa. <sup>12</sup> Epalati opata kipiliyemala Yutikusta ma pasakalo hallati natipo sisiyele mate semtamaluwa.

### *Polo wolota Tlowas tle Miletos dla tale*

<sup>13</sup> Epame di Tlowas mo tle Asos mo dla tlowedeme popa:lati Polota epo atluwa, “Wua: tatle koa hame Asos mo dla uliye. Na: tlo tamali api tame Asos mo dla wua: koa dla posokolowamo,” duwa. <sup>14</sup> Epalati di koa tle tame Asos dla ya: umpame ya: ma koa dulu dla posokoluwa. Epame ma etle Mitilene mo dla uluwa. <sup>15</sup> Epo ma alallati Mitilene tle ma Kiyos hasu dla uluwa. Epame edla hutiyepo ma alallati koa hame Samos hasu dla uluwa. Epo edla hutiyepo alallati ma koa hapo Miletos mo dla uluwa. <sup>16</sup> Amasiyama Polo ya: posolotamana, ma Epeses mo dla tlowedeme. Adipalati, ya: solotamaiyo, Asiya moye hapele saliyome tame Yelusalem dla Pentikos daya dele alila dla hallowedeme.

### *Polota Epeses sos dokopala so mate yukamale*

<sup>17</sup> Epapedeme Polo Miletos dla polomama Epeses sos dokopala so dla yu hamiwa, ya: hala dla pulupo depame. <sup>18</sup> Epame Epeses sos dokopala sota ya: hala dla pumullati ya:ta yia: watle epo atluwa, “Wua: mo-wua:malamana, na:ta alila hapuloma wua: mate Asiya mo dla halemama koko halomhaluwaye. <sup>19</sup> Na: alila hapuloma dulu dla God oko halowe dla po-alindena. Epammama naskamu di dla pohamhetamsela:na. Epame Yu sota na:ye yumuluwedeme wotiyalle hapimyelati dulu metle kaiyo mate God oko hamtauwapo. <sup>20</sup> Epapedeme wua:malamana, na:ta wua: gadlowedeme powota:lalo God koko hapuloma wua: watle haliyamale dla ma-atlamduwapo. Epammama na: koko hale hemele pohatiyomelemdena. Amasiyama opa hapuloma alumale pato dulu dla epo wua: aya dulu dla na: God koko hapulomaye wua: watle ma-atlamduwapo. <sup>21</sup> Epedeme na: Guliki so mate Yu so mateta malamale meyeloje depo God dla heheletipame di Lod Yesu dla mikadepe dlepo depame yu atlamduwapo.

<sup>22</sup> Epedeme na: Hela:dle Soko yu dla salladepo Yelusalem dla tlowepo. Amasiyama edla na: dla woyamolowe kokoye na: pona:malamana. <sup>23</sup> Amasiyama koko hatlo itlo na:malamana. Na:ta mo hapuloma dla sela:lati Hela:dle Sokota na:ta wotiyalle halowe mate amtuwale aya dulu dla tulluwe mate me-imduwapo. <sup>24</sup> Epapedeme na: pasakalo pase malamasema. Amasiyama na: hatlo Lod Yesuta na: watle hamili oko eye, ka:dle yu Godta bokotiyapo malamale kokoye opa dla atlowe tlo sikemte malamama mosukulu dla tame gudlowe solotama.

<sup>25</sup> Epapedeme na: wua: dulu dla God ya: mo kokoye atlamsela:uwapo. Amasiyama wua: dulu dla haleta na: mila:pi ma ponatilowa. <sup>26</sup> Epedeme watapo na: wua: watle atlema, wua: dulu dla oplami haletapo pasakalo hallowe pohalalo, ma Dlapa mo dla telepiye, pona: batalimale. <sup>27</sup> Adipalati, na: koko hapuloma Godta wua:ta dallepo dle kokoye ma-atlamduwapo.

<sup>28</sup> Epedeme wua: wuskamu woloma omha:ha:iya. Epammama Hela:dle Sokota wua: dla hapiwa halo ma woloma omha:ha:iya. Epapedeme wua: halo omha:ha:lalo so some ha:ha:mama God ya: sosye woloma omha:ha:iya. Adipalati, Godtapo Yami Yesuta powale tle ya: opaye mo-hohomuwapo. <sup>29</sup> Na:malamana, na:ta ma-tlati opa opita moko esemala kakasilamale epapele some wua: dulu dla puame wua: haloye poyulupe. <sup>30</sup> Epame mo-wua: opa dulu dla opa opita sillipame mikadepe kokoye ma heheletipame isikimi kokoye atlamsiyamelepe. Epammama yia:tapo wua:ye duka gladepame mikadepe dle so opiye alikili dla elemtelepe. <sup>31</sup> Epedeme wua: yu i malaha:ha:mama

woloma omha:ha:iya. Adipalati, na:tapo sokomoko dapahatlope dulu dla alila hapuloma epo utula:la hapuloma dla koko hema wua: dla amale mate imsula:mduwapo. Epapedeme na:ta imale koko iye wowelimiya.

<sup>32</sup> Epedeme watapo na:ta wua:ye God do tama dla ipila:lowepo. Epalati Godta ya:ta bokotiyapo malamale yu ka:dle tle wua:ye itiyamale hamilalo hallepe. Epedeme yu etapo wua: mate epo Godta sesa:le so hapuloma mate dla pasakalo hallowe hapilipe.

<sup>33</sup> Epame na:ta wua: mate sela:uwa dla na: opa opi alisisi mate epo mani mate epo tluka ka:ka:dle mate tlapame dupa pehetamdena. <sup>34</sup> Amasiyama mo-wua:malamana, na: na:ta solotamale koko mate epo na: mate siyamuwa sota solotamale koko mate ala:lowedeme na: motoye oko dla himmduwa. <sup>35</sup> Epapedeme na: alila hapuloma dulu dla ipapele koko tle wua:ye ma imsula:mduwapo. Epapele tle wua:ta oko halomha:ha:mama atali so gagademsiyamelepo depame. Adipalati, Lod Yesuta yu ipo atluwapo, 'hapili oloma edla siyele patota elapo, amasiyama halomale oloma edla siyele pastota elapo,' duwapo."

<sup>36</sup> Polota yu i atlepo gudepame Epeses sos dokopala so mate alumata ta:la dla kellepo popa:mama inoma sumuwa. <sup>37-38</sup> Epame yia:ta hapulomata a:luwa. Adipalati, Polota yia: watle atlemama, "Wua: ma na: mila:pi ponatilowa," dlati. Epo yia:tapo Poloye huhulapame koa sitali dla semtuluwa.

## 21

### *Polota Yelusalem dla tale*

<sup>1</sup> Di koa sitali dla tulum koa dla alupo mo-tlowedeme ha:ha:mama Epeses sos dokopala so dla namkale dle yu atlepame Kos hasu dla uluwa. Epo edla hutiyepo alallati ma Lodes hasu dla tame woyapame ma etle Patala dla tauwa. <sup>2</sup> Di Patala dla tame natilati koa patoye Ponesiya dla tlowedeme ella natiwa. Epalati di koa edla alupame tamaluwa. <sup>3</sup> Di epame Saiples hasuye weke tiyama dla pomelepo ma Siliya mo dla woyapame ma Taya mo dla tauwa, koa pato dulu dla alisisi hutiyeuwaye edla kolumolowedeme.

<sup>4</sup> Di edla tame mikadepe dle so opi natipame yia: mate alila 7 ha:ha:uwa. Di yia: mate edla ha:ha:lati Hela:dle Sokota imale tle yia:ta Polo watle Yelusalem dla tamiyo demyeuwa. <sup>5</sup> Epalati di Taya mo edla ha:ha:po gudepame matle tlowe mo-kotiyamuwa. Epapalati mikadepe dle so hapuloma wola: mate yimlala mate di eleme koa sitali dla tulumuluwa. Epame edla yimkata alumata ta:la dla kellepo popa:mama inoma sumuwa. <sup>6</sup> Di inoma sumpame koa dulu dla alupo ma-tamalemama namkale dle yu atlati yia: ma mo dulu dla i-ilapo tamaluwa.

<sup>7</sup> Di Taya mo etle ma Tolemais mo dla tauwa. Mo edla mikadepe dle so opi umpame yia: mate alila hatlo ha:ha:uwa. <sup>8</sup> Epo alallati di Tolemais mo meleme ma Kasaliya dla tauwa. Edla di ka:dle yu atlalo oplami Pilipi aya dla ha:ha:la tauwa. Pilipi iye ka:yapa opa gadlalo dikon so 7 hohomale dulu dla ya: ma halepo. <sup>9</sup> Epapele dulu dla Pilipi ya: utukaka dapiyamte dapiyamte dle iwolo mape God tle yu hapame molo atlalo so ha:ha:iyo.

<sup>10</sup> Di ala alila opi medla ha:ha:lati God yu molo atlalo oplami Agabus Yudiya tle puwa. <sup>11</sup> Ya: puame Polo nosowe deaye pustapame ma ya:skamu ya: do mate epo ya: hete mate keketipolliyepo epo atluwa, "Hela:dle Sokota epo atlapo, 'Yu opa Yelusalem dla ha:ha: sotapo nosowe dea ya: aye ipo keketipolliyepo himpame ya:ye po-Yu so do tama dla homellepe,' " duwa.

<sup>12</sup> Dia: mate epo edla ha:ha:uwa so opi mate koko i dalepame Polo watle "Yelusalem dla tamiyo," depame sikemte atluwa. <sup>13</sup> Amasiyama Polo di watle epo atluwa, "Wua: adipapalati a:lle mate na: dla dupa kolle hamima:? Na: hatlo Yelusalem dla dea mate keketipolliyepo himilowe dla podinapopo sela:sema. Hao. Amasiyama na: Lod Yesu koko dla polowe ma ma-dinapopo sela:po," duwa.

<sup>14</sup> Epapele dulu dla di natiwa, dita ya:ta Yelusalem dla tlowe api himomolloweye ponatina. Epedeme di mope demama epo atluwa, “Ka:dena, iye Lod koko dlepiye, ya: koko i halepe,” duwa.

<sup>15</sup> Di koko i gudepame di alisisi dinapopame Yelusalem dla tauwa. <sup>16</sup> Di Yelusalem dla puame woyamalati mikadepe dle so opi dia: mate Kasaliya tle pumulale sota dia:ye Nason aya dla elemhetauwa. Ya:ye Saiples mo dla hallalo. Epeleye ya: mo-powataliya mikadepe dle oplami halaiyo.

<sup>17</sup> Di Yelusalem dla tame woyamalati mikadepe dle sota di natipame sikemte sisiyeuwa. <sup>18</sup> Epame edla hutiyepo alallati yimkata Polo mate Yeims natila tauwa. Amasiyama di edla tame natilati sos dokopala so hapulomata ya: mate popa:uwa. <sup>19</sup> Epalati Polotapo ya: natipo ya: watle namkale yu atlepame ma Godta ya: tle po-Yu so dla koko patoto halomale hapulomaye woloma atlamuwa.

<sup>20</sup> Epalati ya:ta koko i dalepame God dla sikemte sisiyeuwa. Epame matle ya:ta Polo watle epo atlaiyo, “Namkale, wa: mo i natine. Yu so opi hapulomatapo mo-mikadepe duwapo. Amasiyama ya: ma Mosesta aiyalma hatitimale dolumolowe dla koko pato demdepo. <sup>21</sup> Epapeleye opa opitapo ya: watle wa: kokoye mala-atlamyemama epo atlaiyo, ‘Polotapo Yu so mo opi dla ha:ha: so watle atlemama, “Mosesta aiyalma hatitimale mate epo akimlala kapala kotimolowe koko mate epo di Yu so toto koko opi mate dolumiya,” demsela:ma,’ diyo. <sup>22</sup> Epedeme di koko i adipapopa: Adipalati, ya: wa:ta mo dulu hema hala kokoye ma-dallepe.

<sup>23</sup> Epapedeme wa: dita koko atlepiye, wa: koko e halepe. Epedeme di sos dulu dla opa dapiyamte dapiyamte dletapo God mate yu itiyamale ma hatitimuwapo. <sup>24</sup> Epapeleye ya:ta ya: God oko hampuale alila eye mogudlowe mo-mateka:pi puapo. Epedeme wa: ya:ta aiyalma aya dla kokosase kestlowedeme dinapela tlati wa: ma ya: mate telepe. Epame ya:ta dinapeleta tame gudlepiye, wua:ta yimkata Mosesta aiyalma hatitimale dolumama God watle namkale dle alisisi hapilipe. Amasiyama wa:tapo ya:ta namkale dle alisisi hamili ya: asiyama mani himilipe. Epo koko hapuloma i gudlati ya:ta kokosase kestlowe ka:pi. Wa:ta koko i woloma dolumelepiye, eta Yu so hapulomata natipame wa: koko dla yu balemyaleye isikimi koko mleni dlepe. Epame ya:ta wa:ye Mosesta aiyalma hatitimale mate ala:msela:ma dlepe. <sup>25</sup> Epedeme koko iye po-Yu mikadepe dle so poyia: koko. Adipalati, di ya: watle yu ilimale ma-hamiwapo. Epame di yu ilimale dulu dla epo ilimuwa, ‘Wua: biskapa god watle hapili dlowe alisisi halopo podlowa. Epame omali podlowa, epammama mo ala omali mate hallati podlowa. Epame batalimale koko wola: uhalowe epo opa uhalowe mate pahalomha:ha:lowa.’ ”

<sup>26</sup> Epo alila haleta Polota opa dapiyamte dapiyamte dle elepame kokosase kestepo God watle namkale dle alisisi hapilowedeme dinapolowe alila mo-kotiyamuwa. Epalati Polotapo aiyalma aya dla hetame haliyamale dla ya:ta halomolowe kokoye bobotimati-mama ya:ta dinapolowe alila mate epo ya:ta alinepi poyupo God dla namkale dle alisisi hapilowe koko mate atlamuwa.

### *Poloye amtuwale aya dla ka:stlowedeme hamale*

<sup>27</sup> Epame alila 7 iye mogudlowe mateka:pi hallati Yu so opi Asiya mo tle pumulale sota Poloye aiyalma aya dulu dla halla natiwa. Epame ya:tapo mo dulu dla siyaladle pato ta:depo Polo hampame yu teta:le mate epo atlamyeuwa, <sup>28</sup> “Isalael so wua: hapele di gadiya,” demyemama epo atlamyeuwa, “Oplami itapo mo hapuloma dla sela:mama Mosesta aiyalma hatitimale mate epo Isalael so koko mate epo di aiyalma aya mate dla isikimi mala-atlamsela:mduwapo. Epame watapo ya:ta Guliki soye di aiyalma aya dla elemhetaleta di aiyalma ayaye mo-batalipo hamastalepo,” demyeuwa. ( <sup>29</sup> Yu so iwolotapo po-Yu oplami Epeses dla hallalo Tlopimusye Polo mate Yelusalem dla sela:lati natipo ya:ta malamaleta Polota ya:ye ya: aiyalma aya dla semhetauwayo demama ipo atlamyeuwa.)

<sup>30</sup> Epalati Yelusalem so hapulomata sikemte siyaladepame yimkata ullumpuame Poloye aiyalma aya tle alikili dla hallumtulume ma-hapele aiyalma aya kokolomaye hihimomuwa. <sup>31-32</sup> Epame yia: Polo mo-yumuluwedeme ha:ha:iyo. Epalati Loum opahale dokopala oplamita Yelusalem dla siyaladle ta:dle koko dalepame opahale so mate epo yia: omha:ha:lalo so mate elepame hapele opa alumale dla ullumpumuluwa. Epalati opata Polo hopolemyaleye opahale sota pumulla natipame medla guduwa.

<sup>33</sup> Epame opahale so dokopala oplamita Poloye hamame ya: opa watle, “Oli dea dapiyamte mate keketipoliyeiya,” depame Yu so watle epo atluwa, “Oplami iye anata?: Epame ya: apa koko batalimale halati ya: hopole?” duwa.

<sup>34</sup> Epalati opa hapulomata koko meyelo pe meyelo pe dle atlamyemama yu teta:limyeuwa. Epamyemama opahale so dokopala oplamita yia: yu woloma pohana. Epapele koko tle ya:tapo ya: opa watle Poloye opahale so aya dla hamame taiya, duwa. <sup>35-36</sup> Opahale sota Poloye yia: aya dla hamame tlati opata alotle pumulumama yu teta:le mate epo atlampumuluwa, “Yumiya, yumiya,” dempumuluwa. Epo Poloye aya tilikali dla hetlowedeme hallati opahale sota ya:ye maka:himme hetamolowa. Adipalati, opatapo Poloye yuluwedeme sikemte bibikilimyelati.

<sup>37</sup> Amasiyama opahale sota Poloye yia: aya dulu dla ma-hamame tuluwedeme ha:ha:lali Polota Guliki yu mate opahale so dokopala oplami watle epo atluwa, “Na: wa: watle yu hatlo atlowe ka:deta:?” duwa.

Epalati opahale so dokopala oplamita Polota ya: watle Guliki yu mate yukamala dalepame epo atluwa, <sup>38</sup> “Wa: apa oplamita?: Na:ta malamaleta wa:ye Isip oplami, ala hema di gamani so mate opahale ta:demama ya:mkale yumulalo so opa 4,000 elepo dalupa dulu dla elemtauwa oplami e tepo de,” duwa.

<sup>39</sup> Amasiyama Polota epo atluwa, “Oplami e pona: Na: monolo Yu oplami, Kilikiya mo pato dulu dla Talesas mo dla hallalo. Na: mo eye pta koko pato. Epedeme na: ka:deta:, opa watle yu atloweye?” duwa. <sup>40</sup> Epalati opahale so dokopala oplamita ya:ta yu atlowe dla itiyamale hamilati ya: sila:time potopali dla halemama opa watle do popokaluwa, yia:ta yuhamyale medla ka:lipo depame. Epame opa hapulomata yu ma:ka:lipo ha:ha:lali ya:tapo Hibulu yu mate yia: watle yu atlowe kotiyamuwa.

## 22

### *Polota Yu so watle ya: koko atlale*

<sup>1</sup> Polota yu atlowe kotiyamama epo atluwa, “Adulo epo bapadulo epo eidulo, wua: na:ta naskamu na: koko atlali woloma daliya,” duwa. <sup>2</sup> Epalati Yu sota Polota yia: yu ikadepe Hibulu yu mate yukamhalla dalepame sikemte titiyalepo dalemha:ha:uwa.

<sup>3-4</sup> Epalati Polota epo atluwa, “Na:ye Yu oplami, Kilikiya mo pato dulu dla Talesas mo dla hamuwapo. Amasiyama na: Yelusalem mo hema halemama ta:uwa. Epeleye Gamaliyelta na:ye imalati na:tapo di mamadulota aiyalma hatitimaleye sikemte malas-tauwa. Epapele dulu dla wata wua:ta semte God oko tepo depo na: dla siyalasiyaladepame na: yumuluwedeme apopo. Amasiyama na: ma ka:yapa semte koko eye God oko tepo depame na:ta itiyamale pato himimama Yesu dolumtlalo soye wotiyalle hapimama opiye mo-potimalati na: koko edla po-alimdena. Epame opa mate wola: mate na:ta hohopame amtuwale aya dulu dla ka:ka:timduwapo. <sup>5</sup> Epapedeme aiyalma aya dokopala oplami mate Yu so dokopala so mate na: koko iye me-yia:malamana. Adipalati, yia:tapo mikadepe dle so Damasko dla ha:ha:laloye hohopame amtuwale aya dla ka:ka:timelepo depame na: watle yu ilimale hapimama epo atluwa, ‘Wa: tame Damasko dokopala so dla yu ilimale i hapipame mikadepe dle so hohopo Yelusalem dla elempuane,’ duwa.

<sup>6</sup> Na: epamsela:mama alila haleta Damasko mo dla mikadepe dle so hohomala tauwa. Oloma edla alila dukuslopi dla Damasko mo mateka:pi dla tamhallati pakasiyamalalo



pepele di tle hela:dleta tulume na:ye hauwa. <sup>7</sup> Epalati na:ta ta:la dla teyume elemama yuta ipo atla daluwa, ‘Sol, Sol, wa: adipalati na: watle wotiyalle hapimhalema:?’ duwa. <sup>8</sup> Na: epalati asiyama ya: watle epo atluwa, ‘Lod, wa: anata:?’ duwa. Epalati ya:ta asiyama epo atluwa, ‘Na:ye Nasalet oplami Yesupo. Wa:ta mikadepe dle so dla wotiyalle hapimhalaye, na: watle amhalapo,’ duwa. <sup>9</sup> Epapele dulu dla opa na: mate tamaluwa soye yu e woloma podalena. Amasiyama yia: hela:dle tlo me-natiwa.

<sup>10</sup> Epame na:ta epo atluwa, ‘Lod, na: apa koko hapa:?’ duwa. Epalati asiyama Lodta na: watle epo atluwa, ‘Wa: sila:time Damasko mo dla tane. Mo edla na:ta solotamale koko wa:ta halowe ye atellepe,’ duwa. <sup>11</sup> Amasiyama hela:dleta na: inomaye kokowelati na: mate tamalale sota na:ye Damasko dla hamame tauwa.

<sup>12</sup> Na: Damasko dla tame woyamalati oplami hale Ananayasta na: natila puwa. Ya:ye Mosesta aiyalma hatitimaleye woloma dolumsela:lalo oplami. Epapalati Yu so Damasko dla ha:ha:lalota ya:ye ka:dle oplami demdiyo. <sup>13</sup> Epeleye ya:ta puame na: mateka:pi dla halemama epo atluwa, ‘Sol namkale, wa: matle natine,’ duwa. Oloma edla na: inomata ma-ka:dlati ya: natiwa. <sup>14</sup> Epame ya:ta na: watle epo atluwa, ‘Di mamadulo Godtapo wa:ye mo-sauwapo, wa:tapo ya:ta solotamale kokoye malastlepo depame. Epo wa:ta Ka:dle Oplami Kelisoye natimama ya: yu dallepo depame. <sup>15</sup> Epedeme wa:tapo ya: kokoye opa hapuloma dla wa:ta dalle mate natili mate bobotimatimsela:lepe. <sup>16</sup> Epedeme wa: apa ompoloma:? Wa: hapele sila:time Yesu hi sisilamama yú tulune, ya:tapo wa: batalimaleye howahapo wellipo depame,’ duwa.

<sup>17</sup> Alotle na:ta Yelusalem dla ilame tame aiyalma aya dla inoma sumpollati Lodta na: inomaye meyelo pe duwa. <sup>18</sup> Na: inomata meyelo pe dlati Lodta na: dla yukamhalla natiwa. Epammama ya:ta na: watle epo atluwa, ‘Wa: hapele sila:time Yelusalem saliyome tane. Adipalati, opa hema ha:ha: soye wa:ta na: koko atlamalati dalepame pomikadepe dlowa,’ duwa.

<sup>19</sup> Amasiyama na:ta Lod watle epo atluwa, ‘Opa hapuloma yia:malamana, na:ta inoma sumalalo aya hapuloma dla hehetamsela:mama mikadepe dle soye hohopolepame amtuwale aya dla ka:ka:timsela:mduwaye. <sup>20</sup> Epame wa: oko oplami Stiben yumuwa oloma edla ya: yumulalo so kapumale tlukaye na:ta omhalemama yia: watle siyele ta:demhaluwapo,’ duwa.

<sup>21</sup> Amasiyama Lodta na: watle epo atluwa, ‘Wa: wata ma-tane. Adipalati, na:ta wa:ye mo itle pateka:mu po-Yu so mo dla tane dema,’ duwa.”

<sup>22</sup> Epalati Polo ka:yapa ya: yu kotiyapo atlempuale oloma dla opata ya: yu woloma dalempopa:uwa. Amasiyama ma ya:ta po-Yu so koko atlemhallati opata dalepame ma siyaladle ta:demama yu teta:le mate ya: watle epo atlamyeuwa, “Yumiya, yumiya. Ya: ta:lamo hema hallowe poka:dena,” demyeuwa. <sup>23</sup> Epammama yia:ta yu teta:limyemama yia: kapumale tluka uptipo apupu mate di dla pololemyeuwa. <sup>24</sup> Epalati opahale so dokopala oplamita ya: opa watle itiyamale hamiwa, yia:tapo Poloye yia: aya dla hamame tame atlanatili mate hopollepo depame. Adipalati, ya: solotamaiyo, Polota opatapo ya: dla siyalasiyaladepame yu teta:limyale ya: dulu koko atlepo depame. <sup>25</sup> Epapalati opahale so opata Poloye tuwale dea mate hopollowedeme ya: do mate hete mate ala dali dla keketipoliyemha:ha:lali Polota me-halemama opahale so omhallalo oplami hale watle epo atlaiyo, “Wua: dla itiyamale eleme wua:ta Loum mo oplami ikadepeye koko pa:le isikimi hopollowe ye? Adipalati, wua: na: koko ala woloma pogladena,” diyo.

<sup>26</sup> Epalati opahale so omhallalota yu i dalepame ma tame ya: dokopala oplami watle epo atlaiyo, “Wa: wa:ta koko hamsela:ye malanatima:? Adipalati, oplami iye Loum mo oplami ikadepeyo. Epedeme di aiyalmata epo atlapo, ‘Loum mo oplamiye isikimi koko pa:le hopollowe ye aiyalma,’ demdepo,” diyo.

<sup>27</sup> Epalati yia: dokopala oplamita yelle mate puame Polo watle epo atlaiyo, “Wa: na: watle atlane, wa: ikadepe Loum mo oplamita:?” diyo.

Asiyama Polota epo atlaiyo, “Yao, na: ikadepe Loum mo oplamipo,” diyo.

<sup>28</sup> Epapalati opahale so dokopala oplamita asiyama epo atlaiyo, “Na: Loum mo oplami ikadepe dlowedeme asiyama mani pato himiwa,” diyo.

Amasiyama Polota ya: watle epo atlaiyo, “Na: Loum mo oplami ikadepe dlowedeme mani pato epapele pohimina. Adipalati, na: na: waita na: hamale oloma edla na: Loum mo hi mate hamuwapo. Epedeme na:ye Loum oplami ikadepepo,” diyo.

<sup>29</sup> Epalati opahale sota Polo hopollowedeme ha:ha:leta yu i dalepame alikili a:ma potamalaiyo. Epame yia: dokopala oplami mape sikemte wota:iyo. Adipalati, ya:ta Loum mo oplami ikadepeye hopollowedeme dea mate keketipoliyeiya dle koko tle.

### *Polota Yu so dokopala sota esemale dla hetale*

<sup>30</sup> Epame ma alila haleta opahale so dokopala oplamita Polo kokoye woloma malam-olowedeme aiyalma aya dokopala so mate epo Yu so dokopala so mate esemolowedeme sisilamaiyo. Epame ya:ta Polo oli dea mate keketipoliyeleye totowatipame yia:ta esemale itapu dla pameliyo.

## 23

<sup>1</sup> Epalati Polota dokopala so alumale dla omhalemama epo atlaiyo, “Namkadulo, na:malamana, Godta na: batalimaleye ma hiyolepo weliwapo. Epedeme watapo Godta na:ye ka:dle oplami depo,” diyo. <sup>2</sup> Epapalati aiyalma aya dokopala oplami Ananayasta yu i dalepame opa opi Polo mateka:pi dla popa: watle epo atlaiyo, “Polo mati dla heyuiya,” diyo. Epalati oplami haleta sila:time Polo mati dla heyuiyo.

<sup>3</sup> Amasiyama Polota Ananayas watle epo atlaiyo, “Wa:ta na: yuliye asiyama Godta wa: yulupe. Epapedeme wa:ye wa:skamu pepemalalo oplamipo. Adipalati, wa:tapo Mosesta aiyalma hatitimale mate na: koko gladempolapo. Amasiyama wata wa:ta na: heyulita wa: ma aiyalma e ma-hauwokokomalepo,” diyo.

<sup>4</sup> Polota aiyalma aya dokopala oplami dla epo atlati asiyama opa ya: mateka:pi dla popa:leta epo atlaiyo, “Wa: poka:dena, God ya: aiyalma aya dokopala oplami dla yu epo atloweye,” diyo.

<sup>5</sup> Amasiyama Polota epo atlaiyo, “Namkadulo, na: oplami iye semte po-aiyalma aya dokopala oplami tepo de,” diyo. Epammama ya:ta epo atlaiyo, “God yu buka dla epo atlapo, ‘Wa: dokopala oplami dla pobatalipo atlowa,’ depo,” diyo.

<sup>6</sup> Epame Polo natiyo, alumale dulu edla opa opiye Sa:dusi so epo opa opiye Pa:lisi so. Epedeme ya:ta epo atlaiyo, “Namkadulo, na:ye Pa:lisi oplami halepo, epo na: a mape Pa:lisi oplami haluwapo. Epeleye na:tapo opaye palli tle ma sillipe dle koko dla mikadepe dlati koko gladle dla hamamhetame pola ipo,” diyo.

<sup>7</sup> Polota epo atlati alumaleta duka gladepame yu dlomolowe kotiyamaiyo. <sup>8</sup> Adipalati, Sa:dusi soye opata palli tle silliwe koko dla pomikadepe desemde. Epame God ya: banakaka mate epo Hela:dle Soko mate epo bataliya mate dla pomikadepe desemde. Amasiyama Pa:lisi so tlo koko hapuloma hema mikadepe demdiyo.

<sup>9</sup> Epapele koko tle dokopala so alumaleta duka gladepame yu sikemte dlomaiyo. Epame aiyalma imalalo so opi, Pa:lisi so alumale dulu dla ha:ha:lalota sillipame itiyamale mate ipo atlamyaiyo, “Di oplami hema batalimale koko hale ponatisema. Podimalamana, God ya: banakakata: o Hela:dle Sokota ya: dla yu atluwayo,” demyaiyo.

<sup>10</sup> Epame yu dlomaleta ta:mama Pa:lisi so mate Sa:dusi so mate duka gladepame nalatimale pato kotiyamaiyo. Epalati opahale dokopala oplamita ya: opa watle Poloye yumulala depame yia: aya dla hamame taiya, diyo.

<sup>11</sup> Epo utula:la edla Lodta puame Polo mateka:pi dla halemama epo atlaiyo, “Wa: wota:miya. Wa:tapo Yelusalem dla na: koko atlemsela:ye, epammama wa: ma Loum mo dla tame na: kokoye atlamsela:lepe,” diyo.

### *Yu sota Polo yumuluwedeme yu ka:dle*

<sup>12</sup> Epedeme utulalati Yu so opita Polo yumuluwedeme yu ka:demama itiyamale mate epo atlaiyo, “Di Polo ala poyumulalo ha:ha:lepiye, daya mate yú mate podlomolowa. Amasiyama di ya: yumpame daya mate yú mate edla dlomolowepo,” diyo. <sup>13</sup> Alumale dulu hema Yu so opa 40 epapeleta apiyo. <sup>14</sup> Epame yia:ta tame aiyalma aya dokopala so mate Yu so dokopala so mate dla epo atlaiyo, “Di Polo yumuluwedeme yu itiyamale mehimiwa. Epedeme di daya mate yú mate podlomalalo ha:ha:ma epo alotle ya: yumpame dlomolowama. <sup>15</sup> Epapedeme di solotama, wua: matle opahale so dokopala oplami watle yu ipo hamiye, ‘Di ma solotama, wa:ta Poloye hema hamame pulupo depame. Adipalati, di ya: watle atlanatili yu atlamolowama,’ diye. Amasiyama dia:ye api duka dla Polo ompopa:mama ya:ta pulati ya: yumuluwamo,” diyo.

<sup>16</sup> Amasiyama Polo ya: bapota yu i dalepame tame opahale so aya dla Polo natipo opata ya: yumuluwedeme dinapele kokoye atlaiyo. <sup>17</sup> Epalati Polota opahale so omhallaloye sisilapame ya: watle epo atlaiyo, “Maseyemala iye wua: dokopala oplami watle yu hame puana, epedeme ya: hala dla hamame tuwane,” diyo.

<sup>18</sup> Epalati opahale so omhallalota Polo ya: bapo hamame tuwame ya: dokopala oplami watle epo atlaiyo, “Amtuwale aya dulu dla hallalo oplami Polota na:ye sisilapo maseyemala iye wa: watle hamame tuwane de. Adipalati, ya:ta wa: watle yu hampuwu,” diyo.

<sup>19</sup> Epapalati dokopala oplamita maseyemalaye do dla hamame miyelo alikili dla semtame ha:ha:mama ya: watle epo atlaiyo, “Wa: apa koko na: watle atlowedeme api?” diyo.

<sup>20</sup> Epalati maseyemalata asiyama epo atlaiyo, “Yu so opa yia: solotamuwo, iyela yia: dokopala sota esemale dla wa:ta Poloye hamamtelepo depame. Epalati edla yia:ta ma Polo watle atlanatili yu atlamoloweyo. Epapele tlope wa: yia: yu dla mikadepe demiyo. <sup>21</sup> Epame wa: Poloye edla semtamiyo. Adipalati, opa pasatale, 40 epapeletapo api duka dla ya:ye yumuluwedeme ompopa:lepe. Epedeme opa iwoloye Polo yumuluwedeme daya mate yú mate dlowe aiyalma depo ha:ha:po. Epapedeme yia: ma-dinapopame wa:ta asiyama yu atlowe dla dalempopa:uwo,” diyo.

<sup>22</sup> Epalati dokopala oplamita maseyemalaye ma-tane demama epo atlaiyo, “Wa:ta na: watle atlale kokoye ma opa opi watle atlemiyo,” diyo.

### *Poloye Kasaliya dla hamame tale*

<sup>23-24</sup> Epame opahale so dokopala oplamita opahale so omha:ha:lalo dapiyamte sisilapame yia: watle epo atlaiyo, “Wua: wata Poloye Kasaliya mo dla semtaiya. Wua:ta tamama 200 opa aipa:ya halomale mate epo 200 opa kosele halomale mate epame 70 opa aliya koa tle tlowe so mate hohopame Kasaliya dla tlowedeme dinapiya. Wua: epo dinapopame wata utula:la opata mo-hutiyelati Kasaliya dla telepe. Wua: epammama Polo watle aliya koa hale hamilipe, ya:tapo gamani oplami Peliks watle woloma tame woyamelepo depame,” diyo.

<sup>25</sup> Epammama ya:tapo yu ipo ilimale mate gamani oplami Peliks watle hamiyo,

<sup>26</sup> “Namkale gamani oplami Peliks, na:ye Kolodiyas Lusiyaspo.

<sup>27</sup> Yu sotapo oplami iye hamame yumuluwedeme apuwa. Amasiyama ya:ye Loum mo oplami ikadepe dle dalepame na: mate epo na: opa mate ya:ye hemele hatiyomoluwa. <sup>28</sup> Epame na:ta ya: koko dallowedeme Yu so dokopala so esemale dla semhetauwa. <sup>29</sup> Esemale edla na:ta ya:ta isikimi Yu so aiyalma hauwokokomale tlo dalepame ya:ye poyumina epo amtuwale aya dla poka:stana.

<sup>30</sup> Epame Yu so opita oplami iye yumuluwedeme dinapele dalepame ya:ye wa: watle semtaiya duwa. Epo na:ta Yu so opiye wa: watle taiya dlowama, yia:ta ya: dla alli kokoye wa: watle atlamelepo depame.

Eso, na: yu mogudepo.”

<sup>31</sup> Epalati utula:la oloma edla opahale sota yia: dokopala oplami yu dalepo Poloye Kasaliya dla semtamalemama api duka Antipatlis mo dla puame woyamaiyo. <sup>32</sup> Epame alallati aliya koa sota Poloye Kasaliya mo dla semtamalati opahale so opi ma Yelusalem dla i-ilapo tamalaiyo. <sup>33</sup> Aliya koa sota Kasaliya dla puame woyapame gamani oplami Peliks watle yia: dokopala oplamita yu ilimale hamiyo. Epame Polo mape ya: watle homeliyo. <sup>34-35</sup> Epalati gamani oplamita yu ilimale i sesa:pame Polo watle epo atlaiyo, “Wa: apa mo oplamita:?” diyo. Amasiyama Polota ya: watle atlemama, “Na: Kilikiya mo dla hallalo,” dlati ya: ma asiyama epo atlaiyo, “Na: wa: mate siyaladlalo sota pula natipame wa: kokoye gladlowepo,” diyo. Epame ya: opa watle “Poloye hamame tame Helod aya dla woloma omha:ha:iya,” diyo.

## 24

### *Yu sota Polo kokoye Peliks mila:pi tle atlamale*

<sup>1</sup> Alila 5 gudlati aiyalma aya dokopala oplami Ananayas mate epo Yu so dokopala so opi mate Kasaliya dla Polo kokoye gamani oplami Peliks mila:pi tle gladla pumulaiyo. Yia: pumulumama gamani aiyalma koko malastale oplami hale Teletulus sempumulaiyo, ya:tapo koko gladlowe dla Polo koko atlepo depame. <sup>2</sup> Epo yia:ta koko gladlalo aya dla hetamallati Peliksta Polo hema pulupo diyo. Epalati Polota koko gladlalo aya dla mo-puame hallati Teletulusta Polo kokoye atlowe kotiyamama epo atlaiyo, “Peliks, wa:ye di pato oplami ka:dlepo. Adipalati, wa:ta di mo pato omhallati sadle patota elapo. Epame poka:ka:dle koko hapulomaye wa:ta gadle koko tle woloma ka:ka:demduwapo. <sup>3</sup> Epapedeme dita koko hapuloma tlapame wa: dla namkale dle yu mate siyele yu mate atlema. <sup>4</sup> Epedeme di posolotamasema, alila pato dla wa: mate esemolowedeme. Amasiyama di otele mate wa:ye atlema, wa: isikimi alila kiyele dla di yu i dalene,” diyo.

<sup>5</sup> Epame Teletulus ma epo atlaiyo, “Oplami Polo iye batalimale koko imsela:lalo oplami. Adipalati, ya:ta mo hapuloma dla koko imsela:le tle Yu so dla siyaladle hapimduwapo. Epedeme ya:ye Nasalet oplami dolumalalo so dokopala oplami halapo. <sup>6</sup> Epame koko hatlo etlo po-apena. Amasiyama ya:tapo di aiyalma aya mape batalimolowedeme apalati dita ya:ye hamuwa. [Epame ditapo ya:ye di aiyalma mate ya: koko gladlowedeme apuwa. <sup>7</sup> Amasiyama opahale so dokopala oplami Lusiyasta sikemte itiyamale mate puame Poloye dia: tle hamame tauwa. <sup>8</sup> Epame Lusiyastapo di watle, ‘Peliks hala dla tame Polo kokoye gladiya,’ duwa.] Epedeme wa: mowolo Polo watle atlanatiliyiye, asiyama ya:ta wa: watle dita ya: koko dla atlamiya yu iye dallepe,” diyo.

<sup>9</sup> Epame Teletulus mate pumulale Yu sota Peliks watle atlemama, “Yao, Teletulusta atlaye mikadepe,” demyaiyo.

### *Polota koko gladle dla ya:skamu ya: koko atlale*

<sup>10</sup> Epalati gamani oplamita Polo watle yukamane dlati asiyama Polota epo atlaiyo, “Peliks, na:malamana, wa:ye sokomoko hapuloma dulu dla di mo hema opa koko glademhaluwapo. Epedeme na: siyema, asiyama yu wa: watle atlowedeme. <sup>11</sup> Epedeme na:ta God watle siyele hamilowedeme Yelusalem dla tauwaye alila ala <sup>12</sup> pololepo halapo. Epapedeme wa: koko iye opa opi watle atlanatiliyiye, yia:ta wua: watle koko hatlo metlo atellepe. <sup>12</sup> Epedeme na: Yelusalem dla halemama Yu so aiyalma aya dla opa mate yu podlomsela:mdena. Epame na: inoma sumalalo aya dulu dla epo mo dulu dla sela:mama siyaladle pota:demdena. <sup>13</sup> Epedeme Yu so hema ha:ha:ta na: kokoye wa: dla yu meyelope meyelope dle atlamiyale hapulomaye pomikadepe.

<sup>14</sup> Amasiyama yia:ta atlamale dulu dla koko hale tlo mikadepe. Eye, na: di mamadulo God hi ta:dlowedeme Yesu hi dla mikadepe demde. Amasiyama Yu sota na:ta Yesu koko dla imaleye pomikadepedesemde. Na: ma epame Mosesta aiyalma hatitimale mate epo God tle yu hapame molo atlamalalo sota hatitimale yu dla mikadepe demde.

<sup>15</sup> Epedeme Yu so opa hema ha:ha:ta Godta ka:ka:dle so mate bobtalimale so mate palli tle ma sillipe dle koko dla mikadepe depo omha:ha:ye, na: ma hatlo medla mikadepe demdepo. <sup>16</sup> Epapedeme ipapele koko tle na: solotamde, God mila:pi tle epo opa mila:pi tle woloma ka:ka:dle koko tlo halomolowedeme.

<sup>17</sup> Na: Yelusalem saliyome tame mo opi dla sela:mama sokomoko pasatale pololuwapo. Edla sela:po depo ma Yelusalem dla ilame puwapo, na: opa watle mani hapilowedeme. Epammama na: ma God watle namkale dle alisisi hapilowedeme puwapo. <sup>18-19</sup> Epedeme na: aiyalma aya dla polomama God dla namkale dle alisisi hapilowedeme dinampoluwa. Na: edla polomama opa dulu dla siyaladle koko pota:dena, hao, na: isikimi monolo dinampoluwa. Epalati dulu edla Yu sota puame na: malanatiwa. Epame yia: dulu dla Asiya mo tle pumulale Yu sota na: koko dla opa dulu dla siyaladle pato ta:duwa. Epedeme ame adipalati opa ewolota wata hema hawa ha:ha:ma:? Ka:dena, opa ewolota wata puame na: kokoye wa: watle atlamolowe ka:pi.

<sup>20</sup> Epele tlope opa ewoloye hema hawa.

Epedeme Peliks, ka:dena, wa: Yu so hema ha:ha:ye atlanatine, yia:ta na:ye Yelusalem dla yia: dokopala so esemale dla semhetame popa:lati apa batalimale koko na: dla natiwa, eye atlowe ka:pi. <sup>21</sup> Amasiyama na: koko hatlo itlo yia:ta esemale dulu dla yu teta:le mate ipo atluwa, ‘Wata wua:tapo na:ta palli tle ma sillipe dle mikadepe dlati wua:ta na: koko gladepa?’ duwa.”

<sup>22</sup> Amasiyama Peliksta Lod kokoye ya: ma-dalepo halaiyo. Epapedeme ya:tapo opa alumale watle epo atlaiyo, “Di wata Polo koko gladleye midla gudlowepo. Epame ma opahale so dokopala oplami Lusiyasta pulati ya: koko matle gladlowepo,” diyo. <sup>23</sup> Epame Peliksta ma opahale so omhallalo hale watle epo atlaiyo, “Wua: Poloye woloma omha:ha:mama ya: dla upiyele koko hale hamimiyo. Epammama ya:mkadulota ya: watle namkale dle alisisi hapilowe apiye pohimomollowa,” diyo.

<sup>24</sup> Epame alila opi alotle Peliksta ya:llu Dulusila mate Polo hala dla pumulaiyo. Peliks ya:llu Dulusilaye Yu a:yayo. Epeleye yia:ta puame epo atlaiyo, “Poloye hema seme matiya,” diyo. Epalati Polota matime Yesu Keliso dla mikadepe dlowe kokoye atlamhallati Peliksta woloma dalempolaiyo. <sup>25</sup> Ya:ta epo dalempollati Polota ya: watle ka:depo hallowe koko mate epo batalimale koko dulu dla moto hamolowe koko mate atlemhalemama Godta mosukulu alila dla koko gladlowe mape atlaiyo. Epalati Peliksta yu i dalepame wota:mama ya: watle epo atlaiyo, “Mope, medla gudene,” diyo. Epame ma Polo watle, “Na:ta alila ka:dle natilipiye, matle wa: sisilamolowepo,” diyo. <sup>26</sup> Epapele dulu dla Peliksta hemele epo malamdiyo, “Polota na: watle mani hamilipiye, eta asiyama na:ta Poloye amtuwale aya tle alikili dla seme woyamolowepo,” depo malamdiyo. Ya: epo malamhalemama alila opi dla Polo mate yukamolowedeme ya: sisilamdiyo.

<sup>27</sup> Amasiyama sokomoko dapiyamte pololepo alotle Peliksye ya: gamani oko tle alikili dla gilidepame ma Posiyus Pestusta halaiyo. Amasiyama Yu sota sisiyelepo depame Peliksta Poloye amtuwale aya medla pomeliyo.

## 25

### *Polota Sisata ya: koko gladlepo depo atlale*

<sup>1</sup> Pestusta gamani oplami hi halë alotle alila dapahatlope mo-pololepo gudlati Kasaliya tle ma Yelusalem dla puaiyo. <sup>2-3</sup> Ya:ta edla puale oloma edla aiyalma aya dokopala so mate epo Yu so dokopala so opi mate puame ya: watle Polo kokoye epo atlamyaiyo, “Wa: dita solotamale koko hane. Epammama Poloye ma Yelusalem dla sempuane,” demyaiyo. Adipalati, yia: solotamaiyo, Polota Yelusalem dla pumhallati hemele api duka dla yumuluwedeme.



<sup>4</sup> Amasiyama Pestusta epo atlaiyo, “Hao, Poloye Kasaliya medla me-hallepe, Yelusalem dla posempuluwa. Amasiyama na: alila opi pololepo alotle ma Kasaliya dla ilame telepe. <sup>5</sup> Epedeme wua: dokopala sotapo na: mate Polo koko dla esemolowedeme Kasaliya dla tlowe ka:pi,” diyo.

<sup>6</sup> Pestus alila 10 epapele Yelusalem dla pololepame ma Kasaliya dla ilame taiyo. Ya: Kasaliya dla tame elepo alallati koko glادلalo aya dla hetame ya:ta pollalo dla polomama Polota pulupo depo opa watle yu hamiyo. <sup>7</sup> Epalati opata Poloye koko glادلalo aya dla semhetlati Yelusalem tle pumulale Yu so dokopala sota Poloye hallati alikili tle sillidepo ha:ha:mama Polo koko dla yu meyelope meyelope dle atlamyemama Poloye pta batalimale oplami demyaiyo. Amasiyama yia:ta Polo hi mate yu meyelope meyelope dle atlamyale dulu dla Pestusta ikadepe kokoye ponatiyo.

<sup>8</sup> Epapalati Polota ya:skamu gadlowe yu atlemama epo atlaiyo, “Na: Yu so aiyalma hale pohauwokokomana, epo na:ta dia: aiyalma aya hi dla pobatalipo atlana, epame Loum mo pato dokopala oplami Sisa koko dla batalimale yu hale po-atlana,” diyo.

<sup>9</sup> Amasiyama Yu sota sisiyelepo depame Pestusta Polo watle epo atlaiyo, “Ka:deta:, dita hapulomata Yelusalem dla tame wa: koko edla glادلowe?” diyo.

<sup>10</sup> Epalati asiyama Polota epo atlaiyo, “Na: Yelusalem dla potlowa. Adipalati, na: Loum so koko glادلalo aya dla ma-halapo, epedeme hema na: koko glادلowe ka:pi. Epapedeme Pestus, wa: ma mo-wa:malamanana, na: Yu so dla batalimale koko hale pohana. <sup>11</sup> Epapele dulu dla na: batalimale koko hale hamatiye, eta aiyalma e dolumama na:ta polowe ka:pi. Amasiyama Yu sota na: koko dla isikimi mala-atlamyademe, oplami haleta na:ye Yu so do tama dla homellowe poka:dena. Epapedeme na: solotama, Loum mo dokopala oplami Sisata na: koko glادلapo depame,” diyo.

<sup>12</sup> Epalati Pestusta ya: watle molo atlalo so mate koko hema esepame ma Polo watle epo atlaiyo, “Wa: Sisata wa: koko glادلowe solotamale himideme, wa: Sisa hala dla seme tlowepo,” diyo.

### *Pestusta Agilipa watle Polo koko atlamale*

<sup>13</sup> Alila opi alotle Yu so dokopala oplami Agilipata yotumala Benike mate Pestus watle namkale dle yu atlowedeme Kasaliya dla pumulaiyo. <sup>14</sup> Yia: Pestus mate ala me-ha:ha:lati Pestusta Polo kokoye Agilipa watle esemaiyo. Ya:ta esemama epo atlaiyo, “Oplami hale Poloye Peliksta amtuwale aya dla ka:stepo taleye me-halema. <sup>15</sup> Epapeleye na: Yelusalem dla tame woyamalati Yu so aiyalma aya dokopala so mate dokopala so opi mate puame na: watle Polo kokoye epo atluwa, ‘Poloye batalimale oplami, epedeme ya:ye yumine,’ duwa.

<sup>16</sup> Amasiyama na: yia: watle epo atluwa, ‘Di Loum soye oplami hale koko pa:le poyumisemde. Amasiyama di Loum sota koko glادلale kokoye epapena. Oplami haleye koko glادلale dla ya: dla alilalo sota ya: koko atlepo gudlati asiyama oplami ya:skamu ya: koko atellepe. Epame alotle koko glادلalo oplamita ya: dla batalimale koko ella natilipiye, eta ya:ye yumiya demdepo,’ duwa. <sup>17</sup> Epapedeme yia:ta na: mate hema puwa. Oloma edla na:ta koko e glادلowe podekelena. Amasiyama na: puame elepo alallati koko glادلalo aya dla hetame polomama Poloye hema hamame puaiye duwa. <sup>18-19</sup> Dulu edla na:ta malamuwaye, Poloye semte batalimale koko pato hatepo duwa. Amasiyama Yu sota isikimi yia: inoma sumalalo aiyalma mate epo oplami hale Yesu, yia:ta mo-powana demdiye, ma Polota oplami eye ma pasakalo halema dle koko edla yu dlopo ya: koko glادلowedeme seme matala haluwa. <sup>20</sup> Amasiyama na: koko i woloma pomalamalalo halemama Polo watle Yelusalem dla tame wa: koko glادلowe ka:pi duwa. <sup>21</sup> Amasiyama ya: Yelusalem dla tlowe posolotamana. Epammama ya: solotamuwa, Sisata ya: koko glادلapo depame. Epapedeme ya: aseka hema hallepe. Epo na:ta alila ka:dle natipame ya:ye Sisa hala dla semtaiya dlowepo, ya: koko glادلapo depame.”

<sup>22</sup> Epalati Agilipata Pestus watle epo atlaiyo, “Na: oplami i ya: kokoye monolo dal-lowama,” diyo.

Epapalati Pestusta ya: watle epo atlaiyo, “Iyela mowolo ya: koko dallepe,” diyo.

### *Poloye Agilipa mate Benike mate dla sempuale*

<sup>23</sup> Epame alila haleta Agilipa mate Benike mate patoto so some tluka ka:ka:dle didiyepo koko glادلalo aya dla hetaiyo. Yia: koko glادلalo aya dla tumama opahale so dokopala so mate Kasaliya mo dokopala so mate elemtuwaiyo. Epo yia:ta hapuloma koko glادلalo aya dla alupo popa:lati Pestusta Poloye sempuaiya diyo. <sup>24</sup> Epalati Polota koko glادلalo aya dla puame hallati Pestusta epo atlaiyo, “Dokopala oplami Agilipa, wa: mate epame opa hapuloma mate oplami i natiya. Yu so hema ha:ha: so mate epo Yu so Yelusalem dla ha:ha:lalo so mate oplami i dla sikemte allimama na: watle ya:ye yumuluwe ka:pi demdepo. <sup>25</sup> Amasiyama na:ta ya: koko natiye batalimale koko hale hawa ikadepe ya: polowe dla himiloweye. Epapele tlope ya: meyelo solotamaleta Sisata ya: koko glادلapo dedeme na: ya:ye Sisa dla hamame taiya duwa. <sup>26</sup> Amasiyama koko hema na:ta di pato oplami Sisa watle Polo koko dla yu ilipo hamiloweye yu hawa halema. Epedeme na:ta ya:ye wua: mila:pi tle seme ma-ta. Epapedeme Agilipa, wa:ta ya: watle atlanatine. Epame asiyama yu ya:ta wa: watle atla dalepo gudepame na: watle atlane. Epalati na:ta yu eye ilipo Sisa watle hamilowepo. <sup>27</sup> Adipalati, amtuwale aya dulu dla hallalo oplamiye koko pa:le Loum dokopala oplami Sisa watle tane dloweye poka:dena.”

## 26

### *Polota dokopala oplami Agilipa mila:pi tle ya: koko atlale*

<sup>1</sup> Agilipata Polo watle epo atlaiyo, “Na: wata wa: watle alila hamima, wa:tapo koko glادلale hema wa:skamu gadlowe yu atlepo depame,” diyo.

Epalati Polota do ta:depame yu atlowe kotiyamama ipo atlemtaiyo, <sup>2</sup> “Dokopala oplami Agilipa, na: siyema, wata Yu sota na: koko dla yu meyelo meyelo dle atlamyeuwa dla asiyama na:ta naskamu gadlowe yu wa: watle atlowedeme. <sup>3</sup> Adipalati, wa:malamana, Yu so dia: toto koko hapuloma mate epo dia: dulu dla yu dlomde koko mateye. Epedeme wa: na: yuye woloma dalene.

<sup>4</sup> Epapele dulu dla Yu so hapuloma me-yia:malamana, na:ta ka:yapa na: opa dulu dla epo Yelusalem dla haluwa pasakaloye. <sup>5</sup> Epedeme Yelusalem so hapulomaye na: koko yia: malastana. Epapedeme yia:ta wa: watle na: koko atlowa dlepiye, yia: na:ta ka:yapa Pa:lisi oplami haluwa kokoye atellepe. Epapele dla Yu so dulu dla Pa:lisi sota Mosesta aiyalma hatitimale woloma dolumdepo. <sup>6</sup> Epedeme na:ye wata koko glادلale dla halapo, adipalati, Godta na: mamadulo watle yu itiyapo himiliye na:ta edla mikadepe dlati. <sup>7</sup> Amasiyama di Yu so 12 elele hapulomata alila hapuloma God dla inoma sumha:ha:mama yia: ma yu himili hatlo metlo omha:ha:po. Epedeme na: dokopala oplami Agilipa, na: mape watapo yu himili hatlo medla mikadepe dlati Yu sota na: yumuluwedeme ammdopo. <sup>8</sup> Epapele dulu dla Yu so opa, wua: adipalati Godta palli soye ma pasakalo dlowe koko dla pomikadepe desemdi?

<sup>9</sup> Epedeme na: ma wua:ta malamha:ha:ye epammama na: mape Yesu Nasalet oplami dla mikadepe dle so watle elle pato elemduwapo. <sup>10</sup> Epammama aiyalma aya dokopala sota na: watle itiyamale hamilati na:tapo Yelusalem dla God ya: opaye totapo hohopame amtuwale aya dulu dla ka:ka:timsela:mduwapo. Epame mikadepe dle so opiye mopotimalati na: koko edla ka:pi demama siyemduwapo. <sup>11</sup> Epo Yu so inoma sumalalo aya hapuloma dla hehetamsela:mama mikadepe dle so dla wotiyalle hapipame Yesu hi dla putlopo atlamaiya demduwapo. Na: epo yia: dla sikemte siyaladepame mo opi dla tame mikadepe dle soye hohopo wotiyalle hapimduwapo.

<sup>12</sup> Na: epamsela:lati alila haleta aiyalma aya dokopala sota na: watle itiyamale hamilati Damasko mo dla mikadepe dle so hohomolowedeme tauwa. <sup>13</sup> Amasiyama alila dukuslopi tiyama dla na: api duka dla tamhallati pepele di tle hela:dleta na: dla malla natiwa. Hela:dle eye sikemte hela:demama salita hela:dle pe-epapena. Epedeme na: mate epo na: mate tamalale so hapulomaye hela:dle eta hauwa. <sup>14</sup> Epalati di hapulomata ta:la dla teteyume hutiyelati pepele di tle di Hibulu yu mate na: watle epo atla daluwa, 'Sol, Sol, wa: adipalati na: watle wotiyalle hapimhalema? Wa:ta epamhalaye isikimi wa:skamu wotiyalle hapimhalapo,' duwa.

<sup>15</sup> Epalati asiyama na:ta epo atluwa, 'Lod, wa: anata:?' duwa. Asiyama ya:ta na: watle epo atluwa, 'Na:ye Nasalet oplami Yesupo. Wa:ta mikadepe dle so watle wotiyalle hapimhalaye na: watle amhalapo. <sup>16</sup> Epedeme wa: sila:tine. Na:ta wa: watle puame woyamapo. Adipalati, na:ta wa:ye mo-sauwapo, wa:ta na: oko oplami halemama na:ta wa: watle nati-ili mate epo ma nati-iliwe koko mate opa watle imsela:lepo depame. <sup>17-18</sup> Epapedeme wa:tapo Yu so mate epo po-Yu so mate dulu dla na: yu hamsela:lati na:ta wa:ye woloma omhallowepo. Epele dulu dla yia:ta wa:ye wotiyalle hamilipiye, na:ta wa:ye gadlalo hallowepo. Epedeme na:tapo wa:ye yia: dla tane dema, yia:tapo yia: inoma towanatipame amtuwale dulu tle hela:dle dla matilipo depame. Epame wa:ta yia:ye Saitenta itiyamale dulu dla ha:ha: tle elepame ma God hala dla elempulati na:tapo yia: batalimaleye hiyollowepo. Epapalati yia:tapo na: dla mikadepe dle koko tle Godta sesa:le sota ha:ha: dulu dla yia: ma ha:ha:lepe,' duwa.

<sup>19</sup> Epedeme dokopala oplami Agilipa, na: inomata meyelohe demama Pepele di tle malale yu i dalepame na: po-alina. <sup>20</sup> Epame na: Damasko dla epo Yelusalem dla epo Yudiya mo pato dulu dla epame po-Yu so mo hapuloma dla God yu ipo atlemsela:uwa, 'Wua: malamale meyelohe depame wua: bobtalimale tle heheletipo God hala dla pumulaiya. Epame wua:ta God hala dla pumulale koko eye nati-imama opa mila:pi tle ka:ka:dle koko tlo halomsiyamaiya,' demduwa. <sup>21</sup> Epapedeme na:ta koko i halomsela:lati Yu sota na:ye yia: aiyalma aya dulu dla hallati yumuluwedeme ammduwapo. <sup>22</sup> Amasiyama Godta gadle pato tle na: ma wata wua: mila:pi tle halemama dokopala so wua: watle epame opa opi hapuloma watle God yu atlemhalema. Epapele tlope na:ta atlamuwa yu hapulomaye Moses mate God tle yu hapame molo atlamalalo so mateta Godta sale Keliso dla woyamelepe dle koko atlamale mate ma hatlopepo. <sup>23</sup> Epapedeme yu e ya: dulu kokoye ipo, Kelisoye wotiyalle hapame polope. Epame ya: tatile powale tle sila:tipame hela:dleye Yu so mate epo po-Yu so mate dla hampulupe."

<sup>24</sup> Amasiyama Polo ala yu atlemhallati Pestusta yu teta:le mate ya: watle epo atlaiyo, "Polo, wa: yiyilamale koko hama. Wa:ta malamale koko patotapo wa:skamu wa:ye yiyilamale hamipo," diyo.

<sup>25</sup> Epalati Polota asiyama Pestus watle epo atlaiyo, "Namkale, na: poyiyilamasema. Adipalati, na:ta atlamale yu hapuloma iye mikadepepo. <sup>26</sup> Epapedeme dokopala oplami Agilipaye koko hapuloma iye ya:malamana. Epedeme na:ta ya: watle koko i atlowe ka:pi. Adipalati, koko hapuloma iye hemele po-apena. Hao. Opa hapuloma inoma dali dla apuwapo," diyo.

<sup>27</sup> Epedeme Polota dokopala oplami Agilipa watle epo atlaiyo, "Agilipa, wa: God tle yu hapame molo atlamalalo sota yu hatitimale dla mikadepe demdi? Yao, na: malama, wa: mikadepe demdepo."

<sup>28</sup> Amasiyama dokopala oplami Agilipata epo atlaiyo, "Wa: alila kiyele hema na:ta Yesu dla mikadepe dlepo depame na: watle yu epapele atlemhalema:?" diyo.

<sup>29</sup> Epalati Polota asiyama epo atlaiyo, "Na: alila kiyele o alila selemalli, na: e posesa:sema, wa:ta mikadepe dloweye. Epedeme na: inoma sumale yu himima, wa: mate epo wata hema na: yu dalempopa: sotapo God yu dla mikadepe depame na: some ha:ha:loweye. Epammama tlope wua: do dla oli deata ipo poyulumolowa," diyo.

<sup>30</sup> Epalati dokopala oplami Agilipa mate epo Pestus mate epo Benike mate epame opa hapuloma Polo yu dalempopa:leta sillipame ma-tamalaiyo. <sup>31</sup> Yia: tamalemama epo atlamtaiyo, “Oplami iye batalimale koko hale pohana. Epedeme dita ya:ye amtuwale aya dla ka:stepo yumuluweye poka:dena,” demtamalaiyo.

<sup>32</sup> Amasiyama Agilipata Pestus watle epo atlaiyo, “Di oplami iye koko gladle tle matane dlowe ka:pi. Epapele tlope ya: Sisata ya: koko gladlepo dedeme ya: Sisa hala dla semtaiya dlowa,” diyo.

## 27

### *Polota koa tle Itali mo dla tlowe kotiyamale*

<sup>1</sup> Pestusta Poloye Sisa hala dla semtlowe solotamale himipame ya: Loum opahale so omhallalo oplami hale Yuliyus sisilamaiyo. Epame ya: watle epo atlaiyo, “Polo mate epo amtuwale aya dulu dla ha:ha:lalo so opi mate koa tle Itali mo dla Sisa hala dla elemtane,” diyo. Yuliyus iye opahale so alumale hale, ya: hi Sisa alumale demde dulu dla halemdiyo. <sup>2</sup> Epalati di Adlamatiya so koaye Kasaliya tle ma Asiya mo dulu dla mo meyelope meyelope dle dla tlowedeme ella natiwa. Epalati Yuliyusta di watle koa edla alumaiya duwa. Epame Makedoniya mo dulu dla Tesalonika dla hallalo oplami hale Alistakus dia: mate koa edla alupo ma Saidon mo dla tamama duka dla hutiyeuwa.

<sup>3</sup> Epame utulalati Saidon mo dla puame woyamuwa. Amasiyama di Saidon mo dla puame woyamalati Yuliyusta Polo tlo sikemte malamama ya: watle, “Alikili dla woyapo tame wa: amkadulo watle wa:ta solotamale alisisi halomane,” duwa.

<sup>4-5</sup> Epame di ma Mila mo dla ulumama Saiples hasu mateka:pi tle uluwa. Adipalati, kaula pato haliyamale dla mosisi patota bibikilimama ulo patota silliwa. Di epalati mepele Saiples hasu tle polempuame Kilikiya mate Pampiliya mate tetla:mtame Lisiya mo dla woyapame ma Mila mo dla tauwa. <sup>6</sup> Di edla tame popa:lati opahale so omhallalo oplami Yuliyusta Alesendiliya so koa, Itali dla tlowedeme ella natiwa. Epame ya:tapo di watle “koa dulu edla alumaiya,” duwa. <sup>7-8</sup> Epalati di koa dulu edla alupame Nidus dla woloma tamalemama alila pasatale kaula duka dla pololuwa. Di Nidus tla:mtamama mosisita bibikilimama ulota sikemte patoto dlati ma Kiliti hasu dla uluwa. Di epame Kiliti hasu ipi Salmone mateka:pi tle woloma polomyemama puame Lasea mo koa sitali dla puame woyamuwa. Epedeme koa sitali ya: hiye Koa sitali ka:pi.

<sup>9</sup> Di koa sitali hema popa:mama epo momalampopa:uwa, “Di alila pato mopokaduwapo. Epame Yu sota daya aiyalma depo ha:ha:lowe alila ma mo-tla:mtame halapo. Epapedeme tene alila ma mo-kotiyamapo. Epapele dulu dla dita tene alila dla kaula pato tle tlowe poka:dena. Adipalati, ulo patotota sillimama dia:ye batalimalala,” duwa. Epapalati Polota opa watle epo atluwa, <sup>10</sup> “Opa, na:malamana, tene yapi dla kaula pato dla tamellepiye, dia: mate epo di alisisi mate epame di koa mate batalimelepe. Epapedeme di ka:dena midla ha:ha:lowepo,” duwa.

<sup>11</sup> Amasiyama koa dokopala oplami mate epo koa ya: a mate yia: posolotamana epapolowe. Epalati opahale so dokopala oplami mape opa dapiyamte iwolo yu dla mikadepe duwa. <sup>12</sup> Epapalati opa hapulomata epo atluwa, “Di tene yapi dla hema ha:ha:mama koa himme ha:ha:loweye koa sitali poka:dena,” duwa. Epammama yia: solotamuwa, hapele Poiniks mo dla tame ha:ha:lati tene alilata gudlepo depame. Epedeme Poiniks iye koa sitali hale ka:pipo Kiliti hasu dla. Adipalati, koa sitali edla mosisi patota pase puame poyusemde.

### *Mosisi pato mate ulo patoto dulu dla tale*

<sup>13</sup> Epapeleye alila haleta mosisi patota mo-ka:limtlati ma mosisi yimka:malata kaula pato duka tle peleyama tiyama dla bibikilimolowe kotiyamuwa. Epalati koa hamsiyamalalo sota e natipame ka:pi demama upiyele alisisi koa hohopo hutiyeyele yu dulu tle holalipo koa dulu dla hatitimuwa. Epame di Kiliti hasu peleyama tle polomyeuwa.



<sup>14</sup>Di hasu peleyama tle woloma polomyemha:ha:lati pakasiyamalalo mosisi patota hasu tiyama tle sikemte bibikilimama di koaye ma kaula pato duka dla halemtuwa. <sup>15</sup>Di epapalati koa sosolemtauwa memelepame ma isikimi mosisita di koa halemtlati ompopa:uwa. <sup>16-17</sup>Amasiyama mosisita di koaye Kauda hasu homale dla halemtamhallati koa hamsiyamalalo sota pasakalo gadlalo koa yemala koa pato kei dla himomeleme ellaloye sikemte itiyamale mate hamta:depo koa pato dulu dla himiwa. Epame ulota puame dita tauwa koa dla yumama pogladlalo wekelepo depame yia:ta koaye dea mate sikemte yuwa. Epame koa hamsiyamalalo sota sikemte wowota:uwa, koata Libiya mo tiyama dla tamama esawa dla tame gagadlala depame. Yia: epammama mosisita puame yulalo tluka koa di dla hihimamaleye ma isili dla hatitimuwa, koata ma woloma telepo depame. Epapalati mosisita di koaye kaula duka dla isikimi me-halemtauwa.

<sup>18</sup>Epame alila haleta mosisi patota ma sikemte bibikilimalati koa hamsiyamalalo sota opa alisisi koa dulu dla hutieleye yú dulu dla pololuwa, koata holokamelepo depame. <sup>19</sup>Epame matle alila haleta yia:tapo koa ya: oko alisisi mape yú dulu dla pololuwa. <sup>20</sup>Di mosisi patota bibikilimale dulu dla epo ulo patotota silli dulu dla alila pasatale tamalemama sali mate epo tamili mate potlamana. Di epapele dulu dla metamalemama ha:ha:lowe pomalamana, amasiyama isikimi palliwe tlo malatamaluwa.

<sup>21</sup>Amasiyama di alila pasatale dulu dla daya podlomalalo pumulumama Polota sila:time di watle epo atluwa, “Namkadulo, wua: adipalati na: yu podallalo Kiliti hasu saliyome pumuluwa? Di medla ha:ha:matiye, eta koko ipapeleta dia: dla powoyama.

<sup>22</sup>Amasiyama wua: ase koko hema sikemte wowota:miya. Adipalati, wua:ta hapuloma dulu dla oplami haleta popolowa. Isikimi di koa tlo batalimelepe. <sup>23</sup>Adipalati, na: God na:ta mikadepe demdeta ya: banakaka oplami na: dla tulune dlati wata utula:la na: watle malame epo atla, <sup>24</sup>‘Polo, wa: ase sikemte wota:miya. Adipalati, wa:ye isikimi potasema, wa:ye dokopala oplami Sisa mate yukamala tapo. Epapedeme wa: mate epo wa:ta elemta so mate kaula duka hema popalliwa. Adipalati, Godta wa:ta inoma sumale yuye ma-daluwapo,’ de. <sup>25</sup>Epapedeme opa, wua: yu i dalepame wowota:miya. Adipalati, na: ma mikadepe dema, Godta ya: banakaka oplami tle atlamale kokoye woloma dolumelepe. <sup>26</sup>Amasiyama di tamama hasu hale dla tame gulomelepe.”

<sup>27</sup>Di Mediteleniya kaula duka dla siyamama 14 alila pololepame ma utula:la haleta utula:la dukuslopi dla koa hamsiyamalalo sota malamwaye, semte tamali mateka:pi tepo duwa. <sup>28</sup>Epammama yia:tapo ta:la adinamata: depame ta:la ala:lalo dea hame ta:la ala:uwa. Epo natilati ta:laye 40 mita ga:tulli epapele haluwa. Epame matle yimka:mala tame depo matle ala:uwa. Epo natilati 30 mita ga:tulli epapele haluwa. Epalati yia: mala-muwa, tamaliye mo-mateka:pi halayo duwa. <sup>29</sup>Epapalati yia:tapo sikemte wowota:uwa. Adipalati, koata utula:la esawa dla tamama ewala dla gulomalala depame. Epammama yia:tapo upiyele alisisi dapiyamte dapiyamte dleye koa dla hihimapo yú dulu dla pololuwa koata hatlo ellepo depame. Epame utula:la edla popa:mama koa hamsiyamalalo sota, “hapele alalene,” dempopa:uwa. <sup>30</sup>Epampopa:mama yia:ta koa pato tle hemele potlowedeme pasakalo gadlalo koa yemalaye yú dla dea mate halumtulume himpame di watle epo atluwa, “Di koa mu tle upiyele alisisi opi pololowamo,” duwa. <sup>31</sup>Amasiyama Polota opahale omhallalo oplami mate ya: opa mate dla epo atluwa, “Koa hamsiyamalalo sota potlepiye, di hapuloma pallipe,” duwa. <sup>32</sup>Epapalala depame opahale sotapo pasakalo gadlalo koa yemalaye dea kestlati mosisita ma halemtauwa.

<sup>33</sup>Epame ma-alallowe mateka:pi dla hallati Polota opa hapuloma watle epo atluwa, “Wua: 14 alila dulu dla wowota:le mate pumulumama daya woloma podlompuana.

<sup>34</sup>Epedeme wua: watapo woloma daya deiya, wua:tapo itiyamale mate tamali dla tloweye. Epedeme wua: malamaiya, wua: dulu dla haleta popolowa,” duwa. <sup>35</sup>Epame Polo yu i atlepame daya hapo God watle inoma sumale yu atlepame ma opa hapuloma inoma dali dla daya seme gladepame douwa. <sup>36</sup>Polota daya demhalla natipame



opa hapulomata malamale hatlope depame yia: mape daya dlomuwa. <sup>37</sup> Epedeme dia:ye 276 sota koa dulu edla ha:ha:uwa. <sup>38</sup> Yia: daya mo-dlopo gudepame ma daya hapulomaye yú dulu dla pololuwa koata holokamelepo depame.

### *Koata tame ewala dla gulomama gaglatimale*

<sup>39</sup> Epame utulala ikadepe ala alalem tlati koa hamsiyamalalo sota peleyama natiwa. Epame yia:tapo peleyama eye woloma pomalanatilalo medla tame koa himilowa duwa. Adipalati, yia:ta malamaleta peleyama eye semte koa himomolowe ka:pi tepo duwa. <sup>40</sup> Yia: epammama peleyama dla tlowedeme upiyele alisisi koa dla hihimapo hutieleye yú dulu dla kotipo meluwa. Epame koa kei hamalalo kosopaye hitomelepame mu dla tluka himomeleme ellalo haleye ta:depo himomeluwa, mosisita koa halemtlepo depame. Epame dita natiwa tamali peleyama dla tamaluwa. <sup>41</sup> Amasiyama di ala peleyama edla tamha:ha:mama muta tame duka esawa dla gagaduwa. Epalati ulota puame koa kei dla heyulumama koa gaglatimuwa.

<sup>42</sup> Epapele dulu dla opahale so yia:malamuwa, amtuwale aya dulu dla ha:ha:lalo sota yú huhutapo potlala depame. Epammama yia: solotamuwa, yia:ye koa dulu medla siyomtimolowedeme. <sup>43</sup> Amasiyama opahale so omhallalo oplami Yuliyusta posolotamana, yia:ta epo amtuwale aya dulu dla ha:ha:lalo so potimama Polo ma yumuluweye. Epammama ya:ta epo atluwa, “Yú huhutamolowe yia: malamale so wua:ye tamali dla yú huhutamtaiya. <sup>44</sup> Epame yú huhutamolowe yeitalimale soye koa gaglatimale halopo alotle tamali dla huhutamtaiya,” duwa. Epedeme ipapele koko tle opa hapulomata woloma huhutamtame tamali dla popolahauwa.

## 28

### *Polota Malata hasu dla puame woyamale*

<sup>1</sup> Di epame yú huhutamtame hasu dla poposokolepo popa:mama dallati hasu ya: hiye Malatayo dla daluwa. <sup>2</sup> Di edla puame woyamalati mo so edla ha:ha:lalota dia:ye woloma gaduwa. Amasiyama oloma edla tiyo ma helemhalademe mo sota dita dlapa tilimoloweye mo-mipo ha:ha:uwa.

<sup>3</sup> Epalati Polo mape dlapa halopo puame mimsela:lati ilamata dlapa dulu tle woyapame Polo do dla yeluwa. <sup>4</sup> Epalati mo sota ilamata ya: do dla yeleme ella natipo yimkadulo watle epo atlamyeuwa, “Oplami iye ya:mkale yumulalo oplami mle. Adipalati, ya: kaula duka tle pumama popwana. Epedeme ya: wata batalimale asiyama hamama ilama yelepole. Epapedeme ya: wata polope,” demyeuwa. <sup>5</sup> Amasiyama Polota ilamaye ya: do tle dlapa dulu dla ka:stauwa. Epapele dulu dla koko haleta ya: dla powoyamana. <sup>6</sup> Amasiyama mo sota epo momalamha:ha:uwa, “Polo doye hoholopame ta:la dla teyumama polope,” depo momalamha:ha:uwa. Amasiyama alila selemalli dulu dla koko haleta Polo watle powoyamana. Epalati opata koko i natipame Poloye god hale mle demyeuwa.

<sup>7</sup> Epapele dulu dla dita dlapa tilimpopa:uwa mo tle Malata hasu dokopala oplami Publiyus ya: ta:la pase pateka:mu. Epapedeme ya:ta di natipame ya: aya dla elemhetame alila dapahatlope ha:ha:lati ya:ta di ka:pi gademhaluwa.

<sup>8</sup> Epele dulu dla Publiyus ya: aye aya dulu edla esiyele mate epo omtelle mate eluwa. Epalati Polota ya:ta ellalo dla tuwame dota ya: hamame inoma sumalati esiyeleta ya: tle alikili dla woyamuwa. <sup>9</sup> Alotle koko i dalepame esusulumale so hasu edla ha:ha:le so hapulomata pumhallati Polota yia:ye ka:ka:duwa. <sup>10-11</sup> Epele dulu dla dita mo edla ha:ha:lati mo sota di watle namkale dle alisisi halopimha:ha:uwa. Epame mama dapahatlope ha:ha:po gudepame ma mo-tlowedeme popa:lati mo sota ma di watle api duka dla tamama daya dlowe mate epo alisisi opi mate kolumuwa.

### *Polota Loum mo dla tame woyamale*

Di epame Alesendiliya so koa tene yapi Malata hasu dla elale dla alumuwa. Koa e hamsiyamalalota koa ya: mu dla yia: biskapa god dapiyamte mimita:pleta ha:ha:la natiwa. <sup>12</sup> Di koa etle tame Silakusa mo dla koa himpame alila dapahatlope ha:ha:uwa. <sup>13</sup> Epame ma etle Legiyum mo dla uluwa. Edla hutiyepo alallati mosisita bibikilimolowe kotiyamuwa. Di epalati mosisita di koa hapele hamtelepo depame medla koa akustepo tamaluwa. Epame ma alila haleta Putiyolu mo dla tame woyamuwa. <sup>14</sup> Di tame Putiyolu mo dla koa himpo natilati mikadepe dle so opi natiwa. Epalati yia:tapo dia:ye alila yimka:mala yia: mate ha:ha:iya duwa. Di epalati Sande hatlope yia: mate ha:ha:po gudepame matle ta:la api Loum dla tamaluwa. <sup>15</sup> Epalati mikadepe dle so Loum dla ha:ha:lalota dita pua dalepame api duka dla di umuluwedeme puwa. Epapele dulu dla opita puame dia:ye Apiyus Polum mo dla umuwa. Epalati opita mo hale ya: hi Asepe So Aya Dapahatlope demdiye, edla puame umuwa. Epapalati Polota yia: natipame sikemte siyemama God dla siyele pato ta:duwa.

<sup>16</sup> Amasiyama dita Loum mo dla puame woyamalati opahale so omhallalo oplamita Polo watle epo atluwa, “Wa: amtuwale aya dla potlowa. Amasiyama wa: isikimi aya hale dla hallati opahale oplami hatlopeta wa: omhallepe,” duwa.

<sup>17</sup> Epame alila dapahatlope dulu dla halepo alotle Polota Loum mo dulu dla Yu so dokopala so hapulomata ya: hala dla pumullupo depame yu hamiwa. Epo yia:ta mo-puame ha:ha:lati natipame Polota epo atluwa, “Namkadulo Yu so, na: batalimale koko hale na: opa dla pohana, epame di toto aiyalma hale pohauwokokomana. Amasiyama Yelusalem dla Yu sota na:ye koko pa:le hampame Loum so dla homeluwapo. <sup>18</sup> Epame asiyama Loum sota na: watle atlanatili pasatale atlapame na: dla batalimale koko hale ponatina, yia:ta na:ye polowe dla himiloweye. Epedeme yia:ta solotamuwa, na: amtuwale aya tle alikili dla woyamelepo depame. <sup>19</sup> Amasiyama Yu sota na:ye yumuluwedeme apalati na:ta naskamu gadlowe api hale ponatina. Epapalati na: solotamuwa, dokopala oplami Sisata na: koko gladlepo depame. Amasiyama na: koko ipapele dulu dla na: opa Yu so dla po-alisema. <sup>20</sup> Epapedeme na:ta koko iye wua: mate woloma esemolowedeme wua:ye sisilama. Epedeme na:ye wata oli dea mate yupo halapo. Adipalati, na:ta Isalael sota dalemha:ha:mama omha:ha: oplami dla mikadepe duwa koko tle,” duwa.

<sup>21</sup> Epalati asiyama dokopala sota Polo watle epo atluwa, “Di wa: koko dla yu ilimale hale Yudiya tle hamilati pohana. Epame Yu so opi etle pumulumduwata di watle wa: hi mate batalimale hale atla podalemjena. <sup>22</sup> Amasiyama di solotama, wa:ta imsula: kokoye di watle atlamelepo depame. Adipalati, mo hapuloma dulu dla opata imale koko iye allimde,” duwa.

<sup>23</sup> Epame Polo mate Yu so mate alila hale sepo himiwa, yia:ta matle Polo mate Yesu kokoye esemolowedeme. Epame yia:ta sale alila edla Yu so hapulomata Polo hala dla Yesu koko esemolowedeme pumuluwa. Epalati Polota utulalati kotiyapame alila pato dulu dla halemama God ya: mo koko imhalemama Mosesta aiyalma hatitimale tle epame God tle yu hapame molo atlalo sota yu hatitimale tle Yesu kokoye imhaluwa, yia:tapo Yesu dla mikadepe dlepo depame. <sup>24</sup> Epapalati opa opita Polo yu dla dalepame mikadepe duwa. Amasiyama opa opiye pomikadepe dena. <sup>25</sup> Epammama yia: dulu dla duka gladepame yu dlomuwa. Epame yia:ta mo-tlowedeme popa:lati Polota pomikadepe dle so dla yu hatlo itlo atluwa, “Hela:dle Sokotapo ikadepe kokoye God tle yu hapame molo atlalo oplami Aisaya tle wua: mamadulo dla yu ipo atluwapo,

<sup>26</sup> “Wa: tame opa iwolo dla atlemama ipo atellepe,

“Wua: woloma kulume dallepe,

amasiyama wua: woloma pomalamolowa.

Epame wua: woloma kulume natilipe,

amasiyama wua: woloma pomalanatilowa.”

<sup>27</sup> Adipalati, yia: dupa malamaleye pta kokalalimana.

Epapedeme yia: molo mate yia: inoma mate ma hihimamuwapo.

Amasiyama yia: natipame epo dalepame epame malamale hapame na: dla ilame pumulumatiye,

eta na:ta yia: bobtalimaleye hiyotimelemla.'

<sup>28</sup> Epapedeme wua: malamaiya, Godtapo pasakalo halloweye hatlo Yu so dla pohamina. Hao, po-Yu so dla mape hamiwapo. Epedeme yia:tapo woloma solotamale mate God yu dallepe."

[ <sup>29</sup> Epalati Yu sotapo Polo yu i dalepame tamalemama yiskamu yia: dulu dla sikemte yu dlomtamuwa.]

<sup>30</sup> Epame Polo sokomoko dapiyamte dulu dla asiyama mate hallalo aya dla halemama opa ya: natila pumulale soye siyele mate aya edla elemheta demhalemduwa. <sup>31</sup> Epame yia: watle God ya: mo koko imama Lod Yesu Keliso koko atloweye powota:mdena. Epapele dulu dla oplami haleta ya:ye pohumatlemdena.

## **Polota Loum sos dla yu ilimale hamili Loum Loum buka ya: dulu koko**

Polota ala Loum mo dla potlalo halemama yu iye ilipo Loum so dla hamiyo. Yu ilimale dulu hema mikadepe dlowe ya: dulu kokoye ilimaiyo. Epammama ya: tapo Kelisota oko halë mate epo Godta bokotiyapo malamale mate epo mikadepe dlowe koko mate epo pasakalo halowe koko mate ilalimaiyo. Epame batalimale koko dla ma ilimaiyo. Epame Yu so ikadepe mate epo po-Yu so mateta mikadepe dle tle ma-hatlope depo ha:ha: koko mape ilimaiyo.

<sup>1</sup> Na:ye Polo, Yesu Keliso ya: oko oplamipo. Epedeme Godtapo na:ye tane dle oplami hi hamipame na: watle ya: tle pua ka:dle yu atlamsela:lepo depame ma sauwapo. <sup>2</sup> Epapedeme mo-powataliya Godtapo ka:dle yu iye opata dallepo depame ya: tle yu hapame molo atlamalalo so opa dla hamimama yu itiyapo himiwapo. Epedeme yu iye God yu buka dla me-ilimale halapo. <sup>3-4</sup> Epapedeme ka:dle yu iye Yami Yesu Keliso kokoye apopo. Yesu Keliso eye di Lodpo. Epele dulu dla opatapo ta:lamo tiyama tle Yesu Keliso natilati ya:ye Deibidi elele halë oplami haluwapo. Amasiyama ma Soko tle natilati ya:ye God Yami ikadepe haluwapo. Adipalati, Godtapo ya:ye itiyamale mate powale tle ta:duwapo. <sup>5</sup> Epedeme Godtapo na: sikemte malamama Keliso tle na: watle tane dle oko ka:piye hamiwapo, po-Yu so opa hapulomatapo na: tle Keliso dla mikadepe depame salladepo siyamelepo depame. Epapele koko tle na: tapo Keliso yilo ya: oko iye hapo. <sup>6</sup> Epame wua: mape Godtapo wua:ye Yesu Keliso dulu dla ha:ha:lepo depame mo-sisilamuwapo.

<sup>7</sup> Epapedeme na: yu ilimale iye Godtapo bokotiyapo malamale opa Loum mo dla ha:ha:lalo so wua: dla hamima. Godtapo wua:ta ya: opa depo ha:ha:lepo depame ma-sisilamuwapo. Epedeme di A God mate epo di Lod Yesu Keliso mate yia:ta bokotiyapo malamale mate epo sadle mateta wua: mate hallepe.

### *Polota Loum mo so natila puluwedeme sikemte solotamale himhalale koko*

<sup>8</sup> Epedeme mo hapuloma dulu dla opa hapulomatapo wua:ta mikadepe dle kokoye ma-dlalemtauwapo. Epapedeme na: tapo Yesu Keliso tle wua:ta hapuloma yilo God dla siyele yu atlemde. <sup>9</sup> Epame God ma me-ya:malamana, na:ta alila hapuloma wua: yilo inoma sumale yu himhala kokoye. God eye na: tapo na: dupa dulu tle sikemte malahale-mama ka:dle yu Yami kokoye atlamsela:po. <sup>10</sup> Epedeme na:ta wua: natila puluwe koko dla inoma sumale yu mate God dla dalla natidemhalema. Amasiyama epapele dla Godta solotamelepiye, eta na:ta wua: natila puluwepo. <sup>11</sup> Adipalati, na: tapo Soko tiyama tle wua: gadlowedeme wua: natila puluweye sikemte solotama. Epame wua: tapo Lod dulu dla itiyamale mate ha:ha:lepo depame. <sup>12</sup> Epedeme na:ta atlama kokoye ipapena. Na: solotama, na:ta mikadepe dle kokotapo wua:ye gadlepo depame. Epame asiyama wua: mape wua:ta mikadepe dle kokotapo na:ye gadlepo depame. <sup>13</sup> Epapedeme namkadulo, wua: malamaiya, na: sikemte solotamde, wua:ye puame natilowedeme. Amasiyama koko haletapo na:ta wua: puame natilowe apiye himomelemhalemduwapo. Epapele dulu dla na: tapo po-Yu so opa opi gadle himiwaye, epammama na: sikemte solotamde, na: tapo wua:ta mikadepe dle kokotapo teta:lepo depame gadle epapele himiloweye.

<sup>14</sup> Epedeme na: dla solotamale pato elema, mo patoto dulu dla ha:ha:lalo so dla epo dalupa dulu dla ha:ha:lalo so dla ka:dle yu atloweye. Epame koko malamale so dla epo koko yeitamale so dla ka:dle yu atlowe ma solotamale pato elema. <sup>15</sup> Epapele koko tle na: sikemte solotama, Loum mo edla puame ka:dle yu wua: dla atlamolowedeme.

<sup>16</sup> Epedeme na: ka:dle yu iye di dla hamhetama. Adipalati, ka:dle yu iye Godta itiyamalepo. Epedeme Godtapo ka:dle yu itle ya: dla mikadepe dle so pasakaloye gademhalapo. Epammama ya:tapo Yu so tatile gadepame matle po-Yu so mape gademhalapo. <sup>17</sup> Epapedeme ka:dle yuta God mila:pi tle ullu pa:po hallowe kokoye botomastamhalapo. Epapele dulu dla ullu pa:po hallowe koko iye isikimi mikadepe dle koko tle ammalapo. Ame adipalati, God yu bukata epo atlapo, “Godta ullu pa:talo so demhala sotapo mikadepe dle tle pasakalo hallowe hamha:ha:po.”

*Godta siyaladleta opa dla pua koko*

<sup>18</sup> Epedeme Godtapo Pepele dimo tle ya:ta siyaladle kokoye batalimale koko halomha:ha:lalo so hapuloma dla nati-imhalapo. Adipalati, epapele sota yia:ta batalimale koko halomha:ha:ta ikadepe kokoye hemele hahatimyomha:ha:po. <sup>19-20</sup> Amasiyama epapele sotapo yiskamu yia:ye God yeitamale so dloweye po-ala:na. Adipalati, yia:tapo ta:lamo hema Godta mimita:ple alisisi hapuloma tlamatapo yia: dla Godta ikadepe hala kokoye mo-botomastamdepo. Epame yia:ta God ponatilalo wekele tlope, asiyama yia:tapo ya:ye ikadepe God demama ya:ta itiyamaleta kokó ela ma haliyamale dla natilipe. Adipalati, ta:lamo kotiyamale tle pumama Godtapo ya:skamu ya:ta ikadepe hala kokoye opa hapuloma dla ya:ta mimita:ple alisisi tle ma-nati-impuwapo. Epapedeme opatapo yiskamu yia:ye God yeitamana dloweye po-ala:na.

<sup>21</sup> Epedeme yia: God koko me-yia:malamale tlope, yia:ta ya: dla poheodesemde, epame ya: dla malamale pohimisemde. Amasiyama yia:ta momalamaleye pta sikemte bobtalimana, epame yia: dupa duluye amtuwaletapo sikemte poposatilipo ha:ha:mdepo.

<sup>22</sup> Epame yia:tapo yiskamu yia:ye ka:depo momalamale so demdepo. Amasiyama yia:ye sikemte yeitamale sopo. <sup>23</sup> Epedeme yia: kokó halepo hallalo God hi di dla ta:demama siyele hamilowe koko me-melepame ma biskapa god dlopi dota mimita:ple dla sisiyemha:ha:mdepo. Yia: epo sisiyemha:ha:mama opita opa mila:pi halomale dla sisiyemha:ha:mdepo, epalati opita tea mila:pi halomale dla sisiyemha:ha:mdepo, epalati opita aliya mila:pi halomale dla sisiyemha:ha:mdepo, epalati opita ilama mila:pi halomale dla sisiyemha:ha:mdepo.

<sup>24</sup> Epapedeme yia:tapo ipapele koko halomha:ha:lati Godta yia:ye batalimale koko medla pomoluwapo. Epame dulu edla opatapo miyelo yia:ta solotamale koko dolumama yia: motoye batalimale koko dla hatitimha:ha:mduwapo. <sup>25</sup> Epame yia:ye ikadepe God yu dla mikadepe dloweye memelepame ma biskapa yu dla mikadepe depame mo-dolumtamalapo. Epammama yia:ye alisisi mimita:plalo God ikadepe dla pomikadepe dlalo ma ya:ta mimita:ple alisisi dla mikadepe depo tamalapo. Amasiyama hatlo God hi di dla ta:dlowe tlo ka:pi. Eye ikadepepo.

<sup>26</sup> Epedeme opatapo epapele koko halomha:ha:la natipame Godtapo yia: bobtalimale dulu medla dolumtelepo depame me-pomoluwapo. Epapele koko tle wola:tapo yia: opa ikadepeye memelepame ma wola: yimkaduloye uhalomha:ha:po. <sup>27</sup> Epammama opa mape yia: wola: ikadepeye memelepame matle opa yimkaduloye uhalomha:ha:po. Epapedeme yia:ye batalimale koko ipapele sikemte halomha:ha:deme yia: moto dla batalimale asiyamaye hapo.

<sup>28</sup> Epedeme opatapo God kokoye sikemte welilati asiyama Godtapo yia:ye batalimale koko momalamale dulu medla ha:ha:lepo depame me-pomoluwapo. Epapele koko tle yia: dla batalimale koko opata pohaleli dle koko halomoloweta yia: dulu dla melapo. <sup>29</sup> Epapedeme yia:ye batalimale koko ipapeletapo yia: dulu dla poposatilipo ha:ha:po. Eye ullu walle kokopo, epame alisisi sikemte solotamolowe kokopo, epame alliwe koko mate siyaladlowe koko matepo, epame ya:mkale ellewe kokopo, epame ya:mkale yumuluwe kokopo, epame ya:mkale mate nalatimolowe kokopo, epame mala-atlowe kokopo, epame ya:mkale dla batalipo malamolowe kokopo, epame ya:mkale yu



ballowe kokopo, <sup>30</sup> epame ya:mkale batalipo putlopo atlowe kokopo, epame God dla elle himhallowe kokopo, epame ya:skamu ya: tlo ka:dena depame di dla hamhetlowe kokopo, epame ya:skamu pepemolowe kokopo, epame batalimale koko amko halowe koko atotomolowe kokopo, epame a mate wai mate yia: yu dla posalladlalo wekelowe kokopo. <sup>31</sup> Epame yia:ye yiyilamale sopo. Epame yia:ye yia:ta yu itiyapo hatitimale podolumalalo wekelalo sopo. Epame yia: yimkadulo popolowamalalo wekele sopo. <sup>32</sup> Epapedeme Godtapo ipapele koko halomha:ha:lalo soye yia: batalimale asiyama dla pallipe duwaye me-yia:malamana. Amasiyama yia: mepapele batalimale koko me-halomha:ha:mama ma yimkadulo watle, “wua: ma halomha:ha:iya,” demha:ha:po.

## 2

### *Godye ka:depo koko glادلalopo*

<sup>1</sup> Epedeme wa: po-ala:na, wa:tapo wa: amkale koko glademhallowe. Adipalati, wa: ma batalimale koko hatlo meye halomhalapo. Epapedeme wa:ta wa: amkale koko glademame ya: watle ya: batalimale asiyama halopi demhalatapo wa:skamu wa: koko ma me-glademhalapo. <sup>2</sup> Amasiyama dimalamana, Godtapo batalimale so koko glademama woloma ka:depo glademde kokoye. <sup>3</sup> Epedeme wa:ta yimkadulo koko glademhalemama ma hemele batalimale koko hatlo meye halomhallepiye, wa: adipo Godta kasilamale tle alikili dla haodepa:? <sup>4</sup> Amasiyama Godtapo wa:ta malamale meyeloype dlepo depame wa:ye polowamama sadle mate wa: omhalapo. Amasiyama wa: ya:ta namkale dle koko eye pokoko desema. Adipalati, wa: powa:malamata:, Godta namkale dle kokotapo wa:ye seme ya: hala dla ta kokoye. <sup>5</sup> Amasiyama wa: dupa dulu sikemte kokalle koko mate epo malamale pomeyeloype dlowe koko matetapo God dla sikemte siyaladle hapimhalapo. Epedeme ya:ta koko glادلowe alilata pulupiye, oloma edla wa: watle ya:ta siyaladleye nati-ilipe.

<sup>6</sup> Epedeme Godtapo opata koko halomha:ha:le asiyama woloma ala:le mate hapilipe. <sup>7</sup> Epedeme opa anawolotapo hutulli mate ka:ka:dle koko halomha:ha:mama Godta hela:dle mate epo ya:ta hapili pasakalo mate totamha:ha:lepiye, asiyama Godta yia: watle halepo halepo pasakaloye halopilipe. <sup>8</sup> Amasiyama opa anawolotapo yia:ta solotamale koko tlo dolumama ikadepe koko allipame ma batalimale koko dolumtamellepiye, yia: asiyama Godta kasilamale dulu dla ha:ha:lepe. <sup>9</sup> Ta:lamo so anawolotapo batalimale koko halomha:ha:lepiye, Godtapo asiyama yia: dla wotiyalle hapilipe. Epammama ya:tapo Yu so tatile wotiyalle hapipame matle po-Yu so dla wotiyalle hapilipe. <sup>10</sup> Amasiyama Godtapo ka:ka:dle koko halomha:ha:lalo so dla hela:dle mate epo sadle mate halopilipe. Epammama ya:tapo Yu so tatile hapilipe, epame alotle ma po-Yu so dla hapilipe. <sup>11</sup> Adipalati, Godta opa hapuloma koko glademama woloma ka:dle api tle gladlepe. Ya: seme tiyape tlo pogadlowa.

<sup>12</sup> Epedeme po-Yu so opa anawolotapo Mosesta aiyalma hatitimale kokoye yeitapo ha:ha:mama batalimale koko halomha:ha:lepiye, yia: ma batalimale asiyama mehalepe. Epame Yu so opa mape, anawolotapo Mosesta aiyalma hatitimaleye momalapame ma batalimale koko me-halomha:ha:lepiye, Godtapo aiyalma e mate ala:mama yia: watle yia: batalimale asiyama hapilipe. <sup>13</sup> Adipalati, Mosestapo ipo imuwapo, “Isikimi aiyalma koko tlo dalepo ha:ha:lalo soye Godtapo ya: mila:pi tle pollu pa:talo so demhalasema. Amasiyama opa anawolotapo aiyalma koko dalepame yia: moto mate koko halomha:ha:lalo soye Godtapo ya: mila:pi tle ullu pa:talo so demhalapo.” <sup>14</sup> Epedeme po-Yu soye Mosesta aiyalma hatitimale kokoye poyia:malamana. Epapele tlope yia:tapo koko halomha:ha:mama aiyalma kokota atla koko mate ala:po halomha:ha:lepiye, eta yia:ta batalimale koko mate ka:dle koko mate malanatilowe ye imdepo. <sup>15</sup> Epapele koko tle di natipo, aiyalma kokoye yia: dupa dulu dla ma-hatitimale some ha:ha:po. Adipalati, yia:tapo batalimale koko halati yia:ta malamaleta yia: dla

wota:le hampumdepo. Epame asiyama ka:dle koko halati yia: dla siyele hampumdepo. <sup>16</sup> Koko iye koko gladlowe alila dla haliyamale dla nati-ilipe. Adipalati, alila oloma edla Godtapo Yesu Keliso tle opa hapuloma koko glademama opa hapuloma yia: hemele kokoye haliyamale dla botomastlepe. Koko iye ka:dle yu na:ta atlama itapo epo atlapo.

*Yu so mate epo aiyalma koko mate*

<sup>17</sup> Epedeme na: Yu so wua: watle atlema. Wua: wuskamu Yu so ikadepe depame Mosesta aiyalma hatitimale dla hitaha:ha:lalo so demdepo. Epame wuskamu wua: tlo God mateka:pi dla ha:ha:lalo so depame di dla halopo hetamdepo. <sup>18</sup> Epame wua:ta atlemama, “di Godta solotamale koko ma mo-dimalamana. Adipalati, di aiyalma hatitimale ma-sesa:pame ka:dle koko mate batalimale koko mate malanatiloweye mo-dimalamana,” demdepo. <sup>19</sup> Epame wua: wuskamu wua:ye inoma pa:talo so opaye api imalalo so, demdepo. Epame amtuwale dulu dla ha:ha:lalo so yia: hela:dlepo, demdepo. <sup>20</sup> Epame wua: mape yiyilalimale so mate epo koko yeitalimale so mate imoloweye ma-ala:na, demdepo. Adipalati, wua:ta atlemama, “aiyalma kokoye dia: watle hamiwa depame ma ikadepe koko hapuloma mape ma-dimalamana,” demdepo. <sup>21</sup> Amasiyama wua: adipalati yimkadulo tlo imha:ha:mama ma wuskamu wua:ta imale koko podolumalalo wekemdi? Adipalati, wua: wua:ta yu atlemama, “Yimkadulo alisisi uhalomiyo,” depame ma muwolo upo alisisiye uhalomha:ha:po. <sup>22</sup> Epame ma wua:ta, “Upo oplami mate epo upo a:ya mate uhalomiyo,” demdepo. Amasiyama muwolo epapele kokoye halomha:ha:mdepo. Epame ma biskapa dota mimita:ple god dla sikemte allimha:ha: tlope, wua: ala biskapa god dla sisiyelalo aya dla tame alisisiye uhalomha:ha:mdepo. <sup>23</sup> Epedeme wua: wuskamu di dla halopo hehetamama aiyalma kokoye dimalamana, demdepo. Amasiyama wua: aiyalma koko eye hauwokokomale koko tle God hiye mo-batalimdepo. <sup>24</sup> Epapalati God yu bukata epo atlapo, “Yu so wua:tapo batalimale koko halomha:ha:

natipame asiyama po-Yu sotapo God hi mate putlopo atlamyapo,” depo.

<sup>25</sup> Epedeme wa: aiyalma koko dolumhallepiye, eta kapala kestale kokoye koko walena dlepe. Amasiyama wa: aiyalma hauwokokomelepiye, wa: kapala pokestlalo wekele oplami some hallepe. <sup>26</sup> Epapedeme kapala pokestlalo wekele oplamitapo aiyalmata atlama kokoye woloma dolumhallepiye, eta ya:ye kapala kestale oplami some hallepe. <sup>27</sup> Epedeme Yu so wua: dla aiyalma hatitimale koko mate epame kapala kotimolowe koko mate me-elapo. Amasiyama wua: aiyalma me-hauwokokomdepo. Epapele dulu dla opa anawolotapo kapala pokotimalalo wekemama aiyalma koko tlo woloma dolumtamalema:, ewolotapo wua:ye bobtalimale so dlepe.

<sup>28</sup> Epedeme wa:ta kapala kestepo hala kokotapo wa:ye po-Yu oplami ikadepe desema. Adipalati, ikadepe Yu oplami depo hallowe kokoye kapala di hema ponatisema. Epame kapala kestlowe koko ikadepe mape isikimi kapala di dla pe-elasema. <sup>29</sup> Epedeme ikadepe Yu oplami dlowe kokoye ipo elema, oplamitapo God mila:pi tle ka:depo ullu pa:po hallepiye, eta ya:ye Yu oplami ikadepe depo halapo. Epame kapala kestlowe ikadepe koko mape isikimi kapala di dla pe-elasema, amasiyama Sokotapo opa dupa dulu dla ulu hatimhalapo. Epedeme epapele sotapo opa tle siyele pohamha:ha:sema, amasiyama God tle hamha:ha:po.

### 3

<sup>1</sup> Epedeme Yu oplami depo hallowe kokoye apa koko ka:dleta elema:? Epame kapala kestepo hallowe koko mape apa koko ka:dleta elema:? <sup>2</sup> Yao, ka:dle koko me-hutiyepo. Adipalati, Godtapo ka:yapa ya: yuye Yu so watle hamiwapo.

<sup>3</sup> Amasiyama Yu so opitapo God yu dla podolumalalo ha:ha:lali natipame Godtapo asiyama yia: tle kostapa:? <sup>4</sup> Hao, pe-epapolowa. Adipalati, hatlo God tlo ikadepe koko

siyapo tlo atlalo halapo. Amasiyama di ta:la so hapulomaye isikimi mala-atlalo sopo. Ame adipalati, God yu bukatapo God koko dla epo atlapo,

“Wa:ta yu atlati opata dalepame wa:ye ikadepe yu tlo atlema demdepo.

Epame koko gladle dla wa:tapo opata atlowe malamaleye tla:mtame halapo,” depo.

<sup>5</sup> Epapedeme dita batalimale koko halomha:ha: etapo Godta ikadepe koko tlo halomhala kokoye nati-imdepo. Epedeme di adipo atlepa:? God di batalimale asiyama hamilowe poka:dena depa:? <sup>6</sup> Hao, ka:dena, Godtapo di batalimale asiyama hamiloweye. Adipalati, Godta di batalimale asiyama pohamilalo wekelepiye, ya: adipo ta:lamo so koko gladepa:? <sup>7</sup> Epedeme oplami haletapo epo atlowe sepene, “Na:ta mala-atlamde kokotapo Godta ikadepe koko siyapo tlo atlamhala kokoye botomastamdepo. Epedeme na:ta poka:dle koko halomdetapo Godta ka:dle koko mate hela:dle mate nati-ilipiye, ya: asiyama poka:dena, na: watle na: batalimale asiyama hamiloweye.” Epapele tlope ipapele malamale haloweye poka:dena. <sup>8</sup> Epame ma oplami haletapo epo atlowe sepene, “Di batalimale koko me-halomha:ha:lowa. Epalati ka:ka:dle kokotapo woyamelepe.” Amasiyama malamale epo momalamha:ha:loweye pta batalimana. Epapele tlope opa opitapo koko iye na:ta imuwayo depame na: hi mate mala-atlamyapo. Epedeme ka:dena, ipapele so dla Godtapo yia: batalimale asiyama hamiloweye.

### *Oplami haleta God mila:pi tle ka:depo pohalasema*

<sup>9</sup> Epapedeme di Yu so dia: tlo ka:ka:dle so depo ha:ha:mama po-Yu so tlo batalimale so depo ha:ha:ma:? Hao, pe-epapena. Epapele dulu dla na:tapo wua: watle ma-atlamuwapo, Yu so mate epo po-Yu so mate dita yimkata batalimale dulu dla me-ha:ha:po. <sup>10</sup> Ame adipalati, God yu bukatapo epo atlapo,

“Oplami haletapo God mila:pi tle ka:depo pohalasema.

Ka:dle oplami hale hawa ikadepe.

<sup>11</sup> Epame God koko malastale oplami hale hawa ikadepe.

Epame God totamalalo oplami hale hawa ikadepe.

<sup>12</sup> Ame adipalati, opa hapulomatapo God tle mo-kokotipo tamalemama sikemte batalipo ha:ha:po.

Epapele dulu dla ka:depo halale oplami hale hawa ikadepe.

<sup>13</sup> Epame yia:ta yuhamde kokoye wabasi dulu tle hutallu woyamde epapele some halapo.

Epame yia:ta yuhalë oloma edla mala-atlamale yu tlo atlamha:ha:po.

Epame yia: yu opiye ilama mitikape some opa dla wotiyalle hamimdepo.

<sup>14</sup> Epame yia: alila hapuloma yimkadulo dla elle himha:ha:mama bulumale yu yuhamha:ha:mdepo.

<sup>15</sup> Epame yia: yimkadulo potimolowe koko dla mo-dinapopo siyamdepo.

<sup>16</sup> Epapele dulu dla yia: tamalemama wotiyalle koko mate epo upiyele koko mate yimkadulo watle hapimtamalemdepo.

<sup>17</sup> Epedeme yia: dla yimkadulo mate sadepo ha:ha:lowe kokoye poyia:malamana.

<sup>18</sup> Epapedeme yia: dla God wowota:le hawa ikadepe.”

<sup>19</sup> Epedeme dimalamana, yu iye aiyalma hatitimale hapili so dla hamiwapo. Adipalati, yu itapo ta:lamo so hapulomatapo yia: batalimale malanatipo ma Godta kasilamale isili tle ha:ha:lepo depame apuwapo. Epapele oloma dla ditapo God mila:pi tle diskamu gadlowedeme di koko hemele kesomoloweye po-ala:lowa. <sup>20</sup> Adipalati, isikimi aiyalma koko dolumolowetapo Godta dia:ye ya: mila:pi tle po-ullu pa:talo so dlowa. Amasiyama aiyalmatapo isikimi di bobtalimale kokoye dia: watle haliyamale dla bobotimatimhalapo.

### *Ullu pa:po hallowe kokoye mikadepe dle tle puapo*

<sup>21</sup> Epapedeme di aiyalma dolumha:ha:le koko tle God mila:pi tle ullu pa:talo so depo poha:ha:sema. Amasiyama God yu bukata atla koko dolumama Godtapo di watle api hale tle mo-botomastauwapo, ditapo ya: mila:pi tle ullu pa:po ha:ha:lowe kokoye. <sup>22</sup> Epedeme dita Lod Yesu Keliso dla mikadepe dlati asiyama Godtapo dia:ye ullu pa:talo so demhalapo. Epapedeme dita hapuloma Yu so mate epo po-Yu so matetapo api hatlo itle pasakalo halomelepe. <sup>23</sup> Adipalati, dita hapulomatapo mo-bobtalimale dulu dla mo-tutula:pame Godta hela:dle mate po-ala:po ha:ha:sema. <sup>24</sup> Amasiyama epapele tlope Godtapo dia:ye sikemte bokotiyapo malapame Yami Yesu Kelisota di batalimale asiyama hapame ma dia: eleme di batalimale tle alikili dla woyamalati asiyama Godtapo dia:ye ma ullu pa:talo so duwapo. <sup>25</sup> Epedeme Godtapo Yami Yesu Kelisoye di batalimale yilo polopo depame tulune duwapo, ditapo Godta kasilamale tle alikili dla woyamelepo depame. Epapele dulu dla ditapo Yesu Kelisota di batalimale yilo omali olostauwa depo ya: dla mikadepe dlepiye, asiyama Godta dia:ye ya: mila:pi tle ullu pa:talo so dlepe. Epapedeme ipapele kokotapo Godta ka:depo hala kokoye nati-ipo. Ame adipalati, Yesu ala popolalo haluwa oloma edla opata batalimale koko halomha:ha:lati Godtapo yia: sikemte bokotiyapo malamale elemama yia: watle yia: batalimale asiyama pohamimdena. <sup>26</sup> Epapele dulu dla wata oloma hema Godtapo woloma ka:dle koko siyapo tlo hamhalapo. Epedeme Yesu dla mikadepe dlalo soye Godtapo ya: mila:pi tle ullu pa:talo so demhalapo.

<sup>27</sup> Epedeme dia: dla api elema:, ditapo diskamu di dla hame hetloweye? Hao, pe-elasema. Adipalati, isikimi mikadepe dle tle dia:ye God mila:pi tle ullu pa:talo so demhalapo. Ditapo aiyalma koko dolumha:ha:le tle po-apsema. <sup>28</sup> Epapedeme dia:ye isikimi mikadepe dle tle Godtapo ya: mila:pi tle ullu pa:talo so demhalapo. Amasiyama dita aiyalma koko dolumha:ha:lati po-apsema. <sup>29</sup> Epapele dulu dla di natipo, Godye hatlo Yu so yia: God pohalasema. Amasiyama ya: ma po-Yu so yia: God halapo. <sup>30</sup> Epele dulu dla Godye hatlopepo. Epame dia:ye ya:tapo ya: mila:pi tle ullu pa:talo so depo elemolowe apiye hatlopepo. Epedeme Yu so mate epo po-Yu so mateye hatlo mikadepe dle tle Godta yia:ye ya: mila:pi tle ullu pa:talo so dlepe. <sup>31</sup> Epapedeme dita mikadepe dle api tle dolumtamala itapo aiyalma kokoye pokoko dema:? Hao, pe-epapesema. Aiyalma kokoye, koko walena.

## 4

### *Godtapo A:iblahamta mikadepe dle koko natipame ya:ye ullu pa:le oplami duwapo*

<sup>1</sup> Epapedeme ditapo di mama A:iblaham koko dla adipo atlepa:? <sup>2</sup> Ya:ye ya:ta koko halomhalaleta ya:ye God mila:pi tle ullu pa:po haluwa dleta ammatiye, eta ya:ta ya:skamu di dla hamhetlowe api ellemla. Amasiyama ya:ye God mila:pi tle ya:skamu di dla pohamhetamdena. Adipalati, ya: meyelo koko halë tle ullu pa:po pohalana. <sup>3</sup> Ame adipalati, God yu bukatapo epo atlapo,  
“A:iblahamtapo God dla mikadepe dlati

Godtapo ya:ta mikadepe dle natipame ya: mila:pi tle ya:ye ullu pa:le oplami duwapo.”

<sup>4</sup> Epapele dulu dla oplamitapo oko halepiye, ya: oko asiyama eye ponamkale dle alisisi hamisema. Amasiyama eye ya:ta oko halë asiyama epo. <sup>5</sup> Amasiyama oplamitapo ya:ta koko halomhalale tle God mila:pi tle po-ullu pa:le oplami dlowa. Amasiyama hatlo mikadepe dle tle Godtapo oplamiye ya: mila:pi tle ullu pa:le oplami demhalapo. <sup>6</sup> Epedeme Godtapo oplamita koko halomhalale posesalalo ya:ye siyele hamipame ullu pa:le oplami demde kokoye Deibiditapo God yu buka dla epo atluwapo,

<sup>7</sup> “Opa anawolo batalimaleye Lodtapo mo-hiyotipo weliwa,  
wua: sisiyeiya.

<sup>8</sup> Epame opa anawolo batalimaleye Lodtapo asiyama pohamilalo wekema:,

wua: sisiyeiya.”

<sup>9</sup> Epapele dulu dla siyele koko iye hatlo kapala kotimale so dla elema:? O kapala pokotimalalo wekele so dla ma me-elema:? Epedeme di ka:yapa ma-atlalepo, Godtapo A:iblahamta mikadepe dle natipame ya: mila:pi tle ullu pa:le oplami duwapo.

<sup>10</sup> Amasiyama adipalalo Godtapo A:iblahamye ya: mila:pi tle ullu pa:le oplami duwa? Ya:ye kapala mo-kestepo hallati apuwa? O kapala ala pkestlalo hallati apuwa? Amasiyama dulu edla ya: kapala ala pkestlalo hallati Godtapo ya: tatile ya:ye ya: mila:pi tle mo-ullu pa:le oplami duwapo. <sup>11</sup> Epedeme A:iblahamta ala kapala pkestlalo hale-mama God dla mikadepe dlati Godta ya:ye ullu pa:le oplami duwapo. Epapele alotle ya: kapalaye kestauwapo, ya:ta God mila:pi tle mo-ullu pa:le oplami depo hala kokoye nati-iliwedeme. Epapele koko tle opa anawolotapo kapala pokotimalalo ha:ha:mama yia:ta mikadepe dle tle ullu pa:po ha:ha:ma:, ewolo yia: a ikadepeye A:iblahampo. <sup>12</sup> Epame opa anawolotapo kapala kotipo ha:ha:mama A:iblaham some God dla mikadepe depo ha:ha:ma:, ewolo mape A:iblaham ya: yimlala ikadepepo.

*Godta atlamale kokoye A:iblahamtapo mikadepe dle koko tle halë*

<sup>13</sup> Epedeme Godtapo A:iblaham mate epo ya: mamadulo mate dla yu itiyapo himimama ta:lamo pato iye yia: watle hamilowepo duwapo. Epapele dulu dla koko iye A:iblahamtapo aiyalma koko dolumhallati natipame po-atlana. Amasiyama A:iblahamtapo God dla mikadepe dle koko natipame atluwapo. <sup>14</sup> Epapedeme opatapo Godta atlale koko iye isikimi aiyalma koko dolumha:ha:le tle halomatiye, asiyama mikadepe dle kokota koko pa:le ellemla. Epame Godta A:iblaham dla yu itiyapo atlale koko mape koko pa:le ellemla. <sup>15</sup> Adipalati, aiyalma kokotapo aiyalma postlalo so dla Godta kasilamaleye hampumdepo. Amasiyama aiyalma kokota pe-ellalo wekematiye, opata adipo aiyalma postamha:ha:pa:?

<sup>16</sup> Epapele koko tle mikadepe dletapo koko pato halapo. Adipalati, Godta ya:ta yu itiyapo himili atlamale kokoye dita mikadepe dle koko natipame isikimi namkale dle tle dia: dla hapilipe. Epapedeme Yu so mate epo po-Yu so mate dulu dla anawolotapo A:iblahamta mikadepe depo haluwa epapele some ha:ha:ma:, yu itiyapo himili iye yiolepo. Adipalati, A:iblahamye mikadepe dle so hapuloma yia: apo. <sup>17</sup> Ame adipalati, God yu bukatapo A:iblaham koko dla epo atlapo, “Na:tapo wa:ye ta:lamo so hapuloma yia: a hallepo depame wa:ye mo-hulumuwapo,” depo.

Epedeme A:iblahamta God dla mikadepe dle koko tle koko iye mo-woyamuwapo. Epedeme God iye palli tle ma pasakalo dlalo Godpo. Epame God hatlo me-ita amko koko kotiyamalalo God halapo.

<sup>18</sup> Epapele dulu dla Godtapo A:iblaham watle yu itiyapo himimama, “wa:tapo ta:lamo so hapuloma yia: a hallepe,” dlati asiyama A:iblahamtapo koko edla malamale potatlalalalo isikimi mikadepe depame omhaluwapo. Adipalati, Godta ma ya: watle epo atluwapo,

“Wa: mamadulotapo sikemte pasatamama sesa:loweye po-ala:lowa,” duwapo.

Epalati A:iblahamtapo yimlala pohatitimalalo mo-totoyemala halemama mepele Godta atlale yu dla mikadepe duwapo. <sup>19</sup> Epapele dulu dla A:iblahamye mo-totoyemala halemama 100 sokomoko epapele umala taiyo. Epalati ya:llu Sela mape yimlala pohatitimalalo hamkapi a:ya polomama ma-alluyemala polaiyo. Amasiyama A:iblahamtapo Godta atlamale yu dla ala me-mikadepe depo halaiyo. <sup>20</sup> Epame ya:tapo Godta ya: dla yu itiyapo himili koko dla mikadepe depo halemama malamale potatlalalalo halaiyo. Epame ya:ta mikadepe dletapo ya: dla itiyamale hamilati ya:tapo God dla siyele ta:demduwapo. <sup>21</sup> Epame ya:tapo epo malamduwapo, “Godtapo meyelo na: dla yu itiyapo himili kokoye halepe,” demduwapo. <sup>22</sup> Epapedeme Godta A:iblahamta mikadepe dle koko natipame ya:ye ya: mila:pi tle ullu pa:le oplami duwapo.



<sup>23</sup> Epapele dulu dla yu iye hatlo A:iblaham watle po-atlana. <sup>24</sup> Amasiyama di watle ma me-atluwapo. Adipalati, di mape God mila:pi tle mo-ullu pa:talo so duwapo, ditapo di Lod Yesu Keliso powale tle ma pasakalo dle God dla mikadepe dlati. <sup>25</sup> Epedeme Godtapo Yesuye di batalimale dla polopo depame hamiwapo, ya:ta popo sila:tili kokotapo dia:ye God mila:pi tle ullu pa:talo so dlepo depame.

## 5

### *God mila:pi tle ullu pa:po hallowe koko*

<sup>1</sup> Epapedeme dita God dla mikadepe dle koko tle dia:ye God mila:pi tle mo-ullu pa:talo so depo ha:ha:po. Epedeme di Lod Yesu Kelisota koko halë tle God mate sadepo ha:ha:po. <sup>2</sup> Adipalati, dita mikadepe dle koko tle Kelisotapo dia:ye Godta bokotiyapo malamale dla elempuwapo. Epapedeme dia:ye Godta bokotiyapo malamale dulu dla ha:ha:mama Godta hela:dle ipi halowe dla sisiyele mate dalemha:ha:mama omha:ha:po. <sup>3</sup> Epame di ma sisiyemdepo, wotiyalle kokota dia: dla pula natimama. Adipalati, wotiyalle koko itapo dita kokalepo ha:ha:lowe kokoye hampumdepo. <sup>4</sup> Epame kokalepo hallowe kokotapo ikadepe oplami depo hallowe kokoye hampumdepo. Epame ikadepe oplami depo hallowe kokotapo itiyamale mate pasakalo gadleta puluwe koko dla dalemhalemama omhallowe kokoye hampumdepo. <sup>5</sup> Epame dalemhalemama omhallowe koko etapo dia: watle wota:le pohamilowa. Adipalati, Godtapo ya: Hela:dle Sokoye dia: dla mahamiwapo, ya:tapo di dupa dulu dla Godta bokotiyapo malamale kokoye poposatilipo mellepo depame.

<sup>6</sup> Epedeme ditapo diskamu gadlowe po-ala:lalo wekele dulu dla ha:ha:lali Kelisota di gadlowe alila ka:dle dla mo-puwapo, batalimale so dia: yilo polowedeme. <sup>7</sup> Epapele dulu dla oplami haletapo ya:mkale pasakalo gadlowe yilo popolowa. Amasiyama epapele tlope pona:malamana, oplami haletapo ka:dle oplami pasakalo gadlowe yilo polowe sepena. <sup>8</sup> Amasiyama Godtapo ya:ta bokotiyapo malamale pato nati-imama Yami Yesu Kelisoye tulune duwapo, ditapo batalimale dulu dla ala me-ha:ha:lali dia: yilo polopo depame.

<sup>9</sup> Epapedeme dia:ye Keliso omali tle God mila:pi tle mo-ullu pa:talo so duwa deme Kelisotapo dia:ye Godta siyaladle tle alikili dla eleme woyamelepe. <sup>10</sup> Epedeme dia:ye God mate ala me-opahale demha:ha:lali ya:tapo dia:ye Yami Yesu Kelisota powale koko tle me-ya:mkadulo duwapo. Epapedeme dia:ye ma ya:mkadulo ikadepe depame Kelisota pasakalo halë etle ma di pasakaloye gadlepe. <sup>11</sup> Epame koko hatlo etapo pe-elasma. Amasiyama di mape wata God dla sikemte sisiyepo. Adipalati, Godtapo di Lod Yesu Keliso tle dia:ye ma ya:mkadulo ikadepe duwapo.

### *A:damta polowe koko hampulati Kelisota pasakalo hampuale*

<sup>12</sup> Epapedeme oplami hatlo A:damta batalimale koko halë tle batalimale kokotapo ta:lamo dla puwapo. Epame batalimale koko etapo polowe hampuwapo. Epapele koko tle opa hapulomatapo yia: bobtalimale asiyama hamama pallipe. <sup>13</sup> Epedeme Mosesta aiyalma hatitimale kokoye ala populalo hallati opatapo batalimale koko me-halomha:ha:uwapo. Amasiyama epapele dulu dla Godtapo yia: batalimaleye posesa:mhalana. <sup>14</sup> Amasiyama epapele tlope A:dam tle kotiyapo puame Mosesta haluwa oloma edla opa hapulomatapo A:damta koko halë tle mo-palimpuwapo. Epapele dulu dla yia:tapo A:damta Godta aiyalma himili postale hale epapeleye yia:ta popostana. Epapele tlope yia:ta hapulomatapo me-palimpuwapo.

A:damtapo alotle puluwe Keliso ya:nasama haluwapo. <sup>15</sup> Amasiyama Godta bokotiyapo malamale mate A:damta batalimale koko halë mate pohatlope. Adipalati, oplami hatlope A:dam ya: batalimale tle polowe kokotapo opa hapuloma dla puwapo. Epalati asiyama Godta sikemte bokotiyapo malamale mate epo ya: mila:pi tle ullu pa:po hallowe koko matetapo ma oplami hale tle opa hapuloma dla puwapo. Oplami

iyē Yesu Kelisopo. <sup>16</sup> Epedeme Godta bokotiyapo malamale tle puwa koko mate epo A:damta batalimale tle puwa koko mateye pohatlope. Ame adipalati, A:damta batalimale koko hatlo halē tle dita hapulomatapo ma Dlapa mo dla tlowe api dla ha:ha:uwapo. Amasiyama Godta isikimi bokotiyapo malamaletapo dita hapulomata batalimale koko dulu dla ha:ha:liti alikili dla eleme woyamuwapo. <sup>17</sup> Epapedeme oplami hatlopeta batalimale koko halē tle polowetapo opa hapulomaye dokopala depo haluwapo. Amasiyama Godta bokotiyapo malamale tle ullu pa:talo so dle opatapo kokó halepo halepo pasakalo halopame Yesu Kelisota itiyamale tle dokopala so depo ha:ha:lepe.

<sup>18</sup> Epapele dulu dla oplami hatlopeta batalimale koko halētapo batalimale asiyama dla polowe kokotapo opa hapuloma dla puwapo. Amasiyama Kelisota ka:dle koko halē tle opa hapulomaye God mila:pi tle ullu pa:le so depame yia: watile kokó halepo halepo pasakalo hamiwapo. <sup>19</sup> Epedeme oplami hatlopeta God yu dla posalladlalo wekele koko tle opa hapulomaye mo-bobtalimale so duwapo. Amasiyama oplami hatlopeta God yu dla salladle koko tle opa hapulomaye God mila:pi tle ullu pa:talo so depo mellepe.

<sup>20</sup> Epapedeme Godtapo opa dla ya: aiyalma kokoye hamiwapo, yia:tapo yia:ta batalimale koko sikemte halomha:ha:ye malanatilipo depame. Epapele dulu dla batalimale kokotapo sikemte ta:mtlati asiyama Godta bokotiyapo malamale mape sikemte ma:ma ta:mtapo. <sup>21</sup> Epapedeme batalimale kokotapo opaye dokopala depo hallati opa dla polowe kokota eluwapo. Amasiyama watapo Godta bokotiyapo malamaleta dokopala depo halemama opaye kokó halepo halepo pasakalo hallowe dla elemtapo. Adipalati, di Lod Yesu Kelisota koko halē tle dita God mila:pi tle ullu pa:po ha:ha:lowe kokoye hauwapo.

## 6

### *Batalimale kokota itiyamaleye yumili*

<sup>1</sup> Epedeme di batalimale koko me-halomtamelepa:, Godta bokotiyapo malamaleta ta:mtlepo depame? <sup>2</sup> Hao, di pe-epapolowa. Adipalati, ditapo ma batalimale koko halomha:ha:lowe dla mo-paliwapo. Epapedeme di ma adipammama batalimale koko dulu medla me-ha:ha:pa:? <sup>3</sup> Epapele dulu dla wua: powua:malamata:, dita Yesu Keliso mate hatlope dlepo depame yú tutula:uwa kokotapo dita ya: mate paliwa koko imaye. <sup>4</sup> Epapedeme dita yú tutula:uwa oloma edla dia:ye Keliso mate mo-palipame wabasi dulu dla mo-popoliyeuwapo. Epame A Godtapo Keliso ye powale tle ma pasakalo duwa epammama dia:ye ya:tapo pasakalo amko dla hohopo ipila:uwapo.

<sup>5</sup> Epedeme ditapo yú tutula:le koko tle Keliso mate pallipiye, eta ya:ta ma pasakalo dla sila:tiwa epammama di mape ya: mate pasakalo amko dla sillipe. <sup>6</sup> Epame madi-malamana, batalimale koko dita halomha:ha:uwa hapulomaye Keliso mate dali yekelehmihili di dla mo-gogoduwapo, batalimale itiyamale dia: dulu dla elata itiyamale pa:lepo depame. Epame batalimaletapo ma dia:ye podokopala dlalo wekelepo depame. <sup>7</sup> Adipalati, dita Keliso mate paliwa oloma edla dia:ye batalimale itiyamale tle alikili dla me-eleme woyamuwapo.

<sup>8</sup> Epedeme di mikadepe dema, dita Keliso mate mo-paliwa koko tle dita ma ya: mate pasakalo amko halomelepe. <sup>9</sup> Adipalati, dimalamana, Kelisotapo popame ma sila:tiwa kokoye. Epapedeme ya: matle popolowa. Adipalati, polowe kokota ya: mamisika: hamoloweye itiyamale hawa. <sup>10</sup> Epedeme Kelisota pomama batalimale itiyamaleye yumpo hamastauwapo. Epame ya: watapo pasakalo halemama hatlo God yilo halapo. <sup>11</sup> Epapele api hatlo metle wua: mape batalimale itiyamaleye ma alo dla pololuwapo. Epalati Yesu Kelisotapo wua: watile pasakalo hamiwapo, wua:tapo hatlo God yilo ha:ha:lepo depame.

<sup>12</sup> Epedeme wua: mota solotamale koko dolumalala depame wua: palilalo motoye batalimaleta dokopala depo hala de demiya. <sup>13</sup> Epame wua: Saiten ya: oko so dlala depame wua: motoye batalimale koko halomolowe dla hatitimiya. Amasiyama wua: motoye ka:ka:dle koko halomolowe dla God watle halopiya. Ame adipalati, Godtapo wua:ye palli tle ma pasakalo ha:ha:lowe dla ta:ta:duwapo. <sup>14</sup> Epedeme batalimale kokotapo wua:ye ma podokopala depo halasema. Adipalati, wua: ma aiyalma koko dulu dla poha:ha:sema. Amasiyama wua:ye wata Godta bokotiyapo malamale dulu dla ha:ha:po.

*Batalimale koko melepame ma ka:dle koko dla salladepo sela:lowe koko*

<sup>15</sup> Epapele dulu dla Godta bokotiyapo malamaletapo dia:ye aiyalma kokota itiyamale tle ma alikili dla eleme woyamuwapo. Ame ka:deta:, ditapo aiyalma koko tle ma alikili dla woyapo ha:ha:mama batalimale koko me-halomha:ha:loweye? Hao, pe-epapolowa. <sup>16</sup> Adipalati, wua: powua:malamata:, wua:ta salladepo dolumtamala kokotapo wua:ye dokopala depo hala kokoye? Epapele dulu dla wua: batalimale koko dla salladepame dolumtamellepiye, wua:ye pallipe. Amasiyama wua: God yu dla salladepame dolumtamellepiye, wua:ye God mila:pi tle ullu pa:talo so depo ha:ha:lepe. <sup>17</sup> Epedeme wua:ye ka:yapa batalimale koko dla salladepame dolumsiyamduwapo. Amasiyama na: God dla siyele yu atlema. Adipalati, ka:dle yuta wua: dla pulati wua:tapo kikitilata hampame dolumha:ha:po. <sup>18</sup> Epedeme watapo wua:ye batalimale koko itiyamale tle alikili dla woyapame ma ka:ka:dle koko dla salladepo siyamapo.

<sup>19</sup> Epapedeme na: koko iye wua: watle atlemama woloma botomastepo atlowama, wua:ta malamelepo depame. Epedeme wua: ka:yapa wua: motoye batalimale koko halomolowe dla hapimduwapo. Amasiyama watapo wua: motoye ka:ka:dle koko halomolowe dla God watle halopiya, wua:tapo ma ya: opa ikadepe depo ha:ha:lepo depame. <sup>20</sup> Epedeme wua:ta ka:yapa batalimale kokotapo wua:ye dokopala depo elemtauwa oloma edla ka:dle kokotapo wua:ye podokopala depo tana. <sup>21</sup> Epame wua:ta batalimale koko halomduwatapo apa koko ka:dleye wua: dla hampuwa? Hawa. Amasiyama isikimi wua: dla polowe koko tlo hampumduwapo. Epedeme wua: ma wata koko e halomolowe dla wowota:po. <sup>22</sup> Amasiyama wata oloma hema Godtapo wua:ye batalimale itiyamale tle alikili dla eleme woyamuwapo. Epapele koko tle wua:ye watapo God yu dla salladepo siyamapo. Epame koko itapo wua:ye God ya: opa depame halepo halepo pasakalo hallowe koko dla eleme telepe. <sup>23</sup> Epapedeme batalimale asiyamaye polowe kokota elapo. Amasiyama Godtapo ya:ta bokotiyapo malamale tle dia: watle kokó halepo halepo pasakaloye hapimhalapo. Pasakalo eye di Lod Yesu Keliso dulu dla elapo.

## 7

*Dia:ye aiyalma koko dulu dla poha:ha:sema*

<sup>1</sup> Epedeme aiyalma koko mo-malastale so namkadulo, wua: mo-wua:malamana, adipalati, aiyalma kokota atlemhalaye mo-palli so dla po-atlemhalasema. Amasiyama ala me-ha:ha: so dla atlemhalapo. <sup>2</sup> Epapele dulu dla nasama kokoye ipo. A:yatapo oplami hapo hallepiye, ya: aiyalma koko dolumama isikimi hatlo ya:wolali mate hallepe. Amasiyama ya:wolalita polopiye, ya:ta ya:wolali hapo halale aiyalma dulu tle ma alikili a:ma woyapo tame halapo. <sup>3</sup> Amasiyama epapele dulu dla ya:tapo ya:wolali ala mehallati ma tame oplami hale halepiye, ya: oplami eye uhapo. Amasiyama ya:tapo ya:wolalita mo-polati matle tame oplami hale halepiye, ya: oplami eye po-uhasema.

<sup>4</sup> Epapedeme mikadepe dle so namkadulo, wua: mape mepapena. Adipalati, Kelisota pouwa koko tle wua: mape palli so some ha:ha:po. Epapele koko tle aiyalma kokotapo ma wua:ye po-omhalasema. Adipalati, aiyalmata atla kokoye mo-palli so dla po-atlasema. Amasiyama powale tle sila:tili Kelisotapo wua:ye omhalapo, wua:tapo God

ya: oko dulu dla dlomoko some milimha:ha:lepo depame. <sup>5</sup> Epedeme ditapo ka:yapa mota solotamale koko dulu dla siyamalati aiyalma kokotapo dita batalimale koko halomolowe ma-a:ma solotamale pato eluwapo. Epapele dulu dla batalimale solotamale koko etapo dia:ye polowe dla eleme tamduwapo. <sup>6</sup> Amasiyama dita Keliso mate paliwa koko tle di watapo aiyalma koko dulu tle alikili dla mo-woyapo tame ha:ha:po. Epapedeme aiyalma koko itiyamaletapo dia:ye ma po-omhalasema. Epame di ka:yapa aiyalma koko dolumha:ha:uwa tle God dla salladepo siyamduwapo. Amasiyama di watapo Sokota itiyamale tle ma God dla salladepo siyamapo.

*Godta aiyalma hatitimale kokotapo di batalimale nati-imhalapo*

<sup>7</sup> Epedeme di aiyalma koko dla adipo atlepa:? Aiyalma kokoye batalimale kokota:? Hao, pobatalimana. Amasiyama aiyalma koko itapo na: dla na: batalimale kokoye haliyamale dla nati-iwapo. Epapele dulu dla aiyalma hatitimale dulu dla aiyalma haletapo epo atlapo, “Wa: ase ya:mkale alisisi sikemte solotamiya,” depo. Epapedeme na: yu i sesa:pame epo malamuwu, ya:mkale alisisi sikemte solotamolowe kokoye batalimale kokopo. <sup>8</sup> Amasiyama batalimaletapo aiyalma koko dulu dla api natipame na: dupa dulu dla batalimale halowe solotamale ta:duwapo. Amasiyama aiyalma kokotapo hawa halematiye, eta batalimale koko mape itiyamale pa:le hallemla. <sup>9</sup> Epapedeme na:tapo ka:yapa aiyalma koko pomalamalalo haluwa oloma edla na: siyele mate haluwapo. Amasiyama na:tapo aiyalma koko malastauwa oloma edla na: naskamu na:ye batalimale oplami depame polowedeme haluwa kokoye malastauwapo. <sup>10</sup> Epedeme na:ta malamaletapo aiyalma kokotapo na: watle pasakalo hampuluwe tepo duwa, amasiyama isikimi polowe koko tlo na: dla hampuwapo. <sup>11</sup> Epapele dulu dla batalimaletapo aiyalma koko dulu dla api natipame na:ye mala-atlepame polowe dla semtauwapo. <sup>12</sup> Amasiyama aiyalma koko iye me-hela:dena epo me-ka:pi. Adipalati, aiyalma koko iye God tle puwapo.

<sup>13</sup> Epedeme adipammama aiyalma koko na:ta ka:dena demdetapo na: dla polowe koko hampupa:? Hawa, aiyalma itapo na: dla polowe koko pohampuana. Amasiyama batalimale kokotapo na: dla polowe kokoye hampuwapo. Adipalati, batalimaletapo aiyalma koko dulu dla oko hamama na:ye batalimale dla semtauwapo. Epapedeme na: wata natima, batalimale kokoye ikadepe sikemte batalimale kokopo.

*Dia: opasi dulu dla opahale demhala koko*

<sup>14</sup> Epedeme dimalamana, aiyalma kokoye Soko tle puwapo. Amasiyama na:ye ta:la oplamipo. Epedeme batalimale koko solotamaletapo na:ye dokopala depo me-semse:po. <sup>15</sup> Epapedeme na: naskamu na:ta koko halomde kokoye woloma pomalanatisemde. Adipalati, na:ta ka:ka:dle koko halomli depo malamde kokoye e pohalomasemde. Amasiyama batalimale koko na:ta pohaleli demde koko tlo ma na:ta halomdepo. <sup>16</sup> Epame na: na:ta koko halomhala iye batalimale koko depame sikemte wota:lepiye, eta aiyalma kokoye ka:pi dlepe. <sup>17</sup> Epapele dulu dla ikadepe na:tapo batalimale koko iye pohalomhalasema. Amasiyama batalimale na: dulu dla halatapo batalimale koko halomhalapo. <sup>18</sup> Epedeme na: batalimale oplami, ka:dle koko hale-tapo na: dulu dla pe-elasema. Na: solotamdepo, ka:ka:dle koko tlo halomolowedeme, amasiyama na: koko iye pohalomasemde. <sup>19</sup> Adipalati, na: na:ta ka:ka:dle koko siyapo tlo halomli depo malamde kokoye pohalalo, ma batalimale koko na:ta pohaleli dle koko tlo ma na:ta halomdepo. <sup>20</sup> Epapedeme na: na:ta posolotamalalo wekele koko halomhallepiye, eye ikadepe na:ta po-aposema. Amasiyama batalimale na: dulu dla halatapo ammalapo.

<sup>21</sup> Epapele dulu dla na: natima, na: solotamdepo, ka:ka:dle koko siyapo tlo halomolowedeme. Epapele tlope batalimaletapo ala na: dulu dla me-halapo. <sup>22</sup> Amasiyama epapele dulu dla na: na: dupa dulu tle Godta aiyalma hatitimaleye ka:pi demde.

<sup>23</sup> Amasiyama na: opasi dulu dla opahale dle kokoye me-elapo. Adipalati, mota solotamale kokotapo na:ta ka:dle koko hali depo solotamde koko mate natalimhalapo. Epapele koko tle batalimaletapo na:ye amtuwale aya dulu dla ka:stepo hala sepepo. <sup>24</sup> Epapedeme na: ya:mkale. Anta na: gadepa:, na:tapo pasakalo batalimale itle alikili dla woyamoloweye? <sup>25</sup> Epapele tlope na: God dla siyele yu atlema. Adipalati, di Lod Yesu Kelisoye na: gadlalopo.

Epapele dulu dla na: solotamdepo, na:ta malamale tle Godta aiyalma hatitimaleye dolumsela:lowedeme. Amasiyama mota solotamale koko na: dla elatapo na:ye batalimale dla ka:stamhalapo.

## 8

### *Hela:dle Sokota dokopala depo hallowe koko*

<sup>1</sup> Epapedeme opa anawolotapo Yesu Keliso dulu dla ha:ha:ma:, Godta yia: watle yia: batalimale asiyama poloweye pohamilowa. <sup>2</sup> Adipalati, batalimale itiyamaleta dia:ye polowe dla elemtlati asiyama Yesu Kelisota itiyamale tle pasakalo hamilalo Sokotapo dia:ye alikili dla eleme woyamuwapo. <sup>3</sup> Epapele dulu dla aiyalma kokotapo dia:ye batalimale tle alikili dla eleme woyamoloweye po-ala:na. Adipalati, mota solotamale kokotapo aiyalma kokoye hopeyamale hamimduwapo. Amasiyama hatlo God tlo ala:le haluwapo, dia:ye batalimale dulu tle alikili dla eleme woyamoloweye. Epapedeme ya:tapo Yamiye oplami moto hapame ta:lamo dla tulune duwapo, di batalimale yilo popame ma dia:ye batalimale dulu tle alikili dla eleme woyamelepo depame. <sup>4</sup> Epapedeme Godtapo koko iye dinapuwapo, aiyalmata atla koko hapulomaye Kelisota dia: yilo ala:po pustamhallepo depame. Epapele koko tle di mota solotamale koko dla podolumsiyamasema, amasiyama Sokota solotamale koko dla siyamapo.

<sup>5</sup> Epapedeme mota solotamale koko dla dolumsiyamalalo soye isikimi batalimale koko halomolowe tlo momalamalalo sopo. Amasiyama Soko dla dolumsiyamalalo soye isikimi Sokota solotamale koko halomolowe tlo momalamalalo sopo. <sup>6</sup> Epapele dulu dla batalimale koko dla momalamale hatitipo siyamolowetapo dia: dla polowe hampuapo. Amasiyama Sokota solotamale koko dla momalamale hatitipo siyamolowetapo dia: dla sadle koko mate epo pasakalo gadlowe koko mateye hampuapo. <sup>7</sup> Epapedeme mota solotamaleta elemsiyamalalo soye God mate opahale demha:ha:po. Adipalati, ipapele sotapo Godta aiyalma hatitimale dla salladepo dolumsiyamoloweye sikemte allimama aiyalma dolumolowe mape po-ala:po ha:ha:sema. <sup>8</sup> Epapele koko tle Godtapo mota solotamale koko dolumsiyamalalo so tle siyele haloweye po-ala:na.

<sup>9</sup> Amasiyama epapele dulu dla mota solotamale kokotapo wua:ye dokopala depo pe- elemsiyamasema. Amasiyama God ya: Soko wua: dulu dla halatapo wua:ye dokopala depo elemsiyamapo. Epapedeme oplami antapo Keliso ya: Soko pa:le halema:, ya:ye po-Keliso ya: oplami ikadepe. <sup>10</sup> Amasiyama Kelisota ikadepe wua: dulu dla halema dlepiye, wua: pasakalo hallowe halepe. Adipalati, Godta wua:ye ya: mila:pi tle mollu pa:talo so duwapo. Epapele tlope wua: moto dla batalimale asiyamatapo polowe hampulupe. <sup>11</sup> Amasiyama Godtapo wua:ta palilati ya: Hela:dle Soko tle wua: palli motoye ma pasakalo dlepe. Adipalati, Yesu Kelisoye powale tle ma pasakalo duwa God ya: Sokoye wua: dulu dla halapo.

<sup>12</sup> Epapedeme mikadepe dle so namkadulo, wua:ta ase mota solotamale koko dla dostasiyamiya. <sup>13</sup> Ame adipalati, wua: koko ipapele halomsiyamelepiye, wua: pallipe. Amasiyama wua: Sokota itiyamale tle wua:ta batalimale solotamale koko wua: dulu dla halaye yumilipiye, etapo wua: halepo halepo pasakalo halepe. <sup>14</sup> Adipalati, opa anawoloye God ya: Sokota dokopala depo elemtama:, opa ewolotapo God ya: akimlala ikadepe depo ha:ha:po. <sup>15</sup> Epapedeme Godta di watle Soko hamiwaye wota:le soko pohamina. Amasiyama ya:ta di watle Soko hamiwata gadle tle ditapo ya: akimlala depo



ha:ha:mama ya: watle “Aba,\* A,” demha:ha:po. <sup>16</sup> Epame God ya: Sokotapo dita God ya: akimlala depo ha:ha: kokoye di dupa dulu dla atlemhalapo. <sup>17</sup> Epedeme di God ya: akimlala depo ha:ha:deme koko hapuloma God tete depo halaye, e ma diolepo. Epedeme di yimkata Keliso mate koko hapuloma eye omha:ha:lowepo. Adipalati, di Kelisota wotiyalle hauwa ipi dita halepiye, eta di mape ya:ta hela:dle ipiye halepe.

*Itapu dla hela:dle halowedeme ha:ha: koko*

<sup>18</sup> Epapedeme dita wata oloma hema wotiyalle hamha:ha:ye pase koko pato. Amasiyama Godtapo di watle hela:dle hamilowedeme halaye pta pato. <sup>19</sup> Epedeme Godta mimita:ple alisisi hapulomatapo solotamale mate Godta ya: akimlala ikadepe haliyamale dla eleme woyamolowe koko dla dalemha:ha:mama omha:ha:po. <sup>20-21</sup> Epapele dulu dla Godtapo ya:ta solotamale tle ya:ta mimita:ple alisisi hapulomaye polowe itiyamale mate epo hutuluwe itiyamale mate dulu dla ipila:uwapo. Amasiyama Godta ya: akimlala ikadepe haliyamale dla eleme woyamolowe alila oloma edla God ma meyelo ya:ta mita:ple alisisi hapulomaye polowe itiyamale tle epo hutuluwe itiyamale tle eleme alikili dla woyamelepe. Epame ya:tapo ya: akimlala ikadepe dla hamilowedeme dinapele hela:dle mepapeleye ma yia: watle hapilipe.

<sup>22</sup> Epapedeme a:yatapo owayemala hamolowedeme wotiyalle natimdiye, epammama Godta mimita:ple alisisi hapulomatapo alila eta woyamolowe dla omha:ha:mama wotiyalle dulu dla ha:ha:po. <sup>23</sup> Amasiyama hatlo ya:ta mimita:ple alisisitapo alila eta woyamolowe koko dla po-omha:ha:sema. Amasiyama Hela:dle Soko watalo so di mape wotiyalle dulu medla sukalle mate ha:ha:mama alila eta woyamolowe koko dla omha:ha:po. Adipalati, Hela:dle Sokotapo itapu dla ela pasakaloye dia: dla imhalapo. Epapedeme alila oloma edla Godtapo di watle moto amko hapipame dia:ye ma ya: akimlala dlepe. <sup>24</sup> Epapedeme di watapo dita God ya: akimlala depo ma-ha:ha: kokoye isikimi dita mikadepe dle tle malamapo. Amasiyama alotle alila eta pulupiye, koko iye haliyamale dla natilipe. <sup>25</sup> Epedeme dita dalemha:ha:mama omha:ha: koko iye di ala ponatisema. Amasiyama di sadle mate itiyamale mate me-omha:ha:po.

*Hela:dle Sokota dia: gademama inoma sumde koko*

<sup>26</sup> Epame dita hopeyamala natipame Hela:dle Sokotapo dia:ye gademdepo. Ame adipalati, di God dla ikadepe inoma sumoloweye podimalamana. Epapedeme Hela:dle Sokotapo dia: yilo God dla sikemte momalamale mate inoma sumdepo. Epapele tope ya:ta dia: yilo inoma sumde yu ya: dulu koko dita atloweye po-ala:na. <sup>27</sup> Amasiyama opa dupa dulu malastale Godtapo Sokota atlemde kokoye ya:malamana. Adipalati, Hela:dle Sokota God ya: opa yilo inoma sumama woloma Godta solotamale oloma dla himmdepo.

*Godta ya: opa sesalemde koko*

<sup>28</sup> Epedeme dimalamana, adipapele koko hapuloma dulu dla Godtapo ya: sikemte malaha:ha: so dla ka:ka:dle koko tlo dinapomhalapo. Ame adipalati, God meyelo yu himili dolumama dia:ye ya:ta ya: akimlala depame ma-sesalemuwapo. <sup>29</sup> Epedeme Godtapo ya:ta sesalemale soye mo-powataliya malastapame haluwapo. Epame ya:tapo yia:ye ma-sesalemuwapo, yia:tapo ma ya: Maseyemala Yesu some ha:ha:lepo depame. Epapele dulu dla di natipo, Yesutapo God ya: opa hapuloma dulu dla itapu hamale maseyemala depo halemama ya: eidulo mate yotimadulo mate elemhalapo. <sup>30</sup> Epedeme Godtapo ya:ta sesalemale soye ma sisilamuwapo. Epame ya:ta sisilamale soye ma ullu pa:talo so duwapo. Epedeme ya:tapo ya: mila:pi tle ullu pa:talo so duwa dla ya:ta hela:dle ma hapiwapo.

*Koko haletapo dia:ye Godta bokotiyapo malamale tle duka pogladlowa*

\* 8:15: Aba de ya: dulu kokoye Yu so yu mate a demama apopo.

<sup>31</sup> Epapedeme di koko hema adipo atlepa? Godta dia: mate halema dlepiye, oplami antapo dia: mate opahale demama dia:ye tla:mtapa? Hawa. <sup>32</sup> Amasiyama Godtapo Yamiye dupa hohomama podatimana. Ame adipalati, ya:tapo Yamiye di batalimale yilo polopo depame isikimi me-hamiwapo. Godtapo Yami ikadepeye di watle hamilowedeme podatimalalo wekuwapo. Epapedeme Godtapo ma di watle alisisi hapuloma hapiloweye, ya: dla kokalle hale hawa ikadepe.

<sup>33</sup> Epedeme Godta ma-sesalemale soye ma oplami antapo batalimale so depa? Hawa. Adipalati, Godtapo ya:ye mo-ullu pa:talo so duwapo. <sup>34</sup> Epame matle oplami antapo Godta ma sesalemale so dia:ye Dlapa mo dla tlowe so depa? Hawa. Adipalati, Yesu Keliso popo ma pasakalo depame ya: A dowala tiyama dla polomama dia: yilo inoma sumale himhalapo.

<sup>35</sup> Epedeme apa kokota dia:ye Kelisota bokotiyapo malamale tle duka gladepa? Kokalle koko mate epo wotiyalle koko mateta dia:ye Kelisota bokotiyapo malamale tle duka gladepa? Hao. Epame daya pa:le koko mate epo alisisi dimi hallowe koko mateta dia:ye Kelisota bokotiyapo malamale tle duka gladepa? Hao. Epame wota:le koko mate epo polowe koko mateta dia:ye Kelisota bokotiyapo malame tle duka gladepa? Hao, pe-epapolowa. <sup>36</sup> Epedeme God yu bukatapo epo atlapo,

“Wa: yilo opatapo alila hapuloma dia:ye wotiyalle sikemte hapimha:ha:po.

Epame wa: yilo dia:ye eleme alinepi some mo-potimala tapo.”

<sup>37</sup> Amasiyama kokalalimale koko hapuloma dulu hema ditapo di bokotiyapo malamalalo Godta itiyamale tle mo-tla:mtame ha:ha:po. <sup>38</sup> Adipalati, na:malamana, koko haletapo dia:ye Godta bokotiyapo malamale tle duka pogladlowa. Epapele dulu dla polowe koko mate epo pasakalo koko mateta dia:ye Godta bokotiyapo malamale tle duka pogladlowa. Epame banakaka so mate epo i-itiyamale soko mateta dia:ye Godta bokotiyapo malamale tle duka pogladlowa. Epame wata oloma hema koko wowoy-amhala koko mate epo alotle wowoyamolowe koko mateta dia:ye Godta bokotiyapo malamale tle duka pogladlowa. <sup>39</sup> Epame omapla di dla alisisi hutiyete mate epo ta:la isili hema hutiyete alisisi matetapo dia:ye Godta bokotiyapo malamale tle duka pogladlowa. Epedeme ta:lamo pato dulu hema koko haletapo dia:ye Godta bokotiyapo malamale tle duka pogladlowa. Epapedeme Godta bokotiyapo malamale iye Yesu Keliso tle dia: dla botomastamhalapo.

## 9

### *Godtapo Isalael soye ya: opa ikadepe depo sale*

<sup>1-3</sup> Epedeme na:ye Keliso dulu dla halemama ikadepe kokoye wua: watle atlema. Epame na:ye isikimi pomala-atlasema. Hela:dle Sokotapo na:ye dokopala depo hallati na:tapo wua: watle atlemama na: opa Isalael so yilo sikemte dupa kolle natima. Adipalati, ya:tapo Godta solotamale kokoye podolumasema. Epapedeme na:tapo ya: yilo Godta kasilamale dulu dla tloweye mo-dinapopo halapo.

<sup>4</sup> Epapele dulu dla Isalael so opa iwoloye Godtapo ya: akimlala ikadepe duwapo. Epame ya:tapo ya: watle ya:ta hela:dle nati-iwapo. Epame ya:tapo Isalael so mate yu itiyapo himili dulu dla ya:ye ya:ta sesalemale so depo ha:ha:lati aiyalma koko ma ya: watle hamiwapo. Epame ya: watle ikadepe api tle ya: hi di dla ta:demama ya: watle siyele hamilowe koko ma imuwapo. Epame ya: watle Kelisota alotle puluwe koko ma atlamuwapo. <sup>5</sup> Epapele dulu dla ya: mamaduloye A:iblaham mate epo Aisek mate epo Yokob matepo. Epedeme Keliso mape opa iwolo ya: asiya dulu tle oplami moto hapame ta:lamo hema puwapo. Epapedeme Kelisoye Godpo. Epedeme ka:dena, opa hapulomatapo ya: dla kokó siyele ta:demha:ha:loweye. Adipalati, ya:tapo alisisi hapuloma ya: God halapo. Eye ikadepepo.

<sup>6</sup> Epedeme Godtapo Isalael so mate yu itiyapo himiwaye ma-hauwokokomuwa? Hao, pe-epapena. Adipalati, Isalael so dulu dla opa opiye pase Isalael so opa ikadepe. <sup>7</sup> Epame A:iblaham ya: mamadulo dulu dla opa opiye pase A:iblaham ya: mamadulo ikadepe. Adipalati, Godtapo A:iblaham watle epo atluwapo, “Wa: mamadulo ikadepeye hatlo wa: maseyemala ikadepe Aisek tle pulupe,” duwapo. <sup>8</sup> Epapedeme koko itapo epo nati-ipo, A:iblaham ya: mamadulo dulu dla opa opiye pase God ya: akimlala ikadepe. Amasiyama God ya: akimlala ikadepeye yu itiyapo himili maseyemala Aisekta hatitimale sopo. <sup>9</sup> Adipalati, Godtapo A:iblaham mate yu itiyapo himimama epo atluwapo, “Na:tapo sokomoko hale dla ma ilame pulupiye, Selatapo maseyemala hamelepe,” duwapo.

<sup>10</sup> Epapedeme maseyemala iye di mama Aisekpo. Ya:ta ta:po a:ya Lebeka hauwapo. Epame ya:llu Lebeka eta mopapo polopame akimlala dapiyamte hohomuwapo. <sup>11-12</sup> Epapele dulu dla yimlala dapiyamte iye ala pohohomalalo hallati Godtapo Lebeka watle epo atluwapo, “Wa: maseyemala patotapo ya: ei yemala yu dla heodepo salladepo sela:lepe,” duwapo. Epedeme Godtapo yia:ta dapiyamteta koko halomolowe ala yeitapo ha:ha:lali yu i tate ma-atluwapo. Epedeme dita Godta ya: opa sesalemhala koko dla natiye, ya: dita koko halomha:ha: dla natipo po-apesema. Amasiyama ya: isikimi meyelo malapame dinapele tle sesalemhalapo. <sup>13</sup> Epapedeme God yu bukata epo atlapo, “Na: Yokob tlo sikemte malamama asiyama Iso tlo alimduwa,” depo.

<sup>14</sup> Epapele dulu dla di adipo atlepa:? Godye isikimi seme tiyape tlo gadlalo Godta:? Hao, ya: pe-epapesemde. <sup>15</sup> Adipalati, Godtapo Moses watle epo atluwapo, “Na: na:ta sesalemale so dla polowamale koko mate epo bokotiyapo malamale koko mate nati-imdepo,” duwapo.

<sup>16</sup> Epedeme Godta hulumale kokoye opata solotamale tle epo yia:ta koko halomde koko tle natipo po-apesemde. Amasiyama Godta isikimi meyelo bokotiyapo malamale tle oplamiye hulumhalapo. <sup>17</sup> Epapedeme Godtapo Isip so yia: dokopala oplami dla epo atluwapo,

“Na:tapo wa: watle dokopala hi hamiwapo,  
isikimi wa: tle na:ta itiyamaleye opa hapuloma dla botomastlowedeme.  
Epame na: hi mape opa hapulomata dlalemtlepo depo botomastlowedeme,”  
duwapo.

<sup>18</sup> Epapele dulu dla di natipo, Godye ya:ta sesalemale so dla polowamale koko mate epo bokotiyapo malamale koko mate himhalemdepo. Amasiyama ma opa opi dla mikadepe dlowe dla dupa kokalalimolowe kokoye hapimhalapo.

### *Godta kasilamale koko mate epo bokotiyapo malamale koko mate*

<sup>19</sup> Epedeme oplami haletapo na: watle ipo atlanatilowe sepene, “Godtapo meyelo opa opi dla mikadepe dlowe dla dupa kokalalimolowe koko hapimhalema dlepiye, ya: ma adipammama opa ewoloye batalimale so depa:?” <sup>20</sup> Amasiyama namkale, wa:ta ipapele atlanatili God dla atloweye poka:dena. Ame adipalati, wa:ye isikimi ta:la oplamipo. Epedeme nasama yu ipo. Dulitapo yo duli tilalo a:ya watle atlemama, “Wa: adipalati na:ye ipo tima:?” dlowe poka:dena. <sup>21</sup> Adipalati, duli tilalo a:ya yo dla itiyamale elapo, ya:tapo duli hale tlo isikimi alila hapuloma dulu dla asiyamta demsela:lowe timama asiyama duli hale tlo isikimi koko dla tamama asiyamta demsela:lowe tiloweye.

<sup>22</sup> Epapele dulu dla God ma epamhalapo. Ya: dla itiyamale elapo, ya:ta siyaladle mate itiyamale mate opa dla nati-iliweye. Epapele tlope ya:tapo ya:ta alilalo sota mo-polowe api dla tamha:ha:lali natipame hapele yia: batalimale asiyama pohamilalo, sadle mate yia:ye me-omhalapo. <sup>23</sup> Epame ya: dla itiyamale me-elapo, ya:tapo ya:ta bokotiyapo malamalalo so dla ya:ta hela:dle koko nati-iliweye. Ame adipalati, opa ewoloye ya: meyelo ma-sesalemuwapo, ya:ta hela:dle dla ulatumellepo depame. <sup>24</sup> Epapedeme Godtapo opaye ya:ta hela:dle dla ulatumellepo depame sesalemama hatlo Yu so siyapo

tlo posesalemana. Amasiyama ya: po-Yu so opa mape sesalemuwapo. Epedeme ya:ta sesalemale so opa ewoloye dia:po. <sup>25</sup> Godtapo po-Yu so koko dla Hoseya buka dla epo atluwapo,

“Na:tapo ka:yapa pona: opa dlalo haluwa opa ewoloye watapo ma na:ta na: opa dlowepo. Epame opa anawoloye na:ta pobokotiyapo malamalalo haluwa opa ewoloye ma watapo na:ta bokotiyapo malamolowepo,” duwapo.

<sup>26</sup> Ka:yapa Godtapo yia: watle atlemama,

“Wua:ye pona: opa ikadepe,” duwapo.

Amasiyama ma ya:tapo yia: watle atlemama,

“Wua:ye pasakalo hallalo God ya: akimlala dlepe.”

<sup>27</sup> Epame Aisayatapo Isalael so koko dla ma epo atluwapo,

“Isalael sota sikemte pasatamama asila some hallepe.

Amasiyama dulu edla isikimi opihatatapo pasakalo gadle halepe.

<sup>28</sup> Ame adipalati, Lodtapo ta:lamo hema ya:ta hali depo atlale kokoye woloma ma-halepe,

ya: powelilowa.”

<sup>29</sup> Epame Aisayatapo mamisika: Isalael so koko dla epo atluwapo,

“Itiyamale Lodtapo dia: dulu dla opi pogadlalo wekematiye,

dia:ye Sodom mo mate epo Gomola mo mate dlapata hamdemama opa hapuloma poyuli epapelemla.”

### *Isalael sota pomikadepe dle koko*

<sup>30</sup> Epapedeme na:ta atlamale yu ya: dulu kokoye ipo elema. Po-Yu so opatapo yia:ta God mila:pi tle ullu pa:po ha:ha:lowe kokoye pototamana. Amasiyama miyelo yia:ta mikadepe dle koko tle Godtapo yia:ye ya: mila:pi tle ullu pa:talo so duwapo.

<sup>31</sup> Amasiyama Isalael sotapo God mila:pi tle ullu pa:talo so depo ha:ha:lowe kokoye totamama yia: aiyalma koko tlo sikemte dolumha:ha:uwapo. Amasiyama koko etapo yia:ye po-ullu pa:talo so dena. <sup>32</sup> Adipalati, yia:tapo mikadepe dle pa:le, isikimi miyelo itiyamale tle God mila:pi tle ullu pa:talo so dlowedeme apuwapo. Epele koko tle yia:tapo opata kustamtame teteyulalo ewala dla kustamtame teteyumha:ha:uwapo. <sup>33</sup> Adipalati, God yu bukata ipo atlapo,

“Na:tapo Sayon mo dla ewalaye pamellowepo.

Ewala edla opatapo kustamtame teteyumha:ha:lepe.

Amasiyama oplami antapo ya: dla mikadepe dlepiye, ya: wota:le ponatimhallowa.”

## 10

<sup>1</sup> Epedeme mikadepe dle so namkadulo, na:tapo na: dupa dulu tle Isalael so yilo sikemte inoma sumale pato himhalemde, yia:tapo pasakalo gadle halepo depame.

<sup>2</sup> Isalael so yia: sikemte solotamde God dolumtlowedeme, amasiyama dulu edla yia: ikadepe api tle God dolumtloweye poyia:malamana. <sup>3</sup> Epapedeme yia: mape Godta meyelo opaye ya: mila:pi tle ullu pa:talo so demhalaye poyia:malamana. Amasiyama yia: miyelo itiyamale tle God mila:pi tle ullu pa:talo so dlowa depo yia: aiyalma dolumha:ha:ta yia: pogadesema. Epapele koko tle yia:tapo ikadepe God mila:pi tle ullu pa:talo so depo ha:ha:lowe koko haloweye posolotamasema. <sup>4</sup> Adipalati, Kelisotapo aiyalmata halopo puwa koko hapulomaye dia: yilo ma-ala:po guduwapo. Epapedeme oplami antapo Keliso dla mikadepe dlepiye, asiyama Godtapo ya:ye ya: mila:pi tle ullu pa:le oplami dlepe.

### *Ka:dle yutapo pasakalo gadle kokoye hampuwapo*

<sup>5</sup> Epapedeme aiyalmata hampuale ullu pa:po hallowe koko dla Mosestapo epo atluwapo, “Oplami antapo me-pasakalo hali dlepiye, ya: aiyalma koko hapulomaye woloma dolumhallepe,” duwapo. <sup>6</sup> Amasiyama mikadepe dle kokota hampuale ullu

pa:po hallowe kokotapo epo atlapo, “Poka:dena, opatapo Kelisota yia: gadlepo depame Pepele dimo dla Keliso totamala hetloweye. <sup>7</sup> Epame ma poka:dena, opatapo Kelisota yia: gadlepo depame tame wabasi dulu dla ya: totamsiyamoloweye,” depo. <sup>8</sup> Adipalati, isikimi hatlo Keliso dla mikadepe dlowe koko siyapota pasakalo gadlowe kokoye hampumhalapo. Adipalati, God yu bukata epo atlapo,  
 “God ya: yuye wa: mateka:pi dla halapo.

Epame yu eye wa: mati dla epo wa: dupa dulu dla elapo.”  
 Epedeme mikadepe depo hallowe yu eye dita atlamsiyamapo.

<sup>9</sup> Epedeme wa: wa: mati tle Yesuye Lodpo depo botomastapame ma ya:ye Godta ma powale tle ma pasakalo dle koko dla mikadepe dlepiye, wa:ye pasakalo gadle halepe.

<sup>10</sup> Adipalati, wa: dupa duluta mikadepe dle koko tle Godta wa:ye ya: mila:pi tle ullu pa:le oplami demhalapo. Epame wa: mati tle Yesuye Lodpo depo botomastlepiye, etapo wa:ye pasakalo gadle kokoye halepe. <sup>11</sup> Adipalati, God yu bukata epo atlapo,

“Oplami antapo Keliso dla mikadepe dlepiye, ya: wota:le ponatimhallowa,” depo.

<sup>12</sup> Ipapele koko dulu dla di natipo, Yu so mate epo po-Yu so mateye ma-hatlopepo. Adipalati, di Lod ma hatlopepo. Epapele koko tle ya:tapo ya: watle otele himha:ha: so dla ka:ka:dle koko hapuloma halopimhalapo. <sup>13</sup> Adipalati, God yu bukata epo atlapo,  
 “Oplami antapo gadle yilo Lod dla otele himhallepiye,  
 ya:ta pasakalo gadle kokoye halepe.”

<sup>14</sup> Epapele dulu dla opata God dla pomikadepe dlalo wekematiye, yia: adipammama pasakalo gadlowe yilo ya: dla otele himpa:? Epame yia:tapo ya: koko podlallalo wekematiye, yia: adipammama ya: dla mikadepe depa:? Epame ka:dle yuye yia: dla po-atlamalalo wekematiye, yia: adipammama God yu dalepo hapa:? <sup>15</sup> Epame ka:dle yu atlamalalo soye potaiya dlalo wekematiye, yia: adipo God yu atlamsiyamelemo? Epapedeme God yu bukata epo atlapo,

“Ka:dle yu hamsiyamalalo sotapo ka:dle yu hame pula natiloweye pta ka:pi.”

<sup>16</sup> Amasiyama dulu edla pase opa hapulomatapo pomikadepe dena. Yu iye Aisayatapo God yu buka dla epo atluwapo,

“Lod, di yuye opa anawolota mikadepe duwa?”

<sup>17</sup> Epapedeme ka:dle yu Yesu Keliso koko dallowe kokotapo mikadepe dlowe kokoye hampuapo. <sup>18</sup> Epapele dulu dla Isael soye adipapopa:? Yia: ka:dle yu mo-daluwa? Yao, yia: ma-dlaluwapo. Adipalati, God yu bukata epo atlapo,

“Ka:dle yu hamsiyamalalo sotapo ka:dle yuye ta:lamo pato dla tame opa hapuloma dla ma-atlamtauwapo.”

<sup>19</sup> Amasiyama Isael sotapo ka:dle yu iye dalepame malamale hauwa? Yao, yia: malamale hauwa tlope, woloma pomikadepe dena. Epedeme Mosestapo epo ilimuwapo,

“Godtapo epo atluwapo,

‘Na:tapo po-Yu so dla gadle himhallati

ma wua:tapo yia: dla elle himha:ha:mama yia: dla siyalasiyalademha:ha:lepe.’ ”

<sup>20</sup> Epame Aisayatapo Godta atlamale yu iye wota:le pa:po epo atluwapo,

“Opa na: pototamha:ha:lalo wekele sotapo na:ye ma-natiwapo.

Epame na:tapo na: pototamalalo wekele so dla naskamu na: kokoye nati-iwapo.”

<sup>21</sup> Amasiyama Godtapo Isael so dla epo atluwapo,

“Na: alila hapuloma dulu dla wua: elemolowedeme ma-dinapopo halemduwapo.

Amasiyama muwolo dupa kokalalimale koko tle na: yu dla dalepo salladla allimduwapo.”

## 11



<sup>1</sup> Epapedeme na:ta atlama koko iye Godta ikadepe ya: opa Isalael soye alimama alikili a:ma pomoluwa? Hao, pe-epapena. Ame adipalati, na: mape Isalael oplamipo. Epame na: mape A:iblaham ya: mama hale, Benyamin elele dulu dla halapo. <sup>2</sup> Epedeme Godtapo ya:ta mo-powataliya sesalemale soye alimama alikili a:ma popomelena. Epapele dulu dla wua: God yu buka dla Ilayata atlamale kokoye malamaiya. Adipalati, ya:tapo Isalael so koko dla kokoliyemhalemama God dla epo atluwapo, <sup>3</sup> “Lod, Isalael so opa iwolotapo wa: tle yu hapame molo atlamalalo soye potipame ma God dla namkale dle alinepi poyupo halomalalo tile mape dodokotimuwapo. Epammama God tle yu hapame molo atlalo oplami hatlo na: tlo me-pomoluwapo. Amasiyama yia: na: ma me-yumuluwedeme apopo,” duwapo.

<sup>4</sup> Amasiyama Godtapo Ilaya yu ipi dla adipo atluwa? Epapele dulu dla ya:tapo Ilaya watle epo atluwapo, “Na: dla mikadepe dlalo oplami hatlo wa:ta pohalasema. Adipalati, na: dla 7,000 opa me-ha:ha:po, yia:ye biskapa god Bal demde dla poheodesemde,” duwapo.

<sup>5</sup> Epedeme wata oloma hema ma mepo elapo, pase Isalael so opa hapulomatapo God tle alikili a:ma popotana. Amasiyama Isalael so opi tlope ya:ta bokotiyapo malamale tle yia:ye mo-huhulumuwapo, yia:tapo ya: dla mikadepe dlepo depame. <sup>6</sup> Epapedeme Godtapo ya:ta bokotiyapo malamale tle ya: opaye mo-huhulumdepo. Epapele dulu dla yia:ta ka:dle koko halomha:ha:lali po-apesemde. Ame adipalati, Godta opa huhulumde kokoye isikimi opata ka:ka:dle koko halomha:ha:lali ammde dlepiye, eta asiyama ya:ta bokotiyapo malamaleye koko pa:le ellemla.

<sup>7</sup> Epapedeme Isalael sotapo yiskamu yia:ye God mila:pi tle ullu pa:po ha:ha:lowedeme sikemte itiyamuwapo. Epapele tlope yia: koko iye pohana. Amasiyama isikimi Godta huhulumale so tlo ya:tapo ya: mila:pi tle mo-ullu pa:talo so duwapo. Amasiyama opa opi tlo God yu dalla allimama yia: dupa kokalalimuwapo. <sup>8</sup> Adipalati, God yu bukata Isalael so koko dla ipo atlapo,

“Godtapo yia: watle malamale yeitamale hapiwapo,  
yia:tapo pomalamalalo wekelepo depame.

Epame Godtapo yia: inomaye mo-hihimamuwapo,  
yia:tapo ponatilalo wekelepo depame.

Epame ma ya:tapo yia: molo ye mo-hihimamuwapo,  
yia:tapo ma podallalo wekelepo depame.

Epapedeme ipapele kokotapo ala me-elimtamama wata oloma hema ma me-elapo.”

<sup>9</sup> Epapele dulu dla Deibidi mape yia: koko dla ma epo atluwapo,

“Miyelo solotapo koko halomha:ha: koko etapo  
yiskamu yia: hohomolowe dea susumale some ha:ha:lepe.

Epame yia:tapo edla gogodepo teteyupo hutiyemama  
yia: batalimale asiyama halomha:ha:lepe.

<sup>10</sup> Epedeme yia:ta ma natilala depame  
yia: inomaye hihimamelepe.

Epame yia:tapo poutame siyamelepo depame  
yia: watle upiyele didiyemellepe.”

### *Po-Yu sota pasakalo gadle halowe koko*

<sup>11</sup> Epapedeme na: matle ipo atlema, Yu sota Keliso alliwa kokotapo yia:ye mosukulu batalipo hamastauwa? Hao, pe-epapena. Adipalati, yia: batalimale etapo po-Yu so dla pasakalo gadle kokoye hampuwapo. Epela natipame Yu sotapo ma po-Yu so dla elle himha:ha:uwapo. <sup>12</sup> Epapedeme Yu sotapo api hotale kokota po-Yu so opa dla gadle kokotapo puwapo. Amasiyama Godta Yu sotapo yia:ta api hotale tle ma God hala dla pumullupiye, oloma edla asiyama po-Yu sotapo pasakalo gadle sikemte ma-a:ma patoye halepe.

<sup>13</sup> Epedeme na: matle wata oloma hema ma po-Yu so wua: dla atlema, na:ye po-Yu so wua: yilo Taiya dle oplami depo halapo. Epapedeme na:tapo Godta na: watle hamili oko i tlo siyele mate hamhalapo. <sup>14</sup> Epedeme pona:malamana, na:ta po-Yu so mate epo oko hala natipame asiyama na: opa ikadepe Yu sotapo na: eledomama na: hala dla pumulluwe sepena. Epapelepiye, eta na:ta yia: pasakalo gadlowepo. <sup>15</sup> Epedeme Godta Yu so tle alikili a:ma kostauwatapo ta:lamo soye ya: mate namkale depame ya: hala dla elempuwapo. Epapedeme Godta Yu soye ma alotle hohomelepiye, ya:tapo palli soye ma pasakalo depame haliyamale dla elempuale some halemama apelepe. <sup>16</sup> Epedeme wua: natiya, wua:tapo daya yekalo dla atili tle yimka:mala polame God watle hamilita aiyalma dlepiye, daya yekalo dla atili pato mape ma aiyalma depo. Epame dali mape epapena. Dali hala sitalitapo kese woloma ka:depo tutula:po hallepiye, ya: dlo di mape ka:depo hallepe.

*Olipi dlomoko dali dla wayu atlale*

<sup>17</sup> Epedeme Yu soye olipi dlomoko dali emale dlo epapele some ha:ha:po. Epalati asiyama po-Yu soye moku dla hallalo olipi dlomoko dali dlo epapele some ha:ha:po. Epapeleye Godtapo emale olipi dlomoko dali dloye ketamastapame ma asiyama moku dla hallalo olipi dlomoko dali dloye ketahame puame gugouduwapo. Epapedeme po-Yu oplami wa:ye epapele some halapo. Godtapo wa:ye emale dali dla mo-gugouduwapo. Epalati asiyama olipi dlomoko dali emale etapo wa: dla pasakalo hamimhalapo. <sup>18</sup> Amasiyama po-Yu oplami wa:, wa: emale olipi dlomoko dali dlota epo kotipo alikili dla hutiyelati ma wa:ta yia: mo dla gugoudepo hala koko dla ase wa:skamu di dla hame hetama halemiya. Adipalati, wa:tapo gugoudepo hala dali sitali pohalasema. Amasiyama wa: isikimi ya: dlo dla gugoudepo halapo. <sup>19</sup> Epedeme wa: asiyama ipo atlowe sepena, “Na:ta yia: mo halepo depame dlomoko dali dlo ewoloye mo-kotipo alikili dla pololuwapo.” <sup>20</sup> Epapele dulu dla wa:ta atlaye ikadepepo. Adipalati, Yu sota mikadepe dle pa:po ha:ha:lali natipame dali dlo epapele some alikili dla mo-kotipo pololuwapo. Epalati wa:ta mikadepe dle tle dali dlo kestale ipi edla tame mo-gugouduwapo. Epedeme wa: koko edla wa:skamu ase sikemte di dla hame hetamiya. Amasiyama wa: wota:le mate halane. <sup>21</sup> Adipalati, Godtapo dali ya: dlo ikadepeye kotipame alikili dla pololuwa, epammama wa:ta pomikadepe dlalo hallati wa: mape mepo kestepo alikili dla hamastlepe.

<sup>22</sup> Epapedeme di natipo, Godye sikemte bokotiyapo malamalalo Godpo, epame batalimale koko dla sikemte alilalo Godpo. Epapedeme ya:tapo Yu so opa opi ya: tle alikili a:ma tale so dla posiyemhalasema. Amasiyama wa:tapo ya: dla mikadepe depame ya:ta bokotiyapo malamale dulu dla hallepiye, Godtapo asiyama wa:ye sikemte bokotiyapo malamhalapo. Amasiyama wa:tapo ya:ye pomikadepe dlalo hallepiye, Godtapo wa: mape dali dlo some ketamastlepe. <sup>23</sup> Epapele dulu dla Yu so ma God dla mikadepe dlepiye, Godtapo matle yia:ta ha:ha:lalo emale dali dlo dla ma-tame gugoudlepe. Epedeme koko i haloweye God dla itiyamale me-elapo. <sup>24</sup> Epedeme po-Yu so wua:ye moku dla hallalo olipi dlomoko dali dlo ketahame ma olipi dali emale dlo dla tame gugoudle some halapo. Amasiyama Yu soye olipi dali emale e ya: dlo ikadepe ha:ha:po. Epapedeme God ya: dla pokokalena, ya:tapo olipi dali emale dlo ikadepeta kotipo alikili dla pololleye ma ilame yia:ta ha:ha:lalo ikadepe dla gugoudepo melloweye.

*Isalael soye ma ilame God hala dla eleme puluwe koko*

<sup>25</sup> Epedeme mikadepe dle so namkadulo, hemele hatiyomeleme ela kokoye na:ta wua: watle haliyamale dla atlowama, eta wua:tapo wuskamu di dla pohalopo hehetamha:ha:lalo wekelepo depame. Epapele dulu dla hemele hatiyomeleme ela kokoye ipo, Isalael so opa opitapo pomikadepe dlalo dupa kokalalipo me-ha:ha:mtlati po-Yu so opa opi Godta mo-powataliya ma-sesalemale sota ma God hala dla pumullupe.

<sup>26</sup> Epame yia:ta hapulomata mo-pumulla natipame asiyama Isalael so opa hapulomatapo pasakalo gadle kokoye halepe. Adipalati, God yu bukata epo atlapo, “Pasakalo gadlalo oplamiye Sayon mo tle pulupe.

Ya:tapo Isalael sota batalimale koko halomha:ha: hapulomaye alikili a:ma hamastlepe.

<sup>27</sup> Epame na:tapo monolo yu itiyapo himili e dolumama yia: bobtalimaleye hihiyotipo welliwepo,” depo.

<sup>28</sup> Epedeme wata oloma hema Yu so opa opitapo ka:dle yu dla allimama God mate opahale demha:ha:po. Epapele koko tle ka:dle yu etapo po-Yu so wua: dla puapo. Amasiyama epapele tlope Yu soye God meyelo sesalemale so opa ikadepepo. Adipalati, Yu sotapo ikadepe God ya: opa depo ha:ha:lowe kokoye Godtapo yia: mamadulo ka:yapa ha:ha:uwa so mate yu itiyapo me-himiwapo. Epapele koko tle Yu sotapo Godta dupa ellalo so ha:ha:po. <sup>29</sup> Adipalati, God ya:ye ya:ta ya: opa ikadepe depo sesalemale koko mate epame ya:ta hapili koko mate dla ma malamale pomeyelo de semde.

<sup>30</sup> Epedeme po-Yu so wua:ye ka:yapa Godye alimha:ha:uwapo. Amasiyama ma Yu sota Godye allilati asiyama Godtapo ya:ta bokotiyapo malamaleye ma po-Yu so wua: dla hamiwapo. <sup>31</sup> Epedeme wua:ta ka:yapa God yu allimha:ha:uwaye, epammama watapo ma Yu sotapo God yuye allimha:ha:po. Amasiyama Godta wua: dla ya:ta bokotiyapo malamale koko hamiwaye, epammama alotle Yu so dla ma mepo hamilipe. <sup>32</sup> Epapedeme Godtapo opa hapulomaye batalimale koko dulu medla me-pomoluwapo, alotle ya:ta bokotiyapo malamale kokoye yia: dla nati-iliwedeme.

### *God hi di dla ta:diya*

<sup>33</sup> Epedeme Godta malamaleye pta pato epo pta ga:tluna, oplamitapo ya:ta malamale mate epo ya: koko mate malamoloweye po-ala:na.

<sup>34</sup> “Oplami antapo Lodta malamale sitali malastapa:?  
Epame oplami antapo ya: imolowe ala:ta:?”

<sup>35</sup> Epapedeme oplami antapo Godta ya: watle alisisi hamilipo depame ya: tate God dla alisisi hamiwa? Hawa ikadepe.”

<sup>36</sup> Adipalati, alisisi hapulomaye isikimi God tle dia: dla pumhalapo. Ame adipalati, alisisi hapulomaye meyelo mimita:pame ya:ole duwapo. Epedeme opa hapulomatapo isikimi alila hapuloma hatlo ya: hi tlo di dla ta:demha:ha:lowe tlo ka:pi. Eye ikadepepo.

## 12

### *Wua: motoye God watle halopiya*

<sup>1</sup> Epedeme mikadepe dle so namkadulo, Godtapo di watle bokotiyapo malamale pato ma nati-iwapo. Epapedeme na: solotama, wua:tapo wua: motoye pasakalo halemhala ullu pa:le alisisi epapele some God watle halopiya. Adipalati, ipapele koko tle God dla siyele hamiloweta ka:pi halapo. Epalati asiyama ya:tapo wua: dla siyemhallele. <sup>2</sup> Epapedeme wua: ta:lamo kokota wua:ta malamaleye meyelo de demiya. Amasiyama Godta wua:ta malamaleye meyelo de diya. Wua:ta epapelepiye, eta wua: Godta solotamale kokoye sikemte malastlepe. Epame wua: dla ka:dle koko malamolowe mate epo ya: dla siyele hamilowe koko mate epame ka:depo hallowe koko mateta hutiyelepe.

<sup>3</sup> Epedeme na:tapo God ya:ta tane dle oplami depo halemama yu iye wua: watle atlema. Wua: wuskamu di dla halopo hehetamha:ha:miya. Amasiyama Godta wua: watle halopiwa mikadepe dle koko mate ala:mama wuskamu wua: woloma natiya. <sup>4</sup> Epedeme di moto dla u-ulalimale meyelo de meyelo de leta ha:ha:po, epame yia: oko mape meyelo de mape. <sup>5</sup> Epapele dulu dla di mape Keliso dulu dla mepo

ha:ha:po. Dita hapulomatapo Keliso dulu dla moto hatlope depo ha:ha:mama asiyama gade asiyama gade dle oko halomha:ha:po.

<sup>6</sup> Epapedeme Godta dia:ye bokotiyapo malamale tle Sokotapo di watle isikimi namkale dle tle hapimhala koko meyelope meyelope dleye dia: dla me-hutiyepo. Epapele dulu dla wa: dla God tle yu hapame molo atlowe oko hamili hallepiye, wa:ta mikadepe dle mate ala:mama yu mepo atlemhallepe. <sup>7</sup> Epame wa: dla sos dulu dla salla-dle oko halowe hamili hallepiye, wa: mepo sos dulu dla salladle oko hamhallepe. Epame wa: dla God yu atlowe oko himili hallepiye, wa: mepo God yu atlemhallepe. <sup>8</sup> Epame wa: dla ya:mkale gadle yu mate itiyamale hamilowe oko hamili hallepiye, wa: mepo yimkaduloye gadle yu mate itiyamale hapimhallepe. Epame wa: dla isikimi namkale dle tle yimkadulo dla hapimhallowe oko hamili hallepiye, wa: mepo hapimhallepe. Epame wa: dla dokopala depo hallowe oko hamili hallepiye, wa: mepo dokopala depo halemama oko ka:pi halepe. Epame wa: dla atali so gadlowe oko hamili hallepiye, wa: mepo atali soye siyele mate gagademhallepe.

*Mikadepe dle sota ha:ha:lowe koko*

<sup>9</sup> Epedeme mikadepe dle so namkadulo, ikadepe api tle ya:mkale asiyama bokotiyapo malama ya:mkale asiyama bokotiyapo malama demha:ha:iya. Epame batalimale koko tlo allimama asiyama ka:dle koko tlo woloma kikitilata hamaiya. <sup>10</sup> Epame wua: ase wuskamu wua: tlo di dla halopo hehetamha:ha:miya. Amasiyama wua: amkadulo tlo sikemte malamama yia: tlo di dla halopo hehetamha:ha:iya. <sup>11</sup> Epedeme wua: Lod oko hamama hopeyamale mate halomiya. Amasiyama wua: dupa dulu hutulli mate epo Sokota itiyamale mate ya: oko haiya. <sup>12</sup> Epapedeme Godtapo wua: watle hamilowe pasakalo dla sisiyele mate dalemha:ha:mama omha:ha:iya. Epame wotiyalle upiyele dulu medla kokalalipo ha:ha:iya. Epame alila hapuloma dulu dla inoma sumha:ha:iya. <sup>13</sup> Epapele dulu dla mikadepe dle sotapo adipo kokalle koko dulu dla tulume ha:ha:lepiye, wua: yia:ye gadlepe. Epame mikadepe dle sota asepe pulati yia:ye woloma gadlepe.

<sup>14</sup> Epame opa opitapo wua: dla wotiyalle hamilati wua: epalati asiyama Godta yia: watle wotiyalle hamilipo depame ya: atlemiya. Amasiyama isikimi yia: gadlepo depame God dla atlaiya. <sup>15</sup> Epame sisiyele dulu dla ha:ha: so mate hatlope depame sisiyemha:ha:iya. Epame dupa kolle dulu dla ha:ha: so mate hatlope depame dupa kolle dulu dla ha:ha:iya. <sup>16</sup> Epapele dulu dla wua: amkadulo mate woloma sadepo ha:ha:iya. Epame ase wua: tlo malamale sikemte pato halomana depame wuskamu di dla halopo hetamiya. Amasiyama wuskamu isili dla halopo tutula:pame koko yeitamale so mate hatlope dloweye allimiya.

<sup>17</sup> Epedeme opa opitapo wua: watle batalimale koko halati asiyama yia: watle batalimale kokoye nati-idemha:ha:miya. Amasiyama opa mila:pi tle isikimi ka:ka:dle koko tlo halomha:ha:iya. <sup>18</sup> Epapele dulu dla opa hapuloma mate woloma sadepo ha:ha:lowe koko tlo sikemte itiyamaiya.

<sup>19</sup> Epapedeme mikadepe dle so namkadulo, opa opitapo wua: dla batalimale halati asiyama batalimale mepapele mate yia: watle hamimiya. Amasiyama God watle pomeliya. Adipalati,

“Lodta epo atlema,

‘Na:tapo opa dla yia: batalimale asiyama hamilalo halapo.’ ”

<sup>20</sup> Amasiyama wua: koko ipapeleye haiya,

“Wa: dla opahale dlalo oplamita daya ta:mpollati

wa: ya: watle daya hamine.

Epame ya:tapo yú ta:mpollati

ya: watle yú tipo hamine.

Epapele dulu dla wa:ta epapelepiye,

asiyama ya:tapo ya:skamu ya: batalimale kokoye malanatipame wota:lepe.”

<sup>21</sup> Epedeme batalimale kokota wua:ye tla:mta demiya. Amasiyama wua: ka:ka:dle koko tlo halomha:ha:mama batalimale kokoye yumiya.

## 13

### *Gamani so yu dla salladepo siyamaiya*

<sup>1</sup> Epapedeme ka:dena, opa hapulomatapo gamani so dla heodepame yia: yu dla salladepo siyamolowe. Adipalati, gamani so hapulomaye miyelo solotamale tle mo edla dokopala depo popopa:sema. Amasiyama Godtapo itiyamale hamilati yia: mo edla dokopala depame popa:po. <sup>2</sup> Epedeme opa anawolotapo gamani yu dla heodlowe dla allimha:ha:ma:, yia: mape God dla heodlowe allimha:ha:mama apopo. Epapele koko tle yia: batalimale asiyama halepe. <sup>3</sup> Epapele dulu dla ka:ka:dle koko tlo halomha:ha:lalo sotapo gamani soye powowota:mha:ha:sema. Amasiyama batalimale koko halomha:ha:lalo sotapo gamani soye wowota:mha:ha:po. Epedeme wua: gamani so powota:lalo ha:ha:lowa dlepiye, wua: ka:dena, isikimi ka:ka:dle koko tlo halomha:ha:lepe. Epalati gamani sotapo wua: natipame sisiyelepe. <sup>4</sup> Epapedeme gamani soye Godtapo mo edla ipila:uwapo, yia:tapo wua:ye gademha:ha:lepo depame. Epapele dulu dla wua: batalimale koko halepiye, wua: wowota:lowe ka:pi. Adipalati, Godtapo yia: watle itiyamale ma-hamiwapo, yia:tapo wua: watle wua: batalimale asiyama hapimha:ha:lepo depame. <sup>5</sup> Epedeme wua: batalimale asiyama halala depame gamani dla heodepame yia: yu dla salladepo siyamaiya. Adipalati, wua:malamana, koko eye ka:dle kokopo.

<sup>6</sup> Epapedeme gamani sotapo Godta yia: watle oko hapiliye woloma ka:pi halomha:ha:lepo depame ta:kis mani hatitimha:ha:iya. <sup>7</sup> Epedeme gamani so tete hapulomaye gamani so watle halopiya. Epame yia: yu dla heodepame salladepo siyamaiya.

### *Wua: amkadulo sikemte bokotiyapo malamha:ha:iya*

<sup>8</sup> Epedeme wua: amkadulo dla alisisi isikimi yepa:ta halomha:ha:miya. Amasiyama wua: amkadulo mate asiyama bokotiyapo malama asiyama bokotiyapo malama demha:ha:iya. Wua:ta epamha:ha:lepiye, eta wua: aiyalma koko hapulomaye ala:po pustamha:ha:mama apelepe. <sup>9</sup> Adipalati, aiyalma opiye ipo hutiyepo, upo a:ya mate epo upo oplami mate uhala aiyalma, epame ya:mkale yumula aiyalma, epame upo alisisi uhala aiyalma, epame ya:mkale alisisi halowedeme sikemte solotamale himila aiyalma. Epame aiyalma opi ma me-hutiyepo. Amasiyama aiyalma hapuloma iye aiyalma hatlope dulu hema bopudepo halapo. Eye,

“Wa:tapo wa:skamu sikemte bokotiyapo malamhalemndiye,

epammama wa: amkadulo mape epo sikemte bokotiyapo malamhalane.”

<sup>10</sup> Epedeme bokotiyapo malamale koko dulu dla ya:mkale dla upiyele mate epo wotiyalle mate hamilowe pe-elasema. Adipalati, bokotiyapo malamale kokotapo aiyalma koko hapulomata atlamale kokoye ala:po pustamhalapo.

<sup>11</sup> Epedeme na:ta ala atlama koko iye halomha:ha:iya. Adipalati, dia:ye mosukulu alila dla ma-ha:ha:po. Epedeme hutiyele tle ma silliya. Ame adipalati, dita ka:yapa mikadepe duwa oloma edla pasakalo gadle kokoye pateka:mu dla eluwapo. Amasiyama watapo mo-mateka:pi dla puapo. <sup>12</sup> Epapele dulu dla utula:latapo ma-alallowe mateka:pi dla hallati ma asiyama alilatapo ma-alalempuapo. Epapedeme di ka:dena, amtuwale dulu dla batalimale koko halomha:ha:mdiye memelepame ma hela:dle dla ha:ha:mama koko halomha:ha:lowe tlo dinapolowa. <sup>13</sup> Epedeme di woloma alila hela:dle dla ha:ha:lalo so some woloma ka:depo ha:ha:lowa. Amasiyama poka:dena, ditapo kawata yú dele dulu dla, epo wola: uhalomolowe koko dulu dla, epo yu topulolle mate epo nalatimale koko dulu dla, epo ya:mkale ellewe koko dulu dla ha:ha:lowe. <sup>14</sup> Amasiyama dulu edla Lod



Yesu Kelisotapo wua: pasakaloye omhala diya. Epame wua:ta mota solotamale koko halomde api ma himomeliya.

## 14

### *Wa: amkale mikadepe dle oplami dla batalipo atlemiya*

<sup>1</sup> Epedeme wua: dulu dla mikadepe dle pase kokalalimale soye allimha:ha:miya. Epame yia:ta momalamale meyelope meyelope dle koko natipame yia: atlemiya. <sup>2</sup> Adipalati, mikadepe dle oplami haletapo ya:ta malamaleta alisisi hapuloma dloweye ka:pi demdepo. Amasiyama mikadepe dle pase kokallalo wekele oplami haletapo ya:ta malamaleta alinepi mo dloweye aiyalma demdepo. <sup>3</sup> Epedeme dlowe alisisi hapuloma dlowe me-ka:pi dlalo oplamitapo ma mo dlowe tlo aiyalma dlalo oplami dla alliwe poka:dena. Epalati ma asiyama mo dlowe tlo aiyalma dlalo oplamitapo alisisi hapuloma dlalo oplamiye batalimale oplami dlowe poka:dena. Adipalati, Godtapo alisisi hapuloma dlalo oplamiye pobatalimana demhalasema. <sup>4</sup> Epedeme wa: dla itiyamale hawa, ya:mkale oko oplamiye batalimana dloweye. Adipalati, hatlo ya: dokopala oplamitapo meyelo ya: oko oplami kokoye gladlepe. Epalati oko oplamitapo Lodta gadle itiyamale tle ya: okoye woloma ka:pi halepe.

<sup>5</sup> Epame ma alila koko dla oplami haleta epo atlowe sepena, alila hatlope tlo pta aiyalma demama asiyama alila opi tlo aiyalma pa:na, dlowe sepena. Epalati asiyama oplami haleta atlemama, alila hapulomaye ma hatlopepo, dlowe sepena. Epapele dulu dla ka:dena, koko hema opa hapulomatapo isikimi miyelo malamale tle ha:ha:lowe tlo ka:pi. <sup>6</sup> Adipalati, alila hatlo tlo aiyalma dlalo oplamitapo, ya: Lod malamama ammdepo. Epame alisisi hapuloma dlalo oplamitapo ya: Lod malamama alisisi hapuloma demdepo. Adipalati, ya:tapo siyele yu Lod dla atlepame daya demdepo. Epame mo dlowe aiyalma dlalo oplamitapo ya: ma ya: Lod malamama siyele yu atlepame emale alisisi tlo demdepo. <sup>7</sup> Epedeme di ta:lamo hema isikimi bidulo solotamale koko halomha:ha:lowedeme poha:ha:sema. Epame dita palliwe mape isikimi bidulo solotamale tle popalimha:ha:sema. <sup>8</sup> Amasiyama dita ta:lamo hema isikimi Lodta solotamale koko tlo halomha:ha:lowedeme ha:ha:po. Epame dita pallipiye, di isikimi Lod yilo palliwepo. Epapedeme dita ta:lamo hema ha:ha:le dulu dla epo dita palliwe dla di isikimi Lod ya: opa depo ha:ha:lowepo.

<sup>9</sup> Epapele koko tle Kelisotapo powale tle ma pasakalo dla sila:tiwapo, ya:tapo pasakalo ha:ha: so mate epo palli so mate yia: Lod depo hallowedeme.

<sup>10</sup> Epedeme wua: adipalati wua: amkale mikadepe dle oplamiye batalimale oplami demdi? Epame wua: ma adipalati wua: amkale mikadepe dle oplamita malamaleye batalimana demdi? Adipalati, dita hapulomatapo God mila:pi tle koko gladlowedeme ha:ha:lepe. <sup>11</sup> Ame adipalati, God yu bukata epo atlapo, “Yao ikadepe, opa hapulomatapo na: hete sitali dla heodepame na:ye ikadepe Lodpo demyelepe.”

<sup>12</sup> Epedeme dita hapuloma hatlope hatlope dletapo diskamu di kokoye God dla boboti-matimyelepe.

### *Wa:ta dlowe alisisi dlowe koko dla wa: amkale batalimale dla semtamiya*

<sup>13</sup> Epapedeme wua: amkadulo mikadepe dle soye allimha:ha:miya. Epame wua: amkale mikadepe dle oplamita batalimale dulu dla tullala depame wua:tapo ya:ta kustamtame teyuluwe alisisi some ha:ha:miya. <sup>14</sup> Epedeme Lod Yesuta na: watle me-imuwapo, dlowe alisisi hapuloma dloweye aiyalma hale hawa ikadepe. Amasiyama epapele tlope oplami haleta atlemama, “Dlowe alisisi opi dlowe aiyalma,” dlepiye, ya: ka:dena, dlowe alisisi e podlalo mepo aiyalma depo halloweye. <sup>15</sup> Epapele dulu dla wua:ta alisisi dlomha:ha: kokotapo wua: amkale mikadepe dle oplami dla upiyele hapimha:ha:lepiye, wua: oplami eye pobokotiyapo malamha:ha:sema. Epapedeme

wua:ta alisisi hapuloma dlomha:ha: kokotapo wua: amkaleye batalimiya. Adipalati, Kelisotapo ya: yilo mo-pouwapo. <sup>16</sup> Epedeme wua:ye wolomape. Wua:ta dlowe alisisi hapuloma dlomha:ha: koko tle opa opitapo ka:dle yuye batalimana dlala. <sup>17</sup> Adipalati, God ya: mo koko dla daya dlowe mate epo yú dlowe mateta koko pato pohalasema. Amasiyama Hela:dle Sokota itiyamale tle God mila:pi tle ullu pa:po ha:ha:lowe koko mate epo yimkadulo mate sadepo ha:ha:lowe koko mate epo siyele dulu dla ha:ha:lowe koko mateta koko pato halapo. <sup>18</sup> Epedeme oplami antapo Keliso dla salladepo sela:mama ipapele koko dulu dla hallepiye, Godtapo oplami edla siyemhalapo. Epame opa opi mape ya: watle ka:depo hallalo oplami demha:ha:lepe.

<sup>19</sup> Epapedeme di sadle hampulalo koko tlo halomolowedeme totamha:ha:lowa. Epame di amkadulota mikadepe dle dulu dla itiyamale mate ha:ha:lepo depame asiyama gade asiyama gade demha:ha:lowa. <sup>20</sup> Epedeme wua:ta dlowe alisisi dlomde kokotapo God okoye batalima de demiya. Dlowe alisisi hapulomaye ka:dlepo. Epapele tlope wua:ta dlowe alisisi adi dlati wua: amkale mikadepe dle oplami dla upiyele hamimdi, wua: ya: yilo epapele alisisi dlomha:ha:miya. <sup>21</sup> Epapedeme wua: aliya mo dlowe koko mate epo wain yú dlowe koko mate epame koko opi halomolowe mateta wua: amkale mikadepe dle oplamiye batalimale koko dla semtullala depame epapele kokoye ya: mila:pi tle halomha:ha:miya.

<sup>22</sup> Epapele dulu dla wa:ta malamaletapo dlowe alisisi hapuloma dloweye ka:pi dlepiye, ka:dena, me-demhalane. Amasiyama wa:ta malamaleta dlowe alisisi opi dlowe tlo pase ka:pi dlepiye, wa: isikimi wa:ta ka:dena dle alisisi tlo demhalane. Koko dapiyamte dulu hema wa:ta koko adi tlo mikadepe dema:, wa: metlo God mila:pi tle kokata hamame halane. Epedeme oplami antapo ya:ta koko halomhalaye pobatalimale koko depo malamelepiye, ya: siyelowe ka:pi. <sup>23</sup> Amasiyama poka:dena, oplamitapo malamale tatlamaale mate polomama dlowe alisisi hale dloweye. Epapelepiye, Godtapo ya: watle batalimale koko hama dlepe. Adipalati, ya:tapo mikadepe demama koko e pohasema. Epedeme wa:tapo batalimale koko dlalo kokoye ma metlo wa:ta halepiye, wa: batalimale kokoye ma-hapo.

## 15

### *Yimkadulo koko tlo sikemte malamha:ha:iya*

<sup>1</sup> Epedeme ka:dena, mikadepe dle dulu dla kokalepo ha:ha:lalo so ditapo mikadepe dle pase kokalle so gadloweye. Epame diskamu dia: tlo malapame koko pohalomha:ha:lowa. <sup>2</sup> Amasiyama di diamkadulo tlo sikemte malapame yia:ta mikadepe dle dulu dla kokalepo ha:ha:lepo depame yia:ta solotamale koko tlo dolumha:ha:lowepo.

<sup>3</sup> Adipalati, Keliso mape God yu bukata atla yu e dolumama meyelo ya:ta solotamale kokoye po-ala:msela:na. Ame adipalati, yuta epo atlapo,

“Opa anawolotapo wa: dla putlomha:ha:ma:,

yia: mape na: dla putlomha:ha:mama apopo,” depo.

<sup>4</sup> Epedeme koko hapulomaye God yu buka dla mo-powataliya hatitimuwapo, di imhale-mama di gadlalo hallepo depame. Epapele koko tle di sadle mate ha:ha:mama Godtapo di watle pasakalo hamilowe dla dalemha:ha:mama omha:ha:lowepo.

<sup>5-6</sup> Epedeme mikadepe dle dulu dla kokalepo hallowe koko mate ya:mkale gadlowe koko mateye God tle dia: dla puapo. Epapedeme na: inoma sumale yu himima, wua:tapo Yesu Keliso koko natipo dolumama wua: dulu dla woloma malamale hatlope dle kokota ellepo depame. Epame wua:ta hapuloma yimkatatapo di Lod Yesu Keliso ya: A God hi di dla ta:demha:ha:lepo depame.

### *Ka:dle yuye Yu so mate epo po-Yu so mate dla elapo*

<sup>7</sup> Epedeme Kelisotapo wua: hohomuwaye, wua: ma epammama wua: amkaduloye hohomha:ha:iya. Wua:ta epamha:ha:lepiye, opatapo koko eye natipame God hi di dla

ta:dlepe. <sup>8</sup> Epapedeme na: wua: dla atlema, Kelisotapo Yu so yilo salladle oko halalo oplami haluwapo, ya:tapo Godta yia: mamadulo mate yu itiyapo hatitimale kokoye ikadepe dlowedeme. <sup>9</sup> Epame po-Yu sotapo Godta yia: watle bokotiyapo malamale himili koko dla ya: hi di dla ta:dlepo depame. Adipalati, God yu bukata epo atlapo, “Epedeme na:tapo po-Yu so dulu dla halemama wa: hi di dla ta:demhallowepo.

Epame sala dodolumhalemama wa: hi tlo di dla ta:demhallowepo.”

<sup>10</sup> Epame God yu bukata ma epo atlapo,

“Po-Yu so wua:, wua: Yu so mate yimkata hatlo godepame sisiyeiya.”

<sup>11</sup> Epame God yu bukata ma epo atlapo,

“Po-Yu so wua:, wua: God hi di dla ta:demama sisiyeiya.

Epame siyele sala dodolalimama ya: hi di dla ta:diya.”

<sup>12</sup> Epame Aisayata ma epo atlapo,

“Dokopala oplamitapo Yesi\* ya: asiya dulu tle pulupe,  
ya:tapo po-Yu soye dokopala depo hallowedeme.

Epame po-Yu sotapo ya: tle pasakalo gadle halowedeme dalemha:ha:mama omha:ha:lepe.”

<sup>13</sup> Epedeme na: inoma sumale yu himima, wua: dla pasakalo hamilalo Godtapo wua:ye sadle mate epo siyele mateta poposatilipo mellepo depame. Epame Hela:dle Sokota itiyamale tle wua:tapo Godta wua: dla pasakalo hamilowe dla dalemha:ha:mama omha:ha:lali wua: dla siyele elatapo pasatamama alowamelepe.

#### *Polo ya: oko meyelo atlale*

<sup>14</sup> Epapedeme mikadepe dle so namkadulo, na: mikadepe dema, ka:ka:dle kokotapo wua: dulu dla mo-poposatilipo ha:ha:po. Epame na: ma mikadepe dema, wua:ta Keliso kokoye malastapame ma yimkadulo gadle yu mate asiyama gade asiyama gade demha:ha:loweye mo-wua:malamana. <sup>15</sup> Amasiyama epapele tlope wua:ta koko hapuloma iye welilala depame na:tapo yu ilimale dulu hema haliyamale dla botomastepo ilimuwapo. <sup>16</sup> Adipalati, Godta bokotiyapo malamale tle na:ye Keliso ya: oko oplami duwapo, na:tapo po-Yu so dulu dla oko halepo depame. Epedeme na:ye God ka: epo opa ka: duka dla hallalo some salladle oko hamama ya: tle puale ka:dle yu atlamsela:po. Epame po-Yu soye na:tapo ullu ka:depo pamalalo alisisi epapele some God watle hapima, yia:tapo Hela:dle Sokota itiyamale tle ullu pa:po ha:ha:mama God dla siyele hamilipo depame.

<sup>17</sup> Epedeme na: Kelisotapo na:ta God oko hamhallati na: tle oko hamhaluwa tlo di dla hamhetama. <sup>18</sup> Epapele dulu dla na: koko opi tlo di dla hamhetlowe posolotamasema. Amasiyama na: hatlo Kelisotapo na: dulu dla oko hamama na:ta atlamale tle epo na:ta koko halè tle po-Yu sotapo God dla mikadepe duwa koko tlo di dla hamhetama. <sup>19</sup> Epame yia:tapo na:ta Hela:dle Sokota itiyamale tle ulugiyemale koko patoto halomhaluwa natipame God dla mikadepe duwapo. Epedeme na:ye ka:dle yu atlamsela:mama Yelusalem tle kotiyapame tame Ilulikon mo dla tame guduwapo.

<sup>20</sup> Epapedeme na: sikemte solotamduwa, Keliso koko podallalo wekele so mo dla tame ka:dle yu atlamsela:lowedeme. Epammama na: posolotamdena, ya:mkaleta oko mokotiyamale tama di dla ma na:ta oko haloweye. <sup>21</sup> Adipalati, God yu bukata epo atlapo, “Ya: koko pomalamalalo wekele sotapo ya: kokoye malamelepe.

Epame ya: koko podallalo wekele sotapo ya: koko dalepame malastlepe.”

#### *Polota Loum mo dla ha:ha:lalo mikadepe dle so natila tlowedeme solotamale himili*

<sup>22</sup> Epapele koko tle na:tapo ka:dle yu atlamsela:mama wua:ta hala dla tloweye alila ponatimdena. <sup>23</sup> Amasiyama na:ta mo hema oko haloweye moguduwapo. Epedeme na:

\* 15:12: Oplami Yesi iye, dokopala oplami Deibidi ya: apo.

ma puame wua: natilowe solotama. Adipalati, na: mo-powataliya wua: natilowe solotamale himhaluwapo. <sup>24</sup> Epapedeme na: Spein mo dla tamama Loum mo edla tuwame wua: natilowepo. Epapele dulu dla na:ta wua: mate halepo gudapo ma Spein mo dla tlowedeme apalati wua: na:ye gadle himilipe. <sup>25</sup> Amasiyama na: wua: hala dla tlowe aseka me-hallati Yelusalem dla mikadepe dle so watle namkale dle alisisi tatile hamtlowama. <sup>26</sup> Adipalati, mikadepe dle so Makedoniya dla ha:ha:lalo so mate epo Akaya dla ha:ha:lalo so mateta Yelusalem dla alisisi pa:talo mikadepe dle so gadlowedeme mani kolupo na: watle hamiwa, na:ta yia: dla hamtelepo depame. <sup>27</sup> Epapedeme Makedoniya so mate epo Akaya so mateta sisiyele mate mani i kolumuwapo. Adipalati, Yu so tle pasakalo gadlowe kokota yia: dla mo-puwapo. Epedeme yia: ma asiyama alisisi mate Yelusalem mikadepe dle so gadlowe ka:pi duwapo. <sup>28</sup> Epapedeme na:tapo yia:ta namkale dle alisisi kolumale hamtame Yelusalem so dla hapipame ma Spein mo dla tamama duka dla tuwame wua: natilowepo. <sup>29</sup> Epedeme na:malamana, na:ta wua:ta hala dla pulupiye, Kelisota di watle siyele pato hamilipe.

<sup>30</sup> Epapedeme mikadepe dle so namkadulo, Lod Yesu Keliso hi tle epo Sokota bokotiyapo malamale tle na: wua: dla otele pato himima, wua:tapo na: oko ipiye gademama na: yilo God dla inoma sumale himha:ha:lepo depame. <sup>31</sup> Epame wua: inoma sumale yu hale himiya, Yesu dla pomikadepe dle so Yudiya mo dla ha:ha:lalotapo na:ye hampame wotiyalle hamilala depame. Epame ma inoma sumale yu hale himiya, na:tapo mani Yelusalem dla hamtlati mikadepe dle so Yelusalem dla ha:ha:lalotapo mani e natipame sisiyelepo depame. <sup>32</sup> Epapedeme Godta solotamelepiye, na:tapo siyele mate wua: hala dla tlowepo. Epame dita yimkatatapo asiyama gade asiyama gade demama hedle ka:dle halowepo. <sup>33</sup> Epedeme sadle hamilalo Godtapo wua: mate hallepe. Eye ikadepepo.

## 16

### *Polota mikadepe dle so dla namkale dle yu atlale*

<sup>1</sup> Epedeme di nana Poibeye Kenekeleya mo dla dikon oko ka:pi halalo a:yapo. <sup>2</sup> Epapedeme a:ya itapo wua: hala dla pulati wua:tapo ya:ye Lod hi tle namkale dle mate sepame ya:ye woloma ka:pi gadlepe. Adipalati, ya:tapo na:ye koko opi tle woloma ka:pi gademhalemama opa opi mape ya:ta sikemte gademhalemduwapo.

<sup>3</sup> Epame na:ta namkale dle yuye Plisila dla epo ya:wolali Akwila dla hamiya. Adipalati, yia: Yesu Keliso dulu dla na: oko ipi halalo sopo. <sup>4</sup> Epame yia:tapo na: pasakalo tlo sikemte ka:pi gademama asiyama yia: tlo wotiyalle hamama mo-palila yakomuwapo. Epapele koko tle na:tapo namkadulo po-Yu so mikadepe dle so mate yia:ye sikemte malama. <sup>5</sup> Epame yia: aya dulu dla inoma sumha:ha:lalo so dla ma na:ta namkale dle yuye hamiya.

Epame namkale ikadepe Epainetus dla mape na:ta namkale dle yu hamiya. Adipalati, ya:tapo Asiya mo pato dulu dla ya: tatile Keliso dla mikadepe duwapo.

<sup>6</sup> Epame Meli dla mape na:ta namkale dle yuye hamiya. Adipalati, ya:tapo wua: yilo oko pato hauwapo.

<sup>7</sup> Epame na: asiyadulo Andlonikus mate epo Yuniyas mate dla mape na:ta namkale dle yuye hamiya. Adipalati, yia:tapo na: mate yimkata amtuwale aya dulu dla ha:ha:uwapo. Epapele dulu dla Taiya dle so opa dulu dla opa dapiyamte iwoloye sikemte i-itiamale sopo. Yia:ye na: ala Keliso dla pomikadepe dlalo hallati yia: tatile mo-powataliya mikadepe depo ha:ha:uwapo.

<sup>8</sup> Epame namkale Lod dulu dla hallalo Ampiliyatus dla mape na:ta namkale dle yuye hamiya.

<sup>9</sup> Epame diamkale Lod dulu dla oko halalo oplami hale Ulbanus dla mape na:ta namkale dle yuye hamiya. Epo namkale Stakus dla mape na:ta namkale dle yuye hamiya.

<sup>10</sup> Epame Apeles dla mape na:ta namkale dle yuye hamiya. Ya:tapo wotiyalle dulu medla halemama Keliso dla me-mikadepe depo haluwapo. Epame Alistobulus dla epo ya: aya dulu dla ha:ha:lalo so mate dla na:ta namkale dle yuye hamiya.

<sup>11</sup> Epame na: asiya dulu dla hallalo oplami hale Helodiyon dla mape na:ta namkale dle yuye hamiya. Epo mikadepe dle so Nalkisus aya dla ha:ha:lalo so dla mape na:ta namkale dle yuye hamiya.

<sup>12</sup> Epame a:ya Tlupaina mate epo ya:la Tluposa mate dla na:ta namkale dle yu mape hamiya. Adipalati, wola: iwolotapo Lod yilo oko pato hamha:ha:po. Epo namkale ikadepe Pelsis dla mape na:ta namkale dle yuye hamiya. Adipalati, ya: mape Lod dulu dla oko ka:pi halalo a:yapo.

<sup>13</sup> Epame Lod dulu dla hallalo oplami Lupus dla mape na:ta namkale dle yuye hamiya. Epo ya: wai dla mape na:ta namkale dle yuye hamiya. Adipalati, ya:tapo na: wai epapele some halemama na:ye woloma ka:pi gademhaluwapo.

<sup>14</sup> Epame na:ta namkale dle yuye Asunklitus dla epo Plegon dla epo Helmes dla epo Patlobas dla epo Helmas dla epame mikadepe dle so opi yia: mate yimkata hatlope demde dla hamiya.

<sup>15</sup> Epame Pilologus mate dla epo Yuliya mate dla epo Neleus mate dla epo yotumala mate dla epo Olumpas mate dla epame mikadepe dle so yia: mate hatlope demde mate dla na:ta namkale dle yu mape hamiya.

<sup>16</sup> Epedeme wua: Keliso dulu dla ha:ha:mama namkale dle mate asiyama huhulama asiyama huhulama demha:ha:iya. Epame mo hema ha:ha:lalo mikadepe dle so hapulo-matapo yia:ta namkale dle yuye wua: dla hamima.

#### *Polota mosukulu molo atlale yu hamili*

<sup>17</sup> Epapedeme mikadepe dle so namkadulo, wua: dulu dla opa duka hukullalo so mate epo mikadepe dle soye alikili a:ma elemtlalo so mateye woloma natiya. Adipalati, yia:tapo ikadepe koko wua:ta dalepame hamuwa kokoye yia: e podolumasemde. Epedeme yia: tle alikili a:ma potame ha:ha:iya. <sup>18</sup> Adipalati, epapele sotapo Lodta solotamale kokoye podolumha:ha:sema. Amasiyama miyelo solotamale koko tlo dolumha:ha:mama yu sikemte o-opalli koko tle koko yeitamale soye batalimale koko dla elemtuluma:ha:po.

<sup>19</sup> Epapedeme mikadepe dle so opa hapuloma ma-yia:malamana, wua:tapo Lod dla sikemte mikadepe depame salladepo siyama kokoye. Epedeme epapele kokotapo na: dla siyele hamimhalapo. Amasiyama na: sikemte solotama, wua:ta isikimi ka:ka:dle koko siyapo halomolowe tlo malastepo ha:ha:mama asiyama ma batalimale koko halomolowe dla kokotipo ha:ha:lepo depame.

<sup>20</sup> Epame sadle hampulalo Godtapo Saitenta itiyamaleye yumpame Saitenye wua: hete sitali dla himilipe. Epedeme di Lod Yesuta bokotiyapo malamaletapo wua:ta hapuloma mate dla hallepe.

#### *Polo ya:mkadulota Loum so dla namkale dle yu hamili*

<sup>21</sup> Na: mate oko halalo oplami Timoti mape ya:ta namkale dle yuye wua: watle hamima. Epo na: asiya:dule Lukiyus mate epo Yason mate epo Sosipate mateta yia:ta namkale dle yu mape wua: watle hamima.

<sup>22</sup> Epedeme Polo ya: yu ilimalalo oplamiye Teltiyus na:po. Na: mape Lod hi tle wua: dla namkale dle yuye hamima.

<sup>23</sup> Epame na:ta hallalo aya ya: a Gaiyus mape ya:ta namkale dle yuye wua: watle hamima. Aya dulu hema mikadepe dle so hapulomatapo yimkata inoma sumdepo.



Epame Kolin mo pato dulu dla mani ompollalo oplami Elastus mape ya:ta namkale dle yuye wua: watle hamima. Epo di ei Kuwaltus mape ya:ta namkale dle yuye wua: watle hamima. <sup>24</sup> Epedeme di Lod Yesu Kelisota bokotiyapo malamaletapo wua:ta hapuloma mate dla hallepe.

*Polota yu mosukulu atlale*

<sup>25</sup> Epapedeme God hi di dla ta:diya. Adipalati, ya:tapo na:ta atlamsela: ka:dle yu itle wua:ta mikadepe dle itiyamale hamiloweye ala:na. Ka:dle yu Yesu Keliso koko iye ka:yapa mo-powataliya hemele hatiyomeleme eluwapo. <sup>26</sup> Amasiyama kokó halepo hallalo Godtapo yu hamiwapo, ka:dle yu iye God tle yu hapame molo atlamalalo sotapo buka dla ilimelepo depame. Epapuwa koko tle watapo ka:dle yuta ma-haliyamale dla botomastepo elapo, opa hapulomatapo Keliso dla mikadepe depame ya: yu dla salladepo siyamelepo depame. <sup>27</sup> Epedeme Yesu Keliso tle ka:depo dinapolalo God hatlo ya: hi tlo alila hapuloma di dla ta:demha:ha:iya. Eye ikadepepo.

## **Polota Kolin sos dla yu ilimale hamili**

### **1 Kolin**

### **1 Kolin buka ya: dulu koko**

Kolin moye Guliki so yia: mo patopo. Epapeleye Polotapo ya: tatile ka:yapa mo pato edla ka:dle yuye hamtauwapo. Epame alotle ya: sokomoko opi mo-pololepo Epeses mo dla halemama dallati Kolin sos dulu dla hukulli elaleye daliyo. Epalati Polotapo yu ilimale iye Kolin sos dla hamiyo. Yu ilimale dulu hema ya:tapo ipapele kokoye ilimaiyo. Mikadepe dle so dulu dla hukulli koko mate epo wola: halomolowe koko mate epo biskapa god dla sisiyelowe koko mate epo Lod malamale daya dlowe koko mate epo Sokota isikimi hapimhala koko mate epo Yesuta wabasi tle ma sila:tili koko mate epo mikadepe dle sota ma wabasi tle silluwe koko mate.

<sup>1</sup> Na:ye Polopo. Godtapo ya:ta solotamale tle na:ye mo-sauwapo, na:tapo Yesu Keliso ya: Taiya dle oko hamhallepo depame. Epedeme na:tapo di ei Sostenes mate yu iye ilima. <sup>2</sup> Na:tapo God ya: opa Kolin mo dla ha:ha: so wua: dla yu iye ilipo hamima. Adipalati, Godtapo Yesu Keliso tle wua:ye ya: opa dlepo depame sisilamuwapo. Epedeme Godtapo wua: sisilamuwa, epammama ya:tapo mo hapuloma dulu dla opaye ma-sisilamuwapo. Epame ma yia:tapo di Lod Yesu Keliso hiye sisilamha:ha:po. Adipalati, hatlo ya:tapo yimkata yia: mate epo dia: mate di Lod halapo.

<sup>3</sup> Epedeme di A God mate epo di Lod Yesu Keliso mate yia:ta bokotiyapo malamale mate epo sadle mateta wua: mate hallepe.

#### *Polota God dla siyele yu atlale*

<sup>4</sup> Godtapo Yesu Keliso tle wua: dla bokotiyapo malamale hamiwa koko tle na:tapo alila hapuloma wua: yilo God dla siyele yu atloweye pomelesemde. <sup>5</sup> Epapedeme wua:tapo Keliso dulu dla ha:ha:lali Godtapo wua:ye sikemte gadle tle wua:ta ka:dle yu ka:pi atlowe mate epo ka:dle malamale halowe mateye wua: dla hapiwapo. <sup>6</sup> Koko itapo na:ta wua: watle Keliso koko atluwaye mikadepe depo. <sup>7</sup> Epapedeme Sokotapo wua: dla isikimi namkale dle tle wua: watle ka:ka:dle koko hapuloma meyelo pe meyelo dleye ma-hapiwapo, wua:tapo di Lod Yesu Kelisota puluwe dla dalemha:ha:mama omha:ha:lali. <sup>8</sup> Godtapo wua:ye woloma omhalemama itiyamale hamilalo halapo, wua:tapo Yesuta puluwe alila dla ullu pa:po ha:ha:lepo depame. <sup>9</sup> Adipalati, Godye ya:ta yu itiyamale himili dolumolowe dla pomelesemde. Epedeme ya:tapo wua:ye ma-sisilamuwapo, wua:tapo Yami Yesu Keliso mate hatlope depo ha:ha:lepo depame. Adipalati, ya:ye di Lodpo.

#### *Kolin sos dulu dla hukullita elale*

<sup>10</sup> Mikadepe dle so namkadulo, na: Yesu Keliso hi tle wua:ye molo atlema, wua:tapo wua: dulu dla hukulupo ha:ha:mama yu topulolemha:ha:ye medla gudepame matle sadle dulu dla ha:ha:mama hatlope depo ha:ha:lepo depame. <sup>11</sup> Adipalati, a:ya Kalowe aya dulu dla ha:ha:lalo sotapo wua:ta yu topulolle dulu dla ha:ha: kokoye na: watle puame atluwa. <sup>12</sup> Epedeme wua: dulu dla yu topulolemyemama opita epo atlamyapo, “dia:ye Polo dolumalalo sopo,” epalati ma opita atlemama, “dia:ye Apolos dolumalalo sopo,” epalati ma opita atlemama, “dia:ye Pita dolumalalo sopo,” epalati ma opita atlemama, “dia:ye Keliso dolumalalo sopo,” demyapo.

<sup>13</sup> Epele dulu dla Keliso moto hukulluwe ka:deta:? Epame Polo na:tapo wua: yilo dali yekelehmihili di dla pouwa? Epame wua:ta hapuloma Polo hi tle yú tutula:uwa? Hao, pe-epapena. <sup>14</sup> Epedeme na: siyema, adipalati, na:tapo wua: hapulomaye yú dla poka:ka:timana. Amasiyama opa dapiyamte Klispus mate Gaiyus mate tlo na:ta yú dla

ka:ka:timuwapo. <sup>15</sup> Epele dulu dla ma oplami haleta wua: dulu tle atlemama, “dia:ye Polo hi tle yú tutula:uwa,” dloweye po-ala:na. <sup>16</sup> Epame na: matle malama, na:ta yú dla ka:ka:timuwa so opa opiye. Na:ta yú dla ka:ka:timuwa so opa ewoloye, Stepanas mate epo ya: aya dulu dla ha:ha:lalo so matepo. Epame ma etle na: ma pomalamasema, na:ta opa opi yú dla ka:ka:timuwa soye. <sup>17</sup> Amasiyama Kelisotapo na:ye opa yú dla ka:ka:timelepo depame potane dena. Asiyama ya:tapo na:ye isikimi opa dla ka:dle yu tlo imselalepo depame tane duwapo. Epele dulu dla ya: posolotamasema, na:tapo ka:dle yu atlale dulu dla ta:lamo malamale tle ka:depo atloweye. Adipalati, opatapo epapele yu dalemama asiyama Kelisota dali yekelehmihili di dla powaleye pokoko dlala depame.

### *Kelisoye Godta itiyamale mate epo malamale matepo*

<sup>18</sup> Dlapa mo dla tamala sotapo dali yekelehmihili kokoye yiyilamale koko demdepo. Amasiyama Pepele dimo dla hetlalo so ditapo dali yekelehmihili koko e natimama Godta itiyamale koko demdepo. <sup>19</sup> Adipalati, God yu bukata epo atlapo, “Na:tapo ta:lamo koko tle sikemte di dla momalamale sota malamaleye batalipo hamastlowepo,” depo.

<sup>20</sup> Epapedeme ta:lamo koko tle sikemte di ikadepe dla momalamale soye hadima ha:ha:ma:? Adipalati, Godtapo sikemte di ikadepe dla momalamale so iwolota malamale hapulomaye mo-totokoleyapopo hamastapame yiyilamale koko duwapo. <sup>21</sup> Epapedeme Godta malamaleye pta ka:pi. Epapedeme God meyelo opata ta:lamo malamale koko tle ya: koko malamolowe apiye himomeluwapo. Amasiyama ya:tapo opata ta:lamo malamale tle natimama yiyilamale koko demde koko tle mikadepe dle so hapuloma dla yia: pasakalo gadloweye hampuwapo. <sup>22</sup> Epele dulu dla Yu sotapo koko opi dla mikadepe dlowe me-hallati ka:yapa yia: tatle ulugiyemale koko natilowe tlo solotamapo. Epalati asiyama po-Yu sotapo di dla malamale kokoye totamyapo. <sup>23</sup> Epapedeme ditapo Kelisota dali yekelehmihili di dla powale kokoye imsiyamalati Yu sota dalepame hala allimdepo. Epalati asiyama po-Yu sotapo dali yekelehmihili koko eye yiyilamale koko demdepo. <sup>24</sup> Amasiyama Yu so dulu tle Godta sisilamale so mate epo po-Yu so dulu tle Godta sisilamale so mateta Kelisoye Godta itiyamale mate epo malamale matepo demdepo. <sup>25</sup> Epele dulu dla opatapo yiyilamale koko dlaloye Godta e hapame ma yia:ta malamale kokoye ma-tla:mtauwapo. Epame opatapo hopeyalimale koko dlaloye Godta e hapame ma yia:ta itiyamale kokoye ma-tla:mtauwapo.

<sup>26</sup> Epapedeme mikadepe dle so namkadulo, Godta ka:yapa wua: sisilamuwa oloma edla wua:ta ha:ha:uwa pasakaloye wua: tlo wua:malamana. Adipalati, wua: dulu dla ta:lamo tle di dla momalamale so mate epame dokopala so mate epo alisisi poposatilimale so mateye pase pasatana. <sup>27</sup> Epapele dulu dla Godtapo ta:lamo sota natili tle yiyilamale koko dlalo mate yia:ta malamaleye ma-tla:mtauwapo. Epo matle ya:tapo ta:lamo sota hopeyalimale koko dlalo mate yia:ta itiyamaleye ma-tla:mtauwapo. <sup>28</sup> Epapedeme Godtapo ta:lamo sota posolotamalalo wekelalo soye hohopame ma ta:lamo sota ka:ka:dena dlalo soye ma-tla:mtapame ma koko pa:talo so duwapo. <sup>29</sup> Epapedeme Godtapo koko iye dinapuwapo, oplami haletapo koko hema ma ya: mila:pi tle ya:skamu di dla hamhetlala depame.

<sup>30</sup> Hatlo Godta koko halë tle wua:tapo Yesu Keliso dulu dla ha:ha:po. Epame Godtapo Kelisoye dita ka:depo malamalalo sitali duwapo. Epame ma ya:tapo dia:ye ullu pa:talo so depame ka:ka:dena duwapo. Adipalati, Kelisotapo di batalimale yilo popame ma dia:ye God hala dla eleme puwapo. <sup>31</sup> Epapedeme God yu bukata epo atlapo,

“Oplami antapo ya:skamu di dla hamhetlowe solotamelepiye,  
ya: ka:dena, isikimi Lodta koko halë tlo di dla hamhetlepe.”

## 2

### *Polota Hela:dle Soko dla hitahalemama yu atlale*

<sup>1</sup> Mikadepe dle so namkadulo, na:ta ka:yapa wua: hala dla puwa oloma edla na:tapo ta:lamo koko tle sikemte malamale mate halemama God yuye po-atlana. <sup>2</sup> Adipalati, na: solotamuwa, isikimi Yesu Keliso koko mate epo ya:ta dali yekelemhimili di dla pouwa koko mate tlo wua: dla atlamolowedeme apuwapo. <sup>3</sup> Epapedeme na:tapo puame wua: mate haluwa oloma edla na: dla wota:leta hamama hopeyamale mate epo eseselalle mate haluwa. <sup>4</sup> Epame na:ta wua: mate yukamsela:le dulu dla epo na:ta God yu atlale dulu dla woloma ka:pi ta:lamo malamale mate po-atlemdena, wua:ta na: yu dla dalepame mikadepe dlepo depame. Amasiyama na: Hela:dle Sokota itiyamaleye haliyamale dla botomastamama ammduwapo. <sup>5</sup> Adipalati, na: posolotamdena, wua:ta mikadepe dle kokotapo isikimi opata malamale tama di dla halloweye. Amasiyama na: solotamduwa, wua:ta mikadepe dle kokotapo woloma Godta itiyamale tama di dla hallepodepo ammduwapo.

### *Godta malamale koko*

<sup>6</sup> Ditapo mikadepe dulu dla mo-opa dle so mate yuhamama Pepele dimo malamale mate yuhamdepo. Malamale iye pota:lamo malamale epapena, epame pota:lamo dokopala sota malamale pe-epapena. Adipalati, ya:ta itiyamaleye pa:lepe. <sup>7</sup> Di asiyama Godtapo hemele hatiyomelle malamaleye atlamsiyamapo. Ta:lamo ala pomita:plalo halemama Godtapo malamale i mate dia:ye hela:dle dla eleme tlowedeme yu himiwapo. <sup>8</sup> Amasiyama ta:lamo dokopala sotapo malamale iye woloma pomalanatina. Ya:tapo woloma malanatimatiye, etapo ya:ta di Hela:dle Lodye dali yekelemhimili di dla pogogodema. <sup>9</sup> Koko iye God yu bukata atlemama epo atlapo, “Godtapo ya: dla sikemte malaha:ha:lalo so opa dla hamilowedeme ka:depo dinapopo himili kokoye  
oplami haleta ponatina,  
epame oplami haleta podalena,  
epame opata malamale sitali dla puame po-umana.”

<sup>10</sup> Epapele tlope koko iye Godtapo ya: Soko tle dia: dla me-imuwapo. Adipalati, Sokotapo koko hapulomaye malastepo halapo. Epedeme ya:tapo Godta malamale sitali ma malastepo halapo. <sup>11</sup> Epedeme oplamita malamale sitali dulu dla koko hutiyehapulomaye isikimi ya: dulu dla hala sokota malastame halapo. Epapedeme God ya: Hela:dle Soko siyapota Godta malamale sitali dla koko hutiyehapulomaye malastepo halapo. <sup>12</sup> Epedeme ditapo ta:lamo sokoye pohamana. Amasiyama ditapo God tle ya: Sokoye hamuwapo, ditapo Godta dia: watile hapili koko hapulomaye malastepo ha:ha:lepo depame.

<sup>13</sup> Epele dulu dla Godta hapili koko eye dita imsiyama kokopo. Epedeme dita imale kokoye opata malamale tle popuasemde, amasiyama Sokotapo imale kokopo. Epedeme ditapo ikadepe Sokota imale kokoye Soko watalo so dla imdepo. <sup>14</sup> Amasiyama pomikadepe dlalo wekele sotapo God ya: Sokota imale koko halomoloweye allimdepo. Adipalati, ya:ta malamaletapo God ya: Sokota imale kokoye yiyilamale koko demdepo. Epele dulu dla ya:tapo koko iye woloma pomalamolowa. Adipalati, ya: dla God ya: Soko pohalasema. <sup>15</sup> Epedeme Soko poposatilimale sotapo koko hapuloma i hukuloweye ka:dena. Amasiyama opa opitapo Soko poposatilimale so ya: koko hukuloweye poka:dena. <sup>16</sup> Adipalati, God yu bukata epo atlapo,  
“Oplami antapo Lodta malamale sitali malastepo halema:?  
Epame oplami antapo Lodye imolowe ala:ta:?” depo.

Amasiyama dita koko i momalamoloweye ala:na. Adipalati, di Kelisota malamale epapeleye ma-halomuwapo.

### 3

#### *Di yimkata God okoye hamha:ha:po*

<sup>1</sup> Epapedeme mikadepe dle so namkadulo, na:tapo ka:yapa wua: dla yu atlamama mo-mikadepe dle dulu dla mo-opa depo ha:ha: so dla yu atlamdiye pe-epapena. Adipalati, wua:ye mikadepe dle dulu dla ala owayimlala some ha:ha:mama ta:lamo sota ha:ha:le epapele some ha:ha:uwapo. <sup>2</sup> Epedeme wua:tapo daya kokalalimale dloweye ala po-ala:lalo ha:ha:la natipame na:tapo isikimi wua: dla meme ilimuwapo. Amasiyama ma wata oloma hema wua: ala meme siyapo tlo me-dlomha:ha:po. <sup>3</sup> Adipalati, wua:ye ala mota solotamale kokota wua:ye eleme siyamapo. Epedeme wua: dulu dla ya:mkale ellewe koko mate epo yu topulolle koko mate ala me-hutiye tle di malanatipo, wua:tapo ala ta:lamo sota ha:ha:mde epo ha:ha: kokoye. <sup>4</sup> Adipalati, wua: dulu dla opa opita atlemama, “na:ye Polo dolumalalo oplami,” dlati ma opita atlemama, “na: Apolos dolumalalo oplami,” demya kokotapo wua:ta ala ta:lamo so some ha:ha:ye nati-ipo.

<sup>5</sup> Epele dulu dla Apolos mate na: mateye isikimi God ya: oko sopo. Ditapo Godta dia: dla oko hamilati wua:ta mikadepe dlepo depame wua: gaduwapo. <sup>6</sup> Na:tapo isikimi wua: dupa dulu dla God yuye dlomoko ale some emtlati asiyama Apolostapo yú sisimamtlalo haluwapo. Amasiyama Godtapo wua: dulu dla mikadepe dle koko eta peyapo ta:lepo depame itiyamale hamilalo haluwapo. <sup>7</sup> Epedeme emalalo oplami mate epo yú sisimamtlalo oplami mate yia: kokoye pase sikemte pato. Amasiyama emale alisisi eta peyapo ta:lepo depame itiyamale hamilalo God tlo pta koko pato halapo. <sup>8</sup> Epedeme emalalo oplami mate epo yú sisimamtlalo oplami mate yimkata koko hatlo yilo oko hapo. Amasiyama yia:tapo oko meyelope meyelope dle halomale e mate ala:le asiyamaye halomelepe. <sup>9</sup> Epedeme dita madipata Apolos mate God ya: oko hamha:ha:mama ya: osalo dulu dla oko hamha:ha:po. Epalati asiyama wua:tapo God ya: osalo some halapo.

Epame wua: mape God ya: aya some halapo. <sup>10</sup> Epele dulu dla Godtapo namkale dle tle na:ye ma-ka:dena dlati na:tapo ka:depo aya halalo oplamita aya halowedeme saka mate alumiti mate kellemdiye, epammama na:tapo saka mate alumiti mate wua: dulu dla ma-kelliwapo. Epalati ma asiyama oplami haletapo na:ta kelle saka mate epo alumiti mate e tama di dla aya hapo. Amasiyama ya: wolomape! Aya woloma ka:depo halepe. <sup>11</sup> Adipalati, hatlo Kelisotapo dita aya ha dulu hema saka mate epo alumiti mate halapo. Epapeleye oplami haleta saka mate alumiti mate ma amko pokellowa. <sup>12</sup> Aya halalo so opitapo saka mate alumiti mate kelle e tama di dla aya hamama ka:ka:dle itiyamale alisisi ipapeletapo aya hamdepo. Eye gold ewalapo epame silba ewalapo epame ewala opi ka:ka:dle matepo. Amasiyama aya halalo so opitapo pase itiyamale alisisi ipapele mate hamdepo. Eye biskapa dalipo epo osamokolopo epame pelamu upapo. <sup>13</sup> Ditapo alumiti mate epo saka mate kelle e tama di dla apa alisisi mate aya halepiye, asiyama koko gladle alila dla aya eye ka:depo hata: depame opa hapuloma inoma dali dla dlapata mistla natilipe. <sup>14</sup> Epele dulu dla dita aya haletapo dlapa dulu dla me-kokalepo pollopiye, eta di asiyama halepe. <sup>15</sup> Amasiyama oplami antapo biskapa alisisi mate aya halë hallepiye, dlapata aya eye mosukulu hamdepo hamastlepe. Amasiyama yo aya halë oplami eye dlapa dulu metle teletale some hallati asiyama Godta mepele ya: pasakaloye gadlepe.

#### *Wua:ye God ya: aiyalma ayapo*

<sup>16</sup> Epedeme wua: powua:malamata:, wua:ye God ya: aiyalma ayapo? Epedeme God ya: Sokotapo wua: dulu dla halapo. <sup>17</sup> Epele dulu dla oplami haletapo God ya: aiyalma ayaye batalimelepiye, asiyama Godtapo oplami eye batalipo hamastlepe. Adipalati, God ya: aiyalma ayaye pta aiyalma ikadepepo. Epedeme aiyalma aya eye wua:po.



<sup>18</sup> Epedeme wua: koko iye woloma haiya. Adipalati, oplamitapo woloma ka:depo malamale mate halli dlepiye, ya: ka:yapa ta:lamo malamale sota natili tle ya:ye yiyil-amale oplami some hallepe. <sup>19</sup> Adipalati, ta:lamota malamale hamili kokoye Godtapo yiyilamale koko demhalapo. Adipalati, God yu bukata epo atlapo,

“Opa miyelo ta:lamo koko tle malamaletapo dea susumale some hallati asiyama Godtapo yia:ye edla ka:ka:tipo hohomhalapo.”

<sup>20</sup> Epame God yu bukata matle epo atlapo,

“Lodtapo ta:lamo tle sikemte di dla momalamale halë sota malamaleye malastepo halapo.

Epapedeme yia:ta momalamale koko eye asiyama ya:tapo pokoko demdepo.”

<sup>21</sup> Epedeme wua:tapo wua: dokopala so opi tlo ka:ka:dena demama asiyama opi tlo allimiya. Adipalati, koko hapulomaye wuolepo. <sup>22</sup> Polo mate epo Apolos mate epame Pita mateye wua: gadlepo depame wua: watle hapiwapo. Epame ta:lamo mate epo pasakalo mate epo polowe mate mape wua: watle ma-hapiwapo. Epame ma wata ha:ha: i ya: koko mate epo ma alotle ha:ha:lowe ya: koko mateye wua: watle ma-hapiwapo. Koko hapuloma iye wuolepo. <sup>23</sup> Epele dulu dla wua:ye Keliso tetepo. Epalati asiyama Kelisoye God tetepo.

## 4

### *Taiya dle so yia: oko koko*

<sup>1</sup> Epedeme wua:tapo na: mate epo Apolos mateye Keliso ya: oko sopo dloweye ka:dena. Adipalati, Godta meyelo hemele hatiyomelle kokoye ma haliyamale opa dla atlepo depame dia:ye hohomuwapo. <sup>2</sup> Epedeme Godtapo oplami haleye sepame oko hamilipiye, ya: solotamapo, oplami etapo woloma hutulli mate oko ka:depo halepo depame. <sup>3</sup> Amasiyama na: oplami haleta o wua:tapo na: oko kokoye gladlowe dla na: pokoko desema. Adipalati, na: mape naskamu na: kokoye pogladesemde. <sup>4</sup> Ame adipalati, na:ta malamale sitalita na:ta oko halë batalipo hauwa kokoye po-imasema. Amasiyama epapele kokota na:ye Lod mila:pi tle ala poka:dena desema. Adipalati, hatlo Lodtapo na: oko natipame koko gladlepe. <sup>5</sup> Epedeme Lodta ala populalo hallati ha:ha:mama yipta yimkadulo kokoye glademha:ha:miya. Adipalati, Lodtapo puame hemele amtuwale dulu dla hutiyeye koko mate epo opata hemele yia: dupa dulu dla momalamde koko hapuloma mateye haliyamale dla bobotimatimelepe. Epame oloma edla opa hapulomatapo yia:ta halomha:ha:le koko hapuloma mate ala:leye God tle asiyama halomelepe.

<sup>6</sup> Mikadepe dle so namkadulo, na:tapo wua: malapame na: mate Apolos mate di koko tle wua: dla imalepo, wua:tapo God yu bukata atla mate ala:po ha:ha:mama wua: dokopala so yilo wua: dulu dla hukulli pa:po ha:ha:lepo depame. <sup>7</sup> Wua: adipalati wuskamu di dla halopo hehetamha:ha:ma:? Epame wua: koko adiye God tle pahalalo wekuwa? Amasiyama Godtapo isikimi ya:ta namkale dle tle wua: dla koko hapulomaye ma-halopiwapo. Ame epapele dulu dla wua: adipalati God tle koko opi pahalomalalo wekele some ma wuskamu di dla halopo hehetamha:ha:ma:?

<sup>8</sup> Wua:ta malamaletapo wua:ye koko hapuloma mo-malastale so demha:ha:po. Epame wua: ma wuskamu wua:ye Sokota isikimi hapimhala kokoye mo-poposatilipo ha:ha:ma demha:ha:po. Epame wua: ma dita gadle dimi dokopala hi mo-halomuwa demha:ha:po. Wua:ta epapeleta ammatiye, ka:dena, na: mape dokopala hi ma halë hallemla. <sup>9</sup> Amasiyama pona:malamana, Godtapo Taiya dle so dia:ye hohopame mosukulu alo ikadepe dla hatitimuwayo, ditapo koko gladle dla palliwedeme ha:ha: so opa epapele some ha:ha:liti asiyama ta:lamo so opa hapuloma mate epo banakaka so mateta dia:ye tepelemha:ha:lepo depame.

<sup>10</sup> Keliso yilo ditapo yiyilamale so some ha:ha:lali asiyama wua:ta atlemama, “dia: tlo Keliso dulu dla malamale ka:ka:dle so,” demha:ha:mdepo. Epame ditapo hopeyalimale so some ha:ha:lali asiyama wua:tapo atlemama, “dia: tlo itiyamale so,” demha:ha:mdepo. Epame opata wua: tlo sikemte ka:ka:dle so demama asiyama dia: tlo allimdepo. <sup>11</sup> Epele dulu dla di daya teta:le mate yú teta:le mate me-siyamdepo. Epame di tluka mape isikimi bobtalimale siyapo tlo didiyepo siyamdepo. Epame opatapo dia:ye sikemte posalemdepo. Epele dulu dla dia: dla dita ha:ha:lalo aya ikadepe ma hawa. <sup>12</sup> Epapedeme ditapo di moto mate oko pato halomdepo, dita dlowe malamama. Epame opa opita dia: dla putlopo atlamyelati asiyama ditapo yia: dla isikimi siyele yu tlo atlamdepo. Epame opa opita dia: dla wotiyalle hamilati asiyama ditapo isikimi sadle mate yu dimi ha:ha:mdepo. <sup>13</sup> Epame yia:tapo di hi mate isikimi mala-atlamyelati asiyama ditapo isikimi yu ka:dle siyapo tlo yia: dla atlamdepo. Epame ta:lammo sotapo dia:ye hakaka demdepo.

<sup>14</sup> Epapele dulu dla na:tapo yu ilima i mate wua: dla wota:le hamilowedeme popesema. Amasiyama na:ta wua:ye na: yimlala ikadepe some malahalemama wua: watle molo yu atlema. <sup>15</sup> Adipalati, pona:malamana, wua: dla Keliso koko imuwa opaye sikemte pasatale mle. Amasiyama dulu edla hatlo na:tapo wua: a halapo. Adipalati, ka:yapa na: tatile ka:dle yu Yesu Keliso kokoye wua: dla puame imalati wua:tapo mikadepe duwapo. <sup>16</sup> Epapedeme wua:tapo na: koko natipame dolumelepo depame na:tapo koko iye wua: dla atlema. <sup>17</sup> Epapele koko tle na:tapo Timotiye wua: dla tane dema. Adipalati, ya:ye Keliso dulu dla ka:depo oko halalo oplamipo. Epame ya:ye Keliso dulu dla na:ta sikemte dupa ellalo maseyemala ikadepe sepena. Epedeme ya:tapo puame wua: watle na:ta Keliso dulu dla hala koko mate epo mikadepe dle so hapuloma dla na:ta Keliso koko imsela: mateye wua: dla atlamelepe.

<sup>18</sup> Epedeme wua: dulu dla opa opitapo na:ye ma ilame edla populalo wekelepe depo malapame yiskamu di dla halopo hehetamyapo. <sup>19</sup> Amasiyama Lodtapo na:ta wua: hala dla tloweye ka:dena dlepiye, eta na:ta ma-hapele wua: hala dla tlowepo. Amasiyama na:ta pulupiye, na: posolotamasema, isikimi yia:ta atlama yu siyapo tlo dallowe, amasiyama na: solotama, opa ewolota yiskamu di dla halopo hehetamama itiyamale halopo ha:ha: kokoye woloma natilowepo. <sup>20</sup> Adipalati, God ya: mo kokoye isikimi opata atlamde yu tama di dla pohalasema. Amasiyama itiyamale tama di dla halapo. <sup>21</sup> Epapedeme na:ta wua: hala dla puluwe dla wua: apa solotama? Na:ta pumama bulukupi mate hampupa:, o isikimi bokotiyapo malamale mate sadle mate pupa:?

## 5

### *Opa mate wola: mate uhalowe koko dla molo atlale*

<sup>1</sup> Epedeme wua: dulu dla opa mate wola: mate uhalomolowe kokota eluwo demdiye, na: me-dalemde. Koko hema oplami hale wua: dulu dla hallalotapo ya: a ya:llu kolahame halaye pta koko batalimana. Ipapele kokoye God yeitamale sota pohalalo wekemde tlo, ma adipammama mikadepe dle oplamita koko iye hama:? <sup>2</sup> Epame wua: adipalati ipapele kokoye me-natipame ma wuskamu di dla halopo hehetamha:ha:ma:? Amasiyama wua: ipapele koko natipame dupa kolemmama epapele oplamiye aseka sos tle alikili dla hallepo depame ya: hi geda:dlowe ka:pi. <sup>3</sup> Epedeme wua: malamaiya, na:tapo na: moto ikadepe mate wua: mate pohalasema. Amasiyama na:tapo soko tle wua: mate halapo. Epedeme batalimale koko halalo oplami e ya: kokoye na:tapo magladuwapo. <sup>4</sup> Epapedeme wua: ka:dena, koko hema yimkata Lod Yesu hi tle alupame esemale haiya. Epalati na: mape soko tle wua: mate alumale dulu edla hallowepo. Epame Yesu Kelisota itiyamale ma wua: mate me-hallepe. <sup>5</sup> Epame wua:ta esemale dulu edla wua: oplami eye hampame ya: dla mota solotamale koko elaye yulupo depame

Saiten do tama dla homeleiya. Epelepiye, eta ya:ta ya: batalimale tle ma malamale meyelope dlati asiyama Lodtapo ya:ta puluwe alila dla ya: pasakalo gadlepe.

<sup>6</sup> Wua:tapo wuskamu di dla halopo hehetamha:ha:ye pta batalimana. Epele dulu dla powua:malamata:, yist alisisi yematapao palawa daya dla goudepo dukumalati dayata di a:ma hetamdepo. Epammama oplami hatlota batalimale koko hamhallati pohumatlalo me-omha:ha:lepiye, wua:ta hapulomatapao batalimale koko hatlo medla tutula:lepe. <sup>7</sup> Epapedeme wua:tapo woloma ka:depo ha:ha:lowedeme wua: dulu dla batalimale koko halalo oplami halaye alikili dla holamastaiya. Adipalati, Kelisoye yumulati dia: yilo mo-pouwapo. <sup>8</sup> Epapedeme di ka:dena, batalimale koko mate epo poka:ka:dle koko mateye alikili dla pololepame ma ullu pa:le koko mate epo ikadepe koko mate dulu dla ha:ha:loweye.

<sup>9</sup> Na:tapo ka:yapa wua: dla yu ilipo hamiwa dulu dla wua:ye ma-atlamuwapo, wua:tapo wola: mate epo opa mate uhalomalalo so mate hatlope demha:ha:lala depame.

<sup>10</sup> Epele dulu dla na:ta atluwaye, alikili sota wola: mate opa mate uhalomde koko dla atlemama po-apena. Epame yia:ta mani mate alisisi mate sikemte solotamde koko dla atlemama po-apena. Epame yia:ta biskapa god dla sisiyemde koko dla atlemama po-apena. Amasiyama isikimi mikadepe dle so opita batalimale ipapele koko dulu dla ha:ha:la natipame atlemama apuwapo. Epele dulu dla na:tapo wua:ye alikili so ipapele mate hatlope demha:ha:miyo dematiye, mikadepe dle so wua:ye hadima tame ha:ha:lemo? Adipalati, ta:lamo pato iye alikili so epapele sota pasatepo elapo.

<sup>11</sup> Amasiyama na:tapo wua: watle yu ilipo hamiwa ya: dulu kokoye ipo elema. Oplami haletapo ya:skamu ya:ye mikadepe dle oplami depame matle batalimale koko ipapele halomhalemama matle ya:mkale putlomolowe koko mate epo kawata yú sikemte dlowe koko mate epo uhalowe koko mate halomhallepiye, epapele mate hatlope demiya.

<sup>12-13</sup> Epedeme alikili so koko gladloweye pona: koko. Adipalati, hatlo Godtapo yia: kokoye gladlepe. Amasiyama mikadepe dle so alumale wua: dla itiyamale elapo, wua: dulu dla oplami haleta batalimale koko halati ya: koko gladloweye. Adipalati, God yu bukata epo atlapo,

“Batalimale koko halomalalo oplami wua: dulu dla halaye alikili dla dodolomaiya,”  
depo.

## 6

### *Wua: amkadulo mikadepe dle soye eleme koko gladle dla tlowe*

<sup>1</sup> Epedeme mikadepe dle so wua: dulu dla oplami haletapo ya:mkale mate yu top-ulolepame ma adipalati koko eye hame alikili so koko gladlalo so dla koko gladla tamdi? Amasiyama wua: isikimi ka:dena, mikadepe dle so siyapota koko i ka:dloweye.

<sup>2</sup> Adipalati, wua: powua:malamata:, mikadepe dle so ditapo ta:lamo pato i ya: koko gladloweye? Epapedeme ta:lamo pato i ya: kokoye mikadepe dle so ditapo gladlepe dedeme, wua: ka:dena, wua: dulu dla yimka:sikili koko i tatle woloma ka:pi glademha:ha:iya.

<sup>3</sup> Epame wua: ma powua:malamata:, mikadepe dle so ditapo God ya: banakaka so koko gladloweye? Epapedeme di ka:dena, dita ha:ha:le dulu dla yimka:sikili koko woloma ka:ka:demha:ha:loweye. <sup>4</sup> Epapele dulu dla yu topulolle kokota wua: dulu dla woyamalati natipame koko eye ka:dlowedeme wua: ma adipalati alikili so koko gladlalo so dla tamdi? <sup>5</sup> Wua: wowota:lowe ka:pipo. Adipalati, mikadepe dle so wua: dulu dla ka:dle oplami hale hawata:, wua: koko gladloweye? <sup>6</sup> Amasiyama mikadepe dle oplamitapo ya:mkale mikadepe dle oplami haleye seme koko gladlowedeme ma alikili so koko gladlalo so hala dla tamdepo.

<sup>7</sup> Wua: dulu dla koko gladle hutiyetapo wua:ta mikadepe dle kokota mo-powale some elaye nati-ipo. Epedeme wua: poka:deta:, oplami haletapo wua: dla batalimale koko hale halati isikimi natipo emolloweye? Epame wua: poka:deta:, oplami haleta wua: alisisi

uhalati isikimi natipo emollowe? <sup>8</sup> Epele tlope muwolo yimkadulo dla batalimale koko halopame ma yia: alisisi uhalomdepo. Wua:ta epamha:ha:mama wua: amkadulo mikadepe dle so dla ma mepamdepo.

<sup>9</sup> Epapedeme wua: powua:malamata:, batalimale koko halomalalo sotapo God ya: mo koko dla po-u-ulapo tulalo wekelowe? Wua: koko iye woloma malamaiya. Adipalati, opa mate wola: mate uhalomalalo so mate, epo biskapa god dla sisiyelalo so mate, epo opa yimkadulo halomalalo so mate, <sup>10</sup> epo yimkadulo alisisi uhalomalalo so mate, epo alisisi mate mani mate sikemte solotamalalo so mate, epame kawata yú sikemte dlalo so mate, epo yimkadulo dla putlopo atlamalalo so mate, epame isikimi elemale tle yimkadulo alisisi halomalalo so mateye God ya: mo koko dla po-u-ulapo tuluwa. <sup>11</sup> Opi wua:ye ipapele koko dulu dla ha:ha:uwapo. Epapele tlope watapo di Lod Yesu Keliso hi tle epame God ya: Sokota itiyamale tle batalimale hapuloma eye wua: tle mo-howahalomuwapo. Epedeme Godtapo wua:ye ya: mila:pi tle mo-ullu pa:talo so depame ma ya: opa duwapo.

*Wua: motota koko halë tle God dla siyele hamiya*

<sup>12</sup> Epedeme wua: dulu dla opitapo epo atlemdepo, “Dia: dla koko hapuloma halomolowe dla aiyalma hawa,” demdepo. Amasiyama na:ta wua:ye atlema, koko opi wua:ta halomolowe wua: dla pase ka:pi. Epame koko haleta wua:ye dea some popoliyepo dokopala depo hallowe poka:dena. <sup>13</sup> Epame opita ma epo atlemdepo, “Dlowe alisisiye di koko tetepo epame asiyama di kokoye dlowe alisisi tetepo,” demdepo. Amasiyama koko dapiyamte hema Godtapo mosukulu alila dla batalipo hamastlepe. Epedeme di motoye opa mate wola: mate uhalomha:ha:lowe dla pomita:pena. Amasiyama Lod tete depame mimita:puwapo. Epame asiyama Lod mape di motoye omhalapo. <sup>14</sup> Epapedeme Godtapo ya:ta itiyamale tle Lodye powale dulu tle ma pasakalo duwapo. Epedeme ma hatlo ya:tapo dia:ye powale dulu tle ma pasakalo dlepe. <sup>15</sup> Epame powua:malamata:, wua: moto hapulomaye Keliso moto ipipo? Epapeleye ma ka:deta:, oplamitapo ya: motoye Keliso dulu tle hapame ma duka dla sela:lalo a:ya mate hatlope dlowe? Hao, poka:dena. <sup>16</sup> Epedeme powua:malamata:, oplamitapo isikimi duka dla sela:lalo a:ya mate hatlope dlepiye, yia:ta dapiyamtetapo moto ma-hatlope depo? Adipalati, God yu bukata epo atlapo, “Oplamitapo a:ya halepiye,

yia:ta madipatatapo moto ma-hatlope depo halapo.”

<sup>17</sup> Amasiyama oplami antapo Lod dla tame ulupo halema:, ya:ye Soko tle ya: mate ma hatlope depo halapo.

<sup>18</sup> Epedeme wua:ye opa mate wola: mate uhalomolowe batalimale koko tle alikili dla potaiya. Adipalati, batalimale koko opi hapulomatapo wua: motoye pobatalimasemde. Amasiyama opa mate wola: mate uhalowe koko etapo wua: moto dla batalimaleye hampumdepo. <sup>19</sup> Adipalati, powua:malamata:, wua: motoye God ya: Hela:dle Sokota hallalo ayapo? Godtapo ya: Hela:dle Sokoye wua: watile ma-hamiwapo. Epedeme Hela:dle Soko etapo wua: dulu dla halapo. Epapedeme wua:ye wuskamu muwolo wua: motoye po-omha:ha:sema. <sup>20</sup> Adipalati, Godtapo wua:ye asiyama pato mate melemuwapo. Epapedeme dita di moto mate koko halomdetapo God dla siyele hamilowe tlo ka:pi.

## 7

*Oplamita ya:llu mate hallowe koko*

<sup>1</sup> Epedeme wua:ta na: watile yu ilipo hamimama atlanatiwaye, na: wata koko edla asiyama yuye wua: dla atlowe solotama. Yao, oplamitapo isikimi a:ya pohalalo hallowe tlo ka:pi. <sup>2</sup> Amasiyama epapele tlope wua:ta opa mate wola: mate uhalowe batalimale

dla tullala depame wua: ka:dena, oplamitapo woloma ya: a:ya hatlo tlo hapo halloweye. Epame a:ya mape ya: oplami hatlo tlo hapo halloweye.

<sup>3</sup> Epo ha:ha:le dulu dla a:yatapo ya:wolali mate hatlope dlowe solotamelepiye, ka:dena, oplamitapo ya:llu yu dla salladloweye. Epame ma asiyama oplamitapo ya:llu mate hatlope dlowe solotamelepiye, ka:dena, ya:llutapo ya:wolali yu dla salladloweye. <sup>4</sup> Adipalati, a:yaye ya:wolali tetepo. Epedeme ya:tapo ya:skamu ya: motoye po-omhalasema. Amasiyama ya:wolalita omhalapo. Epame asiyama oplami mape ya:llu tetepo. Adipalati, ya:tapo ya:skamu ya: motoye po-omhalasema, ya:llutapo omhalapo. <sup>5-6</sup> Epedeme wua:ta madipata ha:ha:mama hatlope demha:ha:loweye melemiya. Amasiyama wua:ta God dla inoma sumha:ha:lowedeme wua:ta madipatata hatlope demde koko dla esepame solotamale himpo alila kiyele dla aiyalma depo ha:ha:lowa dlepiye, e ka:pipo. Amasiyama koko hema na:tapo wua:ta epapelepo depame wua:ye poha:ha:masema. Epame wua:ta aiyalma depo ha:ha:le kokota mo-puame gudlepiye, eta ma wua:ta madipatata ma-hatlope demha:ha:lowe ka:pipo. Adipalati, wua:ta madipatata ma pohatlope dlalo ha:ha:lali Saitenta wua:ye elemala natimama opa mate wola: mate uhalowe koko dla elemtullala.

<sup>7</sup> Isikimi na:ta malamale dla ipo elemde, opa hapulomatapo na: some wola: pohalomalalo ha:ha:lepo depame. Amasiyama Godtapo opa opi dla wola: halomolowe malamaleye hapimhalapo. Epame ma opa opi dla wola: pohalomalalo isikimi mepo ha:ha:lowe malamaleye hapimhalapo. Epame wola: dla mape mepapena.

<sup>8</sup> Epame na: ma watapo wola: mate opa mate pohalomalalo wekele so wua: dla epo dupulapitalo so wua: dla yu i atlema. Ka:dena, wua:ta na: some wola: mate opa mate pohalomalalo ha:ha:loweye. <sup>9</sup> Amasiyama epapele dulu dla wua:tapo wola: mate opa mate uhalomolowe batalimale koko dla tulluwe dla pokokalepo ha:ha:lalo wekelepiye, eta wua: ma ka:dena, opa mate wola: mate halomolowe. Adipalati, oplamitapo a:ya pohalalo halemama isikimi a:ya hapo hallowe koko tlo sikemte momalamhalloweye e poka:dena. Amasiyama epapele kokota woyamalala depame oplamita a:ya hapo hallowe tlo ka:pipo. Wola: mape koko ma hatlopepo.

<sup>10</sup> Na: ma wola: mate opa mate ma-halomale abili so wua: dla yu iye atlema. Amasiyama yu iye pona: yu ikadepe. Adipalati, Lodtapo meyelo epo atluwapo, "A:yatapo ya:wolaliye pomeleme tlowa," duwapo. <sup>11</sup> Amasiyama ya:tapo mepele ya:wolaliye meleme telepiye, ya: ka:dena, oplami ma pohalalo mepo isikimi polloweye. Epapele dulu dla ya:tapo isikimi mepo pollowe koko dla woloma pomalamalalo wekelepiye, ya: ka:dena, ma ilame tame ya:wolali mate hatlope dlowedeme esemelepe. Epame opa mape poka:dena, yia: wola: salepo tloweye.

<sup>12</sup> Epapedeme Lodta atlale yu ipi hema na: mape na:ta malamale kokoye wua: dla atlowe solotama. Mikadepe dle oplami hale ya:llu pomikadepe dletapo ala ya:wolali mate me-hallowe solotamalati asiyama ya:wolalitapo ya: meleme tlowe poka:dena.

<sup>13</sup> Epame ma mikadepe dle a:ya mape mepapena. Ya:wolali pomikadepe dle oplamitapo ya: mate me-hallowe solotamalati asiyama ya:llutapo ya: meleme tloweye poka:dena.

<sup>14</sup> Adipalati, pomikadepe dle oplamiye, ya:lluta mikadepe dle koko tle ya:ye God mila:pi tle ullu pa:le oplami some halapo. Epame asiyama pomikadepe dle a:ya mape, ya:wolalita mikadepe dle koko tle ya:ye God mila:pi tle ullu pa:le a:ya some halapo. Koko ita pe-epo ellalo wekematiye, wua: yimlalata God mila:pi tle ullu watalo so some ha:ha:lemla. Amasiyama yia:ye God mila:pi tle mo-ullu pa:le so depo ha:ha:po.

<sup>15</sup> Amasiyama wa: a:ya pomikadepe dlalo wekele epapeleta o wa: oplami pomikadepe dlalo wekele epapeleta wa:ye meleme tlowe solotamelepiye, ka:dena, ya: watle me-tane dlepe. Adipalati, ipapele koko dulu dla aiyalma haleta pe-elasma. Amasiyama Godta solotamapo, wa:tapo woloma sadle dulu dla hallope depame. <sup>16</sup> Epedeme a:ya, Godtapo



wa: tle wa:wolali pasakalo gadlowedeme halaye wa: adipo malapa:? Epame oplami wa: mape, Godtapo wa: tle wa: a:ya pasakalo gadlowedeme halaye wa: adipo malapa:?

*Godta wua: hadima ha:ha:lali sisilamuwa pasakalo dulu medla mepo ha:ha:iya*

<sup>17</sup> Epedeme ka:dena, opa hapulomatapo Godta yia: watle hapili pasakalo e mate ha:ha:loweye. Epame wua:tapo Godta ka:yapa wua: sisilamale oloma edla wua:ta ha:ha:uwaye epo ha:ha:iya. Epedeme koko hatlo iye na:tapo mikadepe dle so hapuloma dla imsela:po. <sup>18</sup> Wa: ala pomikadepe dlalo halemama kapala ma-kestauwayo, epapeleye wa: matle mikadepe depo halemama wa:ta kapala kestauwa eye ma meyelope demiya. Epame wa: ala kapala pokestlalo halemama mikadepe duwayo, wa: matle kapala kestamiya. <sup>19</sup> Adipalati, kapala kestlowe koko mate epo kapala pokestlalo wekelowe koko mateta koko pato pohalasema. Amasiyama isikimi Godta molo atlale yu dla dolumhallowe tlo koko patopo. <sup>20</sup> Epedeme Godta ka:yapa wua: sisilamale oloma edla wua:ta ha:ha:uwaye mepo ha:ha:iya.

<sup>21</sup> Godta wa: sisilamuwa oloma edla wa:ye asiyama pa:le dla oko halalo oplami some haluwayo. Wa: ase malamiya, aseka medla mepo halane. Amasiyama medla me-halemama wa:ta alikili a:ma dla woyamolowe api natilipiye, wa: api etle tane. <sup>22</sup> Lodtapo asiyama pa:le dla oko halomalalo so sisilamale oloma edla yia:tapo Lod dulu dla ma asiyama pa:le dla oko halomalalo so some poha:ha:sema. Amasiyama asiyama pa:le dla oko pohomalalalo wekelalo soye Lodta yia: sisilamale oloma dla ma asiyama yia:tapo Keliso dulu dla asiyama pa:le dla oko halomalalo so some ha:ha:po. <sup>23</sup> Godtapo wua:ye asiyama pato mate me-elemuwapo. Epedeme ta:lamo kokota wua:ye elemta demiya. <sup>24</sup> Epapedeme mikadepe dle so namkadulo, Godta ka:yapa wua: sisilamuwa oloma edla wua:ta ha:ha:uwaye, God mila:pi tle ma mepo ha:ha:iya.

*Opa mate wola: mate halomolowe koko*

<sup>25</sup> Lodtapo na: watle amkoteta:le sota wola: mate opa mate halomolowe dla yu hale potlana. Amasiyama wua: dla isikimi na:tapo molo yu atlowepo. Epele dulu dla wua:tapo na:ye mikadepe diya. Adipalati, Lodtapo na:ye gadle tle malamale ka:dleye na: watle ma-hamiwapo. <sup>26</sup> Epedeme di wata oloma hema ta:lamo kokalalimale koko dulu dla ha:ha:deme na:ta wua: dla atlema, wua:ta ha:ha:ye mepo ha:ha:iya. <sup>27</sup> Epedeme wua: opa mate epo wola: mate ma-halopo ha:ha:yo, mepo halopo ha:ha:iya. Amasiyama opi wua: ala wola: mate opa mate pohomalalalo ha:ha:yo, wua: mape mepo me-ha:ha:iya. <sup>28</sup> Amasiyama epele dulu dla wa:tapo a:ya hali dlepiye, eye pobatalimale koko. Epame ipilalotapo oplami hali dlepiye, e mape pobatalimale koko. Amasiyama na: solotama, opata wola: halopo ha:ha:mama upiyele koko opi tlamdiye, wua:ta koko e potlamalalo wekelepo depame wua:ye gadema.

<sup>29</sup> Epedeme mikadepe dle so namkadulo, Yesuta puluwe alilatapo mo-kiyempulati na:tapo wua: dla yu ipo atlema. A:ya ma-halë oplamitapo God oko tlo sikemte malamama a:ya pohalalo wekele some hallowe ka:pi. <sup>30</sup> Epame siyele koko mate epo dupa kolle koko mate epo alisisi pasatepo hallowe koko matetapo oplamita God oko halowe dla api himomolloweye poka:dena. <sup>31</sup> Epedeme dita ta:lamo hema ha:ha: oloma dla koko hapuloma halomha:ha:tapo oplamita God oko halowe dla api himomolloweye poka:dena. Adipalati, ta:lamo pato i mate epo dulu edla ha:ha: alisisi mateta pa:loweye mo-mateka:pi halapo.

<sup>32</sup> Na: posolotamasema, wua:tapo koko hapuloma dla sikemte momalamale mate ha:ha:loweye. Adipalati, a:ya pa:le oplamitapo isikimi hatlo Lod oko hamhalemama ya: dla siyele hamilowe koko tlo sikemte momalamhalemdepo. <sup>33</sup> Amasiyama a:ya walle oplamitapo ya:llu mate epo yimlala mate gadlowe koko tlo momalamsela:mama ya:llu dla siyele hamilowe koko ma sikemte momalamhalemdepo. <sup>34</sup> Epammama ya:tapo momalamale dapiyamte dla tatlapo halemdepo. Malamale haleye ya:llu dla siyele

hamilowe kokopo, epame haleye Lod dla siyele hamilowe kokopo. Epame wola: mape mepamdepo. Sote popa:lalo wola: mate epo ipilatalo matetapo woloma God okoye ka:pi halowe tlo momalamdepo. Adipalati, yia: solotamdepo, yia:tapo God oko hamama yia: moto tle epame yia: soko tle aiyalma depo ha:ha:lowedeme. Amasiyama oplami walle a:yatapo isikimi ya:wolali mate yimlala mate gadlowe koko tlo momalamhalemama ya:wolali dla siyele hamilowe koko ma sikemte momalamhalemdepo. <sup>35</sup> Na:ta koko i atla dulu dla wua:tapo opa mate wola: mate halomolowe koko dla pohumatlasema, asiyama na:tapo isikimi wua:ye gademama amma. Adipalati, na: solotama, wua:tapo Lod dulu dla woloma ka:depo ha:ha:mama hatlo ya: tlo sikemte momalamha:ha:lepo depo amma.

<sup>36</sup> Epele dulu dla wa:tapo ipilalo hale halowe dla yu himme halayo. Epame wa: mape a:ya e halowe dla sikemte solotamale ellepiye, ka:dena, wua:ta madipatata me-halomolowe. Adipalati, edla batalimale koko hale pe-elasema. <sup>37</sup> Amasiyama wa:ta malamaleta mowolo a:ya dimi hallowe kokoye ka:pi depo malapame ma wa:skamu wa: moto hamolowe ma ala:le hallepiye, ka:dena, wa:tapo wa: watle a:ya hamilowa depo yu me-himpo ha:ha:leye ma memellepe. <sup>38</sup> Epapele dulu dla wa:ta a:ya halowe ka:dle kokopo. Amasiyama wa:tapo a:ya dimi isikimi mowolo hallowe tlo sikemte ka:dena.

<sup>39</sup> A:yatapo ya:wolalita ala me-hallati ma oplami hale halowe poka:dena. Amasiyama ya:wolalita mo-polati ma oplami hale halowe solotamelepiye, ka:dena, ya:tapo ma oplami hale hamama isikimi mikadepe dle oplami halowe tlo ka:pi. <sup>40</sup> Amasiyama na:ta malamale dla ipo elema, a:ya eta ma isikimi siyele mate halli dlepiye, ya: ka:dena, matle oplami hale pohalalo mepo pollowe. Na: mikadepe demama God Soko tle koko iye atlema.

## 8

### *Biskapa god dla namkale dle alisisi hapili dlowe koko*

<sup>1</sup> Epedeme di ma watapo dlowe alisisi biskapa god dla namkale dle hapimde koko dla malamolowepo. Dita hapuloma koko iye ma-dimalamale tlope, asiyama malamale kokotapo diskamu dia: dla di dla halopo hetlowe kokoye hampumdepo. Amasiyama bokotiyapo malamale kokotapo isikimi yimkadulo gadlowe kokoye hampumdepo. <sup>2</sup> Epapedeme ya:skamu ya: tlo koko hapuloma sikemte malamana dlalo oplamiye, koko hapuloma dulu dla sikemte yeliyele oplamipo. <sup>3</sup> Amasiyama God sikemte malahallalo oplamiye, Godtapo ya: kokoye malastepo halapo.

<sup>4</sup> Epedeme biskapa god dla namkale dle alisisi hapili dlowe kokoye ipo elema. Dimalamana, biskapa god hapulomaye pogod ikadepe. Adipalati, di God hatlota halapo, god opi hawa ikadepe. <sup>5</sup> Epapele tlope pomikadepe dlalo wekele so opatapo pepele di dla ha:ha:lalo alisisi opi mate epo ta:lamo dla ha:ha:lalo alisisi opi mate semama god demdepo. <sup>6</sup> Amasiyama dimalamana, di A God hatlota halapo. Epedeme hatlo ya:tapo koko hapulomaye mimita:puwapo. Epedeme ditapo hatlo ya: yilo ha:ha:po. Epame Lod mape hatlo Yesu Kelisopo. Godtapo hatlo ya: tle koko hapulomaye mimita:puwapo, epame ya: tle di watle pasakalo hamiwapo.

<sup>7</sup> Epapele dulu dla mikadepe dle so opitapo koko iye woloma sikemte pomalastepo ha:ha:sema. Adipalati, yia:tapo biskapa god opiye semte god ikadepe tepo demdepo. Epammama yia:tapo biskapa god dla namkale dle alisisi hapili halopo demama semte batalimale koko hamapo depame sikemte wowota:mdepo. <sup>8</sup> Amasiyama dlowe alisisitapo dia:ye God hala mateka:pi dla pe-elempuasemde. Epedeme ditapo dlowe alisisi dlomde kokotapo dia:ye God mila:pi tle po-ullu pa:talo so desemde. Epame ma dita dlowe alisisi e podlalo wekelati mape eta dia:ye God mila:pi tle po-ullu pa:talo so desemde.

<sup>9</sup> Epedeme wua: tlo wua:malamana, wua:tapo biskapa god dla namkale dle alisisi hamili e dlowe dla aiyalma hawa kokoye. Amasiyama wua: alisisi e dlomha:ha:mama wolomape. Adipalati, wua:ta epamde kokotapo mikadepe dle so opi pase kokalalimale so yia: hete kustame tlalo alisisi some hallala. Adipalati, yia:tapo ipapele alisisi dloweye semte aiyalma tepo demdepo. <sup>10</sup> Epapedeme wua: natiya. Wua:tapo biskapa god dla sisiyelalo aya dulu dla epapele daya dempopa:lati mikadepe dle dulu dla pase kokalepo ha:ha:lalo sota wua: natipame yia:ta malamaleta wua:ye batalimale koko hama dlepe. Asiyama wua:tapo yia:ta aiyalma dlalo koko tlo ma me-dlomala natimama yia: ma me-dlomalala. <sup>11-12</sup> Amasiyama wua:ta epapele koko halë tle mikadepe dle dulu dla pase kokalalimale sota mikadepe dleye mo-bobtalimdepo. Epapedeme wua:tapo yia:ye batalimale koko dla me-eleme tulumdepo. Adipalati, yia:tapo wua: koko natipame dolumama ma yia:ta aiyalma dlalo kokoye ma me-halomdepo. Wua:ta epamde koko tle wua:tapo Keliso dla mo-batalimale koko hamdepo. Adipalati, Kelisotapo yia: yilo pouwapo. <sup>13</sup> Epapedeme na:tapo ipapele daya dele koko tle namkale mikadepe dle dulu dla pase kokalle oplami batalimalala depame na: matle ipapele daya podemhallowa.

## 9

### *God oko halalo sota yia: oko asiyama halowe koko*

<sup>1</sup> Epedeme na: dla itiyamale pe-elema:, na:ta wua: dla yu ipo ilipo hamiloweye? Epame na:ye potane dle oplamita:? Epame na: mape di Lod Yesu ponatilalo wekele oplamita:? Epame pona:ta:, wua: yilo oko pato hauwaye, wua:ta mikadepe dlepo depame? <sup>2</sup> Epele dulu dla opa mo opi dla ha:ha:lalo sotapo na:ye potane dle oplami dlepiye, asiyama wua:tapo na:ye tane dle oplami ikadepe dlowe ka:pi. Adipalati, wua:tapo na:ta Lodta tane dle oko hauwa e ya: ulu ha:ha:po.

<sup>3</sup> Epapedeme opa opitapo na:ta tane dle oko hamsela: itiyamale dla na: watle atlanatimde dla ya: asiyama yuye wata atlowama. <sup>4</sup> Epedeme wua: malamaiya, na: mate Banabas mate dita di oko asiyama dla daya mate yú mate dlomha:ha:loweye poka:deta:? <sup>5</sup> Epame ditapo di wola: mikadepe dle so mate yimkata siyamoloweye poka:deta:? Adipalati, Taiya dle so opi mate epo Yesu ya: eidulo mate epame Pita mate mape yia: wola: mate me-siyamdepo. <sup>6</sup> Hatlo dita madipata Banabas mateta diskamu di gadlowe alisisi yilo bidulo di do mate oko hamha:ha:pa:? <sup>7</sup> Epedeme wua: natiya, opahale dla tlalo oplamitapo ya:skamu ya: oko asiyamaye hamipa:? Epame alisisi emalalo oplamitapo ya:ta emale alisisi hauwalepo puame ma alisisi eye podlalo wekemdi? Epame halo omhallalo oplamitapo ya: aliya sumpo ma mo eye podlalo wekemdi?

<sup>8-9</sup> Epedeme koko iye na:tapo isikimi opata malamale tle po-atlasema. Adipalati, Mosesta aiyalma hatitimale mape epo atlapo,  
“Wua: bulumkiyawa aliyata oko hamsela:mama

daya dlala depame ya: matiye deata ketopolomiya,” depo.

Epapedeme Godtapo yu i atluwaye, ya: isikimi bulumkiyawa aliya tlo sikemte malamama apuwa? <sup>10</sup> Hao. Ya:tapo di kokoye atlemama apuwapo. Adipalati, osalo dla oko halalo sotapo yia: osalo tle dlowe alisisi hauwalemdiye, epammama ka:dena, God ya: oko so mape yia: oko asiyama halomha:ha:lepe. <sup>11</sup> Epedeme ditapo wua: dulu dla Soko kokoye me-emuwapo. Epele dulu dla poka:deta:, asiyama wua:tapo dia:ye alisisi mate gadloweye? <sup>12</sup> Epame wua:tapo wua: dla God yu atlamalalo so opiye gademde dlepiye, ame poka:deta:, wua:tapo ma di gadloweye?

Amasiyama ditapo wua: dla alisisi opiye po-otomdena. Adipalati, di posolotamdena, epapele kokotapo wua:ta ditapo ka:dle yu Keliso koko atlati dalla allilala depame. Epapalala depame ditapo kokalle koko dulu medla ha:ha:loweye po-allimdena. <sup>13</sup> Epame wua: ma powua:malamata:, opata God dla namkale dle alisisi hapili alisisiye, yo Yu so aiyalma aya dulu edla oko halalo sotapo demduwapo. Adipalati, eye yia: oko asiyamapo.

<sup>14</sup> Epapedeme Lodtapo itiyamale yu mate epo atluwapo, mikadepe dle sotapo God yu atlamalalo soye asiyama gademha:ha:lowe ka:pi.

<sup>15</sup> Amasiyama epapele tope na:tapo asiyama halowe yilo God oko pohamsela:na. Epame ma na:tapo wata oloma itle na: oko asiyamaye mikadepe dle so tle hamsela:lowedeme yu iye po-ilimasema. Epele dulu dla na: siyema. Adipalati, na:tapo asiyama yilo God okoye pohamsela:na. Amasiyama oplami haletapo na:ta asiyama pa:le God oko hamsela: hema natipo alimama na: api himomellepiye, na: asiyama isikimi polowe tlo solotama. <sup>16</sup> Epedeme na: dla na:ta God yu atlamsela:mde koko dla naskamu di dla pohamhetlowa. Adipalati, ka:dle yu hame opa dla atlamsela:loweye Godtapo na: watle hamiwapo. Epapedeme na:tapo God yuye opa dla woloma potlemsela:lalo wekelepiye, na: ya:mkale! Na: pasakaloye batalimelepe. <sup>17</sup> Epele dulu dla na: monolo solotamale tle ka:dle yuye atlemsela:matiye, eta na:tapo na: oko asiyamaye hamsela:lembla. Amasiyama Godtapo meyelo na:ye sepame oko iye hamiwapo, pona:ta solotamale tle. <sup>18</sup> Epedeme na: oko asiyamaye apata:? Na: oko asiyamaye na:tapo opa dla ka:dle yuye asiyama dimi isikimi atlamsela:ta na: dla siyele hampuluwe kokopo.

<sup>19</sup> Epedeme na:ta oko hamsela: dulu hema opata na:ye dokopala depo pahalasema. Amasiyama epapele tope na:tapo opa hapulomaye Keliso hala dla elemtlowedeme yia: yu dla salladepo sela:po. <sup>20</sup> Epapedeme na:ta Yu so mate halemama Yu sota ha:ha:mde kokoye natipame na: mape yia: some halemduwapo, na:tapo yia:ye eleme Yesu hala dla puluwedeme. Epele dulu dla yia:ta Mosesta aiyalma hatitimale dulu dla ha:ha:lali asiyama na: tlo aiyalma dulu edla pahalana. Amasiyama na:tapo yia:ye Yesu hala dla eleme puluwedeme na: mape yia: some aiyalma dulu dla hallalo oplami some halemduwapo. <sup>21</sup> Epame na:tapo po-Yu so mate halale dulu dla mepamduwapo. Yia:ye Mosesta aiyalma hatitimale kokoye yeitamana. Epedeme na: mape yia: mate mepo aiyalma koko yeliyele oplami some halemduwapo, yia:ye Keliso hala dla eleme puluwedeme. Amasiyama epapele dulu dla na:ye ikadepe aiyalma pa:le dulu dla pahalasema. Adipalati, na: mape Keliso aiyalma dolumalalo halapo. <sup>22</sup> Epame na:tapo mikadepe dle dulu dla pase kokalalimale so mate halale dulu dla na: mape yia: some halemduwapo, yia:ye Keliso hala dla eleme puluwedeme. Epapedeme na:tapo opa hapuloma yilo koko hapuloma iye halomsela:mduwapo, na:ta yia:ye Keliso hala dla eleme puluwedeme. <sup>23</sup> Epapedeme na:ta ka:dle yu yilo koko hapuloma iye halomhalapo. Adipalati, na: ma solotama, ka:dle yuta hampua koko ka:dle e halowedeme.

<sup>24</sup> Ame adipalati, wua: malamaiya, opa hapulomata ullumtale dulu dla isikimi oplami hatlota tla:mtapame asiyamaye hamdepo. Epapedeme wua: mape, wua:ta ullumtale dulu dla isikimi tla:mtlowa depo malamale mate ullumtaiya. <sup>25</sup> Epedeme ullalo sotapo ulluwedeme ka:yapa atotomala natili dulu dla ha:ha:mama oko pato hamdepo, pakasiya pa:lalo asiyama alisisiye halowedeme. Amasiyama dita ullumta iye kokó elepo ellalo asiyama alisisi halowedeme apopo. <sup>26</sup> Epapedeme na:tapo isikimi yeliyepo pokukulumtasema. Amasiyama na:tapo na:ta tlowe api itapuye woloma ma-natipame kukulumtapo. Epame na:tapo opokoko sillidle dla siyomalalo oplami some halemama na: kosele mate woloma opokoko sillidle dla siyomhalapo. <sup>27</sup> Epapedeme opa opi dla God yu atlalo oplami na: mape alila hapuloma dulu dla na: motoye keketiyamhalapo, mosukulu alila dla na:ta asiyama haloweye batalimalala depame.

## 10

### *Isael so dla woyamale kokotapo dia: dla imale koko some halapo*

<sup>1</sup> Mikadepe dle so namkadulo, na: ma posolotamasema, wua:tapo di mamadulo dla wowoyamuwa koko woweliloweye. Yia:tapo Isip mo tle alikili dla woyapame tamallati Godtapo wualaye hamiwapo, yia: eleme telepo depame. Epame ya:tapo yia:ye eleme kaula pato duka gladepame ta:la sekelle tle seme dla uluwapo. <sup>2</sup> Epame yia:tapo wuala

dolumtamalale koko mate epo kaula dulu tle tamalale koko mateta yia:ye Moses ya: alotle tlalo so duwapo. <sup>3-4</sup> Epame yia:ta hapulomatapo yimkata Soko daya mate epo Soko yú mate dlomuwapo. Yú eye yia: mate tale Soko ewala dulu tle malemhaluwapo. Soko ewala eye Kelisopo. <sup>5</sup> Amasiyama epapele tlope Godtapo yia: dla posiyemhalana. Epapedeme yia:tapo dalupa dulu dla me-siyamama palimpuwapo.

<sup>6</sup> Epapedeme koko hapuloma itapo dia: dla imapo, ditapo yia:ta batalimale koko halomha:ha:le eye ma dita halomolowe dla solotamalala depame. <sup>7</sup> Epame ma ditapo yia:ta biskapa god dla sisiyemha:ha:uwa epapalala depame. Adipalati, God yu bukata epo atlapo,

“Yia:tapo biskapa god dla sisiyemama daya mate yú mate dlomolowedeme popa:uwapo. Epame ma sillipame siyaluwapo,” depo.

<sup>8</sup> Epame yia:tapo wola: mate epo opa mate uhalomha:ha:le kokoye ma dita po-halomha:ha:lowa. Adipalati, yia:tapo epamha:ha:le koko tle 23,000 opatapo alila hatlo dla paliwapo. <sup>9</sup> Epame wua: mape Kelisoye elemala natimiya. Adipalati, yia:ta epapalati yia:ye ilamata yiyelemama palimpuwapo. <sup>10</sup> Epame di poka:dena, isikimi alli mate ha:ha:mama yu balemha:ha:loweye. Adipalati, yia:ta epamha:ha:lali Godtapo yia: watle polowe hampulalo banakakaye yia: dla tulune duwapo, yia: bobtalimelepo depame.

<sup>11</sup> Epapedeme koko itapo yia: dla wowoyamuwapo, dia:ye imelepo depame. Epammama di ta:lamo mosukulu mateka:pi dla ha:ha:lalo so dla molo atlale yu iye hatitimuwapo, ditapo malaha:ha:lepo depame. <sup>12</sup> Epapedeme oplami antapo ya:skamu ya:ye kokalepo halemama batalimale koko dulu dla potulusemde dlepiye, ya:ye wolomape. Adipalati, ya: mape batalimale koko medla tullala. <sup>13</sup> Epapedeme wua: dla elemala natili koko hapulomata pumhalaye, hatlo mepapeletapo ma opa opi hapuloma dla pumhalapo. Amasiyama Godtapo wua:ta itiyamale tla:mtale elemala natili kokoye yumhalapo. Epame ma wua:ta elemala natili koko dulu tle alikili dla woyamolowe apiye ya:ta imhalapo. Adipalati, ya:tapo woloma ka:dle koko siyapo tlo halalo halapo.

### *Yesu malamale daya depame epo matle biskapa god dla sisiyelowe koko*

<sup>14</sup> Epapedeme mikadepe dle so namkadulo, wua: biskapa god dla sisiyelowe koko tle alikili dla potaiya. <sup>15</sup> Wua:ye ka:depo momalamalalo so some ha:ha:lali na:tapo wua: dla yu iye atlema. Epapedeme muwolo yu i ya: dulu kokoye hukuliya. <sup>16</sup> Epapedeme dita Lod malamale daya dele dla ditapo isilako hapo siyele yu atlepame yú dlomdetapo dia:ye Yesu omali mate hatlope demdepo. Epame ditapo matle daya hauwokokomale halopo demdeta dia:ye Keliso moto mate hatlope demdepo. <sup>17</sup> Adipalati, ditapo daya hatlo hapame hukulupo dlomdetapo dita hapulomata Keliso moto dulu dla hatlope depo ha:ha: kokoye imdepo. <sup>18</sup> Epapedeme wua: ma Isael so kokoye malamaiya. God dla namkale dle alisisi hapili e dlomalalo so opa hapulomatapo namkale dle alisisi e ha:lalo tile mate hatlope demduwapo.

<sup>19</sup> Epapedeme biskapa god dla namkale dle alisisi hapiloweye ka:pita:? Hao. Epame biskapa godye ikadepe godta:? <sup>20</sup> Hao, biskapa godye pogod ikadepe. Epapedeme na:tapo ipo atlema, namkale dle alisisi biskapa god dla hapimdiye God ikadepe dla hapimama po-apesemde, amasiyama bataliya watle hapimama ammdemo. Epapedeme na: posolotamasema, wua:tapo epapele koko tle bataliya yimlala mate hatlope demha:ha:loweye. <sup>21</sup> Epapedeme wua: poka:dena, wua:tapo Lod malamale daya demama Lod isilako tle yú depo ma bataliya dla sisiyemama ya: isilako tle yú de demha:ha:loweye. Epame wua: ma poka:dena, wua:tapo Lod malamale daya depame matle bataliya dla sisiyemama ya: daya ma hapo de demha:ha:loweye. <sup>22</sup> Amasiyama dita epapele koko halomha:ha:lepiye, Lodta dia: dla elle himhallepe. Amasiyama epapele dulu dla dita itiyamale mate Lodta itiyamale mate po-ala:na. Adipalati, Lodta itiyamaleta ma-a:ma tla:mtame halapo.



*Yimkadulo dla hete kustamtlalo alisisi some ha:ha:miya*

<sup>23</sup> Epapedeme wua: dulu dla opitapo epo atlemdepo, “Dia: dla koko hapuloma halomolowe dla aiyalma hawa,” demdepo. Amasiyama epapele tlope wua:ta koko opi halomha:ha:ta wua:ta mikadepe dle dulu dla kokalepo ha:ha:lepo depame pogadesemde. <sup>24</sup> Epame wua: ase wua:ta solotamale koko tlo halomha:ha:miya. Amasiyama wua: amkadulo mikadepe dle so gademama yia:ta solotamale koko ma halomha:ha:iya.

<sup>25</sup> Epapedeme wua: alinepi mo mani mate halomalalo aya dla tame mo halowedeme isikimi me-halopo deiya. Amasiyama wua: mo e halomolowedeme, mo eye biskapa god dla namkale dle alisisi halopita: depame yia: dla atlanatimiya. <sup>26</sup> Epedeme ka:dena, wua:tapo dlowe alisisi hapuloma isikimi me-halopo dlomha:ha:loweye. Adipalati, “ta:lamo pato i mate epo dulu dla alisisi hapuloma hutiyete mateye Lod tetepo.”

<sup>27</sup> Epame pomikadepe dle oplamitapo wua:ye eleme tame ya: aya dla daya dlowa dlepiye, isikimi ya: mate ya: aya dla tame dayaye me-deiya. Epame edla ya:tapo wua: watle daya hapilati asiyama wua:ta daya e dlowedeme biskapa god dla ma-hamita:e depame ya:ye atlanatimiya. Isikimi me-deiya. Adipalati, wua:ta epapeta batalimale koko hale pohasema. <sup>28</sup> Amasiyama wua:tapo daya dlompopa:liti oplami haleta puame wua: watle atlemama, “wua:ta dlompopa: daya eye biskapa god dla namkale dle alisisi ma-hamina, epedeme dlomiya,” dlepiye, wua: epalati ya: malamama daya eye ma dlomiya. <sup>29</sup> Amasiyama wua: tlo wua:malamana, wua:ta daya e dloweye. Amasiyama oplami eta malamaletapo daya e dloweye aiyalma dlepe.

Epedeme na:ta ka:dena dlalo koko dla ma oplami haleta aiyalma hatitimolowe ka:deta:? <sup>30</sup> Epame na:ta siyele mate ma dlalo alisisiye ma oplami haletapo aiyalma himilowe ka:deta:? <sup>31</sup> Amasiyama wua: wolomape! Yimkadulo malamale mate koko halomha:ha:iya. Adipalati, wua:ta daya demde mate epo yú demde mate epo koko hapuloma halomde matetapo God hi di dla ta:dlowe tlo ka:pi. <sup>32</sup> Epammama wua:ta koko halomdeta Yu so dla epo po-Yu so dla epo mikadepe dle so dla hete kustamtlalo alisisi some hala demiya. <sup>33</sup> Epedeme na: mape mepamdepo. Na:ta koko halomdetapo opa opi dla yia: hete kustamtlalo alisisi some halloweye posolotamasemde. Ipapele koko dulu dla na: isikimi na:ta solotamale koko halowedeme po-aposema. Amasiyama opa opi gademama yia:ta solotamale koko tlo halowedeme amma, yia:tapo pasakalo gadle halepo depame.

## 11

<sup>1</sup> Na:tapo Keliso koko natipame dolumtaye, wua: ma epammama na: koko natipo dolumaiya.

*God dla siyele hamilowedeme dokopala bopudlowe koko*

<sup>2</sup> Epedeme wua:ta na:ye sikemte malaha:ha:mama na:ta wua: dla imuwa kokoye woloma ka:pi dolumha:ha:la natipame wua: dla sikemte siyema.

<sup>3</sup> Amasiyama wua: malamaiya, Kelisotapo oplamiye dokopala depo halapo. Epalati asiyama oplamitapo ya: a:yaye dokopala depo halapo. Epame Keliso mape ya: dokopala oplamiye Godta halapo. <sup>4</sup> Epapedeme oplami antapo opa inoma dali dla inoma sumolowedeme epo God tle yu hapame atlowedeme ya: dokopalaye bopudepo hale-mama apelepiye, ya:ye ya: dokopala oplami Keliso dla wota:le hamipo. <sup>5</sup> Epame a:ya antapo inoma sumolowedeme epo God tle yu hapame atlowedeme ya: dokopalaye pobopudlalo apelepiye, ya:tapo ya:wolali dla wota:le hamipo. Adipalati, a:yatapo ya: dokopala pobopudlalo wekelowe koko mate epo kokosase tamolowe koko mate yia: dulu kokoye pomeyelo. <sup>6</sup> Epedeme a:yatapo ya: dokopala bopudlowe allipiye, ya: ka:dena, isikimi ya: kokosase tlo tamelepe. Amasiyama a:yata kokosase tamolowe wota:lepiye, ya: ka:dena, isikimi ya: dokopala tlo bopudloweye.

<sup>7</sup> Amasiyama oplamitapo ya: dokopalaye pobopudlowa. Adipalati, ya:tapo God mila:pi mate epo ya:ta hela:dle mateye ya: tle botomastamhalapo. Amasiyama a:ya tle oplami hiye di dla ta:demhalapo. <sup>8</sup> Adipalati, oplamiye a:ya tle pomita:pena, asiyama a:ya tlo oplami tle mita:puwapo. <sup>9</sup> Epame oplamiye a:ya yilo pomita:pena, asiyama a:ya tlope oplami yilo mita:puwapo. <sup>10</sup> Epapele koko tle a:yatapo ya:ta ya:wolalita itiyamale isili tle halema dle kokoye banakaka so dla imama ya: dokopala bopudlowe tlo ka:pipo.

<sup>11</sup> Amasiyama Lod dulu dla a:yatapo oplami dla koko pato halapo. Epame asiyama oplami mape a:ya dla koko pato halapo. <sup>12</sup> Adipalati, ka:yapa a:yaye oplami tle mita:puwapo. Epapele tlope ma wola:tapo opaye hohomha:ha:po. Amasiyama Godtapo koko hapuloma iye sitali halapo.

<sup>13</sup> Epedeme wua: malamaiya, ka:deta:, a:yatapo inoma sumala tamama ya: dokopala pobopudlalo tloweye? <sup>14</sup> Oplamitapo kokosase seselemalli mate halemama ya:skamu ya: dla wota:le hamimdepo. <sup>15</sup> Amasiyama a:ya dla ya: kokosasete seselemallitapo ya: dla siyele hamimdepo. Epame kokosase seselemalli etapo ya:skamu ya: bopudlepo depame ya: dla hamiwapo. <sup>16</sup> Epedeme God ya: opa hapulomatapo koko hatlo iye dolumha:ha:po. Epedeme oplami haletapo koko hema na: mate yu topulolloweye po-ala:na.

### *Lod malamale daya dele*

<sup>17</sup> Na: yu iye wua: dla atlemama posiyesema. Adipalati, wua:ta yimkata alupo inoma sumha:ha: kokotapo wuskamu wua:ye pogadesema. <sup>18</sup> Adipalati, wua:ta alupo inoma sumde dulu dla gladle ela kokoye na: me-dalepame koko eye mikadepe mle duwa. <sup>19</sup> Amasiyama wua: dulu dla hukulli ela koko tle wua:tapo woloma ikadepe api tiyama tle ha:ha: so malanati epame batalimale api tiyama tle ha:ha: so ma malanati depo.

<sup>20</sup> Epapedeme wua:ta yimkata puame alupo Lod malamale daya demdiye, woloma ikadepe Lod malamale daya demama po-aposemde. <sup>21</sup> Adipalati, wua:ta yimkata alupo daya dlomde dulu dla wua: woloma hapuloma yimkatata ma alupo gudlati edla daya podeseemde. Amasiyama opi tatile daya mo-dlomyelati opitapo ala me-alumhalemdepo. Epammama wua: dulu dla opita daya dimi pumulale soye pogadesemde. Epapele koko tle opitapo daya teta:le mate popa:liti opitapo daya sikemte susukalle mate popa:mdepo. <sup>22</sup> Epapalala depame wua: ka:dena, mo-wua: aya ikadepe dla daya mo-dlopame ma Lod malamale daya dele dla puluwe ka:pi. Adipalati, wua:ta yimkata alupo daya dele dulu dla daya pa:talo so pogadlalo wekemde kokotapo yia: dla wota:le hampumama mo-wua: sos dla mape wota:le hampumdepo. Epapedeme na: ma apa kokoye wua: dla atlepa:? Wua:ta malamaleta koko hema na:ye siyema dema:? Hao. Na: posiyesema.

<sup>23-24</sup> Epapedeme na:tapo Lod tle imale koko hauwaye ma wua: dla hamima. Lod Yesu opahale so do tama dla homellowe utula:la oloma edla ya:tapo daya hapo siyele yu atlepo gudepame hauwokokopo halemama epo atluwapo, "Iye na: motopo, wua: yilo hamipo. Epedeme wua: na: malamale mate ha:ha:mama daya iye dlomha:ha:lepe," duwapo. <sup>25</sup> Epame daya dele mogudlati Yesu ma isilako hapame epo atluwapo, "Isilako iye Godta na: omali tle yu itiyapo himili amko ipo. Wua:tapo isilako itle yú dlomha:ha:mama na: malamale mate dlomha:ha:lepe," duwapo. <sup>26</sup> Epedeme wua:tapo daya i mate epo yú i mate dlomha:ha:mama Yesuta powale kokoye botomas-tamha:ha:lepe, ya:ta puluwe alila dla omtamama.

<sup>27</sup> Epapedeme oplami antapo sosoka:lli koko mate daya i hapo depame ma Lod ya: isilako tle yú delepiye, ya:tapo Lod ya: moto mate epo ya: omali mate dla batalimale koko ma-hapo. <sup>28</sup> Epapedeme oplamitapo ka:yapa ya: tatile ya:skamu ya: kokoye totapame alotle daya depo matle Lod ya: isilako tle yú delepe. <sup>29</sup> Adipalati, ya:tapo Yesuta powale kokoye woloma pomalamalalo daya mate yú mate delepiye ya:skamu ya: dla koko

gladleye hampuapo. <sup>30</sup> Epapele koko tle wua: dulu dla mo-pasatale sepeletapo hopeyali-mama esusulumale mate ha:ha:po. Epame opitapo mo-paliwapo. <sup>31</sup> Amasiyama ditapo di kokoye woloma ikadepe api tle totamha:ha:lepiye, eta ditapo Godta kasilamale isili tle pohaha:lowa. <sup>32</sup> Amasiyama Lodtapo di koko glademama di posalemhalapo, ditapo ta:la so mate Dlapa mo dla tlala depame.

<sup>33</sup> Epapedeme mikadepe dle so namkadulo, wua:tapo Lod malamale daya dlowedeme woloma wua: amkadulota ma-alupo gudlati edla yimkata daya de demha:ha:iya. <sup>34</sup> Epele dulu dla oplami antapo daya ta:lepiye, ya: ka:dena, ya: tatile ya: aya dla daya depame ma yimkata alumale dla pulupe. Adipalati, wua:tapo ma yimkata alupo daya de demha:ha: koko dla Lodta wua: koko gladlala depame. Koko opiye na:tapo alotle wua: hala dla puame ka:ka:dlowepo.

## 12

### *Sokota isikimi namkale dle tle hapimhala koko*

<sup>1</sup> Mikadepe dle so namkadulo, na: ma posolotamasema, wua:tapo Sokota isikimi namkale dle tle hapimhala koko woloma pomalamalalo yeitapo ha:ha:loweye. <sup>2</sup> Wua: ka:yapa ala pomikadepe dlalo ha:ha:lati wua:ye biskapa god dota mita:ple dla mikadepe dlepo depame elemsiyamuwa kokoye malamaiya. Epele dulu dla biskapa god iwoloye yuhalowe poyia:malamana. <sup>3</sup> Epedeme na: wua: dla ikadepe koko atlema. God ya: Sokota semsela:lalo oplamitapo ma Yesu hi dla putlopo atloweye po-ala:na. Epame isikimi God ya: Sokota semsela:lalo oplamitapo Yesuye Lodpo dloweye ala:na.

<sup>4</sup> Sokota isikimi namkale dle tle hapimhala koko meyelope meyelope dleye opa dla hapimhalapo. Amasiyama Soko hatlo eta hapimhalapo. <sup>5</sup> Epame sos dulu dla oko meyelope meyelope dleye me-hutiyepo, amasiyama oko hapuloma etle Lod hatlo yilo oko hamdepo. <sup>6</sup> Epame itiyamale koko meyelope meyelope dle ma me-hutiyepo. Amasiyama God hatlotapo itiyamale eye dita hapuloma dla hapilalo halapo.

<sup>7</sup> Hela:dle Sokotapo sosta ta:lepo depame koko meyelope meyelope dleye mikadepe dle so dla hapimhalapo. <sup>8</sup> Soko hatlotapo oplami hale dla ka:depo malamale mate yu atlowe itiyamaleye hamimdepo. Epame ma Soko hatlo meta oplami hale dla malamale pato hamimdepo. <sup>9</sup> Epame ma Soko hatlo meta oplami hale dla mikadepe dle itiyamaleye hamimdepo. Epame ma Soko hatlo meta oplami hale dla esusulumale so ka:ka:dlowe itiyamaleye hamimdepo. <sup>10</sup> Epame matle Soko hatlo meta oplami hale dla ulugiyemale koko halomolowe itiyamaleye hamimdepo. Epame Soko hatlo meta oplami hale dla God tle yu hapame molo atlowe itiyamaleye hamimdepo. Epame ma Soko hatlo meta oplami hale dla God ya: Soko mate epo soko opi mate malanatilowe itiyamaleye hamimdepo. Epame ma Soko hatlo meta oplami hale dla ulugiyemale yu mate yukamolowe itiyamaleye hamimdepo. Epame ma Soko hatlo meta oplami hale dla ulugiyemale yu mate yukamale ya: dulu koko woloma hatostepo atlowe malamal-eye hamimdepo. <sup>11</sup> Amasiyama koko hapuloma iye Soko hatlotapo hapimhalemama woloma ya:ta solotamale tle opa dla alemhalapo.

### *Moto hatlope, u-ulalimale tlo pasatale*

<sup>12</sup> Keliso motoye dali moto hatlotapo dlo tlo pasatale halemndiye epapele some halapo. Epele dulu dla moto tlo hatlopepo, asiyama ya: dla u-ulalimale dlo tlo sikemte pasatana. <sup>13</sup> Epedeme dita hapulomaye Keliso moto hatlope dulu dla u-ulalimale meyelope meyelope depo ha:ha:po. Epele dulu dla opi dia:ye Yu sopo, epalati opiye po-Yu sopo, epalati opiye asiyama pa:le dla oko halomalalo sopo, epalati opiye yia: dokopala sopo. Amasiyama dita yú tutula:uwa oloma edla Hela:dle Soko hatlope tle dita hapulomaye moto hatlope dla ma gugoudlalimuwapo. Epame Hela:dle Sokoye dia: watle yú some olostlati dita hapulomatapo Hela:dle Soko eye mo-dlomuwapo.

<sup>14</sup> Epedeme moto patoye ulumale hatlota hallati pohalasema. Amasiyama u-ulalimale hapulomata halemama moto hatlo pato tipo halapo. <sup>15</sup> Epele dulu dla heteta ipo atellepe, “Na:ye podo, epapedeme na:tapo moto pato ipi pohalasema,” dlepe. Amasiyama heteta epo atla kokota ya:ta moto hatlo dla ulupo halaye medla ga:dedepa:? Hao, pe-epapolowa. <sup>16</sup> Epame molo ma mepapena. Ya:ta atlemama, “Na:ye po-inoma, epedeme na:tapo moto pato ipi pohalasema,” dlepe. Amasiyama molota epo atla kokota ya:ta moto hatlo dla ulupo halaye medla ga:dedepa:? Hao, pe-epapolowa. <sup>17</sup> Epele dulu dla moto hatlo patoye isikimi inoma siyapota halematiye, asiyama dallowe tlo adipo dalemha:ha:lemo? Epame moto hatlo patoye isikimi molo siyapota halematiye, asiyama ullu pamalalo muye hadima hallemo? <sup>18</sup> Amasiyama Godtapo meyelo malamale tle solotapame moto dla u-ulalimale meyelo meyelo dleye miyelo ha:ha:lowe mo dla u-ulalimuwapo. <sup>19</sup> Epedeme moto dla u-ulalimale hapuloma meyelo meyelo dle ha:ha:ta ma isikimi mila:pi hatlope depo halematiye, asiyama moto ikadepe pato iye pohalema. <sup>20</sup> Epapedeme ya:tapo moto hatlo dulu dla u-ulalimale hapuloma meyelo meyelo dleye mo-mimita:puwapo. Epapele koko tle yia:ta hapulomatapo moto hatlo pato tipo ha:ha:po.

<sup>21</sup> Epapele koko tle inomatapo do watle atlemama, “Na: wa: posolotamasema,” dloweye poka:dena. Epalati asiyama dokopalata hete watle atlemama, “Na: wa: posolotamasema,” dloweye poka:dena. <sup>22</sup> Amasiyama moto hatlo dla u-ulalimale opi pase sikemte i-itiamale mate ha:ha:tapo moto dla koko pato depo ha:ha:po. <sup>23</sup> Epame ditapo di moto dla u-ulalimale yimlala opi dita haliyamale dla ha:ha:lowe tlo pase ka:ka:pi dlaloye, ma ditapo woloma ka:pi natimama totowalimdepo. <sup>24</sup> Amasiyama u-ulalimale opi haliyamale dla ha:ha:laloye ditapo pase totowalisemde. Epedeme Godtapo u-ulalimale opi dita pase ka:ka:pi dlaloye koko patoto dla hatitimuwapo. <sup>25</sup> Godtapo ipo dinapuwapo, moto hatlo dulu dla hukulli pa:po ha:ha:lepo depame. Epame u-ulalimale hapulomatapo ya:mkale asiyama sikemte malama asiyama sikemte malama demha:ha:lepo depame. <sup>26</sup> Epapedeme moto hatlo dla ulumale hatlota wotiyalle natilipiye, u-ulalimale opi hapulomatapo yimkata ya: mate wotiyalle ipi eye halomdepo. Epame ma ulumale hatlota siyele halepiye, u-ulalimale opi hapulomatapo yimkata ya: mate siyele halomdepo.

<sup>27</sup> Mikadepe dle so hapuloma wua:ye Keliso ya: motopo. Epapedeme wua:ta hatlope hatlope dle hapulomatapo ya: dla u-ulalipo ha:ha:po. <sup>28</sup> Epapedeme Godtapo wua: dulu dla ka:yapa opa opi dla Taiya dle okoye ma-hapiwapo. Epame ma medla opa opi dla God tle yu hapame molo atlamalalo okoye hapiwapo. Epame ma medla opa opi dla God yu atlowe okoye hapiwapo. Epame ma opa opi dla ulugiyemale koko halowe itiyamaleye hapiwapo. Epame opa opi dla esusulumale so ka:ka:dlowe itiyamaleye hapiwapo. Epame opa opi dla yimkadulo gagadlowe itiyamaleye hapiwapo. Epame opa opi dla sos omha:ha:lowe oko hapiwapo. Epame ma opa opi dla ulugiyemale yu yuhalowe itiyamaleye hapiwapo. <sup>29</sup> Epapele dulu dla opa hapulomatapo Taiya dle so ha:ha:ma:? Epame opa hapulomatapo God tle yu hapame molo atlamalalo so ha:ha:ma:? Epame opa hapulomatapo God yu atlalo so ha:ha:ma:? Epame opa hapulomatapo ulugiye-male koko halomalalo so ha:ha:ma:? <sup>30</sup> Epame opa hapulomatapo esusulumale so ka:ka:dlalo ha:ha:ma:? Epame opa hapulomatapo ulugiyemale yu yuhalalo ha:ha:ma:? Epame opa hapulomatapo ya: dulu kokoye ma woloma hatostepo atlamalalo ha:ha:ma:?  
<sup>31</sup> Amasiyama Sokota wua: dla isikimi namkale dle tle me-hapimhala dulu dla woloma ka:ka:dle tlo halomolowe dla sikemte solotamale pato himme ha:ha:iya.

## 13

*Ya:mkale bokotiyapo malamolowe koko*

Wata na:tapo wua: watle sikemte ka:dle apiye nati-ima.

<sup>1</sup> Epapedeme na:ye opata yuhalalo yu hapuloma mate epame ma banakaka sota yuhalalo yu hapuloma mate malastepo halemama asiyama ya:mkale bokotiyapo malamale koko tlo na: dla hawa hallepiye, na:ye isikimi koko pa:le yu siyapota sisikalemsela:mama apopo. <sup>2</sup> Epame na: dla God tle yu hapame molo atlowe itiyamale mate epo hemele koko hapuloma mate sikemte malastepo halemama asiyama na: dla ya:mkale bokotiyapo malamale koko tlo hawa hallepiye, na:ye koko pa:le oplamipo. Epame na: dla ka:depo malamale mate epo mikadepe dle kokalle koko tle tamali patoto alikili dla dodokati-molowe itiyamale mate hapo halemama asiyama ya:mkale bokotiyapo malamale koko tlo pa:po hallepiye, na:ye koko pa:le oplamipo. <sup>3</sup> Epame na:tapo na: dla hutiyelalo alisisi hapulomaye alisisi pa:talo so dla hapipame ma yia: dla pobokotiyapo malamalalo hallepiye, na: koko pa:le oplamipo. Epame ka:dle koko yilo na:tapo na: motoye dlapa mistlowe dla himipame ma na: dla ya:mkale bokotiyapo malamolowe pa:le hallepiye, na: ikadepe koko pa:le oplamipo.

<sup>4</sup> Ya:mkale bokotiyapo malamolowe kokoye woloma sadepo hallowe kokopo, epame woloma namkale depo hallowe kokopo. Ya:mkale bokotiyapo malamolowe koko dulu dla ya:mkale ellewe kokoye pe-elasema. Epame ya:skamu ya: tlo di dla hamhetlowe koko mate epo ya:skamu pepemolowe koko mateye pohutiyesema. <sup>5</sup> Epame ya:mkale dla alli hamilowe koko mate epo ya:skamu ya: tlo malamolowe koko mate epo hapele siyaladlowe koko mate pohutiyesema. Epame ya:mkale bokotiyapo malamolowe kokotapo batalimale hapulomaye kokó pomalahallalo isikimi wowelimhalapo. <sup>6</sup> Epame ya:mkale bokotiyapo malamolowe kokotapo batalimale koko dla posiyemhalasema. Amasiyama woloma ikadepe koko dla siyemhalapo. <sup>7</sup> Epame ya:mkale bokotiyapo malamolowe kokotapo koko hapuloma dla sukalemama po-alimhalasema. Epame ya:mkale bokotiyapo malamolowe kokotapo God dla hitahalemdepo. Epame Godta pasakalo hamilowe alilata puluwe dla sadle mate omhalemdepo. Epame koko hapuloma dulu dla kokalepo hallowe kokoye hampumdepo.

<sup>8</sup> Ya:mkale bokotiyapo malamolowe koko itapo gudlowe sukulu pa:le hallepe. Amasiyama dulu edla God tle yu hapame molo atlamde kokota pa:lepe. Epame ulugiyemale yu mate yuhalowe koko mate epo Soko tle ka:depo malamale halowe koko mate ma medla pa:lepe. <sup>9</sup> Adipalati, dia: dla hutiyé ka:depo malamale mate epo God tle yu hapame molo atlamde koko mateye ala woloma po-ala:po halasema. <sup>10</sup> Amasiyama woloma ikadepe ala:po pustale kokota woyamelepiye, asiyama woloma po-ala:lalo wekele kokotapo pa:lepe. <sup>11</sup> Epame na:ta maseyemala haluwa oloma edla na:tapo yimka:sikilita atlamalalo yuye yukamsela:uwapo. Epame oloma edla na:tapo maseyemalata malamdiye epamhaluwapo. Amasiyama na:ta wata ikadepe mo-oplami duwa oloma edla na: ma maseyemala some koko halomhalloweye memeluwapo. <sup>12</sup> Wata oloma hema di inomatapo yú ka:le dulu dla natilati amtutuwalemdiye, epapele some halapo. Amasiyama alotle di inomatapo ma woloma gilistlati di ma woloma ka:depo natilipe. Epame wata oloma hema ditapo koko opi tlo malastepo ha:ha:po, amasiyama alotle Godtapo di koko malastepo halaye epammama di mape koko hapulomaye malastlepe.

<sup>13</sup> Epapedeme mikadepe dle koko mate epo koko dla dalemhalemama omhalowe koko mate epame ya:mkale bokotiyapo malamolowe koko matetapo kokó mehutiyelepe. Amasiyama dapahatlope koko dulu hema koko ikadepe sikemte patoye ya:mkale bokotiyapo malamolowe kokopo.

## 14

*Ulugiyemale yu mate yuhalowe koko mate epo God tle yu hapame molo atlowe koko mate*



<sup>1</sup> Epedeme wua: ya:mkale bokotiyapo malamolowe koko dolumaiya. Epame God tle yu hapame molo atlamolowe koko tlo halowedeme sikemte solotamha:ha:iya. Epame Sokota isikimi hapimhala koko opi halomolowe ma solotamale mate omha:ha:iya. <sup>2</sup> Adipalati, isikimi ulugiyemale yuta yukamalalo oplamiye ya: opa opi dla yu potlasemde. Amasiyama ya:tapo isikimi God dla yukamama ammdepo. Epame hemele hutiyeye kokoye Soko tle atlemama ammdepo. Epedeme oplami haletapo ya:ta yukama ya: dulu kokoye pomaladalesemde. <sup>3</sup> Amasiyama God tle yu hapame molo atlamalalo oplamitapo opata woloma ka:depo itiyamale mate ha:ha:lepo depame gadle yu mate opa dla atlamhalemdepo. <sup>4</sup> Epele dulu dla ulugiyemale yu mate yukamalalo oplamitapo isikimi ya:skamu gademdepo. Amasiyama God tle yu hapame molo atlalo oplamitapo ya:ta molo atlale koko mate mikadepe dle so hapulomaye gademdepo.

<sup>5</sup> Na: pase solotamasema, wua:ta hapulomatapo ulugiyemale yu mate yuhamyelepo depame. Amasiyama na:ta sikemte solotamaye, wua:ta hapulomatapo God tle yu hapame molo atlamalalo so depo ha:ha:lepo depame. Adipalati, God tle yu hapame molo atlalo oplamitapo ulugiyemale yu mate yukamalalo oplamiye tla:mtame halapo. Epapele tlope ulugiyemale yu mate yukamalalo oplamitapo ya:ta ulugiyemale yu mate yukamde ya: dulu koko ma opa hapulomata dallepo depame hatostepo atlalo oplami hallepiye, eta ya: mape God tle yu hapame molo atlalo oplami mate ala:po hallepe.

<sup>6</sup> Epedeme mikadepe dle so namkadulo, na:ta puame wua:ta ha:ha: dla ulugiyemale yu mate yukamsela:lepiye, na: adipo wua: gadepa:? Amasiyama na:tapo wua: hala dla puame na:ta God tle yu halëye wua: dla woloma imelepiye, eta na:ta wua:ye ka:pi gademama apelepe. <sup>7</sup> Adipalati, alisisi ipapele sepeleye pitikako mate epo woiyo mate woloma poyulalo wekelepiye, asiyama opata sala solowe edleye adipo himpa:? <sup>8</sup> Epame opahale dele dulu dla hulu mape woloma posisilamalalo wekelepiye, antapo opahale koko dla dinapopa:?

<sup>9</sup> Epedeme wua: ma epapena. Wua:tapo opata pomalamalalo wekele yu mate yuhalepiye, yia: asiyama wua: yuye adipo maladalepa:? <sup>10</sup> Epedeme ta:lamo pato hema yu meyelope meyelope dle ma me-hutiyepo. Epapele tlope yu hapuloma dulu hema yeitamale so dla ulugiyemale yu demdepo. <sup>11</sup> Epedeme oplami haletapo isikimi ya: yu mate na: dla yukamelepiye, na: adipo ya: yuye maladalepa:? Epapele koko tle na:tapo ya: yu yeliyemama oplami e watle yu meyelope oplami dlepe. Epalati asiyama ya: mape na: watle yu meyelope oplami dlepe. <sup>12</sup> Epapedeme ipapele koko mape wua: dulu dla me-elapo. Epapele dulu dla wua: Sokota hapili kokoye sikemte solotamha:ha:po. Epapedeme wua: asiyama sosta ta:lepo depame Sokota hapili kokoye sikemte totamha:ha:iya.

<sup>13</sup> Epedeme ka:dena, ulugiyemale yu mate yukamalalo oplamitapo matle Godta ya: watle ya:ta ulugiyemale yu mate yukamhala ya: dulu koko woloma hatostepo atlowe malamaleyeye hamilipo depame inoma sumale himme hallepe. <sup>14</sup> Adipalati, na:tapo ulugiyemale yu mate God dla inoma sumelepiye, na: soko mape God dla inoma sumelepe. Amasiyama na:ta malamale tlo woloma pohatostlowa. <sup>15</sup> Epapedeme na: apa koko hapa:? Na: ka:dena, ulugiyemale yu mate inoma suma epo na: yu ikadepe mate inoma suma dloweye. Epammama na:tapo ulugiyemale yu mate siyele sala doluma epo na: yu ikadepe mate siyele sala doluma dloweye. <sup>16</sup> Adipalati, wa:tapo ulugiyemale yu mate God dla siyele ta:demama inoma sumelepiye, asiyama yu yeliyele oplamitapo wa:ta inoma sumale yuta tame gudle oloma dla ya: adipo dalepo mogudepo depa:? Adipalati, ya:ye poya:malamana, wa:ta atla kokoye. <sup>17</sup> Amasiyama pona:malamana, wa: api ka:dle tle God dla siyele ta:demhalemama apeyo. Epapele tlope asiyama oplami hale eye pogadesema.

<sup>18</sup> Na: God dla siyele yu atlema. Adipalati, ulugiyemale yu yuhalë dulu dla na:tapo wua:ta hapulomaye ma-tla:mtame halapo. <sup>19</sup> Amasiyama na:ta mikadepe dle so

imolowedeme isikimi yia:ta malamale yu mate imolowe tlo ka:pi. Asiyama yu ulugiyemale mate imolowe poka:dena.

<sup>20</sup> Epapedeme mikadepe dle so namkadulo, wua: ase akimlalata malamale some ha:ha:miya. Amasiyama wua:ta malamale tle mo-opa dle some ha:ha:iya. Epame wua: bobtalimale koko halomolowe dla owayimlala some ha:ha:iya. Adipalati, yia: dla batalimale koko momalamolowe poyia:malamana.

<sup>21</sup> God yu buka dla yuta ipo elapo,  
“Lodta epo atlema,

‘Na:tapo yu meyelope meyelope dle yu halalo so mati tle na: opa Isael so dla yukamolowepo,

Amasiyama yia:tapo na: yuye woloma pomaladallowa.’ ”

<sup>22</sup> Epapedeme ulugiyemale yu mate yuhalowe pomikadepe dle so dla Godta koko gladlowe kokoye imolowe kokopo. Asiyama koko iye mikadepe dle so dla po-atlasema. Amasiyama God tle yu hapame molo atlowe kokoye mikadepe dle so dla imolowe kokopo, asiyama pomikadepe dle so dla po-atlasema. <sup>23</sup> Epedeme mikadepe dle so wua:tapo hatlo yimkata alupo ha:ha:mama ulugiyemale yu mate yuhamha:ha:lati asiyama pomikadepe dle sota wua: natipo wua:ye yiyilamsiyamama amma dlepe. <sup>24-25</sup> Amasiyama mikadepe dle so wua:tapo God tle yu hapame molo atlamha:ha:lati asiyama pomikadepe dle sotapo puame yu e dalle tle yiskamu yia: bobtalimaleye tlamelepe. Adipalati, wua: yutapo yia: kokoye glademama yia: dupa dulu dla hemele hutie batalimale koko hapulomaye ma haliyamale dla bobotimatimelepe. Epalati yia:tapo alumata akukulume God dla inoma sumpopa:mama epo atlamyelepe, “Ikadepe, Godye wua: mate halapo.”

*Mikadepe dle sota alupo inoma sumha:ha:lowe koko*

<sup>26</sup> Epapedeme mikadepe dle so namkadulo, wua:ta inoma sumha:ha:le dulu dla wua: ipapele koko tlo dolumha:ha:lowe ka:pi. Epedeme wua:ta yimkata inoma sumale dulu dla haleta sala dolumalalo hallepe. Epalati haleta God yu atlalo hallepe. Epalati haleta God tle amko kokota puaye bobotimatimalalo hallepe. Epalati ma haleta ulugiyemale yu mate yukamalalo hallepe. Epalati ma haleta yu e ya: dulu kokoye opa dla hatostepo atlalo hallepe. Epapele dulu dla koko meyelope meyelope dle hapuloma itapo wua:ta mikadepe dle kokota ta:lepo depo ammdopo. <sup>27</sup> Epedeme ka:dena, opata ulugiyemale yu mate yuhalë oloma dla isikimi opa dapiyamte o dapahatlopeta apolowe ka:pi. Epame yia:ta ulugiyemale yu mate epo yuhalë oloma edla woloma ya:mkale tle yukapo gudlati ma ya:mkaleta yukama dlowe ka:pi. Epame oplami haleta yu eye ma opa hapulomata dallepo depame hatostepo atlowe ka:pi. <sup>28</sup> Amasiyama ulugiyemale yu mate yuhalati yu e hatostepo atlalo oplami hawa hallepiye, ka:dena, epo ulugiyemale yu mate yukamalalo oplamita inoma sumale dulu dla yu dimi polomama ya:skamu ya: dla epo God dla yukamolowe tlo ka:pi.

<sup>29</sup> Epalati wua:ta inoma sumale dulu dla God tle yu hapame molo atlamalalo so alumale dulu dla isikimi opa dapiyamte o dapahatlope epapeleta God yu molo atlamha:ha:lowe tlo ka:pi. Epalati asiyama opitapo yia:ta atlama ya: dulu kokoye hukulalo so ha:ha:lepe. <sup>30</sup> Epame asiyama wua:ta popa: dulu dla pakasiyamalalo Godtapo oplami hale watle koko bobotimatimelepiye, ka:dena, ka:yapa yu atlalo oplami aseka hedepo pollowepe. <sup>31</sup> Epame ka:dena, wua:tapo God tle yu hapo atlamha:ha:mama ya:mkale tle atlepo gudlati ma ya:mkaleta atla demha:ha:lowe. Ipapele api tle wua:tapo opa hapulomaye woloma gadlowedeme imama apelepe. <sup>32</sup> Adipalati, God yu molo atlamalalo sotapo Sokota yia: dulu dla oko hamde kokoye miyelo omha:ha:po. <sup>33-34</sup> Adipalati, Godye kokota batalipo telepo depame sosoka:lipo mellalo Godta pohalase. Amasiyama ya:ye kokota woloma ka:depo telepo depame ka:depo dinapolalo Godta halapo.

Mo hapuloma dla sos popa:mta dulu dla ela koko e dolumama wola:tapo wua:ta inoma sumale dulu dla yu dimi sadle mate popa:lowe ka:pi. Adipalati, Mosesta aiyalma hatitimale mape hatlo mepo atlapo. <sup>35</sup> Epele dulu dla yia:tapo koko opi dlallowe solotamelepiye, yia: ka:dena, yia: aya dulu dla yia:wolalidulo watle atlanatilipe. Adipalati, a:yata inoma sumale dulu dla yu atloweye pase ka:dena.

<sup>36</sup> Epapedeme wua:tapo na:ta atlama koko iye dolumala allipiye, na: epalati asiyama ipo atlowepo, “Wua: tle God yuye kotiyamuwa? Epame God yuye isikimi hatlo wua: siyapo dla puwa?” dlowepo. <sup>37</sup> Epapedeme opa yiskamu yia:ye God tle yu hapame molo atlamalalo so dlalo mate epo yiskamu yia:ye Soko poposatilimale so dlalo mateta na:ta wua: dla yu ilipo hami iye Lod tle puma dlowe ka:pi. <sup>38</sup> Epapedeme wua: na: yu dalla alilalo oplami yuye dalemiya.

<sup>39</sup> Epapedeme mikadepe dle so namkadulo, wua: ka:dena, God tle yu hapame molo atlamsiyamolowe koko tlo sikemte totamaiya. Epammama ulugiyemale yu mate yuhalalo soye humatlemiya. <sup>40</sup> Amasiyama ka:dena, koko hapulomaye woloma ka:dle api tle halomha:ha:lowe ka:pi.

## 15

### *Kelisota wabasi tle ma sila:tili*

<sup>1</sup> Mikadepe dle so namkadulo, na:ta ka:yapa wua: dla ka:dle yu hame atlampulati wua:tapo dalepo mikadepe depame dulu medla kokalepo ha:ha:uwapo. Amasiyama wua:ta welilala depame na:tapo wata koko iye mamisika: wua: dla imolowama. <sup>2</sup> Epame wua:tapo na:ta wua: dla ka:dle yu atlamuwa koko hema sikemte kokata hamame ha:ha:lepiye, etapo wua: pasakaloye gadlepe. Amasiyama wua:ta matle biskapa koko imale dla mikadepe dlepiye, eta wua: pasakalo pogadlowa.

<sup>3</sup> Na:tapo ka:yapa dalepame hamuwa kokoye ma na:tapo wua: dla atlamuwapo. Adipalati, koko iye pta pato. Eye Kelisotapo di bobtalimale yilo pouwapo, God yu bukata atla e dolumama. <sup>4</sup> Epame God yu bukata atla e dolumama ya:ye ta:la dulu dla hamatilati wabasi dulu dla elepo depame ma alila dapahatlope oloma dla sila:tiwapo. <sup>5</sup> Epame ya:tapo Pita dla tame woyamuwapo. Epame ma alotle tame ya: alotle tlalo so dla woyamuwapo. <sup>6</sup> Epame ma alotle ya:tapo alila hatlo dulu medla mikadepe dle so 500 opa dla tame woyamuwapo. Opa hapuloma dulu hema opa opi tlo mo-palimama opihata tlo me-ha:ha:po. <sup>7</sup> Epame ya:ye ma Yeims hala dla tame woyamuwapo. Epame matle Taiya dle so opa hapuloma dla tame woyamuwapo. <sup>8</sup> Epame ma mosukulu dla ya:tapo na: dla puame woyamuwapo. Epapele dulu dla na:ye a:yata owayemala hammama ala polo yemala hamdiye, na: epapele some hallati apuwapo.

<sup>9</sup> Adipalati, Taiya dle so hapuloma dulu dla hatlo na: tlo yimka:mala ikadepepo. Epame opatapo na:ye Taiya dle oplami ikadepe dloweye poka:dena. Adipalati, ka:yapa na:tapo God ya: opa dla wotiyalle hapilalo oplami haluwapo. <sup>10</sup> Amasiyama Godta polowamale koko tle na:tapo wata ipo halapo. Adipalati, Godta na: dla ya:ta polowamale koko hamiwaye, na:tapo eye podosomana. Amasiyama namkadulo Taiya dle so alumale dulu dla hatlo na:tapo okoye sikemte hauwapo. Epele dulu dla monolo na:ta itiyamale tle pa-amdena. Amasiyama Godta bokotiyapo malamaletapo na: dulu dla halemama oko hamhalemduwata ammduwapo. <sup>11</sup> Epedeme Taiya dle so namkadulota ka:dle yu atlamsiyama koko hatlo meye ma na:tapo wua: dla atlamsela:po. Epalati asiyama wua:tapo ka:dle yu edla mikadepe duwapo.

### *Palli sotapo wabasi dulu tle ma silliwe koko*

<sup>12</sup> Ditapo Godta Kelisoye wabasi dulu tle ma ta:dle kokoye atlamsiyamapo. Ame wua: adipalati wua: dulu dla opa opita atlemama, “wabasi dulu tle ma silliwe kokoye hawa,” demsiyama? <sup>13</sup> Wabasi dulu tle silliwe kokoye hawa halematiye, Keliso mape wabasi dulu tle posila:tima. <sup>14</sup> Epame Kelisota wabasi dulu tle posila:tilalo

wekematiye, dita ka:dle yu atlamsiyama i mape koko pa:le hallemla. Epame wua:ta mikadepe dle koko mape isikimi koko pa:le ellemla. <sup>15-16</sup> Epame di mape God koko dla isikimi mala-atlamsiyamelemla. Adipalati, ditapo Godta Kelisoye ma pasakalo dla ta:dleye ma-atlamsiyamuwapo. Epele dulu dla Godta palli soye pasakalo dla pota:dlalo wekele kokota ikadepe demhalematiye, ya: Kelisoye pasakalo dla ma pota:dema. <sup>17</sup> Epedeme Godta Kelisoye pasakalo dla pota:dlalo wekematiye, wua:ta mikadepe dle kokotapo koko pa:le hallemla. Epame wua: mape wua: bobtalimale dulu medla ala me-ha:ha:lemla. <sup>18</sup> Epame koko ita ikadepe dematiye, Keliso dla mikadepe dle sota palliye mosukulu batalimelemla. <sup>19</sup> Epapele dulu dla Keliso dla mikadepe dlowe kokoye isikimi wata dita ha:ha: pasakalo i siyapo gadlepe depo malamatiye, di yimkadulo. Di ikadepe sikemte yeitamale so depo ha:ha:lemla.

<sup>20</sup> Amasiyama Godtapo Kelisoye powale tle ma pasakalo dla ta:dleye mikadepepo. Epedeme koko itapo dia:ye imapo, opa anawolotapo mo-palipo hutiyema:, yia: mape palli tle ma pasakalo dla sillipe. <sup>21</sup> Epedeme polowe kokotapo oplami tle puwapo. Epapedeme asiyama powale tle ma pasakalo dlowe koko mape oplami tle puwapo. <sup>22</sup> Adipalati, A:damtapo polowe kokoye opa hapuloma dla hampuwapo. Amasiyama ma watapo opa hapulomatapo Keliso dulu dla pasakalo hamha:ha:lepe. <sup>23</sup> Amasiyama Keliso tatele powale tle ma-sila:tiwapo. Epame mikadepe dle so opatapo Kelisota ma ilame puluwe oloma edla yia:tapo palli tle sillipe. <sup>24</sup> Epalati oloma edla Kelisotapo ta:lamo dokopala so mate epo itiyamale soko hapuloma mateye mosukulu batalipo hamastapame ma ya: mo kokoye A God watle hamilipe. Epapele alotle ta:lamoto mosukulu tame gudlepe.

<sup>25</sup> Kelisotapo ya: dla opahale dlalo so hapulomaye ya: hete sitali isili dla ipila:lowe alila dla ompumama ya:tapo dokopala depo hallepe. <sup>26</sup> Epedeme Kelisotapo ya: dla opahale dlalo so hapuloma poyumtame gudepame ma mosukulu dla yumuluweye polowe kokopo. <sup>27</sup> Adipalati, God yu bukata epo atlapo, “Godtapo koko hapulomaye ya: hete sitali isili dla ma-hatitimuwapo,” depo. Epedeme dimalamana, God yuta atlemama koko hapuloma Keliso hete sitali isili dla hatitimuwa deye, God yo mate isili dla pohimina. Adipalati, hatlo God ya:tapo koko hapulomaye Keliso hete sitali isili dla hatitimalalo halapo. <sup>28</sup> Ya:tapo koko hapulomaye Yami hete sitali isili dla hatitipo gudlati Yamitapo ya:skamu ya:ye A Godta itiyamale isili dla himilipe. Epapele koko tle koko hapuloma dulu dla God hatlo ya:tapo pato hallepe.

<sup>29</sup> Epapedeme palli tle ma silliwe kokota pe-ellalo wekematiye, ame adipalati opatapo yimkadulo yú potutula:lalo palli so yilo ma yia:ta yú tutula:mdi? <sup>30</sup> Epame palli tle ma silliwe kokota pe-ellalo wekematiye, di adipapalati diskamu dia:ye God yu yilo alila hapuloma dulu dla wotiyalle dulu dla halopo tulumama polowe mateka:pi dla hatitimdi? <sup>31</sup> Epapedeme mikadepe dle so namkadulo, na:tapo Yesu Keliso di Lod dulu dla wua: yilo siyemhala kokoye atlemama ipo atlema, na:tapo alila hapuloma dulu dla polowe mateka:pi dla halemde. <sup>32</sup> Palli tle ma silliwe kokota pe-ellalo wekematiye, ame na: adipalati Epeses mo dla halemama na: dla opahale dlalo so, moko esemala sepele mate natalimhaluwa? Epedeme Godta palli soye ma pasakalo dla pota:ta:dlalo wekematiye, eta

“ditapo daya mate yú mate dlomha:ha:lemla.

Adipalati, iyelaye polowe alilata pulupe.”

<sup>33</sup> Epedeme wua: ase opa opitapo wua:ye alikili dla elemta demiya. Adipalati, batalimale so mate namkale depame hatlope depo siyamolowe kokotapo ka:ka:dle koko hapulomaye bobtalimdepo. <sup>34</sup> Epapedeme wua: ka:dle koko halowe malamale hapame matle batalimale koko halomha:ha:miya. Adipalati, na:ta wua: dla wota:le hamilowedeme yu ipo atlema, wua: dulu dla opiye God koko yeitamale so me-ha:ha:po.

*Wabasi dulu tle halopo silliwe moto*

<sup>35</sup> Epedeme wa:ta epo atlowe sepena, “Adipammama Godtapo palli soye ma pasakalo depa:?” Epame ya:ye moto adipapele mate ma pasakalo depo sillipa:?” dlepe. <sup>36</sup> Amasiyama wa:ye koko yeliyele oplamipo. Adipalati, wa: alisisi ale emelepiye, ale e ya: motoye ka:yapa ta:la dulu dla hutumdepo. Epalati ma ale amkota etle peyapo matamdepo. <sup>37</sup> Epame wa:ta emde alisisi hapuloma eye isikimi ale yemalapo, moto pato pe-emasemde. <sup>38</sup> Amasiyama Godtapo wa:ta alisisi emde edla ya: moto ikadepe hamili depo dinapeleye hamimdepo. <sup>39</sup> Epapedeme pasakalo halemhala alisisi hapuloma mape ya: moye meyelo pe meyelope dle halapo. Epedeme oplayemala moye meyelo pepo, epame ta:la dla siyamalalo alinepi mo mape meyelo pepo, epame tea mo mape meyelo pepo, epame amalo mo mape meyelo pepo. <sup>40</sup> Epame dulu edla Pepele dimo moto mate epo ta:lamo moto mate me-hutiyepe. Amasiyama Pepele dimo motota hela:dle mate epo ta:lamo motota hela:dle mateye pohatlope. <sup>41</sup> Epedeme salita hela:dle mape meyelo pepo, epame mamata hela:dle mape meyelo pepo, epame tamilita hela:dle mape meyelo pepo. Epapele dulu dla tamilita hela:dle tlo meyelo pe meyelope dena.

<sup>42</sup> Epapedeme palli sota ma pasakalo dlowe koko ma epapena. Wabasi dulu dla hamatilalo motoye hutulalo motopo. Amasiyama Godtapo pasakalo dla ta:dlowe motoye pohutulalo wekelalo motopo. <sup>43</sup> Epame wabasi dulu dla hamatilalo motoye poka:dena. Amasiyama Godta ta:dlowe oloma edla pta sikemte hela:dle mate hallepe. Epame hopeyamale motoye wabasi dla hamatilipeye, ma itiyamale dla ta:dlepe. <sup>44</sup> Epame ta:lamo motoye wabasi dulu dla hamatilipeye, asiyama Pepele dimo motota wabasi dulu tle sillipe.

Epapedeme ta:lamo motota hallepiye, Pepele dimo moto ma me-halapo. <sup>45</sup> Epedeme God yu bukata epo atlapo, “Ka:yapa haluwa oplami A:damye pasakalo haluwapo,” depo. Amasiyama alotle puwa A:damtapo opa dla pasakalo hamilalo Soko halapo. Ya:ye Kelisopo. <sup>46</sup> Pepele dimo moto tatile pohalana, ta:lamo moto tatile haluwapo. Epalati alotle Pepele dimo motota edla haluwapo. <sup>47</sup> Epapedeme ka:yapa haluwa oplamiye Godtapo ta:la apupu tle mita:puwapo. Ya:ye ta:lamo oplamipo. Epalati ya: ko tle dolumalalo oplamiye Pepele di tle maluwapo. <sup>48</sup> Ta:lamo so hapulomaye apupu tle mita:ple oplami some ha:ha:po. Epalati Pepele dimo soye Pepele dimo tle malale oplami some ha:ha:po. <sup>49</sup> Epedeme ditapo ta:lata mita:ple A:dam moto sepele hapo ha:ha:ye, epammama ditapo ma alotle Pepele dimo tle malale oplami Keliso moto sepeleye halopo ha:ha:lepe.

<sup>50</sup> Epapedeme mikadepe dle so namkadulo, di ta:lamo mototapo God ya: mo koko dla po-ulatuluwa. Adipalati, di moto iye hutulalo motopo. Amasiyama God ya: mo kokoye kokó elepo ellalo mopo. <sup>51-52</sup> Amasiyama wua: daliya, na:ta hemele kokoye wua: dla botomastama. Dita hapuloma dulu dla opiye popalliwa. Amasiyama mosukulu hulu sisilamale oloma edla dita hapulomatapo pakasiyamalalo di ta:lamo moto itle ma meyelo pe dlalimelepe. Adipalati, hulu sisilamale oloma edla palli sotapo ma pohutulalo wekelalo moto halopo sillipe. Epame oloma edla di ala popalilalo me-ha:ha:lowe so di moto mape meyelo pe dlalipame pohutulalo wekelalo moto halomelepe. <sup>53-54</sup> Adipalati, Godtapo dia: dla popo hutulalo moto hutiye iye uptipame matle popolalo wekelalo motoye didiyemellepe. Epapele oloma edla God yu buka dla yu elata mikadepe dlepe. Adipalati, God yu eta ipo elapo, “Polowe kokoye ma-tla:mtame halapo.

<sup>55</sup> Epedeme poloweta tla:mtlowe itiyamale da:?

Epame poloweta wotiyalle hamilalo itiyamale da:?” depo.

<sup>56</sup> Epapedeme polowetapo wotiyalle hamilowe itiyamaleye batalimale tle hamdepo. Epalati asiyama batalimaletapo aiyalma koko tle itiyamale hamdepo. <sup>57</sup> Amasiyama dia: God dla sisiyema. Adipalati, ya:tapo dia:ye eleme di Lod Yesu Keliso tle batalimale koko mate epo polowe koko mateye ma-tla:mtauwapo.



<sup>58</sup> Epapedeme mikadepe dle so namkadulo, wua: kokalepo ha:ha:mama houlal-imha:ha:miya. Epame alila hapuloma dulu dla Lod oko halowe yilo itiyamale mate ha:ha:iya. Adipalati, wua:malamana, wua:ta Lod dulu dla oko ha etapo isikimi koko pa:le pe-elasema.

## 16

### *Mikadepe dle so Yelusalem dla ha:ha:lalo gadlowe dla namkale dle alisisi kolumolowe*

<sup>1</sup> Epedeme wua:ta mikadepe dle so gadlowe dla namkale dle alisisi kolumolowe koko dla na:ta Galasiya so sos hapuloma dla imuwa kokoye epo haiya. <sup>2</sup> Wua: Sande alila hapuloma dulu dla wua:ta hatlope hatlope dletapo namkale dle alisisi wua: mate ala:leye aseka alikili dla kolumha:ha:lepe. Adipalati, eta na:ta wua: hala dla puluwe oloma edla wua: matle namkale dle alisisiye pokolumolowa. <sup>3</sup> Epedeme wua: na:ta puluwe dla omha:ha:mama namkale dle alisisiye momolo kolupame eye halopo Yelusalem dla tlowe so opa mape hulupo ha:ha:iya. Epame na:ta pulupiye, isikimi yia: dla yu ilimale tlo hamilowepo, yia:tapo namkale dle alisisi kolumale e mate hamtelepo depame. <sup>4</sup> Epele dulu dla na:ta yia: mate tlowe dla ka:dena dlepiye, eta na: ma yia: mate tlowepo.

### *Polota mo hale dla tlowedeme dinapele koko*

<sup>5</sup> Na: Makedoniya tatile tapame matle wua: hala dla puluwepo. <sup>6</sup> Na: pona:malamana, wua: mate halemama tene oloma mape wua: mate me-hallowe sepena. Epame wua: ka:dena, na:tapo ma etle hadima tlowedeme apalati na: gadloweye. <sup>7</sup> Na: posolotamasema, wata oloma hema isikimi me-tla:mtamama wua: mila:pi tlamoloweye. Amasiyama Lodta solotamelepiye, eta na:tapo alila pasatale wua: mate halepo gudepame tlowepo. <sup>8-9</sup> Amasiyama na: yipta wua: hala dla potlowa. Adipalati, Epeses mo hema na:ta ka:dle oko halowe kokoloma patota mo-dokostame elema. Amasiyama epapele tlope na: dla opahale dlalo so ma pta wokasemana. Epedeme na: ala Epeses mo midla halemama Pentikos alilata umulati edla tlowepo.

<sup>10</sup> Wua: Timotita wua: hala dla pulati woloma natilipe. Adipalati, ya: poka:dena, wua: dulu dla wota:le mate halloweye. Ame adipalati, ya:ye na:ta Lod oko hamsela:ye, ya: mape epapele oplamipo. <sup>11</sup> Epapedeme na: posolotamasema, oplami haletapo ya:ye yimka:mala depame ya:ye alliweye. Amasiyama wua:tapo sadle mate ya:ye sepame ma hapele na: hala dla pulupo depame tane diya. Adipalati, na: ya:tapo mikadepe dle so opi mate pulupo depame ya:ye omhalema.

<sup>12</sup> Na: solotamuwa, di ei Apolostapo mikadepe dle so ya:mkadulo mate wua: hala dla tame woyamelepo depame. Amasiyama ya:ta wua: hala dla puluweye alilata po-ala:na. Epedeme ya:tapo alila ka:dle natipame wua: hala dla pulupe.

### *Mosukulu yu*

<sup>13</sup> Wua: dinapopame mikadepe dle dulu dla kokalepo ha:ha:iya. Epame sikemte itiyamale mate damkowastame ha:ha:iya. <sup>14</sup> Epame wua:ta koko hapuloma halomale dulu dla woloma bokotiyapo malamale mate halomha:ha:iya.

<sup>15</sup> Epedeme mikadepe dle so namkadulo, Stepanas aya dulu dla ha:ha:lalo so yia: kokoye mo-wua:malamana. Yia:ye Akaya mo dulu dla yia: tatile mikadepe dle dulu dla matimoluwapo. Epame yia: mape yiskamu yia: motoye mikadepe dle so gadlowe oko halomolowe dla hatitipo ha:ha:po. <sup>16</sup> Epapedeme wua: ka:dena, wua:tapo yia: yu dla salladepo siyamoloweye. Epammama opa opi yia: epapele so yu dla mape salladepo siyamaiya. Adipalati, yia: mape hutulli mate God oko hapo. <sup>17</sup> Na: Stepanas mate epo Potunetas mate epo Akaikus mateta na: hala dla pumulale dla siyema. Adipalati, wua:ta na: mate poha:ha:lalo wekele koko dla yia:tapo na: gademha:ha:po. <sup>18</sup> Yia:tapo wua: ka:pi gademha:ha:uwaye, epammama yia: ma watapo na:ye ka:pi gademha:ha:po. Epapedeme wua: epapele so dla sisiyemha:ha:iya.

<sup>19</sup> Asiya mo pato dulu hema sos popa:mtatapo yia:ta namkale dle yuye wua: watile hamima. Epame Akwila mate epo Plisila mate epo yia: aya dulu dla inoma sumha:ha:lalo so mateta Lod hi tle yia:ta namkale dle yu patoye wua: dla hamima.

<sup>20</sup> Epame mikadepe dle so hapuloma hema ha:ha: so mape yia:ta namkale dle yuye wua: dla hamima. Epedeme wua: Keliso dulu dla ha:ha:mama namkale dle mate asiyama huhulama asiyama huhulama demha:ha:iya.

<sup>21</sup> Na: Polopo. Na:tapo monolo na: do ikadepe mate namkale dle yu iye ilima.

<sup>22</sup> Epedeme oplami antapo Lodye pobokotiyapo malamalalo hallepiye, ya:ye ala Godta kasilamale isili dla halapo.

Yao Lod, wa: puane.

<sup>23</sup> Yesu Kelisota bokotiyapo malamaletapo wua: mate hallepe.

<sup>24</sup> Eso. Na:ta bokotiyapo malamaleta Yesu Keliso dulu dla ha:ha:lalo so hapuloma wua: mate hallepe.

## **Polota Kolin sos dla matle yu ilimale hamili**

### **2 Kolin**

### **2 Kolin buka ya: dulu koko**

Biskapa koko imalalo sota Kolin sos dla imsiyamama yia: tlo ka:dena demama asiyama Poloye pase ikadepe Taiya dle oplami demdiyo. Epammama yia:tapo opata Polo yu dla ikadepe dlala depame humatlamsiyamdiyo. Epapele kokoye Polotapo Makedoniya mo dla halemama dalepame yu iye ilipo hamiyo. Epame ya: ma yu ilimale dulu hema mikadepe dle sota yimkadulo gagademha:ha:lepo depame atlamaiyo.

<sup>1</sup> Na:ye Polopo. Godtapo ya:ta solotamale tle na:ye mo-sauwapo, na:tapo Yesu Keliso ya: Taiya dle oko hamhallepo depame. Epapedeme na: mate epo di ei Timoti mate yu ilimale iye God ya: opa hapuloma Kolin mo dla ha:ha: mate epo Akaya mo dla ha:ha: mate dla hamima. <sup>2</sup> Epedeme di A God mate epo Lod Yesu Keliso mate yia:ta bokotiyapo malamale mate epo sadle mateta wua: mate hallepe.

#### *Opata wotiyalle dulu dla ha:ha:lali Godta gadlalo halapo*

<sup>3</sup> Epapedeme di Lod Yesu Keliso ya: A God hi di dla ta:diya. Adipalati, ya:tapo polowamale koko mate epo gadlalo koko mate sitali halapo. <sup>4</sup> Epame ya:tapo dita wotiyalle dulu dla ha:ha:lali dia:ye gademdepo. Eta asiyama ma dita opa opita wotiyalle dulu dla ha:ha:lali yia: gademha:ha:lepo depame. <sup>5</sup> Epapedeme dita Keliso yilo wotiyalle halepiye, asiyama gadle mape Keliso tle dia: dla pulupe. <sup>6</sup> Wua:ta dita wotiyalle dulu dla kokalepo ha:ha:uwa e malaha:ha:lepiye, eta wua: gadlepe. Epame Godtapo dia:ye gadle himhallepiye, ya:tapo wua: dla mape gadle himhallepe. Epapele dulu dla wua: dita wotiyalle hauwa epapele halepiye, wua: wotiyalle dulu edla kokalepo ha:ha:lepe. <sup>7</sup> Epedeme di mikadepe dema, wua:tapo wotiyalle dulu medla woloma kokalalipo ha:ha:lepo depame. Adipalati, wua: dita wotiyalle hauwa ipiye hamha:ha:lepiye, eta wua: dita God tle gadle hauwa ipiye wua: ma e halepe.

<sup>8</sup> Epapedeme mikadepe dle so namkadulo, wua: na:ta Asiya mo dla wotiyalle hauwa kokoye dallowe ka:pi. Wotiyalle koko eye pta sikemte patoto. Epapele dulu dla na:ta malamuwaye, na: wotiyalle dulu medla polowetepo duwa. <sup>9</sup> Yao ikadepe, na:ta malamuwaye, na: dulu medla polope depo malamuwa. Amasiyama koko itapo epo wowoyamuwapo, na:tapo naskamu gadlowe tlo pomalamalalo, ma palli so pasakalo dlalo God dla hitahallepo depame. <sup>10</sup> Epapele dulu dla Godtapo na:ye wotiyalle patoto dulu hema mo-polowe mateka:pi dla hallati ya:tapo gadle himiwapo. Epedeme na: malama, ya:tapo alila hapuloma na:ye gademhallepe. <sup>11</sup> Adipalati, wua: mape wua:ta inoma sumale tle na: gademha:ha:po. Epedeme opa hapulomatapo Godta dia: dla gadle himila natipame asiyama yia:tapo God dla siyele ta:dlepe. Adipalati, ya:tapo yia:ta inoma sumale yu dla asiyama ma-hamimdepo.

#### *Polota malamale meyelope depame Kolin mo dla potlalo wekuwa koko*

<sup>12</sup> Epedeme di diskamu dita atlama koko hema ikadepe demama epo atlema. Eye ditapo diskamu woloma keketiyapo ha:ha:mama wua: dulu dla epo opa hapuloma dulu dla ikadepe koko tle Godta solotamale koko tlo ala:mha:ha:uwapo. Dita ipo ha:ha:uwaye bidulo malamale tle po-apena, amasiyama Godta gadle tle ha:ha:mama apuwapo. <sup>13</sup> Epapedeme na:ta wua: watle yu ilimale hapiwa yia: dulu kokoye hemele pe-elasma. Amasiyama na:tapo wua: watle haliyamale dla me-ilalipo hapiwapo, wua:tapo sesa:mama di kokoye woloma malamelepo depame. <sup>14</sup> Amasiyama wua:ta oloma hema di kokoye ala pomalamolowa. Epapele tlope alotle wua:tapo di koko hapulomaye

malastlepe. Epapelepiye, Lod Yesu Kelisota pulati dita wua: koko tle siyele halepe. Epalati asiyama wua: mape di koko tle siyele halepe.

<sup>15-16</sup> Epedeme na:ta wua:ta na: sikemte malaha:ha: koko malapame Makedoniya dla tamama ka:yapa wua: tatile tame natilowedeme sikemte solotamuwa. Epame ma Makedoniya mo dla halepo ilame pumama matle tuwame wua: natilowe solotamuwa. Epammatiye, eta na:ta wua: hala dla tuwame natiliye dapiyamte depame wua: gadle ma dapiyamte dle mla. Epame asiyama wua:tapo na:ta Yudiya dla tlowe apiye gadle mla.

<sup>17</sup> Epapele dulu dla koko iye na:ta mo-malapame yu me-himiwapo. Amasiyama na: koko eye podolumana. Epapele koko tle wua:ta na:ye malamale tatlamalalo oplami depo malama:? Epame wua: na:ye ta:lamo oplamita koko halowedeme yu hatitipame ma pahalomalalo wekemde oplami sepena dema:? <sup>18</sup> Hao, na:ye pe-epapele oplami. Amasiyama Godta ikadepe koko tlo atlamhalaye, epammama na: mape ikadepe koko tlo atlamsela:po. <sup>19</sup> Adipalati, God Yami Yesu Kelisoye malamale potatlamalalo oplami. Adipalati, ya:ye ya:ta koko halomolowepo depo malamde koko hapulomaye halomdepo. Epapedeme Saeles mate epo Timoti mate epo na: mate Keliso kokoye wua: dla atlamsiyamuwapo. <sup>20</sup> Epedeme Godta di gadlowedeme yu itiyapo hatitimale hapulomaye Keliso tle mo-wowoyamuwapo. Epapedeme di God hi di dla ta:demama Yesu Keliso hi tle atlema, “eye ikadepepo,” demdepo. <sup>21</sup> Epapele dulu dla God hatlo ya:tapo wua: mate epo dia: mate Keliso dulu dla kokalepo ha:ha:lepo depame itiyamale hamimdepo. Epame God hatlo ya:tapo dia:ye sesalemuwapo, ditapo wua: dla ka:dle yu atlamsiyamelepo depame. <sup>22</sup> Epame hatlo ya:tapo ya: uluye dia: dla hatitimuwapo. Epame ya: Hela:dle Sokoye di dupa dulu dla ma hatitimuwapo, dita God ya: akimlala ikadepe depo ha:ha: kokoye dia: dla imelepo depame.

<sup>23</sup> Epapedeme na: ikadepe kokoye wua: watle atlema. Na:ta malamale meyeloje depame ma wua:ta hala dla potlalo wekuwa kokoye ipo elema. Na: posolotamana, na:tapo wua: hala dla tame yu itiyamale mate atlemama wua: watle upiyele hamiloweye. Epame God ma na:ta malamale koko iye me-ya:malamana. <sup>24</sup> Epedeme wua:ta mikadepe dle koko dla na:ta dokopala oplami depo halemama yu iye po-atlasema. Hao, wua:ye mikadepe dle dulu dla mo-kokalalipo ha:ha:po. Amasiyama na:ta wua: gadlowe tlo sikemte solotamana yu iye atlema, siyele kokota wua: dla poposatilipo hutiyelepo depame.

## 2

<sup>1</sup> Epapedeme na: posolotamana, matle wua: hala dla tame wua: watle yu itiyamale mate atlamama upiyele hamiloweye. <sup>2</sup> Adipalati, na:tapo wua:ta hala dla tame upiyele mate epo wotiyalle mate hapilipiye, ma antapo na: watle siyele hamipa:? Hawa. <sup>3</sup> Epedeme na:ta wua: hala dla potlalo isikimi yu ilimale tlo hamiwapo, wua:tapo wua: batalimale tle heheletipame ka:ka:dle koko tlo halomha:ha:lepo depame. Adipalati, eta na:ta tame wua:ta ka:ka:dle koko halomha:ha:la natipame na: dla siyele hamilimla. Amasiyama na: posolotamana, wua:ta batalimale koko halomha:ha:la natimama na: dla dupa kolle hamiloweye. Amasiyama na: mikadepe duwa, wua:ta woloma ka:ka:dle koko halomha:ha:ta na: dla siyele hamilati wua: ma edla sisiyelepo depame. <sup>4</sup> Na:tapo yu eye ilimama dupa kolle mate epo kaiyo mate ilimuwapo. Amasiyama na:ta yu ilimale eye wua:ta natipame dupa kolle himilipo depo po-apena. Isikimi na:tapo wua: sikemte bokotiyapo malahala kokoye nati-imama yu ilimale eye hamiwapo.

*Wa: amkale batalimale welilowe koko*

<sup>5</sup> Epedeme oplami hale wua: dulu dla halatapo wua: dla dupa kolle pato hamimama na: dla mape hamiwapo. Amasiyama na: koko hema itiyamale mate atlowe posolotamasema. <sup>6</sup> Epapele dulu dla sos dokopala so wua:tapo wua:ta esemale dla ya: batalimale kokoye natipo asiyama ma-hamiwapo. <sup>7</sup> Amasiyama wata oloma hema

wua:tapo ya: batalimale kokoye welipame ya:ye gadiya, ya:tapo sikemte dupa kolle himimama mikadepe dle tle alikili a:ma woyapo teletlala depame. <sup>8</sup> Epedeme wua: ka:dena, wua:tapo ya: dla bokotiyapo malaha:ha:ye matle ya: watle nati-ya.

<sup>9</sup> Wua:tapo na: yu dla salladepo ha:ha: kokoye malanatilowedeme na:tapo wua: watle ka:yapa yu ilimale eye ma-hamiwapo. <sup>10-11</sup> Epedeme oplami ana batalimaleye wua:ta wellipiye, na: mape ya: batalimaleye oloma medla welilowepo. Epapele dulu dla na:tapo oplami i ya: batalimaleye wua: yilo Keliso mila:pi tle mo-weliwapo, Saitenta itiyamaleta dia:ye hamalala depame. Adipalati, Saitentapo api hapuloma tle dia:ye elemala natilowedeme mo-dinapopo halaye mo-dimalamana.

### *Polota Taites dla malamale pato himhalale koko*

<sup>12</sup> Epapele dulu dla na:ye Tlowas mo dla tame ka:dle yu Yesu Keliso kokoye atlamolowedeme apalati Lodtapo na:ta edla ka:dle yu atlamolowe kokolomaye dokostauwapo. <sup>13</sup> Amasiyama na:ye Taites edla ponatilalo wekelati ya: yilo sikemte malamale himiwa. Epammama na:ye mikadepe dle so Tlowas dla ha:ha:laloye medla saliyome ma Makedoniya dla Taites totamala tauwa.

### *Keliso dulu dla itiyamale halowe koko*

<sup>14</sup> Epedeme di ka:dena, God hi di dla ta:demama hatlo ya: dla siyele hamiloweye. Adipalati, Godtapo Keliso tle Saitenta itiyamaleye mo-yumuwapo. Epapele koko tle ditapo Keliso dulu dla ha:ha:lali Godtapo dia: dla itiyamale hamimdepo. Epapedeme dita mo hadima tama:, edla Godtapo ka:dle yuye dia: tle ullu ka:dle pamalalo alisisi some opa dla pasalalemtelepe. <sup>15-16</sup> Epedeme ditapo Keliso kokoye opa dla bobotima-timsiyamelepiye, eta ullu ka:dle pamalalo alisisi epapele some God hala dla hetlepe. Epedeme opa hapulomatapo ullu ka:dle pamalalo iye pamelepe. Pasakalo gadle halowe sotapo ullu ka:dle i pamama pasakalo hallowe ullu pamelepe. Amasiyama pasakalo gadle pahalalo wekelowe sotapo ullu i pamama polowe ullu pamelepe. Epedeme oplamitapo isikimi meyelo ya:ta itiyamale tle ipapele oko haloweye po-ala:na. <sup>17</sup> Amasiyama di Godta itiyamale tle oko i halowe tlo ala:na. Adipalati, ditapo opa opi some isikimi mani halowe yilo God yuye po-atlamsiyamasemde. Amasiyama Godtapo dia:ye Keliso ya: oko halomha:ha:lepo depame taiya duwapo. Epapele koko tle ditapo God mila:pi tle ha:ha:mama di dupa dulu woloma ka:dle malamale tle God yu atlamsiyamapo.

## 3

### *Godta yu itiyapo himili amkota hela:dle*

<sup>1</sup> Epedeme wua: ma na:ye naskamu di dla hame hetamama na: kokoye atlamsela:yo depo malama:? Hao, na: pe-epapesema. Epame wua: ma solotama:, na:tapo opa opita yia: koko dla ilalimale pepa halopo puame wua: watle nati-imdiye epapoloweye? Epame na: ma wua:ta na: koko dla ilimale pepaye wua: tle hali depo solotamdi? Hao, pe-epapesemde. <sup>2</sup> Adipalati, wua:ye na: koko dla ka:depo malamalalo yu ilalimale pepa epapele some ma-ha:ha:po, opa hapulomatapo natipame sesa:mha:ha:lepo depame. Epedeme yu ilalimale eye na: dupa dulu dla ma me-ilimuwapo. <sup>3</sup> Epapele dulu dla na:tapo wua: yilo oko hauwa tle wua:tapo mo-mikadepe duwapo. Epapedeme wua: pasakaloye Kelisota yu ilimale hamili epapele some halapo, opa hapulomata natipo sesa:lepo depame. Epedeme yu ilimale iye dota po-ilimana. Amasiyama pasakalo hallalo God ya: Soko tle ilimuwapo. Epame yu ilimale iye aiyalma ewala dla hatitimale pe-epapena. Amasiyama ikadepe wua: dupa dulu dla ilimuwapo. <sup>4</sup> Epapele dulu dla na: koko hema mikadepe dema. Adipalati, na: Yesu Keliso tle na:ta mikadepe dleye God dla hitahalapo.

<sup>5</sup> Epedeme na: oko iye monolo na:ta itiyamale tle haloweye ala:na demama potlasema. Amasiyama Godta itiyamale hamilati oko iye hapo. <sup>6</sup> Epapedeme ya:tapo



na:ye ya: yu itiyapo himili amko dulu dla salladepo sela:lalo oplami hallepo depame mo-sisilamuwapo. Epapele dulu dla yu itiyapo himili amko iye dota po-ilimana. Amasiyama Hela:dle Soko tle puwapo. Adipalati, dota ilimale aiyalmatapo polowe koko hampuapo. Amasiyama Sokotapo pasakalo hapimhalapo.

<sup>7</sup> Epedeme ewala dla ilalimale aiyalma kokoye polowe hampulalo kokopo. Epapele tlope Godtapo Moses watle aiyalma koko eye hamilati Godta hela:dletapo nati-iwapo. Epapele dulu dla Moses ya: mila:pi tle hela:dle eye nati-iwapo. Epalati Isalael sotapo Moses mila:pi natiloweye sikemte usiyemduwapo. Epapele tlope hela:dle eye pakasiya pa:lalo hela:dlepo. <sup>8</sup> Epapele dulu dla aiyalma takala hapili oloma edla Godta hela:dletapo pato haluwapo. Amasiyama Sokota amko koko kotiyamale oloma edla Godta hela:dletapo sikemte pato haluwapo. <sup>9</sup> Epedeme polowe hampulalo aiyalma kokotapo Godta hela:dle pato mate haluwapo. Epapele tlope asiyama Sokota hampuale amko kokotapo sikemte hela:dle pato mate pumama God mila:pi tle ullu pa:po hallowe kokoye hampuwapo. <sup>10</sup> Epapedeme ikadepe, ka:yapa eluwa aiyalma kokota hela:dleye mo-pa:uwapo. Adipalati, hela:dle amkotapo ka:yapa eluwa hela:dleye mo-tla:mtauwapo. <sup>11</sup> Adipalati, kokó hallalo amko kokota hela:dletapo pakasiya pa:lalo takala kokota hela:dleye mo-tla:mtame halapo.

<sup>12</sup> Epedeme amko kokota dia: dla ellati ditapo ka:dle yuye wowota:le pa:po itiyamale mate atlamsiyamapo. <sup>13</sup> Epapele dulu dla di Mosesta koko halë pe-epapesema. Adipalati, ya:tapo ya: mila:piye tlukata bopuduwapo, Isalael sota ya: mila:pi dla hela:dle ela kokota alikili a:ma haode kokoye ponatilalo wekelepo depame. <sup>14</sup> Amasiyama oloma edla Isalael sota God hala dla pulala depame yia: dupa momalamale hapulomaye sikemte kokalalipo meluwapo. Epapele dulu dla wata oloma hema mape yia:ta dupa momalamale hapulomaye ala me-kokalalipo ha:ha:po. Adipalati, yia:ta aiyalma takala sesa:mha:ha:le oloma edla tluka epapele sepeleta yia: dupa momalamale hapulomaye kukopo haluwapo, yia:tapo ikadepe kokoye ponatilalo wekelepo depame. Amasiyama hatlo Kelisotapo yia: dupa dulu dla tluka sepeleta kopo ela alikili a:ma hamastloweye ala:na. <sup>15</sup> Yao, ikadepe, ala wata oloma hema yia:tapo Mosesta aiyalma hatitimaleye sesa:mha:ha:mama tluka epapele sepeleta yia: dupa momalamaleye kukopo hallati yia:tapo ikadepe kokoye pomalamasema. <sup>16</sup> Amasiyama oplami antapo malamale meyelope depame Lod hala dla pulupiye, ya: dupa dulu dla tluka sepeleta kopo halaye alikili a:ma hamastlepe. <sup>17</sup> Epapedeme Lodye Sokopo. Epedeme Lod ya: Sokotapo dia:ye batalimale tle epo aiyalma koko dolumha:ha:mama polowe koko mate tle alikili dla eleme woyamuwapo. <sup>18</sup> Epapele dulu dla di mila:piye tlukatapo pobopudepo ha:ha:sema. Epapele koko tle dita hapulomatapo di mila:pi tle Lodta hela:dleye opa dla nati-ipo. Epame Lod ya: Sokota dia: dulu dla oko hamhallati dia:ye dita ha:ha:le tle Lod some ha:ha:mtapo. Epammama ditapo ya:ta sikemte hela:dleye ma-a:ma nati-imtamalapo.

## 4

### *Ka:dle yu atlamolowe koko*

<sup>1</sup> Epedeme Godta dia:ye bokotiyapo malamama dia:ye ya: oko halepo depame taiya duwapo. Epapele koko tle dia:ye susukalemama duka dla pogudesema. <sup>2</sup> Epame dia:ye hemele batalimale koko halomolowe hapulomaye ma alikili dla pololuwapo. Epame di elemale tle ka:dle yuye po-atlamsiyamasema. Epame di ka:dle yuye pobatalipo atlamsiyamasema. Amasiyama di opa dla ka:dle yu iye haliyamale dla bobotimatipo atlamsiyamapo, opatapo dita koko halomha:ha: natipame dia:ye God mila:pi tle ka:ka:depo ha:ha:lalo so dlepo depame. <sup>3</sup> Amasiyama dita ka:dle yu atlamsiyama iye hemele hatiyomeleme elema dlepiye, isikimi alikili dla haohaodle so dla hemele hatiyomeleme elemama apelepe. <sup>4</sup> Adipalati, ta:lamo dokopala oplami Saitentapo yia:ta

momalamale hapulomaye mo-hihimapo hamastauwapo. Epapele koko tle ka:dle yu Yesu Keliso kokota yia: dla hela:depo dompuaye yia: ponatisema. Epapele tlope Kelisoye ikadepe God mila:pi himili oplamipo.

<sup>5</sup> Epapedeme di diskamu di kokoye po-atlamsiyamasema. Amasiyama di Yesu Kelisoye Lodpo depo atlamsiyamapo. Epapedeme ya:tapo dia:ye taiya duwapo, wua: gadlepo depame. <sup>6</sup> Epedeme kotiyamale sitali dla Godtapo epo atluwapo, “Amtuwale dulu dla hela:dleta domelepe,” duwapo. Epapeleye God hatlo etapo di dupa dulu dla ya:ta hela:dle hamimama domuwapo, ditapo Godta hela:dle Yesu Keliso mila:pi dla elaye malamelepo depame.

<sup>7</sup> Epapele dulu dla dia:ye ta:la so tlope Godtapo meyelo ya:ta hela:dle eye dia: dla hamiwapo, opatapo Godta hela:dle itiyamale eye natimama isikimi God tle puma dlepo depame. <sup>8</sup> Epapele dulu dla opatapo di watle upiyele hapimha:ha: koko etapo dia:ye pobatalimasemde. Epame di dita tlowe api pomalamalalo wekelati duka medla pogudesemde. <sup>9</sup> Epame opatapo dia: dla wotiyalle hamilati asiyama Godta dia: pomeleme tasemde. Epame opatapo dia:ye posalemama hohopollati di matle sillimdepo. <sup>10</sup> Epedeme opatapo Yesu ya: pasakaloye di moto tle natilipo depame ditapo di moto mate wotiyalle hamama Yesuta powale ipiye hapo. <sup>11</sup> Yao, ikadepe, dia:ye Yesu dolumama mo-palliwe mateka:pi dla ha:ha:po, opatapo di palliwe moto itle Yesu ya: pasakaloye natilipo depo apopo. <sup>12</sup> Epedeme ditapo wua: yilo oko hamama palila yakomatapo wua: dla pasakaloye hampuapo.

<sup>13</sup> Epame God yu bukata epo atlapo, “Na:ye God dla mikadepe demama koko iye atlema,” depo. Epedeme dita mikadepe dle mape epapena. Di God dla mikadepe demama ka:dle yuye atlamsiyamapo. <sup>14</sup> Adipalati, dimalamana, Godtapo Lod Yesu Kelisoye powale tle ma pasakalo dla ta:duwapo. Epapedeme di mape Godtapo pasakalo dla ta:ta:dlepe. Epame wua: mate epo dia: mateye ya:ta hala dla elempuame ya: mila:pi tle ha:ha:lepe. <sup>15</sup> Epapedeme ditapo wua: yilo wotiyalle pasatale eye hapo, Godta bokotiyapo mala-maletapo alila hapuloma opaye Keliso hala dla elempumhallepo depame. Epame alila hapuloma opata God hi di dla ta:dlowe kokotapo ta:mtlepo depame.

### *Mikadepe depo hallowe koko*

<sup>16</sup> Epedeme di ta:lamo moto ita itiyamale mo-pa:mama hopeyalimapo. Amasiyama di dupa duluye alila hapuloma Godtapo itiyamale amko hapimhalapo. Epedeme di susukalemama duka dla pogudesemde. <sup>17</sup> Adipalati, wata oloma hema wotiyalle koko dia: dla pumhalaye pase patoto epame yia:ye pase alila selemalli hema poha:ha:lowa. Amasiyama epapele tlope wotiyalle koko itapo dia: dla kokó elepo ellowe siyele patoye hampulupe. <sup>18</sup> Epedeme dia:ye dita di inomata me-tlamde koko dla dita malamaleye pohatitipo ha:ha:lowa. Amasiyama dita malamaleye dita potlamalalo wekemde koko dla hatitipo ha:ha:lowepo. Adipalati, dita tlamde kokoye isikimi alila kiyele elepame ma mo-pa:mdepo. Amasiyama dita potlamalalo wekemde kokotapo kokó hutiyemdepo.

## 5

<sup>1</sup> Epedeme dita ta:lamo hema ha:ha:mama moto halopo ha:ha:ye kimna:ya epapele some ha:ha:po. Epame dimalamana, di moto itapo kimna:ya some kutulostlepiye, Godtapo Pepele dimo dla di watle aya amkoye hapilipe. Aya eye kokó halepo hallowe motopo. Epapele dulu dla aya eye dlopi dota pohana, amasiyama Godtapo hauwapo. <sup>2</sup> Epapedeme ditapo ta:lamo hema upiyele dulu dla susukalle mate ha:ha:mama Pepele dimo dla hutiyemo halomolowe tlo sikemte solotamale mate omha:ha:po. <sup>3</sup> Epame ditapo moto amkoye tluka some didiyelepiye, oloma edla di matle tidali siyapo posiyamolowa. <sup>4</sup> Yao ikadepe, di kimna:ya dulu hema ha:ha:mama wotiyalle mate epo upiyele mate natimha:ha:po. Epele dulu dla di palliwe wowota:mde tlope, di

solotama, moto amkoye halomolowedeme. Eye di solotamapo, di ta:lamo motoye me-melepame ma kokó halepo hallalo moto tlo halomolowedeme. <sup>5</sup> Epedeme Godtapo dia:ye mimita:puwapo, ditapo Pepele dimo dla moto amko hutiyeye halomelepo depame. Epame ya:tapo di watle Hela:dle Sokoye ma-hamiwapo, Soko etapo dita Pepele dimo dla moto amko halomolowe ye ikadepe demama ulu himili halapo.

<sup>6</sup> Epapedeme ditapo alila hapuloma wota:le pa:po itiyamale mate ha:ha:po. Epapele dulu dla dimalamana, di ta:lamo moto i mate ha:ha:mama Lod mate ala poha:ha:sema. <sup>7</sup> Epedeme dia:ye dita di inomata tlamde kokotapo di pe-elemtasema. Amasiyama mikadepe dle kokotapo dia:ye elemtapo. <sup>8</sup> Yao ikadepe, di wota:le pa:po itiyamale mate ha:ha:po. Epame di solotama, di moto iye medla pomelepame ma Lod mate tame ha:ha:lowedeme. <sup>9</sup> Epapedeme di ala me-ha:ha:mama Lod dla siyele hamilowe tlo solotama. Epame ma Lod mate tame ha:ha:mama mepo ya: dla siyele hamilowe ma solotama. <sup>10</sup> Adipalati, dita hapulomatapo Keliso mila:pi tle ya:ta koko gladle dla ha:ha:lepe, ya:tapo dita ta:lamo hema koko halomha:ha:le ya: asiyama mate ala:pame di kokoye gladlepe. Epapele dulu dla ka:ka:dle koko halomha:ha:le sotapo yia: asiyama halomelepe. Amasiyama batalimale koko halomha:ha:le sotapo yia: batalimale asiyama halomelepe.

### *God mate namkale depo hallowe koko*

<sup>11</sup> Epedeme di Lod dla wota:lowe kokoye dimalamana. Epapedeme opatapo di kokoye malastlepo depame yia: gadlowedeme amma. Adipalati, God me-ya:malamana, dia:ye ikadepe ya: oko sopo. Epapedeme di solotama, wua: ma epo malamelepo depame. <sup>12</sup> Epapele dulu dla di diskamu di koko tlo di dla hamhetlowedeme po-apesema. Amasiyama wua:tapo dia:ye di dla halopo hetlepo depame ditapo di kokoye wua: watle atlamsiyamapo. Epapelepiye, etapo opatapo yia: dupa dulu koko tlo pomalamalalo ma isikimi yia: kapala di koko tlo halopo hetlati natimama wua:ta edla yia: watle asiyama yu atlamolowe ye ala:lepe. <sup>13</sup> Epedeme wua:ta di koko natipame atlemama, ikadepe yiyilamale so dlepiye, dita ikadepe God yilo oko halati apopo. Amasiyama wua:tapo di koko natipame atlemama, ka:dle koko hama dlepiye, dita ikadepe wua: yilo oko halati apopo. <sup>14</sup> Adipalati, Kelisota bokotiyapo malamaletapo dia:ye elemsiyamapo. Ame adipalati, dimalamana, oplami hatlopetapo opa hapuloma yilo pouwapo. Epapele koko tle dita hapulomatapo mo-paliwapo. <sup>15</sup> Epedeme Kelisotapo dia: yilo mo-pouwapo, ditapo bidulo solotamale koko tlo podolumsiyamalalo ma isikimi Kelisota solotamale koko tlo dolumsiyamelepo depame. Adipalati, Kelisotapo dia: yilo popame ma pasakalo dla ta:duwapo.

<sup>16</sup> Epapedeme di wata oloma itle oplami haleye ta:lamo malamale tle ponatisema. Amasiyama di ka:yapa Yesu Keliso kokoye ta:lamo sota malamduwa epo malamduwapo. Epapele tlope di wata oloma hema ya: kokoye epo pomalaha:ha:sema. <sup>17</sup> Epedeme oplami antapo Yesu Keliso dla mikadepe dlepiye, ya:ye ma-oplami amko depo. Ya:ta ka:yapa haluwa pasakalo takalaye ma-hamastlati ma asiyama pasakalo amkota ya: dla mo-puwapo. <sup>18-19</sup> Ipapele kokoye Godtapo dia: dla hauwapo. Epame Yesu Kelisota powale koko tle Godtapo ya:ta siyaladle pustamama dia: mate namkale duwapo. Epame Godtapo dia:ye taiya duwapo, ditapo ka:dle yuye atlamsiyamama opa hapulomatapo adipo God mate namkale depo ha:ha:pa: dle kokoye atlamsiyamelepo depame. Epedeme ka:dle yuye ipo. Godtapo Keliso tle opa hapuloma yia: bobtalimal-eye posesana, asiyama ya:tapo isikimi yia: mate namkale dlowe tlo solotamuwapo. <sup>20</sup> Epapele koko tle Godtapo Keliso okoye ma dita halepo depame di watle hamiwapo. Epedeme Godtapo dia: tle wua:ye sisilamhalapo. Epedeme di Keliso kokoye atlamsiyamama wua:tapo God hala dla pulati asiyama Godtapo wua: mate namkale depo hallepo depame otele himha:ha:po. <sup>21</sup> Epapedeme Kelisotapo batalimale koko hale pohana.

Amasiyama Godtapo ya:ye di batalimale asiyama dla ya:ta halepo duwapo, ditapo God mila:pi tle ullu pa:po ha:ha:lepo depame.

## 6

<sup>1</sup> Epedeme ditapo yimkata God mate oko hamha:ha:mama wua: dla otele himima, Godta bokotiyapo malamale wua:ta hamuwatapo isikimi koko pa:le ellala depame.

<sup>2</sup> Adipalati, Godta ipo atluwapo,

“Na:ta namkale dle alila dla na:tapo wa:ta inoma sumale yuye daluwapo.

Epame pasakalo gadlowe alila dla na:tapo wa:ye gaduwapo,” duwapo.

Epedeme na: wua: dla ikadepe koko atlema. Wata alila iye Godta namkale dle alila ipo. Epame wata alila iye pasakalo gadlowe alilapo.

### *Polota kokalle koko dulu dla tale*

<sup>3</sup> Epapedeme di ka:depo ha:ha:mama opatapo di okoye batalipo atlepo depame kustamtlowe alisisiye api duka dla pohatitimasemde. <sup>4</sup> Amasiyama di koko hapuloma dulu dla dita ikadepe God ya: oko so depo ha:ha: kokoye opa dla nati-imde. Eye di wotiyalle mate epo upiyele mate dulu dla me-kokalepo ha:ha:mdepo. <sup>5</sup> Epapele dulu dla opatapo dia:ye hohopolepame amtuwale aya dulu dla pololemdepo. Epame opatapo di koko dla siyaladle pato ta:demdepo. Epame dia:ye pohutiyelalo daya dimi oko pato hamdepo. <sup>6</sup> Amasiyama epapele tlope ditapo di dupa dulu dla ullu pa:po ha:ha:mdepo. Epame ditapo ka:depo malamale mate ha:ha:mama sadle mate epo namkale dle mate ha:ha:mdepo. Epame Hela:dle Sokotapo dia: mate hallati ditapo dia: amkaduloye sikemte bokotiyapo malamha:ha:mdepo. <sup>7</sup> Epame di ikadepe koko tlo atlamsiyamalati Godta itiyamaleta dia: dulu dla oko hamhalemdepo. Epame God mila:pi tle ka:depo hallowe kokoye opahale alisisi some halopo ha:ha:po, diskamu dia:ye gadlowedeme. <sup>8</sup> Epame opa opitapo di watle siyele hamilati asiyama opitapo di yu balemdepo. Epame opa opitapo di hi mate batalimale yu atlamyelati asiyama opitapo di hi mate ka:ka:dle koko atlamyemdepo. Epo opa opitapo di watle atlemama isikimi mala-atlamalalo so demyemdepo. Amasiyama di ikadepe koko tlo atlamsiyamdepo. <sup>9</sup> Epapele dulu dla opa hapulomatapo di kokoye mo-malastepo ha:ha: tlope asiyama yia:tapo dia:ye woloma ponatisemde. Epame opatapo dia:ye hohopolemyemama mopalila yakomapo. Amasiyama di ala me-pasakalo ha:ha:po. <sup>10</sup> Epapele dulu dla dia: dla dupa kolle pato me-elapo. Amasiyama di dulu medla alila hapuloma sisiyele mate ha:ha:mdepo. Epame ditapo atali so some ha:ha:mama opa hapulomaye mikadepe dle tle ma alisisi poposatilimale so depo melemdepo. Epame dia: dla alisisi hawa tlope asiyama koko hapulomaye diolepo.

<sup>11-12</sup> Epapedeme Kolin mo dla ha:ha:lalo so namkadulo, ditapo ikadepe kokoye wua: watle atlamapo. Ditapo di dupa dulu tle wua:ye sikemte bokotiyapo malaha:ha:ma. Amasiyama wua:tapo dia:ye pase malaha:ha:sema. <sup>13</sup> Epapedeme atapo ya: yimlala dla yu atlamdiye, epapele some ma na:tapo wua: watle yu iye atlema. Dita wua:ye sikemte bokotiyapo malaha:ha:ye, epammama wua: ma asiyama dia: dla sikemte bokotiyapo malamale himha:ha:iya.

### *Pomikadepe dle so mate hatlope demiya*

<sup>14</sup> Epedeme wua: pomikadepe dle so mate sikemte hatlope demha:ha:miya. Adipalati, ka:deta:, ka:dle oplamitapo batalimale oplami mate hatlope depo halloweye? Hao. Epame ka:deta:, hela:dle mate epo amtuwale mate hatlope depo ha:ha:loweye? Hao, poka:dena. <sup>15</sup> Epame ka:deta:, Keliso mate epo bataliya yemala Beliyal mate hatlope depo ha:ha:loweye? Hao, poka:dena. Epame ka:deta:, pomikadepe dlalo wekele oplami mate epo mikadepe dle oplami mate hatlope dloweye? Hao, poka:dena. <sup>16</sup> Epame ka:deta:, biskapa god dlopi dota mita:pleta God ikadepe ya: aiyalma aya dla halloweye?

Hao, poka:dena. Adipalati, dia:ye pasakalo halemhala Godta hallalo ayapo. Epedeme Godtapo epo atluwapo,

“Na:tapo yia: mate halemama yia: dulu dla sela:lowepo.

Na:ta yia: God hallowepo,

epalati yia:tapo na: opa depo ha:ha:lepe,” duwapo.

<sup>17-18</sup> Epedeme itiyamale Godtapo ma epo atluwapo,

“Batalimale koko halomha:ha:lalo so tle alikili a:ma woyapo tame ha:ha:iya.

Epame ullu walle koko tle alikili a:ma potaiya.

Epalati na:tapo wua:ye na:ta hala dla elempuluwepo.

Epame na:tapo wua: A ikadepe depo hallati

wua:tapo na: akimlala epo na: utukaka ikadepe depo ha:ha:lepe,” duwapo.

## 7

<sup>1</sup> Epedeme mikadepe dle so namkadulo, Godtapo yu itiyapo hatitimale hapuloma iye di watle ma-hapiwapo. Epapedeme di ka:dena, God wowota:mama di moto dla epo dita malamale dla ullu hutiyepo hapulomaye alikili a:ma pololepame woloma God mila:pi tle ka:depo ha:ha:lawa.

### *Kolin sotapo malamale meyelope dlati Polota siyele*

<sup>2</sup> Epedeme wua: dia:ye sikemte bokotiyapo malamaiya. Ame adipalati, di wua: dulu dla oplami haleye pobatalimana. Epame oplami haleye batalimale dla posemtana. Epame oplami hale maniye po-uhana. <sup>3</sup> Epapele dulu dla na:tapo wua:ye alimama wua: dla batalimana demama yu iye po-atlamasema. Adipalati, na:tapo ka:yapa wua: watle ma-atlamuwapo, na:ta wua:ye me-sikemte bokotiyapo malahalemama polowe koko mate epo pasakalo depo hallowe koko matetapo dia:ye duka pohukulluwa, duwapo.

<sup>4</sup> Epedeme na:ta wua: watle koko iye haliyamale dla atlapo. Na:tapo wotiyalle hapuloma dulu dla halemama wua: koko dalepame sikemte siyeuwa.

<sup>5</sup> Epapele dulu dla di ala Makedoniya dla puame woyamalati di hedle ka:dle ponatina. Adipalati, opatapo dia: dla upiyele koko hamiwa. Epela natimama dia: dla momalamale patota puwa. <sup>6</sup> Amasiyama dupa kolle dulu dla ha:ha:lalo so gadlalo Godtapo dia:ye gademama Taitesye di hala dla tane duwa. <sup>7</sup> Epalati Taitesta dita hala dla pulati natipame dia:ye sikemte sisiyeuwa. Epame ya:tapo dia: watle wua: koko hapuloma atlamalati dalepame epo ma wua:ta Taites watle siyele hamili koko ma atla dalepame di sikemte sisiyeuwa. Epapeleye Taitestapo di watle wua:ta na: natilowe sikemte solotamale himha:ha: koko mate epo wua:ta na: dla batalimale koko halë tle ma dupa kolle himme ha:ha: kokoye atlati me-daluwa. Epame wua:ta ka:yapa na: tiyama tle pohaha:lalo ha:ha:uwa tle ma heheletipo na: tiyama tle ha:ha: kokoye dalepame na: ma sikemte siyeuwa.

<sup>8</sup> Epedeme na:ta ka:yapa wua: watle yu ilimale hamiwatapo wua: dla dupa kolle hamili dalepame na: ma dupa kolle mate haluwa. Amasiyama na: wata ma dupa kolle mate pahalasema. <sup>9</sup> Hao, na: wata siyele mate halapo. Adipalati, wua:ta dupa kolle koko tle ma malamale meyelope depame God hala dla heheletimale koko dalepame. Epedeme wua:ta dupa kolle himili kokoye Godta solotamale koko mate ala:mama apuwapo. Epapele koko tle ditapo wua: dla ikadepe wotiyalle pohamina. <sup>10</sup> Adipalati, Godta hamili dupa kolle kokotapo dia:ye malamale meyelope depame ma God hala dla elempumhalapo. Epedeme di ka:dena, epapele dupa kolle koko dla sisiyelowe. Adipalati, etapo dia: dla pasakalo gadlowe kokoye hampulupe. Amasiyama ta:lamu dupa kolle kokotapo dupa dulu malamale meyelope dlowe kokoye pohampuasema. Amasiyama polowe koko tlo hampuwapo.

<sup>11</sup> Epedeme God tle puwa dupa kolletapo wua:ta dupa malamale meyelope dle kokoye natiya. Adipalati, etapo wua: dla ipapele kokoye hampuwapo. Eye, wua: sikemte



solotamuwapo, wua:ta sosoka:lipo ha:ha:le kokoye woloma hatotimolowedeme. Epame wua: batalimale koko dla allimduwapo, epo batalimale kokota hampua asiyama dla ma wowota:mduwapo. Epame wua:tapo ma na:ye sikemte natilowe solotamama na: tiyama tle ha:ha:po. Epame wua:tapo batalimale koko halë oplami dla asiyama mahamiwapo. Epedeme koko hapuloma dulu hema wua:tapo ka:ka:dle koko siyapo tlo halomaleye botomastauwapo. <sup>12</sup> Epapedeme na:tapo yu ilimale hamiwaye, batalimale kotiyamalalo oplami koko dla po-apena. Epame ya:ta batalimale hauwa oplami edla po-apena. Amasiyama God mila:pi tle wua:tapo ikadepe na: tiyama tle ha:ha:ma: depo natilowedeme apuwapo. <sup>13</sup> Epapele koko tle dia: dla siyele pato elema.

Epame ditapo Taitesta wua: yilo siyele koko natipame di ma sikemte sisiyeuwa. Adipalati, wua:tapo ya:ye gademama ya:ta momalamale koko dla hedle hamiwapo. <sup>14</sup> Amasiyama ya:ye ala wua: hala dla potlalo hallati na:tapo ya: dla wua: kokoye pepemama di dla hame hetauwa. Epapele dulu dla Taitesta wua: hala dla tame natilati na:ta wua: koko pepemama hamhetauwa kokotapo ikadepe duwapo. Epapele koko tle wua:tapo na: dla wota:le pohamina. Adipalati, ditapo alila hapuloma ikadepe koko tlo wua: dla atlamdiye, epammama dita Taites dla wua: koko di dla hamhetauwa kokota mo-mikadepe duwapo. <sup>15</sup> Epedeme Taitestapo wua:ta ya: dla wota:mama ya: hampame ya: yu dalepame salladuwa kokoye powelisemde. Epapedeme ya:ta wua: sikemte bokotiyapo malamaletapo me-ta:mtapo. <sup>16</sup> Epedeme na: sikemte siyema, wua:tapo na:ta atlamuwa koko hapulomaye matle halomha:ha:la natipame.

## 8

### *Yelusalem dla mikadepe dle so ha:ha: gadlowe dla namkale dle alisisi kolumale*

<sup>1</sup> Epedeme mikadepe dle so namkadulo, Godtapo ya:ta bokotiyapo malamale Makedoniya mikadepe dle so dla hamiwaye wua: watle atlamolowama. <sup>2</sup> Epapele dulu dla yia:tapo upiyele koko mate epo wotiyalle koko mate dulu medla ha:ha:mama sisiyele mate ha:ha:uwapo. Epapele dulu dla yia:ye alisisi dimi ha:ha:uwa tlope mepapele yia:tapo namkale dle alisisiye sikemte kolumduwapo, mikadepe dle so Yelusalem dla ha:ha: soye gadlowedeme. <sup>3</sup> Yao, ikadepe, yia:ta yimkadulo watle alisisi hapulomaye sikemte me-halopimha:ha:mama tla:mtale hapimduwapo. Epapele dulu dla yia:tapo miyelo solotamale tle koko iye halomha:ha:uwapo. <sup>4</sup> Adipalati, yia:tapo dia: dla otele himiwapo, yia:tapo yimkata mikadepe dle so opi mate mikadepe dle so Yelusalem dla ha:ha:ye gadle himilowedeme. <sup>5</sup> Epapele dulu dla yia:tapo Godta solotamale koko dolumsiyamama yia: moto tatile God dla halopimduwapo. Epame yia:tapo di yu dla ma salladepo siyamolowa duwapo. Epedeme yia:ta epapele koko halë tle dita malamale tla:mtale kokoye hauwapo.

<sup>6</sup> Epapedeme Taitestapo ka:yapa wua: gademama Yelusalem mikadepe dle so dla namkale dle alisisi hamiloweye mo-kotiyapame kolumpuwapo. Epapeleye di solotama, Taites ma wua:ta hala dla ilame tane dloweye, ya:tapo wua:ye ma gademama namkale dle hamilowe alisisiye mosukulu kolumtame gudlepo depame. <sup>7</sup> Epedeme wua: natiya, wua:tapo ka:dle yuye ka:pi atlamha:ha:po. Epame ikadepe kokoye ka:pi malapo ha:ha:po. Epame koko hapulomaye itiyamale mate halomha:ha:po. Epame wua: dia:ye sikemte bokotiyapo malamha:ha:po. Wua:ta koko hapuloma ipapele halomha:ha: tle itapu so depo ha:ha:po. Epedeme na: solotama, hamili dulu hema wua:tapo mepo itapu so depo ha:ha:lepo depame.

<sup>8</sup> Epapele dulu dla na:ta atlama koko iye wua:ta me-halomha:ha:lepo depame wua: watle yu itiyamale mate po-atlamasema. Amasiyama na:tapo Makedoniya sota hamili kokoye wua: dla atlema, wua:ta ikadepe sikemte bokotiyapo malamale mate ha:ha:ma: depo natilowedeme. <sup>9</sup> Epedeme wua: di Lod Yesu Kelisota bokotiyapo malamale kokoye mo-wua:malamana. Ya:ye alisisi sikemte pasatale oplami tlope ma wua: yilo

ma alisisi pa:le oplami duwapo, wua:tapo ma alisisi poposatilimale so depo ha:ha:lepo depame. Epapedeme ka:dena, wua:tapo wua: amkadulo mikadepe dle so opi epo gagademha:ha:loweye.

<sup>10</sup> Epedeme wua: na: yu daliya. Alo sokomoko dla wua: tatile mikadepe dle so Yelusalem dla ha:ha: so gadlowedeme solotamale pato himpame mani kolumoloweye mo-kotiyamuwapo. Amasiyama wua: duka medla guduwapo. <sup>11</sup> Epedeme wua: ma itiyamale mate kotiyapame mosukulu dla gudlowedeme kolumtamama wua: dla ala:le hutiyete alisisi mate isikimi me-hapiya. <sup>12</sup> Epedeme wua: siyele mate hapilipiye, Godtapo wua:ta namkale dle hapi koko dla siyelepe. Epapele dulu dla wua: dla pasatale hutiyetelepiye, wua: pasatale mepapeleye hapilipe. Amasiyama wua: dla pase pato hutiyetelepiye, wua: e mate ala:mama pase pato hapilipe. <sup>13</sup> Adipalati, na: posolotamasema, wua:tapo wua: amkadulo Yelusalem so watle sikemte pasatale hapimama asiyama wua: tlo pase pato ha koko dla upiyele natiloweye. Amasiyama na: solotama, hapulomatapo alisisi ala:le mate ha:ha:lepo depame. <sup>14</sup> Amasiyama wata oloma hema wua:ye alisisi sikemte poposatilipo ha:ha:deme, wua:ta yia: gadle himiloweye me-ka:pi. Epame yia:tapo poposatilipo ha:ha:mama asiyama wua:ta alisisi pa:lali ma asiyama yia:tapo wua: gadloweye ala:lepe. Epapele koko tle wua: dulu dla asiyama gade asiyama gade dlowe kokota ellepe. <sup>15</sup> Epapedeme God yu bukatapo Isalael so koko dla epo atlapo, “Mena daya sikemte poposatilipo halomale sotapo yia: mate ma-ala:uwapo.

Epame mena daya koweta halomale so mape yia: ma yia: mate ma-ala:uwapo.”

### *Taitesye Kolin mo dla tane dle koko*

<sup>16</sup> Epedeme na: God hi di dla ta:dema. Adipalati, Godtapo na:ta wua: sikemte bokotiyapo malahala koko hamiwaye, epammama Taites dla mape hamiwapo. <sup>17</sup> Epapele dulu dla Taitesye meyelo solotamale tle wua: hala dla tloweye solotamale himme haluwapo. Epapele dla dita ya:ye wua: hala dla tane dlati ya: ma ika sikemte solotama, wua: hala dla tlowedeme. <sup>18</sup> Epapedeme di ei haleye Taites mate wua: hala dla tane dema. Oplami iye mikadepe dle so hapulomata ya:ye ka:dle oplami demama ya:ye di dla hamhetamde. Adipalati, ya:tapo ka:dle yu woloma ka:pi atlamdepo. <sup>19</sup> Epame mikadepe dle so hapulomatapo ma solotamuwa, oplami hatlo itapo na: mate Yelusalem dla namkale dle alisisi kolumaleye hamtelepo depame. Epapele dulu dla dita namkale dle alisisi iye hamtame hamilipiye, etapo God dla siyele hampumama dia: dla ikadepe diamkadulo gadlowe solotamale elaye botomastlepe. <sup>20</sup> Epapedeme di posolotamasema, dita mani iye hamta koko dla oplami haletapo di yu balloweye. Epedeme ka:dena, dita madipatata namkale dle alisisi iye hamtlowepo. <sup>21</sup> Adipalati, di solotama, Lodta ka:dena dle koko mate epo opata ka:dena dle koko mate ala:mama mani iye woloma omha:ha:lowama.

<sup>22</sup> Epapele dulu dla di matle oplami haleye Taites wolo mate wua: hala dla taiya dema. Adipalati, ditapo oplami ita yimkadulo sikemte gadle kokoye natimduwa. Epapedeme ya: ma sikemte solotama, wua: gadlowedeme. Adipalati, ya: me-ya:malamana, wua:tapo solotamale mate Yelusalem so gadlowedeme ha:ha: kokoye. <sup>23</sup> Epedeme Taitesye na: mate wua: yilo oko halalo oplamipo. Epapeleye na:tapo ya:ye wua: hala dla tane dema. Amasiyama opa dapiyamte iwoloye sos hema popa:tapo Taites mate wua: hala dla taiya dema. Opa ewoloye ka:ka:dle sopo, Keliso dla siyele hamilalo sopo. <sup>24</sup> Epapedeme opa iwolotapo wua: hala dla pulati wua:ta yia:ye sikemte bokotiyapo malaha:ha:le kokoye haliyamale dla nati-ya, sos hapulomatapo na:ta wua: koko di dla hamhetauwaye ikadepe mleni dlepo depame.

<sup>1</sup> Epedeme na:tapo wua: dla Yelusalem so watle namkale dle alisisi hamilowe dla ma yu ilimale hamilowe poka:dena. <sup>2</sup> Adipalati, na:malamana, wua:ta yia: gadlowe dla solotamale me-elapo. Epedeme na:tapo Makedoniya mikadepe dle so dla wua: kokoye di dla hamhetamama epo atluwapo, “Mikadepe dle so Kolin dla ha:ha:lalotapo alo sokomoko dla Yelusalem so dla gadle himilowedeme ma-dinapopo ha:ha:uwapo,” duwapo. Epapele koko tle Makedoniya mikadepe dle sota koko i dalepame yia: ma Yelusalem so dla namkale dle hamilowe dla sikemte solotamale himiwapo. <sup>3</sup> Amasiyama na: Taites mate epo ya:mkadulo mate wua: hala dla taiya dema, wua:tapo maniye ikadepe mo-kolupo himha:ha:ma: depo natilowedeme. Adipalati, na: posolotamasema, na:ta wua: koko dla wua:ye di dla hamhetauwa kokotapo isikimi koko pa:le elloweye.

<sup>4</sup> Epedeme na:tapo Makedoniya dla ha:ha:lalo mikadepe dle so mate wua: hala dla pulupiye, na: solotama, wua:tapo mani kolumale e mate ma-dinapopo ha:ha:loweye. Amasiyama epapele dulu dla yia:ta puame wua:ta ala podinapolalo ha:ha:la natilipiye, koko etapo na: dla wota:le hamilipe. Epame wua: mape wota:le ipiye me-halepe. <sup>5</sup> Epapedeme na: Taites wolo tatile wua: hala dla taiya dema, wua:ta namkale dle alisisi kolumha:ha:lowa duwa kokoye natilowedeme. Epapele tle na:ta tlowe oloma edla mani kolumale etapo ma-dinapopo ellepo depame. Epapele dulu dla mani iye muwolo solotamale tle hamilipe. Amasiyama na:tapo wua: akumulati pohamilowa.

<sup>6</sup> Epedeme wua: koko iye malamaiya. Oplamita alisisi pase pato emelepiye, ya: ma mepo alisisi pase pato hauwallepe. Amasiyama oplami antapo alisisi pasatale emelepiye, ya: ma mepo alisisi pasatale hauwallepe. <sup>7</sup> Ka:dena, oplamitapo meyelo solotamale mate ala:mama siyele mate namkale dleye hamilipe. Epele dulu dla poka:dena, isikimi ya:mkaleta ha:ha:mlati namkale dle alisisi hamilowe. Adipalati, siyele mate hamilalo oplami dla Godtapo bokotiyapo malamhalapo. <sup>8</sup> Epame Godtapo wua: gadle tle wua: dla alisisi ala:leta hutiyelati asiyama ma wua:tapo opa opi gadloweye ala:lepe. <sup>9</sup> Adipalati, God yu buka dla epo atlapo,

“Ka:dle oplamitapo siyele mate yimkadulo alisisi pa:talo so dla isikimi me-halopimhalemdepo.

Epame Godtapo ya:ta ka:dle koko halomhalale hapulomaye powelilowa.”

<sup>10</sup> Epapedeme Godtapo alisisi emalalo oplami dla alisisi aleye hapimhalemama dlowe alisisi ma hapimhalapo. Epedeme ya:tapo wua: watle ka:ka:dle koko hapulomaye dlomoko ale some emelepo depame hapilipe. Epalati asiyama wua:tapo ka:ka:dle kokoye emale alisisi some hauwalepame ma alisisi pa:talo soye gadlepe. <sup>11</sup> Yao, ikadepe, Godta wua: dla gadle pato himhallepe, wua:tapo opa opi dla isikimi me-hapimha:ha:lepo depame. Epapele dulu dla ditapo wua:ta namkale dle alisisi kolumaleye Yelusalem mikadepe dle so dla hamtlati yia:tapo siyele yu God dla atellepe.

<sup>12</sup> Epapele dulu dla wua:ta koko ha ita hatlo wua: amkadulo mikadepe dle soye gadlowe dla po-apsema, amasiyama yia:tapo God dla ma siyele ta:dlepo depo apopo. <sup>13</sup> Epedeme wua:ta Yelusalem mikadepe dle so dla gadle pato himiye, wua:ta mikadepe dle kokoye nati-imama apopo. Wua:ta yia:ye epo gadlepiye, asiyama yia:tapo wua:ta ka:dle yu Yesu Keliso koko dla salladepo siyama koko mate epo wua: amkadulo mikadepe dle so dla gadle pato himha:ha: koko mate natimama God dla siyele ta:dlepe. <sup>14</sup> Epapele dulu dla yia:tapo wua:ye yia: dupa dulu tle sikemte malamale mate wua:ye God dla inoma sumale mate ta:dlepe. Ame adipalati, wua: dulu dla Godta bokotiyapo malamale patotapo elapo. <sup>15</sup> Epedeme God dla siyele ta:diya. Adipalati, ya:tapo Yamiye di watle hamiwapo. Namkale dle alisisi iye pta sikemte pato. Epedeme ditapo Godta namkale dle alisisi hamili hema yu atloweye yuta po-ala:sema.

## 10

### *Polota ya: oko koko dla ya:skamu ya: koko atlale*

<sup>1-2</sup> Epapedeme wua: dulu dla opa opitapo na: koko dla epo atlamyapo, “Polotapo dia: mate halemama hopeyamale mate yu atlamhalemde. Amasiyama ya:tapo dia: tle alikili a:ma tame halemama yu ilimale tle dia: dla yu itiyamale mate sikemte atlamhalemde,” demyapo. Epame wua: dulu dla na: watle ta:lamo oplami some halema depo atlalo so ma me-ha:ha:po. Epedeme na:tapo saddle mate epo bokotiyapo malamale mate hallalo Keliso hi tle wua: dla otele himima, na: yu ballalo sotapo na:ta puluwe dla omha:ha:mama yia: bobtalimale tle heheletimelepo depame. Yia:ta epapelepiye, eta na: puame yia: watle yu itiyamale mate po-atlowa.

<sup>3</sup> Epapedeme, yao ikadepe, di ta:lamo hema ha:ha:po. Amasiyama di ta:lamo sota opahale demdiye pe-epapesema. <sup>4</sup> Adipalati, dita opahale alisisi halopo opahale demdiye pota:lamo opahale alisisi epapena. Amasiyama di God ya: opahale alisisi itiyamale eye halopo opahale demama Saitenta itiyamaleye yumdepo. <sup>5</sup> Epame opahale alisisi i mate ta:lamota malamale mate epo ya:skamu di dla hamhetlowe koko mateye yumdepo. Adipalati, ipapele kokotapo God koko malamolowe apiye himomelemdepo. Epame ma opahale alisisi i mate opata malamaleye meyeloje depame ma Keliso dla salladepo siyamolowe dla elempumdepo. <sup>6</sup> Epedeme wua: Keliso dla salladepo siyapame ma ya: yu dla salladlowe allipiye, di wua: dla asiyama wotiyalle hamiloweye ma-dinapopo ha:ha:po.

<sup>7</sup> Epapedeme wua: koko hapuloma dulu dla woloma heheletipo natiya. Epapele dulu dla oplami antapo ya:skamu ya:ye Keliso ya: oplami dlepiye, ya: ma ka:dena, di watle atlemama, “ewolo ma Keliso ya: opapo,” dloweye. <sup>8</sup> Yao, ikadepe, na: Lodta na: watle itiyamale hamiwa tlo di dla hame hetloweye powota:sema. Epedeme Lodta na: watle itiyamale hamiwaye wua: dla wotiyalle hamilipo depo po-apena. Amasiyama wua: gadlepo depame apuwapo.

<sup>9</sup> Epapele dulu dla na: na:ta yu ilimale hapuloma i mate wua: dla wota:le hamilowedeme po-apesema. <sup>10</sup> Adipalati, opa opitapo epo atlamyapo, “Polotapo pateka:mu tle dia: dla yu ilimale hamimama yu itiyamale mate ilipo hami demhalema. Amasiyama ya:tapo dia: mate hala oloma edla ya: sikemte hopeyamale mate halemama yu pase itiyamale mate po-atlamhalasemde,” demyapo. <sup>11</sup> Epapedeme opa epapele sotapo koko iye malamolowe ka:pi. Adipalati, na: wua:ta hala dla pulupiye, na:ta wua: dla yu itiyamale mate ilimale hapiwa e mate ala:mama wua: dla yu itiyamale mate atlowepo.

<sup>12</sup> Epedeme di opa yiskamu yia: tlo natimama yia: tlo ka:ka:dle dlalo so mate po-hatlope dlowa. Adipalati, opa iwoloye sikemte yiyilalimale sopo. <sup>13</sup> Epedeme di Godta di watle hamili oko tlope di dla hamhetamsiyamama Godta gudlowe sukulu himiliye potla:mtlowa. Amasiyama wua:ye di oko sukulu himili dulu dla me-ha:ha:po. <sup>14</sup> Adipalati, di tatile ka:dle yu Keliso kokoye wua: watle atlampuwapo. Epapedeme ditapo di oko kokoye woloma ala:le mate di dla hamhetamsiyamapo. Amasiyama dita ka:dle yuye wua: dla pohampulalo wekematiye, di diskamu di dla pohamhetamsiyama.

<sup>15</sup> Epame di yimkadulota oko halë natipame ma dita eledomama oko eye dita hauwa pe-epapesemde. Amasiyama di isikimi di oko tlo di dla hamhetamdepo. Epame di solotama, wua:ta mikadepe dletapo ta:mama dita wua: dulu dla oko hauwatapo ma a:ma ta:lepo depame. <sup>16</sup> Epapelepiye, ditapo Kolin mo tle ma mo opi dla ka:dle yu podallalo wekele so opa dla ka:dle yu hame atlamtallowepo. Adipalati, di posolotamasema, ya:mkaleta oko halë mo dla ma dita oko halë some diskamu di dla hamhetloweye.

<sup>17</sup> Adipalati, God yu bukatapo epo atlapo,

“Oplamitapo ya:skamu di dla hamhetlowe solotamelepiye,  
ya: ka:dena, isikimi Lodta koko halë tlo di dla hamhetlepe.”

<sup>18</sup> Epedeme opa anawolotapo yiskamu yia: tlo ka:ka:dena depo malamdi, epapele so opaye ikadepe poka:ka:dle sopo. Amasiyama opa anawoloye Lodtapo ka:ka:dle so demhalema:, opa ewoloye ikadepe ka:ka:dle sopo.

## 11

### *Polo mate epo biskapa koko imalalo so mate*

<sup>1</sup> Epapedeme namkadulo, na:ta weya yiyilamale sepele mate naskamu di dla hamheta sepelati natipame mepele na: yuye me-daliya. <sup>2</sup> Epedeme Godtapo wua: dla dupa elaye epammama na: mape wua: dla dupa elapo. Adipalati, homta pollalo ipilaloye ya: ata oplami watle hamilowedeme yu himmdiye, epammama na:tapo wua:ye Keliso watle hamilowedeme yu himiwapo. <sup>3</sup> Amasiyama na: wota:ma, Ib dla koko woyamale epapele kokotapo wua: dla woyamalala depame. Adipalati, ilamatapo Ibye elemala natilati batalimale dulu dla seme tuluwaye, epammama biskapa imalalo sotapo wua: elemala natipame Keliso tle alikili a:ma elemtamallala. Epedeme na: wua: yilo dupa yuma. <sup>4</sup> Adipalati, wua: opa opitapo puame biskapa kokoye imalati woloma poheheletipo natalalo ma hapele yia: yu dla tulumdepo. Epame yia:ta Yesu koko imama dita imuwa mate pohatlope dlalo wekelati yia: yu halowe ma po-alisemde. Epammama wua: Hela:dle Sokoye ma-hamuwa tlope matle ulugiyemale soko hamolowe mape po-alisemde.

<sup>5</sup> Epame wua:tapo biskapa koko imalalo so iwoloye taiya dle so opa patotopo demha:ha:po. Amasiyama na:ta malamaletapo yia:ta malamaley mo-tla:mtame halapo. <sup>6</sup> Epedeme yao, ikadepe, na: opa mila:pi tle woloma ka:pi yukamolowe malamale pohana. Amasiyama na: ka:dle yu koko dla malamale sikemte pato elapo. Epedeme na:tapo koko iye alila hapuloma dulu dla wua: watle ma-nalati-imhaluwapo.

<sup>7</sup> Epapedeme na:tapo asiyama pa:le God tle puale ka:dle yuye isikimi wua: watle me-atlamsela:mduwapo. Epame na:tapo naskamu isili dla hame tuluwapo, ma asiyama wua: tlo di dla ta:dlowedeme. Epapele dulu dla na:ta asiyama pa:le God yu atlemduwaye, na: batalimale koko hamama ammduwa? Hao, pe-epamdena. <sup>8</sup> Epedeme mikadepe dle so mo opi dla ha:ha:lalota na: watle mani hamilati na:tapo mani e hapame wua: yilo oko hamduwapo. <sup>9</sup> Epapele dulu dla na:ta wua: mate haluwa oloma edla na: alisisi dimi halemama wua: dla alisisi podalemdena. Amasiyama Makedoniya dla mikadepe dle so ha:ha:lalotapo na: watle alisisi halopo puame hapiwapo. Epedeme na: wua: dla alisisi hale podalemdena. Epame matle na:tapo wua: watle alisisi hale podallowa. <sup>10</sup> Epapedeme Kelisotapo ikadepe koko tlo atlamsela:uwaye, epammama na: mape wua: dla ikadepe koko tlo atlema. Adipalati, wua: yilo oko hamhalemama wua: dla mani po-otlalo wekemduwa koko dla naskamu di dla hamhetama. Epedeme Akaya mo pato dulu dla oplami haletapo na:ta naskamu di dla hamheta koko hema humatloweye po-ala:na. <sup>11</sup> Epapele dulu dla na: adipalati wua: dla alisisi podallalo wekemdi? Na:ta wua: dla pobokotiyapo malamalalo wekele koko tle amma:? Hao. Adipalati, God me-ya:malamana, na:ta wua: sikemte bokotiyapo malamhala kokoye.

<sup>12</sup> Epapedeme na:ta oko hamsela:mama opa dla mani po-otlalo wekemduwaye, mepamhalowama. Adipalati, biskapa koko imalalo sotapo epo atlamsiyamapo, "Polota koko hamsela: epapeleye di ma hatlo mepapele koko tlo hamsiyama," demsiyamapo. Epapele koko tle na: solotama, epo atlamsiyama so opaye humatlowedeme. Adipalati, yia: tlo yia: oko asiyamaye halomha:ha:po. <sup>13</sup> Opa iwoloye po-Taiya dle so ikadepe. Yia:tapo yiskamu yia:ye Keliso ya: Taiya dle so depame wua:ye elemala natimha:ha:po. <sup>14</sup> Amasiyama na: koko hema pase totokoleyapsema. Adipalati, Saiten mape ya:skamu ya:ye Hela:dle banakaka some yepo halemdepo. <sup>15</sup> Epapedeme Saiten ya: oko sotapo ma God ya: opa ka:depo ha:ha:lalo so some ha:ha:lati natipame di poyiyellowa. Amasiyama mosukulu alila dla yia:tapo yia:ta batalimale koko halomha:ha:le mate ala:mama yia: batalimale asiyama halepe.



*Polota Keliso yilo wotiyalle halë kokoye atlale*

<sup>16</sup> Epedeme na: matle wua: watle ipo atlema, na:ye yiyilamsela:ma depo malamiya. Amasiyama wua: na:ye yiyilamsela:yo depo malamelepiye, wua: yiyilamale oplamita atlamsela:la dalemkiye, epammama na:ta naskamu di dla hamheta yu i ma daliya.

<sup>17</sup> Epapele dulu dla na:ta ipo naskamu di dla hamhetaye Lodta yukamalalo epo yukamama po-apesema. Amasiyama na: weya yiyilamale oplami some yukamapo.

<sup>18</sup> Amasiyama biskapa koko imalalo so hapulomatapo yiskamu di dla halopo hehetamkiye, epammama na: mape naskamu di dla hamhetapo. <sup>19</sup> Epapele dulu dla wua:ye wuskamu sikemte momalamale so demdepo. Amasiyama wua:ye ikadepe yiyilamale so some ha:ha:po. Adipalati, wua:tapo sikemte sisiyele mate yiyilamale so yu dallowe tlo solotamdepo. <sup>20</sup> Adipalati, biskapa koko imalalo sotapo yiskamu yia:ye wua: dokopala so demyelati wua: yia:ye alikili a:ma poposalesemde. Epame yia:tapo wua:ye elemale tle wua: alisisiye isikimi halomalati wua: yia:ye po-atlamasemde. Epame yia:tapo yiskamu yia: tlo di dla hamhetamama asiyama wua: tlo isili dla hamtulupame ma yu batalimale wua: dla atlamalati wua: asiyama yia:ye po-alisemde. <sup>21</sup> Epapele dulu dla na: siyema. Adipalati, na: epapele kokoye wua: dla pohalomsela:na.

Epedeme na: ala me-yiyilamale oplami some yukamama opa opita yiskamu di dla halopo hehetamama yuhamkiye epapolowepo. <sup>22</sup> Epapele dulu dla biskapa koko imalalo sotapo yiskamu yia:ye Hibulu so demdepo. Epele tlope na: mape Hibulu oplamipo. Epame yia:tapo yiskamu yia:ye Isalael so demdepo. Epele tlope na: mape Isalael oplamipo. Epame ma yia:tapo atlemama yia:ye A:iblaham ya: mamadulo demdepo. Epapele tlope na: mape A:iblaham ya: mamapo. <sup>23</sup> Epame ma yia:tapo atlemama yia:ye Keliso ya: oko so demdepo. Amasiyama na:tapo Keliso ya: oko oplami depo halemama itiyamale mate oko hauwata yia: okoye tla:mtame halapo.

Epame na: tlope alila pasatale amtuwale aya dla tutula:mhalemduwapo. Epame na:ye opata sikemte hopolemduwapo. Epame na:ye mo-yumuluwe mateka:pi dla halemduwapo. <sup>24</sup> Epame do supulastale oloma dla Yu so dokopala sotapo na:ye dea mate hopolemhalemama sesa:mtame 39 dla guduwapo. <sup>25</sup> Epame dapahatlope oloma dla Loum dokopala sotapo na:ye dali mate hopoluwapo. Epo ma hatlo oloma dla opatapo na:ye ewalata kelemama yumula yakomuwapo. Epame dapahatlope oloma dla koa pato tle tamalemama koatapo olloduwapo. Epo alila hale dla koata kaula duka dla ollodlati na:ye kaula duka dla yúta halemsele:mama alila mate epo utula:la mate pololuwapo. <sup>26</sup> Epapedeme na:ta sela:le dulu dla aloma yú pupualemale dulu dla aloma u-ula:msela:mama mo-pola yakomuwapo. Epame uhalalo sotapo na: mo-yumula yakomduwapo. Epame mo-na: opa Yu so mate epo po-Yu so mateta na:ye mo-yumula yakomduwapo. Epapele dulu dla na:ye mo patoto dla epo dalupa dulu dla epo kaula pato dulu dla mo-pola yakomduwapo. Epame opa yiskamu yia:ye mikadepe dle so dlatotapo na:ye mo-yumula yakomduwapo.

<sup>27</sup> Epapele dulu dla na:tapo oko pato ma-hauwapo. Epame na: utula:la opi dla woloma ka:dle elale pohamdena. Epame na: alila opitapo yú ta:le mate epo daya ta:le mate halemduwapo. Epame daya dimi halemama tluca alisisi ma pa:po kapumale dulu dla halemduwapo. <sup>28</sup> Epapedeme na: wotiyalle hapuloma dulu hema me-tamama mikadepe dle so hapuloma yilo sikemte momalamale pato himhalemdepo. <sup>29</sup> Epapele dulu dla mikadepe dle oplamitapo hopeyamale natilipiye, na: ma hopeyamale hatlo meye natimdepo. Epame oplami haletapo ya:mkaleye batalimale dla semtullati nati-mama asiyama na: dla wotiyalle hamimdepo.

<sup>30</sup> Epedeme na:tapo naskamu di dla hamhetle dlepiye, na: isikimi na: dla hopeyamale koko ela tlo di dla hamhetlowedeme apelepe. <sup>31</sup> Epapedeme di Lod Yesu ya: A God dita siyele hamilalo mape me-ya:malamana, na:tapo ikadepe yu tlo atlama kokoye. <sup>32</sup> Epedeme na:tapo Damasko mo dla tame hallati dokopala oplami Aletas ya: oko

oplamitapo na:ye yumuluwedeme solotamuwapo. Epammama ya: opatapo na:ye hamolowedeme mo kosukulli kokoloma tala dla omha:ha:mduwapo. <sup>33</sup> Amasiyama namkadulotapo na:ye yekalo dulu dla hamatipame mo kosukulli opokoko tle deata himomelepo alikili a:ma halumtuluwapo. Epalati na:tapo etle alikili a:ma teletauwapo.

## 12

### *Polota inomata meyelope dle koko*

<sup>1</sup> Epapele dulu dla na:ta naskamu di dla hamheta koko iye pta dulu koko pa:na. Amasiyama na:tapo naskamu di dla me-hamhetamhalemama na: inomata meyelope dle koko mate epo Lodta na: dla bobotimatimuwa koko mate wua: dla atlamolowama. <sup>2-3</sup> Epedeme 14 sokomoko mo-pololepo haluwa oloma edla na:ye Pepele dimo ikadepe dla hamame hetauwapo. Epapele dulu dla na: pona:malamana, na:ye ikadepe na: moto mate Pepele di dla hamame hetauwo-o, o isikimi inomata meyelope demama natiwo-o. Amasiyama koko eye hatlo God tlo ya:malamana. <sup>4</sup> Amasiyama epapele tlope na:malamana, na:ye Pepele dimo dla hamame hetauwapo. Epapeleye na: edla ka:ka:dle koko hapuloma yuta atlowe wekele kokoye daluwapo, koko eye na:tapo haliyamale dla bobotimatipo atlamoloweye pta aiyalma. <sup>5</sup> Epapedeme na:tapo Pepele dimo kokota na: dla woyamuwa koko tlo di dla hamhetlowe tlo ka:pi. Epapele tlope na:ta koko eye di dla pohamhetlowa. Epapele dulu dla na:ta naskamu di dla hamhetle dlepiye, na: isikimi na: dla hopeyamale koko ela tlo di dla hamhetlowedeme apelepe. <sup>6</sup> Amasiyama na: inomata meyelope demama tlamale koko hapulomaye di dla halopo hetlowe solotamelepiye, eta na:ye poyiyilamsela:mama apolowa. Adipalati, na: isikimi ikadepe koko tlo atlamolowedeme apelepe. Amasiyama wua:tapo na:ye di dla hamhetlala depame na:tapo na: inomata meyelope dlati tlamuwa kokoye matle po-atlamsela:lowa. Adipalati, na: solotama, wua:ta isikimi na:ta koko halomsela:la natiwa mate epame atlamsela:la dlaluwa koko mate tlo malaha:ha:lepo depo amma.

<sup>7</sup> Epapedeme Godtapo na: inomaye meyelope depame ka:ka:dle koko hapulomaye na: watle nati-iwapo. Amasiyama na:tapo koko edla naskamu di dla hamhetlala depame Saiten ya: banakaka oplamiye na: moto dla tuwale some wotiyalle hamilalo hallepo depame tane duwapo. <sup>8</sup> Epapele dulu dla na: Lod dla dapahatlope oloma dla inoma sumale himiwa, Lodtapo na: dla wotiyalle ela eye alikili a:ma hamastlepo depame. <sup>9</sup> Amasiyama ya:tapo na: watle epo atluwa, "Na:ta bokotiyapo malamaleye wa: mate mala:po halapo. Adipalati, wa:ta hopeyamalati na:ta itiyamaletapo wa: mate halemdepo," duwa. Epapedeme Kelisota itiyamaleta na: dulu dla hallepo depame na:tapo na: dla hopeyamale koko ela tlo naskamu di dla hamhetlowepo. <sup>10</sup> Epedeme na: Keliso yilo wotiyalle halowe dla sikemte siyema. Epapedeme na:ta hopeyamale dulu dla epo opata na: hi mate batalimale yu atlamalati epame kokalle koko mate wotiyalle koko mate dulu dla me-siyele mate hallowepo. Adipalati, na:tapo hopeyamalati Kelisota itiyamaletapo na: mate hallepe.

### *Polota Kolin mikadepe dle so dla bokotiyapo malamale himhalale*

<sup>11</sup> Epedeme na:tapo ipo yiyilamale koko atlaye wua: batalimale koko tle apopo. Adipalati, wua:tapo na: koko dla ka:ka:dle koko siyapo tlo atlamha:ha:lowe ka:pipo. Epapele tlope wua: pe-epapesema. Amasiyama na:ye koko pa:le oplami. Epapele tlope biskapa koko imalalo so ewolotapo na:ye potla:mtame ha:ha:sema. <sup>12</sup> Ame adipalati, na: tlo sikemte itiyamale mate halemama na:tapo ikadepe Taiya dle oplami depo hala kokoye wua: watle nati-imama wua: dulu dla itiyamale mate ulugiyemale kokoye manalati-imhaluwapo. <sup>13</sup> Epapedeme na:tapo mikadepe dle so opa opi mate halemama koko halomhaluwaye ma wua: mate halemama koko hatlo metlo halomhaluwapo. Epapele dulu dla na:ta wua: dulu dla halemama koko hatlo na:ta pohalalo wekuwaye

ipo. Na: wua: watle alisisi hale po-otomdena. Epele dulu dla koko iye na:ta batalimale koko hauwa? Hao, pe-epapena.

<sup>14</sup> Epapedeme na: wata oloma hema dapahatlope oloma dla wua: hala dla puame natiloweye ma-dinapopo halapo. Epame na:ta wua: hala dla pulupiye, na: alisisi hale yilo wua: dla podallowa. Na:ye isikimi wua:ye sikemte malamama wua: natila puma, amasiyama na:tapo wua: mani pahalowa. Adipalati, yimlalatapo aduloye po-omha:ha:semde. Amasiyama adulo tapo yimlalaye omha:ha:mdepo. <sup>15</sup> Epapedeme na: sikemte solotama, na: dla hutiyeye alisisi mate epo na: moto mate wua: yilo oko dla himilowedeme. Na:tapo wua:ye sikemte bokotiyapo malamhalapo. Ame wua: adipalati na:ye pase bokotiyapo malamalalo ha:ha:ma:?

<sup>16</sup> Epedeme na:ta wua: dla alisisi po-otlalo wekemduwa kokoye wua:ta hapuloma mo-wua:malamana. Amasiyama wua: dulu dla opa opita na:ye semte mala-atlemsela:mama wua:ye elepame wua: mani uhamtlowedeme apopo demyapo. Epapele tlope na: adipo epapele kokoye wua: dla hapa:? <sup>17</sup> Epele dulu dla opa na:ta taiya duwa, ewolotapo tame wua:ye elepame wua: mani hauwa? Hao, pe-epapena. <sup>18</sup> Epame na: Taites mate epo di ei hale mate wua: hala dla taiya duwapo. Epele dulu dla Taitestapo wua: maniye elemale tle hapame tauwa? Hao, pe-epapena. Adipalati, mo-wua:malamana, Taites mate epo na: mateye dupa malamale hatlope depame koko halomdepo.

<sup>19-20</sup> Epapedeme dita koko ipo atlamalati wua:ta malamaletapo Poloye isikimi ya:ta batalimale koko halë me-kesoma demyayo. Amasiyama koko eye pomikadepe. Adipalati, di God mila:pi tle dia:ye Keliso ya: oko so ikadepe demama wua:ye imha:ha:po. Epedeme mikadepe dle so namkadulo, di isikimi wua: gadlowedeme apoma, wua: dulu dla ipapele kokota hutiyelala depame. Eye yu topulolle koko epo ya:mkale ellewe koko epo siyaladlowe koko epo ya:skamu ya: tlo malamolowe koko epo putlomale yu atlowe koko epame yu ballowe koko epo ya:skamu di dla hamhetlowe koko epo aiyalma pa:po ha:ha:lowe koko. Wua:ta ipapele koko dulu dla ha:ha:lali na:ta puame natilipiye, na: wua: dla sikemte siyalademama yu itiyamale mate atellepe. Amasiyama wua: posolotamasema, na:ta ipapele koko wua: dla haloweye. <sup>21</sup> Epame na: ma posolotamasema, na:ta ma ilame puale oloma dla wua: dulu dla opa opitapo yia: bobtalimale dulu dla ala me-ha:ha:mama opa mate wola: mate uhalowe koko mate epame ullu walle koko mate dulu dla ha:ha:la natiloweye. Wua:ta epapele koko dulu dla ha:ha:lali na:ta puame natilipiye, Godtapo wua: mila:pi tle wua: yilo na: dla wota:le mate dupa kolle mate hamilipe.

## 13

### *Polota mosukulu molo atlale yu*

<sup>1</sup> Epedeme na: wata dapahatlope oloma dla wua: puame natilowedeme mo-dinapopo halema. Adipalati, God yu bukatapo epo atlapo, “Opa dapiyamte epapele o opa dapahatlope epapeletapo koko hadima ikadepe yu atlepiye, koko eye ikadepepo,” depo. <sup>2</sup> Epapele dulu dla na:ta dapiyamte oloma dla wua: mate halemama batalimale koko halomalalo so dla yu itiyamale mate ma-atlamhaluwapo. Epedeme na: opa ewolo dla mamisika: atlema, na:ta ilame puame wua:ta ala batalimale dulu dla ha:ha:la natilipiye, na: wua:ye sikemte atellepe. <sup>3</sup> Epedeme na:ta koko iye halowepo. Adipalati, wua:tapo Kelisota na: tle oko ha kokoye ikadepe natilowedeme solotamapo. Amasiyama epapele dulu dla Kelisotapo wua: dulu dla oko haloweye pohopeyamasema, asiyama ya:ye itiyamale mate wua: dulu dla me-halapo. <sup>4</sup> Yao, Kelisotapo hopeyamale mate dali yekelemhimili di dla eluwaye e ikadepepo. Amasiyama watapo ya:ye Godta itiyamale tle halapo. Epapele dulu dla di ma hohopeyalimale tlope Keliso dulu dla ha:ha:mama Godta itiyamale hapo ha:ha:po. Epedeme dita wua: tame natilowe oloma edla di itiyamale i mate wua: dulu dla oko halowepo.

<sup>5</sup> Epapedeme wua:ye woloma mikadepe dle koko tle dolumtamalema: depame wuskamu woloma kulume natiya. Epapele dulu wua: Yesu Kelisota wua: dulu dla pohallalo wekelepiye, etapo wua:ta ikadepe pomikadepe dle so some ha:ha: kokoye nati-imama apelepe. <sup>6</sup> Amasiyama na: mikadepe dema, wua:tapo dia:ye ikadepe Taiya dle so demdepo. <sup>7</sup> Epedeme di God dla inoma sumale yu himima, wua:tapo ma batalimale koko pohalomalalo wekelepo depame. Epapele dulu dla opatapo dia:ye ka:dena dlepo depame inoma sumale yu iye pohimisema. Amasiyama wua:tapo ma woloma ka:depo ha:ha:lepo depo apopo. <sup>8</sup> Epapedeme di poka:dena, ikadepe kokoye humatloweye. Amasiyama di ka:dena, ikadepe koko yilo oko haloweye. <sup>9</sup> Epame dita hohopeyamale oloma edla ma asiyama wua:ta itiyamalati di koko edla sikemte sisiyemde. Epedeme koko hema di inoma sumale yu himima, wua:tapo Lod dulu dla mo-opa depo ha:ha:lepo depame. <sup>10</sup> Epedeme na:tapo wua: watle yu iye ilipo hamima, na:tapo ma wua: hala dla tame yu itiyamale mate wua: watle po-atlamalalo wekelepo depame. Adipalati, na: solotama, Lodta na: watle hamiwa itiyamale i mate wua: gadloweye. Amasiyama na: itiyamale i mate wua: dla wotiyalle hamiloweye posolotamasema.

<sup>11</sup> Epapedeme mikadepe dle so namkadulo, na: yu mosukuluye ipo. Wua: sisiyele mate ha:ha:iya. Epame wua: malamale ka:depame na: yuye welimiya. Epame wua: dulu dla yu topulolemha:ha:miya. Amasiyama sadle mate ha:ha:iya. Epapelepiye, bokotiyapo malamalalo Godtapo wua: mate halemama ya:ta sadle kokoye wua: dla hamilipe.

<sup>12</sup> Epedeme wua: Keliso dulu dla ha:ha:mama namkale dle mate asiyama huhulama asiyama huhulama demha:ha:iya. Epapedeme mikadepe dle so hapuloma hema ha:ha:tapo yia:ta namkale dle yuye wua: dla hamipo.

<sup>13</sup> Epedeme Lod Yesu Kelisota bokotiyapo malamale mate epo Godta bokotiyapo malamale mate epame Hela:dle Soko mate hatlope dlowe koko matetapo wua:ta hapuloma dulu dla hutiyelepe.

## Polota Galasiya sos dla yu ilimale hamili Galasiya

### Galasiya buka ya: dulu koko

Galasiya sos iye ka:yapa Polota Taiya dle oko hamsela:mama kotiyamaiyo. Amasiyama ma Polo ko tle Yu so opa opitapo edla pumulaiyo. Polo ko tle pumulale Yu so opa iwolotapo yia:ta imale dulu dla Poloye ikadepe po-Taiya dle oplami demdiyo. Epame asiyama yia:ta imama opa watle epo atlemdiyo, “Wua: pasakalo halowe solotamelepiye, wua: Mosesta aiyalma hatitimale dolumha:ha:mama kapala kotimha:ha:lepe,” demdiyo.

Epele dla Polotapo koko iye alotle dalepame alimama yu ilimale iye Galasiya mo dulu dla sos hapuloma dla halopiyo. Yu ilimale dulu hema Polota ya:skamu ya:ye Taiya dle oplami ikadepe dle kokoye ilimaiyo. Epame ma Galasiya so watle yu itiyamale hamimama epo atlaiyo, “Wua: opa opita puame wua: dla ma amko koko imalati edla ikadepe demiyo. Adipalati, oplamitapo isikimi Yu so aiyalma dolumale tle pasakalo hallowe pahalowa. Amasiyama isikimi hatlo Yesu Keliso dla mikadepe dle koko tle oplamitapo pasakalo hallowe halepe,” diyo.

<sup>1-2</sup> Na: Taiya dle oplami hale Polopo. Na:tapo Galasiya mo pato dulu dla sos popa:mta dla yu ilimale iye hamima. Isikimi opatapo na: sepame Taiya dle okoye pohamina. Amasiyama Yesu Keliso mate epame ya:ye powale tle ta:duwa God mate na:ye sepame Taiya dle okoye hamiwapo. Epame namkadulo na: mate ha:ha: mikadepe dle so mate dita yu ilimale iye wua: watle hamima.

<sup>3</sup> Epedeme A God mate epame Lod Yesu Keliso mate yia:ta bokotiyapo malamale mate sadle mateta wua: dulu dla ellepe. <sup>4</sup> A Godta solotamale koko e dolumama Kelisota di batalimale yilo ya: pasakaloye polowe dla himiwapo, dita ta:lamo batalimale dulu dla ha:ha:lali elepo alikili dla woyamolowedeme. <sup>5</sup> Epapedeme ka:dena, God hi di dla ta:demama ya: dla siyele hamilowe kokotapo kokó elepo ellowe tlo ellepe. Eye ikadepepo.

#### *Ka:dle yu hale hawa ikadepe*

<sup>6</sup> Godtapo dia:ye Kelisota bokotiyapo malamale tle sisilapame ma ya: akimlala duwapo. Amasiyama epapele tlope ma wua:ta ka:dle yu ka:yapa daluwa e hapele memelepame ma api hale dla tlowedeme apalati dalepame yelemama na: pomikadepedesema. <sup>7</sup> Epele dulu dla wua:ta api hale dolumta eye poka:dle yu ikadepe. Amasiyama opa opitapo wua:ye yiyilamale koko dla elemtlowedeme Keliso kokoye meyelope depo imama apopo. <sup>8</sup> Amasiyama ditapo ka:dle yuye wua: watle ma-atlamuwapo. Epele dulu dla oplami antapo ka:dle yuye ma-ilahame meyelope depo imsula:lepiye, ka:dena, ya:ta Dlapa mo dla tulluweye. Epame na: mate epo Pepele di tle malale banakaka oplami mate ka:dle yu iye ilahame ma meyelope depo imsiyamelepiye, ka:dena, di mape Dlapa mo dla tutula:loweye. <sup>9</sup> Na: na:ta ka:yapa atlaleye mamisika: atlema. Wua:ye ka:dle yuye dalepame ma-hamuwapo. Epeleye ma oplami haleta ka:dle yu eye ilahame ma meyelope depo imsula:lepiye, ka:dena, oplami eta Dlapa mo dla tulluweye.

<sup>10</sup> Epapedeme na:ta imale koko hamsela: iye isikimi opa dla siyele hamilowedeme po-amsela:sema. Amasiyama na: isikimi Godta ka:dena dle koko mate ala:lowedeme amma. Epapele dulu dla na: isikimi opata ka:dena dle koko mate ala:lowedeme apelepiye, eta na:ye po-Keliso ya: oko oplami dlepe.

#### *Polota Keliso tle imale halë*



<sup>11</sup> Mikadepe dle so namkadulo, wua: koko iye woloma malamaiya. Adipalati, na:ta imale hamsela: iye opata imale kokoye pohamsela:sema. <sup>12</sup> Na:ta imale hamsela: iye oplami haleta na: watle pohamina, epame oplami haleta na:ye po-imana. Amasiyama koko iye Yesu Keliso meyelo na: dla botomastauwapo.

<sup>13</sup> Epedeme wua: mo-wua:malamana, na:ta Yu sota imale koko dulu dla haluwa pasakaloye. Na:tapo God ya: sos opaye elle himpo halemama wotiyalle hapimduwapo. Adipalati, na: solotamduwa, sos iye yumuluwedeme. <sup>14</sup> Epo Yu sota imale kokoye na:ta sikemte kikitilata hampo dolumtamama na: nasamaduloye na:ta ma-tla:mtauwapo. Epammama na:tapo di toto koko dolumolowe tlo solotamama sikemte itiyamale him-mduwapo.

<sup>15-16</sup> Amasiyama na:ye na: waita ala pohamalalo hallati Godtapo na:ye ma-sauwapo, na:tapo ya: oko hamsela:lepo depame. Epammama ya:tapo bokotiyapo malamale tle na:ye ma-sepame Yamiye na: watle nati-iwapo, na:tapo ka:dle yu Keliso kokoye po-Yu so watle hamtelepo depame. Godta na:ta po-Yu so watle ka:dle yu hamtelepo depame sisilamalati na: gadle yu halowe yilo oplami hale dla tame powoyamana. <sup>17</sup> Epame Yelusalem dla hetame ka:yapa ha:ha:le Taiya dle so watle gadle yu yilo yia: hala dla potana. Amasiyama Godta na: sisilamala dalepame isikimi Alabiya mo dla tauwapo. Edla halepo depame ma Damasko dla ilampuwapo.

<sup>18</sup> Epame sokomoko dapahatlope Damasko dla halepame ma Yelusalem dla Pita natila hetauwa. Epame Pita mate halemama alila 15 pololuwa. <sup>19</sup> Na:ta Yelusalem dla haluwa oloma edla na: Taiya dle so opa opi potlamana. Amasiyama hatlo Lod ya: ei Yeims tlo natiwa. <sup>20</sup> Epedeme na: God mila:pi tle ikadepe kokoye wua: dla ilima. <sup>21</sup> Epo alotle na: Siliya mo mate Kiliya mo mate dla sela:uwa. <sup>22</sup> Epapedeme Yudiya mo dla Keliso ya: sos hapuloma dulu dla mikadepe dle soye na: mila:pi natiloweye poyia:malamana. <sup>23</sup> Amasiyama yia: isikimi opata na: koko dla ipo atlamyelati tlo dalem-diyo, "Oplami Polo itapo ka:yapa Yesu Keliso koko imale alimama dia:ye wotiyalle hapimsela:mduwapo. Epapele tope ya: ma medla mikadepe depame ya:ta ka:yapa aliwa imale kokoye ma ka:dle koko depame opa imsela:po," dem-diyo. <sup>24</sup> Epalati opa iwolota na: koko dalepame God dla siyele pato ta:dem-diyo.

## 2

### *Taiya dle so opata Poloye sale koko*

<sup>1</sup> Sokomoko 14 pololepame na: ma Banabas mate Yelusalem dla tamalemama Taitesye semtamaluwa. <sup>2</sup> Adipalati, Godta na:ye edla telepo depame imuwa. Epalati na:ta edla tame na:ta po-Yu so watle ka:dle yu imsela: kokoye sos dokopala so mate esemuwa. Ame adipalati, na: posolotamana, yia:tapo na: oko dla pomikadepe dlalo wekemama na: okoye batalipo hamastlala depame. <sup>3</sup> Epele dulu dla na: mate sela:uwa oplami Taitesye Guliki oplamipo. Epapele tope dokopala sotapo Yu so yia: toto koko dolumama ya:ye kapala keotlepo depame pohaha:mana. <sup>4</sup> Amasiyama dita esemale dulu dla opa opita solotamuwa, Taitesye kapala keotlepo depame. Epapele tope opa iwoloye ikadepe Kelisoye pomikadepe dlalo sopo. Amasiyama yia: isikimi hemele dita Keliso dulu dla ha:ha:mama ma Yu so yia: aiyalma koko podolumalalo ha:ha:ye e natila matiwa. Adipalati, yia: solotamuwapo, yia: aiyalma koko imaletapo dia: dla upiyele hamilowedeme. <sup>5</sup> Amasiyama di yia: yu dla mikadepe depame potuluna. Adipalati, di solotamuwa, ikadepe ka:dle yuta wua: dulu dla halemama wua: gadlepo depame.

<sup>6</sup> Epedeme na: yu dalem-popa:uwa sos dokopala sotapo na: yu dalepame ka:dena depo yu hale po-atlana. (Amasiyama sos dokopala so dla mikadepe dle sota patoto so dem-diye yia: adipapele sota:? Na: pona:malamana. Amasiyama na: edla pase koko desema. Adipalati, God mila:pi tle oplami haleta ya:mkale potla:mtame halasema.)

<sup>7</sup> Amasiyama sos dokopala so yia: natiwapo, Godta Pita watle Yu so dla ka:dle yu

atlamsela:lowe dla itiyamale hamiwa epapele itiyamaleye na: dla hamiwapo, na:tapo ma po-Yu so dla ka:dle yu atlamsela:lepo depame. <sup>8</sup> Epalati Godtapo Yu so yilo Pita tle oko pato hauwaye epammama ya: ma po-Yu so yilo na: tle oko pato hauwapo.

<sup>9</sup> Epedeme dokopala so Yeims mate epo Pita mate epo Yon matetapo Godta na: watle oko hamili i malanatipame dia: mate oko hatlo halalo so depame na: mate Banabas mate dla do halomuwa. Epame Yeims wolotapo solotamuwa, ditapo po-Yu so dla ka:dle yu hamsiyamelepo depame. Epalati asiyama yia:tapo Yu so dla ka:dle yuye hamsiyamolowamo, duwa. <sup>10</sup> Epame koko hatlo iye yia:ta di watle atluwa, ditapo alisisi pa:talo so mate atali so mate gagademsiyamelepo depame. Amasiyama koko iye na:ta halowedeme sikemte solotamale me-himhaluwapo.

### *Polota Pitata api hotlati Pita mate yu dele*

<sup>11-13</sup> Pitata Antiyoka dla ka:yapa puame haluwa oloma edla ya:ye po-Yu so mikadepe dle so mate hatlope depame yimkata daya demsela:mduwapo. Amasiyama opa opita Yeims hala tle pumullati natipame wota:mama ma po-Yu so mikadepe dle so opa mate pohatlope demhalana. Adipalati, Yeims tle pumulale sota epo atlemduwapo, “Ka:dena, po-Yu sotapo mikadepe dle dulu dla tuluwedeme kapala kotimelepe,” demduwapo. Epalati Pitata opa iwoloye wota:mama ma po-Yu so mate pohatlope demhalana. Epalati Yu so mikadepe dle sotapo Pita natipame ya: koko dla dolumuwa. Epapalati Banabas mape yia: koko medla tuluwa. Epapele koko tle Pitata ikadepe api hotlati na:ta ya:ye opa mila:pi tle sikemte atluwa.

<sup>14</sup> Na: Pita wolotapo ka:dle yu ikadepeye podolumalalo ha:ha:lati natipame opa mila:pi tle Pita watle atlemama epo atluwa, “Wa: Yu oplami ikadepepo. Amasiyama wa: Yu oplamita koko halalo pe-epo halasema. Amasiyama wa: po-Yu sota koko halalo epo halema. Adipalati, wa:ta mikadepe duwa koko tle Yu so yia: aiyalma upiyele eye momeluwapo. Ame adipalati wa:tapo po-Yu soye aiyalma koko e dolumha:ha:lepo depame upiyele hamila yakoma:?” duwa.

<sup>15</sup> Epapele tlope dia:ye po-Yu sota aiyalma pa:le dulu dla ha:ha:lalo so pe-epapena. Hao, dia:ye ikadepe Yu sopo. <sup>16</sup> Amasiyama dimalamana, oplamitapo Yu so aiyalma koko woloma dolumhalale tle Godta ya:ye ya: mila:pi tle po-ullu pa:le oplami dlowa. Hao. Isikimi Yesu Keliso dla mikadepe dle koko tle Godtapo dia:ye ya: mila:pi tle ullu pa:talo so demhalapo. Epapedeme di Yu so mape Keliso dla mikadepe duwapo, Godta dia:ye ya: mila:pi tle ullu pa:talo so dlepo depame. Koko iye ditapo di aiyalma koko woloma dolumha:ha:lati po-apena. Adipalati, oplamitapo Yu so aiyalma koko woloma dolumhalale koko tle Godtapo ya:ye ya: mila:pi tle po-ullu pa:le oplami dlowa.

<sup>17</sup> Di Yu sotapo Keliso hala dla mo-pumuluwapo, Godtapo dia:ye ya: mila:pi tle ullu pa:talo so dlepo depame. Epame etle di malanatiwapo, di ma po-Yu so some bobtalimale so duwapo. Epapele tle Kelisota batalimale koko halowe dla ka:dena demhalema: Hao. <sup>18</sup> Epapedeme na: poka:dena, aiyalma koko na:ta momeluwaye matle kotiyapame imsela:loweye. <sup>19</sup> Epapele koko tle na:tapo aiyalma koko dla mopouwapo, aiyalma kokotapo ma na:ye po-omhallalo wekelepo depame. Epame asiyama God dulu dla na:ye pasakalo halapo, Godtapo na:ye ma omhallepo depame. <sup>20</sup> Epapele koko tle na:ta mikadepe duwatapo Yesuta dali yekelehmihili di dla pouwaye na: ma epapuwapo. Epapedeme wata na:ta pohalasema. Amasiyama Kelisotapo na: dulu dla halapo. Epapedeme na:tapo God Yami dla mikadepe dle tle watapo na: moto ikadepe i mate halema. Ya:tapo na:ye sikemte bokotiyapo malapame na: yilo ya: pasakaloye polowe dla himiwapo. <sup>21</sup> Na: Godta bokotiyapo malamale kokoye pokoko demama poaposema. Adipalati, oplamitapo isikimi Yu so aiyalma dolumolowe koko tle God mila:pi tle ullu pa:po hallowe kokoye halepe dematiye, eta asiyama Kelisota powaleye koko pa:le hallemla.

### 3

#### *Mikadepe dle koko mate epo aiyalma dolumolowe koko mate*

<sup>1</sup> Galasiya so wua:ye yiyilamale sopo. Adipalati, Yesu Kelisota dali di dla powale kokoye wua: watle haliyamale dla ma-atlamuwapo. Epapele tlope ma anta wua:ye elemala natili dla elemtuluwa? <sup>2</sup> Epapedeme wua: koko hatlo iye na: watle atlaiya, wua: apa api tle Hela:dle Sokoye hamuwa? Wua: aiyalma koko dolumolowe tle Hela:dle Soko hamuwa? Hao. Amasiyama wua:ta ka:dle yu dla mikadepe duwa koko tle wua:tapo Hela:dle Sokoye hamuwapo. <sup>3</sup> Wua: yiyilamale sota:? Wua: Sokota itiyamale tle wua:ta mikadepe dlowe kokoye mo-ka:pi kotiyamuwapo. Epapele tlope wua: matle mosukulu dla wua:ta itiyamale tle gudlowedeme apopa? Koko eye poka:dena. <sup>4</sup> Wua:ta mikadepe dle dulu dla wotiyalle hauwaye koko pa:le ellati apuwa? Hao, ya: dulu koko walena.

<sup>5</sup> Godtapo wua: watle Hela:dle Soko hamipame matle ulugiyemale koko halomuwaye wua:ta aiyalma koko dolumha:ha:lati apuwa? Hao, pe-epapena. Amasiyama wua:tapo ka:dle yu dla mikadepe depo ha:ha:lati apuwapo. <sup>6</sup> Epedeme wua: A:iblaham kokoye malamaiya. Ya:tapo God dla mikadepe duwapo. Epalati Godta ya:ta mikadepe dle natipame ya:ye ullu pa:le oplami duwapo. <sup>7</sup> Wua: koko itle woloma malamaiya. Opa anawolotapo mikadepe dle mate ha:ha:ma:, yia:ye A:iblaham ya: mamadulo ikadepepo. <sup>8</sup> Epedeme God yu bukatapo po-Yu sota mikadepe dle tle pasakalo hallowe haloweye ka:yapa ma-atluwapo. Adipalati, Godtapo A:iblaham watle epo atluwapo, “A:iblaham, wa: tle ta:la so hapuloma dla siyele hampulupe,” duwapo. <sup>9</sup> Epapedeme Godtapo A:iblahamta mikadepe dle koko natipame ya: dla siyele hamiwaye, epammama opa anawolota God dla mikadepe dlepiye, Godtapo yia: dla siyele hamilipe.

<sup>10</sup> Amasiyama opa anawolotapo aiyalma koko tlo dolumha:ha:mama aiyalma koko dla hitaha:ha:lepiye, yia:ye Godta kasilamale dulu dla ha:ha:po. Adipalati, God yu bukata epo atlapo, “Aiyalma koko dla hitaha:ha:lalo sotapo aiyalma dolumha:ha:mama aiyalma hatlo tlo hotlepiye, yia: ma Godta kasilamale dulu dla ma-ha:ha:po,” depo. <sup>11</sup> Epedeme aiyalma koko tlo woloma dolumhallalo oplami dla Godta ya:ye ka:dena pe-epapesema. Ame adipalati, God yu bukata epo atlapo, “Godta ullu pa:talo so demhala sotapo mikadepe dle tle pasakalo hallowe hamha:ha:po.”

<sup>12</sup> Amasiyama aiyalma dolumolowe kokotapo mikadepe dle tama di dla pohalasema. Hao, aiyalma dolumolowe kokotapo moto mate koko halowe tama di dla halapo. Adipalati, God yu bukata epo atlapo, “Oplami antapo aiyalma dolumolowe koko dla salladepo sela:ma:, ya: pasakaloye aiyalmata omhalapo,” depo. <sup>13</sup> Epedeme aiyalma koko dolumolowetapo dia:ye Godta kasilamale dulu dla elemtuwapo. Epalati Kelisotapo dia:ye Godta kasilamale dulu dla ha:ha:lati elepo alikili dla woyamuwapo. Epame asiyama ya:tapo dia: yilo Godta kasilamale dulu dla tuwapo. Adipalati, God yu bukata epo atlapo, “Oplami antapo dali di dla powame ellepiye, ya:tapo Godta kasilamale dulu dla elapo,” depo. <sup>14</sup> Epapele dulu dla Kelisotapo Godta kasilamale dulu edla mo-tuwapo, Godta A:iblaham watle yu itiyapo himilita ma po-Yu so dla pulupo depame. Epame dita mikadepe dle koko tle Godta ikadepe atlale Hela:dle Sokoye dita hamelepo depame.

#### *Aiyalma kokotapo Godta yu itiyapo himiliye pomeyelope dena*

<sup>15</sup> Mikadepe dle so namkadulo, na: isikimi nasama koko mate yu ipo atlowama. Alila hale dla opa dapiyamtetapo yia:ta madipata malamale hatlope depame koko hale dla yu itiyapo himilipiye, koko eta ikadepe hallepe. Epele dulu dla oplami haleta amko koko mate yu itiyapo himili iye pokoko depame ma pomeyelope dlowa. <sup>16</sup> Epapedeme God mape A:iblaham mate epame A:iblaham ya: mama hale mate yu itiyapo himiwapo. God yu buka hema A:iblaham ya: mamadulo hapuloma dla po-atlasema. Amasiyama oplami hatlo Keliso kokoye atlemama apopo. <sup>17</sup> Na:ta atla ya: dulu kokoye ipapena. Godta A:iblaham mate yu itiyapo himipame yu edla dolumhalloweye kokalepo me-himiwapo.

Epame 430 sokomoko mogudlati alotle Mosesta aiyalma hatitimale kokotapo edla puwapo. Epedeme alotle puale aiyalma koko itapo Godta ka:yapa A:iblaham mate yu itiyapo himili iye pomeyelo dena. <sup>18</sup> Epedeme wua: natiya. Godta ka:ka:dle kokoye aiyalma koko tle di watle hapimhalematiye, eta Godta ka:yapa A:iblaham mate yu itiyapo himili kokoye koko pa:le hallemla. Amasiyama koko eye pe-epapena. Adipalati, Godta meyelo ka:yapa A:iblaham mate yu itiyapo himili e dolumama ka:dle kokoye A:iblaham watle hamiwapo.

### *Aiyalma kokoye adipapolowe dla hamiwa?*

<sup>19</sup> Epapedeme aiyalma kokoye adipapolowe dla hamiwa? Godta yu itiyapo himili alotle aiyalma kokoye hamiwapo, opatapo yiskamu yia: bobtalimale kokoye malanatilipo depame. Epame Godtapo aiyalma koko iye opata A:iblaham ya: mama Kelisota puluwe dla omha:ha:mama dolumha:ha:lowe dla hamiwapo. Adipalati, Godtapo yu itiyapo himili iye Keliso koko dla atluwapo. Aiyalma koko iye God ya: banakaka sotapo opa ka: epo God ka: duka dla hallalo oplami Moses watle hamiwapo. <sup>20</sup> Epapele dulu dla alumale dapiyamte hallepiye, ka:dena, duka dla hallalo oplami hamoloweye. Amasiyama alumaleye isikimi hatlo hallepiye, duka dla hallalo oplami pohallowa. Epedeme Godtapo A:iblaham mate yu itiyapo himiwaye ya: A:iblaham ka: epo ya: ka: depo duka dla hallalo oplami pohamana. Amasiyama God meyelo A:iblaham mate yukamama yu itiyamale iye himiwapo.

<sup>21</sup> Epedeme aiyalma kokotapo Godta yu itiyapo himili koko mate opahale demhalema:? Hao, pe-epapesemde. Amasiyama aiyalma kokotapo di watle ikadepe pasakalo hallowe hamimatiye, eta dita aiyalma koko dolumha:ha:lali Godta dia:ye ya: mila:pi tle ullu pa:talo so dlemla. Amasiyama pe-epapena. <sup>22</sup> Adipalati, God yu bukata epo atlapo, "Ta:lamo pato hema opaye batalimale itiyamaletapo mo-dokopala depo halapo," depo. Epedeme Godta yu itiyapo himili ka:dle koko e haloweye hatlo Yesu Keliso dla mikadepe dle tle halepe.

<sup>23</sup> Amasiyama mikadepe dle kokoye ala dia: dla populalo hallati aiyalma kokotapo dia:ye upiyele dulu dla elemhaluwapo. <sup>24</sup> Epame aiyalma koko itapo dia:ye Kelisota puluwe dla omtamama elemtauwapo. Epapele tle Kelisota puale oloma dla dia:ye ma mikadepe dle koko tle Godtapo ya: mila:pi tle mo-ullu pa:talo so dlepe duwapo. <sup>25</sup> Watapo mikadepe dle kokota dia: dla puame ellati ma aiyalma kokota dia:ye po-omhalasema.

<sup>26</sup> Wua:ta hapulomaye Yesu Keliso dla mikadepe dle koko tle wua:ye God ya: akimlala depo ha:ha:po. <sup>27</sup> Adipalati, opa anawolotapo Keliso mate hatlope depame yú tutula:uwa, yia: Kelisoye tluka some ma-didiyeuwapo. <sup>28</sup> Epedeme Keliso dulu dla hukulli hawa ikadepe. Epapedeme Yu so mate po-Yu so mate ma hatlope, epame wotiyalle dulu dla asiyama pa:le oko halalo so mate epo yia: omha:ha:lalo so mate ma hatlope. Epame opa mate wola: mate ma hatlope. Adipalati, wua:ta hapulomaye Keliso dulu dla ma hatlope depo ha:ha:po. <sup>29</sup> Epele dulu dla wua: Keliso dulu dla ha:ha:lepiye, wua:ye ikadepe A:iblaham ya: mamadulo depame ya: elo dla ha:ha:lepe. Epedeme Godta A:iblaham watle yu itiyapo himiliye wuolepo.

## 4

<sup>1-2</sup> Nasama yu hale ipo. Oplamitapo yami ala yimka:mala hallati polope. Epalati ma yamitapo ya: a alisisi hapulomaye halomelepe. Amasiyama ya:ta ya: a alisisi halomoloweye ya: ala yimka:mala hallati ma aseka oplami haletapo ya: mate ya: a alisisi mate omhallepe. Epalati ya:tapo aseka ya: omhallalo yu dla salladepo sela:lepe. Epame alotle ya: ata atlale alilata umulati ma ya:tapo ya: a elo dla halemama ya: alisisi hapuloma omhallepe.

<sup>3</sup> Epapedeme di mape dita ka:yapa ka:dle yu dla ala pomikadepe dlalo ha:ha:lali ta:lamo kokotapo dia:ye epo omhaluwapo. <sup>4</sup> Epame Godta alila himilita mo-umulati ya:tapo Yamiye tulune duwapo. Epalati Yamitapo puame ta:lamo a:ya tle hampame Yu so aiyalma dulu dla haluwapo. <sup>5</sup> Ya:tapo asiyama mate dia:ye aiyalma dulu dla ha:ha:lali alikili dla elepo woyamuwapo, ditapo God ya: akimlala depo ha:ha:lepo depame. <sup>6</sup> Godtapo wua:ye ya: akimlala depo hala koko botomastamama Yami Sokoye di dupa dulu dla hamiwapo. Epedeme Soko eta epo sisilamhalapo, *Aba,\* A.* <sup>7</sup> Epapele koko tle wua:ye ma aiyalma koko upiyele dulu dla asiyama pa:le oko halalo so some poha:ha:sema. Amasiyama wua:ye wata God ya: akimlala ikadepe depo ha:ha:po. Wua:ta ikadepe God ya: akimlala depo ha:ha: koko tle Godta omhala mo kokoye wuolepo.

*Polota Galasiya mikadepe dle so sikemte malahalale*

<sup>8</sup> Epedeme wua:ye ka:yapa ikadepe God koko yeitapo ha:ha:mama biskapa god opi dla salladepo siyamuwapo. <sup>9</sup> Amasiyama wua: watapo ikadepe Godye mo-malapo ha:ha:po. Amasiyama ipo atlowe tlo ka:pi, Godta wua:ye mo-malapo halapo. Epapele tlope wua: ma adipalati God tle kokotipame biskapa god dla salladepo siyamolowedeme ilamtamalema? Adipalati, koko eta koko ka:dle hale wua: dla pohampuluwa. Wua: adipalati matle upiyele koko eta wua: dokopala depo hallowe solotama? <sup>10</sup> Wua: ma Yu so yia: koko dolumama alila hale dla koko hale haloweye sepo himi, epo mama hale dulu dla koko hale haloweye sepo himi, epame sokomoko hale dulu dla koko hale haloweye sepo himi demha:ha:po. <sup>11</sup> Epapele tlope na: koko i natipame sikemte wota:ma. Adipalati, na:ta wua: yilo oko pato hauwaye isikimi koko pa:le ellala depame.

<sup>12</sup> Amasiyama mikadepe dle so namkadulo, na: sikemte solotama, wua:tapo na: koko natipo dolumha:ha:lepo depame. Adipalati, na:tapo ka:yapa wua: mate tame haluwa dulu dla na:ye wua: some haluwapo. Na:ta ka:yapa ka:dle yu wua: watle hampuwa oloma edla wua:ta na:ye allimama batalimale koko hale pohana. <sup>13</sup> Epapedeme wua: mo-wua:malamana, na:ta esiyelati puame wua: mo dla halemama ka:dle yuye ka:yapa wua: watle atlamuwapo. <sup>14</sup> Epame na:ta esiyele mate puame halemama wua: dla upiyele koko hamilati wua:tapo na:ye allimama po-ayalemana. Amasiyama wua:tapo na:ye God ya: banakaka oplami tepo depame na:ye woloma omha:ha:uwapo. Epame wua:ta malamaleta na:ye Yesu Keliso meyelo malatepo depame woloma natiwapo. <sup>15</sup> Na:ta ka:yapa wua: mate haluwa dla siyele kokota wua: mate haluwapo. Epame wua: sikemte solotamduwapo, na: woloma gademha:ha:lowedeme. Epammama oloma edla wua:ta wua: inomaye hoholalipo na: dla hapila:po haluwapo. Epapele tlope ame adipalati oloma edla siyele koko eluwata alikili dla haoduwa? <sup>16</sup> Ikadepe koko na:ta wua: watle atlama ita wua:ye na: mate opahale dema:?

<sup>17</sup> Amasiyama biskapa koko imalalo sotapo wua:ye na: tle eleme alikili dla elem-tulluwedeme sikemte itiyamapo. Epele tlope yia: woloma wua: yilo po-apsema. Amasiyama yia: solotama, wua:tapo na: melepame ma yia: dolumelepo depame. <sup>18</sup> Opa opitapo wua: yilo sikemte itiyamelepiye, yia: ka:dena, isikimi ka:dle koko dla yia:ta wua: yilo epo itiyamoloweye. Epapele dulu dla na:ta ka:yapa wua: mate haluwa oloma edla wua:ta ka:dle koko halomolowe dla itiyamale himme ha:ha:uwaye, epammama ma na:ta wua: mate pohallalo wekele oloma edla mepo itiyamale himme ha:ha:iya. <sup>19</sup> Mikadepe dle so namkadulo, na:ta wua:ye mamisika: Keliso some ha:ha:lepo depame wua: gadlowe yilo a:yata owayemala hammama wotiyalle hamdiye, epo amma. <sup>20</sup> Amasiyama na: solotama, wata oloma hema na:ye wua: mo edla halematiye, eta na:ta wua:ye woloma gadlowe api natilimla. Amasiyama watapo na: dla wua:ye woloma gadlowe api ponatisema.

\* **4:6:** *Aba de ya: dulu kokoye Yu so yu mate a demama apopo.*



*Sela mate ya: oko a:ya Hagai mate yia: koko*

<sup>21</sup> Epedeme wua: dulu dla opa opita aiyalma koko dolumolowe tlo solotamha:ha:po. Amasiyama wua: aiyalma ya: dulu kokoye wua:malamata:? <sup>22</sup> God yu bukata epo atlapo, A:iblahamta akimlala dapiyamte hatitimaiyo. Maseyemala haleye A:iblaham ya:llu Sela ya: oko a:ya Hagaita himiyo. Epalati maseyemala haleye A:iblaham ya:llu ikadepe Selata himiyo. <sup>23</sup> A:iblaham yami hale Sela ya: oko a:yata himiliye wola:ta yimlala hohomde api etle hamaiyo. Amasiyama A:iblaham ya:llu ikadepe Selata hamale maseyemalaye Godta yu itiyapo himili mate ala:mama hamaiyo.

<sup>24</sup> Wola: dapiyamte iwolo kokotapo di watle wayu imapo. Wola: dapiyamte itapo Godta yu hatitimale dapiyamte imapo. Hagaitapo Godta Sainai tamali di tle Moses watle aiyalma hapili kokoye imapo. Epedeme opa anawolotapo aiyalma koko dulu hema ha:ha:ma:, yia:ye upiyele dulu dla asiyama pa:le oko halomalalo so some ha:ha:po.

<sup>25</sup> Epapedeme a:ya Hagai itapo Alabiya mo dulu dla Sainai tamali koko mate Yelusalem koko mate imapo. Adipalati, Yelusalem mo pato i mate epo ya: opa mate aiyalma koko dulu dla upiyele mate ha:ha:po. <sup>26</sup> Amasiyama Sela, A:iblaham ya:llu ikadepetapo Pepele dimo dla aiyalma pa:le Yelusalem ela kokoye imapo. Epedeme Pepele di edla ela Yelusalemye mikadepe dle so di waipo. <sup>27</sup> Epedeme God yu bukata epo atlapo, “Hamkapi pollalo a:ya, wa: siyene.

Wa: yemala hammama wotiyalle halowe kokoye yeliyena.

Wa: yimlala hatitimolowe yeliyele tope

wa: yu teta:le mate siyele di dla ta:demsela:ne.

Adipalati, ya:wolali pa:le a:ya yimlalatapo pasatamama ya:wolali walle a:ya yimlalaye tla:mtlepe.”

<sup>28</sup> Epapedeme mikadepe dle so namkadulo, Sela yami Aisektapo Godta yu itiyapo himili koko tle God yami depo haluwaye, wua: ma yu itiyapo himili hatlo etle God ya: akimlala depo ha:ha:po. <sup>29</sup> Epapele dulu dla ta:lamo koko tle himili Hagai yamitapo God ya: Soko tle himili Sela yami dla upiyele koko mate wotiyalle koko mate hapimduwapo. Epapedeme koko hatlo epapeletapo wata oloma hema me-elapo. Aiyalma koko dulu dla ha:ha:lalo sotapo God ya: Soko yimlala di watle upiyele koko mate wotiyalle koko mate halopimha:ha:po. <sup>30</sup> Amasiyama God yu bukata di watle apa koko ima:? “Sela ya: oko a:ya mate yami mate alikili dla posaliya. Adipalati, maseyemala eta poka:dena, ya: a elo dla halloweye. Amasiyama ka:dlepo, ya:llu ikadepe yamitapo ya: a elo dla halemama alisisi hapuloma omhalloweye.” <sup>31</sup> Epapedeme mikadepe dle so namkadulo, dia:ye po-Sela ya: oko a:ya Hagai ya: akimlala. Amasiyama dia:ye A:iblaham ya:llu ikadepe Sela ya: akimlalo.

## 5

*Upiyele koko dulu tle woyapame ma ilame tamalemiya*

<sup>1</sup> Di watapo aiyalma koko upiyele dulu dla poha:ha:sema. Adipalati, Kelisotapo dia:ye dulu etle alikili dla me-eleme woyamuwapo. Epapedeme kokalepo ha:ha:mama ma ilapo aiyalma koko upiyele dulu dla tamalemiya.

<sup>2</sup> Namkadulo, na:tapo wua:ye atlema, wua: aiyalma koko dolumama kapala kotimha:ha:lepiye, Kelisota wua: dulu dla halaye koko pa:le dlepe. <sup>3</sup> Epapedeme na: matle wua: dla ipo atlema, oplami antapo aiyalma koko dolumama kapala keplepiye, ya: ka:dena, aiyalma koko hapuloma woloma dolumhallepe. <sup>4</sup> Epedeme wua: aiyalma koko dolumale tle Godta wua:ye ullu pa:talo so dlepo dlepiye, wua:ta Keliso dulu dla ha:ha:le tle ma-alikili dla woyamaleta apelepe. Epapele dulu dla wua: ma Godta bokotiyapo malamale dulu dla poha:ha:lowa. <sup>5</sup> Amasiyama Hela:dle Sokota itiyamaleta dia: dulu dla hallati ditapo Godta yu itiyapo himili eye mikadepe dle tle halowedeme dalemha:ha:mama omha:ha:po. Adipalati, Godtapo dita mikadepe dleye natipame

dia:ye ullu pa:talo so duwapo. <sup>6</sup> Epele dulu dla kapala kotimolowe koko mate epo kapala pokotimalalo wekelowe koko mateta Keliso dulu dla koko pato pohalasema. Amasiyama mikadepe dle tle yimkadulo bokotiyapo malamolowe koko tlo pato halapo.

<sup>7</sup> Wua: mikadepe dle kokoye ka:pi kotiyapame tamaluwapo. Epele tlope ma antapo wua:ye ikadepe api tle tamallati api himomelepame ma alikili dla elemtuluwa? <sup>8</sup> Wua: api himomelepame wua: alikili dla elemtuluwaye God tle puame po-apena. <sup>9</sup> Epedeme daya haka:le yimka:mala daya amko mate dukumalati daya patoye haka:leta hamdepo. <sup>10</sup> Amasiyama na: Lod dla mikadepe dema, wua:tapo biskapa elemala natili koko imale dla potullalo ma na:ta imale dla mikadepe dlepo depame. Oplami antapo wua:ye biskapa elemala natili koko mate yiyilamale hapimhallepiye, ya:ye ya: batalimale asiyama halepe.

<sup>11</sup> Mikadepe dle so namkadulo, opa opitapo na:ye kapala kestlowe koko imsula:ma demyapo. Epele dulu dla koko iye ikadepeta ammatiye, Yu sota na: dla wotiyalle koko pohamilalo wekelemla. Ame adipalati Yu sotapo na: dla ala wotiyalle mehapimha:ha:ma? Yia:ta na: dla epo wotiyalle hapimha:ha: koko tle na: natipo, na:ye ala Kelisota powale kokoye imsula:po. <sup>12</sup> Epedeme opa anawolotapo wua:ye yiyilamale koko hapimha:ha:ma:, ka:dena, yia:tapo yiskamu yia: kapala kotimama yia: moko mate hoholatimoloweye.

<sup>13</sup> Mikadepe dle so namkadulo, Godta wua:ye aiyalma koko upiyele dulu dla ha:ha:lati wua:ye alikili dla eleme woyamolowedeme sisilamuwapo. Amasiyama upiyele koko etle alikili dla woyapo ha:ha:mama wuskamu wua: motota solotamale koko tlo ala:mha:ha:miya. Amasiyama yimkadulo bokotiyapo malamale mate asiyama malama asiyama malama demha:ha:iya. <sup>14</sup> Adipalati, aiyalma koko hapulomaye molo atlale yu hatlo dulu hema hutiyepo. Eye,

“Wa:ta wa:skamu sikemte bokotiyapo malamdiye,

epammama wa: amkale ma sikemte bokotiyapo malamhalane.”

<sup>15</sup> Amasiyama wua: wua: amkadulo dla elle mate yu topulolle mate dulu dla ha:ha:lepiye, wua: wolomape. Adipalati, wua: dulu dla epapele kokota ellepiye, eta wua:ta mikadepe dle kokoye batalipo hamastlala.

### *Sokota solotamale tle siyamaiya*

<sup>16</sup> Epapedeme na:ta wua: watle atlema, Sokota solotamale tle siyamaiya, wua:tapo mota solotamale koko dla potullalo wekelepo depame. <sup>17</sup> Adipalati, mota solotamale kokotapo Sokota solotamale kokoye po-ala:mhalasema. Epame asiyama Sokota solotamale koko mape mota solotamale koko mate po-ala:mhalasema. Epapedeme solotamale koko dapiyamte iwolotapo yiskamu yia: dulu dla opahale demha:ha:po. Epapele koko tle wua:ta halowa depo momalamde kokoye pohalomasemde. <sup>18</sup> Amasiyama Sokota wua: omhallepiye, wua:ye aiyalma koko upiyele dulu dla ma poha:ha:lowa.

<sup>19</sup> Epedeme mota solotamale kokoye haliyamale dla hutiyepo. Eye ipapele kokopo. Opa mate wola: mate uhalomolowe koko, epo ullu walle koko, epame opa mate wola: mate uhalomolowe dla sikemte ta:le koko, <sup>20</sup> epo dota mimita:ple god dla sisiyelowe koko, epame ya:mkadulo mimita:plowe koko, epo yimkadulo mate posadepo hallowe koko, epame yimkadulo mate yu topulollowe koko, epo sikemte siyaladlowe koko, epo ya:skamu ya: tlo sikemte malamama yimkaduloye pomalamalalo wekelowe koko, epame opa duka hukulupo ha:ha:lowe koko, <sup>21</sup> epo ya:mkale sikemte ellewe koko, epame daya dele pato himpame kawata yú dlopo yiyilalimsiyamama batalimale koko halomolowe koko, epame batalimale koko opi epapele. Epapedeme ipapele koko dla na:ta ka:yapa wua: watle ma-atlamuwapo. Epapeleye ma wata wua: watle atlema. Opa anawolotapo ipapele koko dulu dla ha:ha:lepiye, yia: God ya: mo koko dla po-u-ulapo tuluwa.

<sup>22</sup> Amasiyama Hela:dle Soko ya: dlomokoye ipo, ya:mkale bokotiyapo malamolowe koko, epo siyele koko, epame sadepo hallowe koko, epo yimkadulo mate ka:depo hallowe koko, epame namkale dle koko, epo ka:dle koko, epame ikadepe koko tlo halowe malamale, <sup>23</sup> epo ya:skamu isili dla hamtulluwe koko, epame ya:skamu ya: moto hamolowe koko. Epapedeme ipapele koko dolumolowe dla aiyalma hale pe-elasema. <sup>24</sup> Epedeme Keliso dulu dla ha:ha:lalo sotapo mota solotamale batalimale koko hapulomaye dali yekelemhimili di dla mo-gogoduwapo. <sup>25</sup> Epame ditapo pasakalo amkoye Hela:dle Soko tle ma-hamha:ha:po. Epapedeme ka:dena, Hela:dle Sokota di dokopala depo halloweye. <sup>26</sup> Epammama poka:dena, ditapo diskamu di dla halopo hetamama yimkadulota siyalasiyaladlepo depame potepelemha:ha:lowa. Epame yimkadulo elle mate poha:ha:lowa.

## 6

### *Yimkaduloye gagademha:ha:iya*

<sup>1</sup> Mikadepe dle so namkadulo, wua: dulu dla haleta batalimale koko dla tullupiye, ka:dena, mikadepe dle dulu dla kokalepo ha:ha:lalo so wua:tapo ya:ye sadle mate gadepame ma ilame hamame pulupe. Amasiyama epapele dulu dla wua: ma wolomape. Adipalati, wua: ma batalimale koko hatlo mepapele dla tullala. <sup>2</sup> Epedeme wua: dulu dla wuskamu asiyama gade asiyama gade demha:ha:iya. Wua:ta epamha:ha:lepiye, Kelisota solotamale kokoye dolumha:ha:mama apelepe. <sup>3</sup> Epapedeme oplami antapo ya:skamu ya:ye ka:dena depo atlepame matle ya:ta atla koko e mate po-ala:lalo wekelepiye, ya:ye isikimi ya:skamu mala-atlemhalapo. <sup>4</sup> Epedeme wua: dulu dla opa hapulomatapo woloma yiskamu yia: kokoye tlamolowe ka:pipo. Epame yia:ta natili dulu dla yia:ta koko halomha:ha:ye ka:pi dlepiye, eta yia:ye sisiyelowe ka:pi. Amasiyama poka:dena, oplamitapo ya: koko mate yimkadulo koko mate ala:loweye. <sup>5</sup> Epapele dulu dla ka:dena, opa hapulomatapo yia: pasakaloye miyelo woloma omha:ha:loweye.

<sup>6</sup> Epedeme ka:dena, wua: dla alisisi ka:dle hutiye e mate wua: dla God yu imha:ha: so opaye asiyama gadloweye.

<sup>7</sup> Wua: wuskamu elemala natimha:ha:mama God ma elemala natilowa demha:ha:miya. Adipalati, Godye oplami haleta elemala natiloweye po-ala:na. Epedeme oplamitapo apa alisisi ale emelepiye, ya: alisisi eye polahame delepe. <sup>8</sup> Epedeme e ma epapena. Oplamitapo mota solotamale kokoye emelepiye, ya: asiyama polowe kokoye polahalepe. Amasiyama oplami antapo Sokota solotamale kokoye emelepiye, ya: asiyama pasakalo hallowe kokoye polahalepe. <sup>9</sup> Epapedeme ka:ka:dle koko halomha:ha:mama susukallati oko duka dla gudemiya. Adipalati, dita emale alisisi hauwallowe alilaye me-pulupe. <sup>10</sup> Epedeme dia: dla alila ka:dle natilipiye, ka:dena, ditapo mikadepe dle so dla woloma ka:ka:dle koko halomsiyamolowepo. Epame opa hapuloma dla mape ka:ka:dle koko halomolowepo.

### *Kapala kotimoloweye pokoko, amasiyama oplamita amko dlowe kokota koko pato halapo*

<sup>11</sup> Epedeme wua: na:ta na: do mate yu ilimale dulu dla hi patoto hatitimaleye menatipo.

<sup>12</sup> Opa opitapo isikimi koko hatlo tle wua:ye kapala kotimelepo depame solotamapo. Epammama yia: solotamapo, opa opitapo yia:ye ka:ka:dle so dlepo depame. Adipalati, yia: posolotamasema, yia:ta hatlo Keliso koko tlo atlamsiyamalati opata yia:ye wotiyalle hamiloweye. <sup>13</sup> Epele dulu dla kapala kotimale so ewolota Moses ya: aiyalma kokoye woloma podolumha:ha:sema. Asiyama yia:tapo isikimi wua:ye kapala kotimale koko tle yiskamu yia:ye di dla halopo hetlowedeme apopo.

<sup>14</sup> Amasiyama na: wua: dla na: kokoye atlowepo. Na: koko opi tle naskamu di dla pohamhetlowa. Amasiyama Yesu Keliso dali yekelemhimili tlo na:tapo di dla hamhetlowepo. Adipalati, ya:ta dali yekelemhimili di dla pouwa koko tle ta:lamo kokotapo na: dla mo-pouwapo. Epalati asiyama na: mape ta:lamo koko dla mo-pouwapo. <sup>15</sup> Epedeme oplamitapo kapala kestepo hallowe koko mate epo kapala pokestlalo hallowe koko mateta koko pato pohalasema. Amasiyama oplamitapo ma amko depo hallowe kokotapo koko pato halapo. <sup>16</sup> Epapedeme opa anawolotapo koko i dolumha:ha:lepiye, yia: mate epo God ya: opa hapuloma mate dla sadle koko mate epo bokotiyapo malamale koko mateta yia: dulu dla hutiyelepe.

<sup>17</sup> Epedeme na: dla ase upiyele hapimha:ha:miya. Adipalati, na: moto dla ulu hutiyetapo na:ta Yesu Keliso ya: oko oplami depo hala kokoye nati-ipo.

<sup>18</sup> Mikadepe dle so namkadulo, Lod Yesu Kelisota bokotiyapo malamalepo wua: mate hallepe. Eye ikadepepo.

## Polota Epeses sos dla yu ilimale hamili Epeses Epeses buka ya: dulu koko

Polotapo amtuwale aya dulu dla halemama yu ilimale iye Epeses sos dla hamiyo. Epedeme ya:ta yu ilimale dulu hema ipo atlaiyo, “Mikadepe dle so hapulomaye Keliso dulu dla hatlope depo ha:ha:po.” Epame ya: ma epo atlaiyo, “Sostapo Keliso moto hallati Kelisotapo dokopala depo halapo. Epame mikadepe dle so hapulomatapo yimkata aya some hallati asiyama Kelisotapo dulu edla molopa kestale some halapo. Epame sostapo Keliso ya:llu some halapo.”

<sup>1</sup> Na:ye Polopo. Godta na:ye sauwapo, na:tapo Yesu Keliso ya: Taiya dle oko halepo depame. Epedeme na:tapo yu ilimale iye Epeses mo dulu dla ha:ha:lalo Yesu Keliso dla mikadepe dle so wua: dla hamima. Adipalati, wua:ye God ya: opapo. <sup>2</sup> Di A God mate epo Lod Yesu Keliso mate yia:ta bokotiyapo malamale mate epo sadle mateta wua: dulu dla ellepe.

### *Kelisota koko halë tle dia:ye God ya: akimlala duwapo*

<sup>3</sup> Epedeme ka:dena, ditapo Lod Yesu Keliso ya: A God dla siyele ta:dloweye. Adipalati, dita Keliso dulu dla ha:ha:lali ya:tapo ya: Soko tle ka:ka:dle koko hapulomaye Pepele dimo tle dia: watle ma-hapiwapo. <sup>4</sup> Ta:lamo ala pohallalo hallati ya:tapo dia:ye mo-hohomuwapo, ditapo Keliso dulu dla ha:ha:mama ya: mila:pi tle batalimale pa:po aiyalma depo ha:ha:lepo depame. <sup>5</sup> Ya:ta bokotiyapo malamale tle Godtapo Yesu Keliso tle dia:ye ya: akimlala dlowedeme mo-powataliya solotamale me-himiwapo. Adipalati, eye ya:ta sikemte solotamale kokopo. <sup>6</sup> Epedeme ka:dena, ditapo Godta dia: bokotiyapo malamale koko dla sisiyelowe ka:pi. Adipalati, ya:ta di bokotiyapo malamale botomastamama ya: Maseyemala hatlo ya:ta dupa ellaloye dia: watle hamiwapo. <sup>7</sup> Epapedeme Kelisota ya: omali asiyama mate dia:ye elepame di bobtalimaleye me-hihiyotipo weliwapo. Koko iye Godta di bokotiyapo malamale tle apuwapo. <sup>8</sup> Adipalati, Godtapo bokotiyapo malamale patoye di watle hamimama malamale ka:dle pasatale mape di watle hamiwapo. <sup>9-10</sup> Epame Godtapo ya:ta hemele dinapopo himili kokoye di watle mo-botomastauwapo. Epapedeme ya:ta hemele dinapopo himili koko eye ipo. Ya:ta sale alila dla tame umulupiye, ya:tapo koko hapuloma Pepele dimo dla hutiyete mate epo ta:lamo dla hutiyete mate hatlo alupame Kelisota dokopala depo hala isili dla puame ipila:lepe.

<sup>11</sup> Epedeme koko hapulomaye Godta solotamale koko tle wowoyamhalapo. Epapedeme Kelisota koko halë tle Godtapo dia:ye ya: opa dlepo depame mo-hohomuwapo. Epedeme koko iye ya:tapo mo-powataliya solotapame dinapuwapo. <sup>12</sup> Epapedeme ya:tapo solotamuwapo, Yu so di tatile Keliso dla mikadepe dlalo sotapo di A God ya: dla siyele ta:dlepo depame. <sup>13</sup> Epame po-Yu so wua: mape, wua:ta ka:yapa ka:dle yuye dalepame Keliso dla mikadepe duwa koko tle wua:ye mo-God ya: opa duwapo. Epame epapele koko tle ya:tapo meyelo ya: yu himili dolumama wua: watle ya: ulu himimama ya: Hela:dle Sokoye ma-hapiwapo, wua:ta ikadepe God ya: opa depo ha:ha: kokoye nati-imama. <sup>14</sup> Adipalati, dita Yesuta puame di elemolowe dla omta koko hema Hela:dle Sokota di watle itiyamale hamilipe, ditapo Godta ya: opa yilo dinapopo himili koko hapulomaye halomelepo depame. Epedeme di ka:dena, God dla sisiyeloweye.

### *Polota inoma sumale koko*

<sup>15</sup> Epapedeme na:ta wua:ta Lod Yesu dla mikadepe dle koko mate epo wua:ta God ya: opaye sikemte bokotiyapo malamaha:ha: koko mateye me-daluwa. <sup>16</sup> Epedeme na: wua:



yilo siyemama God dla inoma sumhalloweye pomeleseemde. <sup>17</sup> Epame na:ta wua: yilo di Lod Yesu ya: A God dla inoma sumhalemde, ya:tapo Soko tle wua: watle malamale ka:ka:dle hapilati wua:tapo God kokoye sikemte malastepo ha:ha:lepo depame.

<sup>18</sup> Epame na: matle inoma sumale yu hale ipo himima, wua:tapo wua: soko inomaye totowatimalati wua:tapo wua:ta dalemha:ha:mama omha:ha: ya: dulu kokoye woloma natilipo depame. Epame Godta ya:ta sesalemale so dla dinapopo himili koko patoye malastlepo depame. Adipalati, ya:tapo wua:ta koko hapuloma eye halomelepo depame ma-sisilamuwapo.

<sup>19-20</sup> Epame na: matle inoma sumale yu hale himima, wua:tapo ya:ta itiyamale kokoye sikemte malastlepo depame. Adipalati, itiyamale etapo mikadepe dle so dia: mate hale-mama di gademhalapo. Epame itiyamale hatlo metapo Godta Yesu Kelisoye powale tle ma pasakalo depame Pepele dimo dla ya: dowala tiyama dla pamoluwapo. <sup>21</sup> Epedeme Godtapo Kelisoye hampame dokopala so hapuloma mate epo itiyamale soko hapuloma mate yia: dokopala oplami depo hallepo depame pamoluwapo. Epapedeme hatlo ya:tapo wata oloma hema yia: dokopala oplami halapo. Epame alotle Godta ta:lamu amko mita:plati ma hatlo ya:tapo yia: dokopala oplami depo hallepe. <sup>22</sup> Epedeme Godtapo koko hapulomaye Keliso hete sitali dla hatitipame ma ya:ye sos dokopala oplami duwapo, ya:tapo koko hapuloma omhallalo hallepo depame. <sup>23</sup> Epapedeme sosye Keliso ya: motopo. Epedeme sostapo Keliso tle pasakalo hapulomaye halomhalapo. Epalati Kelisotapo mo hapuloma dulu dla koko hapuloma dla pasakalo hapilalo halapo.

## 2

### *Powale tle ma pasakalo dlowe koko*

<sup>1</sup> Wua: ka:yapa wua: bobtalimale koko tle mo-palipo ha:ha:uwapo. <sup>2</sup> Adipalati, oloma edla wua:tapo ta:lamu koko hapuloma dolumale koko tle Saitenye mo-dolumuwapo. Ya:tapo ta:lamu pato iye omhalemama God dla poheodlalo wekele soye omhalapo. <sup>3</sup> Epedeme ka:yapa dita hapulomatapo epapele so some ha:ha:mama mota solotamale koko halomolowe kokota dia:ye dokopala depo haluwapo. Epapele koko tle batalimale sotapo Godta kasilamale umula tamaluwa api edla di ma medla tamaluwapo.

<sup>4-5</sup> Amasiyama God dla ya:mkale polowamale kokoye pato elapo. Epapedeme ya:tapo dia:ye bokotiyapo malamama dita di batalimale dulu dla palipo ha:ha:lati natipame Keliso mate palli tle ma pasakalo duwapo. Epedeme Godta bokotiyapo malamaletapo wua: pasakaloye gaduwapo. <sup>6</sup> Epame Godta dia:ye Keliso mate pasakalo depame ma Pepele dimo dla dia:ye Keliso mate ipila:uwapo. <sup>7</sup> Epedeme ya:tapo opa alotle ha:ha:lowe sota Godta bokotiyapo malamale mate epo namkale dle pato mate malamelepo depame ya:tapo Yesu Kelisoye di watle hamiwapo. <sup>8</sup> Epapedeme wua:ta God dla mikadepe dliti asiyama ya:ta bokotiyapo malamale tle wua: pasakaloye gaduwapo. Epedeme wua:ta muwolo itiyamale tle po-apena. Amasiyama Godta isikimi ya:ta namkale dle koko tle apuwapo. <sup>9</sup> Epapedeme wua:ta ka:ka:dle koko halomha:ha:la natipame Godta wua: dla pasakalo pohamina. Epedeme koko hema oplami haletapo ya:skamu di dla hamhetloweye po-ala:na. <sup>10</sup> Epapedeme dia:ye Godtapo ka:depo dinapele so depo ha:ha:po. Epame dita Keliso dulu dla ha:ha:mama ka:ka:dle koko siyapo tlo halomha:ha:lepo depame dia:ye ka:depo dinapuwapo. Ka:ka:dle koko iye Godtapo mo-powataliya dita halomelepo depame dinapuwapo.

### *Keliso dulu dla hatlope depo hallowe koko*

<sup>11</sup> Epedeme wua:ye Yu so mate pohatlope. Adipalati, wua:ye po-Yu sopo. Epapedeme Yu sotapo wua: watle atlemama, kapala pokotimalalo wekele so, demdepo. Epame asiyama yiskamu yia: tlo kapala kotimale so demdepo. Amasiyama kapala kotimale koko iye isikimi dloli opatapo yia: moto dla hamdepo. <sup>12</sup> Epapedeme wua: malamaiya,

wua:ta ka:yapa ha:ha:uwa dulu dla wua:ye Keliso dimi ha:ha:uwapo. Epame wua: mape ikadepe Isalael mo so depo poha:ha:na. Epapele koko tle Godtapo Isalael so mate yu itiyapo hatitimale koko hapulomaye wua: hi mate pohutiyena. Epame oloma edla wua:tapo koko pa:le ta:lamo hema God dimi siyamuwapo. <sup>13</sup> Epedeme wua: ka:yapa God tle pateka:mu dla ha:ha:uwapo. Amasiyama wata oloma hema Kelisota ya: omali tle wua:ye God mateka:pi dla me-eleme puwapo.

<sup>14-15</sup> Ka:yapa Yu so mate epo po-Yu so mate yimkadulo asiyama ele asiyama ele dle dulu dla ha:ha:uwapo. Adipalati, Yu so aiyalma kokotapo yia: mate epo po-Yu so mate dulu dla duka gladle eluwapo. Amasiyama Kelisota powale koko tle Yu so aiyalma koko hapulomaye mo-dokostamama ya:mkale ellewe kokota komale some haluwa ma mo-dokostauwapo. Epedeme Yu so mate epo po-Yu so mateye Kelisotapo ma-yimkata ma-hatlope depame mo-opa amko duwapo. Epame sadle kokoye yia: dla hampuwapo. Adipalati, Kelisoye di sadlepo. <sup>16</sup> Epedeme Kelisota powale koko tle Yu so mate epo po-Yu so mateye ma hatlope demama Godta kasilamale kokota yia: hi mate eluwaye alikili dla ma-hamastauwapo. Epame ma yia:ye God hala dla eleme puwapo. <sup>17</sup> Kelisotapo puame God tle pateka:mu dla ha:ha:uwa po-Yu so wua: dla epo God mateka:pi dla ha:ha:le Yu so dia: dla sadle kokoye atlampuwapo. <sup>18</sup> Epapedeme Kelisota koko halë tle Yu so dia: mate epo po-Yu so wua: mateta Hela:dle Soko hatlo itle A God hala dla puluweye ala:na.

<sup>19</sup> Epedeme po-Yu so wua:ye wata po-alikili so depo ha:ha:sema. Amasiyama wua:ye watapo yimkata God ya: opa mate God ya: mo so depo ha:ha:mama God ya: akimlala depo ha:ha:po. <sup>20</sup> Epedeme wua:ye Godta aya halë some halapo. Epapedeme aya hema Taiya dle so mate epo God tle yu hapame molo atlamalalo so opa matetapo saka some ha:ha:po. Epalati asiyama Yesu Keliso meyelo molopa kestale alumiti some halapo. <sup>21</sup> Epapele dulu dla hatlo Kelisota aya eye hamame hallalo hallati ayata ta:mtapo. Epalati asiyama aya etapo ma Lod ya: aiyalma aya depo halapo. <sup>22</sup> Epedeme po-Yu so wua:ye Keliso tle aya dulu hema aya halë dali opi epapele some ha:ha:po. Epalati Godta ya: Hela:dle Soko tle aya dulu hema hallalo halapo.

### 3

#### *Polota po-Yu so dla ka:dle yu hamtale*

<sup>1</sup> Na: Polopo. Na:tapo Yesu Keliso oko oplami halemama po-Yu so wua: dla Keliso koko atlamsela:uwa tle na:tapo amtuwale aya dulu dla halapo. <sup>2</sup> Epapele dulu dla koko iye mo-wua:malamana, Godtapo na: watle po-Yu so wua: dla ka:dle yu Godta bokotiyapo malamale kokoye atlamsela:lepo depame oko hamiwaye. <sup>3</sup> Epedeme Godtapo ya:ta dinapele koko hemele hatiyomeleme eluwaye meyelo na: watle ma haliyamale dla botomastauwapo. Epalati na:tapo koko iye wua:ta malamelepo depame me-ilipo hamiwapo. <sup>4</sup> Epedeme wua: na:ta ilimale i sesa:mama na:ta ya:ta hemele dinapopo himili koko sikemte malastepo halaye natilipe. Godta hemele dinapele koko eye Keliso kokopo. <sup>5</sup> Epedeme koko iye ka:yapa ha:ha:uwa opata pomalaha:ha:na. Amasiyama watapo Hela:dle Soko tle Taiya dle so dla epo God tle yu hapame molo atlamalalo so dla mo-botomastauwapo. <sup>6</sup> Epapedeme Godta hemele dinapopo himili ya: dulu kokoye ipo elapo. Po-Yu so wua:tapo ka:dle yu dla mikadepe depame Keliso dulu dla ha:ha: kokotapo Yu so mate yimkata God ya: akimlala depo ha:ha:po. Epame ka:yapa Godtapo Yu so dla yu itiyapo hatitimuwa koko hapulomaye wua: ma e halomelepe.

<sup>7</sup> Godtapo na: bokotiyapo malamama ya:ta itiyamale tle na: watle ya: yu ka:dle atlamsela:lowe oko hamiwapo. <sup>8</sup> Epedeme God ya: opa hapuloma dulu dla na:ye alo ikadepe dla hallalo halapo. Epapele tlope Godtapo na:ye ma-sauwapo, na:tapo Keliso dulu dla sukulu pa:le ka:ka:dle koko hapuloma hutiyeye po-Yu so dla haliyamale dla atlamsela:lepo depame. <sup>9</sup> Epedeme koko hapuloma mimita:plalo Godtapo mo-powataliya

hemele dinapopo hatiyomeleme haluwa kokoye na:tapo botomastlepo depame na:ye ma-sauwapo. <sup>10</sup> Epalati itiyamale soko hapulomata God ya: sos tle Godta malamale patota ela kokoye woloma malamelepe. <sup>11</sup> Yu so mate epo po-Yu so mate hatlope dlowe koko iye Godtapo ka:yapa malapame dinapuwa kokopo. Epapeleye ya:tapo Yesu Keliso di pasakalo gadlalo tle koko iye ma-hauwapo. <sup>12</sup> Epapedeme Kelisota koko halë tle epame dita ya: dla mikadepe dle tle ditapo itiyamale mate wowota:le pa:po God hala dla puluwe ka:pi. <sup>13</sup> Epedeme na:ta wua: dla atlema, na:ta amtuwale aya dulu hema wua: yilo wotiyalle hamhala koko hema ase sikemte momalamha:ha:miya. Adipalati, na:ta wua: yilo wotiyalle ha koko itapo alotle wua: dla siyele hampulupe.

*Godtapo mikadepe dle so dla itiyamale hamilipo depame Polota inoma sumale himili*

<sup>14</sup> Epapele koko tle na:tapo alumata ta:la dla akukulume polomama A God dla inoma suma. <sup>15</sup> Ta:lamo mate epo Pepele dimo mate dulu dla ha:ha: opa hapulomatapo ya: tle yia: hi halomha:ha:po. Adipalati, God hatlo ya:tapo di A halapo. <sup>16</sup> Epame God dla ka:ka:dle koko hapulomata pasatapo elapo. Epedeme na: inoma sumama ya: dla atlema, ya:tapo ya: Soko tle wua: dupata kokallowe koko itiyamaleye hamilipo depame. <sup>17</sup> Epame na: ma inoma sumale yu hale himima, wua:ta mikadepe dle tle Kelisotapo wua: dupa dulu dla hallepo depame. Epame wua:tapo ya:ta bokotiyapo malamale koko dulu dla kokalalipo ha:ha:lepo depame. <sup>18</sup> Epame na: ma ya: dla atlema, wua:tapo yimkata God ya: opa mate ha:ha:mama ya:ta bokotiyapo malamale kokota ga:tulli mate epo popolalle mate epo selemalli mate epo didle mateye malastlepo depame. <sup>19</sup> Kelisota bokotiyapo malamale kokoye pta sikemte pato epame opata malamaleye tla:mtana. Amasiyama epapele tlope na: inoma sumale yu himima, wua:ta ya:ta bokotiyapo malamale eye malastlepo depame. Wua:ta epapelepiye, koko hapuloma dulu dla wua:tapo God some ha:ha:lowe ala:le oloma dla ha:ha:lepe.

<sup>20</sup> Epedeme Godta itiyamaleta dia: dulu dla oko hamhallepiye, Godta dia: tle koko patoto hapuloma halomolowe ala:na. Adipalati, ya: dla koko patoto halomolowe itiyamaleye elapo. Itiyamale eye dita ya: dla atlamde koko mate epo dita malamale mateye tla:mtana. <sup>21</sup> Epedeme ka:dena, ditapo sos dulu dla Yesu Keliso tle God dla siyele hamilowe kokotapo kokó elloweye. Koko eye ikadepepo.

## 4

*Keliso moto dulu dla hatlope dlowe koko*

<sup>1</sup> Epedeme na: Lod yilo amtuwale aya dulu dla halema. Epedeme na: solotama, wua:tapo Godta wua: sisilamuwa pasakalo mate ala:po ha:ha:lepo depame. <sup>2</sup> Epame wua: amkadulo mate woloma ka:depo sadle mate ha:ha:mama hapele siyalade demha:ha:miya. Amasiyama wua: ya:mkale asiyama bokotiyapo malama asiyama bokotiyapo malama demha:ha:iya. <sup>3</sup> Epele dulu dla wua: alila hapuloma dulu dla wua:tapo Soko tle hatlope depo ha:ha:lowedeme wua: amkadulo mate woloma sadepo ha:ha:iya. <sup>4</sup> Adipalati, dita hapulomaye moto hatlope dulu dla ha:ha:po. Epame Soko ma hatlopepo. Epame Godtapo dita hapulomata koko hatlo dla dalemha:ha:mama omha:ha:lepo depame sisilamuwapo. <sup>5</sup> Epame di Lod ma hatlopepo. Epame dita mikadepe dle ma hatlopepo. Epame yú tulluwe koko ma hatlopepo. <sup>6</sup> Epame di A God ma hatlopepo. Epedeme ya:tapo dita hapulomaye omhallalo halemama dia: tle oko hamhalapo. Epame dia: dulu dla halapo.

<sup>7</sup> Epapedeme Kelisotapo dita hapuloma dla isikimi namkale dle tle malamale meye-lope meyelope dleye ma-halopiwapo, ditapo God ya: oko halepo depame. <sup>8</sup> Epapedeme God yu bukata epo atlapo,

“Ya:tapo di ikadepe dla hetamama

ya: dla opahale dlalo soye hohopame dea mate yulupo eleme hetauwapo.

Epame ma ya:tapo opa dla namkale dle alisisi halopiwapo,” depo.

<sup>9</sup> Epedeme wua: ka:yapa, “ya:tapo di ikadepe dla hetaiyo,” dle kokoye malamaiya. Adipalati, “ya:ta di ikadepe dla hetale” ya: dulu kokoye ipo elapo. Kelisoye ka:yapa Pepele dimo tle ma ta:lamo isili ikadepe hema maluwapo. <sup>10</sup> Epapedeme Pepele di ikadepe tle ma ta:lamo isili ikadepe hema maluwa oplami hatlo eta matle Pepele dimo di ikadepe dla hetauwapo, ya:tapo koko hapuloma dulu dla pasatepo hallowedeme.

<sup>11</sup> Epedeme Kelisotapo isikimi namkale dle tle ya: sos dulu dla oko meyelope meyelope dle hapimama opa opi dla Taiya dle okoye hapiwapo, epame opi dla God tle yu hapame molo atlamolowe oko hapiwapo, epame opi dla God yu hame mo opi dla siyamolowe oko hapiwapo, epame opi dla sos omhallowe oko hapiwapo, epame opi dla God yu imalalo oko hapiwapo. <sup>12</sup> Kelisotapo koko i hauwapo, mikadepe dle sotapo God oko halowe dla ma-dinapopo ha:ha:lepo depame. Epame Keliso ya: motota ta:lepo depame. <sup>13</sup> Epapelepiye, eta ditapo mikadepe dle tle hatlope depo ha:ha:mama God Yami kokoye sikemte malastepo ha:ha:mama apelepe. Epame dita mikadepe dle tle ikadepe opa depo ha:ha:mama ikadepe Keliso some ha:ha:lepe.

<sup>14</sup> Epapele dulu dla di matle dita mikadepe dle dulu dla yimlala yimka:sikili some poha:ha:lowa. Epame biskapa amko koko imale dalepame malamale potatlal-imha:ha:lowa. Epame biskapa amko koko imalalo sota api meyelope meyelope dle tle dia:ye eleme tlowedeme apelepiye, di epalati yia: podolumolowa. <sup>15</sup> Amasiyama di ikadepe koko tlo kikitilata hampame bokotiyapo malamale mate ha:ha:mama koko hapuloma dulu dla di dokopala oplami Keliso dla kese tutula:po ha:ha:lowepo. <sup>16</sup> Adipalati, Kelisotapo moto dla u-ulalimale hapuloma hohopo halapo. Epalati moto hapuloma meyelope meyelope dletapo moto pato dla gugoudepame oko hamhale-mama bokotiyapo malamale kokota pasatepo halapo. Epalati motota ta:mtapo.

### *Keliso dulu dla amko depo hallowe koko*

<sup>17</sup> Epedeme na:tapo Lod hi tle wua:ye atlema, wua: ase ta:lamo sota ha:ha:lalo epapele some ha:ha:miya. Adipalati, yia:ta malamale hapulomaye poka:ka:dle koko dla hatitipo siyamapo. <sup>18</sup> Epame yia:ta momalamale hapulomaye ma-amtuwalemana. Epame yia: dla ikadepe koko malamolowe po-ala:na. Yia:ta epo dupa kokalalimale koko tle yia:ye Godta hamili pasakalo tle pateka:mu dla ha:ha:po. <sup>19</sup> Epame yia: dla ka:dle koko mate epo batalimale koko mate malanatilowe poyia:malamana. Epapedeme yia:tapo isikimi yia: mota solotamale koko tlo dolumha:ha:mama batalimale koko hapuloma halomha:ha:mama gudlowe pa:po ha:ha:po.

<sup>20</sup> Amasiyama wua:ye epapele api tle Keliso kokoye pomalamana. <sup>21</sup> Epapedeme wua:tapo ya: kokoye ma dalepame ikadepe koko Yesu dulu dla elaye mo-malamuwapo. <sup>22</sup> Epapedeme wua:ta ka:yapa ha:ha:uwa pasakalo batalimale eye alikili a:ma pololiya. Adipalati, pasakalo batalimale epapeletapo wua:ye batalimolowedeme eleme tamdepo. <sup>23</sup> Epapedeme Godtapo wua:ta malamaleye meyelope de diya. <sup>24</sup> Epame wua: pasakalo takalaye tluka takala some uptipame ma pasakalo amkoye tluka amko some halopo didiyeiya. Pasakalo amko eye Godtapo dinapuwapo, ditapo ya: some aiyalma dle mate ullu pa:po ha:ha:lepo depame.

<sup>25</sup> Epapedeme ka:dena, wua:ta hapulomatapo ya:mkale mala-atlowe koko tle memelepame ma ikadepe koko tlo atlamsiyamaiya. Adipalati, dita hapulomata Keliso moto dulu dla hatlope depo ha:ha:po.

<sup>26</sup> Epame wa:ta siyaladle koko dulu dla siyaladle koko eta wa:ye batalimale dla semta demiya. Epame wa:ta siyaladle koko eta wa: dla ala me-elemama sali tulu demiya. <sup>27</sup> Adipalati, siyaladle kokotapo di pasakalo batalimelepo depame Saiten dla kokoloma dokostamdepo.

<sup>28</sup> Epedeme wa: uhalalo oplami depo halayo. Wa: uhamhalaye memelepame ma wa: do mate oko halowe kotiyamane. Wa:ta epapelepiye, eta wa:tapo ma yimkadulo atali so gadloweye ala:lepe.

<sup>29</sup> Epame wua:ta batalimale yu atlamsiyamde kokoye medla gudiya. Epame wua: matle yu ka:dle, ya:mkale gadlowe yu siyapo tlo atlamha:ha:iya.

<sup>30</sup> Epammama wua:ta ha:ha:le koko tle God ya: Hela:dle Soko dla dupa kolle hamimiya. Adipalati, ya:tapo wua: dulu dla God ya: ulu halapo. Epedeme Yesuta puame ya: opa hohomolowe alila dla omtamama wua:ta ikadepe God ya: opa depo ha:ha: kokoye ya:ta imhalapo.

<sup>31</sup> Epedeme wua: dulu dla ipapele koko hapuloma hutiyeye alikili dla pololiya. Eye ya:mkale elle mate hallowe koko, epame siyaladle koko, epame ya:mkale dla itiyamale yu mate sisikayuluwe koko, epame yimkadulo dla putlopo atlowe koko, epame ya:mkale polowamale pa:le koko. <sup>32</sup> Amasiyama wua: namkale dle mate epo ya:mkale bokotiyapo malamale mate ha:ha:iya. Epame Godta Yesu Keliso tle wua: bobtalimale howahapo weliwaye, epammama wua: ma wua: amkadulo bobtalimale kokoye wowelimha:ha:iya.

## 5

### *Hela:dle dulu dla hallowe koko*

<sup>1</sup> Wua:ye God ya: akimlala depo ha:ha:po. Epame Godtapo wua:ye bokotiyapo malamhalapo. Epapedeme wua: God koko natipame ya:ta hala epo ha:ha:iya.

<sup>2</sup> Epame yimkadulo bokotiyapo malamolowe mate ha:ha:iya. Adipalati, Kelisotapo di bokotiyapo malapame dia: yilo mo-pouwapo. Epame Yu so opata ullu ka:dle alisisi God watle namkale dle hapimduwaye, epammama ya:tapo ya: motoye God watle hamiwapo.

<sup>3</sup> Epedeme God ya: opa wua: dulu dla batalimale koko ipapeleta hutiyeloweye poka:dena. Eye opa mate epo wola: mate uhalomolowe koko, epame ullu walle koko hapuloma meyelope meyelope dle halomolowe, epame mani mate alisisi mate sikemte solotamolowe koko. <sup>4</sup> Epame matle poka:dena, wua:tapo batalimale koko esemsiyamoloweye epame ullu walle yu yuhamsiyamoloweye epame batalimale koko dla sikemte asupumsiyamoloweye. Amasiyama wua: epapele koko tle memelepame ma God dla siyele yu mate atlamha:ha:iya. <sup>5</sup> Ame adipalati, wua: malamaiya, wola: mate epo opa mate uhalomalalo so mate epo ullu walle koko halomalalo so mateye Keliso mate God mate yia: mo koko dla pe-elementuluwa. Epame mani mate alisisi mate sikemte solotamalalo so mape pe-elementuluwa. Adipalati, yia:ye biskapa god dla sisiyelalo sopo. <sup>6</sup> Epapedeme ipapele koko dla oplami haleta wua:ye mala-atla demha:ha:miya. Adipalati, batalimale koko hapuloma ipapele tle Godta kasilamale kokotapo ya: yu dla posalladlalo wekele so dla puapo. <sup>7</sup> Epapedeme wua:ye ipapele so opa mate hatlope demha:ha:miya.

<sup>8</sup> Adipalati, wua: ka:yapa amtuwale dulu dla siyamuwapo. Amasiyama wua:ye wata Lod dulu dla hela:dle mate ha:ha:po. Epedeme wua: hela:dle dulu dla ha:ha:lalo sota koko halomde, epapele some ha:ha:iya. <sup>9</sup> Adipalati, hela:dle ya: dlomokoye ipo. Eye namkale dle koko epame God mila:pi tle ka:depo hallowe koko epame ikadepe koko.

<sup>10</sup> Epedeme wua: ipapele koko dulu dla ha:ha:mama Lod dla siyele hamilowe koko siyapo tlo totamha:ha:iya. <sup>11</sup> Epammama wua: amtuwale dulu dla ha:ha:lalo sota koko halomde kokoye halomha:ha:miya. Amasiyama wua:tapo koko eye haliyamale dla botomastepo atlamsiyamaiya. <sup>12</sup> Adipalati, yia:ta koko hemele halomdiye pta batalimana. <sup>13</sup> Amasiyama batalimale koko eye hela:dletapo haliyamale dla botomastlati opatapo natimdepo. <sup>14</sup> Adipalati, hela:dletapo koko hapulomaye haliyamale dla halopo pumdepo. Epapedeme God yuta epo atlapo,  
“Ellalo oplami, wa: sila:tine,



Wa: powale dulu tle sila:tine.

Epalati Kelisota wa:ye hela:depo mellepe,” depo.

<sup>15</sup> Epedeme wua:ta ha:ha: kokoye woloma natiya. Epammama koko yeitamale so some ha:ha:miya. Amasiyama wua: woloma ka:depo malamale mate ha:ha:iya.

<sup>16</sup> Epame wua:ta koko halomha:ha: dulu dla alila ka:dle iye isikimi dosomiya. Adipalati, wata alila oloma iye batalimale alilapo. <sup>17</sup> Epapedeme wua: koko yeitamale so some ha:ha:miya. Amasiyama wua: woloma Lodta solotamale koko tlo momalamha:ha:iya. <sup>18</sup> Epame wua: kawata yú dlopame yiyilamale mate ha:ha:miya. Adipalati, epapele kokotapo wua:ye batalimale dla elemtamdepo. Amasiyama Sokota wua: dulu dla pasatapo hala diya. <sup>19</sup> Epame wua:ta yimkata alumale dulu dla siyele sala dolumha:ha:mama wua: dupa dulu tle Lod dla siyele ta:demha:ha:iya. <sup>20</sup> Epame wua: alila hapuloma dulu dla koko hapuloma dla di Lod Yesu Keliso hi tle A God dla siyele yu atlamha:ha:iya.

### *Opa mate epo yia: alludulo mate*

<sup>21</sup> Epedeme wua: Keliso tlo wowota:mama wuskamu isili dla halopo tulupame yimkadulo yu dla asiyama sallade epo asiyama sallade demsiyamaiya.

<sup>22</sup> Epame wola:, wua:ta Keliso yu dla salladepo siyamaye, epammama wua: ma wua:wolalidulo yu dla mepo salladepo siyamaiya. <sup>23</sup> Adipalati, Kelisota ya: sos dokopala halaye, epammama oplamitapo ya: a:yaye dokopala halapo. Sos eye Keliso ya: motopo. Epedeme Keliso meyelo ya: sosye pasakalo gadlalo halapo. <sup>24</sup> Epedeme sosta ya:skamu isili dla hamtulupame Keliso yu dla salladepo sela:mdiye, epammama wola:, wua: mape wuskamu isili dla halopo tutula:pame wua:wolalidulo yu dla salladepo siyamaiya.

<sup>25</sup> Epame opa, Kelisotapo ya: sos bokotiyapo malamuwaye, epammama wua: mape wua: alluduloye sikemte bokotiyapo malamha:ha:iya. Adipalati, Kelisotapo ya: sos yilo ya: pasakaloye polowe dla himiwapo. <sup>26</sup> Epame ya:tapo ya: sosye yú tutula:lowe koko mate epo God yu mate howahauwapo, sostapo ma God ya:ole depo hallepo depame. <sup>27</sup> Kelisotapo koko iye hauwapo, ya: sostapo hela:dle mate halemama ullu pa:po aiyalma depo hallepo depame. <sup>28</sup> Epapele koko tle ka:dena, opatapo yiskamu yia: moto sikemte malamdiye, epammama yia: alludulo ma sikemte bokotiyapo malamolowe ka:pi. Adipalati, ya:llu sikemte bokotiyapo malamalalo oplamitapo ya:skamu ya: moto ma woloma ka:pi omhalemdepo. <sup>29</sup> Epedeme wua: malamaiya, oplamitapo ya: motoye alimama batalipo po-omhalasemde. Amasiyama ya:tapo ya: motoye sikemte malamama ya: motota itiyamale mate hallepo depame daya demhalemdepo. Epedeme Kelisotapo ya: moto sos dla epamhalapo. <sup>30</sup> Adipalati, dia:ye ya: motopo. <sup>31</sup> Epapedeme God yu bukata epo atlapo,

“Epedeme oplamitapo ya: a mate epo ya: wai mate melepame ma ya:llu mate hatlope depo hallepe.

Epame yia:ta madipatatapo moto hatlope depo ha:ha:lepe.”

<sup>32</sup> Epedeme oplamita a:ya hapame ya: mate hallowe ya: dulu kokoye pta pato. Epedeme koko itapo Kelisota sos mate moto hatlope depo hala kokoye botomastapo.

<sup>33</sup> Epapedeme na: ma opa dla atlema, wua:tapo wuskamu sikemte malamdiye, epammama wua: alludulo mape sikemte bokotiyapo malamha:ha:iya. Epalati ka:dena, wua: alludulo mape wua: yu dla salladepo siyamoloweye.

## 6

### *Adulo mate waidulo mate epo yimlala mate*

<sup>1</sup> Yimlala, wua: Lod dulu dla ha:ha:mama wua: adulo yu dla epo wua: waidulo yu dla salladepo siyamaiya. Adipalati, iye ka:dle kokopo. <sup>2-3</sup> Epapedeme aiyalma hatitimale dulu dla aiyalma haleta epo atlapo,

“Wua: adulo yu dla epo wua: waidulo yu dla salladepo siyamaiya.”  
Epedeme wua:ta epapelepiye, eta

“ta:lamo hema wua:tapo woloma ka:depo kokó ha:ha:lepe.”

<sup>4</sup> Epedeme adulo wua:ta wua: yimlala batalipo omha:ha:le tle yia: dla siyaladle hami demha:ha:miya. Amasiyama wua: yimlalata woloma ka:depo ha:ha:lepo depame woloma ka:dle api tle yia:ye gademha:ha:mama Keliso dulu dla ha:ha:lowe kokoye imha:ha:iya.

*Asiyama pa:le dla oko halalo so mate epo yia: dokopala so mate*

<sup>5</sup> Epame asiyama pa:le dla oko halalo so, wua:ta Keliso yu dla salladepo siyamaye, epammama ma wua: ta:lamo dokopala soye wowota:mama yia: yu dla hutulli mate salladepo siyamaiya. <sup>6</sup> Epele dulu dla wua: isikimi yia: inoma dali dla oko ka:pi halowa demiya. Adipalati, oko halowe dla sasalalimale soye isikimi yia: dokopala so inoma dali dla oko ka:pi halomdepo. Amasiyama wua: Keliso ya: oko so some wua: dupa dulu tle woloma Godta solotamale dla salladepo siyamaiya. <sup>7</sup> Epedeme wua:ta hutulli mate yia: oko hamama wua: dupa dulu tle isikimi Lod yilo oko hama depo malamaiya. <sup>8</sup> Adipalati, wua:malamana, Lodta opa hapuloma, asiyama pa:le dla oko halomalalo so mate epo yia: dokopala so mate dla yia:ta ka:ka:dle koko halomha:ha:le yia: asiyama mate ala:leye halopilipe.

<sup>9</sup> Epame dokopala so wua: mape wua: oko soye woloma ka:pi omha:ha:iya. Epame yia: dla itiyamale yu mate wowota:le hapimha:ha:miya. Adipalati, wua:malamana, wua: mate epo yia: mate wua: Lod hatlopeye Pepele dimo dla halapo. Epedeme ya:tapo opa hapuloma kokoye woloma ka:pi gladlepe, epammama ya:tapo seme tiyape tlo pogadlowa.

*Wua: opahale koko dla dinapiya*

<sup>10</sup> Epedeme na: yu mosukulu dla na:tapo wua: watle koko iye atlema. Wua: Lod dulu dla ha:ha:mama ya:ta itiyamale pato mate ha:ha:iya. <sup>11</sup> Epame opahale dla tamama didiyepo tlalo alisisi hapulomaye God tle halopame didiyeiya, wua:tapo Saitenta el-emala natili koko hapuloma dulu medla kokalalipo ha:ha:lowedeme. <sup>12</sup> Adipalati, dita opahale de iye isikimi opa ikadepe mate po-opahale desema. Amasiyama ditapo bataliya yimlala hapuloma mate epo yia: dokopala so mate epame ta:lamo amtuwale omha:ha:lalo yia: dokopala so mate opahale depo. <sup>13</sup> Epapedeme wua:tapo batalimale alila dla kokalalipo ha:ha:lowedeme God tle opahale alisisi hapulomaye halopo didiyeiya. Wua:ta epapelepiye, eta opahale dele alilata mogudlati wua:tapo ala mekokalalipo ha:ha:lepe.

<sup>14</sup> Epapedeme wua: kokalalipo ha:ha:lowedeme ikadepe kokoye nosowe some didiyeiya. Epame God mila:pi tle ullu pa:po hallowe kokoye kapulu some pitako dla didiyeiya. <sup>15</sup> Epame ka:dle yuta hapili sadle mate epo dinapopo hallowe koko mateye wua: hete dla hete alisisi some didiyeiya. <sup>16</sup> Epame alila hapuloma dulu dla mikadepe dle kokoye ilokili some hamsiyamama wuskamu wua:ye kukomsiyamaiya, Saiten ya: opahale kosele teleka:leta puame wua:ye sumalala depame. <sup>17</sup> Epame pasakalo gadlowe kokoye etimi some didiyeiya. Epame Hela:dle Sokota wua: dla hapili aipa:yaye wua: do mate halopo ha:ha:iya. Adipalati, aipa:ya iye God yupo. <sup>18</sup> Koko hapuloma iye inoma sumale tle halomha:ha:iya. Epame alila hapuloma dulu dla Sokota itiyamale tle inoma sumha:ha:iya. Epammama wua:ta solotamale koko hapulomaye inoma sumale tle God dla otele himme ha:ha:iya. Epame wua: dinapopo ha:ha:mama God ya: opa hapuloma yilo inoma sumale yu himme ha:ha:iya.

<sup>19</sup> Epame wua: mape na: yilo inoma sumale yu himme ha:ha:iya, Godtapo na:ta atlamolowe yu hapulomaye na: watle hapilipo depame. Epame na:tapo powota:lalo itiyamale mate ka:dle yu ya: dulu kokoye haliyamale dla botomastlepo depame. <sup>20</sup> Adipalati,

na:tapo ka:dle yu yilo oko halalo halapo. Amasiyama epapele tlope na:tapo oko eye wata oloma hema amtuwale aya dulu dla halemama oko hamhalapo. Epapedeme wua: na: yilo inoma sumha:ha:iya, na:tapo God yuye wota:le pa:po atlamhallepo depame.

*Mosukulu dla namkale dle yu atlale*

<sup>21-22</sup> Epedeme na:tapo na: ei, Lod dulu dla oko halalo oplami Tikikusye wua: hala dla tane dema, ya:tapo di koko hapulomaye wua: dla atlepo depame. Epame gadle yu mate wua:ye itiyamale hamilipo depame.

<sup>23</sup> A Godtapo Lod Yesu Keliso mate yia:ta sadle koko mate epo bokotiyapo malamale koko mate epo mikadepe dle koko mateye mikadepe dle so hapuloma dulu dla ellepe.

<sup>24</sup> Epedeme di Lod Yesu Keliso sikemte malamalalo so opa dla Godta bokotiyapo malamaleta yia: mate hallepe.

## **Polota Pilipi sos dla yu ilimale hamili Pilipi Pilipi buka ya: dulu koko**

Mikadepe dle so Pilipi dla ha:ha:lalota Polo watle namkale dle alisisi halopiyo. Epalati alotle Polota Loum mo dla amtuwale aya dulu dla polomama asiyama yu ilimale iye yia: watle hamiyo. Ya: yia: watle siyele yu atlemama molo atlale yu mate ilipo hamiyo. Polo ya:skamu ya:ye amtuwale aya dulu dla halema depo pomalamaiyo. Amasiyama ya: isikimi mikadepe dle sota Lod dulu dla me-siyele mate ha:ha:lepo depame yu iye ilipo hamiyo.

<sup>1</sup> Di Yesu Keliso oko halalo so Polo mate epo Timoti mate yu ilimale iye Pilipi mo dulu dla mikadepe dle so mate epo dikon so mate epame sos dokopala so mate dla hamima. <sup>2</sup> Epedeme di A God mate Lod Yesu Keliso mate yia:ta bokotiyapo malamale mate sadle mateta wua: dulu dla ellepe.

### *Polota Pilipi so dla namkale dle yu atlale*

<sup>3</sup> Na: alila hapuloma wua: malapame God watle siyele yu atlemde. <sup>4</sup> Epame wua: yilo God watle inoma sumama siyele mate atlemde. <sup>5</sup> Adipalati, wua:ta ka:yapa God yu dalepame mikadepe duwa oloma etle pua dulu dla wua:ta na:ta ka:dle yu atlamsela:lati ka:pi gademduwapo. <sup>6</sup> Epapedeme na:malamana, Godta wua: dulu dla oko ka:dle kotiyamuwaye pomellowa. Amasiyama Yesu Kelisota ma ilampuluwe dla tame guddepo mellepe.

<sup>7</sup> Epapele koko tle na:ta wua: yilo ipo sikemte malamhalaye ka:dena. Adipalati, wua:ye namkadulo ikadepepo. Ame adipalati, na:ta amtuwale aya dla tulluwe dla epame na:ta God tiyama tle halemama opata mikadepe dle dulu dla kokalepo ha:ha:lepo depame ka:dle yuye insela:lati wua:tapo na: mate Godta bokotiyapo malamale dulu dla hatlope demduwapo. <sup>8</sup> God ya:malamana, na:ta wua: natilowedeme solotamale pato himme hala kokoye. Adipalati, na:tapo wua:ye Yesu Kelisota bokotiyapo malamale mate wua:ye sikemte malahalema.

### *Polota inoma sumale*

<sup>9-10</sup> Na: wua: yilo inoma sumale yu pato himima, wua: dulu dla wua:tapo yimkadulo bokotiyapo malamolowe kokota ta:lepo depame, epame wua:tapo God koko malamoloweta sikemte ta:lepo depame. Epo na: ma inoma sumale yu hale himima, wua:tapo ka:dle koko mate batalimale koko mate dulu dla ka:dle koko tlo malanatipame halomha:ha:lepo depame. Epo wua:ta epamha:ha:mama Kelisota puale oloma dla ullu pa:talo so depo ha:ha:lepo depame. <sup>11</sup> Epame na: ma inoma sumale yu hale himima, wua:tapo Keliso tle ka:ka:dle koko halomoloweta wua: dla poposatilipo ha:ha:lati Godta natipo siyelepo depame.

### *Polota amtuwale aya dulu dla haluwatapo ka:dle yuye opa dulu dla pato duwapo*

<sup>12</sup> Mikadepe dle so namkadulo, na: solotama, wua:tapo koko iye woloma malastlepo depame. Adipalati, na: dla woyamuwa wotiyalle kokotapo ka:dle yuye poyumina. Amasiyama na: dla wowoyamuwa koko etapo ka:dle yuye opa hapuloma dla mahamtauwapo. <sup>13</sup> Epapedeme opa hapuloma hema ha:ha: so mate epo dokopala oplami aya alikili tle omha:ha:lalo so mate me-yia:malamana, na:ta Keliso dla mikadepe duwa koko tle amtuwale aya dulu dla halaye. <sup>14</sup> Epame na: dla oli dea yulupo hala koko itapo mikadepe dle so opi dla itiyamale hamipo, yia:tapo God yuye wowota:le pa:po atlamsiyamelepo depame.

<sup>15</sup> Mikadepe, opa opitapo na: dla elle himpame yia:ta God yu atlale koko tle na: tla:mtlowa depame God yu atlamsiyamapo. Amasiyama opa opitapo ka:dle malamale tle Keliso kokoye atlamsiyamapo. <sup>16</sup> Adipalati, yia:malamana, na:ta God tiyama tle halemama God yu yilo na:ta amtuwale aya dulu dla tuluwaye. Epapedeme yia:tapo na:ye bokotiyapo malapame God yu atlamsiyamapo. <sup>17</sup> Amasiyama opa opi ana-wolotapo yia:ta God yu atlale koko tle na: tla:mtlowa dlalo sotapo yia: ka:dle koko tle Keliso kokoye po-atlamsiyamasema. Amasiyama yia: yiskamu hamhetale koko tle Keliso kokoye atlamsiyamapo. Yia:ta epamsiyamama na:ta amtuwale aya dla hallati na: watile wotiyalle hamilowedeme amsiyamapo. <sup>18</sup> Epapele dulu dla opa opitapo batalipo malamale tle God yu atlamsiyamalati opa opitapo ka:dle momalamale tle Keliso kokoye atlamsiyamapo. Amasiyama epapele dulu dla na: koko e posesa:sema. Adipalati, hatlo Keliso koko tlo opa dla atlowe kokota pato halapo. Epedeme ipapele koko dla na: sikemte siyema.

Epele dulu dla na: ma sikemte siyema. <sup>19</sup> Adipalati, wua:ta na: yilo inoma sumale koko tle epame Yesu ya: Hela:dle Sokota na: gademhala koko tle na:malamana, na:ye amtuwale aya dulu tle ma alikili dla woyamelepe. <sup>20</sup> Epedeme na: dupa dulu tle malapame solotamale kokoye ipo. Na:ta kokalepo halemama God oko wata hamhala iye pomellowa. Adipalati, na:ta na: okoye woloma pohalalo isikimi duka dla teyulupiye, eta na: dla wota:le hamilipe. Epapedeme na: solotama, na:ta ka:yapa wota:le pa:po itiyamale mate God oko dla sela:uwaye, ma wata epo hallowe solotama. Epapele dulu dla na:ta pasakalo hallowe dla epo polowe dla na: isikimi Keliso hi tlo di dla ta:dlowe solotama. <sup>21</sup> Adipalati, na:ta ala me-pasakalo hallepiye, na: isikimi Keliso yilo hallowepo. Amasiyama na:ta polowe ma ka:pi. Adipalati, edla na: Keliso mate hallepe. <sup>22</sup> Epapedeme na: ala me-pasakalo hallepiye, ka:dena, na: Lod okoye woloma hamtlowepo. Amasiyama na: dla malamale pta tatlama. Adipalati, na:ta malamaleyeye poloweta ka:pita:, o pasakalo hallowe kokota ka:pita:? dema. <sup>23</sup> Amasiyama na:tapo koko dapiyamte hema koko hatlo tlo solotamoloweye pta kokalema. Epele tlope na: popame Keliso mate hallowe tlo sikemte solotama. <sup>24</sup> Amasiyama na:ta wua: gadlowe yilo na:ta ala popolalo hallowe tlo ka:pi.

<sup>25</sup> Na: koko eye ikadepe demama malama, na:ye yipta popolowa, wua:tapo na:ta gadle tle mikadepe dle dulu dla kokalepo ha:ha:mama sisiyele mate ha:ha:lepo depame. <sup>26</sup> Epapedeme na:ta ma wua: hala dla ilampulati wua:tapo Keliso dulu dla sikemte sisiyelepe.

<sup>27</sup> Epedeme koko patoye ipo, wua:ta ha:ha:le pasakalo dulu dla Keliso ya: ka:dle yu mate ala:po ha:ha:iya. Epele dulu dla na:ta puame wua: natilowe dla ta:, o isikimi na: mo dla halemama dallowe dla ta:, na: solotama, wua:tapo woloma malamale hatlope depame yimkata opa hapuloma mila:pi tle ka:dle yu dulu dla kokalepo ha:ha:lepo depame.

<sup>28</sup> Epele dulu dla wua: dla allimha:ha: so dla wowota:mha:ha:miya. Wua:ta powowota:lalo ha:ha:lepiye, eta yia:ta polowe dla umula taye yia: watile imelepe. Epame Godtapo wua: watile pasakalo hallowe hamilowedeme hala koko mape yia: watile imelepe. <sup>29</sup> Epedeme Godtapo wua:ye Keliso hala dla sisilamuwaye hatlo mikadepe dle dulu dla ha:ha:lepo depame po-apena. Hao, amasiyama Keliso yilo wotiyalle dulu dla ha:ha:lowe mate dla mape sisilamuwapo. <sup>30</sup> Epapedeme dita hapulomatapo yimkata kokalle koko dulu dla wotiyalle me-natimdepo. Epame wua: ma me-natiwapo, na:ta ka:yapa Keliso yilo wotiyalle hamama upiyele hauwaye. Epele dulu dla na: wotiyalle dulu edla ala me-halapo.

## 2

*Ya:mkale bokotiyapo malamale mate sadle mate ha:ha:iya*



<sup>1</sup> Wua: Keliso dulu dla ha:ha:liti itiyamale hamdi? Epame ya:ta bokotiyapo mala-maleta wua:ye gademdi? Epo dulu edla wua: Soko mate hatlope demdi? Epame wua: dulu dla ya:mkale polowamale mate gadlowe koko mate elema:? <sup>2</sup> Wua: dulu dla ipapele kokota dollupiye, na: wua: dla atlema, malamale hatlope depame bokotiyapo malamale dulu dla ha:ha:mama hatlope depo ha:ha:iya. Wua:ta ipapele koko dulu dla ha:ha:lepiye, eta na: dla siyele pato hamilipe. <sup>3</sup> Epo ha:ha:le dulu dla wua: wa:skamu wua: hi di dla halopo hetamama ya:mkale malamale pa:le mate ha:ha:miya. Amasiyama wua: sadle mate ha:ha:mama yimkadulo sikemte momalamha:ha:iya. <sup>4</sup> Epame wua: hatlo wua:ta solotamale koko tlo ala:mha:ha:miya. Amasiyama wua: amkadulota solotamale koko mape ala:mha:ha:iya.

*Keliso koko natipo dolumaiya*

<sup>5</sup> Wua:ta ha:ha:le dulu dla wua:ta momalamale mate epo wua:ta moto mate koko halë mate Keliso some ipo ha:ha:iya.

<sup>6</sup> Koko hapuloma dulu dla Kelisoye God depo haluwapo.

Amasiyama ya:ta epo God depo haluwa kokoye pase sikemte malamana.

<sup>7</sup> Amasiyama ya: ya:ta epo halale koko hapulomaye God hala dla me-pomelepame ya:skamu ya:ye koko pa:le duwapo.

Epame ya:ye oplami moto hapame ta:lamo dla puwapo.

Ya:tapo salladlalo oplami halemama salladle oko halowedeme maluwapo.

<sup>8</sup> Ya: epo oplami moto hapo ya:skamu isili dla hamtulupame

God yu dla salladepo sela:mama dali yekelemhimili di dla poloweye po-alina.

<sup>9</sup> Epedeme Godta ya:ye di ikadepe dla hamhetapame ya: watle hi pato hamiwapo.

Hi itapo hi hapuloma dulu dla di ikadepe dla elapo.

<sup>10</sup> Godtapo Yesu watle hi pato iye hamiwapo,

Pepele di dla ha:ha: so hapuloma mate epo ta:lamo dla ha:ha: so hapuloma mate epame ta:la dulu dla ha:ha: so hapuloma mateta hatlo Yesu ya: hi dla heodlepo depame.

<sup>11</sup> Epapedeme hapulomatapo di A God hiye di dla ta:dlowedeme Yesu Kelisoye Lod dlepe.

*Wua: Godya: akimlala depo ha:ha:mama tamili some amtuwale dulu dla salempopa:iya*

<sup>12</sup> Epapedeme namkadulo, na:ta wua: mate haluwa oloma edla wua:ta na: yu dla ka:pi salladepo siyamuwapo. Amasiyama ka:dena, ma na:ta wua: saliyome tame pateka:mu dla hala oloma hema wua:tapo na: yu dla woloma mepo salladepo siyamaiya. Epele dulu dla wua: God wowota:le mate ha:ha:mama mikadepe dle sota ha:ha:lalo pasakalo nati-ya. <sup>13</sup> Adipalati, Godtapo wua: dulu dla oko hamhalemama wua: watle ya:ta solotamale koko ka:ka:dle halomolowe malamaley halopimdepo.

<sup>14</sup> Wua: koko hapuloma halomha:ha:mama alli mate yu topulolle mate halomha:ha:miya. <sup>15</sup> Adipalati, wua:ta epapele koko pahalomalalo ha:ha:lepiye, eta wua:ye God ya: akimlala depame ullu pa:le ikadepe ka:ka:dle so dlepe. Epame dulu edla wua:tapo ta:lamo hema ha:ha:mama batalimale so dulu dla tamili some salempopa:lepe.

<sup>16</sup> Adipalati, wua:tapo opa opi watle pasakalo yuye alemha:ha:le koko tle. Wua:ta epamha:ha:lepiye, eta na: malamelepe, na: oko wua: dulu dla hauwaye koko pa:le pe-elasma. Epammama Yesuta ma ilampulupiye, na: wua: koko dla siyelowepo.

<sup>17</sup> Wua:ta mikadepe dleye alinepi poyupo God dla hapimdiye epapele some halapo. Epapedeme e tama di tle opata na: yumpo na: omaliye simelepiye, ka:dena. Adipalati, epapele koko dla na:tapo ka:dena demama wua: mate hatlo siyepo. <sup>18</sup> Epedeme wua: mape koko hema na: mate sisiyelowe ka:pi.

*Timoti mate Epaplotitos mate yia: koko*

<sup>19</sup> Namkadulo, Lod Yesu Kelisota ka:dena dlepiye, eta Timotiye wua: dla tane dlowepo. Epame ya:ta wua:ta ha:ha: koko natipame ma ilampuame na: watle atlati dallowe sikemte solotama. <sup>20</sup> Epele dulu dla na: dla wua: gadlowe oplami hale hawa ikadepe, hatlo Timotipo. Hatlo ya:tapo wua: gadloweye sikemte solotama. <sup>21</sup> Amasiyama opa opiye yiskamu yia: koko tlo sikemte malamama Keliso oko tlo pase malamasema. <sup>22</sup> Epele dulu dla wua: Timotita halale kokoye mo-wua:malamana. Ya:tapo maseye-malata ya: a gademdiye epammama ya:tapo na:ta ka:dle yuye opa dla hamsela:lati na: gademsela:uwapo. <sup>23</sup> Epapedeme na:ta na: dla koko woyamolowe malastlepiye, eta wua: watle Timotiye hapele tane dlowepo. <sup>24</sup> Epame na: Lod dla mikadepe dema, ya:ta na: dla alila hamilipiye, eta na: mape hapele tame wua: natilipe.

<sup>25</sup> Amasiyama namkale Keliso dulu dla na: mate oko halalo oplami Epaploditos mape wua: dla tane dlowama. Wua:tapo ya:ye na: mate sela:mama na: gademsela:lepo depame tane duwapo. Amasiyama na: wata ya:ye ma ilame wua: hala dla tane dema. <sup>26</sup> Adipalati, ya:ye wua: sikemte momalamhalema. Epame wua:ta ya:ta esiyele koko dalepo ya: momalamha:ha: dla ya:ye sikemte dupa yuli mate halema. <sup>27</sup> Yao, eye ikadepe, ya: esiyemama mo-pola yakomuwapo. Epapele tlope Godta ya: bokotiyapo malamama ya:ye ma-ka:duwapo. Epame ya:ta ka:dle koko tle Godta na: ma gaduwa, na:ta ya: yilo dupa kollala depame. <sup>28</sup> Epapele koko tle na:tapo ya:ye hapele wua: dla tane dema, wua:ta ya: natipo sisiyelepo depame. Epalati asiyama na:tapo wua: yilo woloma hedle halowepo. <sup>29</sup> Wua:ta ya:ta pula natipame sisiyele mate ya: hamaiya. Wua: opa Epaploditos epapele so dla siyele ta:demha:ha:iya. <sup>30</sup> Adipalati, ya:tapo Keliso oko hamsela:mama mo-pola yakomuwapo. Wua:tapo mo pateka:mu dla ha:ha:mama na: pogadlalo ha:ha:lati ya:tapo wua: yilo na: gademsela:mama ya:skamu ya: pasakaloye haodlowe dla himiwapo.

### 3

#### *Keliso koko malamolowe tlo pta koko pato*

<sup>1</sup> Epapedeme namkadulo, wua: Lod dulu dla ha:ha:mama sisiyele mate ha:ha:iya. Na: na:ta wua: watle ma atlamuwa koko iye ma wata wua: watle atlamolowedeme po-alisema. Adipalati, ka:dlepo, wua:tapo koko iye woloma sikemte malastepo ha:ha:loweye.

<sup>2</sup> Epapedeme wua: wolomape. Adipalati, opa opitapo wua:ye ipo imsiyamapo, “Wua: pasakalo hallowe halowedeme kapala kotimaiya,” demsiyamapo. Epapele tlope yia:ta imale koko dla mikadepe demiya. Adipalati, yia:ye esemala some batalimale koko halomsiyamama apopo. <sup>3</sup> Epame God mila:pi tle yia:ye kapala pokotimale so depo ha:ha:po. Amasiyama Hela:dle Sokota itiyamale tle God hi di dla ta:dlalo so dia:ye ya: mila:pi tle ikadepe kapala kotimale so depo ha:ha:po. Di dita itiyamale tle koko halomde dla diskamu popepeyalimasema. Amasiyama Kelisota dia: dla koko halë tlo di dla hamhetamama ya:ye pepema. <sup>4</sup> Epele dulu dla oplami haletapo ya:skamu pepemolowe poka:dena. Amasiyama ya:ta ya:skamu pepemama ya:ye di dla hamhetlepiye, na:ta ya:ye tla:mtelepe. <sup>5</sup> Adipalati, na: waita na: hampame alila 7 pololepo gudlati 8 alila dla na: kapala kestauwapo. Na:ye Isalael so dulu dla Benyamin elele halë oplamipo. Epapedeme na:ye Hibulu oplami ikadepepo. Epo na:ye Pa:lisi oplami halemama Godta aiyalma hatitimale hapulomaye woloma dolumpumama hale pohamastana. <sup>6</sup> Na:ta ikadepe Yu oplami depame Godta aiyalma hatitimale hapuloma eye woloma kikitilata hamame dolumpumama mikadepe dle soye wotiyalle hapimhaluwapo. Epele dulu dla aiyalma koko hapuloma dulu tle opata na: natiwaye, na:ye batalimale pa:le oplami depo haluwapo.

<sup>7</sup> Alila oloma edla na:ta koko e tlamduwaye koko pta pato demduwapo. Amasiyama watapo Keliso dulu tle halemama takala koko e tlamaye, na: dla pokoko desema.

<sup>8</sup> Epapedeme na:ta Yesu Kelisoye na: Lod duwa kokota pato halemama koko opi hapulomaye na: dla koko pa:le halapo. Epedeme na: Keliso hamolowedeme ya: yilo takala koko hapuloma eye pokoko depame hakaka some mo-pololuwapo. <sup>9</sup> Na: Keliso mate hatlope depo hallowe tlo sikemte solotama. Epele dulu dla na:ta di Yu so aiyalma dolumhaluwatapo na:ye God mila:pi tle ullu pa:le oplami pe-epapena, hao. Amasiyama na:ta Keliso dla mikadepe duwa koko tle Godtapo na:ye ullu pa:le oplami duwapo. <sup>10</sup> Epedeme na: Keliso koko mate epo ya:ye powale tle ma pasakalo dla ta:duwa itiyamale koko mate tlo sikemte malamolowe solotama. Epammama na: solotama, Kelisota wotiyalle hapo pouwaye na: ma epapolowedeme. <sup>11</sup> Epame na: ma mikadepe dema, na:ta powale tle ma pasakalo dloweye.

*God tle asiyama halowedeme itiyamale mate mosukulu dla ullumtaiya*

<sup>12</sup> Na:ta atla dulu hema na:ye Keliso kokoye ikadepe sikemte malastauwa depo potlasema. Epame na: dla Godta ya: oko hamhalaye ala pogudesema. Amasiyama na: Keliso some hallowedeme ya:ta na: sisilamuwa koko dla ala omtamama itiyamale mate tapo. Adipalati, Kelisotapo na:ta ya: some hallepo depame na:ye ma-sauwapo. <sup>13</sup> Namkadulo, epapele tlope na: ala Keliso some pohalasema. Epapedeme na: alo koko hapulomaye wowelipame itapu koko tlo sikemte solotamama malatapo. Adipalati, koko iye patopo. <sup>14</sup> Epedeme na: itiyamale mate asiyama halowedeme mosukulu dla tama. Asiyama eye Godta Yesu tle dinapele Pepele di dla ela pasakalo e halowedeme. <sup>15</sup> Epapedeme di mikadepe dle dulu dla kokalepo ha:ha:lalo sota ipo malamha:ha:lowe ka:pipo. Epapele dulu dla wua: koko hema pase mikadepe dlalo wekelepiye, Godta wua:ye woloma imelepe. <sup>16</sup> Amasiyama ka:dlepo, dita adipo ka:dle yuye dolumpuwa, ma mepo dolumtlowe ka:pi.

<sup>17</sup> Namkadulo, ka:dena, wua:tapo na:ta haluwa pasakalo natipame dolumoloweye. Epame mikadepe dle so opa opita di koko natipo dolumha:ha:ye, wua: ma ewolo pasakalo natipame yia: dolumaiya. <sup>18</sup> Adipalati, opa opitapo Kelisota dali di dla powale kokoye allimama ya: dla opahale demha:ha:po. Epedeme na: koko hapuloma iye wua: watle ma-atlamuwapo. Epame ma watapo kaiyo mate wua: watle atlema. <sup>19</sup> Adipalati, opa iwolota tamalaye Dlapa mo dla tamalapo. Epame yia: godye yia: motota solotamale alisisipo. Epame yia:ta batalimale koko halomde dla wowota:lowe tlope ma ka:ka:dle koko depame sisiyemdepo. Epame yia:ta malamale dulu dla ta:lamo koko tlo solotamale pato hutiyepo. <sup>20</sup> Amasiyama dia:ye, Pepele dimoye di mo ikadepepo. Epedeme di, di Lod Yesu Kelisota Pepele dimo tle mallepo depame ya: omha:ha:po. Adipalati, ya:tapo di pasakaloye hampulupe. <sup>21</sup> Epele dulu dla ya:tapo malame di ta:lamo motoye ya:ta itiyamaleta meyelohe depame ma ya: Pepele dimo moto sepeleye di watle hapilipe. Ya:ta di moto amko hapilowe itiyamale etapo alisisi hapulomaye ma ya: hete sitali dla hatitimoloweye ala:na.

## 4

*Mikadepe dle sota halomha:ha:loweye Polota molo atlale*

<sup>1</sup> Namkadulo, na: wua: sikemte malamama wua: tame natilowe solotama. Epame wua:ta na: dla siyele pato hamima. Epedeme wua: Lod dulu dla ha:ha:mama woloma kokalepo ha:ha:iya.

<sup>2</sup> Na: ma wola: dapiyamte Yuwodiya mate Suntuka: mate dla atlema, yia:ta yu topulolle dulu dla ha:ha:ye memelepame ma Lod dulu dla hatlope depo ha:ha:lepo depame. <sup>3</sup> Epedeme namkale pato, na: wa: dla atlema, wola: dapiyamte iwoloye woloma gadene. Adipalati, yia:tapo Kelemen mate epo opa opi mate na:ta ka:dle yu hame sela:lali na: gademsiyamuwapo. Epame iwolo hiye Pasakalo Buka dulu dla hutiyepo.

<sup>4</sup> Epapedeme Lod dulu dla sisiyele mate ha:ha:iya. Epame na: yu i mamisika: atlema, wua: sisiyele mate ha:ha:iya. <sup>5</sup> Epame opa hapuloma dla wua:ta sadle kokoye nati-ya. Lodta puluweye mo-mateka:pi. <sup>6</sup> Epapele dulu dla wua: ase sikemte momalamale mate ha:ha:miya. Amasiyama inoma sumale yu mate siyele yu mate wua:ta solotamale koko hapulomaye God dla otele himme ha:ha:iya. <sup>7</sup> Epalati Godta sadletapo wua: dupa dulu dla epo wua:ta malamale dla omhallepe, wua:ta Yesu Keliso dulu dla me-ha:ha:lepo depame. Adipalati, Godta sadle iye pta ka:pi, opata malamaleye tla:mtana.

<sup>8</sup> Epedeme mikadepe dle so namkadulo, na: yu mosukulu dla tamama koko iye wua: watle atlema. Wua:ta malamale dulu dla ipapele koko tlo sikemte malamha:ha:iya. Eye ikadepe kokopo, epo sadepo hallowe kokopo, epo God mila:pi tle ka:depo hallowe kokopo, epame ullu pa:po hallowe kokopo, epame opa dla siyele hamilowe kokopo. Epedeme ipapele koko tlo sikemte momalamha:ha:iya. <sup>9</sup> Epapedeme ka:dle koko na:ta wua: watle imalati wua:ta dalepame hauwaye etlo dolumha:ha:iya. Epame wua:ta na:ta koko halomsela:lati natiwaye e ma halomha:ha:iya. Epapelepiye, sadle hamilalo Godta wua: mate hallepe.

*Polota Pilipi sota namkale dle alisisi hamili koko dla siyele yu atlale*

<sup>10</sup> Epapedeme wua:tapo alila pato mo-pokadlati wua:ta ma na: malapame namkale dle alisisi na: watle hamiwa dla na:ta sikemte siyele yu Lod dla atlema. Na:malamana, wua:tapo alila hapuloma dulu dla na: malamha:ha:mduwaye. Amasiyama alila ka:dleta wua: dla popumdena, wua:ta na: malapame na: dla namkale dle alisisi hapiloweye.

<sup>11</sup> Epedeme na: dla alisisita pa:lati wua: watle alisisi otomama po-atlasema. Amasiyama na: na:malamana, na:ta adipapele koko dulu dla tulume hallepiye, na: edla alimama pobatalimana desemde. <sup>12</sup> Adipalati, na: alisisi dimi halloweye na:malamana. Epame na: alisisi pasatale hallowe koko mape na:malamana. Epapele dulu dla na: dla alisisi pasatale hallowe koko mate epo alisisi dimi hallowe koko mate dulu edla na: ma-ala:na. Epame na: dla daya ta:lowe koko mate epo daya sukallowe koko mate dulu dla na: ma-ala:na. Adipalati, na: ipapele koko hapuloma dulu dla halloweye mo-malastauwapo. <sup>13</sup> Epapedeme na: Kelisota itiyamale hamiwa tle koko hapuloma halomoloweye ma-ala:na.

<sup>14</sup> Amasiyama dulu edla wua:tapo na:ta kokalle koko dulu dla hallati gaduwaye ka:pi. <sup>15</sup> Epedeme Pilipi so mo-wua:malamana, na:ta ka:yapa ka:dle yuye wua: dla hampuame Makedoniya dla hamsela:po depame ma mo hale dla tlowedeme hallati wua:tapo na:ye alisisi mate gaduwapo. Epele dulu dla sos opita na:ye pogadena. <sup>16</sup> Alila opi dulu dla na: Tesalonika dla halemama alisisi dimi hallati wua:tapo alisisi mate na:ye gademduwapo. <sup>17</sup> Epapele dulu dla na:tapo wua: watle alisisi otomhallati po-apesemde. Amasiyama na: solotama, wua:tapo hamili tle asiyama Godta wua: dla gadle himhala natilipo depo amma. <sup>18</sup> Watapo na: dla alisisi sikemte pasatepo elapo. Adipalati, Epaploditosta wua:ta na: watle namkale dle alisisi hapiliye puame hapiwa. Epapedeme wua:ta na: watle namkale dle alisisi hamiliye di Yu sota ka:dle ullu pamalalo ha:lati Godta seyamale ullu papame siyemama ka:dena demdiye, epapele some halapo. Epedeme Godtapo wua: dla ka:dena depame siyemhalapo. <sup>19</sup> Epapedeme na: God dla koko hapulomata pasatame sukulu pa:le elapo. Epedeme ya:ta Yesu Keliso tle wua:ta solotamale kokoye wua: watle hapilipe.

<sup>20</sup> Epapedeme siyele kokotapo di A God dla kokó elepo ellepe. Eye ikadepepo.

<sup>21</sup> Epapedeme Yesu Keliso dla mikadepe dle so opa hapuloma dla namkale dle yu atlamaiya. Mikadepe dle so na: mate hema ha:ha: so ma yia:ta namkale dle yu wua: dla atlema. <sup>22</sup> Epalati Sisa aya dla oko halalo mikadepe dle so yia:ta namkale dle yuye wua: dla atlema. Epame mikadepe dle so opi mape yia:ta namkale dle yuye wua: dla atlema.

<sup>23</sup> Lod Yesu Kelisota bokotiyapo malamaletapo wua: mate hallepe.

## **Polota Kolosi sos dla yu ilimale hamili Kolosi Kolosi buka ya: dulu koko**

Kolosi sos dulu dla biskapa koko imalalo sota ipapele kokoye imha:ha:iyo, opata aiyalma hatitimale dolumolowe koko epo banakaka so dla sisiyemama heodlowe koko. Epame ya:ta imale dulu dla hatlo Kelisota itiyamale tle di pasakalo gadloweye po-ala:na demdiyo. Epela natipame Polota amtuwale aya dulu dla halemama yu ilimale iye Kolosi sos watle hamiyo. Epedeme ya:ta yu ilimale dulu hema koko pato hatlo ya:ta atlaleye, hatlo Kelisota di pasakalo gadloweye ala:na diyo.

<sup>1-2</sup> Na:ye Polopo. Godta na:ye sauwapo, na:tapo Yesu Keliso ya: Taiya dle oko halepo depame. Epedeme na:tapo di ei Timoti mate yu iye Kolosi dla ha:ha:lalo Keliso dla mikadepe dle so wua: dla hamima. Adipalati, wua:ye God ya: opapo. Epedeme di A Godta bokotiyapo malamale mate epo sadle mateta wua: mate hallepe.

### *Polota siyele yu mate inoma sumale yu mate atlale*

<sup>3</sup> Ditapo wua: yilo inoma sumha:ha:mama di Lod Yesu Keliso ya: A God dla siyele yu atlemde. <sup>4</sup> Adipalati, wua:ta Yesu Keliso dla mikadepe dle koko mate epame wua:ta God ya: opa dla bokotiyapo malamha:ha: koko mateye di me-daluwa. <sup>5</sup> Epedeme ka:dle yutapo wua: dla puwa oloma etle pua dla wua:tapo Pepele dimo dla ela pasakaloye halowedeme dalemha:ha:mama omha:ha:uwapo. Epapele koko tle wua: dulu dla mikadepe dle koko mate ya:mkale bokotiyapo malamolowe koko mateta hutiyepo. <sup>6</sup> Wua:ta ka:yapa ka:dle yu dalepame Godta bokotiyapo malamaleye ikadepe dlati ka:dle yutapo wua: dulu dla dlomoko some mimama pasatauwapo. Epele dulu dla koko eta hatlo wua: dulu dla powoyamana. Amasiyama mo hapuloma dulu dla wowoyamuwapo. <sup>7</sup> Epedeme wua:tapo ka:dle yuye dita sikemte malamalalo oplami Epaplas tle ma-daluwapo. Oplami itapo yimkata dia: mate Lod okoye hamdepo. Epedeme ya:tapo wua: gadlowedeme wua: dulu dla Keliso okoye ka:pi hauwapo. <sup>8</sup> Epame wua:ta Soko dulu tle ha:ha:mama ya:mkale bokotiyapo malamha:ha: kokoye di watle atluwapo.

<sup>9</sup> Epedeme dita wua: koko daluwa oloma etle dita wua: yilo God dla inoma sumoloweye poka:limdena. Adipalati, di solotama, Godtapo ya:ta solotamale kokoye Soko tle wua: dla imalati ma wua:ta malastlepo depo amma. Epame Godtapo ya: Soko tle wua: dla malamale ka:dleye hamilipo depo amma. <sup>10</sup> Epedeme ditapo wua: yilo inoma sumha:ha:ye, wua:ta ka:depo ha:ha:le pasakalo tle Lod dla siyele hamilipo depo amma. Epame wua:tapo ka:ka:dle koko tlo halomha:ha:mama dlomoko some milimelepo depo amma. Epame wua:ta God koko malamoloweta ta:lepo depo amma. <sup>11</sup> Di ma inoma sumale yu hale himima, Godtapo ya:ta itiyamale pato mate wua: dla itiyamale hamilipo depame wua:tapo kokalle koko hapuloma dulu dla kokalepo dalemha:ha:mama omha:ha:lepo depame. <sup>12</sup> Epedeme siyele mate A God hi di dla ta:demha:ha:iya. Adipalati, ya:tapo hela:dle mo dla ya:ta sesalemale so watle hamilowedeme dinapele kokoye ma dita halowe ala:na duwapo. <sup>13</sup> Adipalati, ya:tapo dia:ye amtuwale itiyamale dulu tle ma eleme ya:ta malamale Maseyemalata itiyamale dulu dla ipila:uwapo. <sup>14</sup> Epedeme Maseyematapato di batalimale asiyamaye ya:ta himiwapo. Epedeme ya:tapo di batalimale hapulomaye mo-howahalomuwapo.

### *Kelisota koko hapuloma dulu dla pato halapo*

<sup>15</sup> Epedeme Kelisoye opata ponatilalo wekemde God mila:pi himhalapo. Epame Godta alisisi hapuloma mimita:ple dulu dla ya:tapo itapu halemama omhallalo halapo. <sup>16</sup> Adipalati, Godtapo hatlo Keliso ya: tle alisisi hapuloma ta:lamo dla ha:ha:lalo



mate epo pepele di dla ha:ha:lalo mate mimita:puwapo. Ya:tapo epo mimita:pomama dita tlamde alisisi hapuloma mate epo dita potlamalalo wekemde alisisi hapuloma mate mimita:puwapo. Epammama ya:tapo itiyamale soko hapuloma mate epo yia:ta omha:ha:lalo mo hapuloma mate mimita:puwapo. Epapedeme Godtapo koko hapulomaye Keliso tete depame Keliso tle mimita:puwapo. <sup>17</sup> Epedeme alisisi hapuloma ala pohaha:lalo hallati Keliso ya: tatile haluwapo. Epapedeme ya:ta mimita:ple alisisi hapulomata dokostepo tullala depame woloma hamame hallalo halapo. <sup>18</sup> Epedeme Kelisota sos dokopala halapo. Epapedeme sos eye ya: motopo. Ya:ye kotiyamalepo. Epame ya:ye powale tle ka:yapa itapu sila:tili oplamipo, ya:tapo koko hapuloma dulu dla itapu hallepo depame. <sup>19</sup> Adipalati, Godtapo solotamuwapo, ya: koko hapulomatapo Keliso dulu dla pasatepo hallepo depame. <sup>20</sup> Epame Godtapo Kelisota dali yekelemhimili di dla powale koko tle alisisi hapuloma ta:lamo dla ha:ha:lalo mate epo pepele di dla ha:ha:lalo mateye ma ilame ya: hala dla elempuwapo. Adipalati, ya:tapo Keliso omali tle sadle kokoye hampuwapo.

<sup>21</sup> Wua:ye ka:yapa God tle pateka:mu dla ha:ha:uwapo. Adipalati, wua:ta malamale tle epame wua:ta batalimale koko halomduwa koko tle wua:ye God mate opahale demha:ha:uwapo. <sup>22</sup> Amasiyama ma watapo Yami Yesu Kelisota oplami moto hapame powale koko tle Godtapo wua:ye ya: hala dla me-elempuwapo, wua:tapo ya: mila:pi tle ullu pa:po ha:ha:mama batalimale pa:po ha:ha:lepo depame. <sup>23</sup> Epedeme wua: ka:dena, mikadepe dle dulu dla woloma kokalepo ha:ha:iya. Epame wua:ta ka:dle yu dalepame mikadepe depo ha:ha:mama Godta wua: pasakalo gadlowe dla dalemha:ha:mama omha:ha:ye melemya. Ka:dle yu iye ta:lamo pato dla ma-atlampuwapo. Epedeme Godtapo na: dla oko i hamilati na:tapo ka:dle yu iye hame sela:lalo halapo.

### *Polotapo sos yilo oko halë koko*

<sup>24</sup> Na:tapo wua: yilo wotiyalle hamama siyema. Adipalati, Kelisota hauwa wotiyalle ipiye ma na:tapo na: moto mate Keliso ya: sos yilo wotiyalle hapo. Ame adipalati, sosye Keliso ya: motopo. <sup>25</sup> Epame Godtapo sos yilo na:ye ya: oko oplami duwapo. Epedeme ya:tapo na: watile oko hamiwaye, na:tapo wua: gademama God yuye woloma haliyamale dla bobotimatimsela:lepo depame hamiwapo. <sup>26</sup> Adipalati, ka:dle yu iye ka:yapa opa hapulomata dallala depame hemele hatiyomeleme eluwapo. Amasiyama ma wata oloma hema Godtapo ya: opa dla mo-botomastauwapo. <sup>27</sup> Epedeme hemele hatiyomeleme elale koko eye ipo, Kelisota wua: dulu dla halapo. Epapedeme ya:tapo wua:ta God hala dla hetloweye api dlepe. Epapedeme Godtapo solotamale tle hemele hatiyomeleme elale ka:dle yu iye ma po-Yu so wua: dla mo-botomastauwapo.

<sup>28</sup> Epedeme ditapo malamale ka:dle mate Keliso kokoye opa hapuloma dla imsiyama molo atlamsiyamapo, yia:tapo Keliso dulu dla ikadepe opa depo ha:ha:lepo depame. <sup>29</sup> Epapele koko tle Kelisota itiyamale patota na: dulu dla hallati na:tapo God okoye sikemte hapo.

## 2

<sup>1</sup> Na: solotama, wua:ta koko iye sikemte malamelepo depame. Adipalati, na:ta wua: yilo epame Laodikeya so yilo epame opa opi na: mila:pi ponatilalo wekele so yilo inoma sumale yu mate sikemte oko hamde. <sup>2</sup> Adipalati, na:ta solotamale koko patoye epo elema, mikadepe dle soye gadle yu mate itiyamale hamilowedeme. Epame yia:tapo yimkata ha:ha:le dulu dla asiyama bokotiyapo malama asiyama bokotiyapo malama dlowe kokotapo yia:ye hatlo alupo dea some yupo hallepo depo amnde. Epame na: ma solotama, yia:tapo ka:dle yuye sikemte malastepo ha:ha:mama wota:le pa:po siyele mate ha:ha:lepo depame. Epame na: ma solotama, yia:ta Godta hemele hatiyomelle ela kokoye malastlepo depame. Adipalati, Godta hemele hatiyomelle ela koko eye Kelisopo. <sup>3</sup> Epedeme hatlo Keliso ya: dulu dla malamale ka:dle hapulomaye me-hutiyepo. <sup>4</sup> Yu iye

na:tapo wua: watle atlema, oplami haletapo biskapa koko imale tle wua:ye eleme alikili dla tlowedeme popotiyamale yu atlamalala depame.

<sup>5</sup> Epapele dulu dla na:tapo ikadepe wua: mate pohalasema. Amasiyama na:tapo Soko tle wua: mate halapo. Epedeme na:tapo wua:ta ka:depo ha:ha:mama Keliso dla mikadepe depo kokalepo ha:ha: dla na: siyema.

*Keliso dulu dla ha:ha:lowe koko*

<sup>6</sup> Epedeme wua:tapo Yesu Kelisoye wua: Lod depo ya: hamuwaye, epammama woloma hatlo ya: tlo dolumaiya. <sup>7</sup> Epame wua:ta mikadepe dle keseye hatlo Keliso dulu dla tutula:diya. Epame ya: tama dla wua:ta mikadepe dle kokota ta:ta:diya. Epame wua:ta mikadepe dle dulu dla itiyamale mate ha:ha:mama kokalepo ha:ha:iya. Adipalati, koko hapuloma iye wua: dla mo-imuwapo. Epame alila hapuloma dulu dla God dla siyele mate ha:ha:iya.

<sup>8</sup> Epedeme wua: wolomape, oplami haletapo ya:ta ka:depo dinapolowe malamale mate epo isikimi yu opalli tle wua:ye eleme alikili dla tlala. Adipalati, epapele mala-maleye Keliso tle popuasema, isikimi opata malamale tle puapo epame ta:lammo soko tle puapo.

<sup>9</sup> Amasiyama Keliso moto dulu dla God koko hapulomatapo pasatepo halapo. <sup>10</sup> Epapedeme wua: Keliso dulu dla ha:ha:lepiye, wua: dla koko haletapo pokiyepo halasema. Epedeme hatlo ya:tapo itiyamale soko hapulomaye dokopala depo halemama omhallalo halapo. <sup>11</sup> Epedeme wua:ta Keliso dulu dla ha:ha: koko tle wua:ye kapala mo-kotimale so depo ha:ha:po. Amasiyama kapala kotimale koko iye dlopi opata wua: moto dla kapala pokotimana. Hao. Amasiyama Kelisota kapala kotimaleye wua:ta mahauwapo. Eye wua:ta mota solotamale koko dla siyama tle alikili dla wowoyamoloweye apopo. <sup>12</sup> Epame wua:ta yú tutula:uwa oloma edla wua:ye Keliso mate wabasi dulu dla ma-hatiwapo. Epame wua:ye Keliso mate wabasi dulu tle ma mo-silliwapo. Adipalati, wua:tapo Godta Yesuye powale tle ma pasakalo duwa itiyamale edla mikadepe duwapo.

<sup>13</sup> Epedeme wua: Kelisota kapala kotimale ulu pohalomalalo ha:ha:uwa koko tle epame wua: batalimale koko tle wua: mo-palli so some ha:ha:uwapo. Amasiyama Godtapo Keliso tle wua:ye pasakalo dla elempuwapo. Epame ya:tapo di batalimale hapuloma mo-howahalomuwapo. <sup>14</sup> Epame di bobtalimale hapuloma hatitimale pepa eye hiyotipame Keliso mate dali yekelehmihili di dla mo-gogoduwapo. Adipalati, pepa etapo dia:ye Godta kasilamale dla elemtlowedeme eluwapo. <sup>15</sup> Epedeme Kelisota dali yekelehmihili di dla powale koko tle Godtapo itiyamale soko hapulomata itiyamaleye mo-tla:mtapame opa hapuloma inoma dali tle yia: dla wota:le hamiwapo.

*Isikimi opata aiyalma hatitimale dla dolumiya.*

<sup>16</sup> Epedeme opa opi wua: dulu dla aiyalma sikemte hatitimalalo soye me-ha:ha:po. Epapedeme wua:ta daya mate yú mate dlomha:ha: koko dla yia:ta aiyalma hatitimalati dolumha:ha:miya. Epame yia:tapo wua:ta daya dele meyeloape meyeloape dle koko dla epo wua:ta inoma sumalalo alila koko dla aiyalma hatitimaleye wua:ta podolumalalo ha:ha:lati asiyama yia:ta wua: dla allipiye, wua: epalati ase sikemte momalamha:ha:miya. <sup>17</sup> Adipalati, ipapele aiyalma kokoye ikadepe kokota alotle puluwedeme hallati ya:nasama siyapota itapu dla dompuapo. Amasiyama ya:nasama i ikadepe kokoye Kelisopo. <sup>18</sup> Opa iwolotapo epo aiyalma hatitimale tle opata yia: tlo ka:ka:dle so dlepo depame yiskamu yia:ye isili dla halopo tutula:mdepo. Yia: ma epame banakaka so dla siyele ta:demha:ha:mama inomata meyeloape depame koko tlamha:ha:mdepo. Epame epapele koko tle yia:tapo yiskamu di dla halopo hehetamha:ha:mama yiskamu yia: tlo ka:ka:dle so demdepo. Epame ma asiyama yia:tapo mikadepe dle so wua: tlo bobtalimale so demdepo. Amasiyama wua: epalati koko edla ase sikemte malamiya. <sup>19</sup> Adipalati, epapele soye sos dokopala oplami Keliso dla tame po-u-ulalipo ha:ha:sema. Epapedeme yia:ye Keliso moto ipi pohalopo

ha:ha:sema. Amasiyama Keliso dulu dla Keliso moto ipi halopo ha:ha:lalo so opaye Kelisota yia:ye kelepti some hohopo hallalo halemama yia:ye omhalapo. Epalati mototapo Godta solotamale tle ta:mtapo.

<sup>20</sup> Epedeme wua: Keliso mate mo-paliwapo. Epame ta:lamo koko tle alikili dla wowoy-apame ma opata hatitimale aiyalma koko tle alikili dla wowoyapo ha:ha:po. Epedeme wua: ma adipalati ta:lamo so some ha:ha:mama aiyalma ipapele dolumha:ha:ma?  
<sup>21</sup> Eye, “epapele hala aiyalma,” epo “ipapele alisisi dla natila aiyalma,” epame “epapele umula aiyalma,” dlowe kokoye apopo. <sup>22</sup> Adipalati, aiyalma iye isikimi opata dlopi hatitimale aiyalmapo, epame hapele pa:lalo alisisi dla hutiyepo. <sup>23</sup> Opa opitapo aiyalma koko ipapele natimama semte ka:detepo depo malamdepo. Adipalati, yia:ta natili dulu dla aiyalma ipapele dolumalalo sota itiyamale mate God dla sisiyemama yiskamu isili dla halopo tutula:pame yia: moto hohomalalo so demdepo. Amasiyama epapele tlope ditapo batalimale koko dla tullala depame aiyalma ipapeletapo dia: dla itiyamale pohamisemde.

### 3

#### *Takala koko dulu dla hallowe mate epo amko koko dulu dla hallowe mate*

<sup>1</sup> Epedeme wua:ye Godta Keliso mate powale tle ma pasakalo dla ma-ta:duwapo. Epedeme wua:ta malamale hapulomaye Pepele dimo dla hutiyeko koko tlo malaha:ha:iya. Adipalati, edla Kelisotapo Godta pollalo dowala tiyama dla polapo. <sup>2</sup> Epedeme wua: ase ta:lamo koko tlo momalamha:ha:miya. Amasiyama Pepele dimo koko momalam-oloweta wua:ta momalamale dla poposatilipo hutiyeko diya. <sup>3</sup> Adipalati, wua:ye mo-paliwapo, epame wua: pasakaloye Keliso mate God dulu dla hutiyepo. <sup>4</sup> Epedeme Kelisoye wua: pasakalo ikadepepo. Ya:tapo ma ilampulupiye, wua:tapo Kelisota hela:dle dulu dla ya: mate ha:ha:lepe.

<sup>5</sup> Epedeme wua: dulu dla mota solotamale koko ipapeleye pololiya, eye opa mate epo wola: mate uhalomolowe kokopo, epame ullu walle koko ma pololiya. Epame batalimale koko halomolowe dla sikemte ta:lowe koko ma alikili dla pololiya. Epame mani mate epo alisisi mate sikemte solotamolowe koko ma momalamha:ha:miya. Adipalati, mani mate alisisi mate sikemte solotamolowe koko iye biskapa god dla sisiyelowe kokopo. <sup>6</sup> Epapedeme Godta siyaladletapo batalimale koko hapuloma i halomha:ha:lalo so dla pulupe. <sup>7</sup> Ipapele koko hapulomaye wua:tapo ka:yapa ta:lamo koko dulu dla ha:ha:mama halomha:ha:mduwapo.

<sup>8</sup> Amasiyama wua: wata batalimale koko hapuloma pololiya. Epedeme wua: yimkadulo dla siyaladle mate ha:ha:miya. Epame yimkadulo elle mate ha:ha:mama yia: dla wotiyalle halopimha:ha:miya. Epame batalimale yu mate epo yimkadulo putlomale yu mate atlamha:ha:miya. <sup>9-10</sup> Epame wua: yimkadulo dla mala-atlamha:ha:miya. Adipalati, wua:ye takala koko hapulomaye tluka some uptipo mo-pololepame ma amko kokoye tluka some didiyewapo. Epedeme wua:ye alila hapuloma dulu dla Godta ya:ta gadle tle wua:ta ha:ha:leye ma amko demha:ha:po, wua:tapo ya: some ha:ha:lepo depame. Epame wua:tapo God sikemte malastame ha:ha:lepo depame. <sup>11</sup> Epedeme amko koko dulu hema opa duka hukulliye hawa. Epapedeme Yu so mate epo po-Yu so mateye ma ma-hatlopepo. Epame kapala kotimale so mate epo kapala pokotimalalo wekele so mateye ma-hatlopepo. Epame yu meyelo meyelope dle so mate epo mo pateka:mu dla ha:ha:lalo so mate ma ma-hatlopepo. Epame asiyama pa:le dla oko halomalalo so mate epo yia: dokopala so mate ma ma-hatlopepo. Adipalati, hatlo Kelisota koko pato halapo. Epame ya:tapo mikadepe dle so hapuloma dulu dla halapo.

<sup>12</sup> Epedeme wua:ye God ya: opapo. Ya:tapo wua:ye bokotiyapo malapame ma-sesalemuwapo. Epedeme wua: sadle mate ha:ha:mama yimkadulo polowamale mate ha:ha:iya. Epame wua: amkadulo dla namkale dle mate ha:ha:mama yimkadulo yu

dla heodemha:ha:iya. <sup>13</sup> Epame wua: amkadulo mate woloma ha:ha:mama hapele siyalade demha:ha:miya. Amasiyama wua: amkadulo bobtalimale kokoye wowelimha:ha:iya. Adipalati, Lodta wua: bobtalimale hapuloma woweluwaye, epammama wua: ma wua: amkadulo bobtalimaleye wowelimha:ha:iya. <sup>14</sup> Epedeme koko patoye ipo elema. Ya:mkale bokotiyapo malamale mate ha:ha:iya. Adipalati, bokotiyapo malamale kokotapo yimkadulo mate woloma sadepo halemama hatlope depo hallowe kokoye hampuapo.

<sup>15</sup> Epapedeme wua:ye Keliso ya: moto ipipo. Epame ya:tapo wua:ye ya:ta sadle dulu dla ha:ha:lepo depame ma sisilamuwapo. Epedeme Kelisota sadletapo wua: dupa dulu dla dokopala depo hallepe. Epame sisiyele mate ha:ha:iya. <sup>16</sup> Epame Kelisota imaletapo wua: dupa dulu dla pasatepo hallepe. Epedeme wua: malamale ka:dle mate epo siyele sala mate ya:mkale asiyama gade asiyama gade demha:ha:iya. Epame wua: dupa dulu tle God dla inoma sumale sala mate sisiyele sala mate dodolalimha:ha:iya. <sup>17</sup> Epedeme wua:ta atlamha:ha:mde koko hapuloma mate epo moto mate koko halomha:ha:mde hapuloma mateye Lod Yesu hi tle halomha:ha:iya. Epame Yesu hi tle siyele yu God dla atlamha:ha:iya.

*Pasakalo amko dulu dla yimkadulo mate ha:ha:lowe koko*

<sup>18</sup> Wola:, wua:wolalidulo yu dla salladepo siyamaiya. Adipalati, Lod dulu dla koko iye ka:pipo.

<sup>19</sup> Epame opa wua: mape, wua: wola:ye sikemte momalamha:ha:mama yia: mate woloma ka:pi sadepo ha:ha:iya.

<sup>20</sup> Epame yimlala wua: mape, wua: adulo yu mate epo wua: waidulo yu mate dla woloma salladepo siyamaiya. Adipalati, koko iye Lodta solotamapo.

<sup>21</sup> Epame adulo, wua: yimlalata koko halomalati natipame yia:ye ase sikemte batalipo atlamiya. Adipalati, wua:ta epapelepiye, wua: yimlalata ma miyelo koko halomolowe ye wowota:lepe.

<sup>22</sup> Epame asiyama pa:le dla oko halalo so, wua: ta:lamo hema wua: dokopala so yu dla woloma salladepo siyamama yia: okoye woloma halomha:ha:iya. Epammama hatlo yia:ta wua: omha:ha:lali oko ka:pi hali demiya. Adipalati, oko halowe dla sasalalimale soye isikimi yia: dokopala sota yia: omha:ha:lali natipame oko ka:pi halomdepo. Epedeme wua: woloma wua: dupa dulu tle solotamale mate wua: dokopala so okoye ka:pi halomha:ha:iya. Adipalati, ipapele kokotapo wua:ta wua: Lod wowota:le kokoye botomastamdepo. <sup>23</sup> Epapedeme wua:ta oko halë dulu dla woloma ka:pi halowe tlo malapame oko haiya. Epame wua:ta opa opi oko hamama isikimi Lod yilo oko hama depo malamaiya. <sup>24</sup> Adipalati, wua:ye ikadepe Keliso ya: oko sopo. Epedeme wua:tapo Pepele dimo dla ya: tle asiyama halomelepe. <sup>25</sup> Amasiyama batalimale koko halomalalo so dla yia: batalimale asiyama hapilipe. Adipalati, Godta koko gladle alila dla ya:tapo isikimi seme tiyape tlo pogadlowa. Amasiyama ya:tapo koko hapulomaye woloma ka:pi gladlepe.

## 4

<sup>1</sup> Epame dokopala so, wua: oko so iwoloye woloma ka:pi omha:ha:iya. Adipalati, wua: mape wua: dokopala oplamiye Pepele dimo dla me-halapo.

*Koko hapuloma dulu dla inoma sumale mate ha:ha:iya*

<sup>2</sup> Epedeme wua: alila hapuloma dulu dla dinapopo ha:ha:mama inoma sumha:ha:iya. Epame God dla namkale dle yu atlamha:ha:iya. <sup>3</sup> Wua:ta epamha:ha:mama dia: yilo inoma sumha:ha:loweye welimiya. Adipalati, di solotama, Godtapo dita ka:dle yu hamsiyamolowe kokolomaye gowaladlepo depame. Epame ditapo Keliso koko hemele elaye ma opa dla atlamelepo depame. Epedeme na:tapo Keliso yilo amtuwale aya dulu

hema halapo. <sup>4</sup> Epapedeme wua: na: yilo inoma sumha:ha:iya, na:tapo ka:dle yu atlale dla woloma ka:pi hatostepo atlepo depame.

<sup>5</sup> Epedeme wua: alila hapuloma dulu dla alikili so mate ha:ha:mama ka:ka:dle koko siyapo tlo woloma ka:pi halomha:ha:iya, yia:tapo koko e natimama Keliso koko tlo pta ka:pi dlepo depame. <sup>6</sup> Epame wua:tapo yia: dla yu atlale oloma edla woloma ka:pi sadle mate atlamha:ha:iya. Epame yia:tapo asiyama wua: watle atlanatili yu atlati asiyama atlowe yu mape ma-dinapopo ha:ha:iya.

*Mosukulu namkale dle yu atlale*

<sup>7-8</sup> Epedeme na:tapo na: ei, Lod dulu dla oko halalo oplami Tikikusye wua: hala dla tane dema, ya:tapo di koko hapulomaye wua: dla atlepo depame. Epame gadle yu mate wua:ye itiyamale hamilipo depame. <sup>9</sup> Epapele dulu dla na: ma wua: abo oplami Onisimasye wua: dla tane dema. Ya: mape mikadepe dle dulu dla diamkale ikadepepo. Epapedeme Tikikus mate epo Onisimas matetapo di kokoye wua: dla tame atellepe.

<sup>10</sup> Epame na: mate amtuwale aya dulu dla hallalo oplami Alistakusta ya:ta namkale dle yuye wua: dla atlema. Epalati Banabas ya: ei Maka mape ya:ta namkale dle yuye wua: dla atlema. Wua: oplami Maka kokoye mo-wua:malamana. Epedeme ya:ta wua: dla pulupiye, wua:tapo ya:ye woloma sadle mate selepe. <sup>11</sup> Epame oplami hale Yesu depame ma ya: hi hale Yustus demde mape, ya:ta namkale dle yuye wua: dla hamima. Epedeme Yu so opa hapuloma dulu dla opa dapahatlope iwolo tlo na: mate God ya: mo koko yilo oko hamha:ha:po. Epame yia:tapo na:ye ka:pi gadle koko tle na: dla siyele elemde.

<sup>12</sup> Epalati wua: abo oplami Epaplas mape ya:ta namkale dle yuye wua: dla hamima. Oplami i mape Keliso ya: oko oplamipo. Epedeme ya:tapo wua: yilo inoma sumale pato himhalemde, wua:tapo Keliso dulu dla kokalepo ha:ha:mama ikadepe opa depo ha:ha:lepo depame. Epame wua:tapo Godta solotamale koko hapulomaye malastlepo depame. <sup>13</sup> Epame na:malamana, ya:ye wua: yilo oko pato hamhalapo. Epame ya: mape mikadepe dle so Laodikeya dla ha:ha: so mate epo Hiyelapolis dla ha:ha: so mate yilo ma oko pato hamhalapo. <sup>14</sup> Epame diamkale dokota Luk mate epo Dimas mate yia: mape yia:ta namkale dle yuye wua: dla hamima. <sup>15</sup> Epame na:ta namkale dle yuye diamkadulo mikadepe dle so Laodikeya dla ha:ha: so dla atlaiya. Epame na:ta namkale dle yuye a:ya Nimpa dla epame ya: aya dulu dla inoma sumha:ha:lalo so dla ma atlaiya.

<sup>16</sup> Epedeme wua: yu ilimale iye sesa:pame ma Laodikeya sos dla hamimama ma asiyama na:ta yia: watle yu ilimale hale hamiliye e hapo sesa:iya.

<sup>17</sup> Epame Alkipus watle atlemama Lodta ya: watle oko hamiliye woloma ka:pi ham-tame mosukulu dla gudene diya.

<sup>18</sup> Epedeme na:ye Polopo. Na:tapo mosukulu yu ilimale iye monolo na: do mate ilipo wua: dla hamima. Epedeme na:tapo amtuwale aya dulu hema hala koko dla na:ye malaha:ha:iya.

Eso, Godta bokotiyapo malamaleta wua: mate hallepe.



## Polota Tesalonika sos dla yu ilimale hamili

### 1 Tesalonika

### 1 Tesalonika buka ya: dulu koko

Poloye Kolin mo dla halemama Tesalonika so watle yu i ilimaiyo. Polo ka:yapa Tesalonika dla tale oloma edla opatapo ya: yu dla dalepame mikadepe diyo. Amasiyama Yu sota koko i natipame Poloye dodolomaiyo (Taiya dle so 17:1-10). Epeleye Polotapo mikadepe dle so iwoloye sikemte malahalemama yia: watle molo atlale yu i ilipo hamiyo, yia:tapo wotiyalle dulu dla ha:ha:mama God mila:pi tle woloma ka:depo ha:ha:lepo depame. Epame yia:tapo Yesuta puluwe dla mikadepe dle so hapulomata ya: hala dla hetlowe koko ma malastlepo depame ilimaiyo.

<sup>1</sup> Di Polo mate Saeles mate epo Timoti mate yu ilimale iye Tesalonika sos dulu dla mikadepe dle so wua: watle hamima. Adipalati, wua:ye A God mate Lod Yesu Keliso mate dulu dla ha:ha:po. Epedeme Lodta bokotiyapo malamale mate sadle mateta wua: dulu dla ellepe.

#### *Tesalonika sota mikadepe dle koko*

<sup>2</sup> Dita alila hapuloma wua: yilo inoma sumama wua: koko dla God dla siyele yu atlemde. <sup>3</sup> Epammama wua:ta mikadepe depame oko hauwa mate epo ya:mkale bokotiyapo malapame moto mate koko hauwa mate epo wua:ta Yesu Keliso dla dalemha:ha:mama omha:ha: koko mateye dita di A God dla inoma sumha:ha:mama powelisemde.

<sup>4</sup> Mikadepe dle so namkadulo, dimalamana, Godta wua:ye bokotiyapo malapame wua:ye mo-hohomuwapo. <sup>5</sup> Adipalati, dita yu ka:dle wua: dla hampuwaye isikimi yu siyapo pohampuana. Amasiyama itiyamale mate epo Hela:dle Soko mate wua: dla hampuwapo. Epo di mape ka:dle yu iye sikemte mikadepe depo malamama wua: dla impuwapo. Epapedeme dita wua: gadlowedeme wua: mate ha:ha:uwaye, wua:malamana. <sup>6</sup> Epame wua:ta di koko natipo di dolumama Lod dolumuwapo. Epame wua:ta ka:dle yu dalepo hapame wotiyalle dulu dla ha:ha:lali Hela:dle Sokota siyeleye wua: dla hamiwapo. Epalati wua:tapo siyele mate ka:dle yu eye hauwapo.

<sup>7</sup> Epedeme mikadepe dle so hapuloma Makedoniya dla ha:ha:lalo so mate epo Akaya dla ha:ha:lalo so mateta wua: koko natipo wua: dolumolowe ka:pi. <sup>8</sup> Epapedeme Godta wua: dulu dla oko halë kokoye wua: tle hatlo Makedoniya mate Akaya mate dla podlalemmtana. Hao, wua:ta mikadepe dle kokoye mo hapuloma dla mo-dlalemmtauwapo. Epapedeme wua: kokoye dita mo opi dla atlamtloweye poka:dena. <sup>9</sup> Ame adipalati, mo hapuloma dulu dla opata dita wua: aya dla pulati wua:ta yu ka:dleye hutulli mate hamuwaye e atlamyapo. Epammama yia:ta wua:ta biskapa god tle ma ikadepe pasakalo hallalo God dla mikadepe depo ya: yu dla salladepo siyama kokoye atlamyapo. <sup>10</sup> Epammama yia:ta ma wua:ta God Yami, Godta powale tle hamame ta:dleye Pepele di tle mallepe depo omha:ha:ye atlamyapo. Eye Yesupo. Ya:tapo Godta kasilamaleta pulati dia:ye eleme alikili dla woyamelepe.

## 2

#### *Polota Tesalonika mo dla oko halë koko*

<sup>1</sup> Mikadepe dle so namkadulo, dita wua: hala dla pumuluwaye ya: dulu koko popa:na. <sup>2</sup> Wua:malamana, dita ka:yapa wua: hala dla puluwedeme Pilipi mo dla ha:ha:lali opata dia: dla mala-atlamyemama wotiyalle hamiwaye. Amasiyama epapele dulu dla di Lodta di gadle tle opata di alli dulu medla ditapo wota:le pa:po wua: watle God tle puale ka:dle

yuye atlamuwapo. <sup>3</sup> Adipalati, dita imale kokoye mala-atlale tle popuasema, epame ullu walle koko tle popuasema. Epedeme dita wua:ye pomala-atlowa, hao. <sup>4</sup> Amasiyama di God yu ka:dle tlo atlamsiyamapo. Adipalati, Godtapo dia:ye ala:na depame hohopo ya: yu ka:dleye atlamtaiya duwapo. Epedeme dita oko hamsiyama iye opata sisiyelepo depo po-apsema. Hao. God, di dupa dulu tlamalalota siyelepo depo apopo.

<sup>5</sup> Epo wua: mape wua:malamana, wua:ta di hala dla matilipo depame isikimi mala-atlale yu mate po-opalina. Epammama di mani halowe yilo ka:dle yuye po-atlemdena. God ma koko iye ikadepe depo. <sup>6</sup> Epapele tle di wua: mate epo opa hapuloma mateta dia: dla sisiyelepo depame pa-amdena. <sup>7</sup> Amasiyama di Kelisota Taiya dle so dla itiyamale eluwapo, wua: dla alisisi otloweye. Epapele tlope di alisisi wua: dla po-otomdena. Adipalati, ditapo wua:ye owayemala ya:yatapo ya: yimlala woloma omhalemkiye, epapele some woloma omha:ha:uwapo. <sup>8</sup> Adipalati, dita wua:ye bokotiyapo malamale tle hatlo God tle puale ka:dle yuye wua: dla pohampuana, hao. Di pasakalo mape wua: dla hapilowedeme puwapo. Ame adipalati, wua:ye dita sikemte malaha:ha: sopo. <sup>9</sup> Epapele dulu dla ditapo wua: mate ha:ha:mama dita dlowe alisisi mate epo dita solotamale alisisi opi mate e ala:lowedeme ditapo utula:la hapuloma mate epo alila hapuloma mate di moto mate oko pato hamha:ha:uwaye, wua:malamana. Epapele koko tle dita God tle puale ka:dle yu atlamsiyamama wua: dla alisisi po-otomdena.

<sup>10</sup> Yao, dita mikadepe dle so wua: mate ha:ha:uwaye di api hale pohotana. Amasiyama dita yimkata wua: mate ha:ha:mama woloma ka:depo ha:ha:uwapo. Epedeme wua: koko i mo-wua:malamana, epo God mape koko hema mikadepe depo. <sup>11</sup> Ata ya: akimlala woloma omhalemkiye, epammama dita wua: hapulomaye woloma omha:ha:uwapo. <sup>12</sup> Ditapo wua:ta God mila:pi tle ka:ka:depo ha:ha:lepo depame api meyelo meyelope dle tle wua: watle gadle yu atlamha:ha:uwapo. Adipalati, Godtapo wua:ye sisilamhalapo, wua:tapo ya: mo koko dla tuwame ha:ha:mama ya:ta hela:dle dulu dla ha:ha:lepo depame.

<sup>13</sup> Di ma God dla siyele yu atlema. Adipalati, wua:ta dita God yu atla dalepo hamama yu iye oplami tle puma pe-epo atlana. Amasiyama wua:ta yu iye ikadepe God tle puma depame woloma hauwapo. Epedeme God yu etapo mikadepe dle so wua: dulu dla oko hamhalapo. <sup>14</sup> Epedeme mikadepe dle so namkadulo, mo-wua:malamana, Yu sota Yudiya mo dla Yesu Keliso dla mikadepe dle so watle wotiyalle hapimduwaye. Epammama epapele kokota wua: dla mo-woyamama mo-wua: abo sotapo wua: dla wotiyalle ma-hapimduwapo. <sup>15</sup> Yu sotapo amka:yapa God tle yu hapame molo atlamalalo soye potipame Yesu Kelisoye ma yumuwapo. Epame ma yia:tapo dia: watle wotiyalle hamiwapo. Epedeme Yu so ewolotapo God dla siyele pohapimhalasema epame yia:tapo opa hapuloma dla elle pato elapo. <sup>16</sup> Epammama yia:tapo dita po-Yu so watle ka:dle yu hamtame atlati po-Yu sota pasakalo hallowe halala depame yia:ta di api himomella yakomuwapo. Ipapele koko tle yia: bobtalimale hapulomatapo yiskamu yia: dla kokolumtlati Godta kasilamaletapo ikadepe yia: dla umula puapo.

### *Polota ma Tesalonika mo dla tlowe solotamale*

<sup>17</sup> Epapedeme mikadepe dle so namkadulo, opata dia:ye wua: mo tle posallati dita alila kiyele dla wua: saliyomtame ha:ha:uwa dla, wua: malamoloweye powelindena. Epedeme di sikemte solotamduwa, wua: mila:pi mamisika: natilowedeme. <sup>18</sup> Epammama na: monolo puame wua: natilowe sikemte solotamduwa. Amasiyama Saitenta di api himomelemduwa.

<sup>19</sup> Epapedeme di Lod Yesuta ma ilampuale dla apa kokota di watle siyele hamipa? Epame apa kokota dita ya: mila:pi tle wota:le pa:po kokalepo ha:ha:pa? Wua:po. Wua:ta mikadepe dletapo dita ka:depo oko halë kokoye haliyamale dla botomastlepe.

<sup>20</sup> Ikadepe, Godtapo wua: koko tle di watle siyele hamilipe.

### 3

1-2 Di wua: natila puluwe alilaye ma-tla:mtlati ma a:ma gilidlowe allimama isikimi Timoti tlo wua: dla tane demama dia: tlo Atene mo medla ha:ha:lowa duwa. Timoti iye dia: mate oko hamsela:mama God yu ka:dle Keliso kokoye atlamsela:mdepo. Epapeleye dita ya:ye wua: watle tane duwapo, ya:tapo wua:ta mikadepe dle dulu dla kokalepo ha:ha:lepo depame molo atlowedeme. <sup>3</sup> Adipalati, wotiyalle dulu hema oplami haleta mikadepe dle tle teyulala depame. Epame wua: ma mo-wua:malamana, mikadepe dlowe kokoye wotiyalle koko mate elapo. <sup>4</sup> Epapedeme dita wua: mate ha:ha:mama wotiyalle kokota puluweye wua: watle ma-atlamduwapo. Epapeleye wotiyalle koko etapo wata dia: dla mo-woyamuwapo. <sup>5</sup> Epapele koko tle na: posolotamana, na:ta wua:ta mikadepe dle kokoye podallalo halloweye. Epammama na:ta Timotiye wua: hala dla tane duwa. Adipalati, na: wua: yilo sikemte dupa kiyetamhaluwa, wua:tapo Saitenta elemala natili dla tullati dita wua: yilo oko hauwata koko pa:le ellala depame.

<sup>6</sup> Amasiyama Timotita ala wua: mate halepo ma ilampuame di watle wua: koko atlamala daluwaye pta ka:pi. Adipalati, ya:tapo wua:ta mikadepe dle koko mate ya:mkale bokotiyapo malamolowe koko mate halomha:ha:ye puame di watle atlamuwa. Epo ya:ta di watle wua:ta di malaha:ha:mama di natilowe sikemte solotamale elema duwa. Epele dulu dla di ma asiyama wua: natilowe sikemte solotama. <sup>7</sup> Epedeme mikadepe dle so namkadulo, dita wotiyalle koko mate upiyele koko mate dulu dla ha:ha:mama wua:ta mikadepe dle kokoye puame atlati daluwata di gaduwa. <sup>8</sup> Adipalati, dita wua:ta Lod dulu dla kokalepo ha:ha:le koko dalepame sikemte sisiyemama woloma hedle hama. <sup>9</sup> Epapele koko tle dita wua: yilo siyele yu God dla atloweye sukulu pa:le elema. Adipalati, di God mila:pi tle ha:ha:mama wua: kokota dia: dla siyele pato hamima. <sup>10</sup> Epo utula:la mate alila mate wua: matle natilowe yilo God dla inoma sumale yu pato himme ha:ha:ma. Epapele dulu dla wua:ta mikadepe dle koko dulu dla koko haleta ala po-ala:lalo hallepiye, dita puame eye ala:lowepo.

<sup>11</sup> Epedeme di inoma sumale yu himima, di A God mate epo di Lod Yesu mate dita wua: hala dla tlowe apiye ka:depo dinapelepo depame. <sup>12</sup> Epame di ma inoma sumale yu hale himima, Godtapo wua: dulu dla bokotiyapo malamale elaye ta:lepo depame. Epalati dita wua:ye sikemte bokotiyapo malaha:ha:ye epammama ma wua:tapo wua: dulu dla epo opa hapuloma dulu dla ya:mkale bokotiyapo malamale mate ha:ha:lepo depame. <sup>13</sup> Epame di ma inoma sumale yu hale himima, di Lod Yesuta ya:ta sesa:le opa mate puale oloma edla wua:tapo mikadepe dle dulu dla kokalepo ha:ha:mama di A God mila:pi tle ullu pa:po ka:ka:dle so depo ha:ha:lepo depame.

### 4

#### *God mila:pi tle ka:ka:depo ha:ha:lowe koko*

<sup>1</sup> Mikadepe dle so namkadulo, ka:depo ha:ha:le koko tle God dla siyele hamilowe kokoye dita wua: watle me-imuwapo. Epedeme na:malamana, wua: epapele koko dulu dla ma-ha:ha:po. Amasiyama ka:ka:dle kokota wua: dulu dla hutiyetapo ta:lepo depame watapo na:ta Lod Yesu hi tle wua:ye sikemte atlema.

<sup>2</sup> Wua: mo-wua:malamana, dita Lod Yesuta itiyamale tle wua: watle imuwa kokoye. <sup>3</sup> Adipalati, Godta solotamapo, wua:tapo ya: mila:pi tle aiyalma depo ha:ha:lepo depame. Epedeme wua:ye opa mate wola: mate uhalomolowe koko tle aiyalma depo ha:ha:iya. <sup>4</sup> Epo wua: mape mo-wua:malamana, oplamita ya: moto woloma hampame aiyalma depo hallowe ka:pi. <sup>5</sup> Epedeme batalimale malamale wua: dulu dla elatapo wua:ye semsela: demiya. Adipalati, God yeitalimale sota epapele koko halomdepo. <sup>6</sup> Epapele koko tle wa: amkale mikadepe dle oplami ya: a:ya uhamama ya: dla wotiyalle hamimiya. Adipalati, Lodtapo batalimale koko ipapele halomalalo soye batalimale asiyama hamilipe. Eye dita ka:yapa wua: watle atlemama epapele koko halomiyo, duwapo. <sup>7</sup> Ame

adipalati, Godtapo di sisilamuwaye, ditapo batalimale dulu dla ha:ha:lepo depo po-apena. Amasiyama ditapo God mila:pi tle woloma ka:ka:depo ha:ha:lepo depame ya:ta di sisilamuwapo. <sup>8</sup> Epapedeme oplami antapo yu iye dolumolowe allipiye, ya: oplami yu dla alimama po-aposema. Amasiyama ya: God, wua: dla Hela:dle Soko hapimhala yu dla alimama apopo.

<sup>9</sup> Epedeme wua: bokotiyapo malamale dulu dla ha:ha:mama mikadepe dle sota ya:mkale asiyama gade ya:mkale asiyama gade dlowe kokoye mo-wua:malamana. Adipalati, Godtapo bokotiyapo malamale koko eye wua: watle me-imuwapo. Epedeme ma dita koko hema wua: dla yu ilipo hamilowe poka:dena. <sup>10</sup> Namkadulo, wua:ta Makedoniya mo dla ha:ha:lalo mikadepe dle soye bokotiyapo malamha:ha:mama gagademha:ha:ye dimalamana. Epedeme dita wua:ye epapele koko dulu medla mepo ha:ha:lepo depame sikemte atlema.

<sup>11</sup> Epedeme wua: wua: amkadulo mate woloma ka:depo sadle mate ha:ha:mama homta ha:ha:iya. Epame wua: oko halomha:ha:mama yimkadulo oko dla yu balemha:ha:miya. Epammama muwolo wuskamu wua: gadlowe yilo wua: moto mate oko halomha:ha:iya. Adipalati, dita koko iye wua: watle me-imuwapo. <sup>12</sup> Wua:ta ipapele koko halomha:ha:lepiye, alikili sota wua: koko natipame ka:pi dlepe. Epame wua:tapo wuskamu gadlowedeme wua: amkadulo dla pohitaha:ha:lowa.

### *Yesuta puluwe koko*

<sup>13</sup> Namkadulo mikadepe dle so, di posolotamasema, wua:tapo palli so kokoye yeitapo ha:ha:loweye. Alikili sotapo palli so yilo dupa kolomama sikemte a:lemdepo. Adipalati, yia: palli sota ma-silliwe kokoye yeitamana. Amasiyama wua:tapo alikili so some palli so yilo sikemte dupa kolle mate ha:ha:miya. <sup>14</sup> Adipalati, di Yesuta powale tle ma pasakalo dle koko dla mikadepe demdepo. Epedeme di ma mikadepe dema, Yesuta ma ilampuluwe oloma edla Godta mikadepe dle so opa palliye Yesu mate elempulupe.

<sup>15</sup> Epedeme Lodta meyelo atlale yuye dita wua: watle atlema, eye Lodta puale oloma edla, palli so ala me-hutiyelati di popalilalo pasakalo ha:ha: sota yipta Yesu hala dla pehetlowa. <sup>16</sup> Amasiyama Lod meyelo Pepele di tle malemama itiyamale yu mate epo banakaka so yia: dokopala oplami yu mate epo God ya: hulu yu mate mallepe. Epalati Keliso dla mikadepe depo ha:ha:mama palli so tatile sillipe. <sup>17</sup> Yia:ta me-hetlati di ala popalilalo ha:ha: so mape palli so mate yimkata wuala di dla Lod umula hetlepe. Epame ditapo Lod mate kokó ha:ha:po ha:ha:lepe. <sup>18</sup> Epapedeme wua: amkadulo wua: dulu dla ha:ha: sota palli so yilo sikemte malaha:ha:lala depame yu i mate yia:ye woloma gagademha:ha:iya.

## 5

### *Lodta puluwe koko dla dinapiya*

<sup>1</sup> Mikadepe dle so namkadulo, dita ipapele kokota wowoyamolowe alila wua: watle imoloweye poka:dena. <sup>2</sup> Adipalati, wua: mo-wua:malamana, Lodta ma ilame pumama uhalalo oplamita utula:la pumdiye epapele some pulupe. <sup>3</sup> Alila oloma edla opata epo atlamyelepe, “Haiya! Alila pta ka:pi. Dia: dla koko hale hawa, siyele siyapota elapo,” demyelepe. Epamyelati pakasiyamalalo wotiyalle kokota yia: dla pumama pallipe. Epedeme wua: malamaiya, mopapo pollalo a:yata ya:ta owayemala hamolowe wotiyalleta ya: dla pumdiye ya: malapollati po-apesemde. Epapedeme e ma epapena. Opata alila e malaha:ha:lali populuwa. Epedeme alila hema oplami haleta poteletlowa.

<sup>4</sup> Amasiyama mikadepe dle so namkadulo, alila eta pulupiye, uhalalo oplamita puale some wua: dla yiyelle pohamilowa. Adipalati, wua:ye amtuwale dulu dla poha:ha:sema. <sup>5</sup> Amasiyama wua:ye alila hela:dle dulu dla ha:ha:lalo sopo. Epapedeme di utula:la amtuwale dulu dla poha:ha:lalo so. <sup>6</sup> Epapedeme di hutiyelalo opa some poha:ha:lowa.

Amasiyama di dinapopame omha:ha:mama di moto hohomalalo so depo ha:ha:lowepo. <sup>7</sup> Adipalati, hutiyelalo soye utula:la hutiyemdepo, epo kawata yú dlopo yiyilamalalo soye utula:la kawata yú dlompo.

<sup>8</sup> Amasiyama di alila hela:dle dulu dla ha:ha:lalo sopo. Epedeme di ka:dena, dinapopo omha:ha:mama di moto hohomalalo so depo ha:ha:loweye. Epo ha:ha:mama mikadepe dle koko mate bokotiyapo malamale koko mate kapulu some didiyepo ha:ha:lowepo. Epo Godta pasakalo hallowe koko di watle hamilowe dla omha:ha: kokoye di dokopala dla dokopala alisisi some didiyelowepo. <sup>9</sup> Adipalati, Godtapo di sisilamuwaye, ya:ta kasilamale dulu dla tumullupo depo po-apena. Amasiyama di Lod Yesu Keliso tle pasakalo hallowe halepo depame apuwapo. <sup>10</sup> Epapedeme Kelisota dia: yilo mopouwapo, ditapo ya: mate yimkata ha:ha:lepo depame. Epedeme dita ha:ha:po pallipiye, eta dita Keliso mate ha:ha:lowe kokoye pomeyelo dlopa. <sup>11</sup> Epedeme wua: wua: amkaduloye mikadepe dle dulu dla kokalepo ha:ha:lepo depame asiyama gade asiyama gade demha:ha:mama itiyamale hapimha:ha:iya. Amasiyama na:malamana, wua:ye mepamha:ha:po.

### *Gadle yu mosukulu*

<sup>12</sup> Mikadepe dle so namkadulo, di wua: dla atlema, wua: sos dokopala so mate epo God yu imalalo so mate dla heodepame yia: watle siyele hamiya. Adipalati, yia:tapo wua: dulu dla oko pato sikemte hamha:ha:po. <sup>13</sup> Epapedeme yia:ta oko ha koko dla wua:ta yia:ye bokotiyapo malamama yia:ye di dla ipila:iya. Epammama wua: amkadulo mate woloma sadepo ha:ha:iya.

<sup>14</sup> Epame wua: dulu dla oko halomolowe dla hopeyalimale soye oko halomelepo depame sikemte atlamaiya. Epo haliyamale dla koko halomolowe dla wowota:lalo soye gadle yu mate gagademha:ha:iya. Epo atali so hapuloma mape gagademha:ha:iya. Epame wua: amkadulo mate sadepo ha:ha:mama pakasiyamalalo kakasilamha:ha:miya. <sup>15</sup> Epamha:ha:le dulu dla oplami haleta wua: watle batalimale koko hale halepiye, wua: asiyama ya: watle wotiyalle pohamilowa. Amasiyama sadle mate ka:ka:dle koko tlo wua: dulu dla epo opa hapuloma dulu dla halomha:ha:iya.

<sup>16</sup> Alila hapuloma dulu dla sisiyele mate ha:ha:iya. <sup>17</sup> Epammama alila hapuloma dulu dla inoma sumale mate ha:ha:iya. <sup>18</sup> Epame koko hapuloma dulu dla God dla siyele yu atlemha:ha:iya. Adipalati, Godtapo Keliso ya: opata ipapele koko halomha:ha:lepo depame solotamhalapo. <sup>19</sup> Epapedeme wua: Hela:dle Soko okoye humatlemiya. <sup>20</sup> Epammama God yu molo atlamalalo sota God tle yu hapame atlamale yuye isikimi koko demiyo. <sup>21</sup> Amasiyama koko hapuloma dulu dla ikadepe God tle puma:e depame woloma heheletimala natiya. Epame koko ka:ka:dle tlo halopame e dolumha:ha:iya. <sup>22</sup> Epame batalimale koko hapuloma halomolowe dla aiyalma depo ha:ha:iya.

<sup>23</sup> Epedeme di inoma sumale yu himima, sadle hapilalo Godta meyelo wua:ye woloma aiyalma depo hallowe kokoye hamilipo depame. Epame di ma inoma sumale yu himima, di Lod Yesu Kelisota puale dla omtamama wua:tapo wua: soko tle epo wua: moto tle epo wua:ta malamale tle ullu pa:po ha:ha:lepo depame. <sup>24</sup> Epedeme Godta wua: dla koko i halomelepe. Adipalati, wua: sisilamuwa Godye ya:ta yu atlale dolumolowe pomelesemde.

<sup>25</sup> Mikadepe dle so namkadulo, wua: dia: yilo inoma sumale yu himha:ha:iya. <sup>26</sup> Epame wua: amkadulo mikadepe dle so dla namkale dle yu atlamha:ha:iya. <sup>27</sup> Na: Lod hi tle wua:ye atlema, wua:tapo yu ilimale iye mikadepe dle so hapuloma watle sesa:po ilipo depame. <sup>28</sup> Epedeme di Lod Yesu Kelisota bokotiyapo malamaleta wua: mate hallepe.



## Polota Tesalonika sos dla matle yu ilimale hamili

### 2 Tesalonika

### 2 Tesalonika buka ya: dulu koko

Tesalonika sos dulu dla mikadepe dle so opitapo yia: oko hapulomaye memelepame ma hatlo popa:mama Yesuta puluwe koko dla omha:ha:iyo. Epalati Polotapo koko e natipame matle yia: watle gadle yu i ilipo hamiyo. Epame opatapo Yesuta puluwe koko dla batalipo malapame omha:ha:lali Polota Yesuta puluwe kokoye ma woloma yia: watle imaiyo.

<sup>1</sup> Di Polo mate Saeles mate epo Timoti mate yu ilimale iye Tesalonika sos dulu dla ha:ha:lalo mikadepe dle so wua: watle hamima. Adipalati, wua:ye di A God mate Yesu Keliso mate dulu dla ha:ha:po. <sup>2</sup> Epedeme di A God mate Lod Yesu Keliso mate yia:ta bokotiyapo malamale mate sadle mateta wua: dulu dla ellepe.

#### *Godta koko gladloweye Polota atlale*

<sup>3</sup> Mikadepe dle so namkadulo, di ka:dena, wua:ta mikadepe dle koko mate ya:mkale bokotiyapo malamale koko mateta wua: dulu dla ta:mtaye dita God dla siyele yu atlowe ka:pi. <sup>4</sup> Wua:ta wotiyalle koko mate kokalle koko mate dulu dla kokalepo ha:ha:mama mikadepe dle dulu dla me-ha:ha: koko tle ditapo siyele mate God ya: sos opi dla wua: kokoye atlamsiyamde.

<sup>5</sup> Wua:tapo mikadepe dle tle wotiyalle ha kokotapo Godta opa kokoye woloma ka:pi gladlowe kokoye haliyamale dla imapo. Epapele koko tle Godtapo wua:ye ya: mo koko dla ulatuluweye ala:na dlepe. Epapele dulu dla God ya: mo koko yilo wua:tapo wotiyalle hapo. <sup>6-7</sup> Epedeme Godye woloma ikadepe koko tlo halalopo. Epapedeme Yesuta ilame pulati ya:tapo wua: watle wotiyalle hapimha:ha: so watle asiyama wotiyalle hamilipe. Epame wotiyalle dulu edla ha:ha: so wua: watle hedle ka:dle hamilipe. Epame di watle mape hedle hamilipe. Koko iye Lod Yesuta ya: banakaka so itiyamale mate Pepele di tle dlapa tele aloweli mate malemama apelepe. <sup>8</sup> Lod Yesuta malame God koko posolotamalalo wekelalo so mate epo ka:dle yu Keliso koko dla posalladepo siyamalalo so mate dla asiyama wotiyalle halopilipe. <sup>9</sup> Oloma edla Lodta yia:ye batalipo hamastlepe epame ya: mila:pi tle epo ya:ta hela:dle itiyamale tle alikili dla hohopo polollati yia:ta edla ha:ha:mama sukulu pa:le ha:ha:lepe. <sup>10</sup> Epame alila oloma edla ya:ta pulati ya: opata ya: watle sisiyemama haiyalle yu mate sisiyele pato ta:dlepe. Epedeme dulu hema wua: ma me-ha:ha:lepe. Adipalati, wua:ta ka:dle yu dita wua: dla atlali wua:ta mikadepe duwa koko tle.

<sup>11</sup> Di koko hema wua: yilo God dla alila hapuloma inoma sumale yu himme ha:ha:ma, wua:tapo Godta wua: sisilamuwa pasakalo mate ala:po ha:ha:lepo depame. Epame di ma inoma sumale yu himima, wua:tapo wua: dla malamale ka:ka:dle hutiyeye Godta itiyamale tle eye moto mate koko halomha:ha:lepo depame. Epame di ma inoma sumale yu himima, wua:tapo Godta itiyamale tle wua:ta mikadepe dle dulu tle peyama okoye woloma halomha:ha:lepo depame. <sup>12</sup> Epedeme dita inoma sumale yu himi iye opatapo wua: koko ka:pi natipo di Lod Yesu hiye di dla ta:dlepo depo amma. Epame Lod Yesuta asiyama wua: hi di dla ta:demama siyele hamilipo depo amma. Epedeme di God epo Lod Yesu Kelisota bokotiyapo malamale tle koko iye puapo.

## 2

*Humatla podallalo wekelalo oplami koko*

<sup>1</sup> Mikadepe dle so namkadulo, na: di Lod Yesu Kelisota puluwe koko mate epo ya:ta dia:ye elemolowe koko mate wua: dla atlowe solotama. <sup>2</sup> Epedeme wua: opa opita puame atlemama, “Lod ya: alilaye mo-puwa,” dlati dalepame hapele yiyelepame dupa yulumama yia: yu dla tulumiya. Epame yia:ta atlemama, “Sokota di watle koko iye momolo imuwa,” dlati yia: yu dla mikadepe dlalimiyo. Epo ma yia:ta atlemama, “Polo wolota di watle yu ilimale hamimama ipo atluwa,” dlati e mape yia: yu dla mikadepe dlalimiyo. <sup>3</sup> Epapedeme ipapele koko hapuloma dulu dla oplami haleta wua:ye elemala nati demiya. Adipalati, Lod ya: alilata puluwedeme hallati koko dapiyamte tate wowoyamelepe. Eye, opata Lod posolotamalalo alikili dla wowoyapo telepe. Epame humatlati podallalo wekelalo oplamita woyamelepe. Amasiyama alotle ya:ye Dlapa mo dla ka:stlepe. <sup>4</sup> Ya:tapo ya:skamu hamhetamama opata sisiyelalo god hapulomaye batalimana depame hatlo ya: tlo ka:dena depo di dla hamhetlepe. Epammama ya:tapo tame God ya: aiyalma aya dla polomama ya:skamu ya:ye ikadepe Godpo dlepe.

<sup>5</sup> Amasiyama na:ta wua: mate sela:mama koko hapuloma i ma-atlamsela:uwaye, wua: mo-woweluwa? <sup>6</sup> Amasiyama wata oloma hema humatla podallalo wekelalo oplamita puluwe api himomeleme hala kokoye mo-wua:malamana. Adipalati, ya:ta woloma ya: alila ikadepe dla pulupo depame ya: apiye ala himomeleme halapo. <sup>7-8</sup> Epapele tlope humatla podallalo wekelalo kokotapo hemele opa dulu dla oko ma-hamhalapo. Amasiyama ipapele kokota ta:lala depame ya: api himomeleme hallalotapo ya: apiye ala me-himomelemhalapo. Epame alotle ya: api himomeleme hallaloye alikili dla gilidlati ya:tapo edla woyamelepe. Amasiyama Lod Yesuta puame ya: mati tle hedle mate epo ya:ta hela:dle itiyamale mate humatla podallalo wekelalo oplamiye yumpo hamastlepe.

<sup>9</sup> Epedeme humatla podallalo wekelalo oplamita pulupiye, ya: Saitenta itiyamale mate pulupe. Ya: puame elemale mate ulugiyemale koko patoto halomsela:lepe. <sup>10</sup> Ya:tapo epamsela:mama batalimale api tle alikili soye elemale mate hohomelepe. Epalati yia:tapo dulu edla mosukulu pallipe. Adipalati, yia:tapo yia: watle pasakalo hamilowe yu dla allimama pohana. <sup>11</sup> Ipapele koko tle Godtapo elemala natili koko patoye yia: watle hamilipe, yia:tapo elemala natili dulu edla tutula:lepo depame. <sup>12</sup> Epedeme anawolotapo ikadepe koko dla pomikadepe dlalo wekepame batalimale koko tlo solotamha:ha:ma:, ewoloye Godta yia: koko gladepame yia: watle batalimale asiyama hamilipe.

### *Kokalepo ha:ha:iya*

<sup>13</sup> Mikadepe dle so namkadulo, Lodta bokotiyapo malamaleta wua: mate halapo. Epame dita wua: yilo God dla siyele yu atlowe ka:pi. Adipalati, Godta wua:ye mopowataliya pasakalo hallowe dla ma-sesalemuwapo. Epedeme wua:tapo Hela:dle Sokota itiyamale tle ullu pa:talo so dle koko tle epo wua:ta ikadepe koko dla mikadepe dle koko tle Godta wua:ye pasakalo halloweye ma-hapiwapo. <sup>14</sup> Godtapo dita ka:dle yu atlamsiyama itle wua:ta pasakalo hallowe halepo depame wua: sisilamuwapo, wua: ma Yesu Kelisota hela:dle dulu ha:ha:lepo depame. <sup>15</sup> Epedeme mikadepe dle so namkadulo, dita wua: dla imuwa koko mate epo yu ilalimale halopo puwa mate woloma kokata hohopame wua:ta mikadepe dle dulu dla sikemte kokalepo ha:ha:iya.

<sup>16-17</sup> Epedeme di inoma sumale yu himima, di Lod Yesu Keliso mate epo di A God mate wua: gadle tle wua:ye itiyamale hamilipe, wua:tapo ka:ka:dle koko halomsiyamama ka:ka:dle yu tlo yuhamsiyamelepo depame. Adipalati, di A Godtapo dia:ye bokotiyapo malapame dia: watle kokó elepo ellalo gadleye hamiwapo, ditapo siyele mate ya:ta hapilowe pasakalo dla dalemha:ha:mama omha:ha:lepo depame.

## 3

*Dia: yilo inoma sumale yu himha:ha:iya*

<sup>1</sup> Mikadepe dle so namkadulo, God yuta mo hapuloma dla ma-hapele dlalemtlepo depame wua:ta dia: yilo inoma sumale yu himme ha:ha:iya. Adipalati, di solotama, wua:tapo God yuye pato depame siyele mate hamuwaye, opa mo hapuloma dla ha:ha: so ma epapelepo depame. <sup>2</sup> Epapele dulu dla wua: Godta dia:ye batalimale so dulu dla woloma omhallepo depame inoma sumale yu himha:ha:iya. Adipalati, pase opa hapulomata God dla pomikadepe desema.

<sup>3</sup> Amasiyama Godye ya:ta yu itiyapo himili dolumolowe dla pomelesemde. Epedeme ya:tapo wua:ye itiyamale hamipame wua:ye woloma omhallepe, batalimale oplami Saitenta wua: dla wotiyalle hamilala depame. <sup>4</sup> Epapedeme di Lod dla mikadepe dema, wua:tapo dita atlamuwa kokoye ma-hamha:ha:yo depame. <sup>5</sup> Epedeme di wua: yilo inoma sumale yu himima, wua:tapo Lodta gadle tle Godta bokotiyapo malamale kokoye wua: dupa dulu dla ellepo depame. Epame Kelisota pua koko dla dalemha:ha:mama omha:ha:lepo depame.

### *Itiyamale mate oko haiya*

<sup>6</sup> Mikadepe dle so namkadulo, di Yesu Keliso hi tle wua:ye sikemte atlema. Mikadepe dle oplami antapo dita imale yuye podolumalalo hopeyamale mate hallepiye, wua: epapele so mate hatlope demiya. <sup>7</sup> Adipalati, wua: mo-wua:malamana, dita ha:ha:uwa kokoye. Epedeme wua: ma epo ha:ha:lowe ka:pi. Adipalati, dita wua: mate ha:ha:uwa dulu dla di hopeyamale mate poha:ha:na. <sup>8</sup> Epame di oplami hale daya dlowedeme asiyama dimi podemdena. Hao, di asiyama himpame daya demduwapo. Epame alila mate epo utula:la mate di motoye oko pato dla hatitimduwapo, dita daya dlowe asiyama himiloweye halowedeme. Epammama di oplami hale dla pohitaha:ha:na. <sup>9</sup> Di epamsiyamama wua: dla dita alisisi otlowe itiyamale eluwa kokoye haliyamale dla pobotomastemdena. Amasiyama dita wua: dla ka:dle koko imama diskamu dia:ye omha:ha:mduwapo. <sup>10</sup> Epame dita wua: mate siyamale oloma edla ditapo wua: wale imuwa kokoye ipo. Oplami antapo oko halowe sasalemama allipiye, ya: daya podlowa.

<sup>11</sup> Amasiyama di wua: dulu dla opa opita oko halowe alli kokoye atla me-daluwa. Epammama ya:tapo oko pahalomalalo isikimi duka dla siyamama yimkadulo yu balemsiyamapo. <sup>12</sup> Di opa epapele so dla Yesu Keliso hi tle atlema, ya:tapo epapele koko tle memelepame ma yiskamu ya: pasakalo gadlowe yilo ya: moto mate oko halomha:ha:lepo depame. <sup>13</sup> Amasiyama mikadepe dle so namkadulo, wua: ka:ka:dle koko halomolowe dla hopeyalimiya.

<sup>14</sup> Ipapele koko dulu dla oplami hale dita yu ilimale hami hema pomikadepe dlalo wekelepiye, wua:ta ya:ye woloma inoma dlolemha:ha:lepe. Epame ya: mate hatlope depo siyamiyo. Adipalati, ya:tapo koko i natipo ya:skamu wota:lepo depame. <sup>15</sup> Amasiyama epele dulu dla ya:ye alikili oplami demiyo. Isikimi ya:ye molo atlale yu mate atellepe. Adipalati, ya:ye wua: mate yimkata mikadepe dle dulu dla halapo.

### *Polota namkale dle yu mosukulu atlale*

<sup>16</sup> Epedeme na: inoma sumale yu himima, koko hapuloma dulu dla sadle hamilalo Lodtapo alila hapuloma dulu dla wua: dla sadle hapilalo hallepo depame. Lod etapo wua: mate hallepe.

<sup>17</sup> Na: Polo monolo hema na: do mate na:ta namkale dle yu i ilima. Iye na:ta yu ilimale koko ipo. Wua:tapo hema malanatipame yu ilimale hapulomaye na:ta ilalimana dlepo depame. Epedeme na: ipo ilimde.

<sup>18</sup> Di Lod Yesu Kelisota bokotiyapo malamaleta wua: mate hallepe.

## **Polota Timoti watle yu ilimale hamili**

### **1 Timoti**

### **1 Timoti buka ya: dulu koko**

Polotapo God yu hamsela:le oloma dla Timotitapo ya:ta imale dalepame mikadepe diyo. Epame ya:tapo Polota God yu hame mo hapuloma dla sela:lati ya: mate sela:iyo. Epapele alotle Timotitapo Epeses sos dokopala oplami hallati Polotapo ya: watle yu ilimale iye hamiyo. Yu ilimale dulu hema sos dokopala so dla gadle yuye ilimaiyo.

<sup>1</sup> Na:ye Polopo. God di pasakalo gadlalo mate Yesu Keliso mateta na:ye sepame Taiya dle okoye hamiwapo. Epedeme Yesu Kelisotapo dita dalemha:ha:mama omha:ha:halepo halepo pasakaloye di watle hamila pulupe.

<sup>2</sup> Na:tapo yu ilimale iye Timoti wa: watle hamima. Adipalati, mikadepe dle dulu dla Timoti wa:ye na: maseyemala ikadepe sepene.

A God mate epame Yesu Keliso di Lod mate yia:ta bokotiyapo malamale mate epame sadle mateta wa: mate hallepe.

#### *Biskapa imale koko dla atlale*

<sup>3</sup> Na:tapo Makedoniya mo dla tamhalemama wa:ye atluwapo, wa:tapo Epeses mo dla hallepo depame. Adipalati, wa:ta edla halemama opa opita God koko batalipo imsiyamaye humatlepo depame. <sup>4</sup> Opa iwolotapo Yu so yia: toto esemale koko tlo sikemte esemsiyamapo. Amasiyama esemale koko itapo isikimi opa dla yu dlomale koko hampuapo. Epapedeme yia:ta imale kokotapo oplamita God dla mikadepe dle dulu dla kokalepo hallowe kokoye pohamisema. <sup>5</sup> Amasiyama na:ta yu ilimale ya: dulu kokoye ipapena. Ka:dena, mikadepe dle sotapo yimkadulo sikemte bokotiyapo malam-oloweye. Adipalati, bokotiyapo malamale koko eye ullu pa:le dupa tle epame dupa malamale ka:dle tle epame Yesu Keliso dla mikadepe dle tle pumhalapo. <sup>6</sup> Amasiyama God koko batalipo imsiyamalalo opa iwolotapo isikimi biskapa koko imsiyamama ikadepe api tle ma alikili dla ma-tamalapo. <sup>7</sup> Epapedeme yia:ta malamaletapo yia:ta Mosesta aiyalma hatitimale imsiyamolowe tlo solotamdepo. Amasiyama yia: aiyalma kokoye poyia:malamana. Yia: isikimi yeitamale tle imama Mosesta hatitimale aiyalma kokoye ipapena demsiyamama batalipo imsiyamapo.

<sup>8</sup> Amasiyama dimalamana, dita aiyalma koko eye woloma ka:dle api tle imelepiye, eta aiyalma koko eye woloma ka:pi ellepe. <sup>9</sup> Adipalati, aiyalma koko iye ka:ka:dle so dla pohatitimana. Amasiyama batalimale opa ipapele so dla hatitimuwapo. Eye aiyalma hauwokokomalalo so dla, epo God yu dalla allimama ma miyelo solotamale dla siyamalalo so dla, epame God tle alikili dla potamalale so dla, epo batalimale koko halomalalo so dla, epame pomikadepe dlalo isikimi ta:lamo koko dolumsiyamalalo so dla, epame yia: adulo mate yia: waidulo mate potipame ma opa opi potimalalo so dla, <sup>10</sup> epame opa mate wola: mate uhalomalalo so dla, epame opa opita ma yimkadulo dla namile pasakalo ilalo so dla, epame asiyama pa:le oko halomalalo soye opa opi dla asiyama mate hapilalo so dla, epame isikimi mala-atlalo so dla, epame ikadepe God koko imale dla allilalo so dla. <sup>11</sup> Epedeme imale hapuloma eye ka:dle yu dulu dla hutiyepo. Ka:dle yu eye Godtapo na: watle ma-hamiwapo, na:tapo opa dla atlamsela:lepo depame.

#### *Godta polowamale koko dla Polota namkale dle yu atlale*

<sup>12</sup> Na:tapo na: dla itiyamale hamilalo di Lod Yesu Keliso dla siyele yu atlema. Adipalati, ya:tapo na:ye ka:dena depame ya: oko oplami duwapo. <sup>13</sup> Na: ka:yapa ala pomikadepe dlalo halemama na:tapo Keliso koko dla batalipo atlemduwapo. Epame na:tapo Yesu

Keliso dolumalalo so dla wotiyalle mate upiyele mate hapimduwapo. Epapele tlope Godtapo na: polowamama na:ye ya: hala dla sempuwapo. Adipalati, oloma edla na: pomikadepe dlalo halemama na:ta koko halomhaluwa hapulomaye woloma pomalamdena. <sup>14</sup> Epame di Lodta ya:ta polowamale kokoye na: dla sikemte pasatepo hamiwapo. Epapele koko tle na:tapo Yesu Keliso dulu dla halemama ya: dla mikadepe dlowe koko mate epame yimkadulo bokotiyapo malamolowe koko mate hauwapo.

<sup>15</sup> Yesu Kelisotapo ta:lamo hema puwapo, batalimale koko halomalalo so opa di pasakalo gadlowedeme. Epedeme yu iye ikadepepo, ditapo dalepo hamama dolumelepo depame. Amasiyama batalimale so opa hapuloma dulu dla na:tapo ikadepe sikemte batalimale oplami haluwapo. <sup>16</sup> Epapele tlope Yesu Kelisotapo na: polowamama na:ye ma ilame hamuwapo, opatapo koko e natimama Godta batalimale so sikemte malahala kokoye malamelepo depame. Epame ya: dla mikadepe depo halemama kokó halepo halepo pasakaloye halepo depame.

<sup>17</sup> Godtapo kokó halepo hallalo dokopala oplami halapo. Ya:ye popowasemde, epame opata ya:ye ponatisemde. Epedeme ya:tapo God hatlo halapo. Epapedeme ka:dena, hatlo ya: dla heodepo sisiyemha:ha:lowe kokota kokó elepo ellepe. Yu iye ikadepepo.

*Polotapo Timoti watle mikadepe dle dulu dla kokalepo hallowe koko atlale*

<sup>18</sup> Na: maseyemala Timoti, God tle yu hapame molo atlamalalo sotapo wa: watle yu hamiwaye malamane. Epedeme na: mape yia:ta yu hamili malamama na:ta yu ilimale iye wa: watle hamipo. Epedeme wa:tapo yu eye woloma kokata hamame halemama ka:dle yu yilo itiyamale mate opahale dene. <sup>19</sup> Epame wa:ta Yesu Keliso dla mikadepe dle kokoye kokalepo halemama wa: dupa dulu dla ka:dle malamale elaye mepo hala dene. Adipalati, opa opiye yia: dupa dulu dla ka:ka:dle momalamale hutiyee e mate ka:ka:dle kokoye pohalomha:ha:sema. Epame yia:tapo batalimale api dolumtamalemama yia:ta Keliso dla mikadepe dle kokota mo-haohaodepo. <sup>20</sup> Epedeme ipapele so opa opiye Humenayospo epame Alesendapo. Opa iwoloye na:tapo Saiten do tama dla homeluwa. Adipalati, miyelo edla yia:ta God koko batalipo imsiyamaye malanatipame medla gudlepo depame.

## 2

*Inoma sumolowe koko dla imale*

<sup>1</sup> Epedeme wa: na:ta atla yu iye woloma dalene. Ka:dena, mikadepe dle so ditapo God dla namkale dle yu mate otele yu mate inoma sumha:ha:mama opa hapuloma ta:ta:demha:ha:loweye. <sup>2</sup> Epame ka:dena, ditapo gamani dokopala so mate epame mo dulu dla itiyamale hohopo ha:ha:lalo so mateye God dla inoma sumale mate ta:ta:demha:ha:loweye. Adipalati, ditapo yimkata sadle dulu dla ha:ha:mama God mila:pi tle ka:depo ha:ha:lepo depame. <sup>3</sup> Adipalati, ditapo yimkaduloye inoma sumale mate ta:ta:demha:ha:lepiye, di pasakalo gadlalo Godye sikemte siyemhallepe. <sup>4</sup> Epapedeme God dla solotamale elapo, opa hapulomatapo pasakalo gadle hamama ikadepe koko ma malamelepo depame. <sup>5</sup> Adipalati, God hatlota halapo, epame God ka:epo opa ka: duka dla hallalo ma hatlo Yesu Kelisota halapo. <sup>6</sup> Adipalati, Godta himili alila dla Yesutapo ya:skamu ya: motoye hamiwapo, ta:la so batalimale hapuloma asiyama dla. <sup>7</sup> Epedeme Godtapo na:ye sisilapame tane dle oko hamiwapo, na:tapo po-Yu so dla ka:dle yu hamtelepo depame yia:tapo ka:dle yuye dalepame mikadepe dlepo depame. Epedeme na:ta atlama yu iye ikadepepo.

<sup>8</sup> Epedeme na: solotama, God sikemte malamalalo so opatapo inoma sumolowedeme tame alupo yia: do di dla ta:ta:depo inoma sumha:ha:mama yia: dulu dla yu topulolle mate siyaladle mate poha:ha:lowa.

<sup>9</sup> Epame na: posolotamasema, wola:tapo duka dla siyamalalo so wola: some tluka poka:ka:dleye didiyepo opa inoma dali dla siyamoloweye. Amasiyama wua: ka:dena,



wua:ta tluka didiyemha:ha:lowe alisisiye woloma natilipe. Adipalati, tluka sikemte ka:ka:dle didiyelowe mate epo kokosase popoliyetimolowe mate epo gold mate moli mate sokolomale alisisi didiyelowe mateta wua:ye God mila:pi tle poka:dena dlowa. <sup>10</sup> Amasiyama ka:ka:dle koko halomoloweta wua:ye ka:dena demdepo. Epedeme koko iye God wowota:le so wola: dla ka:dena.

<sup>11</sup> Epedeme wola:, wua: daliya. God yu atlalo oplamitapo God yu atlemhallati woloma dalempopa:mama malamale hapame yu edla salladepo siyamaiya. <sup>12</sup> Epele dulu dla poka:dena, wola:tapo opa dla dokopala depo ha:ha:mama yia: dla God yu atlamha:ha:loweye. Amasiyama ka:dena, wola:tapo woloma yu dimi God yu tlo dalloweye. <sup>13</sup> Adipalati, Godtapo A:dam tatile mita:pame ma alotle Ib mita:puwapo. <sup>14</sup> Epapele dulu dla Saitentapo A:dam tatile pe-elemanana. Amasiyama Ib tatile elemala natilati batalimale kokoye ma-hauwapo. <sup>15</sup> Epedeme wola:tapo mepo yimlala hohomha:ha:lepe. Epame yia:tapo yia:ta mikadepe dle dulu dla ullu pa:po kokalepo ha:ha:mama opa hapulomaye bokotiyapo malamale mate koko ka:ka:dle halomha:ha:lepiye, Godtapo yia: pasakaloye gadlepe.

### 3

#### *Sos dokopala so*

<sup>1</sup> Epedeme na:ta atla yu iye ikadepepo. Oplamitapo sos dokopala oplami halli dlepiye, ya: ka:dle oko halowedeme solotamapo. <sup>2</sup> Epapedeme ka:dena, sos dokopala oplamitapo ka:depo hallalo oplami halemama a:ya hatlope tlo hamhallepe. Epame ya:ye ya:skamu ya: moto hamalalo oplami hallepe. Epame ya:ye sadle oplami hallepe. Epame asepe so dla namkale dlalo oplami hallepe. Epame ka:dle yuye ka:pi imalalo oplami hallepe. <sup>3</sup> Epame ya: kawata yú depame poyiyilamhallowa. Epame pakasiyamalalo posiyalademhallowa. Epame ya:ye mani sikemte posolotamhallowa. <sup>4</sup> Epame ya:ye ya:llu mate epo ya: yimlala mate woloma ka:pi natilalo oplami hallepe. Epame ya: yimlala mape ya: yu dalepame salladlalo ha:ha:lepe. <sup>5</sup> Amasiyama ya:tapo ya:llu mate epo ya: yimlala mate batalipo omhallepiye, ya: ma mikadepe dle so sos dulu dla ha:ha:ye adipo omhalepa:?

<sup>6</sup> Epame mikadepe dle ala amko oplamitapo sos dokopala oplami hallowe poka:dena, ya:tapo ya:skamu di dla hamhetale koko tle teyulala depame. Adipalati, Saitentapo amka:yapa ya:skamu di dla hamhetale koko tle teyupame wotiyalle hauwapo. <sup>7</sup> Epapedeme ka:dena, mikadepe dle so mate epo alikili so mateta dokopala oplami i natipame ka:dena dloweye. Epapelepiye, opatapo ya: hi dla batalimale yu hale potlowa. Epame ya:tapo Saitenta elemala natili koko dla poteyuluwa.

#### *Dikon so*

<sup>8</sup> Dikon so mape ka:ka:dle so opata ha:ha:lowe ka:pi, opatapo yia: natipame ka:dena dlepo depame. Epapedeme yia: ka:dena, alila hapuloma dulu dla woloma ikadepe koko tlo atlamha:ha:loweye. Epame yia: poka:dena, kawata yú dlopo yiyilamha:ha:loweye. Epame yia: poka:dena, mani ma sikemte solotamha:ha:loweye. <sup>9</sup> Epame yia: poka:dena, dupa malamale tatlamale mate ha:ha:loweye. Amasiyama ka:dena, yia:tapo mikadepe koko tlo sikemte kikitilata hamame ha:ha:loweye. <sup>10</sup> Epedeme opa anawolotapo dikon so ha:ha:lowa dlepiye, ka:dena, mikadepe dle sotapo ka:yapa opa ewolo koko tatile woloma tlamelepe. Epele dulu dla yia: koko hapuloma ka:ka:pi ha:ha:la tlamelepiye, ka:dena, opa ewolota dikon so opa ha:ha:lepe.

<sup>11</sup> Epapedeme dikon so wola: hohomolowe mape koko hatlo mepapena. Yia: mape opa opita yia: natipame ka:ka:dle so wola: dlalota ha:ha:lepe. Epame yimkadulo yu poballalo wekelalo so wola:ta ha:ha:lepe. Epame yia: mape yiskamu yia: moto hohomalalo so wola:ta ha:ha:lepe. Epame yia:ta oko halé dulu dla yia: woloma oko ka:pi hutulli mate halalo sota ha:ha:lepe.

<sup>12</sup> Epapele dulu dla dikon so opaye ka:dena, wola: hatlo halopo ha:ha:loweye. Epame yia: ka:dena, yia: wola: mate epo yia: yimlala mate woloma ka:pi omha:ha:loweye. <sup>13</sup> Epapedeme dikon so opatapo oko woloma ka:pi hutulli mate halepiye, opata e natimama opa ewoloye ka:pi dlepe. Epela dalemama yia:tapo mikadepe dle dulu dla yia:ta itiyamale mate kokalalipo ha:ha:lepe.

*Dita God malamolowe ya: dulu koko*

<sup>14</sup> Na: ma solotama, wa:ta hala dla puluwedeme. Amasiyama na: ma isikimi yu ilimale iye wa: wadle hamima. <sup>15</sup> Adipalati, na:ta hapele populalo wekelepiye, yu ilimale ita mikadepe dle sotapo halowe kokoye wa: dla imelepe. Adipalati, mikadepe dle so iwoloye pasakalo halemhala God ya: sospo. Epedeme God ya: sos itapo ikadepe koko ya: sitali halapo. <sup>16</sup> Epedeme dita Yesu Keliso dla mikadepe depo ta kokoye pta koko pato. Adipalati,  
Ya:tapo oplami ikadepe moto hamsela:lati  
opata ya: natiwapo.  
Epame Hela:dle Sokota ya:ye ka:dle oplami duwapo.  
Epame banakaka sota ya: natiwapo.  
Epame opatapo ta:lamu hapuloma dla ya: kokoye atlamsiyamalati  
opata ya: dla mikadepe duwapo.  
Epame Godtapo ya:ye Pepele dimo dla ta:duwapo.

## 4

*Isikimi mala-atlalo sota imale koko dla dolumiya*

<sup>1</sup> Hela:dle Sokotapo haliyamale dla epo atlapo, “Mosukulu alila dla opa opita mikadepe dle kokoye memellepe. Epame yia:tapo isikimi mala-atlalo sokota imale koko mate epo bataliya yimlalata imale koko mate dla dolumelepe,” depo. <sup>2</sup> Amasiyama opa ipapele koko imsiyamalaloye isikimi mala-atlalo sopo. Epame yia:tapo yiskamu di dla halopo hetamsiyamolowe tlo malamama asiyama ka:dle koko mate batalimale koko mate malanatilowe tlo poyia:malamana. Adipalati, yia: dla ka:dle koko malamolowe malamale hutiyeye mo-palipo hutiyepo. <sup>3</sup> Epame yia:tapo wola: halomolowe mate epo dlowe alisisi opi dlowe mate aiyalma demdepo. Amasiyama Godtapo dlowe alisisi hapulomaye mimita:puwapo, ditapo delepo depame. Epedeme ka:dena, mikadepe dle sotapo dlowe alisisi e dlowedeme ka:yapa God dla inoma sumale mate siyele yu atlowe ka:pi. <sup>4</sup> Adipalati, Godta mimita:ple alisisi hapulomaye pta ka:pipo. Epele dulu dla di ma poka:dena, ditapo dlowe alisisi opiye batalimana dloweye. Amasiyama ditapo God dla sisiyele mate dlowe alisisi i dloweye ka:pi. <sup>5</sup> Adipalati, God yu mate epo inoma sumale yu matetapo dlowe alisisi iye ma-ka:demdepo.

*Keliso koko dla ka:dle salladlalo oplami hallowe*

<sup>6</sup> Wa:tapo yu iye woloma mikadepe dle so opa dla imhallepiye, wa:ye Yesu Keliso ya: oko oplami ikadepe ka:dleta apelepe. Epame wa:ta daya demhalemama itiyamale hamdiye, epammama wa:tapo ka:dle yu dla mikadepe dlowe kokoye dolumhallepiye, eta wa: dla itiyamale hamilipe. <sup>7</sup> Epedeme dulu edla wa: biskapa koko esemale dalemama koko edla dolumiya. Amasiyama wa: God mila:pi tle woloma ka:depo hallowe koko tlo atotomala natimhalane. <sup>8</sup> Adipalati, wa: motota itiyamale mate hallepo depo atotomala natimhalloweye pase koko pato. Amasiyama wa:ta God mila:pi tle woloma ka:depo hallowe koko tlo koko pta patopo. Adipalati, koko itapo wata dita ta:lamu hema ha:ha: pasakalo mate epo ma alotle puluwedeme hala kokó halepo halepo hallowe pasakalo mate yia: sitali halapo. <sup>9</sup> Yu iye ikadepepo. Epedeme opa hapulomatapo yu i dalepame dolumha:ha:lowe ka:dena. <sup>10</sup> Adipalati, dimalamana, Godye pasakalo hallalo Godpo. Epame dimalamana,

ya:tapo opa hapulomata pasakalo gadlowe halepo depame solotamhalapo. Epapedeme ka:dle yu dla mikadepe depame dolumha:ha:lalo so opa dla ya:tapo yia: pasakalo gadlalo halapo. Epapedeme ipapele koko tle mikadepe dle so ditapo ka:dle yuye opa dla imsiyamama oko pato hapo, opatapo yu i dalepame dolumelepo depame. <sup>11</sup> Epedeme yu iye opa dla imane.

<sup>12</sup> Epedeme wa:ta ala amkota:le oplami depo hala koko dla opata wa:ye yimka:mala de demiya. Amasiyama opata wa: koko natipo dolumelepo depame woloma ka:ka:dle koko tlo halomhalane, wa:ta yukamale tle, epo wa:ta halale pasakalo tle, epame wa:tapo yimkadulo bokotiyapo malamale tle, epame wa:ta mikadepe dle koko tle, epame wa:ta wa:skamu wa: moto hamale koko tle. <sup>13</sup> Epame wa: na:ta puluwe dla omtamama God yuye opa dla sesa:pame yia:ye imhalemama molo yu atlamhalane. <sup>14</sup> Epame sos dokopala sotapo wa: dokopala dla hamame inoma sumama wa: watle molo atlale oloma dla Hela:dle Sokota wa: watle hamili oko hamiwa eye woloma itiyamale mate hamhalane.

<sup>15</sup> Wa: opa hapuloma mila:pi tle halemama na:ta atlama koko hapuloma iye woloma dolumhalane. Epame oko itiyamale mate hane, opata wa: koko natipame ka:dena dlepo depame. <sup>16</sup> Wa: wolomape! Wa: woloma ikadepe koko tlo imhalemama ka:ka:dle koko tlo halomhalane. Wa:ta epapelepiye, Godtapo wa: pasakalo mate epo wa:ta imhala opa yia: pasakalo mateye gadlepe.

## 5

### *Yimkadulo dla sadle mate atlamane*

<sup>1</sup> Epele dulu dla wa: toto oplamita batalimale koko hamhala natipame ya: watle ase sikemte yu sisikalle mate atlemiya. Amasiyama wa:tapo wa: a watle woloma sadle mate yukapo imdiye, epammama wa:tapo ya: watle woloma sadle mate atlane. Epame amkoteta:le so dla mape wa:ta wa: ei ikadepe dla woloma sadle mate yukapo imdiye, epammama wa:tapo yia: watle woloma sadle mate atlamane. <sup>2</sup> Epame hadiyema dla popa:lalo so wola: mape wa:ta wa: wai watle woloma sadle mate yukapo imdiye, epammama yia: watle woloma sadle mate atlamane. Epame ipilatalo dla mape mepapene. Wa:ta wa:tumadulo watle woloma sadle mate yukapo imdiye, epammama yia: watle woloma sadle mate epo ka:dle malamale mate atlamane.

### *Sepeyamatalo soye woloma gagademha:ha:iya*

<sup>3</sup> Epame sepeyama a:ya yimlala pa:leta isikimi duka dla sela:mama gadlowe pa:msela:lati mikadepe dle sota e natimama ya: gadlowe ka:pi. <sup>4</sup> Amasiyama sepeyama ya: yimlala mate epo ya: awadulo mate me-ha:ha:lepiye, ka:dena, yia:tapo yia:ta mikadepe depo ta koko e dolumama ya: gadlowe ka:pi. Yia:ta epamha:ha:lepiye, eta yia:ta yimka:sikili ha:ha:lati yia: wai mate epo yia: awa mateta yia: gademha:ha:uwa asiyama eye gademama apelepe. Adipalati, ipapele kokotapo God dla siyele hamimhalapo. <sup>5</sup> Epele dulu dla sepeyama pollalo a:yatapo gadlowe pa:le dulu dla polomama utula:la mate epo alila mate gadle yilo God dla otele himimpollope. <sup>6</sup> Amasiyama sepeyama antapo meyelo solotamale koko tlo dolumsela:ma:, ya:ye mo tle pasakalo halemama asiyama soko tle mo-powale halapo.

<sup>7</sup> Epedeme wa: mikadepe dle so atlane, yia:tapo sepeyamatalo yimlala pa:le woloma gadlepo depame. Yia:ta epapelepiye, opata yia: natimama yia: koko dla batalimale yu hale po-atlowa. <sup>8</sup> Amasiyama oplami antapo atlemama, “na:ye mikadepe dle dulu dla Keliso dolumtlalo oplami,” depame matle ya: waidulo mate epo ya: asiyadulo mate woloma pogadlalo hallepiye, ya:ye mikadepe dle dulu dla pohalasema. Epedeme ya:ye pomikadepe dle wekele oplami ikadepepo.

<sup>9</sup> Epedeme sos dulu dla mikadepe dle sotapo sepeyamatalo woloma gadlepo depame wa:ta yia: hi halomama isikimi ipapele sepeyamatalo so wola: hi tlo halomelepe.

Sokomoko 60 mo-tla:mtame ha:ha: so, epo isikimi oplami hatlo tlo halomale so. <sup>10</sup> Epame yia:ye opa hapulomata ka:ka:dle koko halomalalo so dlalo wola:. Epame yia:ye yia: yimlala woloma ka:pi omha:ha:lalo wola:. Epame yia:ye asepe so gadlalo wola:. Epame yia:ye mikadepe dle so opi dla salladle oko halalo so wola:. Epame yia:ye wotiyalle dulu dla ha:ha:lalo so gadlalo wola:. Epame yia:ye ka:ka:dle koko hapuloma halomalalo wola:. Epapele sepeyamatalo so hi tlo halomolowe ka:pi.

<sup>11-12</sup> Amasiyama wa: sepeyamatalo so hi halomama wola: ala amkoteta:leta sepeyama popa: hiye pahalomolowa. Adipalati, yia:tapo sepeyamatalo popa:mama sosta yia: gadlepo depame yu himimama, “di matle opa pahalomolowa,” demdepo. Epapele tlope ma alotle opa halomolowe solotamaleta yia: dla pulati yia:tapo matle opa halomdepo. Yia:ta epamde koko tle sosta yia: gademha:ha:lepo depame yia:ta yu himiliye mahauwokokomama batalimale koko hamdepo. <sup>13</sup> Epame ma koko haleta ipo elapo. Wa:tapo ala amkota:le sepeyamataloye sosta gadlepo depame hi halomelepiye, yia:tapo oko halowe sasalalimama isikimi koko pa:le aya dla hohola:msiyamama yimkadulo yu balemsiyamelepe. <sup>14</sup> Epedeme ka:dena, ala amkoteta:le sota sepeyama popa:tapo matle opa halopame yimlala hatitipo, yia: yimlala eye woloma omha:ha:loweye. Yia:ta epapelepiye, pomikadepe dle sota yia: watile batalipo atlowe api hale ponatilowa. <sup>15</sup> Amasiyama epapele tlope ala amkoteta:le sota sepeyama popa: opitapo Saiten yu dla dalepame mo-dolumtamalapo.

<sup>16</sup> Epele dulu dla mikadepe dle a:ya antapo ya: asiyadulo dulu dla sepeyamatalo popa:lepiye, ya: ka:dena, ya:tapo ewoloye woloma omhalloweye. Epalati asiyama sos dulu dla mikadepe dle ha:ha: sotapo isikimi gadle pa:le sepeyamatalo siyama tlo gagademha:ha:lepe.

*Sos dokopala so dla woloma gadlowe koko*

<sup>17-18</sup> Epedeme wua: God yu buka dla yu hutiye iye daliya.

“Wua: bulumkiyawa aliyata oko hamsela:mama

daya dlala depame ya: matiye deata ketopolomiya.”

Epame God yu bukata ma epo atlapo,

“Ka:dena, oko halalo oplamitapo ya: oko asiyama halowe ka:pi.”

Epapedeme sos dokopala sotapo wua: dla God yu imha:ha:mama oko pato hamdepo. Epedeme wua: yia: yu dla heodepame yia:ye woloma omha:ha:mama yia: oko asiyama ma hapimha:ha:iya.

<sup>19</sup> Epame oplami hatlota puame wa: watile atlemama, “na: sos dokopala oplamita batalimale koko hamhala nati” dlali wa: yipta ya: yu dla dalepame mikadepe demiya. Amasiyama opa pasataletapo puame wa: watile atlepiye, eta yia: yu dla mikadepe dlepe.

<sup>20</sup> Epele dulu dla sos dokopala oplamita batalimale koko ikadepe halë hallepiye, wa: epalati opa hapuloma inoma dali tle ya:ye sikemte atlane. Wa:ta epapelepiye, opata koko e natimama wowota:lepe.

<sup>21</sup> Na: God mate Yesu Keliso mate epame yia:ta sesalemale banakaka opa mila:pi tle wa:ye atlema, wa:tapo na: yu dalepame dolumhalapo depame. Epamhalemama seme tiyape tlo pogademhallowa.

<sup>22</sup> Epame wa: hahapila:le mate opaye sos dokopala ha:ha:lepo depame hapele huhulupo yia: dokopala dla do mate hohopo inoma suma demhalemiya. Epame opa opita batalimale koko dulu dla tullati wa: mate tuludemhalemiya. Amasiyama wa: wa:skamu wa: motota batalimale koko dla tullala depame hamalalo halane.

<sup>23</sup> Timoti, wa: yú siyapo demhallati wa: dupaye yelemhalapo. Epedeme wa: yú demama wain yú mate dukupo dedemhalane, eta wa: dupa yelemhalaye pa:lepe.

<sup>24</sup> Opa opitapo batalimale kokoye haliyamale dla halati opa hapulomatapo menatipame epo atlemdepo, “Godta wua: kokoye gladlepe,” demdepo. Amasiyama opa opita batalimale koko halomaleye dita potlamasemde. Amasiyama alotle Godta koko

gladlepiye, batalimale hapuloma eye haliyamale dla hatitimelepe. <sup>25</sup> Epapedeme ka:ka:dle koko opi opata halomdiye, haliyamale dla hutiyepo. Epalati ka:ka:dle koko opi opata halomdiye, hemele hutiyepo. Amasiyama alotle Godtapo ka:ka:dle koko dita halomde hapulomaye haliyamale dla hatitimalati opa hapulomatapo natilipe.

## 6

### *Asiyama pa:le dla oko halomalalo so mate epo yia: dokopala so mate*

<sup>1</sup> Asiyama pa:le dla oko hamha:ha:lalo soye ka:dena, yia:tapo yia: dokopala so yu dla heodemha:ha:loweye. Yia:tapo epamha:ha:lepiye, opata e natimama ka:dle yu mate epo God hi mate dla pobatalipo atlowa. <sup>2</sup> Asiyama pa:le dla oko halomalalo so opi yia: dokopala soye mikadepe dle sopo. Epapele tlope yia:tapo yia: dokopala so yu popokallowe poka:dena. Amasiyama ka:dena, yia:tapo woloma hutulli mate yia: dokopala so yu dla heodepo salladepo siyamoloweye. Adipalati, yia: dokopala so mape mikadepe dle sopo. Epame Godtapo yia: ma bokotiyapo malamhalapo.

### *Mani sikemte solotamolowe kokoye batalimale kokopo*

Epedeme Timoti, wa:tapo na:ta atlamale kokoye opa dla imhalemama atlamhalane.

<sup>3</sup> Epame oplami antapo imale hale hame opaye imsela:lepiye, ya:ye ikadepe di Lod Yesu Keliso koko imale tle alikili dla ma-taleta apelepe. <sup>4</sup> Ipapele oplami dla ka:dle koko malamale hale pe-elasema, amasiyama isikimi ya:skamu ya: tlo ka:dena depame di dla hamhetlalo oplamipo. Epame ipapele oplamitapo imale meyelope meyelope dle yilo yu topulollowe sikemte solotamdepo. Epame yu topulolle koko itapo ya:mkale ellewe koko mate epo yu balle koko mate epo isikimi mala-atlowe koko mate epame duka gladle koko mate halopo pumdepo. <sup>5</sup> Epame ipapele oplami dla ka:dle malamale pe-elasema. Epame ya: dla ikadepe kokota hawa halapo. Epammama ya:ta malamaleta semte God dla mikadepe depo halloweye alisisi poposatilipo hallowe koko tepo demdepo.

<sup>6</sup> Amasiyama oplami antapo God dulu dla halemama siyele mate sadepo hallepiye, ya:ye koko hapuloma mo-halopo halapo. <sup>7</sup> Epedeme ta:lamo hema di waidulota di hohomuwaye, alisisi mate pohohomana. Epapedeme dita pallipiye, di ma di alisisi mate potlowa. <sup>8</sup> Epedeme dia: dla dlowe alisisi mate tluka alisisi mate hutiyepo natimama ditapo alisisi iye dia: mate ma-ala:na dlowe ka:pi.

<sup>9</sup> Amasiyama alisisi sikemte poposatilipo ha:ha:lowa depo momalamalalo sotapo yiskamu yia:ye elemala natili koko dla elemtulumdepo. Opa ipapele soye aliyatapo dea susumale dulu dla tumdiye, epapele some ha:ha:po. Adipalati, yia:ta alisisi poposatilipo ha:ha:lowe malamale kokotapo batalimale koko hapuloma halomolowe dla yia:ye eleme tamama bobtalimelepe. <sup>10</sup> Ame adipalati, mani sikemte solotamolowe kokotapo batalimale koko hapuloma sitali halapo. Epedeme opa opitapo mani sikemte solotamale koko tle yia:ta mikadepe dle dulu tle ma alikili dla wowoyapame matamaluwapo. Epapele koko tle yiskamu yia: dla dupa kolle kokoye hampumdepo.

### *Timoti, wa: batalimale koko hapuloma tle alikili dla halane*

<sup>11</sup> Amasiyama Timoti, wa:ye God ya: oplamipo. Epedeme wa: batalimale koko hapuloma tle alikili dla woyapo halane. Epame wa: God mila:pi tle ka:depo halemama ka:ka:dle koko halomhalane. Epame mikadepe dle koko dulu medla halemama yimkadulo sikemte bokotiyapo malamhalane. Epame wotiyalle koko hapuloma dulu dla kokalepo halane. Epame sadle mate halane. <sup>12</sup> Epedeme Godta wa: sisilamuwa kokó halepo halepo hallowe pasakalo e halowedeme woloma mikadepe dle koko dulu dla kokalepo halemama opahale dene. Adipalati, wa:tapo opa hapuloma mila:pi tle halemama wa:ta God dla mikadepe depo hallowe koko atlati Godtapo pasakalo eye wa:watle hamilowedeme ma-sisilamuwapo.



<sup>13</sup> Epedeme na:tapo alisisi hapuloma dla pasakalo hapilalo God hi mate epame Pontes Paelet mila:pi tle woloma ikadepe koko tlo botomastlalo Yesu hi mate wa:ye atlema, <sup>14</sup> wa:tapo di Lod Yesu Kelisota puluwe alila dla omtamama woloma ullu pa:po halemama na:ta imale yu dla dolumhalane. <sup>15</sup> Epedeme Godta alila sepo himilipiye, Yesuta alila edla pulupe. Epame ya:ye dokopala so hapuloma yia: dokopala oplamipo. Epame patoto so hapuloma yia: Lodpo. Epedeme hatlo ya: dla siyele ta:demha:ha:lowe ka:pi. <sup>16</sup> God hatlo ya:tapo kokó halepo hallalo halapo. Epame ditapo ya:ta hala mateka:pi dla tuluweye po-ala:na. Adipalati, ya:ye sikemte hela:dle dudu dla hallalopo. Epapedeme oplami haletapo ya:ye ponatina. Ikadepe, oplami haleta ya: natiloweye po-ala:na. Ya: dla kokó elepo ellalo itiyamaleye elapo. Epedeme ditapo alila hapuloma hatlo ya: dla siyele ta:demha:ha:lowe tlo ka:pi. Koko iye ikadepepo.

*Mani poposatilimale so wua: yimkadulo gagadiya*

<sup>17</sup> Wa: mani sikemte poposatilimale so opa watle yu iye atlamane, yia:tapo yiskamu di dla halopo hetamama yia: mani dla hitaha:ha:lala depame. Amasiyama ka:dena, yia:tapo hatlo God dla hitaha:ha:loweye. Adipalati, God hatlo eta di gadlalo halapo. Epame hatlo ya:tapo ka:ka:dle kokoye dia: dla halopimhalapo. <sup>18</sup> Epame ma yia: watle atlane, yia:tapo opa dla ka:ka:dle koko tlo halomha:ha:mama yia: gagademha:ha:lepo depame. Epammama yia:tapo yia: mani mate alisisi pa:talo soye gagademha:ha:lepo depame. <sup>19</sup> Yia:ta epapele koko halomha:ha:lepiye, eta yia:tapo ma alotle halomolowe alisisiye Pepele dimo dla kokolumha:ha:mama apelepe. Epame yia:tapo kokó halepo halepo hallowe pasakaloye halepe.

<sup>20</sup> Timoti namkale, Godtapo wa: watle hamiwa okoye woloma omhalane. Epame batalimale yu dla dalepame dolumiya. Epame ka:dle yu dla alilalo so mate yu topulolemhalemiya. Adipalati, yia:tapo yiskamu yia:ye koko momalamale so demdepo, amasiyama yia:ye ikadepe yeitamale sopo. <sup>21</sup> Epapedeme opa opitapo ipapele mala-male mate ha:ha:mama ikadepe api tle ma alikili dla ma-tamaluwapo.

Eso. Godta bokotiyapo malamaleta wua: mate hallepe.

## Polota matle Timoti watle yu ilimale hamili

### 2 Timoti

### 2 Timoti buka ya: dulu koko

Yu ilimale iye Polota amtuwale aya dulu dla halemama Timoti watle ma hamiyo. Adipalati, ya: malamaiyo, opata ya: yumuluwe alilaye mo-mateka:pi dla puapo depame. Epedeme Polota Timotita mikadepe dle dulu dla kokalepo hallepo depame molo atlale yu iye ilipo hamiyo. Adipalati, Polota malamaiyo, oko ya:ta hamsela:leye ma Timotita hamtelepo depame.

<sup>1</sup> Na:ye Polopo, Yesu Kelisota tane dle oplamipo. Epame Godta meyelo solotamale tle na:ye sepame Taiya dle oko iye hamiwapo, na:tapo ya: yuye opa dla imsela:lati opata dalepame mikadepe dlepo depame. Epame ya:ta Yesu Keliso dulu dla ha:ha:mama halepo halepo pasakalo halepo depame. <sup>2</sup> Yu ilimale iye na:ta sikemte bokotiyapo malamale maseyemala Timoti wa: watle hamima.

A God mate epame di Lod Yesu Keliso mate ya:ta bokotiyapo malamale mate epo sadle mateta wa: mate hallepe.

#### *Timoti, wa: wota:miya*

<sup>3</sup> Timoti, na:ta wa: malamama God dla sikemte siyele yu atlemde. Epame alila hapuloma mate utula:la hapuloma mate na:tapo wa: yilo God dla inoma sumale yu atlemde. Epame na: mamadulota God dla mikadepe depo puwaye, na: ma hatlo ya: God medla mikadepe depame ka:dle malamale mate ya: oko hamhalema. <sup>4</sup> Epame dita yimkata ha:ha:pame na:ta wa: saliyome tlati wa:ta na: yilo sikemte amuwaye na: e powelimalasema. Epedeme na: wa: mila:pi matle natipame sikemte siyele mate hallowe solotama.

<sup>5</sup> Wa:ta Yesu Keliso dla mikadepe depame kokalepo hala kokoye na:malamana. Epedeme wa:ta mikadepe dle koko epapeleye ka:yapa wa: awa Lois dla eluwapo. Epame matle wa: wai Yunike dla eluwapo. Epapedeme na: ma mikadepe dema, mikadepe dle epapeleye wata wa: dla elapo. <sup>6</sup> Epapele koko tle na:ta wa: dla atlema. Adipalati, na:ta wa: dokopala dla do mate hamame inoma sumalati Hela:dle Sokota wa: watle oko hamiwaye, woloma itiyamale mate oko eye hamtane. <sup>7</sup> Adipalati, Godta di watle Soko hamiwaye, wota:le soko pohamina. Amasiyama ya:tapo di watle Soko hamiwa etapo itiyamale mate epo bokotiyapo malamolowe koko mate epame batalimale koko dla tullala depame di moto hohomolowe koko mate hapimhalapo.

<sup>8</sup> Epapedeme wa: di Lod Yesu Keliso kokoye opa dla atlowe wota:miya. Epame na:ta Keliso yilo amtuwale aya dulu dla hala itapo wa: dla wota:le hami demiya. Amasiyama wa: na: oko ipi hamama Godta wa: watle oko hamiwa eye wotiyalle dulu medla itiyamale mate me-hamtane. Adipalati, Godtapo wa: dla itiyamale hamilalo halapo. <sup>9</sup> Godtapo alisisi hapuloma ala pomita:plalo halemama ya:ta di elemolowe kokoye yu itiyapo me-himiwapo. Dita ka:dle koko halomha:ha:lati po-apena. Amasiyama ya:ta di bokotiyapo malamale tle Yami Yesu Kelisota di batalimale dla polati asiyama ya:tapo dia:ye elemolowedeme sisilamuwapo. <sup>10</sup> Epame di pasakalo gadlalo oplami Yesu Kelisota puwa kokotapo Godta ka:yapa hemele dinapopo himili kokoye ma haliyamale dla botomastauwapo. Epame ya:tapo powaleta itiyamaleye mo-yumpame ma ka:dle yu tle pasakalo hallowe halowe kokoye haliyamale dla botomastauwapo.

<sup>11</sup> Epedeme ka:dle yu iye na:tapo opa dla imalalo oplami hallepo depame A Godtapo na: watle tane dle okoye hamiwapo. <sup>12</sup> Epedeme na:tapo oko i hamhalemama wotiyalle koko dulu dla wota:le pa:le mate hamhalema. Adipalati, na:malamana, na:ta mikadepe

depame dolumta oplamiye. Epapedeme na:malamana, ya:ta na: watle oko hamiwa okoye meyelo na: gademhalemama oko eye hamtame mosukulu dla gudlepe.

<sup>13</sup> Na:tapo wa: dla ikadepe imale kokoye etlo kikitilata hamame halemama e dolumhalane. Epame Yesu Keliso dulu dla halemama ya:mkale bokotiyapo malamolowe koko mate epo mikadepe depo hallowe koko mate dulu medla halane. <sup>14</sup> Epame dia: dulu dla hallalo Hela:dle Sokota gadle tle Godta wa: watle hamili ka:dle yuye sikemte kikitilata hamame halane.

<sup>15</sup> Epame wa: ma wa:malamana, Asiya so hapulomatapo na: saliyome tamallati Pigelos mate epo Helmogenes mateta ma na: saliyome tamaluwaye.

<sup>16-17</sup> Epalati oplami Onesipolasta Loum mo dla puame na: natilowedeme na: totamsela:uwapo. Epame ya:ta na:ta amtuwale aya dulu dla oli dea mate yulupo polla nati-pame powota:lalo na: gademhalemduwapo. Epedeme na: inoma sumale yu himima, Lodta gadletapo Onesipolas mate epo ya: aya dulu dla ha:ha:lalo so mate dla ellepo depame. <sup>18</sup> Epame Godta koko gladle oloma edla ya: kokoye woloma polowamale mate gladlepo depame. Epedeme Timoti, wa: ma wa:malamana, na:ta Epeses dla hallati ya:ta na: ka:pi gademhaluwa kokoye.

## 2

### *Keliso yilo ka:depo opahale dlalo oplami halane*

<sup>1</sup> Na: maseyemala namkale, wa: Yesu Keliso dulu dla bokotiyapo malamale ela etle itiyamale hane. <sup>2</sup> Epame wa: opa hapuloma inoma dali tle na:ta wa: imuwa kokoye ka:ka:dle so opa hapuloma dla imane, yia:tapo ma opa opi dla imelepo depame.

<sup>3</sup> Epame Yesu Keliso yilo ka:depo opahale dlalo oplami some wotiyalle dulu dla oko hamhallowe alimiya. <sup>4</sup> Adipalati, wa: natine, ka:depo opahale dlalo oplamitapo ya: dokopala oplami yu dla sikemte salladepo sela:lowe tlo solotamama isikimi koko hale dla alila dosomolowe posolotamasemde. <sup>5</sup> Epame wa: ma natine, kukullalo oplamitapo kukulli dulu dla ya:ta yimkadulo tla:mtlowedeme solotamama aiyalma hapulomaye woloma ka:pi dolumdepo. <sup>6</sup> Epame wa: ma natine, ka:dena, alisisi sikemte emalalo oplamitapo ya: alisisita ma-napo popa:lati natipame ya: tatile polahamdemdepo. <sup>7</sup> Epedeme wa: na:ta atla koko iye woloma malamane. Adipalati, Lodtapo wa:ta yu iye woloma halepo depame wa: watle ka:depo malamaleye hamilipe.

<sup>8</sup> Epedeme wa: Deibidi ya: mama Yesu Kelisota powale tle ma pasakalo duwa kokoye malamane. Adipalati, eye ka:dle yu na:ta imsela: ipo. <sup>9</sup> Epame na:ta ka:dle yu im-sela:lati opata na:ye uhalalo oplami some hampame amtuwale aya dulu dla oli deata kokotipoliyepo halapo. Amasiyama ka:dle yuye dea mate pokotipoliyepo halasema. <sup>10</sup> Epapele koko tle na:tapo Godta sesalemale so opa yilo wotiyalle dulu dla halapo, yia:tapo Yesu Keliso tle kokó halepo hallalo pasakalo mate epo hela:dle mate halomelepo depame.

<sup>11</sup> Epapedeme koko iye ikadepepo.

Di ikadepe ya: mate palli hallepiye,  
di matle ya: mate ha:ha:lepe.

<sup>12</sup> Epame ditapo wotiyalle koko dulu dla mepo kokalepo ha:ha:lepiye,  
eta di mape ya: mate omha:ha:lalo ha:ha:lepe.

Epame ditapo opa mila:pi tle ya:ye hamolowe allipiye,  
asiyama ya:tapo opa mila:pi tle di hohomolowe allipe.

<sup>13</sup> Amasiyama dita mikadepe dle dulu dla ha:ha:mama ya: welidemha:ha:lepiye,  
ya: asiyama dia:ye powelidemhalasema.

Adipalati, ya: ya:ta yu itiyapo himiliye postapame ma meyelo dloweye po-ala:na.

### *Ka:depo oko halalo oplami*

<sup>14</sup> Epedeme wa: na:ta atlama koko iye ma mikadepe dle so dla woloma imhalane. Epame yia:tapo yimka:sikili koko dla yu topulolemha:ha:ye God mila:pi tle yia:ye atlamane. Adipalati, epapele kokota ka:dle kokoye opa dla pohampuasema. Amasiyama isikimi yu e dallalo so tlo bobtalimdepo. <sup>15</sup> Timoti, wa: okota wa: dla wota:le pohamilalo wekelepo depame God mila:pi tle wa: okoye woloma ka:depo hane. Epame God yu dulu kokoye woloma ka:depo hukulupame opa dla ikadepe koko tlo imhalane, Godta wa:ye ka:depo oko halalo oplami dlepo depame.

<sup>16</sup> Amasiyama wa: batalimale koko tlo esemsiyamalalo so tle alikili dla halane. Adipalati, epapele kokotapo opaye God hala dla pe-elempuasemde. <sup>17</sup> Epame epapele esemale kokotapo ta:mama hakopa pato some opa mo demdepo. Epapele so dulu dla opa opi ha:ha:ye Humenayos mate Piletus matepo. <sup>18</sup> Adipalati, opa iwolotapo ikadepe api tle ma alikili dla ma-tamaluwapo. Epame yia:ta atlemama opata palli tle ma silliwe kokoye mo-woyamuwa depo atlamsiyamalati opa opita koko e dalemama yia:ta mikadepe dleye mo-bobtalimuwapo. <sup>19</sup> Amasiyama Godtapo sitali kotiyamama kokalepo himilita ala me-elapo. Sitali koko eye ipo, “Godtapo ya: opaye malastepo halapo. Epedeme oplami antapo atlemama, ‘Na: God dulu dla halema,’ dlepiye, ya: ka:dena, batalimale koko hapuloma tle alikili dla woyapo hallepe.”

<sup>20</sup> Epedeme alisisi pasatale oplami aya dulu dla palita pasatale me-hutiyepo. Palita opiye pta sikemte ka:ka:pita hutiyepo. Epalati palita opiye pase sikemte ka:ka:pi ma me-hutiyepo. Epapele dulu dla palita opi pta sikemte ka:ka:dleye isikimi koko patoto dla daya dlowedeme halomdepo. Amasiyama palita opi pase sikemte ka:ka:dleye isikimi alila hapuloma dulu dla daya dlomha:ha:mama halomha:ha:mdepo. <sup>21</sup> Epapedeme yu i ya: dulu kokoye ipapena. Oplami antapo ya: batalimale tle malamale meyelope depame alikili dla woyamelepiye, Godtapo ya:ye hampame koko pato dla pabellepe. Adipalati, epapele oplamitapo aiyalma depo halemama ya: dokopala oplami okoye ka:depo halowedeme ma-dinapopo halapo.

<sup>22</sup> Epedeme wa: amkoteta:le sota sikemte solotamde batalimale koko tle alikili dla woyapo halane. Epame ullu pa:po halemama mikadepe dle koko mate epo bokotiyapo malamolowe koko mate hallowedeme itiyamane. Epame dupa dulu tle God dla sisilamha:ha: so mate sadepo halane. <sup>23</sup> Epame wa: yimka:sikili koko dla yu topulollalo so tle alikili dla woyapo halane. Adipalati, wa:malamana, ipapele kokotapo nalatimale kokoye hampumdepo. <sup>24</sup> Epapedeme God ya: oko oplamitapo yu potopulolemhallowa. Amasiyama ya:tapo opa hapuloma mate woloma sadepo halemama pakasiyamalalo posiyalademhallowa. Epame ya:ye woloma ka:depo imalalo oplami hallepe. <sup>25-26</sup> Epame ya:ta imale koko dla allilalo so dla asiyama ya:tapo yia:ye woloma sadle mate gadlalo hallepe. Adipalati, Saitenta yia:ye me-elemuwapo, yia:tapo ya:ta solotamale koko halomha:ha:lepo depame. Amasiyama ka:depo imalalo oplamitapo ikadepe kokoye yia: dla woloma sadle mate imelepiye, eta yia:ta Godta gadle tle yia:ta malamale meyelope depame ikadepe koko imaleye hammama asiyama Saiten koko tlo memellowe sepena.

### 3

#### *Mosukulu alila koko*

<sup>1</sup> Koko itlo woloma sikemte malahalane. Adipalati, mosukulu alila dla wotiyalle koko mate epo kokalalimale koko mateta pumhallepe. <sup>2</sup> Adipalati, oloma edla opatapo ya:mkale pomalamalalo isikimi yia: tlo sikemte malamalalo ha:ha:lepe. Epame opatapo maniye sikemte solotamelepe. Epame opatapo yiskamu di dla halopo hehetamha:ha:lepe. Epame yia:tapo yimkadulo koko dla isikimi mala-atlamha:ha:lepe. Epame yia:tapo yia: adulo yu dla epo yia: waidulo yu dla posallademha:ha:lowa. Epame yia:tapo yimkadulo dla siyele yu po-atlamha:ha:lowa. Epame yia:tapo ullu walle koko

halomha:ha:lepe. <sup>3</sup> Epame yia: dla yimkadulo bokotiyapo malamale kokota pa:lepe. Epame yia: dla ya:mkale batalimale koko welilowe kokota pe-ellowa. Epame yia:tapo yimkadulo kokoye balemha:ha:lepe. Epame yia:ye batalimale koko halowe dla yia:moto pohohomha:ha:lowa. Epame yia:tapo yimkadulo pomalamalalo wekele mate wotiyalle hapimha:ha:lepe. Epame yia:tapo ka:dle kokoye sikemte allimha:ha:lepe. <sup>4</sup> Epame yia:tapo yimkaduloye elemala natimha:ha:lepe. Epame yia:tapo itapu kokoye woloma pomalamalalo isikimi me-yeitapo koko halomha:ha:lepe. Epame yia:tapo yiskamu yia:tlo sikemte patoto so demyelepe. Epame yia:tapo yia:motota solotamale koko tlo sikemte halomha:ha:mama asiyama Godye pomalamha:ha:lowa. <sup>5</sup> Ipapele sotapo kapala di tle mikadepe dle so some ha:ha:mama asiyama Godta itiyamale kokoye pomikadepe demha:ha:lowa. Epedeme ipapele so mate hatlope demsela:miya.

<sup>6-7</sup> Adipalati, ipapele so opatapo yimkadulo aya dulu dla hehetamsiyamama malamale tatlamale so wola:ye hohomdepo, yia:tapo ma yia:ta imale koko dla dolumelepo depame. Ipapele so wola:tapo alila hapuloma solotamdepo, imale amko koko dalepame halowedeme. Epapele tlope yia:tapo ikadepe koko halowe po-ala:lowa. Adipalati, yia:batalimale koko mate epo yia:motota solotamale koko mateta yia:ye elemtamdepo. <sup>8</sup> Epedeme ka:yapa Yanes mate epo Yambles mate Mosesye sikemte alimha:ha:uwapo. Epapedeme ma mosukulu alila dla ha:ha:lalo sotapo ikadepe kokoye ma yia:ta mepo alimha:ha:lepe. Adipalati, yia:ta malamale mo-batalipo hamastlati yia:ta mikadepe dle kokotapo mo-puame sukastlepe. <sup>9</sup> Yia:ta mikadepe dle kokota epo puame sukastlati ma asiyama yia:batalimale kokota haliyamale dla botomastlepe. Adipalati, Yanes mate epo Yambles mate mape yia:ma mepapuwapo.

#### *Wa: na: koko natipame dolumane*

<sup>10-11</sup> Epedeme Timoti, wa: mo-wa:malamana, na:ta imuwa kokoye, epame na:ta haluwa kokoye, epo na:ta solotapame mala tauwa kokoye, epame na:ta mikadepe dle kokoye, epo na:ta sadle mate bokotiyapo malamhaluwa kokoye. Epame wa:ma medaluwapo, na:tapo Antiyoka mo dla epo Ikoniyom mo dla epo Listla mo dla wotiyalle koko dulu dla kokalepo me-haluwaye. Na:wotiyalle koko hapuloma dulu medla me-haluwapo, amasiyama Lodtapo na:ye wotiyalle koko dulu etle seme alikili dla woyamuwapo. <sup>12</sup> Yao, ikadepe, opa anawolotapo Yesu Keliso dulu dla ka:ka:depo ha:ha:lowa depo solotamelepiye, opatapo yia:dla wotiyalle hapimha:ha:lepe. <sup>13</sup> Epapele dulu dla batalimale so mate epo isikimi kapala di dla mikadepe dlalo so mateye matle sikemte batalimale koko dulu dla ha:ha:lepe. Epame yia:tapo opa opiye eleme batalimale koko dla tulumama yia:mate medla tulumellepe.

<sup>14</sup> Amasiyama Timoti, wa:dla imuwa ikadepe ka:dle koko etlo woloma kikitilata hamame halane. Adipalati, mo-wa:malamana, wa:dla koko i imuwa soye. <sup>15</sup> Epame wa:mape ala yimka:mala tle kotiyapame pumama God yu bukata atla kokoye malam-puwapo. Epedeme God yu etapo wa:dla malamale hamilipe, wa:ta Yesu Keliso dla mikadepe depame halata wa:dla pasakalo hamilipo depame. <sup>16-17</sup> Epedeme God yu bukaye, e God yu ikadepepo. Epapedeme God yu bukatapo opaye imhalemama opata api hotlati matle ikadepe api dla elempua demhalapo. Epame God yu bukatapo opata ka:depo ha:ha:lowe kokoye imhalapo, God ya:opata ka:ka:dle koko siyapo tlo halomha:ha:lowe ala:po ha:ha:lepo depame.

## 4

#### *Polotapo Timoti watle molo yu mosukulu atlale*

<sup>1-2</sup> Yesu Kelisota dokopala hi hapo ma ilame pulupiye, ya:tapo opa hapuloma ala me-pasakalo ha:ha:so koko mate epo mo-palli so koko mate gladlepe. Epapedeme na:tapo Yesu Keliso hi tle epo God hi tle wa:dla atlema, wa:tapo ka:dle yuye opa dla imhallepo depame. Epedeme wa:ka:dena, opa God yu dallowe solotamalalo so dla God



yu atlamhalemama God yu dalla alilalo so dla ma me-atlamhalane. Epamhalemama opata biskapa koko imale dla tullati natipame asiyama wa:tapo yia:ye ka:dle yu mate ma ikadepe koko imale dla elempua demhalane. Epame ma yia:ta batalimale koko dla tullala depame God yu mate yia:ye gademhalane. Epame wa: yia: dla God yu imhalemama sadle mate yia:ye itiyamale hapimhalane. <sup>3</sup> Adipalati, opatapo matle ka:dle yu imale dla dalla alliwe alilata pulupe. Epalati yia:tapo isikimi yia:ta solotamale koko siyapo tlo imalalo so opa yu dla sikemte dalemha:ha:lepe. <sup>4</sup> Epame yia:tapo ikadepe koko imaleye memelepame matle biskapa koko imale dla dolumelepe. <sup>5</sup> Amasiyama dulu edla wa: ka:dena, ikadepe koko tlo kikitilata hampame wa:skamu wa: motoye hamalalo halemama wotiyalle koko dulu medla kokalepo hallepe. Epame ka:dle yu imhalemama Godta wa: watle hamiwa okoye woloma ka:depo hamhalane.

<sup>6</sup> Epedeme Timoti, na:ye opata mo-yumuluwe mateka:pi dla halapo. <sup>7</sup> Amasiyama na: God okoye woloma ka:depo hampuame guduwapo. Epele dulu dla na:ta mikadepe dleye ala me-kokalepo halapo. <sup>8</sup> Epapele dulu dla Godta na: hi mate dinapopo himili asiya-maye Pepele dimo dla na: omelapo. Epedeme di koko gladlalo oplami Yesuta puame asiyama eye na: watle hamilipe. Epame hatlo na: watle asiyama iye pohamilowa. Hao, opa anawolota ya:ta puluwe dla omha:ha:ma:, yia: asiyama mape halopo puame hapilipe.

<sup>9</sup> Timoti, wa: hapele na:ta hala hema puane. <sup>10</sup> Adipalati, oplami na: mate haluwa Dimasye meyelo ta:lamo solotamale koko tle na: saliyome ma Tesalonika mo dla tauwa. Amasiyama Kleskesye Galasiya mo dla God oko hala tauwa. Epalati Taites tlo Dalamatiya mo dla God oko hala tauwa. <sup>11</sup> Epapele dulu dla hatlo Luk tlo na: mate hema halema. Epedeme wa:ta na: hala dla pumama Makaye seme puane. Adipalati, ya:tapo puame na: mate halemama na: gademhallepo. <sup>12</sup> Amasiyama na: Tikikusye Epeses mo dla tane duwa. <sup>13</sup> Epedeme Timoti, wa: pumama na: kapumale tluka, Tlowas mo dla halepo pumama Kalopus aya dla welimpuwaye, hampuane. Epame na: buka alisisi mape halopo puane.

<sup>14</sup> Epapele dulu dla oli mate alisisi mimita:plalo oplami hale Alesendatapo na: dla wotiyalle pato hamimduwa. Amasiyama Lodtapo ya: watle asiyama hamilipe. <sup>15</sup> Ka:e! Wa: pumama oplami etlo wolomape. Adipalati, ya:tapo dita imale kokoye sikemte alimde.

<sup>16</sup> Epapedeme na:ta ka:yapa koko gladla hetauwa oloma edla oplami haletapo na: gadepame na: mate pehetana. Amasiyama yia:ta hapulomatapo na: saliyome potauwapo. Epapele tlope na: Lod dla inoma sumale yu himima, ya:tapo yia: batalimal-eye wellipo depame. <sup>17</sup> Amasiyama epapele dulu dla Lodtapo na: mate halale tle koko gladlalo sota na:ye polowe dla pohimina. Epedeme ya:tapo na:ye gaduwapo, na:tapo ka:dle yuye po-Yu so hapuloma dla hamtelepo depame. <sup>18</sup> Epapedeme oplami antapo na: dla wotiyalle hamilowedeme apelepiye, Lodtapo na: mate halemama na: gadlalo hallepe. Epame ya:tapo na:ye ya: Pepele dimo dla seme hetlepe. Epapedeme ka:dena, opatapo alila hapuloma dulu dla hatlo God dla heodepo sisiyemha:ha:loweye. Yu iye ikadepepo.

<sup>19</sup> Epedeme wa:tapo na:ta namkale dle yuye Plisila mate epo Akwila mate dla atlepame ma Onesipolas mate epo ya: aya dulu dla ha:ha:lalo so mate dla atlamane.

<sup>20</sup> Elastusye Kolin mo dla me-hallati asiyama Tlopinus tlo esiyemhallati Miletos mo dla na:ta saliyome tauwa.

<sup>21</sup> Epapedeme wa: tene alila ala po-umulalo hallati hapele wa:ta puluwe api totapame na: hala dla puane.

Yubulas mate epo Pudes mate epo Linus mate epame Kalaodiya mate epo mikadepe dle so hapuloma matetapo yia:ta namkale dle yuye wa: watle hamima.

<sup>22</sup> Lodta wa: mate hallepe. Epame Godta bokotiyapo malamaletapo wua:ta hapuloma mate dla hallepe.  
Eso, na: yu mogudepo.

## Polota Taites watle yu ilimale hamili Taites Taites buka ya: dulu koko

Polota mo hapuloma dla God yu hamsela:lati Taitesta ya: mate sela:iyo. Epame alotle Polotapo Taitesye Kiliti hasu dla sos dokopala oplami hallepo depame medla saliyome taiyo. Epapedeme yu ilimale dulu hema Polotapo Taites watle sos dokopala oplamita hallowe kokoye ilipo hamiyo.

<sup>1</sup> Na:ye Polo, God ya: oko oplamipo. Epame Yesu Kelisotapo na:ye tane duwapo, na:ta Godta sesalemale soye ikadepe koko mate ka:dle yu mate imhalati yia:ta mikadepe dleta teta:lepo depame. Adipalati, ikadepe koko etapo yia:ta God dulu dla ha:ha:lowe kokoye imelepe. <sup>2</sup> Epame yia:tapo kokó halepo hallalo pasakaloye God tle halowedeme omha:ha:lepo depo na:tapo yia:ye gadlalo halapo. Adipalati, Godtapo ka:yapa alisisi hapuloma ala pomita:plalo halemama ya:tapo kokó halepo hallalo pasakalo iye di watle hamilowedeme yu ma himiwapo. Epedeme Godye pomala-atlasemde. <sup>3</sup> Epapedeme ka:dle alilata pulati God di pasakalo gadlatapo ka:dle yuye botomastapame na:ye tane duwapo, na:tapo ka:dle yuye opa dla atlepo depame.

<sup>4</sup> Epedeme na:tapo yu ilimale iye Taites wa: watle hamima. Adipalati, mikadepe dle dulu dla wa:ye na: maseyemala ikadepe sepena.

A God mate epame Yesu Keliso di pasakalo gadlalo mate yia:ta sadle mate epame bokotiyapo malamale mateta wa: mate hallepe.

### *Sos dokopala so*

<sup>5</sup> Na:tapo wa:ye Kiliti hasu dla saliyome tauwapo, wa:tapo sos hapuloma dla yia: dokopala so hohomtelepo depame, epame sos koko opi ma dinapelepo depame.

<sup>6</sup> Wa: epamsela:mama na:ta wa: watle sos dokopala so koko dla atluwa yu ma me-malaselalepe. Adipalati, sos dokopala oplamitapo batalimale pa:le hallepe. Epame ya: a:ya hatlo hamhallepe. Epame ya: yimlala ma mikadepe depo ha:ha:mama yia: a mate yia: wai mate yia: yu dla salladlalo ha:ha:lepe. Epame yia:tapo poka:ka:dle kokoye pohalomha:ha:lowa. <sup>7</sup> Oplamitapo sos dokopala oplami halli dlepiye, ya: ka:dena, batalimale pa:le hallepe. Adipalati, ya:ye God oko hamhalapo. Epame ya:tapo ya:skamu di dla pohamhetamhallowa. Epame hapele posiyalademhallowa. Epame kawata yú depame poyiyilamhallowa. Epame ya: ponalatimhallowa. Epame mani sikemte posolotamhallowa. <sup>8</sup> Amasiyama ya:tapo asepe so dla namkale dlalo oplami depo hallepe. Epame ka:ka:dle koko hapuloma tlo solotamalalo hallepe. Epame ya: ya:skamu ya: moto hamalalo hallepe. Epame opa mila:pi tle ka:depo halemama God mila:pi tle ma ka:dle oplami depo hallepe. <sup>9</sup> Epame ya:tapo dita imsiyama ka:dle yu ikadepe dla kokata hamame halemama ka:dle yu e mate opa gadlalo hallepe. Epame ya:tapo ikadepe koko dla allimha:ha: so watle yia:ta api hotepo ta kokoye imalalo hallepe.

### *Kiliti so opa opitapo batalimale koko imha:ha:le*

<sup>10</sup> Epapedeme sos dulu dla dokopala so yu dla poheodlalo wekele so opaye me-ha:ha:po. Yia:ta biskapa kokoye opa dla imama yia:ye batalimale api dla eleme tapo. Ipapele koko halomha:ha:ye Yu so opa opi mikadepe dle dulu dla ha:ha: sota amha:ha:po.

<sup>11</sup> Epapedeme yia:ta imsiyama kokoye humatlowe ka:dena. Adipalati, yia:tapo opa hapulomata malamaleye bobtalimsiyamapo. Epame yia:tapo mani halowedeme poka:ka:dle koko iye imsiyamapo. <sup>12</sup> Epapedeme Kiliti so dulu dla imalalo oplami haletapo Kiliti so koko dla epo atluwapo, “Kiliti so hapulomaye isikimi mala-atlalo sopo. Epame yia:tapo moko esemala epapele some ha:ha:po. Yia:tapo oko halowe dla

allimama asiyama dlowe tlo sikemte dlomha:ha:po,” duwapo. <sup>13</sup> Ya:ta ipo atluwa kokoye ikadepe koko atluwapo. Epedeme Taites, wa: biskapa imalalo so opa iwoloye natipame yia:ye sikemte atlamane, yia:tapo batalimale imale kokoye memelepame ma ka:dle koko imale dla mikadepe dlepo depame. <sup>14</sup> Epame yia:tapo Yu so yia: toto koko esemale hamsiyamaye memelediya. Epame yia:tapo ka:dle yu dla allimha:ha: sota imale koko dla dalemsiyama ma memelediya.

<sup>15</sup> Epedeme God mila:pi tle ka:ka:depo ha:ha:lalo so dla alisisi hapuloma mate epo dlowe alisisi hapuloma mate ullu pa:po me-hutiyepo. Amasiyama batalimale dulu dla ha:ha: so mate epame pomikadepe dle so mate dla alisisi hapuloma ullu walena. Adipalati, ka:depo malamolowe malamale yia: dla eluwaye mo-batalipo hamastauwapo. Epedeme yia: dla ka:dle koko mate batalimale koko mate mala-natiloweye poyia:malamana. <sup>16</sup> Epedeme yia:ta atlemama, “Di Godye dimalamana,” demdepo. Amasiyama yia:ta batalimale koko halomdetapo yia:ta God dla pomikadepe dlalo wekele kokoye nati-imdepo. Yia:ye batalimale so ikadepepo. Epame yia:tapo ikadepe ka:dle yu dla allimdepo. Epame yia: dla ka:ka:dle koko halomolowe dla po-ala:lalo wekele so ikadepepo.

## 2

### *Ikadepe koko imale dla dolumolowe*

<sup>1</sup> Amasiyama wa: opa imane, yia:tapo ka:dle yu dulu dla ha:ha:mama Godta solota-male koko tlo halomha:ha:lepo depame. <sup>2</sup> Epammama wa: toto opa imane, yia:tapo sadepo ha:ha:mama yiskamu yia: moto hohomalalo so depo ha:ha:lepo depame. Epame yia: imane, yia:tapo mikadepe dle dulu dla kokalepo ha:ha:mama opa hapulomaye sikemte bokotiyapo malamha:ha:lepo depame. Epame yia:tapo wotiyalle koko dulu dla kokalepo ha:ha:lepo depame. Yia:ta epo ha:ha:lepiye, eta opatapo yia:ye ka:ka:dle so dlepe.

<sup>3</sup> Epame toto wola: ma ipo imane, yia:tapo God yu dla mikadepe depame moto mate koko halomha:ha:lepo depame. Epame yia: atlamane, yia:tapo yimkadulo yuye poballalo ha:ha:lepo depame. Epame yia:tapo kawata yú dlopo yiyilamsiyamalala depame yia:ye atlamane. Epame yia:ta ka:ka:dle koko halomha:ha:lali wola: opita yia: natipame yia: dolumelepo depame yia:ye imane. <sup>4</sup> Epapedeme yia:tapo epapele api tle amkoteta:le so wola:ta yia:wolalidulo mate epo yimlala mate dla bokotiyapo malamolowe kokoye imha:ha:lepe. <sup>5</sup> Epame ka:dena, yia:tapo amkoteta:le so wola:ta ka:dle koko halomha:ha:mama yiskamu yia: moto hohomolowe kokoye imelepe. Epame yia:wolalidulo mate yia: yimlala mate woloma natilowe koko ma imelepe. Epame yia:tapo yia:wolalidulo yu dla sallademha:ha:lowe koko ma imelepe. Yia:ta epamha:ha:lepiye, pomikadepe dle sotapo koko e natimama God yu dla pobatalipo atlowa.

<sup>6</sup> Epame amkoteta:le so opa mape yiskamu yia: moto hohomolowe kokoye imane. <sup>7</sup> Epedeme Taites, wa:tapo amkoteta:le so opa dla ka:depo hallowe kokoye nati-iliwe ka:pi. Epame wa:tapo God yu atlemama woloma ka:pi imane. <sup>8</sup> Wa:ta God yuye woloma ka:pi imhallepiye, asiyama wa: alilalo so opatapo wowota:mama wa: dla batalipo atlowe apiye ponatilowa.

<sup>9</sup> Epame wa: ma asiyama pa:le dla oko halomalalo soye atlane, yia:tapo yia: omha:ha:lalo so yu dla salladepame ka:ka:dle koko tlo halomha:ha:mama yia: mate yu potopulollalo ha:ha:lepo depame. <sup>10</sup> Epame poka:dena, yia:tapo yia: omha:ha:lalo so mani uhalomha:ha:loweye. Amasiyama yia:tapo woloma ka:dle koko siyapo tlo halomha:ha:lepe, yia: omha:ha:lalo sota yia: kokoye ka:pi dlepo depame. Epame God di pasakalo gadlalota imaleye ka:pi dlepo depame.

<sup>11</sup> Godta di bokotiyapo malamale tle Yesu Kelisoye ta:lamo hema tulune duwapo, ya:tapo opa hapuloma pasakalo gadlepo depame. <sup>12</sup> Godta bokotiyapo malamale koko etapo dia:ye imhalapo, ditapo ta:lamo koko dulu dla ma poha:ha:lalo wekelepo depame. Epame ditapo di moto hohopo ha:ha:mama God mila:pi tle woloma ka:ka:depo ha:ha:lepo depame. <sup>13</sup> Epedeme dita hapulomatapo pasakalo gadlalo Yesu Kelisota Godta hela:dle mate ta:lamo hema puluwe dla woloma dalemha:ha:mama omha:ha:lowa. Ya:ye ikadepe Godpo. <sup>14</sup> Ya:tapo dia: yilo mo-pouwapo, ditapo di batalimale dulu dla ha:ha:lati asiyama mate hohopame alikili dla eleme woyamolowedeme. Epammama ya:tapo mo-pouwapo, ditapo ya: mila:pi tle ya: opa depo ha:ha:mama ullu pa:talo so depo ha:ha:lepo depame. Epame ditapo ka:ka:dle koko tlo halomolowe dla sikemte solotamha:ha:lepo depame.

<sup>15</sup> Epapedeme wa: koko hapuloma iye itiyamale mate woloma molo atlemhalemama yimkaduloye God yu mate gagademhalane. Wa:ta epo imhalla natipame opata hatlo wa:ta imale dla heodemha:ha:lowe tlo ka:pi. Epammama oplami haleta wa:ye koko pa:le oplami de demiya.

### 3

#### *Mikadepe dle sota ha:ha:lowe koko*

<sup>1</sup> Epedeme mikadepe dle so opa dla ipapele kokoye imhalane, yia:tapo yia: omha:ha:lalo gamani dokopala so yu dla epame mo dokopala so yu dla heodemha:ha:lepo depame. Epammama yia:tapo ka:ka:dle koko halomolowe dla madinapopo ha:ha:lepo depame. <sup>2</sup> Epame yia: poka:dena, ya:mkale yu balemha:ha:mama oplami hale dla batalimale koko atloweye. Amasiyama yia: sadle mate bokotiyapo malamale dulu dla ha:ha:mama yimkadulo mate namkale demha:ha:lowe ka:pi.

<sup>3</sup> Epedeme Taites, wa: dita ka:yapa ha:ha:uwa pasakalo malamane. Di ala pomikadepe dlalo ha:ha:mama pasakalo batalimale dulu dla ha:ha:uwapo. Dita God yu dla posaladlalo ha:ha:lati batalimale kokota dia:ye elemsiyamuwapo. Epalati ditapo yimkadulo allimduwapo, epame yimkadulo alisisi natipame solotamama yia:ye elemduwapo. Epame opata dia: dla allilati asiyama dita yia:ye allimduwapo.

<sup>4</sup> Amasiyama God di pasakalo gadlalotapo ya:ta namkale dle koko mate epame yimkadulo malamolowe koko mateta dia: dla woyamalati ya:tapo di pasakaloye gaduwapo. <sup>5</sup> Epele dulu dla ditapo ka:ka:dle koko halomha:ha:lati po-apena. Amasiyama ya:tapo meyelo di bokotiyapo malamale tle apuwapo. Epame ya:tapo di batalimaleye howahalopame Hela:dle Sokoye di watle hamiwapo, ditapo ma opa amko so depo ha:ha:lepo depame. <sup>6</sup> Godtapo Yesu Keliso di pasakalo gadlaloye dia: dla malane duwapo, ditapo ya: tle Hela:dle Sokoye hamama sikemte poposatlipo ha:ha:lepo depame. <sup>7</sup> Epapedeme Godtapo dia:ye ya:ta bokotiyapo malamale tle ma ullu pa:talo so dlati asiyama ditapo kokó halepo hallalo pasakaloye halowedeme omha:ha:po. <sup>8</sup> Epedeme yu iye ikadepepo. Adipalati, yu itapo opa hapulomaye gagademhalapo. Epedeme na: solotama, wa:tapo koko iye mikadepe dle so dla woloma imhalapo depame. Epelepiye, yia:tapo woloma ka:ka:dle koko halomha:ha:mama opa gagademha:ha:lepe.

<sup>9</sup> Amasiyama wa: yimka:sikili koko dla yu topulollalo so tle alikili dla woyapo halane. Epame opatapo Yu so yia: toto koko esemale mate epo Mosesta aiyalma hatitimale dolumolowe koko yilo yu topulolemha:ha: natipame dolumiya. Adipalati, ipapele koko hapulomatapo opaye pogadesemde. <sup>10</sup> Epame oplami antapo biskapa imale hame sos dulu dla imsela:mama opa duka gladlepiye, epapele oplami dla humatlane. Epame ya:ta wa: yu podallalo wekelati matle ya:ye humatlane. Amasiyama ya:ta ala wa: yu podallalo me-imsela:lepiye, ya:ye alikili dla pomelene. <sup>11</sup> Ame adipalati, ya:ye



batalimale oplamipo. Epedeme ya:ta koko halomhalatapo ya: batalimaleye haliyamale dla ma-nati-ipo.

*Mosukulu namkale dle yu atlale*

<sup>12</sup> Na:tapo Atemas epapele o Tikikus epapeleye wa: dla tane dlowepo. Epame ya:tapo wa:ta hala dla tame woyamalati asiyama wa:tapo Nikopolis mo dla na:ye umula puane. Adipalati, na: solotama, tene oloma dla wa: mate edla yimkata ha:ha:lowedeme.

<sup>13</sup> Epame gamani aiyalma koko malastale oplami Sinasi mate epo ya:mkale Apolos mateye gadene. Epame yia:ta mo hale dla tlowedeme ha:ha:lati yia: watle yia:ta api duka dla tamama halopo tlowe alisisi ma-ala:leye halopine. <sup>14</sup> Epame ka:dena, mikadepe dle sotapo ka:ka:dle koko halomha:ha:lowe tlo malamha:ha:mama asiyama gade asiyama gade demha:ha:loweye. Adipalati, di opatapo mikadepe dle dulu dla ha:ha:mama isikimi ha:ha:lowe tlo poka:dena.

<sup>15</sup> Epedeme na: mate ha:ha:lalo so hapulomatapo wa: dla namkale dle yuye hamipo. Epapedeme Taites, ma wa:tapo dita namkale dle yu iye wa: mate ha:ha: mikadepe dle so dla atlane.

Godta bokotiyapo malamale kokotapo wua: mate alila hapuloma dulu dla hallepe.

## **Polota Palimon watle yu ilimale hamili**

### **Palimon**

### **Palimon buka ya: dulu koko**

Oplami Palimonye alisisi sikemte pasatale oplami halaiyo. Epapele tlope ya: mikadepe depo halemama Polo mate namkale depo halaiyo. Epapele dulu dla Onisimasye Palimon ya: oko oplami halemama asiyama pa:le dla oko hamhalaiyo. Epapele dulu dla Onisimastapo ya: dokopala oplami Palimon tle teletame Polo umpame ya: mate halaiyo. Epalati Polotapo imale koko tle Yesu dla mikadepe diyo. Epela natipame Polotapo Palimon watle yu ilimale iye hamiyo, ya:tapo ya: oko oplami Onisimasta ma ilame ya: hala dla tlati ya:tapo ya:ye siyele mate ma hamelepo depame.

<sup>1-2</sup> Na:ye Polopo, Yesu Keliso koko yilo amtuwale aya dulu dla hallalo oplamipo. Na:tapo di ei Timoti mate yu ilimale iye hamima. Ditapo diamkale dia: mate oko hatlo halalo oplami Palimon wa: dla epame mikadepe dle so wa: aya dulu dla inoma sumalalo so dla yu ilimale iye hamima. Epame yu ilimale hatlo iye di nana Apiya wa: mate epame ka:dle yu yilo kokalepo hallalo oplami Alkipus wa: mate dla ma hamima.

<sup>3</sup> Di A God mate Yesu Keliso mate yia:ta bokotiyapo malamale mate epame sadle koko mateta wua: mate hallepe.

*Palimonta bokotiyapo malamale koko mate epame mikadepe dle koko mate*

<sup>4</sup> Palimon, na:ta alila hapuloma inoma sumde dla wa: ta:demama God dla wa: yilo siyele yu atlemde. <sup>5</sup> Adipalati, na: me-dalemde, wa:ta Lod Yesu dla mikadepe dle kokoye. Epame wa:ta God ya: opa hapulomaye bokotiyapo malahala koko ma me-dalemde. <sup>6</sup> Na:ta inoma sumale yu haleye ipapena. Wa: mate epo dia: mate dita mikadepe dle kokotapo Godta wa: dla Keliso tle ka:ka:dle koko hapuloma halopimhalaye malastlepo depame. <sup>7</sup> Na: ei namkale, wa:tapo God ya: opaye bokotiyapo malamama yia: dla siyele hapimhala kokotapo na: dla itiyamale mate siyele pato mate hamima.

*Onisimasye wa: ei ikadepe some sane*

<sup>8</sup> Keliso dulu dla na:tapo wa: bapa some halapo. Epedeme na: dla itiyamale elapo, na:tapo wa:ye molo atloweye. <sup>9</sup> Amasiyama na:ta wa: bokotiyapo malamaleye pato elema. Epedeme na:ta wa: dla isikimi atlanatima. Adipalati, na:ye Polopo, Yesu Keliso yilo amtuwale aya dulu dla halemama mo-totoyemala halapo. <sup>10</sup> Na: Onisimas kokoye wa: dla dalla natima, wa:tapo ya:ye ma sadle mate selepo depame. Adipalati, na:tapo amtuwale aya dulu dla halemama ya:ye gademhaluwa, ya:tapo mikadepe dlepo depame. Epapedeme watapo na:ta ya: a some halema. <sup>11</sup> Ka:yapa Onisimastapo wa: oko halalo oplami haluwa oloma edla ya:tapo wa:ye woloma pogademdena. Amasiyama watapo ya:ta mikadepe depo halemama wa: mate na: mate gadlalo ka:dle oplami halapo.

<sup>12-13</sup> Onisimasye na:ta sikemte solotamale oplamipo. Epedeme na: solotama, ya:ye hema hamame hallowedeme. Adipalati, na:ta ka:dle yu yilo amtuwale aya dulu dla hallati ya:tapo wa:ta na: gadlowe okoye ma ya:ta hamhalemde. Epapele tlope na: ya:ye ma ilame wa: dla tane dema. <sup>14</sup> Adipalati, na:tapo wa:ye podallalo ya:ye hema seme halloweye poka:dena. <sup>15</sup> Pona:malamana, Onisimastapo alila yimka:mala wa: tle alikili dla tame haluwapo. Epapele tlope ma ya:tapo alila hapuloma dulu dla wa: mate hallowe sepena. <sup>16</sup> Epedeme wa:ta ya:ye ma semtlepiye, wa: matle ya:ye isikimi wa: isili tle halemama asiyama pa:le dla oko hamhala demiyo. Adipalati, ya: mape watapo Keliso dulu dla mikadepe dle oplami amko depo halapo. Epedeme na:ta ya:ye sikemte malamde. Epapedeme asiyama wa:tapo ya:ye Keliso dulu dla wa: ei ikadepe some sikemte malahallepe.

<sup>17</sup> Na:ye wa: amkale ikadepepo. Epedeme na:ta wa: hala dla pulati natipame wa:ta siyele yu na: dla atlowe epapele yu ma wa:tapo Onisimasta wa: hala dla pulati natipame atellepe. <sup>18</sup> Epele dulu dla Onisimastapo wa: dla batalimale koko hale ma hauwayo, epame ya:ta wa: dla alisisi hale asiyama ala pohamilalo halayo, e ma na: dla atlane. <sup>19</sup> Epalati na:ta ya:ta alisisi halomale asiyamaye wa: dla hamilowepo. Adipalati, na: Polopo. Na:tapo na: do ikadepe mate yu iye ilima. Amasiyama wa:malamana, wa:tapo Keliso dulu dla ka:dle pasakalo hamhallepo depame na:tapo oko pato hauwapo. Epapele tlope ma na:tapo wa: pasakalo yilo oko hauwa e ya: asiyamaye wa: dla po-otlowa. <sup>20</sup> Epapedeme na: ei namkale, wa: Lod yilo Onisimasye ma-sane, na:tapo Keliso dulu dla siyelepo depame. <sup>21</sup> Na: malama, wa:tapo na:ta atlama koko iye halomelepe depame. Epame na: ma malama, wa:tapo na:ta atlama koko iye ma halomama tla:mtelepe depame. Epammama yu ilimale iye hamima.

<sup>22</sup> Epame koko haleye ipo. Wua:tapo na:ta amtuwale aya tle alikili dla woyamelepo depame God dla inoma sumha:ha:mdepo. Epedeme Godta solotamelepiye, na: alikili dla woyapame ma wua: hala dla puluwepo. Epapedeme na:ta edla tame hallowe moye dinapene.

*Mosukulu namkale dle yu atlale*

<sup>23</sup> Na: mate Keliso yilo amtuwale aya dulu dla hallalo oplami hale Epaplas mape ya:ta namkale dle yuye wa: dla atlema. <sup>24</sup> Epame namkadulo opi na: mate yimkata oko halalo so Maka mate epo Alistakus mate epo Dimas mate epame Luk mate yia:ta namkale dle yu ma wa: dla hamima.

<sup>25</sup> Eso. Lod Yesu Kelisota bokotiyapo malamaleta wua: mate hallepe.

## Yu so dla yu ilimale hamili Hibulu Hibulu buka ya: dulu koko

Di podimalamana, Hibulu buka i ilimale oplamiye. Amasiyama yu ilimale iye Yu so mikadepe dle so dla ilipo hamiwapo. Epele dulu dla Yu so yia: hi haleye Hibulu so demdepo. Oloma edla Yu sotapo God ya: banakaka so mate epo Moses mate tlo patoto so demduwapo. Epapele tlope asiyama yu ilimale dulu hema atla kokota ma epo atlapo, hatlo Yesu tlo pato halapo. Adipalati, Yesutapo amko koko hampuwata takala koko Mosesta hampualeye tla:mtauwapo. Ame adipalati, takala koko dulu dla God ka: epo opa ka: duka dla ha:ha:lalo sotapo opa bobtalimale howahallowedeme alinepi omali mate ammduwapo. Amasiyama amko koko dulu dla Yesutapo God ka: epo opa ka: duka dla hallalo amko halapo. Adipalati, ya:tapo ya: omali mate opa hapuloma yia: bobtalimale howahallowe kokoye hampuwapo. Epapele koko tle takala koko dla ma itiyamale hale pe-elasema. Epedeme dita isikimi hatlo Yesu Kelisota di bobtalimale dla pomama ya: omalitapo di bobtalimale howahapo hamastauwa dla mikadepe dlepiye, eta dia:ye God mila:pi tle ullu pa:talo so dlepe. Epame buka itapo ka:yapa ha:ha:uwa mikadepe dle kokalalimale so opa yia: koko mape dia: dla imapo. Epapedeme ditapo yia: koko natipo dolumha:ha:mama wotiyalle koko dulu medla dita mikadepe dle mate kokalalipo ha:ha:lowepo.

### *God Yamitapo banakaka sota itiyamaleye tla:mtame halapo*

<sup>1</sup> Mo-powataliya Godtapo ya: yu molo atlamalalo so tle di mamadulo dla api meyelope meyelope dle tle molo atlamhalemduwapo. <sup>2</sup> Amasiyama wata mosukulu alila oloma hema ya:tapo ya: yuye Yami tle dia: dla yukamuwapo. Epedeme ya:tapo Yami tle alisisi hapulomaye mimita:pame Yamiye mo-sauwapo, ya:tapo alotle alisisi hapulomaye omhallepo depame. <sup>3</sup> Epedeme Yamitapo Godta hela:dle hamhalemama God mila:pi ikadepe himhalapo. Epame ya:tapo ya: yu itiyamale tle koko hapulomaye halopo hallalo halapo. Epedeme ya:tapo opa yia: bobtalimaleye howahalopo gudepame Pepele dimo dla hetame pato God dowala tiyama dla polapo. <sup>4</sup> Epapele dulu dla Yamitapo banakaka soye tla:mtame halapo. Epame Godtapo Yami watle hi hamiwatapo banakaka so dla hi halopiliye tla:mtame halapo. <sup>5</sup> Ame adipalati, Godta ya: banakaka oplami hale dla yu po-ipo atlana,

“Wa:ye na: Maseyemalapo,

watapo na:ye wa: A dlepo,” pe-epo atlana.

Epame Godtapo banakaka so hale dla ma yu hale po-ipo atlana,

“Na:tapo ya: A dlepe,

epalati ya:tapo na: Maseyemala dlepe,” pe-epo atlana.

<sup>6</sup> Epame matle Godtapo Yami hatloye ta:lamo dla seme maluwa oloma edla, ya:tapo epo atluwapo,

“God ya: banakaka so hapulomatapo hatlo Yami dla heodepame siyele hamilipe,” duwapo.

<sup>7</sup> Amasiyama Godtapo ya: banakaka so koko dla yu ipo atluwapo,

“Godtapo ya: banakaka soye ya: oko so depame mosisi some hallepo depame mimita:puwapo.

Epame dlapa teleka:le some hallepo depame mimita:puwapo.”

<sup>8</sup> Amasiyama ya:tapo ya: Maseyemala koko dla epo atluwapo,

“God, wa: mo kokotapo kokó elepo ellepe.

Epame wa:tapo ka:dle api tle wa: opaye woloma omhallepe.

<sup>9</sup> Epame wa: ka:dle koko tlo solotamama  
asiyama batalimale koko tlo alimhalemduwapo.

Epapele koko tle wa: Godtapo wa:ye ma-sepame  
wa: dla siyele hamiwapo.

Siyele wa: dla hamiwa etapo wa: amkadulo dla siyele hutiyeye tla:mtame halapo.”

<sup>10</sup> Epame Godtapo matle epo atluwapo,  
“Lod, wa:tapo kotiyamale sitali dla ta:lamoye wa:ta mita:puwapo.  
Epame pepele di ma wa: dota mimita:puwapo.

<sup>11</sup> Epapele tlope ta:lamo mate epo pepele di mate pa:lepe.  
Yia:tapo tluka takala some sosola:timelepe.

Amasiyama Lod, wa:ye kokó halepo hallepe.

<sup>12</sup> Epame Lod, wa:tapo ta:lamo mate pepele di mate tluka takala some popolopo  
hamastlepe.

Epalati yia:tapo ma mila:pi meyelo dlepe.

Amasiyama Lod, wa:ye pomeyelope desemde.

Epame wa:ye sukulu pa:le hallalopo.”

<sup>13</sup> Epapele dulu dla Godtapo banakaka oplami hale dla yu po-ipo atlana,

“Wa: na: dowala tiyama dla polane.

Wa: pollati na:tapo wa: wadle opahale demha:ha: soye wa: hete sitali isili dla  
hatitimolowepo,” pe-epo atlana.

<sup>14</sup> Amasiyama banakaka so hapulomaye isikimi God yu dla salladepo siyamalalo  
sokopo. Yia:ye Godtapo taiya duwapo, yia:tapo pasakalo gadle halowedeme ha:ha: soye  
gadlepo depame.

## 2

### *Pasakalo gadle halowe kokoye koko patopo*

<sup>1</sup> Epedeme dita ma-daluwa ikadepe kokoye woloma kikitilata hamame ha:ha:lowe  
ka:pi, ditapo ikadepe api tle ma alikili dla hahala:po tlala depame. <sup>2</sup> Epedeme banakaka  
sota di mamadulo dla hapili aiyalma hatitimaleye ikadepepo. Epapele dulu dla opa ana-  
wolotapo yu edla allimama podolumalalo wekele soye, Godta yia: bobtalimale asiyama  
hapimduwapo. <sup>3</sup> Epedeme di koko itlo ikadepe demama asiyama Lod meyelo ya: tatile  
pasakalo gadle koko botomastaleye koko pa:le dlepiye, di adipo Godta kasilamale dulu  
tle alikili a:ma woyapa:? Epapedeme Yesu yu dalle sotapo pasakalo gadle koko iye  
ikadepe demama ma di wadle atlamuwapo. <sup>4</sup> Epalati ditapo yia:ta atlamsiyamale yu dla  
mikadepe dlepo depame Godtapo di wadle ulugiyemale koko patoto nalati-imduwapo.  
Epame ya:ta sesalemale so dla Hela:dle Sokoye hapimduwapo.

### *Yesuta dia:ye pasakalo gadlowe dla elemtlalo halapo*

<sup>5</sup> Epedeme dimalamana, Godtapo ta:lamo amko mita:plepiye, ya: banakaka sota  
omha:ha:lepo depame itiyamale pohamilowa. <sup>6</sup> Adipalati, God yu bukata epo atlapo,  
“God, wa: adipalati opaye sikemte malamdi?

Epame wa: adipalati opaye woloma sikemte omhalemndi?

<sup>7</sup> Wa:tapo yia:ye alila kiyele dulu dla banakaka so isili tle ha:ha:iya, duwapo.

Epame wa:tapo yia:ye ma hohopo ta:depame hela:dle mate epo itiyamale mate dla  
ipila:uwapo.

<sup>8</sup> Epame wa:tapo yia: wadle koko hapuloma omha:ha:lepo depame itiyamale hami-  
wapo.”

Epedeme Godta koko hapulomaye opata itiyamale isili tle hatitimama koko haleye  
popomelena. Epapele dulu dla wata oloma hema di ala opata koko hapuloma  
omha:ha:lati ponatisema. <sup>9</sup> Amasiyama di Yesu tlo natipo. Adipalati, ya:ye Godtapo alila  
kiyele dulu dla banakaka so isili tle halane duwapo. Epapeleye watapo Godtapo ya:ye



hamame ta:depame hela:dle mate itiyamale mate dla pamoluwapo. Adipalati, ya:tapo Godta bokotiyapo malamale tle wotiyalle hapame opa hapuloma yilo pouwapo.

<sup>10</sup> Epapedeme Godtapo koko hapuloma mimita:pame ma ya:ole duwapo. Epame ya:tapo ya: opaye hela:dle dla elempuluwedeme solotamuwapo, Yesutapo wotiyalle hapame polati ya:ye ala:na dlowedeme. Adipalati, Yesutapo opaye pasakalo gadlowe dla elemtlalo oplami halapo. <sup>11</sup> Epedeme Yesu mate epo ya:ta God dla elemtlalo so mate A hatlopepo. Epapele koko tle ya:tapo yia: watle atlemama, “wua:ye na: eidulo mate epo notimadulo matepo,” dloweye powota:semde. <sup>12</sup> Epammama Yesuta God watle epo atluwapo,

“Na:tapo wa: hiye na: eidulo dla epo notimadulo dla bobotimatimolowepo.

Epame wa: opa hapuloma alumale dulu dla na:tapo wa: hi di ikadepe dla ta:dlowepo.”

<sup>13</sup> Epame ya:tapo matle epo atluwapo,

“Na: mikadepe dema, Godta na: pasakaloye omhallepo depame,” duwapo.

Epame ya:tapo mamisika: epo atluwapo,

“Na:ye ipo. Na:tapo Godta na: watle hapili yimlala mate halapo,” duwapo.

<sup>14</sup> Epedeme God ya: yimlalatapo opa moto halopo ha:ha:po. Epapele koko tle Yesu ya: mape oplami ikadepe moto hauwapo, ya:tapo ya:ta powale koko tle polowe dokopala oplami Saitenta itiyamaleye yumuluwedeme. <sup>15</sup> Epame palliwe wowota:le kokota dea some popoliyepo ha:ha:le soye eleme alikili a:ma woyamolowedeme. <sup>16</sup> Epedeme wua: natiya, Yesuta puwaye, ya: banakaka so gadlowedeme popuana. Amasiyama ya: isikimi A:iblaham ya: mamadulo tlo gadlowedeme puwapo. <sup>17</sup> Epapedeme ya:tapo puame koko hapuloma dulu dla dia: some haluwapo. Epammama ya:tapo dia: bokotiyapo malamama God ka: epo di ka: duka dla hallalo halapo. Epapele koko tle ya:tapo Godta kasilamale pustamama opa hapuloma batalimale yilo pouwapo. <sup>18</sup> Epedeme Yesuta elemala natili koko mate epo wotiyalle koko mate dulu metle tademe, ya: ala:na, dita elemala natili dulu dla ha:ha:lali di gadloweye.

### 3

#### *Yesuta Moses tla:mtame hala koko*

<sup>1</sup> Epedeme mikadepe dle so namkadulo, Godtapo wua:ye ya: opa depame ma-sisilamuwapo. Epapedeme wua: Yesu kokoye malamaiya. Godtapo Yesuye di watle ma-tane duwapo, ya:tapo di mikadepe dle so alumale dokopala oplami hallepo depame.

<sup>2</sup> Epapele dulu dla Mosestapo God ya: opa gademama God yu dla hutullupo sela:uwaye, epammama Yesutapo ya: tane dle God yu dla hutullupo sela:uwapo. <sup>3</sup> Epedeme wua: natiya, opatapo oplami haleta aya ka:pi hamhalla natipame ya: watle atlemama, aya ka:pi halalo oplami, depame ya: hiye di dla hamhetamdiye, epammama Godtapo Yesu tlo di ikadepe dla hamhetamama asiyama Moses tlo woya isili tiyama dla hamtuluwapo.

<sup>4</sup> Epapele dulu dla aya hapulomaye yo halalo so me-ha:ha:po. Amasiyama Godtapo koko hapuloma dinapolalo halapo.

<sup>5</sup> Epedeme Mosestapo God ya: opa yilo salladle oko ka:pi hauwapo. Ya: oko etapo Godta alotle ya: opa dla bobotimatimolowe kokoye imuwapo. <sup>6</sup> Amasiyama God Yami Kelisotapo God ya: opaye dokopala depo halemama oko ka:pi hamhalapo. Epedeme di-tapo mikadepe dle dulu dla me-kokalepo ha:ha:mama dita dalemha:ha:mama omha:ha: kokoye pomellalo wekelepiye, eta dia:ye ikadepe God ya: opa dlepe.

#### *Pomikadepe dle koko dla molo atlale*

<sup>7-8</sup> Epapedeme Hela:dle Sokotapo epo atlapo,

“Watapo wua: God yu dalepame wua: dupa kokalalimiya.

Adipalati, wua: mamadulotapo dalupa dulu dla siyamama epo dupa kokalimduwa koko tle God dla allimduwapo.

<sup>9</sup> Epedeme wua: mamadulotapo 40 sokomoko dalupa dulu dla siyamama na:ta yia: watle koko patoto halomduwaye me-natimduwapo.

Epapele tlope yia: na: yu dallowe allimama na: dla siyaladle hapimduwapo.

<sup>10</sup> Epapedeme na:tapo yia: mate sikemte siyalademama epo atluwapo, 'Yia:ye na: tle alikili a:ma tamalapo.

Epame yia: na: kokoye pomalamasema,' duwapo.

<sup>11</sup> Epapele koko tle na:tapo siyaladle mate yu ipo itiyapo himiwapo, 'Yia:tapo na:ta hedlowe mo dinapele dla po-u-ulapo tuluwa.' "

<sup>12</sup> Epedeme mikadepe dle so namkadulo, wua: wolomape. Batalimale malamale mate epo malamale tatlamale mateta wua:ye pasakalo halemhala God tle alikili dla elemta demiya. <sup>13</sup> Amasiyama batalimale kokotapo wua: dupa kokalalimalala depame wua: alila hapuloma dulu dla yimkadulo gadle yu mate asiyama gade asiyama gade demha:ha:iya. <sup>14</sup> Epapele dulu dla dita ka:yapa mikadepe depame itiyamale mate ha:ha:uwa me-emte mosukulu dla tame gudlepiye, eta dia:ye Keliso mate hatlope depo ha:ha:mama apelepe. <sup>15</sup> Epapele koko tle God yu bukata epo atlapo, "Watapo wua: God yu dalepame wua: dupa kokalalimiya.

Adipalati, wua: mamadulota epo dupa kokalalimduwa koko tle God dla allimduwapo."

<sup>16</sup> Epedeme dulu hema opa anawolotapo God yu dalla allimduwa? Eye Isalael so Mosesta Isip mo tle alikili dla eleme woyamale sota ammduwapo. <sup>17</sup> Epame 40 sokomoko dulu dla Godtapo opa anawolo dla siyaladle pato himhaluwa? Eye Isalael so batalimale koko halopame dalupa dulu dla palimpuwa sopo. <sup>18</sup> Epame Godta ma opa anawolo watle yu itiyapo himimama, "Wua: na:ta hedlowe mo dinapele dla po-u-ulapo tuluwa," duwa? Eye ya: yu dla posalladlalo siyamale Isalael so dla atlemama apuwapo. <sup>19</sup> Epedeme di natipo, yia:ta mikadepe dle pa:le koko tle yia:ta Godta hedlowe mo dinapele dla po-u-ulapo tuwana.

## 4

### *God ya: opata hedle halowe koko*

<sup>1</sup> Epedeme Godtapo yu itiyapo himimama ya: opatapo ya:ta hedlowe mo dinapele dla u-ulapo tulupo depo yu himiwata ala me-kokalepo elapo. Epapedeme wolomape, wua: dulu dla oplami haleta po-ulatulalo wekelala. <sup>2</sup> Adipalati, ka:dle yu dita daluwa eye, Mosesta ka:yapa Isip mo tle alikili dla eleme woyamale so mape ka:dle yu eye madaluwapo. Amasiyama yu etapo yia:ye pogadena. Adipalati, yia: yu edla pomikadepe demdena. <sup>3</sup> Epapele dulu dla ditapo ya: yu dla mikadepe dlepiye, ditapo Godta hedlowe mo dinapele dla u-ulapo tulupe. Amasiyama pomikadepe dlalo wekele so dla Godta epo atluwapo,

"Na:tapo siyaladle mate yu ipo itiyapo himiwapo,

'Yia:tapo na:ta hedlowe mo dinapele dla po-u-ulapo tuluwa,' " duwapo.

Epapele tlope ka:yapa ta:lamo mita:ple oloma edla Godtapo ya: oko hapuloma mogudepame hedepo poluwapo. <sup>4</sup> Adipalati, God yu bukata epo atlapo, "Godtapo alila 6 dulu dla oko hamtepo gudepame ma alila 7 dla hedepo poluwapo." <sup>5</sup> Epame Godta yu hatlo iye mamisika: atlemama epo atlapo, "Yia:tapo na:ta hedlowe mo dinapele dla po-u-ulapo tuluwa," depo.

<sup>6</sup> Epedeme hedlowe koko etapo ala me-elapo, opatapo dulu edla u-ulapo tulupo depame. Amasiyama ka:yapa ha:ha:uwa sotapo yia:ta ka:dle yu dalepame posalladlalo wekele koko tle hedlowe mo dinapele edla po-u-ulapo tuwana. <sup>7</sup> Epedeme Godtapo dita u-ulapo tulupo depame ma alila hale himiwapo. Alila eye wata ipō. Adipalati, ma alotle Godtapo Deibidi tle dita mo-malamale yu hema mamisika: epo atluwapo,

“Watapo wua: God yu dalepame wua: dupa kokalalimiya,” duwapo.

<sup>8</sup> Epapedeme Yosuwatapo opa eleme hedlowe mo dla tamatiye, eta Godta ma alotle ya: opata hedlowe alila hale halowe koko dla po-atlalo wekelemla. <sup>9</sup> Epedeme dimalmana, itapu dla God ya: opata hedle ka:dle halowe alilata me-omelapo. <sup>10</sup> Epapedeme Godtapo ta:lamo patoye mita:po gudepame ma hedepo poluwaye, epammama alila oloma edla God ya: opatapo yia: oko tle epo hedepo popa:lepe. <sup>11</sup> Epedeme di ka:dena, Godta hedlowe mo dinapele edla u-ulapo tuluwedeme itiyamoloweye. Adipalati, opa anawolotapo Isalael sota apele epammama God yu dla posalladlalo ha:ha:lepiye, yia: mo dulu edla po-u-ulapo tuluwa.

<sup>12</sup> Epedeme God yuye pasakalo halemhalemama itiyamale mate oko hamhalapo. Epame aipa:ya ko mate a:pe walle some halapo. Amasiyama ya:ta haka:lleta aipa:ya haka:lle hapulomaye tla:mtame halapo. Epame God yu eta aipa:ya some di opasi dulu dla tumama soko mate epo malamale mate hutiyeye duka glademdepo. Epammama yu etapo dita solotamale koko mate epo di dupa malamale mate dla koko glademhalapo.

<sup>13</sup> Epapele dulu dla koko hapulomatapo God tle hemele pohatiyomeleme elasema. Amasiyama koko hapulomatapo ya: inoma dali dla hutiyepo. Epedeme God hatlo hema ditapo diskamu di koko hapulomaye bobotimatimelepe.

*Yesuye God ka: epo opa ka: duka dla hallalo oplamipo*

<sup>14</sup> Epedeme dia: dla God ka: epo di ka: duka dla hallalo ka:dle oplami me-halapo. Ya:tapo Pepele dimo dla hetauwapo. Eye God Yami Yesupo. Epapedeme di ka:dena, dita mikadepe depo tamala koko itlo woloma kikitilata hamoloweye. <sup>15</sup> Epapele dulu dla dita elemala natili koko tle alikili dla potlowe po-ala:lalo ha:ha:la natipame di polowamama di gademhalloweye, hatlo Yesu tlo ala:na. Adipalati, elemala natili kokota dia: dla pumdiye, epammama Yesutapo ta:lamo hema halemama elemala natili koko hapulomata ya: dla ma me-pumduwapo. Amasiyama dulu edla ya: batalimale koko hale pohana. <sup>16</sup> Epapedeme dita gadle halowe solotamelepiye, eta di ka:dena, wowota:le pa:po Yesu hala dla puluwaye, ya:ta di gadlepo depame. Dita epapelepiye, eta di edla Godta bokotiyapo malamale mate epo polowamale mate halomelepe.

## 5

<sup>1</sup> Epedeme aiyalma aya dokopala oplami hallowedeme Yu so opa dulu tle hale hulumdepo, ya:tapo God ka: epo opa ka: duka dla halemama opa yilo oko hamhallepo depame. Epame oplami etapo opa hapuloma batalimale howahalomelepo depame God dla aliya poyupo namkale dle alisisi halopimhallepe. <sup>2</sup> Epapedeme aiyalma aya dokopala oplami iye yeitamale so mate epo batalimale so mateta batalimale dulu dla tulume ha:ha:lali polowamale mate yia: gademdepo. Adipalati, ya: mape isikimi ta:lamo oplamipo. <sup>3</sup> Epapele koko tle ya:tapo opa hapuloma yia: bobtalimale mate epo me-ya: batalimale mate howahalomolowedeme God dla aliya poyupo namkale dle alisisi halopimdepo.

<sup>4</sup> Epedeme oplamitapo God ka: epo opa ka: duka dla hallowe hi meyelo pohalowa. Adipalati, Godtapo ka:yapa A:lon hulumuwaye, epammama ya:tapo isikimi ya:ta solotamale tle God ka: epo opa ka: duka dla ha:ha:lalo soye hulumhalapo. <sup>5</sup> Epapedeme Kelisotapo ya:skamu di dla hamhetamama God ka: epo opa ka: duka dla hallowe hi pohana. Amasiyama Godtapo ya:ye sepame ya: watle epo atluwapo,

“Wa:ye na: maseyemalapo,  
watapo na:ye wa: A dlepo,” duwapo.

<sup>6</sup> Epame Godtapo ma epo atluwapo,

“Wa:tapo Melkisedek some God ka: epo opa ka: duka dla hallalo halemama kokó hallepe,” duwapo.

<sup>7</sup> Epedeme Yesuta ta:lamo hema haluwa oloma edla God dla otele yu himimama kaiyo mate inoma sumhalemduwapo. Epapele dulu dla Godta ya:ta hutulli natipame ya:ta inoma sumale yuye me-dalemduwapo. Adipalati, God dla itiyamale me-eluwapo, ya:ye powale tle gadloweye. <sup>8</sup> Epapedeme Yesuye God Yami tlope, ya: ya:ta wotiyalle hauwa koko tle ya:ta salladepo tauwa kokoye me-malamuwapo. <sup>9</sup> Epapele koko tle ya:tapo ya: yu dla salladepo siyamalalo so dla kokó elepo ellalo pasakalo sitali halapo. Adipalati, ya:ta wotiyalle halë koko tle Godtapo ya:ye ala:na duwapo. <sup>10</sup> Epame ya:ye opa ka: epo God ka: duka dla hallalo oplami Melkisedekta halale some hallepo depame sawapo.

*Mikadepe dle dulu dla mo-opa depo ha:ha:lowe*

<sup>11</sup> Epedeme koko hema dita yu atlamolowe pasatale ala me-hutiyepo. Amasiyama dita yu i ya: dulu koko wua: watle woloma atlamoloweye pta kokalena. Adipalati, wua:ta koko i malamoloweye pta dekelena. <sup>12</sup> Wua:ye mo-powataliya mikadepe dle dulu dla me-ha:ha:uwapo. Epapedeme wua: ka:dena, ma wua:tapo opa opi watle God yu imoloweye. Amasiyama epapele tlope wua: Keliso dulu dla ala amkoteta:le so some ha:ha:mama ma oplami haleta wua:ye God koko woloma imelepo depame solotamha:ha:po. Epedeme wua: owayimlala some ala meme tlo dlomha:ha:mama daya kokalle podlomha:ha:sema. <sup>13</sup> Adipalati, oplami ala meme tlo me-demhallalo oplamiye, ya:ta mikadepe dle dulu dla ala pokokalepo halasema. Epame ya: ala ka:dle koko mate epo batalimale koko mate woloma pomalanatimhalasema. <sup>14</sup> Amasiyama mikadepe dle dulu dla mo-opa depo ha:ha: sotapo daya kokalle ipapele dloweye ala:na. Adipalati, ya:ta sikemte atotomala natili koko tle ya: ma-ya:malamana, batalimale koko mate epo ka:dle koko mate malanatiloweye.

## 6

<sup>1-2</sup> Di mikadepe dle so amko dla ipapele koko imdepo. Eye polowe dla elemtlalo batalimale koko tle malamale meyelope depame God dla mikadepe dlowe koko mate, epame yú tulluwe koko mate, epame dota dokopala dla hohopo inoma sumolowe koko mate, epame palli tle ma silliwe koko mate, epame kokó ellalo koko gladle koko mate. Amasiyama dia: mikadepe dle dulu dla ala amkoteta:le so epapele some pohaha:sema. Epedeme di ka:dena, dita mikadepe dle dulu dla ma a:ma tamalemama mikadepe dle dulu dla mo-opa depo ha:ha: so epapele some ha:ha:loweye. <sup>3</sup> Epedeme Godta ka:dena dlepiye, di epapolowepo.

*Opata mikadepe dle tle alikili a:ma tlala depame molo atlale*

<sup>4</sup> Epapele dulu dla di mikadepe dle dulu tle ma alikili dla potale soye ma adipo hohopa:, ya:ta ma malamale meyelope depo God dla heheletimelepo depame? Adipalati, ya:ye Godta hela:dle kokoye mo-malapame Pepele dimo koko ma ma-dla natiwapo. Epame Hela:dle Soko ma ma-hamuwapo. <sup>5</sup> Epame ya:ye God yu ka:dle ma ma-hauwapo. Epame Godta alotle ta:lamo amko mita:plowe oloma edla ya:ta itiyamaleta puluwe koko ma mo-malamuwapo. <sup>6</sup> Epapele tlope ya:ye ya:ta mikadepe dleye melepame ma alikili dla potauwapo. Epedeme ipapele soye ma malamale meyelope depo God hala dla elempuluweye pta kokalena. Adipalati, ya:tapo God Yamiye mamisika: dali di dla gogodemha:ha:mama opa inoma dali dla ya: dla wota:le hapimha:ha:po.

<sup>7</sup> Epele dulu dla opa opiye ta:la ka:pi epapele some ha:ha:po. Tiyota ta:la dla hellati dlowe alisisita ka:pi matapame dlomoko milimalati yo emalalo oplamita hauwalemdiye, epapele some ha:ha:po. Epapedeme Godye epapele ta:la dla sikemte siyemhalapo. <sup>8</sup> Amasiyama opa opiye ta:la batalimale epapele some ha:ha:po. Ta:la edla osamokolo batalimale siyapota matapame Godta kasilamale isili dla tula yakomhalapo. Epalati Godtapo ta:la eye mosukulu alila dla dlapata misteli demhalapo.

<sup>9</sup> Mikadepe dle so namkadulo, na: mikadepe dema, na:ta yu ipo atlamale dulu dla na: wua: koko po-atlamasema. Adipalati, na:malamana, wua:ye God tle pasakalo

gadle halowe so opata koko halomalalo epapele some halomha:ha:po. <sup>10</sup> Adipalati, wua:ta God yilo oko sikemte halomha:ha:uwaye, ya: e powelimhalasema. Epame wua:ta ya:ye sikemte malamama mikadepe dle soye woloma gagademha:ha:uwaye, ya: e ma powelisema. Epedeme wua:ta yia:ye ala me-gagademha:ha:ye ya: me-malahalapo. <sup>11</sup> Epapele dulu dla di sikemte solotama, wua:ta yimkadulo sikemte malamha:ha:ye duka dla gudemiya. Adipalati, eta wua:ta Godta pasakalo gadlowe dla dalemha:ha:mama itiyamale mate mosukulu dla tame gudlepe. <sup>12</sup> Epedeme wua:ta ipapelepiye, eta wua:ta mikadepe dle dulu dla hohopeyalimale mate poha:ha:lowa. Amasiyama wua: mikadepe dle tle God dla pasakalo halowedeme dalemha:ha:mama omha:ha: sota koko halomha:ha: natipame dolumaiya.

### *Godta yu itiyapo himili dla mikadepe dlowe ka:pi*

<sup>13</sup> Oplami haletapo Godye potla:mtame halasema. Epedeme Godtapo me-ya: hi mate aiyalma sepame A:iblaham mate yu itiyapo himimama epo atluwapo,

<sup>14</sup> “Na:tapo wa: gademama wa: mamadulo pasataleye hapilowepo,” duwapo.

<sup>15</sup> Epalati A:iblahamtapo sadle mate Godta yu itiyapo himili dla omhaluwapo. Epame ya:ta epo omhalepo gudlati Godtapo ya: watle hamili depo yu himili kokoye ya: watle hamiwapo.

<sup>16</sup> Epedeme opatapo aiyalma solowedeme apelepiye, yia:ye yia: tla:mtame hala oplami hi sepame aiyalma semdepo. Epame yia:ta aiyalma ipo semdetapo yia:ta yu itiyapo himili kokoye kokalemdepo. Epalati opata koko e natimama yu poballowa.

<sup>17-18</sup> Epammama Godtapo ya: opa gadlowedeme yu itiyapo himiwapo. Epedeme opatapo ya:ta atlama koko dla mikadepe dlepo depame ya:tapo itiyamale mate aiyalma ma ma-sauwapo. Epapedeme Godtapo di watle ya: yu itiyapo himili koko mate epo aiyalma solowe koko mate hapiwapo. Koko dapiyamte iye ma meyelope dloweye po-ala:na. Adipalati, Godye isikimi pomala-atlasemde. Epapedeme dia: dla wota:le pe-elasema. Epame ditapo Godta dia: dla pasakalo hamilowe dla omha:ha:mama gadle yilo God hala dla ullumpumuluwapo.

<sup>19</sup> Epedeme Godtapo di watle pasakalo hamilowe koko itapo di pasakalo dla koata halemyelala depame deata dali dla himomelemhalemkiye, epapele some halapo. Epapeleye dea eye pta sikemte sesemomama kestloweye po-ala:na. Epame dea eye Pepele dimo aiyalma aya dulu dla tlukata komale seme tle tuwame himomelemhalapo.

<sup>20</sup> Mo iye Yesutapo ya: tatile itapu mo-ulatuwapo, dia: gadlowedeme. Adipalati, ya:ye Melkisedek some halemama God ka: epo di ka: duka dla kokó halepo hallalo halapo.

## 7

### *Melkisedek koko*

<sup>1</sup> Oplami Melkisedek iye Salem mo pato dokopala oplami haluwapo. Epame ya:tapo di ikadepe dla hallalo God ka: epo opa ka: duka dla hallalo haluwapo. Epedeme A:iblahamtapo opahale dla tame dokopala so opa poyupo pumhallati Melkisedektapo ya:ye api duka dla umpame Godta siyele kokoye ma ya: dla hamiwapo. <sup>2</sup> Epalati asiyama A:iblahamtapo ya:ta opahale dla tepo pumama alisisi halopo pualeye alumale 10 dulu dla kolumtapame kolumale hatlope tlo Melkisedek watle hamiwapo. Melkisedek hi ya: dulu kokoye ka:depo hallowe dokopala oplami. Epame Salem hi ya: dulu kokoye sadle. Epapedeme ya:tapo sadle dokopala oplami haluwapo. <sup>3</sup> Oplami Melkisedek iye ya: a pa:na epo ya: wai pa:na. Epame ya: toto ma hawa, epo ya: hamale alila ma hawa, epame ya:ta polowe alila ma hawa. Epapedeme ya:tapo God ka: epo opa ka: duka dla hallalo halemama kokó hallalo halapo. Epedeme ya:ye God Yami sepele some halapo.

<sup>4</sup> Epedeme oplami Melkisedektapo dokopala oplami pato haluwaye, wua: eye woloma sikemte malamaiya. Adipalati, Isalael so opa hapuloma yia: mama A:iblahamtapo ya:ye malanatipame ya:ta opahale depo pumama halopo puale alisisiye alumale 10 dla



kokolumtapame alumale hatlope tlo Melkisedek watle hamiwapo. <sup>5</sup> Mosesta aiyalma hatitimale dolumama Libai elele dulu dla opa anawolotapo God ka: epo opa ka: duka dla ha:ha:lalo ha:ha:ma:, isikimi ewolotapo yia: opa ikadepe Isalael so tle alisisi kokolumale 10 dulu dla kolumale hatlo tlo halomduwapo. <sup>6-7</sup> Amasiyama Melkisedek iye po-Libai elele halë oplami. Epapele tlope ya:tapo A:iblaham tle alisisi kokolumale 10 dulu dla kolumale hatlo tlo hauwapo. Epame wua: ma natiya, dokopala oplamitapo ya: isili dla hallalo oplami watle Godta siyele koko hamilowe tlo ala:na. Epedeme Melkisedektapo A:iblaham watle Godta siyele kokoye hamiwapo. Amasiyama A:iblahamye God tle yu itiyapo hatitimale halomale oplamipo.

<sup>8</sup> Amasiyama koko haleye ipo elema. Yu so dulu dla alisisi 10 kokolumale dulu dla hatlo tlo halomalalo so opaye palilalo sopo. Amasiyama A:iblaham tle alisisi kolumale 10 dulu dla hatlo halë oplami Melkisedek iye popolalo wekelalo oplamipo. Adipalati, God yu bukata atlemama, ya:ye popolalo, kokó mepo hallalo oplami demdepo. <sup>9-10</sup> Epele dulu dla Libai elele halë sotapo alisisi 10 kokolumale dulu dla kolumale hatlo tlo halomalalo ha:ha:uwapo. Amasiyama A:iblahamta api duka dla Melkisedek umpame ya: watle alisisi hamiwa oloma edla Libaiye ala pahalana. Epapele tlope ya: mape ya: mama A:iblaham tle ya: alisisiye Melkisedek watle ma-hapiwapo. Adipalati, ya:ye ya: mama A:iblaham omali ipipo.

<sup>11</sup> Mosesta aiyalma hatitimaleta epo atlapo, “Opa ka: epo God ka: duka dla ha:ha:lalo so hapulomaye isikimi Libai elele tle ha:ha:lepe,” depo. Amasiyama Libai elele so ewolotapo opa pasakalo gadloweye po-ala:na. Epapedeme Godtapo opa ka: epo God ka: duka dla hallalo oplami amko, Melkisedek epapeleye ma-hamuwapo. Amasiyama ya:tapo oplami amko iye Libai mate epo A:lon mate yia: elele tle pohamana. <sup>12</sup> Epedeme God ka: epo opa ka: duka dla hallalo oplamiye ma elele hale tle hamelepiye, ka:dena, Mosesta aiyalma hatitimale ma meyeloype dloweye. <sup>13</sup> Epedeme dita atla oplami iye di Lodpo. Amasiyama ya: elele sotapo opa ka: epo God ka: duka dla poha:ha:mdena. <sup>14</sup> Adipalati, dimalamana, di Lodye Yuda elele halë oplamipo. Amasiyama epapele tlope Mosestapo God ka: epo opa ka: duka dla halloweye Yuda elele tle populupe demdena.

### *Kelisoye Melkisedek sepele oplamipo*

<sup>15</sup> Epapedeme di watapo Godta adipalati ya: ka: epo opa ka: duka dla hallalo oplami amko Melkisedek sepele hamale kokoye malamapo. <sup>16</sup> Yesutapo opa ka: epo God ka: duka dla hallalo oplami amko halapo. Ya:ta mo edla halaye Libai elele hi halë tle pahalasema. Amasiyama ya: pasakalotapo sukulu pa:le hallowe itiyamale tle ya:tapo hi eye hapo halapo. <sup>17</sup> Adipalati, God yu bukata ya: koko dla epo atlapo, “Wa:tapo Melkisedek some God ka: epo opa ka: duka dla hallalo halemama kokó hallepe,” depo.

<sup>18-19</sup> Epedeme Godtapo aiyalma takala ma alikili dla himiwapo. Adipalati, aiyalma edla itiyamale ma-hawa haluwapo, epame opa pasakalo ma pogademdena. Epela natipame koko amko ka:pitapo ya: moye ma-hauwapo, ditapo amko koko ka:pi etle God mateka:pi dla pulupo depame.

<sup>20</sup> Epedeme Godtapo Yesuta opa ka: epo God ka: duka dla hallepo depame yu itiyapo me-himiwapo. Amasiyama ya:tapo ka:yapa Libai elele tle ha:ha:mpuwa opa dla yu itiyapo himili ipapeleye po-atlana. <sup>21</sup> Amasiyama ma ya:tapo yu itiyapo himimama Yesu dla epo atluwapo, “Wa:tapo God ka: epo opa ka: duka dla hallalo halemama kokó hallepe. Lodtapo yu iye itiyapo me-himiwapo.

Epapedeme ya: matle ya:ta yu itiyapo himili amko iye pomeyeloype dlowa.”

<sup>22</sup> Epedeme koko amko dulu dla Yesuta God ya: ulu halapo. Epapele koko tle amko kokotapo takala kokoye ma-tla:mtauwapo. <sup>23</sup> Epapedeme takala koko dulu dla God ka: epo opa ka: duka dla ha:ha:lalo so hapulomatapo mo-palimpuwapo. <sup>24</sup> Amasiyama

amko koko dulu dla Yesutapo God ka: epo opa ka: duka dla hallalo halemama kokó hallepe. Adipalati, ya:ye popolowa. <sup>25</sup> Epapedeme ya: dla itiyamale elapo, ya:tapo opa eleme God hala dla ta so yia: pasakalo gadloweye. Adipalati, ya:tapo kokó halemama ya: opa yilo God hala dla otele himhalapo.

<sup>26</sup> Epedeme hatlo Yesuta God ka: epo di ka: duka hallalo hallowe tlo ala:na. Adipalati, ya:ye pta aiyalma depo hallalopo. Epo ya:ye batalimale pa:le halemama ullu pa:po hallalopo. Epame Godtapo ya:ye batalimale so dulu tle hampame Pepele dimo ikadepe dla pamoluwapo. <sup>27</sup> Yesuye ka:yapa ha:ha:uwa God ka: epo opa ka: duka dla ha:ha:lalo so epapele some pohalasema. Adipalati, yia:tapo alila hapuloma dulu dla me-yia: bobtalimale mate epo opa hapuloma yia: bobtalimale mate howahalomolowedeme God dla aliya poyupo hapimduwapo. Amasiyama Yesutapo opa hapuloma yia: bobtalimaleye alila hatlo dla howahapo hamastlowedeme ya:skamu ya: motoye polowe dla himiwapo. <sup>28</sup> Epele dulu dla Mosesta aiyalma hatitimale kokotapo God ka: epo opa ka: duka dla ha:ha:lowe so hohomduwaye isikimi ta:la so opa hohomduwapo. Amasiyama Mosesta aiyalma hatitimale alotle Godtapo yu itiyapo himili amko tle Yamiye sauwapo, ya:tapo God ka: epo opa ka: duka dla hallalo hallepo depame. Adipalati, Godta ya:ye kokó hallalo ka:dle oplami duwapo.

## 8

### *Yesuye God ka: epo di ka: duka dla hallalo ka:dle oplamipo*

<sup>1</sup> Epedeme dita atlama koko hapuloma dulu dla koko patoye ipo elema. Di ka: epo God ka: duka dla hallalo oplamiye Pepele dimo dla hetame pato God dowala tiyama dla polapo. <sup>2</sup> Epame ya:tapo Pepele dimo aiyalma aya dulu dla oko hamhalapo. Aiyalma aya iye isikimi opata yia: do mate pohana. Amasiyama Godtapo meyelo hauwapo.

<sup>3</sup> Epedeme ka:yapa Mosesta aiyalma koko dolumama God ka: epo opa ka: duka dla ha:ha:uwa sotapo God dla namkale dle alisisi mate epo alinepi mate poyupo halopimduwapo. Epapedeme ka:dena, di ka: epo God ka: duka dla hallalo oplami amko mape God dla namkale dle alisisi hamiloweye. <sup>4</sup> Epele dulu dla wua: natiya. Yesutapo ta:lamo hema halematiye, ya:ye God ka: epo opa ka: duka dla hallalo oplami pohalema. Adipalati, God ka: epo opa ka: duka dla ha:ha:lalo soye ma-ha:ha:po. Epame yia:tapo Mosesta aiyalma hatitimale dolumama God dla namkale dle alisisi halopimha:ha:po.

<sup>5</sup> Amasiyama yia:ta oko halomduwa aiyalma aya eye isikimi Pepele dimo dla aiyalma aya ikadepeta pola e ya:nasamapo. Adipalati, Godtapo Moses watle tlukata halë aiyalma aya e halepo depame epo atluwapo, “Wa: na:ta tamali di dla nati-iwa nasama edla dolumama aiyalma ayaye woloma ka:pi halepe,” duwapo. <sup>6</sup> Epapele koko tle wua: natiya. Godtapo Yesu dla opa ka: epo God ka: duka dla hallalo oko hamiwatapo ka:yapa oko e halompuwa opaye mo-tla:mtame halapo. Epame Yesutapo God tle amko koko hampuwatapo Mosesta takala koko hampuwaye mo-tla:mtame halapo. Adipalati, amko kokotapo Godta yu itiyapo himili ka:dle tama di dla elapo.

<sup>7</sup> Epapedeme Mosesta hampuwa takala koko eta woloma ka:depo elematiye, eta Godta matle koko hale amko pohimma. <sup>8</sup> Amasiyama God meyelo Mosesta hampuwa takala koko eye poka:dena depame epo atluwapo, “Lodta ipo atlema,

‘Alilata pulupe, na:tapo Isael so opa hapuloma mate

epo Yuda elele halomale so mate yu itiyapo himili amko himiloweye.

<sup>9</sup> Epedeme yu itiyapo himili amko iye

ka:yapa na:tapo yia: mamaduloye Isip mo tle alikili dla woloma eleme woyamuwa oloma dla aiyalma hatitimale hamiwa mate pohatlope.

Adipalati, yia:tapo na:ta yia: watle hamiwa aiyalma hatitimaleye podolumha:ha:na.

Epalati na:tapo yia: tle kostauwapo.

<sup>10</sup> Amasiyama na:tapo alotle Isalael so opa mate yu amko itiyapo himiloweye ipapena. Na:tapo yia:ta malamale sitali dla epo yia: dupa dulu dla na: aiyalma kokoye hatiti-molowepo.

Epalati yia:tapo na: aiyalma eye alila hapuloma dla malaha:ha:lepe.

Epapalati na:tapo yia: God hallowepo.

Epalati yia:tapo na: opa depo ha:ha:lepe.

<sup>11</sup> Epapedeme yia: dulu dla oplami haletapo yimkaduloye na: koko malastepo ha:ha:lepo depame po-imolowa.

Adipalati, yia:ta hapuloma yimka:sikili tle kotiyapo tame patoto oloma dla na: kokoye malastepo ha:ha:lepe.

<sup>12</sup> Epalati na:tapo yia: polowamama yia: bobtalimale hapulomaye welliwepo.' "

<sup>13</sup> Epedeme Godta amko kokoye himili dlepiye, ya: takala kokota pa:lowe alilata moteteka:mpulati natipame apopo. Epapedeme takala kokoye mo-takala molati alikili dla hamastlowedeme ma-dinapopo elapo.

## 9

### *Mosesta hampuale takala koko*

<sup>1</sup> Epedeme takala koko dulu dla opata God dla sisiyelowe apiye me-eluwapo. Epame yia:ta sisiyelalo aiyalma aya ma me-haluwapo. <sup>2</sup> Epame aiyalma aya dulu edla alupoli dapiyamte me-ha:ha:uwapo. Epedeme ka:yapa kokoloma tle aya dulu dla ulatuwame alupoli hale hala hiye Aiyalma. Epeleye alupoli edla tuloma dali mate epo aiyalma daya hatitimalalo helemale mate popa:mduwapo. Epalati aiyalma dayaye helemale di dla hatitipo hutiyemduwapo. <sup>3</sup> Epame ma etle alupoli hale dulu a:ma dla tulalo kokolomaye tlukata kopo halemduwapo. Alupoli e ya: hiye pta Sikemte Aiyalma dlalo alupolipo. <sup>4</sup> Alupoli dulu edla goldta halé ullu ka:dle seyamale ha:lalo tile polomduwapo. Epame Godta yu itiyapo himili aiyalma tóko goldta mita:ple mape alupoli hatlo medla polomduwapo. Epame tóko dulu edla goldta mita:ple isilako dulu dla mena dayaye hapo elemduwapo. Epame A:lon ya: dali ku, pupulu dla dali upata peyamale mape tóko dulu medla elemduwapo. Epame aiyalma 10, ewala dla hatitimale mape gold tóko hatlo dulu medla hutiyemduwapo. <sup>5</sup> Epame gold tóko di bodlalo hema Pepele di dla ha:ha:lalo hela:dle banakaka epapele sepele dapiyamte dlopi opata mimita:pleta popa:mduwapo. Yia: di edla popa:mama yia: suku mate gold tókoye bopudepo popa:mduwapo. Aiyalma tóko iye ka:yapa batalimale howahalomduwa mopo. Amasiyama watapo dita wua: dla koko hapuloma iye woloma imoloweye poka:dena.

<sup>6</sup> Epapedeme aiyalma aya dulu dla alisisi hapulomata ipo hutiyeuwapo. Epalati God ka: epo opa ka: duka dla ha:ha:lalo so hapulomatapo aiyalma aya dulu hema itapu dla hallalo alupoli dla tuwame God watle siyele hamilowe oko halomduwapo. <sup>7</sup> Amasiyama God ka: epo opa ka: duka dla ha:ha:lalo so yia: dokopala oplami hatlotapo aiyalma aya dulu dla pta Sikemte Aiyalma dlalo alupoli dla tumduwapo. Epele dulu dla ya:tapo sokomoko hatlo dulu dla isikimi alila hatlo dla alupoli hema tumduwapo. Ya:tapo epo isikimi alila hatlo dla tuwa demhalemama ya: batalimale mate epo opa hapulomata yeitamale koko tle batalimale koko halomale hapuloma mate howahalomolowedeme omali hamtuwa demhalemduwapo. <sup>8</sup> Epapedeme Hela:dle Sokota di imapo, aiyalma aya takalata ala me-poluwatapo opata God hala dla tlowe apiye ala me-himomeleme haluwapo.

<sup>9</sup> Epedeme koko hapuloma itapo wata dia: dla ela kokoye imapo. Adipalati, God dla namkale dle alisisi hapilowe koko mate epo alinepi poyupo hapilowe koko mateta God dla sisiyelalo so opa dupa dulu howahaloweye po-ala:mdena. <sup>10</sup> Adipalati, takala koko itapo dia:ye eleme amko koko dla puwapo. Amasiyama amko kokota mo-pulati asiyama takala kokota mo-pa:uwapo. Adipalati, takala kokoye isikimi daya dlowe koko mate epo

yú dlowe koko mate epame yú huhutamolowe meyelope meyelope dle koko mate dla elapo.

*Kelisota hampuale amko koko*

<sup>11</sup> Epedeme amko koko ka:pita pulati Kelisotapo dulu edla God ka: epo opa ka: duka dla hallalo halla puwapo. Epapedeme ya:tapo Pepele dimo dla pollalo ullu pa:le aiyalma aya dulu dla tuwapo. Aiyalma aya iye dlopi opata do mate pohana. Epame aiyalma aya iye ta:lamo hema popolasema. <sup>12</sup> Aiyalma aya dulu edla Kelisotapo isikimi alila hatlo dla alupoli hale pta Sikemte Aiyalma dlalo dla tumama gaut aliya omali mate epo bulumkiyawa aliya omali mate pohame tuwana. Amasiyama ya:tapo me-ya: omali ikadepeye hapo tumama kokó elepo ellalo batalimale howahalalo kokoye dia: dla hampuwapo. <sup>13</sup> Takala koko dulu dla gaut aliya omali mate epame bulumkiyawa aliya omali mate epo bulumkiyawa aliya elo hamdele tilepu mateta batalimale so opaye isikimi kapala di tlo ka:ka:demduwapo. <sup>14</sup> Amasiyama Keliso omalitapo dita pasakalo halemhala God dla siyele hamilipo depame di dupa dulu dla polowe dla elemtlalo batalimale koko hapulomaye howahalomdepo. Adipalati, kokó hallalo Sokota itiyamale tle Kelisotapo ya:skamu di batalimale asiyama dla ya: motoye God watle hamiwapo. Adipalati, hatlo ya:tapo batalimale pa:le halemama koko eye ya:ta halowe tlo ala:uwapo.

<sup>15</sup> Epapele koko tle Kelisotapo amko koko dulu dla God ka: epo opa ka: duka dla hallalo halapo, Godta sisilamale so opa hapulomatapo kokó halepo hallalo pasakaloye halepo depame. Adipalati, Kelisota powale kokotapo yia:ta takala koko dulu dla ha:ha:mama batalimale halomha:ha:uwa hapulomaye mo-howahalomuwapo.

<sup>16</sup> Epedeme oplamitapo mo-polowedeme polomama ya:ta solotamale kokoye pepa dla ilimelepe. Epame ya:ta mo-polati alotle opa opitapo pepa edla natipame ya:ta solotamale koko halepe. <sup>17</sup> Epapedeme pepa ilimalalo oplami yoye ala me-hallati isikimi oplami haletapo pepa e hapame ya:ta solotamale koko hatitimale eye pahalomolowa. Amasiyama ka:dena, yo pepa i ilimalalo oplamiye mo-powale hallati oplami haleta pepa e hapo ya:ta solotamale koko iye halomolowe ya:pi.

<sup>18</sup> Epapedeme ka:yapa Mosesta aiyalma hatitimale kokoye kotiyamolowedeme, alinepi poyuli omali mate kokoloma dokostauwapo. <sup>19</sup> Adipalati, Mosestapo ka:yapa aiyalma koko hapulomaye Isael so watle ma-atlapame ma bulumkiyawa aliya yemala omaliye hapame yú mate dukumuwapo. Epame sematipi sese hame dali dla polupame omali dla saodepo aiyalma hatitimale buka dla popokalepame ma opa dla popokaluwapo. <sup>20</sup> Epame epo atluwapo, “Wata omali itapo Godta wua: mate yu itiyapo himiliye kokalepo, wua:tapo dolumha:ha:lepo depame.” <sup>21</sup> Mosestapo omali mate epo popokalemama aiyalma aya mate epame dulu dla hutiyelalo alisisi hapuloma mate ma popokaluwapo. <sup>22</sup> Epapedeme Mosesta aiyalma hatitimaleta epo atlapo, “Alisisi hapulomatapo omali huhutamelepiye, eta ka:dlepe,” depo. Epele dulu dla omalita polostlalo wekelepiye, batalimale mape pohowawapo welilowa.

<sup>23</sup> Epapedeme ta:lamo aiyalma aya mate epo dulu dla hutiyelalo alisisi hapuloma mat-eye omalitapo howahamhallepe dle koko tle alinepi omalita howahalomhaluwapo. Amasiyama aiyalma aya i mate epo dulu dla hutiyelalo alisisi mateye isikimi Pepele dimo dla ikadepe popa: e yia:namapapo. Amasiyama Pepele dimo dla aiyalma aya ikadepe pola eye isikimi alinepi omali tle pohowahalowa. Amasiyama sikemte ka:dle alisisita howahalepe. <sup>24</sup> Epapedeme Kelisotapo ta:lamo hema pollalo aiyalma aya dulu dla potuwana. Adipalati, ta:lamo hema aiyalma aya polaye Pepele dimo dla aiyalma aya ikadepeta polaye e ya:namapapo. Amasiyama ya: Pepele dimo dla hetame dia: gadlowe yilo God hala dla woyamuwapo. <sup>25</sup> Epame opa ka: epo God ka: duka dla ha:ha:lalo so yia: dokopala oplamitapo sokomoko hapuloma dulu dla alinepi omali mate aiyalma aya dulu dla pta sikemte Aiyalma Dlalo alupoli dla tuwa demhalemduwaye, ya: pe-epapena. Adipalati, ya:tapo isikimi alila hatlo dla God watle ya: motoye hamimama

omali olostauwapo. <sup>26</sup> Epapedeme ya:ta pe-epapalalo wekematiye, ya:tapo alila hapuloma ta:lamo kotiyamale tle pumama wotiyalle hampulumla. Amasiyama mosukulu alila hema ya:tapo puame alila hatlope dla ya: omali olostauwa koko tle di bobtalimale hapulomaye mo-howahalopo hamastauwapo.

<sup>27</sup> Epedeme oplamitapo alila hatlope dla polopiye, ya: Godta koko gladle dla tame woyamelepe. <sup>28</sup> Epapedeme Kelisotapo alila hatlo dla pomama opa hapuloma yia: bobtalimaleye halopame alikili dla hamastauwapo. Amasiyama ya:ta ma ilame puaye, ya: opa hapuloma yia: bobtalimaleye matle halopo alikili dla hamastlowedeme popuasema. Hao. Amasiyama ya:tapo ya: omha:ha: so opa dla pasakalo gadle hamilowedeme pulupe.

## 10

<sup>1</sup> Mosesta aiyalma hatitimale kokoye isikimi alotle ka:ka:dle kokota puluwedeme hala e ya:nasama halapo. Epapele koko tle aiyalma koko dulu hema ha:ha:lalo sotapo God mateka:pi dla puluwedeme sokomoko hapuloma dulu dla yia: bobtalimale howahalomelepo depame God watle api hatlo metle alinepi poyupo hapimha:ha:mduwapo. Amasiyama yia:ta alinepi poyupo God watle hapimha:ha:mduwa koko etapo yia:ye eleme yia: bobtalimale tle alikili dla powoyamhalana. <sup>2</sup> Epele dulu dla yia:ta God watle alinepi poyupo hapimha:ha:le koko eta yia: dupa duluye woloma ka:pi howahapo hamasta demhalematiye, eta yia:ta God watle alinepi poyupo hapimha:ha:leye medla gudlemla. <sup>3</sup> Amasiyama yia:ta epo alinepi poyupo God watle hapimha:ha:le kokotapo sokomoko hapuloma dulu dla yia:ta yia: bobtalimale ma mo-malamolowe kokoye induwapo. <sup>4</sup> Adipalati, gaut aliya omali mate epo bulumkiyawa aliya omali matetapo batalimaleye woloma ka:pi howahapo hamastloweye po-ala:na.

<sup>5</sup> Epapedeme Kelisotapo ta:lamo hema puwa oloma edla ya:tapo God watle epo atluwapo,

“Wa: alinepi poyuli mate epo namkale dle alisisi hapili mate ma posolotamasema.

Amasiyama wa:tapo na: watle oplami moto ikadepeye ma-dinapuwapo.

<sup>6</sup> Epame alinepi dlapa halomale mate epo batalimale howahalepo depame namkale dle alisisi hapilowe kokotapo ma wa: dla siyele pohapimhalasema.

<sup>7</sup> Epedeme na:ta epo atluwapo,

‘God yu bukata na: koko atla eye ala:lowedeme

na:tapo wa:ta solotamale koko halowedeme mo-puwapo.’ ”

<sup>8</sup> Epedeme dulu hema Kelisota God watle atlemama epo atluwapo, “Wa: matle alinepi poyupo halomale koko mate epame batalimale howahalowe dla namkale dle alisisi hapili mate ma posolotamasema,” duwapo. Amasiyama wua: natiya, alinepi poyupo God watle hapili koko iye Mosesta aiyalma hatitimale kokotapo wua: watle, “koko iye halomha:ha:iye,” dle kokopo. Epapele tlope God ma koko eye posolotamasema.

<sup>9</sup> Epapedeme Kelisota God watle epo atluwapo, “Na:tapo wa:ta solotamale kokoye halowedeme mo-puwapo,” duwapo. Epapedeme Kelisota takala kokoye alikili dla hamastapame ma amko kokoye hapame takala kokota hallalo mo dla himiwapo.

<sup>10</sup> Epedeme Godta solotamale koko e dolumama Yesu Kelisotapo ya: motoye polowe dla himiwatapo ditapo alila hapuloma dulu dla kokó God ya: opa depo ha:ha:po.

<sup>11</sup> Epapedeme takala koko dulu dla God ka: epo opa ka: duka dla ha:ha:lalo sotapo alila hapuloma dulu dla opa batalimale howahalepo depame God watle alinepi poyupo namkale dle alisisiye halopimha:ha:mduwapo. Amasiyama koko etapo yia: bobtalimaleye woloma pohowahapo hamastamdena. <sup>12</sup> Amasiyama Kelisotapo alila hatlo dla ya: motoye polowe dla himimama kokó ellalo batalimale howahalaloye hampuwapo. Epame ya:tapo God dowala tiyama dla poluwapo. <sup>13</sup> Ya: edla polomama Godtapo ya: dla opahale dlalo soye elempuame ya: hete sitali isili dla ipila:lepo depame ompolapo.



<sup>14</sup> Epame ya:tapo alila hatlo dla ya: motoye polowe dla himili kokotapo Godta ka:dena dle so opaye kokó elepo ellalo batalimale howahalowe dla elempuwapo.

<sup>15</sup> Epame Hela:dle Soko mape di watle Lodta atlale kokoye ikadepe atlemama epo atlapo,

<sup>16</sup> “Na:tapo alotle na: opa mate yu amko itiyapo himiloweye ipapena. Na:tapo yia:ta malamale sitali dla epo yia: dupa dulu dla na: aiyalma kokoye hatitimolowepo.”

<sup>17</sup> Epame Hela:dle Sokota ma epo atlapo,

“Na: matle yia: bobtalimale mate epo yia:ta poka:ka:dle koko halomha:ha:le hapuloma mateye ma pomalahallowa.”

<sup>18</sup> Epapedeme batalimale hapulomaye woloma mo-howahapo hamastlepiye, ma alotle batalimale howahalowe dla God watle namkale dle alisisi hapilowe kokotapo isikimi koko pa:le ellepe.

*Di ka:dena, Godta hala mateka:pi dla tuluweye*

<sup>19</sup> Epedeme mikadepe dle so namkadulo, Yesu omalitapo dia: dla itiyamale hamiwapo, ditapo aiyalma aya dulu dla pta Sikemte Aiyalma dlalo alupoli dulu dla tuluweye.

<sup>20</sup> Adipalati, Yesuta pouwa kokotapo pta Sikemte Aiyalma dlalo alupoli dla tulalo tluka kokolomaye mo-dokostauwapo. Epapedeme ya:tapo dita God hala dla tlowe pasakalo halemhala api amkoye ma-tamuwapo.

<sup>21</sup> Dia: dla God ka: epo di ka: duka dla hallalo oplami ka:dleta me-halapo. Ya:tapo God ya: opa omhallalo halapo. <sup>22</sup> Epapedeme di ka:dena, dita mikadepe dle koko tlo kikitilata hampame wota:le pa:po Godta hala mateka:pi dla tlowa. Adipalati, di dupa dulu dla malamale sitaliye Yesu ya: omalitapo mo-howahapame ka:depo meluwapo. Epame di moto mape yú sikemte alisiyamale mate mo-howahalomuwapo.

<sup>23</sup> Epedeme Godta di watle pasakalo gadle hamilowedeme yu itiyapo himili e halowe dla dalemha:ha:mama malamale tatlamale mate omha:ha:miya. Adipalati, God ya: dla ya:ta yu itiyapo himili e haloweye pomelesemde. <sup>24</sup> Epapedeme diamkadulotapo bokotiyapo malamale mate ha:ha:mama ka:dle koko siyapo tlo halomha:ha:lepo depame yia:ye gagademha:ha:lowa. <sup>25</sup> Epedeme wua: yimkata alupame inoma sumha:ha:lowe kokoye memelemiya. Adipalati, opa opitapo yimkata alupo inoma sumha:ha:lowe kokoye memeleme tamalapo. Amasiyama wua: Yesuta ilame puluwe alilata mateka:pi dla mopula natipo omtamama yimkata alupame gadle yu mate asiyama sikemte gade asiyama sikemte gade demha:ha:iya.

<sup>26</sup> Epedeme ditapo ikadepe kokoye mo-malapame ma alotle batalimale kokoye sikemte solotapame halomha:ha:lepiye, ditapo ma alotle di batalimale howahalowe apiye pe-ellowa. <sup>27</sup> Amasiyama di Godta koko gladlowe dla wowota:le mate omha:ha:lowepo. Adipalati, dlapa sikemte itiyamaletapo God dla opahale dlalo soye hamdepo hamastlepe.

<sup>28</sup> Epapedeme Mosesta aiyalma hatitimale postlalo oplami kokoye koko gladle dla opa dapiyamte epapele o dapahatlope epapeleta ya: koko dla ikadepe koko atlamelepiye, ka:dena, ya:ye yumuluweye. <sup>29</sup> Epedeme wua: malamaiya, Mosesta aiyalma hatitimale postlalo oplamiye epo yumilipiye, asiyama God Yami dla alilalo oplami dla apa kokota woyapa? Adipalati, ya:tapo ya: bobtalimale howahalomuwa Keliso omaliye pokoko demama bokotiyapo malamale Soko dla ma alli mate putlomale yu atlamhalapo. <sup>30</sup> Amasiyama dimalamana, Godta epo atluwapo,

“Asiyama hamiloweye nolëpo. Epedeme na:tapo batalimale koko halomalalo so dla yia: batalimale asiyamaye halopiliwepo,” duwapo.

Epame ya: ma epo atluwapo, “Lodtapo ya: opa kokoye gladlepe,” duwapo.

<sup>31</sup> Epapedeme oplamitapo koko gladle alila dla ya: batalimale koko tle pasakalo halemhala God do tama dla teyuluweye pta koko pato. Adipalati, eye pta wota:le kokopo.

*Wua: mikadepe dle dulu dla kokalepo ha:ha:iya*

<sup>32</sup> Epapedeme wua:ta ka:yapa Yesu Keliso koko dalepo hapame wotiyalle koko dulu dla kokalepo ha:ha:uwa eye welimiya. <sup>33</sup> Adipalati, alila opi dla opata wua:ye opa hapuloma mila:pi tle wua: dla batalipo atlepame wotiyalle hapimduwapo. Epame ma alila opi dla yia:tapo wotiyalle koko mepapeleye wua: amkadulo dla hapimduwapo.

<sup>34</sup> Epame amtuwale aya dulu dla ka:ka:timale sota wotiyalle halati wua:ta yia:ye gademduwapo. Epame opa opitapo wua: alisisiye wua: tle kokolahapo tlati wua: asiyama yia: dla yu hale po-atlalo isikimi sisiyemduwapo. Adipalati, wua:tapo kokó hutiyelalo ka:ka:dle kokota wua: omelaye, etlo halomolowedeme omha:ha:mama ammduwapo.

<sup>35</sup> Epapedeme wua:ta mikadepe dle dulu dla itiyamale mate ha:ha:ye alikili dla pololemiya. Adipalati, koko etapo wua: dla asiyama patoye hampuapo. <sup>36</sup> Epapedeme ka:dena, wua:ta Godta solotamale koko halomha:ha:mama wua:ta ya:ta yu itiyapo himili koko halowedeme mikadepe dle dulu dla itiyamale mate ha:ha:iya. <sup>37</sup> Adipalati, God yu bukata epo atlapo,

“Alila yimka:mala dla ha:ha:po gudlepiye,  
ma alotle dita omha:ha: oplamitapo oloma edla woyamelepe.  
Epele dulu dla ya: podekellowa.

<sup>38</sup> Na:ta ullu pa:talo so demhala sotapo mikadepe dle tle pasakalo hallowe hamha:ha:po. Amasiyama yia:tapo na: tle alikili dla telepiye, na: yia: dla posiyelowa.”

<sup>39</sup> Amasiyama dia:ye God tle ma alikili dla haodepo Dlapa mo dla tamala so epapele some pohaha:sema. Amasiyama dia:ye mikadepe dle dulu dla ha:ha:mama God tle pasakalo gadle halowa depo omha:ha:lalo sopo.

## 11

*Mikadepe dle kokalalimale so opa*

<sup>1</sup> Epedeme mikadepe dle kokoye adipapeta? Mikadepe dle kokoye ipapena. Ditapo dalemha:ha:mama omha:ha: kokota ikadepe dia: dla pulupe dlowe kokopo. Epame dita potlamalalo wekemde kokoye ma dita “koko eye ikadepe kokopo,” dlowe kokopo.

<sup>2</sup> Ka:yapa ha:ha:uwa di mamaduloye, yia:ta mikadepe dle koko tle Godtapo yia: dla siyemhalemduwapo.

<sup>3</sup> Epame ditapo Godta ta:lamo mate epo pepele di mateye ya: yu tle mimita:piyo dle kokoye adipo malapa? Isikimi dita mikadepe dle koko tle koko iye malastlepe. Epame hatlo dita mikadepe dle koko tle wata dita tlama koko iye dita potlamalalo wekemde koko tle mimita:piyo demdepo.

*Eibol*

<sup>4</sup> Eiboltapo God dla mikadepe demama namkale dle alisisi hapimhallati Godtapo ya: dla siyemama ka:dle oplami duwapo. Amasiyama ya: bapa Keinta namkale dle alisisi halopimhalale dla Godtapo posiyena. Epapele dulu dla Eibol yoye mo-powataliya pouwapo. Amasiyama ya:ta mikadepe dle kokotapo ala dia: dla me-imhalapo.

*Inok*

<sup>5</sup> Inokta mikadepe dle kokoye Godta natipame ya: ala popolalo hallati Godtapo ya:ye Pepele dimo dla hamame hetauwapo. Epedeme opatapo ya:ye ma ponatina. Epele dulu dla ya: ala Pepele dimo dla pohamame hetlalo hallati Godtapo ya:ta mikadepe dle kokoye natipame ya: dla siyemduwapo. <sup>6</sup> Amasiyama mikadepe dle pa:le oplami dla Godta posiyemhalasema. Adipalati, ka:dena, God hala dla puluwedeme solotamalalo oplamitapo ka:yapa, Godye ikadepe halema, depame mikadepe dlepe. Epame ya: ma

ka:dena, Godtapo ya: totamalalo so opa dla asiyama hapimhala koko dla ma mikadepe dlepe.

### *Nowa*

<sup>7</sup> Epame mikadepe dle koko tle Nowatapo ya:llu mate epo ya: yimlala mate pasakalo gadlowedeme koa pato tiwapo. Adipalati, Godta itapu dla woyamolowe kokoye ya: watle momolo atlati ya:tapo dalepame God dla wota:mama isikimi salladuwapo. Epame ya:ta mikadepe dle kokotapo ta:lamo so hapuloma dla yia: bobtalimale kokoye inuwapo. Epame Godtapo Nowata mikadepe dle koko natipame ya:ye ka:dle oplami duwapo.

### *A:iblaham*

<sup>8</sup> Godtapo A:iblaham watle epo atluwapo, “Wa: mo mate epo wa: opa mate memelepame ma na:ta wa: watle hamilowedeme hala mo dla tane,” duwapo. Epalati A:iblahamta God dla mikadepe depame ya: mo saliyome Godta ya: watle atlale mo edla yeliyemtamama oloma hadima tame woyamolowe demtauwapo. <sup>9-10</sup> A:iblahamtapo Godta ya: watle hamili dle mo edla tame woyapame asepe oplami some halemama mo e halowe dla mikadepe depo haluwapo. Epame ya:ta mo edla tame halemama kimna:ya halopo halemsela:mduwapo. Adipalati, ya:tapo Godta woloma ka:depo dinapeleta kokó ellalo mo edla hallowe tlo omtamama dalemhaluwapo. Epame ya: ko tle yami Aisek mate epo ya: mama Yokob matetapo yia: mape kimna:ya halopo ha:ha:msiyamalati Godtapo A:iblaham mate yu itiyapo himiliye ma yia: watle hamiwapo.

<sup>11</sup> Epame ya:llu Sela hamkapi pollalo a:ya mape ma alluyemala ikadepe polomama ya:ta mikadepe dle koko tle God tle owayemala hamolowe itiyamaleye hauwapo. Adipalati, ya:tapo Godta yu itiyapo himili edla mikadepe duwapo. <sup>12</sup> Epapedeme A:iblahamta mo-totoyemala ikadepe halemama maseyemala himili tle ya: mamadulota pasatapo halapo. Epedeme ya: mamadulotapo pasatamama tamili some epo asila some sesa:lowe pa:le halapo.

### *Mikadepe dle sota asepe so some ha:ha:le koko*

<sup>13</sup> Opa hapuloma iwolotapo Godta yia: mate yu itiyapo himili e halomolowe dla omha:ha:lowe kokoye pomelena. Amasiyama yia:tapo koko eye pahalomalalo paliwapo. Yia: isikimi Godta yia: watle hapili dle kokota ala pateka:mu tle pumulla natipame isikimi ka:dena duwapo. Adipalati, yia: malamuwapo, yia:ye isikimi ta:lamo hema asepe so some ha:ha:po depame. <sup>14</sup> Epedeme opa yiskamu yia:ye asepe so dlalo sotapo woloma yia: mo ikadepe tlo totamha:ha:po. <sup>15</sup> Epapedeme opa iwolotapo yia:ta ka:yapa ha:ha:le mo edla ha:ha:lowedeme atlamha:ha:mama ammatiye, eta yia:ye ma i-ilapo mo edla tamellemla. <sup>16</sup> Amasiyama yia:tapo Pepele dimo ka:dle tlo totamha:ha:mama apuwapo. Epapedeme yia:tapo God watle, “wa:ye di God ikadepe halapo,” dlati asiyama Godta yia:ye po-alimdena. Adipalati, ya:tapo yia: yilo Pepele dimo ka:dleye madinapuwapo.

### *Godta A:iblahamta mikadepe dle kokoye natili*

<sup>17-18</sup> Epedeme Godtapo A:iblaham watle epo atluwapo, “Na:tapo wa: mamadulota pasatlowe koko dla yu itiyapo himiwaye, wa: maseyemala ikadepe Aisek tle kotiyamelepe,” duwapo. Epapele tlope Godtapo A:iblahamta mikadepe dleye kokaleta:depo natilowedeme, “Wa: maseyemala hatlo Aisekye yumpo na: watle hamine,” duwapo. Epalati asiyama A:iblahamtapo God dla mikadepe demama ya: maseyemala Aisekye yumpo God watle hamilowedeme apuwapo. <sup>19</sup> Adipalati, ya: mikadepe duwapo, Godtapo ya:ye ma pasakalo dlepe depame. Epapele koko tle A:iblahamtapo ya: maseyemala Aisekye mo-powale tle ma pasakalo desepuwapo.

### *Aisek mate epo Yokob mate epame Yosep mate*

<sup>20</sup> Epame Yokob mate epo Iso mate yia:ta itapu dla ha:ha:lowe koko dla yia: a Aisektapo ya:ta mikadepe dle tle yia:ye inoma sumale mate ta:duwapo.

<sup>21</sup> Epame Yokobtapo mo-totoyemala mo-polowe mateka:pi dla halemama ya:ta mikadepe dle tle ya: mamadulo Yosep ya: akimlala dapiyamte yilo God watle inoma sumale mate ta:duwapo. Epame ma ya:tapo ya: dali ku dla hitahalemama God dla siyele hamiwapo.

<sup>22</sup> Epame Yoseptapo mo-totoyemala mo-polowe mateka:pi dla halemama ya:ta mikadepe dle tle Godtapo Isalael soye Isip mo tle alikili dla eleme woyamoloweye atluwapo. Epapedeme ya:tapo ya: opa Isalael so watle epo atluwapo, “Wua:tapo Isip mo tle alikili dla woyapo tamalemama na: elo mate halopo telepe,” duwapo.

### *Moses*

<sup>23</sup> Epame mikadepe dle koko tle Moses ya: a mate epo ya: wai matetapo Mosesye ham-pame hemele alikili dla hatiyomeleme ha:ha:mama mama dapahatlope pololuwapo, Isip mo dokopala oplamita ya: yumulala depame. Epammama yia:tapo maseye-mala ka:dle hamale natipame Isip mo dokopala oplami yu hauwokokomoloweye powowota:na. Adipalati, mikadepe dle kokotapo yia: dla itiyamale hamiwapo, yia:ta dokopala oplami yu hauwokokomoloweye.

<sup>24</sup> Epame Mosesta ta:pame ya:ta mikadepe dle koko tle Isip mo dokopala oplami dla ya: mama ikadepe dloweye aliwapo. <sup>25</sup> Adipalati, ya:tapo God ya: opa mate wotiyalle halowe tlo sikemte solotamama asiyama dokopala oplami aya dulu dla alisisi pasatale dulu dla halloweye aliwapo. <sup>26</sup> Mosestapo Isip mota hamili ka:ka:dle koko mate epo alisisi pasatale koko mate dulu dla halloweye posolotamana. Amasiyama ya:tapo Kelisota puluwe koko dla omtamama wotiyalle halowe tlo ka:pi duwapo. Adipalati, ya:tapo isikimi Godta ya: watle asiyama hamilowe tlo omhaluwapo. <sup>27</sup> Epame Mosestapo ya:ta mikadepe dle koko tle Isip mo dokopala oplamita kasilamaleye powota:lalo Isip mo tle alikili dla woyamuwapo. Epame ya:tapo opata ponatilalo wekelalo Godye ikadepe ma-natili some omtamama itiyamale mate tauwapo. <sup>28</sup> Epame mikadepe dle koko tle Mosestapo Isalael so watle Godta Namilatale dayaye demama yia: aya kokoloma dla omali huhutupiliyemtaiye duwapo, polowe hampulalo banakaka oplamitapo yia: akimlala ka:yapa itapu hohomale soye popotimtlalo wekelepo depame.

<sup>29</sup> Mikadepe dle koko tle Isalael sotapo Omteka:pele Kaula duka gladepame isikimi ta:la sekelle tle uluwapo. Amasiyama Isip so opatapo yia: ma api hatlo metle ulluwa depo ullati yúta yia:ye poyuwapo.

### *Leihab*

<sup>30</sup> Epedeme mikadepe dle koko tle Isalael sota Yeliko mo patoye alila 7 dulu dla siyamama sillidemsiyamalati mo kosukullita meyelo hauwokokopo tuluwapo.

<sup>31</sup> Epame mikadepe dle koko tle opa pasatale elemsela:lalo a:ya Leihabtapo Isalael so yia: wota: tlalo soye gaduwapo. Epapele koko tle Yeliko so opa hapuloma, God dla posalladlalo wekele so tlo palimama hatlo Leihab tlo popolalo wekuwapo.

### *Opa opita mikadepe dle koko*

<sup>32</sup> Epapedeme na: ma apa kokoye wua: dla atlepa:? Adipalati, na:tapo wua: dla Gidiyon koko mate, epo Balak koko mate, epo Semson koko mate, epo Yepta koko mate, epo Deibidi koko mate, epo Sa:muwel koko mate, epame God tle yu hapame molo atlamalalo so koko mate atlamtelepiye, alilata pa:lepe. <sup>33</sup> Epedeme mikadepe dle koko tle opa iwolotapo mo patoto opi mate opahale demama ma-tla:mtamaluwapo. Epame yia:tapo ka:ka:dle koko halomha:ha:lati asiyama Godta yia: watle hamili depo halale kokoye yia:ta ma-halomduwapo. Epame layon esemalata yia:ye potimalala depame yia: matiye hihimamduwapo. <sup>34</sup> Epame yia:tapo dlapa ulli teleka:le aloweliye sustimduwapo. Epame opahale sota yia: aipa:ya mate yia:ye potimala yakomalati yia:tapo dulu metle

alíkili dla woyamduwapo. Yia:ta opahale dele dulu dla yia:ta hopeyalimalati asiyama Godta yia: watle itiyamale hamimduwapo. Epalati yia:tapo itiyamale e mate opahale soye alíkili dla posalemduwapo.

<sup>35</sup> Wola: opitapo yia: opa palli so ma pasakalo depo sillati yia:tapo ma elemduwapo. Epalati opa opitapo mikadepe dle so dla wotiyalle hapimha:ha:uwapo, yia:tapo wotiyalle e natimama God dla mikadepe dlowe kokoye memellepo depame. Epapele tlope mikadepe dle so ewolotapo wotiyalle koko e natimama yia:tapo God tle alíkili dla woyamoloweye posolotamdena. Adipalati, yia: solotamduwapo, wotiyalle dulu edla palipame ma mosukulu alila dla God tle pasakalo amko ka:dle halomolowedeme.

<sup>36</sup> Dulu edla mikadepe dle so opiye opata tepelemyemama hohopolemduwapo. Epame opiye amtuwale aya dulu dla oli dea mate hihimapo ka:ka:timduwapo. <sup>37</sup> Epalati opiye ewala mate siyomtimduwapo. Epalati opa opi motoye duka kotimduwapo. Epame opi tlo aipa:ya mate potimduwapo. Epalati opitapo sipi aliya kapala mate gaut aliya kapala mate didiyemha:ha:mama atali yimlala some alisisi dimi ha:ha:mduwapo. Epame yia: dla ellalo sotapo yia: watle wotiyalle hapimha:ha:mduwapo. <sup>38</sup> Epalati yia:tapo dalupa dulu dla epo tamali di dla epo munamu dulu dla ha:ha:msiyamduwapo. Epapedeme ta:lamo iye pta batalimana, ka:ka:dle so opa ipapeleta hema ha:ha:loweye.

<sup>39</sup> Epedeme opa hapuloma iwoloye yia:ta mikadepe dle tle Godtapo yia: dla siyemhalemduwapo. Amasiyama yia:tapo Godta yia: mate yu itiyapo himili kokoye pohalomana. <sup>40</sup> Adipalati, Godtapo ka:ka:dle kokoye dia: watle hamilowedeme madinapopo haluwapo. Epapele tlope ya: posolotamana, opa ewolo tatile koko e haloweye. Amasiyama ya: solotamuwapo, ditapo yimkata yia: mate koko eye halomelepo depame.

## 12

### *Di ka:dena, Yesu koko natipo dolumoloweye*

<sup>1</sup> Epedeme opa hapuloma iwolota mikadepe dle kokotapo dia: dla imapo, ditapo batalimale koko hapuloma pololepame itiyamale mate mosukulu dla ullumtlepo depame. Adipalati, batalimale kokotapo dia:ye hohopame hopeyamale hapimhalapo.

<sup>2</sup> Epedeme ka:dena, ditapo mosukulu dla ullumtamama di inomata woloma Yesu dla omtamama tloweye. Adipalati, ya:tapo dita mikadepe dle kokoye kotiyapame dinapolalo halapo. Epame ya:tapo alotle siyele halowe malamama dali yekelehmimili di dla poloweye powota:na. Epame ya:tapo God dowala tiyama dla poluwapo. <sup>3</sup> Epedeme wua:tapo hopeyamama duka dla gudlala depame Yesu koko tlo momalamha:ha:iya. Adipalati, batalimale sota ya: allimama wotiyalle hapimyelati ya:tapo duka dla pogudena. <sup>4</sup> Epedeme wua:ta batalimale koko mate opahale demha:ha: kokotapo ala wua:ye omali olostlowe oloma dla tame pogudesema.

### *Godtapo di A depo halemama di molo atlalo oplami halapo*

<sup>5</sup> Godtapo wua:ye ya: akimlala depame gadle yu mate wua: molo atluwaye, wua: mowowelipa? Adipalati, ya:tapo epo atluwapo,

“Na: maseyemala, wa:ta api hotlati Lodtapo wa: yumhala koko dla pokoko demiya.

Epame ya:ta wa:ye sikemte molo atlali dalla alimiya.

<sup>6</sup> Adipalati, Lodtapo ya:ta malahala sota api hotla natipame posalemhalapo.

Epame ya:tapo ya: akimlala dlalo so opata ka:ka:depo ha:ha:lepo depame yia:ye posalemhalapo,” duwapo.

<sup>7</sup> Epedeme Godta wua: posalemhala koko dulu medla woloma saddle mate ha:ha:iya. Adipalati, Godtapo wua:ye ya: akimlala ikadepe depame wua:ye posalemhalapo. Ame adipalati, dimalamana, adulotapo yia: yimlalata ka:ka:depo ha:ha:lepo depame posalemha:ha:mde kokoye. <sup>8</sup> Epapedeme Godtapo ya: akimlala hapulomaye posalemhalapo. Epapele dulu dla Godtapo wua:ta api hotlati wua: popoyulalo wekelepiye, wua: po-God ya: akimlala ikadepe depo ha:ha:sema. <sup>9</sup> Epedeme ta:lamo hema di adulotapo dita



api hotlati dia:ye posalemha:ha:lali ditapo yia: yu dla salladepo siyamdepo. Epapedeme di ma ka:dena, ditapo pasakalo hallowe halowedeme, Pepele dimo dla hallalo A yu dla salladepo siyamoloweye. <sup>10</sup> Epame ta:lamo hema di adulotapo dita api hotlati yia:tapo malamale tle ka:dena dle koko hamama dia:ye alila kiyele dla posalemdepo. Epele tlope Godtapo di posalemde kokoye pta ka:pipo. Adipalati, ya:tapo solotamdepo, dita ya: some ullu pa:po ha:ha:mama aiyalma depo ha:ha:lepo depame. <sup>11</sup> Epapele dulu dla dita api hotlati di posalemde kokoye posiyele koko, amasiyama pta wotiyalle kokopo. Epapele tlope ditapo di posalemde koko etle malamale ka:pi halepiye, eta ditapo ka:depo sadle dulu dla ha:ha:lepe.

<sup>12</sup> Epapedeme wua: do mate epo wua: hete mateta hopeyalimaleye itiyamale hapiya. <sup>13</sup> Epame wua:ta tlowe api ma woloma ka:depo dolepo himiya. Epelepiye, eta wua: ko tle dolumtamala hopeyalimale so mape poteteyuluwa, amasiyama yia: ma itiyamale halepe.

### *Dita God tle kostamtlala depame molo atlale*

<sup>14</sup> Epapedeme opa hapuloma mate woloma sadepo ha:ha:lowe koko tlo totamaiya. Epame ullu pa:po ha:ha:lowe koko ma totamaiya. Adipalati, ullu mate ha:ha:lalo sotapo Lodye ponatilowa. <sup>15</sup> Epapedeme wua: dulu dla oplami haletapo Godta bokotiyapo malamale kokoye pohalalo wekelala depame yimkaduloye asiyama woloma gade asiyama woloma gade demha:haiya. Epame wua: dulu dla ya:mkale ellewe kokotapo wua:ye dukulu some popoliyepo halemama batalimale koko dla elemtulu demiya. Adipalati, epapele kokotapo wua:ta hapulomaye batalimalala. <sup>16</sup> Epame wua: wolomape, wua: dulu dla oplami haletapo wola: uhalowe koko mate epo opa uhalowe koko mate dulu dla tullala. Epame Iso some God dla kostapame ma batalimale koko dla solotamiya. Adipalati, Isotapo isikimi alila hatlo dla daya dlowe yilo ya: a elo dla hallowe itiyamaleye ma ya: ei watle hamiwapo. <sup>17</sup> Amasiyama wua:malamana, ya:tapo ma-alotle ya: a elo dla hallowe itiyamaleye ma hali depame ya: a watle puame atlati asiyama ya: ata ma ya: watle pohamina. Epela natipame ma ya:tapo amale mate ya: a watle atluwapo. Amasiyama ya: atapo ma malamale meyelo depame ya: gadlowe apiye ponatina.

### *Sainai tamali mate Sayon tamali mate*

<sup>18</sup> Epapedeme wua:ye Sainai tamali dla popuana. Adipalati, Godtapo tamali di edla halemama Isalael so dla ya: aiyalmaye hapiwapo. Epapele oloma dla tamali eye amtuwale patota bopudepo hallati dlapata dulu metle woyapo ullumhaluwapo. Epalati mosisi patotapo tamali di edla puame yumhaluwapo. <sup>19</sup> Epapele dulu dla Isalael sotapo hulu yu mate epo Godta yukamale yu mate dalepame sikemte wowota:le mate ma dalla allimama epo atlamyeuwapo, "Yu yukamhala eye medla gudlepo," demyeuwapo. <sup>20</sup> Adipalati, Godtapo epo atluwapo, "Oplami haletapo epame alinepi haletapo tamali iye umulupiye, ya:ye ewala mate kelepame yumilipe," duwapo. <sup>21</sup> Epalati Moses mape ya:ta natili koko dla sikemte wota:mama epo atluwapo, "Na: sikemte wota:mama eseselalema," duwapo.

<sup>22</sup> Hao, wua: Sainai tamali dla popuana. Amasiyama wua:tapo Sayon tamali dla mopuapo. Tamali eye pasakalo halemhallalo God ya: mopo. Eye Pepele dimo Yelusalempo. Epapedeme mo edla God ya: banakaka so sikemte pasataletapo sisiyele mate alumhalapo. <sup>23</sup> Epame mo edla Godta ka:yapa hohomale akimlala Pepele dimo dla yia: hi hutiyeye so ma medla me-ha:ha:po. Epame opa hapuloma koko glادلalo God ma edla halapo. Epame God mila:pi tle ka:ka:depo ha:ha:mama palli so yia:nasama mape mo edla ha:ha:po. Adipalati, yia: mape mo edla God tle pasakalo gadle halopo ha:ha:po. <sup>24</sup> Epame mo edla Yesu ma me-halapo. Ya:tapo Godta yu itiyapo himili amkoye di watle hampuwapo. Epame ya: omalita popokalletapo dia: dla batalimale howahalowe kokoye imapo. Amasiyama Eibol omaliye pe-epapena.

<sup>25</sup> Epedeme wua: wolomape! Godta wua: watle koko atlati ya: yu dalla allimiya. Adipalati, Godta Sainai tamali di dla Moses tle yukamhallati dalla alli so hapulomaye isikimi wotiyalle pa:le alikili dla powoyamana. Epapedeme watapo dita Pepele di tle dia: dla yukamale oplami yu dla dalla allipiye, di ma adipammama wotiyalle pa:le mate alikili dla woyapa:? <sup>26</sup> Godtapo Sainai tamali di tle yukamhalale oloma edla ya: yutapo ta:lamo patoye holuwapo. Amasiyama ya: matle epo atluwapo,  
“Na:ta matle yukamelepiye,

hatlo ta:lamo siyapota poholluwa.

Amasiyama pepele di mate hollupe.”

<sup>27</sup> Epedeme Godta ipo atluwa ya: dulu kokoye ipapena. Ya:ta ya: do mate mimita:ple alisisi hapulomaye mosukulu batalipo polollepe. Amasiyama kokó ha:ha:lalo alisisi hapulomatapo kokó mepo ha:ha:lepe.

<sup>28</sup> Epedeme ditapo Godta di watle kokó hallalo mo hamilowe koko dla sisiyemama God dla wota:le mate ya: hi di dla ta:dloweye ka:pi. <sup>29</sup> Adipalati, di Godtapo alisisi hapuloma sikemte hamdepo hamastlalo dlapa epapele some halapo.

## 13

### *Mosukulu dla molo yu atlale*

<sup>1</sup> Wua:ta mikadepe dle dulu dla ya:mkale asiyama bokotiyapo malama ya:mkale asiyama bokotiyapo malama demha:ha: koko dulu medla mepo ha:ha:iya. <sup>2</sup> Epame yimkadulo asepe so mape gademha:ha:lowe koko ma welimiya. Adipalati, opa opitapo ka:yapa epo asepe so gagademha:ha:mama God ya: banakaka so ikadepeye yia:ta malamaleta semte opa ikadepe tepo depame yia: aya dla eleme hetauwapo. <sup>3</sup> Epame wua:tapo amtuwale aya dulu dla ha:ha:lalo soye sikemte malaha:ha:mama wua: mape semte yia: mate yimkata ha:ha:mapo demha:ha:iya. Epame opa opita wotiyalle dulu dla ha:ha: so mape sikemte malaha:ha:mama wua: mape semte yia: mate yimkata yia:ta wotiyalle ha eye hamapo demha:ha:iya.

<sup>4</sup> Epame opatapo wola: halomolowe kokoye pta koko patopo. Epedeme ka:dena, abili so opata yia: wola: mate woloma ka:depo ha:ha:mama ullu pa:po ha:ha:lowe ka:pi. Adipalati, Godtapo opa mate epo wola: mate uhalomalalo so kokoye gladepame yia: batalimale asiyama halopilipe.

<sup>5</sup> Epame wua: mani sikemte solotamale mate ha:ha:miya. Amasiyama wua: dla alisisi hutiyeye etlo wua: mate ma-ala:na demha:ha:iya. Adipalati, God meyelo epo atluwapo,  
“Na:tapo wua:ye posaliyome tlowa,  
epame na:tapo wua:ye powelilowa.”

<sup>6</sup> Epapedeme ditapo yu edla ikadepe demama epo atlowe ka:pi,

“Lodye na: gadlalopo. Epedeme na: powota:lowa.

Adipalati, isikimi oplami siyapota itiyamale tle adipapele wotiyalloye na: dla hamipa:?”

<sup>7</sup> Epame ka:yapa God yu wua: dla atlamha:ha:uwa dokopala so ewolo kokoye moma-lamha:ha:iya. Adipalati, yia:ta adipo ha:ha:le koko tle wua: dla siyele hampumduwa e malapame yia:ta mikadepe dle koko ma natipame dolumaiya.

<sup>8</sup> Yesu Kelisoye alila hapuloma dulu dla pomeyelope desemde. Epapedeme ya:tapo tatla mate epo watapo mate epame iyela mate mila:pi hatlo mepo halemdepo.

<sup>9</sup> Epapedeme biskapa koko imale meyelope meyelope dleta wua:ye eleme alikili dla tademiya. Amasiyama Godta bokotiyapo malamaleta wua: dupa dulu dla itiyamale hamilalo hala diya. Adipalati, wua:ta daya dlomde dla aiyalma hatitimale kokotapo wua: dupa duluye itiyamale pohamimhalasema. Ame adipalati, aiyalma e dolumalalo so dla aiyalma etapo yia: pogademhalasema.

<sup>10</sup> Epedeme amko koko dulu dla ha:ha:lalo so dia: dla alinepi poyupo ha:lalo tileye me-polapo. Epapele tope aiyalma aya dulu edla oko halalo sotapo di tile edla daya hutiye e dloweye aiyalmapo. Adipalati, yia:ye takala koko dulu dla ha:ha:lalo sopo.

<sup>11</sup> Epedeme takala koko dulu dla God ka: epo opa ka: duka dla ha:ha:lalo so yia: dokopala oplamitapo opa batalimale howahalomolowedeme alinepi omali hapame pta Sikemte Aiyalma dlalo alupoli dulu dla tumduwapo. Amasiyama alinepi e yia: moto ikadepe tlo opata ha:ha:mduwa mo alikili dla halopo tame dlapa dla mistemduwapo. <sup>12</sup> Epapedeme Yesu mape ya: omali mate opaye ka:ka:depo mellowedeme yia: mo alikili dla wotiyalle hapame pouwapo. <sup>13</sup> Epedeme ditapo mo dulu tle alikili dla u-ulapo ya: hala dla tlowa. Epame opata ya: dla batalipo atlamya kokoye yimkata dia: mate halowa. <sup>14</sup> Adipalati, ta:lamo iye podita kokó ha:ha:po ha:ha:lowe mo. Epapedeme ditapo dita kokó ha:ha:po ha:ha:lowe mo amkoye omha:ha:po.

<sup>15</sup> Epedeme ka:dena, ditapo Yesu tle dita siyele kokoye God watle alila hapuloma namkale dle alisisi some hapimha:ha:lowa. <sup>16</sup> Epapedeme wua: ka:ka:dle koko halomolowe mate epo yimkadulo gagadlowe koko halomolowe mate melemiya. Adipalati, ipapele koko mape God dla siyele hamilowe namkale dle alisisi epapele some halapo.

<sup>17</sup> Epedeme wua: sos dokopala so yu dla salladepame siyamama yia: yu dla hutullu dle mate ha:ha:iya. Adipalati, yia:tapo wua: pasakalo omha:ha:lalo ha:ha:po. Epame mosukulu alila dla yia:tapo wua: omha:ha:uwa kokoye woloma God dla bobotima-timelepe. Epapele koko tle yia:tapo siyele mate yia: oko woloma ka:depo halomelepo depame wua:tapo yia: yu dla salladle mate siyamaiya. Amasiyama wua:ta pe-epapalalo wekelepiye, asiyama yia:tapo upiyele mate ha:ha:mama wua:ye woloma pogadlowa.

<sup>18</sup> Epapedeme wua:tapo dia: yilo God watle inoma sumale himme ha:ha: kokoye melemiya. Epame di ma mikadepe dema, dita malamale sitalita dia: dla dita batalimale koko halë halaye po-atlasema. Adipalati, di solotamde, alila hapuloma dulu dla woloma ka:ka:dle koko siyapo tlo halomha:ha:lowedeme. <sup>19</sup> Epapedeme na: solotama, wua:tapo na:ta hapele wua: hala dla ilame pulupo depame inoma sumale himme ha:ha:loweye.

<sup>20</sup> Godtapo sadle hamilalo halapo. Epame ya:tapo di Lod Yesuye powale tle ma pasakalo duwapo. Epedeme watapo Yesutapo ya: opaye sipi aliya some eleme tlalo halapo. Adipalati, ya:tapo Godta ya: opa mate kokó ellalo yu itiyapo himili amkoye kokallepo depame ya: omaliye olostauwapo. <sup>21</sup> Epedeme na: inoma sumale yu himima, wua:tapo Godta gadle tle ya:ta solotamale koko halomha:ha:lepo depame. Epame na: ma inoma sumale yu hale himima, Godtapo Yesu Kelisota itiyamale tle wua: pasakalota ya: dla siyele hamilalo hallepo depame. Epedeme Yesu Keliso dla itiyamale mate hela:dle mateta kokó ellepe. Koko iye ikadepepo.

<sup>22</sup> Mikadepe dle so namkadulo, na:tapo wua: dla gadle yu kiyeyele ilipo hamima. Epedeme ka:dena, wua:tapo na: yu iye woloma ka:pi dalepame sadle mate haiya.

<sup>23</sup> Na: ma solotama, wua:tapo di ei Timotiye amtuwale aya dulu tle ma-alikili dla hamame woyamale kokoye dallepo depame. Epapedeme ya:tapo hapele na: hala dla puame woyamelepiye, eta na:tapo ya: mate ma wua: hala dla puluwepo.

<sup>24</sup> Epapedeme na:ta namkale dle yuye wua: sos dokopala so dla epo mikadepe dle so hapuloma dla atlema. Epele dulu dla Itali mo tle pumulale mikadepe dle so opi mape yia:ta namkale dle yuye wua: dla atlema.

<sup>25</sup> Eso. Godta bokotiyapo malamaleta wua: mate hallepe.

## Yeimsta yu ilimale Yeims Yeims buka ya: dulu koko

Yeims buka ilimalalo oplami iye Yesu ya: ei Yeims mle. Ya:tapo Yelusalem sos dokopala halemama mo opi dla ha:ha:lalo mikadepe dle so watle yu ilimale iye hamiyo, yia:tapo Keliso yilo wotiyalle ha dulu dla kokalepo ha:ha:lepo depame.

<sup>1</sup> Na: Yeims, God mate Yesu Keliso mate yia: oko halalo oplamipo. Na:tapo Yu so elele 12 so ta:lamo meyelope meyelope dle dla ha:ha:mta dla namkale dle yu i ilipo hamima.

*Kokalle koko mate elemala natili koko mate*

<sup>2</sup> Mikadepe dle so namkadulo, kokalle koko hapulomata wua: dla pulati sisiyele mate dulu medla ha:ha:iya. <sup>3</sup> Adipalati, wua:malamana, kokalle koko ipapeletapo pumdepo, dita mikadepe dleye kokaleta: depa natilowedeme. Epapele dulu dla dita kokalle koko dulu dla kokalepo ha:ha:lepiye, eta dita mikadepe dle dulu dla hutulli mate ha:ha:lowe kokoye hampumdepo. <sup>4</sup> Epapedeme ka:dena, wua:ta mikadepe dle dulu dla mo-opa depa ha:ha:lepo depame hutulli koko wua: dulu dla elata ta:mta diya. Wua:ta epapelepiye, eta wua:ta mikadepe dle dulu dla sikemte kokalepo ha:ha:mama ka:depo malamale Yesu Keliso dla ela epapeleta wua: dla ellepe. Epalati wua:ta mikadepe dle dulu dla koko opita wua: dla pokiyelowa.

<sup>5</sup> Epedeme oplami antapo ka:depo hallowe malamaleye ya: dla po-ala:lalo halema, ya: ka:dena, God dla inoma sumale yu mate otele himme hallepe. Adipalati, Godye ya: opa gadlowe dla sikemte solotamale elademe ya:tapo ya:ye gadlepe. <sup>6</sup> Amasiyama ya: God dla mikadepe depame inoma sumale himme polomama malamale potatlamolowa. Adipalati, malamale tatlamale oplamiye mosisita puame ulo dla yulati ulota hahala:po siyamdiye, ya: ma epapele some halapo. <sup>7-8</sup> Epapele oplamiye malamale hatlo dla pohimme halasema, amasiyama momalamale tatlamale mate halapo. Epapedeme poka:dena, ya:tapo God dla inoma sumale yu mate otele himme halaye asiyama hali depa malahalloweye.

<sup>9</sup> Epedeme mikadepe dle dulu dla ha:ha:mama alisisi pa:po ha:ha: so, wua: sisiyeiya. Adipalati, Godtapo wua:ye ya: mila:pi tle mo-patoto so duwapo. <sup>10</sup> Epame alisisi poposatilimale so, wua: ma Godtapo wua:ye isili dla halopo tulluwe dla sisiyeiya. Adipalati, alila haleta wua:ye sali alemalleta osamokolo dla domalati tolemama palimdiye, wua: ma epapelepe. <sup>11</sup> Epame salita matamama dali haha dla domalati dali haha ka:dleta tolemama balla tulumdiye, wua: ma epapelepe. Epedeme wua:tapo wua: oko me-hamha:ha:mama me-pallipe.

<sup>12</sup> Kokalle koko dulu dla kokalepo hallalo oplamitapo siyelepe. Adipalati, ya: kokalle koko dulu dla kokalepo hallepiye, Godta ya: watle asiyama halepo halepo hallowe pasakalo hamilipe. Epapedeme halepo halepo hallowe pasakalo iye Godtapo ya: dla sikemte malaha:ha: so watle hamilowedeme yu itiyapo himiwapo.

<sup>13</sup> Epedeme elemala natili kokota wa: dla pulati “Godta na:ye elemala natima,” demiya. Adipalati, batalimale kokotapo Godye elemala natili dla pohamamtulusemde. Epame Godta ya: opaye batalimale koko dla tullupo depame pe-elemala natisemde. <sup>14</sup> Amasiyama oplami meyelo batalimale koko solotapame malamdetapo ya:ye elemala natimhalapo. <sup>15</sup> Epame batalimale koko malamale itapo moto mate koko halowe dla hamame tulumdepo. Epalati moto mate batalimale koko halë itapo ta:pame ma oplami dla polowepe hampumdepo.

<sup>16</sup> Epedeme namkadulo, wua: malamaiya, Godta opaye pe-elemala natimhalasemde. <sup>17</sup> Adipalati, ka:ka:dle ullu pa:talo alisisi hapulomaye A Godta hala di tle pumhalapo.

Epele dulu dla ya:ta mimita:ple alisisi hapuloma mama mate epo tamili mate epo sali matetapo yia:ta ha:ha:leye alila opi dla yia:ta popa:le meyelo meyelo demdepo. Amasiyama yia: mimita:plalo Godye pomeyelo desemde. <sup>18</sup> Epapedeme Godtapo meyelo yu himili dolumama ya: yu ka:dle tle di watle pasakalo hallowe kokoye mahamiwapo, ya:ta mimita:ple alisisi hapuloma dulu dla ditapo itapu so depo ha:ha:lepo depame.

*God yu dalepame moto mate koko halomha:ha:iya*

<sup>19</sup> Epedeme mikadepe dle so namkadulo, wua: daliya, opa hapulomatapo hapele dlallalo so depo ha:ha:lowe ka:pi. Epammama ma hapele yukamolowe koko mate hapele siyaladlowe koko mate dulu dla poha:ha:lowa. <sup>20</sup> Adipalati, oplamita siyaladle tle koko woyamdetapo God mila:pi tle ka:depo hallowe pasakalo mate po-ala:po halasema. <sup>21</sup> Epedeme wua: dulu dla batalimale koko hapuloma mate epo ullu walle koko hapuloma mate alikili dla pololiya. Epame wua:ta God yu dalepame hamuwa koko eye hutulli mate kikitilata hamame ha:ha:iya. Adipalati, yu edla itiyamale elapo, wua:ta pasakalo hallowe halowe.

<sup>22</sup> Epapedeme wua: God yu dalepame ya:ta atla koko eye halomha:ha:iya. Adipalati, wua: God yu dalepame ya:ta atla koko e pahalomalalo ha:ha:lepiye, wua: wuskamu elemala natimha:ha:mama apelepe. <sup>23-24</sup> Adipalati, oplami antapo God yu dalepo moto mate koko pahalalo hallepiye, ya:ye oplamitapo ya:nasama natilalo alisisi dla ya:skamu natipame ma pakasiyamalalo ya: mila:pi welimdiye, epapele some halapo. <sup>25</sup> Amasiyama oplami antapo Godta molo atlale yu ka:dle e natipame powelilalo woloma dolumhallepiye, Godtapo oplami eta koko hapuloma halomde dla siyemama ka:ka:dle koko tlo ya: dla halopilipe. Epedeme Godta molo atlale yu ka:dle eta opaye batalimale koko dulu tle alikili dla eleme woyamhalapo.

<sup>26</sup> Epapele dulu dla oplami antapo ya:skamu ya:ye God koko sikemte malastana depame ya: matiye poka:ka:dle koko atlowe dla pohamalalo wekelepiye, ya:ta God koko malastaleye koko pa:leta apelepe. Epame ya:ye ya:skamu elemala natimama apelepe. <sup>27</sup> Amasiyama oplamitapo atali so mate dupulapi so mate gagademhalemama ta:lamo batalimale koko mate podopdomalalo hallepiye, Godta ya:ta mikadepe dle kokoye sikemte ka:dena dlepe.

## 2

*Alisisi pa:talo so allimiya*

<sup>1</sup> Mikadepe dle so namkadulo, wua:ye di pato Lod Yesu Keliso dla mikadepe dle sopo. Epapedeme wua: opa opi natipame yia: tlo ka:ka:dena depo solotamama opa opiye batalimana depo allimiya. <sup>2</sup> Eye ipapolowe koko yapopo, oplami haletapo wua:ta inoma sumpopa:lati tluka ka:ka:dle didiyepo matilipe, epalati oloma medla alisisi pa:le oplami mape tluka bobtalimale didiyepo matilipe. <sup>3</sup> Epalati wua:tapo tluka ka:ka:dle didiyepo mati oplami watle atlemama, “Wa: itapu hema matime polane,” depame ma alotle tluka bobtalimale didiyepo mati oplami watle atlemama, “Wa: alo huma tuwame polane,” dlepe. <sup>4</sup> Amasiyama wua:ta koko ipapele haye, wua: apa koko hama:? Wua: isikimi opa opi tlo ka:ka:dena demama opa opi tlo bobtalimana depo. Epapedeme batalipo malamale wua: dulu dla ela etapo opaye ipo duka hukulumhalapo.

<sup>5</sup> Epedeme mikadepe dle so namkadulo, wua: koko iye woloma daliya. Godtapo ta:lamo pato dulu dla alisisi pa:talo soye mo-sesalemuwapo, yia:tapo yia: dupa dulu dla mikadepe dle kokotapo poposatilipo ha:ha:lepo depame. Epame yia:ta God ya: mo koko dla u-ulapo tulupo depame. Adipalati, Godtapo ya: dla malaha:ha: so watle yu itiyapo me-himiwapo, ya: mo koko halowe. <sup>6</sup> Amasiyama dulu edla wua:tapo alisisi pa:talo soye pokoko demdepo. Ame wua: adipalati ma alisisi pasatale so dla dostasiyama:?



Ewolotapo wua: dla wotiyalle hapipame koko gladle dla elemtulumdepo. <sup>7</sup> Epame yia:tapo di Lod Yesu Keliso hi dla opahale demha:ha:mama mala-atlamha:ha:po.

<sup>8</sup> God yu buka dulu dla molo atlale yu pato ipo elapo,

“Wa: wa:skamu sikemte bokotiyapo malamdiye,

epammama wa: amkale ma sikemte bokotiyapo malamane,” depo.

Epedeme wua: molo atlale yu i woloma dolumha:ha:lepiye, eta wua:ye api dla ha:ha:po.

<sup>9</sup> Amasiyama wua:ta malamale dulu dla opa opi tlo ka:ka:dena demama, opa opi tlo bobtalimana dlepiye, wua: batalimale koko dla mo-tulumama apopo. Epapele tle God ya: yutapo wua:ye aiyalma hauwokokomalalo so demdepo. <sup>10</sup> Adipalati, oplami antapo God ya: aiyalma hapuloma woloma dolumhalemama aiyalma hatlo postlepiye, ya:ye God ya: aiyalma hapulomaye ma-hauwokokomama apopo. <sup>11</sup> Epedeme Godta epo atluwapo, “Wua: upo wola: mate epo upo opa mate uhala aiyalma,” duwapo. Epame God hatlo meta ma epo atluwapo, “Ya:mkale pasakalo kestla aiyalma,” duwapo. Epapele dulu dla wa: upo wola: mate epo upo opa mate upohalalo halemama ya:mkale pasakalo tlo kestlepiye, wa: God aiyalma hapulomaye ma-hauwokokomapo.

<sup>12</sup> Epapedeme wua:ta yuhalë hapuloma mate epo moto mate koko halomale hapuloma mate wolomape. Adipalati, wua: bobtalimale tle alikili dla eleme woyamuwa aiyalma etapo wua: kokoye gladlepe. <sup>13</sup> Epedeme koko gladle oloma edla Godtapo opa yimkadulo popolowamalalo wekelalo soye sadle mate koko pogladlowa. Amasiyama Godtapo koko gladle dla yimkadulo polowamalalo soye sadle mate koko gladlati yia:tapo wowota:le pa:po sisiyele mate ha:ha:lepe.

#### *Mikadepe dle dulu dla moto mate koko halowe*

<sup>14</sup> Epapedeme mikadepe dle so namkadulo, oplami haletapo ya:skamu ya:ye mikadepe dle oplami depame ya:ta moto mate koko halëta pa:lepiye, ya:ta mikadepe dleye koko pa:le halapo. Epapele oplamiye ya:ta mikadepe dleta ya: watle pasakalo hallowe pohamilowa. <sup>15</sup> Epapele dulu dla wa: amkale mikadepe dle oplamita daya epapele mate epo tluka epapele mate pa:po hallepe. <sup>16</sup> Epalati wa:tapo ya: watle atlemama, “Namkale, woloma tame tluka didiyepo polomama daya dene,” dlepe. Amasiyama wa: ya:ta solotamale koko pohamilalo isikimi epo atlepo mellepiye, wa: koko ka:dle pohasema. <sup>17</sup> Ame adipalati, mikadepe dletapo meyelo halemama moto mate koko halëta pa:lepiye, mikadepe dle eye mo-powame elapo.

<sup>18</sup> Epapele dulu dla oplami haleta epo atlowe sepene, “Wa: tlo mikadepe dle walena. Amasiyama na: tlo isikimi moto mate koko halalo oplami,” dlepe. Epalati asiyama na:ta epapele oplami dla epo atellepe, “Adipammama oplamitapo moto mate koko halë pa:po halemama ya:ta mikadepe dle kokoye nati-ipa:? Amasiyama moto mate ka:ka:dle koko halomhallalo oplamitapo ya: moto mate koko halë tle ya:ta mikadepe dleye nati-ilipe,” dlepe. <sup>19</sup> Epedeme wa:ta God hatlo dla mikadepe demde deye e ka:pipo. Amasiyama bataliya yimlala mape God hatlo medla mikadepe demama wowota:mdepo.

<sup>20</sup> Epapedeme wa: yiyilamale oplamipo. Adipalati, mikadepe dleye moto mate koko halëta pa:lepiye, mikadepe dle eye ya: dulu koko hawapo. Epedeme wa: koko iye na:ta woloma wa: watle imelepo depo amma:? <sup>21</sup> Ame adipalati, di mama A:iblahamye ya:ta mikadepe depame moto mate koko halë tle Godtapo ya: mila:pi tle mo-ullu pa:le oplami duwapo. Eye ipapuwapo, ya:ta ya: maseyemala Aisekye God dla alinepi poyupo hapilalo tile dla yumuluwedeme di dla himiwapo. <sup>22</sup> Epapedeme wua: natiya. A:iblahamtapo mikadepe dle mate epo moto mate koko halë matetapo woloma ka:pi ala:po eluwapo. Epame ya:ta moto mate koko halëtapo ya:ta mikadepe dleye ka:pi duwapo. <sup>23</sup> Koko itapo God ya: yu buka dulu dla atlale koko mate ma-ala:mama epo atlapo, “A:iblahamye God dla mikadepe dlati Godta ya:ta mikadepe dleye natipame ya: mila:pi tle ullu pa:le oplami duwapo.” Epapele koko tle Godta A:iblahamye namkale ikadepe duwapo. <sup>24</sup> Epedeme wua: natiya. Opaye hatlo mikadepe dle tle God mila:pi tle ullu pa:talo so

pe-epo amhalasema. Hao. Moto mate koko halë mate epo mikadepe dle mateta God mila:pi tle opaye ullu pa:talo so demhalapo.

<sup>25</sup> Epo di ma duka dla sela:lalo a:ya Leihabta koko halë natipo. Ya: mape ya:ta koko halëta Godta ya:ye ya: mila:pi tle mo-ullu pa:le a:ya duwapo. Adipalati, ya:tapo Isalael so yia: wota: soye gademama ya: aya dla elemhetauwapo. Epame ma api hale tle taiya demama yia: pasakalo gaduwapo. <sup>26</sup> Epedeme oplamitapo ya: dla hedleta pa:lepiye, ya: motoye mo-powame elemdepo. Epapedeme mikadepe dle koko ma epapena. Oplamitapo ya:ta mikadepe dle kokoye moto mate koko pohalalo hallepiye, ya:ta mikadepe dleye mo-powame elapo.

### 3

#### *Wua: teye woloma hohomaiya*

<sup>1</sup> Mikadepe dle so namkadulo, na: pase malamasema, wua:ta hapulomata imalalo so depo ha:ha:loweye. Adipalati, Godta koko gladle oloma dla imalalo so hapuloma di kokoye Godta sikemte kokalle mate gladlepe. <sup>2</sup> Epele dulu dla dita hapulomatapo api mo-komdepo. Amasiyama oplami antapo ya:ta yukamale dulu dla api pohotlalo hallepiye, ya:ye ikadepe ka:dle oplamipo. Epedeme ipapele oplamitapo ya:skamu ya: moto hamoloweye ala:na. <sup>3</sup> Epapedeme di ya:nasama koko i natipo. Oplamitapo hos aliya koa tle tlowedeme apelepiye, ya: alisisi yemala hos aliya mati dla himpame deata seme dla himomele epo seme dla himomele dlepe. Epame dea edla hohopo tamama hos aliyata oplamita solotamale dla telepo depame deaye hahalumtelepe. <sup>4</sup> Epame ya:nasama hale ipo. Kaula pato dla siyamalalo koa ma epapena. Koata mosisi patota bibikilimale dulu dla mepele me-telepiye, koata pobatalipo tlowa. Adipalati, koaye pato tlope ya:ye hamame tlalo kosopa yemala hale kei dla me-halapo. Etapo koa hamtlalo oplamita solotamale dla semtlepe.

<sup>5</sup> Epapedeme di mati dulu dla te yemala halaye e ma epapena. Di moto dla ha:ha: alisisi hapuloma dulu dla teye yimka:mala ikadepepo. Amasiyama ya: dla yu o-opalimama koko di dla halopo hetale pta pato. Isikimi malamane, mo patoye dlapa yemala yimka:malata seledlati mo pato e hamdemdepo. <sup>6</sup> Epedeme te di mati dulu dla halaye ya: ma dlapa sepena. Adipalati, teye di moto dulu dla batalimale hamilalo alisisi halapo. Epedeme teta batalimale kotiyapame oplami moto patoye dlapa some hamdemdepo. Dlapa iye Dlapa mo tle kotiyapame di te dla seledemdepo. Epalati dlapa itapo oplami pasakaloye hamdepo hamastamdepo.

<sup>7</sup> Epapele dulu dla opata yowo alinepi mila:pi meyelope meyelope dle tea epo aliya epo yú dulu dla ha:ha:lalo ipapeleye ma halo dlepo depame ilimdepo. <sup>8</sup> Amasiyama oplamita teye aliya some hamame iliweye po-ala:na. Adipalati, teye sikemte batalimana. Epedeme ya:tapo ilama some oplami dla wotiyalle hamilowedeme me-dinapopo elapo. <sup>9</sup> Epapele tlope te hatlo ita di A Lod hi di dla ta:demdepo. Epame te hatlo me-itapo Godta ya: sepele mimita:ple opaye wotiyalle halopiliwe yu atlamdepo. <sup>10</sup> Epedeme mati hatlo me-itle God dla siyele ta:dlowe koko mate epame opa wotiyalle hapilowe koko mate atlamdepo. Epedeme mikadepe dle so namkadulo, dia: dulu dla ipapele kokota ellowe poka:dena. <sup>11</sup> Epapedeme ka:deta:, matale hatlope tle yú ka:le mate yú alisiyamale mate molloweye? Hao. <sup>12</sup> Epame pigi dalita olipi dlomoko pomilimasemde. Epo gla:pi dalitapo pigi dlomokoye pomilimasemde. Hao. Epame yú batalimale alinepita yú huhutamalalo dla yú ka:dle alisiyamale potilimasemde.

#### *Oplami antapo ka:depo malamalalo halema:?*

<sup>13</sup> Epedeme wua: dulu dla oplami antapo ka:depo hallowe malamale mate halema:? Ya: ka:dena, ya:ta ka:depo hallowe malamale etle ya: moto mate koko halë nati-iliwe ka:pi. Epammama ya:tapo ya:skamu di dla hamhetlowe malamale mate pohallowa.

<sup>14</sup> Amasiyama wa: hemele wa: dupa dulu dla ya:mkale ellewe koko mate epo ya:mkale pomalamalalo wekelowe koko mate me-hutiyelati wa:skamu wa:ye ka:depo mala-malalo oplami demiya. Adipalati, wa:ta epo atlaye wa: ikadepe koko po-atlasema.

<sup>15</sup> Wa: hemele batalimale koko ipapele me-malamhalemama wa:skamu wa:ye ka:dena dlepiye, malamale eye God tle pomalasma. Amasiyama malamale eye ta:lamota malamale mate epo Saitenta malamale mate tle puapo. <sup>16</sup> Epapedeme mo hadima ya:mkale ellewe koko mate epo ya:mkale pomalamalalo wekelowe koko mate ellepiye, mo edla duka gladleta elemama batalimale koko hapulomata ta:lepe.

<sup>17</sup> Amasiyama ka:depo hallowe malamale God tle puatapo di watle ipapele koko imapo. Itapu koko patoye ullu pa:le kokopo. Epame sadle koko epame ya:mkale malam-olowe koko epame ya:mkale yu dla salladlowe koko epame bokotiyapo malamolowe koko epo ya:mkale gadlowe koko epo poduka hukulumama opiye batalimale tiyama dla ipila: epo opiye ka:dle tiyama dla ipila: dlowe koko epo te pobobla:llalo wekelowe koko.

<sup>18</sup> Epapedeme oplamitapo opa opi mate sadepo halemama yimkadulo mate sadepo hallowe koko imhallepiye, opa ewolo dulu dla ka:dle kokota dollupe.

## 4

### *God mateka:pi dla pumulaiya*

<sup>1</sup> Epedeme apa kokota natalimale koko mate yu topulolle koko mate wua: dla halopo pumdi? Wua: dupa dulu dla batalimale solotamale koko hutiyetapo halopo pumdepo. Adipalati, wua: dupa dulu dla batalimale koko solotamaletapo ka:dle koko solotamale mate natalimhalapo. <sup>2</sup> Wua: alisisi solotamdepo, amasiyama wua: e pohalomasemde. Epame wua: dla ya:mkale elle kokota elemama ya:mkaleye yumdepo. Epapele tlope wua:ta solotamale koko mate ala po-ala:semde. Epame wua: yu demama natalimdepo. Amasiyama koko itapo wua:ta solotamale koko ala po-ala:semde. Adipalati, mu-wolo God dla po-atlanatisemde. <sup>3</sup> Epame wua:ta God dla atlati asiyama pohamilalo wekemdiye ipapalati ammdrepo. Eye wua:tapo malamale batalimale mate popa:mama God dla atlepame ma alisisi e mate muwolo solotamale koko halomolowa dlati ammdrepo.

<sup>4</sup> Momalamale tatlalimale so wua:ye woloma God yu dla poha:ha:sema. Epedeme wua: malamaiya, ta:lamo koko dla solotamale himilowetapo God dla opahale dlowe dla semtulupo. Epedeme oplami antapo ta:lamo koko mate hatlope depo sela:lepiye, ya:ye God mate opahale demhalapo. <sup>5</sup> Epedeme wua: God yuta ipo atlaye pomikadepe desema? Adipalati, God yuta ipo atlapo,

“Godtapo di watle Soko hamiwatapo

dita hatlo God tlo malasiyamelepo depame sikemte solotamhalapo,” depo.

<sup>6</sup> Epame Godta dia:ye bokotiyapo malamale pato himhalapo ditapo hatlo ya: tlo malasiyamelepo depame. Epapedeme ya: yu dla ipo atlapo,

“Godtapo yiskamu di dla halopo hetlalo soye alimhalapo.

Amasiyama sadepo ha:ha:lalo so dla ya:ta bokotiyapo malamale pato himhalapo,” depo.

<sup>7</sup> Epapedeme wuskamu wua: motoye God dla halopipame ya: yu dla salladepo siyamaiya. Epame Saitenta elemala natili dulu dla kokalepo ha:ha:mama ya: yu dla humatlaiya. Adipalati, wua:ta epapelepiye, Saiten mape wua: tle alikili dla teletlepe.

<sup>8</sup> Epedeme wua: God mateka:pi dla pumulaiya, epalati God mape wua: mateka:pi dla pulupe. Epedeme bobtalimale so wua:, oplamitapo ya: do ullu howahamdiye, wua: ma epammama wua: bobtalimale tle God dla heheletimaiya. Epame momalamale tatlalimale so wua:, wua: dupa duluye howahalomaiya. <sup>9</sup> Epedeme wua: sisiyele koko memelepame ma wua: batalimale koko dla dupa kolle mate a:lemha:ha:iya. <sup>10</sup> Epo God mila:pi tle wuskamu isili dla halopo tutula:iya. Epalati Godta wua:ye di dla ipila:lepe.

*Wa: amkale mikadepe dle oplami koko glademiya*

<sup>11</sup> Epapedeme mikadepe dle so namkadulo, wua: dulu dla wua: amkadulo isikimi mala-atlamiya. Epedeme oplami antapo ya:mkale kokoye isikimi mala-atlepame ya: koko glademama ya:ye batalimale oplami dlepiye, ya: God aiyalmaye batalimana depo. Epedeme epapele oplamiye God aiyalma woloma podolumasemde. Amasiyama ya: ya:skamu koko gladlalo oplami demhalapo. <sup>12</sup> Epapele tlope dulu edla di natiye, hatlo Godtapo aiyalma hatitimalalo halemama koko gladlalo halapo. Epame God hatlo ya:tapo pasakalo gadlalo halemama opa watle yia: batalimale asiyama hapilalo halapo. Epapedeme poka:dena, wa:ta wa: amkale koko glademama ya:ye batalimale oplami dloweye.

*Di iyela dla koko woyamoloweye podimalamana*

<sup>13</sup> Epedeme opa opitapo epo atlamdepo, “Di iyela mo opi dla tame alisisi aya tipo ha:ha:mama sokomoko hatlo dla mani pato tiliwa,” demdepo. Epapedeme opa ipo atlamale so, wua: yu i woloma daliya. <sup>14</sup> Adipalati, wua: powua:malamana, iyela dla koko woyamoloweye. Wua: pasakaloye wuala some halapo. Adipalati, wuala yimka:malata elepo depo ma pakasiyamalalo halemamdiye epapele some halapo. <sup>15</sup> Amasiyama wua: isikimi yu ipo atlowe tlo ka:pi, “Di Lodta solotamelepiye, eta di ha:ha:mama koko i halomha:ha:lowepo,” dlepe. <sup>16</sup> Epapele tlope wua: wata wuskamu di dla halopo hehetamyemama wua:ta halomolowe koko atlamha:ha:po. Epedeme ipo yiskamu di dla halopo hehetamolowe kokoye batalimale kokopo. <sup>17</sup> Epapedeme oplami antapo ka:dle koko halowe mo-ya: malamaletapo ma koko e pahalalo hallepiye, ya: batalimale koko dla mo-tulupo halapo.

## 5

*Alisisi poposatilimale so, wua: wolomape!*

<sup>1</sup> Alisisi poposatilimale so, wua: na: yu daliya. Wua: dupa kolle mate a:lemha:ha:iya. Adipalati, wua: dla wotiyalle kokota puapo. <sup>2</sup> Epapedeme wua: alisisi hapulomaye huhutalemelepe. Epalati wua: tluka alisisiye mututla:ta dlomelepe. <sup>3</sup> Wua: elo mani aya dla kokolupo ha:ha:leta miyelo batalimelepe. Wua: elo mani batalimaletapo wua: bobtalimale kokoye nati-imama apelepe. Epedeme wua: mani bobtalimale etapo koko gladle oloma dla wua:ye dlapa some hamdepo hamastlepe. Epapedeme wua: yeitamale sopo. Wua: adipalati mosukulu alila tlo omha:ha:mama alisisi kokolupo ha:ha:uwa? <sup>4</sup> Epedeme wua: natiya, wua:ta wua: oko sotapo wua: alisisi emale dla oko halomha:ha:lati asiyama pahalopimdena. Epapedeme yia:ta wua: dla allimama God dla gadle yilo a:lemha:ha:po. Epalati di pato Lodtapo yia:ta a:lemha:ha: kokoye ma-dalepo.

<sup>5</sup> Epele dulu dla wua:ta ta:lamo hema ha:ha:uwaye, alisisi poposatilipo ha:ha:mama wua:ta solotamale koko tlo halomha:ha:uwapo. Epedeme wua: aliya halo ipo ta:lati yumme demdiye, wua: aliya epapele some ha:ha:po. Adipalati, wua: wua:ta solotamale koko mate wuskamu me-ilipo teta:lati koko gladlowe oloma dla aliya some poyuluwedeme ha:ha:po. <sup>6</sup> Epame wua:tapo ka:ka:dle so opaye koko gladle dla elemhetame yia: koko gladepame potimaiya demduwapo. Amasiyama opa iwolotapo wua: dla batalimale koko hale pahalomdena.

*Wotiyalle dulu dla dalle mate omha:ha:mama kokalepo ha:ha:iya*

<sup>7</sup> Epedeme mikadepe dle so namkadulo, wua: Lodta puluwe dla dalemha:ha:mama omha:ha:iya. Eye epapena, oplamitapo alisisi empame tiyo hellepo depo omhalemdepo. Tiyotapo helemama ya: alisisi emaleye teta:pame dlowe alisisita teimelepo depame omhalemdepo. <sup>8</sup> Epapedeme alisisi emalalo oplamitapo ya: alisisita matlepo depame omhalemdiye, epammama wua: ma woloma dalle mate omha:ha:mama kokalepo ha:ha:iya. Adipalati, Lodta puluweye mo-mateka:pi halapo.

<sup>9</sup> Epapedeme mikadepe dle so namkadulo, wua: amkadulo watle atlamha:ha:mama “wua:ta batalimale kokota amma,” demha:ha:miya. Adipalati, wua:ta epamha:ha:lepiye, Godta wua: kokoye gladepe batalimale asiyama hamilipe. Epedeme wua: natiya. Koko gladlalo oplamiye mo-kokoloma tala dla halapo.

<sup>10</sup> Epapedeme mikadepe dle so namkadulo, wua: God tle yu hapame molo atlamalalo sota ha:ha:le natipame wua: ma epo ha:ha:iya. Adipalati, yia:tapo Lod hi tle yu atlamsiyamama wotiyalle koko dulu dla woloma sadle mate ha:ha:mduwapo.

<sup>11</sup> Epapedeme opa anawolotapo wotiyalle koko dulu dla kokalepo ha:ha:lepiye, Godta yia: dla siyemhalapo. Epedeme wua: Yob kokoye mo-wua:malamana. Ya: wotiyalle koko dulu dla sadle mate woloma kokalepo haluwapo. Epalati Godta ya: dla siyemama koko hauwaye wua: ma-daluwapo. Adipalati, Lodye opa sikemte bokotiyapo malamhalapo. Ame adipalati, ya: dla ya:mkale polowamale pato elapo.

<sup>12</sup> Mikadepe dle so namkadulo, koko pato itlo woloma daliya. Wua: mikadepe koko atlowedeme omapla di mate epo ta:lamo mate epo alisisi opi mate sesalepame aiyalma posolowa. Epedeme wua: koko hale halowe solotamelepiye, ka:dena, wua: wua:ta solotamale koko hatlo metlo atellepe. Epame wua: koko hale halowe posolotamalalo wekelepiye, ka:dena, wua:ta posolotamalalo wekele koko hatlo metlo atellepe. Adipalati, wua:ta pe-epapalalo ma mepele aiyalma selepiye, Godta wua: koko gladlepe.

### *Inoma sumale kokoye itiyamale kokopo*

<sup>13</sup> Epapedeme wua:ta ha:ha:le dulu dla oplami antapo ya: dla upiyele koko ellepiye, ka:dena, ya:tapo inoma sumale yu God dla otele himilipe. Epame oplami antapo siyele mate hallepiye, ka:dena, ya:tapo siyele sala mate God hi di dla ta:demhallepe.

<sup>14</sup> Epame wua: dulu dla oplami antapo esiyele mate ellepiye, ya: ka:dena, sos dokopala so sisilamoloweye, yia:ta puame ya: dla Lod hi mate dakopala ullu ka:dleta sipame ya:ye inoma sumale mate ta:dlepo depame. <sup>15</sup> Epalati yia:ta mikadepe depame inoma sumale himilipiye, esiyele oplami eta ka:dlepe. Adipalati, Lodta yia:ta inoma sumale yuye dalepame ma-ka:depo. Epapele dulu dla oplami ya: dla batalimale koko hale ellepiye, Lodta oloma medla hiyolepo wellipe.

<sup>16</sup> Epapedeme wuskamu wua: dulu dla wua: bobtalimale kokoye bobotimatipame inoma sumale mate asiyama ta:de asiyama ta:de demha:ha:iya, Godta wua: dulu dla esusulumale so hutiyeye ka:ka:dlepo depame. Adipalati, God mila:pi tle ka:depo hallalo oplamita inoma sumaleye sikemte itiyamana. <sup>17</sup> Epedeme wua: natiya, di mama Ilayaye oplami dia: sepele haluwapo. Ya:tapo tiyo pehellalo hallepo depame inoma sumale kokalle himilati tiyota pehellalo sokomoko dapahatlope gudepo ma mama 6 pololuwapo. <sup>18</sup> Ya: epame ma tiyo hellepo depame inoma sumale kokalle himilati tiyo patota ma heluwapo. Epalati dlowe alisisita matle matauwapo.

<sup>19-20</sup> Epapedeme mikadepe dle so namkadulo, wua: dulu dla oplami haleta mikadepe api tle alikili dla polatullupiye, ka:dena, oplami haleta ya:ye hamame puluwaye. Adipalati, wua: malamaiya, oplami antapo ya:mkaleye batalimale koko tle ma ka:dle api dla sempulupiye, ya: oplami eye kokó elepo ellalo polowe dla tullati ya: pasakalo gademama apelepe. Epalati oloma medla Godta ya: batalimaleye hiyotipo wellipe.



## Pitata yu ilimale

### 1 Pita

### 1 Pita buka ya: dulu koko

Mikadepe dle so opitapo yia:ta mikadepe dle koko tle wotiyalle koko mate epo kokalalimale koko mate dulu dla ha:ha:la natipame Saimon Pitatapo yia: watle gadle yu ilimale iye hamiyo, yia:tapo dulu medla ha:ha:mama sisiyele mate ha:ha:lepo depame. Adipalati, wotiyalle koko mate epo kokalalimale koko matetapo yia:ta mikadepe dle kokoye kokalalimhalapo. Epammama ya:ta yia: watle epo atlaiyo, “Keliso ye ta:lamo hema sela:mama wotiyalle ma-hauwapo. Epedeme mikadepe dle so hapulomatapo wotiyalle epapele halowe dla ma dinapopo ha:ha:lowe ka:pi,” diyo.

<sup>1</sup> Na: Pitapo, Yesu Kelisotapo sepame tane dle oplamipo. Epedeme na:tapo Godta sesalemale so opa hapuloma Pontus mo dla epo Galasiya mo dla epo Kapadokiya mo dla epo Asiya mo dla epo Bituniya mo dla meyelo pe meyelo pe depo hutukuliyapo tame ha:ha: so dla yu ilimale iye hamima. Adipalati, wua:ye ta:lamo pato hema asepe so some ha:ha:po. <sup>2</sup> Epedeme wua:ye Godta ka:yapa mo-malapame ma sesalemuwapo, wua:tapo ya: Soko tle ullu pa:po ha:ha:mama aiyalma depo ha:ha:lepo depame. Epame wua:tapo Yesu Keliso yu dla salladepo siyamama ya: omali tle howahalomale so depo ha:ha:lepo depame.

Godta bokotiyapo malamale mate epo sadle mateta wua: mate kokó hallepe.

*Pasakalo halemhala koko dla dalemha:ha:mama omha:ha:lowe koko*

<sup>3</sup> Epedeme ditapo di Lod Yesu Keliso ya: A God dla siyele ta:dlowe ka:pi. Adipalati, ya:ta di bokotiyapo malamama Yesu Kelisota popo sila:tili koko tle dia:ye mamko so duwapo. Epedeme Pepele dimo dla ka:dle kokota di omela e halowedeme dalemha:ha:mama omha:ha:po. <sup>4</sup> Pepele dimo dla di omela koko eye pobatalimolowa epo popa:lowa, amasiyama kokó mepo ellepe.

<sup>5</sup> Epedeme wua:ta mikadepe dle tle Godtapo ya:ta itiyamale mate wua:ye woloma omhallepe, wua:tapo pasakalo gadlowe halepo depame. Epedeme Godta ya: opa pasakalo gadlowe koko iye mosukulu alila dla opa hapulomata natilipo depame botomastlepe. <sup>6</sup> Epapele dulu dla wata oloma hema wua:ye dupa kolle mate wotiyalle meyelo pe meyelo pe dle dulu dla ha:ha:po. Amasiyama wua: sisiyeiya. Adipalati, wua: pasakalo gadlowe kokota wua: omelapo.

<sup>7</sup> Epedeme dlapatapo gold ewala dla hullu hutiyemde hapuloma hamdepo hamastlati ma isikimi gold ewala ka:dle siyapota halem diye, epapele some kokalalimale kokotapo dia: dla pumdepo, dita mikadepe dle kokoye kokaleta: depo natilowedeme. Godta natili tle wua:ta mikadepe dletapo pa:lalo alisisi gold ewalaye ma-tla:mtale halapo. Epedeme wua:ta mikadepe dle kokotapo me-kokalalipo hutiyelepiye, eta Yesuta puluwe oloma dla Godta wua: dla siyele pato mate hela:dle mate hapimama wua: hiye di dla ta:dlepe.

<sup>8-9</sup> Wua:tapo Keliso ye ponatisemde, epele tlope wua:tapo ya:ye sikemte malamdepo. Epame wua: wata oloma hema ya:ye ala ponatisema. Amasiyama wua:tapo mepele ya:ye mikadepe demdepo. Epedeme wua:ta mikadepe dle kokota tame gudlowe ya: asiyamaye wua:tapo kokó halepo halepo pasakalo halepe. Epapele koko tle wua: dla siyele sikemte patota elapo.

<sup>10</sup> Epedeme ka:yapa ha:ha:uwa God tle yu hapame molo atlamalalo sotapo pasakalo gadlowe koko iye woloma malamolowedeme yia:tapo ya: dulu kokoye woloma to-tamduwapo. Epame yia:tapo Godta bokotiyapo malamale kokota alotle wua: dla puluwe kokoye momolo atlamha:ha:mduwapo. <sup>11</sup> Epalati Keliso ya: Sokotapo yia: dulu dla halemama Kelisotapo wotiyalle hapame ma dokopala depo hallowe kokoye

induwapo. Epapedeme yia:tapo Kelisota adipalalo woyamolowe depame woloma totamha:ha:mdiyoy. Epame oplami anaye Keliso depa: demha:ha:mdiyoy. <sup>12</sup> God tle yu hampame molo atlamalalo so iwolotapo Keliso koko momolo atlamsiyamuwaye, Kelisotapo yia:ta ha:ha:le oloma edla pulupo depame po-apena. Adipalati, koko iye Godtapo isikimi yia: watle imuwapo, Kelisotapo wua:ta ha:ha: oloma hema pulupe depame. Epapedeme wata oloma hema Taiya dle so opata Pepele di tle hamili Hela:dle Sokota itiyamale tle ka:dle yu Yesu Keliso kokoye wua: dla atlamsiyamalati ma-daluwapo. Epedeme banakaka sotapo Godta ya: opa yilo pasakalo gadlowe dinapele koko itapo ya: opa dla adipo woyamolowe depame sikemte solotamale mate natilowedeme omha:ha:mdepo.

*Aiyalma depo ha:ha:lowe koko dla sisilamale*

<sup>13</sup> Epedeme wua: hahamale mate ha:ha:mama wua: moto hohomalalo so depo ha:ha:iya. Epame Yesu Kelisota puluwe oloma edla Godta wua: watle bokotiyapo malamale hapilowe kokota woyamolowe koko dla dalemha:ha:mama omha:ha:iya. <sup>14</sup> Epapedeme God yu dla salladepo siyamama matle wua:ta ka:yapa ha:ha:uwa pasakalo dla ilame tamalemiya. Adipalati, wua: ka:yapa God koko yeitapo ha:ha:mama mota solotamale koko dulu dla ha:ha:uwapo. <sup>15</sup> Epedeme wua: sisilamuwa Godye aiyalmapo. Epapedeme wua: mape koko hapuloma dulu dla mepo aiyalma depo ha:ha:iya. <sup>16</sup> Adipalati, God yu bukata epo atlapo, “Na:ye Aiyalmapo.

Epedeme wua: mape aiyalma depo ha:ha:iya,” depo.

<sup>17</sup> Epapedeme wua:tapo God dla inoma sumha:ha:mama ya: watle A demha:ha:mdepo. Amasiyama ya:tapo opa hapuloma yia: kokoye glademama isikimi yia:ta halomha:ha:le koko mate ala:po gladlepe. Epapedeme wua:tapo ta:lamo hema asepe so some ha:ha:mama God wowota:le mate ha:ha:iya. <sup>18</sup> Adipalati, wua:malamana, wua:tapo ka:yapa wua: mamadulota Keliso dimi ha:ha:uwa pasakalo epapele dulu dla ha:ha:lali Godtapo wua:ye asiyama pato mate elemuwa kokoye. Epedeme Godtapo wua:ye pa:lalo alisisi gold mate epo silba mate pe-elemanana. <sup>19</sup> Amasiyama ya:tapo Keliso omali tle wua:ye me-lemuwapo. Adipalati, Kelisoye God ya: La:m ullu pa:lepo. <sup>20</sup> Epapele koko tle Godtapo ta:lamo ala pokotiyamalalo hallati Kelisoye wua: yilo omali olostlepo depame mo-sauwapo. Epapele tlope Godtapo Kelisoye ta:lamo kotiyamale oloma edla potulune dena. Amasiyama ya:tapo wua:ta ha:ha: oloma dla tulune duwapo. <sup>21</sup> Epedeme wua:tapo Keliso tle ya: A Godye mikadepe demdepo. Adipalati, ya:tapo Kelisoye powale tle ta:depame ma ya: watle hela:dle mate epo itiyamale mate halopiwapo. Epapedeme wua:tapo God dla mikadepe depame ya: tle kokó halepo halepo pasakalo halowedeme dalemha:ha:mama omha:ha:po.

<sup>22</sup> Epapedeme wua:ye watapo ka:dle yu dla salladepo ha:ha: koko tle wua:ye mo-ullu pa:po ha:ha:po. Epedeme wua: watapo bokotiyapo malamale dulu dla ha:ha:mama wua: dupa dulu tle wua: amkadulo mikadepe dle soye asiyama malama asiyama malama demha:ha:iya. <sup>23</sup> Epedeme pasakalo halemhala God yutapo wua: dla pasakalo amkoye ma-hamiwapo. Pasakalo amko iye wua: adulotapo wua: watle halopiwa pasakalo pe-epapena. Adipalati, yia:tapo wua: watle pasakalo hapili iye pa:lepe. Amasiyama God yuta wua: watle hapili pasakaloye popa:lowa. <sup>24</sup> Epapedeme God yu bukata epo atlapo, “Opa hapulomaye osamokolota palimdiye, epapele some ha:ha:po.

Epame matle dali hahata u-uplatipo ha:ha:po ma hapele balladepo tulumdiye, epapele some ha:ha:po.

Epapedeme osamokolo mate epo dali haha matetapo palimha:ha:po.

<sup>25</sup> Amasiyama God yu tlope kokó elepo elapo.”

Epedeme yu eye wua: watle ma-atlamuwa ka:dle yu epo.

## 2

<sup>1</sup> Epapedeme wua: batalimale koko hapuloma tle epame isikimi mala-atlowe koko tle epo ya:skamu pepemhallowe koko tle epo ya:mkale ellewe koko tle epame ya:mkale yu ballowe koko tle alikili dla wowoyamaiya. <sup>2-3</sup> Wua: watapo Lodta halale ka:dle kokoye natipame mo-malamuwapo. Epedeme wua: owayemalatapo ya: wai meme dlowedeme sikemte ta:mhalemdiye, epammama wua:tapo God yuye sikemte dallowe tlo solotamha:ha:iya. Adipalati, wua:ta God yu dalemha:ha:lepiye, etapo wua:ye Keliso dulu dla teta:pame pasakalo gadlowe kokoye halepe.

### *Yesuye pasakalo halemhala alumitipo*

<sup>4</sup> Wua: Yesu Keliso hala dla puaiya. Adipalati, ya:ye pasakalo halemhala alumitipo. Epame Godtapo ya:ye solotapame sale oplamipo. Epapele tlope opatapo ya:ye alimama hamastauwapo. <sup>5</sup> Epedeme wua: mape Godta sesalemale pasakalo halemhala alumiti epapele some ha:hapo. Epapedeme wua: God hala dla pumulaiya, ya:tapo ya: aiyalma ayaye wua: tle halepo depame. Epame wua: mape aya dulu edla ha:ha:mama God ka: epo opa ka: duka dla ha:ha:mama God oko hamha:ha:po. Epedeme wua:ta Keliso dulu dla ha:ha:mama God oko hamha:ha:ye, etapo God dla namkale dle alisisi hamili epapele some halapo. Epedeme koko edla Godta sikemte siyemhalapo. <sup>6</sup> Epedeme God yu bukata epo atlapo,

“Na:ta sale alumitiye Sayon mo dla hitomollowepo.

Amasiyama oplami antapo ya: dla mikadepe dlepiye, ya: wota:le ponatimhallowa,” depo.

<sup>7</sup> Epedeme alumiti eta mikadepe dle so wua: dla koko pato halapo. Amasiyama Keliso koko dla alilalo so dla God yu bukata epo atlapo,

“Aya halalo sota alumiti alimama

alumiti hamastaletapo ma wata aya duka dla molopa kestale some halapo.”

<sup>8</sup> Epame God yu bukata ma epo atlapo,

“Opatapo alumiti edla kustamtame teteyumha:ha:lepe,” depo.

Epedeme opata God yu dla allimama posalladlalo siyama koko tle yia:tapo alumiti hema kustamtame teteyumha:ha:lepe. Eye Godtapo yia: dla mepapelepo depame dinapopo himili kokopo.

<sup>9</sup> Amasiyama wua:tapo God ka: epo opa ka: duka dla ha:ha:mama ya: oko hamha:ha:lepo depame Godta sesalemale so wua:po. Epame wua:ye God ya: opa depame aiyalma depo ha:ha:lalo sopo. Godtapo wua:ye amtuwale dulu dla ha:ha:lali ma ya:ta hela:dle dulu dla elemuwapo, wua:tapo Godta ka:ka:dle koko halomaleye haliyamale dla bobotimatimelepo depame. <sup>10</sup> Wua:ye ka:yapa po-God ya: opa depo ha:ha:na. Amasiyama watapo wua:ye God ya: opa ikadepe depo ha:ha:po. Epame wua: ka:yapa Godta bokotiyapo malamale kokoye pohamana. Amasiyama wata wua:tapo Godta bokotiyapo malamale kokoye ma-hauwapo.

<sup>11</sup> Mikadepe dle so namkadulo, wua:tapo ta:lamo hema ha:ha:mama asepe so some ha:ha:po. Epapedeme na:tapo wua:ye sikemte itiyamale mate atlema, wua:tapo wua: mota solotamale koko dolumsiyamolowe dla aiyalma depo ha:ha:iya. Adipalati, mota solotamale kokotapo wua: sokota solotamale koko mate opahale demhalapo.

<sup>12</sup> Epedeme wua: alikili so dulu dla ha:ha:mama woloma ka:pi ha:ha:iya. Epame dulu edla yia:tapo wua:ye allimama wua: dla batalipo atlamyelati asiyama wua:tapo isikimi ka:ka:dle koko tlo halomha:ha:iya. Adipalati, yia:tapo wua:ta ka:ka:dle koko halomha:ha:la natili koko tle Godta yia: pasakalo gadlowedeme puluwe oloma edla yia:tapo God hiye di dla ta:dlepe.

### *Dokopala so yu dla heodepame salladepo siyamaiya*

13-14 Epapedeme wua: Lod yilo gamani dokopala oplami yu dla epo ya:ta taiya dle so opa yu dla salladepo siyamaiya. Adipalati, gamani sotapo yia: opaye wua: dla taiya demdepo, batalimale koko halomalalo so dla asiyama hapilipo depame. Epame ma ka:ka:dle koko tlo halomalalo so dla siyele hamilowedeme. <sup>15</sup> Epedeme Godta solotamapo, wua:tapo ka:ka:dle koko halomha:ha:lepiye, eta koko yeitalimale sotapo wua: dla batalipo atlamolowe apiye ponatilowa. <sup>16</sup> Epapele dulu dla wua: ka:yapa Saitenta itiyamale dulu dla ha:ha:uwapo. Amasiyama Kelisota itiyamale tle wua:ye dulu etle ma alikili dla eleme woyamuwapo. Epedeme wua:ta epo ha:ha: kokotapo wua:ye ma batalimale koko dla elemtulu demiya. Amasiyama wua: God dla salladlalo so depa ha:ha:iya. <sup>17</sup> Epapedeme wua:ye wua: amkadulo malamale mate ha:ha:iya. Epame mikadepe dle so mate yimkata bokotiyapo malamale dulu dla ha:ha:iya. Epame wua: God wota:mama wua: gamani dokopala oplami yu dla salladepo siyamaiya.

<sup>18</sup> Asiyama pa:le dla oko halalo so, wua: dokopala so dla wowota:le mate yia: yu dla salladepo siyamaiya. Epammama wua: hatlo dokopala so koko ka:ka:dle so yu dla salladepo siyamaiya. Amasiyama wua: dokopala so koko bobtalimale so yia: yu dla ma me-salladepo siyamaiya. <sup>19</sup> Wua: Godta solotamale koko dolumha:ha:lati opata wua: dla koko pa:le isikimi wotiyalle tlo hapilipiye, Godta wua:ye ka:ka:dle so dlepe. <sup>20</sup> Amasiyama wua: bobtalimale koko halomha:ha:lati opata asiyama wua: dla wotiyalle hapilipiye, wua: asiyama apa hali depa:? Hawa. Adipalati, wotiyalle eye wua: batalimale asiyamapo. Amasiyama wua: ka:ka:dle koko halomha:ha:lati opata wua: dla wotiyalle hapilipiye, asiyama Godta wua: dla siyemhalapo. <sup>21</sup> Godtapo wua:ye ipapele koko dla sisilamuwapo. Adipalati, Kelisotapo wua: yilo wotiyalle ma-hauwapo, wua:tapo ya: natipame dolumelepodepame. <sup>22</sup> Adipalati, God yu bukata epo atlapo, “Ya:ye batalimale koko hale pohana.

Epame ya: mati tle bobokolomale yu hale po-atlemsela:mdena,” depa.

<sup>23</sup> Epame opatapo Keliso watle putlomale yu atlamyelati dalepame asiyama ya:tapo yia: watle putlomale yu hale po-atlemdena. Epame opata ya: dla wotiyalle hapimyelati asiyama ya:tapo opata wowota:lepo depame wota:le yu hale po-atlemdena. Amasiyama ya:tapo wotiyalle koko dulu medla isikimi ya: pasakalo tlo God do tama dla himm-duwapo. Adipalati, Godtapo opa hapuloma kokoye woloma ikadepe koko tle glادلalo halapo. <sup>24</sup> Epedeme Kelisotapo di batalimale hapuloma halopame dali yekelemhimili di dla eluwapo, ditapo batalimale koko hapuloma halomha:ha:ye memelepame matle God mila:pi tle ka:ka:dle koko tlo halomha:ha:lepo depame. Epapedeme ya: moto dla ulu hutiyewotiyalletapo wua:ye ma-ka:ka:duwapo. <sup>25</sup> Adipalati, wua:ye muwolo solotamale dla siyamama sipi aliya some dalupa dulu dla mo-haohaodepo ha:ha:uwapo. Amasiyama watapo wua:ye sipi aliya omhallalo oplami dla ma ilame mo-pumuluwapo. Ya:ye wua: pasakalo omhallalo oplamipo.

### 3

#### *Wola: mate epo yia:wolalidulo mate*

<sup>1</sup> Epapedeme wola:, wua:wolalidulo yu dla salladepo siyamaiya. Adipalati, wua:ta epamha:ha:lepiye, wua:wolalidulo opi pomikadepe dle sotapo wua: koko ka:pi e natimama yia: ma God dla mikadepe dlepe. Epapele koko tle oplami haletapo yia:ta mikadepe dlepo depame yia: watle gadle yu hale po-atlowa. <sup>2</sup> Adipalati, wua:wolalidulotapo wua:ta God mila:pi tle ka:ka:depo ullu pa:po ha:ha: e natimama yia: ma God dla mikadepe dlepe.

<sup>3</sup> Epedeme wua:ta kokosase ka:ka:depo kokotipolijemde mate epo tluka ka:ka:depo didiyemde mate epo ka:ka:dle alisisi sokolomale didiyemde koko matetapo wua:ye poka:ka:dena dlowa. Hao. <sup>4</sup> Amasiyama wua: dupa dulu dla ka:depo dinapele kokotapo wua:ye ka:ka:dena demdepo. Eye sadle mate homta hallowe kokopo. Adipalati,

Godtapo koko iye ka:dena demhalapo. Epedeme wua: dupa dulu dla sadle koko mate epo homta hallowe koko mateta hutiyeye popa:lowa. <sup>5</sup> Epapedeme ipapele api tle ka:yapa ha:ha:uwa God dla mikadepe dle so wola:tapo yia: dupa dulu tle ka:depo dinapomha:ha:mama yia:wolalidulo yu dla salladepo siyamduwapo. <sup>6</sup> Epedeme Sela ma epamduwapo. Ya:tapo ya:wolali A:iblahamyemama ma ya: dokopala oplami demduwapo. Epedeme wua: woloma ka:ka:dle koko halomolowe dla powowota:lalo ha:ha:lepiye, wua:ye Sela ya: utukaka ikadepepo.

<sup>7</sup> Epapedeme opa, wua: mape wua: wola: malamale mate ha:ha:iya. Adipalati, yia:ye pase i-itiamana. Amasiyama yia: mape Godta wua: watle hamili pasakalo hatlo meye halopo ha:ha:po. Epedeme wua:ta wua: wola: mate ka:depo ha:ha:lepiye, eta wua:ta alila hapuloma God dla inoma sumha:ha:lowe apiye pohimomollowa.

*Ka:ka:dle koko halomha:ha:lowe yilo wotiyalle halowe*

<sup>8</sup> Epapedeme na:ta ma-atlamuwa kokoye ipo elema. Wua: malamale hatlope depame ya:mkale malamale mate ha:ha:iya. Epammama ya:mkale bokotiyapo malamale mate ha:ha:mama sadle mate ha:ha:iya. <sup>9</sup> Epame wua: amkadulota wua: watle batalimale koko halati asiyama batalimale koko mate yia: watle hademha:ha:miya. Epame yia:tapo wua: watle putlopo atlati wua: mape asiyama yia: watle putlomale yu mate atlamha:ha:miya. Amasiyama wua: yia: watle asiyama isikimi ka:ka:dle koko tlo nati-imha:ha:iya. Adipalati, wua:ta ipapele koko tlo halomha:ha:lepo depame Godta wua:ye sisilamuwapo. Epedeme ya:tapo wua: watle asiyama hapilipe. <sup>10</sup> Adipalati, God yu bukata epo atlapo,

“Oplamitapo alila hapuloma dulu dla siyele mate hallowe solotamelepiye,

ya: ka:dena, ya: mati tle batalimale yu mate epo mala-atlowe yu mate po-atlamhallowa.

<sup>11</sup> Epame ya: ka:dena, ya:ta batalimale koko halomhalaye memelepame matle ka:ka:dle koko tlo halomhallowe.

Epame ya:tapo yimkadulo mate woloma sadepo hallowe kokoye totamelepe.

<sup>12</sup> Adipalati, Lodtapo ka:ka:dle koko halomalalo soye

woloma omhalemama yia:ta inoma sumale yuye dlalemhalapo.

Amasiyama ya:tapo batalimale koko halomalalo so dla kostepo halapo.”

<sup>13</sup> Epedeme ka:ka:dle koko halomhalalo so, wua: dla antapo wotiyalle hamipa:?

<sup>14</sup> Amasiyama epapele tlope wua:ta ka:ka:dle koko yilo wotiyalle halepiye, Lodtapo wua: dla siyemhalapo. Epele dulu dla wua: dla wotiyalle hapilalo so opa dla ase sikemte wowota:miya, epame ase sikemte momalamale mate ha:ha:miya. <sup>15</sup> Amasiyama Kelisota wua: dokopala oplami depa hallepo depame wua: dupa dulu dla hamaiya.

Epame opatapo wua:ta mikadepe dle ya: dulu kokoye dallati yia: watle asiyama yu atlowe dla ma dinapopo ha:ha:iya. Epame wua:ta yia: watle wua:ta mikadepe dle ya: dulu koko atlemama ya:mkale malamale mate epo sadle mate atellepe. <sup>16</sup> Epame wua:ta batalimale koko dulu dla pohaha:lalo wekelepiye, wua: dla batalipo atlamha:ha:lalo sotapo wua:ta Keliso dulu dla ha:ha:mama woloma ka:pi ha:ha: natipame wowota:lepe.

<sup>17</sup> Epapedeme wua:ta poka:ka:dle koko tlo halomha:ha:lali opata wua: dla wotiyalle halopimha:ha:lepiye, Godta asiyama wua: dla siyemhalema: Hao, posiyelowa. Amasiyama wua:ta Godta solotamale dolumha:ha:mama ka:dle koko halomha:ha:lali opata wua: dla wotiyalle halopimha:ha:lepiye, asiyama Godta wua: dla siyemhalapo.

<sup>18</sup> Adipalati, Keliso mape Godta solotamale koko dolumhalemama wotiyalle hauwapo. Ame adipalati, ya: batalimale pa:le oplami tlope, bobtalimale so dia: yilo alila hatlo dla wotiyalle hauwapo, dia:ye God hala dla elempuluwedeme. Epele dulu dla opatapo ya:ye mo-yumuwapo. Amasiyama God ya: Sokota ya:ye ma pasakalo duwapo. <sup>19</sup> Epedeme ya:tapo Soko tle tame amtuwale aya dulu dla ha:ha:lalo soko dla ka:dle yuye atlamuwapo. <sup>20</sup> Iwolotapo ka:yapa Nowata koa timhalale oloma edla



Godta yia:ye sadle mate omhallati yia:tapo ka:dle yu dallowe dla allimduwapo. Epapele koko tle opa hapulomaye yúta poyulati isikimi 8 sotapo koa dulu dla tumama pasakalo gadlowe hauwapo. <sup>21</sup> Epapedeme koko itapo mikadepe dle sota yú tutula:lowe kokoye imapo. Yú tutula:lowe koko itapo di kapala dla ullu hutiyeye howahalepo depame po-aposemde. Amasiyama yú tutula:lowe koko itapo dita Yesu Kelisota popame ma pasakalo dle tle ma dita pasakalo halowe kokoye imapo. Epedeme oplamita yú tulluwe kokoye ipapena. Oplamita God mila:pi tle ka:depo hallowe yilo yú tulumdepo.

<sup>22</sup> Yesu Kelisoye watapo Pepele dimo dla hetame God dowala tiyama dla polapo. Epedeme ya:ta edla pollati banakaka so hapuloma mate epo dokopala so hapuloma mate epo itiyamale soko hapuloma matetapo hatlo ya: dla heodemha:ha:po.

## 4

### *God yilo hallowe koko*

<sup>1</sup> Epedeme Kelisotapo ta:lamo hema sela:mama wotiyalle hauwapo. Epedeme wua: mape wotiyalle halowedeme ma dinapopo ha:ha:iya. Adipalati, wua: wotiyalle dulu dla ha:ha:lepiye, wua: ma batalimale dulu dla poha:ha:lowa. <sup>2</sup> Epapele koko tle wua: matle ta:lamo solotamale koko podolumha:ha:lowa. Amasiyama wua: Godta solotamale koko tlo dolumha:ha:lepe. <sup>3</sup> Adipalati, wua: ala pomikadepe dlalo ha:ha:mama alikili so mate batalimale koko sikemte halomha:ha:mama wola: mate epo opa mate uhalomha:ha:mduwapo. Epame mota solotamale koko dla dolumama daya dele pato himpame kawata yú sikemte dlomha:ha:mduwapo. Epame dota mita:ple god dla sisiyemha:ha:mama sikemte batalimale koko halomha:ha:mduwapo. <sup>4</sup> Epapedeme wua:ta ipapele koko tle alikili dla wowoyapo ha:ha:la natipame alikili so wua: mate siyamduwatapo wua:ye tepelemyemama wua: hi mate putlopo atlamyapo. <sup>5</sup> Amasiyama mosukulu alila dla yia:tapo pasakalo ha:ha: so koko mate epo palli so koko mate glادلalo God mila:pi tle ha:ha:lepe. Epalati ya:tapo yia: koko gladlepe. <sup>6</sup> Epedeme ka:dle yu atlati dallalo so opiye mo-paliwapo. Amasiyama epapele tlope yia: motota palilati yia: sokota God mate kokó ha:ha:po.

<sup>7</sup> Ta:lamo koko hapulomata puame gudlowe alilaye mo-mateka:pi halapo. Epapedeme wua: woloma ka:dle malamale mate ha:ha:mama God dla inoma sumha:ha:iya.

<sup>8</sup> Epame koko hapuloma dulu dla koko patoye ipo. Wua: ha:ha:mama wua: amkaduloye bokotiyapo malamha:ha:iya. Adipalati, koko hapuloma dulu dla bokotiyapo malamolowe kokotapo yimkadulo bobtalimale kokoye wowelimhalapo.

<sup>9</sup> Epame wua: dupa dulu upiyele mate wua: amkaduloye wua: aya dla elemheta demha:ha:miya. Amasiyama siyele mate yia:ye elemhetame daya ilima demha:ha:iya.

<sup>10</sup> Epedeme Godtapo ya: Soko tle wua:ta hapuloma dla oko meyelope meyelope dleye ma-hapiwapo. Epedeme Godta wua: watile oko hapili eye woloma yimkadulo gadlowe yilo oko haiya. Wua:ta epamha:ha:lepiye, Godta bokotiyapo malamale kokoye yia: dla nati-imama apelepe. <sup>11</sup> Epapedeme Godta wa: dla ya: yu atlowe oko hamili hallepiye, wa: woloma God yuye atlamsela:ne. Epame wa: dla yimkadulo gadlowe oko hamili hallepiye, wa: woloma Godta itiyamale tle yimkaduloye gademhalane. Epapedeme ipapele koko hapuloma dulu dla wua:tapo woloma ka:depo halomha:ha:lepiye, koko eta Yesu Keliso tle God hiye di dla ta:dlepe. Epapedeme itiyamale mate epo hela:dle mateta ya: dla kokó elepo ellepe. Koko iye ikadepepo.

### *Mikadepe depo halemama wotiyalle halowe koko*

<sup>12</sup> Mikadepe dle so namkadulo, wotiyalle kokota dlapa some wua: dla pulati nati-mama ase sikemte momalamiya. Adipalati, mo-wua:malamana, wotiyalle koko ipapeleta mikadepe dle so dla pumdepo, yia:ta mikadepe dletapo dulu medla kokalepo ha:ha:lepo depame. <sup>13</sup> Amasiyama wotiyalle koko dulu dla wua: sisiyele mate ha:ha:iya. Adipalati, wua:ta Kelisota wotiyalle hauwa epapele wotiyalle halepiye, asiyama ya:ta

hela:dle mate epo itiyamale mate puluwe alila dla wua:ye sikemte sisiyelepe. <sup>14</sup> Wua:ta Keliso dla mikadepe dle koko dla opata wua:ye tepelemyemama putlomale yu mate atlamelepiye, wua: asiyama isikimi sisiyeiya. Adipalati, God ya: Hela:dle Sokotapo wua: mate hallepe. <sup>15</sup> Epapedeme wua: ya:mkale yumili koko tle epame alisisi uhalë koko tle epo batalimale koko halomhalale tle epo ya:mkale yu balle koko tle wotiyalle koko halepiye, wua: God tle wua:ta wotiyallë ha asiyamaye pohalowa. Adipalati, wotiyalle eye wua: batalimale asiyamapo. <sup>16</sup> Amasiyama wua:ta mikadepe dle koko tle wotiyalle hamama ase wowota:miya. Isikimi wua:ta God ya: akimlala depo ha:ha: koko dla God dla sisiyeiya.

<sup>17</sup> Epedeme koko gladlowe alilaye mo-puapo. Epapedeme Godtapo ya: akimlala ikadepe tle koko gladloweye kotiyamelepe. Godta mikadepe dle so tle koko gladloweye kotiyamelepe dlepiye, ame ka:dle yu dla pomikadepe dlalo so opa dla apa kokota woyapa:? <sup>18</sup> Adipalati, God yu bukata ipo atlapo,

“Ka:ka:dle sota pasakalo gadle halowe dla kokalle natilipiye,

asiyama God alilalo so mate epo batalimale so mate dla adipapopa:?” depo.

<sup>19</sup> Epapedeme Godta solotamale koko dolumha:ha:mama wotiyalle halomalalo so, wua: wotiyalle dulu medla ha:ha:mama wua: mita:plalo God dla hitaha:ha:iya. Adipalati, ya:tapo wua:ye pomeleme tasemde. Epedeme wua: ka:dle koko halomha:ha:loweye melemiya.

## 5

### *God okoye hutulli mate haiya*

<sup>1</sup> Na: wata ma sos dokopala so dla yu atlowama. Na: mape sos dokopala oplami halepo. Epame na: mape Kelisota wotiyalle hauwaye me-natiwa. Epame na: mape wua: mate Kelisota ma ilame puluwe oloma dla yimkata wua: mate Kelisota hela:dle ipi halepe.

<sup>2</sup> Epedeme sipi aliya omhallalotapo ya: sipi woloma omhalemdiye, epammama wua: mape Godta wua: watle hapili mikadepe dle soye woloma omha:ha:iya. Epame wua: yia:ye woloma solotamale mate omha:ha:iya. Epapele dulu dla wua: isikimi asiyama halowe malamale mate ha:ha:mama alli mate yia:ye omha:ha:miya. <sup>3</sup> Epame wua: yia:ye omha:ha:mama sikemte itiyamale mate omha:ha:miya. Amasiyama yia:tapo wua: koko natipo wua: dolumelepo depame wua:ye woloma God mila:pi tle ka:ka:depo ha:ha:iya. <sup>4</sup> Epame Kelisota pulupiye, oloma edla ya:tapo wua: watle sukulu pa:le asiyamaye halopilipe.

<sup>5</sup> Epame amkoteta:le so wua: mape sos dokopala so yu dla salladepo siyamaiya. Epame mikadepe dle so hapuloma, wua: mape wua: amkadulo mate woloma sadepo ha:ha:iya. Adipalati, God yu bukata ipo atlapo,

“Godtapo yiskamu di dla halopo hetlalo so opaye alimhalapo.

Amasiyama ya:tapo yimkadulo mate sadepo ha:ha:lalo so opa dla ya:ta bokotiyapo malamaleye hapimhalapo.”

<sup>6</sup> Epedeme wua: itiyamale God isili tle woloma sadle mate ha:ha:iya. Wua:ta epelepiye, ya:tapo ya:ta himili alila dla wua: dla siyele hamilipe. <sup>7</sup> Epame epele dulu dla ha:ha:mama wua:ta momalamde koko hapulomaye God watle halopiya. Adipalati, ya:tapo wua:ye malamama woloma ka:pi gademhalapo.

<sup>8</sup> Epedeme wua: wolomape, wua: wuskamu woloma omha:ha:iya. Adipalati, wua: dla opahale dlalo oplami Saitenye wua: podlowedeme alikili tle layon esemala some siyaladepo sela:po. <sup>9</sup> Epapedeme wua: mikadepe dle dulu dla kokalepo ha:ha:mama Saiten dla humatlaiya. Adipalati, mo-wua:malamana, wua: amkadulo mikadepe dle sota ta:lamo pato dulu hema wotiyalle koko hatlo metle tamalaye.

<sup>10</sup> Epedeme wua:ta alila kiyele dla wotiyalle dulu dla ha:ha:po gudlepiye, Godtapo wua:ye gademama kokalepo melepame itiyamale hamilipe. Adipalati, ya:tapo wua:ye

sikemte bokotiyapo malamama Yesu Keliso tle kokó halepo hallalo hela:dle dulu dla ha:ha:lepo depame sisilamuwapo. <sup>11</sup> Epapedeme itiyamale patotapo hatlo ya: dla kokó elepo ellepe. Eye ikadepepo.

*Yu mosukulu dla Pitatapo namkale dle yu atlale*

<sup>12</sup> Epedeme na:tapo wua: gadlowe yu kiyele iye mikadepe dle dulu dla na: ei ikadepe some hallalo oplami Saeles mate ilipo hamima. Epedeme na:ta yu ilimale ya: dulu kokoye, Godta bokotiyapo malamale kokopo. Epedeme wua:ye dulu medla kokalepo ha:ha:iya.

<sup>13</sup> Epedeme Godta sale sos Babilon mo dla hala mate epo mikadepe dle dulu dla na: maseyemala some hallalo Maka mate yia:ta namkale dle yuye wua: dla hamima.

<sup>14</sup> Epedeme wua:ta ha:ha:le dulu dla wua: amkadulo mikadepe dle so opi natipame sisiyele mate yia:ye huhulama demha:ha:iya.

Eso. Godta sadletapo Keliso dulu dla ha:ha:lalo so hapuloma wua: mate hallepe.

## Pitata matle yu ilimale

### 2 Pita

### 2 Pita buka ya: dulu koko

Pitata matle yu ilimale hale hamili i ya: dulu kokoye ipapena. Biskapa elemala natilalo so opatapo Yesu Keliso kokoye batalipo imsiyamala natipame ya:tapo mikadepe dle so dla gadle yu iye ilipo hamiyo, ya:tapo ma ya:ta imale dla tullala depame. Epammama ya:tapo mikadepe dle so ewolo dla epo atlaiyo, “Yesu Kelisoye ikadepe ma ilame pulupe,” diyo. Epedeme Pitatapo ya:ta polowe mateka:pi dla tamama gadle yu mosukulu iye ilipo mikadepe dle so dla hamiyo. Adipalati, ya: malamaiyo, ya:ta Yesu Keliso dla mikadepe dle koko tle opata ya:ye yumilipe depame.

<sup>1</sup> Na:ye Saimon Pitapo, Yesu Kelisotapo Taiya dle oko hamilati ya: yu dla salladepo sela:lalo oplamipo. Yesu Kelisota di God halemama di pasakalo gadlalo halapo. Epedeme ya:tapo di watle mikadepe dle ka:dle hamiwa, epapeleye matle wua: watle hamiwapo. Adipalati, ya:ye woloma ka:dle koko siyapo tlo halalo oplamipo. Epapedeme na:tapo wua: watle yu ilimale iye hamima.

<sup>2</sup> Godta bokotiyapo malamale mate epo sadle mateta wua: dla sikemte pasatlati wua:tapo God mate epo di Lod Yesu mate dla malamaleyeye ma-a:ma sikemte ta:mtlepe.

#### *Godta sisilamale pasakalo mate ala:po ha:ha:iya*

<sup>3</sup> Yesutapo Godta itiyamaleyeye hapo halapo. Epedeme dita ya: kokoye malastepo ha:ha:lali ya:tapo di watle itiyamale etle koko hapulomaye ma-hapiwapo, ditapo ka:depo ha:ha:mama Godta solotamale koko dolumha:ha:lepo depame. Epame ya:tapo ya:ta hela:dle mate epo ya:ta ka:depo halale koko dulu tle dia:ye ma-sisilamuwapo.

<sup>4</sup> Epapele koko tle ya:tapo koko patoto ka:ka:dleye di watle hapilowedeme yu itiyapo hatitimuwapo, ditapo yu itiyapo hatitimale itle mota solotamale kokota ta:lamo dla batalimale halopo pumhala tle alikili dla woyapo ha:ha:lepo depame. Epame God some batalimale pa:po ha:ha:lepo depame.

<sup>5</sup> Epapele koko tle mikadepe dle dulu dla woloma ka:depo ha:ha:iya. Epo ka:depo ha:ha:mama ka:depo malamale mate ha:ha:iya. <sup>6</sup> Epo ka:depo malamale mate ha:ha:mama wua: moto ma woloma omha:ha:iya. Epo wua: moto woloma omha:ha:mama wotiyalle dulu dla kokalepo ha:ha:iya. Epo wotiyalle dulu dla kokalepo ha:ha:mama God mila:pi tle ka:depo ha:ha:iya. <sup>7</sup> Epo God mila:pi tle ka:depo ha:ha:mama wua: amkadulo mikadepe dle soye gagademha:ha:iya. Epo wua: amkadulo mikadepe dle soye gagademha:ha:mama opa hapulomaye bokotiyapo malamha:ha:iya. <sup>8</sup> Epedeme ipapele koko hapulomata mikadepe dle so wua: dulu dla pasatepo hutiyelepiye, etapo ka:ka:dle kokota wua: dla dlomoko some milimelepe. <sup>9</sup> Amasiyama oplami antapo ipapele kokota ya: dla pa:po hallepiye, ya:ye inoma pa:le oplami some halapo. Epame Godta ka:yapa ya: batalimale mo-howahauwa kokoye ya: mo-welipo halapo.

<sup>10</sup> Epapedeme mikadepe dle so namkadulo, wua: Godtapo sesalepame sisilamuwa dulu medla ha:ha:lowedeme sikemte itiyamaiya. Wua:ta epapelepiye, wua: poteteyuluwa. <sup>11</sup> Epalati asiyama Godtapo wua:ta di pasakalo gadlalo Lod Yesu Kelisota omhala kokó elepo ellalo mo dla hetlowe apiye dinapelepe.

<sup>12-13</sup> Wua:ta hapulomatapo ikadepe koko dulu dla mo-kokalepo ha:ha:po. Epedeme na:ta atlama koko iye mo-wua:malamana. Amasiyama epapele tlope na: ala popolalo halemama koko iye wua:ta powelilalo me-malaha:ha:lepo depame wua: watle atlama. <sup>14</sup> Adipalati, na:malamana, na:ye pase kokó hallowa. Ame adipalati, na:ta polowe kokoye di Lod Yesu Kelisota na: watle me-imuwapo. <sup>15</sup> Epapedeme na: solotama, koko

hapuloma iye wua: watle imolowedeme, wua:tapo na:ta polati ma alotle ha:ha:mama me-malaha:ha:lepo depame.

### *God yu buka sitali koko*

<sup>16</sup> Epedeme ditapo wua: watle di Lod Yesu Kelisota itiyamale mate puluwe koko atlamsiyamuwaye, isikimi opata esemale kokoye po-atlamsiyamana. Amasiyama ditapo di inoma ikadepe mate ya:ta hela:dle mate epo itiyamale mate natiwapo. <sup>17</sup> Adipalati, A Godtapo ya: hi di dla ta:demama ya: watle siyele hamimama epo atluwapo, “Iye na: dupa ellalo maseyemalapo. Epedeme na: ya: dla siyema,” duwapo. <sup>18</sup> Yu iye dita yimkata Yesu mate aiyalma tamali di dla ha:ha:mama pepele di tle mallati daluwapo.

<sup>19</sup> Epapedeme dimalamana, God tle yu hapame molo atlamalalo sota Yesu Keliso koko dla hatitimuwa yuye ikadepepo. Epapedeme wua: mape ka:dena, yia: yu dla mikadepe diya. Adipalati, yu etapo amtuwale dulu dla tuloma epapele some hela:dle hamimhalapo. Amasiyama utula:lata ma-tlati ma hela:dleta pumama tamili kodlopata wua: dupa dulu dla domolowe alilaye mo-puapo. <sup>20</sup> Epedeme koko patoye ipo elapo. Oplamitapo isikimi ya:ta itiyamale tle God yu buka dla molo atlale yu gladloweye po-ala:na. <sup>21</sup> Adipalati, God yu buka dulu dla molo atlale yu haleta isikimi opata malamale tle popuana. Amasiyama Hela:dle Sokotapo opa dulu dla hallati yia:tapo God tle yu eye hapame ma atlamsiyamuwapo.

## 2

### *Biskapa koko imalalo so*

<sup>1</sup> Amasiyama ka:yapa Isalael so dulu dla biskapa koko imalalo so opaye me-ha:ha:uwapo. Epapedeme biskapa koko imalalo so opa opiye wua: dulu dla ma me-siyamelepe. Epedeme yia:tapo yia: asiyama mate hohomale Lodye alimama hemele God kokoye batalipo imsiyamale tle mikadepe dle soye bobtalimelepe. Epedeme Godta yia: watle asiyama hamiloweye podekellowa. <sup>2</sup> Amasiyama mikadepe dle so opitapo biskapa koko imalalo so yia: batalimale koko dla dolumala natipame ma alikili sota ikadepe Keliso dolumolowe apiye batalimana demyelepe. <sup>3</sup> Epame biskapa koko imalalo so iwolotapo yia:ta elemale tle isikimi wua: mani halowedeme mala-atlamyelepe. Amasiyama Godta yia: koko gladlowe alilaye mo-powataliya himili halapo. Epedeme alila etapo ala yia: dla umula pumhalapo.

<sup>4</sup> Adipalati, God ya: banakaka sota batalimale koko dla tullati Godtapo yia: nati-pame pomelena. Amasiyama Godtapo yia:ye hohopame munamu amtuwale dulu dla ka:ka:timuwapo, yia:tapo edla ha:ha:mama koko gladlowe alilaye omha:ha:lepo depame. <sup>5</sup> Epedeme wua: natiya, ka:yapa Godta ta:lamo pato iye yu mate yuli oloma edla batalimale so opiye pogadena. Amasiyama ka:dle yu atlalo oplami Nowa mate epo ya: mate hatlo koa dulu dla tumulale so <sup>7</sup> mate tlo gaduwapo.

<sup>6</sup> Epame ma alotle Godta Sodom mo mate epo Gomola mo mate poyuli oloma edla dlapatapo hamdepo hamastauwapo. Epedeme ya:tapo koko itle batalimale so dla alotle koko woyamoloweye nati-iwapo. <sup>7-8</sup> Amasiyama wua: natiya, dlapata Sodom mo mate epo Gomola mo mate hamdele oloma edla Godtapo ka:dle oplami hatlo Lot tlo gaduwapo. Adipalati, hatlo ya:tapo opata alila hapuloma dulu dla batalimale koko halomyela natipame alimama dupa kolle mate haluwapo.

<sup>9</sup> Epapedeme wua: natiya, God ya:malamana, ya: opatapo kokalalimale koko dulu dla epo upiyele koko dulu dla ha:ha:lali natipame gadlowe apiye. Epame ya: ma ya:malamana, koko gladlowe alila dla omtamama batalimale so opaye hohopo hal-loweye, yia: koko gladlowedeme. <sup>10</sup> Epedeme opa anawolotapo mota solotamale batalimale koko halomha:ha:mama God dla poheodlalo ha:ha:ma:, Godtapo ewolo dla yia: batalimale asiyama hamilipe.



Epapedeme biskapa koko imalalo so iwoloye wowota:le pa:po yiskamu di dla halopo hehetamsiyamama Saiten ya: banakaka so dla putlopo atloweye powowota:semde. <sup>11</sup> Amasiyama wua: natiya, God ya: banakaka sota biskapa koko imalalo sota itiyamal-eyeye ma-tla:mtame halapo. Epapele tlope yia:ye Lod mila:pi tle Saiten ya: banakaka so dla allimama poputlopo atlamasemde. <sup>12</sup> Amasiyama biskapa koko imalalo so iwoloye moku dla ha:ha:lalo alinepita koko halomalalo epapena. Adipalati, yia:tapo yia:ta pomalamalalo wekele koko mate putlopo atlamyemdepo. Yia:ye opatapo alinepi poyupo dlomdiye, epapele some ha:ha:po. Adipalati, Godtapo yia:ye epo poyulupe.

<sup>13</sup> Epedeme yia:tapo yimkadulo watle wotiyalle halopimha:ha:uwa koko tle asiyama Godtapo yia: watle wotiyalle me-epapele hamilipe. Epame yia:tapo mota solotamale batalimale koko opa inoma dali dla halomolowedeme wowota:le mate po-aposemde. Epame yia:tapo wua: elemale mate wua: mate hatlope depo daya dlomha:ha:po. Epapele koko tle yia:ye batalimale alisisi ullu walle epapele some ha:ha:mama wua: hiye bobtalimha:ha:po. <sup>14</sup> Epedeme yia: alila hapuloma wola: uhalomolowe koko tlo sikemte solotamale hatitipo siyamdepo. Epammama yia: dla batalimale koko halomoloweye pomelesema. Epame yia:tapo opa anawolota mikadepe dle dulu dla pase kokalalimale soye batalimale koko halomelepo depame elemtulumdepo. Epame yia: dupa dulu dla mani ta:le koko mape pato elemdepo. Epapedeme ipapele koko tle yia:ye Godta kasilamale dulu dla ma-ha:ha:po. <sup>15</sup> Yia:ye ikadepe api dolumtlowe mo-melepame ma Beol yami Balamta imale dla dolumtamalapo. Adipalati, ka:yapa Balam itapo asiyama yilo batalimale koko halomhalloweye po-alimdena. <sup>16</sup> Epapedeme Godtapo Balamta batalimale koko halomhala memellepo depame ya: donki aliya yukamolowe yeliyeletapo meyelo yukamaiyo.

<sup>17</sup> Epedeme biskapa koko imalalo so iwoloye yú matale mo-pitalemale some ha:ha:po. Epame mosisitapo wuala dla yulati wualata hahala:po siyamdiye, epapele some ha:ha:po. Amasiyama Godtapo yia: mo dinapeleye munamu ga:tulli amtuwale dulu dla halapo. <sup>18</sup> Adipalati, iwolotapo yia: tlo ka:ka:dena depame yiskamu di dla halopo hehetamsiyamama yu o-opalimsiyamdepo. Epammama opa opitapo ala batalimale dulu dla ha:ha:po depo ma haliyamale dla woyamalati ma asiyama yia:tapo wola: uhalomoloweye ka:dena dle koko tle nomsu some halalepame yia:ye batalimale koko dla ma eleme tulumdepo. <sup>19</sup> Opa iwolotapo imama dokopala so yu dla heodloweye koko pa:na demdepo. Amasiyama epapele tlope yia:ye batalimale kokotapo eleme dokopala depo tapo. Adipalati, wa: apa koko dla salladepo sela:lepiye, koko etapo wa:ye dokopala depo halapo.

<sup>20</sup> Epedeme di pasakalo gadlalo Yesu Keliso dulu dla ha:ha:lalo so opaye ta:lamo batalimale dulu tle ma alikili dla woyapo ha:ha:po. Amasiyama epapele tlope yia:tapo matle ilame tame yia:ta ka:yapa batalimale koko dulu dla ha:ha:uwa dla ha:ha:lepiye, yia:ta ha:ha:le pasakalotapo ma sikemte batalipo hallepe. <sup>21</sup> Epapedeme ka:dena, yia:tapo ka:yapa ikadepe Yesu Keliso kokoye pomalamalalo wekelowe tlo ka:pi. Adipalati, yia:tapo Yesu Keliso kokoye malapame ma i-ilapo tamaluwa kokotapo batalipo halapo. <sup>22</sup> Epedeme ipapele koko tle molo atlale yuta yia: koko dla ipo atlapo,

“Esemalatapo ma ilame tame meyelo mumulli takalaye me-demdepo.

Epame aliyatapo yú mo-hutupame ma ilame tame toto hutumdepo.”

### 3

#### *Yesu ma ilame pulupe*

<sup>1</sup> Mikadepe dle so namkadulo, na: matle yu ilimale hale iye wua: dla hamima. Na:ta wua: dla yu ilalipo hapili dapiyamte dulu hema na: solotama, wua:ta woloma malamale ka:dle halepo depame. <sup>2</sup> Adipalati, na: solotama, wua:tapo God tle yu hapame molo

atlamalalo sota atlamale yu mate epo di pasakalo gadlalo Lod Yesu Keliso yu, Taiya dle sota atlamale mate woloma malaha:ha:lepo depame.

<sup>3</sup> Epedeme wua: koko i woloma malamaiya. Adipalati, mosukulu alila dla God koko dla tepelemyemama putlomale yu mate atlamalalo so opatapo pulupe. Epame yia:ta puame yia: motota solotamale koko hapulomaye halomyelepe. <sup>4</sup> Epame ma yia:ta epo atlamyelepe, “Yesuye ikadepe ma ilame puli duwa? Amasiyama ya: ala popuasema. Adipalati, ta:lamo pato i kotiyapo puwa oloma etle ta:lamo tapo ma pomeyelope dlalo hallati asiyama di mamadulo tlo mo-palimpuwapo,” demyelepe. <sup>5</sup> Epapele koko tle yia:tapo Godta ya: yu tle pepele di mita:ple koko mate epo ta:lamo yu dlu dlu tle hame woyamale koko mate dla mikadepe dloweye allimdepo.

<sup>6</sup> Epedeme amka:yapa God meyelo yu mate ta:lamo pato, oloma edla haluwaye, yumuwapo. <sup>7</sup> Amasiyama God matle wata oloma hema hutiyeye pepele di mate epo ta:lamo mateye dlapatapo hamdlepo depame yu himpo halapo. Epedeme koko iye Godta koko gladlowe alila dla woyamelepe. Epame alila oloma edla ya:tapo batalimale so opa kokoye gladepame batalipo hamastlepe.

<sup>8</sup> Amasiyama mikadepe dle so namkadulo, wua: koko hatlo itlo malamolowe wowe-limiya. Adipalati, God dla alila hatlopeye 1,000 sokomoko epapele some halapo. Epame ma asiyama 1,000 sokomokoye alila hatlope epapele some halapo. <sup>9</sup> Epedeme Lod dla ya:ta koko hali dle koko haloweye podekelena. Amasiyama opa opitapo Lodye dekelema demdepo. Epapele tlope ya: podekelesemde. Adipalati, ya: posolotamasema, oplami hatlota Dlapa mo dla tloweye. Epedeme ya:tapo wua:ta batalimale koko dlu dlu tle malamale meyelo dlepo depame sadle mate wua:ye omhalapo.

<sup>10</sup> Amasiyama Lod ya: alilata puluweye uhalalo oplami some pulupe. Epalati oloma edla pepele diyeye sokomoko some dillimpumama me-pa:lepe. Epalati dlapatapo alisisi hapulomaye hamdemama ta:lamo mate epo dlu dlu edla ha:ha:lalo alisisi hapuloma mate mosukulu hamdepo hamastlepe.

<sup>11</sup> Epapedeme ka:e! Koko hapulomaye dlapata epo hamdepo hamastlepe dlepiye, wua: ka:dena, aiyalma depa ha:ha:mama God mila:pi tle woloma ka:depo ha:ha:iya. <sup>12</sup> Wua: God mila:pi tle ka:ka:depo ha:ha:mama Lod ya: alilata puluwe dla dalemha:ha:mama omha:ha:iya. Wua:ta epapelepiye, eta God ya: alilatapo ma-hapele pulupe. Epedeme alila oloma edla pepele diyeye dlapata hamdlepe. Epalati alisisi hapulomaye alemalleta hamama potulupo hamastlepe. <sup>13</sup> Amasiyama di Godta yu itiyapo himili e dolumama pepele di amko mate epo ta:lamo amko mateta puluwe dla omha:ha:po. Epedeme mo edla isikimi ka:dle koko siyapota meyelo ellepe.

<sup>14</sup> Epedeme mikadepe dle so namkadulo, wua:tapo Lod ya: alilata puluwe dla omha:ha:mama woloma God mila:pi tle ka:depo ha:ha:iya, wua:ta ya: alila dlu dlu ullu pa:talo so depa ha:ha:lepo depame. Epame God mate sadepa ha:ha:iya. <sup>15</sup> Epedeme wua: koko iye woloma malamaiya. Lodye opata pasakalo gadlowe halepo depame sadle mate yia:ye ala me-omhalapo. Epedeme diamkale Polo mape koko hatlo hema Godta ya: dlu dlu ka:dle malamale hamili mate wua: watle me-ilalipo hamiwapo. <sup>16</sup> Epedeme ya:tapo yu ilalimale hapuloma dlu dlu koko hatlo metlo ilalimuwapo. Amasiyama koko opi Polota ilalimale dlu dlu kokalalimale ma me-hutiyepo. Epedeme koko yeitamale so mate epo malamale tatlamale so matetapo Polota yu ilalimale ya: dlu dlu kokoye batalipo hukulumdepo. Epame God yu opi mape mepo batalipo hukulumdepo. Epapele koko tle yiskamu miyelo yia: dlu dlu koko gladleye hame pumdepo.

<sup>17</sup> Mikadepe dle so namkadulo, wua: ipapele kokoye mo-wua:malamana. Epapedeme wuskamu wua:ye woloma omha:ha:iya. Adipalati, batalimale sotapo yia:ta imale koko tle wua:ta kokalepo ha:ha: tle wua:ye ma alikili dlu dlu eleme tlala. <sup>18</sup> Amasiyama wua:ye Lod Yesu di pasakalo gadlalota bokotiyapo malamale mate epo wua:ta ya: malamale

koko mateta wua: dulu dla ta:ta:diya. Epapedeme hela:dle mate epo itiyamale mateta  
Keliso dla kokó elepo ellepe. Koko iye ikadepepo.

## Yonta yu ilimale

### 1 Yon

### 1 Yon buka ya: dulu koko

Elemala natilalo sotapo sos hapuloma dla imsiyamama Yesuye oplami moto hame ta:lamo dla posela:na demsiyamaiyo. Epame yia:ta imale dulu dla batalimale koko halowe ye pokoko demsiyamdiyo. Epame ya:mkale bokotiyapo malamolowe mape pokoko demdiyo. Yia:tapo ipapele imale hamsiyamalati Yesu ya: alotle tlalo oplami hale Yontapo mo-totoyemala halemama koko i natipame yu ilimale iye sos hapuloma dla halopimtaiyo. Adipalati, Yon posolotamaiyo, mikadepe dle so sos hapuloma dla ha:ha:tapo ma elemala natilalo sota imale dla tullala depame. Amasiyama ya: solotamaiyo, yia:tapo ka:yapa Keliso koko dalepo hamuwa koko tlo sikemte kikitilata hamame ha:ha:mama yimkadulo ma sikemte bokotiyapo malamha:ha:lepo depame.

#### *Yesuye Pasakalo Hapilalo Yupo*

<sup>1</sup> Ditapo wua: watle Pasakalo Hapilalo Yu kokoye ilima. Eye ka:yapa kotiyamale sitali ikadepe dla ya:ye haluwapo. Di ya: kokoye dalepame di inomata ya:ye natiwapo. Epame di do mate ya:ye umuwapo. <sup>2</sup> Pasakalo eta haliyamale dla botomastlati di natiwapo. Epapedeme dita ya: natideme dita ya: kokoye haliyamale dla botomastepo atlamsiyamapo. Epedeme ya:ye ka:yapa A God mate haluwapo. Epame dia: watle haliyamale dla botomastauwapo. Epapedeme ya: dla kokó elepo ellalo pasakalo elapo. <sup>3</sup> Epedeme dita dalepame natiwa kokoye wua: watle atlema, wua:tapo dia: mate hatlope dlepo depame. Adipalati, dia:ye A God mate Yami Yesu Keliso mate hatlope depo ha:ha:po. <sup>4</sup> Epapedeme ditapo koko hema wua: mate dia: mate siyele pato ta:dlowedeme yu iye ilipo hamima.

#### *Godye hela:dlepo*

<sup>5</sup> Epedeme dita Keliso tle daluwa kokoye ma wua: watle botomasta ipo. Eye, Godye hela:dlepo. Ya: dla amtuwale hale pe-elasema. <sup>6</sup> Epapele dulu dla dita atlemama, “Di God mate hatlope demde,” depame ma amtuwale dulu dla me-siyamelepiye, dia:ye isikimi mala-atlapo. Epapele koko tle dia: dla ikadepe kokota pe-elasema. <sup>7</sup> Amasiyama Godta hela:dle dulu dla halaye, epammama di ma hela:dle dulu dla ha:ha:lepiye, eta di mikadepe dle so hapulomaye hatlope depo ha:ha:mama apelepe. Epapalati Yami Yesu omalitapo di bobtalimale hapulomaye howahapame hiyostlepe.

<sup>8</sup> Epele dulu dla dita atlemama, “Di bobtalimale pa:talo so,” dlepiye, di diskamu ikadepe koko tle ma alikili dla elemtulupo. Epedeme dia: dla ikadepe kokoye hawa.

<sup>9</sup> Amasiyama epapele dulu dla dita di bobtalimaleye God dla bobotimatimelepiye, ya:tapo di bobtalimale hapulomaye howahapo wellipe. Adipalati, ya:tapo ya: yu itiyapo himili e dolumama woloma ikadepe koko tlo halepe. <sup>10</sup> Epame dita atlemama, “Di bobtalimale koko pahalomasemde,” dlepiye, di Godye isikimi mala-atlalo oplami demama apelepe. Epapele tle God yuta di dupa dulu dla pe-ellowa.

## 2

#### *Kelisoye di gadlalopo*

<sup>1</sup> Na: mamadulo namkadulo, wua:tapo batalimale koko dulu dla tutula:lala depame yu ilimale iye wua: watle hamima. Amasiyama wua: dulu dla haleta batalimale koko dulu dla tullupiye, wua: malamaiya, oplami haletapo dia: tiyama tle halemama God dla dia: yilo otele himhalapo, eye ka:dle oplami Yesu Kelisopo. <sup>2</sup> Epedeme Kelisota di batalimale

dla pomama Godta kasilamaleye mo-pustauwapo. Amasiyama hatlo di batalimale yilo po-apena, hao, ta:la so hapuloma yia: bobtalimale yilo apuwapo.

<sup>3</sup> Epame dita Godta molo atlale yu dla salladepo siyamelepiye, eta dita ya:ye mikadepe dle kokoye nati-imama apelepe. <sup>4</sup> Amasiyama oplami haletapo atlemama, “Godye na:malamana,” depame ma ya:ta molo atlale yuye podolumalalo sela:lepiye, ya:ye isikimi mala-atlemama apelepe. Epedeme epapele oplami dla ikadepe kokoye hawapo. <sup>5</sup> Amasiyama oplami antapo Godta molo atlale yu dla salladepo sela:lepiye, epapele oplamitapo ya: dupa dulu tle God sikemte malamolowe kokoye pato elapo. Epame di ipapele koko tle dita ikadepe God mate hatlope dle kokoye malamdepo. <sup>6</sup> Eye, oplami haleta atlemama, “Na: God mate hatlope depo halema,” dlepiye, ka:dena, epapele oplamitapo Yesuta haluwa pasakalo epapele some hallepe.

<sup>7</sup> Namkadulo, na:ta wua: wadle molo atlale yu ilipo hami iye po-amko. Amasiyama wua:ta ka:yapa mikadepe depame molo atlale yu hamuwaye e ipo. Adipalati, molo atlale yu takala iye wua:ta ka:yapa ma-daluwapo. <sup>8</sup> Epapele tlope molo atlale yu takala hema amko kokoye me-elapo. Adipalati, amko koko ikadepeye Keliso dulu dla epame wua: dulu dla nati-ipo. Epapele koko tle amtuwaleta mo-pa:mtlati hela:dleta modompuapo.

<sup>9</sup> Oplami antapo ya:skamu ya:ye hela:dle dulu dla halema depame ya:mkale mikadepe dle oplamiye elle mate hallepiye, ya: ala amtuwale dulu dla halapo. <sup>10</sup> Amasiyama oplami antapo ya:mkadulo mikadepe dle soye bokotiyapo malamhallepiye, ya:ye hela:dle dulu dla halapo. Epedeme hela:dle dulu edla ya:ta batalimale dla tullupo depame kustame tlowe alisisiye hawapo. <sup>11</sup> Epapedeme dulu edla oplami antapo ya:mkale mikadepe dle oplamiye elle mate hallepiye, ya:ye amtuwale dulu dla halapo. Ya: amtuwale dulu dla sela:mama ya:ta ta apiye ponatisema. Adipalati, amtuwale kokotapo ya: inomaye me-hihimamuwapo.

<sup>12</sup> Epedeme na: mamadulo, na: wua: wadle yu ilimale iye hamima. Adipalati, wua: bobtalimaleye Keliso hi tle me-hihiyoluwapo. <sup>13</sup> Epame adulo, yu ilimale i ma wua: dla hamima. Adipalati, ka:yapa kotiyamale sitali tle haluwa oplami Kelisoye mo-wua:malamana. Epo ma amkoteta:le so, wua: dla yu ilimale iye hamima. Adipalati, wua:tapo batalimale oplami Saitenye ma-tla:mtame ha:ha:po. Epame na: mamadulo, na: ma wua: dla yu ilimale iye hamima. Adipalati, wua: di Aye mo-wua:malamana. <sup>14</sup> Epame adulo yu ilimale i ma wua: dla hamima. Adipalati, ka:yapa kotiyamale sitali tle haluwa oplami Kelisoye mo-wua:malamana. Epo ma amkoteta:le so wua: dla yu ilimale iye hamima. Adipalati, wua:ye itiyamale sopo. Epame God yuta wua: dulu dla ellati wua:tapo batalimale oplami Saitenye ma-tla:mtame ha:ha:po.

### *Ta:lamoko koko dla sikemte solotamolowe*

<sup>15</sup> Epedeme wua: ta:lamoko koko mate epame ya:ta halopo pua alisisi hapuloma mate ase sikemte solotamiya. Oplamitapo ta:lamoko koko dla sikemte solotapo hallepiye, ya: dupa dulu dla A God malamolowe ikadepe hawa halapo. <sup>16</sup> Epapedeme ta:lamoko sikemte solotamale koko tle ipapele kokota woyamelepe. Mota solotamolowe koko, epo ta:lamota halopo pua alisisi tlapame sikemte solotamolowe koko, epame alisisi pasatapo halemama ya:skamu di dla hamhetlowe koko. Epele tlope koko hapuloma iye A God tle popuasema, amasiyama ta:lamota halopo pua kokopo. <sup>17</sup> Epedeme ta:lamoko koko mate epo ya:ta halopo pua koko hapuloma mate pa:lepe. Amasiyama Godta solotamale koko halomalalo so tlo kokó ha:ha:po ha:ha:lepe.

### *Keliso dla humatlalo oplami*

<sup>18</sup> Na: mamadulo wua: daliya. Mosukulu alilaye mo-mateka:pi halapo. Epedeme Keliso dla humatlalo oplamita puluwe kokoye wua: wadle ma-atlamuwapo. Amasiyama Keliso dla humatlalo so opiye wata mo-wowoyapo siyamapo. Di epapele koko tle



malanatipo, mosukulu alilaye mo-mateka:pi puapo depo. <sup>19</sup> Amasiyama opa iwoloye ka:yapa dia: mate hatlope depo siyapame ma di salepo tauwapo. Adipalati, yia:ye ikadepe dia: mate hatlope depo poha:ha:na. Yia:ta dia: mate ikadepe hatlope depo ha:ha:lita ammatiye, eta di posalepo tama. Amasiyama yia:ta di salepo tauwa eta ikadepe yia:ta dia: mate pohatlope dle kokoye botomastauwapo.

<sup>20</sup> Amasiyama wua:ye Kelisotapo Hela:dle Sokoye wua: dla mo-olostauwapo. Epapele koko tle wua:ta hapuloma ikadepe kokoye mo-wua:malamana. <sup>21</sup> Epedeme na:ta wua: dla ilima koko iye wua:ta ikadepe kokoye yeitapo ha:ha:liti po-apsema. Amasiyama ikadepe kokoye mo-wua:malamana. Adipalati, ikadepe koko dulu dla mala-atlowe koko pe-elasema.

<sup>22</sup> Epapele dulu dla anaye isikimi mala-atlalo oplami demdi? Eye oplami antapo Yesuye po-Keliso dlalo halema:, epapele oplamiye isikimi mala-atlalo oplami demdepo. Epedeme ya:tapo Keliso dla humatlalo oplami halapo. Adipalati, ya:tapo A God mate Yami mate dla pokoko desemde. <sup>23</sup> Epapedeme oplami antapo God Yami Yesuye pokoko demhalema:, ya: dulu dla A God ma pahalasema. Amasiyama oplami antapo God Yami Yesuye ya: dupa dulu dla ma-hamuwa, ya: A God ma ma-hamuwapo.

<sup>24</sup> Epedeme ka:dlepo, wua:ta ka:yapa ka:dle yu hauwa eta wua: dupa dulu dla kokó elloye. Epapele dulu dla yu eta wua: dulu dla kokó ellepiye, eta A God mate epo Yami mateta wua: mate hatlope depo hallepe. <sup>25</sup> Epalati Keliso meyelo di watle kokó elepo ellalo pasakalo hamilowedeme yu itiyapo himiwaye hamilipe.

<sup>26</sup> Epapedeme opa opitapo biskapa imale koko hamsiyamalati na:tapo wua: watle yia: kokoye ilipo hamima. <sup>27</sup> Adipalati, wua: dla Kelisota ya: Hela:dle Sokoye mo-olostauwapo. Epedeme Hela:dle Soko eta wua:ye imalalo hallati wua: ma posolotamasema oplami haleta wua:ye imoloweye. Ame adipalati, Hela:dle Soko etapo wua:ye ikadepe koko hapuloma me-imhalapo. Epedeme ya:ta imale dulu dla isikimi ikadepe koko siyapo tlo imhalemama isikimi mala-atlale koko po-imhalasema. Epapedeme wua: Keliso dulu medla mepo ha:ha:iya.

### *God ya: akimlala*

<sup>28</sup> Epapedeme na: mamadulo, wua: Keliso dulu dla mepo ha:ha:iya. Epelepiye, wua:tapo ya:ta puale oloma edla ya: mila:pi tle itiyamale mate wowota:le pa:po ha:ha:lepe. <sup>29</sup> Di Godye isikimi ka:ka:dle koko tlo halomhalemde dlepiye, eta di malamelepe, ka:ka:dle koko halomalalo soye God ya: akimlalapo.

## 3

<sup>1</sup> Di A Godta dia:ye sikemte bokotiyapo malamuwaye woloma malamaiya. Ya:ta bokotiyapo malamale tle dia:ye ya:tapo ya: akimlala demdepo. Epapedeme dia:ye ikadepe ya: akimlala depo ha:ha:po. Epapele koko tle ta:lamo solotamalalo sotapo di kokoye poyia:malamana. Adipalati, yia:ye God koko poyia:malamana. <sup>2</sup> Epedeme namkadulo, di watapo God ya: akimlala depo ha:ha:po. Amasiyama di ala podimalamana, dita alotle adipo ha:ha:pa: dle kokoye. Epapele tlope dimalamana, Kelisota pulupiye, di ma ya: some ha:ha:lepe. Adipalati, ditapo ya: mila:pi ikadepeye natilipe. <sup>3</sup> Epedeme koko hema opa anawolotapo dalemha:ha:mama omha:ha:ma:, ka:dena, yia:ta ullu pa:po Keliso some ha:ha:loweye.

<sup>4</sup> Oplami antapo batalimale dulu dla sela:ma:, ya:tapo Godta aiyalma hatitimaleye hauwokomhalapo. Adipalati, batalimale kokotapo aiyalma hauwokomhalapo.

<sup>5</sup> Wua: mo-wua:malamana, Kelisota puwaye opa hapuloma batalimaleye howahapo welilowedeme puwapo. Adipalati, ya: dla batalimale hale hawa. <sup>6</sup> Oplami antapo Keliso dulu dla halema:, ya: matle batalimale koko dulu dla posela:lowa. Amasiyama oplami antapo batalimale koko dulu medla sela:ma:, ya:ye Keliso kokoye woloma natipame pomalamana.

<sup>7</sup> Na: mamadulo namkadulo, wua: wolomape, opa opita imale tle wua:ye alikili dla elemtulu demiya. Ka:ka:dle koko tlo halomhallalo oplamiye, ya: God mila:pi tle ka:dle oplami depo halapo. Epedeme ya:tapo Kelisota God mila:pi tle ka:dle oplami depo halaye ya: ma epo hallepe. <sup>8</sup> Amasiyama oplami antapo batalimale koko dulu dla sela:lepiye, ya:ye Saiten ya: oplamipo. Adipalati, Saitenye ka:yapa kotiyamama batalimale oplami depo haluwata ala me-halapo. Epapele koko tle God Yamita Saiten ya: oko yumuluwedeme puwapo.

<sup>9</sup> Epedeme opa anawolotapo mo-God ya: akimlala depo ha:ha:ma:, yia: matle batalimale koko dulu dla posiyamolowa. Adipalati, Godta hallalo pasakalo ikadepeye yia: dulu dla halapo. Epedeme yia:tapo ma batalimale koko dulu dla siyamoloweye po-ala:lowa. <sup>10</sup> Epapedeme ipapele koko tle ditapo God ya: akimlala mate Saiten ya: akimlala mate malanatimha:ha:po. Oplami antapo ka:ka:dle koko pohalomalalo halemama ya:mkale mikadepe dle oplamiye pobokotiyapo malamalalo hallepiye, ya:ye po-God yami.

*Ya:mkale sikemte bokotiyapo malamolowe*

<sup>11</sup> Wua:ta ka:yapa imale koko daluwaye ipo. Ka:dena, dita hapulomatapo ya:mkale asiyama bokotiyapo malama ya:mkale asiyama bokotiyapo malama demha:ha:loweye. <sup>12</sup> Wua:ye ipapele koko dulu dla ha:ha:mama Kein some ha:ha:miya. Adipalati, ya:ye Saiten yu dla salladepo sela:mama ya: ei yumuwapo. Epedeme wua: natiya, adipalati Keinta ya: ei yumuwa? Eye ya: natiwapo, ya:ta koko halomhalale hapulomaye bobtalimale siyapo. Amasiyama ya: eita koko halomhalale hapulomaye isikimi ka:ka:dle siyapo. <sup>13</sup> Ipapele koko tle wua: malamelepe, ta:la sotapo wua: dla elle pato himilipiye, ase sikemte malamiya.

<sup>14</sup> Di dita diamkadulo mikadepe dle soye bokotiyapo malamha:ha: koko tle ditapo polowe tle ma pasakalo dla ulumtame ha:ha:ye natipo. Oplami antapo ya: dla ya:mkale bokotiyapo malamale hawa hallepiye, ya:ye ala polowe dulu dla me-halapo. <sup>15</sup> Oplami antapo ya:mkale mikadepe dle oplami dla elle mate hallepiye, ya:ye ya:mkale yumulalo oplamipo. Epapedeme wua: mo-wua:malamana, oplami antapo ya:mkale yumulalo hallepiye, ya: dulu dla halepo halepo pasakalo hawa halapo.

<sup>16</sup> Epapedeme di ipapele koko tle ikadepe bokotiyapo malamolowe kokoye malamapo. Yesu Kelisotapo dia: yilo ya: pasakaloye polowe dla himiwapo. Epedeme di ma ka:dena, dita diamkadulo mikadepe dle so yilo di pasakaloye alikili dla hatitimoloweye. <sup>17</sup> Epapedeme oplami hale alisisi pasataletapo ya:mkale mikadepe dle oplami alisisi pa:le hallati natipame ya: gadlowe allipiye, ya: dupa dulu dla God sikemte malamaleye hawa ikadepepo. <sup>18</sup> Na: mamadulo namkadulo, poka:dena, ditapo isikimi di mati tle ya:mkale bokotiyapo malamolowe kokoye atlamha:ha:loweye. Amasiyama ka:dena, ditapo ya:mkale bokotiyapo malamolowe koko ikadepeye moto mate natiimha:ha:loweye.

*God mila:pi tle wota:le pa:po itiyamale mate ha:ha:lowe*

<sup>19-20</sup> Di diamkaduloye ikadepe sikemte bokotiyapo malamha:ha:lepiye, eta dita ikadepe God ya: akimlala depo ha:ha:ye malamelepe. Amasiyama dita ikadepe God ya: akimlala depo ha:ha: dulu dla di dupa malamaleta di bobtalimaleye nati-ilipiye, di koko edla powowota:lowa. Amasiyama di mepele God mila:pi tle wowota:le pa:po itiyamale mate ha:ha:lowepo. Adipalati, Godta pato halemama di dupa dulu malamaleye tla:mtamhalemama koko hapulomaye malastepo halapo.

<sup>21</sup> Epapedeme mikadepe dle so namkadulo, di dupa dulu malamaleta dia:ye pobatalimale so dlepiye, eta di wowota:le pa:po God mila:pi tle ha:ha:lowepo. <sup>22</sup> Epele dulu dla di apa kokoye ya: dla atlanatilipiye, di koko eye ya: tle halepe. Adipalati, ditapo ya:ta molo atlale yu dolumha:ha:mama ya:ta solotamale koko halomha:ha:po. <sup>23</sup> Epedeme

ya:ta molo atlale yuta ipo atlapo, “Wua: God Yami Yesu Keliso hi dla mikadepe diya. Epame ya:ta imale dolumama ya:mkale asiyama bokotiyapo malama ya:mkale asiyama bokotiyapo malama demha:ha:iya,” depo. <sup>24</sup> Opa anawolotapo Godta molo atlale yu dolumha:ha:ma:, yia:ye ya: mate hatlope depo ha:ha:po. Epame asiyama ya:ye yia: mate hatlope depo halapo. Di ma dimalamana, Godye dia: mate hatlope depo halapo. Adipalati, ya:tapo ya: Hela:dle Sokoye di watle hamiwapo.

## 4

### *Imale hapulomaye heheletimala natiya*

<sup>1</sup> Mikadepe dle so namkadulo, wua: wolomape! Adipalati, biskapa God yu molo atlamalalo so hapuloma watapo ta:lamo pato dla ma-siyamapo. Epedeme oplami haleta puame wua: dla atlemama, “Na:ta imale koko hamsela: iye Soko tle puma,” dlati wua: yipta ya: yu dalepame ya: dla tulumiyu. Amasiyama wua: ya:ta imale hamsela:ye ikadepe God tle puma: depame ya:ye woloma heheletimelepe. <sup>2</sup> Amasiyama wua: yia:ta imale dulu dla God ya: Soko kokoye ipo malanatilipe. Yia:ta imaleta atlemama, Yesuye God tle malame oplami moto hame ta:lamo hema haluwa, dlepiye, eta yia:ta imale kokoye ikadepe God tle puapo. <sup>3</sup> Amasiyama oplami antapo ipapele kokoye po-imalalo wekelepiye, ya:ta imale kokoye God tle popuasema. Ipapele oplami dupa dulu dla Keliso dla humatlalo soko halapo. Keliso dla humatlalo sokoye ta:lamo pato dla pulupe dlati wua:ta dalemha:ha:uwaye, eta wata mo-puame halapo.

<sup>4</sup> Na: mamadulo namkadulo, epapele tlope wua:ye God ya: akimlala ikadepepo. Epedeme wua:tapo biskapa God yu molo atlamalalo sota imale dalepame yia: yu dla potullalo wekuwata wua:ta yia:ye ma-tla:mtauwapo. Adipalati, wua: dulu dla Soko halata itiyamaletapo ta:lamo so dulu dla soko hala itiyamaleye ma-tla:mtame halapo. <sup>5</sup> Biskapa God yu molo atlamalalo so iwoloye ta:lamo sopo. Epedeme yia: alila hapuloma ta:lamo koko tlo esemsiyamapo. Epalati ta:lamo sota yia: yu dla sikemte dalemha:ha:po. <sup>6</sup> Amasiyama di God ya: opa depo ha:ha:po. Epedeme God ya: opa ikadepetapo di yu dalemdepo. Amasiyama po-God ya: opatapo di yuye podalesemde. Ipapele koko tle ditapo ikadepe koko imalalo soko mate isikimi elemala natili koko tle imalalo soko mate malanatimdepo.

### *Godye sikemte bokotiyapo malamalalo halapo*

<sup>7</sup> Mikadepe dle so namkadulo, ka:dena, dita hapulomatapo ya:mkale asiyama bokotiyapo malama asiyama bokotiyapo malama demha:ha:loweye. Adipalati, bokotiyapo malamale kokoye God tle puapo. Epedeme oplami antapo ya:mkale bokotiyapo malamhalema:, ya:ye God ya: maseyemalapo, epame ya:ye God kokoye ya:malamana. <sup>8</sup> Amasiyama oplami antapo ya:mkale pobokotiyapo malamalalo halema:, ya:ye God poya:malamana. Adipalati, Godye sikemte bokotiyapo malamalalo halapo. <sup>9</sup> Epedeme Godtapo dia:ye sikemte ipo bokotiyapo malamuwapo. Ya:tapo Yami hatlopeye ta:lamo dla tulune duwapo, ditapo ya: tle pasakalo hallowe halepo depame. <sup>10</sup> Bokotiyapo malamolowe ikadepe kokoye ipapena. Ka:yapa dita Godye pomalamana, hao. Amasiyama Godta dia:ye sikemte bokotiyapo malamama Yami hatlopeye di watle hamiwapo, ya:tapo di batalimale asiyama halowedeme.

<sup>11</sup> Mikadepe dle so namkadulo, Godta dia:ye adipo sikemte bokotiyapo malamuwa, di ma ka:dena, epo bokotiyapo malamale mate diamkadulo asiyama bokotiyapo malama asiyama bokotiyapo malama demha:ha:loweye. <sup>12</sup> Oplami haletapo Godye ponatina. Amasiyama dita ipo ya:mkale asiyama bokotiyapo malama asiyama bokotiyapo malama demha:ha:lepiye, eta Godye dia: dulu dla hallepe. Epalati ya:ta bokotiyapo malamaleta dia: dulu dla ma-ala:po hallepe.

<sup>13</sup> Di dimalamana, dia:ye God dulu dla ha:ha:po. Epalati asiyama ya:tapo dia: dulu dla halapo. Epedeme di koko iye dimalamana, adipalati, ya:tapo ya: Hela:dle Sokoye

di watle hamiwapo. <sup>14</sup> Epedeme A Godtapo Yamiye ta:lamo hema tulune duwapo, ya:tapo ta:la so pasakalo gadlalo hallepo depame. Epalati ditapo koko iye natipame atlamsiyamapo. <sup>15</sup> Epedeme oplami antapo Yesuye God Yami dlepiye, Godta ya: mate halapo. Epalati ya: mape God mate halapo. <sup>16</sup> Epedeme dimalamana, Godta adipo di bokotiyapo malamuwaye. Epapedeme di ya: dla mikadepe depame ya: dla hitaha:ha:po.

Godye bokotiyapo malamalalo halapo. Epedeme oplami antapo bokotiyapo malamale ya: dupa dulu dla elema:, ya:ye God mate hatlope depo hallati asiyama God mape ya: mate hatlope depo halapo. <sup>17</sup> Ditapo wowota:le pa:po itiyamale mate Godta koko gladlowe alila dla ha:ha:lepo depame ya:tapo bokotiyapo malamale kokoye dia: dulu dla ma-ala:po himiwapo. Adipalati, dia:ye Keliso some ta:lamo hema ha:ha:po. <sup>18</sup> Amasiyama di Godta di watle di batalimale asiyama hamilowe dla wowota:mha:ha:lepiye, ya:ta bokotiyapo malamaleye dia: dla ala po-ala:po halasema. Adipalati, bokotiyapo malamale dulu dla wota:le kokoye hawa. Epame bokotiyapo malamale kokotapo wota:le kokoye yumhalapo.

<sup>19</sup> Dia: dla bokotiyapo malamaleye me-elapo. Adipalati, God tatile dia:ye bokotiyapo malamuwapo. <sup>20</sup> Epedeme oplami haletapo atlemama, “Na: Godye sikemte malamde,” depame matle ya:mkaleye elle mate hallepiye, ya:ye isikimi mala-atlalo oplamipo. Adipalati, ipapele oplamitapo ya:mkale mikadepe dle oplami ya:ta natilaloye pobokotiyapo malamalalo hallepiye, ya: ma ya:ta ponatilalo wekele Godye adipo malapa:? <sup>21</sup> Molo atlale yu iye Kelisota di watle hamiwapo. Oplami antapo Godye sikemte malahallepiye, ya: ma ka:dena, ya:mkale mikadepe dle oplamiye sikemte bokotiyapo malamhallepe.

## 5

### *Mikadepe dle kokotapo ta:lamo koko itiyamaleye tla:mtelepe*

<sup>1</sup> Epedeme oplami antapo Yesuye Godta sale Keliso dlepiye, ya:ye God yamipo. Epame oplami antapo Aye sikemte malahallepiye, ya: mape A Yamiye sikemte malahalapo. <sup>2</sup> Di God sikemte malaha:ha:mama ya:ta molo atlale yu dla salladepo siyamelepiye, eta dita God ya: akimlala dla bokotiyapo malaha:ha: kokoye nati-imama apepepe. <sup>3</sup> Adipalati, God sikemte malamolowe ya: dulu kokoye ipo. Ditapo ya:ta molo atlale yu dla salladepo siyamelepe. Epedeme ya:ta molo atlale yuye dia: dla pase upiyena. <sup>4</sup> Epedeme God ya: akimlalatapo yia:ta mikadepe dle tle ta:lamo kokota itiyamaleye ma-tla:mtame ha:ha:po. <sup>5</sup> Epapedeme oplami antapo ta:lamo kokota itiyamaleye tla:mtapa:? Eye oplami antapo Yesuye God yami demhalema:, epapele oplamitapo ta:lamo kokota itiyamaleye ma-tla:mtame halapo.

### *Halepo halepo hallowe pasakaloye Yesu dla elapo*

<sup>6</sup> Yesuye ta:lamo dla puame yú tuluwapo. Epame polowe dla ya: omali olostauwapo. Epapedeme Yesuta ta:lamo hema puwaye hatlo yú tulluwedeme popuana. Amasiyama yú tulupame omali olostlowedeme puwapo. Epalati Hela:dle Sokotapo koko hema di watle ikadepe koko atlapo. Adipalati, Hela:dle Sokota isikimi ikadepe koko tlo atlamhalapo.

<sup>7</sup> Dapahatlope koko iwolotapo Keliso koko dla imapo. <sup>8</sup> Eye Hela:dle Soko mate epo yú tulli koko mate epo omali olostale koko mateta di watle Keliso kokoye botomastapo. Epammama dulu edla haleta koko hale meyelo po-imasema. <sup>9</sup> Di solotamdepo, opa opita yia:ta tlamale kokoye di watle atlamalati dalepame mikadepe dlowedeme. Epapele dulu dla ka:dena, Godta di watle atlamhala koko tlo sikemte kikitilata hamoloweye. Adipalati, ya:tapo di watle Yami koko dla ikadepe koko atluwapo. <sup>10</sup> Epedeme opa anawolotapo God Yami dla mikadepe depo ha:ha:ma:, Godtapo Yami koko dla ikadepe atlale yuta yia: dupa dulu dla elapo. Amasiyama opa anawolotapo Godta Yami koko dla ikadepe atlale yu dla pomikadepe dlalo ha:ha:ma:, yia:tapo Godye isikimi mala-atlalo

oplami demha:ha:po. <sup>11</sup> Epedeme Godtapo di watle Yami koko dla ikadepe atluwa yuye ipo. Godtapo di watle halepo halepo hallowe pasakaloye hamiwapo. Pasakalo eye Yami dulu dla elapo. <sup>12</sup> Epedeme oplami antapo Yami Yesuye ma-hamuwa, ya: dla pasakalo eye me-elapo. Amasiyama oplami antapo God Yamiye pohamalalo wekuwa, ya: dla halepo halepo hallowe pasakaloye pe-elasema.

*Yonta mosukulu yu atlale*

<sup>13</sup> Epedeme na: God Yami dla mikadepe dle so wua: watle yu ilimale iye hamima, wua:tapo halepo halepo hallalo pasakalo hauwa kokoye malamelepo depame.

<sup>14</sup> Epedeme di ikadepe dema, dita inoma sumale dulu dla dita solotamale kokoye ya:ta solotamale mate ala:po atlepiye, ya: di yu dallepe. <sup>15</sup> Epele dulu dla ya:ta di inoma sumale yuye alila hapuloma dalemhalema dlepiye, di dimalamana, dita apa kokoye ya: dla dalla natilipiye, ya:ta alisisi eye di watle ma-hamimdepo.

<sup>16</sup> Epame oplami antapo ya:mkale mikadepe dle oplamiye popolowe dla semtullalo batalimale koko hamhallati natilipiye, ka:dena, ya:tapo oplami e yilo inoma sumale yu himilipe, Godta ya: pasakalo gadlepo depame. Epapedeme na:ta atla koko iye oplamiye popolowe dla semtullalo batalimale koko tlo atlema. Amasiyama polowe dla semtullalo batalimale kokoye me-elapo. Epedeme na:ta atla kokoye polowe dla semtullalo batalimale koko halalo oplami yilo inoma sumelepo depo po-atlasema. <sup>17</sup> Epapele dulu dla dimalamana, poka:ka:dle koko hapulomaye batalimalepo. Amasiyama epapele tope oplami popolowe dla semtullalo batalimale koko ma me-hutiyepo.

<sup>18</sup> Epedeme dimalamana, oplami antapo God yami depo halema:, ya: matle batalimale koko dulu dla posela:lowa. Adipalati, God Yamitapo ya:ye woloma omhalapo. Epalati batalimale oplami Saitentapo ya:ye pobatalimolowa.

<sup>19</sup> Epame di dimalamana, dia:ye God ya: akimlalapo. Amasiyama ta:lamo pato iye Saitenta omhalapo.

<sup>20</sup> Epame di ma dimalamana, God Yamitapo mo-puwapo. Epame ya:tapo di watle ka:depo malamaleye ma-hamiwapo, ditapo ikadepe God koko tlo malastlepo depame. Epedeme ditapo ikadepe God mate epo Yami Keliso mate hatlope depo ha:ha:po. Epedeme Yesuye ikadepe Godpo. Epapedeme ya: dla halepo halepo hallowe pasakalo kokoye elapo.

<sup>21</sup> Epedeme na: mamadulo namkadulo, wua: wuskamu woloma omha:ha:mama biskapa god dla mikadepe dlalimiya.



## Yonta matle yu ilimale

### 2 Yon

### 2 Yon buka ya: dulu koko

Ka:yapa God yu hamsiyamama opa imsiyamalalo sotapo mo hale tle ma mo hale dla ta demsiyamama God yu hamsiyamaiyo. Epalati mo dulu dla mikadepe dle sota yia:ye woloma ka:pi gagademdiyo. Amasiyama God yu hamsiyamalalo so dulu dla biskapa koko imalalo so alumale mape me-siyamaiyo. Epalati Taiya dle oplami hale Yonta koko i natipame mikadepe dle sotapo biskapa koko imalalo soye gadlala depame yu iye ilimaiyo.

<sup>1-2</sup> Wua: mama pato na:tapo Godta sale wai mate ya: yimlala mate dla yu ilimale iye hamima. Na: wua:ye sikemte malahalema. Hatlo na:ta wua:ye sikemte pomalaha-lasema, amasiyama ikadepe koko malamale so opi mape wua:ye sikemte malaha:ha:po. Adipalati, ikadepe koko di dupa dulu dla ela itapo dia: dla kokó elepo ellepe.

<sup>3</sup> A Godtapo Yami Yesu Keliso mate di watle bokotiyapo malamale mate polowamale mate epame sadle mate hapilipe. Adipalati, ditapo ikadepe koko dla mikadepe depame yimkaduloye bokotiyapo malamale mate ha:ha:po.

<sup>4</sup> Wa: yimlala opitapo Ata molo atlale yu dla ikadepe depame dolumtauwo dla dalepame na: sikemte siyeuwa. <sup>5</sup> Epedeme wai namkale, yu ilimale iye wa: dla po-amko desema. Amasiyama dita ka:yapa daluwa bokotiyapo malamale kokoye e atlemama amma. Epedeme ka:dena, dita hapulomata asiyama bokotiyapo malama asiyama bokotiyapo malama demha:ha:loweye. <sup>6</sup> Epapedeme bokotiyapo malamale ya: dulu kokoye ipo. Ditapo Godta molo atlale yuyé woloma dolumha:ha:loweye. Adipalati, ka:dena, wua:tapo God sikemte malamale mate ha:ha:mama ya:mkale asiyama bokotiyapo malama ya:mkale asiyama bokotiyapo malama demha:ha:loweye. Epedeme wua: ka:yapa koko iye ma-daluwapo.

<sup>7</sup> Epedeme biskapa koko imalalo so hapulomatapo wata ta:lamo pato hema me-siyamapo. Ipapele opatapo Yesu Kelisota ikadepe oplami moto hapame ta:lamo hema sela:uwaye po-imasemde. Oplami antapo ipapele koko imsela:lepiye, ya:ye elemala natilalo oplamipo, epame ya:ye Yesu dla humatlalo oplamipo. <sup>8</sup> Epedeme wua: wolomape, biskapa koko imale dla tulumama wua: God tle asiyama pohalalo wekelala depame. Epapedeme wua: asiyama halowedeme wuskamu woloma omha:ha:mama kokalepo ha:ha:iya. <sup>9</sup> Amasiyama oplami antapo Kelisota imale dulu dla pohallalo ma imale hale dla hallepiye, ya:ye God mate pohalasema. Amasiyama oplami antapo Kelisota imale dulu dla halema:, ya:ye A God mate Yami mate hatlope depo halapo. <sup>10</sup> Epapedeme oplami antapo Kelisota imale koko pohampulalo ma imale hale ham-pulupiye, wua: ya:ye namkale depame wua: aya dla semhetamiya. <sup>11</sup> Adipalati, oplami antapo ipapele oplami mate namkale dlepiye, ya:tapo ya: mate batalimale oko ipiye hapo.

<sup>12</sup> Eso namkadulo, na: wua: dla atlamolowe koko opi ma me-hutiyema. Amasiyama na: posolotamasema, yu ilimale tle wua: dla atlamoloweye. Adipalati, na: solotama, monolo puame wua: mate yukamolowedeme. Epedeme na:ta edla pulupiye, eta dita yimkata siyele ta:dlowepo.

<sup>13</sup> Eso namkale, wa: nana Godta sale ya: yimlalatapo yia:ta namkale dle yu wa: dla atlema.

## Yonta matle dapahatlope oloma dla yu ilimale

### 3 Yon

### 3 Yon buka ya: dulu koko

Yontapo yu ilimale iye ya:mkale mikadepe dle oplami Gaiyus watle hamiyo. Adipalati, Gaiyustapo God yu imsiyamalalo sota ya: mo dla tlati gadle koko dalepame. Epame sos dokopala oplami Diyotloipas watle ya:ta alli yuye hema ilimaiyo. Adipalati, oplami itapo God yu imsiyamalalo soye gadlowe alimama opa opita yia: gagadlala depame humatlemhalemdiyo.

<sup>1</sup> Namkale Gaiyus, wa: mama na:tapo wa:ye sikemte malamama wa: watle yu ilimale iye hamima.

<sup>2</sup> Namkale, na: mikadepe dema, wa:ye esiyele dulu dla pohallalo woloma ka:depo halayo. Amasiyama na: wa: yilo inoma sumale yu himima, wa:tapo koko hapuloma dulu dla ka:depo hallepo depame. Epele tlope na:malamana, wa:ye mikadepe dle koko dulu dla ka:depo halapo. <sup>3</sup> Epame mikadepe dle so namkadulo opitapo puame wa:ta ikadepe koko dla kikitilata hampame e dolumhala kokoye atlati dalepame na: sikemte siyeuwa. <sup>4</sup> Epapedeme koko opi patotota na: dla siyele pato pohamisemde, amasiyama na: mamadulotapo ikadepe api dolumtlati natipame na: dla sikemte siyele elemde.

<sup>5</sup> Namkale, wa:ta ka:dle yu imsiyamalalo sota imsiyamama wa: mo dla asepe so some pumullati wa:ta yia: gagademhalaye e ka:pipo. <sup>6</sup> Epame yia:ta wa:ta bokotiyapo malamale mate hala kokoye di sos hema puame atluwa. Wa: God yu imsiyamalalo sota wa: mo dla pumulupo ma mo-tlowedeme popa:lati yia:ta api duka dla dlomtlowe alisisi halopimama Godta ka:dena dle koko mate ala:po halopi demhallepe. <sup>7</sup> Adipalati, yia: Keliso yilo oko hamsiyamama pomikadepe dle so tle alisisi pohalomasemde. <sup>8</sup> Epedeme ka:dena, dita ipapele soye woloma gagademha:ha:loweye. Dita ipapele so gagademha:ha:lepiye, eta di ma Keliso oko ipi hamama apelepe.

<sup>9</sup> Ipapele koko dla na: sos edla yu ilimale ma-hamiwa. Amasiyama Diyotlopasta di yu e dalepame poheodena. Adipalati, ya: sikemte solotama, wua: dulu dla ya:tapo sos edla dokopala hallowedeme. <sup>10</sup> Epedeme na:ta pulupiye, ya:ta poka:ka:dle koko halomhalemama di kokoye isikimi mala-atlemhaluwaye haliyamale dla atlowepo. Epame koko hatlo itlo pohana. Amasiyama ya: God yu imsiyamalalo so mape ya: mo dla pumullati ya:ta humatlamdepo. Epame matle sos sota God yu imsiyamalalo so ewolo gagadlowedeme apalati ya:ta yia: ma humatlamdepo. Epapele dulu dla sos so opita ya: yu dla poheodlalo God yu imsiyamalalo so gadlati ya:tapo yia:ye sos dulu dla ha:ha:ye hi kotimdepo.

<sup>11</sup> Epapedeme namkale, batalimale oplami koko natipame ya: koko dolumiya. Amasiyama koko adi tlo ka:deta:, etlo halomhalane. Oplami antapo ka:ka:dle koko tlo halomhalema:, ya:ye God mate hatlope depo halapo. Amasiyama oplami antapo batalimale koko halomhalema:, ya:ye God koko yeliyepo halapo.

<sup>12</sup> Epapele dulu dla di natipo, opa hapulomatapo oplami Damatliyos kokoye ka:dena demyapo. Epame ya:ta moto mate koko halëtapo ikadepe koko mate ma-ala:po. Epo di mape ya:ye ka:dle oplami demdepo. Epedeme wa: mo-wa:malamana, dia:ye ikadepe koko tlo atlamdepo.

<sup>13</sup> Eso namkale, na: dla koko opi wa: watle atlamoloweye me-hutiyema. Amasiyama na: posolotamasema, yu ilimale tle wa: dla atloweye. <sup>14</sup> Na: solotama, monolo puame wa: mate yukamolowedeme.

<sup>15</sup> Epedeme saddle kokotapo wa: mate hallepe. Epame wa: amkadulotapo wa: watle yia:ta namkale dle yu atlema. Epedeme asiyama wa:tapo dia: amkadulo edla ha:ha: so watle dita namkale dle yu atlamtane.

## Yudata yu ilimale Yuda Yuda buka ya: dulu koko

Yuda buka ilimalalo oplami iye Yesu ya: ei Yudas mle. Epapeleye ya: tapo mikadepe dle so hapuloma dla gadle yu iye ilipo hamiyo, yia: tapo biskapa imale dla tullala depame. Adipalati, ya: natiyo, biskapa koko imalalo sotapo mikadepe dle soye alikili dla elemtlati.

<sup>1</sup> Na:ye Yuda, Yesu Keliso ya: oko oplamipo, epame Yeims ya: eipo. Na: tapo A Godta sesalemale so wua: dla yu ilimale iye hamima. Adipalati, A Godtapo wua:ye bokotiyapo malamama wua:ye Yesu Keliso yilo woloma omhalapo. <sup>2</sup> Epedeme Godta polowamale mate sadle mate epame bokotiyapo malamale mateta wua: dla sikemte pasatepo hallepe.

### *Biskapa imalalo so koko dla molo yu atlale*

<sup>3</sup> Mikadepe dle so namkadulo, na: tapo dita God tle pasakalo gadle halomuwa kokoye mo-powataliya wua: watle ilipo hamilowe solotamuwa. Amasiyama na: ma koko hale dla yu ilimale iye ilipo hamima, wua: tapo Godta ya: opa dla hamili mikadepe dle dulu dla kokalepo ha:ha:mama biskapa sota imale koko tlo hamastlepo depame.

<sup>4</sup> Adipalati, biskapa koko imalalo sotapo hemele wua: alumale dulu dla mo u-ulapo tuwame ha:ha:po. Epedeme opa iwolota imama Godta di polowamale koko dulu dla dita batalimale koko haloweye pohumatlasema. Isikimi dia: dla wola: mate opa mate uhalomolowe koko dla kokoloma me-dokostame elema demdepo. Epame ma yia: tapo di dokopala oplami Lod Yesu Keliso dla allimdepo. Amasiyama Godtapo ipapele so opa koko gladlowe dla mo-powataliya yu himiwapo.

<sup>5</sup> Epapele dulu dla na: tapo mo-wua: malamale kokoye matle wua: dla woloma imolowe solotama. Epedeme wua: malamaiya, Lodtapo Isalael so gademama Isip mo tle alikili dla eleme woyamuwapo. Amasiyama ma alotle Isalael so opa opi ya: dla pomikadepe dle soye ya: tapo mo-potimuwapo.

<sup>6</sup> Epame wua: koko hale i malamaiya. Banakaka so opitapo Godta yia: watle hamili itiyamale e mate oko halowe posolotamalalo isikimi matle itiyamale pato halowe tlo solotamama Godta yia: dla hamili mo saliyome tamaluwapo. Epalati Godtapo yia:ye oli dea mate yulupame munamu amtuwale dulu dla ka:ka:tipo halapo, mosukulu alila dla yia: koko gladlowedeme.

<sup>7</sup> Epame wua: matle Sodom mo mate epo Gomola mo mate epame mo yimlala opi yia: mateka:pi dla popa:myale yia: koko malamaiya. Adipalati, mo hema opa mate epo wola: mate uhalowe batalimale kokotapo pasatepo elemama yia: moto dla batalimale koko opiye ma-halomduwapo. Epedeme mo iwolotapo itapu dla wotiyalle kokotapo batalimale koko halomalalo so dla puluweye imapo. Wotiyalle koko iye kokó elepo ellalo Dlapa kaulapo.

<sup>8</sup> Epapele api tle biskapa koko imalalo so iwolo mape yia: ma mepamdepo. Yia: tapo yiskamu yia: tlo milamalo tlamalalo so demha:ha:mama yiskamu yia: moto dla batalimale koko mate hakaka apomdepo. Epame yia: tapo God dla poheodlalo ha:ha:mama soko hapuloma dla putlopo atloweye powowota:semde. <sup>9</sup> Amasiyama epapele tope banakaka so yia: dokopala oplami Maikoltapo Saiten mate Moses moto yilo yu dele oloma edla ya: tapo yu batalimale hale po-atlana. Amasiyama ya: isikimi Saiten watle yu ipo atluwapo, "Godtapo wa:ye sikemte atellepe," duwapo. <sup>10</sup> Amasiyama opa iwolotapo yia:ta pomalamalalo wekele koko mate putlopo atlamyemdepo. Epame yia:ye moku dla ha:ha:lalo alinepita yia:ta solotamale koko tlo halomha:ha:mdiye, epapele some

ha:ha:po. Epedeme yia:ta solotamale koko halomha:ha: koko itapo yia:ye batalipo hamasta demhalapo.

<sup>11</sup> Epapedeme yia:ye yimkadulo! Yia:tapo Kein api dla mo-dolumuwapo. Adipalati, Keintapo ya: ei yumuwapo. Epame yia:tapo Balam koko natipame dolumama mani yilo batalimale koko halomha:ha:po. Epame yia:tapo Kola koko natipame dolumha:ha:mama God yu dla poheodemha:ha:sema. Epedeme Godtapo yia:ye po-timelepe.

<sup>12</sup> Epedeme opa iwolotapo wua:ta malamale daya dele dulu edla yiskamu yia: tlo sikemte malamama wowota:le pa:po daya sikemte dlomdepo. Epapele koko tle yia:ye batalimale alisisi ullu walle epapele some ha:ha:mama wua: hiye bobtalimha:ha:po. Epame yia:ye pepele dita gillistame elepo depo ma tiyo hellowedeme dikipo pumdiye, epapele some ha:ha:po. Epame yia:ye dlomoko dalitapo dlomoko pomilimalalo ha:ha:mdiye, epapele some ha:ha:po. Epame yia:ye dali mo-palli alikili dla popotatipo pololemdiye, epapele some ha:ha:po. <sup>13</sup> Epapedeme kaula dla ulo patotota sillimama atuluta di tle kampumdiye, epammama yia:tapo yia: batalimale koko mate haliyamale dla epo nalati-imdepo. Epame yia:ye omapla di dla yeitamsiyamalalo tamili epapele some ha:ha:mama kokó elepo ellalo munamu ga:tulli amtuwale dulu dla tulluwedeme tamalapo.

<sup>14-15</sup> Epedeme A:dam ya: mamadulo dulu dla 7 oloma dla hallalo oplami Inoktapo ipapele so opa koko dla momolo atlemama epo atluwapo, “Wua: natiya. Lodtapo ya: opa sikemte pasatale mate puapo, ta:la so opa hapuloma yia: koko gladlowedeme. Epame ya:tapo God mate opahale demha:ha:mama ya: dla batalimale koko halomha:ha: so opaye koko gladla puapo. Epame ya:tapo God pomalamalalo wekele so opata ya: putlopo atlamyelalo so dla asiyama hamila puapo,” duwapo.

<sup>16</sup> Epapedeme yia:tapo yia:ta alli kokoye botomastamama yimkadulo yuye balem-siyamdepo. Epammama yia:tapo mota solotamale koko dla dolumsiyamama yiskamu yia: tlo ala:na depame yiskamu di dla halopo hehetamsiyamdepo. Epame ma yia:tapo opa opi tle yia:ta solotamale alisisi halomolowedeme yu sikemte o-opalimyemdepo.

*Wuskamu wua: motoye Godta bokotiyapo malamale dulu dla hatitipo ha:ha:iya*

<sup>17</sup> Epedeme namkadulo, wua: di Lod Yesu Kelisota Taiya dle sota momolo atlamuwa kokoye malamaiya. <sup>18</sup> Adipalati, yia:tapo wua: dla ipo atluwapo, “Mosukulu alila dla God koko dla tepelemyemama putlomale yu mate atlamalalo so opatapo pulupe. Epame yia:ta puame yia: mota solotamale koko hapulomaye halomyelepe,” duwapo. <sup>19</sup> Epedeme opa iwoloye mikadepe dle so dulu dla hukullalo sopo. Epame yia: mape ta:lamo koko dla solotamalalo sopo. Epedeme Hela:dle Sokoye yia: dulu dla pohalasema.

<sup>20-21</sup> Amasiyama mikadepe dle so namkadulo, wua: pasakaloye wua:ta mikadepe dle tama di dla aya some haiya. Epame Sokota itiyamale tle inoma sumha:ha:mama Godta bokotiyapo malamale dulu dla ha:ha:iya. Epame Lod Yesu Kelisota bokotiyapo malamale tle wua: dla hamili kokó ellalo pasakaloye halowedeme dalemha:ha:mama omha:ha:iya.

<sup>22</sup> Epame mikadepe dle dulu dla malamale tatlamale mate ha:ha:lalo opaye polowamha:ha:mama gagademha:ha:iya. <sup>23</sup> Epame wua: amkadulota Dlapa mo api dla tamallati natipame ma ikadepe api dla elempumulaiya. Epedeme wua: amkadulota batalimale koko dla tullati yia:ye woloma polowamale mate gagademha:ha:mama wuskamu wua: ma woloma omha:ha:iya, wua:tapo yia: batalimale koko hatlo medla tullala depame.

*God hi di dla ta:diya*

<sup>24</sup> Godye itiyamana. Epedeme ya:tapo wua:ta teteyulala depame gadlepe. Epame ya:ye ala:na, ya:tapo wua:ye ullu pa:talo so depame ya:ta hela:dle dla elempupame



wua: dla siyele pato hamiloweye. <sup>25</sup> Epedeme hatlo ya:tapo di Lod Yesu Keliso tle di pasakalo gadlalo God halapo. Epapedeme hatlo ya: dla hela:dle mate itiyamale mateta elapo. Epedeme ya:ta itiyamale mate epo hela:dle matetapo ka:yapa haluwapo, epo wata halapo, epo alotle ma me-hallepe. Koko iye ikadepepo.

## **Bobotimatimale Buka** **Bobotimatimale buka ya: dulu koko**

Yesu ya: alotle tlalo oplami Yonta mo-totoyemala halemama Godta ya: inoma meye-lope dle koko tle ya:tapo itapu dla wowoyamolowe kokoye buka hema ilimaiyo. Oloma edla mikadepe dle so hapuloma dla wotiyalle halopimha:ha:iyo. Epalati Yontapo ya:ta God tle tlamale koko hapulomaye ilipo yia: watle hamiyo, yia:tapo mikadepe depo ha:ha:mama wotiyalle koko hapuloma dulu dla me-kokalepo ha:ha:lepo depame.

<sup>1</sup> Godtapo Yesu Keliso tle ya: opa dla amile dla wowoyamolowe kokoye bobotimatimale. Koko hema Yesutapo ya: oko oplami Yon watle imolowedeme ya: banakaka oplamiye tulune diyo. <sup>2</sup> Epalati Yontapo ya:ta tlamale koko hapulomaye atlamaiyo. Epedeme ya:ta tlamale koko atlamaleye God yu mate epo Yesu Kelisota botomastlowe koko matepo. <sup>3</sup> Yu i sesa:lalo oplami dla Godtapo siyemhalapo. Epame yu i dalepame yia: dupa dulu dla hatitimalalo so dla ma Godtapo siyemhalapo. Adipalati, koko hapuloma ita wowoyamolowe alilaye mo-mateka:pi halapo.

### *Namkale dle yu sos 7 dla atlamale*

<sup>4</sup> Na: Yontapo Asiya mo dulu dla sos 7 dla namkale dle yu atlema.

God halapo, epame ka:yapa haluwapo, epame ya: matle hallepe. Epedeme wua: ya: tle bokotiyapo malamale mate sadle mate halomaiya. Epame ya: mila:pi dla ha:ha:lalo Soko 7 tle ma bokotiyapo malamale mate sadle mate halomaiya. <sup>5</sup> Epame matle Yesu Keliso tle bokotiyapo malamale mate sadle mate halomaiya. Adipalati, ya:ye ikadepe koko atlalo oplamipo. Epame ya:ye powale dulu tle ya:tapo itapu sila:tili oplami halapo. Epame hatlo ya:tapo ta:lamo dla dokopala ha:ha:mta so yia: dokopala oplami halapo.

Ya:tapo dia:ye bokotiyapo malapame ya: omali tle dia:ye di bobtalimale tle alikili dla me-eleme woyamuwapo. <sup>6</sup> Epame ya:tapo dia:ye ya: A God ka: epo opa ka: duka dla ipila:uwapo, ditapo ya: mo so depo ha:ha:mama ya: A God oko hamha:ha:lepo depame. Epedeme Yesu Keliso dla hela:dle mate itiyamale mate kokó halepo hallepe. Eye ikadepepo.

<sup>7</sup> Epedeme wua: natiya, ya:tapo wuala dulu tle woyapo pulupe. Opa hapuloma mate epo ya: yumili so mateta ya: natilipe. Epame ta:la so hapulomatapo ya:ta pua koko natipame a:lemyelepe. Yao, koko ita woyamelepe. Eye ikadepepo.

<sup>8</sup> Epapedeme Lod Godta epo atlapo, “Na:ye kotiyamale mate epo sukulu matepo. Epame na:ye wata halapo, epame ka:yapa haluwapo, epame ma alotle hallepe. Na:ye itiyamalepo.”

### *Yonta Opa Yami natili koko*

<sup>9</sup> Na:ye wua: mama Yonpo. Na:tapo wua: mate Keliso yilo wotiyalle hamhalapo. Amasiyama dulu edla Kelisota dia: watle kokalepo ha:ha:lepo depame itiyamale hamimhalapo. Epapedeme dita hapulomaye ya: mo sopo. Na:tapo God yu mate epo Keliso koko mate opa dla atlamsela:le koko tle opatapo na:ye Patmos hasu dla dodolomuwapo. <sup>10</sup> Inoma sumalalo alila dla Hela:dle Sokota tulume na:ye hauwa. Epalati hulu yu sepeletapo na: ko dla sisilamalati daluwa. <sup>11</sup> Yu eta na: watle epo atla daluwa, “Wa:ta tlama koko hapulomaye buka dla ilalipame sos 7 iwolo dla halopine. Eye Epeses sos dla epo Sumuluna sos dla epo Pelgamon sos dla epo Tayatila sos dla epo Saldis sos dla epame Piladelepiya sos dla epame Laodikeya sos dla hapine,” duwa.

<sup>12</sup> Epalati na: helestame na: dla yukamhala oplamiye anta amma: depame natiwa. Epo toko natitepo gold tuloma 7ta ha:ha:la natiwa. <sup>13</sup> Epalati tuloma dulu medla toko natitepo Opa Yami sepeleta tluka seselemalli didiyepame gold nosoweta pitako dla

asiyame hallati natiwa. <sup>14</sup> Epalati ya: kokosaseta kamama wapoko some hallati natiwa. Epame ya: inomata dlapa tele some teleka:mhallati natiwa. <sup>15</sup> Epalati ya: hetetapo blons ewala epapele some hela:demama sikemte usiyemala natiwa. Epalati ya: yutapo utumapita dillimhalem diye epapele some haluwa. <sup>16</sup> Epalati natitepo ya: dowala dota tamili 7 hohopo halemama ya: mati tle aipa:ya haka:lle ko mate a:pe walleta woyamala natiwa. Epame ya: mila:pita hela:dletapo sali some domala natiwa.

<sup>17</sup> Na:ta ya: natiwa oloma edla na: ta:la dla teyume powale oplami some eluwa. Epalati ya:tapo ya: dowala do mate na:ye hammama epo atluwa, “Wa: ase sikemte wota:miya. Na:ye kotiyamale mate epo sukulu matepo. <sup>18</sup> Na:ye kokó halepo hallalopo. Na:ye mopouwapo, epapele tlope na: matle kokó halepo hallalo pasakalo halapo. Epapedeme polowe kokoloma elo mate epame popo tame ha:ha:lalo mo kokoloma elo mate na: dla hutiyepo.

<sup>19</sup> Epapedeme wa:ta ka:yapa tlamuwa koko mate epo wata wa:ta tlamale koko hapuloma mate epame wa:ta ma alotle tlamolowe koko hapuloma mate buka dla hatitimhalane. <sup>20</sup> Epapedeme wa:tapo tamili 7 na: dowala do dla popa:la tlamale mate epo gold tuloma 7 tlamale mate yia: dulu kokoye ipo elema. Epedeme tamili 7 iye sos 7 yia: banakaka sopo. Epalati tuloma 7ye sos 7po.”

## 2

### *Epeses sos dla yu ilimale hamili*

<sup>1</sup> “Epeses sos banakaka oplami dla yu iye ilipo hamine. Tuloma 7 dulu dla sela:mama tamili 7 ya: dowala dota hohopo sela:lalo oplamita epo atlema, <sup>2</sup> Wa:ta koko halomhala hapulomaye na:malamana. Epame wa:tapo upiyele dulu dla God oko hamhalemama hutulli mate hamhalaye na:malamana. Epame wa:ta batalimale koko halomha:ha:lalo so alimhalaye na:malamana. Epame opatapo yiskamu yia:ye Taiya dle so opa demsiyamalati asiyama wa:tapo yia:ye heheletimala natimama yia:ta isikimi mala-atlale koko natidemhalaye na:malamana. <sup>3</sup> Epame wa:tapo na: hi yilo wotiyalle dulu dla pohopeyamalalo halemama me-kokalepo hala mape na:malamana.

<sup>4</sup> Amasiyama na:ta poka:dena dle koko hatlo wa: dla natiye, e atlowe solotama. Eye, wa:ta ka:yapa mikadepe depame na: sikemte malahaluwa kokoye wa: ma mo-welina. <sup>5</sup> Epapedeme wa:skamu wa:ta teyuli natipame wa: dupa dulu malamale meyelope depame wa:ta ka:yapa halemama halomhaluwa kokoye ma-halomane. Amasiyama wa: malamale pomeyelope dlalo hallepiye, na: puame wa: tulomaye hame alikili dla himilowepo. <sup>6</sup> Amasiyama wa:ta Nikolas alumale sota halomde koko natipo alimhala kokoye e ka:pipo. Adipalati, na: mape ewolota halomde koko natiloweye alimde.

<sup>7</sup> Epapedeme molo walle oplamitapo Hela:dle Sokota sos dla atlemhalaye dallepe. Epedeme oplami antapo mikadepe dle dulu dla halemama kokalepo hallepiye, na:tapo ya: wattle itiyamale hamilowepo, ya:tapo God ya: mo dulu dla pasakalo dlomoko dali tle dlomokoye dowahame delepo depame.”

### *Sumuluna Sos dla yu ilimale hamili*

<sup>8</sup> “Sumuluna sos banakaka oplami dla yu iye ilipo hamine. Na:ye kotiyamale mate epo sukulu matepo. Na:ye popame ma pasakalo duwapo. Epapedeme na:tapo yu iye hamima. <sup>9</sup> Wa:ta wotiyalle koko mate epo alisisi pa:le koko mate dulu dla halaye na:malamana. Amasiyama wa:ye Soko tle alisisi pasatale depo halapo. Epame opatapo wa: dla batalimale koko atlamha:ha:ye na:malamana. Yia: epammama yiskamu yia:ye Yu so demha:ha:po, amasiyama yia:ye ikadepe po-Yu so, yia:ye Saiten ya: opapo. <sup>10</sup> Wa:ta wotiyalle koko halowedeme hala dla ase sikemte wota:miya. Epedeme na:tapo wa: dla atlema, Saitentapo wua: dulu dla opa opiye amtuwale aya dulu dla ka:ka:timelepe, wua:ta mikadepe dle koko natilowedeme. Epalati wua:tapo alila 10 dulu dla wotiyalle

dulu dla ha:ha:lepe. Epapedeme wua:ta mikadepe dle koko dulu dla wua: woloma kokalepo ha:ha:mama wua:ta palliwe sukulu dla tame gudiya. Wua:ta epapelepiye, na:ta asiyama pasakalo hallowe kokoye wua: watle hamilowepo.

<sup>11</sup> Epapedeme molo walle oplamitapo Hela:dle Sokota sos dla atlemhalaye dallepe. Epapedeme oplami antapo mikadepe depo halemama itiyamale mate kokalepo hallepiye, ya:tapo soko tle polowe kokoye ponatilowa.”

### *Pelgamon Sos dla yu ilimale hamili*

<sup>12</sup> “Pelgamon sos banakaka oplami dla yu iye ilipo hamine. Aipa:ya ko mate a:pe walle hamhallalota yu iye atlema. <sup>13</sup> Wa:ta hala moye na:malamana, mo edla Saitenta dokopala halapo. Epapele tlope wa:tapo na: dolumoloweye pomelesema. Epame Saiten mo wa:ta hala edla opatapo na: yu hamsela:lalo oplami Antipas yumulati wa:ta na: dla mikadepe dloweye pomelena.

<sup>14</sup> Amasiyama na:ta wa: dla poka:dena dle koko opi tlamuwaye, e wa: watle atlowe solotama. Eye wua: dulu dla Balamta imale koko dolumsiyamalalo soye me-ha:ha:po. Epapedeme Balamta imale koko dolumalalo oplami hale Balaktapo amka:yapa Isalael so opaye eleme batalimale koko dulu dla tuluwapo. Epalati yia:tapo biskapa god dla halopili dlowe alisisi dlomha:ha:mama opa mate wola: mate uhalomha:ha:mduwapo. <sup>15</sup> Epapedeme Nikolas alumale sota imale koko dolumsiyamalalo so opa opi mape wua: dulu dla me-ha:ha:po. <sup>16</sup> Epapedeme wa: batalimale tle helestapame wa:ta malamale meyelo pe dene. Wa:ta pe-epapalalo wekelepiye, na:tapo ma-hapele puame na: mati tle woyamolowe aipa:yata yia: mate natalimolowepo.

<sup>17</sup> Epapedeme molo walle oplamitapo Hela:dle Sokota sos dla atlemhalaye dallepe. Epapedeme oplami antapo mikadepe depo halemama itiyamale mate kokalepo hallepiye, na:tapo ya: watle hemele ela mena daya mate epo ewala kamale mate hapilowepo. Ewala hema hi amkoye me-elapo. Epapedeme hi eye oplami haleta poya:malamana. Amasiyama yo ewala e halalo oplami tlo ya:malamana.”

### *Tayatila Sos dla yu ilimale hamili*

<sup>18</sup> “Tayatila sos banakaka oplami dla yu iye ilipo hamine. Na:ye God Yamipo. Na: inomaye dlapa some teleka:na, epame na: heteye blons ewala epapele some hela:demama sikemte usiyemana. Epapedeme na:tapo epo atlema. <sup>19</sup> Wa:ta koko halomhala hapuloma mate epo wa:ta bokotiyapo malamale mate epo mikadepe dle koko mate halemama hutulu depo hala kokoye na:malamana. Epame wa:ta Keliso yilo wotiyalle hamhala mape na:malamana. Epo wa:ta wata koko halomhalata, wa:ta ka:yapa koko halomhaluwa tla:mtame halaye, na:malamana.

<sup>20</sup> Amasiyama na:ta wa: dla koko hatlo tlo poka:dena dle koko natiye, e wa: watle atlowama. Eye wa:tapo a:ya hale Yesabelta koko hamhalaye pohumatlasemde. Adipalati, ya:tapo ya:skamu ya:ye God tle yu hapame molo atlalo a:ya depame ya:ta imale koko mate na: opaye eleme opa mate wola: mate uhalomha:ha:mama biskapa god dla dlowe alisisi halopili dlomha:ha:po. <sup>21</sup> Epalati na:tapo ya: watle alila ma-hamiwapo, ya:tapo ya: batalimale tle malamale meyelo pe depame. Amasiyama ya: posolotamasema, ya:tapo ya: batalimale tle helestapame malamale meyelo pe dloweye. <sup>22</sup> Epapedeme na:tapo ya: watle esiyele hamilowepo. Epame opa anawolotapo ya: mate batalimale koko halomduwa, ewolo dla mape na:tapo wotiyalle pato hamilowepo, yia:tapo yia: bobtalimale koko tle poheheletimalalo wekelati. <sup>23</sup> Epame na:tapo ya: dolumalalo opa hapuloma ma potimolowepo. Epalati sos hapulomatapo koko i natimama na:ye opata malamale mate epo dupa dulu mate tlamalalo oplami dlepe. Epapedeme na:tapo wua: watle wua:ta halomha:ha:le asiyama mate ala:le hapilowepo.

<sup>24-25</sup> Yesabelta imale hamsela: iye Saitenta imale kokopo. Amasiyama Tayatila so opi wua:ye ya:ta imale koko iye podolumha:ha:na. Epapedeme na: wua: dla atlema, na:ta

puluwe sukulu dla omtamama isikimi wua:ta God yu dla ha:ha:ye mepo me-ha:ha:mama koko hatlo metlo dolumha:ha:iya.

<sup>26</sup> Epapedeme oplami antapo mikadepe dle dulu dla kokalepo halemama na:ta solotamale koko hamhalemama sukulu dla tame gudlepiye, na:tapo ya: watle ta:lamo hapuloma omhallowe itiyamale hamilowepo.

<sup>27</sup> Ya:tapo sikemte itiyamale mate yia:ye omhallepe.

Epame ya:ta itiyamaletapo ta:lata dinapele alisisi supulastemdiye, epapele some opaye susupulatimelepe.'

Itiyamale hatlo iye na:ta na: A tle hauwa ipo. <sup>28</sup> Epame na:tapo ya: watle ma-alalem-matlatai tamili kodlopa pato woyamdiye e hamilowepo. <sup>29</sup> Epapedeme molo walle oplamitapo Hela:dle Sokota sos dla atlemhalaye dallepe."

### 3

#### *Saldis Sos dla yu ilimale hamili*

<sup>1</sup> "Saldis sos banakaka oplami dla yu iye ilipo hamine. God ya: soko 7 mate epo tamili 7 mate halomalalo oplamita epo atlema. Wa:ta koko halomhalaye na:malamana. Opata wa:ye pasakalo halema demdepo. Epele tlope wa: mo-powana. <sup>2</sup> Epedeme wa: elale tle sila:tipame wa: dla hutiyeye koko mo-palila yakomaye matle itiyamale hapine. Adipalati, na:ta natili dulu dla wa:ta halomhala koko hapulomaye na: God mila:pi tle po-ala:po elasema. <sup>3</sup> Epedeme wa:ta ka:yapa God yu dalepame hauwaye e malamama woloma dolumane. Epammama wa: dupa dulu malamale meyeloape depame elale tle sila:tine. Wa:ta posila:tilalo wekelepiye, na: uhalalo oplami some pulupe. Epedeme na:ta puluwe alilaye wa: woloma pomalanatilowa.

<sup>4</sup> Amasiyama opa opi God mila:pi tle ka:ka:depo ha:ha:ye Saldis mo dulu medla me-ha:ha:po. Epedeme yia:tapo tluka kamkamale didiyepo na: mate siyamelepe. Adipalati, yia:ye ka:ka:dle sopo. <sup>5</sup> Epedeme oplami antapo mikadepe dle dulu dla itiyamale mate kokalepo hallepiye, ya: mape tluka kamkamale mepapele didiyelepe. Epedeme ya: hi Pasakalo Buka dla elaye na:tapo pohiyostlowa. Epame na:tapo na: A mate epo ya: banakaka so mate yia: mila:pi tle ya:ye solowepo. <sup>6</sup> Epapedeme molo walle oplamitapo Hela:dle Sokota sos dla atlemhalaye dallepe."

#### *Piladelepiya Sos dla yu ilimale hamili*

<sup>7</sup> "Piladelepiya sos banakaka oplami dla yu iye ilipo hamine. Na:ye aiyalma epo ikadepepo. Na:ye Deibidi kokoloma elo hamhallalopo. Epedeme na:ta kokoloma gowal-adlepiye, ma oplami haleta pohimomollowa. Epame na:ta kokoloma himomellepiye, ma oplami haleta pogowaladlowa. Epedeme na: ipo atlema, <sup>8</sup> Wa:ta koko halomhalaye na:malamana. Epedeme wa: natine, na: wa: dla kokoloma mo-gowaladlepo. Epalati oplami haleta ma pohimomollowa. Epapele dulu dla wa: itiyamale pasto tlope, wa:ta na:ta imale dolumsela:mama opa hapuloma mila:pi tle na: kokoye powelimdena. <sup>9</sup> Wa: dalene! Na:ta Saiten ya: opaye elempuame wa: hete sitali isili dla pomellepe. Epalati yia:ta edla popa:mama na:ta wa: bokotiyapo malamale kokoye malanatilipe. Epedeme opa iwolota mala-atlamyemama yiskamu yia:ye Yu sopo demdepo. Epele tlope yia: po-Yu so ikadepe. <sup>10</sup> Epedeme wotiyalle patota ta:lamo hema pulupe, opa hapulomata kokalepo ha:ha:ma: depo natilowedeme. Amasiyama alila edla na:ta wa:ye woloma omhallowepo. Adipalati, wa: na:ta imale dolumama kokalepo halemama wa:ta mikadepe dleye pomelena.

<sup>11</sup> Na:ta puluweye mo-mateka:pi. Epedeme wa: dla mikadepe dle koko elaye woloma omhalane, oplami haleta wa: hi mate ela pasakalo Pepele dimo dla elaye halala depame. <sup>12</sup> Epedeme oplami antapo ya:ta mikadepe dle dulu dla itiyamale mate kokalepo hallepiye, na:tapo na: A God aiyalma aya dla ya:ye alumiti some hitomollowepo.



Epelepiye, ya:tapo matle aiyalma aya tle alikili dla powoyamolowa. Epame na:tapo na: A God hi mate epo na: hi amko mate epo God ya: mo hi mate ya: dla hatitimolowepo. Mo iye Yelusalem mo amkopo. Epedeme mo itapo Pepele di na: A Godta hala tle mallepe. <sup>13</sup> Epedeme molo walle oplamitapo Hela:dle Sokota sos dla atlemhalaye dallepe.”

### *Laodikeya Sos dla yu ilimale hamili*

<sup>14</sup> “Laodikeya sos banakaka oplami dla yu iye ilipo hamine. Na:ye ikadepepo. Epame na: tle God yu ikadepeye botomastamdepo. Epo na:tapo Godta mimita:ple alisisi hapuloma dulu dla sitali depo halemama yu iye atlema. <sup>15</sup> Wa:ta koko halomhala hapulomaye na:malamana. Epedeme na:ta wa: natili dulu dla wa:ta na: malamaleyepase pato, epame wa:ta na: alli koko mape pase pato. Amasiyama wa: isikimi duka dla hallalo oplamipo. Epapele tlope na: posolotamasema, wa:tapo isikimi epo duka dla halloweye. <sup>16</sup> Epedeme na:tapo wa:ye na: mati dulu tle alikili dla mumulluwepo. <sup>17</sup> Epapedeme wa:ta wa:skamu wa:ye atlemama, ‘na:ye alisisi pasatana,’ depame ‘na: dla alisisi ma-ala:na,’ demdepo. Amasiyama wa: powa:malamata:, wa:tapo alisisi pa:po halemama atali yemala some inoma pa:po tidali siyapo sela:ye? <sup>18</sup> Epedeme na: wa: dla atlema, wa: na: dla puame gold mani hane, wa:ta alisisi pasatale depo hallepo depame. Epame wa: na: dla puame tluka kamkamale halomane, wa:ta tidali siyapo sela: e bopudloweye. Epame wa: na: dla puame inoma melesene ma halopo inoma dla huhutupiliyene, wa:ta ma ka:depo natilipo depame.

<sup>19</sup> Epedeme na:ta sikemte bokotiyapo malamalalo soye na:ta atlamhalemama posalemhalapo. Epapedeme wa: hutulli mate halemama wa: dupa dulu pasakaloye meyelope dene. <sup>20</sup> Epedeme wa: dalene! Na: kokoloma tala dla halemama kokoloma dla heyulumhalapo. Oplami antapo na: yu dalepame kokoloma gowaladlepiye, na: ya: hala dla tuwame ya: mate daya delepe, epame asiyama ya: mape na: mate daya delepe. <sup>21</sup> Na:ta mikadepe dle mate itiyamale mate hallati na: Ata ya:ta pollalo dla ya: mate pollopo depame na:ye mo-pameluwapo. Epapedeme oplami antapo ya:ta mikadepe dle dulu dla itiyamale mate hallepiye, na:ta ya:ye na:ta pollalo mo dla na: mate pollopo depame pamollowepo. <sup>22</sup> Epedeme molo walle oplamitapo Hela:dle Sokota sos dla atlemhalaye dallepe.”

## 4

### *Yonta Pepele dimo natili*

<sup>1</sup> Koko ita tame gudlati na: toko ipo natitepo, Pepele dimo kokolomata gowaladepo hallati natiwa. Epele dulu dla na:ta ka:yapa daluwa hulu yu sepeleta ma na: watle epo atluwa, “Hema matane. Epalati na:tapo amile dla wowoyamolowe kokoye wa: watle imolowepo,” duwa. <sup>2</sup> Epalati pakasiyamalalo Hela:dle Sokota na:ye halati toko Pepele dimo dla natitepo Godta ya:ta pollalo mo dla polla natiwa. <sup>3</sup> Ya:ta hela:dletapo sikemte usiyemama ewala Yasepa mate epo Kaneliya demdiye epapele some haluwa. Epalati pesepidolota ewala Emelal demdiye epapele sepeleta ya:ta pollalo dla sillidepo hallati natiwa. <sup>4</sup> Epame ya:ta pollalo alikili tle dokopala so 24ta yia:ta popa:lalo dla popa:lati natiwa. Yia: popa:mama tluka kamkamale didiyepo gold dokopala alisisi didiyepo popa:uwa. <sup>5</sup> Epame Godta pollalo mo tle omaplata halë mate hela:hela:dle mateta wowoyamhaluwa. Epame ya:ta pollalo mila:pi tle tuloma 7ta ota:mtipo ullalimha:ha:lati natiwa. Tuloma iye God ya: Soko 7po. <sup>6</sup> Epame ya:ta pollalo mila:pi tle galasi kaula alisiyamale sepeleta hela:lemtame ellati natiwa.

Epame Godta pollalo alikili mateka:pi medla pasakalo ha:ha:lalo alisisi dapiyamte dapiyamte dleta ha:ha:la natiwa. Yia: mila:pi mate epo yia: ko mateye inomata pasatame ha:ha:la natiwa. <sup>7</sup> Yia: dulu dla haleta layon aliya mila:pi himili some haluwa. Epalati haletapo bulumkiyawa aliya mila:pi himili some haluwa. Epalati haleye oplami mila:pi

himili some haluwa. Epalati haletapo kepili tea mila:pi himili some haluwa. <sup>8</sup> Yia:ta hapulomatapo suku 6 watalota ha:ha:mama inomata yia: moto hapulomaye hapo ha:ha:uwa. Yia: suku isili ma inoma watalo. Epapele dulu dla ewolotapo alila hapuloma mate epo utula:la hapuloma mate dulu dla ipo atlamha:ha:mdepo,

“Aiyalma, aiyalma, aiyalma,

di Lod Godye sikemte aiyalmapo, epame sikemte itiyamalepo.

Ya:ye ka:yapa haluwapo,

epame wata me-halapo, epame ya:ye alotle ma me-hallepe.”

<sup>9-10</sup> Epedeme pasakalo ha:ha: alisisi dapiyamte dapiyamte dletapo God dla sisiyele mate ya: hi di dla ta:dlepiye, dokopala so 24 mape oloma medla ya: dla heodepo popa:mama ya: dla siyele hamimdepo. Adipalati, ya:ye kokó halepo hallalopo. Yia:tapo yia: dokopala alisisi ya: mila:pi dla hatitipame epo atlamdepo,

<sup>11</sup> “Di Lod God, ka:dena, wa:ta itiyamale hapuloma halomolowe.

Epedeme ka:dena, dita wa: dla sisiyemama wa: hi di dla ta:dloweye.

Adipalati, wa:ta alisisi hapuloma mo-mimita:puwapo.

Epedeme wa:ta solotamale tle yia:ta hapulomata me-ha:ha:po.”

## 5

### *Pepa polli mate La:m mate*

<sup>1</sup> Na: Godta ya:ta pollalo dla polla natitepo ya: dowala do dla pepa pollita ellati natiwa. Pepa edla dulu mate epo alikili mate yu ilimana. Epame pepa polli eye dea 7ta yulupo hutiyelati natiwa. <sup>2</sup> Epame na: banakaka oplami hale sikemte itiyamale natiwa. Ya:tapo yu sisiyatlemale mate epo atluwa, “Oplami anta ala:ta:, dea i kotipame pepa i towastloweye,” duwa. <sup>3</sup> Amasiyama Pepele dimo mate ta:lamo mate epo ta:la dulu dla ha:ha: mate dla oplami haletapo dea i kotipo pepa dulu natilowe po-ala:na.

<sup>4</sup> Epedeme na: sikemte amuwa. Adipalati, pepa polli i towastepo dulu natilowe oplami hale hawa ikadepe. <sup>5</sup> Epame dokopala so dulu dla oplami haleta na: watle epo atluwa, “Wa: ase sikemte ammiya. Adipalati, Yuda elele oplami Deibidi ya: mama haletapo ya: dla opahale dlalo soye mo-tla:mtauwapo. Epalati opata ya:ye Layon demdepo. Epedeme hatlo ya: dla itiyamale elapo, ya:ta dea 7ye kotipame pepa polli dulu ma natilowe.”

<sup>6</sup> Epalati na: Godta pollalo mo dla pasakalo ha:ha: alisisi mate epo dokopala so mate dulu dla sipi aliya yemala La:mta halla natiwa. La:m aliya eye opata yumili ulu walena. La:m eye pate 7 epame inoma 7 dena. Inoma 7ye Godtapo ta:lamo hapuloma dla taiya dle Soko 7po. <sup>7</sup> Epedeme La:mta puame God ya: dowala do dla pepa polli elaleye hauwa. <sup>8</sup> Ya:tapo pepa polli ya: dowala do tle halati pasakalo ha:ha:lalo alisisi dapiyamte dapiyamte dle mate epo dokopala so 24 mateta ya: hete sitali dla heodepo popa:uwa. Epame yia:ta hapulomatapo woiyo mate gold isilako mate halopo popa:uwa. Gold isilako dulu edla ullu ka:dle pamalalo alisisita poposatilipo popa:uwa. Eye God ya: opata inoma sumalalo yupo. <sup>9</sup> Epame yia:ta popa:mama sala amkoye ipo sauwa,

“Wa: ala:na, pepa polli dea kotimolowe.

Adipalati, opata wa:ye yumuwapo.

Epedeme wa: omali tle ta:lamo hapuloma dulu dla

opa elele meyelope meyelope dle mate epo yu meyelope meyelope dle so mateye

God dla me-elempuwapo.

<sup>10</sup> Epedeme wa:ta yia:ye elepame

God ya: mo so duwapo,

yia:tapo God ka: epo opa ka: duka dla ha:ha:mama

God oko hamha:ha:lepo depame.

Epame yia:tapo ta:lamo hapuloma dla dokopala depo ha:ha:lepe.”

<sup>11</sup> Epame ma na:ta natiwa dulu dla banakaka so hapuloma sesa:lowe sukulu pa:leta yu hala daluwa. Epame yia:ta Godta pollalo mate epo pasakalo ha:ha:lalo alisisi mate epame dokopala so mateta popa:lati alikili tle sillidepo ha:ha:lati natiwa. <sup>12</sup> Yia:ta ha:ha:mama yu teta:le mate sala ipo sauwa,

“Opata yumili La:mye ala:na,  
itiyamale hapuloma mate alisisi hapuloma mate malamale ka:dle mate hela:dle  
mate halomolowe.

Epedeme dita ya: dla sisiyemama  
ya: hi di dla ta:dlowe ka:pi.”

<sup>13</sup> Epame na: ma Pepele dimo dla epame ta:lamo dla epame ta:la dulu dla epame yú dulu dla pasakalo ha:ha: hapulomata ipo atlati daluwa,

“God mate epo La:m mate dla  
hela:dle mate itiyamale mateta kokó hutiyelepe.

Epedeme dita yia: dla sisiyemama  
yia: hi di dla ta:dlowe ka:pi.”

<sup>14</sup> Epalati pasakalo ha:ha:lalo alisisi dapiyamte dapiyamte dleta epo atluwa, “Eye ikadepepo,” duwa. Epame dokopala sota heodepo popa:mama God mate La:m mate dla siyele ta:duwa.

## 6

### *Pepa polli yulumale deaye La:mta kotimale*

<sup>1</sup> Na: natilati La:mta pepa polli yulumale dea 7 dulu dla dea hatlo kestlati natiwa. Epalati pasakalo ha:ha:lalo alisisi dapiyamte dapiyamte dle haleta yukamama omapla some gulludemama, “Puane,” duwa. <sup>2</sup> Epalati na: toko ipo natitepo hos aliya kamale natiwa. Hos di dla poluwa oplamiye to walena. Epame ya: dokopala dla dokopala alisisi hamiliye asiyame poluwa. Ya:tapo itiyamale mate tamama opahale soye potipame dokopala hali demtauwa.

<sup>3</sup> Epalati La:mta dea yuli hale kestlati pasakalo ha:ha: alisisi haleta ipo atlati daluwa, “Puane.” <sup>4</sup> Epalati na: toko ipo natitepo hos aliya omteka:peleta woyamalati natiwa. Epalati Godta hos aliya di dla pollalo oplami dla aipa:ya hamimama epo atluwa, “Wa:tame ta:lamo dla sadle kokota elaye kolahane, opata yiskamu ya:mkale yumi ya:mkale yumi demha:ha:lepo depame,” duwa.

<sup>5</sup> Epalati La:mta dea yuli hale kestlati pasakalo ha:ha: alisisi haleta ipo atlati daluwa, “Puane.” Epalati na: toko ipo natitepo hos aliya dikili natiwa. Hos di dla poluwa oplami do dulu dla upiyele natilalo alisisita ella natiwa. <sup>6</sup> Pasakalo ha:ha: alisisi dapiyamte dapiyamte dle dulu dla yuta ipo atlati daluwa, “Daya pa:le kokota pulupe. Epedeme alila hatlope oko asiyamatapo witi daya isikimi 1 lita epapele halepe. Epame alila hatlo oko asiyamatapo bali daya isikimi 3 lita epapele halomelepe. Epapele dulu dla ope mate epame wain yú mate pobatalimolowa,” duwa.

<sup>7</sup> Epame La:mta dea yuli hale kestlati pasakalo ha:ha: alisisi haletapo epo atlati daluwa, “Puane.” <sup>8</sup> Epalati na: toko ipo natitepo hos aliya walle natiwa. Hos aliya di dla pollalo oplami ya: hiye polowe. Epalati popo tame ha:ha:lalo mota ya: ko tle dolumpulati natiwa. Epame Godta yia: watile epo atluwa, “Wua: ta:lamo pato dla tame opaye alumale dapiyamte dapiyamte dle dulu dla hukulupame alumale hatlope dulu dla ha:ha:lalo so tlo poyulupe. Wua: yia:ye poyumama aipa:ya mate epame daya pa:le koko tle epame esiyele koko tle epame alinepi itiyamale mate tle yia:ye poyulupe,” duwa.

<sup>9</sup> Epame La:mta ma dea yuli hale kestlati na: toko ipo natitepo, God dla namkale dle alisisi ha:po hapilalo tile mateka:pi dla God yu atlamha:ha:lati potimale yia: sokota hutiyelati tlamuwa. <sup>10</sup> Yia:tapo yu teta:le mate epo atluwa, “Di pato Lod, wa:ye aiyalma mate epo ikadepe matepo. Wa: adipalalo ta:lamo so koko gladepame di omali koko dla

asiyama hamipa:?” duwa. <sup>11</sup> Epalati Godta yia: watile tluka kamkamale didiyemele-mama epo atluwa, “Wua: aseka alila kiyele omha:ha:iya. Adipalati, wua:ye opata potimalati paliwaye, epammama alotle mikadepe dle so opa opi mape mepapelepe. Opata yia: potimtama na:ta sukulu himili dla tame gudlepiye, eta na:ta yia: koko gladepe yia: watile asiyama wotiyalle hamilowepo,” duwa.

<sup>12</sup> Epame na: La:mta ma dea yuli hale mosukulu tiyama kestlati me-natiwa. Epapele oloma edla allutuwale patota tuwa. Epalati salitapo tluka dikili some sikemte diki depo haluwa. Epalati mamatapo omali some omteka:po haluwa. <sup>13</sup> Epapalati tamili omapla di dla popa:leta mosisi patota pumama dali dlomoko mili dla yulati dlomokota ta:la dla balladepo tulumdiye, tamilita epo ta:la dla balladepo tuluwa. <sup>14</sup> Epapele oloma edla wa:yata popolumdiye, epapele some pepele dita epo popolumtamama mepa:uwa. Epame tamali hapuloma mate epo hasu hapuloma mate yia:ta popa:lalo mo memelepame ma alikili dla dodokolapo tulum hutiyemyela natiwa.

<sup>15</sup> Epalati ta:lamo dokopala so hapuloma mate epo opahale dokopala so hapuloma mate epo alisisi poposatilimale so mate epo asiyama pa:le oko halalo so mate epo yia: dokopala so mateta teiko dulu dla epo munamu dulu dla haohaodemyeuwa.

<sup>16</sup> Epammama yia:tapo tamali mate epo ewala patoto mate dla epo atlamyeuwa, “Dia:ye bopudiya, Godta di ponatilalo wekelepo depame. Epame ditapo La:mta siyaladle tle hemele haohaodlepo depame. <sup>17</sup> Adipalati, yia:ta siyaladle alilatapo mo-puapo. Epa-pedeme dulu edla oplami antapo me-kokalepo halemama yia:ta siyaladleye tla:mtapa:?” demyeuwa.

## 7

### *Isael so 144,000 opata God dla ulu halomale*

<sup>1-2</sup> Epedeme koko ita tame gudlati na: banakaka so dapiyamte dapiyamte dleta ta:lamota tame gugudle dapiyamte dapiyamte dle dla tame ha:ha:la natiwa. Godta yia: dla itiyamale hamiyo, yia:tapo ta:lamo mate kaula pato mate epo dalupa mateye mosisita bobtalimelepo depame. Amasiyama yia:tapo mosisita bibikilimalala depame ala me-himomeleme ha:ha:uwa. Epame na: ma banakaka oplami haleta salita matlalo tiyama tle matla natiwa. Ya: matamama pasakalo hallalo Godta ya: watile hamili ukule mate hampuwa. Epame ya:tapo yu teta:le mate banakaka so dapiyamte dapiyamte dle dla epo atluwa, <sup>3</sup> “Wua: ta:lamo mate kaula pato mate epo dalupa mate yipta bobtalimiya. Wua: aseka me-ha:ha:lati di tatile God dla salladepo siyamalalo so opa hapuloma yia: daptala dla ukule mate ulu hatitimtlowama. Dita yia: dla ulu hatitimtepo gudlati wua: alotle mosisita ta:lamo mate epo kaula pato mate epo dalupa mate bobtalimaiya,” duwa.

<sup>4</sup> Epame na: opa ulu halomale so sukulu daluwa. Eye 144,000 so opata ulu halomuwa. Opa iwoloye Isael so elele 12 halomalepo.

<sup>5</sup> Yuda elele dulu dla 12,000 opata ulu halomuwa.

Epame Luben elele dulu dla 12,000 opata ulu halomuwa.

Epame Gad elele dulu dla 12,000 opata ulu halomuwa.

<sup>6</sup> Epame Asel elele dulu dla 12,000 opata ulu halomuwa.

Epame Naptali elele dulu dla 12,000 opata ulu halomuwa.

Epame Manase elele dulu dla 12,000 opata ulu halomuwa.

<sup>7</sup> Epame Simiyon elele dulu dla 12,000 opata ulu halomuwa.

Epame Libai elele dulu dla 12,000 opata ulu halomuwa.

Epame Isakal elele dulu dla 12,000 opata ulu halomuwa.

<sup>8</sup> Epame Sebulun elele dulu dla 12,000 opata ulu halomuwa.

Epame Yosep elele dulu dla 12,000 opata ulu halomuwa.

Epame Benyamin elele dulu dla 12,000 opata ulu halomuwa.

*Mo hapuloma tle wowoyamale opa*

<sup>9</sup> Koko ita tame gudlati na: matle toko ipo natitepo opa alumale patota Godta pollalo mo mila:pi dla epo La:m mila:pi tle ha:ha:la natiwa. Yia:ye oplami haleta sesa:loweye po-ala:na. Yia: mo meyelo meyelo dle tle epo elele meyelo meyelo dle tle epo yu meyelo meyelo dle tle puame ha:ha:uwa. Epame yia:ta tluka kamkamale didiyepo ha:ha:mama dota bikisi halopo ha:ha:uwa. <sup>10</sup> Epame yia:tapo yu teta:le mate epo atlamyeuwa,

“Di Godye ya:ta pollalo mo dla mo-polapo.

Epame dita pasakalo ha:ha:lowe kokoye ya: mate epo La:m mateta di watle mahapiwapo,” demyeuwa.

<sup>11</sup> Epame dokopala so mate epo pasakalo ha:ha: alisisi mateta Godta pollalo mo mateka:pi dla ha:ha:lali banakaka so hapulomatapo alikili tle sillidepo ha:ha:mama God mila:pi tle heodepo ya: dla siyele ta:demama epo atlamyeuwa,

<sup>12</sup> “Ikadepe, siyele mate hela:dle mate malamale ka:dle mate itiyamale mate di God dla kokó hutiyelepe.

Epedeme dita ya: dla sisiyemama ya: hi di dla ta:dlowe ka:dena.

Eye ikadepepo,” demyeuwa.

<sup>13</sup> Epalati dokopala oplami haleta na: watle epo atluwa, “Tluka kamkamale didiyepo ha:ha: iwoloye anawolota? Epame yia:ye adi tle pumulo?” duwa.

<sup>14</sup> Epalati na:ta asiyama ya: watle epo atluwa, “Dokopala oplami, na: pona:malamana. Wa: tlo koko eye wa:malamana,” duwa.

Epalati asiyama ya:ta na: watle epo atluwa, “Iye ta:lamo pato dla wotiyalle pato pua dulu tle alikili dla wowoyamale opapo,” duwa. “Opa iwoloye La:m omali mate yia: tluka howahalomalati ma kamkamuwapo. <sup>15</sup> Epapedeme yia:ta Godta pollalo mila:pi tle ha:ha:mama ya: aiyalma aya dulu dla alila mate utula:la mate ya: hi di dla ta:demha:ha:po. Epalati Godta meyelo yia:ye omhalemama yia: gademhalapo.

<sup>16</sup> Epedeme yia:tapo matle daya mate yú mate pota:ta:mha:ha:lowa. Epame sali alemalleta yia: dla podomhallowa. <sup>17</sup> Adipalati, Godta pollalo mateka:pi dla hallalo La:mta meyelo yia:ye omhalemama yia:ye pasakalo yú kolomale dla elemata demhallele. Epalati Godta yia: inoma kaiyo hapulomaye hihiyotipo wellipe.”

## 8

*Dea yuli mosukulu kestale*

<sup>1</sup> Epedeme La:mta pepa polli dea yulumale mosukulu kestlati Pepele dimota alila kiyele dla yu dimi ka:lipo eluwa. <sup>2</sup> Epame na: matle banakaka so opi 7 God mila:pi tle ha:ha:lalo sota ha:ha:la natiwa. Epame yia: dla hulu 7ye halopiwa.

<sup>3</sup> Epame banakaka oplami haleta gold isilako hapame Godta pollalo mila:pi dla gold tileta pola dla puame haluwa. Epame ullu ka:dle pamalaloye ya: watle hamilati ya:tapo God ya: opata inoma sumale yu mate hatlo dukupame gold isilako dla ha:uwa. <sup>4</sup> Epalati ya:ta ha:mhala isilako etle ullu ka:dle pamalalo hamdele namile mate epame God ya: opata inoma sumale yu mate God hala dla hetauwa. <sup>5</sup> Epame banakaka oplamita tile dla dlapa hapame gold isilako dla hapo pasatlali ma ta:lamo dla hamastauwa. Epalati omapla hela:hela:dle mate omapla halë mate epo allutuwale mateta wowoyamuwa.

*Banakaka sota hulu sisilamale*

<sup>6</sup> Epedeme banakaka so 7ta hulu sisilamolowedeme dinapopo ha:ha:uwa. <sup>7</sup> Epapeleye banakaka oplami itapu hallalota ya: hulu sisilamalati ewala mate epo dlapa mateta omali mate dukupo ta:la dla tiyo some heluwa. Epalati ta:lamo patoye alumale dapahatlope dulu dla hukulupame alumale hatlope tlo dlapata hamdemama dali mate osamokolo mate hamdouwa.



8-9 Epame banakaka oplami haleta ya: hulu sisilamalati tamali patoye dlapa hamdele epapeleta kaula pato dla hamastauwa. Epammama kaula patoye alumale dapahatlope dulu dla hukulupame alumale hatlo tlo omali yelati dulu edla ha:ha:lalo alisisi hapulomata paliwa. Epame koa hapuloma edla siyamale mape mo-bobtalipo hamastauwa.

10 Epame banakaka oplami haleta ya: hulu sisilamalati tamili pato tuloma some hamdemhallalota pepele di tle aloma yú dla epo yú kokolomale dla teyuwa. 11 Tamili pato ya: hiye Haka:le. Epalati aloma yú hapuloma mate epo yú kokolomale hapuloma mate alumale dapahatlope dulu dla hukulupame alumale hatlo dulu dla ha:ha:lalo aloma yú mate epo yú kokolomale mate mo-bobtalimuwa. Epedeme yú e dlomale so opa hapulomaye paliwa. Adipalati, yú iye pta haka:na.

12 Epame ma banakaka oplami haleta ya: hulu sisilamalati sali seme mate mama seme mate epame tamili opi mateta amtuwa. Epammama alila ipita amtumama utula:la ipi ma mama mate tamili mate dla hela:dle hawa haluwa.

13 Epame na: matle natilati kepilita omapla di dla hollomsela:la natiwa. Ya: hollomsela:mama yu teta:le mate ipo atlati daluwa, “Woiyo! Woiyo! Woiyo! Ta:lamo dla ha:ha:lalo so opa yimkadulo. Adipalati, banakaka so opa dapahatlope ala yia: hulu posisilalimasema. Yia:ta yia: hulu sisilalimelepiye, wotiyalle koko dapahatlopeta wua: dla pulupe,” duwa.

## 9

### *Ma banakaka oplami haleta ya: hulu sisilamale*

1 Epame ma banakaka oplami haletapo ya: hulu sisilamalati na: pepele di tle ta:la dla teyuli tamili natiwa. Tamili hema munamu sukulu pa:le kokoloma eloye hamiwa.

2 Epame ya:tapo kokoloma gowaladlati sukulu pa:le munamu dulu tle namile patota woyapo hetamama pepele di mate sali mate amtuwa. 3 Epalati namile dulu tle wolomopita wowoyapo ta:lamo dla maluwa. Epalati wolomopi hema kalepateyewalata yellati wotiyallalo epapele itiyamaleye hamiwa, yia:tapo opa yiyelemelepo depame. 4 Epalati yuta wolomopi watle epo atluwa, “Wua: ta:lamo dla osamokolo mate dali mate ha:ha:hapulomaye pobobtalimolowa. Amasiyama opa anawolo daptala dla God ya: ulu hawa ha:ha:ma:, wua: isikimi opa ewolo dla wotiyalle hapimha:ha:iya,” duwa. 5 Amasiyama wolomopi hema opa potimolowe itiyamale pohamina. Isikimi mama 5 dulu dla opa dla wotiyalle hapimha:ha:lepo depame itiyamale tlo hamiwa. Epedeme opaye wolomopita yiyelemalati yia:tapo kalepateyewalata yellati wotiyalemdiye, epapele wotiyalleye natimha:ha:lepe. 6 Epalati alila oloma edla opatapo palliwe solotamelepe, amasiyama yia: popalliwa.

7 Wolomopi iwoloye hos aliya patotota opahale dla tlowedeme dinapo ha:ha:mdiye, epapele sepena. Yia: dokopala dla gold dokopala alisisi epapele didiyepo ha:ha:uwa. Epalati yia: mila:pita opa mila:pi some ha:ha:uwa. 8 Epalati yia: kokosaseye wola: kokosase some ha:ha:uwa. Epame yia: a:peye layon aliya a:pe some ha:ha:uwa. 9 Epame yia: pitako dla olita kapulu mita:ple sepele didiyepo ha:ha:uwa. Epame yia:ta hoholoye-mama yia: sukuta popaliyeuwaye, opahale sota hos aliya tle opahale dla ullumtamama yuhalemdiye, epapele some haluwa. 10 Yia: tileye kalepateyewala tile sepena. Epedeme yia: tile e mate mama 5 dulu dla opa yiyelemha:ha:lowe itiyamale eluwa. 11 Wolomopi yia: dokopala oplamiye sukulu pa:le munamu dulu dla hallalo banakaka oplamipo. Oplami i ya: hiye Hibulu yu mate semama Abadon. Epalati Guliki yu mate semama Apoliyon.\*

12 Epapedeme wotiyalle koko itapu eluwaye mogudepo. Amasiyama itapu a:ma dla ala wotiyalle koko dapiyamteta me-hutiyepo.

\* **9:11:** Abadon hi mate epo Apoliyon hi mate yia: dulu kokoye koko hapuloma bobtalimalalo oplami demama apopo.

*Ma banakaka oplami haleta ya: hulu sisilamale*

<sup>13</sup> Epame ma banakaka oplami haleta ya: hulu sisilamalati na: God mila:pi tle pollalo gold tile pate tle yuta epo pulati daluwa. <sup>14</sup> Yu eta yo hulu sisilamalalo banakaka oplami dla epo atluwa, “Yupalates aloma pato pili dla banakaka so opa dapiyamte dapiyamte dle dea mate yulupo ha:ha:ye totowatimane. <sup>15</sup> Adipalati, yia:ye ma-dinapopo ha:ha:po ta:lamo so hapuloma hukulli dapahatlope dulu dla alumale hatlope dulu dla ha:ha:lalo so tlo potimolowedeme. Epedeme wata iye yia: alilapo epo yia: mamapo epo yia: sokomokopo,” duwa. Epela dalepame banakaka oplami yo hulu sisilamalalota tame yia:ye dea totowatimuwa.

<sup>16</sup> Epame na: opahale sota hos aliya di dla popa:lati natiwa. Epame yia: namba ma daluwa, eye 200 miliyon. <sup>17</sup> Epedeme na:ta tlamuwa hos aliya mate epo aliya di dla popa:uwa opahale so mateye ipapena. Aliya di dla popa:uwa yia: kapuluye omteka:pena epo dikina epo walena. Epalati hos aliya yia: dokopalaye layon dokopala sepena. Epame yia: mati dulu tle dlapa mate namile mate epo ullu batalimale pamalalo mateta woyamuwa. <sup>18</sup> Epalati ta:lamo so hapuloma alumale dapahatlope dulu dla alumale hatlope tlo hos aliya mati tle woyamale dlapa mate namile mate epo ullu batalimale pamalalo mateta potimuwa. <sup>19</sup> Hos aliyata itiyamaleye mati dla epo tile mate dla hutiyeuwapo. Adipalati, yia: tileye ilama sepena, dokopala watalo. Epedeme e mate opaye wotiyalle hapimduwapo.

<sup>20</sup> Amasiyama wotiyalle koko ita opa potimama opa opi ta:lamo medla pomelle sotapo yia:ta dota mita:ple god dla sisiyelowe pomelena. Epammama yia:tapo bataliya dla sisiyemha:ha:loweye pomelena. Yia:tapo malamale pomeyelo dlalo ha:ha:mama dota mimita:ple god ipapele dla sisiyemha:ha:uwapo, goldta mita:ple god dla epo silbata mita:ple god dla epo blonsta mita:ple god dla epo ewalata mita:ple god dla epame dalita mita:ple god dla. Epapele tlope god iwoloye natilowe poyia:malamana, epo dallowe ma poyia:malamana, epame siyamolowe ma poyia:malamana. <sup>21</sup> Epame opa iwolo dla yimkadulo potimolowe koko mate epo osolo koko mate epame opa mate wola: mate uhalomolowe koko mate epo upo alisisi uhalomolowe koko mate pomelena.

## 10

*Banakaka oplami mate buka polli mate*

<sup>1</sup> Na: matle banakaka oplami hale itiyamaleta pepele di tle wualata ya: moto dla polupo malla natiwa. Epalati ya: dokopala di dla pesepidolota hallati natiwa. Epame ya: mila:pita sali some hallati ya: heteta dlapa some teleka:mmalla natiwa. <sup>2</sup> Epame banakaka oplami ya: do dla buka polli yemalaye mo-towastame ella natiwa. Epame ya:ta malemama ya: dowala heteta kaula pato dla doluwa, epalati ya: weke heteta ta:la dla doluwa. <sup>3</sup> Epame ya:tapo yu teta:mama layon some paluwa. Ya:ta epo yu teta:le dulu dla omapla 7ta yuhalë daluwa. <sup>4</sup> Yia:ta yuhapo gudlati na:tapo yia:ta yuhalë eye buka dla hatitimolowedeme apuwa. Amasiyama pepele di tle yuta malemama na: watle epo atluwa, “Wa: omapla 7ta yuhalë kokoye buka dla hatitimiya. Yia:ta yuhalë kokoye opa hapuloma dla botomastamiya,” duwa.

<sup>5</sup> Epame na:ta banakaka oplamita ya: hete mate kaula pato dla dole epo ta:la dla dole depo hallati natiwata ya: dowala do mate pepele di dla ta:depo halla natiwa. <sup>6</sup> Epame ya:ta God hi tle yu teta:le mate epo atluwa, “Kokó halepo hallalo Godtapo pepele di mate ta:lamo mate epo kaula pato mate epame dulu edla ha:ha:lalo alisisi hapuloma mate mimita:puwapo. Epedeme na:tapo ya: hi tle ikadepe koko atlema. Godta ya:ta hali dle koko haloweye podekellowa. <sup>7</sup> Epedeme mosukulu hallalo banakaka oplamita ya: hulu sisilamelepiye, Godtapo ya:ta hemele dinapopo himili kokoye hame haliyamale dla woyamelepe. Godtapo koko iye ya: yu hapo molo atlamalalo so dla ma-atlamuwapo,” duwa.

<sup>8</sup> Epame yuta pepele di tle matle na: watle epo atluwa, “Wa: banakaka oplami ta:la dla epo kaula pato dla dole depo hala dla tame ya: do dulu dla buka gowaladepo elaye hane,” duwa.

<sup>9</sup> Na: epalati tame banakaka oplami dla buka e halowedeme daluwa. Epalati ya:ta asiyama na: watle epo atluwa, “Wa: hame dene. Wa:ta delepiye, wa: mati dla topsiyo some opalli hamilipe. Amasiyama wa:ta dokollopiye, eta wa: dla haka:le hamilipe,” duwa. <sup>10</sup> Epalati na: banakaka oplami tle buka hame ka:yapa douwa oloma edla topsiyo some opaluwa. Amasiyama ma dokollati haka:uwa. <sup>11</sup> Epalati yuta ma na: watle epo atluwa, “Wa: matle ta:lamu meyelo meyelo dle so dla epo yu meyelo meyelo dle yuhalalo so dla epo dokopala so hapuloma dla alotle yia: dla koko wowoyamolowe ya: ma-atlamtane,” duwa.

## 11

### *God tle yu hapame molo atlamalalo so opa dapiyamte*

<sup>1</sup> God ya: banakaka oplamita na: watle ala:lalo dea hamimama epo atluwa, “Wa: tame God ya: aiyalma aya mate epo God dla namkale dle alisisi ha:lalo tile mate tlo ala:ne. Epame edla God dla siyele ta:dlalo so opa hapuloma sesa:ne. <sup>2</sup> Amasiyama aiyalma aya alikili tlo ala:miyo. Adipalati, eye po-Yu sota halepo depame alikili dla pomoluwapo. Yia:tapo edla ha:ha:mama Yelusalem moye 42 mama dulu dla hete dolemha:ha:lepe. <sup>3</sup> Epame na:tapo na: opa dapiyamte ya: taiya dlowepo, yia:ta na: yu hamsiyamelepo depame. Epalati yia:tapo dupa kolle tluka didiyepo 1,260 alila dulu dla God yu atlamsiyamelepe,” duwa.

<sup>4</sup> Opa dapiyamte iwoloye ta:lamu pato God mila:pi tle ha:ha:lalo olipi dali dapiyamte mate epame tuloma dapiyamte mate God yu buka dla atlaye ewolopo. <sup>5</sup> Epapele dulu dla oplami antapo yia: dla wotiyalle hamilowedeme apelepiye, dlapatapo yia: mati tle woyapame ya:ye hamdepo hamastlepe. <sup>6</sup> Epedeme yia: dla itiyamale elapo, yia:ta God yu molo atlamsiyama alila edla tiyota hellala depo himomollowe. Epame yia: dla itiyamale hale elapo, yúye ma omali yeloweye. Epame yia: dla ma itiyamale hale melapo, ta:lamu hema wotiyalle mila:pi meyelo meyelo dle hame yia:ta solotamale oloma dla hampua hampua dloweye.

<sup>7</sup> Opa dapiyamte iwolota God yu atlamsiyamata mogudlati sukulu pa:le munamu dulu tle woyamale ulugiyemale alinepitapo yia: mate opahale demama yia:ye potimelepe. <sup>8</sup> Epame yia: Lod dali yekelemhimili di dla gogodle mo pato edla yia: motota api duka dla dollupe. Epedeme mo pato eye soko tle natilati Sodom mo mate epo Isip mo mate epapele some halapo. <sup>9</sup> Epalati opa hapuloma mo meyelo meyelo dle so mate epo elele meyelo meyelo dle so mate epo yu meyelo meyelo dle so mateta yia: motota 3½ alila dulu dla api duka dla hutiyela natipame hatiliwe allipe. <sup>10</sup> Epame ta:lamu pato dla ha:ha: so hapulomatapo opa dapiyamte iwolota palli koko dla sikemte sisiyemama yimkadulo watle namkale dle alisisi mate asiyama hami asiyama hami demha:ha:lepe. Adipalati, opa dapiyamte iwolota opa hapuloma dla wotiyalle pato hapimha:ha:mduwapo.

<sup>11</sup> Epame 3½ alilata mogudlati Godta ma opa dapiyamte iwolo dla pasakalo halopiwa. Epalati yia:ta sillati yia: natilalo sotapo sikemte yiyelemama wowota:uwa. <sup>12</sup> Epame yuta Pepele di tle yia: dla epo atla daluwa, “Hema mataiya.” Epalati yia:tapo yia: dla opahale dlalo sota me-omha:ha:lati wuala dulu tle Pepele di dla hetauwa.

<sup>13</sup> Yia:ta Pepele di dla hetale oloma edla allutuwale patota tuwa. Epalati mo pato dulu dla mo yemala hatlope tlo batalipo hamastamama 7,000 opaye poyuwa. Epalati opa opi popotimalalo wekele sota koko i natipame wowota:mama Pepele dimo dla hallalo Godta itiyamale dla mikadepe demama ya: dla heodemye uwa.

<sup>14</sup> Epapedeme wotiyalle koko dapahatlope dulu dla dapiyamteye mogudepo. Amasiyama ma itapu a:ma dla ala hatlope me-elapo.

*Banakaka oplamita mosukulu hulu sisilamale*

<sup>15</sup> Mosukulu dla hallalo banakaka oplamita ya: hulu sisilamalati yu itiyamaleta pepele di tle epo atlamyeuwa,

“Watapo ta:lamo pato omhallowe itiyamaleye di God mate ya:ta sale Keliso mate dla me-elapo.

Epedeme Godta ta:lamo pato iye omhalemama sukulu pa:le dulu dla hallepe.”

<sup>16</sup> Epame God mila:pi tle popa:lalo 24 dokopala sota yia: dokopalata ta:la dla heodepo popa:mama God dla siyele ta:demama epo atlamyeuwa,

<sup>17</sup> “Lod God wa: itiyamalepo.

Wa:ye ka:yapa haluwapo epame wata halapo.

Epedeme di wa: hi di dla ta:dema.

Adipalati, ta:lamo pato iye wa:ta itiyamale pato mate omhallowe mo-kotiyamapo.

<sup>18</sup> Ta:lamo so hapulomata kakasilamha:ha:lali

wa:ta kasilamaleta mo-woyamapo.

Epame palli so koko gladlowe alila ma mo-woyamapo.

Epame wa: yu molo atlamalalo so dla wa:ta asiyama hapilowe alilata ma mo-puapo.

Epame mikadepe dle so mate epo wa: hi dla wowota:lalo so hapuloma yimka:sikili mate epo patoto mate dla asiyama hapilowe alila ma mo-puapo.

Epame wa:ta yimkadulo potimalalo so opa poyuluwe alila ma mo-puapo.”

<sup>19</sup> Epame na: God ya: aiyalma aya Pepele dimo dla pollalo kokolomata gowaladepo hallati natiwa. Epame aiyalma aya dulu dla Godta yu itiyapo kokalepo himili aiyalma tókota polla natiwa. Epalati omapla hela:hela:dle mate epo omapla halë mate epame allutuwale mateta woyamuwa. Epame ewalata pepele di tle tiyo some heluwa.

## 12

*A:ya mate ilama mate*

<sup>1</sup> Epalati pepele di dla ulugiyemale kokotapo woyamuwa. Eye a:yatapo sali asipo ya: hete dapiyamteta mama dla dololepo halemama tamili 12 ya: dokopala dla didiyepo hallati natiwa. <sup>2</sup> A:ya iye mopapo koko walena. Epeleye ya:tapo owayemala hamolowedeme wotiyalle natimama ammeluwa.

<sup>3</sup> Epame ma ulugiyemale koko haleta pepele di dla woyamuwa. Eye ilama pato omteka:peleta woyamuwa. Ilama ya: dokopalaye 7. Epame ya: dokopala 7 hema dokopala sota didiyelalo alisisiye didiyepo ha:ha:la natiwa. Epame ilama hema pate 10ta ha:ha:uwa. <sup>4</sup> Epalati ilamatapo ya: tile mate tamili alumale dapahatlope dla heyulati alumale hatlopeta ta:la dla teyuwa. Epame ilamata a:ya mudali dla omhaluwa, ya:tapo owayemala hamalati e yumdlowedeme. <sup>5</sup> Epame a:yata maseyemala mahamalati banakakatapo maseyemala eye Godta hala dla hamame hetauwa. Adipalati, maseyemala etapo ta:lamo pato hapulomaye itiyamale mate omhallalo hallepe.

<sup>6</sup> Epalati ya: waiye dalupa dulu dla Godta ya: mo dinapele dla teletauwa. Ya:tapo edla tame 1,260 alila dulu dla hallati Godta ya:ye woloma omhallepo depame.

<sup>7</sup> Epalati Pepele di dla opahaleta woyamuwa. Epalati banakaka so yia: dokopala oplami Maikolta ya: banakaka so eleme Ilama mate natalimuwa. Epalati asiyama Ilamata ya: banakaka so eleme yia: mate natalimuwa. <sup>8-9</sup> Amasiyama epo opahale dle dulu dla Ilama mate ya: banakaka so mate po-itiyamalalo wekelati Maikoltapo yia:ye Pepele di tle ta:lamo isili dla ka:ka:timuwa. Epedeme ilama pato iye ka:yapa mopowataliya haluwapo. Epame ya:ye ta:lamo so hapuloma elemala natilalo oplamipo. Ya: hi dapiyamte, haleye bataliyapo, epame haleye Saitenpo.

<sup>10</sup> Na: epalati pepele di tle yu teta:le patota epo atla daluwa,

“Wata God ya: mo koko mate epo ya:ta itiyamale mateta dia: dla mo-pualepo. Epame pasakalo gadlowe koko mape dia: watle ma hamilipo. Epedeme watapo Godta sale Kelisotapo dokopala oplami halapo. Adipalati, Saitenye watapo Pepele di tle ma-ka:stalepo. Ya:tapo alila hapuloma mate epo utula:la hapuloma mate God mila:pi tle halemama mikadepe dle so kokoye batalipo atlemhalemduwapo. <sup>11</sup> Amasiyama yia:tapo La:m omali tle epo ka:dle yu yia:ta hamsiyamale tle Saitenye ma-tla:mtauwapo. Epele dulu dla yia: palliwe powowota:mdena.

<sup>12</sup> Epapedeme Pepele dimo mate epame dulu edla ha:ha:lalo so wua: mate sisiyeiya. Adipalati, Saitenye wua: tle ma alikili dla ka:stalepo. Amasiyama ta:lamo dla ha:ha:lalo so mate epo kaula pato dulu dla ha:ha:lalo so mate, wua:ye wolomape! Kokalle koko mate epame upiyele koko mateta wua: dla pulupe. Adipalati, Saitenye wua: dla mo-malalepo. Ya:ye sikemte siyaladle mate sela:lepe. Adipalati, ya: natipo, ya:ta ya: opa elemolowe alilaye pase selemalina.”

<sup>13</sup> Epame Ilamata ya:skamu natitepo ya:ye ta:lamo dla ka:stla natipame ma maseyemala hamale a:yaye hamolowedeme dodolomuwa. <sup>14</sup> Amasiyama a:yatapo Ilama etle dalupa dulu dla teletlepo depame kepili suku dapiyamteye ya: watle halopiwa. Epalati ya:tapo kepili suku e mate dalupa dulu dla hollomtauwa, Godta ya:ye edla sokomoko dapahatlope mate epo mama 6 dulu dla woloma omhallepo depame. <sup>15</sup> Epalati Ilamatapo ya: mati tle aloma pato woyamuwa, yútapo a:ya eye yumatilipo depame. <sup>16</sup> Amasiyama ta:lata a:ya e gademama ya: mati pato mate yúye dokoluwa. <sup>17</sup> Epalati Ilamatapo a:ya dla sikemte siyaladepame tame a:ya yimlala opi dla opahale ta:duwa. A:ya i ya: yimlalaye Godta molo atlale yu dolumha:ha:mama Yesuta imale kokoye sikemte kikitilata hohopo ha:ha:lalo sopo. <sup>18</sup> Epalati Ilamatapo kaula pato peleyama dla haluwa.

## 13

### *Kaula pato dulu tle ulugiyemale alinepita woyamale*

<sup>1</sup> Epalati na: ma ulugiyemale alinepita kaula pato dulu tle haliyamale dla woyammatla natiwa. Ya: dla pate 10 mate dokopala 7 mate ha:ha:uwa. Epalati ya: pate hapuloma dla dokopala sota didiyelalo alisisita ha:ha:uwa. Epalati ya: dokopala hapuloma dla God dla putlomale yu hatitimaleta hutiyeuwa. <sup>2</sup> Na:ta ulugiyemale alinepi natiwa eye moko esemala leped moto epapena. Epalati ya: hete tlo bea aliya hete epapena. Epalati asiyama ya: mati tlo layon mati epapena. Epapeleye Ilamatapo ya: dla itiyamale eluwa hapuloma eye ma ulugiyemale alinepi hema halopiwa. <sup>3</sup> Ulugiyemale alinepi ya: dokopala haleye opata yumili ulu walle halla natiwa. Epalati ta:lamo so hapulomatapo yiyelle mate ya: omha:ha:mama dolumtamaluwa. <sup>4</sup> Epame Ilama dla heodepame ya: dla siyele ta:demyeuwa. Adipalati, ya:tapo itiyamale pato ulugiyemale alinepi dla hamiwa. Epame yia: ma ulugiyemale alinepi dla heodepo sisiyemama epo atlamyeuwa, “Anta itiyamaletapo ulugiyemale alinepita itiyamaleye tla:mtame halema:? Epame antapo ya: mate opahale dlowe ala:ta:?” demyeuwa.

<sup>5</sup> Epame ulugiyemale alinepi dla itiyamale hamiwa, ya:tapo 42 mama dulu dla ya:skamu hamhetamsela:mama God hi dla putlopo atlamsela:lepo depame. <sup>6</sup> Epalati ya:tapo God hi dla putlopo atlemsela:mama Pepele dimo mate epame dulu edla ha:ha:lalo so mate dla putlopo atlemsela:uwa. <sup>7</sup> Epame ya: dla ma itiyamale hamiwa, ya:ta mikadepe dle so dla opahale demhalemama wotiyalle hapimhallowedeme. Epame ya: dla ma itiyamale hamiwa, ya:tapo ta:lamo meyelope meyelope dle hapuloma mate epame opa yu meyelope meyelope dle so mate epo elele meyelope meyelope dle so mateye omhallalo hallowedeme. <sup>8</sup> Epalati ta:lamo so opa hapulomatapo ya: dla heodepame sisiyemha:ha:uwa. Amasiyama ta:lamo ala pomita:plalo hallati Godta opa anawolo hiye Pasakalo Buka dla ma-hatitimuwa, opa ewolota ulugiyemale alinepi dla heodepo posisiyena. Epedeme Pasakalo Buka iye opata yumili La:m tetepo.



<sup>9</sup> Epedeme molo watalo so wua: yu i daliya.

<sup>10</sup> Opa anawoloye amtuwale aya dla hohopo telepe dle hallepiye,  
yia:ye mepo amtuwale aya dla hohopo telepe.

Epame opa anawoloye aipa:ya mate potimelepe dle hallepiye,  
yia:ye mepo aipa:ya mate potimelepe.

Ipapele koko natimama God ya: opatapo mikadepe dle dulu dla woloma kokalepo  
ha:ha:lowe ka:pi.

### *Ta:la dulu tle ulugiyemale alinepita woyamale*

<sup>11</sup> Na: matle ulugiyemale alinepi haleta ta:la dulu tle woyamala natiwa. Ya: pate dapiyamteye La:m pate sepena. Amasiyama ya:ye ilama some yukamalalo. <sup>12</sup> Epedeme ya:tapo ka:yapa kaula dulu tle woyamale ulugiyemale alinepita itiyamaleye hapame itiyamale e mate ta:lamo so hapulomaye ha:ha:msela:uwapo, yia:tapo ka:yapa woyamale ulugiyemale alinepi dla heodepo sisiyelepo depame. <sup>13</sup> Ya:ta epamsela:mama ulugiyemale koko patoto halomsela:uwa. Epame ya:tapo opata omha:ha:lati dlapaye pepele di tle malane dlati maluwa. <sup>14</sup> Epame ya:tapo ta:lamo so opaye elemala natilowedeme ulugiyemale koko hapulomaye halomsela:uwa. Epame ya:tapo ka:yapa woyamale ulugiyemale alinepi ya: mila:pi sepeleye opata dlopi dota mita:plepo depame ha:ha:mhaluwa. <sup>15</sup> Ya: matle itiyamale hapame dlopi dota mita:ple alisisi dla pasakalo hamiwa, ya:tapo yukamelepo depame. Epame dlopi dota mita:ple alisisita yukamalati ya: dla heodepo posisiyelalo wekele soye potimaiya duwa.

<sup>16</sup> Ya: matle ta:lamo so opa hapuloma yimka:sikili mate epo patoto mate, epame alisisi poposatilimale so mate epo alisisi pa:talo so mate, epame asiyama pa:le oko halalo so mate epo yia: dokopala so mateye yia: dowala do dla o yia: daptala dla ulu halomelepo depame ha:ha:limhaluwa. <sup>17</sup> Epapele dulu dla ulu pahalomalalo wekele so dla alisisi hoidlowe mate epo alisisi halomolowe mate dla itiyamale pe-ellowa. Ulu iye ka:yapa woyamale ulugiyemale alinepi ya: hipo, epame ya: hi nambapo.

<sup>18</sup> Wua: koko hema woloma malamaiya. Ka:depo malamalalo oplamitapo ulugiyemale alinepi ya: namba iye sesa:lepe. Adipalati, namba i ya: dulu kokoye oplami hale hita elapo. Epedeme ya: nambaye 666.

## 14

### *144,000 sota sala sale*

<sup>1</sup> Na: matle natilati La:mta Sayon tamali di dla halla natiwa. Epalati 144,000 opata ya: mate ha:ha:la natiwa. Opa iwolo daptala dla La:m hi mate epo ya: A hi mate hutiyuwa. <sup>2</sup> Na: epame pepele di tle utumapita sodle yu sepeleye daluwa. Epame omaplata halë sepele ma daluwa. Epame yu na:ta daluwa eye woiyo taumalalo sota woiyo yulumha:ha: sepele yu some daluwa. <sup>3</sup> Epalati 144,000 sota Godta pollalo mo mate epo pasakalo ha:ha:lalo alisisi dapiyamte dapiyamte dle mate epame dokopala so mate yia: mila:pi tle ha:ha:mama sala amko semha:ha:uwa. Sala iye oplami haletapo malamoloweye po-ala:na. Amasiyama isikimi 144,000 opa yia: tlo sala iye yia:malamana. Opa iwoloye ta:lamo tle Godtapo asiyama mate ma-hohomuwapo. <sup>4</sup> Opa iwoloye wola: mate poha:ha:mdena, epame wola: kapala po-umamdena. Yia:ye ullu pa:talo sopo. Epame yia:tapo La:mta hadima tama:, yia: ma ya: dolumsiyanmdepo. Epedeme opa iwolotapo osalo dulu dla itapu teimale alisisiye hauwalepo God mate epame La:m mate dla hapili alisisi epapele some ha:ha:po. Adipalati, yia:ye Godtapo ta:lamo tle asiyama mate mo-hohomuwapo. <sup>5</sup> Epame yia:tapo yia: mati tle bobokolomale yu po-atlamasemde. Epedeme yia: dla batalimale koko hale pe-elasema.

### *Banakaka so dapahatlopetata atlamale koko*

<sup>6</sup> Epame na: ma di dla natilati banakaka oplamita di dla hollomsela:lati natiwa. Ya:tapo ta:lamo meyelope meyelope dle dla epame elele meyelope meyelope dle so dla epo yu meyelope meyelope dle so dla kokó ellalo ka:dle yuye hamtlowedeme hollomsela:uwa. <sup>7</sup> Epame ya:tapo yu teta:le mate epo atluwa, “God dla wowota:mama hatlo ya: dla siyele ta:diya. Adipalati, alilata mo-umula puapo, Godtapo opa hapuloma koko gladloweye. Godtapo pepele di mate epo ta:lamo mate epame kaula pato mate epame yú matale hapuloma mate mimita:puwapo. Epapedeme hatlo ya: dla siyele ta:diya,” duwa.

<sup>8</sup> Epalati banakaka oplami haleta ya:mkale ko tle dolumtamama epo atluwa, “Babilon mo patoye mo-batalipo hamastauwapo. Adipalati, ya:ta batalimale kokotapo ta:lamo so hapulomaye batalimale dla elemtauwapo,” duwa.

<sup>9</sup> Epalati matle banakaka oplami haleta yimkadulo ko tle tamama yu teta:le mate epo atluwa, “Opa anawolota ulugiyemale alinepi dla epo ya: mila:pi sepele dlopi dota mita:ple dla heodepo sisiyemha:ha:lepiye, yia:ye bobtalimelepe. Epame opa anawolota ulugiyemale alinepi tle ya: do dla o daptala dla ulu halomelepiye, yia: ma bobtalimelepe. <sup>10</sup> Adipalati, yia:tapo Godta kasilamale pato isilako tle yú dlomelepe. Epapele dulu dla opa iwoloye La:m mate epo God ya: banakaka so mateta me-omha:ha:lati dlapa mate ewala teleka:le mateta yia: dla wotiyalle hamilipe. <sup>11</sup> Yia: dla wotiyalle hamilalo dlapaye sumtlowe poya:malamana. Epame ya: namiletapo alila hapuloma dulu dla mepo hetama hallepe. Epedeme wotiyalle dulu edla ha:ha:lalo so dla hedle hale ponatilowa. Adipalati, yia:tapo ulugiyemale alinepi tle ulu halopame ma ya: dla epo ya: mila:pi sepele dlopi dota mita:ple dla heodepo sisiyemha:ha:uwapo. <sup>12</sup> Ipapele koko natimama God ya: opa Yesu dla mikadepe dlalo sotapo mikadepe dle dulu dla woloma kokalepo ha:ha:lowe ka:pi.”

<sup>13</sup> Na: pepele di tle yuta epo pulati daluwa, “Buka dla yu iye ilimane. Wata oloma itle tamalemama mikadepe dle dulu dla ha:ha:mama palli sota sisiyelepe,” duwa. Epalati Hela:dle Sokota asiyama epo atluwa, “Ikadepe, yia: matle wotiyalle ponatilowa, amasiyama aseka hedepo ha:ha:lepe. Adipalati, yia:ta ka:dle koko halomha:ha:lati asiyama Godta yia: watle hamilowedeme dinapele kokotapo yia: dolumsiyamapo,” duwa.

#### *Ta:lamo alisisi hauwallowe koko*

<sup>14</sup> Na: matle di dla natilati wuala kamale natiwa. Epame wuala di dla Opa Yami sepeleta polla natiwa. Ya: dokopala dla dokopala sota didiyelalo alisisi goldta mita:ple asipame aipa:ya haka:lle hampoluwa. <sup>15</sup> Epalati God ya: aiyalma aya dulu tle banakaka oplami haleta puame wuala di dla poluwa oplami watle yu teta:le mate epo atluwa, “Ta:lamo alisisi hapulomaye ma-napo popa:po. Epame alisisi hauwallowe alilata mo-puapo. Epedeme wa: aipa:ya hapame alisisi hauwalene,” duwa. <sup>16</sup> Epalati wuala di dla pollalo oplamitapo ya: aipa:ya hapame ta:lamo alisisi hapulomaye ma-hauwaluwa.

<sup>17</sup> Epalati banakaka oplami haletapo aipa:ya haka:lle mate aiyalma aya Pepele dimo dla pola tle woyamala natiwa. <sup>18</sup> Na: matle God dla namkale dle alisisi ha:lalo tile dla dlapa milalo banakaka oplami natiwa. Ya:tapo aipa:ya hamhallalo banakaka oplami watle yu teta:le mate epo atluwa, “Ta:lamo dla gla:pi dlomoko hapulomaye ma-napo hutiyepo. Epedeme wa: aipa:ya hapame gla:pi dlomokoye hauwalene,” duwa. <sup>19</sup> Epalati banakaka oplamitapo ya: aipa:ya hapame gla:pi dlomoko hapuloma hauwalepame halopo puame dlomoko dala okollalo ita dla kolumuwa. Ita iye Godta kasilamale ita patopo. <sup>20</sup> Epapeleye mo pato alikili dla dlomoko dala okollalo ita dla dlomokoye hete dolemha:ha:lati omalitapo ita etle alowampoluwa. Epo alowampolomama omalitapo aloma pato himiwa, 300 kilomita selemalli epapele, epame ya:ta ga:tulliye oplami maka: oloma epapele dla haluwa.

## 15

### *Banakaka so 7ta mosukulu wotiyalle koko halopo puluwe dla dinapele*

<sup>1</sup> Na: ulugiyemale koko pato haleye omapla di dla natiwa. Epedeme banakaka so 7ta mosukulu wotiyalle koko 7 halopo pula natiwa. Yia:ta halopo pua wotiyalle koko 7 ita puame gudlepiye, Godta kasilamale kokota medla gudlepe. <sup>2</sup> Epame na: ma galasi kaula sepeleta dlapa mate dukumale hallati natiwa. Epo na: matle ulugiyemale alinepi tle ulu pohalalo wekepame ma ya: mate epo ya: mila:pi sepele dlopi dota mita:ple dla posisiyelalo wekele sotapo galasi kaula dla ha:ha:lala natiwa. <sup>3</sup> Yia:tapo Godta yia: watle hapili woiyo yulumha:ha:mama God yu dla salladepo sela:lalo oplami Moses sala mate epo La:m sala mate ipo dodolalimha:ha:uwa,  
“Lod God wa:ye sikemte itiyamana.

Wa:ta koko halomale hapulomaye sikemte patoto epame pta ka:ka:pi.

Wa:tapo ta:lamo hapuloma dulu dla dokopala halapo.

Wa: koko hapulomaye ka:dena epame ikadepe.

<sup>4</sup> Lod, wa: dla powota:lalo wekelalo oplami hale halema:?

Epame wa: dla heodepame sisiyelowwe dla alilalo oplami hale halema:?

Adipalati, hatlo wa: tlope aiyalma ikadepepo.

Ta:lamo so hapulomatapo puame wa: dla heodepame sisiyelepe.

Adipalati, opa hapulomatapo wa:ta ka:ka:dle koko halomale hapulomaye ma-dalemtauwapo.”

<sup>5</sup> Koko ita tame gudlati na: toko ipo natitepo Pepele dimo dla aiyalma aya kokolomata gowaladepo halla natiwa. <sup>6</sup> Epalati mosukulu wotiyalle koko halopo pumulalo banakaka so 7ta aya dulu etle wowoyamala natiwa. Yia:tapo tluka kamkamale didiyepame ma yia: pitako dla gold nosowe didiyele haluwa. <sup>7</sup> Epame pasakalo ha:ha:lalo alisisi dapiyamte dapiyamte dle dulu dla haleta banakaka so 7 dla kokó halepo hallalo Godta kasilamale pasatale isilako 7ye hapiwa. <sup>8</sup> Epalati banakaka so 7tapo wotiyalle koko 7 halopo puale alilata gudlepo depo omhalale alila oloma edla namileta Godta hela:dle tle epame itiyamale tle puame aiyalma ayaye hapo haluwa, oplami haleta tulala depame.

## 16

### *Godta kasilamale isilako 7*

<sup>1</sup> Epame na: matle yu teta:le patotapo aiyalma aya tle banakaka so 7 dla epo atla daluwa, “Wua: tame Godta kasilamale isilako 7ye ta:lamo dla olotimaiya,” duwa.

<sup>2</sup> Epela dalepame itapu hallalo banakaka oplamitapo ya: isilakoye ta:la dla olostauwa. Epalati ulugiyemale alinepi tle ulu halomale so mate epo ya: mila:pi sepele dlopi dota mita:ple dla heodepame sisiyelalo so mate dla sose mate hakopa mateta yulumtauwa.

<sup>3</sup> Epalati matle banakaka oplami haletapo ya: isilakoye kaula pato dla olostauwa. Epalati yútapo ma omali yeuwa. Omali eye palli so omali epapele sepena. Epalati kaula dulu edla pasakalo ha:ha:lalo alinepi hapulomata paliwa.

<sup>4</sup> Epame matle banakaka oplami haletapo ya: isilakoye aloma yú dla epame yú matale hapuloma dla olostauwa. Epalati yúta omali yeuwa. <sup>5</sup> Epalati yú omhallalo banakaka oplamitapo God dla epo atluwa,

“Aiyalma God, wa:ye wata halapo epame ka:yapa haluwapo.

Epame wa:ta koko gladleye pta ka:pi.

<sup>6</sup> Adipalati, bobtalimale so iwolotapo wa: opa mate wa: yu molo atlamalalo so mate yia: omaliye olotimuwapo.

Epapedeme wa: watapo omaliye yia:ta delepo depame hamilipo.

Eye yia: asiyama mate ala:lepo.”

<sup>7</sup> Na: matle God dla namkale dle alisisi ha:lalo tile tle yuta epo atla daluwa,

“Lod God, wa:ye itiyamalepo.

Ikadepe, wa:ta koko gladleye pta ka:pi, koko hale hotale hawa ikadepe.”

<sup>8</sup> Epame matle banakaka oplami haletapo ya: isilakoye sali dla olostauwa. Epalati salitapo sikemte itiyamale mate domama sikemte alemaluwa. <sup>9</sup> Salita sikemte alemale-mama opaye dlapa some hamdlati natipame opata God hi dla putlopo atlamyeuwa. Adipalati, wotiyalle koko hapuloma iye Godta omhallalo halapo. Amasiyama yia: posolotamana, yia:tapo yia: bobtalimale tle heheletipame ma God hala dla puame ya: dla heodemama sisiyelowe.

<sup>10</sup> Epalati ma banakaka oplami haleta ya: isilakoye ulugiyemale alinepita pollalo dla olostauwa. Epalati amtuwaletapo ulugiyemale alinepita omhallalo moye halati opatapo wotiyalle natimama yia: teye yiyelemyeuwa. <sup>11</sup> Epame yia:tapo wotiyalle pato natimama Pepele di dla hallalo God hi dla putlopo atlamyeuwa. Adipalati, sose mate hakopa mate yia: moto dla sikemte yulumyeuwa. Amasiyama yia: posolotamana, yia:tapo yia: bobtalimale tle heheletimolowe.

<sup>12</sup> Epalati ma banakaka oplami haleta ya: isilakoye Yupalates aloma pato dla olostauwa. Epalati aloma patotapo pitauwa, salita matlalo tiyama tle dokopala sota yia: opa elempulupo depame. <sup>13</sup> Epalati bataliya yimlala dapahatlope kwaka sepeleta ilama mati tle epo ulugiyemale alinepi mati tle epame isikimi mala-atlalo oplami\* mati tle wowoyamuwa. <sup>14</sup> Bataliya yimlala iwoloye ulugiyemale koko patoto halomolowe yia:malamana. Epedeme yia:tapo ta:lamo dokopala so hapulomaye yia: opa mate elempulupe, Godta sale alilata umulati God mate opahale dlowedeme. <sup>15-16</sup> Epame bataliya yimlala iwolotapo dokopala so hapulomaye mo hale Hibulu yu mate semama Almagadon demde dla elempuame pomoluwa.

Epedeme wua: daliya! “Na:ta puluweye mo-mateka:pi. Na: uhalalo oplami some pulupe. Epapedeme oplami antapo tluka ma-dinapopo halemama omhallepiye, ya:ye siyelepe. Adipalati, ya:tapo tidali siyapo sela:mama wota:mdiye, ma pe-epapolowa.”

<sup>17</sup> Epalati mosukulu dla hallalo banakaka oplamitapo ya: isilakoye ta:lamo ka: epame Pepele dimo ka: duka di dla olostauwa. Epalati aiyalma aya dulu dla Godta pollalo mo tle yuta epo atluwa, “Koko hapulomaye mo-puame gudepo,” duwa. <sup>18</sup> Epame oloma edla omaplata hela:hela:dle mate epo omaplata halē mate epame allutuwale sikemte pato mateta haluwa. Allutuwale ipapeleye opata ka:yapa ponatimdena. <sup>19</sup> Epalati allutuwale pato ita tumama mo pato Babilonye alumale dapahatlope dla hukulupo ip-ila:uwa. Epame ta:lamo pato dulu dla mo hapulomatapo bobtalimtauwa. Epame oloma edla Godtapo Babilon mo pato ya: batalimaleye powelina. Epedeme Godtapo ya:ta kasilamale isilakoye ya: wadle hamiwapo, ya:ta delepo depame. <sup>20</sup> Epame oloma edla hasu hapulomaye yúta dodokoluwa. Epalati tamali hapulomata illipo tulumhaluwa. <sup>21</sup> Epalati ewala patoto yia:ta upiyele 40 kilogla:m epapeleta tiyo some pepele di tle ta:lamo so opa tama di dla heluwa. Epalati opata wotiyalle koko i natimama God dla putlomale yu atlamyeuwa. Adipalati, wotiyalle koko iye pta pato haluwa.

## 17

### *Duka dla sela:lalo batalimale a:ya mate ulugiyemale alinepi mate*

<sup>1</sup> Isilako 7 halopo ha:ha:lalo so banakaka oplami haletapo puame na: wadle epo atluwa, “Na: mate puane. Epalati na:tapo wa: wadle duka dla sela:lalo batalimale a:ya koko gladloweye nati-iliwepo. A:ya iye aloma pili hapuloma dla hallalopo. <sup>2</sup> Epalati ta:lamo dokopala so hapulomatapo a:ya hema uhalomha:ha:mduwapo. Epalati ta:lamo so hapulomatapo a:ya ita opa uhalomhalale batalimale kokoye kawata yú some dlopame yiyilalimsiyamduwapo.”

\* **16:13:** Isikimi mala-atlalo oplami iye ta:la dulu tle woyamale ulugiyemale alinepipo. (13:11)

<sup>3</sup> Epame banakaka oplamita na:ye Soko tle seme dalupa dulu dla tauwa. Na: edla natilati a:yata ulugiyemale alinepi omteka:pele tama di dla polla natiwa. Ulugiyemale alinepi ya: moto dla God dla putlomale yu ilimaleta hutiyeuwa. Epame ya: dla dokopala 7 mate epame pate 10 mateta ha:ha:uwa. <sup>4</sup> Epalati a:yatapo tluka omteka:pele sikemte ka:ka:dle didiyepo poluwa. Epame ya:tapo mani patota halomale gold alisisi mate epo ewala yimka:sikili ka:ka:dle mate epo moli mate sokolomale didiyepo poluwa. Epame ya:tapo ya: do mate gold isilako hampoluwa. Isilako dulu hema ya:ta opa uhalomhalale batalimale koko mate epame batalimale hapuloma mateta pasatame poluwa. <sup>5</sup> Epame ya: daptala dla hi iye himili haluwa,

Babilon mo pato.

Batalimale hapuloma mate

epo duka dla siyamalalo batalimale wola: hapuloma mate yia: waipo.

Hi i ya: dulu kokoye hemele me-elapo.

<sup>6</sup> Na: epame a:ya ita God ya: opa Yesu koko atlamsiyamale so potimale yia: omaliye sikemte depo yiyilampolla natiwa.

Na: epela a:ya i natipame sikemte yelepame momalamuwa. <sup>7</sup> Epalati banakaka oplamita na: watle epo atluwa, “Wa: adipalati sikemte momalampoloma:? Na: wa: dla a:ya i ya: dulu koko mate epame ya:ta pola ulugiyemale alinepi, dokopala 7 mate epame pate 10 mate halomale, ya: dulu kokoye atlowepo. <sup>8</sup> Wa:ta ulugiyemale alinepi nati iye, ya: ka:yapa haluwapo. Amasiyama wata oloma hema epapele alinepi ma pohalasema. Amasiyama alotle eye sukulu pa:le munamu dulu tle haliyamale dla woyapame ma Dlapa mo dla tullupe. Epalati opa anawolo hiye ta:lamo ala pokotiyamalalo hallati Pasakalo Buka dla pohatitimalalo wekuwa, opa ewolotapo ulugiyemale alinepi i nati-mama yiyellepe. Adipalati, alinepi iye ka:yapa haluwapo. Epame wata oloma hema pohalasema. Amasiyama ya: ma alotle pulupe.

<sup>9</sup> Epedeme ka:depo malamale sotapo koko iye woloma malamelepe. Ulugiyemale alinepi dokopala 7ye a:yata pollalo tamali 7po. <sup>10</sup> Epame ya: dulu koko haleye dokopala so 7po. Dokopala so 7 dulu dla 5ye mo-paliwapo. Epalati haletapo wata oloma hema me-halapo. Amasiyama haleye ala puluwedeme halapo. Amasiyama ya:ta pulupiye, ya: isikimi alila kiyele dla halla pulupe. <sup>11</sup> Epapedeme ka:yapa haluwa ulugiyemale alinepiye wata pohalasema. Amasiyama ma ya:ta namba 8 dokopala oplami hallepe. Epapele tlope ya:ye dokopala so 7 mate sitali hatlopepo. Amasiyama ya:ye alotle Godta batalimelepe.

<sup>12</sup> Epapedeme pate 10 wa:ta natiliye dokopala so 10po. Dokopala so 10 iwoloye ala poha:ha:sema. Amasiyama yia:tapo ulugiyemale alinepi mate alila kiyele dulu dla dokopala depo ha:ha:lepe. <sup>13</sup> Epame dokopala so 10 hapuloma iwolotapo yia:ta mala-male hatlope depame yia:ta itiyamaleye ulugiyemale alinepi dla hamilipe. <sup>14</sup> Epame yia:tapo La:m dla opahale dlepe. Amasiyama La:mtapo ya:ta sesa:le so opa elepame opahale dele dulu dla dokopala so 10ye tla:mtelepe. Adipalati, ya:ye dokopala so hapuloma yia: dokopala oplamipo, epame patoto so hapuloma yia: Lodpo.”

<sup>15</sup> Epame banakaka oplamita ma na: watle epo atluwa, “Batalimale a:yata aloma pili hapuloma dla hallati wa:ta tlamuwa aloma e ya: dulu kokoye ta:lamo meyelo meye-lope dle sopo, epo elele meyelo meye-lope dle sopo, epame yu meyelo meye-lope dle sopo. <sup>16</sup> Epalati wa:ta natiwa ulugiyemale alinepi mate epo pate 10 mateta a:ya dla sikemte elle pato himilipe. Epammama yia:tapo ya: alisisi hapuloma uhalopame ya:ye tidali siyapo pomellepe. Epame ma yia:tapo ya: moye depame ya:ye dlapa dla ka:stlepe. <sup>17</sup> Amasiyama God meyelo opa ewolota malamale dla epapene dlati yia:tapo koko eye halomha:ha:lepe. Epame yia:tapo malamale hatlope depame yia:ta itiyamaleye ulugiyemale alinepi watle hamilipe. Yia:ta epamha:ha:mama Godta atlamale koko



hapulomata wowoyapo gudlepe. <sup>18</sup> Epame a:ya wa:ta natiwa eye ta:lamo dokopala so hapuloma omhallalo mo pato Babilonpo.”

## 18

### *Babilon mo patoye batalipo hamastale*

<sup>1</sup> Epedeme koko ita tame gudlati na: matle banakaka oplami haleta sikemte itiyamale hame pepele di tle malla natiwa. Epame ya:ta hela:dletapo ta:lamo pato mate hela:depo maluwa. <sup>2</sup> Epame ya:tapo sikemte yu teta:le mate epo atluwa,

“Babilon mo patoye mo-batalipo hamastlati  
opata ma mo edla poha:ha:sema. Mo siyapo pomoluwapo.  
Epalati bataliya yimlatapo ma mo edla ha:ha:po.

Epame opata posolotamalalo wekele tea ma edla ha:ha:po.

<sup>3</sup> Adipalati, ta:lamo so hapulomatapo ya: batalimale kokoye kawata yú some mo-dlopo yiyilalimsiyamduwapo.

Epame ta:lamo dokopala so hapulomatapo ya: mate mo-hutiyemduwapo.  
Epame ya: batalimaletapo alisisi aya watalo soye ma-alisisi poposatilimale so dem-  
duwapo.”

<sup>4</sup> Epame na: matle yuta pepele di tle epo atla daluwa,  
“Na: opa, wua: Babilon dulu tle alikili dla woyamaiya,  
wua:tapo ya: mate batalimale koko pahalalo wekelepo depame.

Adipalati, wua:tapo ya: mate batalimale koko halomelepiye,  
wua: mape ya:ta ya: batalimale asiyama wotiyalle halati wua: mate halomelepe.

<sup>5</sup> Ya: batalimale kokotapo kolumhetamama pepele di umula yakomapo.

Epalati Godtapo ya: batalimale asiyama hamiloweye powelisema.

<sup>6</sup> Ya:tapo batalimale koko opa opi dla hamhaluwaye ma asiyama ya: watle hapiya.  
Epame ya:tapo opa opi dla batalimale koko halomhaluwa asiyama ya: watle hapi-  
mama tla:mtame hapiya.

Epame ya:tapo ya: batalimale koko mate opa opi dla kawata yú some ilimhaluwaye  
ma asiyama ya: watle imama tla:mtame iya.

<sup>7</sup> Ya:tapo ya:skamu di dla hamhetamhalemama alisisi pasatepo haluwa,  
e mate ala:le asiyamaye wotiyalle mate dupa kolle mate ya: dla hapiya.

Adipalati, ya:tapo ya:skamu epo atlemduwapo,  
‘Na:ye podupulapi, na:ye dokopala a:yapo. Epedeme dupa kolle kokota na: dla  
populuwa,’ demduwapo.

<sup>8</sup> Epapedeme pakasiyamalalo wotiyalle koko ipapeletapo ya: dla pulupe,  
polowe koko mate epame dupa kolle koko mate epo daya ta:le koko mateta ya: dla  
pulupe.

Epame dlapatapo ya:ye hamdepo hamastlepe.

Adipalati, ya: koko gladlalo Lod Godye sikemte itiyamalepo.”

<sup>9</sup> Epalati ta:lamo dokopala so ya: mate hutiyelalo sotapo dlapata ya: hamdemhala  
namileta hetla natipame ya: yilo dupa kolemmama a:lemyelepe. <sup>10</sup> Epame yia:ta  
ya:ta wotiyalle ha koko e natipame wowota:mama pateka:mu tle omha:ha:mama epo  
atellepe,

“Woiyo, Babilon mo pato ya:mkale!

Wa: pta itiyamale mo haluwapo.

Epapele tlope alila kiyele dulu hema pakasiyamalalo koko gladle kokotapo wa: dla mo-  
woyamapo,” dlepe.

<sup>11</sup> Epame ta:lamo hema alisisi aya watalo sotapo ya: yilo dupa kolemmaha:ha:ma  
a:lemha:ha:po. Adipalati, oplami haletapo ma yia: tle alisisi ipapele pahalomolowa.

<sup>12</sup> Eye goldpo, epame silbapo, epo ka:ka:dle ewala yimlala, epame molipo. Epame

tluka ka:ka:dle mila:pi meyelo pe meyelo pe dle mate, epo dali ullu ka:depo pamalalo mila:pi meyelo pe meyelo pe dle mate, epame alisisi opi mila:pi meyelo pe meyelo pe dle elota mimita:ple, epo dali ka:dleta mimita:ple, epo blons ewalata mimita:ple, epo olita mimita:ple, epame ewala kamaleta mimita:ple. <sup>13</sup> Epame daya dla goudepo dlalo alisisi mila:pi meyelo pe meyelo pe dle mate, epo ka:depo seyamale pamalalo alisisi mate, epame osokolo mate. Epame wain yú mate epame olipi ope mate, epo palawa daya mate, epo bulumkiyawa mate epo sipi aliya mate, epame hos aliya mate epo aliya koa mate, epame asiyama pa:le dla oko halomha:ha:lalo so opa mate.

<sup>14</sup> Epame yia:tapo Babilon watle epo atellepe, “Babilon, ka:ka:dle alisisi wa:ta sikemte solotamalalo hapulomatapo wa: tle mo-haodlepo. Epo wa:ta daya ka:ka:dle demhalemduwa mate epo alisisi pasatepo halemduwa mateta wa: tle mo-pa:po. Epedeme wa: matle alisisi iye ma ilame pohalomolowa,” dlepe. <sup>15</sup> Opa iwolotapo yia: alisisiye Babilon watle halopimha:ha:mama mani sikemte poposatilipo ha:ha:mduwapo. Amasiyama ya:ta wotiyalle hala natipame yia:tapo pateka:mu tle omha:ha:mama wowota:mha:ha:lepe. Epame yia:ta dupa kolle mate a:lle mate ha:ha:mama epo atlamha:ha:lepe,

<sup>16</sup> “Woiyo, Babilon mo pato ya:mkale,  
mo-batalimapo!

Ya:tapo tluka omteka:pele sikemte ka:ka:dle didiyemhalemama  
mani patota halomale gold alisisi mate epo ewala yimka:sikili ka:ka:dle mate epo  
moli mate sokolomale didiyemhalemduwapo.

<sup>17</sup> Epapele tope ya:tapo pakasiyamalalo alila kiyele dla ya: alisisi ka:ka:dle hapuloma  
eye mo-haodlepo.”

Epalati yú koa patoto halopo siyamalalo so mate epo yia: opa mate pateka:mu tle ha:ha:mama Babilon mo omha:ha:lepe. <sup>18</sup> Epo yia:ta Babilon mota hamdemhala dlapa namile patota hetla natipame epo atellepe, “Ta:lamo pato dulu hema Babilon mo pato ipapele hale hawa ikadepe,” dlepe. <sup>19</sup> Epame yia:ta ya: yilo dupa kolle mate a:lemyemama yia: dokopala dla apuputa kukutinyemama epo atlamyelepe,  
“Woiyo, Babilon mo pato ya:mkale,  
mo-batalimapo!

Koa watalo so ditapo ya: alisisi yemha:ha:mama mani patoto halomduwapo.  
Amasiyama alila kiyele dulu hema pakasiyamalalo Godta ya:ye batalipo  
hamastapo,” dlepe.

<sup>20</sup> Amasiyama Pepele di dla ha:ha:lalo so mate epo God ya: opa mate epame Taiya dle so opa mate epo God tle yu hapame molo atlamalalo so mate wua: sisiyeiya. Adipalati, Babilontapo wua: dla wotiyalle hapimhaluwa e ya: asiyama Godtapo ya:ye yumama batalipo hamastapo.

<sup>21</sup> Epalati banakaka oplami hale sikemte itiyamaletapo ewala patoye hame kaula pato duka dla hamastamama epo atluwa,  
“Babilon mo patoye ipo hamastlati ya:tapo matle pohallowa.

<sup>22</sup> Epedeme Babilon, wa: dulu dla opatapo woiyo yu mate  
epo hulu yu mate epo sala sale mate matle podallowa.  
Epame opatapo matle wa: dulu dla oko pohalomha:ha:lowa.  
Epame wa: dulu dla wola:tapo daya ma poyulumha:ha:lowa.

<sup>23</sup> Epame tuloma wa: dulu dla hela:depo ha:ha:mduwatapo  
matle hela:depo ha:ha:la ponatilowa.

Epame opata wola: halomha:ha:mama  
sisiyemha:ha:mduwa yuye matle podallowa.

Epame wa: alisisi aya omha:ha:lalo sotapo ta:lamo pato hema sikemte itiyamale mate  
ha:ha:uwapo.

Epame wa: osolo kokotapo ta:lamo so hapulomaye alikili dla me-eleme tauwapo.

<sup>24</sup> Epapedeme Godtapo Babilon mo dla ya: batalimale asiyamaye ma-hamipo.  
Adipalati, ya:tapo God tle yu hapame molo atlamalalo so mate epame God ya: opa  
mate epame ta:lamo pato dulu dla opa opi mate mo-potimduwapo.”

## 19

### *Godta Babilon mo yumulati opata sisiyele*

<sup>1</sup> Koko ita tame gudlati na: matle Pepele di dla opa hapulomata yuhalë yu epapele  
daluwa. Yia:tapo epo atluwa,  
“God dla sisiyeiya.

Adipalati, pasakalo gadlowe koko mate  
epo hela:dle koko mate epame itiyamale koko mateye hatlo di God tetepo.

<sup>2</sup> Ya:ta koko gladle dulu dla koko hale hotale hawa ikadepe.

Amasiyama ya: isikimi ikadepe koko tle koko glademdepo.

Epapedeme ya:tapo duka dla sela:lalo batalimale a:ya kokoye gladepe  
ya:ye mo-batalipo hamastauwapo.

Adipalati, a:ya i ya: batalimale koko tle ta:la so opa hapulomaye mo-bobtalipame  
God ya: opa ma ya:ta potimduwapo.

Epapele koko tle Godta ya: watile asiyama hamiwapo.”

<sup>3</sup> Epame yia:ta ma epo atluwa,  
“God dla sisiyeiya.

Adipalati, duka dla sela:lalo batalimale a:ya  
hamdemhala dlapa namiletapo alila hapuloma dulu dla di dla hetamhallepe.”

<sup>4</sup> Epalati dokopala so 24ta pasakalo ha:ha:lalo alisisi dapiyamte dapiyamte dle mateta  
Godta pollalo mila:pi tle alumata kellepo popa:mama God dla sisiyele ta:duwa. Epam-  
mama yia:ta epo atluwa,

“Koko eta mepapelepe. Epedeme God dla sisiyeiya.”

### *La:mta a:ya halë dla daya dele koko*

<sup>5</sup> Godta pollalo mo tle yuta epo atluwa,  
“Opa hapuloma patoto mate epo yimka:sikili mate  
anawolotapo God yu dla salladepo siyamama ya: wowota:le mate ha:ha:ma,  
wua: di God hi di dla ta:diya,” duwa.

<sup>6</sup> Na: matle opa alumale patota yuhalë yu sepele mate epo utumapi yu sepele mate  
epame omaplata halë yu sepele mateta yuhamama epo atla daluwa,  
“God dla sisiyeiya.

Adipalati, di Lod Godye sikemte itiyamalepo. Epame ya:tapo di dokopala halapo.

<sup>7</sup> Epedeme ditapo sikemte sisiyemama  
God hi di dla sikemte ta:dlowepo.

Adipalati, La:mta a:ya halowe alilaye mo-puapo.  
Epame ya:lluta ma-dinapopo halapo.

<sup>8</sup> Epame ya:ta asilipo depame  
ya: watile tluka kamale ullu pa:le hamiliye ma asiyame halapo.”

Tluka kamale i ya: dulu kokoye God ya: opata ka:ka:dle koko halomde kokopo.

<sup>9</sup> Epame banakaka oplamita na: watile epo atluwa, “Wa: buka dla yu iye hatitimane.  
‘La:mta a:ya halë daya dele dla pumullupo depame sisilalimale so, wua:ye sisiyeiya.’ ”  
Epame banakaka oplamita matle epo atluwa, “Yu iye ikadepe God ya: yupo,” duwa.

<sup>10</sup> Epalati na:tapo ya: yu dalepame ya: hete sitali isili dla heoduwa, ya: dla siyele  
ta:dlowedeme. Amasiyama banakaka oplamita na: watile atlemama epo atluwa, “Na:  
dla siyele ta:demiya. Adipalati, na: mape God yu dla salladepo sela:lalo oplami wa:  
epapelepo, epame Yesu yu hamsiyamalalo so opa epapelepo. Epedeme wa: hatlo God

dla siyele ta:dene. Epapedeme Yesu koko atlamsiyamalalo soye yia: Hela:dle Sokota itiyamale tle atlamsiyamapo.”

*Hos aliya kamale di dla pollalo oplami*

<sup>11</sup> Na: matle Pepele dita gowaladepo hallati natiwa. Epalati dulu edla oplamita hos aliya kamale di dla polla natiwa. Epeleye opata ya: hi semama ikadepe koko tlo halalo oplami demdepo. Epame ya:ye God ya: oko oplami ikadepe ka:pi demdepo. Epedeme ya:ta koko gladle dulu dla koko haleye pohotasemde. Epame ya:tapo ka:dle koko hame puluwe yilo opahale demdepo. <sup>12</sup> Epame ya: inomaye dlapa teleka:le aloweli epapele some haluwa. Epame ya: dokopala dla dokopala sota didiyelalo alisisiye sikemte wokasepo haluwa. Epame ya: moto dla ya: hi himili haluwa. Amasiyama opa hapulomata hi eye poyia:malamana. Hatlo ya: tlo ya:malamana. <sup>13</sup> Epame ya:tapo tluka omali dla haliyomelleye asiyame poluwa. Epeleye opata ya: hi semama God yu demdepo. <sup>14</sup> Epalati Pepele dimo opahale sota tluka ka:dle kamkamale didiyepo hos aliya kamkamale di dla hetame popa:mama ya: ko tle tamaluwa. <sup>15</sup> Epame ya: mati tle woyamolowe aipa:ya haka:lletapo ta:lamo so opa hapulomaye posalepame yia:ye tla:mtelepe. Epame ya:tapo sikemte itiyamale mate ma yia:ye omhalemama Godta kasilamale ita dulu dla gla:pi dlomoko kolumaleye hete dollepe. <sup>16</sup> Epalati hi itapo ya: tluka dla epo ya: malla dla hutiyeuwa,

“Dokopala so hapuloma yia: dokopala oplamipo,  
epame patoto so hapuloma yia: Lodpo.”

<sup>17</sup> Na: matle banakaka oplami haleta sali dla halla natiwa. Epeleye ya:ta tea hapuloma di dla holoyemsiyamalalo dla yu teta:le mate epo atluwa, “Godta daya dele pato dinapele dlowedeme wua:ta hapulomata puame alumaiya. Adipalati, Godtapo ya: dla opahale dlalo soye potimelepe. <sup>18</sup> Epedeme wua: puame ta:lamo dokopala so palli mo dlomaiya. Epame matle hos aliya palli mo mate epo hos aliya di dla popa:lalo so opa palli yia: mo ma dlomaiya. Epame opa hapuloma patoto mate epo yimka:sikili mate yia: mo ma dlomaiya,” duwa.

<sup>19</sup> Epalati na: ulugiyemale alinepi mate epo ta:lamo dokopala so mateta yia: opaye el-eme alupo ha:ha:la natiwa. Yia:tapo hos aliya kamale di dla pollalo oplami mate epo Pepele dimo opahale so mate dla opahale dlowedeme dinapomha:ha:uwa. <sup>20</sup> Amasiyama opahale dele dulu dla ulugiyemale alinepi mate epo isikimi mala-atlalo oplami mateye hohopame Dlapa kaula dla ka:ka:timuwa. (Isikimi mala-atlalo oplami itapo ulugiyemale alinepi tle ulu halopame ma ya: mila:pi sepele dlopi dota mita:ple dla heodepo sisiyelalo so hapuloma hohomsela:uwa oplami eye ipo.) <sup>21</sup> Epame opa opiye hos aliya di dla pollalo oplamitapo ya: mati tle woyamale aipa:yata potimuwa. Epalati teata puame yia: moye dlomama sikemte susukaluwa.

## 20

*1,000 sokomoko koko*

<sup>1</sup> Na: matle banakaka oplami haleta Pepele di tle malemama sukulu pa:le munamu kokoloma elo sumalalo mate epo oli dea pato mate halopo mallati natiwa. <sup>2-3</sup> Epame banakaka oplami eta Saiten, ka:yapa haluwa ilamaye hampame oli deata yupo sukulu pa:le munamu dulu dla ka:stapame kokoloma eloye sumuwa, ya:tapo 1,000 sokomoko dulu dla halemama ta:lamo soye matle pe-elemala natilalo wekemhallepo depame. Amasiyama 1,000 sokomokota mogudlepiye, banakaka oplamitapo matle ya:ye munamu tle alikili dla hamame woyamelepe, ya:tapo alila kiyele dla ta:lamo soye elemala natimsela:lepo depame.

<sup>4</sup> Na: matle toko ipo natitepo God yu mate epo Yesu Keliso koko mate imsiyamalati opata potimale so yia: soko tlamuwa. Epame matle ulugiyemale alinepi tle yia: do dla epo yia: daptala dla ulu pohalomalalo wekele so yia: soko ma tlamuwa. Yia:tapo

ulugiyemale alinepi mate epo ya: mila:pi sepele dlopi dota mita:ple mate dla heodepame posisiyemdena. Epapedeme yia:ta hapulomatapo ma pasakalo depame dokopala sota popa:lalo mo dla popa:la natiwa. Opa ewolo dla Godta ta:la so opa koko gladlowe itiyamale hamiwa. Epapedeme yia:tapo Keliso mate yimkata 1,000 sokomoko dulu dla ta:lamo ye omha:ha:lepe. <sup>5-6</sup> Epedeme yia: tate palli tle silli so, yia: sisiyelowe ka:pi. Adipalati, soko tle polowe kokota yia: dla populuwa. Epapedeme yia:ta opa ka: epo God ka: duka dla ha:ha:mama Yesu mate 1,000 sokomoko dulu dla ta:lamo patoye omha:ha:lepe. Amasiyama palli so opi hapulomaye yipta posilliwa. Yia:tapo 1,000 sokomokota tame mogudlati edla sillipe.

### *Godta Saitenye Dlapa kaula dla ka:stale*

<sup>7</sup> 1,000 sokomoko ita tame gudlati banakaka oplamitapo sukulu pa:le munamu kokolomaye gowaladlepe, Saitentapo matle ulamatilipo depame. <sup>8</sup> Epalati ya:tapo ta:lamo pato dla tame sela:mama opaye isikimi elemala natimsela:lepe. Epam-sela:mama ya:tapo Gog mo so mate Magog mo so mate elempulupe, God ya: opa mate opahale dlowedeme. Epedeme ya:ta eleme puluwe so opa iwoloye pta pasatana, sesa:lowe po-ala:na. <sup>9</sup> Epeleye opa iwolota puame aya polemama Godta sikemte malahallalo opa mate epo ya:ta sikemte malahallalo mo mateye silliduwa. Amasiyama pepele di tle dlapata malame yia:ye hamdepo hamastauwa. <sup>10</sup> Epame Godta Saitenye hampame ulugiyemale alinepi mate epo isikimi mala-atlalo oplami mateta ha:ha: Dlapa kaula medla ka:stauwa. Epalati yia:tapo edla ha:ha:mama alila mate epo utula:la mate wotiyalle sukulu pa:le dulu dla ha:ha:lepe.

### *Mosukulu alila dla koko gladlowe*

<sup>11</sup> Na: matle dokopala oplamita pollalo kamale alisisi pato di dla Godta polla natiwa. Epalati ta:lamo mate epo pepele di mateta ya: tle mosukulu potlati oplami haleta ma yia: ponatina. <sup>12</sup> Epalati na: palli so hapuloma patoto mate yimka:sikili mateta Godta pollalo mila:pi tle ha:ha:la natiwa. Epame buka hapulomaye gowalagowaladla natitepo Pasakalo Buka mape gowaladepo ella natiwa. Buka opi dulu dla opa hapulomata koko hapuloma meyelo meyelo dle halomha:ha:leye edla hatitimale haluwa. Epalati Godta buka etle ompolomama palli so koko hapulomaye gladuwa. <sup>13</sup> Epapedeme kaula pato dulu dla palli so hutiyetapo matle haliyamale dla wowoyamuwa. Epalati palli so opi poloweta hohopo ha:ha:le so mate epame powame tame ha:ha:lalo mota hohopo ha:ha:le so hapuloma mape haliyamale dla wowoyamuwa. Epalati Godtapo yia:ta halomha:ha:le koko hapulomaye buka tle ompolomama yia: kokoye gladuwa. <sup>14</sup> Epame polowe mate epo powame tame ha:ha:lalo mo mateye Dlapa kaula dla ka:ka:timuwa. Epedeme Dlapa kaula iye soko tle polowe kokopo. <sup>15</sup> Epame Pasakalo Buka dla hi pohutiyelalo wekele so opa hapulomaye Dlapa kaula dla ka:ka:timuwa.

## 21

### *Pepele di amko mate ta:lamo amko mate*

<sup>1</sup> Na: matle pepele di amko mate ta:lamo amko mate tlamuwa. Ka:yapa haluwa ta:lamo mate epo pepele di mateta ma-hawa hallati kaula pato mape ma-hawa haluwa. <sup>2</sup> Epalati na: toko ipo natitepo ullu pa:le mo Yelusalem amkota Godta hala mo tle malla natiwa. Ya:tapo a:ya ipilalota ya:wolali halowedeme tluka ka:pi dinapopo pumdiye, epo malla natiwa. <sup>3</sup> Epalati Godta pollalo mo tle yu sikemte teta:le mate epo atla daluwa, "Watapo God ya: ayaye opa dulu dla mo-polapo. Epedeme ya:tapo yia: mate hallepe. Epame opa iwolo mape ya: opapo. God meyelo yia: mate hallepe. Adipalati, ya:ye yia: Godpo. <sup>4</sup> Epame ya:tapo ya: opa inoma dulu dla kaiyo hapulomaye hihiyollepe. Epame oloma edla polowe koko ma hawa hallepe. Epame dupa kolle koko mate epame



a:lle koko mate epame wotiyalle koko mateta medla pa:lepe. Adipalati, takala koko hapulomatapo mosukulu mo-pa:po.”

<sup>5</sup> Epame Godtapo ya:ta pollalo dla polomama epo atluwa, “Wua: natiya. Na:tapo koko hapulomaye ma amko depo.” Epame ya: matle epo atluwa, “Wa: buka dla koko iye hatitimane. Adipalati, yu iye ikadepepo,” duwa.

<sup>6</sup> Epame ya: matle na: watle epo atluwa, “Koko hapulomaye wata medla puame gudupo. Na:ye kotiyamale mate epo sukulu matepo. Epame na:ye sitali mate epo pupulu matepo. Epedeme yú ta:msela:lalo oplami dla na:tapo pasakalo yú matale tle asiyama pa:le isikimi tipo hamilowepo. <sup>7</sup> Epame oplami antapo mikadepe depo halemama kokalepo hallepiye, ya:tapo koko hapuloma iye halomelepe. Epame na:tapo ya: God hallati asiyama ya:tapo na: maseyemala depo hallepe. <sup>8</sup> Amasiyama God yu dla wowota:le so mate, epo God yu dalla alli so mate, epame ullu watalo so mate, epo yimkadulo potimalalo so mate, epame wola: mate opa mate uhalomalalo so mate, epo yimkadulo popolotimalalo so mate, epame biskapa god dla sisiyelalo so mate, epame mala-atlamalalo so mateye hohopame Dlapa kaula dla ka:ka:timelepe. Dlapa kaula iye soko tle polowe kokopo.”

### *Yelusalem mo amko*

<sup>9</sup> Mosukulu wotiyalle hampulalo isilako hohopo ha:ha:lalo banakaka 7 dulu dla banakaka oplami haleta na: watle puame epo atluwa, “Na: mate puane. Na:tapo wa: watle La:m ya:lluye nati-iliwama,” duwa. <sup>10</sup> Epame ya:tapo na:ye Soko tle tamali di ikadepe dla semhetauwa. Epame edla ya:tapo na: watle ullu pa:le mo Yelusalemta Godta hala mo tle malla nati-iwa. <sup>11</sup> Mo itapo Godta hela:dle mate malemama dom-maluwa. Epame ya:ta hela:hela:dleye mani pato mate halalo ewala yemala yasepa demdiye epapele some haluwa. <sup>12</sup> Epame ya: kosukulliye pta pato epame pta di ikadepe. Epame kosukulli kokoloma 12 dla banakaka so 12ta omha:ha:uwa. Epame kokoloma 12 hema Isael so elele 12 hita hutiyeuwa. <sup>13</sup> Epalati kokoloma dapahatlopeta salita matlalo tiyama dla ha:ha:, epame salita tullalo tiyama dla kokoloma dapahatlopeta ha:ha:, epame bukopa seme dla kokoloma dapahatlopeta ha:ha:, epame seme dla kokoloma dapahatlopeta ha:ha:demtauwa. <sup>14</sup> Mo kosukulli pato eye ewala 12 tama di dla kosukulli haluwa. Ewala 12 hema La:m ya: Taiya dle so 12 opa hita hutiyeuwa.

<sup>15</sup> Na: mate yukamhaluwa banakaka oplamiye ala:lalo gold dea hame haluwa, meyelo tame mo mate epo mo kosukulli mate epame kokoloma mate ala:lowedeme. <sup>16</sup> Epame banakaka oplamita mo ikadepeta ta:le ala:uwaye ipapele haluwa. Mota selemalliye 2,400 kilomita epapele haluwa, epame mota popolalle mape 2,400 kilomita epapele haluwa. Epame di mape 2,400 kilomita epapele haluwa. <sup>17</sup> Epame banakaka oplamita mo alikili tle kosukullita deiyamale ala:uwaye 66 mita epapele haluwa. Ya:ta ala:lalo dea hame sela:uwa iye wata dita hame ha:ha: ala:lalo dea i mate hatlopepo.

<sup>18</sup> Mo kosukulli iye yasepa ewalata kosukulli haluwa. Amasiyama mo pato tlo sikemte galasi some hela:lle gold ewalata halë haluwa. <sup>19</sup> Epalati kosukulli pato i hamame hallalo ewala 12 patoto hatitimaleye mani patota halomale ewala yimlala yimka:sikili mate ka:pi dinapele haluwa. Epedeme ewala patoto dulu edla itapu pollalo ewalaye Yasepa ewalapo. Epalati medla pollaloye Sapaya ewalapo. Epame medla pollaloye Aget ewalapo. Epalati medla pollaloye Emelal ewalapo. <sup>20</sup> Epame medla pollaloye Saldoniks ewalapo. Epame medla pollaloye Kaneliya ewalapo. Epalati medla pollaloye Kilisolait ewalapo. Epame medla pollaloye Belol ewalapo. Epame medla pollaloye Topas ewalapo. Epalati medla pollaloye Kilisopes ewalapo. Epame medla pollaloye Yasin ewalapo. Epame mosukulu dla pollaloye Ametis ewalapo.

<sup>21</sup> Epalati kokoloma 12ye moli 12 mate mimita:pena. Epapele dulu dla moli hatlo pato mita:pleta kokoloma hatlo dla hala hala demtauwa. Epalati mo dulu edla api pato eluwaye gold ewalata mita:pemama sikemte galasi some hela:lemeluwa.

<sup>22</sup> Amasiyama mo dulu edla aiyalma aya tlo ponatina. Adipalati, sikemte itiyamale Lod God mate La:m mateta mo edla yia:tapo aiyalma aya depo ha:ha:po. <sup>23</sup> Epame mo edla salita hela:dle mate epo mamata hela:dle mate ma posolotamasema. Adipalati, God ya: hela:dletapo mo pato eye hela:depo hallepe. Epalati La:mtapo mo e ya: tuloma hallepe. <sup>24</sup> Epalati ta:lamo so hapulomatapo hela:dle dulu edla siyamelepe. Epalati ta:lamo dokopala sotapo yia: alisisi ka:ka:dle hapulomaye halopo mo pato edla pumullupe. <sup>25</sup> Epalati mo pato kosukulli dla kokoloma hapuloma ha:ha:ye pogogodemha:ha:lowa. Adipalati, mo edla amtuwaleye hawa hallepe. <sup>26</sup> Epame mo dulu edla ta:lamo alisisi ka:ka:dle poposatilimale koko hapulomaye halopo pulupe. <sup>27</sup> Epame mo dulu edla batalimale koko haleye pohame tuluwa. Epame batalimale koko halomalalo so mate epo mala-atlamalalo so mate mo edla potuluwa. Amasiyama La:m ya: Pasakalo Buka dla opa hi hutiyelalo so siyapota mo dulu edla tulupe.

## 22

<sup>1-2</sup> Banakaka oplamitapo matle na: watle pasakalo hapimhallalo alomaye nati-iwa. Aloma i ya: yúye sikemte alisiyamana. Epalati ya: huye God mate La:m mateta popa:lalo mo tle kotiyapo api pato mo duka dla ellalo alikili tle polomyeuwa. Epalati aloma pili seme mate seme mate dla pasakalo hapilalo dlomoko dalita ha:ha:uwa. Yia:tapo mama hapuloma dulu dla dlomoko milimha:ha:mde. Epalati yia: upatapo opaye ka:ka:demde. <sup>3</sup> Mo edla opata matle Godta kasilamale dulu dla poha:ha:lowa. Epalati God mate epo La:m mateta popa:lalo moye mo dulu edla hallepe. Epalati God ya: opatapo ya: dla heodepo sisiyemha:ha:lepe. <sup>4</sup> Epame yia:tapo God mila:pi ikadepeye natimha:ha:lepe. Epalati ya: hitapo yia: daptala dla hutiyelepe. <sup>5</sup> Epame mota matle po-amtumhallowa. Epame opata tulomata hela:dle mate epo salita hela:dle mate matle posolotamha:ha:lowa. Adipalati, Lod Godta meyelo mo edla hela:dle hamilalo hallepe. Epalati God ya: opatapo kokó ha:ha:lalo dokopala so depo ha:ha:lepe.

### *Lod Yesu wa: puane*

<sup>6</sup> Banakaka oplamita matle na: watle epo atluwa, “Yu iye ikadepepo. Epedeme Lod Godtapo ya: banakakaye tane dlepo, ya:tapo ya: opa watle amile dla wowoyamolowe kokoye imelepo depame. Ya:ye ya: yu molo atlamsiyamalalo so dla ya: Hela:dle Soko hamilalo Godpo,” duwa.

<sup>7</sup> “Epedeme wua: daliya. Na:ta puluwe alilaye mo-mateka:pi. Epapedeme oplami antapo buka dulu hema yu hutiyeye kikitilata hamame halemama dolumhallepiye, ya:ye siyelepe.”

<sup>8</sup> Na:ye Yonpo. Na:tapo koko hapuloma iye natipame daluwapo. Banakaka oplamita na: watle koko iye nati-imhalepo gudlati na:tapo ya: hete sitali dla tulume heodepo poluwa, ya: dla siyele hamilowedeme. <sup>9</sup> Amasiyama banakaka oplamita na: watle epo atluwa, “Na: dla siyele ta:demiya. Adipalati, na: mape God yu dla salladepo sela:lalo oplami wa: epapelepo, epame God tle yu hapame molo atlamalalo so opa epapelepo, epame buka ita atla yu dla dolumsiyamalalo so opa epapelepo. Epedeme wa: hatlo God dla heodepo siyele hamine,” duwa.

<sup>10</sup> Epame ya:ta na: watle atlemama epo atluwa, “Buka dulu hema molo atlale yu hutiyeye hemele hahatiyomiya. Adipalati, koko hapuloma ita wowoyamolowe alilaye mo-mateka:pi dla puapo. <sup>11</sup> Epedeme batalimale koko halomhallalo oplamitapo batalimale koko dulu medla me-hallepe. Epame ullu walle oplamitapo ullu dulu dla me-hallepe. Epame ka:ka:dle koko halomalalo oplamitapo ka:ka:dle koko tlo me-halomhallepe. Epame aiyalma depo ha:ha:lalo sotapo mepo aiyalma depo ha:ha:lepe,” duwa.

<sup>12</sup> “Epedeme wua: daliya. Na:ta puluwe alilaye mo-mateka:pi. Na:tapo opa hapulomata halomha:ha:le mate ala:le asiyamayeye halopo pulupe. <sup>13</sup> Na:ye kotiyamale mate

epo sukulu matepo. Epame itapu mate epo alo matepo. Epame sitali mate epo pupulu matepo.

<sup>14</sup> Epedeme tluka howahalopo ha:ha:lalo so, wua:ye sisiyeiya. Adipalati, wua: dla itiyamale elapo, wua:ta pasakalo dlomoko dali tle dlomoko dlalipo dloweye. Epame mo kosukulli kokoloma tle mo dulu dla ulatuluweye wua: dla itiyamale ma melapo. <sup>15</sup> Amasiyama esemalata koko halomalalo epapele so mate, epo yimkadulo popolotimalalo so mate, epo wola: mate epo opa mate uhalalo so mate, epo yimkadulo potimalalo so mate, epo biskapa god dla sisiyelalo so mate, epo mala-atlamalalo so mateye mo dulu edla potulalo, isikimi alikili tle ha:ha:lepe.

<sup>16</sup> Na:ye Yesupo. Na:tapo na: banakaka oplamiye wua: dla tane duwapo, ya:tapo sos dulu dla ha:ha: so wua: watle koko hapuloma iye bobotimatimelepo depame. Na:ye Deibidi ya: mamapo. Epame ma alalem-matlali tamili kodlopa patota matame polomdiye e na:po.”

<sup>17</sup> Epalati Hela:dle Soko mate epo La:m ya:llu mateta epo atlema, “Yesu puane.” Epedeme yu i dallalo so hapulomatapo yia: ma atlemama, “Yesu puane,” dlowe ka:pi. Epapedeme yú ta:msela:lalo oplami wa: puame pasakalo hamilalo yúye asiyama pa:le isikimi me-tipo dene.

<sup>18</sup> Epedeme buka hema yu hutiye i dallalo so opa wua: koko iye woloma daliya. Oplami antapo yu hema yu opi mate babadlepiye, Godtapo buka dulu hema wotiyalle koko atlaye ya: watle hamilipe. <sup>19</sup> Epame oplami antapo buka dulu hema yu hutiye opiye hiyotimelepiye, Godtapo ya:ta pasakalo hamilalo dlomoko dali tle dlomoko dowahame dloweye aiyalma himilipe. Epame ya:tapo Yelusalem mo amko dulu dla tuluwe api ma himomellepe.

<sup>20</sup> Epedeme koko hapuloma iye haliyamale dla bobotimatimalalotapo epo atlapo, “Ikadepe, na:ta puluweye mo-mateka:pi.” Yao, Lod Yesu, wa: mo-puane.

<sup>21</sup> Lod Yesuta bokotiyapo malamaletapo opa hapuloma mate dla ellepe. Eye ikadepepo.